


Mejəwey-mey
Mawiya



Mofu-Gudur: Mejəwey-mey Mawiya New Testament

Mejəwey-mey Mawiya
Mofu-Gudur: Mejəwey-mey Mawiya New Testament
Le Nouveau Testament en langue Mofu-Gudur
(Cameroun)

copyright © 2007 Wycliffe Bible Translators, Inc.

Language: (Mofu-Gudur)

Contributor: Aramaic Bible Translation, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source files dated 29 Jan 2022

2b021919-36cf-59da-a35f-10c5e5548811

Contents

Matiye	1
Mark	96
Luk	156
Jan	253
Slëra ŋga Ndøhay Meslørey	324
Rawma hay	415
1 Kwarinti hay	461
2 Kwarinti hay	503
Galat hay	532
Efez hay	549
Følepi hay	565
Kwalaws hay	576
1 Tesalawnik hay	588
2 Tesalawnik hay	598
1 Timawte	604
2 Timawte	617
Tit	626
Filemanjw	632
Hebøre hay	635
Jak	669
1 Piyer	681
2 Piyer	694
1 Jan	702
2 Jan	713
3 Jan	715
Jud	717
Cek ma wuzar a Jan	722

**Mey-maaya-mawiya masa
Matiye
ma wuzlala
Mey da ray
Mey-maaya-mawiya masa Matiye
ma wuzlala**

Matiye a wuzlala Mey-maaya-mawiya na, gweegwe letek ta masa Mark leŋ Luk ma wuzlalamara. Ata tabiya a wuzlalam:

- mey da ray Jan-Baptis ma zelta ndəhay nga mbəfdamara menjey ata
- mey da ray baptem nga Yesu
- mey da ray bay-malula ma wufey nga bata Yesu daa masa anŋa fa key daliyam da wuzlah-ley
- mey da ray Yesu ma zla sləra anŋa daa hwayak ngab Galile
- mey da ray Yesu ma daw aa berney nga Jeruzelem
- mey da ray meməcey nga Yesu da Jeruzelem
- mey da ray masləkdawa nga Yesu daa meməcey

Matiye na, anŋa ndaw ma cakala budaw nga ngwamna nga Rawm. Ama Yesu a zəla nga səpa. Da ray nŋene, ta', a mbəkda sləra anŋa, a daw asiya. Ara ndaw da wuzlah gula hay nga Yesu kuraw a ray a cew.

Matiye a wuzlala dərewel anŋa na, ngada ndəhay Jəwif hay. A zla dərewel anŋa na, ta mezəley nga ndəhay daa səkway nga Yesu amba a wuzda Yesu aa daa səkway nga Abəraham. Aa guzley da ray mayawa nga Yesu. A wufey amba Jəwif hay a səmara fara fara Yesu na, ara ndaw masa Gazlavay ma wala nga ləhdata ndəhay daa mebərey, asaya, amba a səmara ara anŋa masa ndəhay maa guzlam da ray a daa Mejəwey-mey Magurma.

Matiye ta wuzleley mey la ga masa Yesu maa guzlda. Daa fasəlawal 5 haa 7 na, ara mey masa Yesu ma wuzda da anŋwa. Daa fasəlawal 13 mey-menŋey hay daha ta meesərkedey hay mekele mekele da ray mewey nga Gazlavay da ray ndəhay. Daa fasəlawal 24 ta 25 ara mey da ray menjey nga ndəhay nga Yesu daa masa ata fa səkwmaran anŋa ma da vəhwa nga zəma bay anŋa.

Daa mezley nga dərewel e, mey mawuzlalakaya da ray Yesu daha, a ləvey: «A da zəlmara Emanəwel, anda meləvey, Gazlavay aa ta aləkwa.» (1.23) Daa mendəvey a, Matiye a wuzleley mey da ray Yesu ma ləvey: «Səmara,

yah na, yah ta akwar mandaw mandaw haa mendəvey nga bəla.» (28.20)

Daa dərəwel e keđe na, mey mekele mekele daha nga vəley gədan a ndəhay:

Mey da ray maaya nga Gazlavay da ray ndəhay (5.3-10)

Sləra masa Yesu ma vəldatara a gula anğa hay nga key (28.19-20)

Mezley nga səkway nga Yesu Kəriste

(Luk 3.23-38)

¹ *Yesu *Kəriste na, ara səkway nga Bay *Davit. Davit e may, a yawa daa səkway nga *Abərahəm. Ndəhay daa səkway nga Yesu Kəriste he na, a zley ta Abərahəm.

² Abərahəm a na, anğa papaŋ nga *Izak.

Izak may, papaŋ nga Jakwap.

Jakwap, papaŋ nga ata Juda ta məlmaha hay.

³ Juda, papaŋ nga ata Fares ta Zerah ma yatərwa ta ngwas anğa mezəley Tamar.

Fares, papaŋ nga Esraŋw.

Esraŋw, papaŋ nga Aram.

⁴ Aram, papaŋ nga Aminadap.

Aminadap, papaŋ nga Naasaŋw.

Naasaŋw, papaŋ nga Salmaŋ.

⁵ Salmaŋ, papaŋ nga Bəwaz ma yarawa ta ngwas anğa *Rahap.

Bəwaz, papaŋ nga Awbet ma yarawa ta ngwas anğa Rut.

Awbet, papaŋ nga Jese.

⁶ Jese, papaŋ nga Bay Davit.

Davit e na, anğa papaŋ nga Salamaŋw. Mamaha ta key ngwas nga Uri la.

⁷ *Salamaŋw, papaŋ nga Rabəwam.

Rabəwam, papaŋ nga Abiyah.

Abiyah, papaŋ nga Asaf.

⁸ Asaf, papaŋ nga Jawzafat.

Jawzafat, papaŋ nga Jəwaram.

Jəwaram, papaŋ nga Awziyas.

⁹ Awziyas, papaŋ nga Jəwatam.

Jəwatam, papaŋ nga Akaz.

Akaz, papaŋ nga Ezekiyas.

¹⁰ Ezekiyas, papaŋ nga Manase.

Manase, papaŋ nga Amaŋw.

Amaŋw, papaŋ nga Jawziyas.

1:1 1.1 Rm 1.3-4; 2Tm 2.8; Mt 20.30-31 **1:2** 1.2 MC 21.2-3; 25.26; 29.32-30.24

1:3 1.3 MC 38.29-30; Rut 4.18-22 **1:5** 1.5 Rahap: Jes 2.1-24; Rut ta Bəwaz:

Rut 1-4 **1:6** 1.6 2Sam 11-12 **1:7** 1.7 1Mev 11.31-13.23 **1:8** 1.8 2Mev

13.23-21.20; 26.1 **1:9** 1.9 2Mev 26.1-28.27 **1:10** 1.10 2Mev 29.1-33.25

11 Jawziyas, papan̄ nga ata Yekwaniya ta məlmaha hay,
a yatərwa daa masa ndəhay daa hwayak nga *Babilan̄w
lan̄w

ma həlmata *Israyel hay aa hwayak ata.

12 Fa dəba ha masa ata ma həlmata la a Babilan̄w a na,
Yekwaniya a yawa Salatiyel.

Salatiyel, papan̄ nga Zarubaabel.

13 Zarubaabel, papan̄ nga Abiyut.

Abiyut, papan̄ nga Eliyakim.

Eliyakim, papan̄ nga Azawr.

14 Azawr, papan̄ nga Sadakw.

Sadakw, papan̄ nga Akim.

Akim, papan̄ nga Eliyut.

15 Eliyut, papan̄ nga Eliyazar.

Eliyazar, papan̄ nga Matan̄.

Matan̄, papan̄ nga Jakwap.

16 *Jakwap, papan̄ nga *Jawzef, zel nga *Mari

ma yarawa Yesu ma zəlmara Kəriste, anda meləvey,

ndaw masa Bay *Gazlavay ma wala nga ləhdata
ndəhay.

17 Anda kefe, dəga fa Abəraham haa kasl fa Davit na,
dedeŋ nga dedeŋ hay kuraw a ray a məfad. Dəga fa Davit
e may haa kasl ta pas masa ata ma həlmata Israyel hay a
Babilan̄w na, dedeŋ nga dedeŋ hay kuraw a ray a məfad.
Yaw, dəga ta pas a ŋgene kasl fa mayawa nga Kəriste na,
dedeŋ nga dedeŋ hay kuraw a ray a məfad saya.

*Mey da ray mayawa nga Yesu Kəriste
(Luk 2.1-7)*

18 Ehe cəndamara mey da ray mayawa nga Yesu *Kəriste.
*Mari mamaha na, ara kwakwa nga *Jawzef. Daa masa
Jawzef ta la Mari a way an̄ga daa ba aran̄ na, Mari ta
key hwaď sem ta gədan̄ nga *Mesəfney nga Gazlavay.

19 Jawzef, man̄gasl nga Mari na, ara ndaw maaya ta len̄gesl.
Daa masa aa ma cənda Mari ta key ta hwaď sem na, a wuďey
a par hwaray fa dey nga ndəhay ba. Da ray ŋgene, a wulkey
nga mbəkda kwakwa an̄ga, ama a wuďey nga mbəkda na,
kwa ndaw a səra mey a ba. 20 Daa masa Jawzef fa wulkey da
ray mey a na, *maslan̄ nga Bay Gazlavay da vad ta', a sawa
a ray a, aa guzlar daa mesəfney, a ləvar: «Jawzef, səkway
nga *Davit, ka da zluřey nga la kwakwa akah Mari ba, maja
a key ta hwaď ŋgene na, ara ta gədan̄ nga Mesəfney nga
Gazlavay. 21 A yawa bəzey mezəle la, ka da par mezəley

Yesu, maja a da lèhdata ndèhay anɗa hay daa meɓeɓey ata hay.»

²² Cek aha keɗe cɓpa ta key la anda Gazlavay maa guzlwa zleezle ta mey *ndaw ma tɔla mey anɗa, ma lɔvey:

²³ «Nɔka taw! dam-sabara a key ta hwaɗ la manjar zel, a da yawa ɓɛzey mezɔle.

A da zɔlmara Emanɔwel»,

anda melɔvey, Gazlavay aa ta alɔkwa.

²⁴ Jawzef a slɔkɗey daa ɗar, fa dɔɓa ha a ka anda maslan ɗa Bay Gazlavay ma lɔvar heyey. Leɗ! a la kwakwa anɗa Mari a way, ²⁵ ama ta cɔmam cew e daa ba, haa kasl mayawa ɗa ɓɛzey a. Jawzef a par mezɔley Yesu.

2

Mey da ray ndèhay ma sɛra mey da ray wurzla hay

¹ Yesu a yawa da Betɔlehem daa hwayak ɗa *Jude, daa masa *Herawt anɗa bay ɗa hwayak a. Fa dɔɓa ɗa mayawa anɗa, ndèhay ma sɛra mey da ray wurzla hay a samawa ta da wurza aa berney ɗa *Jeruzelem. ² Aa cɔɗɗamara, a lɔvam: «ɓɛzey masa ata ma yamɔrwa ma da key bay ɗa *Jɔwif hay heyey na, anɗa dama? Ya ta hɔtmɔrwa wurzla anɗa la ma bawa ta da wurza. Anda keɗe, ya samawa na, amba ya ragadamar.»

³ Bay Herawt ma cɔnda mey a keɗe na, rav anɗa a jɔvey ga, asaya, ndèhay daa berney ɗa Jeruzelem tabiya rav a jɔvtar may. ⁴ Ta', a zɔltɔrwa *bay-ray hay ɗa ndèhay ma ka kwakwas ɗa Gazlavay, ta ndèhay maa sɔrkada *kwakwas ɗa Mawiz, aa cɔɗɗata, a lɔvtar: «*Kɔriste, ndaw masa Gazlavay ma wala ɗa key bay na, a da yawa dama?»

⁵ A mbɔɗɗamara, a lɔvmar: «A da yawa da Betɔlehem daa hwayak ɗa Jude. Ya sɔrmara maja *ndaw ma tɔla mey ɗa Gazlavay ta wuzleley la da ray a zleezle, a lɔvey:

⁶ «Akwar, ndèhay da Betɔlehem daa hwayak ɗa Jude na, slala akwar aa mahura da wuzlah slala hay

mahura hay da Jude,

maja ara da slala ha ɗgene yah ma da bawa bay

ma da nɔkey dey fa ndèhay aɗaw hay Israyel hay.»

⁷ Fa dɔɓa ha, Bay Herawt a zɔltɔrwa ndèhay ma sɛra mey da ray wurzla hay heyey ta mayal a, amba aa cɔɗɗata wurzla ha a bawa na, ta pas wura. ⁸ Ta', a slɔrdata a Betɔlehem, a lɔvtar: «Diyam a Betɔlehem, sɔpmara ɓɛzey a ta dɔk-vaw. Da masa akwar ma hɔtmɔrwa la na, ka samawa, ka wuzdamiwa, amba ya daw, ya ragadar may.»

⁹ Ndəhay a ma cəndamara mey ɲga bay a cay na, ta', a diyam. Masa ata daa cəved na, a hətmar wurzla masa ma bawa ta da wurza heyey fa daw fa mey ata. Wurzla ha fa daw fa mey fa mey, a wusey kasl aa slam masa bəzey mecəhe anɲa da hwaɖ a heyey na, deɲ! a lecey a ray way a. ¹⁰ Masa ata ma hətmar wurzla malacakaya heyey na, aa səmam ga, ara mey ba. ¹¹ A wusam aa slam aha, ta', a mbəzam aa way a, a hətfamar bəzey a ta mamaha *Mari. A həlmamara, a ragadamar. Cay, ta', a pəskamata gabal ata hay, a vəlmar cek hay ma həɖkam ba. A vəlmar bərey mewedey pəlɲged pəlɲged ta matəway ɲga wudez mezey maaya, leɲ slalak mezey maaya mezəley «*mir». ¹² Fa dəba ha, mesəfney a katar. Daa mesəfney a na, Gazlavay a kətata ɲga diyam ta fa Bay Herawt saba. Maja ɲgene, ta', a lam cəved mekele ɲga vəhey aa hwayak ata.

Ata Jawzef ta Mari a hwam aa hwayak ɲga Ejip

¹³ Daa masa ndəhay ma səra mey da ray wurzla hay heyey ma diyam sem na, ta', *maslan ɲga Bay Gazlavay a wuzar vaw a *Jawzef daa mesəfney, a ləvar: «Sləkɖey, la bəzey, hwam ta mamaha aa hwayak ɲga *Ejip. Njamawa fetede, haa kasl pas masa yah ma da ləvkwar ɲga vəhwa, maja Bay *Herawt a da səpa bəzey a amba a kəɖa vagay.»

¹⁴ Masa Jawzef ma cənda mey a keɖe la na, pərta! a sləkɖey, leɲ! a la bəzey a, a səhwam ta maman ɲga bəzey a dasi tavaɖ a ɲgene a Ejip. ¹⁵ A njamawa fetede haa kasl meməcey ɲga Bay Herawt. Cek aha ta key la anda Gazlavay maa guzley ta mey *ndaw ma təla mey anɲa zleezle, ma ləvey: «Ya ta zələrwa bəzey adaw daa hwayak ɲga Ejip la.»

A kəɖmata bəza hay mezəle da slala Betəlehem

¹⁶ Bay *Herawt ma səra ndəhay ma səra mey da ray wurzla hay heyey ta fəcmara sem na, mevel a car ga! Ta', a slərey ndəhay anɲa hay ɲga kəɖmata bəza hay mezəle da Betəlehem ta bəza hay masa gweegwe ta slala ha tabiya vagay. A wudəy ɲga kəɖey vagay na, bəza hay masa ma yamawa təlam haa kasl fa bəza hay mevey cew. A kəɖta bəza hay mecəhe hay a anda ɲgene na, maja anɲa ma səra mevey ɲga wurzla ma bawa masa anɲa ma cənda da mey ndəhay ma səra mey da ray wurzla hay heyey. ¹⁷ Mekəɖey bəza hay a vagay ɲgene na, ta key la anda Jeremey, ndaw ma təla mey ɲga Gazlavay, maa guzley zleezle, a ləvey:

¹⁸ «A cəndamara fa wudam ta gəɖan da slala Rama, matəway ta mewudey sləw a! a ndəvey ba.

Ara Rasel ma təway bəz anğa hay.
 Mevel anğa a dəkey ba,
 maja bəz anğa hay a ta məcam sem.»

Mavəhwa nğa ata Jawzef ta Mari da Ejip

¹⁹ Fa dəba nğa meməcey nğa Bay *Herawt heyey na, ta', *maslan nğa Bay Gazlavay a wuzar vaw a *Jawzef daa mesəfney daa hwayak nğa *Ejip heyey, ²⁰ a ləvar: «Sləkdəy, la bəzey, vəham ta mamaha aa hwayak nğa *Israyel, maja ndəhay * ma səpmara bəzey a nğa kədəy vagay heyey na, ta məcam sem dəba.»

²¹ Cay, Jawzef pərta! a sləkdəy, leŋ! a la bəzey, ta', a vəham ta mamən nğa bəzey a, aa hwayak nğa Israyel. ²² A da cənda na, Arkelawas fa zəma bay nğa papaha Herawt daa hwayak nğa *Jude. Da ray nğene, mandərzay a kar, a zlurey nğa njeý daa hwayak a. Ta', mesəfney a kar a Jawzef saya. Daa mesəfney a na, Gazlavay a kəta nğa daw aa hwayak nğa *Galile. ²³ Anda kedə, a daw a njeý aa hwayak a, da slala *Nezeret. Menjeý anğa da slala ha nğene na, ta key la, anda ndəhay ma təla mey nğa Gazlavay, ma kadamara zleezle, ma ləvam: «A da zəlmara bəzey a na, ndaw Nezeret.»

3

Mey da ray sləra nğa Jan-Baptis

(*Mark 1.1-8; Luk 3.1-18; Jan 1.19-28*)

¹ Fa dəba ha, ndaw daha mezəley *Jan-Baptis, a wuzwa vaw da wuzlah-ley daa hwayak nğa *Jude, fa wuzey mey, ² a ləvey: «Mbəddamara menjeý akwar, səpmara Gazlavay ta mevel pal, maja gweegwe cay, bay nğa Gazlavay a wuzwa.»

³ *Jan a na, ara ndaw masa *Izay, *ndaw ma təla mey nğa Gazlavay zleezle, maa guzley da ray a, a ləvey:

«Ndaw fa wudey da wuzlah-ley, a ləvey:

Diyamar cəved nğada Bay Mahura,

dīymara cəved e maaya maaya dər e.»

⁴ Zana fa vaw nğa Jan a na, macakaya ta enğwec nğa slagwama. Vaw anğa majəwkaya ta huted. A zəmey na, ayakw ta amam da ley. ⁵ Ndəhay daa berney nğa

*Jeruzelem ta daa hwayak nğa Jude tabiya, leŋ daa hwayak hay mekele mekele gweegwe ta wayam nğa Jurdeŋ tabiya a diyam a fa Jan a, ⁶ a wuzdamara mebərey ata hay. Jan ta', a katar *baptem daa wayam a.

2:18 2.18 Jer 31.15-16 * **2:20** 2.20 ndəhay: Bay Herawt ta madər lam anğa hay **2:23** 2.23 Lk 1.26; 2.39, 51; Jan 1.46 **3:2** 3.2 4.17; Lk 3.3 **3:3** 3.3 Iz 40.3 **3:4** 3.4 2Bay 1.8

⁷ Da wuzlah ndəhay ma diyam fa Jan a amba a katar baptem na, *Fariza hay ta *Saduse hay ga daha. A da hətatar na, fa samawa a fa vəda, ta', aa guzltar, a ləvtar: «Hey! akwar bəza hay nga kucesl hay! Ma ləvkwar ka ləham la daa banay masa Gazlavay ma da handərwa a ray akwar na, wa?» ⁸ Kam cek maaya, amba ndəhay a səmra akwar ta mbəddamara menjey akwar sem, akwar fa səmra Gazlavay ta mevel pal. ⁹ Ka da wulkam daa mevel akwar, ka ləvam: «Papa ala na, ara *Abəraham, maja ngene, Gazlavay a da sərfandar dey-ceceh.» Ka da ləvam kəne ba, maja ya fa ləvkwar fara fara, Gazlavay a gwa nga tərdata aŋwa hay kedə nga səkway nga Abəraham may. ¹⁰ Zlamba maŋgakaya cay nga ngeney wudez hay ta slaslalay a cəpa. Wudez ma yey babəza maaya ba na, a ngenamara, a pamar awaw fa vəda. ¹¹ Yah na, ya kakwar baptem ta yam, nga wuzwa fara fara akwar ta mbəddamara menjey akwar cay. Ama ndaw ma fənya fa sawa. Aŋga na, kwa ya wusa nga cəkwa tarak da salay aŋga ba. Ndaw a na, a kakwar baptem la ta *Mesəfney nga Gazlavay lej ta awaw. ¹² Aŋga da gədak ta vəley mekəfey daw da har, amba a wunka bəz-daw ta cekwesl e. Bəz-daw na, a da həla a wuded. Ama cekwesl e na, a da gədar awaw a ray a, awaw masa ma məcey ba nga səmataw.»

Mey da ray baptem nga Yesu
(Mark 1.9-11; Luk 3.21, 22)

¹³ Fa dəba ha, Yesu a sawa daa hwayak nga *Galile, a daw aa wayam nga Jurden fa *Jan, amba Jan a kar *baptem. ¹⁴ Ama Jan a wudəy nga kar baptem e ba, a ləvar: «Am! Anja ma da daw fa kah, amba ka kaya baptem na, yah jak, ba diya? Kaa, ka fa sawa fa yah jak na, kwara?» ¹⁵ Yesu a mbəddara, a ləvar: «Ama wure kedə na, təba nga kaya baptem, amba ya kakwa sləra nga Gazlavay masa aa maa cəfda tabiya nga key.» Ta', Jan a, a təba nga kar baptem e. ¹⁶ Masa Yesu ma hətəy baptem cay fa bawa daa yam na, wure ngene, slam da vad bədan! a wurey. A da nəkey dey na, *Mesəfney nga Gazlavay fa pawa salay da vad, anda makurgwadakw. Cəkwa! a nje y a ray a. ¹⁷ Asaya, dəy fa cənwa da gazlavay da vad, a ləvey: «Kedə he, ara Bəzey adaw, masa yah ma wudə kalah. Ya faa səmey ga da ray a.»

3:7 3.7 bəza hay nga kucesl hay: 12.34; 23.33; banay: 24.15-25, 37-39 **3:9** 3.9 Lk 1.54-55; Jan 8.39; Rm 2.28-29; 4.12 **3:10** 3.10 7.19 **3:11** 3.11 Lk 3.16 **3:12** 3.12 Jer 13.24; Mt 13.30 **3:15** 3.15 5.17; 28.19 **3:16** 3.16 Iz 63.19; Ez 1.1-3; Jan 1.51; SNM 7.56; CWJ 4.1; 19.11 **3:17** 3.17 Iz 42.1; Ps 2.7; Mt 12.18; 17.5

4

Bay-malula a wudfey nga bata Yesu
(Mark 1.12, 13; Luk 4.1-13)

¹ Fa dɔba ha, *Mesɔfney nga Gazlavay a handa Yesu a wuzlah-ley amba *Satan, bay-malula, a jada nga bata.

² Kwa Yesu ta zɔmey cek daa ba, ɗar kwakwar mɔfad, taa vad, taa pas. Fa dɔba ha, may a car dɔba. ³ Ta', bay-malula a daw a cakay a nga bata, aa guzlar, a lɔvar: «Da kah Bɔzey nga Gazlavay na, tɔrdata aŋgwa hay keɗe nga ɗaf taw!»

⁴ Yesu a mbɔɗɗara, a lɔvar: «Mawuzlalakaya daa ɗerewel nga Gazlavay, a lɔvey: “Ndaw na, a njeɣ ta cek mezɔmey daada ba, ama ta mey cɔpa masa ma bawa da mey Gazlavay.”»

⁵ Cay, bay-malula ha ta', a handa a *Jeruzelem, berney nga Gazlavay. A tɔpda aa ray nga *Way-mekey-kwakwas nga Gazlavay, ⁶ a lɔvar: «Da kah Bɔzey nga Gazlavay na, jɔvey a hwayak, maja Mey nga Gazlavay mawuzlalakaya a lɔvey:

“Gazlavay a da ka amba a slɔrwa maslan aŋga hay, a slɔwmaka la a har ata
amba salay akah a gurzey fa aŋgwa ba.”»

⁷ Yesu a mbɔɗɗara, a lɔvar: «Mey nga Gazlavay mawuzlalakaya a lɔvey saya: “Ka da jada Bay Gazlavay akah ba.”»

⁸ Fa dɔba ha, bay-malula ha, a handa saya, a tɔpda aa ray nga aŋgwa maazɔma, a wuzdara hwayak hay da bɔla cɔpa ta zleley hay cɔpa da hwad a, aa guzlar, ⁹ a lɔvar: «Da kah ma ragadaya la, kah ma ɗɔrya ɗaŋgay la na, hwayak hay a ta zleley hay cɔpa da hwad a keɗe na, ya vɔldatakawa la.»

¹⁰ Ta', Yesu a mbɔɗɗara, a lɔvar: «Satan, hway la feɗe! Mbɔkɗaya maja Mey nga Gazlavay mawuzlalakaya a lɔvey: “Ka da ragadar na, si ŋgada Bay Gazlavay akah gway. ɗɔrar ɗaŋgay ŋgada Bay Gazlavay pal taava aŋga.”»

¹¹ Daa ŋgene, bay-malula ha, mbak! a mbɔkɗa Yesu. Ta', maslan hay nga Bay Gazlavay da vad a samawa a cakay a, a jɔnmara, a vɔlmar cek mezɔmey.

Yesu a zlar slɔra aŋga daa hwayak nga Galile

¹² Menjeɣ nekɔɗey na, ta', a kɔrzamara *Jaŋ-Baptis, a mbɔzdamara aa fɔrsɔne. Masa Yesu ma cɔnda ata ma kɔrzamara Jaŋ-Baptis sem na, a slɔkɗey, a vɔhey aa hwayak nga *Galile. ¹³ Ta njeɣ da slala *Nezeret daa ba, ama a daw a njeɣ a Kapernayum. Kapernayum na, ara slala

da mey dēhwa nga Galile, masa daa hwayak nga səkway nga Zabulanjw ta nga Naftali. ¹⁴ Anda keɗe, cek aha ta key la anda *Izay, *ndaw ma tēla mey nga Gazlavay, maa guzley zleezle, ma ləvey:

¹⁵ «Ndəhay daa hwayak nga səkway nga Zabulanjw ta nga Naftali,

hwayak hay masa gweegwe ta dēhwa nga Galile, ta dey langar nga wayam nga Jurdeŋ,

hwayak nga Galile masa ndəhay Jəwif hay ba hay ma njam da hwaɗ a,

¹⁶ ndəhay a, ata daa ləvan, ama a hətmar mewedey mahura la.

Ata masa anda ndəhay maməctakaya, ama slam a wedey la a ray ata.»

¹⁷ Masa Yesu ma daw a Kapernayum a na, ara daa ŋgene, aŋga ma zlar mewuzey mey, a ləvey: «Mbəɗdamara menjey akwar da bəla, maja gweegwe cay, Gazlavay a wuzdərwa bay aŋga.»

Yesu a zəlwa gula hay məfad ŋgeeme
(Mark 1.16-20; Luk 5.1-11)

¹⁸ Pas pal daha, Yesu fa pəkey da mey dēhwa nga *Galile. Ta', a hətey məlman hay cew daha, ara ndəhay ma kərza ewet. Ata *Simanjw masa ma zəlmara *Piyer ta məlmaha *Andəre, fa kərzam ewet ta *tabaw daa dēhwa ha. ¹⁹ Yesu ta', a zəltərwa, a ləvtar: «Samawa asi aɗaw. Akwar na, ndəhay ma kərza ewet, ama dəga wure keɗe ya da tərɗakwar nga ndəhay ma zəlwa ndəhay aa cəved nga Gazlavay.» ²⁰ Wure ŋgene, mbak! a mbəkdamata tabaw ata hay, ta', a diyam asi Yesu.

²¹ Yesu a ŋgəchey nekəɗey fa mey na, a hətey məlman hay cew mekele saya, ara ata *Jak ta məlmaha *Jan, bəza hay nga Zebede. Ata manjatakaya daa kwambiwal ta papa ata Zebede, fa diymata tabaw ata hay. Yesu ta', a zəlta ata Jak ta Jan nga diyam asiya. ²² Wure ŋgene, mbak! a mbəkdamara kwambiwal leŋ papa ata, ta', a diyam asi Yesu.

Yesu a wuzey mey ta a mbəley masa-macay hay
(Mark 1.39; Luk 4.44; 6.17-19)

²³ Yesu fa pəkta slala hay cəpa daa hwayak nga *Galile, faa sərkaɗata ndəhay daa way-mewuzey-mey hay nga Gazlavay, fa wuzey *Mey-maaya-mawiya da ray *mewey nga Bay Gazlavay da ray ndəhay, fa mbəley ndəhay daa macay hay wura wura cəpa leŋ ndəhay maahəlbatakaya

hay tabiya. ²⁴ Ndəhay tabiya daa hwayak nga Siri a cəndamara mey da ray a. Anda keđe, a handamar ndəhay ga daa macay hay mekele mekele, siya hay masa vaw fa catar kalah, siya hay masa malula da ray, siya hay masa ta cek da ray fa bərzlam, leŋ masa maahəlbatakaya hay. Ta', Yesu a mbəldata. ²⁵ Ndəhay ga fa diyam asiya. Ndəhay a na, a samawa daa hwayak nga Galile, daa hwayak mezəley Berney-Hay-Kuraw, daa berney nga *Jeruzelem, daa hwayak nga *Jude, leŋ daa hwayak ta dey langar nga wayam nga Jurdeŋ.

5

Yesu a wuzey mey da aŋgwa

¹ Masa Yesu ma hətatar ndəhay ga fa diyam asiya na, ta', a təpey a aŋgwa, cəkəwam! a njeŋ ta njeŋ. Gula aŋga hay a diyam, a kusam a cakay a.

Mey da ray maaya nga Gazlavay ma da sawa a ray ndəhay (Luk 6.20-23)

² Yesu a zlar ŋgaa sərkađata, a ləvtar:

³ «Maaya nga Gazlavay aa da ray ndəhay ma ləvam mbalay Gazlavay, ba na, ata cek hay nga tede.

Maaya nga Gazlavay aa da ray ata na,
maja ata ma təbmara
amba Gazlavay a wey da ray ata fara fara.

⁴ Maaya nga Gazlavay aa da ray ndəhay
masa ta matəway daa dey,
maja ata na, ara Gazlavay ma da dəktar mevel.

⁵ Maaya nga Gazlavay aa da ray ndəhay meekwed-mey,
maja ata na, a da hətam slam menjeŋ
anda Gazlavay ma ləvtar a da vəldatara.

⁶ Maaya nga Gazlavay aa da ray ndəhay ma wuđam
ŋga key cek ma mbafar a Gazlavay ta mevel ata cəpa,
maja ata na, Gazlavay a, a pata la aa wiya.

⁷ Maaya nga Gazlavay aa da ray ndəhay
ma səram dey-ceceh fa ndəhay,
maja ata na, Gazlavay a sərfatar dey-ceceh la may.

⁸ Maaya nga Gazlavay aa da ray ndəhay
ma səpmara mey nga Gazlavay ta mevel pal,
maja ata na, a hətmar Gazlavay la ta dey ata.

⁹ Maaya nga Gazlavay aa da ray ndəhay
ma cəmtar đay nga ndəhay,
maja ata na, Gazlavay a da zəлта bəz aŋga hay.

¹⁰ Maaya nga Gazlavay aa da ray ndəhay
 masa ndəhay ma sərdamata banay
 maja ata ma kam cek ma mbafar a Gazlavay.

Maaya nga Gazlavay aa da ray ata na,
 maja Bay Gazlavay fa wey da ray ata.

¹¹ «Da ndəhay fa cədmakwar, fa sərdamakwar banay,
 asaya, fa mbəzlam a ray akwar maja akwar ndəhay adaw
 hay na, maaya nga Gazlavay aa da ray akwar. ¹² Ta
 sərdamata banay ta ndəhay ma təla mey nga Gazlavay
 zleezle la, ba diya? Yaw, da anda keđe na, maaməlkam,
 njam ta meesəmey ga ara mey ba, maja ara Gazlavay ma
 da pəlkwara mawurbay nga sləra akwar maaya maaya da
 vad.»

Mey da ray manda ta slam-mewedey

(Mark 9.50; Luk 14.34, 35)

¹³ Yesu a ləvtar a gula anğa hay saya: «Da bəla keđe,
 akwar na, anda manda. Da mecərey nga manda ha
 daa saba na, ka da sərmara ara manda na, kwara? Da
 mecərey nga manda ha daa saba na, anğa maaya saba, a
 kwiydamura aa papalah saw, ndəhay a hərpamara.

¹⁴ «Asaya, akwar na, ndəhay ma wada bəla. Da berney
 aa daa ray nga anğwa na, a bey fa dey nga ndəhay la daw?
¹⁵ Yaw, ndaw a gədey awaw aa petərila, a pa asi manğayak
 ba, si a pa aa slam mepey petərila amba a wadatar dey
 ngada ndəhay daa way a tabiya. ¹⁶ Anda keđe, si ka
 wadam fa dey nga ndəhay tabiya, amba a hətmar sləra
 akwar maaya, a həslmar ray a Papakw akwar Bay Gazlavay
 da vad.»

Mey da ray kwakwas nga Mawiz

¹⁷ «*Kwakwas nga Mawiz ta meesərkedey nga ndəhay
 ma təla mey nga Gazlavay na, ka wulkam, ya sawa nga nəsa
 daw? Ara kəne ba. Ama ya sawa na, amba ya wuzdakwara
 mabara nga mey da ray a. ¹⁸ Ya fa ləvkwar fara fara,
 kwakwas nga Mawiz a, kwa kuset kədey, fa daa zədey
 daa ba səlak, haa kasl slam da vad ta slam da hwayak
 ma ndəvam. Kwakwas nga Mawiz fa daa zədey daa ba,
 haa kasl ta pas masa sləra nga kwakwas a ma ndəvey cay
 cəpa. ¹⁹ Anda keđe, da ndaw ta zləbey mey la, kwa kuset
 kədey daa kwakwas a, asaya, da taa sərkadata ndəhay la
 nga kamara anda aa ma zləba ha na, ndaw aha a da tərey
 ndaw mecəhe da wuzlah ndəhay masa Gazlavay ma wey

5:10 5.10 1Pi 3.14 **5:11** 5.11 10.22; Lk 6.22 **5:12** 5.12 2Mev 36.16; Mt
 23.30; Lk 6.23; SNM 7.52; Heb 11.32-38; Jak 5.10 **5:13** 5.13 Mk 9.50 **5:15**
 5.15 Mk 4.21; Lk 8.16 **5:16** 5.16 Ef 5.8; Fəl 2.15; 1Pi 2.12 **5:17** 5.17 3.15;
 7.12; 22.40; Rm 3.31 **5:18** 5.18-19 Jak 2.10

da ray ata. Ama da ndaw ta nar ray la ngada kwakwas a cøpa, asaya, da taa sèrkadata ndøhay la nga kamara køne na, ndaw aha a da tørey mahura da wuzlah ndøhay masa Gazlavay ma wey da ray ata. ²⁰ Ya fa løvkwar fara fara, akwar fa da ndøkwaam a wuzlah ndøhay masa Gazlavay ma wey da ray ata na, daa ba, si ka kam cek ma mbafar a Gazlavay ma føna *Fariza hay lej ndøhay maa sèrkada kwakwas nga Mawiz.»

Mey da ray mecey-mevel

²¹ Yesu aa sèrkadata gula anga hay da cakay a heyey saya, a løvtar: «Akwar ma cøndamara mey nga Gazlavay maa guzldatara ngada dede aløkwa hay zleezle la, ba diya? Mey a, a løvey: “Ka da køfey ndaw vagay ba. Kwa waawa ma køfey ndaw vagay na, a kamar sariya la.” ²² Ama yah na, ya fa løvkwar saya, kwa waawa ma cey mevel a ray mølmaha * na, Gazlavay a kar sariya la. Kwa waawa ma løvar a mølmaha: “Kah manjar lengesl” na, a handamara ndaw a la fa mey nga ndøhay mahura hay ma sla yawa nga Israyel hay. Asaya, kwa waawa ma løvar a mølmaha: “Kah marøzlkaya” na, ngene, mak nga mbøzda aa vøged nga awaw magaza.

²³ «Yaw, da ka fa daw aa *Way-mekey-kwakwas nga Gazlavay amba ka vølar cek a Gazlavay, daa ngene, ka sèrfada, mølmakw fa cey mevel da ray akah na, ²⁴ ngene, mbøkda cek akah ha a cakay slam-meføkey cek ngada Gazlavay a, daw fa mølmakw a, cømamawa ðay ta anga la ðagay, wara ka vøhwa, ka vølda cek akah ngada Gazlavay.

²⁵ «Da ndaw a wudka, fa handaka aa sariya na, wusey vaw, ðiymara mey akwar ta ndaw aha daa cøved. Da daa ba na, a da vøldaka a har ndaw ma ka sariya. Ndaw ma ka sariya ha, a da vøldaka a har sewje hay. Sewje hay may, a da køzlamaka aa førsøne. ²⁶ Ya fa løvka fara fara, ka fa da bawa daa førsøne he daa ba sølak, si kah ma pøla døvaz a la tabiya ndav.»

Mey da ray meley-vaw saw

²⁷ «Akwar ma cøndamara mey nga Gazlavay maa guzlda la, a løvey: “Ka da ley vaw saw da palah ba.” ²⁸ Ama yah na, ya fa løvkwar saya, kwa waawa maa hømey ngwas nga ndaw daa mevel anga nga ney ta anga na, ngene anda ndaw aha ta lam vaw sem ta ngwas aha. ²⁹ Da dey akah

5:21 5.21 Mab 20.13; Lev 24.17 * 5:22 5.22 mølmaha: Mølmaha a wudfey nga løvey ara møلمان nga søkway ba, ama ara møلمان daa mey nga Gazlavay.
 5:22 5.22 1j 3.15 5:24 5.24 6.14-15 5:25 5.25-26 Lk 12.58-59 5:26 5.26 18.34 5:27 5.27 Mab 20.14 5:28 5.28 Jøw 31.1; 2Pi 2.14

nga zəmay fa həldaka nga key cek hay maaya ba na, wuzlka dey a, hazakada dorenj ta kah. Ngama mezəvey nga vaw akah pal meezədey da ray vaw akah tabiya ma da kəzley aa vəged nga awaw magaza. ³⁰ Asaya, da har akah nga zəmay fa həldaka nga key cek maaya ba na, dəsla har a, hazakada dorenj ta kah. Ngama mezəvey nga vaw akah pal meezədey da ray vaw akah tabiya ma da mbəzey aa vəged nga awaw magaza.»

Mey da ray mebəley ngwas

(Matiye 19.9; Mark 10.11, 12; Luk 16.18)

³¹ «Mey mekele daha saya, a ləvey: “Kwa waawa ma bəla ngwas anga na, si a vəlar derewel nga wuzda anga ma bəla sem.” ³² Ama yah na, ya fa ləvkwar saya: Ndaw a da bəla ngwas anga ba, si da ngwas aha ta ley vaw la da palah kwa. Da ndaw a bəla, fa dəba ha ngwas aha a ley zel mekele na, a key ngene, a tərda ngwas aha nga ngwas meley-vaw saw da palah. Asaya, ndaw ma la ngwas masa zel e ma bəla ngene na, anga anda ndaw ma ley vaw saw da palah may.»

Mey da ray mēbedey

³³ «Asaya, akwar ma cəndamara mey nga Gazlavay maa guzldatara ngada dede aləkwa hay la, a ləvey: “Ka da mbaɗam nga tede ba. Da akwar ma mbaɗam sem na, si ka kamara cek aha fara fara ta mezəley nga Bay Gazlavay.”

³⁴ Ama yah na, ya fa ləvkwar, kwa ka da mbaɗam ba səlak, kwa ta slam da vad ka da mbaɗam ba, maja ara slam-menjey nga Gazlavay. ³⁵ Kwa ta slam da hwayak ka da mbaɗam ba, maja ara slam-mepey-salay nga Gazlavay. Kwa ta *Jeruzelem ka da mbaɗam ba, maja ara berney nga Gazlavay Mawaca-waca. ³⁶ Asaya, kwa ta ray akwar hay ka da mbaɗam ba, maja ka gwamara nga tərdamara kwa engwec nga ray akwar matara pal nga mabara ba. ³⁷ Da mey a ara anga na, ləvam: “Ahaw, ara anga!” Da ara anga ba na, ləvam: “Kay, ara anga ba!” Da ka ləvam mey wal na, ngene mey a, a bawa ta fa *Satanj, bay-malula.»

Mey da ray mēpəley cəhwal

(Luk 6.29, 30)

³⁸ «Akwar ma cəndamara mey nga Gazlavay maa guzley la daa slam mekele, a ləvey: “Da ndaw a wuzlkakawa dey na, wuzlkara nga anga may. Da ndaw a pəlɗgwakawa

5:29 5.29-30 18.8-9; Mk 9.43-47 5:31 5.31 Mew 24.1; Mt 19.7; Mk 10.3-4
 5:32 5.32 19.9; Mk 10.11-12; 1Kwr 7.10-11 5:33 5.33 Lev 19.12; Mesl 30.3
 5:33 5.33-37 23.16-22; Jak 5.12 5:34 5.34-35 Iz 66.1; SNM 7.49 5:35 5.35
 Ps 48.3 5:37 5.37 2Kwr 1.17-19

sler na, pəlŋgwara ŋga aŋga may.”³⁹ Ama yah na, ya fa ləvkwar, akwar na, ka da pəlam cəhwal ba. Da ndaw a kədka a cakay baazlam ŋga zəmay na, mbəfdara dey ŋga gula saya.⁴⁰ Da ndaw a wudka amba a təba dəŋ-kece akah na, gərda ŋga təba dawura akah saya.⁴¹ Da ndaw a təkaka dəy ŋga ley cek dadakw kəlemeeter pal na, handara a key kəlemeeter cew.⁴² Da ndaw aa cəfdafaka cek na, vəlar. Asaya, da ndaw a dedədey cek na, kwa ka daa zləka ba.»

Mey da ray mewudəy masa-gəra hay

(Luk 6.27, 28, 32-36)

⁴³ «Akwar ma cəndamara mey ŋga Gazlavay maa guzley la daa slam mekele, a ləvey: “Wudə jam akah, masa-gəra akah na, ka da pey dey a ray a ba.”⁴⁴ Ama yah na, ya fa ləvkwar: wudmata masa-gəra akwar hay, dərām dāŋgay a Gazlavay amba a pəstar mey a ndəhay ma sərdamakwar banay.⁴⁵ Anda kefe, a da wuzwa akwar na, bəza hay ŋga Papan Bay Gazlavay da vad, maja aŋga na, fa wadərawa pas a ray ndəhay maaya ta maaya ba hay, asaya, fa parawa var ŋgada ndəhay ma namar ray ta ŋgada ndəhay ma namar ray ba tabiya.⁴⁶ Da ka wudam ndəhay ma wudmakwar daada gway na, Gazlavay a da pəlkwara mawurbay ŋga sləra akwar na, maja me? Kwa ma cakala budaw hay na, fa kamara kəne may, ba diya?⁴⁷ Da ka cam har ŋgada səkway akwar hay gway na, ka ta kam sləra maaya ma fəna maamandaw la daw? Kwa ndəhay ma sərmara Bay Gazlavay ba na, fa kamara kəne may, ba diya?⁴⁸ Papakw akwar Bay Gazlavay da vad, aŋga maaya kalah, a wudta ndəhay tabiya. Təram ndəhay maaya kalah anda aŋga.»

6

Mey da ray mejəney masa-viya hay

¹ Yesu aa sərkadata gula aŋga hay da cakay a heyey saya, a ləvtar: «Wam vaw fa sləra masa akwar ma kamara ŋgada Gazlavay. Ka da kamara ta mezlepey fa mey ŋga ndəhay ba. Maja da ka kamara amba a hətmakwar na, Papakw akwar masa da vad na, fa da pəlkwara mawurbay ŋga sləra akwar a daa ba.

² «Yaw, da ka vəlam dala a ndəhay masa-viya hay na, ka da wudam ta wudey anda ndəhay masa ta neneh cew ba. Ata na, fa kamara kəne daa *way-mewuzey-mey ŋga Gazlavay leŋ daa mepəkey ata hay, amba ndəhay aa

5:38 5.38 Mab 21.24 **5:39** 5.39 Rm 12.17 **5:40** 5.40 1Kwr 6.7; Heb 10.34
5:43 5.43 Lev 19.18; Mt 22.39; Mk 12.31; Lk 10.27 **5:44** 5.44 Mab 23.4-5;
Rm 12.20; 1Pi 2.20-23; mepəsey-mey: Lk 6.28; 23.34; SNM 7.60; Rm 12.14; 1Kwr
4.12; 1Pi 3.9 **5:45** 5.45 Ef 5.1 **5:48** 5.48 Lev 19.2 **6:1** 6.1 23.5

hømdamata. Ya fa løvkwar fara fara, meehømey a ηgene na, ara mawurbay ηga sløra ata. ³ Ama kah, da ka fa vøley dala a masa-viya hay na, vølda ta mayal a, amba ndøhay a sørmara ba. ⁴ Anda kefe, Papakw Bay Gazlavay, ma høtar cek masa kah ma vølda na, ara anga ma da pølkawa mawurbay akah.»

Mey da ray medørey-dangay

(Luk 11.2-4)

⁵ «Yaw, da akwar fa døram dangay na, ka da kamara anda ndøhay masa ta neneh cew ba. Ata na, a wudam melecey ηga dørey dangay daa *way-mewuzey-mey ηga Gazlavay lej da mey-cøved hay amba ndøhay tabiya a høtmatar. Ya fa løvkwar fara fara, taa hømdamata cay, meehømey a ηgene na, ara mawurbay ata. ⁶ Ama kah, da masa ka fa da dørey dangay na, daw a ver akah, gørcø mey-slam, dørar dangay a Papakw Bay Gazlavay fetefø, daa slam masa ndøhay da hwaf a daa ba. Anda kefe, Papakw Bay Gazlavay, ma høtar sløra masa kah ma ka ta mebey ηgene na, ara anga ma da pølkawa mawurbay ηga sløra akah.

⁷ «Da akwar fa døram dangay na, ka da dølum mey ga anda ma ta kuley hay ba. Ata a wulkam na, Bay Gazlavay a cøndatara mey ata meduley ga ηgene la. ⁸ Ka da kam anda ata ba, maja Papakw akwar Bay Gazlavay na, ta søra cek masa akwar ma daa cødfafamara sem. ⁹ Da akwar fa døram dangay na, løvam:

“Papa ala Bay Gazlavay da vad,
anja ndøhay tabiya ηga namaka ray maja kah na,
Bay Gazlavay pal.

¹⁰ Anja bay akah ηga wuzwa.

Ka amba ya namaka ray da bøla kefe
anda ata ma namaka ray da vad.

¹¹ Vøldar cek mezømey ηga wusndar tasana.

¹² Mbøkdamara mebey ala
anda ala ma mbøkdamatara mebey
ηga ndøhay ma kamandar cek maaya ba.

¹³ Jøfndar amba cek a batandar ηga key mebey ba.
Badandørwa dasi har ηga bay-malula.”

[Ahaw, ara kah Bay Gazlavay ta gødan,
ma wey da ray cek hay tabiya.

Ara kah masa ndøhay ma høslmaka ray ηga sørmataw.
Amen.]

14 «Sərmara, da akwar fa mbəkdamatara mebərey nga ndəhay ma kamakwar mebərey na, ηgene, Papakw akwar masa da vad a mbəkdwara mebərey akwar la may.

15 Ama da ka mbəkdamatara mebərey nga ndəhay ba na, ηgene, Bay Gazlavay Papakw akwar a mbəkdwara mebərey akwar daa ba may.»

Mey da ray mekey daliyam

16 Yesu a ləvtar saya: «Masa akwar fa kam *daliyam na, ka da ndərbam dey anda ndəhay masa ta neneh cew ma kamara ba. Ata na, a ndərbam dey amba ndəhay tabiya a sərmara ata fa kam daliyam. Ya fa ləvkwar fara fara, taa həmdamata cay, meehəmey a ηgene na, ara mawurbay nga sləra ata. 17 Ama kah, da masa ka fa key daliyam na, pəra dey akah, njəra ray akah, 18 amba ndəhay a sərmara ka fa key daliyam ba. Ama, ma səra na, si Papakw Bay Gazlavay, ma hətər sləra masa kah ma ka ta mebey ηgene, a pəlkawa mawurbay nga sləra akah la.»

Mey da ray mebəcey zleley da gazlavay da vad

(Luk 12.33, 34)

19 «Ka da səpam nga bəcey zleley da bəla kefe ba, maja kwa mətal, da daa ba, maaca a gwa nga zəma. Kwa mayal hay a gwamara nga slənmara way nga lalamara. 20 Ama səpam nga bəcey na, zleley masa da vad, maja fetefe na, mətal, da daa ba, maaca a gwa nga zəma ba. Kwa mayal hay a gwamara nga mbəzam fetefe, nga lalamara ba.

21 Ya ləvey anda kefe maja daa slam masa zleley akah aa da hwad a na, mevel akah may aa fetefe.»

Mey da ray mewedey masa fara fara

(Luk 11.34-36)

22 «Bəz nga dey na, anğa anda petər la ngada vaw tabiya. Da bəz nga dey akah anğa maaya maaya na, ηgene vaw akah cəpa aa daa slam-mewedey. 23 Ama, da bəz nga dey akah maaya ba na, ηgene, vaw akah cəpa aa daa ləvan. Da mewedey da ray akah fara fara daa ba na, ηgene, kah daa ləvan bək-bək.»

Mey da ray mesəpey Gazlavay, da daa ba, zleley

(Luk 16.13; 12.22-31)

24 Yesu a ləvtar saya: «Ndaw pal a gwa nga key madərlam nga bay hay cew ba. Da ta key la kəne na, a da wudə bay lanğar ma fəna bay lanğar, da daa ba, a da nar ray ngada

bay lanġar, a røsa bay lanġar. Ka gwamara nġa sèpmara Gazlavay leŋ zleley cewete daa slam a ba.

²⁵ «Maja nġene, ya fa løvkwar fara fara, daa menjey akwar na, ray akwar a da høbey da ray cek mezømey ta cek mesey ba. Asaya, ray akwar a da høbey da ray zana nġa køzley fa vaw akwar ba. Yaw, cek mezømey na, a fønà heter akwar daw? Asaya, zana na, a fønà vaw akwar daw?

²⁶ «Wulkam da ray dīyanġ hay taw: fa sløkam daa ba, fa nġømam daw daa ba, fa bøcam kwa meeme a wuded daa ba, ama Papakw akwar Bay Gazlavay da vad fa vøltar cek mezømey cøŋga. Kaa akwar na, ka fønmata dīyanġ hay, ba daw? ²⁷ Ndaw da wuzlah akwar ma gwa nġa pey kwa dār pal a ray dār anġa da bøla ta mewulkey anġa na, wa?

²⁸ «Kaa, ka wulkam ga da ray zana na, maja me? Nøkmara meefekwey hay da ley cey! Aa fakwam na, kwara? A kam sløra ba, a cam zana ba, ²⁹ ama ya fa løvkwar, kwa Bay *Salamaŋw zleezle ta zleley ga ta gwa nġa køzley zana ma mbey anda meefekwey pal na, daa ba. ³⁰ Gazlavay a ka amba kusaf aa fekwey tasana, ama mandaw na, kusaf a, a wewurey. Da Gazlavay fa key cek maaya nġada kusaf masa awaw ma da wawura anda kefe na, Gazlavay a nøkfakwar dey ma fønà kusaf a nġene daa ba daw? Akwar masa ma pamara Gazlavay nġa ndaw akwar fara fara ba nġene, sèrmara Gazlavay a køzlakwar zana la ma fønà meefekwey hay a.

³¹ «Da ray nġene, ka da wulkam ga ba. Da ka løvam: “Ya da zømam me? Ya da sam me? Ya da køzlam fa vaw me?” na, ka da wulkam køne ba, ³² maja ma sèpam cek hay a nġene na, ara ndøhay ma sèrmara Gazlavay ba. Asaya, cek hay masa akwar ma wudam cøpa ha na, Papakw akwar da vad ta søra sem. ³³ Sèpam teesed na, Gazlavay nġa wey da ray akwar, asaya, kam cek anda anġa ma wudfey. Fa døba ha, Bay Gazlavay a vøldakwara cek hay siya la cøpa.

³⁴ Ya fa løvkwar døba, ka da wulkam ga fa cek ma da key mandaw ba, maja mewulkey nġa mandaw na, anġa wal. Mewulkey fa dār pal na, a wusa nġada dār a.»

7

*Mey da ray membøkey mebørey nġa ndøhay
(Luk 6.37, 38, 41, 42)*

6:24 6.24-34 6.11 **6:25** 6.25 Føl 4.6; 1Pi 5.7 **6:26** 6.26 10.29-31; Lk 12.6-7
6:29 6.29 1Bay 10 **6:30** 6.30-31 14.31 **6:32** 6.32 6.8 **6:33** 6.33 1Bay
3.11-14; Ps 37.4-5 **6:34** 6.34 Mab 16.4, 19-20

¹ Yesu aa guzltar saya, a ləvtar: «Ka da wulkam daa mevel akwar, ka ləvam, “Anja manan̄ ŋгаа zəfey maja mebərey an̄ga” na, kəne ba, maja Bay Gazlavay a daa zəfdakwar maja mebərey akwar kəne may. ² Ya fa ləvkwar, Bay Gazlavay a daa zəfdakwar daa sariya anda akwar ma wudam manan̄ na, ŋгаа zəfey ŋgene may. Asaya, a da dəsla mey da ray akwar anda akwar ma dəslmara mey da ray ndəhay mekele may.

³ «Ka nəkey dey fa guzer daa dey ŋga məlmakw, ama hwadam mahura masa daa dey akah na, ka wulkey da ray a ba na, maja me? ⁴ Ka gwa ŋga ləvar ŋgada məlmakw, “Dagay, ya lakawa guzer daa dey akah la”, anja hwadam mahura daa dey akah daha gway na, kwara? ⁵ Kah, ndaw masa ta neneh cew! La hwadam daa dey akah la dāgay, amba ka hət̄ar dey n̄jəd-n̄jed̄ ŋga ley guzer daa dey ŋga məlmakw.»

Mey-mənḡey da ray ndəhay ma rəsmara Gazlavay

⁶ «Cek hay maaya masa ŋgada Gazlavay na, ka da vəldamatara ŋgada gədey hay ba, maja a da tatərmawa a ray akwar. Asaya, ka da kəzlamata bersle akwar hay maaya asi salay ŋga vetem hay ba, maja a da mbərzlamata ta salay.»

*Mecəfd̄ey cek fa Bay Gazlavay
(Luk 11.9-13)*

⁷ «Cacəfd̄am cek fa Bay Gazlavay, a vəldakwara la. Səpam cek fa Gazlavay, ka hət̄am la. Zəlam fa mey-mbew, a wurkwara la, ⁸ maja kwa waawa maa cəfd̄afar cek na, a vəlar la. Kwa waawa ma səpey cek fa vəda na, a hət̄ey la. Kwa waawa ma zəley fa mey-mbew na, a wurara la. ⁹ Da bəzey akah aa cəfd̄afaka makala na, ka vəlar an̄gwa la daw? ¹⁰ Asaya, da aa cəfd̄afaka ewet na, ka vəlar zezekw la daw? ¹¹ Akwar ndəhay malamba hay ma!, ka sərmara ŋga vəley cek maaya ŋgada bəz akwar hay. Da kəne na, kaa wara Papakw akwar Bay Gazlavay da vad̄ a vəltar cek maaya ŋgada ndəhay masa maa cəfd̄afamara ba na, kwara?

¹² «Anda ked̄e, kamatar cek maaya a ndəhay anda akwar ma wudam a kamakwara kəne may. Ked̄e he ara mey masa *kwakwas ŋga Mawiz leŋ ndəhay ma təla mey ŋga Gazlavay maa sərkadamara.»

Mey-menğey ta mey-mbew hay cew
(Luk 13.24)

¹³ «Səpam ɲga mbəzey na, ta daa mey-mbew meenğəlez e, maja mey-mbew maaban a na, ara cəved meezəfey ndaw. Ma daw taa cəved e na, aɲga ta banay daa ba. Ndəhay ga fa diyam ta da hwaɖ a. ¹⁴ Ama mey-mbew ɲga cəved ma hendey ndaw aa heter mawiya na, ara mey-mbew meenğəlez e. Ma daw ta hwaɖ a na, aɲga ta banay. Ndəhay ma hətam ɲga daw ta da hwaɖ a na, ga daa ba.»

ɲga sərey ndəhay maaya ta maaya ba hay na, kwara?
(Luk 6.43, 44)

¹⁵ «Wam vaw fa ndəhay ma pamata ray ata ɲga ndəhay ma təla mey ɲga Gazlavay. A da samawa fa akwar na, ta meney ray zəkwaɓ zəkwaɓ anda təbaɲ hay, ama a da kam həma na, anda gədey-ley hay. ¹⁶ Ka da sərmata na, ta fa sləra ata hay maaya ba. Nəka, ndaw a gwa ɲga ɲgəley manğwara fa hatak-daw la daw? Da daa ba, ndaw a gwa ɲga ɲgəley gudav fa manjaraf la daw? ¹⁷ Wudez maɖadəkaya gudaf! gudaf! na, a yey babəza maaya maaya may. Wudez masa fa betey ta betey na, a yey babəza maaya ba may. ¹⁸ Anda keɖe, wudez makudɖafar a na, a yey babəza maaya ba na, daa ba. Yaw, wudez masa fa betey ta betey may, a yey babəza maaya na, daa ba. ¹⁹ Wudez ma yey babəza maaya ba na, a dəslmara, a pamar awaw fa vəda. ²⁰ Ara anda keɖe, ka da sərmata ndəhay ma pamata ray ata ɲga ndəhay ma təla mey ɲga Gazlavay na, ta fa sləra ata hay maaya ba may.»

Mey da ray sariya ɲga Gazlavay
(Luk 13.25-27)

²¹ «Sərmara ndəhay ma zəlmaya “Bay Mahura, Bay Mahura” na, fa da mbəzam cəpa a wuzlah ndəhay masa Gazlavay ma wey da ray ata na, daa ba. Ama ma da mbəzam na, si ndəhay ma kam cek ma mbafar a Papay Bay Gazlavay da vaɖ gway. ²² Ta pas masa yah ma da katar sariya a ndəhay tabiya na, ndəhay ga a ləvmaya la: “Bay Mahura, Bay Mahura, mey ɲga Gazlavay masa ala ma wuzdamara na, ara ta mezəley akah. Malula hay masa ala ma bəlmata da ray ndəhay ga na, ara ta mezəley akah. Asaya, maazla hay ga masa ala ma kamata na, ara ta mezəley akah, ba diya?” ²³ Anda keɖe, ya daa guzltar ta’ a

7:14 7.14 SNM 14.22 **7:15** 7.15 Mew 13.2-4; Mt 24.11, 24; SNM 20.29; 2Kwr 11.13-15; 2Pi 2.1; 1Jn 4.1 **7:16** 7.16 Jak 3.12 **7:16** 7.16-18 12.33 **7:17** 7.17 Gal 5.19-23 **7:19** 7.19 3.10; Lk 3.9; Jan 15.2, 6 **7:21** 7.21 6.10; 7.24-27; 21.28-31; Rm 2.13; Jak 1.22-25; 2.14-26

mey, ya ləvtar: «Kwa ya sərkwar ba sələk! Diyam dərəj ta yah, akwar ndəhay ma kam cek hay malamba.»»

Mey-mənğey ta way hay cew
(Luk 6.47-49)

²⁴ «Yaw, kwa waawa ma cənda mey adaw kefe, ma ka cek anda mey a la na, anğa anda ndaw masa ta lenğesl, ma ləma way anğa da ray pərad. ²⁵ Ta piya, bərgadan a kawa a ray way a, var a pey, wayam a ley. Ama way a, a bəzley ba, maja salay nğa way a mapakaya da ray pərad. ²⁶ Ama kwa waawa ma cənda mey adaw kefe, ma ka cek anda mey a daa ba na, anğa anda ndaw manjar lenğesl, ma ləma way anğa da ray mawurbay. ²⁷ Ta piya, bərgadan a kawa a ray way a, var a pey, wayam a ley. Way a kərep! a bəzley, kwa dey lanğar ma mbəkey daa ba.»

Yesu aa sərkadata ndəhay na, ta me?

²⁸ Fa dəba ha Yesu ma ndəvda nğaa sərkadata ndəhay cay da ray mey hay a nğene na, ndəhay a, a rəzlam da ray meesərkedey anğa ha, ²⁹ maja aa sərkadata ndəhay anda ndəhay ata hay maa sərkada *kwakwas nğa Mawiz ba, ama aa sərkadata na, ta gədan masa Gazlavay ma vəldara.

8

Yesu a pərey ndaw daa maasəkula

¹ Fa dəba ha, Yesu a bərnğawa da anğwa heyey, ndəhay ga fa səpmar wurzay. ² Ndaw-maasəkula daha a nğəchey a cakay a, a regedey fa mey anğa, a ləvar: «Bay adaw, da ka wufey na, ka gwa nğa pərya daa maasəkula adaw kefe.»

³ Yesu tal! a təlda har anğa, a gəsfar, a ləvar: «Ya wufey amba maasəkula akah a pərey. Tərey ndaw mapərkaya dəba!» Wure wure nğene, ndaw-maasəkula heyey sad! a səfey. ⁴ Ta', Yesu a ləvar: «Pey lenğesl, ka da wuzda cek masa yah ma kakawa kefe kwa a ndaw ba. Ama daw fa *ndaw ma ka kwakwas nğa Gazlavay, amba a nəkaka. Fa dəba ha, vəlar cek a Gazlavay anda *kwakwas nğa Mawiz ma ləvey, nğa wuzey a ndəhay, maasəkula fa vaw akah daa saba.»

Yesu a mbəlda madərlam nğa mahura nğa sewje hay

⁵ Yesu fa daw a Kapernayum. Masa anğa fa daw na, ndaw Rawma daha, anğa mahura nğa sewje hay temere, a nğəchey a cakay a. A kar ambahw amba Yesu a jəna, ⁶ a ləvar: «Bay adaw, madərlam adaw, anğa manakaya da way

daa macay. Maahəlbakaya, fa sərey banay kalah.» ⁷ Yesu a mbəddara, a ləvar: «Ya fa daw, ya mbəlda la.» ⁸ Ama mahura ŋga sewje hay heyey a ləvar: «Bay adaw, kwa ya ta wusa amba ka mbəzey a way adaw na, daa ba. Gweguzley mey pal gway na, madərlam adaw a, a mbəley la. ⁹ Ya ləvka anda keđe maja yah na, sewje hay mahura da ray adaw daha, asaya, yah mahura da ray sewje hay mekele may. Da ya ləvar ŋgada sewje langar “daw”, a daw. Da ya ləvar ŋgada ndaw langar “sawa”, a sawa. Da ya ləvar ŋgada beke adaw “ka sləra keđe”, a ka.»

¹⁰ Masa Yesu ma cənda mey a keđe la na, a mbafar ara mey ba, ta', aa guzltar ŋgada ndəhay ma diyam asiya, a ləvey: «Ya fa ləvkwar fara fara, kwa ya ta hətey ndaw ma paya ŋga ndaw anga fara fara anda ndaw keđe daa ba səlak, kwa da wuzlah səkway adaw hay *Israyel hay, ya ta hətey daa ba. ¹¹ Ya fa ləvkwar: Ta pas masa Gazlavay ma da wuzdərwa bay anga na, ndəhay ga a samawa la daa slam hay tabiya da bəla, ŋga key gwagway da vad ta ata *Abəraham, *Izak leŋ *Jakwap. ¹² Ama ndəhay masa ma yamawa da wuzlah səkway ŋga ndəhay ŋga Gazlavay na, a da kəzlamata aa ambaw aa ləvan. Fetede na, a da təwam, a daa pədam sler.» ¹³ Ta', Yesu aa guzlar a mahura ŋga sewje hay heyey, a ləvar: «Daw a way dəba. Anja cek masa kah ma wudəy keđe na, ŋga key, anda kah ma təba mey adaw keđe.» Wure wure ŋgene madərlam anga heyey mbal! a mbəley.

Yesu a mbəley masa-macay hay ga

¹⁴ Cay, ta', Yesu a daw a way *Piyer. A hətfar maman ŋga ŋgwas ŋga Piyer e, vaw fa car, manakaya, awaw fa vaw ga.

¹⁵ Yesu ta', a gəsfar fa har. Da ray ŋgene, awaw fa vaw heyey daa saba. Ŋgwas aha pəta! a lecey, ta', a vəlar cek mezəmey a Yesu a.

¹⁶ Taa kwad a ŋgene, a handamawa ndəhay ga ta malula hay da ray. Yesu aa guzltar mey pal, ta', malula hay da ray ndəhay a, a bam. Asaya, a mbəldata ndəhay masa-macay hay tabiya. ¹⁷ Cek aha ta key la anda *Izay, *ndaw ma təla mey ŋga Gazlavay maa guzley zleezle, ma ləvey: «Ara anga ta ray anga ma jəndakwar daa bəle aləkwa, asaya, ara anga ma mbəldandakwar daa macay aləkwa hay tabiya.»

Mey da ray ndəhay ma wudam ŋga diyam asi Yesu

¹⁸ Masa Yesu ma nəkta ndəhay ga fa zlərmar ray na, ta', a ləvtar a gula anga hay amba a zləngam a dey langar

nga dēhwa nga *Galile. ¹⁹ Daa ηgene, *ndaw maa sarkada kwakwas nga Mawiz daha a ηgōchey a cakay a, aa guzlar, a ləvar: «Bay adaw, kwa aa slam wura wura masa kah ma da daw na, ya daw la asi akah.» ²⁰ Yesu a mbəfdara, a ləvar: «Mbiga hay, ata ta vōged ata hay, diyan hay, ata ta way ata hay. Ama yah, *Bəz nga Ndaw na, kwa slam nga ney nekəfey amba ya məskey vaw da hwaɗ a na, daa ba.»

²¹ Ndaw mekele da wuzlah ndəhay nga Yesu heyey, a sawa, a ləvar: «Bay adaw, vəlya cəved amba ya daw ya jəhərwa papay la daɗay.» ²² Yesu a mbəfdara, a ləvar: «Sawa asi adaw, mbəkdata ndəhay maməctakaya nga jəhmata ndəhay ata hay maməctakaya.»

*Yesu a lacada bərgadan da wuzlah dəhwa
(Mark 4.35-41; Luk 8.22-25)*

²³ Cay, Yesu kula! a mbəzey aa kwambiwəl, gula anɗa hay ta', a diyam bama. ²⁴ Daa masa kwambiwəl a fa daw na, wure ηgene memed mahura aa bərey a ray yam, mendərey nekəfey vanɗwala nga yam a sərta kwambiwəl a. Daa ηgene, Yesu na, manakaya daa ɗar. ²⁵ Ta', gula anɗa hay, a ηgōcham a cakay a, a sləkɗadamara, a ləvmar: «Bay Mahura, sləkɗey, ləhdandakwar! Aləkwa fa da məkwa.» ²⁶ Yesu a mbəfdatara, a ləvtar: «Ka zɗuram na, maja me? Akwar fa padamara Gazlavay nga ndaw akwar fara fara daa ba daw?» Pərta! a sləkɗey, ta', aa bəctar ηgada memed ta yam heyey. Memed deŋ! a lecey, yam a wusey saba. ²⁷ Da ray ηgene, ndəhay a rəzlam, a ləvam da wuzlah ata: «Ndaw a keɗe na, ara na, wa? Masa kwa memed ta yam a cənmər mey keɗe na!»

*Yesu a bəley malula da ray ndəhay cew
(Mark 5.1-20; Luk 8.26-39)*

²⁸ Daa masa Yesu ma wusey la a dey langar nga dēhwa nga *Galile heyey, masa daa hwayak nga ndəhay Gederen hay na, ndəhay cew daha ta malula da ray fa bamawa daa cəvay hay mavavərkwatakaya daa anɗwa, a cam ray ta Yesu. Ndəhay a, fa zlazləbam ndəhay ara mey ba, kwa ndaw ma gwa nga daw taa cəved e ηgene daa ba. ²⁹ Ndəhay a, a wudam ta gədan, a ləvmar a Yesu: «Kah, Bəzey nga Gazlavay, ka wuɗey fa ala na, me? Ka sawa nga sərɗandar banay dəga pas nga sariya aran daw?»

³⁰ Da fetede na, ηgaba nga vetem hay ga daha da mecəkwer gweegwe ta ata. ³¹ Malula hay da ray ndəhay kaa heyey a bərkwamara Yesu, aa cəɗamara, a ləvmar:

«Da ka da bəlnɔdar na, vəlnɔdar cəvedf amba ya diyam ya mbəzam aa vetem hay katay.» ³² Ta', Yesu a ləvtar: «Diyam, mbəzam.» Da ray ɲgene, a bam da ray ndəhay keɖe heyey, a diyam a mbəzam a ray vetem hay a. Ta', vetem hay a cəpa, a hwam ta gəɖaɲ ɲgadaa heelen, a tataram, a kwiyam saf! aa yam, aa zəɖam kuɖap! fetede.

³³ Mecəkwer hay ɲga vetem hay kaa heyey takw! a həlmara mahway a slala, a kadamatara mey a leɲ mey da ray ndəhay ta malula da ray heyey cəpa ɲgada ndəhay da slala ha. ³⁴ Da ray ɲgene, ndəhay tabiya da slala ha a bamawa, a cadamara ray ta Yesu. Ta', a bərkwamara ɲga daw la daa hwayak ata ha.

9

Yesu a mbəley ndaw maahəlbakaya
(Mark 2.1-12; Luk 5.17-26)

¹ Fa dəba ha, Yesu a təpey aa kwambiwal, a vəhey a dey langar ɲga dəhwa, a daw a slala aɲga. ² Ta', a handamar ndaw maahəlbakaya daha, manakaya da ray bebele. Masa Yesu ma nəka ndəhay a, fa təbmara aɲga ta gəɖaɲ ɲga mbəlda ndaw ata na, ta', a ləvar a ndaw maahəlbakaya heyey: «Dəka mevel, bəz aɖaw! Mebərey da ray akah daa saba.» ³ Fetede na, ndəhay maa sərkada kwakwas ɲga *Mawiz daha, a wulkam daa ray ata, a ləvam: «Ndaw a keɖe, a pa ray aɲga ɲga Gazlavay na, kwara?» ⁴ Yesu a səra mewulkey ata. Da ray ɲgene, aa cəɖɖata, a ləvtar: «Ka wulkam maaya ba anda keɖe na, maja me? ⁵ Ya gwa ya ləvey: “Məbərey akah daa saba” da daa ba, ya gwa ya ləvey: “Sləkɖey, daw ta salay akah.” Dasi mey hay cewete keɖe na, masa ta banay ɲga ləvey ɲgada yah na, wura? ⁶ Yaw, ya wuɖey ka sərmara, yah *Bəz ɲga Ndaw, yah ta gəɖaɲ ɲga mbəkey mebərey ɲga ndəhay da bəla keɖe. Wure keɖe, ka hətmar cek ma da key la.» Anda keɖe, Yesu, ta', a ləvar a ndaw maahəlbakaya heyey: «Sləkɖey, la bebele akah, daw a way!» ⁷ Ndaw aha pərta! a sləkɖey, ta', a daw a way. ⁸ Daa masa ndəhay makustakaya ma hətmar cek aha mekey na, a zluram, a rəzlam. A həlmamara Gazlavay maja aɲga ma vələr gəɖaɲ mahura anda keɖe a ndaw-magəɖaɲ.

Yesu a zəla Matiye
(Mark 2.13-17; Luk 5.27-32)

⁹ Yesu a sləkɖey daa slam aha, a daw. Masa aɲga fa daw na, a hətar ndaw daha mezəley *Matiye. Aɲga manjakaya fa key sləra daa slam mecekeley budaw. Ta', Yesu aa guzlar,

a ləvar: «Sawa, səpya.» Da ray n̄gene, Matiye p̄erta! a sləkdey, ta', a daw asiya.

¹⁰ Fa d̄əba ha nekədey, Yesu a daw n̄ga zəmey daf da way Matiye he. Daa way a, ata Yesu ta gula an̄ga hay a zəmamara daf a na, ta ndəhay ma cakala budaw ga leŋ ta ndəhay ma zləba *kwakwas n̄ga Mawiz. ¹¹ Masa *Fariza hay ma hətmatar fa zəmam daf bama ta ndəhay a na, ta', a ləvmatar a *gula hay n̄ga Yesu: «Bay akwar a zəmam daf ta ndəhay ma cakala budaw leŋ ta ndəhay ta mebərey hay na, kwara?»

¹² Yesu ma cənda mey a na, ta', aa guzltar, a ləvtar: «Ndəhay masa wurwer na, mey ata ta ndaw ma vəlda slalak daa ba. Ama ma wufey mey n̄ga ndaw ma vəlda slalak na, si ndəhay masa-macay hay gway. ¹³ Ehe, sərmara mey n̄ga Gazlavay mawuzlalakaya daa d̄erewel an̄ga, a ləvey: «Ya wufey na, ndəhay a səram dey-ceceh fa ndəhay, ba na, a hərmaya gənaŋ hay ba.» Yaw, ndəhay ma wulkam ata ndəhay maaya fa mey n̄ga Gazlavay na, Gazlavay ta slərđiwa n̄ga zəlta daa ba, ama a slərđiwa na, n̄ga zəley ndəhay ta mebərey.»

Mey da ray mekey daliyam

(Mark 2.18-22; Luk 5.33-39)

¹⁴ Fa d̄əba ha, gula hay n̄ga *Jan-Baptis a n̄gəcham a cakay Yesu, aa cəfdamara, a ləvmar: «Ala ta ndəhay *Fariza hay na, ala fa kam *daliyam *, ama gula akah hay na, a kam daliyam ba səlak na, maja me?» ¹⁵ Yesu a mbədfatara ta mey-men̄gey, a ləvey: «Da ndaw a zəlwa ndəhay aa mekey mələk n̄ga kwakwa n̄ga zəmey cek na, ndəhay a, aa səmam da cakay zel-kwakwa ha daa ba daw? Ta pas n̄gene a kam daliyam ba. Ama pas a, a sawa la masa ata ma da kərzamara zel-kwakwa † ha na, a kam daliyam la d̄əba.

¹⁶ «Yaw, ndaw a gwa n̄ga d̄əpa zana magurma ta zana mawiya daw? A key ba, maja zana mawiya madəpkaya na, a nəsa zana magurma ha la, zana magurma ha a da n̄gərey a dey a.

¹⁷ «Asaya, ndaw a gwa a zlərey wuzam meededeŋ e aa kwene-kwene ‡ magurma ba. Da a zləra a hwaď a na, wuzam a, a məsley, a n̄gəra kwene-kwene he la. Anda

9:9 9.9 8.21-22 **9:10** 9.10 11.19; Mk 2.15; Lk 5.29; 7.34; 15.1-2; 19.7 **9:13** 9.13 Aw 6.6; Mt 12.7; Lk 19.10 * **9:14** 9.14 daliyam: Da ndaw jəwif fa key daliyam na, a zəmey cek ba amba a nar ray a Gazlavay, a mbədda men̄jeŋ an̄ga. **9:14** 9.14 6.16-17; 11.18-19; Lk 7.33-34 † **9:15** 9.15 zel-kwakwa: Yesu a n̄gey mey da ray ndəhay ma da kərzamara n̄ga kədey vagay. **9:15** 9.15 22.2; 25.10; Jan 2.1-12; 3.29; CWJ 19.7 ‡ **9:17** 9.17 kwene-kwene: Ara cek anda des (gwajakwad) ama makakaya ta ambal.

keɗe, wuzam a lenj kwene-kwene he a n̄sam la cewete. Da ŋga key maaya na, si ndaw a z̄l̄era wuzam meedeɗek e na, aa kwene-kwene mawiya. Anda keɗe, wuzam a, aa daha, kwene-kwene may aa daha, cewete a n̄sam ba.»

Yesu a mb̄oley ŋgwas ta a sl̄ekɗad̄erwa dam daa mem̄oɗey

(Mark 5.21-43; Luk 8.40-56)

¹⁸ Daa masa Yesu faa guzltar anda ŋgene na, ndaw mahura daa *way-mewuzey-mey ŋga Gazlavay a sawa fa an̄ga, ta', a regedey fa mey an̄ga, a l̄ovar: «Dam aɗaw ta m̄oɗey sem wure wure keɗe. Ama ya fa kaka ambahw, sawa, pa har akah a ray a amba a h̄otar mes̄ofney an̄ga aa slam a c̄ŋga.» ¹⁹ Da ray ŋgene, Yesu a lecey, a diyam asiya ta gula an̄ga hay.

²⁰ Ŋgwas daha, mambaz fa mb̄oɗwa da hwaɗ d̄oɗga mevey kuraw a ray a cew. Daa masa Yesu fa daw na, ŋgwas aha a ŋḡoɗhey a cakay a ta fa d̄oɗba, ta', a ḡoɗfar har fa mey ŋga zana ŋga Yesu a. ²¹ A ka anda keɗe maja an̄ga fa wulkey daa mevel an̄ga, a l̄ovey: «Da ya gwa ŋga ḡoɗfar har kwa fa zana an̄ga na, ya mb̄oley la.» ²² Yesu p̄oɗa! a mb̄oɗey dey fa d̄oɗba, a n̄oɗka ŋgwas aha, ta', a l̄ovar: «D̄oɗka mevel, dam aɗaw! Ka ta mb̄oley cay maja kah ma paya ŋga ndaw akah fara fara.» Wure wure ŋgene, ŋgwas aha ta mb̄oley cay.

²³ Fa d̄oɗba ha, Yesu a wuswa a way ndaw mahura heyey. A h̄oɗfatar nd̄ohay ma fa sl̄oɗam, asaya nd̄ohay makustakaya fa mb̄oɗam haya! haya! ²⁴ Ta', a l̄oɗtar a nd̄ohay a: «Hwam la feɗe! Dam aha ta m̄oɗey daa ba, ama a key a ney aa ɗar.» Nd̄ohay a, aa san̄ḡoram da ray a. ²⁵ Daa masa nd̄ohay a ma bamawa sem aa ambaw na, Yesu a mb̄oɗey a way a, ta', a k̄erza dam aha fa har. Dam a p̄erta! a sl̄ekɗey. ²⁶ Mey da ray dam aha, a c̄oney aa wura aa wura tabiya daa hwayak a.

Yesu a wurey dey ŋga nd̄ohay wulaf hay cew

²⁷ Masa Yesu ma sl̄ekɗey da way ndaw mahura heyey la na, wulaf hay cew daha, a s̄oɗmar wurzay ta mewudey, a l̄oɗam: «S̄oɗfandar dey-ceceh, may taw, B̄oɗey ŋga *David!»

²⁸ Yesu a wusey a way na, wulaf hay cew heyey, a mb̄ozam asiya. Ta', Yesu aa c̄oɗɗata, a l̄oɗtar: «Ka wulkam na, ya gwa ŋga wurkwara dey akwar daw?» A mb̄oɗdamara, a l̄oɗmar: «Ahaw, Bay Mahura.» ²⁹ Da ray ŋgene, an̄ga gas! gas! a ḡoɗfatar har fa dey ŋga wulaf hay a, ta', a l̄oɗtar:

«Dey akwar nga wuram anda akwar ma təbmara ya gwa nga wurkwar.» ³⁰ Dey ata wur! wur! a wuram. Yesu a kətata, a ləvtar: «Jəkam sləmay maaya maaya, ndaw a da cənda cek masa ma key ta akwar keđe ba.» ³¹ Ama ndəhay cew kaa heyey, a mbəkdamara slam aha nekədey na, ta', a kadamara mey da ray Yesu a ndəhay daa hwayak a tabiya.

Yesu a bəla malula da ray ndaw ma gwa ngaa guzley ba

³² Masa ndəhay Yesu ma wurtara dey heyey fa bamawa da way a la na, ta', a handamar ndaw daha ma gwa ngaa guzley ba, maja anğa ta malula da ray. ³³ Ta', Yesu a bəla malula da ray ndaw a, ndaw aha aa guzley dəba. Da ray ngeney, ndəhay tabiya fetede a rəzlam, a ləvam: «Dəga nga menjey aləkwa, ya ta hətkwa cek ma key anda keđe daa hwayak nga *Işrayel keđe daa ba.» ³⁴ Ama ndəhay *Fariza hay na, aa guzlam, a ləvam: «Ara bay nga mesəfney maaya ba hay ma vəlar gədanj nga bəley malula da ray ndəhay.»

Mey da ray Yesu, ma key dey-ceceh fa ndəhay

³⁵ Yesu fa pəkta berney hay ta slala hay masa gweegwe ta dəhwa nga *Galile. Fetede faa sərkatada ndəhay daa way ata hay mewuzey mey nga Gazlavay, fa wuzey *Mey-maaya-mawiya da ray *mewey nga Bay Gazlavay da ray ndəhay, asaya, fa mbəley ndəhay daa macay hay wura wura cəpa lej ndəhay maahəlbatakaya tabiya. ³⁶ Masa Yesu ma hətatar ndəhay makustakaya na, dey-ceceh a kar maja a gəram, gədanj ata daa saba, ata anda təbanj hay manjar mecəkwer. ³⁷ Maja ngeney ta', a ngatar mey a gula anğa hay, a ləvtar: «Cek ta key la ga da ley Ş, ama ndəhay pəreh nga kamərwa ngada way. ³⁸ Anda keđe, kamar ambahw a bay nga ley a, nga slərwa ndəhay mekele saya a dey a nga kawa cek hay da ley a.»

10

Yesu a slərdata gula anğa hay kuraw a ray a cew
(Mark 3.13-19; Luk 6.12-16)

¹ Fa dəba ha, Yesu ta', a zəлта gula anğa hay kuraw a ray a cew amba a slərdata nga key sləra anğa. A vəltar gədanj nga bəley malula hay da ray ndəhay, asaya, nga

9:29 9.29 8.13 **9:30** 9.30 12.16; Mk 7.36 **9:31** 9.31 Mk 7.36 **9:32**
9.32-34 12.22-24 **9:34** 9.34 10.25; 12.24, 27; Mk 3.22; Lk 11.15, 19 **9:35**
9.35 4.23 **9:36** 9.36 Mesl 27.17; Ez 34.5; Zak 10.2; Mt 14.14; 15.32; Mk 8.2

Ş **9:37** 9.37 Cek ta key la ga da ley: Yesu a wa cek ma key da ley ta ndəhay ma da təbmara mey nga Gazlavay, ama ndəhay pəreh nga jənta nga təbmara mey nga Gazlavay a. Bay nga ley a na, ara Gazlavay.

mbøley ndøhay daa macay hay wura wura cøpa, leŋ ndøhay maahølbatakaya tabiya.

² Ndøhay meslørey kuraw a ray a cew e na, ara *Simanŋw, ndaw masa ma zølmara *Piyer ta mølmaha *Andøre, *Jak ta mølmaha *Jan, ata cewete bøza hay ŋga Zebede, ³ *Følep, *Bartelemey, *Tuma, *Matiye, *ndaw ma cakala budaw, Jak, bøzey ŋga Alfe, Taade, ⁴ Simanŋw, ndaw da wuzlah ndøhay ma wudam ŋga læhdamata ndøhay ata hay dasi har ŋga masa-gøra ata hay, leŋ Juda Iskariyawt, ndaw ma vølda Yesu a har masa-gøra anŋa hay.

Mey da ray sløra ŋga ndøhay meslørey ŋga Yesu ma da kamara

(Mark 6.7-13; Luk 9.1-6)

⁵⁻⁶ Yesu a slørdata gula anŋa hay kuraw a ray a cew heyey, a køtata, a lævtar: «Diyam fa ndøhay *Israyel hay. Ata maazøftakaya anda tøban hay maa zødam. Ama a slala ndøhay masa *Jøwif hay ba hay na, ka da diyam ba. Ka da diyam a slala *Samari hay ba may. ⁷ Da akwar fa diyam daa cøved na, wuzdamatara a ndøhay, lævmatar, “Gweegwe cay, bay ŋga Gazlavay a wuzwa.” ⁸ Mbøldamata masa-macay hay, sløkfadamatørwa ndøhay mamøctakaya, pørmata maasøkula hay, bølmata malula hay da ray ndøhay. Gødan a na, ya vøldakwara ŋga maaya. Yaw, akwar may, kamatara ŋga maaya. ⁹ Da akwar fa diyam na, ka da lam dala a har ba. ¹⁰ Ka da diyam ta gabal da har ba, kwa ta zana hay cew ba. Ka da diyam kwa ta tarak ba, kwa ta zlanday ba. Maja ndaw ma ka sløra na, si a høtey cek mezømey maja sløra anŋa.

¹¹ «Da akwar ma wusam la aa berney, da daa ba, a slala na, søpam ndaw masa ma wudfey ŋga tøbkwar. Njam da way anŋa haa kasl pas masa akwar ma da diyam. ¹² Da akwar fa mbøzam a way ndaw na, ka camatar har, ka lævmatar: “Maaya ŋga Gazlavay ŋga sawa a ray akwar.” ¹³ Da ndøhay da way a ta tøbmakwar la na, cacøfdamara Gazlavay amba maaya anŋa a njeý a ray ata. Ama da ta tøbmakwar daa ba na, cacøfdamara Gazlavay amba a la maaya anŋa ha la da ray ata. ¹⁴ Da way, da daa ba, da slala masa ndøhay da hwad a, a gømam ŋga tøbmakwar ba, asaya, a gømam ŋga cøndamara meý akwar ba na,

10:2 10.2-4 Jan 1.40-44; SNM 1.13 **10:5-6** 10.5 Lk 10.33 **10:5-6** 10.5-15 Lk 10.4-12 **10:5-6** 10.6 Jer 50.6; Mt 15.24; SNM 13.46 **10:7** 10.7 4.17 **10:10** 10.10 1Kwr 9.14; 1Tm 5.18 **10:13** 10.13 Lk 2.14

raramatara lagwada fa salay akwar hay *, bam la da way a, da daa ba, da slala ha. ¹⁵ Ya fa lœvkwar fara fara, ta pas nga sariya na, Gazlavay a da sœrdata banay ta ndœhay daa berney a ngene ma fœna nga ndœhay daa berney nga *Sadawm ta nga *Gwamar †.»

Mey da ray banay ma da sawa a ray ndœhay meslœrey nga Yesu

(Mark 13.9-13; Luk 21.12-17)

¹⁶ Yesu a patar lenġesl, a lœvtar: «Jœkam slœmay, ya fa slœrdakwar anda tœbaŋ hay ngada wuzlah gœdey-ley hay. Anda kede, wam vaw fa ndœhay anda zezekw hay ma wam vaw fa ray ata. Tœram ndœhay meekwed-mey anda makurgwadakw hay. ¹⁷ Wam vaw, maja a kœrzamakwar la, a handamakwar la fa mey nga ndœhay ma ka sariya. Asaya, a slœdmakwar la daa way ata hay mewuzey mey nga Gazlavay. ¹⁸ A dœdamakwar la fa mey nga ndœhay mahura hay lenġ fa mey nga bay hay maja akwar ndœhay adaw hay. Gazlavay a pœskatar mey la nga handamakwar amba ka kam sede da ray adaw fa mey ata lenġ fa mey nga ndœhay masa *Jœwif hay ba hay. ¹⁹ Da ta handamakwar la aa sariya na, ka da hœbam ray da ray mey masa akwar ma daa guzldamara ba, maja mey masa akwar ma daa guzldamara ngene na, a bawa la daa masa akwar faa guzlam. ²⁰ Yaw, mey a, a da bawa ta fa akwar ba, ama ara Mesœfney nga Papakw akwar Bay Gazlavay ma da balakwara mey a.

²¹ «Ndœhay a vœldamata mœlma ata hay la nga kœdey vagay. Papaŋ hay may, a vœldamata bœz ata hay la kœne. Bœza hay a kam hœma la a ray papa ata hay ta mama ata hay, amba ndœhay a kœdmata vagay. ²² Ndœhay cœpa a da ngœldamakwar ba maja yah. Ama ndaw ma bœsa banay a la haa kasl mendœvey a na, Gazlavay a lœhda la. ²³ Da fa sœrdamakwar banay da slala na, diyam a slala mekele. Ya fa lœvkwar fara fara, ta pas masa yah, *Bœz nga Ndaw, ma da vœhwa na, akwar ma ndœvdamara slœra akwar da slala hay tabiya nga *Israyel daa ba araŋ.

* **10:14** 10.14 raramatara lagwada fa salay akwar hay: Da Jœwif hay fa pœkam daa hwayak nga Jœwif hay ba hay na, a raramara lagwada fa salay ata hay lenġ fa zana ata hay maja a wulkam lagwada ha a da zlœbta. Yesu a lœvtar a gula anġa hay, da ndœhay da slala a tœbmara mey ata ba na, nga raramatara lagwada fa salay ata hay kœne. Nœka Mk 6.11; Lk 9.5. **10:14** 10.14 SNM 13.51

† **10:15** 10.15 Berney hay nga Sadawm ta nga Gwamar na, Gazlavay ta pœlhata sem cewete zleezle maja mebœrey nga ndœhay daa berney hay a kalah. Nœka Mezley 18 ta 19. **10:15** 10.15 MC 18.20; 19.1-29; Mt 11.24 **10:16** 10.16 Lk 10.3 **10:17** 10.17 SNM 5.40; 2Kwr 11.24 **10:17** 10.17-22 24.9-14; Mk 13.9-13; Lk 21.12-19; Janġ 16.1-4 **10:18** 10.18 SNM 24.1-26 **10:19** 10.19-20 Lk 12.11-12 **10:21** 10.21 Mi 7.6; Mt 10.35; Lk 12.52-53 **10:22** 10.22 5.11; Janġ 15.18 **10:23** 10.23 16.28; SNM 8.1

²⁴ «Ndaw maa sərkey na, a səra cek a fəna ndaw maa sərkada ba. Ndaw ma ka sləra na, mahura da ray bay anğa ba. ²⁵ Ndaw maa sərkey na, a da tərey anda ndaw maa sərkada ha gway. Ndaw ma ka sləra na, a da tərey anda bay nğa sləra ha gway. Yaw, akwar na, anda ndəhay da way adaw, da ta zəlmaya “*Beyelzebul †” sem na, nğene he, akwar ndəhay da way adaw, a da cədmakwar ma fəna.»

Ka da zluram ta ndəhay ba
(Luk 12.2-9)

²⁶ «Da ray nğene, ka da zluram ta ndəhay ba. Cek tabiya masa ndəhay ma badamara, a wuzwa la a palah, cek hay masa ndəhay ma sərmara ba na, a sərmara la. ²⁷ Mey masa yah ma wuzdakwara ta mayal a keđe na, wuzdamərwa a palah. Yaw, mey adaw masa akwar ma cəndamara ta meymesəkey keđe na, təpam aa ray nğa anğwa, wudmara ta gədan a ndəhay tabiya. ²⁸ Ka da zluram ta ndəhay ma da kədmakwar vagay ba, maja a da kədam na, vaw akwar daada gway, ama a gwamara a ray mesəfney akwar ba. Zluram na, si ta Gazlavay gway. Anğa na, a gwa nğa kəzla vaw akwar ta mesəfney akwar aa vəgeđ nğa awaw magaza.

²⁹ Diyan mecəhe mecəhe cew na, a gwa nğa həđkedey dala pal daada, ba daw? Ama kwa diyan mecəhe pal fa da kəzlwa a hwayak nğaa zəfey na, daa ba, si Papakw akwar Bay Gazlavay ma vəlda cəved nğaa zədda. ³⁰ Akwar may, kwa enğwec nğa ray akwar hay na, masləftakaya pal pal tabiya. ³¹ Yaw, maja nğene, ka da zluram ba. Akwar na, Gazlavay a wudkwar a fəna diyan hay mecəhe mecəhe ga nğene, ba daw?

³² «Kwa waawa ma ləvey fa mey nğa ndəhay, anğa ndaw adaw na, nğene, yah, ya da ləvey fa mey nğa Papay da vad, anğa, ndaw adaw may. ³³ Ama ndaw ma ləvey fa mey nğa ndəhay, a sərya ba na, nğene, ya da ləvey fa mey nğa Papay da vad, ya səra ndaw a ba may.»

Mey da ray ndəhay ma wunkam day maja mey nğa Yesu
(Luk 12.51-53; 14.26, 27)

³⁴ Yesu a patar lenğesl saya, a ləvtar: «Ka da wulkam ya sawa nğa handawa zazay a bəla na, kəne ba. Fara fara, ya sawa na, nğa handawa zazay ba, ama ya handawa vəram.

³⁵ Ya sawa na, amba ya wunkatar day nğa bəz-mezəle ta papaha, nğa dam-maŋgusa ta mamaha, leŋ nğa nğwas ta

10:24 10.24-25 Lk 6.40; Jan 13.16; 15.20 † **10:25** 10.25 Beyelzebul: Mezəley nğa bay nğa mesəfney maaya ba hay. **10:25** 10.25 9.34 **10:26** 10.26 Mk 4.22; Lk 8.17 **10:28** 10.28 Heb 10.31 **10:30** 10.30 Lk 21.18 **10:32** 10.32 CWJ 3.5 **10:33** 10.33 Mk 8.38; Lk 9.26; 2Tm 2.12 **10:34** 10.34 Lk 2.14

mamanj nga zel e. ³⁶ Kwa da way ndaw pal na, ndəhay siya hay a da təram masa-gəra nga siya hay.

³⁷ «Kwa waawa ma wudfa papaha ta mamaha kalah a fəna anğa ma wudya na, ta wusa nga njeý ta yah daa ba. Asaya, kwa waawa ma wudfa bəz anğa hay ta dam anğa hay kalah a fəna anğa ma wudya na, ta wusa nga njeý ta yah daa ba.

³⁸ Kwa waawa ma bəsa banay § ma da sawa a ray a maja yah daa ba na, ta wusa nga njeý ta yah daa ba. Asaya, kwa waawa ma səpya daa ba na, anğa ta wusa nga njeý ta yah daa ba may. ³⁹ Yaw, kwa waawa ma wudfey nga ləhda heter anğa na, aa zəfda la. Ama ndaw ma vəlda heter anğa maja yah na, a hətər la aa slam a.»

Gazlavay ma da pəley mawurbay nga sləra na, ngada wa hay wa?

(Mark 9.41)

⁴⁰ «Kwa waawa ma təbkwar la ta meesəmey na, a key a təbey ngeñe na, yah. Ndaw ma təbya na, a key a təbey ngeñe na, ndaw ma slərđiwa. ⁴¹ Yaw, kwa waawa ma təba *ndaw ma təla mey nga Gazlavay ta meesəmey, maja a səra, anğa ndaw ma təla mey nga Gazlavay na, a hətəy mawurbay nga sləra anğa la anda nga ndaw ma təla mey nga Gazlavay. Yaw, kwa waawa ma təba ndaw maja a səra, ara ndaw maaya fa mey nga Gazlavay na, a hətəy mawurbay nga sləra anğa la anda nga ndaw maaya ha may. ⁴² Kwa waawa ma vəlar yam makəslkaya ngada ndaw pal da wuzlah akwar, masa ma pa ray anğa nga mecəhe, maja a səra, anğa gula adaw na, ya fa ləvkwar fara fara, a hətəy mawurbay nga sləra anğa la.»

11

(Luk 7.18-35)

¹ Masa Yesu ma kətata ndəhay anğa hay meslərey kuraw a ray a cew heyey cay na, pərta! a sləkđey, a daw nga wuzey *Mey-maaya-mawiya ngada ndəhay da slala hay fetedə.

Jan-Baptis a slərđata gula anğa hay fa Yesu

² *Jan-Baptis, anğa daa fərsəne. Daa masa anğa daa fərsəne he na, a cənda mey da ray sləra nga Yesu *Kəriste. Ta', a slərey gula anğa hay siya fa Yesu a ³ ngaa cəfdamara, a ləvmar: «Kah na, Kəriste, ndaw ma da sawa nga ləhdata

10:35 10.35 10.21; 24.10; Mk 13.12; Lk 21.16 **10:35** 10.35-36 Mi 7.6 **10:37** 10.37 Mew 13.7-10; 33.9; Mt 19.29; Mk 10.29; Lk 18.29 § **10:38** 10.38 Ta mey Gərek a ləvey: «Kwa waawa ma la hwadam anğa mazlangalakaya nga daw asi adaw daa ba na, ta wusa nga njeý ta yah daa ba.» **10:38** 10.38-39 16.24-25; Mk 8.34-35; Lk 9.23-24; Jan 12.25-26 **10:40** 10.40 18.5; Mk 9.37; Lk 9.48; Jan 13.20; Gal 4.14 **11:1** 11.1 7.28 **11:2** 11.2 14.3

ndəhay heyey daw? Da daa ba, ya səkwam ndaw mekele ma da sawa daw?» ⁴ Yesu a mbəɸɸatara, a ləvtar: «Diyam, kadamara cek masa akwar ma cəndamara ta sləmay akwar, ta masa akwar ma hətmar ta dey akwar keɸe a Jan-Baptis. ⁵ Ləvmar na, wulaf hay fa hətmar dey dəɸa, jegwer * hay fa diyam maaya maaya ta salay ata, maasəkula hay ta səɸam sem, madagazlam hay fa cənəm sləmay, ndəhay maməctakaya fa sləkɸamawa daa meməcey, ndəhay masa-viya hay fa cəndamara Mey-maaya-mawiya dəɸa. ⁶ Ndaw ma mbəkda mey aɸaw ba maja sləra masa yah ma ka na, maaya ŋga Gazlavay aa da ray a.»

Mey da ray Jan-Baptis

⁷ Masa gula hay ŋga *Jan-Baptis ta diyam sem na, Yesu aa guzlar mey da ray Jan-Baptis a, a ndəhay, a ləvtar: «Akwar ma diyam a wuzlah-ley na, ŋga nəkwa me? Ka nəkmawa na, guzer masa memed ma wusa daw? Ara anɸa ba, ba diya? ⁸ Kaa, akwar ma diyam ŋga nəkwa na, me? Ka nəkmawa na, ndaw masa ma pey zana maaya fa vaw daw? Anja ndəhay masa ma pam zana maaya fa vaw na, ata da way bay hay, ba diya? ⁹ Wuzdamiwa, ka diyam ŋga nəkmawa na, wa? Ka nəkmawa na, *ndaw ma təla mey ŋga Gazlavay, ba diya? Ya fa ləvkwar, fara fara ara anɸa. Ama a fəna ndaw ma təla mey ŋga Gazlavay la saya, ¹⁰ maja *Jan a na, ara ndaw masa mey ŋga Gazlavay mawuzlalakaya maa guzley da ray a, a ləvey: “Bay Gazlavay a ləvar a Bəzey anɸa: Ehe, ya fa slərey maslan-cəved aɸaw fa mey akah, amba a diykawa cəved akah.”»

¹¹ Yesu aa guzley saya, a ləvey: «Ya fa ləvkwar fara fara, da wuzlah ndəhay da bəla na, kwa ndaw ma fəna Jan-Baptis na, daa ba. Ama ndaw mecəhe da wuzlah ndəhay masa Gazlavay fa wey da ray ata na, ndaw aha a fəna Jan-Baptis. ¹² Dəga ta pas masa Jan-Baptis ma zlar ŋga wuzey mey ŋga Gazlavay haa wure keɸe na, ndəhay malamba masa-həma hay fa kəɸam vaw ŋga təkmarə Bay Gazlavay ŋga wey da ray ndəhay. A wuɸam ŋga wamara bəla aa slam a ŋga Gazlavay. ¹³ Kwakwas ŋga *Mawiz ta ndəhay ma təla mey hay tabiya taa guzlam la da ray Gazlavay ma wey da ray ndəhay. Aa guzlam anda keɸe haa kasl pas masa Jan ma wuswa. ¹⁴ Da ka təbmara mey aɸaw na, ya fa ləvkwar, *Eli, ndaw masa ndəhay ma təla mey hay maa

11:3 11.3 Jan 1.15, 27; 3.31; 11.27 * **11:5** 11.5 jegwer: Ndaw masa salay pal maaya ba. **11:5** 11.5 Iz 35.5-6; 26.19; 61.1; Lk 4.18 **11:10** 11.10 Mal 3.1; Mab 23.20; Mk 1.2; Lk 1.76

guzlam zleezle da ray a ma da v̄hwa heyey na, ara Jan-Baptis a. ¹⁵ Da ndaw, an̄ga ta sl̄emay na, n̄ga c̄enda mey a maaya maaya.

¹⁶ «S̄ekway n̄ga nd̄ohay masa wure keɗe kaa na, ya da wata na, ta me? Yaw, ya da wata na, ta b̄eza hay masa manjatakaya da slala fa kam wasa ta mandala ata hay, a wudkam ɗay da wuzlah ata, a l̄ovam: ¹⁷ “Ala ta famakwar sl̄alam la, ama ka ta ḡervam daa ba. Ala ta zlamakwar walay vagay la, ama akwar ta t̄owam daa ba may.” ¹⁸ Yaa guzlkwar anda keɗe na, maja Jan ta sawa la n̄ga wuzkwar mey. A key *daliyam, asaya, a sey wuzam ba. Kaa nd̄ohay a l̄ovam: “An̄ga ta malula da ray.” ¹⁹ Yah, *B̄ez n̄ga Ndaw, ya sawa, ya fa z̄omey cek, ya fa sey cek anda nd̄ohay mekele. Ama nd̄ohay a l̄ovam: “N̄okmara, ndaw a keɗe, a wulkey si n̄ga z̄omey cek ta n̄ga sey wuzam n̄gada hwaɗ an̄ga gway. Asaya, an̄ga na, ara jam n̄ga nd̄ohay ma cakala budaw ta n̄ga nd̄ohay ma zl̄eba kwakwas n̄ga Mawiz.” Ama yah na, ya fa l̄ovkwar nd̄ohay a da s̄ermara len̄gesl n̄ga Gazlavay an̄ga maaya na, ta fa sl̄era maaya masa nd̄ohay ta len̄gesl n̄ga Gazlavay ma kamara.»

Mey da ray banay ma da sawa a ray nd̄ohay ma t̄ɓmara mey n̄ga Yesu ba

(Luk 10.13-15)

²⁰ Fa d̄ɓa ha, Yesu a mb̄ɗtar ray n̄gada nd̄ohay da slala hay masa aa ma key maazla hay ga da hwaɗ a. A mb̄ɗtar ray na, maja nd̄ohay da slala hay a, ta mb̄ɗdamara menjey ata daa ba. ²¹ A l̄ɗtar: «Haya! nd̄ohay da slala Kwarazij, banay a sawa la a ray akwar. Haya! nd̄ohay da slala Betsayda, banay a sawa la a ray akwar. Da nd̄ohay daa berney n̄ga Tir ta n̄ga Sidan̄w ta h̄ɗmatar maazla hay a la na, anja ta mb̄ɗdamara menjey ata sem d̄ɓa zleezle, anja ta k̄zlam zana n̄ga sak meef̄erey vaw sem fa vaw, asaya, ta p̄ɗkwalam sem daa beb̄ɗes n̄ga wuzwa na, ata ta mb̄ɗdamara menjey ata da b̄ɓa cay. ²² Da ray n̄gene, ya fa kadakwara, ta pas masa Gazlavay ma da ka sariya da ray b̄ɓa na, Gazlavay a da s̄ɗdakwar banay ma f̄ɓa n̄ga nd̄ohay daa berney n̄ga Tir ta n̄ga Sidan̄w. ²³ Akwar nd̄ohay da Kapernayum may, ka wulkam na, Gazlavay a n̄gɗlkwar la a vad̄ daw? Ara k̄ɓe ba. A da k̄zlakwar aa slam n̄ga nd̄ohay mam̄ɗtakaya. Ya ta key maazla hay la da wuzlah akwar. Da nd̄ohay daa berney n̄ga *Sadawm ta h̄ɗmatar maazla hay a keɗe la na, anja berney ata ta p̄lhey

11:14 11.14 1Bay 17.1; Mal 3.23; Mt 17.12-13; Mk 9.13 **11:15** 11.15 13.9, 43; Mk 4.9, 23; 7.16; Lk 8.8; 14.35 **11:18** 11.18-19 9.14; Mk 2.18; Lk 5.33 **11:19** 11.19 9.10; 11.2 **11:21** 11.21 Tir ta Sidan̄w: 15.21; Iz 23.1-16; Am 1.9-10; SNM 12.20

daa ba, anja anɔa daha haa wure keɗe. ²⁴ Da ray nɔgene, ya fa kadakwara, ta pas masa Gazlavay ma da ka sariya da ray bɛla na, Gazlavay a da sɛrdakwar banay ma fɛna nɔga ndɔhay daa berney nɔga Sadawm.»

Yesu a kar suse a Gazlavay ta meesamey
(Luk 10.21, 22)

²⁵ Daa nɔgene, Yesu aa guzley, a lɔvey: «Waa Papay Bay Gazlavay, ndaw ma wa slam da vad ta da hwayak, ya fa kaka suse, maja ka ta wuzdɛrwa maaya akah la a ndɔhay ma sɛra cek ba anda bɛza hay mecɔhe hay. Ama nɔgada ndɔhay masa ta lenɔgesl ma sɛra cek na, ka ta bada maaya ha sem fa ata. ²⁶ Ahaw, Papay, maja ta mbafaka sem nɔga ka kɛne.»

²⁷ Ta', Yesu aa guzltar a gula anɔa hay, a lɔvey: «Papay ta vɛldatiwa cek hay tabiya sem asi har adaw. Kwa ndaw pal ma sɛrya, yah, *Bɛz nɔga Ndaw na, daa ba, si Papay. Asaya, kwa ndaw pal ma sɛra Papay daa ba may, si yah, Bɛzey anɔa, lenj ndɔhay masa yah ma wufey nɔga wuzdatara.»

Mey da ray Yesu ma da mɛskadata vaw ta ndɔhay

²⁸ «Akwar ndɔhay masa fa gɛram nɔga sɔpey mey hay mekele mekele nɔga *ndɔhay maa sɛrkada kwakwas nɔga Mawiz nɔgene, samawa fa yah, akwar fa da gɛram daa saba.

²⁹ Cɛndamara mey adaw, samawa, sasɛrkam fa yah, maja yah ndaw meekwed-mey, ka da mɛskam vaw ta zazay.

³⁰ Meesɛrkey adaw na, anɔa ta banay nɔga cɛney ba, kwa slɛra masa yah ma da lɛvkwar nɔga key na, aa ta gɛra daa ba.»

12

Yesu, anɔa bay ma wey da ray pas memɛskey-vaw
(Mark 2.23-28; Luk 6.1-5)

¹ Pas pal daha, ara ta *pas memɛskey-vaw, ata Yesu ta gula anɔa hay a diyam taa ley nɔga cek anda daw *. May fa catar a gula anɔa hay a. Da ray nɔgene, ta', a hɛbam cek hay a heyey, aa mbɛɗmara. ² Daa masa ndɔhay *Fariza hay ma hɛtmatar gula anɔa hay fa hɛbam cek aha na, ta', aa guzlmarr a Yesu, a lɛvmar: «Haya! Nɛkta gula akah hay fa kam slɛra ta pas memɛskey-vaw, ara cek matɛkakaya daa *kwakwas nɔga Mawiz.»

11:23 11.23 Iz 14.13, 15 **11:24** 11.24 10.15; Lk 10.12 **11:25** 11.25 Iz 29.14; 1Kwr 1.18-29 **11:27** 11.27 28.18; Jan 1.18; 3.35; 10.15; 13.3; 17.2 **11:28** 11.28-30 Iz 28.12 **11:29** 11.29 Jer 6.16 * **12:1** 12.1 cek anda daw: Ta mey Pɛlta na, mezɔley «alkamaari», ta mey Nasara «le blɛ». **12:1** 12.1 Mew 23.25-26 **12:2** 12.2 Mab 20.8-10

³ Yesu a mbøfdatara, a løvtar: «Akwar ta janɔamara daa derewel nga Gazlavay cek masa *Davit ma ka zleezle na, daa ba daw? Ta pas lanɔar daha, ata Davit ta ndøhay anɔa hay, may fa catar, ama cek mezømey fa ata daa ba.

⁴ Maja nɔgene Davit e a mbøzey aa way nga Gazlavay, anɔa ta ndøhay anɔa hay, ta', a zømamara peɔ masa mavøldakaya nɔgada Gazlavay. Kwa kwakwas aløkwa ta pøskatar mey nga zømamara daa ba, anja nga zømamara na, si ndøhay ma ka kwakwas nga Gazlavay gway. ⁵ Asaya, ka ta janɔamara mey nga kwakwas nga Mawiz la, ta pas memøsey-vaw na, ndøhay ma ka kwakwas a fa kam sløra daa *Way-mekey-kwakwas nga Gazlavay. Anda kefe, ata fa zløbmara kwakwas nga pas memøsey-vaw, ama ara mebørey ba. ⁶ Ehe, ya fa løvkwar, cek mahura ma føna Way-mekey-kwakwas nga Gazlavay na, anɔa fefe da wuzlah akwar. ⁷ Derewel nga Gazlavay zleezle a løvey: "Ya wufey na, ndøhay a søram dey-ceceh fa ndøhay, ba na, a hørmaya gønaw hay ba." Ama ka ta cøndamara mabara nga mey a fara fara daa ba. Anja da ka ta cøndamara la na, ka gwamara nga mbøfmatar ray nɔgada ndøhay masa manjar mebørey kefe ba. ⁸ Yaw, ma wey da ray pas memøsey-vaw na, ara yah, *Bøz nga Ndaw.»

Yesu a diyra har mamøckaya nga ndaw ta pas memøsey-vaw

(Mark 3.1-6; Luk 6.6-11)

⁹ Fa døba ha, Yesu pørtal! a sløkdey, a daw a mbøzey aa *way-mewuzey-mey nga Gazlavay da slala ha. ¹⁰ Ndaw fetefe daha, har mamøckaya. Ndøhay *Fariza hay daa way-mewuzey-mey a, aa cøfðamara Yesu, a løvmar: «Kwakwas aløkwa ta vøley cøved la nga mbøley ndaw ta *pas memøsey-vaw daw?» Aa cøfðamara anda nɔgene na, amba aa døffamar mey. ¹¹ Yesu a mbøfdatara, a løvtar: «Da ndaw da wuzlah akwar, anɔa ta tøban pal, da tøban a, a køzley aa vøged ta pas memøsey-vaw na, ndaw aha, a badørwa daa vøged e daa ba daw? ¹² Yaw, ya fa løvkwar fara fara, ndaw a føna tøban ta maaya. Kaa wara kwakwas aløkwa a vøley cøved nga jøney ndaw ta pas memøsey-vaw ba na, kwara?»

¹³ Cay, ta', Yesu a løvar a ndaw masa har mamøckaya heyey: «Tøldørwa har a.» Tal! a tøldara har a. Ta', a diyey anda har lanɔar. ¹⁴ Da ray nɔgene, ndøhay Fariza hay a, a bamawa aa ambaw, a kusam, a cømdamara døy ata nga kødey Yesu vagay.

Mey da ray ndaw ma ka slëra masa Gazlavay ma wala

¹⁵ Daa masa Yesu ma sëra dabaray ata la na, përtä! a slëkdey daa slam aha, ndal! a daw. Ndëhay ga fa diyam asiya. Ta', a mbëldata masa-macay hay cëpa da wuzlah ata.

¹⁶ Ama a katar mey, a lëvtar: «Kwa ka da wuzdamara mey da ray adaw a ndëhay ba.» ¹⁷ Yesu maa guzley anda kedë na, mey a, ta key la anda *Izay, *ndaw ma tëla mey nga Gazlavay zleezle, ma lëvey:

¹⁸ «Gazlavay a lëvey: Kedë ara ndaw ma ka slëra adaw masa yah ma wala,

yah ma wudä kalah,
yah faa sëmey ga da ray a.

Ya slërey Mesëfney adaw la a ray a,
amba a wuzdatara a ndëhay masa Jëwif hay ba,
ya da katar sariya a ndëhay ta cëved e.

¹⁹ Kwa fa da tërey vaw ta ndaw daa ba,
kwa fa da wudey ta wudey daa ba.

Kwa fa da key baazlam da wuzlah ndëhay daa ba.

²⁰ Fa da ngërfa panay masa fa da hëbey na, daa ba.

Asaya, kwa fa da mëca petërä masa fa da mëcey na, daa ba,

maja ara ndaw mesërey dey-ceceh fa masa-bële hay.

A ka slëra anga ha la haa ta pas

masa aa ma da ka sariya fara fara da ray ndëhay cëpa.

²¹ Ndëhay tabiya a da pamara nga ndaw ata fara fara.»

Gëdanj nga Yesu a sawa na, dama?

(Mark 3.20-30; Luk 11.14-23)

²² Ta', a handamawa ndaw-wulaf daha ma gwa ngaa guzley ba, maja anga ta malula da ray. Yesu ta', a mbëlda, a gwa ngaa guzley, a gwa nga hëtar dey maaya maaya dëba.

²³ Ndëhay tabiya fetedë a rëzlam, a lëvam da ray Yesu: «Da ara Bëzey nga *Davit † heyey kwa?»

²⁴ Ama ndëhay *Fariza hay ma cëndamara mey a kedë na, a lëvam: «Ndaw kedë fa bëley malula da ray ndëhay ta maazla nga *Beyelzebul, bay nga mesëfney maaya ba hay.»

²⁵ Yesu a sëra mewulkey ata, a lëvtar: «Da ndëhay daa hwayak pal a kam vëram da wuzlah ata na, hwayak a ngene a nësey la. Asaya, ndëhay da slala hay, da daa ba, ndëhay da way ndaw pal, da ta cëmam dëy da wuzlah ata daa ba na, slala ha a nësey la, da daa ba, way nga ndaw aha a

12:16 12.16 8.4; 9.30; Mk 7.36 **12:17** 12.17-21 Iz 42.1-4 **12:18** 12.18 3.17
12:22 12.22-24 9.32-34 † **12:23** 12.23 Bëzey nga Davit: Ara mehësley-ray ngada ndaw mawalakaya ma da sawa nga key Bay Mahura nga Israyel hay, a da yawa daa sækway nga Davit, bay nga Israyel hay zleezle. **12:23** 12.23 20.30-31 **12:24** 12.24 10.25

nøsey la may. ²⁶ Da ndøhay nga *Satan fa kədam vaw da wuzlah ata na, ηgene he, ara Satan a, mekədey vaw ta vaw anga. Kaa wara a da cəmtar ray nga wey da ray ata na, kwara dəba wura? ²⁷ Da ka ləvam ya bəla malula ta gədan nga Beyelzebul, bay nga mesəfney maaya ba hay na, kaa gula akwar hay na, a bəlam malula ta gədan nga wa? Da ray ηgene, gula akwar hay na, a wuzdamakwara la, mey akwar ηgene, ara anga ba. ²⁸ Fara fara, ya fa bəley malula ta gədan nga *Mesəfney nga Gazlavay. A wudey nga ləvey, Gazlavay fa wey da ray akwar cay.

²⁹ «Yaw, kwa ndaw-mayal ma gwa nga mbəzey a way ndaw masa-gədan amba a lalatərwa cek anga hay meedey anga na, daa ba. Si ndaw-mayal a, a key gədan teesed, a jəwa ndaw masa-gədan a dāgay. Fa dəba ha, a gwa a həltərwa cek hay da way a.

³⁰ «Da ndaw ta njei ta yah daa ba na, ηgene ndaw a ara masa-gəra adaw. Asaya, da ndøhay a jənmaya nga bəcwa ray nga ndøhay ηgada fa Gazlavay ba na, a key ηgene, aa wadamatar ray. ³¹ Maja ηgene, ya fa ləvkwar, da ndaw ta key cek maaya ba sem, kwa a cəda Gazlavay na, Gazlavay a gwa a mbəkdara mebərey anga cəpa. Asaya, a gwa a mbəkdara mey hay maaya ba tabiya masa anga maa guzlda da ray Gazlavay a. Ama da ndaw a cəda Mesəfney nga Gazlavay na, Gazlavay fa da mbəkdara mebərey anga daa ba səlak. ³² Kwa anja ndaw aha aa guzley mey maaya ba da ray adaw, yah, *Bəz nga Ndaw na, Gazlavay a gwa a mbəkdara mebərey anga. Ama ndaw maa guzley mey maaya ba da ray Mesəfney nga Gazlavay na, Gazlavay fa da mbəkdara mebərey a daa ba, kwa wure kefe, kwa ta vara ta vara, fa da mbəkdara daa ba səlak.»

Mey-mənggey ta wudez meye babəza maaya ta maaya ba (Luk 6.43-45)

³³ «Da wudez, anga maaya na, a yey babəza maaya may. Da wudez, anga maaya ba na, a yey babəza maaya ba may. A da səmra wudez kefe maaya ta maaya ba na, fa babəza ha. ³⁴ Hey! Akwar bəza hay nga kucel hay, akwar ndøhay maaya ba, kaa wara ka daa guzlam mey maaya na, kwara? Maja mey masa ndaw maa guzlda na, fa wuzdərwa cek masa mabadakaya daa mevel anga. ³⁵ Anda kefe, ndaw maaya na, fa wuzdərwa cek maaya daa mevel anga. Ndaw malamba may, fa wuzdərwa cek malamba daa mevel anga. ³⁶ Ya fa ləvkwar, ta pas masa Bay Gazlavay ma da ka

sariya na, kwa waawa a kadara mey anɗa la a Bay Gazlavay da ray mey hay maaya ba masa aa maa guzldata cɔpa.

³⁷ Anda keɗe, da mey masa kah maa guzlda aa maaya ba na, Gazlavay a mbɔɗka ray la. Yaw, da mey a maaya na, ɗgene Gazlavay a paka la ɗga ndaw maaya fa mey anɗa.»

*Nɗohay aa cɔɗamara Yesu ɗga key maazla
(Mark 8.11, 12; Luk 11.29-32)*

³⁸ Fa dɔba ha, ndohay siya da wuzlah *ndohay maa sarkada kwakwas ɗga Mawiz leɗ *Fariza hay siya aa guzlmara a Yesu, a lɔvmar: «Bay ala, ya wuɗam ka kandar maazla ma wuzɗerwa gɔɗan ɗga Gazlavay.»

³⁹ Yesu a mbɔɗɗatara, a lɔvtar: «Akwar ndohay masa wure keɗe na, malamba hay, akwar ma mbɔɗdamara Bay Gazlavay sem! Ka wuɗam ɗga hɔtam maazla ma wuzɗerwa gɔɗan ɗga Gazlavay fara daw? Kwa akwar fa da hɔtam maazla ha daa ba, si maazla anda ma key ta *Jawnas, *ndaw ma tɔla mey ɗga Gazlavay zleezle. ⁴⁰ Anda Jawnas ma key ɗar maakar taa vad, taa pas da hwaɗ ewet mahura heyey na, ara anda ɗgene may, yah, *Bɔz ɗga Ndaw, ma da key ɗar maakar taa vad, taa pas da vɔgeɗ. ⁴¹ Ta pas sariya masa Gazlavay ma da ka na, ndohay daa berney ɗga Niniwe heyey na, a lacamawa la ɗga mbɔɗmakwar ray, akwar ndohay wure keɗe, maja daa masa ata ma cɔndamara mey ɗga Gazlavay masa Jawnas ma wuzɗatara na, ta mbɔɗdamara menjey ata sem. Nɔkmara, da wuzlah akwar feɗe, ndaw ma fɔna Jawnas daha, ama akwar ta mbɔɗdamara menjey akwar daa ba. ⁴² Asaya, ta pas sariya masa Gazlavay ma da ka na, ɗgwas ma key bay daa hwayak ɗga Saba zleezle heyey a lacawa la ɗga mbɔɗkwar ray, akwar ndohay wure keɗe, maja anɗa na, a sawa da dɔreɗ ɗga cɔney mey da ray leɗgesl maaya ɗga Bay *Salamanɗw. Nɔkmara, da wuzlah akwar feɗe, ndaw ma fɔna Bay Salamanɗw daha, ama akwar ta tɔbmara mey anɗa daa ba.»

*Mey da ray malula ma vɔhwa a ray ndaw saya
(Luk 11.24-26)*

⁴³ «Da masa malula ta bey sem da ray ndaw na, a daw a pɔkey da ley saw, a sɔpey slam ɗga mɔskey vaw. Ama da ta hɔtey slam daa ba na, ⁴⁴ a wulkey, a lɔvey: “Nɗama, ya vɔhey aa slam aɗaw masa yah ma bawa da hwaɗ a heyey.” A vɔhey a ray ndaw aha aa slam anɗa heyey, a hɔtfar slam aha maɗiykaya maaya maaya, kwa meeme da hwaɗ a daa

ba. ⁴⁵ Da ray ηgene, malula ha a daw, a ηgəlwa malula hay mekele maasala ma fənmara ta həma ηga key cek maaya ba. A samawa a ray ndaw a heyey. Anda kefe, ndaw aha a da sərey banay ma fəna masa ηgeeme. Ara anda kefe, cek aha a da key ta ndəhay masa maaya ba wure kefe.»

Maman ηga Yesu ta məlmaha hay na, ara wa hay wa?
(Mark 3.31-35; Luk 8.19-21)

⁴⁶ Daa masa Yesu faa guzltar a ndəhay na, ata mamaha ta məlmaha hay malacatakaya daa ambaw, a wudam ηгаа guzltar. ⁴⁷ Ndaw daha a ləvar a Yesu: «Mamakw ta məlmakw hay ata malacatakaya daa ambaw. A wudam ηгаа guzlmaka.»

⁴⁸ Yesu a mbəddara, a ləvar: «Mamay na, wa? Məlma adaw hay na, wa hay wa?» ⁴⁹ Fa dəba ha Yesu, ta', a wuzey har ηgada fa gula anηa hay, a ləvey: «Mamay ta məlma adaw hay na, ara ndəhay kefe, ⁵⁰ maja məlma adaw, dam-mama adaw, da daa ba, mamay na, ara ndaw ma key cek anda Papay da vad ma wudəy.»

13

Mey-menjey ta ndaw maa kwecey hulfad a ley
(Mark 4.1-9; Luk 8.4-8)

¹ Ta pas a ηgene, Yesu a bey da way, a daw a nje y a me y dəhwa ηga *Galile ηгаа sərkadata ndəhay. ² Ndəhay ga a kusam a cakay a. Maja ηgene, ta', Yesu a təpey aa kwambiwal, a nje y a hwad a amba aa guzltar. Kwambiwal a, aa da ray yam, ama ndəhay a na, malacatakaya da me y dəhwa ha. ³ Aa guzltar da ray cek hay ga ta me y-menjey, a ləvtar:

«Ndaw mehəvey daha, a daw ηгаа kwecey hulfad a ley anηa. ⁴ Daa masa anηa faa kwacada hulfad a na, hulfad lanηar a kəzley aa cəved. Fa dəba ha, diyan η hay a samawa, a ndamara. ⁵ Yaw, hulfad lanηar a kəzley aa slam masa pərad, hwiyak da ray a ga daa ba. Hulfad a, a pəcey fiyaw, maja hwiyak da ray a ga daa ba. ⁶ Ama menjey nekədey, da masa pas fa te y na, a bəta. Fa dəba ha, a kweley, maja slaslalay a daa vəged ga daa ba. ⁷ Hulfad lanηar a kəzley a wuzlah hatak. Hatak a, a gəley, aa nje rda hulfad mapəckaya ha. ⁸ Ama hulfad lanηar na, a kəzley aa slam masa maaya, a gəley, a ye y babəza ga, wurzay pal, a gwa a ye y babəza temere, lanηar kwakwar maakwaw, lanηar may, kwakwar maakar.»

⁹ Yesu aa guzltar saya, a ləvtar: «Da ndaw, anğa ta sləmay na, nğa cənda mey a maaya maaya.»

Yesu aa guzltar a ndəhay ta mey-menğey hay na, maja me?

(Mark 4.10-12; Luk 8.9, 10)

¹⁰ Fa dəba ha, *gula hay nğa Yesu a nğəcham a cakay a, aa cəfdamara, a ləvmar: «Kaa guzltar nğada ndəhay a ta mey-menğey hay na, maja me?»

¹¹ A mbədfatara, a ləvtar: «Yaa guzltar ta mey hay menğey na, maja akwar na, Gazlavay ta vəkwar cəved la nğa sərey mey hay mabadatakaya da ray mewey anğa da ray ndəhay. Ama ndəhay a keđe na, Gazlavay ta vəltar cəved nğa sərey mey a daa ba. ¹² Anda keđe, da ndaw a wudəy nğa səra mey nğa Gazlavay na, Gazlavay a jəna nğa səra mey a la a dey a. Da ndaw a wudəy nğa səra mey nğa Gazlavay ba na, kwa mey a masa nekədey daa mevel anğa na, Gazlavay a badərwa la tabiya. ¹³ Yaw, yaa guzltar ta mey-menğey na, maja ata fa nəkam dey, ama a hətmar dey ba, fa jəkam sləmay, ama a cəndamara ba. ¹⁴ Anda keđe, cek aha ta key la nğada ata, anda mey masa Gazlavay maa guzlda zleezle ta mey ndaw ma təla mey anğa *Izay, ma ləvey:

“Akwar fa jəkam sləmay maaya maaya,
ama ka cəndamara ba.

Akwar fa nəkam dey maaya maaya,
ama ka hətmar dey ba.

¹⁵ Maja ndəhay a, a gəmam nğa cənam mey ba,
a dəzlmata sləmay ata hay,
a dəpmata dey ata hay.

A kamara kəne amba a hətmar dey ba,
a jəkam sləmay ba,
a təbmara mey a, aa mevel ata ba.

Da ray nğene, fa da mbədfamara menjey ata
amba ya mbəldata na, daa ba.”

¹⁶ «Ama akwar, gula adaw hay na, maaya nğa Gazlavay aa da ray akwar, maja akwar fa hətmar dey, asaya, akwar fa jəkam sləmay. ¹⁷ Ya fa ləvkwar fara fara, ndəhay ma təla mey hay ga zleezle ta ndəhay siya ga masa maaya fa mey nğa Gazlavay ta wudam la nğa hətmar cek masa akwar ma hətmar keđe, ama ta hətmar daa ba. Ta wudam la nğa cəndamara cek masa akwar ma cəndamara keđe, ama ta cəndamara daa ba.»

*Mabara nga mey-menjey ta ndaw maa kwecey hulfad
(Mark 4.13-20; Luk 8.11-15)*

¹⁸ «Ehe, cøndamara mabara nga mey-menjey ta ndaw maa kwecey hulfad heyey dɔba. ¹⁹ Ndəhay siya hay a cøndamara mey da ray *mewey nga Gazlavay da ray ndəhay, ama a cøndamara mabara nga mey a ba. Baymalula a sawa, a la mey maaya daa mevel ata la. Ngada ata na, mey a, anɔa anda hulfad ma kəzley aa cəved. ²⁰ Ndəhay siya hay saya ma cøndamara mey nga Gazlavay la na, a tɔbmara fiyaw fiyaw ta meesəmey. Ngada ata na, mey a anɔa anda hulfad ma kəzley aa slam masa pərad. ²¹ Ama ndəhay a, a tɔbmara mey nga Gazlavay nga dar nekədey gway. Ta pas masa banay mekele mekele ma da sawa a ray ata maja mey a na, ndəhay a, a da mbəkdamara mey nga Gazlavay a fiyaw fiyaw. Ata na, anda hulfad ma pəcwa daa slam masa pərad, slaslalay daa vөгed ga daa ba. ²² Ndəhay mekele a cøndamara mey nga Gazlavay, a tɔbmara, ama mey a, aa zədey maja ata fa wulkam kalah da ray menjey maaya da bəla, asaya, maja a wudam zleley kalah. Ngada ata na, mey a, anɔa anda hulfad masa ma kəzley a wuzlah hatak, manjanjərdakaya daa hatak a. Ata anda cek ma yey babəza ba. ²³ Ndəhay mekele saya, a jəkam sləmay fa mey nga Gazlavay, a tɔbmara. Da ray nɔgene, fara fara a kadamara sləra ta anɔa. Ata anda hulfad ma pəcwa daa slam maaya. Anda kefe, mey a, a yey daa mevel ata anda hulfad ma pəcwa ma yey ga, babəza fa vəda a key temere, mekele a key kwakwar maakwaw, da daa ba, kwakwar maakar.»

Mey-menjey ta ley nga daw ta zlərav da hwad a

²⁴ Fa dɔba ha, Yesu aa guzltar ta mey-menjey mekele a ndəhay makustakaya heyey, a ləvtar: «*Mewey nga Bay Gazlavay da ray ndəhay na, ya gwa nga wa na, ta me? Ehe, ya nɔgakwar mey da ray a: Ndaw daha a sləkey hulfad maaya a ley anɔa. ²⁵ Ta tavad masa ndəhay fa nam na, masa-gəra anɔa, a sawa, a sləkey zlərav aa ley a, ta', a daw. ²⁶ Menjey nekədey, daw heyey a pəcwa. Zlərav a, a pəcwa may. A gəlam daa slam a, a pamawa ray *. ²⁷ Anda kefe, ndəhay ma ka sləra nga bay nga ley a, ta', a samawa, a ləvmar a bay ata: "Waa Bay ala, ka sləkey aa ley akah na, hulfad maaya, ba diya? Kaa zlərav na, a sawa dama?" ²⁸ A mbəfdatara, a ləvtar: "Ara masa-gəra adaw ma ka sləra ha." Ta', ndəhay ma ka sləra anɔa hay a, a ləvmar: "Anda kefe na, ka wudəy ya diyam, ya mədmata

daw?” ²⁹ A mbæfdatara, a ləvtar: “Kay, a njeý, maja da akwar fa mæfmata na, ka da mæfam daw maaya asiya may. ³⁰ Mbækdamata nga kam daa slam a haa kasl kiya mekey daw. Ta kiya ha ngeñe, ya da ləvtar ngada ndəhay ma da kamərwa daw a, nga ngəmamara zlərav a la dğagay, nga jəwmata maadƣay a, nga pamatar awaw fa vəfə. Ama daw maaya na, a kamərwa, a handamərwa a wudef.”»

Mey-menğey ta babəza nga bazlawar leŋ ta cek ma həsla makala

(Mark 4.30-32; Luk 13.18, 19)

³¹ Fa dəba ha, Yesu aa guzltar ta meý-menğey mekele saya a ndəhay fetede heyey, a ləvtar: «*Mewey nga Bay Gazlavay da ray ndəhay na, anğa anda babəza nga bazlawar, masa ndaw ma la, ma rəba aa ley anğa. ³² Anğa mecəhe da wuzlah hulfad hay siya, ama a pəcwa, a gəley mahura da ray cek hay siya, a tərey nga wudez, dıyan hay a samawa, a dıyam way fa meý-har hay a.»

(Luk 13.20, 21)

³³ Yesu aa guzltar ta meý-menğey mekele saya, a ləvtar: «Mewey nga Bay Gazlavay da ray ndəhay na, anğa anda cek ma həsla makala masa ngwas ma həley kuset kədəy, ma jahada ta hapa nga makala ga, amba a həslərwa tabiya.»

Yesu aa guzley ta meý-menğey na, maja me?

(Mark 4.33, 34)

³⁴ Yesu a wuzdatara meý hay cəpa ngada ndəhay na, ta meý-menğey. Kwa taa guzltar ta meý mekele daa ba.

³⁵ A ka kəne na, amba a key anda *ndaw ma təla meý nga Gazlavay maa guzley zleezle, ma ləvey:

«Ya daa guzltar a ndəhay ta meý-menğey,

Ya da wuzdatara cek hay masa zleezle mabadatakaya dəga Gazlavay ma ləma bəla.»

Mabara nga meý-menğey ta ley nga daw

³⁶ Fa dəba ha, Yesu ta', a mbækdata ndəhay heyey, a vəhey a way. Gula anğa hay ta', a samawa a cakay a, aa cəfdamara, a ləvmar: «Wuzdandara mabara nga meý-menğey ta zlərav da ley heyey cey.»

³⁷ Ta', a mbæfdatara, a ləvtar: «Ndaw ma sləka daw masa maaya na, ara yah, *Bəz nga Ndaw. ³⁸ Ley na, ara bəla. Hulfad masa maaya na, ara ndəhay ma təbmara amba Gazlavay a wey da ray ata. Zlərav na, ara ndəhay ma namar ray a bay-malula. ³⁹ Masa-gəra ma sləka zlərav na, ara *Satan, bay-malula. Kiya mekey daw na, ara pas

nga mendövey nga bëla. Ndöhay ma da kamərwa daw na, ara maslan hay nga Gazlavay da vad. ⁴⁰ Anda ata ma ngömamara zlerav nga tekwrey na, ta pas mendövey nga bëla na, a da key këne may ta ndöhay ma namar ray a bay-malula. ⁴¹ Anda kefe, yah, Böz nga Ndaw, ya slərdata maslan adaw hay da vad la nga badamata ndöhay ma təknamata ndöhay nga key mebörey leŋ ndöhay ma kam cek malamba da wuzlah ndöhay masa Gazlavay ma wey da ray ata. ⁴² A da kəzlamata aa awaw mendövey ba. Fetede na, a təwam la, aa pədam sler la. ⁴³ Ama ngada ndöhay ma namar ray a Bay Gazlavay na, a njam la ta Papa ata, Bay Gazlavay, da vad, a wadam la anda pas. Da ndaw, anga ta sləmay na, nga cənda mey a maaya maaya.»

Mey-menğey ta zleley mabadakaya leŋ ta bersle

⁴⁴ Yesu aa guzltar ta mey-menğey mekele saya, a ləvtar: «*Mewey nga Bay Gazlavay da ray ndöhay na, aa letek ta zleley mabadakaya daa ley. Ndaw a daw, a hətar, a bada ma fəna saya. Aa səmey ga da ray a. Maja ngene, a daw, a hədkadata cek anga hay tabiya amba a hədka ley a.

⁴⁵ «Asaya, mewey nga Gazlavay da ray ndöhay na, aa letek ta ndaw ma ka filaw, ma səpey bersle maaya membey nga hədkey. ⁴⁶ Da ta hətey bersle maaya membey ma hədkey ba la na, a daw, a hədkadata cek anga hay tabiya amba a hədka bersle he.»

Mey-menğey ta tabaw

⁴⁷ «Asaya, *mewey nga Gazlavay da ray ndöhay na, aa letek ta *tabaw † ma kərzawa ewet hay daa dəhwa, a kusmawa səkway nga ewet hay mekele mekele ga. ⁴⁸ Masa tabaw a ta rəhey cay ta ewet e na, ta', a badamərwa a mey dəhwa. A njam ta njey, a walamata səkway nga ewet hay masa maaya, a pamata aa gabal, ama səkway nga ewet hay masa maaya ba na, a kəzlamata. ⁴⁹⁻⁵⁰ Ta pas mendövey nga bëla na, maslan hay nga Gazlavay da vad, a samawa la nga wunkey ndöhay ma namar ray a Gazlavay ta ndöhay masa ta mebörey. Ndöhay masa ta mebörey na, a kəzlamata aa awaw mendövey ba. Fetede na, a təwam la, asaya, aa pədam sler la. Sariya nga Gazlavay ma da key na, ara anda kefe.»

Mey da ray mey hay menğey nga Yesu

13:40 13.40 7.19; Jan 15.6 **13:41** 13.41 24.31; Mk 13.27 **13:42** 13.42 8.12
13:43 13.43 Dan 12.3; NMH 5.31; Mt 11.15 **13:44** 13.44 Fəl 3.7-14 † **13:47**
13.47 tabaw: Ara njele mahura masa ndöhay ga ma kərzadamara ewet daa slam a. **13:49-50** 13.50 8.12

⁵¹ Yesu aa cəfdata gula anğa hay, a ləvtar: «Akwar ta sərmara mabara nğa mey hay menğey keđe la daw?» A mbəddamara, a ləvmar: «Ahaw, ala ta sərmara la.»

⁵² Da ray nğene, Yesu a nğatar mey mekele saya, a ləvtar: «Kwa waawa da wuzlah *ndəhay maa sərkada kwakwas nğa Mawiz ma təba amba Gazlavay a wey da ray a na, anğa anda bay nğa way ma badərwa zleley anğa mawiya ta magurma nğa jəney ndəhay.»

Ndəhay da Nezeret a rəsmara Yesu

(Mark 6.1-6; Luk 4.16-30)

⁵³ Masa Yesu maa guzltar a ndəhay ta mey hay menğey cay na, ta', a sləkdey fetede, ⁵⁴ a daw a *Nezeret, slala masa aa ma gəley da hwađ a. Fetede aa sərkadata ndəhay daa *way-mewuzey-mey nğa Gazlavay. Ndəhay tabiya daa way a, a rəzlam, a ləvam: «Haya! Ma vəldara lenğesl a ndaw a keđe nğa sərey cek hay anda keđe na, wa? A hətərwa lenğesl nğa sərey cek hay a keđe na, dama? ⁵⁵ Anğa na, bəzey nğa ndaw ma sla hwadam, ba diya? Mamaha na, *Mari, ba diya? Ata *Jak, *Jawzef, *Simanw leñ Jud na, məlmaha hay ba diya? ⁵⁶ Dam-mamaha hay tabiya, ata da wuzlah aləkwa fede, ba diya? Kaa a hətərwa lenğesl keđe ta gədan keđe na, dama?» ⁵⁷ Ara maja mewulkey ata nğene, ata ma təbmara mey nğa Yesu ba. Da ray nğene, Yesu aa guzltar, a ləvtar: «*Ndaw ma təla mey nğa Gazlavay na, ndəhay a təbmara mey anğa kwa dama dama, ama ma təbmara ba na, si ndəhay daa hwayak anğa, ndəhay daa səkway anğa.» ⁵⁸ Yesu a key maazla hay fetede nekədey gway maja ata ma təbmara mey anğa ba.

14

Mey da ray meməcey nğa Jan-Baptis

(Mark 6.14-29; Luk 9.7-9)

¹ Daa nğene, *Herawt, bay daa hwayak nğa *Galile, a cənda mey da ray Yesu. ² Da ray nğene, aa guzltar a madərlam anğa hay, a ləvtar: «Ndaw aha na, ara *Jan-Baptis. A sləkđawa daa meməcey. Ara maja nğene, anğa ta gədan nğa key maazla hay.»

³⁻⁴ Herawt aa guzley anda keđe na, maja ara anğa ta ray anğa ma kəda Jan-Baptis a vagay. Ehe mey da ray Jan-Baptis a: Herawt a la Herawdiyət, nğwas nğa məlmaha *Fəlep nğa nğwas anğa, daa masa Fəlep aa ta dey dğay. Maja nğene, *Jan a ləvar a Herawt: «Kah ma la nğwas nğa məlmakw nğene na, ara cek matəkakaya daa kwakwas

aləkwa.» Da ray ηgene, Herawt a ləvtar a sewje anɣa hay ηga kərzamara Jan a. Ta', sewje anɣa hay a, a kərzamara, a jəwmara, a kəzlamara aa fərsəne. ⁵ Herawt a wudəy ηga kəda Jan a vagay, ama a zlurey ta ndəhay *Jəwif hay maja a wulkam na, Jan a ara *ndaw ma təla mey ηga Gazlavay.

⁶ Yaw, ta pas gwagway ηga mesərfedey dər ηga mayawa ηga Herawt na, dam ηga Herawdiyat a gərvey fa mey ηga ndəhay mazəltakaya aa gwagway a. Megərvey a, a mbafar kalah a Herawt. ⁷ Ta', a mbedey fa mey ηga ndəhay, a ləvar a dam aha: «Kwa meeme masa kah maa cəfdafaya na, ya vəldakawa la.» ⁸ A mbəddara a Herawt, a ləvar: «Vəldiwa ray ηga Jan-Baptis aa vəley wure kedə fedə.» A ləvar anda ηgene na, maja mamaha ma balar mey.

⁹ Masa Bay Herawt ma cənda mey a kedə na, mevel a təfar. A gwa ηga mbədda mey anɣa ha saba, maja ta mbedey sem fa mey ηga ndəhay mazəltakaya heyey. Da ray ηgene, ta', a vəley cəved ηga vəlda ray ηga Jan-Baptis ηgada dam aha. ¹⁰ Ta', a slərey ndaw aa fərsəne. Ndaw aha a dəslərwa ray ηga Jan-Baptis, ¹¹ a parawa aa vəley, a handərwa, a vəldara a dam a heyey. Ta', dam aha a handara a mamaha. ¹² Fa dəba ha, gula hay ηga Jan-Baptis a, a diyam a lamara vagay a, a pəshamara aa cəvay. Ta', a diyam, a wuzdamara mey a, a Yesu.

Yesu a vəltar cek mezəmey ηgada ndəhay ma fəna gabal zlam

(Mark 6.30-44; Luk 9.10-17; Jan 6.1-14)

¹³ Daa masa Yesu ma cənda mey da ray meməcey ηga *Jan-Baptis la na, pərta! a sləkdey, ta', a daw ta kwambiwal amba a wusey taava anɣa aa slam masa ndəhay da hwaɗ a daa ba. Masa ndəhay da slala hay ma cəndamara anɣa sem na, a diyam ta mey dəhwa ha ta salay, a səpmar wurzay.

¹⁴ Anɣa ma wusey cay na, ta', a bərnɣawa daa kwambiwal a, a hətfatar ndəhay makustakaya ga fetedə. A sərfatar dey-ceceh, ta', a mbəldata masa-macay hay da wuzlah ata.

¹⁵ Ta pas ηgaa kwaɗ na, *gula hay ηga Yesu a ηgəcham fa vəda, a ləvmar: «Wure kedə hakwaɗ cay, aləkwa da wuzlah-ley. Nɣama na, ka mbədtar mey a ndəhay a ηga diyam a slala hay, amba a hədkam cek mezəmey.» ¹⁶ Yesu a mbəddatara, a ləvtar: «Ndəhay a na, si a diyam a slala hay daw? Akwar, ray akwar na, vəlmatar cek mezəmey a.»

¹⁷ Ama a mbəddamara, a ləvmar: «Kwa cek mezəmey fa ala daa ba, si peɗ zlam ta ewet cew daada gway.» ¹⁸ Yesu a mbəddatara, a ləvtar: «Handamərwa fedə.»

14:3-4 14.3-4 Lev 18.16; 20.21; Lk 3.19-20 **14:5** 14.5 21.26; Mk 11.32; Lk 20.6

14:13 14.13-21 15.32-39 **14:14** 14.14 9.36

19 Fa dɔba ha, Yesu a lɔvtar ŋgada ndɔhay tabiya ŋga njam a hwayak. Anŋa hal! a hɔlta peŋ zlam ta ewet cew heyey, a baŋgada dey a vad, a kar suse a Gazlavay. Fa dɔba ha, a papɔsa peŋ e, ta', a vɔldatara a gula anŋa hay amba a wunkamatara a ndɔhay makustakaya heyey. 20 Kwa waawa a zɔmey haa a rɔhey. Gula anŋa hay ta', a cakalamara siya ŋga peŋ e. Membɔkey na, a rɔhey gadakar kuraw a ray a cew. 21 Ndɔhay ma zɔmam peŋ e na, ata ga ara mey ba, a fɔna ndɔhay gabal zlam, ŋgusay ta bɔza hay manjar ŋga slɔfam.

*Yesu a daw ta salay da ray dɔhwa ŋga Galile
(Mark 6.45-52; Jan 6.15-21)*

22 Masa ndɔhay a ma zɔmam cek cay na, wure wure ŋgene Yesu ta', a tɔktar dɔay a gula anŋa hay ŋga tɔpam aa kwambiwal amba ata na, a zlɔngam teesɔd a dey lanŋar ŋga dɔhwa ŋga *Galile. Yesu na, a njeŋ fa dɔba daŋay amba a mbɔdɔtar mey a ndɔhay makustakaya heyey ŋga diyam a way. 23 Masa ta mbɔdɔtar mey a ndɔhay a cay na, ta', a tɔpeŋ aa ray ŋga anŋwa ŋga dɔrwa danŋay. Haa tavad, anŋa pal taava anŋa da anŋwa ha cɔnŋa. 24 Kwambiwal masa gula anŋa hay da hwad a heyey, anŋa da wuzlah yam, anŋa dɔreŋ ta rav-zazay, vanŋwala ŋga yam fa zakada * kwambiwal a maja memɔd fa key ga ŋgada ray ata. 25 Fa dɔba ha, gweegwe slam ŋgaa pɔrek na, Yesu ta', a daw ta salay da ray yam ŋgada fa ata. 26 Masa gula anŋa hay a ma hɔtmar fa daw da ray yam na, a zluram ga, aa wasam pɔrpar! Aa guzlam da wuzlah ata, a lɔvam: «Ara mamayam!» Ta', a wudam ta gɔdan maja mandɔrzay fa katar. 27 Ama, wure ŋgene, Yesu aa guzlar, a lɔvtar: «Dɔkmara mevel! Ara yah, ka da zluram ba!»

28 *Piyer a mbɔdɔdara, a lɔvar: «Bay adaw, da ara kah fara fara na, vɔlya cɔved amba ya daw da ray yam ŋgada fa kah taw.» 29 Ta', Yesu a lɔvar a Piyer: «Sawa!»

Piyer a bɔrŋgawa daa kwambiwal, a daw da ray yam ta salay ŋgada fa Yesu. 30 Ama, masa aa ma nɔka memɔd fa key ta gɔdan na, mandɔrzay a kar. A zlar ŋga mbɔzey asi yam, ta', a wudeŋ, a lɔvey: «Bay mahura, lɔhdaya!»

31 Wure wure ŋgene, Yesu tal! a tɔley har, a kɔrza fa har, a lɔvar: «Ka wulkey cew cew na, maja me? Kah, ndaw masa ma paya ŋga ndaw akah fara fara ba ŋgene.» 32 Fa dɔba ha, ta', a tɔpam cewete aa kwambiwal a. Wure wure ŋgene, memɔd e, deŋ! a leceŋ, a key saba. 33 Gula hay ŋga Yesu

14:20 14.20 2Bay 4.43-44 14:23 14.23 5.1; Lk 5.16 * 14:24 14.24 a zakada:
a dɔgda 14:25 14.25 Jɔw 9.8 14:26 14.26 Lk 24.37 14:30 14.30-32 8.26
14:31 14.31 6.30; 8.26; 16.8; 17.20; Lk 12.28

masa daa kwambiwal, a ragadam fa mey anga, a ləvmar: «Fara fara, kah na, Bəzey nga Gazlavay.»

Yesu a mbəley masa-macay hay daa hwayak nga Genezeret

(Mark 6.53-56)

³⁴ Masa ata Yesu ta gula anga hay ma təngam la a dey langar nga dəhwa nga *Galile heyey na, a wusam aa hwayak daha mezəley Genezeret. ³⁵ Ndəhay daa slam aha na, a sərmara ara Yesu. Ta', a kadamatara mey a, a ndəhay da slala hay mekele mekele daa hwayak a. Daa masa ata ma cəndamara mey a cay na, ta', a handamar masa-macay hay. ³⁶ A bərkwamara amba masa-macay hay a, a gəsam har kwa fa mey nga zana anga gway. Ndəhay ma gəsfamar har cəpa na, ta mbəlam sem.

15

Mey nga Yesu da ray kwakwas nga Jəwif hay

(Mark 7.1-13)

¹ Fa dəba ha, *Fariza hay ta *ndəhay maa sərkada kwakwas nga Mawiz a samawa da *Jeruzelem fa Yesu, a ləvmar: ² «Gula akah hay a zləbmara kwakwas nga papan nga papa aləkwa hay zleezle na, maja me? A da zəmam dəf na, a pərmara har anda kwakwas aləkwa ma ləvey ba na, kwara?» ³ Yesu a mbəddatara, a ləvtar: «Akwar na, ka zləbmara *mewey hay nga Gazlavay ta mesəpey kwakwas akwar hay na, maja me? ⁴ Gazlavay a ləvey: “Natar ray ngada ata papakw ta mamakw.” Asaya, “Ndaw ma cəda papaha, da daa ba, ma cəda mamaha na, si a kədmara ndaw aha vagay.” ⁵ Ama akwar na, akwar faa sərkadam ndəhay, ka ləvam ndaw a gwa nga ləvar a papaha, da daa ba, a mamaha: “Cek masa yah ma da vəldakawa nga jənka heyey na, ya vəldakawa daa saba, maja yah ma vəldara sem a Gazlavay.” ⁶ Ngene na, ndaw aha a nar ray a papaha, da daa ba, a mamaha ha saba, ba diya? Ara anda ngene, akwar fa nəsmara mey nga Gazlavay, ta mesəpey kwakwas akwar. ⁷ Akwar na, ndəhay masa ta neneh cew! *Izay, *ndaw ma təla mey nga Gazlavay zleezle maa guzley da ray akwar na, anja fara. Izay a, a ləvey:

⁸ “Gazlavay a ləvey: Ndəhay kefe fa həslmaya ray

ta mey nga tede,

ama mevel ata na, aa dərəj ta yah.

⁹ Ata fa həlmamaya,

ama mehəlmey a, ta tərey sem nga cek nga tede,

maja kwakwas masa ata maa sərkadamara ηgene na, ara kwakwas ηga ndaw-magedaη daada gway.”»

*Mey da ray cek mekey mebərey a ndaw
(Mark 7.14-23)*

¹⁰ Fa dəba ha, Yesu a zəltərwa ndəhay makustakaya ta', aa guzlar, a ləvtar: «Jəkam sləmay, cəndamara mey keđe maaya maaya: ¹¹ Cek masa ndaw ma ndəkwdə a mey, ma zəma na, a kar mebərey ba, ama ma kar mebərey na, si mey ma bawa da mey aηga.»

¹² Ta', *gula hay ηga Yesu a ηgəcham a cakay a, a ləvmar: «Ka fa sərə mey masa kah maa guzlda keđe na, fa catar mevel a *Fariza hay, ba diya?» ¹³ Yesu a mbədfatara, a ləvtar: «Kwa wudez wura wura masa Papay da vad, ma rəva ba na, a mədfmara la. ¹⁴ Mbəkdamata! Ata na, wulaf hay ma dafam wulaf hay anda ata. Da ndaw-wulaf a dēfey wulaf cəla ta zlanday na, ata cewete a tēfam la aa vөгed, ba diya?»

¹⁵ Fa dəba ha, *Piyer ta', aa guzlar, a ləvar: «Wuzdandara mabara ηga mey a keđe cey.» ¹⁶ Yesu a ləvey: «Akwar gula adaw hay kwa na, ka cəndamara mey a keđe ba saya na, gway daw? ¹⁷ Cek masa ndaw ma ndəkwdə a mey, ma zəma na, a daw ηgada hwad ηga ndaw aha. Fa dəba ha, a bawa a palah. Ka ta sərmara daa ba cəηga daw? ¹⁸ Ama mey masa ndaw maa guzlda ta mey aηga na, a sawa dəga daa mevel aηga. ηgene, a kar mebərey a ndaw aha. ¹⁹ Mewulkey maaya ba a bawa na, daa mevel ηga ndaw. Ara mewulkey a ma həlda ndaw ηga kəfey ndaw vəgay, ηga ley vaw saw da palah, ηga key cek malamba saw kəne, ηga leley, ηga mbərzley a ray ndaw, leη ηga key mbada fa ndəhay. ²⁰ Ara səkway ηga cek hay malamba anda keđe ma kar mebərey a ndaw. Ama, da ndaw a zəma cek ta har manjar ηga pərey na, ara mebərey ba.»

*Ngwas masa Jəwif ba a pa Yesu ηga ndaw aηga fara fara
(Mark 7.24-30)*

²¹ Fa dəba ha, Yesu pərta! a sləkdey daa slam aha, tal! a diyam ta gula aηga hay aa hwayak mekele masa berney ηga Tir ta berney ηga Sidaηw da hwad a. ²² Ngwas daa hwayak a daha, aηga dam Kana. A sawa fa Yesu, a kar ambahw, a wudey, a ləvar: «Waa Bay mahura, Bəzey ηga *Davit! Dam adaw daha, aηga ta malula da ray, fa sərda banay kalah. Sərfaya dey-ceceh may taw!» ²³ Yesu taa guzlar kwa mey pal daa ba. Gula aηga hay a ηgəcham a

cakay a, a ləvmar: «Mbədar mey a ηgwas a keɖe, maja fa səpndakwar wurzay ta mewudey.» ²⁴ Yesu a mbəɖɖatara, a ləvtar: «Gazlavay a slərɖiwa na, fa ndəhay *Israyel hay gway. Ata na, maazəɖtakaya anda təbaŋ hay manjar mecəkwer.»

²⁵ Ama, ηgwas a heyey a daw, a regeɖey fa mey anɔa, a ləvar: «Waa Bay mahura, jənya may taw!» ²⁶ Yesu a mbəɖɖara, a ləvar: «Mevəley ɖaf ηga bəza hay ηgada gəɖey hay na, maaya daw?» ²⁷ ηgwas a heyey a ləvar: «Ahaw, Bay aɖaw, kaa gəɖey hay na, a zəmam meepəsey ηga ɖaf ma kəzley daa slam masa bay ata hay ma zəmam ɖaf cəŋga, ba diya?» ²⁸ Da ray ηgene, Yesu a mbəɖɖara, a ləvar: «Maaya kwakwa! Kah ma paya la ηga ndaw akah fara fara. Cek aha ηga key anda kah ma wudey.» Daa ηgene, dam anɔa heyey a mbəley.

Yesu a mbəley masa-macay hay ga

²⁹ Fa dəba ha, Yesu a sləkɖey daa slam aha, a daw ta mey dəhwa ηga *Galile. Ta', a təpey aa ray ηga anɔwa, cəkwan! a njeɣ fetede. ³⁰ Ndəhay makustakaya ga, a samawa fa vəɖa, a handamawa ndəhay jegwer hay, ndəhay wulaf hay, ndəhay maahəlbatakaya hay, madagazlam hay lenj ndəhay ta macay hay mekele mekele ga. A njadamata fa mey ηga Yesu. Ta', a mbəɖɖata. ³¹ Ndəhay makustakaya heyey a rəzlam maja ata ma hətmatar madagazlam hay heyey faa guzlam dəba, ndəhay maahəlbatakaya hay heyey ta mbəlam cay, ndəhay jegwer hay heyey fa diyam ta salay ata hay, wulaf hay may fa hətmatar dey dəba. Ta', a həlmamara Bay Gazlavay ηga *Israyel hay.

Yesu a vəltar cek mezəmey ηgada ndəhay ma fəna gabal məfad

(Mark 8.1-10)

³² Yesu ta', a zəltərwa gula anɔa hay, a ləvtar: «Dey-ceceh fa kaya fa ndəhay makustakaya keɖe, maja anɔa kaa ɖar maakar ata da cakay aɖaw, wure keɖe cek mezəmey da har ata daa saba. Ya wudey ηga mbəkɖata ηga diyam a way ta may ba, maja da a da hətam gəɖaŋ daa cəveɖ ηga wusey a way ata hay ba kwa.» ³³ Gula anɔa hay a mbəɖɖamara, a ləvmar: «Kaa aləkwa da wuzlahley keɖe na, ya da hətmawa cek mezəmey ηga rəhɖata ndəhay tabiya makustakaya keɖe na, dama?» ³⁴ Yesu aa cəɖɖata, a ləvtar: «Da har akwar feɖe kaa na, peŋ we?» A

mbøddamara, a løvmar: «Da har ala na, peñ maasala ta ewet mecæhe mecæhe nekæfey gway.»

³⁵ Yesu a løvtar a ndøhay makustakaya heyey nga njam a hwayak. ³⁶ Annga ta', a høla peñ maasala ta ewet hay heyey, a kar suse a Gazlavay, a papøsa, ta', a vøldatara a gula annga hay. Gula annga hay a, a wunkamatara a ndøhay makustakaya ha. ³⁷ Kwa waawa ta høtey cek mezømey la, haa a røhey. Ta', gula annga hay a cakalamara siya mambækakaya. Macakalakaya ha a røhey gadakar mahura mahura maasala. ³⁸ Yaw, ndøhay ma zømamara peñ ta ewet e na, ndøhay gabal møfad, ngusay ta bøza hay manjar nga sløfam. ³⁹ Fa døba ha, Yesu a mbækdata ndøhay makustakaya ha nga diyam a way ata hay. Ta', a tøpey aa kwambiwal, a diyam aa hwayak mezøley Magadan.

16

Mahura nga Jøwif hay aa cøfdamara Yesu nga key maazla (Mark 8.11-13; Luk 12.54-56)

¹ Fa døba ha, *Fariza hay ta ndøhay *Saduse hay a ngøcham a cakay Yesu nga jadamara, aa cøfdamara amba a key maazla nga wuzda gødan annga a sawa ta fa Bay Gazlavay. ² Yesu a mbøfdatara, a løvtar: «[Masa pas fa køzley, gazlavay fa key magaza na, ka løvam mandaw na, gazlavay nga var a key daa ba. ³ Asaya, pørek pørek da masa pas fa bawa, fa cey na, ka løvam tasana na, var a pey la. Anda kefe, da akwar fa nøkam dey a gazlavay na, ka sømara cek ma da key tasana ta cek ma da key mandaw. Kaa sløra masa yah ma ka na, ka sømara mabara ha ba na, kwara?] ⁴ Akwar ndøhay masa wure kefe na, malamba hay, akwar ma mbækdamara Bay Gazlavay sem! Ka wudam nga høtam maazla ma wuzdərwa gødan nga Gazlavay fara daw? Kwa akwar fa da høtam maazla ha daa ba, si maazla anda ma key ta *Jawnas * zleezle.»

Fa døba ha, Yesu ta', a mbækdata, a daw.

Mey-mengey da ray meesærkedey nga Fariza hay ta nga Saduse hay (Mark 8.14-21)

⁵ Daa masa ata Yesu ta gula annga hay ma tøngam sem a dey langar nga døhwa na, gula annga hay a ta sørfadamara nga handawa peñ daa ba. ⁶ Ta', Yesu aa guzltar, a løvtar: «Wam vaw fa cek ma høsla peñ nga *Fariza hay lej nga *Saduse hay!» ⁷ Da ray ngene, gula annga hay aa guzlam

da wuzlah ata, a ləvam: «Aa guzley anda keɔe maja aləkwa ma sakurwa ta peŋ daa ba daw?»

⁸ Yesu na, ta sərə mey masa ata maa guzldamara da wuzlah ata sem. Da ray ŋgene, aa cəfɔata, a ləvtar: «Akwar ndəhay masa ma pamara Gazlavay ŋga ndaw akwar fara fara ba ŋgene, ka wulkam da ray peŋ masa akwar ma handamawa daa ba na, maja me? ⁹ Haa wure keɔe akwar na, ka cəndamara mey a ba cəŋga daw? Sərfadamara peŋ zlam masa yah ma wunkatara ŋgada ndəhay gabal zlam heyey. Mambəkakaya na, a rəhey gadakar we? ¹⁰ Asaya, sərfadamara peŋ maasala masa yah ma wunkatara ŋgada ndəhay gabal məfaɔ heyey. Mambəkakaya na, a rəhey gadakar mahura mahura we? ¹¹ Yaw, daa masa yah maa guzlkwar: “Wam vaw fa cek ma həsla peŋ masa fa Fariza hay leŋ fa Saduse hay” na, yaa guzley na, da ray peŋ ba. Kaa ka cəndamara ba na, kwara?»

¹² Anda keɔe, *gula hay ŋga Yesu heyey a sərmara, Yesu aa guzltar na, da ray cek ma həsla peŋ fara fara ba, ama a ŋgatar mey da ray meesərkedey ŋga Fariza hay ta ŋga Saduse hay.

*Piyer a wuzda, Yesu na, ara Kəriste
(Mark 8.27-30; Luk 9.18-21)*

¹³ Yesu a wusey aa slam masa gweegwe ta slala Sezere-Ɖəlep. Aa cəfɔata gula aŋga hay, a ləvtar: «Ndəhay a padamaya, yah, *Bəz ŋga Ndaw na, ŋga wa?»

¹⁴ A mbəɔdamara, a ləvmar: «Ndəhay siya a ləvam kah na, *Jan-Baptis, mekele hay a ləvam, kah na, *Eli, *ndaw ma təla mey ŋga Gazlavay zleezle. Ndəhay mekele hay saya a ləvam, kah na, Jeremey, da daa ba, ndaw mekele dasi ndəhay ma təla mey ŋga Gazlavay zleezle.»

¹⁵ Ta', Yesu aa cəfɔata saya, a ləvtar: «Kaa akwar may, ka ləvam yah na, wa?»

¹⁶ *Simanɔw *Piyer a mbəɔdara, a ləvar: «Kah na, *Kəriste, Bəzey ŋga Gazlavay, ndaw masa aŋga daha ta dey ŋga sərmataw.»

¹⁷ Yesu aa guzlar, a ləvar: «Simanɔw, bəzey ŋga *Jawnas, maaya ŋga Gazlavay aa da ray kah, maja mey masa kah maa guzlda keɔe na, ara ndaw-magədaŋ ma wuzdakawa ba, ama ara Papay da vad ma wuzdakawa. ¹⁸ Yaw, yah may, ya fa ləvka, kah na, mezəley akah Piyer anda meləvey “pəraɔ.” Ya da pa *mecəmey-ray ŋga ndəhay aɔaw hay da ray pəraɔ a. Kwa meməcey na, fa da gwa ŋgaa zəɔɔa daa

ba. ¹⁹ Ya da vëlka gëdan nga wurey cëved ngada ndəhay amba a təräm ndəhay nga Gazlavay. Mey masa kah ma da jəwa da bəla na, anğa majəwkaya da gazlavay da vad may. Asaya, mey masa kah ma da pəska da bəla na, anğa mapəskakaya da gazlavay da vad may.»

²⁰ Yesu ta', a kətata gula anğa hay, a katar mey, a ləvtar: «Fara fara yah na, Kərıste, ama ka da wuzdamara a ndəhay ba.»

Ndaw ma wudəy nga səpa Yesu na, si a key me?
(Mark 8.27-30; Lük 9.18-21)

²¹ Dəga ta pas masa *Piyer ma wuzda Yesu ara *Kərıste heyey na, Yesu a wuztar mey ngada gula anğa hay, a ləvtar: «Si ya daw a *Jeruzelem. Mahura hay nga *Jəwif hay, *bay-ray hay nga ndəhay ma ka kwakwas nga Gazlavay, leŋ *ndəhay maa sərkada kwakwas nga Mawiz na, a sərdamaya banay la fetede, a kədmaya la vagay. Ama nga đar maakar a na, ya sləkđawa la daa meməcey.»

²² Piyer ta', a zəla Yesu ta cakay, a mbəđar ray, a ləvar: «Kay! Bay mahura, Gazlavay nga ka kəne ba! Anja səkway nga cek anda ngene na, nga hətfaka ba səlak!»

²³ Ama Yesu pəla! a mbəđey dey ngada fa Piyer, a ləvar: «Hway la da cakay adaw, kah, *Satan. Kah na, ka fa səpey nga zlanğadadaya daa cəved adaw daw? Maja mewulkey akah ngene na, ara mewulkey nga Gazlavay ba, ama ara mewulkey nga ndaw-magədan gway.»

²⁴ Ta', Yesu aa guzltar a gula anğa hay, a ləvtar: «Da ndaw a wudəy nga səpya na, si a mbəkda mewulkey fa ray anğa, a səpya ta mevel pal, si a bəsa banay ma da sawa a ray anğa maja yah, anda yah ma da məcəy fa hwadam mazlanğalakaya. ²⁵ Sərmara, kwa waawa ma wudəy nga ləhda heter anğa na, a key aa zəđda, ama ndaw maa zəđda heter anğa maja yah na, a hətar la aa slam a. ²⁶ Da ndaw a hətey cek hay tabiya masa anğa ma wudəy da bəla kedə, ama taa zəđda heter anğa sem na, cek hay a tabiya ngene, ta ləhdamara ndaw a la daw? Yaw, ndaw a gwa nga mbəđa heter anğa na, ta me? ²⁷ Sərmara, yah, *Bəz nga Ndaw na, ya da sawa ta gədan nga Papay leŋ ta maslan anğa hay da vad. Ya da pəla mawurbay kwa nga waawa cəpa, təde fa sləra masa ndaw a ma ka. ²⁸ Ya fa ləvkwar fara fara, ndəhay siya da wuzlah akwar fedə, fa da məcām daa ba

16:18 16.18 Lk 22.32; Jan 1.42; 21.15-17; Ef 2.20 **16:19** 16.19 Lk 11.52; Mt 18.18; Jan 21.15-17 **16:20** 16.20 17.9 **16:21** 16.21 17.22-23; 20.17-19; 26.2 **16:24** 16.24-25 10.38-39; Lk 14.27; 17.33; Jan 12.25-26; 1Pi 2.21 **16:27** 16.27 Ps 62.13; Jəw 34.11; Mt 7.23-27; 13.41; 25.31-46; Lk 13.27; Jan 5.29; Rm 2.6; 1Kwr 3.13-15; 1Pi 1.17; 2Tm 4.14; CWJ 22.12

haa ata ma hətmaya ta dey ata la dƣagay, masa yah, Bəz nƣa Ndaw, ya fa zəma bay adaw.»

17

Yesu a mbədey fa dey nƣa gula anƣa hay
(Mark 9.2-13; Luk 9.28-36)

¹ Dar maakwaw fa dəba ha na, Yesu ta', a zəлта ata *Piyer, *Jak, leŋ *Jan, məlman nƣa Jak a, a nƣəлта aa ray nƣa anƣwa maazəma, a njam fetede taava ata. ² Yesu a, pəla! a mbədey fa dey ata, dey anƣa a wedey anda pas, zana anƣa mabara ndəd-nded. ³ Wure wure nƣene, ata *Mawiz ta *Eli a wuzmatar vaw a gula anƣa hay heyey *. Gula hay a, a hətmatar fa kam maɗay ta Yesu a. ⁴ Da ray nƣene, Piyer aa guzlar a Yesu, a ləvar: «Waa Bay Mahura, maaya na, ya njakwa fede. Da ka wudəy na, amba ya kərcey slam hay maakar, pal nƣada kah, pal nƣada Mawiz, pal nƣada Eli.»

⁵ Daa masa faa guzley aran na, mekwtene mewedey ndəd-nded! a sawa, sərət! a sərtata. A cənam ɗay maa guzłwa daa mekwtene he, a ləvey: «Kede he ara Bəzey adaw masa yah ma wudə kalah. Ara bəzey masa ya faa səmey ga da ray a. Jəkfamar sləmay!»

⁶ Masa *gula hay nƣa Yesu ma cəndamara la na, a złuram ga, ta', a təɗam ta mey ta mey, ɗanƣay dar! a hwayak. ⁷ Wure nƣene, Yesu a nƣəchawa a cakay ata, a wusta ta har, a ləvtar: «Sləkdam, ka da złuram ba.» ⁸ A banƣadamara dey na, a hətam ndaw mekele saba, si Yesu taava anƣa gway.

⁹ Masa ata fa bərnƣamawa da anƣwa ha na, Yesu a kətata, a ləvtar: «Ka da wuzdamara cek masa akwar ma hətmar kede a ndaw ba, haa kasl pas masa yah, *Bəz nƣa Ndaw, ma da sləkdawa daa meməcey.»

¹⁰ Ta', gula hay nƣa Yesu aa cəɗdamara, a ləvmar: «Ndəhay maa sərkada kwakwas nƣa Mawiz a ləvam si Eli a sawa la teesed da ray *Kəriste na, maja me?» ¹¹ Yesu a mbəɗdatara, a ləvtar: «Ahaw, fara fara si Eli a sawa nƣa ɗiyta cek hay cəpa maaya maaya. ¹² Ama, yah na, ya fa ləvkwar, Eli ta sawa cay. Ndəhay ta hətmar la, ama ta sərmara daa ba, ta kamar cek maaya ba la anda mevel ata ma wudəy. Ara kəne may, ndəhay a ma da sərdamaya banay, yah, Bəz nƣa Ndaw.»

¹³ Anda kede, gula hay nƣa Yesu ta sərmara sem Yesu aa guzłtar na, da ray *Jan-Baptis.

16:28 16.28 10.23; 24.34; Mk 9.1; 13.30; Lk 9.27; 21.32 **17:1** 17.1 5.1 **17:2** 17.2-8 2Pi 1.16-18; CWJ 1.16 * **17:3** 17.3 Ata Mawiz ta Eli na, ta məcam sem ɗəga zleezle, ta wuzmatar vaw la a gula hay nƣa Yesu. **17:5** 17.5 3.17 **17:9** 17.9 16.20 **17:10** 17.10-11 Mal 3.23-24; Mt 16.14 **17:12** 17.12-13 11.14; Lk 1.17; Jan 1.21

Yesu a bada cek da ray bəzey
(Mark 9.14-29; Luk 9.37-43a)

¹⁴ Masa ata Yesu ta gula anɗa hay maakar heyey ma wusam la a cakay ndəhay makustakaya na, ta', ndaw daha a ngəchawa a cakay Yesu, a regedey fa mey anɗa, ¹⁵ a kar ambahw, a ləvar: «Bay Mahura, bəzey adaw anɗa ta cek da ray, fa bəzlada, fa sərda banay. Da cek aha ta zlar nɗa bəzlada la na, ta pas langar a təɗda aa awaw, da daa ba, aa yam. Sərfar dey-ceceh may taw! ¹⁶ Ya ta handa la fa gula akah hay, ama ta gwamara nɗa mbəldamara daa ba.»

¹⁷ Yesu ta', aa guzley, a ləvey: «Hey! Akwar ndəhay marəzltakaya masa ma pamaya nɗa ndaw akwar fara fara ba kedfe. Ya da njey ta akwar na, haa ta vara? Ya da bəskwar na, haa ta vara? Handamiwa bəzey a fedfe!» ¹⁸ Masa ata ma handamərwa bəzey a la na, Yesu ta', aa bəcar a cek da ray bəzey a. Ta', cek aha a bey. Wure nɗene, bəzey a, a mbəley.

¹⁹ Masa ata Yesu ta gula anɗa hay ata taava ata na, ta', gula anɗa hay a, a ngəcham a cakay a, aa cəɗdamara, a ləvmar: «Ala ta gwamara nɗa badamara cek da ray bəzey a daa ba na, maja me?» ²⁰ Yesu a mbəɗɗatara, a ləvtar: «Maja akwar fa təɓmara mey nɗa Gazlavay fara fara daa ba. Ya fa ləvkwar fara fara, da akwar fa təɓmara mey nɗa Gazlavay kwa kuset kəɗey həma babəza nɗa bazlawar na, nɗene, ka gwamara nɗa ləvmar a anɗwa mahura kedfe, sləkɗey la fedfe, daw nɗada fataɗay na, anɗwa ha a sləkɗey la. Anda kedfe, cek masa ta gəra nɗa key fa akwar na, daa ba. [²¹ Ama nɗa bey cek anda kedfe da ray ndaw na, si ta medərey-danɗay a Bay Gazlavay len ta mekey *daliyam.]»

Yesu aa guzley saya da ray meməcey anɗa ta masləkɗawa anɗa

(Mark 9.30-32; Luk 9.43b-45)

²² Ta pas langar daha, ata Yesu ta gula anɗa hay a vəhmawa a *Galile, ata tabiya daa slam a. Yesu ta', aa guzlar, a ləvtar: «A da kərzamaya yah, *Bəz nɗa Ndaw, a da vəldamaya a har ndəhay. ²³ Ndəhay a, a da kəɗmaya vagay. Nɗa ɗar maakar a na, ya sləkɗawa la daa meməcey.»

Mey a kedfe a təɗtar mevel a gula anɗa hay.

Mey da ray budaw

²⁴ Ata Yesu ta gula anɗa hay a diyam a Kapernayum. Ata ma wusam la na, ndəhay ma cakala budaw nɗa *Way-mekey-kwakwas nɗa Gazlavay ata fetedfe. Ta', ndəhay a, a ngəcham a cakay *Piyer aa cəɗdamara, a ləvmar: «Bay

akwar na, a pøley budaw nga Way-mekey-kwakwas nga Gazlavay ba daw?» ²⁵ Piyer a mbødfdatara, a løvtar: «'A, 'a, fa pøley.»

Daa masa Piyer fa mbøzey a way masa Yesu aa da hwaɗ a na, Yesu aa guzlar teesed, a løvar: «Simanɗw Piyer, ya wufey ngaa cødfaka, ma pølam budaw a bay hay da bøla keɗe na, wa hay wa? Ara bøza hay nga bay hay a daw? Da daa ba, ara zøgdaw hay daw?»

²⁶ Piyer a mbødfara, a løvar: «Ara zøgdaw hay.»

Yesu a løvey: «Anda keɗe na, bøza hay nga bay a pølam budaw ba. ²⁷ Ama ngama ya pølkwa budaw a, amba mevel a catar ba. Anda keɗe, daw aa døhwa nga *Galile, køzla tetølem † akah a hwaɗ a. Ewet masa kah ma da lawa teesed na, ka wura mey nga ewet e, ka høtfey børey nga dala mak nga pølndakwara budaw a la. Larawa amba ka pølndakwara budaw aløkwa cew e.»

18

Ma da key mahura na, wa?

(Mark 9.33-37; Luk 9.46-48)

¹ Daa ngene, *gula hay nga Yesu a ngøcham a cakay a, aa cødfamara, a løvmar: «Da wuzlah ndøhay masa Gazlavay fa wey da ray ata na, mahura na, wa?» ² Yesu ta', a zølwa bøzey mecøhe, a lacada a wuzlah ata. ³ Ta', aa guzlar, a løvtar: «Ya fa løvkwar fara fara, da akwar ta mbødfam amba ka tøram anda bøza hay mecøhe daa ba na, ngene, akwar fa da njam a wuzlah ndøhay masa Gazlavay fa wey da ray ata na, daa ba sølak. ⁴ Ndaw ma pa ray anɗa nga mecøhe anda bøzey mecøhe keɗe na, ara anɗa ma da key mahura da wuzlah ndøhay masa Gazlavay fa wey da ray ata. ⁵ Kwa waawa ma tøbey bøzey anda bøzey mecøhe keɗe maja a wufya na, a key ngene, a tøbey yah, ray aɗaw.»

Mewey vaw fa cek ma bata ndaw

(Mark 9.42-48; Luk 17.1-2)

⁶ «Asaya, kwa waawa ma betey ndaw pal dasi ndøhay ma tøba mey aɗaw hay keɗe nga key mebørey na, ngada anɗa na, ngama ata ma jøwmar anɗwa mahura a ɗay, ma køzlamara aa bøløy gway. ⁷ Kay! Banay daha fa ndøhay da bøla keɗe, maja cek hay ga fa tøknamata ndøhay nga key mebørey. Ahaw fara, cek hay a, a da batamata nga key mebørey mandaw mandaw. Ama banay a sawa la a ray ndaw ma høldata ndøhay nga key mebørey a. ⁸ Da har akah,

da daa ba, salay akah, fa hældaka nga key mebörey na, dəsla har a, da daa ba, salay a, hazakada dören ta kah. Ngama kah ma hətəy heter mendəvey ba ta salay pal, da daa ba, ta har pal da ray kah ma da mbəzey aa awaw mendəvey ba ta har akah hay cewete, da daa ba, ta salay akah hay cewete.

⁹ Da dey akah fa hældaka nga key mebörey na, wuzlka dey a, hazakada dören ta kah. Ngama kah ma hətəy heter mendəvey ba ta dey pal, da ray kah ma da mbəzey aa vəged nga awaw magaza ta dey akah hay cewete.

(Luk 15.3-7)

¹⁰ «Pam lenjesl, kwa ka da rəsam ndaw pal letək da wuzlah ndəhay ma pamata ray ata nga mecəhe anda bəza hay ba. Fara fara, ya fa ləvkwar maslan ata hay da vad fa lacafamatar a ray da cakay Papay da vad mandaw mandaw.

[¹¹ Maja yah *Bəz nga Ndaw, ya sawa na, nga ləhdata ndəhay masa maazəftakaya.]»

Mey-menğey ta təban meezəfey

¹² «Da ndaw aa ta təban hay temere, da pal da wuzlah ata taa zəfey sem na, ndaw aha a da key na, kwara? A mbəkdata təban hay kwakwar zlam-letek a ray a zlam-letek da anğwa, a daw a səpərwa pal masa meezəfey a nğene daa ba daw? ¹³ Ya fa ləvkwar fara fara, da masa ta hətərwa la na, aa səmey la ga da ray təban a pal nğene, ma fəna da ray kwakwar zlam-letek a ray a zlam-letek masa taa zədam daa ba heyey. ¹⁴ Ara kəne, Papakw akwar masa da vad may, a wufey kwa ndaw pal letək da wuzlah ndəhay ma təba mey anğa hay aa zəfey ba.»

Da məlmakw ta kaka cek maaya ba la na, ka da kada na, kwara?

¹⁵ Yesu aa guzltar a gula anğa hay, a ləvtar: «Da məlmakw * ta kaka cek maaya ba la na, daw fa vəfa, kadara mebörey anğa ha, akwar taa cew e. Da ta cəndakawa mey akah la na, nğene ara cek maaya, kah ma diya məlmakw a sem.

¹⁶ Ama da a cəndakawa mey akah ba na, nğəley ndaw pal, da daa ba, ndəhay cew asi akah. Ka ka anda kefe na, anda dərəwel nga Gazlavay ma ləvey: “Kwa cek wura wura maaya ba masa ndaw ma ka, nga sərey mey da ray a fara fara na, maaya na, ndəhay cew, da daa ba, maakar a nəkmara mey a, a kam sede da ray mey a.” ¹⁷ Da a cəndakwara ba cənğa na, kada mey a, a ndəhay daa *mecəmey-ray nga ndəhay adaw hay. Da a cəntar mey a

18:8 18.8-9 5.29-30 **18:10** 18.10-14 Jan 10.11-15 **18:14** 18.14 6.10 * **18:15** 18.15 məlmakw: A wufey nga ləvey ara məlman nga səkway ba, ama ara məlman daa mey nga Gazlavay. **18:15** 18.15 Lev 19.17; Gal 6.1 **18:16** 18.16 Mew 19.15; Jan 8.17; 2Kwr 13.1; 1Tm 5.19

ndəhay daa mecəmey-ray a ba cəŋga na, pa mələmakw a ŋga ndaw ma səra Gazlavay ba, da daa ba, pa ŋga *ndaw ma cakala budaw.»

Mey da ray medərey-danġay

¹⁸ «Ya fa ləvkwar fara fara, kwa mey wura wura masa akwar ma da jəwmara da bəla na, anġa majəwkaya da gazlavay da vad may. Asaya, kwa mey wura wura masa akwar ma da pəskamara da bəla na, anġa mapəskakaya da gazlavay da vad may.

¹⁹ «Ya fa ləvkwar saya: da ndəhay cew da bəla keċe, a cəmam dəy ŋгаа cəfdəy kwa meeme daa medərey-danġay na, Papay da vad a vəltar la. ²⁰ Maja da ndəhay cew, da daa ba, maakar ta cəmam la ta mezəley adaw na, yah da wuzlah ata.»

Mey-menġey ta ndaw ma ka sləra ma sərey dey-ceceh ba

²¹ Fa dəba ha, *Piyer ta', a ŋgəchey fa Yesu, a ləvar: «Bay Mahura, da mələma adaw fa kaya cek maaya ba mandaw mandaw na, ya da mbəkdara mebərey anġa na, dey we? Haa dey maasala daw?» ²² Yesu a mbəkdara, a ləvar: «Kay! dey maasala daada ba, ama dey kwakwar maasala haa dey maasala ha.

²³ «Maja ŋgene, ya wudəy ŋga ŋgakwar mey amba ka səmra Gazlavay a wey da ray ndəhay na, kwara. Bay daha a wudəy ŋгаа cəfdə dəvaz anġa fa ndəhay ma ka sləra anġa hay. ²⁴ Masa anġa fa zlar ŋгаа cəfdə dəvaz a na, a handamar ndaw pal masa ta dala anġa da ray a ga a sləfey ba. ²⁵ Cek anġa ŋga pəla daa ba. Anda keċe, bay a, a pəskatar mey a gula anġa hay ŋga hədkadamara ndaw aha, ta ŋgwas anġa, ta bəz anġa hay leŋ cek anġa hay cəpa ŋga pəley dəvaz a. ²⁶ Ta', ndaw a heyey, a pətkeley fa mey ŋga bay anġa ha, a ləvar: “Ambahw, bay adaw, vəlya đar nekəfey, cay na, ya pəlkawa cəpa.” ²⁷ Bay heyey dey-ceceh a kar fa ndaw aha. Anda keċe, a mbəkda dəvaz anġa da ray ndaw aha heyey cəpa, ta', a mbəkda ŋga daw.

²⁸ «Masa ndaw aha fa bawa na, a cam ray ta ndaw mekele masa ata ma kam sləra bama. Dəvaz anġa fa ndaw aha daha may, dəvaz a, kuset kəfey gway. Kaw! a kərza ndaw aha kas! asi đay. Ta', a ləvar: “Pəlyawa dala adaw.” ²⁹ Ndaw masa ata ma kam sləra bama heyey, ta', a pətkeley fa mey anġa, a dərar danġay, a ləvar: “Ambahw, vəlya đar nekəfey, cay na, ya pəlkawa.” ³⁰ Ama ndaw kaa heyey a təba ba. Ta', a handa, a kəzla aa fərsəne, haa

an̄ga ma p̄lra d̄evaz an̄ga ha. ³¹ Mandala an̄ga hay siya ma h̄tmar na, a r̄ezlam, mevel a catar ga. Ta', a diyam a wuzdamara mey a c̄pa a bay ata heyey. ³² Da ray n̄gene, bay a heyey a z̄lrawa ndaw aha, a l̄var: "Kah na, ndaw malamba. Ya ta mb̄kdakawa d̄evaz masa da ray kah sem c̄pa maja kah ma d̄erya dan̄gay. ³³ Kaa kah na, ka s̄rfar dey-ceceh fa mandala akah anda yah ma s̄rfaka dey-ceceh ba na, kwara?" ³⁴ Mevel a car a bay heyey, ta', a v̄lda a har nd̄ohay n̄ga s̄rdamara banay, haa aa ma p̄lra d̄evaz an̄ga ha c̄pa.»

³⁵ Cay, Yesu ta', a patar len̄gesl, a l̄vtar: «Yaw, ara anda n̄gene, da ndaw da wuzlah akwar a mb̄kdara meb̄rey n̄ga m̄lmaha ta mevel pal ba na, Papay da vad̄, fa da mb̄kdara meb̄rey an̄ga daa ba k̄ne may.»

19

Mey da ray meb̄ley n̄gwas
(Mark 10.1-12; Luk 16.18)

¹ Masa Yesu ma nd̄vda mey an̄ga cay na, ta', a bey daa hwayak n̄ga *Galile, a daw aa hwayak n̄ga *Jude da dey lan̄gar n̄ga wayam n̄ga Jurden̄. ² Nd̄ohay ga, a s̄pmar wurzay. Fetede, ta', a mb̄ldata masa-macay hay da wuzlah ata.

³ *Fariza hay a diyam a cakay a, amba a jadamara. Aa c̄fdamara, a l̄vmar: «Kwakwas al̄kwa a v̄ley c̄ved a ndaw n̄ga b̄la n̄gwas an̄ga, kwa fa mey wura wura daw?» ⁴ Yesu a mb̄ddatara, a l̄vtar: «Mawuzlalakaya daa d̄erewel n̄ga Gazlavay a l̄vey: "Daa mezley n̄ga b̄la, Gazlavay a l̄mwa na, zel ta n̄gwas." Ka ta jan̄gamara mey a daa ba daw? ⁵ Gazlavay a l̄vey saya: "Maja n̄gene, ndaw-mez̄le a mb̄kda papaha ta mamaha, amba a c̄mam ta n̄gwas an̄ga. Ata cewete, a t̄ram anda ndaw pal."»

⁶ Anda ked̄e, ata nd̄ohay cew saba, ama ata anda ndaw pal. Yaw, cek masa Gazlavay ma c̄ma sem anda ked̄e na, ndaw a da wunka ba.»

⁷ Fariza hay a, aa c̄fdamara Yesu a saya, a l̄vmar: «*Mawiz ta wuzleley mewey la ma l̄vey, da ndaw a wud̄ey n̄ga b̄la n̄gwas an̄ga na, si a wuzlalar d̄erewel n̄ga wuzda an̄ga ma b̄la sem. Kaa a wuzlala mey a anda ked̄e na, maja me?» ⁸ Yesu a mb̄ddatara, a l̄vtar: «Mawiz a v̄lkwar c̄ved n̄ga b̄ley n̄gwas akwar hay na, maja mevel akwar maaya ba. Ama daa mezley n̄ga b̄la na, cek aha ta key k̄ne na, daa ba. ⁹ Ya fa l̄vkwara fara fara, kwa waawa ma

bøla ngwas anga, ngwas aha ta ley vaw saw da palah daa ba, a ley ngwas mekele, a key ngene na, a ley vaw saw da palah.»

¹⁰ Gula anga hay, a ləvmar: «Da nga bəley ngwas si anda kefe na, ngama, ndaw a njei manjar ngwas.» ¹¹ Yesu a mbəddatara, a ləvtar: «Ndəhay cəpa a təbmara meyi a nga key kəne ba. Ma gwa nga təbmara na, si ndəhay masa Gazlavay ma vəltar gədanj nga təbmara meyi a. ¹² Sərmara, cek hay mekele mekele daha ma təkta ndəhay nga ley ngwas. Ndəhay siya maja vaw a latar ba dəga nga mayawa ata, siya maja ata maanngwadatakaya, siya hay may a njam manjar ngwas, maja a wudam nga key sləra ngada Bay Gazlavay gway. Da ndaw ma gwa nga təba meyi masa yah ma kada da ray meley ngwas kefe daha na, nga təba.»

*Yesu a pəstar meyi a bəza hay
(Mark 10.13-16; Luk 18.15-17)*

¹³ Fa dəba ha, ndəhay a handamata bəza hay fa Yesu, amba a patar har a ray, a pəstar meyi, a dərey dangay maja ata. Ama gula anga hay, a kamatar meyi a ndəhay a. ¹⁴ Da ray ngene, Yesu aa guzltar a gula anga hay a, a ləvtar: «Mbəkdamatərwa bəza hay nga samawa fa yah! Ka da təkмата ba, maja Gazlavay fa wey da ray ndəhay masa anda bəza hay a.» ¹⁵ Ta', a patar har a ray, a pəstar meyi. Fa dəba ha, ndal! madaw anga.

*Bəz-gula masa-zleley aa cəfda Yesu da ray mehətey heter mendəvey ba
(Mark 10.17-31; Luk 18.18-30)*

¹⁶ Ta pas langar daha, bəz-gula daha a ngəchey a cakay Yesu, aa cəfda, a ləvar: «Bay adaw, ya da key maaya amba ya hətəy heter mendəvey ba na, me?» ¹⁷ Yesu a mbəddara, a ləvar: «Kaa cəfdaya da ray mekey cek maaya na, maja me? Ara Gazlavay pal taava anga, ndaw maaya. Da ka wudəy nga hətəy heter mendəvey ba na, si ka nar ray a *mewey hay nga Gazlavay.» ¹⁸ Gula ha aa cəfda Yesu, a ləvar: «Ya ney ray na, a mewey hay wura?» Yesu a mbəddara, a ləvar: «Ka da kəfey ndaw vagay ba, ka da ley vaw saw da palah ba, ka da leley ba, ka da mbərzley a ray ndaw ba.

¹⁹ Natar ray ngada ata papakw ta mamakw, asaya, wudə meseembew akah anda kah ma wudə ray akah.» ²⁰ Bəz-gula ha, a ləvar: «Mewey hay a cəpa kefe, ya ta zləfta daa ba səlak, ma mbəkya nga key na, wura dəba wura?» ²¹ Yesu a ləvar a bəz-gula ha: «Da ka wudəy nga tərey ndaw maaya

kalah na, daw, hɔdkadata cek akah hay tabiya, wunkatara dala ha a masa-viya hay. Da ka ta ka la anda keɗe na, ka da hɔtey zleley fa Gazlavay da vad. Masa kah ma vɔldatara dala ha cay a masa-viya hay na, sawa, sɔpya.» ²² Masa bɔz-gula ha ma cɔnda mey a anda keɗe na, ta', a daw, anɗa ta meesɔmey daa ba, maja aa ta zleley ga, a wudɗey nɗa vɔldatara a ndɔhay ba.

²³ Da ray nɗene, Yesu aa guzltar a gula anɗa hay, a lɔvtar: «Ya fa lɔvkwar fara fara, anɗa ta banay ga nɗada ndaw masa-zleley amba a tɔba Gazlavay nɗa wey da ray a. ²⁴ Asaya, ya fa lɔvkwar, anɗa ta banay nɗada slagwama nɗa mbɔzey taa vɔgeɗ nɗa baatal. Ama, anɗa ta banay ga ma fɔna saya nɗada ndaw masa-zleley nɗa tɔba Gazlavay nɗa wey da ray a.» ²⁵ Masa gula anɗa hay ma cɔndamara mey a keɗe na, a rɔzlam ga, a lɔvam: «Kay! Da anda keɗe na, ma da lɔhey daa meɔrey na, wa?» ²⁶ Da ray nɗene, Yesu a nɔkta, a lɔvtar: «Mɔlɔhey daa meɔrey na, ara cek masa ndaw-magɔdan ma gwa nɗa ka ba, ama Gazlavay na, a gwa nɗa kata cek hay tabiya.»

²⁷ Ta', *Piyer aa guzlar a Yesu a, a lɔvar: «Yaw, ala na, ya ta mbɔkdamatɔrwa cek ala hay sem cɔpa, amba ya sɔpmaka. Kaa ya da hɔtam fa salay ala na, me?» ²⁸ Yesu a mbɔɗɗatara, a lɔvtar: «Ya fa lɔvkwar fara fara, ta pas masa cek hay cɔpa ma da tɔram mawiya na, yah, *Bɔz nɗa Ndaw, ya da nɗey aa slam-menɗey aɗaw mawadakaya nɗa wey da ray ndɔhay. Akwar, kuraw a ray a cew masa ma sɔpmaya keɗe na, ka da nɗam aa slam-menɗey nɗa bay hay amba ka kamatar sariya nɗada sɔkway hay kuraw a ray a cew nɗa *Israyel. ²⁹ Da ndaw a mbɔkɗɔrwa way anɗa, da daa ba, a mbɔkɗatɔrwa mɔlmaha hay, dam-mamaha hay, mamaha, papaha, bɔz anɗa hay, da daa ba, a mbɔkɗatɔrwa ley anɗa hay, amba a sɔpya na, ndaw aha a hɔtey cek hay a la ma fɔna masa anɗa ma mbɔkɗatɔrwa nɗene a key dey temere. Asaya, a hɔtey heter mendɔvey ba la may. ³⁰ Yaw, ndɔhay ga ma tɔbmara mey aɗaw nɗeeme, a da vɔham fa dɔba. Asaya, ndɔhay ga masa fa dɔba, a da diyam fa mey.»

20

Mey-menɗey ta ndɔhay ma ka slɔra da ley

¹ Ta', Yesu aa guzltar a gula anɗa hay, a lɔvtar: «Ya gwa nɗa wa cek masa ndɔhay ma da hɔtam ta pas masa

19:21 19.21 6.20; 8.21-22; Lk 12.33 **19:22** 19.22 Ps 62.11 **19:26** 19.26 Zak 8.6; Lk 1.37 **19:28** 19.28 25.31; Lk 22.30; 1Kwr 6.2; CWJ 3.21 **19:29** 19.29 10.37 **19:30** 19.30 20.16; Mk 10.31; Lk 13.30

Gazlavay ma da wuzdərwa mewey an̄ga da ray ndəhay na, ta me? Ehe, ya n̄gakwar mey da ray a. Bay n̄ga ley daha, a bawa taa p̄erek e n̄ga səpey ndəhay n̄ga key sl̄era da ley an̄ga. ² A kam maɗay ta ndəhay ma ka sl̄era. Fa mevərndey na, a da v̄ltar dala t̄ɔde n̄ga sl̄era n̄ga ndaw mevərndey da ley. Ta', a l̄vhtar n̄ga diyam a ley an̄ga ha d̄ɔba. ³ Pas t̄ɔde meh̄oley maaca na, a bawa da way saya, a da n̄akey dey na, a ray ndəhay mekele hay manjatakaya n̄ga maaya daa slam aha. ⁴ Ta', a l̄vhtar: "Diyam ta kam sl̄era da ley aɗaw katay may, amba ya p̄elkwar dala t̄ɔde fa sl̄era akwar a." ⁵ Ta', ndəhay a, a diyam aa sl̄era ha. Bay n̄ga ley kaa heyey a bawa ta wuzlah-pas, a h̄oley ndəhay mekele. Asaya, a bawa ta pas n̄gaa kwaɗ, a h̄oley ndəhay mekele saya. ⁶ Pas gweegwe a k̄ezley na, a bawa, a h̄otey ndəhay manjatakaya daa slam aha saya, a l̄vhtar: "Ka v̄rndam n̄ga maaya anda keɗe na, maja me?" ⁷ A mb̄ɔɗdamara, a l̄vhtar: "Ya v̄rndam n̄ga maaya na, maja ndaw ma h̄ɔlndar aa sl̄era daa ba." Anda keɗe, a l̄vhtar: "Yaw, diyam a ley aɗaw, ta kam sl̄era may."

⁸ «Masa pas ta k̄ezley cay na, ta', a z̄ɔlrawa *bay-ray n̄ga sl̄era an̄ga, a l̄var: "Z̄ɔlt̄ərwa ndəhay ma ka sl̄era, p̄ɔltara dala ata. Ka zlar ta fa ndəhay ma samawa madagway-dakw haa kasl fa ndəhay ma samawa n̄geeme." ⁹ Ndəhay madagway-dakw heyey a diyam fa bay-ray n̄ga sl̄era heyey d̄ɔba, a t̄ɔbmara dala ata, kwa waawa a h̄otey dala t̄ɔde n̄ga sl̄era n̄ga ndaw mevərndey da ley. ¹⁰ Ndəhay n̄geeme heyey a diyam may, a wulkam na, a da h̄ɔtam ma f̄ɔna n̄ga ndəhay madagway-dakw hay heyey. Ama, a h̄ɔtam na, dala t̄ɔde n̄ga sl̄era n̄ga ndaw mevərndey da ley c̄n̄ga gway. ¹¹ Masa fa t̄ɔbmara dala ha na, faa n̄guram mey da ray bay n̄ga ley a, ¹² a l̄vam: "Ndəhay ma samawa madagway-dakw keɗe, a kam sl̄era b̄ɔrey pal gway, ama ka v̄ltar dala letek ta ala ma kam sl̄era hipas daa pas mecey na, kwara?" ¹³ Ta', bay n̄ga ley a, aa guzley n̄gada ndaw pal da wuzlah ata, a l̄var: "Jam aɗaw, ya ta bataka daa ba s̄ɔlak, maja ya kakwa maɗay na, da ray dala t̄ɔde n̄ga mevərndey n̄ga sl̄era n̄ga ndaw pal da ley, ba diya? ¹⁴ T̄ɔba dala akah masa anda al̄ɔkwa ma kakwa maɗay, daw. Ya wuɗey n̄ga v̄ɔlar dala h̄ɔma n̄ga akah a ndaw ma sawa aa sl̄era fa d̄ɔba keɗe. ¹⁵ Fa kah na, ya gwa n̄ga key cek ta zleley aɗaw anda yah ma wuɗey ba daw? S̄ɔɔɔn̄ fa kaka maja yah ndaw maaya daw?"»

¹⁶ Ta', Yesu aa guzltar saya, a l̄vhtar: «Ara anda keɗe, ndəhay madagway-dakw, a da t̄ɔram ndəhay n̄geeme,

asaya, ndohay ngeeme a da taram ndohay madagway-dakw.»

Yesu aa guzley nga dey maakar da ray memacey anga ta maslakdawa anga

(Mark 10.32-34; Luk 18.31-34)

¹⁷ Ata Yesu fa diyam a *Jeruzelem. Daa masa ata daa caved na, ta', Yesu a ngelta gula anga hay kuraw a ray a cew ta cakay, a lɔvtar: ¹⁸ «Ehe, wure kedɛ alɛkwa fa nakwa a Jeruzelem. Fetede na, a da vɛldamaya, yah *Bɛz nga Ndaw, a har *bay-ray hay nga ndohay ma ka kwakwas ta *ndohay maa sɛrkada kwakwas nga Mawiz. A da kamaya sariya nga kɛdey vagay. ¹⁹ Asaya, a da vɛldamaya a har ndohay masa *Jɛwif hay ba, amba aa sanɣeram a ray adaw, a slɛdmaya ta laway, a dɛrmaya fa hwadam mazlangalakaya, ya macey la. Nga dar maakar a na, ya slɛkdawa la daa memacey a.»

Maman nga ata Jak ta Jan aa cɛfda Yesu

(Mark 10.35-45)

²⁰ Fa dɛba ha, ngwas nga Zebede ta bɛz anga hay a ngɔcham fa Yesu. Ngwas aha a regedey fa mey anga, aa cɛfda nga jɛna. ²¹ Yesu ta', aa cɛfda, a lɔvar: «Ka wudɛy na, me?» Ngwas aha, aa mbɛddara, a lɔvar: «Ya wudɛy na, ka lɔvya dɛga wure kedɛ, daa masa ka fa zɛma bay akah na, ka da njadata bɛz adaw hay cew kedɛ, pal ta har-zɛmay akah, langar ta har-gula akah.» ²² Yesu aa guzltar a bɛza hay nga ngwas a heyey, a lɔvtar: «Ka sɛrmara cek masa akwar maa cɛfdam ba. Ka gwamara nga sɛram banay la anda yah ma da sɛra daw *?» Ta', a mbɛddamara, a lɔvmar: «Ahaw, ya gwamara.» ²³ Yesu a lɔvtar: «Ahaw, ka sɛram banay la anda yah ma da sɛra. Ama nga njey ta har-zɛmay adaw, da daa ba, ta har-gula adaw na, ara yah ma da dɛsla mey a nɣene ba. Ara Papay ma dɛyta slam hay a nɣene ngada ndohay masa aa ma walata.»

²⁴ Fa dɛba ha, masa gula anga hay siya kuraw ma cɛndamara mey a na, a cam mevel a ray mɛlman hay cew heyey. ²⁵ Da ray nɣene, Yesu a zɛlta tabiya, a lɔvtar: «Ka sɛrmara da wuzlah ndohay da bɛla kedɛ na, bay hay daha. Bay hay a na, fa wam da ray ndohay ta gɛdan, asaya, mahura hay mekele fa wam da ray ndohay ta caved e ba. ²⁶ Ama da wuzlah akwar na, a da key kɛne ba. Yaw, da ndaw da wuzlah akwar a wudɛy nga key mahura na, si

20:16 20.16 19.30 **20:17** 20.17-19 16.21; 27.26-31 * **20:22** 20.22 Ka gwamara nga sɛram banay la anda yah ma da sɛra daw?: Ta mey Gɛrek a lɔvey «Ka gwamara nga sam cek la daa vɛley anda yah ma da sa daw?» **20:22** 20.22 26.39; Mk 14.36; Lk 22.42; Jan 18.11 **20:23** 20.23 SNM 12.2

a terey ndaw ma ka slera akwar. ²⁷ Asaya, da ndaw da wuzlah akwar a wufey nga key *bay-ray na, si a terey anda beke akwar. ²⁸ Anda kefe, kwa yah, *Bez nga Ndaw, ya sawa a bela na, amba ndohay a kamaya slera ba. Ama ya sawa a bela na, amba ya katar slera a ndohay, ya velda heter adaw nga lohey ndohay ga daa meberey.»

Yesu a wurey dey nga ndohay wulaf hay cew
(Mark 10.46-52; Luk 18.35-43)

²⁹ Masa ata Yesu ta gula anga hay fa bam da Jerikwaw na, ndohay ga fa sɔpmatar wurzay. ³⁰ Ndohay wulaf hay cew daha manjatakaya da mey-cɔved. A cɔndamara na, Yesu fa daw ta ngene. Ta', a wudam, a lɔvam: «Bay Mahura, Bezey nga *Davit, ambahw sɔrfandar dey-ceceh may taw!» ³¹ Ndohay ga heyey a kamatar mey, a lɔvmatar nga njam teete. Ama wulaf hay a, a wudam ta gɔdan ta gɔdan cɔnga, a lɔvam: «Bay Mahura, Bezey nga Davit, ambahw sɔrfandar dey-ceceh may taw!» ³² Yesu ta', a lecey, a zɔltɔrwa, aa cɔfdara, a lɔvtar: «Ka wudam ya kakwar na, me?» ³³ Ta', wulaf hay a, a mbɔddamara, a lɔvmar: «Bay Mahura, ya wudam ka wurndara dey ala.» ³⁴ Wulaf hay a, a kamar dey-ceceh a Yesu. Anga gas! gas! a gɔsfatar har fa dey ata. Wure wure ngene, dey ata ha, wur! wur! a wuram, a hɔtmar dey maaya maaya dɔba. Fa dɔba ha, ta', a diyam asiya.

21

Yesu a daw a Jeruzelem anda bay
(Mark 11.1-11; Luk 19.28-40; Jan 12.12-19)

¹ Ata Yesu ta gula anga hay fa diyam aa berney nga *Jeruzelem. Masa ata gweegwe ta berney a na, a wusam gweegwe ta slala daha mezɔley Betfaje da rav Angwa nga *Awliviye. Yesu ta', a slerey gula anga hay cew teesɔd ngada slala ha, ² a lɔvtar: «Diyam a slala fa mey akwar katay, ka da hɔtfam madi-zɔngwaw majɔwkaya ta babɔza da cakay a. Pɔskamɔrwa, handamatiwa cewete. ³ Da ndaw a tɔkakwar nga pɔska na, lɔvmar: “Bay Mahura a wufey.” Ngene na, ndaw aha, a mbɔkdakwar la nga pɔska wure ngene.» ⁴ Yaw, cek aha ta key la amba a key anda Gazlavay maa guzwa zleezle ta mey *ndaw ma tɔla mey anga ma lɔvey:

⁵ «Lɔvmatar a ndohay daa berney nga *Siyanɔw:

20:26 20.26-27 23.11; Mk 9.35; Lk 9.48 **20:28** 20.28 Iz 53.12; 1Kwr 6.20; 7.23; Gal 1.4; 1Tm 2.5-6; 1Pi 1.18-19 **20:29** 20.29-34 9.27-30 **20:30** 20.30-31 1.1; 9.27; 12.23; 15.22; 21.9, 15; 22.41-46; Mk 10.47-48; 11.10; Lk 1.32, 69; 2.11; 18.38-39; Jan 7.42

nøkam dey, bay akwar fa sawa fa akwar.
Ara ndaw meekwed-mey, aa da ray madi-zəŋgwaw,
aa da ray babəza ŋga madi-zəŋgwaw aha.»

⁶ Da ray ŋgene, gula anŋa hay cew heyey a diyam, a kamara anda Yesu ma ləvtar ha. ⁷ A handamar madi-zəŋgwaw ta babəza ha dəba. Gula anŋa hay a, a ciymata zana ata hay a ray zəŋgwaw hay a. Yesu ta', a njeɣ a ray a. ⁸ Ndəhay ga malacatakaya daa cəved ŋga cey ray ta Yesu, a ciyam zana ata hay aa cəved ŋga həslmar ray. Siya hay da wuzlah ata, a bəzlham mey-har ŋga wudez hay, a pamata aa cəved e may. ⁹ Ndəhay fa diyam fa mey anŋa, leŋ fa dəba anŋa, ata tabiya fa wudam, a ləvam: «*Hawzana! Həlmakwa Bəzey ŋga *Davit! Anja Bay Gazlavay ŋga pəsar mey a ndaw masa aa ma slərdərwa ta mezəley anŋa. Həlmakwa Bay Gazlavay da vad!»

¹⁰ Masa Yesu a fa mbəzey aa berney ŋga Jeruzelem na, ndəhay daa berney a, a mbədam haya! haya! aa cəfdam vaw da wuzlah ata, a ləvam: «Kede he na, ara wa?» ¹¹ Ndəhay ga ma diyam ta Yesu heyey, a mbəddamatara, a ləvmatar: «Ara ndaw ma təla mey ŋga Gazlavay, mezəley Yesu, ndaw *Nezeret daa hwayak ŋga *Galile.»

Yesu a bəлта ndəhay daa Way-mekey-kwakwas ŋga Gazlavay

(Mark 11.15-19; Luk 19.45-48; Jan 2.13-22)

¹² Fa dəba ha, Yesu a mbəzey aa papalah ŋga *Way-mekey-kwakwas ŋga Gazlavay. Fetede na, ndəhay fa kam luma. Maja ŋgene, ta', a bəлта ndəhay tabiya ma hədkadam cek hay leŋ ndəhay ma hədkam cek hay. A bəlzta slam hay ŋga ndəhay ma mbəda dala ta janŋa hay ŋga ndəhay ma hədkadam makurgwadakw hay. ¹³ Ta', a ləvtar: «Mawuzlalakaya daa dərrewel ŋga Gazlavay, Gazlavay a ləvey: "Way adaw na, ara way amba ndəhay a dərmaya danŋay da hwad a." Ama akwar na, ka tərđamara way a kede ŋga slam ŋga mayal hay!»

¹⁴ Ndəhay wulaf hay ta ndəhay jegwer hay a ŋgəcham fa Yesu daa Way-mekey-kwakwas a. Ta', a mbəldata. ¹⁵ Ndəhay mahura hay da ray ndəhay ma ka kwakwas ŋga Gazlavay leŋ *ndəhay maa sərkada kwakwas ŋga Mawiz, a hətmatar maazla hay masa Yesu ma ka. Asaya, a hətmatar bəza hay daa Way-mekey-kwakwas ŋga Gazlavay a, fa wudam, a ləvam: «*Hawzana! Həlmakwa Bəzey ŋga *Davit!» Da ray ŋgene, mevel a catar. ¹⁶ Ta', a ləvmar

a Yesu: «Ka fa cōnda mey masa ata maa guzlam kefe daw?» Yesu a mbəɸɸatara, a ləvtar: «Ahaw, ya fa cōnda. Mawuzlalakaya daa ɸerewel ŋga Gazlavay, a ləvey: “Bay Gazlavay, ka taa sərkaɸata bəza hay mecəhe hay ta bəza hay da mey ɸəwa la ŋga həlmamaka.” Ka ta jaŋgamara mey a daa ba daw?» ¹⁷ Fa dəba ha, Yesu a mbəkɸata, a bawa daa berney ŋga *Jeruzelem e, a daw a slala Betani. A ney fetede dasi tavaɸ a ŋgene.

Mey da ray wudez manjar babəza
(Mark 11.12-14, 20-24)

¹⁸ Pepərek e, ta slam ŋgaa pərek na, Yesu a vəhwa aa berney ŋga *Jeruzelem, may fa car. ¹⁹ Daa masa aŋga fa daw na, a hətey wudez daha da mey-cəved, a yey babəza anda gudav. Ta', a daw a cakay wudez e, ama a hətfey fa wudez e na, si gwaslaf a gway, babəza fa vəɸa daa ba. Da ray ŋgene, Yesu a nəsa wudez e, a ləvey: «Kuse! Ka yey babəza saba ŋga sərmataw.» Wure wure ŋgene, wudez e, a kweley. ²⁰ Daa ŋgene, gula aŋga hay, ata da siya. Masa ata ma hətmar wudez e ma kweley anda ŋgene na, a rəzlam, a ləvmar a Yesu: «Wudez e, a kweley fiyaw fiyaw na, kwara?» ²¹ Yesu a mbəɸɸatara, a ləvtar: «Ya fa ləvkwar fara fara, da akwar fa pamara Gazlavay ŋga ndaw akwar fara fara, asaya, da akwar fa wulkam cew cew daa ba na, ka gwamara ŋga key cek anda yah ma ka ŋgada wudez kefe daada ba, ama ka gwamara kwa ŋga ləvar ŋgada aŋgwa mahura kefe: “Sləkɸey la feɸe, kəzley aa bəlay” na, a key la kəne. ²² Da akwar fa pamara Gazlavay ŋga ndaw akwar fara fara na, cek masa akwar maa cəɸɸamara daa medərey-danɸay na, a vəɸɸakwara la cəpa.»

Ma vəɸɸara gəɸar a Yesu na, wa?
(Mark 11.27-33; Luk 20.1-8)

²³ Fa dəba ha, Yesu a mbəzey aa papalah ŋga *Way-mekey-kwakwas ŋga Gazlavay. Aa sərkaɸata ndəhay fetede. Masa aŋga faa sərkaɸata ndəhay a na, ta', *bay-ray hay da ray ndəhay ma ka kwakwas ŋga Gazlavay len mahura hay ŋga *Jəwif hay a ŋgəcham a cakay a, aa cəɸɸamara, a ləvmar: «Ma ləvka ŋga kata cek hay a kefe na, wa? Asaya, ma vəlka cəved ŋga kata na, wa?» ²⁴ Yesu, ta', a mbəɸɸatara, a ləvtar: «Yaw, yah may, amba yaa cəɸɸakwar mey pal. Da akwar ta mbəɸɸamiwa mey a la na, yah may, ya kadakwara ndaw ma vəɸɸdiwa cəved ŋga kata cek hay a kefe la. ²⁵ Kaa ma slərdərwa *Jan-Baptis ŋga

katar *baptem a ndəhay na, wa? Gazlavay daw, ndəhay daw?»

Da ray ɲgene, ndəhay mahura hay a ta bay-ray hay a, a slam yawa da wuzlah ata, a ləvam: «Ya da mbəɖdakwa aa mey aɲga ha na, kwara? Da ya ləvkwa: “Ara Gazlavay ma slərdərwa” na, a da mbəɖdandakwara, a ləvey: “Kaa ka təbmara mey ɲga Jaɲ-Baptis a ba na, maja me?” ²⁶ Ama da ya ləvkwa: “Ara ndəhay ma slərdamərwa” na, ya zlurakwa ta ndəhay maja ndəhay tabiya fa wulkam Jaɲ-Baptis na, ara *ndaw ma təla mey ɲga Gazlavay.» ²⁷ Da ray ɲgene, ta', a mbəɖdamara a Yesu, a ləvmar: «Ya sərmara ba.»

Yesu, ta', a mbəɖdatara, a ləvtar: «Yaw, da anda keɖe na, ya fa da kadakwara ndaw ma vəlya cəved ɲga kata cek hay a keɖe, daa ba may.»

Mey-menɲey ta bəza hay cew

²⁸ Yesu aa guzltar a ndəhay daa *Way-mekey-kwakwas ɲga Gazlavay heyey saya, a ləvtar: «Ya wuɖey ya ɲgakwar mey amba ka wulkam da ray a.

«Ndaw daha, aɲga ta bəza hay cew. A ləvar ɲgada bəzey mahura: “Bəz aɖaw, tasana daw ta kawa sləra da ley.”

²⁹ Bəzey a, a mbəɖdara, a ləvar: “Ya fa da daw daa ba.” Ama menɲey nekəɖey na, a mbəɖda lenɲesl aɲga, ta', a daw ɲga kawa sləra ha. ³⁰ Papaha, ta', a ləvar ɲgada bəzey mecəhe saya, kəne may. Bəzey a, a mbəɖdara, a ləvar: “Aya, papay.” Ama fa dəba ha, bəzey a, ta daw ɲga kawa sləra heyey daa saba. ³¹ Kaa dasi bəza hay cew keɖe, ma ka cek masa papa ata ma wuɖey la na, wura?» Ndəhay a, a mbəɖdamara, a ləvmar: «Ara bəzey mahura.»

Yesu a mbəɖdatara ɲgada ndəhay a dəba, a ləvtar: «Ahaw, kəne, ama ya fa ləvkwar fara fara, ndəhay maaya ba hay anda ndəhay ma cakala budaw ta ɲgwas-barlaw hay, a mbəzam la teesɖ da ray akwar a wuzlah ndəhay masa Gazlavay ma wey da ray ata. ³² *Jaɲ-Baptis ta sawa la ɲga wuzkwar cəved masa dər e, ama akwar ta təbmara mey aɲga daa ba. Ndəhay ma cakala budaw ta ɲgwas-barlaw hay, ata na, ta təbmara mey aɲga la. Kwa masa akwar ma hətmar ata ma mbəkdamara mekey mebərey na, akwar ta mbəɖdamara menɲey akwar ɲga təbey mey ɲga Jaɲ-Baptis a daa ba cəɲga.»

Mey-menɲey da ray ndəhay ma təbmara Bəzey ɲga Gazlavay ba

(Mark 12.1-12; Luk 20.9-19)

³³ Yesu aa guzltar a ndəhay saya, a ləvtar: «Jəkam sləmay fa mey-menjey mekele. Ndaw daha, a key jerne ŋga wudez ma yey babəza mezəmey. Ta', a zləba jerne he ray a zlar. Daa jerne he na, a dīyey slam ŋga dəcey babəza ŋga wudez e, a ləmey way magəl-kaya maazəma ŋgada ndaw ma jəfa jerne he. A vəlɗa jerne he a har ndəhay ŋga kam sləra da hwad a. Fa dəba ha, ta', a daw aa slam dərəŋ. ³⁴ Masa kiya menjəley babəza ŋga wudez daa jerne he ta wuswa cay na, bay ŋga ley a, a slərey gula aŋga hay ŋga təbwa babəza ŋga wudez e maala ŋga aŋga. ³⁵ Masa gula hay a ma wusam cay fa ndəhay ma ka sləra daa jerne kaa heyey na, ndəhay ma ka sləra hay a, kaw! kaw! a kərzamata. Gula laŋgar, a slədmara, laŋgar may, a kədmara vagay, asaya, ta', aa zakamara gula laŋgar ta aŋgwa vagay. ³⁶ Fa dəba ha, bay ŋga jerne kaa heyey a slərey gula hay ga ma fəna ŋgeeme heyey. Ndəhay ma ka sləra daa jerne kaa heyey, a kədmata kəne cəŋga. ³⁷ Fa dəba ha, ta', a slərey bəzey aŋga, a wulkey, a ləvey: "A namar ray la a bəzey da hwad adaw." ³⁸ Ama daa masa ndəhay ma ka sləra daa jerne kaa heyey ma hətmar bəzey aŋga ha fa sawa na, ta', a slam yawa da wuzlah ata, a ləvam: "Katay ara bəzey ma da wa jerne keɗe fa dəba ŋga papaha. Nakwa ta kəɗkwa vagay, amba ya wakwa jerne he keɗe." ³⁹ Anda keɗe, a kərzamara, a dafamara a dəba jerne he, ta', a kədmara vagay.»

⁴⁰ Yesu aa guzltar saya, a ləvtar: «Kaa wara bay ŋga jerne he ma da sawa na, a da kadata ndəhay a na, kwara?» ⁴¹ A mbəɗdamara, a ləvmar: «Bay ŋga jerne he, a da kəɗta ndəhay lamba hay a vagay, kwa fa da sərfatar dey-ceceh daa ba. Fa dəba ha, a da vəlɗa jerne he a har ndəhay mekele. Ndəhay a, a da vəlmar babəza ŋga wudez e ta kiya menjəley babəza ha.» ⁴² Yesu ta', aa guzltar, a ləvtar: «Akwar ta jaŋgamara mey mawuzlalakaya daa dərəwel ŋga Gazlavay daa ba səlak daw? Mey masa ma ləvey: "Aŋgwa meləmey way masa ndəhay ma ləma way ma kəzlamara ta cakay na, aŋgwa ha na, ta tərey sem ŋga aŋgwa maaya meləmey way ma fənta siya hay jak. Njgene na, ara Bay Gazlavay ma ka cek aha, ara cek maaya fa dey aləkwa."»

⁴³⁻⁴⁴ Fa dəba ha, Yesu aa guzltar saya, a ləvey: «[Da ndaw a tədəy a ray aŋgwa aha na, ndaw aha a da ŋgərfey. Asaya da aŋgwa aha a kəzley a ray ndaw na, a dəga ndaw aha la kwəɗ-kwad anda bebəɗes.] Ara maja keɗe, ya fa ləvkwar,

akwar na, Bay Gazlavay fa da vɛlkwar cɛved ŋga njeɣ da wuzlah ndɛhay aŋga hay daa ba. A da vɛley cɛved na, si ŋgada ndɛhay masa slɛra ata ma mbafar.»

⁴⁵ Masa *bay-ray hay ŋga ndɛhay ma ka kwakwas ŋga Gazlavay ta *Fariza hay ma cɛndamara meɣ-menɣeɣ masa Yesu maa guzlda ha na, a sɛrmara Yesu aa guzley na, da ray ata. ⁴⁶ Da ray ŋgene, a sɛpam cɛved amba a kɛrzamara. Ama a zluram ta ndɛhay fetede maja ndɛhay a, a wulkam Yesu na, ara *ndaw ma tɛla meɣ ŋga Gazlavay.

22

Mey-menɣeɣ da ray Jɛwif hay ma tɛbmara meɣ ŋga Yesu ba

(Luk 14.15-24)

¹ Yesu aa guzltar ŋgada ndɛhay daa *Way-mekey-kwakwas ŋga Gazlavay heyey ta meɣ-menɣeɣ hay saya, a lɛvtar: ² «Ya gwa ŋga wa *mewey ŋga Bay Gazlavay da ray ndɛhay na, ta me? Yaw, bay daha, a key gwagway ta pas bɛzey aŋga ma lawa kwakwa. ³ A slɛrdata madɛrlam aŋga hay ŋga zɛlwa ndɛhay masa mazɛltakaya ŋgadaa gwagway a. Ama ndɛhay mazɛltakaya ha, a gɛmam ŋga samawa ba.

⁴ «Fa dɛba ha, a slɛrey madɛrlam aŋga hay mekele saya, a lɛvtar: “Diyam ta lɛvmatar a ndɛhay masa mazɛltakaya na, ŋga samawa aa gwagway a. Yah ma hɛrta sla hay ta dɛhway cay, cek hay tabiya madiytakaya cay, ŋga samawa ŋga zɛmey daf ŋga gwagway a dɛba.” ⁵ Ama ndɛhay mazɛltakaya ha, a pam lenɣesl fa mezɛley a ba. A diyam ŋga key cek ata hay mekele. Ndaw lanɣar a daw a ley, ndaw lanɣar a daw a kawa filaw. ⁶ Siya hay may, a kɛrzamata madɛrlam hay ŋga bay kaa heyey, a sɛrdamata banay, a kɛdmata vagay. ⁷ Masa bay kaa heyey ma cɛnda na, mevel a car, a slɛrey sewje aŋga hay ŋga kɛdeɣ ndɛhay ma kɛdmata madɛrlam aŋga hay heyey vagay. Fa dɛba ha, sewje hay a, a wawurmara berney ata.

⁸ «Cay, ta’, a lɛvtar ŋgada madɛrlam aŋga hay siya: “Cek hay tabiya ŋga gwagway madiytakaya cay, ama ndɛhay mazɛltakaya na, ata tɛde ŋga samawa aa gwagway a saba. ⁹ Anda kede, diyam aa cɛved mahura hay, zɛlmawa kwa waawa masa akwar ma hɛtam amba a samawa, a zɛmam daf ŋga gwagway a.” ¹⁰ Ta’, madɛrlam aŋga hay kaa heyey, a diyam aa cɛved mahura hay, a zɛlmawa ndɛhay masa ata ma hɛtam, ndɛhay maaya ta maaya ba hay cɛpa, haa way masa ata ma kam gwagway da hwad a kaa heyey a rɛhey.

¹¹ «Bay kaa heyey a daw, a mbəzey aa way n̄ga gwagway n̄ga n̄ektərwa ndəhay ma zəmam daf n̄ga gwagway a. A da n̄key dey na, a ray ndaw daha da wuzlah ata, zana n̄ga gwagway fa vaw daa ba. ¹² Aa guzlar a ndaw a, a ləvar: “Jam adaw, zana n̄ga gwagway fa vaw akah daa ba kaa na, ka mbəzwa aa way a, ta wura?” Kwa ndaw aha, ta mbəddara daa ba. ¹³ Ta’, bay kaa heyey aa guzltar a ma ka sləra an̄ga hay, a ləvtar: “Jəwmara salay ta har n̄ga ndaw n̄gene, hazakadamara aa ambaw, aa ləvan̄. Fetede na, a da təway, asaya, a daa pədey sler.”»

¹⁴ Yesu ta’, aa guzltar a ndəhay a saya, a ləvey: «Ahaw, ndəhay ga mazəltakaya, ama mawalatakaya na, ndəhay nekədey gway.»

Ndəhay mahura hay a jadamara Yesu da ray mepəley budaw

(Mark 12.13-17; Luk 20.20-26)

¹⁵ Fa dəba ha, ndəhay *Fariza hay, a kusam ta cakay n̄ga səpey dabaray, amba a kərzamara Yesu fa mey masa an̄ga ma daa guzlda. ¹⁶ Ta’, a sləram gula ata hay siya, ta ndəhay n̄ga Bay *Herawt fa Yesu n̄gaa cəfdamara. A ləvmar: «Bay ala, ya sərmara kah na, ndaw ma mbərzley ba, ka faa sərkadata ndəhay n̄ga njam anda Gazlavay ma wudəy fara fara, ka zlurey ta ndaw ba, asaya, ka n̄kta ndəhay cəpa letək fa mey akah. ¹⁷ Anda kede, ya wudam n̄gaa cəfdamaka, kwakwas aləkwa na, a vəley cəved n̄ga pəley budaw a bay mahura *Sezere daw? A vəley cəved ba daw? Wuzdandara mewulkey akah da ray mey a kede cey.»

¹⁸ Ama Yesu ta səra mewulkey ata maaya ba n̄gene sem. Ta’, a ləvtar: «Akwar ndəhay masa ta neneh cew, ka wudam n̄ga jadamaya na, maja me? ¹⁹ Wuzmaya dala masa akwar ma pəlam budaw a ta an̄ga.» Ta’, ndəhay kaa heyey a wuzmar dala ha pal. ²⁰ Yesu a n̄ka dala ha, ta’, aa cəfdata saya, a ləvtar: «Fa dala ha kede na, ara dey n̄ga wa? Ara mezəley n̄ga wa?» ²¹ A mbəfdamara, a ləvmar: «Ara n̄ga Sezere, bay mahura n̄ga *Rawm.» Da ray n̄gene, Yesu a ləvtar: «Anda kede, cek masa n̄ga Sezere na, vəldamara a Sezere he. Cek masa n̄ga Gazlavay na, vəldamara a Gazlavay a.» ²² Masa ata ma cəndamara Yesu ma mbəfdatara anda n̄gene la na, a rəzlam ga da ray mey a. Mbak! a mbəkdamara, ta’, a diyam.

Mey da ray masləkəfawa n̄ga ndəhay daa meməcey
(Mark 12.18-27; Luk 20.27-40)

²³ Ta pas a ηgene, ndəhay *Saduse hay a ηgəcham a cakay Yesu. Saduse hay na, ara ndəhay ma wulkam, ma ləvam da ndaw ta məcey sem na, fa da sləkdfawa daa meməcey daa ba. Ta', aa cəfdamara Yesu, a ləvmar: ²⁴ «Bay ala, mawuzlalakaya daa *kwakwas ηga Mawiz a ləvey: “Da ndaw a məcey ta hətey bəzey daa ba na, si məlmaha a la ηgwas-vagay a, amba a yamawa bəza hay ηgada məlmaha maməckaya ha.” ²⁵ Yaw, məlman η hay maasala da wuzlah ala daha, ata ηгаа man, ηгаа pan. Məlma ata mahura leη! a ley ηgwas, pam! a məcey, kwa ta hətey bəzey daa ba. Da ray ηgene, a mbəkdara ηgwas anηa a məlmaha lanηar. ²⁶ Cek aha, a key letek ta mambaray a, a key letek ta məlma ata ηga dey maakar a haa kasl fa məlma ata ηga dey maasala ha. ²⁷ Fa dəba ha ata ma məcām la cəpa ata na, ηgwas aha pam! a məcey may. ²⁸ Anda kefe, ta pas masa ndəhay maməctakaya ma da sləkdamawa na, ηgwas aha a da key na, ηgwas ηga wa dasi ata? Maja ata cəpa ta lamara la ηga ηgwas ata.»

²⁹ Yesu a mbəddatara a ləvtar: «Akwar faa zəfdamara ray akwar maja ka sərmara mey ηga Gazlavay ba, asaya, maja ka sərmara gədan ηnηa ba. ³⁰ Ya fa ləvkwar fara fara, ta pas masləkdfawa ηga ndəhay daa meməcey na, zel hay fa da lam ηgusay daa saba, ηgusay fa da njam ta zel hay daa saba may, ama ndəhay, a da njam anda maslan hay ηga Gazlavay da vad. ³¹ Akwar ma janηamara mey masa Gazlavay maa guzldakwara da ray masləkdfawa ηga ndəhay daa meməcey na, daa ba daw? Gazlavay a ləvey: ³² “Yah, Gazlavay masa *Abəraham, *Izak, leη *Jakwap ma namar ray.”» Yesu aa guzley saya, a ləvey: «Gazlavay na, ara Gazlavay ηga ndəhay ta dey, ba na, ηga ndəhay maməctakaya ba.» ³³ Ndəhay tabiya ma cəndamara mey a kefe na, a rəzlam da ray meesərkedey ηga Yesu a.

Mewey ηga Gazlavay masa mahura na, wura?

(Mark 12.28-34; Luk 10.25-28)

³⁴ Masa *Fariza hay ma nəkmara Yesu ta kusta *Saduse hay sem ta mey na, ta', a kusam, a ηgəcham a cakay Yesu. ³⁵ *Ndaw maa sərkada kwakwas ηga Mawiz da wuzlah ata daha, aa cəfda Yesu amba a jada, a ləvar: ³⁶ «Bay adaw, *mewey ηga Gazlavay mahura ma fənta siya hay na, wura?»

³⁷ Yesu a mbəddara, a ləvar: «“Si ka wufa Bay Gazlavay akah, ta mevel akah cəpa, ta mesəfney akah cəpa, asaya, ta leηgesl akah cəpa.” ³⁸ Kefe he ara mewey ηga Gazlavay

mahura ma fənta siya hay. ³⁹ Asaya, mewey nga dey cew e ma səpa kefe daha saya. Mewey a, ata letek. Mewey a, a ləvey: “Si ka wuda meseembew akah anda kah ma wuda ray akah.” ⁴⁰ Yaw, *kwakwas nga Mawiz tabiya ta meesərkedey nga ndəhay ma təla mey nga Gazlavay zleezle macəmtakaya tabiya na, daa mewey hay a cew kefe.»

Kəriste, anga bay nga Davit na, kwara?

(Mark 12.35-37; Luk 20.41-44)

⁴¹ Daa masa *Fariza hay makustakaya na, Yesu aa cəfdəta may, ⁴² a ləvtar: «*Kəriste, *ndaw masa Gazlavay ma wala nga ləhdata ndəhay na, ka wulkam da ray a na, kwara? Anğa, səkway nga wa?» A mbəddamara, a ləvmar: «Anğa na, səkway nga Bay *Davit.» ⁴³ Yesu a ləvtar: «Ta gədan nga *Mesəfney nga Gazlavay na, Davit ta zəla Kəriste he la, “Bay Mahura.” Kaa a zəla anda kefe saya na, kwara? Davit e, ta ləvey la:

⁴⁴ “Bay Gazlavay a ləvar a Bay adaw Mahura:

Sawa, njeý a har-zəmay adaw

amba ya wakwa da ray ndəhay

haa ta pas masa yah ma da pata

masa-gəra akah hay asi salay akah.”

⁴⁵ Yaw, da Davit a zəla Kəriste “Bay Mahura” na, kaa wara Kəriste he ara bəzey da hwađ Davit saya na, kwara?» ⁴⁶ Kwa ndaw pal da wuzlah ata ta gwa nga mbəddara kwa mey pal daa ba. Dəga ta pas ngene, kwa waawa a zlurey nğaa cəfdəfar mey.

23

Yesu a patar lengesl a ndəhay da ray ndəhay maa sərkada kwakwas nga Mawiz ta da ray Fariza hay

(Mark 12.38, 39; Luk 11.43, 46; 20.45, 46)

¹ Yesu aa guzltar nğada ndəhay makustakaya ta nğada gula anğa hay daa *Way-mekey-kwakwas nga Gazlavay heyey saya, ² a ləvtar: «*Ndəhay maa sərkada kwakwas nga Mawiz lej ndəhay *Fariza hay na, mapatakaya aa slam a nga Mawiz nğaa sərkedey kwakwas anğa. ³ Si ka təbmara mey ata, asaya, ka kamara cek masa ata maa sərkadamakwara ha. Ama cek masa ata ma kamara na, ka da kamara ba, maja ata ta ray ata na, fa kamara cek anda ata maa sərkadamakwara ha, daa ba. ⁴ A bamawa kwakwas hay maadəkwa a maadəkwa a masa ndəhay ma gwamara nga

22:39 22.39 Lev 19.18; Mt 5.43; 19.19; Rm 13.9; Gal 5.14; Jak 2.8 **22:40** 22.40 5.17; Rm 13.10 **22:41** 22.41-46 20.30-31 **22:44** 22.44 Ps 110.1; SNM 2.33-35; 1Kwr 15.27; Heb 1.13; 8.1 **22:46** 22.46 Mk 12.34; Lk 20.40 **23:3** 23.3 Rm 2.21-23

səpa ba. A təkmatar dəy a ndəhay ɲga səpmara kwakwas hay a, ama ata na, a gəmam ɲga jənmata ndəhay ɲga səpey kwakwas hay a kwa nekədey ba. ⁵ A kamata sləra ata hay tabiya na, amba ndəhay a hətmatar aa həmdamata gway. Anda kefe, a wuzlalam mey masa daa dərewel ɲga Gazlavay, a təfmara aa ambal anda laya, a ləwmara fa daɲgay, da daa ba, fa har. A təfmata mahura mahura ma fəna ɲga ndəhay siya hay. Asaya, zana hay masa ata ma pamata fa vaw na, a cam gagəmay maazəma maazəma * fa mey a, ma fəna ɲga ndəhay mekele.

⁶ «Da ta zəlmata la aa gwagway na, a wudam menjey aa slam maaya ɲga ndəhay mahura hay. Asaya, daa *way-mewuzey-mey ɲga Gazlavay na, a wudam menjey aa slam maaya fa mey. ⁷ A wudam ndəhay a camatar har ta meney ray fa mey ɲga ndəhay makustakaya, asaya, a wudam ndəhay a zəlmata bay.

⁸ «Ama akwar na, ka da təbmara amba a zəlmakwar bay ba, maja akwar tabiya na, məlman hay. ɲgada akwar, ndaw ma səra cek na, aɲga pal. ⁹ Asaya, ka da zəlam ndaw da bəla kefe Papan ba, maja Papakw akwar na, aɲga pal masa da vad. ¹⁰ Ka da təbmara amba a zəlmakwar Bay Mahura ba, maja Bay akwar Mahura na, ara *Kəriste pal taava aɲga.

¹¹ «Ndaw mahura da wuzlah akwar na, ara ndaw ma kakwar sləra. ¹² Kwa waawa ma pa ray aɲga ɲga ndaw mahura na, Gazlavay a da pa ɲga mecəhe. Kwa waawa ma nada ray aɲga na, Gazlavay a da pa ɲga mahura.»

Yesu a mbədtar ray a ndəhay maa sərkada kwakwas ɲga Mawiz ta a Fariza hay

(Mark 12.40; Luk 11.39-42, 44, 52; Luk 20.47)

¹³ «Banay a sawa la a ray akwar, akwar *ndəhay maa sərkada kwakwas ɲga Mawiz ta *Fariza hay. Akwar na, ndəhay masa ta neneh cew. Akwar fa təkмата ndəhay ɲga mbəzey a wuzlah ndəhay masa Gazlavay fa wey da ray ata. Akwar ta ray akwar, ta mbəzam daa ba, asaya, ka ta təkмата ndəhay ma wudam ɲga mbəzam sem.

[¹⁴ «Banay a sawa la a ray akwar, akwar ndəhay maa sərkada kwakwas ɲga Mawiz ta Fariza hay. Akwar na, ndəhay masa ta neneh cew. Akwar fa təbmatara cek hay ɲga ɲgwas-vagay hay tabiya, asaya, akwar faa guzlam ga daa medərey-dəɲgay amba ndəhay aa zaramakwar. Maja

* **23:5** 23.5 Daa mewulkey ɲga Jəwif hay, gagəmay macakaya maazəma fa mey ɲga zana ɲga ndaw na, a wuzda ndaw aha aɲga ndaw ma nar ray a Gazlavay.

23:5 23.5 Mab 13.9; Mew 6.8; Mesl 15.38-39; Mt 6.1

23:8 23.8 Jan 13.13

23:11 23.11 20.26-27; Mk 9.35; 10.43-44; Lk 9.48; 22.26

23:12 23.12 Ps 75.8;

Mt 18.4; Lk 1.52; 14.11; 18.14

ngene Gazlavay a sêrdakwar banay la ma fôna ndôhay siya.]

¹⁵ «Banay a sawa la a ray akwar, akwar ndôhay maa sêrkada kwakwas nga Mawiz ta Fariza hay. Akwar na, ndôhay masa ta neneh cew. Akwar fa pøkam aa wura aa wura cêpa amba ka hêtam kwa ndaw pal letek nga sêpey kwakwas akwar ni, ama da akwar ma hêtam la na, ka têrdamara ndaw a, nga ndaw nga awaw magaza ma fênkwar haa dey cew.

¹⁶ «Banay a sawa la a ray akwar, akwar ndôhay ma wuzmatar cêved ngada ndôhay, ama akwar na, wulaf hay. Ka lèvam: “Kwa waawa ma mbedey nga key cek ta *Way-mekey-kwakwas nga Gazlavay na, ara nga tede, ama kwa waawa ma mbedey nga key cek ta bôrey magaza mewedey pëlŋged pëlŋged daa Way-mekey-kwakwas a na, si cêma a ka cek aha anda aa ma lèvey.” ¹⁷ Akwar na, ndôhay manjar-lengesl, asaya, akwar wulaf hay! Way-mekey-kwakwas nga Gazlavay ta bôrey magaza na, mahura dasi ata na, wura? Way-mekey-kwakwas nga Gazlavay na, anga mahura da ray bôrey magaza, maja ara Way a ma têrda bôrey magaza aha nga cek maaya ngada Gazlavay. ¹⁸ Akwar fa lèvam saya: “Kwa waawa ma mbedey nga key cek ta slam-mefêkey cek ngada Gazlavay na, *mbedey a, ara nga tede. Ama kwa waawa ma mbedey nga key cek ta cek mavêldakaya ngada Gazlavay masa mapakaya da ray slam aha na, si a ka cek aha anda aa ma lèvey.” ¹⁹ Akwar na, wulaf hay! Cek mahura na, cek mevêley a Gazlavay daw? Da daa ba, slam-mefêkey cek a Gazlavay ma têrda cek aha maaya fa Gazlavay daw? ²⁰ Anda kedê, kwa waawa ma mbedey ta slam-mefêkey cek ngada Gazlavay na, a key ngene, a mbedey ta slam aha lej ta cek da ray a tabiya. ²¹ Kwa waawa ma mbedey ta Way-mekey-kwakwas nga Gazlavay na, a key ngene, a mbedey ta Way a lej ta Gazlavay manjakaya daa Way a. ²² Kwa waawa ma mbedey ta slam da vad na, a key ngene, a mbedey ta slam-menjey nga Gazlavay lej ta Gazlavay a manjakaya da ray a.

²³ «Banay a sawa la a ray akwar, akwar ndôhay maa sêrkada kwakwas nga Mawiz ta Fariza hay. Akwar na, ndôhay masa ta neneh cew. Akwar fa wunkamata cek akwar hay tabiya slam kuraw, ka vêldamara slam pal a Gazlavay, kwa cek hay mecêhe mecêhe ma cêrda lar na, akwar fa wunkamara kêne may. Ama nga sêpey mewey hay maaya na, ka sêrfadamara ba. Anda melèvey mekey

cek ta cøved e, mesørey dey-ceceh, asaya, menjey mandaw mandaw daa cøved nga Gazlavay. Sasøkar jak, cek hay a ñgene na, ara cek hay maaya nga key. Ka da mbøkdamara nga key cek hay siya hay ba may. ²⁴ Akwar fa wuzmatar cøved ñgada ndøhay, ama akwar na, wulaf hay. Akwar fa jajørmara cek akwar mesey maja jajøway mecøhe da hwaf a, anja ñgene, akwar fa ndam slagwama a hwaf daa yam maajørkaya heyey cønga gway.

²⁵ «Banay a sawa la a ray akwar, akwar ndøhay maa sarkada kwakwas nga Mawiz ta Fariza hay. Akwar na, ndøhay masa ta neneh cew. Akwar fa pørmata døba nga vøley akwar hay mesey cek ta vøley akwar hay nga daf, anja ñgene, ta da hwaf a na, vøley hay a madakalatakaya tep! tep! ta cek hay nga mayal akwar hay lej ta cek hay maaya ba masa akwar ma wudam kalah daa mevel akwar. ²⁶ Akwar Fariza hay na, wulaf hay! Pøram teesed na, hwaf a dægay, anda kedø, døba ha na, a pørey la.

²⁷ «Banay a sawa la a ray akwar, akwar ndøhay maa sarkada kwakwas nga Mawiz ta Fariza hay. Akwar na, ndøhay masa ta neneh cew. Akwar na, anda cøvay hay makulbatakaya mabara ma mbam. Ama ta da hwaf a na, mazakaya, asaya, marøhtakaya ta tetesl hay. ²⁸ Akwar na, køne may. Fa dey nga ndøhay na, akwar anda ndøhay maaya. Anja daa mevel akwar na, cek hay malamba hay ga, akwar ndøhay masa ta neneh cew.

(Luk 11.47-51)

²⁹ «Banay a sawa la a ray akwar, akwar *ndøhay maa sarkada kwakwas nga Mawiz ta *Fariza hay. Akwar na, ndøhay masa ta neneh cew. Akwar fa lømamata cøvay hay nga ndøhay ma tøla mey nga Gazlavay ma kødmata vagay zleezle nga mbey, akwar fa kam banjay fa cøvay hay nga ndøhay ma ka cek ta cøved e zleezle. ³⁰ Asaya, akwar fa løvam: “Daa masa papan ñga papa ala hay, ata ta dey, da daa ñgene ala daha na, anja ala fa da cømam ta ata ñga kødøey ndøhay ma tøla mey nga Gazlavay a vagay na, daa ba.” ³¹ Anda kedø, akwar, ta ray akwar, fa wuzdamara, akwar na, bøza hay nga ndøhay ma kødmata ndøhay ma tøla mey nga Gazlavay. ³² Yaw, maaya na, ka ndøvdamara sløra nga papan ñga papakw akwar hay zleezle la gway. ³³ Akwar zezekw hay, sækway nga kucsl hay! Akwar fa da løham fa awaw magaza na, daa ba!

³⁴ Maja ñgene, jøkam slømay! Yah na, ya da slørkwar

ndohay ma tɔla mey nga Gazlavay, ndohay ta lenjesl ma sɛra cek, len ndohay ma daa sɛrkadamakwara mey nga Gazlavay. Da wuzlah ndohay a na, siya hay ka da kɛdmata vagay, siya hay ka da dɛrmata fa hwadam mazlanjalakaya, siya hay ka da slɛdmata daa way akwar hay mewuzey mey nga Gazlavay, siya hay may ka da sɛpmatar wurzay aa berney hay mekele mekele amba ka sɛrdamata banay.

³⁵ Maja ngene, mambaz nga ndohay ma ka cek ta cɛved e cɛpa masa ndohay ma kɛdmata vagay na, a hufkwar † la. A kɛdam teesɛd na, Abel. Asaya, ta kɛdam ndohay mekele mekele la haa kasl fa Zakari, bɛzey nga Baraki, masa akwar ma kɛdmara daa walan nga slam-mefɛkey cek ngada Gazlavay ta *Way nga Gazlavay. ³⁶ Ya fa lɛvkwar fara fara, mambaz nga ndohay a ngene, a huftar la a ray ndohay masa wure keɛde.»

Yesu aa guzley da ray Jeruzelem

(Luk 13.34, 35)

³⁷ Fa dɛba ha, Yesu a lɛvey: «Haya! Akwar ndohay da *Jeruzelem, akwar ndohay da Jeruzelem, Gazlavay a slɛrkwar ndohay ma tɔla mey anɔa hay na, ka kɛdmata vagay! Asaya, a slɛrkwar maslan anɔa hay na, kaa zakamata ta anɔwa! Ama mandaw mandaw ya wudɛy amba ya bɛckwar tabiya akwar anda gwagwar ma bɛcta bɛz anɔa hay asi kɛrɛpasl, ama ka wudam ba. ³⁸ Cɛndamara, Gazlavay a da la har anɔa da ray akwar, Way-mekey-kwakwas akwar a da tɛrey yidenɔ. ³⁹ Yah fa lɛvkwar dɛga wure keɛde, akwar fa da hɛtmaya fa dey daa saba haa ta pas masa akwar ma da lɛvam: “Anja Bay Gazlavay nga pɛsar mey ngada ndaw masa aa ma slɛrdɛrwa ta mezɛley anɔa.”»

24

Yesu aa guzley da ray Way-mekey-kwakwas nga Gazlavay ma da bɛzley

(Mark 13.1-2; Luk 21.5-6)

¹ Yesu a bawa daa *Way-mekey-kwakwas nga Gazlavay. Masa anɔa fa daw na, gula anɔa hay a ngɛcham a cakay a amba a wuzdamara Way-mekey-kwakwas nga Gazlavay a, anɔa malɛmkaya na, kwara. ² Ta', Yesu aa guzlar, a lɛvtar: «Akwar fa hɛtmar way a keɛde cɛpa, ba diya? Ya fa lɛvkwar fara fara, way a keɛde na, a bɛzlmara la, kwa anɔwa pal fa da mbɛkey da ray cɛla daa ba.»

Mey da ray bēla ma da ndōvey
(Mark 13.3-13; Luk 21.7-19)

³ Fa dēba ha, Yesu a daw aa Anḡwa nḡa *Awliviye, cəkwaṃ! a nḡey fetede. Gula anḡa hay ta', a nḡečham a cakay a, ata taava ata, aa cēfdamara, a lēvmar: «Wuzdan-dara cey, cek aha a da key na, ta vara? Yaw, ya da sērmara gweegwe cay ka vōhwa, asaya, gweegwe cay bēla a ndōvey na, fa me?»

⁴ Yesu a mbēdfatara, a lēvtar: «Wam vaw fa ndōhay ma da fēcmakwar. ⁵ Ya lēvkwar anda kefe, maja ndōhay ga a samawa la ta mezōley adaw, kwa waawa a da lēvey anḡa na, *Kēriste, *ndaw masa Gazlavay ma wala nḡa lēhdata ndōhay. Anda kefe, a fēcām ndōhay la ga. ⁶ Ka da cēnam vōram hay gweegwe ta akwar leṅ mey da ray vōram hay masa dōreṅ ta akwar. Ta nḡene he cēpa na, ka da zluram ba, maja si cek hay a nḡene a kam la teesed fagay. Ama ara mendōvey nḡa bēla ba aran. ⁷ Hwayak lanḡar a da key vōram ta hwayak lanḡar, bay lanḡar a da key hōma a ray bay lanḡar. Daa hwayak hay mekele mekele, may a key la, asaya, hwiyaḡ a wusey la. ⁸ Cek hay a tabiya a da kam na, anda hwaḡ ma zlar nḡa car nḡada nḡwas ma da yey.

Mey da ray banay ma da hētfatar ndōhay ma tēba mey nḡa Yesu

⁹ «Daa nḡene, a da vēldamakwar a har ndōhay nḡa sērdamakwar banay, a kēdfmakwar la vagay. Ndōhay tabiya da bēla a da nḡēldamakwar ba, maja yah. ¹⁰ Anda kefe, ndōhay ga a da mbēkdamara nḡa tēbey mey adaw. A da nḡēlam vaw ba da wuzlah ata, asaya, siya hay a da vēldamata siya hay asi har nḡa ndōhay nḡa sērdamata banay. ¹¹ Ndōhay ga a samawa la, a da mbērzlam, a lēvam ata na, ndōhay ma tēla mey nḡa Gazlavay. Ndōhay a nḡene, a da nēsām ndōhay ga. ¹² Ndōhay a da kam cek hay malamba ma fēna ma fēna, maja nḡene ndōhay ga fa da wuḡdam vaw ta maaya daa saba. ¹³ Ama ndaw ma bēsa banay a la haa mendōvey a na, Gazlavay a lēhda la. ¹⁴ Si a wuzdamara *Mey-maaya-mawiya da ray *mewey nḡa Bay Gazlavay da ray ndōhay a ndōhay tabiya da bēla la fagay, amba ndōhay tabiya a cēndamara mey da ray adaw. Fa dēba ha, bēla a ndōvey dēba.»

Mey da ray banay ma da sawa a ray ndōhay da Jude
(Mark 13.14-23; Luk 21.20-24)

24:5 24.5 24.24; 2Tes 2.9-10; 1Jn 2.18 **24:7** 24.7 2Mev 15.6; Iz 19.2 **24:9** 24.9 5.11 **24:9** 24.9-14 10.17-22; Jan 16.1-4 **24:10** 24.10 10.35; Lk 12.52-53
24:11 24.11 7.15 **24:12** 24.12 2Tm 3.1-5 **24:13** 24.13 CWJ 13.10 **24:14** 24.14 28.19

¹⁵ «Cay na, ka da hətmar ndaw malamba ma nəsə cek, ara ndaw masa Gazlavay ma wudey nga hətərar fa dey ba. Ka da hətmar ndaw aha manjakaya daa *Way-mekey-kwakwas nga Gazlavay. Ndaw a na, *Daniyel, *ndaw ma təla mey nga Gazlavay ta wuzleley mey la zleezle da ray a. (Akwar masa ma janğamara mey a keđe na, si ka pam lenğesl fa mey a.)
¹⁶ Daa đar hay a ngene na, si ndəhay daa hwayak nga *Jude a hwam nga bawa a anğwa. ¹⁷ Kwa ndaw masa fa məskey vaw daa ambaw na, fa da mbəzey a way nga lawa cek anğa hay daa ba. ¹⁸ Kwa ndaw anğa da ley na, a da vəhwa a way nga ley zana ba. ¹⁹ Daa đar hay a ngene, banay a sawa la a ray ngusay ta hwad ta a ray ngusay masa ta bəza hay da har. ²⁰ Dəram danğay a Gazlavay amba banay a, a sawa ta piya ba, kwa ta *pas meməskey-vaw ba may, ²¹ maja daa đar hay a ngene na, banay a sawa la ga a ray ndəhay. Dəga mezley nga bəla haa wure keđe ndaw ta sərey banay anda ngene daa ba arə. Asaya, banay fa da sawa ma fəna ngene daa saba. ²² Da Gazlavay ta ngəwa siya nga đar nga banay a daa ba na, anja kwa ndaw pal fa da mbəkey ta dey daa ba. Ama a ngəwa siya nga đar a na, maja ndəhay masa anğa ma walata nga ndəhay anğa hay.

²³ «Da ray ngene, da ndaw a ləvkwar: “*Kəriste, anğa keđe”, da daa ba “anğa katay” na, ka da təbmara mey anğa ba. ²⁴ Ya ləvkwar anda keđe na, maja ndəhay ma pamara ray ata nga Kəriste, asaya, ndəhay ma pamara ray ata nga ndəhay ma təla mey hay nga Gazlavay na, a samawa la. A kam maazla hay ma rəzla ndaw la nga wuzdərwa gədan ata amba a təknam ndəhay. Da a gwamara na, a təknam kwa ndəhay masa Gazlavay ma walata sem nga ndəhay anğa hay may. ²⁵ Jəkam sləmay, cəndamara maaya maaya, fa cek hay a keđe ma da kam na, ya ta pakwar lenğesl cay.»

Mey da ray ma vəhwa nga Bəz nga Ndaw
(Mark 13.24-27; Luk 17.23-24; Luk 21.25-28)

²⁶ «Da ndaw aa guzlkwar, a ləvkwar: “*Kəriste anğa katay da wuzlah-ley” na, ka da diyam ba. Da a ləvkwar saya “anğa mabakaya feđe” na, ka da təbmara mey nga ndaw a ba. ²⁷ Yah, *Bəz nga Ndaw, ya da vəhwa na, anda var ma zəmey ma wəfey dəga da wurza haa kasl a mey-anğwa.

24:15 24.15 Dan 9.27; 11.31; 12.11 **24:17** 24.17-18 Lk 17.31 **24:21** 24.21 Dan 12.1; CWJ 7.14 **24:23** 24.23-25 Lk 17.23-24 **24:24** 24.24 24.5; 7.15; CWJ 13.13-14 **24:27** 24.27 24.30, 37; 25.31; 1Kwr 15.23; 1Tes 3.13; 4.15; 2Tes 2.1, 8; Jak 5.7-8; 2Pi 3.4; 1Jn 2.28

28 Daa slam masa cek mamæckaya daha na, kwakucuh hay makustakaya fetede*.

29 «Fa dæba nga banay a masa daa ðar hay a ngene na, wure ngene pas a tæbzley la, kiya fa da wedey daa saba, wurzla hay a kæzlamawa la da vad a hwayak, cek hay cæpa da gazlavay da vad, a wusam la. 30 Daa ngene, yah, Bæz nga Ndaw, ya da wuzwa vaw da gazlavay da vad. Anda kefe, ndøhay da bæla cæpa a da wudam ta matøway. A da høtmaya, yah, Bæz nga Ndaw, ya fa sawa da ray mekwtene ta gødan mahura lenj ta mewedey nga Bay Gazlavay. 31 Day nga taalam mahura a cænwa la, yah, Bæz nga Ndaw, ya da slørdatørwa maslanj hay nga Bay Gazlavay da vad amba a diyam aa slam hay tabiya da bæla, a kusmatørwa ndøhay masa Gazlavay ma walata nga ndøhay anja hay.»

Mey-menjey ta gudav

(Mark 13.28-31; Luk 21.29-33)

32 «Jøkam slømay maaya maaya fa mey masa yah ma da wakwara ta gudav. Da masa ka høtmar gudav fa ðedey, gwaslaf a gudaf! gudaf! na, ka sørmara kiya madaw a ley gweegwe cay. 33 Anja letek køne, da ka høtmatar cek hay a tabiya fa kam anda yah ma løvkwat kefe na, ngene sørmara, Yah, *Bæz nga Ndaw, gweegwe cay ya vøhwa. 34 Ya fa løvkwat fara fara, cek hay a kefe tabiya a da kam na, ndøhay masa wure kefe ta mæcam tabiya daa ba aran. 35 Slam da vad ta slam da hwayak a ndøvey la, ama mey adaw na, fa da ndøvey daa ba sælak.»

Ma særa pas nga mavøhwa nga Bæz nga Ndaw na, wa?

(Mark 13.32-37; Luk 17.26-30, 34-36)

36 «Fara fara, cek hay a kefe tabiya a da kam na, ndaw ma særa kwa ðar a, kwa ler e, daa ba. Kwa maslanj hay ma njam da cakay Bay Gazlavay da vad a sørmara ba, kwa Yah, Bøzey anja, ya særa ba, ama si Papay, pal taava anja, ma særa ðar a.

37 Ta pas masa yah, *Bæz nga Ndaw ma da vøhwa na, a da key anda cek ma key daa masa Nøwe anja da bæla. 38 Daa masa Bay Gazlavay ta paslata cek hay da bæla ta yam daa ba aran, haa a wusey kasl fa ðar masa Nøwe ma mbøzey aa kwambiwal na, ndøhay fa zømam cek, fa sam cek, fa

* **24:28** 24.27-28 Anda ndøhay ma høtmar mezømey nga var, da daa ba, kwakucuh hay makustakaya da ray cek mamæckaya na, ndøhay tabiya a da høtmar Yesu, Bæz nga Ndaw ma da vøhwa na, køne may. **24:28** 24.28 Jøw 39.30; CWJ 19.17-18 **24:29** 24.29 Iz 13.10; 34.4; Hag 2.6, 21; 2Pi 3.10, 12; CWJ 6.12-14 **24:30** 24.30 Zak 12.10-14; Dan 7.13-14; Mt 24.27; 26.64; Mk 14.62; CWJ 1.7 **24:31** 24.31 13.41; taalam: 1Kwr 15.52; 1Tes 4.16 **24:34** 24.34 16.28 **24:36** 24.36 SNM 1.7 **24:37** 24.37-39 MC 6.11-13; 7.7-13; 2Pi 3.6

lam ngusay, asaya, fa vøldamata dam ata hay a way zel.
³⁹ Ama daa ngene na, kwa ndøhay ta sørmara masa cek fa da høtfatar na, daa ba, haa yam a sawa aa zøfdata cøpa.

Yah, Bøz nga Ndaw ma da vøhwa na, a da key køne. ⁴⁰ Daa ngene, da ndøhay cew fa kam sløra da ley na, ya da ngøla pal, ya da mbøkda langar. ⁴¹ Da ngusay cew fa køram fa lavar pal na, ya da ngøla pal, ya da mbøkda langar.

⁴² Anda kefe, wam vaw, ka da nam ba, maja ka sørmara pas nga Bay akwar Mahura ma da vøhwa ba. ⁴³ Jøkam slømay maaya maaya, da bay nga way a søra ðar masa ndaw-mayal ma da daw a way anga nga leley ta tavad na, a ney aa ðar dasi tavad a ngene la daw? Fa da ney daa ba sølak, fa da mbøkda ndaw-mayal nga sløna way anga daa ba. ⁴⁴ Maja ngene, akwar may, wam vaw maaya maaya, maja yah, Bøz nga Ndaw, ya da vøhwa na, kwa ka sørmara ðar a ba.»

Mey da ray ndaw ma ka sløra maaya ta maaya ba
(Luk 12.41-48)

⁴⁵ «Ndaw ma ka sløra maaya ta lenjesl na, wura? Ndaw ma ka sløra maaya ta lenjesl na, ara ndaw masa bay anga ma vøldata ma ka sløra hay cøpa asi har anga amba a vøltar cek mezømey daa masa may fa catar. ⁴⁶ Da masa bay anga ha, a sawa a høtfar anga fa ka sløra ha na, ndaw ma ka sløra ha aa sømey la. ⁴⁷ Ya fa løvkwar fara fara, bay anga ha, a da vøldara zleley anga hay cøpa a har anga amba a nøkfar dey. ⁴⁸ Ama da ndaw ma ka sløra ha anga maaya ba na, a da ley mewulkey wal, a løyey: “Bay aðaw aha, fa da vøhwa gweegwe daa ba.” ⁴⁹ Anda kefe, ndaw ma ka sløra ha, a zlar nga køfta mandala anga hay masa ata ma kam sløra bama. A da zømey cek, a da sey wuzam ta ndøhay ma wam mandaw mandaw. ⁵⁰ Yaw, bay anga ha na, a da vøhwa ta pas masa ndaw ma ka sløra fa wulkey da ray a daa ba, asaya, kwa fa da søra ler e daa ba. ⁵¹ Bay anga ha, a da bøla da way anga, a da sərda banay anda ndøhay masa ta neneh cew ma da søram banay ta pas mendøvey nga bøla, fetefe a da tøyaw, asaya, a daa pøfey sler.»

25

Mey-menjey da ray ma da vøhwa nga Yesu

¹ Yesu a ngatar mey a gula anga hay, a løvtar: «Ya gwa nga wa pas masa yah ma da vøhwa nga wey da ray ndøhay na, ta me? Yaw, ya gwa nga wa ta sabara hay kuraw daha

ma diyam ta pas meley kwakwa. A diyam nga cawa ray ta zel nga dam a ta tavaɗ, ta petərla ata hay da har. ² Sabara hay zlam da wuzlah ata na, manjar lenjesl hay. Siya hay zlam na, ata ta lenjesl. ³ Sabara hay manjar lenjesl hay heyey na, a lamata petərla ata hay, ama ta lam mal a har nga zlərey aa petərla ata hay a saya na, daa ba gway. ⁴ Ama sabara hay zlam masa ta lenjesl heyey na, a lamata petərla ata hay, asaya, a zləram mal aa kwalaba hay. ⁵ Zel nga dam aha ta wuswa fiyaw daa ba. Anda keɗe, sabara hay heyey a gəram nga səkwamara haa ɗar a katar, a nam.

⁶ «Ta wuzlah-tavaɗ na, ɗay a cənwa ta gəɗaŋ, a ləvey: “Zel nga dam ta wuswa cay, diyam ta cadamərwa ray.” ⁷ Da ray ngene, sabara hay kaa heyey a sləkɗam daa ɗar, a ɗiymata petərla ata hay. ⁸ Sabara hay manjar lenjesl hay heyey na, a ləvmatar a sabara hay masa ta lenjesl hay: “Ambahw, vəlmandar mal may taw. Petərla ala hay fa məcam maja mal daa saba.” ⁹ Sabara hay a, a mbəɗdamatara, a ləvmatar: “Kay! ya vəldamara ba, maja mal ala fa da wusndakwar aləkwa cəpa daa ba. Diyam ta həɗkamawa fa ndəhay ma həɗkada mal.”

¹⁰ «Masa ata ma diyam sem nga səpwa mal heyey na, zel nga dam heyey, a wuswa dəba. Sabara hay siya zlam masa maɗiytakaya vaw heyey na, a mbəzam bama nga key gwagway. Ta', a gərcamara mey-slam.

¹¹ «Fa dəba ha, sabara hay zlam manjar lenjesl heyey, a wusmawa, a ləvam: “Bay ala, Bay ala, wurndara mey-mbew may taw!” ¹² Ama zel nga dam heyey, a mbəɗdatara, a ləvtar: “Ya fa ləvkwar fara fara, ya sərkwar ba.”»

¹³ Yaw, Yesu aa guzltar saya, a ləvtar: «Anda keɗe, wam vaw, maja yah, *Bəz nga Ndaw, ma da vəhwa na, ka sərmara kwa ɗar a ba, kwa ler e ba.»

Mey-menɗey da ray ndəhay ma ka sləra maaya ta maaya ba

(Luk 19.11-27)

¹⁴ Yesu aa guzltar mey-menɗey saya, a ləvtar: «Ma da vəhwa aɗaw a bəla na, aŋga letək anda ndaw masa-zleley ma daw a mələk. Masa fa da daw na, a zəлта ndəhay ma ka sləra aŋga hay, a vəldatara zleley aŋga amba a nəkfamar dey. ¹⁵ A vəlar gabal temere zlam * a ndaw pal, a vəlar gabal temere cew a ndaw laŋgar, a vəlar gabal temere pal a ndaw laŋgar saya. A vəldatara na, təɗe ta gəɗaŋ nga

25:1 25.1 Lk 12.35-36 **25:10** 25.10 9.15 **25:11** 25.11-12 Lk 13.25 **25:12** 25.12 7.23 **25:13** 25.13 24.42 **25:14** 25.14-15 Mk 13.34 * **25:15** 25.15
Gabal temere zlam, gabal temere cew, leŋ gabal temere pal mawuzlalakaya ta mey Gərek na, «talaŋ zlam, talaŋ cew, talaŋ pal».

ndaw a, nga ndaw a. Fa dɔba ha, ta', a daw a mɔlak.
 16 Ndaw masa ma hɔtey gabal temere zlam heyey na, a daw wure wure ngene, a kada filaw ta dala ha. A hɔtey gabal temere zlam mekele a dey a. 17 Ndaw masa ma hɔtey gabal temere cew heyey na, a ka kɔne may. A hɔtey gabal temere cew a dey a. 18 Ama ndaw masa ma hɔtey gabal temere pal na, a daw ta', a zlɔdey vɔgedɔ, a bada dala nga bay anɔa ha a hwadɔ a.

19 «Menjey ga fa dɔba ha, bay nga ndɔhay ma ka slɔra ha, a vɔhwa da mɔlak a, ta', aa cɔfdɔta da ray dala ha heyey.
 20 Ndaw masa ma hɔtey gabal temere zlam heyey, a ngɔchey a cakay a, ta gabal temere zlam mekele da dey a, ta', a lɔvar: "Bay adaw, kah ta vɔlya gabal temere zlam la. Nɔka, yah ma hɔtey gabal temere zlam mekele la a dey a." 21 Bay anɔa, a mbɔddara, a lɔvar: "Maaya, kah ndaw ma ka slɔra maaya ta cɔvedɔ e. Kah ma key slɔra ta cɔvedɔ e la ta cek mecɔhe. Ya da vɔldatakawa cek adaw hay maaya ga asi har akah. Sawa, njakwa cew e, sasɔmkwa."

22 «Ndaw masa ma hɔtey gabal temere cew, a ngɔchey a cakay a may, ta', a lɔvar: "Bay adaw, ka ta vɔlya gabal temere cew la, nɔka, ya ta hɔtey gabal temere cew mekele la a dey a." 23 Bay anɔa ha, a lɔvar: "Maaya, kah ndaw ma ka slɔra maaya ta cɔvedɔ e. Ka ta key slɔra la ta cɔvedɔ e ta cek mecɔhe. Ya da vɔldatakawa cek adaw hay maaya ga asi har akah. Sawa, njakwa cew e, sasɔmkwa."

24 «Fa dɔba ha, ndaw masa ma hɔtey gabal temere pal heyey, a ngɔchey a cakay a, ta', a lɔvar: "Bay adaw, ya sɔra, kah ndaw ma sɔrey dey-ceceh fa ndaw ba, ka ngɔmey daw daa slam masa kah ma slɔka ba, asaya, ka kawa cek da ley daa slam masa kah ma rɔva ba. 25 Ya ta zlurey la ta kah, anda kedɔ, ta', ya daw ya bada dala akah aa vɔgedɔ. Dala ha anɔa kedɔ, ehe tɔba cek akah." 26 Bay anɔa ha, a mbɔddara, a lɔvar: "Kah ndaw ma ka slɔra maaya ba, masa-mayad! Ka sɔra yah ndaw ma ngɔmey daw daa slam masa yah ma slɔka ba, asaya, ya kawa cek da ley daa slam masa yah ma rɔva ba, 27 anda kedɔ, ka gwa ka vɔlda dala adaw a har ndɔhay amba daa mavɔhwa adaw kedɔ na, a vɔhdamiwa dala ha ta yam a, ba daw?"

28 «Da ray ngene, ndaw masa-zleley a, a lɔvtar a ndɔhay ma ka slɔra anɔa hay mekele: "Tɔbmara gabal temere he, vɔldamara a ndaw masa ma hɔtey gabal temere zlam a dey a heyey. 29 Sɔrmara, ndaw masa cek anɔa daha, a da vɔlmar a dey a, ama ndaw masa cek anɔa kuset kɔdey na,

a da tɔbmara kwa masa kuset kɔɔfey a ɲgene. ³⁰ Ndaw ma ka slɔra kede na, aɲga ndaw masa mayad ɲga tede, hazakadamara aa ambaw, aa lɔvanɲ. Fetede, a da tɔway, asaya, a daa pɔɔfey sler.”»

Mey da ray mendɔvey ɲga bɔla

³¹ Yesu aa guzltar a gula aɲga hay saya a lɔvtar: «Masa yah, *Bɔz ɲga Ndaw, ma da vɔhwa daa mewedfey adaw na, ya da samawa ta maslanɲ hay ɲga Gazlavay tabiya da vad. Ya da njeɲ aa slam adaw menjeɲ maaya ɲga key sariya.

³² Sɔkway hay tabiya da bɔla, a da kusam fa meɲ adaw. Ya da ɲgɔwta ndɔhay maaya ta maaya ba hay wal wal anda ndaw-mecɔkwer ma ɲgɔweɲ tɔbanɲ hay ta dɔhway. ³³ Ya da pata ndɔhay maaya ta har-zɔmay, ndɔhay maaya ba ta har-gula.

³⁴ «Fa dɔba ha, yah bay, ya da lɔvtar a ndɔhay ta har-zɔmay: “Akwar ndɔhay masa Papay ma pɔskwar meɲ, slam madfeykaya ɲgada akwar daha dɔga mezley ɲga bɔla, samawa, njakwa bama ta Gazlavay ɲga sɔrmataw, ³⁵ maja may ta caya la, akwar ta vɔlmaya cek mezɔmey la, yam ta kaya la, akwar ta vɔlmaya yam ɲga sey la, ya ta daw la fa akwar anda ndaw-mɔlak, akwar ta tɔbmaya la a way akwar hay, ³⁶ zana fa vaw adaw daa ba, akwar ta vɔlmaya zana la. Vaw ta caya la, akwar ta samawa la ɲga nɔkmaya. Yah daa fɔrsɔne, akwar ta samawa la ɲga nɔkmaya.”

³⁷ «Da ray ɲgene, ndɔhay maaya heyey, a da mbɔɔɔdamiwa, a lɔvmaya: “Bay mahura, ya hɔtmaka may fa caka, ta’, ya vɔlmaka cek mezɔmey na, ɲga vara? Ya hɔtmaka yam fa kaka, ta’, ya vɔlmaka yam ɲga sey na, ɲga vara? ³⁸ Ya hɔtmaka kah ndaw-mɔlak, ta’, ya tɔbmaka a way ala hay na, ɲga vara? Da daa ba, ya hɔtmaka zana fa vaw daa ba, ta’, ya vɔlmaka zana na, ɲga vara? ³⁹ Asaya, ya hɔtmaka vaw fa caka, da daa ba, kah daa fɔrsɔne, ta’, ya nɔkmakawa na, ɲga vara?”

⁴⁰ «Yah, bay, ya da mbɔɔɔdatara, ya lɔvtar: “Ya fa lɔvkwar fara fara, cek hay tabiya masa akwar ma kamara ɲgada kwa waawa, kwa ɲgada ndɔhay mecɔhe hay dasi ndɔhay adaw hay kede, ka kamara ɲgene na, ɲgada yah may.”

⁴¹ «Fa dɔba ha, ya daa guzltar a ndɔhay ta har-gula, ya lɔvtar: “Akwar masa Bay Gazlavay ta nɔskwar sem, ɲgɔcham la da cakay adaw. Diyam aa awaw mendɔvey ba madfeykaya ɲgada bay-malula ta maslanɲ aɲga hay. ⁴² Maja

may ta caya la, ama akwar ta vɛlmaya cek mezɔmey daa ba. Yam ta kaya la, ama akwar ta vɛlmaya yam nga sey daa ba. ⁴³ Ya ta daw la fa akwar anda ndaw-mɛlak, ama akwar ta tɛbmaya a way akwar hay daa ba. Zana fa vaw adaw daa ba, ama akwar ta vɛlmaya zana daa ba. Vaw ta caya la, asaya, yah daa fɛrsɛne, ama akwar ta samawa nga nɛkmaya daa ba.”

⁴⁴ «Da ray ngene, a da mbɛɔɔdamiwa, a lɛvmaya: “Bay mahura, ya hɛtmaka may fa caka, da daa ba, yam fa kaka na, nga vara? Ya hɛtmaka kah ndaw-mɛlak, da daa ba, zana fa vaw akah daa ba na, nga vara? Asaya, ya hɛtmaka vaw fa caka, da daa ba, kah daa fɛrsɛne masa ala ta jɛnmaka daa ba na, nga vara?”

⁴⁵ «Da ray ngene, ya da mbɛɔɔdatara, ya lɛvtar: “Ya fa lɛvkwar fara fara, cek hay masa akwar ma gɛmam nga kamara ngada kwa waawa, kwa ngada ndɛhay mecɛhe hay dasi ndɛhay adaw hay kedɛ ba na, ka gɛmam nga kamara ba ngene na, ara ngada yah may.”

⁴⁶ «Yaw, ndɛhay maaya ba hay anda ngene na, a da sɛram banay nga sɛrmataw, ama ndɛhay masa maaya fa Gazlavay na, a da hɛtam heter mendɛvey ba.»

26

Mahura hay nga Jɛwif hay a slam yawa nga kɛɔɛy Yesu vagay

(Mark 14.1, 2; Luk 22.1, 2; Jan 11.45-53)

¹ Masa Yesu ma ndɛvda meesɛrkedey hay a kedɛ tabiya cay na, ta', aa guzltar a gula anɔa hay, a lɛvtar: ² «Ka sɛmara, mendɛrey ɔar cew nga wusey fa gwagway nga *Pak, ba diya? Ta pas a ngene, a da kɛzɛmaya yah, *Bɛz nga Ndaw, a da dɛrmaya fa hwadam mazlanɔalɛkaya.»

³ Ta pas a ngene, *bay-ray hay nga ndɛhay ma ka kwakwas nga Gazlavay ta mahura hay nga *Jɛwif hay a kusam a way Kayif, *ndaw mahura da ray ndɛhay ma ka kwakwas nga Gazlavay cɛpa. ⁴ A slam yawa da wuzlah ata amba a kɛzɛmara Yesu ta mayal a nga kɛɔɛy vagay. ⁵ Aa guzlam, a lɛvam: «Ya gwakwa nga kɛzakwa daa gwagway kedɛ ba, maja ndɛhay a da yam mey.»

Ngwas a mbɛɔɔar bɛrɔɛy fa ray nga Yesu

(Mark 14.3-9; Jan 12.1-8)

⁶ Daa ngene, Yesu aa da Betani da way *Simanɔw, ndaw masa aa ma mbɛlda daa maasɛkula. ⁷ Masa Yesu a, fa zɛmey ɔaf na, ngwas daha a ngɛchey a cakay a ta kwalaba

nga anɣwa maavərkwakaya mezəley «*albaatəra». Kwala-aba ha marəhkaya ta bərdey mezey maaya ma hədkey ba. Ta', a mbəddara bərdey a fa ray nga Yesu. ⁸ Masa *gula hay nga Yesu ma hətmar na, a cam mevel, a ləvam da wuzlah ata: «A nəsa bərdey a kefe nga tede na, maja me? ⁹ Anja a hədkada na, a gwa nga hətey dala ga. Fa dəba ha a wunkatara dala ha a masa-viya hay, ba daw?»

¹⁰ Yesu a səra mewulkey ata ha, ta', aa guzltar, a ləvtar: «Ka həbmar ray a nɣwas aha na, maja me? Sləra masa anɣa ma kayawa kefe na, anɣa maaya, ¹¹ maja ndəhay masa-viya hay na, mandaw mandaw akwar bama. Ama yah na, akwar fa da hətmaya nga njey mandaw mandaw ta akwar daa ba. ¹² Nɣwas aha, a mbədda bərdey fa vaw adaw na, a key nɣene, a diyawa vaw adaw nɣadaa cəvay. ¹³ Ya fa ləvkwar fara fara, kwa daa wura daa wura da bəla tabiya, ndəhay ma da wuzdamara *Mey-maaya-mawiya na, a kadamara cek masa nɣwas a ma ka kefe la may, amba ndəhay a sərfadamara nɣwas aha.»

Juda a vəlda Yesu a har masa-gəra anɣa hay
(Mark 14.10, 11; Luk 22.3-6)

¹⁴ Fa dəba ha, ndaw pal da wuzlah *gula hay nga Yesu kuraw a ray a cew mezəley Juda Iskariyawt, a daw fa *bay-ray hay nga ndəhay ma ka kwakwas nga Gazlavay. ¹⁵ Ta', aa guzltar, a ləvtar: «Da ya ta vəldakwara Yesu a har akwar la na, ka da vəlmaya me?» Ta', a məslmar bərey hay kwakwar maakar nga dala, a vəldamara. ¹⁶ Dəga ta pas a nɣene, Juda a daw a səpey cəved amba a kərzatara Yesu, a vəldatara.

Yesu a zəmam dəf nga gwagway nga Pak ta gula anɣa hay
(Mark 14.12-21; Luk 22.7-13, 21-23; Jan 13.21-30)

¹⁷ Ta dəar nɣeeme nga *gwagway nga pen manjar cek ma həsla da hwaɗ a na, *gula hay nga Yesu, a nɣəcham a cakay a, a ləvmar: «Ka wudəy ya diyam, ya diyəmərwa slam amba ya zəmkwa dəf nga gwagway nga *Pak na, dama?» ¹⁸ Yesu a mbəddatara, a ləvtar: «Diyam aa berney nga *Jeruzelem fa ndaw daha. Ka ləvmar na, “Bay ala a ləvey: Dar adaw gweegwe cay a wuswa. Ya wudəy nga key gwagway nga Pak ta gula adaw hay na, da way akah.”» ¹⁹ Gula hay nga Yesu heyey a kamara anda Yesu ma ləvtar. Anda kefe, a diyamara cek nga gwagway nga Pak a dəba.

²⁰ Taa kwad a ηgene, Yesu a njam ta gula anɗa hay kuraw a ray a cew ηga zamey daf ηga gwagway a. ²¹ Daa masa ata fa zomamara daf a na, Yesu aa guzltar, a lɔvtar: «Ya fa lɔkwar fara fara, ndaw pal da wuzlah akwar a vɔldaya la a har ndɔhay ηga kɔdmaya vagay.» ²² Mey a keɗe a mɛtar vaw kwa ara mey ba a gula anɗa hay a. Da ray ηgene, aa cɔɗdamara Yesu pal pal, a lɔvam: «Bay Mahura, ara yah ma da vɔldaka ba, ba diya?»

²³ Yesu a mbɔɗɗatara, a lɔvtar: «Ma da vɔldaya a har ndɔhay ηga kɔdmaya vagay na, ara ndaw masa alɔkwa fa zomkwa daf bama daa slam a keɗe. ²⁴ Ahaw, yah, *Bɔz ηga Ndaw na, ya mɔcey la anda mey mawuzlalakaya daa ɗerewel ηga Gazlavay ma lɔvey. Ama banay a sawa la a ray ndaw ma da vɔldaya a har ndɔhay ηga kɔdmaya vagay a. Nɗada ndaw aha na, ηgama ta yamɔrwa daa ba sɔlak.»

²⁵ Juda, ndaw ma da vɔlda Yesu a har ndɔhay ηga kɔdmara vagay heyey aa cɔɗɗa Yesu may, a lɔvar: «Bay aɗaw, ara yah ma da vɔldaka daw?» Yesu a mbɔɗɗara, a lɔvar: «Ka fa kada ta mey akah ηgene na, kwariya?»

Mey da ray mezamey cek ηga madagway-dakw ηga Bay Mahura

(Mark 14.22-26; Luk 22.14-20; 1 Kwarinti hay 11.23-25)

²⁶ Masa ata fa zomam daf ηga gwagway a na, Yesu len! a ley penj. A kar suse a Gazlavay, a wunka, ta', a vɔɗɗatara a gula anɗa hay, a lɔvtar: «Ehe, tɔbmara, zomamara. Keɗe he, ara vaw aɗaw.» ²⁷ Fa dɔba ha, len! a ley vɔley ta cek mesey da hwad a, a kar suse a Gazlavay saya. Ta', a vɔɗɗatara, a lɔvtar: «Ehe, samara akwar cɔpa. ²⁸ Keɗe he, ara mambaz aɗaw. Ta fa mambaz a, Gazlavay a jɔwey mey mawiya ta ndɔhay anɗa hay. Mambaz a, a da mbɔɗɗa maja ndɔhay ga amba Gazlavay a mbɔkɗatara meɓerey ata hay.

²⁹ Ya fa lɔkwar, dɔga wure keɗe ya fa da sey yam ηga babɔza ηga wudez maɗɔckaya anda keɗe daa saba sɔlak. Ya da sey na, si cek mawiya mekele ta pas masa alɔkwa bama daa slam masa Papay fa wey da ray ndɔhay da vad.»

³⁰ Ta', a zlam walay ηga gwagway daa *Pɔsam hay. Fa dɔba ha, a slɔkɗam, a diyam aa Anɗwa ηga *Awliviye.

Piyer a lɔvey fa da mbɔkɗa Yesu daa ba sɔlak

(Mark 14.27-31; Luk 22.31-34; Jan 13.36-38)

³¹ Yesu aa guzltar a gula anɗa hay, a lɔvtar: «Dasi tavad keɗe akwar cɔpa ka da mbɔkɗamaya anda mawuzlalakaya

daa d̄erewel nga Gazlavay, ma l̄ovey: “Ya k̄eḁa ndaw-mec̄kwer la vagay. T̄eḁaḅ hay masa ma s̄ek̄eram daa slam a may, aa kwacam ray la pal pal.”³² Ama da yah ta sl̄ek̄ḁawa cay daa mem̄oey na, ya daw la teesed da ray akwar aa hwayak nga *Galile. Ka da h̄etfamaya fetede.»³³ *Piyer a mb̄eḁḁara, a l̄ovar: «Kwa nd̄ohay c̄eḁa a mb̄ekdamaka, ama yah na, ya fa da mb̄ekḁaka daa ba s̄olak.»³⁴ Yesu a mb̄eḁḁara, a l̄ovar: «Ya fa l̄ovka fara fara, dasi tavad̄ kede, wuskwaa gwagwalak a da cey ḁay na, ka ta l̄ovey cay dey maakar, ka s̄erya ba, ka s̄erya ba.»³⁵ Ama Piyer a mb̄eḁḁara, a l̄ovar: «Kwa da fa da k̄eḁmaka vagay na, nga k̄eḁmandakwar cew e, ya fa da l̄ovey ya s̄erka ba na, daa ba s̄olak.» Gula hay nga Yesu siya a l̄ovam k̄one may.

*Yesu a d̄orey danḅay a Gazlavay da Gecemene
(Mark 14.32-42; Luk 22.39-46)*

³⁶ Fa d̄eḁa ha, Yesu a wusam ta gula anḅa hay aa slam daha mez̄oley Gecemene. Ta', aa guzltar a gula anḅa hay, a l̄ovtar: «Njam fede, yah na, ya daw la fatad̄ay nga d̄erwa danḅay a Gazlavay.»

³⁷ Ta', a nḡelta ata *Piyer ta b̄eḁa hay nga Zebede cewete. Wure ḅgene, mevel anḅa a d̄esley, aa l̄okey maja banay ma da sawa a ray a.³⁸ Anda kede, aa guzltar, a l̄ovtar: «Mewulkey fa da k̄eḁya vagay. Njam fede, zaz̄ekakwa, ka da nam ba.»³⁹ Ta', a nḡeḁhey nek̄eḁey fa mey, a ney ta hwad̄ ta hwad̄, ray dar! a hwayak, a d̄orey danḅay, a l̄ovey: «Papay, da a key ta key na, nḡeḁhada banay ma da sawa a ray ad̄aw kede la. Ta k̄one he c̄eḁa na, key anda kah ma wud̄ey, ba na, anda yah ma wud̄ey ba.»

⁴⁰ Cay, ta', a v̄ehwa fa gula anḅa hay maakar heyey, a h̄etfatar manatakaya daa ḁar. Aa guzlar a Piyer, a l̄ovar: «Haya! Ka gwamara nḡaa z̄ekam ta yah kwa ler pal ba gway daw?»⁴¹ Zaz̄ekam, ka da nam ba, d̄eram danḅay a Gazlavay nga j̄onkwar amba cek a batakwat̄ nga key meḁeḁey ba. Mevel akwar na, a wud̄ey nga key cek maaya, ama vaw akwar na, anḅa ta b̄ole.»

⁴² Yesu a nḡeḁhey nga dey cew saya, ta', a d̄orey danḅay, a l̄ovey: «Papay, da ka wud̄ey nga nḡeḁhada banay a kede d̄oreḅ ta yah ba, si a sawa a ray ad̄aw c̄ema na, ka anda kah ma wud̄ey.»

26:31 26.31 Zak 13.7; Mt 26.56; Jan 16.32 **26:32** 26.32 28.7, 16 **26:34** 26.34 26.75 **26:34** 26.34-35 Lk 22.33-34; Jan 13.36-38 **26:36** 26.36-46 Lk 5.16; Heb 5.7-8 **26:39** 26.39 6.10; 20.22; Jan 18.11; Heb 10.9 **26:41** 26.41 Ef 6.18; Heb 2.18

⁴³ Fa dɔba ha, a vɔhwa fa gula anɔa hay maakar heyey saya, a hɔtfatar manatakaya cɔnɔa maja ɔar fa latar mey kalah. ⁴⁴ Anda keɔe, Yesu ta', a mbɔkdata, a nɔgɔchey saya, a ɔɔrey ɔanɔay nɔa dey maakar, aa guzley mey letek anda aa ma ɔɔrey ɔanɔay nɔa dey cew heyey. ⁴⁵ Fa dɔba ha ta', a vɔhwa fa gula anɔa hay heyey saya, a lɔvtar: «Haa wure keɔe, akwar fa nam, fa mɔskam vaw cɔnɔa daw? Ehe ɔar a ta wuswa cay amba a vɔldamaya, yah, *Bɔz nɔa Ndaw, a har ndɔhay ta meɔrey. ⁴⁶ Nɔkmara ndaw ma da vɔldaya a har ndɔhay nɔa kɔɔey vagay fa sawa katay. Lacam, nakwa ta cadakwa ray.»

A kɔrzamara Yesu

(Mark 14.43-50; Luk 22.47-53; Jan 18.3-12)

⁴⁷ Masa Yesu ta ndɔvɔda meeguzley daa ba aran na, Juda, ndaw pal dasi gula anɔa hay kuraw a ray a cew heyey, a wuswa. Juda ha a samawa na, ta ndɔhay ga ta ɔɔlaw * hay da cakay, ta zlanday hay da har. Ma slɔrdamatɔrwa ndɔhay a na, ara bay-ray hay nɔa ndɔhay ma ka kwakwas ta mahura hay nɔa Jɔwif hay. ⁴⁸ Juda, ndaw masa ma da vɔlda Yesu a har ndɔhay, ta wuswa fa Yesu daa ba aran na, aa guzltar a ndɔhay a, a lɔvtar: «Ndaw masa yah ma da car har anda mandala aɔaw fara fara na, ara anɔa, kɔrzamara.» ⁴⁹ Masa Juda ma wusey la gweegwe ta Yesu na, wure wure nɔgene, a nɔgɔchey a cakay a, a lɔvar: «Bay aɔaw, zay daw?» Ta', a car har anda aa ma lɔvey heyey. ⁵⁰ Yesu a mbɔɔɔara, a lɔvar: «Jam aɔaw, ka slɔra masa kah ma wuɔey nɔa ka.»

Anda keɔe, ndɔhay ma samawa ta ata Juda heyey a nɔgɔcham fa Yesu a, ta', a kɔrzamara. ⁵¹ Ndaw pal da wuzlah gula anɔa hay masa da cakay a, a mɔɔɔrwa ɔɔlaw anɔa, a nɔgɔma, cɔrah! a cɔrha slɔmay nɔa madɔrlam nɔa ndaw mahura da ray ndɔhay ma ka kwakwas. ⁵² Maja nɔgene, Yesu aa guzlar, a lɔvar: «Mada ɔɔlaw akah aa way a maja ndɔhay ma kɔɔam vaw ta ɔɔlaw na, ara ɔɔlaw a ma da kɔɔta vagay. ⁵³ Ka sɔra, da ya wuɔey na, ya gwa nɔaa cɔɔɔa Papay nɔa slɔrya maslan anɔa hay ga a fɔna gabal kuraw a ray a cew † nɔa jɔnya, ba daw? ⁵⁴ Ama da ya ka kɔne na, mey nɔa Gazlavay mawuzlalakaya a da key fara fara na, kwara dɔba wura? Maja mey a mawuzlalakaya, a lɔvey si cek aha a key kɔne.»

26:44 26.44 2Kwr 12.8 **26:45** 26.45 Jan 12.23; 13.1; 17.1 * **26:47** 26.47 ɔɔlaw: maslalam **26:52** 26.52 MC 9.6 † **26:53** 26.53 Yesu a wuɔey nɔa lɔvey Papaha, Bay Gazlavay, a gwa nɔa slɔrar maslan hay ga, a slɔfey ba. A wa ta sewje hay nɔa Rawm ma kusam gabal maakwaw, gabal maakwaw, slam 12.

⁵⁵ Fa dɔba ha, Yesu aa guzltar a ndɔhay makustakaya fetede, a lɔvtar: «Ka samawa nga kɔrzamaya ta dɔlaw, ta zlanday faa har faa har anda yah ndaw-mayal na, maja me? Mandaw mandaw yah manjakaya daa *Way-mekey-kwakwas nga Gazlavay, ya faa sɔrkadata ndɔhay, ama ka ta kɔrzamaya daa ba. ⁵⁶ Ama daa mey nga Gazlavay mawuzlalakaya na, ndɔhay ma tɔla mey nga Gazlavay taa guzlam la da ray cek ma da key da ray adaw. Ara maja ngene si cek aha a key cɔpa.»

Fa dɔba ha, gula aɔga hay cɔpa a zluram, a mbɔkdamara Yesu, a hwam.

Yesu fa mey nga ndɔhay ma sla yawa nga Jɔwif hay

(Mark 14.53-65; Luk 22.54, 55, 63-71; Jan 18.13, 14, 19-24)

⁵⁷ Ndɔhay ma kɔrzamara Yesu heyey, ta', a handamara a way Kayif, *ndaw mahura da ray ndɔhay ma ka kwakwas nga Gazlavay. *Ndɔhay maa sɔrkada kwakwas nga Mawiz ta mahura hay nga *Jɔwif hay makustakaya fetede. ⁵⁸ *Piyer na, fa sɔpa Yesu ta meedɔren e. A daw haa a mbɔzey a palah-way nga ndaw mahura da ray ndɔhay ma ka kwakwas nga Gazlavay heyey. Ta', a njam ta ndɔhay ma jɔfa way a, amba a nɔka cek masa ata ma da kamar a Yesu.

⁵⁹ *Bay-ray hay nga ndɔhay ma ka kwakwas nga Gazlavay ta ndɔhay mahura hay mekele masa ma sla yawa nga Jɔwif hay tabiya, a sɔpam dabaray nga mbɔrzlafamar a ray Yesu amba a kɔdmara vagay. ⁶⁰ Kwa ndɔhay ga ta mbɔrzlafamar la a ray Yesu, ama ta ngene he cɔpa, ta hɔtam mey tɔde nga kɔdmara vagay daa ba. Fa dɔba ha na, ndɔhay cew daha a samawa fa mey ata, a mbɔrzlafamar a ray a, a lɔvam: ⁶¹ «Ndaw kefe a lɔvey: “Ya gwa nga bɔzla *Way-mekey-kwakwas nga Gazlavay, dɔr maakar na, ya lɔma la aa slam a.”» ⁶² *Ndaw mahura da ray ndɔhay ma ka kwakwas nga Gazlavay a slɔkdey, aa guzlar a Yesu, a lɔvar: «Ka mbɔfdatara a ndɔhay maa guzlam da ray akah kaa ba gway daw?» ⁶³ Ama Yesu manjakaya teete. Ta', ndaw mahura da ray ndɔhay ma ka kwakwas nga Gazlavay heyey a lɔvar saya: «Ya faa cɔfdaka ta mezɔley nga Gazlavay masa aa ta dey, *ndaw masa Gazlavay ma wala nga lɔhdata ndɔhay heyey na, ara kah daw? Wuzdiwa! Kah na, Bɔzey nga Gazlavay daw? Mbedey amba ka kadiwa fara fara.»

⁶⁴ Yesu a mbɔfdara, a lɔvar: «Ka fa kada ta mey akah ngene na, kwariya? Ama ya fa lɔvkwɔr, dɔga wure kefe,

ka da hɛtmaya yah, *Bɛz ŋga Ndaw, manjakaya ta harzɛmay ŋga Bay Gazlavay Mawaca-waca. Asaya, ka hɛtmaya la ya fa sawa da ray mekwtene da vad.» ⁶⁵ Maja ŋgene, ndaw mahura ha ŋgar! ŋgar! a ŋgɛrta zana aŋga hay, aa guzley, a lɔvey: «'As! 'As! Ta pa ray aŋga sem ŋga Gazlavay, akwar ta cɛndamara la, ba diya? Wure kedɛ, kwa ya sɛpkwa ndaw ŋгаа guzɛndakwar da ray a saba. ⁶⁶ Kaa wure kedɛ, ka wulkam kwara?» Ndɛhay da cakay a, a mbɛɛdamara, a lɔvmar: «Aŋga ta key mebɛrey sem, si mekɛɛɛy aŋga vagay.»

⁶⁷ Ndɛhay siya a cɛrmar meesleɓ aa dey, a dɔvmar mekɛɛɛy, siya hay may, a vɛlmar matapa-har ‡, ⁶⁸ a lɔvmar: «Da kah *Kɛriste na, sɛra ma kɛɛka kedɛ na, wa? Wuzdandara cey!»

Piyer a lɔvey a sɛra Yesu ba

(Mark 14.66-72; Luk 22.56-62; Jan 18.15-18, 25-27)

⁶⁹ Daa ŋgene, *Piyer manjakaya da palah-way ŋga ndaw mahura ma ka kwakwas ŋga Gazlavay heyey. Dam ma ka slɛra fetɛɛɛɛ daha, a ŋgɛchawa a cakay a, a lɔvar: «Kah na, gula ŋga Yesu, ndaw *Galile may, ba diya?» ⁷⁰ Ama Piyer a cada mey fa mey ŋga ndɛhay tabiya, a lɔvey: «Kay! Ya sɛra mey masa kah ma wudɛy ŋгаа guzley ba!» ⁷¹ Fa dɛɓa ha, ta', a daw fa mey-mbew ŋga way a. Dam ma ka slɛra mekele daha saya, a hɛtar Piyer, ta', aa guzɛtar a ndɛhay fetɛɛɛɛ, a lɔvtar: «Ndaw kedɛ ara ndaw ŋga Yesu, ndaw *Nezeret.» ⁷² Piyer a cada mey saya, a lɔvey: «Ya fa mbɛɛɛy, fara fara, ya sɛra ndaw a ba.»

⁷³ Fa dɛɓa ha nekɛɛɛy saya, ndɛhay masa fetɛɛɛɛ a ŋgɛcham a cakay Piyer, a lɔvmar: «Fara fara kah na, kah ndaw da wuzɛlah ndɛhay aŋga hay maja meeguzley akah kaa na, anda ndaw daa hwayak aŋga.» ⁷⁴ Da ray ŋgene, Piyer ta', a lɔvtar: «Ya fa mbɛɛɛy, fara fara ya sɛra ndaw a ba. Da ya mbɛrɛzley na, Gazlavay ŋga mbɛɛɛya ray!» Wure wure ŋgene, gwagwalak ta', a cey ɛɛay. ⁷⁵ Piyer a sɛrfada mey masa Yesu maa guzɛlar zleezle heyey dɛɓa. Mey a, a lɔvey: «Wuskwaa gwagwalak a da cey ɛɛay na, ka ta lɔvey cay dey maakar ka sɛrya ba, ka sɛrya ba.» Piyer ta', a bawa aa ambaw, a tɔway ga, a zɔley marava.

26:64 26.64 Dan 7.13; Mt 22.44; 24.30; Mk 13.26; Lk 21.27 **26:65** 26.65 a ŋgɛrta zana aŋga hay: Mesl 14.6; Es 9.3; Ta pa ray aŋga sem ŋga Gazlavay: Lev 24.16; Jan 19.7 ‡ **26:67** 26.67 matapa-har: maarawa **26:67** 26.67 Iz 50.6; 53.5 **26:68** 26.68 21.11 **26:75** 26.75 26.34

27

*A handamara Yesu fa mey nga Bay Pilat
(Mark 15.1; Luk 23.1, 2; Janj 18.28-32)*

¹ Perek perek, *bay-ray hay nga ndəhay ma ka kwakwas nga Gazlavay tabiya, leŋ mahura hay nga *Jəwif hay a slam yawa daa slam a nga kədey Yesu vagay. ² A jəwmara, a handamara fa Pilat, ndaw Rawma ma wa hwayak ata.

*Mey da ray meməcey nga Juda
(SNM 1.18, 19)*

³ Juda, ndaw ma vəlda Yesu asi har nga masa-gəra anga hay heyey, a cənda fa da kədmara Yesu vagay na, a zəley marava. Da ray ŋgene, a handatara bərey hay kwakwar maakar nga dala heyey a *bay-ray hay nga ndəhay ma ka kwakwas nga Gazlavay ta mahura hay nga *Jəwif hay.

⁴ A ləvtar: «Ya ta key mebərey la maja yah ma vəlda ndaw masa ta zay da mey nga kədey vagay.» Ama ndəhay a, a mbəddamara, a ləvmar: «Ŋgene na, ara mey akah ba na! Ma hətfandar me?» ⁵ Da ray ŋgene, aa kwacada dala heyey aa *Way-mekey-kwakwas nga Gazlavay. Ta', a daw a ləwa ray anga, pam! a məcey.

⁶ *Bay-ray hay nga ndəhay ma ka kwakwas nga Gazlavay heyey, a gədmamara dala ha. Aa guzlam, a ləvam: «Kwakwas aləkwa, a vəldakwar cəved amba dala keđe, a cəmey ta zleley mavəldakaya nga key sləra daa Way-mekey-kwakwas nga Gazlavay ba, maja ara dala nga mekədey ndaw vagay.» ⁷ A slam yawa da wuzlah ata da ray dala ha. Ta', a hədkam ley nga ndaw meləmey manɣayak daha ta dala ha. A tərdamara ley a nga cəvay nga mələk hay ma məcəm fetede. ⁸ Ara maja ata ma hədkamara ley a ŋgene ta dala nga ray nga ndaw na, haa wure keđe, ndəhay fa zəlmara ley a: «ley nga mambaz.» ⁹ Cek aha, ta key la anda Jeremey, *ndaw ma təla mey nga Gazlavay maa guzley zleezle, a ləvey: «A lam bərey hay kwakwar maakar nga dala masa ndəhay da wuzlah ndəhay *Israyel hay ma pamara təde fa ray nga ndaw. ¹⁰ A vəldamara dala ha nga hədkey ley nga ndaw meləmey manɣayak anda Bay Gazlavay ma ləvya.»

*Yesu fa mey nga Bay Pilat
(Mark 15.2-15; Luk 23.2-5, 13-25; Janj 18.28-19.16)*

¹¹ A lacadamara Yesu fa mey nga Bay Pilat. Bay a, aa cɔfɔa, a lɔvar: «Kah na, bay nga *Jɔwif hay fara daw?» Yesu a mbɔfɔdara, a lɔvar: «Anda kah ma lɔvey.»

¹² Daa masa *bay-ray hay nga ndɔhay ma ka kwakwas nga Gazlavay leŋ mahura hay nga Jɔwif hay heyey faa dɔdfamar mey na, kwa Yesu ta mbɔfɔdatara daa ba. ¹³ Da ray ngene, Pilat aa guzlar, a lɔvar: «Ka fa cɔnda mey hay maaya ba cɔpa masa ata maa guzldamara da ray akah keɔe, ba diya?» ¹⁴ Kwa Yesu a mbɔfɔdara ba sɔlak. Anda keɔe, Bay Pilat a rɔzley ga maja.

¹⁵ Fa mevey a, fa mevey a, ta gwagway nga *Pak na, bay daa hwayak a, fa pɔskey ndaw pal daa fɔrsɔne. A pɔskey na, ndaw masa ndɔhay makustakaya ma wuɔam.

¹⁶ Daa ngene, ndaw daa fɔrsɔne daha, ndɔhay tabiya a sɔrmara ara ndaw maaya ba. Mezɔley nga ndaw a na, Yesu Barabas. ¹⁷ Pilat aa cɔfɔdata ndɔhay makustakaya, a lɔvtar: «Ka wuɔam ya pɔskakwar na, Yesu Barabas daw, da daa ba, Yesu, ndaw masa ata ma zɔlmara *Kɔriste heyey daw?»

¹⁸ Pilat a sɔra a handamɔrwa Yesu fa mey anɔa na, maja sɔleŋ fa katar da ray Yesu a.

¹⁹ Daa masa Bay Pilat manjakaya daa slam mekey sariya na, ngwas anɔa, a slɔrwa fa anɔa, a lɔvar: «Ka da kar cek a ndaw ngene ba, maja ara ndaw masa ta zay da mey. Ya sɔra maja dasi tavaɔ keɔe, mesɔfney ta kaya la ta ndaw aha. Mesɔfney a, ta laya mey la.»

²⁰ *Bay-ray hay nga ndɔhay ma ka kwakwas nga Gazlavay leŋ mahura hay nga Jɔwif hay heyey, a hɔldamata ndɔhay makustakaya heyey ngaa cɔfɔdamara Bay Pilat amba a pɔskatara Barabas, ama Yesu na, a kɔɔmara vagay.

²¹ Bay Pilat aa cɔfɔdata saya, a lɔvtar: «Dasi ndɔhay cew keɔe na, ka wuɔam ya pɔskakwar na, wa?» Ndɔhay makustakaya ha, a mbɔfɔdamara, a lɔvmar: «Barabas! Barabas!»

²² Pilat aa cɔfɔdata saya, a lɔvtar: «Kaa Yesu ndaw ma zɔlmara Kɔriste na, ya da kada na, kwara?» Ndɔhay tabiya a mbɔfɔdamara, a lɔvmar: «Dɔra fa hwadam mazlanɔgalakaya!»

²³ Pilat aa cɔfɔdata, a lɔvtar: «Cek maaya ba masa anɔa ma key na, wura?» Ama a wuɔam ta gɔɔaŋ ta gɔɔaŋ saya, a lɔvam: «Dɔra fa hwadam mazlanɔgalakaya!»

²⁴ Masa Pilat ma nɔka kwa a gwa nga key meeme da ray mey a ba, asaya, masa anɔa ma nɔka ndɔhay fa kam baazlam ta gɔɔaŋ, ta gɔɔaŋ na, ta', a kawa yam, a pɔra har anɔa fa mey nga ndɔhay makustakaya, a lɔvtar: «Da akwar ta

27:11 27.11 2.2; 27.29, 37, 42; Mk 15.2, 9, 12, 18, 26, 32; Lk 23.3, 37-38; Jan 1.49; 12.13; 18.33, 39; 19.3, 15, 19, 21 27:12 27.12-14 Jan 19.9; Mt 26.63 27:19 27.19 Lk 23.47 27:20 27.20-23 SNM 3.13-14

kədmara ndaw keđe la vagay na, mey adaw da hwaď a daa ba. Ara mey akwar!» ²⁵ Ndəhay makustakaya tabiya a mbəddamara, a ləvmar: «Anja ndaw a ŋga məcey. Mey a ŋga sawa a ray ala ta bəz ala hay tabiya!» ²⁶ Anda keđe, ta', Pilat a pəskatara Barabas daa fərsəne. Ama Yesu na, Pilat a ləvtar a sewje hay ŋga slədmara ta laway, ta', a vəldatara amba a dərmarā fa hwadam mazlanġalakaya.

Sewje hay aa sanġəram a ray Yesu
(Mark 15.16-20; Jan 19.2-3)

²⁷ Fa dəba ha, sewje hay ŋga Bay Pilat, a handamara Yesu a palah-way ŋga Bay aha. Ta', a zəlmatərwa sewje hay siya fetede tabiya a cakay a. ²⁸ A cəkwmata zana anġa hay fa vaw, ta', a kəzlmār zana ŋga bay hay magaza. ²⁹ Ta', a cam hatak, a paďamar ray ta anġa anda gursaw ŋga bay. Fa dəba ha, a vəlmar danġwar ŋga bay hay a har-zəmay. A ragadam fa mey anġa, aa sanġəram a ray a, a ləvam: «Zay daw, bay ŋga *Jəwif hay?»

³⁰ Fa dəba ha, a təfmar meesleď fa vaw, ta', a təbmara danġwar heyey, a kədmara aa ray ta anġa. ³¹ Masa ata maa sanġəram cay a ray a na, a cəkwmara zana magaza heyey fa vaw, a kəzlmār zana anġa hay. Ta', a badamara daa berney a, a handamara ŋga dərey fa hwadam.

A dərmarā Yesu fa hwadam mazlanġalakaya
(Mark 15.21-32; Luk 23.26-43; Jan 19.17-27)

³² Masa sewje hay a, fa handamara Yesu na, a cam ray ta ndaw daa berney ŋga Siren daha, mezəley *Simanġw. A təkmar đay a Simanġw heyey ŋga la hwadam mazlanġalakaya ŋga Yesu a. ³³ A wusam aa slam mezəley Gwalgwata, anda meləvey, «slam anda tetesl ŋga ray ŋga ndaw.» ³⁴ Fetede, a vəlmar wuzam majahadəkaya ta slalak meedəwek e. Yesu aa cəka, ama a gəmey ŋga sa ba.

³⁵ Ta', a dərmarā fa hwadam mazlanġalakaya heyey. Fa dəba ha, a kəďam caca ŋga wunkey zana anġa hay. ³⁶ Ta', a njam fetede ŋga jəďmara. ³⁷ A wuzlalam mey fa hwadam, a sləpmara ta da ray Yesu fa hwadam mazlanġalakaya. Ara mey masa ata ma kəďmara vagay maja. Mey a, a ləvey: «Ndaw keđe na, ara Yesu, bay ŋga *Jəwif hay.» ³⁸ Daa slam masa ata ma dərmarā Yesu a na, ta dəram mayal hay cew la a cakay a, pal ta har-zəmay, lanġar ta har-gula.

³⁹ Ndəhay ma diyam taa slam a ŋgene, aa sanġəram a ray a, a wusam ray, a cəďmara, ⁴⁰ a ləvmar: «Kah na, ndaw

ma wudey nga bəzla *Way-mekey-kwakwas nga Gazlavay amba ka ləma mekele daa dər maakar heyey, ba diya? Da kah Bəzey nga Gazlavay na, bərnəgawa fa hwadam a ngenə a hwayak, ləhda ray akah, dəba taw!» ⁴¹ Asaya, *bay-ray hay nga ndəhay ma ka kwakwas nga Gazlavay ta *ndəhay maa sərkada kwakwas nga Mawiz leŋ mahura hay nga Jəwif hay aa sanğərfamar, a ləvam: ⁴² «A ləhdata ndəhay siya hay na, kaa ray anğa na, a gwa nga ləhda, ba daw? Da anğa Bay nga *Israyel hay na, anja nga bərnəgawa fa hwadam a wure keđe dəba taw! Da ta bərnəgawa sem na, ngenə, ya təbkwa mey anğa. ⁴³ A pa Gazlavay nga ndaw anğa fara fara, asaya, taa guzley la, a ləvey: “Yah na, Bəzey nga Gazlavay.” Yaw, da Gazlavay fa wuda na, nga ləhda wure keđe dəba taw!» ⁴⁴ Mayal hay cew masa madərtakaya da cakay a heyey na, a cədmara kəne may.

Meməcey nga Yesu

(Mark 15.33-41; Luk 23.44-49; Jan 19.28-30)

⁴⁵ Ta wuzlah-pas, ləvan a key daa hwayak cəpa. Ləvan a, a njeý haa bərey maakar nga pas nğaa kwad. ⁴⁶ Ta bərey maakar a na, Yesu a wudey ta gədan, a ləvey ta mey ata: «Eli, Eli, lema sabaktani?» Anda meləvey: «Gazlavay adaw, Gazlavay adaw, ka mbəkdaya na, maja me?» ⁴⁷ Ndəhay siya fetede, a cədamara mewudey nga Yesu a na, a ləvam: «Nəka, anğa fa zəla *Eli, *ndaw ma təla mey nga Gazlavay zleezle!» ⁴⁸ Ndaw pal da wuzlah ata, ta', a hway nga jəhwəbey cek anda gagəmay aa yam nga babəza nga wudez meekwerek e, ta', a pa fa mey nga zlanday. A təldara a Yesu a amba a sasəba. ⁴⁹ Ama ndəhay mekele a ləvam: «Səkwakwa, amba ya nəkakwa da wara cay Eli a, a sawa nga ləhda kwa.»

⁵⁰ Yesu a wudey ta gədan saya, pam! a məcəy. ⁵¹ Daa *Way nga Gazlavay na, zana ma gərca *Slam masa Gazlavay aa da hwad a daha. Masa Yesu ma məcəy la na, zana ha, a nğərey cew dəga da vad kasl a hwayak. Hwiyak a wusey, bəler * hay a bəzlam, ⁵² cəvay hay a wuram, ndəhay nga Gazlavay maməctakaya ga, a sləkdfamawa daa meməcəy. ⁵³ A bamawa daa cəvay. Fa dəba nga masləkdfawa nga Yesu na, ndəhay a, a diyam aa berney nga *Jeruzelem, berney nga Gazlavay. Fetede, ndəhay ga a hətmatar.

⁵⁴ Mahura nga sewje hay nga Rawma hay ta sewje anğa hay ma jədmara Yesu heyey, a hətmar hwiyak ma wusey ta

27:40 27.40 26.61, 63 **27:42** 27.42 27.11 **27:43** 27.43 Ps 22.9; Mt 26.63

27:45 27.45 Am 8.9 **27:46** 27.46 Ps 22.1 **27:48** 27.48 Ps 69.22 * **27:51**

27.51 bəler: anğwa ma bəzlwə. **27:51** 27.51 Mab 26.3; Heb 10.19-20

cek hay mekele ma kam heyey na, a zluram ga, a lõvam: «Fara fara ndaw keɗe na, ara Bøzey nga Gazlavay.»
⁵⁵ Ngusay ga fetede daha, ata fa nõkam dey da døren, da døren. Ngusay a ta søpmar wurzay nga Yesu la døga da *Galile fa jønmara. ⁵⁶ Da wuzlah ngusay a na, *Mari da Magdala, Mari mamañ nga ata *Jak ta *Jawzef, leñ mamañ nga bøza hay nga Zebede.

*A jøhmara vagay nga Yesu
 (Mark 15.42-47; Luk 23.50-56; Jan 19.38-42)*

⁵⁷ Ta pas ngaa kwad a ngene, ndaw masa-zleley da slala Arimate daha, mezøley *Jawzef, anga may, ara *ndaw ma tøba mey nga Yesu. A wusey a *Jeruzelem. ⁵⁸ Ta', a daw a høtfar Bay Pilat, aa cøfda vagay nga Yesu. Da ray ngene, Bay Pilat a, a pøskatar mey a sewje anga hay nga vøldamara vagay a, a Jawzef e. ⁵⁹ A la vagay a, a zlønga ta zana mawiya mezløngey vagay. ⁶⁰ A handa vagay a, aa cøvay mawiya masa anga maa vørkwa daa anywa daa ðar hay a ngene. Fa døba ha, a gødbalawa † beeler mahura gaz! fa mey nga cøvay a, ta', a daw. ⁶¹ Ata *Mari da Magdala ta Mari lanjar daha, manjatakaya fetede, dey pøla! a mey cøvay a.

Sewje hay nga Bay Pilat a jøðmara cøvay nga Yesu

⁶² Pepørek e, anda meløvey ta *pas memøskay-vaw, *bay-ray hay nga ndøhay ma ka kwakwas nga Gazlavay ta *Fariza hay a kusam, a diyam a way Bay Pilat, ⁶³ a lõvmar: «Bay Mahura, ala fa sørfadamara daa masa ndaw membørzley keɗe anga ta dey na, taa guzley la, a løvey: “Fa døba nga ðar maakar na, ya sløkðawa la daa memøcey.”

⁶⁴ Anda keɗe, pøskatar mey a sewje akah hay amba a jøðmara cøvay a haa ðar maakar, daa ba na, gula anga hay a da samawa nga lalamara vagay a. Fa døba ha, a da mbøzlam, a da lõvam: “Yesu ta sløkðawa sem daa memøcey.” Membørzley ata ngene na, a da føna membørzley nga ndaw aha masa ngeeme heyey.»

⁶⁵ Pilat ta', a mbøðdatara a ndøhay a, a lõvtar: «Ehe, ngølmata sewje hay keɗe, diyam jøðmara cøvay a maaya maaya anda akwar ma wudam.» ⁶⁶ Ta', a diyam nga jøðmara cøvay a maaya maaya. Anda keɗe, a slørbamara mey nga cøvay a maaya maaya. Fa døba ha, a pam sewje hay nga jøðmara.

28

Yesu a sləkɔawa daa meməcey
(Mark 16.1-10; Luk 24.1-12; Jan 20.1-10)

¹ Fa dɔba ŋga *pas meməskey-vaw, ta pas luma ŋga Gudal, *Mari da Magdala ta Mari lanɔar daha a diyam ta slam bɛŋ-bɛŋ ŋga nɛkmərwa cɔvay ŋga Yesu. ² Wure wure ŋgene hwiyak a wusey gɛɔ-ɛɔ ta gɛɔaŋ. Daa ŋgene maslaŋ ŋga Gazlavay da vad a pawa salay, a gɛɔbala beeler mahura da mey cɔvay heyey, a njeɣ a ray a. ³ Maslaŋ a, dey aŋga a wedey anda var ma zəmey, zana fa vaw aŋga a wedey mabara ndɔɔ-ndɔɔ anda gagəmay. ⁴ Sewje hay ma jɔɔa cɔvay heyey ma hətmar cek aha na, a zluram ga, aa wasam pər-par! a tɔɔam a hwayak, ata anda ndəhay maməctakaya.

⁵ Ta', maslaŋ ŋga Gazlavay heyey aa guzltar a ŋgusay a, a lɔvtar: «Akwar na, ka da zluram ba, ya sɛra ka sɔpam na, Yesu, ndaw masa ata ma dɔrmara fa hwadam mazlaŋgalakaya heyey. ⁶ Aŋga fedɛ daa saba, ta sləkɔawa sem daa meməcey anda aŋga maa guzley heyey. Samawa nɛkmara slam masa ata ma pamara vagay aŋga ha a hwad a tiya! ⁷ Cay na, diyam fiyaw fiyaw, lɔvmatar a gula aŋga hay: “Yesu ta sləkɔawa sem daa meməcey. Aŋga sem teesɛɔ fa mey akwar ŋgada *Galile, ka da hətɔamar fetedɛ.” Mey adaw ŋgada akwar na, ara kedɛ.»

⁸ ŋgusay a, a mbəkdamərwa cɔvay a, a hwam fiyaw fiyaw ŋga kadamatara mey a, a gula aŋga hay heyey. Daa ŋgene mandɔrzay fa katar, ama faa sɔmam ga. ⁹ Ta', Yesu heyey a daw a cadata ray, a catar har. Masa ŋgusay a ma hətmar Yesu la na, a ŋgəcham a cakay a, a ragadamar, a kɔzamarara fa salay. ¹⁰ Ta', Yesu aa guzltar, a lɔvtar: «Ka zluram ba, diyam ta wuzdamatara a mɔlma adaw hay siya na, ŋga diyam a Galile. A da hətmaya fetedɛ.»

Mey ŋga sewje hay ma jɔɔmara cɔvay

¹¹ Daa masa ŋgusay heyey ata daa cɔved arañ na, sewje hay siya da wuzlah sewje hay ma jɔɔa cɔvay heyey, a vɔham aa berney. A kadamatara cek ma key cɔpa da mey cɔvay heyey ŋgada *bay-ray hay ŋga ndəhay ma ka kwakwas ŋga Gazlavay. ¹² *Bay-ray hay ŋga ndəhay ma ka kwakwas kaa heyey, ta', a kusam ta mahura hay ŋga *Jɔwif hay, a slam yawa da wuzlah ata. Ta', a vɔlmatar dala ga ŋgada sewje hay a, ¹³ a kɔtmata, a lɔvmatar: «Diyam, wuzdamara a ndəhay, lɔvmatar: “Gula hay ŋga Yesu a, ta samawa sem ta tavad, ta lalamara vagay a sem daa masa

ala manatakaya daa dar.” ¹⁴ Da bay nga hwayak ta cænda la na, ya sɔpam cæved la nga wuzdamara mey a maaya maaya amba a tɔba. Anda kedfe, kwa mey fa da hɔtfakwar daa ba.» ¹⁵ Ta’, sewje hay heyey dɔba, a tɔbmara dala ha, a diyam a kamara anda ata ma kɔtmata heyey. Ara maja ngene haa wure kedfe fa kadamara mey a da wuzlah Jɔwif hay cɔnga.

Yesu, a wuztar vaw a gula anga hay

(Mark 16.14-18; Luk 24.36-49; Jan 20.19-23; SNM 1.6-8)

¹⁶ Gula hay nga Yesu kuraw a ray a letek a diyam a *Galile, a tɔpam aa ray nga anɔgwa masa Yesu ma lɔvtar nga diyam a hwaɗ a heyey. ¹⁷ Daa masa gula hay a ma hɔtmar Yesu la na, ta’, a ragadamar. Ama siya hay da wuzlah ata na, ta sɔrmara ara Yesu fara fara na, daa ba.

¹⁸ Yesu ta’, a nɔgɔchey a cakay ata, a lɔvtar: «Gazlavay ta vɔldiwa gɔdan sem nga wa slam da vad ta slam da hwayak cɔpa. ¹⁹ Maja ngene, diyam fa sɔkway hay da bɔla cɔpa, tɔrdamata nga ndɔhay adaw hay. Kamatar *baptem ta mezɔley nga Papay, ta mezɔley adaw, yah Bɔzey anga, leɔ ta mezɔley nga Mesɔfney anga. ²⁰ Asaya, sasɔrkadamata amba a tɔbmara mey hay tabiya masa yah maa sɔrkadakwara. Yaw, sɔrmara, yah na, yah ta akwar mandaw mandaw haa mendɔvey nga bɔla.»

28:13 28.13 27.64 **28:16** 28.16 5.1; 26.32; 28.10 **28:17** 28.17 14.31 **28:18** 28.18 Dan 7.14; Mt 11.27 **28:19** 28.19 sɔkway hay da bɔla cɔpa: 10.5-6; 24.14; Mk 16.15; Lk 24.47; SNM 1.8; CWJ 7.9; kamatar baptem: Mt 3.15; Mk 16.16; SNM 2.38; 8.36; 1Kwr 1.13-16; Ef 4.5; Jan 3.22; 4.1-2; Rm 6.3-4; Papay, Bɔzey anga, leɔ Mesɔfney anga: 2Kwr 13.13; SNM 2.38; 8.16; Rm 6.3, 4; Gal 3.27; Kwa 2.12
28:20 28.20 1.23; 5.2-7, 27; 11.28-30; 18.20

Mey-maaya-mawiya masa

Mark ma wuzlala Mey da ray

Mey-maaya-mawiya masa Mark ma wuzlala

Mark, ndaw ma wuzlala derewel keɗe na, ara ndaw ma zɛlmara Jan-Mark masa mawuzlalakaya daa SNM 12.12 ta 12.25 leŋ daa Kwa 4.10.

Mark a wuzlala Mey-maaya-mawiya ha na, a wuɗey nga wuzdatara a ndɔhay tabiya Yesu na, ara ndaw masa Gazlavay ma wala nga lɔhdata ndɔhay. Derewel e na, aŋga maazɛma anda siya hay ba. Mark taa guzley da ray mayawa nga Yesu daa ba, asaya taa guzley da ray Yesu daa masa aŋga bɛzey na, daa ba. Daa derewel e na, Mark ta wuzleley la nekɔɗey da ray meesɔrkedey nga Yesu. Ama a wuzleley har-gɔɗaŋ na, da ray cek hay masa Yesu ma kata, anda melɔvey maazla hay, membɔley ndɔhay daa macay, mebɔley malula da ray ndɔhay.

Mark a wuɗey ya sɔrkwa Yesu Kɔriste na, ara ndaw ta gɔɗaŋ maja dɔga daa mezley nga derewel e na, a wuzda Yesu Kɔriste ara Bɛzey nga Gazlavay (1.1). Fa dɔba ha Mark aa guzley da ray mey hay zlam ma wuzda Yesu ma da zlar slɔra aŋga. Mey hay a na, ara Jan-Baptis ma sawa nga ɗiira cɔved nga Yesu, Yesu ma hɔtey baptem, Mesɔfney nga Gazlavay ma pawa salay a ray Yesu, ɗay ma cɔnwa da gazlavay da vad ma lɔvey Yesu na, ara bɛzey nga Gazlavay mawudkaya kalah, leŋ Yesu ma jerey fa Satan (1.2-13).

Daa fasɔlawal 1.14 haa 10.52 na, Yesu a pɔkey daa hwayak nga Galile leŋ daa slam hay gweegwe ta hwayak a. A wuzda aŋga ta gɔɗaŋ nga Gazlavay. Ndɔhay ga a tɔbmara mey aŋga, ama ndɔhay siya a rɛsmara.

Daa fasɔlawal 11 haa fasɔlawal 16 na, Yesu aŋga da Jeruzelem leŋ daa slam hay gweegwe ta Jeruzelem e.

Daa derewel e keɗe na, mey mekele mekele daha nga vɔley gɔɗaŋ a ndɔhay:

Yesu a wuɗey na, bɛza hay a diyam fa vɔɗa (10.13-15)

Yesu a wuɗey na, ndɔhay tabiya a cɔndamara mey aŋga, a tɔbmara (16.15)

¹ Keɗe ara mezley nga *Mey-maaya-mawiya da ray *Yesu *Kɔriste, Bɛzey nga *Gazlavay.

*Jan-Baptis a wuzey mey da ray masawa nga Yesu
(Matiye 3.1-12; Luk 3.1-18; Jan 1.19-28)*

² *Mey-maaya-mawiya ha a zley anda *Izay, *ndaw ma tɔla mey nga Gazlavay zleezle, ma wuzlala daa dɛrewel anɔa, a lɔvey:

«Gazlavay a lɔvar a Bɔzey anɔa,
“Ehe, ya fa slɔrey maslan-ɔvedɔ adaw fa mey akah,
nga dɔiya ɔvedɔ akah.

³ Ndaw fa wudey da wuzlah-ley, a lɔvey:

Diyamar ɔvedɔ ngada Bay Mahura,
dɔymara ɔvedɔ e maaya maaya dɔr e.”»

⁴ Ndaw ma tɔla mey a na, ara *Jan-Baptis. Anda kefe, ta daw la a wuzlah-ley. Fetede ta katar *baptem la a ndɔhay, ta wuzey mey nga Gazlavay la, a lɔvey: «Mbɔddamara menjey akwar, sɔpmara Gazlavay ta mevel pal, hɔtam baptem, amba Gazlavay a mbɔkdakwara mebɔrey akwar.»

⁵ Ndɔhay ga daa berney nga *Jeruzelem len da slala hay mekele mekele masa daa hwayak nga *Jude a diyam fa *Jan a, a wuzdamara mebɔrey ata hay. Jan ta', a katar baptem daa wayam nga Jurden. ⁶ Jan a pey fa vaw na, zana nga engwec nga slagwama *, vaw majɔwkaya ta hutedɔ. A zɔmey na, ayakw ta amam da ley. ⁷ Fa wuztar mey nga Gazlavay a ndɔhay, a lɔvey: «Fa dɔba adaw na, ndaw ma fɔnya a sawa la. Ya wusa nga regedey fa mey anɔa amba ya pɔska zewedɔ nga tarak anɔa ba. ⁸ Yah na, ya kakwar baptem ta yam, ama ndaw aha na, a da kakwar baptem ta *Mesɔfney nga Gazlavay.»

*Jan-Baptis a kar baptem a Yesu
(Matiye 3.13-4.11; Luk 3.21, 22; 4.1-13)*

⁹ Daa masa *Jan-Baptis fa wuzey mey nga Gazlavay ta masa anɔa fa katar *baptem a ndɔhay na, Yesu a slɔkdawa da slala *Nezeret, daa hwayak nga *Galile. A wusey fa *Jan daa wayam nga Jurden heyey. Jan ta', a kar baptem daa wayam a. ¹⁰ Masa Yesu fa bawa daa yam a na, wure ngene a hɔtar slam da vadɔ fa wurey, *Mesɔfney nga Gazlavay a pawa salay a ray a anda makurgwadakw. ¹¹ A ɔnda dɔy maa guzlwa da vadɔ, ma lɔvey: «Kah na, Bɔzey adaw masa yah ma wudɔ kalah. Ya faa sɔmey ga da ray akah.»

¹² Wure wure ngene, Mesɔfney nga Gazlavay, ta', a tɔkar dɔy a Yesu nga daw a wuzlah-ley. ¹³ A njey fetede dɔr kwakwar mɔfadɔ, anɔa manjakaya da wuzlah cek nga ley

hay. Fetede, *Satan, bay-malula, a wudey nga bata, ama ta gwa daa ba. Fa dɔba ha, maslan hay nga Bay Gazlavay da vad a samawa nga jɔnmara.

*Yesu a zɔlwa gula hay mɔfad ngeeme
(Matiye 4.12-22; Luk 4.14, 15; 5.1-11)*

¹⁴ Pas pal daha, Bay *Herawt a slɔrey sewje anɔa hay nga kɔrzawa *Jan-Baptis. A kɔrzamɔrwa, a jɔwmara, a kɔzlamara aa fɔrsɔne.

Masa ata ma kɔzlamara Jan-Baptis a la aa fɔrsɔne na, Yesu ta', a daw aa hwayak nga Galile. Anɔa fa pɔkey fetede, fa wuzda Mey-maaya-mawiya nga Gazlavay a ndɔhay, ¹⁵ a lɔvtar: «Dar masa Bay Gazlavay ma wala ta wuswa cay. Anda melɔvey, gweegwe cay, Gazlavay a wuzdɔrwa bay anɔa. Anda kedede, mbɔddamara menjey akwar, tɔbmara *Mey-maaya-mawiya nga Gazlavay!»

¹⁶ Yesu fa daw da mey dɔhwa nga *Galile †. A da nɔkey dey na, a ray ndɔhay cew ma kɔrza ewet daha, ara ata Simanɔw ta mɔlmaha Andɔre. Ata fa kɔrzam ewet ta tabaw ‡ daa dɔhwa ha. ¹⁷ Ta', Yesu a nɔgɔchey a cakay ata, a lɔvtar: «Samawa asi adaw. Akwar na, ndɔhay ma kɔrza ewet, ama dɔga wure kedede ya da tɔrdakwar nga ndɔhay ma zɔlwa ndɔhay aa cɔved nga Bay Gazlavay.» ¹⁸ Wure nɔgene, ata *Simanɔw ta *Andɔre mbak! a mbɔkdamata *tabaw ata hay, ta', a diyam asi Yesu.

¹⁹ Yesu a nɔgɔchey daa slam aha nɔgene nekɔdey na, a hɔtatar ata *Jak ta mɔlmaha *Jan, bɔza hay nga Zebede. Ata daa kwambiwal ata, fa dɔymata tabaw ata hay. ²⁰ Wure nɔgene, Yesu a zɔltɔrwa. Bɔza hay a, a mbɔkdamara papa ata Zebede manjakaya daa kwambiwal a ta ndɔhay ma kam slɔra ta ata. Ta', ata Jak ta Jan a diyam asi Yesu.

*Yesu a bɔley malula da ray ndaw
(Luk 4.31-37)*

²¹ Fa dɔba ha, ata Yesu ta gula anɔa hay a diyam a slala Kapernayum. Ta *pas memɔskey-vaw, Yesu a daw aa *way-mewuzey-mey nga Gazlavay fetede. Aa sɔrkadata ndɔhay, a wuztar mey nga Gazlavay daa way a. ²² Ndɔhay a, a rɔzlam da ray meesɔrkedey anɔa ha, maja anɔa faa sɔrkadata ndɔhay anda *ndɔhay maa sɔrkada kwakwas nga Mawiz ba, ama aa sɔrkadata ta gɔdan masa Gazlavay ma vɔldara.

† **1:16** 1.16 dɔhwa nga Galile: Ara dɔhwa mahura, maazɔma ha a key gweegwe kɔlemeeter 22, mewurey a, a key kɔlemeeter 12. Yam da hwad a mandaw mandaw daha. Slala hay mekele mekele da mey dɔhwa ha. ‡ **1:16** 1.16 tabaw: Cek mahura nga kɔrzey ewet anda njeele mahura masa ndɔhay ga ma kɔrzadamara ewet. **1:18** 1.18, 20 Mt 8.21-22 **1:22** 1.22 Mt 7.28-29

²³ Wure wure ηgene, ndaw ta malula da ray daha, a mbəzey aa way-mewuzey-mey nga Gazlavay a, a wudey ta gədan, a ləvey: ²⁴ «Yesu, ndaw *Nezeret, walay akah ta ala malula hay me? Ka sawa ηгаа zəfdandar daw? Ya səra fara fara, kah na, ndaw nga Gazlavay, masa aa ma slərdərwa nga key sləra anɣa.»

²⁵ Yesu a babəcar a malula da ray ndaw aha, a ləvar: «Njey teete. Bey da ray ndaw kefe.»

²⁶ Malula da ray ndaw a heyey, aa wasada ta gədan, a wudey, ta', a bey da ray ndaw aha. ²⁷ Ndəhay makustakaya daa way a cəpa, a rəzlam, aa cəfdam vaw da wuzlah ata, a ləvam: «Haya! Ara cek e me? Ara meesərkey mawiya daw? Ndaw a, aa ta gədan, kwa aa guzltar a malula hay da ray ndəhay na, malula hay a, a cənmar mey.»

²⁸ Wure wure ηgene, sləmay nga Yesu fa zəley kwa daa wura daa wura cəpa daa hwayak nga *Galile a.

*Yesu a mbəley masa-macay hay ga
(Matiye 8.14-17; Luk 4.38-41)*

²⁹ Ta', Yesu a bey daa *way-mewuzey-mey nga Gazlavay da Kapernayum heyey, wure ηgene, a daw a way ata *Simanɣw ta *Andəre. Ata *Jak ta *Jan a ləgdamara §. ³⁰ Mamanɣ nga ηgwas nga Simanɣw, vaw fa car, manakaya, awaw fa vaw ga. Masa Yesu ma wusey la a way a na, wure ηgene, a kadamara macay nga ηgwas kaa heyey a Yesu. ³¹ Yesu a mbəzey fa ηgwas aha, a kərza fa har, a sləkdada. Awaw fa vaw heyey daa saba. Nɣwas aha, ta', a vəltar cek mezəmey.

³² Masa hakwad ma key la na, ndəhay a handamawa masa-macay hay ga fa Yesu, asaya, a handamawa ndəhay ga masa ta malula da ray. ³³ Ndəhay tabiya da slala ha, a kusam fa mey-mbew nga way nga ata Simanɣw ta Andəre heyey. ³⁴ Yesu a mbəley ndəhay ga daa macay hay mekele mekele. Asaya, a bəley malula da ray ndəhay ga. A mbəkdata malula hay a ηгаа guzlam ba, maja malula hay a, a sərmara Yesu na, ara Bəzey nga Gazlavay.

*Yesu a wuzey mey nga Gazlavay da slala hay mekele
mekele daa hwayak nga Galile
(Luk 4.42-44)*

³⁵ Pepərek e, Yesu a wuley taa pərek e, a daw aa slam masa ndəhay da hwad a daa ba, anɣa fa dərar danɣay a Gazlavay fetefe. ³⁶ Masa ata *Simanɣw ta mandala anɣa hay ta sləkdam cay daa dər na, a hətmar Yesu saba, ta',

a diyam a sɔpmara. ³⁷ Masa ata ma hɔtfamar la na, ta', a lɔvmar: «Ndɔhay tabiya fa sɔpmaka.»

³⁸ Ama Yesu a lɔvtar: «Ahaw, ya sɔra, ama nakwa la a slala hay mekele mekele masa gweegwe ta slala ha keɔfe amba ya wuzey mey nga Gazlavay da slala hay a may, maja ma handiwa feɔfe na, ara slɔra ha keɔfe.» ³⁹ Da ray ngene, Yesu a daw a slala hay cɔpa masa daa hwayak nga *Galile. A wuzey mey nga Gazlavay daa way-mewuzey-mey hay nga Gazlavay mekele mekele fetefe, a bɔley malula hay da ray ndɔhay saya.

Yesu a pɔrey ndaw daa maasɔkula
(Matiye 8.1-4; Luk 5.12-16)

⁴⁰ Yaw, ndaw-maasɔkula daha a sawa fa Yesu. Ta', a regedey fa mey anɔa, a kar ambahw, a lɔvar: «Da ka wufey na, ka gwa nga pɔrya daa maasɔkula adaw keɔfe.»

⁴¹ Yesu, a sɔrfar dey-ceceh, tal! a tɔlda har anɔa, a gɔsfar, a lɔvar: «Ya wufey amba maasɔkula akah a pɔrey. Tɔrey ndaw mapɔrkaya dɔba!»

⁴² Wure wure ngene, maasɔkula fa ndaw a heyey daa saba. Ndaw aha ta sɔɔfey cay. ⁴³ Yesu a lɔvar nga daw a way, ama masa anɔa ma da lɔvar nga daw a way na, ta', a kɔta la dɔgay, ⁴⁴ a lɔvar: «Pey lenɔesl, ka da wuzda cek masa yah ma kakawa keɔfe kwa a ndaw ba. Ama daw fa *ndaw ma ka kwakwas nga Gazlavay, amba a nɔkaka. Fa dɔba ha, vɔlar cek a Gazlavay anda *kwakwas nga Mawiz ma lɔvey, nga wuzey a ndɔhay, maasɔkula fa vaw akah daa saba.»

⁴⁵ Ama, ndaw aha ta tɔba mekɔtey nga Yesu a daa ba, ta', a daw, a wuzdatara cek masa Yesu ma kara heyey ngada ndɔhay daa hwayak a cɔpa. Masa anɔa ma wuzda mey a, a ndɔhay ga la na, maja ngene, Yesu a gwa nga mbɔzey aa berney meedey ndɔhay saba, maja ndɔhay a da kusmawa a cakay a ga kalah. Anda keɔfe, Yesu a daw a njeɔ da wuzlah-ley. Ndɔhay kwa daa wura daa wura cɔpa fa diyam fa vɔɔfa cɔnɔa.

2

Yesu a mbɔley ndaw maahɔlbakaya
(Matiye 9.1-8; Luk 5.17-26)

¹ Masa Yesu ma lawa da wuzlah-ley heyey na, ɔar nekɔɔfey fa dɔba ha, ta', a vɔhwa a Kapernayum. Ndɔhay a cɔndamara masa anɔa da way na, ² a kusmawa ga aa way masa anɔa da hwad a, slam nga njeɔ daa way a daa ba,

asaya, kwa slam nga njeý fa mey-mbew nga way a daa ba. Fetede, Yesu fa wuztar mey nga Gazlavay. ³ Ndohay daha, ta', a samawa fa anga. A samawa na, a handamawa ndaw maahelbakaya, ndohay mofad da wuzlah ata ma lamerwa ndaw aha manakaya da ray bebele. ⁴ A hetam slam nga handamara fa mey nga Yesu ba, maja ndohay ga kalah. Da ray ngene, ta', a tepam aa ray nga way a, a wuram slam der e ta Yesu manjakaya. Ta', a ndekwdamara ndaw maahelbakaya heyey taa slam masa ata ma wurmara ha. A teldamara aa way a na, ndaw aha manakaya da ray gegedef anga. ⁵ Masa Yesu ma noka ndohay a, fa tømara anga ta gedan nga mbelda ndaw ata na, ta', a løvar a ndaw maahelbakaya heyey: «Böz adaw, mebørey da ray akah daa saba.»

⁶ *Ndohay maa sarkada kwakwas nga Mawiz nekøfey daha fetede. Ta', a wulkam daa ray ata, a løvam: ⁷ «Ndaw kaa aa guzley anda kefe na, maja me? A pa ray anga nga Gazlavay na, kwara! Ma gwa nga mbøkda mebørey nga ndaw na, wa? Si Gazlavay pal taava anga.»

⁸ Wure ngene Yesu a sora mewulkey ata. Ta', aa cøfdata, a løvtar: «Ka wulkam daa ray akwar anda kefe na, maja me? ⁹ Ya gwa ya løvey: “Mebørey akah daa saba” da daa ba, ya gwa ya løvey: “Sløkøfey, la gegedef akah, daw ta salay akah.” Dasi mey hay cewete kefe na, masa ta banay nga løvey ngada yah na, wura? ¹⁰ Yaw, ya wufey ka sømara yah, *Böz nga Ndaw, yah ta gedan nga mbøkey mebørey nga ndohay da bøla.» Anda kefe, Yesu, ta', a løvar a ndaw maahelbakaya heyey: ¹¹ «Ehe, ya fa løvka: “Sløkøfey, la gegedef akah, daw a way.”» ¹² Wure ngene, ndaw aha a lecey fa dey nga ndohay tabiya, ta', a la gegedef anga, a bey da wuzlah ndohay a, a daw. Da ray ngene, ndohay makustakaya heyey a røzlam, a hølmmara Gazlavay, a løvam: «Døga nga menjey aløkwa, aløkwa ta høkwa cek anda kefe na, daa ba sølak.»

*Yesu a zøla Levi amba a søpa
(Matiye 9.9-13; Luk 5.27-32)*

¹³ Yesu a sløkøfey da slala ha, a daw ngada mey døhwa nga *Galile saya. Ndohay ga a samawa fa anga, ta', Yesu aa sarkadata ta mey nga Gazlavay. ¹⁴ Fa døba ha, Yesu a sløkøfey daa slam aha, a daw a pøkey. Masa anga fa pøkey na, a høtar *Levi, bøzey nga Alfe, anga manjakaya fa key sløra daa slam mecekeley budaw. (*Jøwif hay fa røsmata ndohay daa søkway ata masa ma cakala budaw nga ndohay

Rawma.) Yesu a ləvar: «Sawa, səpya.» Da ray ηgene, Levi pərta! a sləkdey, a daw asiya.

¹⁵ Fa dəba ha nekədey, Yesu a daw ηga zəmey daf da way Levi a. Daa way a, ata Yesu ta gula anğa hay a zəmamara daf a na, ta ndəhay ma cakala budaw ga leη ta ndəhay ma zləba *kwakwas ηga Mawiz. A zəmam daf bama na, maja ndəhay ma zləba kwakwas ηga Mawiz a ga fa səpmar wurzay ηga Yesu. ¹⁶ Ndəhay maa sərkada kwakwas ηga Mawiz masa da wuzlah *Fariza hay a hətmar Yesu fa zəmam daf ta ndəhay ma zləba kwakwas ηga Mawiz leη ta ndəhay ma cakala budaw. Da ray ηgene, ndəhay maa sərkada kwakwas ηga Mawiz a, a ləvmatar a *gula hay ηga Yesu: «Haya! Yesu a zəmam daf ta ndəhay ma cakala budaw leη ta ndəhay ma zləba kwakwas ηga Mawiz na, kwara!»

¹⁷ Yesu ma cənda mey a la na, ta', aa guzltar, a ləvtar: «Ndəhay masa wurwer na, mey ata ta ndaw ma vəlda slalak daa ba. Ama ma wudəy mey ηga ndaw ma vəlda slalak na, si ndəhay masa-macay hay gway. Yaw, ndəhay ma wulkam ata ndəhay maaya fa mey ηga Gazlavay na, Gazlavay ta slərđiwa ηga zəlta daa ba, ama a slərđiwa na, ηga zəley ndəhay masa ta mebərey.»

Mey da ray mekey daliyam
(Matiye 9.14-17; Luk 5.33-39)

¹⁸ Ta pas lanğar daha, gula hay ηga *Jan-Baptis leη *Fariza hay fa kam *daliyam. Ndəhay mekele, ta', a samawa, aa cəfdamara Yesu, a ləvmar: «Gula hay ηga Jan-Baptis leη ndəhay ma səpam cəved ηga Fariza hay fa kam daliyam, ama gula akah hay na, a kam daliyam ba na, maja me?»

¹⁹ Yesu a mbəđdatara ta mey-menğey, a ləvey: «Da ndaw a zəlwa ndəhay aa mekey mələk ηga kwakwa ηga zəmey cek na, a kam daliyam ta pas ηgene daw? A kam daliyam ba səlak maja zel-kwakwa, anğa da wuzlah ata. Ta pas masa zel-kwakwa aa manjakaya ta ata na, a kam daliyam ba.

²⁰ Ama pas a, a sawa la masa ndəhay ma da kərzamara zel-kwakwa ha, a hətmar da wuzlah ata saba. Ta pas a ηgene na, a kam daliyam la.

²¹ «Yaw, ndaw a dəpa zana mawiya ta zana magurma ba, maja zana mawiya madəpkaya na, a nəsa zana magurma ha la, zana ha a ηğərey la a dey a. ²² Asaya, ndaw a gwa ηga zlərey wuzam meededek e aa kwene-kwene * magurma

ba. Da a zlëra a hwað a na, wuzam a, a mësley, a ngëra kwene-kwene he la. Anda keðe, wuzam a leŋ kwene-kwene he a nësam la cewete. Maaya na, si ndaw a zlëra wuzam meedeðek e na, aa kwene-kwene mawiya.»

*Yesu, anga bay ma wey da ray pas meməskey-vaw
(Matiye 12.1-8; Luk 6.1-5)*

²³ Ta *pas meməskey-vaw daha, Yesu a diyam ta gula anga hay, ata fa diyam taa ley nga cek anda daw. Masa ata fa diyam na, gula anga hay a hëbam cek aha ngaa mbëðey.

²⁴ Da ray ngene, ndëhay *Fariza hay aa cëðfamara Yesu, a lëvmar: «Nëkta gula akah hay fa kam slëra ta pas meməskey-vaw. Ata fa kam cek matëkakaya daa *kwakwas nga Mawiz ta pas meməskey-vaw na, maja me?» ²⁵ Yesu a mbëðdatara, a lëvtar: «Akwar ta janngamara daa ðerewel nga Gazlavay cek masa *Davit ma ka zleezle na, daa ba sëlak daw? Yaw, ta pas lanngar daha, Davit ta ndëhay anga hay, ata daa banay maja may fa catar, ama cek mezëmey fa ata daa ba. ²⁶ Maja ngene Davit e, daa masa Abiyatar, anga *ndaw mahura da ray ndëhay ma ka kwakwas nga Gazlavay, a mbëzey aa way nga Gazlavay, a la peŋ masa mavëldakaya ngada Gazlavay, a zëma. Kwakwas nga Mawiz a vëley cëved a ndëhay tabiya nga zëmey peŋ e ba, si ndëhay ma ka kwakwas gway. Ama Davit ta zëma peŋ e la, ta vëltar la ngada ndëhay anga hay may.» ²⁷ Yesu ta', aa guzltar saya, a lëvtar: «Gazlavay a pa pas meməskey-vaw na, nga key maaya ngada ndëhay. Gazlavay a lëmta ndëhay na, amba pas meməskey-vaw a sërdata banay ba. ²⁸ Anda keðe, yah, *Bëz nga Ndaw, yah na, ndaw ma wey kwa da ray pas meməskey-vaw.»

3

*Yesu a ðiŋra har mamëckaya nga ndaw ta pas meməskey-vaw
(Matiye 12.9-14; Luk 6.6-11)*

¹ Fa dëba ha, Yesu, ta', a vëhey aa *way-mewuzey-mey nga Gazlavay saya. Fetede na, ndaw har mamëckaya daha.

² *Fariza hay a wudam aa dëðfamar meŋ a ray Yesu. Da ray ngene, a jëðmara da a da mbëlda ndaw aha ta *pas meməskey-vaw kwa. ³ Yesu a lëvar a ndaw masa har mamëckaya heyey: «Leceŋ feðe, fa meŋ nga ndëhay tabiya.»

⁴ Fa dɔba ha, ta', aa cɔfdata ndɔhay heyey, a lɔvtar: «Kwakwas alɔkwa a lɔvey na, kwara? Ta pas memɔskey-vaw na, alɔkwa ta cɔved ŋga key maaya a ndaw daw, da daa ba, ŋga key maaya ba daw? Alɔkwa ta cɔved ŋga lɔhey ndaw daa memɔcey daw, da daa ba, ŋga kɔdey ndaw vagay daw?»

Ama ndɔhay a, a gɔmam ŋga mbɔfdamara ba.

⁵ Yesu a nɔkta tabiya ta dey magaza. Mevel a car ga maja mevel ata maaya ba. Ta', a lɔvar a ndaw aha heyey: «Tɔldɔrwa har a.»

Tal! a tɔldara har a. Har a, ta', a diyey aa slam a. ⁶ Masa Fariza hay ma hɔtmar har ŋga ndaw aha ta diyey sem na, a bam daa way-mewuzey-mey ŋga Gazlavay heyey. Wure wure ŋgene, a kusam ta ndɔhay ŋga Bay *Herawt, a cɔmdamara dɔay ata ŋga kɔdey Yesu vagay.

Ndɔhay ga a diyam asi Yesu

⁷ Ata Yesu ta gula anɔa hay, a mbɔkdamata ndɔhay daa *way-mewuzey-mey ŋga Gazlavay heyey, a diyam a mey dɔhwa ŋga *Galile. Ndɔhay ga a diyam asi Yesu a. Ndɔhay ma diyam asiya na, a samawa daa hwayak ŋga Galile, ⁸ daa berney ŋga *Jeruzelem, daa hwayak ŋga *Jude, daa hwayak ŋga Idume, daa hwayak masa ta dey lanɔar ŋga wayam ŋga Jurden, asaya, daa hwayak hay gweegwe ta berney ŋga Tir len ta berney ŋga Sidanw. Ndɔhay a, a samawa ga na, maja ata fa cɔndamara slɔra masa Yesu ma ka. ⁹ Ta', Yesu aa cɔfdata gula anɔa hay ŋga sɔpmar kwambiwal amba da ndɔhay makustakaya ha fa ŋgacamara kalah na, a gwa a tɔpey aa kwambiwal a. ¹⁰ Ndɔhay masa macay hay cɔpa fa wusam vaw ŋgada fa Yesu amba a gɔsfamar, maja anɔa fa mbɔley ndɔhay ga. ¹¹ Ndɔhay ta malula da ray daha a hɔtmar Yesu na, a tɔdam asi salay anɔa, a wudam, a lɔvam: «Kah, Bɔzey ŋga Gazlavay!» ¹² Ama Yesu a kɔtata, a katar mey ta gɔdan, a lɔvtar a da wuzdamara anɔa na, wa ba.

Yesu a weley ndɔhay meslɔrey anɔa hay kuraw a ray a cew

(Matiye 10.1-4; Luk 6.12-16)

¹³ Fa dɔba ha, masa Yesu fa da tɔpey a anɔgwa na, a zɔlta ndɔhay masa anɔa ma wudey. Ta', ndɔhay a, a diyam fa vɔda. ¹⁴ A weley ndɔhay kuraw a ray a cew ŋga tɔrey ndɔhay anɔa hay meslɔrey. A walata na, amba a pɔkam bama mandaw mandaw, amba a slɔrdata ŋga wuzey mey ŋga Gazlavay, ¹⁵ asaya, amba a vɔltar gɔdan ŋga bɔley malula hay da ray ndɔhay. ¹⁶ Ndɔhay mawalatakaya kuraw

a ray a cew e na, ara *Simanɥw ndaw masa Yesu ma par mezəley *Piyer, ¹⁷ ata *Jak ta məlmaha *Jan, bəza hay ɳga Zebede masa Yesu ma patar mezəley Bawanerges, anda meləvey, «ndəhay ma kam baazlam anda var maa bəcey», ¹⁸ *Andəre, *Fəlep, *Bartelemey, *Matiye, *Tuma, Jak bəzey ɳga Alfe, Taade, Simanɥw, ndaw da wuzlah ndəhay ma wudam ɳga ləhdamata ndəhay ata hay dasi har ɳga masa-gəra ata hay, ¹⁹ leɳ Juda Iskariyawt, ndaw ma vəlda Yesu a har masa-gəra aɳga hay.

*Ndəhay a ləvam Yesu na, aɳga ta malula da ray
(Matiye 12.22-32; Luk 11.14-23; 12.10)*

²⁰ Masa Yesu ma walata ndəhay aɳga hay meslərey cay na, ta', a bəɳɳgawa da aɳgwa ha, a daw a way. Ndəhay ga a diyam fa aɳga saya. Ata Yesu ta gula aɳga hay kwa ta hətam har ɳga zəmey dəf daa ba, maja ndəhay makustakaya ga kalah. ²¹ Masa mamaha ta məlmaha hay ma cəndamara ndəhay makustakaya kalah da cakay a na, ta', a samawa amba a ɳgəlmara maja ndəhay a, a wulkam, a ləvam: «Malula fa kar a Yesu!»

²² *Ndəhay maa sərkada kwakwas ɳga Mawiz ma samawa da *Jeruzelem, aa guzlam da ray a, a ləvam: «*Beyelzebul, bay ɳga mesəfney maaya ba hay da ray aɳga daha. Ara aɳga ma vəlar gədan ɳga bəley malula da ray ndəhay.»

²³ Maja ndəhay maa guzlam anda ɳgene na, Yesu, ta', a zəltərwa, a ɳgatar mey, a ləvtar: «*Satan, bay-malula, a gwa a bəla malula da ray ndəhay daw? A gwa ba səlak.

²⁴ Anda meləvey, da ndəhay daa hwayak pal a kam vəram da wuzlah ata na, hwayak a ɳgene a pəlhey la. ²⁵ Asaya, da ndəhay da way pal a kədam vaw da wuzlah ata na, way a ɳgene a pəlhey la. ²⁶ Anda kecfə, da Satan, bay-malula, a kədtə ndəhay aɳga hay na, a key ɳgene, a kədey ray aɳga, aɳga fa da key bay ata daa saba. ²⁷ Yaw, kwa ndaw-mayal ma gwa ɳga mbəzey a way ndaw masa-gədan amba a lalatərwa cek aɳga hay meedey aɳga na, daa ba. Si ndaw-mayal a, a key gədan teesəf, a jəwa ndaw masa-gədan a dəgay. Fa dəba ha, a gwa a həltərwa cek hay da way a.»

²⁸ Yesu a ləvtar saya: «Ya fa ləvkwəra fara fara, Bay Gazlavay a gwa a mbəkdata mebərey tabiya masa ndəhay ma kamara. Asaya, a gwa a mbəkdata mey hay maaya ba tabiya masa ndəhay maa guzlam da ray a. ²⁹ Ama, kwa waawa maa guzley mey maaya ba da ray *Mesəfney ɳga Gazlavay na, Gazlavay fa da mbəkdata mebərey ɳga ndaw

aha daa ba. Yaw, ndaw ma cəfə Mesəfney nga Gazlavay na, mebərey anğa a da njeý nga sərmataw.»

³⁰ Yesu a ləvey anda nğene na, maja ata faa guzlam, a ləvam: «Malula fa kar a Yesu.»

Mamanj nga Yesu ta məlmaha hay na, ara wa hay wa?
(*Matiye 12.46-50; Luk 8.19-21*)

³¹ Ata mamanj nga Yesu ta məlmaha hay a wusmawa aa way masa Yesu aa da hwaď a, a lacam aa ambahw, a sləram ndaw nga zələrwa Yesu. ³² Ndəhay makustakaya ga da cakay a manjatakaya, a ləvmar: «Haya, ata mamakw ta məlmakw hay faa cəfədamaka daa ambahw.»

³³ Yesu a mbəđdatara, a ləvtar: «Mamay na, wa? Məлма aďaw hay na, wa hay wa?»

³⁴ Ta', a nəkfata ndəhay manjatakaya ma zlərmar ray heyey, a ləvtar: «Mamay ta məлма aďaw hay na, ara ndəhay keďe, ³⁵ maja məлма aďaw, dam-mama aďaw, da daa ba, mamay na, ara ndaw ma key cek masa Gazlavay ma wuďey.»

4

Mey-menğey ta ndaw maa kwecey hulfad a ley
(*Matiye 13.1-9; Luk 8.4-8*)

¹ Fa dəba ha, Yesu a daw a meý dəhwa nga *Galile saya, aa sərkađata ndəhay fetedə. Ndəhay ga a diyam a cakay a, maja nğene, Yesu a təpeý aa kwambiwal, a njeý a hwaď a. Kwambiwal a, aa da ray yam, ama ndəhay na, ata da meý dəhwa ha. ² Daa meesərkey anğa na, a kadatar cek hay ga ta meý-menğey. Daa meesərkey anğa ha na, a ləvtar:

³ «Jəkam sləmay! Ndaw mehəvey daha, a daw nğaa kwecey hulfad a ley anğa. ⁴ Masa anğa faa kwacada hulfad a ley a na, hulfad lanğar a kəzley aa cəved. Fa dəba ha, điyanj hay a samawa, a ndamara. ⁵ Hulfad lanğar, a kəzley aa slam masa pəraď, hwiýak da ray a ga daa ba. Hulfad a, a pəceý fiyaw, maja hwiýak da ray a ga daa ba. ⁶ Ama menjeý nekəđey, da masa pas fa teý na, a bata. Fa dəba ha, a kweley, maja slaslalay a daa vəgeď ga daa ba. ⁷ Hulfad lanğar a kəzley a wuzlah hatak. Hatak a, a gəley, aa njərđa hulfad mapəckaya ha. Da ray nğene, hulfad mapəckaya ha a gwa a gəley nga yey ba. ⁸ Ama, hulfad lanğar a kəzley aa slam masa maaya, a pəceý, a gəley, a yey ga. Hulfad mapəckaya pal babəza fa vəđa a key kwakwar maakar, lanğar kwakwar maakwaw, da daa ba, temere.»

⁹ Ta', Yesu a ləvey: «Da ndaw, anɔa ta sləmay na, nɔa cənda mey a maaya maaya.»

Yesu aa guzltar a ndəhay ta mey-menɔey hay na, maja me?

(Matiye 13.10-15; Luk 8.9, 10)

¹⁰ Masa Yesu ma nɔgəchey sem da cakay ndəhay ga heyey na, gula anɔa hay kuraw a ray a cew ta ndəhay mekele da cakay a, aa cəfdamara da ray mey-menɔey hay masa anɔa maa guzldatara heyey. ¹¹ Yesu a mbəfdatara, a ləvtar: «Akwar na, Gazlavay ta vəkwar cəved la nɔa sərey mey da ray mewey anɔa da ray ndəhay. Mey a na, mabadakaya fa dey nɔa ndəhay siya. A cəndamara mey a anda mey-menɔey gway. ¹² Anda kefe,

“Ndəhay a, fa nəkam dey maaya maaya,

ama a hətmar dey ba,

asaya, fa jəkam sləmay maaya maaya,

ama a cəndamara ba,

da daa ba na, a mbəfdam dey la nɔgada fa Gazlavay,

amba Gazlavay a mbəkdatara mebərey ata.”»

Mabara nɔa mey-menɔey da ray meekwecey hulfad

(Matiye 13.18-23; Luk 8.11-15)

¹³ Ta', Yesu a ləvtar: «Ka sərmara mabara nɔa mey-menɔey da ray meekwecey hulfad kefe ba daw? Kaa, ka sərmara mabara nɔa mey-menɔey hay siya na, kwara? ¹⁴ Ndaw maa kwecey hulfad a ley na, anɔa anda ndaw ma wuzey mey nɔa Gazlavay. ¹⁵ Ndəhay siya, ata anda cəved masa hulfad ma kəzley a hwad a. A cəndamara mey nɔa Gazlavay, ama *Satan, bay-malula, a sawa, a la mey a la daa mevel ata. ¹⁶ Ndəhay siya may, ata anda slam masa pərad masa hulfad ma kəzley a hwad a. A cəndamara mey nɔa Gazlavay, a təbmara fiyaw ta meesəmey. ¹⁷ Ama ndəhay a, a təbmara mey nɔa Gazlavay nɔa dər nekədəy anda hulfad ma pəcwa masa ta slaslalay daa vəged ga daa ba. Ta pas masa banay mekele mekele ma da sawa a ray ata maja mey a na, a da mbəkdamara mey nɔa Gazlavay fiyaw fiyaw. ¹⁸ Ndəhay mekele a təbmara mey nɔa Gazlavay anda hulfad ma kəzley a wuzlah hatak. A təbmara mey nɔa Gazlavay, ¹⁹ ama mey a, aa zədəy anda hulfad mapəkaya maa nɔjərdəy daa hatak maja ata fa wulkam kalah da ray menɔey maaya da bəla, maja a wudam zleley kalah, asaya maja a səpam cek hay mekele mekele. Da ray nɔgene, ndəhay a taa zəfdamara mey nɔa Gazlavay daa mevel ata sem. Ata anda cek ma yey babəza ba, maja mewulkey

ata ha ηgene. ²⁰ Ndohay mekele saya, a tōbmara mey ηga Gazlavay anda hulfad ma pōcwa daa slam maaya. A cōdamara mey a, a tōbmara, a kadamara slōra ta anηa. Anda kefe, mey a, a yey daa mevel ata anda hulfad ma pōcwa ma yey ga, babōza fa vōda a key kwakwar maakar, mekele a key kwakwar maakwaw, da daa ba, temere.»

Yesu a ηgey mey ta petōrla
(Luk 8.16-18)

²¹ Ta', Yesu a lōvtar: «Ndaw a gwa a pa petōrla magōdkaya asi mangayak daw? Da daa ba, asi harηgawaw daw? Kōne ba. Si a pa na, aa slam mepey petōrla masa ma gwa ma wađa slam da way. ²² Cek hay tabiya masa mabadatakaya na, a wuzwa la a palah, a da hōtmar fa dey. Anda melōvey, cek masa daa lōvan na, a wuzwa la aa slam mawadakaya amba ndohay tabiya a hōtmar. ²³ Da ndaw, anηa ta slōmay na, ηga cōnda mey a maaya maaya.»

²⁴ Yesu a lōvtar saya: «Pam lenηesl fa mey masa akwar ma cōdamara kefe. Anda akwar ma tōbmara mey ηga Gazlavay na, Gazlavay a wakwara maaya anηa la kōne, fara fara, a da wakwara ma fōna. ²⁵ Da ndaw a tōba mey ηga Gazlavay na, Gazlavay a jōna la ηga tōba mey a ma fōna ma fōna. Da ndaw a tōba mey ηga Gazlavay ba na, kwa mey a masa nekōdey daa mevel anηa na, Gazlavay a badōrwa la tabiya.»

Mey-menηey ta cek masa ndaw ma slōka

²⁶ Yesu a kadatara saya, a lōvey: «*Mewey ηga Bay Gazlavay da ray ndohay na, ya gwa ηga wa na, ta me? Ehe, ya ηgakwar mey da ray a.

«Ndaw a slōkey cek a ley. ²⁷ Cek a, a pōcwa. Taa vad, taa pas cek aha fa gōley. Kwa ndaw a, aa daa đar, kwa aa ta dey, cek aha fa gōley cōnηa, ama ndaw aha a sōra cek aha a gōley na, kwara ba. ²⁸ Cek aha, a pōcwa na, taava anηa, ara hwiyak ma vōlar gōdan ηga pōcōrwa. Ngeeme cek aha, a bawa anda kwakwas. Fa dōba ha, a gōley. A tōlwa ray, a nōhey. ²⁹ Da cek aha ta nōhey cay na, ndaw aha a ηgōma maja kiya mekey cek da ley ta wuswa cay.»

Mey-menηey ta babōza ηga bazlawar
(Matiye 13.31, 32, 34; Luk 13.18, 19)

³⁰ Yesu a kadatara saya, a lōvey: «Ya da wakwa *mewey ηga Gazlavay da ray ndohay na, ta me? Ya da wuzdakwara mewey ηga Gazlavay kaa na, ta mey-menηey wura? ³¹ Yaw,

ya da wakwa mewey nga Gazlavay da ray ndəhay na, ta babəza nga bazlawar masa ndaw ma rəba aa ley anğa. Anğa kuset kədəy dasi babəza nga cek hay tabiya da bəla. ³² Ama da marəbkaya cay na, a pəcwa, a gəley mahura a fənta cek hay mekele tabiya ma yey babəza mezəmey. A pey har hay mahura mahura, kwa diyan hay a gwamara a diyam way da hwađ a.»

³³ Yaw, Yesu a wuzdatara mey nga Gazlavay na, ta mey-menğey hay anda kedə. Aa sərkadatar mey nga Gazlavay a ndəhay tədə ta gədan ata amba a cəndamara. ³⁴ Aa sərkadata na, si ta mey-menğey hay gway. Ama da masa ata ta gula anğa hay daada na, a wuzdatara mabara nga mey a maaya maaya.

Yesu a lacada bərgadan da wuzlah dəhwa
(Matiye 8.23-27; Luk 8.22-25)

³⁵ Taa kwad aha nğene, masa Yesu manjakaya daa kwambiwal heyey na, ta', a ləvtar a gula anğa hay: «Təngkwa a dey lanğar nga dəhwa.»

³⁶ Da ray nğene, a mbəkdamata ndəhay makustakaya da mey dəhwa ha, gula hay a, a təngdamara Yesu ta kwambiwal masa aa manjakaya da hwađ a heyey. Kwambiwal hay mekele malacatakaya da cakay a daha. ³⁷ Ta', bərgadan a zlar mekey bew! bew!, a cawaslada yam aa kwambiwal a, haa kwambiwal a, a rəhey. ³⁸ Yesu, anğa fa dəba nga kwambiwal a, aa daa đar, ray mabəkaya fa cek. Gula anğa hay a sləkdamara, a ləvmar: «Bay Mahura, aləkwa fa da məckwa kedə na, a kaka da ray ba gway daw?»

³⁹ Yesu ta', a sləkdey, a babəcar a bərgadan, a ləvar: «Ka key saba!» A ləvar a yam a: «Ka wusey saba!» Wure wure nğene, bərgadan a, a key saba, yam a, a wusey saba. Memed te' te', a key saba. ⁴⁰ Ta', Yesu a ləvtar a gula anğa hay: «Ka zluram na, maja me? Akwar fa pamaya nga ndaw akwar fara fara daa ba daw?»

⁴¹ Da ray nğene, gula anğa hay a, a zluram ga, aa guzlam da wuzlah ata, a ləvam: «Ndaw a kedə na, ara na, wa? Masa kwa memed ta yam a cənmər mey kedə na!»

5

Yesu a bəley malula da ray ndaw
(Matiye 8.28-34; Luk 8.26-39)

¹ Masa Yesu ma lacada bərgadan a la na, a wusam ta gula anğa hay a dey lanğar nga dəhwa ha, masa daa hwayak nga ndəhay Gəraza hay. ² Yesu, ta', a bərnğawa daa

kwambiwal, wure ɲgene, ndaw daha a bawa daa aɲgwa masa cɔvay hay da hwaɗ a, a sawa a cada ray ta aɲga. Ndaw aha, aa ta malula da ray. ³ A njeɣ da wuzlah cɔvay hay a. Ndaw a gwa a jɔwa, kwa ta calalaw ba. ⁴ A jɔwmata salay aɲga hay ta har aɲga hay ta calalaw dey weewe, ama a ɗɛslta calalaw hay a. Ndaw ma fɛna ta gɔɗaɲ daa ba. ⁵ Mandaw mandaw, taa vad, taa pas, fa pɔkey daa cɔvay hay, fa pɔkey da aɲgwa. Daa mepɔkey aɲga ha na, fa wudeɣ ta gɔɗaɲ, fa pɔɗka vaw aɲga ta aɲgwa.

⁶ Masa ndaw aha ma hɛtar Yesu da dɔreɲ na, a hway ɲgada fa vadfa, a regedey fa meɣ aɲga. ⁷⁻⁸ Yesu a lɔvar: «Malula, bey da ray ndaw keɗe!»

Ama ndaw a, a wudeɣ ta gɔɗaɲ, a lɔvey: «Yesu, Bɔzey ɲga Gazlavay da vad, ka wudeɣ fa yah me? Ya fa kaka ambahw, ta mezɔley ɲga Bay Gazlavay, ka da sɔɗɗaya banay ba.»

⁹ Yesu aa cɔɗɗa, a lɔvar: «Mezɔley akah na, me?»

Ndaw aha a mbɔɗɗara, a lɔvar: «Mezɔley adaw na, “ga,” maja ala malula hay ga.»

¹⁰ Malula hay da ray ndaw aha a bɔrkwamara Yesu, amba Yesu a, a bɛlta daa hwayak a ba.

¹¹ Daa slam aha ɲgene, ɲgaɓa ɲga vetem hay ga daha da mecɔkwer, fa sɔpam cek mezɔmey da rav-aɲgwa. ¹² Malula hay da ray ndaw heyey a bɔrkwamara Yesu, aa cɔɗɗamara, a lɔvmar: «Vɔlɗar cɔved amba ya mbɔzam a ray vetem hay katay, may taw.»

¹³ Yesu, ta', a vɛltar cɔved. Da ray ɲgene, malula hay a, a bam da ray ndaw aha, a diyam a mbɔzam a ray vetem hay a. Vetem hay fetede na, a key gweegwe gabal cew. Vetem hay a, a hwam ta gɔɗaɲ ɲgadaa heelen, a tataram, a kwiyaɲ saf! aa dɔhwa, a ɓabɔtam cɔpa.

¹⁴ Masa mecɔkwer hay ɲga vetem hay kaa heyey ma hɛtmatar vetem hay a ta ɓabɔtam sem na, a hwam, a diyam, a wuzdamatara a ndɔhay da slala ha leɲ a ndɔhay gweegwe ta slala ha. Da ray ɲgene, ndɔhay a, a samawa ɲga nɔkey cek ma key fetede he. ¹⁵ Ndɔhay a wusmawa a cakay Yesu, a hɛtfamar ndaw masa Yesu ma bɛlta malula hay ga da ray a heyey. Ndaw aha manjakaya fetede ta zana fa vaw, a sɔra leɲgesl dɔɓa. Da ray ɲgene, ndɔhay ma samawa heyey, mandɔɗzay a katar. ¹⁶ Ndɔhay fetede ma hɛtmatar cek ma key da ray ndaw ta malula da ray, leɲ da ray vetem hay a na, a kadamatara a ndɔhay siya ma samawa. ¹⁷ Ta', ndɔhay a, a bɔrkwamara Yesu ɲga daw daa hwayak ata la.

¹⁸ Masa Yesu fa tōpey aa kwambiwal nga daw na, ndaw masa aa ma bōlra malula hay da ray anḡa heyey, a bōrkwa Yesu amba a vōlar cōved nga diyam cew e. ¹⁹ Yesu a vōlar cōved a ndaw aha ba, ama a lōvar: «Vōhey a way, kadatara a ndōhay akah hay cek mahura masa Bay Gazlavay ma kakawa tabiya, kadatara masa anḡa ma sōrey dey-ceceh da ray akah kedē.»

²⁰ Ta', ndaw aha, a daw, a wuzda cek masa Yesu ma ka tabiya da ray a heyey a ndōhay daa hwayak daha mezōley Berney-Hay-Kuraw. Ndōhay cōpa masa ma cōndamara mey a na, a rōzlam.

*Yesu a fōna gōdanḡ nga macay ta nga memōcey
(Matiye 9.18-26; Luk 8.40-56)*

²¹ Yesu a vōhwa ta kwambiwal da dey lanḡar nga dōhwa nga *Galile heyey. Ndōhay makustakaya da cakay a ga da mey dōhwa ha. ²² Ndaw daha mezōley Jayirus, ara ndaw pal da wuzlah *bay-ray hay daa *way-mewuzey-mey nga Gazlavay fetede. A sawa a cakay ata, a hōtar Yesu, ta', a tōfey asi salay anḡa, ²³ aa cōfda ta matōway daa dey, a lōvar: «Dam adaw fa da mōcey. Ambahw, sawa, pa har akah a ray a amba a mbōley, a njei ta dey, may taw.» ²⁴ Ta', Yesu a diyam cew e.

Ndōhay makustakaya ga fa diyam asiya, fa nḡacamara. ²⁵ Da wuzlah ata na, nḡwas daha, mambaz fa mbōdwa da hwaḡ dōga mevey kuraw a ray a cew. ²⁶ Ta sōrda banay la ga. Ta daw la fa dakwter hay ga, ta ndōvda zleley anḡa sem tabiya, ama kwa ta key nḡama daa ba, macay a, fa lar mey ta gōdanḡ cōnḡa. ²⁷ Nḡwas aha fa cōnda Yesu fa mbōley ndōhay, maja nḡene, a sawa a wuzlah ndōhay makustakaya heyey ta fa dōba nga Yesu. Ta', a gōsfar har fa zana anḡa.

²⁸ A ka anda kedē maja anḡa fa wulkey daa mevel anḡa: «Da ya gwa nga gōsfar har kwa fa zana anḡa na, ya mbōley la.» ²⁹ Masa nḡwas aha ma gōsfar har fa zana anḡa la na, wure wure nḡene mambaz anḡa heyey taḡ! a dōsley mey. A sōra anḡa ta mbōley sem. ³⁰ Wure nḡene Yesu a sōra gōdanḡ ta bey la daa vaw anḡa. Maja nḡene, a mbōdwa dey fa dōba, a lōvtar a ndōhay ga heyey: «Mēgōsey har fa zana adaw na, wa?»

³¹ Gula anḡa hay a mbōdōdamara, a lōvmar: «Ka fa nōkta ndōhay fa nḡacamaka ta dey wura wura tabiya kaa na, kaa cōfdandar “Magōsfaya har wa” na, kwara?»

³² Ama Yesu fa nōkey dey ta cakay cōnḡa, amba a hōtar ndaw ma gōsfar har a. ³³ Nḡwas aha mandōrzay fa kar

ga, faa wesey, a sɛra Yesu ta mbɔlda sem. Da ray ɲgene, a sawa, a tɔfey asi salay ɲga Yesu, a wuzdara mabara ɲga mey a. ³⁴ Yesu a lɔvar: «Dam adaw, ka ta mbɔley cay maja kah ma paya ɲga ndaw akah fara fara. Daw ta zazay, macay akah daa saba.»

³⁵ Masa Yesu faa guzlar ɲgada ɲgwas aha aran na, ndɔhay a samawa ta meslɔrey da way Jayirus, bay-ray ɲga way-mewuzey-mey ɲga Gazlavay heyey, a lɔvmar ɲgada Jayirus a: «Dam akah heyey, ta mɔcey sem. Ka gɔrda vaw ta Bay Mahura keme seme?»

³⁶ Ama Yesu kwa ta jɔkey slɔmay fa mey ata daa ba, a lɔvar a Jayirus: «Mevɛl akah a da tɔfey ba. Paya ɲga ndaw akah fara fara gway na, cay.»

³⁷ Yaw, kwa Yesu ta vɔley cɔved ɲgada ndaw ɲga daw asiya daa ba, si a ɲgɔley na, *Piyer, *Jak, lej *Jan, mɔlman ɲga Jak. ³⁸ A wusam a way Jayirus heyey, a hɔtfamatar ndɔhay makustakaya. Ndɔhay a, lenɲesl ata ta mbɔfey sem, fa tɔwam, fa wudam ta gɔdan. ³⁹ Yesu a mbɔzey a way a, a lɔvtar: «Lenɲesl akwar a mbɔfey, akwar fa tɔwam na, maja me? Bɔzey a, ta mɔcey daa ba, ama a key a ney aa dar.»

⁴⁰ Ndɔhay a, aa sanɲɔram a ray a. Yesu a badatɔrwa cɔpa aa ambaw. A ɲgɔlta ata papan ɲga dam aha ta maman ɲga dam aha lej gula anɲa hay maakar heyey. A mbɔzam aa way masa dam aha manakaya da hwad a heyey. ⁴¹ Yesu ta', a kɔrza dam aha fa har, a lɔvar: «*Talita kum!*,» anda melɔvey, «Dam adaw, ya fa lɔvka, lecey.»

⁴² Dam kedɛ den! a lecey, ta', a daw. (Mevɛy ɲga dam aha kuraw a ray a cew.) Wure ɲgene, ata masa daa way a na, a rɔzlam ga. ⁴³ Ama Yesu a kɔtata, a lɔvtar: «Cek masa ma key kedɛ na, ka da kadamara ɲgada ndaw ba.» A lɔvtar saya: «Vɔlmar cek ɲga zɔmey.»

6

Ndɔhay da Nezeret a rɔsmara Yesu (Matiye 13.53-58; Luk 4.16-30)

¹ Yesu a slɔkɔfey da slala ata Jayirus heyey, a daw a *Nezeret, slala masa aa ma gɔley da hwad a. Gula anɲa hay a diyam asiya. ² Ta *pas memɔskey-vaw na, Yesu a daw aa *way-mewuzey-mey ɲga Gazlavay fetedɛ, aa sɔrkadata ndɔhay. Ndɔhay ga a jɔkam slɔmay fa mey anɲa. A rɔzlam, a lɔvam: «Aa sɔrkadɔrwa mey ɲga Gazlavay tabiya kedɛ na, dama? A hɔtɔrwa lenɲesl ɲga sɔrey cek hay a kedɛ na, dama? Ma vɔldara gɔdan ɲga key maazla anda kedɛ

na, wa? ³ Anġa na, ndaw ma sla hwadam, ba diya? Anġa bəzey nġa *Mari, ba diya? Anġa məlman nġa *Jak, nġa Jawz, nġa Jud, leŋ nġa *Simanw, ba diya? Dam-mamaha hay ata da wuzlah aləkwa fede, ba diya?» Ara maja nġene, ndəhay fetede ma gəmam nġa təbmara mey nġa Yesu ba.

⁴ Maja mewulkey ata nġene, Yesu aa guzlar ta mey-menġey, a ləvtar: «*Ndaw ma təla mey nġa Gazlavay na, ndəhay a təbmara mey anġa kwa dama dama, ama ma təbmara ba na, si ndəhay daa hwayak anġa, ndəhay daa səkway anġa, asaya, ndəhay da way ata.»

⁵ Yesu a gwa mekey maazla da wuzlah ata ba, si a pey har a ray ndəhay masa-macay hay nekədəy gway, a mbəldata.

⁶ Da ray nġene, Yesu a rəzley da ray ata maja ata ma təbmara mey anġa ba. Ta', Yesu a daw a slala hay mekele daa hwayak a, aa sərkadata ndəhay.

*Yesu a slərdata gula anġa hay kuraw a ray a cew
(Matiye 10.5-15; Luk 9.1-6)*

⁷ Fa dəba ha, Yesu a zəltərwa gula anġa hay kuraw a ray a cew, amba a slərdata cew cew aa slam hay mekele mekele. Da ray nġene, a vəltar gədan nġa bəley malula hay da ray ndəhay. ⁸ Ta', a kətata, a ləvtar: «Diyam, ama ka da lam cek a har ba. Ka da lam cek mezəmey ba, ka da lam gabal ba, ka da lam dala aa jiba ba, lam a har na, si danġwar gway. ⁹ Yaw, pamata tarak akwar hay a salay, ka diyam na, si ta zana akwar hay masa fa vaw gway. Ka da lam zana cew cew ba.»

¹⁰ Yesu a kətata saya, a ləvtar: «Da akwar ta wusam la aa slam na, nġam da way ndəhay ma təbmakwar haa kasl pas masa akwar ma da diyam aa slam mekele. ¹¹ Da ndəhay daa slam aha a təbmakwar ba, a jəkam sləmay fa mey akwar ba na, mbəkdamata ndəhay a. Raramatara lagwada fa salay akwar hay * amba ka wuzdamatara ata ndəhay masa ta mebərey.»

¹² Gula hay nġa Yesu heyey a diyam, a wuzdamara mey nġa Gazlavay a ndəhay. A ləvmatar: «Si ka mbəkdamara menġey akwar, ka səpmara Gazlavay ta mevel pal.» ¹³ Asaya, a bəlam malula hay ga da ray ndəhay, a takwadəmatar mal fa ndəhay masa-macay hay ga, a mbəkdamata.

Mey da ray meməcey nġa Jan-Baptis

¹⁴ Bay *Herawt fa cənda mey da ray Yesu maja ndəhay faa guzlam ga da ray a. Ndəhay siya a ləvam: «Ara *Jan-Baptis ma sləkəda daa meməcey. Maja nġene, anġa ta

gədan̄ ŋga key maazla.» ¹⁵ Mekele hay a ləvam: «Ara *Eli †.» Mekele hay saya a ləvam: «Ara ndaw anda ndəhay ma təla mey ŋga Gazlavay zleezle.»

¹⁶ Masa Herawt ma cənda mey hay a kefe la na, a ləvey: «Ara Jan-Baptis! Ya ta dəsira ray an̄ga sem, ama ta sləkɗawa sem daa meməcey!»

¹⁷⁻¹⁸ Herawt aa guzley anda kefe na, maja ara an̄ga ta ray an̄ga ma kəɗa Jan-Baptis a vagay. Ehe mey da ray Jan-Baptis a: Herawt a la Herawdiyat, ŋgwas ŋga məlmaha *Fəlep ŋga ŋgwas an̄ga, daa masa Fəlep aa ta dey d̄agay. Maja ŋgene, *Jan a ləvar a Herawt: «Kah ma la ŋgwas ŋga məlmakw ŋgene na, ara cek matəkakaya daa kwakwas aləkwa.» Da ray ŋgene, Herawt a ləvtar a sewje an̄ga hay ŋga kərzamara Jan-Baptis a. Ta', sewje an̄ga hay a, a kərzamara, a jəwmara, a kəzlamara aa fərsəne.

¹⁹ Masa Herawdiyat ma cənda mey ŋga Jan-Baptis kefe la na, mevel a car, a wud̄ey ŋga kəɗa vagay, ama a gwa ba maja Herawt a təba ba. ²⁰ Herawt na, fa zlurey ŋga kəɗa Jan-Baptis a vagay, fa nəkfar dey maja a səra Jan-Baptis ara ndaw ma key cek ta cəved e, ara ndaw ma jəkey sləmay fa Gazlavay. Masa an̄ga ma cənda mey masa Jan-Baptis maa guzlda la na, ray an̄ga a həbey ga. Ama Herawt a wud̄ey ŋga jəkfar sləmay cəŋga.

²¹ Yaw, d̄ar masa Herawdiyat ma hətey cəved amba a kəɗmara Jan-Baptis na, ta wuswa cay. Ara pas ŋga gwagway masa Herawt ma sərfada d̄ar an̄ga ŋga mayawa. Herawt ta zəlwa ndəhay la ga ŋga zəmey daf. A zəlwa gula an̄ga hay, bay hay ŋga sewje hay, leŋ mahura hay daa hwayak ŋga *Galile. ²² Daa masa ndəhay fa kamara gwagway a na, dam ŋga Herawdiyat a ndəkwey a wuzlah ata, a gərvey. Megərvey a, a mbafar a Herawt ta ŋgada ndəhay mazəltakaya heyey. Ta', Herawt a ləvar a sabara ha: «Cacəɗafaya cek masa kah ma wud̄ey amba ya vəldakawa.» ²³ Herawt ta', a mbedey, a ləvey: «Ta Gazlavay tabiya, cek masa kah maa cəɗafaya na, ya vəldakawa la, kwa ŋga wunkey hwayak adaw cew e, ya wunkakwa la.»

²⁴ Ta', sabara ha, a bawa, a daw a ləvar a mamaha: «Ya daa cəɗafar na, me?»

²⁵ Mamaha a mbəɗɗara, a ləvar: «Cacəɗafar ray ŋga Jan-Baptis.»

6:14 6.14-15 8.28 † **6:15** 6.15 Eli: Ara ndaw ma təla mey ŋga Gazlavay zleezle ta məcey ta məcey daa ba, ama Gazlavay ta la sem a gazlavay a vad daa mesewere. Masa Yesu an̄ga da bəla na, ndəhay mekele a ləvam Yesu ara Eli ma vəhwa a bəla. **6:15** 6.15 Lk 7.16 **6:17-18** 6.17-18 Lev 18.16; 20.21; Lk 3.19-20 **6:23** 6.23 Est 5.3, 6; 7.2

Sabara ha, a wusey vaw, a vøhey fa bay a, a løvar: «Ya wufey ka vøldiwa ray nga Jan-Baptis wure keðe aa vøley.»

²⁶ Da ray ñgene, Herawt aa ta meesømey daa saba. Ama a gwa nga mbødda mey anga ha saba, maja ta mbedey sem fa mey nga ndøhay mazøtakaya heyey. ²⁷ Anda keðe, ta', a slørey sewje wure wure ñgene nga handørwa ray nga Jan-Baptis. Ta', sewje he a daw aa førsøne, a døslørwa ray nga Jan-Baptis a. ²⁸ A parawa aa vøley, a handørwa, a vøldara a sabara heyey, ta', sabara ha a handara a mamaha. ²⁹ Masa gula hay nga Jan ma cøndamara ta kødmara Jan sem na, a diyam a lamara vagay a, a pøshamara aa cøvay.

Yesu a vøltar cek mezømey ñgada ndøhay ma føna gabal zlam

(Matiye 14.13-21; Luk 9.10-17; Jan 6.1-14)

³⁰ Gula hay kuraw a ray a cew masa Yesu ma slørdara cew cew nga wuzey mey nga Gazlavay heyey a vøhmawa, a kusam a cakay Yesu a, a kadamara cek hay masa ata ma kamørwa, ta masa ata maa sørkadamatørwa a ndøhay.

³¹ Ta', Yesu a løvtar: «Nakwa aa slam masa ndaw da hwaf a daa ba, amba ya njakwa taava aløkwa, amba ka gwamara ka møskam vaw.» A løvtar anda keðe na, maja mandaw mandaw ndøhay ga fa samawa, fa vøham, mekele hay fa samawa saya, kwa ata Yesu ta gula anga hay a, a høtam har nga zømey døf ba. ³² Da ray ñgene, a tøpam aa kwambiwal, a diyam aa slam masa ndaw da hwaf a daa ba, amba a njam taava ata.

³³ Masa ata fa diyam na, ndøhay ga ta høtmatar la, ta sørmara slam masa ata ma diyam a hwaf a sem. Da ray ñgene, ndøhay da slala hay tabiya daa hwayak a, a hwam ta salay, aa slam masa ata ma sørmara ata Yesu ta gula anga hay ma da diyam a hwaf a. A wusam aa slam aha teesef da ray ata Yesu ta gula anga hay. ³⁴ Masa Yesu ma wusey la aa slam mebørnøgey na, a børnøgawa daa kwambiwal a, a høtatar ndøhay makustakaya ga. Dey-ceceh a kar, maja a nøkta ndøhay a, ata anda tøban hay masa manjar mecøkwer. Ta', aa sørkadata ndøhay a da ray cek hay mekele mekele ga.

³⁵ Mamba pas a køzley, *gula hay nga Yesu a ñgøcham fa vøða, a løvmar: «Wure keðe hakwaf cay, aløkwa da wuzlah-ley. ³⁶ Løvtar a ndøhay keðe nga diyam a wuzlah-way, da daa ba, a slala hay ta cakay, amba a hødkamawa cek mezømey.»

³⁷ Ama Yesu a mbødfdatara, a løvtar: «Akwar ta ray akwar, vølmatar cek mezømey a ndøhay a!» A løvmar: «Ka wufey ya diyam nga hødkaawa cek mezømey ta dala ga kalah ‡ amba ya vøldamatara a ndøhay kefe daw?»

³⁸ Da ray ngene, Yesu aa cøfdata, a løvtar: «Da har ndøhay makustakaya fefe na, peñ we? Diyam, nøkmørwa.» Masa ata ma nøkmørwa la na, a løvmar: «Ya høtmawa na, peñ zlam ta ewet cew.»

³⁹ Ta', Yesu a løvtar a gula anga hay nga njadamata ndøhay njakw! njakw! a ray kwakwas meendøbek e. ⁴⁰ Da ray ngene, ndøhay a, a njam ta njeý. Daa slam pal na, ndøhay temere, temere, daa ba, ndøhay kwakwar zlam, kwakwar zlam. ⁴¹ Yesu hal! a hølta peñ zlam ta ewet hay cew heyey, ta', a banгада dey a vad, a kar suse a Gazlavay. Fa døba ha, ta', a papøsa peñ e, a vøldatara a gula anga hay amba a wunkamatara a ndøhay heyey. Asaya, Yesu a papøsta ewet hay cew heyey, a vøldatara a gula anga hay amba a wunkamatara a ndøhay a. ⁴² Kwa waawa a zømey haa a røhey. ⁴³ Ta', gula anga hay a cakalamara peñ ta ewet masa ndøhay ma mbøkdamara. A cakalamara aa gadakar hay. Macakalakaya ha a røhey gadakar kuraw a ray a cew.

⁴⁴ Ndøhay ma zømam peñ e na, zel hay a key gabal zlam §.

*Yesu a daw ta salay da ray døhwa nga Galile
(Matiye 14.13-21; Luk 9.10-17; Jan 6.1-14)*

⁴⁵ Masa ndøhay ma zømam cek cay na, wure ngene, Yesu ta', a tøktar day a gula anga hay nga tøpam aa kwambiwal amba ata na, a zløngam teesed a dey langar nga døhwa ha gweegwe ta slala Betsayda. Yesu na, a njeý fa døba dagay amba a mbøftar mey a ndøhay makustakaya heyey nga diyam a way. ⁴⁶ Fa døba ha masa ata ma wunkam la na, ta', a daw aa angwaw nga dørey dangay a Gazlavay. ⁴⁷ Masa tavad ta key sem na, *gula hay nga Yesu ata da wuzlah døhwa daa kwambiwal. Ama Yesu na, anga pal taava anga da angwaw heyey. ⁴⁸ A nøkta gula anga hay na, fa søram banay ga nga tøngey døhwa ha, maja memed fa key ga ngada ray ata. Fa døba ha, gweegwe slam ngaa pørek na, Yesu ta', a daw ta salay da ray yam ngada fa ata. Aa ma ngøchey la gweegwe ta kwambiwal a na, a wufey nga mbøkdata fa døba. ⁴⁹ Ama ata ma høtmar Yesu fa daw da ray yam a na, a wulkam ara mamayam. Ta', a wudam,

‡ **6:37** 6.37 dala ga kalah: Mawuzlalakaya ta mey Gørek daa slam a kefe, a løvey: «deniye temere cew.» Deniye pal na, ara mawurbay nga sløra nga ndaw fa mevørndey. **6:43** 6.43 2Bay 4.43-44 § **6:44** 6.44 Daa Mt 14.21, a løvey ngusay ta bøza hay daha may, ama manjar nga sløfey. **6:46** 6.46 Lk 5.16 **6:48** 6.48 Jøw 9.8; Lk 24.28

⁵⁰ maja ata cəpa fa hətmar anğa fa daw da ray yam a, anda kedə, a zluram ga. Ama wure ŋgene, Yesu a ləvtar: «Dəkmara mevel! Ara yah, ka da zluram ba!»

⁵¹ Yesu, ta', a təpey aa kwambiwal fa gula anğa hay a. Masa aa ma təpey la aa kwambiwal a na, memed' a key saba. Da ray ŋgene, gula anğa hay a, a rəzlam ga, ⁵² maja kwa ata ma hətmar maazla masa Yesu ma ka ta peŋ heyey na, daa ŋgene ta gwamara ŋga sərmara gədan ŋga Yesu a daa ba, maja ray ata manğərdakaya.

Yesu a mbəley masa-macay hay daa hwayak ŋga Genezeret

(Matiye 14.34-36)

⁵³ Masa ata Yesu ta gula anğa hay ma təŋgam la a dey lanğar ŋga dəhwa heyey na, a wusam aa hwayak daha mezəley Genezeret. A jəwmara kwambiwal a mey dəhwa ha fetede. ⁵⁴ A bərnğamawa daa kwambiwal a, wure ŋgene ndəhay a sərmara ara Yesu ma bərnğawa. ⁵⁵ A hwam a slala hay mekele mekele cəpa ŋga wuzey a ndəhay siya Yesu ta sawa la. Da ray ŋgene, a handamatərwa masa-macay hay manatakaya fa gegədəd' aa slam masa Yesu aa da hwad' a. ⁵⁶ Aa slam masa Yesu ma daw, kwa a slala hay, kwa aa berney hay, kwa a wuzlah-ley na, ndəhay ga fa handamawa masa-macay hay aa slam masa ndəhay makustakaya da hwad' a. A bərkwamara amba masa-macay hay a gəsam har kwa fa mey ŋga zana anğa gway. Ndəhay ma gəsfamar har cəpa na, ta mbəlam sem.

7

Ndaw aa maaya fa mey ŋga Gazlavay na, kwara?

(Matiye 15.1-9)

¹ *Fariza hay ta ndəhay siya da wuzlah *ndəhay maa sərkada kwakwas ŋga Mawiz a samawa da *Jeruzelem, a kusam a cakay Yesu. ² A hətmatar *gula hay ŋga Yesu siya fa zəmam dəf ta har manjar ŋga pərey. Anda meləvey, gula hay a ta kamara anda kwakwas ata ma ləvey na, daa ba.

³ Yaw, Fariza hay a ta ndəhay *Jəwif hay mekele tabiya fa kamara kwakwas a. A da zəmam dəf na, si a pərmara har maaya maaya la. ⁴ Da ta vəhmawa daa luma cay, fa da zəmam dəf na, si a pəram la dəgay. A nam ray a cek hay mekele mekele anda kwakwas ata ma ləvey. Anda meləvey, a pərmata vəley hay, kwakulam hay, leŋ manğayak hay amba a təram ndəhay mazləbtakaya ba.

⁵ Da ray ηgene, Fariza hay ta ndəhay maa sərkada kwakwas ηga Mawiz heyey, aa cəfdamara Yesu a, a ləvmar: «Gula akah hay a kam cek hay anda kwakwas ηga papan ηga papa aləkwa hay ma wuzdamandakwara ba na, maja me? Ata fa zəmam dəf ta har manjar ηga pərey.»

⁶ Yesu a mbəddatara, a ləvtar: «Akwar ndəhay masa ta neneh cew! Zleezle *Izay, *ndaw ma təla mey ηga Gazlavay maa guzley da ray akwar na, anja fara. A wuzlala daa derewel ηga Gazlavay, a ləvey:

“Gazlavay a ləvey: Ndəhay keđe fa həslmaya ray ta mey ηga tede,

ama mevel ata na, aa dərəj ta yah.

⁷ Ata fa həlmamaya, ama mehəlmey a, ta tərey sem ηga cek ηga tede,

maja kwakwas masa ata maa sərkadangamara ηgene na, ara kwakwas ηga ndaw-magədan daada gway.”»

⁸ Yesu a ləvtar saya: «Akwar, Fariza hay ta ndəhay maa sərkada kwakwas ηga Mawiz, ka mbəkdamara *mewey hay ηga Gazlavay, ama ka kam kwakwas ma sawa ta fa ndəhay.»

⁹ Ta’, Yesu aa guzltar saya: «Haya! Mewey hay ηga Gazlavay na, ka wudam saba, ka mbəkdamara amba ka səpam kwakwas akwar jak daw? ¹⁰ Yaw, Mawiz a ləvey: “Natar ray ηgada ata papakw ta mamakw.” Mawiz a ləvey saya: “Ndaw ma cəda papaha, da daa ba, mamaha na, si a kədmara ndaw aha vagay.” ¹¹ Ama akwar na, akwar faa sərkadangam ndəhay, ka ləvam, ndaw a gwa ηga ləvar a papaha, da daa ba, a mamaha: “Cek masa yah ma da vəldakawa ηga jənka heyey na, ya vəldakawa daa saba, maja cek aha na, *Kwarbanj*.” (“*Kwarbanj*” a wudfey ηga ləvey “cek mavəldakaya ηgada Gazlavay.”) ¹² Da ray ηgene, ka ləvmatar a ndəhay ηga jənmata papa ata hay ta mama ata hay saba. ¹³ Anda keđe, akwar fa nəsmara mey ηga Gazlavay ta meesərkedey akwar, maja ka pamara kwakwas akwar ηga mahura da ray mey ηga Gazlavay. Asaya, akwar fa kam cek hay mekele mekele maaya ba letek anda cek aha keđe.»

(*Matiye 15.10-20*)

¹⁴ Ta’, Yesu a zəлта ndəhay makustakaya tabiya saya, a ləvtar: «Jəkfamaya sləmay, akwar tabiya, cəndamara mey keđe. ¹⁵ Cek masa ndaw ma zəma na, a gwa ηga kar mebərey a ndaw aha ba, ama si mewulkey masa ma bawa daa mevel anga. [¹⁶ Wure keđe anja akwar ta sləmay na, cəndamara mey a keđe maaya maaya.]»

¹⁷ Fa dɔba ha, Yesu a mbəkdata ndəhay makustakaya heyey, a mbəzey aa way. Gula anɔa hay ta', aa cɔfdamara da ray mey-menɔey masa aa ma kada ha. ¹⁸ Yesu ta', a lɔvtar: «Akwar may, haa wure kedɛ, ka cɔndamara ba cɔnɔa daw? Ya wudɛy ka sɔrmara fara fara cek mezəmey ma mbəzey a hwad ndaw na, a gwa nɔa kar mebɔrey a ndaw aha ba, ¹⁹ maja cek aha a mbəzey aa mevel anɔa ba, ama a mbəzey aa zakwataf anɔa, fa dɔba ha, a bawa a palah.» Anda kedɛ, Yesu fa wuzda cek hay mezəmey cɔpa na, ndaw a gwa a zɔma, a kar mebɔrey ba.

²⁰ Yesu aa guzltar saya, a lɔvey: «Cek ma kar mebɔrey a ndaw na, ara mewulkey ma bawa daa mevel anɔa. ²¹ Ahaw, ara daa mevel nɔa ndaw-magɔdan mewulkey maaya ba ma bawa. Mewulkey a, a hɔlda ndaw nɔa key cek hay malamba, anda meleley, mekɔdɛy ndaw vagay, ²² meleyyaw saw da palah, mekey dey fa cek nɔa ndəhay, mekey cek ta maagway, membɔrzley, mekey cek ma ka hwaray, mekey sɔlen, mekey mbada fa ndəhay, mezlepey, len mepey lenɔesl ba. ²³ Yaw, cek hay maaya ba tabiya kedɛ na, a bamawa daa mevel nɔa ndaw, a kamar mebɔrey a ndaw a.»

Ngwas masa Jəwif ba a pa Yesu nɔa ndaw anɔa fara fara (Matiye 15.21-28)

²⁴ Ta', Yesu a sləkɔy daa slam a nɔgene, a daw aa hwayak mekele gweegwe ta berney nɔa Tir. A mbəzey aa way. A wudɛy amba ndaw a sɔra anɔa fetedɛ ba, ama a gwa nɔa bey ba. ²⁵⁻²⁶ Fetedɛ, nɔwas daha anɔa dam *Jəwif ba, a yawa da Fenisi daa hwayak nɔa Siri. Dam anɔa daha, anɔa ta malula da ray. Masa aa ma cɔnda mey da ray Yesu na, wure nɔgene, a daw fa vɔda, a tɔdɛy fa mey anɔa. Ta', a kar ambahw a Yesu, a lɔvar: «Bɔla malula da ray dam adaw kedɛ may taw.» ²⁷ Ama Yesu aa guzlar ta mey-menɔey, a lɔvar: «Mbəkdata bɔza hay nɔa rɔham dɔgay, maja mevɔley daf nɔa bɔza hay nɔgada gɔdɛy hay na, maaya ba.» ²⁸ Nɔwas aha a mbɔddara, a lɔvar: «Ahaw, Bay adaw. Ama kwa gɔdɛy hay daa slam masa ndəhay fa zɔmam daf na, ata fa zɔmam meepɔsey nɔa daf masa bɔza hay ma kɔzlamata a hwayak may, ba diya?» ²⁹ Da ray nɔgene, Yesu a lɔvar: «Kah ma mbɔddərwa mey a la maaya. Maja nɔgene, malula ta bey sem da ray dam akah, ka gwa nɔa daw a way.» ³⁰ Anda kedɛ, nɔwas aha, a daw a way, a hɔtfar dam anɔa manakaya da ray harɔngawaw ta meesəmey, malula ta bey sem da ray anɔa.

Yesu a wurey sləmay nga ndaw madagazlam

³¹ Ta', Yesu a sləkdey daa slam masa gweegwe ta berney nga Tir heyey. A daw ta daa berney nga Sidanjw, a vəhwa ta mey dəhwa nga *Galile gweegwe ta hwayak nga Berney-Hay-Kuraw. ³² Ndəhay a handamawa ndaw daha madagazlam, maada. A bərkwamara Yesu amba a par har a ray nga wurara sləmay anğa ta nga tərda neneh anğa dadakw saba.

³³ Anda keđe, Yesu ta', a ngəla ndaw aha aa slam masa doreŋ ta ndəhay makustakaya. A pata bəz-mey-har anğa hay aa sləmay nga ndaw aha. Ta', a təfey meesleḅ fa bəz-mey-har anğa, a wusa neneh nga ndaw aha ta bəz-mey-har a. ³⁴ Ta', Yesu a banğada dey a vad, a səfney ta gədan, a ləvar a ndaw aha: «*Efata*» anda meləvey, «*Wurey!*» ³⁵ Wure ngene, sləmay nga ndaw aha ta', a wurey. Neneh anğa, dadakw saba. ³⁶ Yesu a kətata tabiya, a ləvtar: «Ka da wuzdamara a ndaw ba.» Ama kwa Yesu a təkta nga wuzda mey a na, ata ta wuzdamara sem cəŋga. ³⁷ Ndəhay a rəzlam ga, a ləvam: «A key cek hay cəpa maaya. Kwa sləmay nga ndaw madagazlam na, a wuru. Kwa neneh nga ndaw maada na, a tərda dadakw saba.»

8

Yesu a vəltar cek mezəmey ngada ndəhay ma fəna gabal məfad

(Matiye 15.32-39)

¹ Daa d'ar hay a ngene masa Yesu fa pəkey daa hwayak nga Berney-Hay-Kuraw heyey na, ndəhay ga a samawa, a kusam a cakay a saya. Cek fa ata nga zəmey daa ba. Yesu a zəltərwa gula anğa hay, a ləvtar: ² «Dey-ceceḅ fa kaya fa ndəhay makustakaya keđe, maja anğa kaa d'ar maakar ata da cakay adaw. Wure keđe cek mezəmey da har ata daa saba. ³ Da ya mbəkdata nga diyam a way ata hay ta may na, fa da hətam gədan daa cəved daa ba, maja ndəhay siya hay da wuzlah ata, a samawa da doreŋ.»

⁴ Gula anğa hay a mbəddamara, a ləvmar: «Aləkwa daa wuzlah-ley keđe na, ya da hətkurwa peŋ nga rəhey ndəhay tabiya keđe na, dama?»

⁵ Yesu aa cəfdata, a ləvey: «Da har akwar feđe kaa na, peŋ we?»

A ləvam: «Da feđe na, peŋ maasala daha.»

⁶ Ta', Yesu a ləvtar a ndəhay makustakaya heyey nga njam a hwayak. Fa dəba ha, ta', a həla peŋ maasala heyey,

a kar suse a Gazlavay. A papəsa, a vəldatara a gula anğa hay amba a wunkamatara a ndəhay a. Ta', a wunkamatara. ⁷Da har ata, ewet mecəhe mecəhe nekədey daha saya. Yesu a kar suse a Gazlavay. Ta', a ləvtar a gula anğa hay nğa wunkamatara saya. ⁸Kwa waawa ta hətey cek mezəmey la, haa a rəhey. Ta', gula anğa hay a cakalamara siya ma mbəkdatakaya. Macakalakaya ha a rəhey gadakar mahura mahura maasala. ⁹Ndəhay ma zəmam cek fetede he na, a fəna ndəhay gabal məfad. Fa dəba ha, Yesu a ləvtar a ndəhay a nğa vəham a way ata hay dəba. ¹⁰Wure wure ngene, a təpam ta gula anğa hay aa kwambiwal, a diyam aa hwayak nğa Dalmanuta.

*Fariza hay aa cəfdamara Yesu nğa key maazla
(Matiye 16.1-4)*

¹¹Fa dəba ha, *Fariza hay a wusmawa fa Yesu, a zlamar mekey yawa ta anğa. A wudam a jadamara. Da ray ngene, aa cəfdamara amba a key maazla nğa wuzda gədan anğa a sawa ta fa Bay Gazlavay. ¹²Yesu a səfney ta gədan, a gərey maja a təbmara mey anğa ba, ta', a ləvtar: «Ndəhay masa wure kede aa cəfdam maazla nğa wuzdərwa ara Gazlavay ma slərđiwa na, maja me? Ya fa ləvkwar fara fara, ya fa da key maazla ha daa ba.» ¹³Ta', Yesu a mbəkdata Fariza hay a, a daw a mbəzey aa kwambiwal nğa təngey a dey langar nğa dəhwa nğa *Galile.

*Mey-məngey da ray meesərkedey nğa Fariza hay
(Matiye 16.5-12)*

¹⁴Daa kwambiwal a na, *gula hay nğa Yesu ata ta peñ pal gway. A sərfadamara nğa handawa peñ a dey a saba. ¹⁵Ta', Yesu a kətata, a ləvtar: «Wam vaw fa cek ma həsla peñ nğa *Fariza hay, leñ fa cek ma həsla peñ nğa Bay *Herawt.»

¹⁶Gula anğa hay a wulkam, aa guzlam da wuzlah ata, a ləvam: «Aa guzley anda kede na, maja aləkwa ma sakurwa ta peñ daa ba daw?»

¹⁷Yesu a səra cek masa ata maa guzlam da wuzlah ata. Da ray ngene, aa cəfdata, a ləvtar: «Ka wulkam da ray peñ masa akwar ma handamawa daa ba na, maja me? Haa wure kede akwar na, ka cəndamara mey a ba cənğa daw? Akwar na, ray manğərdakaya. ¹⁸⁻¹⁹Akwar fa nəkam dey, ama ka hətmar dey ba daw? Akwar fa jəkam sləmay, ama ka cənam sləmay ba daw? Daa masa yah ma wunkata peñ zlam nğada ndəhay gabal zlam heyey na, mambəkakaya na, a rəhey gadakar we? Akwar fa sərfadamara, ba diya?»

A mbøddamara, a løvmar: «Gadakar hay kuraw a ray a cew.»

²⁰ Yesu a løvtar saya: «Daa masa yah ma wunkatara peñ maasala ngada ndəhay gabal məfad heyey na, ka rəham gadakar mahura hay ta peñ mambəkakaya na, we?»

A mbøddamara, a løvmar: «Gadakar mahura mahura maasala.»

²¹ Ta', Yesu a løvtar: «Ka sərfadamara cek masa yah ma ka, ama haa wure kefe ka cəndamara mey masa yah maa guzlda da ray cek ma həsla peñ kefe ba cəngə daw?»

Yesu a wurey dey nga ndaw-wulaf

²² Ta', Yesu ta gula anğa hay a wusam a Betsayda. Fetede a handamawa ndaw-wulaf fa vəfa, a kamar ambahw nga gəsfar har fa ndaw aha amba dey anğa a wurey. ²³ Da ray nğene, Yesu ta', a kərza ndaw aha fa har, a dafda dorenj ta slala ha. Ta', a kar meesleβ fa dey nga ndaw aha, a par har fa dey, aa cəfda, a ləvar: «Ka fa hətar dey dəba daw?»

²⁴ Ndaw-wulaf a, a banğafda dey, a ləvey: «Ya fa hətatar ndəhay, ama ata anda wudez hay ma diyam.»

²⁵ Ta', Yesu a gəsfar har fa dey saya. Ndaw aha, dey anğa a wurey, a hətatar cek hay maaya maaya dəba. ²⁶ Yesu aa guzlar nga daw a way, a kəta, a ləvar: «Ka da daw ta Betsayda kefe ba, daw a way dğay.»

*Piyer a wuzda, Yesu na, ara Kəriste
(Matiye 16.13-20; Luk 9.18-21)*

²⁷ Fa dəba ha, ata Yesu ta gula anğa hay a diyam a slala hay masa gweegwe ta slala mahura mezəley Sezere-Fəlep. Masa ata fa diyam daa cəved na, Yesu aa cəfdata, a ləvey: «Yah na, ndəhay a padamaya na, nga wa?»

²⁸ A mbøddamara, a løvmar: «Ndəhay siya a ləvam kah na, *Jan-Baptis. Mekele hay a ləvam kah na, *Eli, *ndaw ma təla mey nga Gazlavay zleezle. Mekele hay saya a ləvam kah na, ndaw pal dasi ndəhay ma təla mey nga Gazlavay zleezle.»

²⁹ Ta', aa cəfdata saya, a løvtar: «Kaa akwar may, ka ləvam yah na, wa?»

Piyer a mbøddara, a ləvar: «Kah na, *Kəriste, *ndaw masa Gazlavay ma wala nga ləhdata ndəhay.»

³⁰ Ta', a kətata gula anğa hay, a katar mey, a løvtar: «Ka da wuzdamara mey a kefe a ndaw ba.»

Yesu aa guzley da ray meməcey anğa ta masləkdawa anğa

(Matiye 16.21-28; Luk 9.22-27)

³¹ Yesu, ta', aa sərkadata gula anğa hay, a ləvtar: «Si yah, *Bəz nğa Ndaw, ya sərey banay la ga dagay. Mahura hay nğa *Jəwif hay, *bay-ray hay nğa ndəhay ma ka kwakwas nğa Gazlavay, leŋ *ndəhay maa sərkada kwakwas nğa Mawiz a rəsmaya la, fa da təbmara ara Gazlavay ma slərđiwa na, daa ba. A da kədmaya vagay, nğa đar maakar a na, ya sləkdawa la daa meməcey.»

³² A wuzdatara mey a keđe, ba' a palah ta bəda daa ba. Da ray nğene, *Piyer ta', a zəla ta cakay, a mbədar ray. ³³ Yesu pəla! a mbədey dey, a nəkta gula anğa hay siya. Ta', a kar mey a Piyer, a ləvar: «Hway la da cakay adaw, kah, *Satan. Maja mewulkey akah nğene na, ara mewulkey nğa Gazlavay ba, ama ara mewulkey nğa ndaw-magədan gway.»

³⁴ Ta', a zəлта ndəhay makustakaya nğa nğəchamawa a cakay ata ta gula anğa hay. A ləvtar: «Da ndaw a wuđeey nğa səpya na, si a mbəkda mewulkey da ray ray anğa, a səpya ta mevel pal, si a bəsa banay ma da sawa a ray a maja yah, anda yah ma da məcey fa hwadam mazlanğalakaya.

³⁵ Sərmara, kwa waawa ma wuđeey nğa ləhda heter anğa na, a key nğene, aa zəđda. Ama kwa waawa maa zəđda heter anğa maja anğa fa səpya, asaya, maja anğa fa wuzey *Mey-maaya-mawiya a ndəhay na, a key nğene, a ləhda heter anğa ha. ³⁶ Da ndaw a hətey cek hay tabiya masa anğa ma wuđeey da bəla keđe, ama taa zəđda heter anğa sem na, cek hay a tabiya nğene, ta ləhdamara ndaw a la daw? ³⁷ Yaw, ndaw a gwa nğa mbəda heter anğa ta cek ba.

³⁸ Kwa waawa ma paya hwaray, da daa ba, ma key hwaray nğa təba mey adaw fa mey nğa ndəhay da bəla wure keđe masa ma mbəkdamara Bay Gazlavay sem ta masa ma kam mebərey keđe na, yah, Bəz nğa Ndaw, ya par hwaray la ta pas masa yah ma da vəhwa ta gədan nğa Papay leŋ ta maslan anğa hay.»

9

¹ Yesu aa guzltar saya, a ləvtar: «Ya fa ləvkwar fara fara, ndəhay siya da wuzlah akwar feđe, fa da məcam daa ba, si ata ma hətmar Bay Gazlavay fa wey ta gədan anğa la dagay.»

Gula hay nga Yesu a hətmatar ata Eli ta Mawiz faa guzlam ta Yesu

(Matiye 17.1-13; Luk 9.28-36)

² Dar maakwaw fa dəba ha na, Yesu ta', a zəлта ata *Piyer, *Jak, leŋ *Jaŋ, a ɲgəлта aa ray ɲga aɲgwa maazəma daa slam aha, a njam taava ata fetede. Yesu pəla! a mbədey fa dey ata. ³ Zana aɲga a tərey mabara, a wedey ndəd-nded. Mewedey ɲga zana ha ɲgene na, kwa ndaw da bəla kede ma gwa ɲga pəra zana ha ɲga wedey kəne daa ba. ⁴ Wure wure ɲgene, gula aɲga hay maakar heyey, a hətmatar ata *Eli ta *Mawiz, ndəhay ɲga Gazlavay zleezle, faa guzlam ta Yesu.

⁵ Da ray ɲgene, Piyer aa guzlar a Yesu, a ləvar: «Bay ala, maaya na, ya ɲjakwa fedə. Ya da kərcam slam hay maakar, pal ɲgada kah, pal ɲgada Mawiz, pal ɲgada Eli.» ⁶ Piyer aa guzley anda kede na, maja mandərzay fa katar kalah, a səra mey masa aa maa guzlda ba.

⁷ Ta', mekwtene a sərtata. Daa mekwtene he na, a cənam day ma ləvey: «Kede he ara Bəzey adaw masa yah ma wudə kalah. Jəkfamar sləmay!»

⁸ Wure wure ɲgene, *gula hay ɲga Yesu a, a nəkam dey ta cakay, ama a hətmatar ndəhay a saba, si a hətam na, Yesu pal taava aɲga da cakay ata.

⁹ Masa ata fa bəɲgamawa da aɲgwa ha na, Yesu a kətata, a ləvtar: «Cek masa akwar ma hətmərwa kede na, ka da wuzdamara a ndaw ba sələk, haa kasl pas masa yah, *Bəz ɲga Ndaw, ma da sləkɗawa daa meməcey.» ¹⁰ Gula hay ɲga Yesu a, a təbmara mekətey a kede, ama aa cəfdam vaw da wuzlah ata, a ləvam: «Masləkɗawa daa meməcey na, mey a, a wudəy ɲga ləvey na, kwara?»

¹¹ Ta', aa cəfdamara Yesu, a ləvmar: «Ndəhay maa sərkada kwakwas ɲga Mawiz, a ləvam si Eli a sawa la teesed da ray *Kəriste na, maja me?»

¹² Yesu a mbəddatara, a ləvtar: «Ahaw, fara fara Eli a sawa la teesed ɲga diyta cek hay cəpa maaya maaya. Mawuzlalakaya daa dərəwel ɲga Gazlavay, a ləvey, Bəz ɲga Ndaw, a sərey banay la ga, ndəhay a rəsmara la. Akwar fa sərfadamara mey a kede daw? ¹³ Yaw, ya fa ləvkwar Eli na, ta sawa cay. Anda dərəwel ɲga Gazlavay ma ləvey da ray a zleezle na, ndəhay ta kamar cek maaya ba la anda ata ma wudam.»

Yesu a bada cek da ray bəzey

(Matiye 17.14-21; Luk 9.37-43a)

14 Ata Yesu ta ata *Piyer, *Jak, leŋ *Jan a ngəcham gweegwe ta *gula hay nga Yesu siya zlam-letek. Fetede a hətam ndəhay ga da cakay gula hay a. *Ndəhay maa sərkada kwakwas nga Mawiz daha fetede, fa kam yawa ta gula hay zlam-letek e. 15 Masa ndəhay heyey ma hətmar Yesu la na, wure ngene ata cəpa a rəzlam, a wusam vaw ngada fa anga amba a camar har.

16 Yesu aa cəfdata gula anga hay fetede, a ləvtar: «Ka kam yawa ta ndəhay kede na, da ray me?»

17 Ndaw pal da wuzlah ndəhay makustakaya heyey aa guzlar, a ləvar: «Bay adaw, ya ta handakawa bəzey adaw la. Anga ta cek da ray, fa təkə ngaa guzley. 18 Kwa daa wura daa wura masa cek aha ta zlar la na, a təfda a hwayak, maŋgwafakw a bawa da mey, aa pəfey sler, vaw anga a mberey. Ya ta cacəfdata gula akah hay la amba a badamara cek aha na, ama ta gwamara daa ba.»

19 Ta', Yesu a mbəfdatara a ndəhay a, a ləvtar: «Akwar səkway nga ndəhay ma pamaya nga ndaw akwar fara fara ba kede. Ya da njeŋ ta akwar na, haa ta vara? Ya da bəskwar na, haa ta vara? Yaw, handamiwa bəzey a.» 20 Ta', a handamara bəzey a fa Yesu. Masa bəzey a ma hətmar Yesu na, wure ngene, cek aha aa wasada. Ta', bəzey a, a təfey a hwayak, a pətkeŋley da hwayak, maŋgwafakw a bawa da mey.

21 Ta', Yesu aa cəfda papan nga bəzey a, a ləvar: «Cek aha a zlar anda kede na, dəga nga vara?»

Papaha a mbəfdatara, a ləvar: «A zlar dəga daa bəzey. 22 Ta pas mekele cek aha, a təfda aa awaw, da daa ba, a təfda aa yam amba a kəfda vagay. Da ka gwa nga bəla cek da ray bəzey a na, ambahw, sərɤandar dey-ceceh, jəndar may taw!»

23 Yesu a mbəfdatara, a ləvar: «Ka ləvey da ya gwa nga bəla na, maja me? Ya gwa ya key cek hay cəpa ngada ndaw ma paya nga ndaw anga fara fara.»

24 Wure ngene, papan nga bəzey a, a wudey, a ləvey: «Ya fa paka nga ndaw adaw fara fara, ama anga ta banay ngada yah, si ka jənya nga paka nga ndaw adaw ma fəna.»

25 Masa Yesu ma nəkta ndəhay ga fa hwamawa nga nəkey cek masa aa ma ka na, a babəcar a cek da ray bəzey a heyey, a ləvar: «Kah, cek ma təkə bəzey kede ngaa guzley, ma təkə nga jəkey sləmay, ya fa ləvka, bey, daw! Ka da vəhwa a ray a saba!»

26 Ta', cek aha, a zlar saya, a wudey ta gədan. Aa wasada bəzey a ta gədan, a təfda a hwayak. Cek aha, a bey da ray bəzey a. Ndəhay ga da cakay a, a ləvam: «Bəzey a ta məcey sem.» Aa guzlam anda kede na, maja bəzey a, ta

børzley sem. ²⁷ Ama Yesu a kørza fa har, a sløkdada. Ta', bözey a, a lecey.

²⁸ Yesu ta', a daw a way. Masa ata taava ata ta gula anğa hay da way na, gula anğa hay a, aa cøfdamara, a løvmar: «Ala ta gwamara nğa badamara cek da ray bözey a daa ba na, maja me?»

²⁹ Yesu a mbøfdatara, a løvtar: «Ijga bey cek anda kefe da ray ndaw na, si ta medørey-dangay a Bay Gazlavay gway.»

Yesu aa guzley saya da ray memøcey anğa ta masløkðawa anğa

(Matiye 17.22, 23; Luk 9.43b-45)

³⁰ Ata Yesu ta gula anğa hay a sløkdam daa slam aha ngene, a diyam taa hwayak nğa *Galile a Kapernayum. Yesu a wufey ndøhay a sørmara a lawa dama ba, ³¹ maja anğa faa sèrkadata gula anğa hay. Daa meesørkey a na, a løvtar: «A da kørzamaya, yah, *Böz nğa Ndaw. A da vøldamaya a har ndøhay. Ndøhay a, a da kødmaya vagay, ama nğa ðar maakar a na, ya sløkðawa la daa memøcey.»

³² Ama gula anğa hay ta cøndamara mey masa Yesu maa guzldatara ngene daa ba. Asaya, a zluram nğaa cøfdamara mey a.

Mahura dasi gula hay nğa Yesu na, wa?

(Matiye 18.1-5; Luk 9.46-48)

³³ Ata Yesu ta gula anğa hay a wusam a Kapernayum, a mbøzam a way. Masa ata da way a na, Yesu aa cøfdata, a løvtar: «Ijga fene, ka kam yawa daa cøved na, da ray me?»

³⁴ Ama a njam teete, maja daa masa ata daa cøved na, ta kam yawa la da wuzlah ata, a løvam: «Mahura dasi aløkwa na, wa?» ³⁵ Yesu, ta', a njeý ta njeý, a zølta gula anğa hay kuraw a ray a cew, a løvtar: «Da ndaw a wufey a key mahura da ray ndøhay na, si a pa ray anğa nğa mecøhe, a jønta ndøhay tabiya.»

³⁶ A ley bözey mecøhe, a lacada a wuzlah ata. A kørza bözey a fa har, ta', a løvtar a gula anğa hay: ³⁷ «Nøkmara bözey masa yah ma kørza kefe. Yaw, kwa waawa ma tøbey bözey * anda bözey mecøhe kefe maja a wufya na, ndaw aha a key ngene, a tøbey yah, ray adaw. Asaya, kwa waawa ma tøbya na, a tøbey ngene, yah pal taava adaw ba, ama a key a tøbey Bay Gazlavay ndaw ma slørdiwa may.»

9:27 9.27 5.41 **9:30** 9.30-32 8.31 **9:33** 9.33-34 Lk 22.24 **9:35** 9.35
10.43-44; Mt 20.26-27; Lk 22.26 * **9:37** 9.37 bözey: Fede Yesu a wufey nğaa
guzley da ray bözey daada ba, ama aa guzley da ray kwa waawa masa ta gøðar
pøreh. **9:37** 9.37 Mt 10.40; Lk 10.16; Jan 13.20

Ndaw masa-gëra aləkwa ba na, ara jam aləkwa
(Luk 9.49-50)

³⁸ *Jan aa guzlar a Yesu, a lëvar: «Bay ala, ala ta hëtam ndaw daha la fa bëley malula da ray ndëhay ta mezëley akah. Ya wudam nga tëkmara maja ara ndaw da wuzlah aləkwa ba.»

³⁹ Yesu a mbëfdatara, a lëvtar: «Ka da tëkmara ba, maja da ndaw a gwa mekey maazla maaya ta gëdan ma sawa ta mezëley adaw na, ndaw aha fa daa guzley mey maaya ba da ray adaw na, daa ba. ⁴⁰ Anda kedë, ndaw masa anga masa-gëra aləkwa ba na, ara jam aləkwa. ⁴¹ Yaw, ya fa lëkwar fara fara, ndaw ma jënkwar ta cek nekëfey, kwa a vëkwar yam nga sey maja akwar ndëhay adaw hay na, Bay Gazlavay a pëtra mawurbay anga la.»

Pam lëngesl fa cek ma hendey ndaw aa mebërey
(Matiye 18.6-9; Luk 17.1-2)

⁴² «Kwa waawa ma betey ndaw pal dasi ndëhay ma tëba mey adaw hay kedë nga key mebërey na, ngada anga na, ngama ata ma jëwmar angwamahura a day, ma këzlamara aa bëlay. ⁴³ Anja da har akah, fa hëldaka nga key mebërey na, dësla har a. Ngama kah ma hëtey heter mendëvey ba ta har pal, da ray kah ma da mbëzey aa awaw mendëvey ba masa daa vëged nga awaw magaza ta har akah hay cewete.

[⁴⁴ Fetedë, “mëtal ma zëmey ndaw fa da ndëvey daa ba, awaw fa da mëcey daa ba.”] ⁴⁵ Da salay akah, fa hëldaka nga key mebërey na, dësla salay a. Ngama kah ma hëtey heter mendëvey ba ta salay pal, da ray kah ma da mbëzey aa vëged nga awaw magaza ta salay akah hay cewete. [⁴⁶ Fetedë, “mëtal ma zëmey ndaw fa da ndëvey daa ba, awaw fa da mëcey daa ba.”] ⁴⁷ Da dey akah, fa hëldaka nga key mebërey na, wuzlka dey a. Ngama kah ma mbëzey ta dey pal aa slam masa Gazlavay ma wey da ray ndëhay anga hay da vad, da ray kah ma da mbëzey aa vëged nga awaw magaza ta dey akah hay cewete. ⁴⁸ Fetedë, “mëtal ma zëmey ndaw fa da ndëvey daa ba, awaw fa da mëcey daa ba.”

⁴⁹ «Sërmara, Gazlavay a jada ndaw anga maaya, da daa ba, maaya ba na, ta awaw lëj ta manda †. ⁵⁰ Manda na,

9:40 9.40 Mt 12.30; Lk 11.23 **9:43** 9.43 Mt 5.30 **9:47** 9.47 Mt 5.29 **9:48** 9.48 Iz 66.24 † **9:49** 9.49 Gazlavay a jadata ndëhay ta cek hay mekele mekele daa menjey ata da bëla masa ta banay ga. Mey a kedë a wudëy nga lëvey ndëhay ma rësmara Gazlavay ma da sëram banay, da daa ba, a wudëy nga lëvey ndëhay nga Yesu ma da tëram maaya ma fëna ma fëna ta fa banay a. (Nëka Iz 48.10; Rm 5.3-5; Jak 1.2-4; 1Pi 1.6-7.) «Awaw» a wudëy nga lëvey mesërey banay ga, da daa ba, menjey daa awaw nga sërmataw. «Manda» na, Jëwif hay a kamara fa cek meewurey ngada Gazlavay. **9:49** 9.49 Lev 2.13

ara cek maaya. Ama da manda ha a cørey saba na, ya da kadakwa amba a cørey saya na, kwara? Akwar na, kam maaya a ndøhay anda manda ma cørda cek. Njam ta zazay da wuzlah akwar, ka da tøram vaw ba.»

10

*Yesu a wuzey mey da ray mebøley ηgwas
(Matiye 19.1-12; Luk 16.18)*

¹ Yesu a sløkdøey da slala Kapernayum, a daw aa hwayak ηga *Jude da dey lanɣar ηga wayam ηga Jurdeη. Ndøhay a kusam ga a cakay a saya. Aa faa sørkadata anda aa ma ka mandaw mandaw.

² *Fariza hay a diyam fa vøfa, amba a jadamara. Aa cøfdamara, a løvmar: «Kwakwas aløkwa a vøley cøved a ndaw ηga bøla ηgwas anɣa daw?»

³ Yesu a mbøddatara, a løvtar: «*Mawiz a løvkwar ηga key na, kwariya?»

⁴ Fariza hay a, a løvmar: «Mawiz a løvey da ndaw a wudøey ηga bøla ηgwas anɣa na, si a wuzlalar dørøwel ηga bøla ηgwas anɣa ha dɔgay, fa døba ha, a bøla.» ⁵ Yesu a løvtar: «Sørmara, Mawiz a wuzlala *mewey a ηgene na, maja mevel akwar maaya ba, ka gømam ηga tøbmara mey ηga Gazlavay ba. ⁶ Daa mezley ηga bøla, “Gazlavay a lømwa na, zel ta ηgwas”, ba diya? ⁷ “Maja ηgene, ndaw-mezøle a mbøkda papaha ta mamaha, amba a cømam ta ηgwas anɣa. ⁸ Ata cewete, a tøram anda ndaw pal.” Anda kedø, ata ndøhay cew saba, ama ata anda ndaw pal. ⁹ Yaw, cek masa Gazlavay ma cøma sem anda kedø na, ndaw a da wunka ba.»

¹⁰ Fa døba ha, masa ata Yesu ta gula anɣa hay ma vøham cay a way na, gula anɣa hay aa cøfdamara saya da ray mebøley ηgwas. ¹¹ Yesu a løvtar: «Kwa waawa ma bøla ηgwas anɣa, fa døba ha, a ley mekele na, ndaw aha a key ηgene, a ley vaw saw da palah, a key a kar cek maaya ba ηgada ηgwas anɣa mahura. ¹² Nɣada ηgusay may, da ηgwas a mbøkda zel e, a daw asi ndaw mekele na, ηgwas aha a key ηgene, a ley vaw saw da palah.»

*Yesu a pøstar mey a bøza hay
(Matiye 19.13-15; Luk 18.15-17)*

¹³ Ndøhay a handamata bøza hay fa Yesu amba a patar har a ray, a pøstar mey. Ama gula anɣa hay a kamatar mey a ndøhay a. ¹⁴ Masa Yesu ma nøka cek masa gula anɣa hay

ma kamara ha na, a mbafar ba, ta', aa guzltar, a ləvtar: «Mbəkdamatərwa bəza hay ɲga samawa fa yah! Ka da təkмата ba, maja Gazlavay fa wey da ray ndəhay masa anda bəza hay a. ¹⁵ Ya fa ləvkwar fara fara, da ndaw fa təba Bay Gazlavay ɲga wey da ray a anda bəzey mecəhe ma təba daa ba na, ndaw aha fa da mbəzey a wuzlah ndəhay masa Gazlavay ma wey da ray ata na, daa ba.»

¹⁶ Ta', a lata bəza hay a, a har aɲga, a patar har a ray, a pəstar mey.

Ndaw masa-zleley aa cəfda Yesu da ray mehətey heter mendəvey ba

(Matiye 19.16-30; Luk 18.18-30)

¹⁷ Masa Yesu fa da daw aa slam mekele na, gula daha a hawa fa aɲga, a regedey fa mey aɲga, ta', a ləvar: «Bay adaw, ndaw masa maaya, ya da key amba ya hətəy heter mendəvey ba na, me?» ¹⁸ Yesu, ta', a ləvar: «Ka zəlya ndaw maaya na, maja me? Ndaw maaya na, Gazlavay pal taava aɲga. ¹⁹ Yaw, ka sərə *mewey hay ɲga Gazlavay, ba diya? Ara mey ma ləvey: “Ka da kəfey ndaw vagay ba, ka da ley vaw saw da palah ba, ka da leley ba, ka da mbərzley a ray ndaw ba, ka da təkney cek ɲga ndaw ba, natar ray ɲgada ata papakw ta mamakw.”»

²⁰ Ndaw a, a mbəddara, a ləvar: «Bay adaw, dəga yah daa zariya adaw, ya ta zləbta mewey hay a ɲgene daa ba səlak.»

²¹ Yesu a nəka ndaw aha, a wudfa, ta', a ləvar: «Cek pal ma mbəkaka daha ɲga key. Anda kefe, daw, hədkadata cek akah hay tabiya, wunkatara dala ha a masa-viya hay. Da ka ta ka la kəne na, ka da hətəy zleley fa Gazlavay da vad. Masa kah ma vəldatara dala ha cay a masa-viya hay na, sawa, səpya.»

²² Masa ndaw a ma cənda mey a kefe la na, a ndərba dey, a daw, aɲga ta meesəmey daa ba, maja aɲga ta zleley ga, a wufey a vəlda a ndəhay mekele ba.

²³ Yesu a nəkta gula aɲga hay da cakay a, ta', a ləvtar: «Aɲga ta banay ga ɲgada ndəhay masa-zleley amba a təbmara Gazlavay ɲga wey da ray ata.»

²⁴ Gula aɲga hay a rəzlam ga da ray mey a. Ama Yesu a ləvtar saya: «Bəz adaw hay, aɲga ta banay ɲgada ndaw amba a təba Bay Gazlavay ɲga wey da ray a *.²⁵ Ahaw, aɲga ta banay ɲgada slagwama ɲga mbəzey taa vəgeɗ ɲga

10:15 10.15 Mt 18.3 **10:19** 10.19 Mab 20.12-16; Mew 24.14 **10:21** 10.21 Mt 19.21 **10:22** 10.22 Ps 62.11 * **10:24** 10.24 Daa dərəwel hay mekele ta mey Gərek a ləvey: «aɲga ta banay ɲgada ndaw ma vəlda ray aɲga ɲgada zleley amba a təba Bay Gazlavay ɲga wey da ray a.»

baatal. Ama an̄ga ta banay ga ma fəna saya n̄gada ndaw masa-zleley n̄ga təba Bay Gazlavay n̄ga wey da ray a.»

²⁶ Gula an̄ga hay a rəzlam ta gədan̄ ta gədan̄, aa cəfdam vaw da wuzlah ata, a ləvam: «Da anda kedə na, ma da ləhey daa mebərey na, wa?»

²⁷ Da ray n̄gene, Yesu a nəkta, a ləvtar: «Meləhey daa mebərey na, ara cek masa ndaw-magədan̄ ma gwa n̄ga ka ba. Ama Gazlavay a gwa n̄ga ləhda ndaw maja an̄ga na, a gwa a kata cek hay tabiya.»

²⁸ *Piyer a ləvar a Yesu: «Yaw, ala na, ya ta mbəkdamatərwa cek ala hay sem cəpa, amba ya səpmaka.»

²⁹ Yesu a mbəfdara, a ləvar: «Ya fa ləvkwar fara fara, da ndaw a mbəkdarwa way an̄ga, da daa ba, a mbəkdatərwa məlmaha hay, dam-mamaha hay, mamaha, papaha, bəz an̄ga hay, da daa ba, a mbəkdatərwa ley an̄ga hay, amba a səpya, asaya amba a wuzey *Mey-maaya-mawiya na, ³⁰ ndaw aha, daa masa an̄ga da bəla na, a hətey cek hay a la ma fəna, a key dey temere a ray cek hay masa an̄ga ma mbəkdatərwa ha. Anda meləvey, a da hətey way hay, məlman̄ hay, dam-maman̄ hay, maman̄ hay, bəza hay, ta ley hay mekele mekele saya. Asaya, ndəhay a sərdamara banay la ga maja mey adaw. Fa dəba n̄ga mēndəvey n̄ga bəla na, a hətey heter mēndəvey ba la saya. ³¹ Yaw, ndəhay ga ma təbmara mey adaw n̄geeme, a da vəham fa dəba. Asaya, ndəhay masa fa dəba, a da diyam fa mey.»

Yesu aa guzley n̄ga dey maakar da ray meməcey an̄ga ta masləkdawa an̄ga

(Matiye 20.17-19; Luk 18.31-34)

³² Ata Yesu ta ndəhay mekele, ata daa cəved ma daw a *Jeruzelem. Yesu fa daw fa mey n̄ga gula an̄ga hay. Gula an̄ga hay a, ray ata fa həbey maja a səmra Yesu a da sərey banay da Jeruzelem, ama an̄ga fa daw a Jeruzelem e cənga. Asaya, ndəhay mekele masa ma səpmatar wurzay na, fa diyam ta mandərzay daa dey. Yesu a n̄gelta gula an̄ga hay kuraw a ray a cew saya ta cakay, aa guzltar da ray cek masa ma da hətfar.

³³ A ləvtar: «Ehe, aləkwa fa nakwa a Jeruzelem. Fetede na, yah, *Bəz n̄ga Ndaw, a da vəldamaya a har *bay-ray hay n̄ga ndəhay ma ka kwakwas ta *ndəhay maa sərkada kwakwas n̄ga Mawiz. A da kamaya sariya n̄ga kədefey vagay, a da vəldamaya a har ndəhay ma təba mey n̄ga Gazlavay ba. ³⁴ Ndəhay a na, aa san̄gəram la a ray adaw, a təfmaya meesleb la aa dey, a slədmaya la ta laway. Fa dəba ha, a

kədmaya la vagay. Nga dar maakar a na, ya sləkdəwa la daa meməcey.»

*Ata Jak ta Jan a səpam nga key mahura
(Matiye 20.20-28)*

³⁵ Fa dəba ha, *gula hay nga Yesu masa bəza hay nga Zebede, ata *Jak ta *Jan, a samawa fa Yesu, a ləvmar: «Bay ala, ya wudam ka kandar cek masa ala ma daa cəfdamaka.»

³⁶ Yesu a mbəddatara, a ləvtar: «Ka wudam ya kakwar na, me?»

³⁷ A mbəddamara, a ləvmar: «Ya wudam ta pas masa kah ma da zəma bay akah na, pəskandar mey amba ndaw pal a njeý ta har-zəmay akah, ndaw lanjar a njeý ta har-gula akah.»

³⁸ Maja ngene, Yesu a ləvtar: «Ka səmra cek masa akwar maa cəfdam ba. Ka gwamara nga səram banay la anda yah ma da səra daw? Da daa ba, ka gwamara nga bəsmara banay la anda yah ma da bəsa daw?»

³⁹ A mbəddamara, a ləvmar: «Ahaw, ya gwamara.»

Yesu a ləvtar: «Ahaw, ka səram banay la anda yah ma da səra. Ka bəsmara banay la anda yah ma da bəsa. ⁴⁰ Ama nga njeý ta har-zəmay adaw, da daa ba, ta har-gula adaw na, ara yah ma da dəsla mey a ngene ba. Ara Gazlavay ma da diyta slam hay a ngene ngada ndəhay masa aa ma walata.»

⁴¹ Fa dəba ha, masa gula anja hay siya kuraw ma cəndamara mey a na, a cam mevel a ray ata Jak ta Jan.

⁴² Da ray ngene, Yesu a zəлта tabiya, a ləvtar: «Ka səmra da wuzlah ndəhay da bəla keđe na, bay hay daha. Bay hay a na, fa wam da ray ndəhay ta gədan, asaya, mahura hay mekele fa wam da ray ndəhay ta cəved e ba.

⁴³ Ama da wuzlah akwar na, a da key kəne ba. Yaw, da ndaw da wuzlah akwar a wudəy nga key mahura na, si a tərey ndaw ma ka sləra akwar. ⁴⁴ Asaya, da ndaw da wuzlah akwar a wudəy nga key *bay-ray na, si a tərey anda beke nga ndəhay cəpa. ⁴⁵ Maja, yah, *Bəz nga Ndaw, ya sawa a bəla na, amba ndəhay a kamaya sləra ba. Ama ya sawa na, amba ya katar sləra a ndəhay, ya vəlda heter adaw nga ləhey ndəhay ga daa mebərey.»

*Yesu a wurey dey nga ndaw-wulaf
(Matiye 20.29-34; Luk 18.35-43)*

⁴⁶ Ata Yesu ta gula anja hay a wusam a Jerikwaw, a mbəzam a slala ha. Fa dəba ha, masa Yesu fa bam da

slala ha ta gula an̄ga hay leŋ ndəhay ga heyey na, ndaw-wulaf daha mezəley Bartime, ara bəzey ŋga ndaw mezəley Time. Ndaw-wulaf a na, manjakaya fetede, fa rəkey da meycəved. ⁴⁷ Masa an̄ga ma cənda ara Yesu, ndaw *Nezeret, ma daw taa cəved e na, a wudey, a ləvey: «Yesu, *Bəzey ŋga Davit, ambahw sərfaya dey-ceceh, may taw!»

⁴⁸ Ndəhay ga heyey a kamar mey, a ləvmar ŋga njeý teete, ama ndaw-wulaf a, a wudey ta gədan̄ cəŋga, a ləvey: «Bəzey ŋga Davit, ambahw sərfaya dey-ceceh, may taw!»

⁴⁹ Yesu ta', a lecey, a ləvtar a ndəhay da cakay a: «Zəlmərwa ndaw aha.»

Ta', ndəhay a, a zəlmərwa, a ləvmar: «Dəka mevel, lecey, Yesu fa zəlka.»

⁵⁰ Anda keđe, aa zakada gwedeere an̄ga, pərta! a lecey, a daw fa Yesu.

⁵¹ Ta', Yesu aa cəfda, a ləvar: «Ka wudey ya kaka na, me?»

Ndaw-wulaf a, a mbəddara, a ləvar: «Bay adaw, ya wudey ka wuryawa dey adaw amba ya hətar dey cəŋga.»

⁵² Yesu a ləvar: «Dey akah ta wurey cay, maja kah ma paya ŋga ndaw akah fara fara. Wure keđe, daw.»

Wure wure ŋgene, dey an̄ga ta', a wurey, a hətar dey dəba. Ta', a səpa Yesu daa madaw an̄ga.

11

Yesu a daw a Jeruzelem anda bay

(Matiye 21.1-11; Luk 19.28-40; Jan̄ 12.12-19)

¹ Ata Yesu ta gula an̄ga hay fa diyam aa berney ŋga *Jeruzelem. Masa ata gweegwe ta berney a na, a wusam gweegwe ta slala Betfaje leŋ ta slala Betani da rav An̄gwa ŋga *Awliviye. Ta', Yesu, a slərey gula an̄ga hay cew teesed ŋgada slala ha. ² A ləvtar: «Diyam a slala fa mey akwar katay. Da akwar ma wusam la a slala ha na, ka hətfam bəz-zəŋgwaw majəwkaya la fetede masa kwa ndaw ta təpey a ray a daa ba aran̄. Pəskamərwa, handamərwa fede. ³ Da ndaw aa cəfdakwar, a ləvey ka pəskamara zəŋgwaw a ŋga key me na, ka mbəddamara, ka ləvmar: "Bay Mahura a wudey. A da vəhdakawa wure keđe."»

⁴ Da ray ŋgene, a diyam, a hətfamar bəz-zəŋgwaw a, majəwkaya da meycəved gweegwe ta mey-mbew. A pəskamərwa. ⁵ Ndəhay nekəfey da wuzlah ndəhay fetede daha aa cəfdamata, a ləvmatar: «Ka pəskamara zəŋgwaw a na, keme?»

⁶ A mbəɸdamatara, a ləvmatar: «Bay Mahura a wudey. A da vəhdakwara wure keɸe.» Ta', ndəhay a, a mbəkdamata ŋga diyam ta zəŋgwaw a. ⁷ A handamərwa zəŋgwaw a heyey a Yesu. A ciymata zana ata hay a ray zəŋgwaw a. Ta', Yesu a təpey a ray a. ⁸ Ndəhay ga malacatakaya daa cəved ŋga ceɸ ray ta Yesu, a ciyam zana ata hay aa cəved e ŋga həslmar ray. Ndəhay mekele a diyam a bəzłhamawa mey-har ŋga wudez hay da ley, a pamata aa cəved e may.

⁹ Ndəhay fa diyam fa mey anɸa, ndəhay mekele hay fa diyam fa dəba anɸa. Ata tabiya fa wudam, a ləvam: «*Hawzana! Həlmakwa Bay Gazlavay! Anja Bay Gazlavay ŋga pəsar mey a ndaw masa aa ma slərdərwa ta mezəley anɸa. ¹⁰ Anja Bay Gazlavay ŋga pəsar mey a bay ma da wey aa slam a ŋga Bay *Davit, papaŋ ŋga papa aləkwa zleezle. Həlmakwa Bay Gazlavay da vad!»

¹¹ Ta', Yesu a mbəzey aa berney ŋga Jeruzelem. A daw aa *Way-mekey-kwakwas ŋga Gazlavay. A sanɸalata cek hay cəpa da hwad a. Ta', a diyam ta gula anɸa hay kuraw a ray a cew a Betani maja gweegwe tavad cay.

*Mey da ray wudez manjar babəza
(Matiye 21.18-19)*

¹² Pepərek e, ata Yesu ta gula anɸa hay a sləkɸam da Betani heyey. Daa ŋgene, may fa car a Yesu. ¹³ Masa ata fa diyam daa cəved na, Yesu a hətey wudez da dərəŋ, wudez e madadəkaya. Ta', a daw a cakay a amba a nəka da babəza fa wudez e daha kwa. Ama, a hətfey fa wudez e na, si gwaslaf gway, babəza fa vəɸa daa ba, maja ara kiya meyey babəza ba. ¹⁴ Da ray ŋgene, Yesu a nəsa wudez e, a ləvey: «Anja wudez keɸe ŋga yey babəza saba ŋga sərmataw.»

Masa anɸa maa guzley anda keɸe na, gula anɸa hay ta cəndamara mey a la.

Yesu a bəłta ndəhay daa Way-mekey-kwakwas ŋga Gazlavay

(Matiye 21.12-17; Luk 19.45-48; Jan 2.13-22)

¹⁵ Ata Yesu ta gula anɸa hay, a wusmawa a *Jeruzelem. Yesu a mbəzey aa papalah ŋga *Way-mekey-kwakwas ŋga Gazlavay. Fetede na, ndəhay fa kam luma. Maja ŋgene, ta', a bəłta ndəhay ma həɸkadam cek hay leŋ ndəhay ma həɸkam cek hay. A bəzłta slam hay ŋga ndəhay ma mbəɸa dala ta janɸa hay ŋga ndəhay ma həɸkadam makurgwadakw hay. ¹⁶ Asaya, Yesu a vəley cəved kwa ŋgada waawa ŋga daw ta cek hay wura wura taa papalah

nga Way-mekey-kwakwas nga Gazlavay a ba. ¹⁷ Da ray ngene, a saserkadata ndəhay, a ləvey: «Mawuzlalakaya daa dərəwel nga Gazlavay, Gazlavay a ləvey: “Way adaw na, ara way amba ndəhay da bəla tabiya a dərəmaya dāngay da hwađ a.” Ama akwar na, ka tərđamara way a keđe nga slam nga mayal hay!»

¹⁸ Masa *bay-ray hay nga ndəhay ma ka kwakwas nga Gazlavay ta *ndəhay maa sərəkada kwakwas nga Mawiz ma cəndamara mey masa Yesu ma kada keđe na, a səpam cəved nga kəđmara vagay maja ata fa zluram ta anğa. A zluram na, maja ndəhay ga fa rəzlam da ray mey masa anğa maa sərəkadata.

¹⁹ Masa tavađ ta key cay na, ta', Yesu a bamawa ta gula anğa hay daa berney nga Jeruzelem e.

*Mey da ray wudez masa Yesu ma nəsa heyey
(Matiye 21.20-22)*

²⁰ Pepərek e, masa ata Yesu ta gula anğa hay fa diyam taa cəved ma daw a *Jeruzelem na, a hətmar wudez manjar babəza heyey ta kweley sem haa kasl fa slaslalay a. ²¹ *Piyer a sərəfada masa Yesu ma nəsa wudez e heyey, ta', a ləvar a Yesu: «Bay Mahura, nəka wudez masa kah ma ləvey nga yey babəza saba heyey na, ta kweley sem.»

²² Da ray ngene, Yesu a ləvtar: «Pamara Gazlavay nga ndaw akwar fara fara mandaw mandaw. ²³ Ya fa ləvkwar fara fara, ndaw a gwa a ləvar a anğwa mahura: “Sləkdəy la fedə, kəzley aa bəlay.” Da ndaw aha anğa ta mewulkey cew cew daa ba, asaya, da anğa fa wulkey fara fara daa mevel anğa Gazlavay a da kara cek masa anğa maa cəfdə na, Gazlavay a kara la. ²⁴ Maja ngene, ya fa ləvkwar, da akwar fa dərəam dāngay a Gazlavay ngaa cəfdəy cek, asaya, da akwar fa wulkam daa mevel akwar Gazlavay a vəldakwara cek aha la na, Gazlavay a vəldakwara cek aha la, kwa kaa cəfdəam meeme daa međərey-dāngay akwar.

²⁵ Yaw, da akwar fa dərəam dāngay a Gazlavay, mevel akwar fa cey a ray ndaw na, mbəkdamara mebərey nga ndaw aha, amba Papakw akwar masa da vad a mbəkdamara mebərey akwar may. [²⁶ Ama da ka mbəkdamatara mebərey nga ndəhay ba na, Papakw akwar masa da vad a mbəkdamara mebərey akwar daa ba may.]»

*Ma vəldara gədaŋ a Yesu na, wa?
(Matiye 21.23-27; Luk 20.1-8)*

²⁷ Ata Yesu ta gula anğa hay a vøhmawa a *Jeruzelem saya. Masa Yesu fa pøkey daa *Way-mekey-kwakwas nga Gazlavay na, *bay-ray hay nga ndøhay ma ka kwakwas, ta *ndøhay maa sèrkada kwakwas nga Mawiz, leŋ mahura hay nga *Jøwif hay a diyam fa anğa. ²⁸ Aa cøfdamara, a løvmar: «Ma løvka nga kata cek hay a kefe na, wa? Ma vølka cøved nga kata na, wa?»

²⁹ Ta', Yesu a mbøddatara, a løvtar: «Amba yaa cøfdakwar mey pal. Da akwar ta mbøddamiwa mey a la na, ya kadakwara ndaw ma vøldiwa cøved nga kata cek hay a kefe la may. ³⁰ Yaw, ma slørdørwa *Jan-Baptis nga katar *baptem a ndøhay na, wa? Gazlavay daw, da daa ba, ndøhay daw? Mbøddamiwa cey!»

³¹ Da ray ngene, ndøhay a, a slam yawa da wuzlah ata, a løvam: «Ya da mbøddakwa aa mey anğa ha na, kwara? Da ya løvka: "Ara Gazlavay ma slørdørwa" na, a da mbøddandakwara, a løvey: "Kaa ka tøbmara mey nga Jan-Baptis a ba na, maja me?" ³² Ama da ya løvka: "Ara ndøhay ma slørdamørwa" na, ndøhay makustakaya da cakay aløkwa fa da tøbmara daa ba.»

Yaw, mahura hay a na, fa zluram ta ndøhay, maja ata cøpa a wulkam Jan-Baptis ara *ndaw ma tøla mey nga Gazlavay fara fara. ³³ Da ray ngene, a mbøddamara a Yesu, a løvmar: «Ya sørmara ba.»

Ta', Yesu a mbøddatara, a løvtar: «Yaw, da anda kefe na, ya fa da kadakwara ndaw ma vølya cøved nga kata cek hay a kefe na, daa ba may.»

12

*Mey-menğey da ray ndøhay ma tøbmara Yesu ba
(Matiye 21.33-46; Luk 20.9-19)*

¹ Fa døba ha, Yesu a ngatar mey, a løvtar:

«Ndaw daha a key jerne nga wudez mezømey. Ta', a zløba jerne he tabiya. A diyey slam nga døcey babøza nga wudez e. A lømey way magølkaya maazøma ngada ndaw ma jøfa jerne he. Fa døba ha, a høley ndøhay aa jerne anğa ha nga key sløra da hwad a. Ta', a daw aa slam døreŋ.

² Masa kiya menğøley babøza nga wudez e ta wuswa cay na, a slørey gula anğa pal da wuzlah madørlam anğa hay aa jerne he amba a tøbma babøza maala nga anğa. ³ Ama ndøhay ma ka sløra daa jerne he a kørzamara madørlam a, a slødmara, a bølmara a way, ta har ba' køne. ⁴ Ta', bay nga jerne he, a slørey madørlam anğa mekele fa ata. Ndøhay a, ta', a slønmar ray, a cødmara. Ta', a bølmara.

⁵ Fa dɔba ha, bay nga jerne he, a slɔrey madɔrlam anɔa mekele saya. Ndɔhay a, a kɔdmara vagay. Anda kedɛ, a slɔrey madɔrlam anɔa hay mekele mekele, ama ndɔhay a, a slɔdmata siya hay, asaya, a kɔdmata siya hay vagay.

⁶ Ndaw pal mambɔkakaya nga slɔrey na, ara bɔzey anɔa mawudkaya kalah. A slɔrey nga madagway-dakw na, bɔzey anɔa ha. A wulkey daa ray anɔa, a lɔvey: "Fara fara a namar ray la a bɔzey adaw." ⁷ Ama, masa bɔzey a fa daw gweegwe ta jerne he na, ndɔhay ma ka slɔra ha a hɔtmar, aa guzlam da wuzlah ata, a lɔvam: "Ehe, ndaw ma sawa katay na, ara bɔzey ma da wa jerne he. Nakwa, kɔdkwa vagay, amba jerne he a njeɔ ngada alɔkwa." ⁸ Da ray ngene, a diyam, kaw! a kɔzamarara bɔzey a, a kɔdmara vagay, ba! a kɔzlamara vagay a, a dɔba jerne he.»

⁹ Yesu aa cɔfdata, a lɔvey: «Akwar na, ka wulkam bay nga jerne he, a da key na, kwara? Ehe, ya fa lɔvkwar, bay nga jerne he, a sawa la, a kɔdta ndɔhay ma ka slɔra ha la vagay, a vɔlda jerne he la, a har ndɔhay mekele. ¹⁰ Akwar ta janɔamara mey nga Gazlavay la, ba diya? Mey masa ma lɔvey:

"Anɔwa melɔmey way masa ndɔhay ma lɔma way ma kɔzlamara ta cakay na, anɔwa ha na, ta tɔrey sem nga anɔwa maaya melɔmey way ma fɔnta siya hay jak.

¹¹ Ngene na, ara Bay Gazlavay ma ka cek aha, ara cek maaya fa dey alɔkwa."»

¹² Mahura hay nga *Jɔwif hay a heyey a sɔpam cɔved nga kɔzamarara Yesu, maja a sɔrmara Yesu aa guzley mey-menɔey na, da ray ata. Ama ata fa zluram ta ndɔhay fetedɛ. Da ray ngene, mahura hay a, a mbɔkdamara, ta', a diyam.

Ndɔhay mahura hay a jadamara Yesu da ray mepɔley budaw

(Matiye 22.15-22; Luk 20.20-26)

¹³ Fa dɔba ha, mahura nga *Jɔwif hay a slɔram *Fariza hay ta ndɔhay nga Bay *Herawt fa Yesu. A wudam a jadamara amba aa guzley mey maaya ba. ¹⁴ A diyam, a lɔvmar: «Bay ala, ya sɔrmara kah na, ndaw ma mbɔzley ba. Masa kah faa guzley na, ka zlurey ta ndaw ba, asaya, ka nɔkta ndɔhay cɔpa letek fa mey akah. Ka faa sɔrkadata ndɔhay nga njam anda Gazlavay ma wudɛy fara fara. Yaw, kwakwas alɔkwa a vɔley cɔved nga pɔley budaw a bay mahura *Sezere daw? Maaya na, ya pɔlmara budaw a daw, ya pɔlmara ba daw?»

¹⁵ Ama Yesu a sɛra, ndɔhay a, aa guzlam ta neneh cew. Ta', a lɔvtar: «Ka wudam n̄ga jadamaya na, maja me? Lamaya dala ha pal amba ya nɛka.»

¹⁶ Ta', a lamar dala ha. Yesu aa cɛfdata, a lɔvtar: «Fa dala ha kedɛ na, ara dey n̄ga wa? Ara mezɔley n̄ga wa?»

A mbɛfdamara, a lɔvmar: «Ara n̄ga Sezere, bay mahura n̄ga Rawm.»

¹⁷ Ta', Yesu a lɔvtar: «Cek masa n̄ga Sezere na, vɔldamara a Sezere he. Cek masa n̄ga Gazlavay na, vɔldamara a Gazlavay a.»

Anda kedɛ, ndɔhay a, a rɔzlam ga da ray mey n̄ga Yesu a.

Saduse hay a jadamara Yesu da ray maslɛkɔfawa daa memɔcey

(Matiye 22.23-33; Luk 20.27-40)

¹⁸ Ndɔhay *Saduse hay na, ara ndɔhay ma wulkam, ma lɔvam da ndaw ta mɔcey sem na, fa da slɛkɔfawa daa memɔcey daa ba. Ndɔhay da wuzlah Saduse hay a, a diyam fa Yesu, aa cɛfdamara, a lɔvmar: ¹⁹ «Bay ala, zleezle *Mawiz ta wuzlalandakwar kwakwas la, a lɔvey: “Da ndaw mɔlmaha ta mɔcey sem na, da n̄gwas n̄ga ndaw ma mɔcey a, ta yawa bɛza hay daa ba na, si mɔlmaha a la n̄gwas-vagay a, amba a yamawa bɛza hay n̄gada mɔlmaha mamɛckaya ha.” ²⁰ Yaw, mɔlman̄ hay maasala daha, ata n̄gaa man̄, n̄gaa pan̄. Mɔlma ata mahura, len̄! a ley n̄gwas. Fa dɔba ha, ndaw aha pam! a mɔcey ta hɔtey bɛzey daa ba. ²¹ Da ray n̄gene, mambaray a, len̄! a la n̄gwas-vagay a, an̄ga pam! a mɔcey saya ta hɔtey bɛzey daa ba may. Fa dɔba ha, mɔlma ata mamaakar a, a la n̄gwas-vagay a, ama pam! a mɔcey ta hɔtey bɛzey ta n̄gwas aha daa ba cɛn̄ga. ²² Anda kedɛ, ata maasala ata cɔpa, ta lamara n̄gwas aha la, ta mɔcam sem cɔpa, ta mbɛkam bɛza hay daa ba. Fa dɔba ha ata ma mɔcam la cɔpa ata na, n̄gwas aha pam! a mɔcey may. ²³ Anda kedɛ, ta pas maslɛkɔfawa n̄ga ndɔhay daa memɔcey na, n̄gwas aha, a da key na, n̄gwas n̄ga wa? Maja ata maasala ata cɔpa ta lamara la n̄ga n̄gwas ata.»

²⁴ Yesu a mbɛfdatara, a lɔvtar: «Akwar faa zɔfdamara ray akwar anda kedɛ na, maja me? Ara maja ka sɛrmara mey n̄ga Gazlavay ba ta maja ka sɛrmara gɔdan̄ an̄ga ba. ²⁵ Yaw, daa maslɛkɔfawa n̄ga ndɔhay daa memɔcey na, zel hay fa da lam n̄gusay daa saba, n̄gusay fa da n̄jam ta zel hay daa saba, ama a da n̄jam anda maslan̄ hay n̄ga Gazlavay da vad. ²⁶ Ya wudfey yaa sɛrkadakwar da ray maslɛkɔfawa n̄ga ndɔhay daa memɔcey. Ka ta

janġamara daa d'erewel masa Mawiz ma wuzlala la, ba diya? Derewel e na, aa guzley da ray kusaf masa awaw megədey da ray a. Fetede na, Gazlavay a ləvar a Mawiz: "Yah, Gazlavay masa *Abərahām, *Izak, leŋ *Jakwap ma namar ray."» ²⁷ Yesu aa guzley saya, a ləvey: «Gazlavay na, ara Gazlavay ŋga ndəhay ta dey, ba na, ara Gazlavay ŋga ndəhay maməctakaya ba. Akwar Saduse hay, ka ta zləbmara mey a sem kalah!»

Mewey ŋga Gazlavay masa mahura na, wura?
(Matiye 22.34-40; Luk 10.25-28)

²⁸ Masa ndəhay *Saduse hay heyey fa kam yawa ta Yesu na, ndaw da wuzlah *ndəhay maa sərəkada kwakwas ŋga Mawiz daha, a wusey a cakay ata, a cənda yawa ata ha. A nəka na, Yesu ta mbəfdatara mey a maaya maaya la. Da ray ŋgene, aa cəfda Yesu, a ləvar: «*Mewey mahura ma fənta siya hay na, wura?» ²⁹⁻³⁰ Yesu a mbəfdara, a ləvar: «Mewey mahura ma fənta siya hay a na, ara mey ma ləvey: "Jəkam sləmay, akwar ndəhay *Israyel hay, Bay Gazlavay masa aləkwa ma nakwar ray na, anġa pal, Bay aləkwa mahura. Wudmara Gazlavay, Bay akwar, ta mevel akwar cəpa, ta mesəfney akwar cəpa, ta leŋgesl akwar cəpa, ta gədanj akwar cəpa." * Mewey masa mahura na, ara mey kede. ³¹ Yaw, *mewey mahura ŋga dey cew e daha saya, mewey a, a ləvey: "Wudfa meseembew akah anda kah ma wudfa ray akah." Mewey hay masa ma fənmata cew hay kede na, daa ba.»

³² Ndaw maa sərəkada kwakwas heyey a ləvar: «Mey akah maaya, Bay adaw! Mey masa kah maa guzlda kede na, ara mey fara fara. Gazlavay, anġa pal taava anġa, Gazlavay mekele daa ba. ³³ Si ndaw a wudfa Gazlavay ta mevel anġa cəpa, ta leŋgesl anġa cəpa, ta gədanj anġa cəpa. Asaya, si a wudfa meseembew anġa anda anġa ma wudfa ray anġa. Ndaw ma səpta mewey hay a kede na, a mbafar a Gazlavay a fəna mevəley cek hay ta mehərey cek hay ŋgada anġa.»

³⁴ Masa Yesu ma nəka ndaw aha ta mbəfdara mey a la ta leŋgesl maaya na, ta', a ləvar: «Mewulkey akah ŋgene maaya, gweegwe ka təba amba Gazlavay a wey da ray akah.»

12:26 12.26 Mab 3.2, 6 * **12:29-30** 12.29-30 Yesu a wuztar kede na, mezley ŋga medərey-danġay masa Jəwif hay ma kamara taa pərek taa kwaf. A zəlmara medərey-danġay a ta mey ata, *Sema*. Nəka Mewey hay 6.4-5.
12:29-30 12.29-30 Mew 6.4-5 **12:31** 12.31 Lev 19.18; Mt 22.39 **12:32** 12.32 Lk 20.39 **12:33** 12.33 1Sam 15.22; Aw 6.6

Fa dɔba ha, kwa waawa ta gɔmey nɔga cɔfdɛy mey fa Yesu a daa saba, maja a zɔram fa mey aɔga masa aɔga ma da mbɔfdatara.

Kɔriste, aɔga bay nɔga Davit na, kwara?
(*Matiye 22.41-46; Luk 20.41-44*)

³⁵ Masa Yesu faa sɔrkadata ndɔhay daa *Way-mekey-kwakwas nɔga Gazlavay na, ta', aa cɔfdɛta, a lɔvey: «*Ndɔhay maa sɔrkada kwakwas nɔga Mawiz a lɔvam *Kɔriste *ndaw masa Gazlavay ma wala nɔga lɔhdata ndɔhay na, ara bɔzey da hwad Bay *Davit na, kwara? ³⁶ Ta fa gɔdaɔ nɔga *Mesɔfney nɔga Gazlavay na, Davit ta lɔvey la: "Bay Gazlavay a lɔvar a Bay adaw Mahura:

Sawa, nɔjey ta har-zɔmay adaw

amba ya wakwa da ray ndɔhay

haa ta pas masa yah ma da pata masa-gɔra akah hay asi salay akah."

³⁷ Davit ta ray aɔga, a zɔla Kɔriste "Bay Mahura" na, kaa wara Kɔriste he ara bɔzey da hwad Davit saya na, kwara?»
(*Matiye 23.1-36; Luk 20.45-47*)

Ndɔhay ga fa jɔkam slɔmay fa meesɔrkey nɔga Yesu ta meesɔmey. ³⁸ Daa meesɔrkey a na, Yesu a lɔvtar a ndɔhay makustakaya ha: «Wam vaw fa *ndɔhay maa sɔrkada kwakwas nɔga Mawiz. A wudam mepɔkey ta dawura hay fa vaw nɔga zlepey. A wudam ndɔhay a camatar har ta meney ray fa mey nɔga ndɔhay tabiya. ³⁹ Daa *way-mewuzey-mey nɔga Gazlavay na, a sɔpam slam-menɔjey fa mey nɔga ndɔhay amba ndɔhay tabiya a hɔtmatar. Ta pas gwagway na, a sɔpam slam-menɔjey maaya. ⁴⁰ Asaya, fa tɔbmatara cek hay nɔga nɔgwas-vagay hay tabiya. A nɔjam daa medɔrey-danɔgay ga, aa guzlam ga amba ndɔhay a lɔvam ata maaya. Ya fa lɔvkwɔr, ata na, Gazlavay a sɔrdata banay la, ma fɔna nɔga ndɔhay mekele!»

Mey da ray nɔgwas-vagay masa-viya ma vɔley cek a Gazlavay

(*Luk 21.1-4*)

⁴¹ Ta', Yesu a daw, a nɔjey a cakay slam mecekeley dala daa *Way-mekey-kwakwas nɔga Gazlavay. Aɔga fa nɔkta ndɔhay fetedɛ ma pamara dala aa cek mecekeley dala. Ndɔhay masa-zleley hay fa vɔlam dala ga. ⁴² Nɔgwas-vagay masa-viya daha, a sawa, a kwiyey sisey sisey cew aa cek aha may. Dala aɔga ha, mekele daa ba. ⁴³ Da ray nɔgene, Yesu a zɔlta gula aɔga hay, a lɔvtar: «Ya fa lɔvkwɔr fara

fara, ngwas-vagay masa-viya keɗe na, ta pey dala la aa cek mecekeley dala ma fəna nga ndəhay cəpa. ⁴⁴ Ya ləvkwar anda keɗe na, maja ndəhay siya hay, a vələm dala nekəɗey daa dey zleley ata hay da way ga. Ama ngwas-vagay keɗe, ta mərğa anğa cəpa, a vələda zleley anğa tabiya, masa anğa ma da həɗkey cek mezəmey ta anğa.»

13

Yesu aa guzley da ray Way-mekey-kwakwas nga Gazlavay ma da bəzley

(Matiye 24.1, 2; Luk 21.5, 6)

¹ Daa masa Yesu fa bawa daa *Way-mekey-kwakwas nga Gazlavay na, gula anğa pal aa cəɗɗa, a ləvar: «Bay aɗaw, nəka Way-mekey-kwakwas nga Gazlavay keɗe cey! Səkway nga way wura, maləmkaya maaya ta anğwa ma mbey anda keɗe!»

² Yesu a mbəɗɗara, a ləvar: «Ka fa hətar way a maləmkaya maaya masa mahura keɗe, ba diya? Way a cəpa na, a bəzlmara la, kwa anğwa pal fa da mbəkey da ray cəla daa ba.»

(Matiye 24.3-14; Luk 21.7-19)

³ Fa dəba ha, Yesu a daw aa Anğwa nga *Awliviye, cəkwan! a njeɗ dey pəla! ngada fa *Way-mekey-kwakwas nga Gazlavay heyey. Ata *Piyer, *Jak, *Jan, leŋ *Andərə, ata taava ata da cakay Yesu a. Ta', aa cəɗɗamara, a ləvmar:

⁴ «Wuzɗandara cey, cek aha a da key na, ta vara? Ya da sərmara ɗar a ta wuswa cay na, fa me?»

⁵ Ta', Yesu a kətata, a ləvtar: «Wam vaw fa ndəhay ma da fəcmakwar. ⁶ Sərmara, ndəhay ga a samawa la ta mezəley aɗaw, kwa waawa a da ləvey anğa na, *Kəriste, *ndaw masa Gazlavay ma wala nga ləhɗata ndəhay. A təknam ndəhay la ga. ⁷ Ta pas masa akwar ma da cənəm vərəm hay gweegwe ta akwar, asaya, ta pas masa akwar ma da cənəm labara nga vərəm hay masa da dərəŋ na, ka da zɗuram ba, maja si cek hay a nğene, a kam la teesɗ ɗagay. Ama ara mendəvey nga bəla ba aran. ⁸ Hwayak lanğar a da key vərəm ta hwayak lanğar, bay lanğar a da key həma a ray bay lanğar. Daa hwayak hay mekele mekele, hwiyak a wusey la. May a key la da bəla. Cek hay a na, a kam la anda hwad ma zɗar nga car ngada ngwas ma da yey, anda meləvey, ara mendəvey nga bəla ba aran, ama ara mezley a.»

⁹ Yesu a ləvtar saya: «Ama akwar na, wam vaw! Ndəhay a handamakwar la fa mey nga ndəhay ma ka sariya, a

slədfmakwar la daa *way-mewuzey-mey nga Gazlavay. A handamakwar la fa mey nga ndəhay mahura hay leŋ fa mey nga bay hay, maja akwar ndəhay adaw hay. Anda kefe, ka da kam sede da ray adaw fa mey ata. ¹⁰ Yaw, ŋgeeme na, si ndəhay ma təba mey adaw a wuzdamara *Mey-maaya-mawiya da ray adaw a ndəhay da bəla cəpa la dʒagay, wara cay bəla a ndəvey. ¹¹ Pas masa ata ma da kərzamakwar nga hendey aa sariya na, ka da zluram da ray mey masa akwar ma daa guzlam ba. Ama, gwaguzlam mey masa Gazlavay ma da vəldakwara ta pas a ŋgene, maja mey a na, a da sawa ta fa akwar ba, ama ta fa *Mesəfney nga Gazlavay. ¹² Ndaw a da vəlda məlmaha amba a kədfmara vagay. Papanj hay a kamara la kəne ŋgada bəza ata hay may. Bəza hay a mbədfmatar dəba la a papa ata hay leŋ a mama ata hay, a vəldamata a ndəhay amba a kədfmata vagay may. ¹³ Ndəhay tabiya a da ŋgəldamakwar ba, maja yah. Ama ndaw ma bəsa banay a haa mēndəvey a na, Gazlavay a ləhda la.»

*Mey da ray banay ma da sawa a ray ndəhay da Jude
(Matiye 24.15-28; Luk 21.20-24)*

¹⁴ Yesu aa guzley saya, a ləvey: «Da dʒar a ta wuswa cay na, ka hətmar ndaw malamba ma nəsa cek la. Ara ndaw masa Gazlavay ma wudəy nga hətar fa dey ba. Ndaw aha, a da njeŋ na, aa slam anjga menjeŋ ba. (Akwar masa ma janjgamar mey a kefe na, si ka pam leŋgesl fa mey a.) Ta pas ŋgene, si ndəhay daa hwayak nga *Jude a hwam nga baw a anjwa. ¹⁵ Kwa ndaw masa fa məskey vaw daa ambaw na, fa da mbəzey a way nga lawa cek daa ba.

¹⁶ Kwa ndaw anjga da ley na, fa da vəhwa a way nga ley zana daa ba. ¹⁷ Daa dʒar hay a ŋgene, banay a sawa la a ray ŋgusay ta hwad ta a ray ŋgusay masa ta bəza hay da har. ¹⁸ Dəram danjgay a Gazlavay, cacədfamara amba cek hay a, a wusmawa ta piya ba *. ¹⁹ Daa dʒar hay a ŋgene, banay a sawa la ga a ray ndəhay. Dəga Gazlavay ma ləma bəla haa wure kefe ndaw ta sərey banay anda ŋgene daa ba aran. Asaya, banay fa da sawa ma fəna ŋgene daa saba.

²⁰ Da Bay Gazlavay ta ŋgəwa siya nga dʒar nga banay a daa ba na, anja kwa ndaw pal fa da mbəkey ta dey daa ba. Ama a ŋgəwa siya nga dʒar a na, maja ndəhay masa anjga ma walata ŋgada anjga. ²¹ Da ray ŋgene, da ndaw

13:9 13.9-13 Mt 10.17-22; Janj 16.1-4 **13:11** 13.11 Lk 12.11-12 **13:12** 13.12
Mi 7.6; Mt 10.35; Lk 12.52-53 **13:13** 13.13 Janj 15.21; CWJ 13.10 **13:14** 13.14
Dan 9.27 **13:15** 13.15-16 Lk 17.31 * **13:18** 13.18 cacədfamara amba cek
hay a, a wusmawa ta piya ba: a ləvey anda kefe maja ta piya na, mepəkey ta
banay. **13:19** 13.19 Dan 12.1; CWJ 7.14

a lœvkwar: “*Køriste, anɣa keɔe”, da daa ba “Nœkmara, anɣa katay” na, ka da tœbmara mey anɣa ba. ²² Ya lœvkwar anda keɔe na, maja ndœhay ma pamara ray ata nɣa Køriste, asaya, ndœhay ma pamara ray ata nɣa ndœhay ma tœla mey hay nɣa Gazlavay na, a samawa la. A kam maazla hay la nɣa wuzdœrwa gœɔaŋ ata amba a tœknam ndœhay. Da a gwamara na, a tœknam kwa ndœhay masa Gazlavay ma walata sem nɣa ndœhay anɣa hay may. ²³ Akwar na, wam vaw, maja ya ta pakwar lenɣesl cay da ray cek hay a œpa.»

Mey da ray ma vœhwa nɣa Bœz nɣa Ndaw
(*Matiye 24.29-31; Luk 21.25-28*)

²⁴ Yesu a lœvey saya: «Ama daa œar hay a nɣene, fa dœba nɣa mesœrey banay nɣa ndœhay na, pas a tœbzley la,

kiya fa da wedey daa saba,

²⁵ wurzla hay a kœzlmawa la da vad a hwayak, cek hay œpa da gazlavay da vad a wusam la.

²⁶ Fa dœba ha, ndœhay a da hœtmaya, yah, *Bœz nɣa Ndaw, fa sawa daa mekwtene ta gœɔaŋ mahura len ta mewedey nɣa Bay Gazlavay. ²⁷ Yaw, Gazlavay a da slœrdatœrwa maslaŋ anɣa hay amba a diyam aa slam hay tabiya da bœla, a kusmatœrwa ndœhay masa anɣa ma walata nɣa ndœhay anɣa hay.

(*Matiye 24.32-35; Luk 21.29-33*)

²⁸ «Jœkam slœmay maaya maaya fa mey masa yah ma da wakwara ta gudav. Da masa ka hœtmar gudav fa œœey, gwaslaf a gudaf! gudaf! na, ka sœrmara kiya madaw a ley gweegwe cay. ²⁹ Anɣa letek kœne, da ka hœtmatar cek hay a fa kam anda yah ma lœvkwar keɔe na, nɣene sœrmara Yah, *Bœz nɣa Ndaw, gweegwe cay ya vœhwa. ³⁰ Ya fa lœvkwar fara fara, cek hay a keɔe tabiya a da kam na, ndœhay masa wure keɔe † ta mœcam tabiya daa ba araŋ. ³¹ Slam da vad ta slam da bœla a ndœvey la, ama mey œdaw na, fa da ndœvey daa ba œlak.

(*Matiye 24.36-44*)

³² «Fara fara, cek hay keɔe tabiya a da kam na, ndaw ma sœra kwa œar a, kwa ler e, daa ba. Kwa maslaŋ hay ma njam da cakay Bay Gazlavay da vad a sœrmara ba, kwa Yah, Bœzey anɣa, ya sœra ba, ama si Papay, pal taava anɣa, ma sœra œar a. ³³ Wam vaw! Ka da nam ba, maja ka sœrmara

13:21 13.21-23 Lk 17.23-24 **13:22** 13.22 Mt 24.24 **13:24** 13.24-25 Mt 24.29
13:26 13.26 Mt 24.30 † **13:30** 13.30 ndœhay masa wure keɔe: Ndœhay a wulkam Yesu aa guzley da ray ndœhay masa ta dey daa nɣene, da daa ba, da ray Jœwif hay masa ta dey ta pas masa Yesu ma da vœhwa. **13:30** 13.30 Mt 16.28 **13:32** 13.32 SNM 1.7

ðar a, a da wuswa ta vara ba. ³⁴ Ya da vøhwa a bøla na, anda ndaw ma daw a mølak. Ndaw aha, a da mbøkda way anga na, a mbøftar mey a ma ka sløra anga hay, a vøltar sløra pal pal. A løvar a ndaw ma jøða mey-slam nga way a: "Njey ta dey, ka da ney ba."

³⁵ «Yaw, anda keðe, wam vaw, ka da nam ba, maja ka sørmara ðar masa bay nga way ma da vøhwa ba. Da taa kwaf, da ta wuzlah-tavaf, da gwagwalak fa cey ðay, da taa pørek na, ka sørmara ba. ³⁶ Da ya vøhwa ðørfafay na, ya wufey ya høtfakwar daa ðar ba. ³⁷ Mey masa yah ma løvkwar keðe na, ara ngada ndøhay tabiya: Ka da nam ba.»

14

Mahura hay nga Jøwif hay a slam yawa nga køðey Yesu vagay

(Matiye 26.1-5; Luk 22.1, 2; Jan 11.45-53)

¹ Ma lawa ðar cew nga wusey fa gwagway nga *Pak ta *gwagway nga penj manjar cek ma høsla da hwaf a. *Bay-ray hay nga ndøhay ma ka kwakwas ta *ndøhay maa sørkada kwakwas nga Mawiz a søpam cøved nga kørzey Yesu ta mayal a, amba a køðmara vagay. ² A da kørzamara ta mayal a na, maja mahura hay a, a løvam: «Ya gwakwa nga kørzakwa daa gwagway keðe ba, maja ndøhay a da yam mey.»

Ngwas a mbøðar børðey fa ray nga Yesu

(Matiye 26.6-13; Jan 12.1-8)

³ Yesu aa da Betani, fa zømey ðaf da way *Simanjw, ndaw masa aa ma mbølda daa maasøkula heyey. Masa anga fa zømey ðaf na, ngwas daha, a mbøzey fa ata ta kwalaba da har, kwalaba ha nga angwa maavørkwakaya mezøley «*albaatøra». Kwalaba ha na, marøhkaya ta børðey mezey maaya masa ma høðkey ba, mezøley «*nar». A wura mey nga kwalaba ha, a mbøðda børðey a, fa ray nga Yesu.

⁴ Ndøhay mekele fetede a cam mevel a ray ngwas aha. Aa guzlam da wuzlah ata, a løvam: «A nøsa børðey a keðe na, maja me? ⁵ Anja a høðkada na, a gwa nga høtey dala ga, høma dala nga ndaw ma key sløra nga mevey pal, ba daw? Da ray membøðey børðey a, a ray ndaw na, ngama a wunkatara dala ha a masa-viya hay, ba daw?» A mbøðmar ray ga ngada ngwas aha.

⁶ Ama Yesu a løvtar: «Mbøkdamara! Ka mbøðmar ray na, maja me? Cek masa aa ma ka ngada yah keðe na, ara cek maaya. ⁷ Masa-viya hay na, akwar mandaw mandaw

bama. Ta pas wura wura masa akwar ma wudam na, ka gwamara nga jɛnmata. Ama yah na, akwar fa da hɛtmaya nga njeɣ ta akwar mandaw mandaw daa ba. ⁸ Nɣwas aha ta key cek masa aa ma gwa nga ka la. Kwa ya ta mɛceɣ daa ba aran kaa na, ta mbɛɗɗa bɛrdeɣ cay fa ray adaw nga diya vaw adaw ngadaa cɛvay. ⁹ Ya fa lɛvkwar fara fara, kwa daa wura daa wura da bɛla tabiya na, ndɛhay ma da wuzdamara *Mey-maaya-mawiya nga Gazlavay, a kadamara cek masa nɣwas aha ma ka keɗe la may, amba ndɛhay a sɛrfadamara nɣwas aha.»

Juda a vɛlda Yesu a har masa-gɛra anɣa hay
(Matiye 26.14-16; Luk 22.3-6)

¹⁰ Juda Iskariyawt, gula pal da wuzlah *gula hay nga Yesu kuraw a ray a cew, a daw fa *bay-ray hay nga ndɛhay ma ka kwakwas. A lɛvtar a wudeɣ nga vɛldatara Yesu a har ata. ¹¹ Ata ma cɛndamara meɣ a keɗe la na, aa sɛmam ga. A lɛvmar da ta vɛldatara Yesu la na, a vɛlmar dala. Anda keɗe, Juda ha, a daw a sɛpeɣ cɛved amba a vɛldatara Yesu.

Yesu a zɛmam ɗaf nga gwagway nga Pak ta gula anɣa hay
(Matiye 26.17-25; Luk 22.7-14, 21-23; Jan 13.21-30)

¹² Ara ɗar nɣeeme nga *gwagway nga peɣ manjar cek ma hɛsla da hwaɗ a. Ta pas a nɣene, *Jɛwif hay a hɛram bɛz-tɛban hay nga gwagway nga *Pak. Gula hay nga Yesu a diyam fa vɛɗa, a lɛvmar: «Ka wudeɣ ya diyam, ya ɗiymɛrwa slam amba ya zɛmkwa ɗaf nga gwagway nga Pak na, dama?»

¹³ Da ray nɣene, Yesu a zɛley gula anɣa hay cew, a slɛrdata, a lɛvtar: «Diyam aa berney nga *Jeruzelem. Fetede na, ka da cam ray ta ndaw fa daw ta yam daa kwakulam. Diyam asiya. ¹⁴ Aa way masa aa ma da mbɛzey na, lɛvmar a bay nga way a: “Bay ala a lɛvey: Way mapakaya nɣada yah amba ya zɛmam ɗaf nga gwagway nga Pak ta gula adaw hay na, aa daa wura?” ¹⁵ Fa ɗɛba ha, a wuzkwar way mahura da ray way la. Way a maɗiykaya maaya maaya, cek hay cɛpa nga gwagway da hwaɗ a daha. Ka da ɗiymandakwara cek mezɛmey amba ya zɛmkwa ɗaf nga gwagway a fetede.»

¹⁶ Gula anɣa hay cew heyey, a mbɛkdamata, a diyam aa berney a. Fetede, a hɛtfamatar cek hay tabiya anda Yesu ma lɛvtar heyey. Ta', a ɗiymata cek hay nga gwagway nga Pak a.

17 Taa kwad a ngene na, Yesu a wusam ta gula anga hay kuraw a ray a cew aa slam mezomey daf nga gwagway a. 18 Masa ata fa zomamara daf a na, Yesu aa guzltar, a lovey: «Ya fa lovkwar fara fara, ndaw pal da wuzlah akwar, masa fa zomey daf ta yah wure kefe, a veldaya la a har ndohay nga kedmaya vagay.» 19 Mey a kefe a mectar vaw a gula anga hay a, aa cefdamara Yesu pal pal, a lovam: «Ara yah ma da veldaka ba, ba diya?»

20 Yesu a mbefdatara, a lovtar: «Ara ndaw pal da wuzlah akwar, gula adaw hay kuraw a ray a cew. Ara ndaw masa alakwa fa zomkwa daf bama daa slam a kefe. 21 Fara fara, si yah, *Böz nga Ndaw, ya mecey anda mey mawuzlalakaya daa derewel nga Gazlavay ma lovey. Ama banay a sawa la a ray ndaw ma da veldaya a har ndohay nga kedmaya vagay a. Ngada ndaw aha na, ngama ta yamerwa daa ba selak.»

Yesu a zomam daf nga madagway-dakw ta gula anga hay (Matiye 26.26-30; Luk 22.14-20; 1 Kwarinti hay 11.23-25)

22 Masa ata fa zomam daf nga gwagway a na, Yesu lej! a ley penj. A kar suse a Gazlavay, a wunka, ta', a veldatara a gula anga hay, a lovtar: «Ehe, tebmara. Kefe he, ara vaw adaw.» 23 Fa dëba ha, lej! a ley voley ta cek mesey da hwad a, a kar suse a Gazlavay saya, ta', a veldatara a gula anga hay. Gula anga hay cëpa ta', a samara.

24 Yesu a lovtar: «Kefe na, ara mambaz adaw. Mambaz a, a da mbefwa maja ndohay ga. Ta fa mambaz a, Gazlavay a jöwey mey mawiya ta ndohay anga hay. 25 Ya fa lovkwar fara fara, kwa ya fa da sey yam nga babëza nga wudez mafëckaya daa saba selak. Ya da sey na, si cek mawiya mekele daa slam masa Gazlavay fa wey da ray ndohay da vad.»

26 Ta', a slam walay nga gwagway daa *Pësam hay. Fa dëba ha, a slëkfam, a diyam aa Angwa nga *Awliviye.

Gula hay nga Yesu a lovam fa da mbëkdamara Yesu daa ba

(Matiye 26.31-35; Luk 22.31-34; Jan 13.36-38)

27 Yesu a lovtar a gula anga hay: «Akwar cëpa ka da mbëkdamaya daa masa fa da kërzamaya nga kedey vagay anda mawuzlalakaya daa derewel nga Gazlavay ma lovey: “Ya këfa ndaw-mecëkwer la vagay.

Tëbanj anga hay a kwakwacam ray la pal pal.”

²⁸ Ama da yah ta sləkɗawa cay daa meməcey na, ya daw la teesed da ray akwar aa hwayak nga *Galile. Ka da hɔtfamaya fetede.»

²⁹ *Piyer a lɔvar: «Kwa ndəhay cəpa a mbəkdamaka, ama yah na, ya fa da mbəkɗaka daa ba.»

³⁰ Yesu a mbəɗɗara, a lɔvar: «Ya fa lɔvka fara fara, dasi tavad keɗe, wuskwaa gwagwalak a da cey ɗay nga dey cew na, ka ta ləvey cay dey maakar, ka sɔrya ba, ka sɔrya ba.»

³¹ Ama Piyer a mbəɗɗara ta gəɗaŋ, a lɔvar: «Kay! Kwa da fa da kəɗmaka vagay na, nga kəɗmandakwar cew e, ya fa da ləvey ya sərka ba na, daa ba səlak.» Gula hay nga Yesu siya a ləvam kəne may.

*Yesu a dɔrey ɗaŋgay a Gazlavay da Gecemene
(Matiye 26.36-46; Luk 22.39-46)*

³² Ata Yesu ta gula aŋga hay a wusam aa slam daha mezəley Gecemene. A lɔvtar: «Njam fede, yah na, ya daw la nga dərwa ɗaŋgay a Gazlavay.»

³³ Ta', a ŋgelta ata *Piyer, *Jak, leŋ *Jaŋ, a diyam bama. Daa ŋgene, mandərzay a kar a Yesu, mevel aŋga a tɔɗey, maja banay ma da sawa a ray a. ³⁴ Ta', a lɔvtar a gula aŋga hay maakar heyey: «Mewulkey fa da kəɗya vagay. Njam fede, ka da nam ba.» ³⁵ Ta', Yesu a ŋgəchey nekəɗey fa mey, a regedey a hwayak, a dɔrey ɗaŋgay a Gazlavay. Aa cəɗɗa Gazlavay amba da Gazlavay a tɔba na, banay masa aŋga ma da sɔra na, a wusfar ba. ³⁶ A ləvey: «Papay, Papay, cek hay cəpa ka gwa nga kata. Ləhɗaya daa banay a keɗe. Ta kəne he cəpa na, key anda kah ma wuɗey, ba na, anda yah ma wuɗey ba.» ³⁷ Ta', a vəhwa fa gula aŋga hay maakar heyey, a hɔtfatar manatakaya daa ɗar. A lɔvar a *Simanw Piyer: «Simanw, ka fa ney daw? Ka ta gwa nga zezəkey nekəɗey, kwa ler pal daa ba gway daw? ³⁸ Zazəkam, ka da nam ba, dɔram ɗaŋgay a Gazlavay nga jənkwar amba cek a batakwar nga key meɓerey ba. Mevel akwar a wuɗey nga key cek maaya, ama vaw akwar na, aŋga ta ɓele.»

³⁹ Ta', Yesu a ŋgəchey saya, a dɔrey ɗaŋgay a Gazlavay anda ŋgeeme heyey saya. ⁴⁰ Fa dɔba ha, a vəhwa fa gula aŋga hay maakar heyey saya, a hɔtfatar manatakaya cəŋga maja ɗar fa latar mey kalah. Masa Yesu ma hɔtfatar manatakaya na, a sləkɗam, a sərmara ata ma daa guzɓmar ŋgada Yesu ba.

⁴¹ Ta', Yesu a mbəkɗata, a daw nga dɔrey ɗaŋgay a Gazlavay nga dey maakar. Cay, a vəhwa fa gula aŋga hay

heyey, a ləvtar: «Haa wure keɗe akwar fa nam, fa məskam vaw cəŋga daw? Cay dəba. Pas a ta wuswa cay, amba a vəldamaya, yah, *Bəz ŋga Ndaw, a har ndəhay ta mebərey. ⁴² Lacam! Nəkmara, ndaw ma da vəldaya a har ndəhay ŋga kəɗey vagay fa sawa katay. Nakwa la, ta cadakwa ray.»

(*Matiye 26.47-56; Luk 22.47-53; Jan 18.3-12*)

⁴³ Masa Yesu faa guzley na, wure ŋgene, Juda, ndaw pal dasi gula anɗa hay kuraw a ray a cew heyey, fa sawa fa vəɗa. Juda ha a samawa na, ta ndəhay ga ta dələw * hay da cakay, ta zlanday hay da har. Ma slərdamatərwa ndəhay a na, ara bay-ray hay da ray ndəhay ma ka kwakwas, ta ndəhay maa sərkaɗa kwakwas ŋga Mawiz, leŋ mahura hay ŋga Jəwif hay. ⁴⁴ Juda, ndaw masa ma da vəlda Yesu a har ndəhay, ta wuswa fa Yesu daa ba araŋ na, aa guzlar a ndəhay a, a ləvtar: «Ndaw masa yah ma da car har anda mandala aɗaw fara fara na, ara anɗa. Kərzamara, handamara, jəɗmara maaya maaya.» ⁴⁵ Masa Juda ma wusey cay gweegwe a cakay Yesu na, a ŋgəchey fa vəɗa, a ləvar: «Bay aɗaw!» Ta', a car har anda aa ma ləvey heyey.

⁴⁶ Ndəhay ma samawa ta ata Juda heyey, ta', a kərzamara Yesu. ⁴⁷ Ama ndaw pal da wuzlah gula anɗa hay fetede, a məɗərwa dələw anɗa, a ŋgəma, cərah! a cərha sləmay ŋga məɗərlam ŋga ndaw mahura da ray ndəhay ma ka kwakwas. ⁴⁸ Ta', Yesu a ləvtar: «Ka samawa ŋga kərzamaya ta dələw, ta zlanday faa har faa har anda yah ndaw-mayal na, maja me? ⁴⁹ Mandaw mandaw yah da wuzlah akwar, ya faa sərkaɗata ndəhay daa *Way-mekey-kwakwas ŋga Gazlavay, ama ka ta kərzamaya daa ba. Cek hay a, a da kam wure keɗe na, amba a key anda ɗerewel ŋga Gazlavay zleezle ma ləvey da ray cek ma da key da ray aɗaw.»

⁵⁰ Fa dəba ha, gula anɗa hay cəpa a zluram, a mbəkdamara Yesu, a hwam.

⁵¹ Bəz-gula daha fa səpar wurzay ŋga Yesu. Anɗa fetede ta gwedeere masləlhakaya fa vaw. Ndəhay ma kərzamara Yesu heyey, a kərzamara bəz-gula ha may. ⁵² Ama, ta', a pərsley da har ata, a mbəkda gwedeere anɗa, a hway vaw ba' kəne.

Yesu fa mey ŋga ndəhay ma sla yawa ŋga Jəwif hay

(*Matiye 26.57-68; Luk 22.54, 55, 63-71; Jan 18.13, 14, 19-24*)

⁵³ Ndəhay ma kərzamara Yesu heyey, a handamara a way *ndaw mahura da ray ndəhay ma ka kwakwas ŋga Gazlavay. *Bay-ray hay ŋga ndəhay ma ka kwakwas ŋga

* **14:43** 14.43 dələw: maslalam **14:49** 14.49 Lk 19.47; 24.46 **14:50** 14.50-52
14.27

Gazlavay, ta mahura hay nga *Jøwif hay, len *ndøhay maa sèrkada kwakwas nga Mawiz ata makustakaya fetede.⁵⁴ *Piyer na, fa sèpa Yesu ta meedørenj e. A mbøzey a palahway nga ndaw mahura da ray ndøhay ma ka kwakwas heyey. Fetede, a njam ta ndøhay ma jøða way a, anja fa søtey awaw.

⁵⁵ Bay-ray hay nga ndøhay ma ka kwakwas nga Gazlavay ta ndøhay mahura hay mekele masa ma sla yawa nga Jøwif hay tabiya, ata na, a sèpam cek malamba masa Yesu ma ka amba a kamar sariya, a køðmara vagay. Ama ta høtam daa ba. ⁵⁶ Ndøhay ga a samawa nga mbørzley a ray Yesu. Ama ata na, taa guzlam mey letek daa ba. ⁵⁷ Da ray ngenene, ndøhay mekele da wuzlah ata, a sløkdødam ta meyey-mey, a mbørzlam, a løvam: ⁵⁸ «Ya cøndamara ndaw aha a løvey: “Ya bøzla *Way-mekey-kwakwas nga Gazlavay masa ndøhay ma lømamara kedde la, ya løma la mekele dør maakar masa kwa har nga ndaw fa da gøsfar nga lømey way a daa ba.”» † ⁵⁹ Ama kwa ta membørzley ata ha kedde na, aa guzlam mey wal wal cønga.

⁶⁰ Da ray ngenene, ndaw mahura da ray ndøhay ma ka kwakwas heyey a lecey fa mey nga ndøhay cøpa, ta', aa cøfða Yesu, a løvar: «Ka mbøðdatara a ndøhay maa guzlam da ray akah kedde ba gway daw?»

⁶¹ Ama Yesu manjakaya teete, kwa ta mbøðdatara daa ba. Da ray ngenene, ndaw mahura heyey aa cøfða Yesu saya, a løvar: «Kah na, *ndaw masa Gazlavay ma wala nga løhdata ndøhay heyey daw? Gazlavay masa ala ma hølmmamara na, kah na, Bøzey anja daw?»

⁶² Yesu a mbøðdara, a løvar: «Ahaw, ara yah. Akwar, ka da høtmaya, yah, *Bøz nga Ndaw, manjakaya ta har-zømay nga Bay Gazlavay Mawaca-waca. Asaya, ka høtmaya la, ya fa sawa daa mekwatene da vad.»

⁶³⁻⁶⁴ Maja ngenene, ndaw mahura heyey, njar! njar! a ngerða zana anja hay. Mevel a car ga maja Yesu ma løvar a sawa ta fa Bay Gazlavay. Ta', ndaw mahura ha, a løvta a ndøhay ma sla yawa makustakaya heyey: «Wure kedde, kwa ya søpkwa ndaw ngaa guzldakwar da ray a saba. Ta pa ray anja sem nga Gazlavay, akwar ta cøndamara la, ba diya? Wure kedde ka wulkam da ray a na, kwara?»

14:56 14.56 Ps 35.11 † **14:58** 14.58 Yesu a løvey fara fara na, «Bøzlmara Way-mekey-kwakwas nga Gazlavay kedde, dør maakar ya løma la aa slam a.» (Jan 2.19).Ta løvey masa ara anja ma da bøzla na, daa ba. Fara fara Yesu aa guzley da ray ray anja masa ata ma da køðmara vagay, nga dør maakar a, a sløkdødawa. **14:58** 14.58 15.29; Mt 26.61 **14:61** 14.61 Yesu taa guzley daa ba: Iz 53.7; Mk 15.3-5; Bøzey nga Gazlavay: 15.39 **14:62** 14.62 Dan 7.13; Mt 22.44; 24.30; Mk 13.26; Lk 21.27

Ndohay cəpa a ləvam anğa ta mebərey, si mekədey anğa vagay.

⁶⁵ Ndohay siya da wuzlah ata a cəram meesleḅ a ray Yesu a. A dəpmara dey anğa ta zana, a dəvmar mekədey, a ləvmar: «Səra ma kədə keḅe na, wa? Wuzdandara cey!» Fa dəba ha, ta', a vəldamara a har ndohay ma jədmara heyey, ndohay ma jədmara ha a vəlmar matapa-har.

Piyer a ləvey a səra Yesu ba

(Matiye 26.69-75; Luk 22.56-62; Jan 18.15-18, 25-27)

⁶⁶ *Piyer, anğa da palah-way nğa ndaw mahura ma ka sariya heyey, sabara dasi dəmay ma ka sləra da way ndaw mahura ha, a sawa, ⁶⁷ a hətar Piyer fa sətəy awaw. A sanjala Piyer heyey, a ləvar: «Kah may, gula nğa Yesu, ndaw *Nezeret keḅe, ba diya?»

⁶⁸ Ama Piyer a cada mey, a ləvey: «Kay! Ya səra cek masa kah ma wudey nğaa guzley ba!»

A daw fa mey-slam nğa way heyey. [Ta', gwagwalak a cey dəy.] ⁶⁹ Ta', sabara heyey, a hətar Piyer saya, a ləvtar a ndohay makustakaya fetede: «Ndaw keḅe anğa da wuzlah ndohay nğa Yesu a!»

⁷⁰ Ama Piyer a cada mey saya. Menjey nekədey, ndohay fetede heyey a ləvmar a Piyer saya: «Fara fara, kah ndaw da wuzlah ndohay nğa Yesu, maja kah na, ndaw *Galile.»

⁷¹ Da ray ngene, Piyer ta', a ləvtar: «Ya fa mbədey, fara fara, ya səra ndaw masa akwar maa guzlam da ray a keḅe ba səlak! Da ya mbərzley na, Gazlavay nğa mbədyə ray!»

⁷² Wure wure ngene, gwagwalak a cey dəy nğa dey cew. Piyer a sərfada mey masa Yesu ma ləvar zleezle heyey: «Wuskwaa gwagwalak a da cey dəy nğa dey cew na, ka ta ləvey cay dey maakar, ka sərya ba, ka sərya ba.» Masa Piyer ma sərfada mey a la na, pat! a bawa ta matəway.

15

A handamara Yesu fa mey nğa Bay Pilat

(Matiye 27.1, 2, 11-14; Luk 23.1-5; Jan 18.28-38)

¹ Pərek pərek, *bay-ray hay nğa ndohay ma ka kwakwas nğa Gazlavay, mahura hay nğa *Jəwif hay, *ndohay maa sərkada kwakwas nğa Mawiz, leḅ ndohay mahura hay mekele ma sla yawa nğa Jəwif hay, a kusam amba a slam yawa da ray Yesu. Fa dəba ha, a jəwmara Yesu, a handamara fa Pilat, bay fetede. ² Bay Pilat a, aa cəfda Yesu, a ləvar: «Kah na, bay nğa Jəwif hay fara daw?»

Yesu a mbəfdara, a ləvar: «Anda kah ma ləvey.»

³*Bay-ray hay nga ndəhay ma ka kwakwas nga Gazlavay heyey a dadəffamar mey hay mekele mekele a ray Yesu.

⁴ Da ray ɲgene, Pilat aa cəfda saya, a ləvar: «Ka mbəddatara a ndəhay maa guzlam da ray kah kefe ba gway daw? Ka fa cənda mey hay cəpa masa ata maa guzldamara da ray akah kefe, ba diya?»

⁵ Ama Yesu a mbəddara ba səlak. Anda kefe, Pilat a rəzley ga maja.

*A kamar sariya a Yesu ɲga kədey vagay
(Matiye 27.15-26; Luk 23.13-25; Jan 18.39-19.16)*

⁶ Fa mevey a, fa mevey a, ta gwagway ɲga *Pak na, Bay Pilat fa pəskey ndaw pal daa fərsəne. A pəskey na, ndaw masa ndəhay makustakaya maa cəfdafamara. ⁷ Yaw, ndaw daha mezəley Barabas. Anɲa daa fərsəne maja anɲa da wuzlah ndəhay masa ma namatar ray a ndəhay ma wa hwayak ba. Daa mekədey-vaw daha na, ata Barabas a ta kədam ndaw la vagay. ⁸ Ndəhay makustakaya ha a diyam aa ambaw Bay Pilat, ɲgaa cəfdamərwa amba a pəskatar ndaw pal daa fərsəne anda anɲa ma katara fa mevey a, fa mevey a. ⁹ Pilat a mbəddatara, a ləvtar: «Ka wudam na, ya pəskakwar bay ɲga *Jəwif hay daw?» ¹⁰ A ləvey anda kefe na, maja a səra *bay-ray hay nga ndəhay ma ka kwakwas nga Gazlavay heyey a handamərwa Yesu na, maja sələɲ fa katar da ray a. ¹¹ Ama bay-ray hay a, a həldamata ndəhay makustakaya heyey ɲgaa cəfdamara Bay Pilat amba a pəskatara Barabas jak.

¹² Pilat aa cəfdata saya, a ləvtar: «Ndaw masa akwar ma zəlmara “Bay ɲga Jəwif hay” na, ka wudam ya kada na, kwara?»

¹³ A wudam ta gədan, a ləvmar: «Dəra fa hwadam mazlanɲgalakaya! Dəra fa hwadam mazlanɲgalakaya!»

¹⁴ Pilat aa cəfdata, a ləvtar: «Cek maaya ba masa anɲa ma key na, wura?»

Ama a wudam ta gədan ta gədan saya, a ləvam: «Dəra fa hwadam mazlanɲgalakaya! Dəra fa hwadam mazlanɲgalakaya!»

¹⁵ Pilat a wudəy amba aa səmdata ndəhay makustakaya heyey. Anda kefe, ta', a pəskatara Barabas daa fərsəne. A ləvtar a sewje hay ɲga slədmara Yesu ta laway. Fa dəba ha, a vəldatara amba a dərmara fa hwadam mazlanɲgalakaya.

*Sewje hay aa sanɲəram a ray Yesu
(Matiye 27.27-31; Jan 19.2-3)*

¹⁶ Sewje hay a handamara Yesu a palah-way nga Bay Pilat. Ta', a zəlmətərwa sewje hay siya fetede tabiya. ¹⁷ A kəzlməz zana magaza nga bay hay fa vaw. A cam hatak, a padamar ray anda gursaw nga bay. ¹⁸ Ta', a camar har, a ləvməz: «Zay daw, bay nga *Jəwif hay?»

¹⁹ A kədməra ta zlanday a wuzlah-ray, a təfmar meesleb fa vaw. A ragadam fa mey anğa. ²⁰ Fa dəba ha, masa ata maa sanğəram cay a ray a na, a cəkwməra zana magaza heyey fa vaw, a kəzlməz zana anğa hay. Ta', a badaməra daa berney a, a handaməra nga dərey fa hwadam.

*A dərmarə Yesu fa hwadam mazlanğalakaya
(Matiye 27.32-44; Luk 23.26-43; Jan 19.17-27)*

²¹ Ndaw daa berney nga Siren daha, mezəley *Simənjw, anğa papənj nga ata Alekzandəre ta Rufus. A sawa da ley, anğa fa daw ta nğene. Masa sewje hay heyey, fa handaməra Yesu na, a təkmar dəy a Simənjw heyey nga la hwadam mazlanğalakaya nga Yesu a. ²² A handaməra Yesu aa slam mezəley ta mey ata Gwalgwata, anda meləvey, «slam anda tetesl nga ray nga ndaw.» ²³ A wudam nga vəlmar wuzam majahadəkaya ta slalak mezəley «*mir», ama Yesu a gəmey nga sa ba *. ²⁴ Ta', a dərmarə fa hwadam mazlanğalakaya. Fa dəba ha, a kədam caca nga wunkey zana anğa hay amba a sərməra kwa waawa a da hətəy na, zana wura.

²⁵ A dərmarə Yesu fa hwadam na, taa pərek, pas tədə mehəley maaca. ²⁶ Mey masa ata ma kədməra vagay maja ha na, mawuzlaləkaya fa hwadam, a ləvey: «Ara bay nga *Jəwif hay.» ²⁷ Daa slam masa ata ma dərmarə Yesu a na, ta dərəram mayal hay cew la a cakay a, pal ta har-zəmay, lanğar ta har-gula. [²⁸ Cek aha ta key la anda mawuzlaləkaya daa dərəwəl nga Gazlavay zleezle ma ləvey: «Ndəhay a da sləfməra a dey ndəhay malamba.»]

²⁹ Ndəhay ma diyam taa slam a nğene aa sanğəram a ray a, a wusam ray, a cədməra, a ləvməz: «Hey! Kah na, ndaw ma wudəy nga bəzla *Way-mekey-kwakwas nga Gazlavay amba ka ləma mekele daa dər maakar heyey, ba diya?

³⁰ Bərnğəwə fa hwadam a nğene a hwayak, ləhda ray akah dəba taw!»

³¹ Asaya, *bay-ray hay nga *ndəhay ma ka kwakwas nga Gazlavay ta *ndəhay maa sərkada *kwakwas nga Mawiz

15:17 15.17 Lk 23.11 **15:18** 15.18 Mt 27.11 **15:19** 15.19 14.65 **15:21**
15.21 Rm 16.13 * **15:23** 15.23 a gəmey nga sa ba: A vəlmar slalak a, a Yesu
na, amba a bəsa mecey nga mbəlek fa vaw anğa. A gəmey nga sa ba na, maja
a wudəy nga bəsa banay a. **15:24** 15.24 Ps 22.19 **15:26** 15.26 Mt 27.11
15:27 15.27 Iz 53.12 **15:29** 15.29 14.58 **15:29** 15.29-32 Ps 22.8; 109.25

aa sanjəram da ray a, a ləvam da wuzlah ata: «A ləhdata ndəhay siya hay na, kaa ray anja na, a gwa nja ləhda, ba daw? ³² Ndaw keđe, da anja ndaw masa Gazlavay ma wala nja key Bay nja *Israyel hay na, nja bərnjəgawa fa hwadam a wure keđe dəba taw. Da ya nəkakwa ta bərnjəgawa sem na, nje, ya təbkwa mey anja la.»

Ndəhay madərtakaya da cakay Yesu heyey na, a cədmara may.

Meməcey nja Yesu

(Matiye 27.45-56; Luk 23.44-49; Jan 19.28-30)

³³ Ta wuzlah-pas, ləvanj a key daa hwayak cəpa. Ləvanj a, a nje haa bərey maakar nja pas nja kəwad. ³⁴ Ta bərey maakar a na, Yesu a wudey ta gədanj, a ləvey ta mey ata: «*Elawi, Elawi, lema sabaktani?*» Anda meləvey: «Gazlavay adaw, Gazlavay adaw, ka mbəkdaya na, maja me?»

³⁵ Ndəhay siya fetede, a cəndamara mewudey nja Yesu a na, a ləvam: «Jəkam sləmay, anja fa zəla *Eli, *ndaw ma təla mey nja Gazlavay zleezle!»

³⁶ Ndaw pal da wuzlah ata, ta', a hway nja jəhwəbey cek anda gagəmay aa yam nja babəza nja wudez meekwerek e, ta', a pa fa mey nja zlanday. A təldara a Yesu a amba a sasəba. Ndaw a, a ləvey: «Səkwakwa, amba ya nəkakwa da wara cay Eli a, a sawa nja bərnjadərwa la kwa.»

³⁷ Ama Yesu a wudey ta gədanj, pam! a məcəy.

³⁸ Daa *Way nja Gazlavay na, zana ma gərca *Slam masa Gazlavay aa da hwad a daha. Masa Yesu ma məcəy la na, zana ha, a nje cew dəga da vad kasl a hwayak.

³⁹ Mahura nja sewje hay nja Rawma hay manjakaya fa mey nja Yesu, masa anja ma hətər Yesu ma məcəy meedey anja na, bay nja sewje hay a, aa guzley, a ləvey: «Fara fara ndaw keđe na, ara Bəzey nja Gazlavay.»

⁴⁰ Njusay fetede daha may, ata fa nəkam dey ta meedərenj e. Da wuzlah ata na, *Mari da Magdala, Salawme, lej Mari mamən nja ata Jawz ta *Jak, bəz-gula. ⁴¹ 0Njusay a ta pəkam la ta ata Yesu daa masa anja daa *Galile, ta kamar sləra la. Da cakay hwadam mezlenjeley Yesu a na, njusay ga mekele daha may. Njusay a na, ta diyam la ta Yesu a *Jeruzelem.

A jəhmara vagay nja Yesu

(Matiye 27.57-61; Luk 23.50-56; Jan 19.38-42)

⁴² Ta pas ηgene na, ara dar masa ndohay ma diyam vaw nga *pas memeskey-vaw. Ta pas ngaa kwad a ηgene, memeskey-vaw nga *Jawif hay a, a zley. ⁴³ Ndaw da slala Arimate daha, mezoley *Jawzef, annga, ndaw da wuzlah ndohay mahura ma sla yawa nga Jawif hay. Ndohay ga fa namar ray. Annga may, fa sekwa mewey nga Bay Gazlavay. Ndaw aha na, a kerza mevel, a daw fa Bay Pilat amba aa cefda nga volar coved nga la vagay nga Yesu amba a joha. ⁴⁴ Pilat a razley ga maja Yesu ta macey sem fiyaw fiyaw gway. Da ray ηgene, a zelərwa mahura nga sewje hay, aa cefda da Yesu a macey na, menjey ga kwa. ⁴⁵ Masa Pilat maa cefda mahura nga sewje hay heyey la na, ta', a volar coved a Jawzef nga la vagay a. ⁴⁶ Jawzef, ta', a həkkey zana maaya mabara. A berηgadərwa vagay a da ray hwadam mazlanjalakaya heyey a hwayak. Ta', a zlenga ta zana ha, a handa aa cəvay. Cəvay a, maavərkwakaya daa anɣwa anda bədam. Ta', a gədbalawa beeler mahura, gazl! a mey cəvay a. ⁴⁷ Ata *Mari da Magdala, ta Mari, mamaη nga Jawz heyey, ata fetede, fa nekam dey aa cəvay masa ata ma pamara vagay nga Yesu a hwaɗ a heyey.

16

*Yesu a sləkɗawa daa meməcey
(Matiye 28.1-8; Luk 24.1-12; Jan 20.1-10)*

¹ Fa dəba nga *pas memeskey-vaw na, *Mari da Magdala, Mari mamaη nga *Jak, leη Salawme, a həkam berdey hay ma zam maaya amba a diyam a wucmərwa fa vagay nga Yesu. ² Perek perek ta luma nga Gudal, masa pas fa bawa na, ηgusay a, a diyam a mey cəvay nga Yesu a. ³ Ata daa coved na, aa guzlam da wuzlah ata, a ləvam: «Ma da gədbalandakwara beeler mahura da mey cəvay a na, wa?» ⁴ A da nekam dey na, a hətmar beeler heyey, magədbalakaya ta cakay. ⁵ Masa ata fa mbəzam aa cəvay a na, a hətam gula manjakaya ta har-zəmay. Annga ta zana mahura mabara fa vaw. Anda keɗe, mandərzay a katar a ηgusay a. ⁶ Ama gula ha a ləvtar: «Ka zluram ba! Ka səpam na, Yesu, ndaw *Nezeret, masa ata ma dərmarə fa hwadam mazlanjalakaya heyey daw? Ta sləkɗawa sem daa meməcey, annga fede daa saba. Nəkmara slam masa ata ma pamara a hwaɗ a. ⁷ Wure keɗe na, diyam, ləvmatar ηgada ata *Piyer ta *gula hay nga Yesu mekele na, Yesu annga sem teesed a *Galile fa mey akwar. Ka da hətəfamar fetede anda aa ma ləvkwar.»

⁸ A bamawa, a hwam, a mbəkdamara cəvay a, ata faa wasam maja mandərzay fa katar, lenğesl ata ta mbədey sem. Ta kadamara kwa ηgada waawa daa ba, maja ata fa zluram ga.

*Yesu a wuztar vaw a gula anğa hay
(Matiye 28.9-10; Jan 20.11-18)*

[⁹ Pərek pərek ta pas luma ηga Gudal, Yesu a sləkdfawa daa meməcey. Masa ta sləkdfawa cay na, ηgeeme a wuzar vaw a *Mari da Magdala, ηgwas masa aa ma bəley malula maasala da ray a heyey. ¹⁰ Ta', ηgwas aha, a daw, a kadatara a ndəhay masa ma pəkam ta Yesu zleezle. A hətfatar ata daa matəway. ¹¹ Nğwas aha, a ləvtar: «Yesu aa ta dey! Yah ma hətər la.» Ama masa ata ma cəndamara mey masa ηgwas a ma kada na, a təbmara mey a ba.

(Luk 24.13-35)

¹² Fa dəba ha, Yesu a wuztar vaw ηgada gula anğa hay cew ma diyam ta daa cəved ma bawa da *Jeruzelem. A wuztar vaw a na, wal ta masa anğa ma wuzar vaw ηgada *Mari da Magdala heyey. ¹³ Gula hay a, a vəhmawa, a kadamatara a *gula hay ηga Yesu siya. Gula hay a, a təbmara mey ata ha ba saya na, gway.]

*Yesu a wuztar vaw a gula anğa hay kuraw a ray a letək
(Matiye 28.16-20; Luk 24.36-49; Jan 20.19-23; SNM 1.6-8)*

[¹⁴ Fa dəba ha, masa gula anğa hay kuraw a ray a letək fa zəmam daf na, Yesu a wuztar vaw. A mbədtar ray maja a təbmara mey da ray a ba, a ləvtar: «Ya ta sləkdfawa sem daa meməcey, ama ndəhay ma hətmaya ta dey ata na, ka təbmara mey ata ba na, kwara? Anda keđe, akwar na, ndəhay masa ray maηgərdakaya.» ¹⁵ Ta', a ləvtar saya: «Diyam aa hwayak hay cəpa, wuzdamatara *Mey-maaya-mawiya a ndəhay tabiya. ¹⁶ Ndaw ma təba mey a la, ta ma hətey *baptem la na, a ləhey la daa mebərey. Ama ndaw ma təba mey a daa ba na, sariya a kərza la. ¹⁷ Gazlavay a vəltar gədaη ηga key maazla hay la a ndəhay ma təbmara Mey-maaya-mawiya ha. Anda meləvey, a da bəlam malula da ray ndəhay ta mezəley adaw. A daa guzlam mey hay mekele mekele masa ata ma səmra ba. ¹⁸ Kwa a kərzam zezekw ta har, kwa a ləgwata ta slalak ma kədey ndaw vagay na, cek fa da katar daa ba. A da pam har a ray masa-macay hay. Anda keđe, masa-macay hay a, a mbəlam la.]]»

16:15 16.15-16 Mt 28.19 **16:16** 16.16 SNM 2.38 **16:17** 16.17 SNM 8.7; 16.17; mey hay: SNM 2.4; 10.46; 19.6; 1Kwr 14 **16:18** 16.18 zezekw: Lk 10.19; SNM 28.3-6; membəley: SNM 4.30; 5.16; 8.7; Jak 5.14-15

*Bay Gazlavay a la Yesu a vad'**(Luk 24.50-53; SNM 1.9-11)*

[¹⁹ Masa Bay Mahura Yesu ma kadatara cek hay la cəpa a gula anğa hay na, ta', Gazlavay a la a vad'. Fetede, anğa manjakaya ta har-zəmay nğa Gazlavay. ²⁰ Gula anğa hay, ta', a diyam aa wura aa wura cəpa, a wuzdamara *Mey-maaya-mawiya a ndəhay. Yesu, Bay Mahura, fa jənta daa sləra ata ha. Ndəhay a sərmara mey nğa *gula hay nğa Yesu ara mey fara fara na, maja anğa fa vəltar gədan nğa key maazla hay.]

Mey-maaya-mawiya masa

Luk ma wuzlala Mey da ray

Mey-maaya-mawiya masa Luk ma wuzlala

Luk na, ara dakwter. Ta lögda Pawl la kasl aa hwayak nga Rawm (Kwa 4.14; Flm 1.24; 2Tm 4.11). Ndəhay a wulkam anğa ndaw Jəwif ba, ama ndaw Gərek.

Luk ta wuzleley dərəwel cew la. A wuzleley na, *Mey-maaya-mawiya* leŋ *Sləra nga Ndəhay Meslərey*. A wuzlalata ngada ndaw mezəley Teyewfil amba a səra mey masa ndəhay nga Yesu maa sərkadamara na, ara mey fara fara (1.4). Kwa a wuzlala dərəwel e ngada Teyewfil na, ama ara ngada ndəhay masa Jəwif hay ba hay may.

Daa fasəlawal 1 ta 2 na, Luk aa guzley da ray mayawa nga Yesu ta masa anğa zariya. Ta wuzlalata mezəley nga ndəhay daa səkway nga Yesu la dəga fa Yesu a haa fa Adam. A wudfey nga wuzda Yesu na, ara ndaw ma ləhdata ndəhay daa səkway hay da bəla tabiya.

Daa dərəwel anğa na, Luk aa guzley da ray mekele mekele: A ləvey Gazlavay a wudfey ndəhay tabiya a ləham. A wuzleley ga da ray medərey-danğay. Ta wuzndakwar medərey-danğay nga Yesu la mekele mekele. A wuzleley ga da ray meesəmey da ray sləra masa Gazlavay ma ka. Luk ta wuzleley da ray ngusay mekele mekele masa daa Matiye leŋ Mark na, daa ba. A wuzda Yesu a wudfta ndəhay masa-viya hay. Ta wuzleley mey-menğey mekele mekele la da ray zleley. Yesu a wudfta ndəhay masa ta mebərey cənğa. A ka amba ndəhay a sərmara na, Gazlavay fa wudfta. Luk a wuzda dey ga Yesu na, ara «Bəz nga Ndaw». Yesu ara Bəzey nga Gazlavay, asaya, anğa ndaw-magədan. Luk taa guzley la ga da ray Mesəfney nga Gazlavay. Yesu ta key sləra la ta gədan nga Mesəfney nga Bay Gazlavay da ray a (4.14). A ləvtar a gula anğa hay nga njam daa berney nga Jeruzelem kasl pas masa Gazlavay ma da vəltar gədan ma sawa ta da vad (24.49).

Mey mahura daa dərəwel keđe na, ara mey ma ləvey: «Fara fara yah, Bəz nga Ndaw, ya sawa na, nga səpey ndəhay maazədtakaya ta nga ləhdata.» (19.10)

Daa dərəwel e keđe na, mey mekele mekele daha nga vəley gədan a ndəhay:

Walay nga Mari (1.46-55)

Mayawa nga Yesu (2.1-20)

Mey da ray mewudfey masa-gəra hay (6.27-31)

Mey da ray membəkey mebərey nga ndəhay (6.37-38)

Ma da sərey ndaw, anğa maaya na, ta fa sləra anğa (6.43-45)

Mey ngeeme

¹ Waa *Teyewfil,

Ndəhay ga ta kədam vaw la nga wuzleley da ray cek hay ma kam da wuzlah ala. ² A wuzlalam na, mey masa ala ma cəndamərwa fa ndəhay masa ma hətmərwa ta dey ata dəga nga mezley nga sləra nga *Yesu. Ndəhay a, ara ndəhay ma wuzdamara mey nga *Gazlavay. ³ Ya taa cədfey ndəhay la ta dək-vaw da ray cek hay tabiya ma key dəga nga mezley nga sləra nga Yesu a. Yah may, a mbafaya nga wuzlalatakawa cek hay a ngada kah Teyewfil, ndaw mahura. ⁴ Ya wuzlalakawa amba ka səra mey masa ata maa sərkadamakawa na, ara mey fara fara.

Maslan nga Gazlavay da vad a wuzda Elizabet a da key hwad

⁵ Daa masa *Herawt anğa bay daa hwayak nga *Jude na, *ndaw ma ka kwakwas nga Gazlavay daha mezəley *Zakari. Anğa da wuzlah ndəhay ma ka kwakwas nga Gazlavay masa ata ma zəlmata ndəhay nga Abiyah. Ngwas nga Zakari a, mezəley Elizabet, anğa səkway nga *Aranw, *ndaw mahura da ray ndəhay ma ka kwakwas nga Gazlavay zleezle. ⁶ Zakari a, ata cewete ta ngwas anğa, ndəhay maaya fa mey nga Gazlavay, fa təbmara *mewey nga Bay Gazlavay maaya maaya, asaya, fa namar ray a kwakwas nga Gazlavay ta cəved e. ⁷ Ama bəzey ata daa ba, maja Elizabet a yey ba. Ata cewete maraw hay.

⁸ Pas pal daha, Zakari fa key sləra ngada Gazlavay daa *Way-mekey-kwakwas nga Gazlavay maja sləra ha ta pas ngene a ray ata ta ndəhay nga Abiyah heyey. ⁹ Anğa fa key sləra fetedə maja ta kədam caca la amba a walamara anda kwakwas ata ma ləvey. Sləra anğa ha na, ara nga mbəzey aa *Slam masa Gazlavay aa da hwad a daa *Way nga Gazlavay amba aa wurey cek mezey maaya ngada Gazlavay. ¹⁰ Daa ngene, ndəhay tabiya makustakaya daa ambaw fa dəram danğay. ¹¹ Ta', *maslan nga Bay Gazlavay da vad a wuzar vaw a Zakari. A lecey ta har-zəmay da cakay slam-meewurey cek mezey maaya ngada Gazlavay

heyey. ¹² Masa Zakari ma hëtar na, lengeſl anġa a mbëdey, a zlurey. ¹³ Ama maslan ġga Gazlavay a, a lëvar: «Ka zlurey ba, Zakari, maja Bay Gazlavay ta cënda medërey-danġay akah la. Elizabet, ġgwas akah, a yaka bëzey mezële la, ka da zëla bëzey a, *Jan. ¹⁴ Kaa sëmey la ga. Ndëhay ga aa sëmam la fa mayawa anġa ha may, ¹⁵ maja a da key ndaw ma ka slëra mahura ġga Gazlavay. Fa da sey wuzam daa ba, kwa fa da sey cek mamëslkaya daa ba sëlak. *Mesëfney ġga Gazlavay a sawa la a ray a, dëga anġa da hwaď mamaha. ¹⁶ A da jënta ndëhay *Israyel hay ga amba a vëhmawa fa Bay Gazlavay ata. ¹⁷ A da daw fa mey ġga Bay Gazlavay ġga diyra cëved. Anġa ta gëdan lenj ta mesëfney ġga Gazlavay da ray a anda *Eli, *ndaw ma tëla mey ġga Gazlavay zleezle. A da cëmtar đay ġgada papanj hay ta bëz ata hay. A da tërdara ndëhay makëwtakaya ġga ndëhay ma wulkam maaya anda ndëhay ma kam cek ta cëved e. Anda keďe, a da điyta ndëhay ġga tëbey Bay Mahura ma da sawa.»

¹⁸ Ama Zakari aa cëfďa maslan ġga Gazlavay heyey, a lëvar: «Ya da sëra masa cek aha a key la fara fara na, fa me? Maja wure keďe na, yah maraw, ġgwas adaw may, madanġwas.» ¹⁹ Maslan ġga Gazlavay a, a mbëďdara, a lëvar: «Ara yah, Gabëriyel, yah masa ma lecey fa mey ġga Gazlavay ġga kar slëra. Ara anġa ma slërdiwa amba ya wuzdakawa mey maaya keďe. ²⁰ Mey adaw masa yah ma kadakawa keďe na, a key la fara fara ta pas masa Gazlavay ma wuďey anda yah ma lëvka, ama kah ta tëba daa ba. Da ray ġgene, wure keďe, ka da tërey madagazlam, ka fa da gwa ġgaa guzley daa ba, haa kasl cek aha ma key la.»

²¹ Daa masa Zakari a lawa daa Slam maaya daa *Way ġga Gazlavay heyey na, ndëhay makustakaya daa ambaw heyey fa sëkwmarra, a rëzlam maja ta njawa sem ga kalah daa slam aha. ²² Zakari a bawa aa ambaw, a gwa ġgaa guzltar saba. Da ray ġgene, ndëhay a, a sërmara Gazlavay ta wuzar cek la daa slam aha. A gwa aa guzley ba, aa guzltar na, si ta har gway.

²³ Masa Zakari ta ndëvda slëra anġa cay na, ta', a daw a way. ²⁴ Fa dëba ha, Elizabet, ġgwas anġa, a key hwaď. Kiya zlam aa manjakaya da way da way, a bəda hwaď a. Aa guzley daa ray anġa, a lëvey: ²⁵ «Nëka, cek masa Bay Gazlavay ma kayawa. A wuďey ġga bëlyawa hwaray daa dey adaw fa dey ġga ndëhay.»

Maslan nga Gazlavay da vad a wuzda mayawa nga Yesu
²⁶ Masa Elizabet aa ta hwad kiya maakwaw na, Gazlavay a slerwa maslan anga, Gabariyel, a *Nezeret daa hwayak nga *Galile, ²⁷ fa dam-sabara, kwakwa nga ndaw mezoley *Jawzef. Jawzef e na, ara səkway nga Bay *Davit zleezle. Mezoley nga sabara ha, *Mari. ²⁸ Maslan nga Gazlavay heyey kula! a mbəzey fa vəda, a car har, a ləvar: «Ya caka har, Mari. Bay Gazlavay a wudka kalah. Bay Gazlavay aa ta kah.» ²⁹ Mari ma cənda mey a na, mey a, a həbar ray. A wulkey daa ray anga, a ləvey: «Mecey-har a, kede na, a wufey nga ləvey na, kwara?» ³⁰ Ta', maslan nga Gazlavay a, a ləvar: «Ka da zlurey ba Mari, maja ara Gazlavay ma pəska mey. ³¹ Ka da key hwad, ka da yawa bəzey mezəle, ka da zəla bəzey a, Yesu. ³² A da key ndaw mahura, asaya, anga Bəzey nga Bay Gazlavay da vad. Bay Gazlavay a da tərda nga bay aa slam a nga Bay Davit, ndaw daa səkway anga zleezle. ³³ A da wa səkway nga *Israyel nga sərmataw. Bay anga fa da ndəvey daa ba səlak.» ³⁴ Mari aa guzlar a maslan nga Gazlavay heyey, a ləvar: «Cek aha, a da key na, kwara? Maja ya səra zel ba.» ³⁵ Maslan a, a mbəddara, a ləvar: «Mesəfney nga Bay Gazlavay da vad a sawa la a ray akah ta gədan anga, a bərdaka la anda meezed. Da ray ngene, bəzey a ma da yawa na, ara bəzey masa mapakaya wal ngada Gazlavay. Ndəhay a da zəlmara Bəzey nga Gazlavay. ³⁶ Nəka, Elizabet, səkway akah, kwa anga madanɡwas na, anga ta hwad wure kede may. A da yawa bəzey mezəle. Ndəhay a ləvam anga dərlay, ama wure kede aa ta hwad kiya maakwaw, ³⁷ maja cek masa ta banay fa Gazlavay na, daa ba.» ³⁸ Fa dəba ha, Mari a ləvar: «Yah ndaw ma ka sləra nga Bay Gazlavay. Cek aha nga key anda kah ma ləvey.» Ta', maslan nga Gazlavay a, a mbəkda, a daw.

Mari a daw fa Elizabet

³⁹ Daa dar a ngene, *Mari a sləkdey, a wusey vaw, a daw a slala daa anɡwa nga *Jude. ⁴⁰ A wusey a slala ha, kula! a mbəzey a way *Zakari, ta', a car har a Elizabet. ⁴¹ Daa masa Elizabet ma cənda mecey-har nga Mari na, bəzey da hwad Elizabet a, a wusey. Wure ngene, *Mesəfney nga Gazlavay a sawa a ray Elizabet. ⁴² Da ray ngene, aa guzley ta gədan, a ləvar a Mari: «Maaya nga Gazlavay aa da ray akah, a fəna da ray nɡusay siya tabiya. Asaya, maaya nga Gazlavay aa da ray bəzey masa kah ma da yarawa! ⁴³ Yah na, wa

may wa, amba mamaŋ ŋga Bay adaw Mahura a sawa a way adaw anda keŋe na! ⁴⁴ Ya sɛra kah mamaŋ ŋga Bay adaw Mahura na, maja, daa masa yah ma cɛnda ɔfay akah, kah ma caya har na, bɛzey da hwaɔ adaw a wusey ta meesɛmey. ⁴⁵ Maaya ŋga Gazlavay aa da ray akah, maja ka ta tɛba mey aŋga la da ray cek ma da key fara fara.»

Mari a hɛlma Bay Gazlavay

⁴⁶ Fa dɛba ha *Mari a lɛvey:

- «Ya fa hɛlma Bay Gazlavay ta mevel adaw cɛpa.
⁴⁷ Ya faa sɛmey maja Gazlavay, ndaw ma lɛhɔdaya,
⁴⁸ kwa yah, ndaw mahura fa mey ŋga ndɔhay ba na,
 aŋga fa nɛkfaya dey, yah, ndaw ma ka slɛra aŋga.
 Fara fara, dɛga wure keŋe, ndɔhay ma da yamawa tabiya,
 a daa guzlam da ray adaw, a lɛvam:
 “Maaya ŋga Gazlavay aa da ray aŋga”.
- ⁴⁹ A da lɛvam anda keŋe
 maja Bay Gazlavay Mawaca-waca, ta kaya cek maaya
 la.
 Aŋga na, Bay Gazlavay pal.
- ⁵⁰ A katar maaya la mandaw mandaw
 ŋgada ndɔhay ma namar ray.
- ⁵¹ Aa ta gɛɔaŋ ŋga key slɛra mahura,
 aa waɔatar ray ŋga ndɔhay ma zlapam.
- ⁵² A badata bay hay ma wamata ndɔhay ta gɛɔaŋ daa bay,
 a pata ndɔhay masa ma namar ray ŋga mahura.
- ⁵³ Ndɔhay masa may fa catar na, a rɛhɔdata ta cek mezɛmey,
 masa-zleley hay na, a vɛhɔdata ta har ba' kɛne.
- ⁵⁴ Ta jɛnndakwar la,
 alɛkwa ndɔhay *Israyel hay, ma ka slɛra aŋga hay,
 anda aa ma lɛvtar zleezle a papaŋ ŋga papa alɛkwa
 hay.
- ⁵⁵ A lɛvtar na, a da key maaya ŋgada *Abɛraham ta
 ŋgada ndɔhay ma yamawa daa sɛkway aŋga hay
 ŋga sɛrmataw.»
- ⁵⁶ Mari a nɛy da way Elizabet a key gweegwe kiya
 maakar. Fa dɛba ha, ta', a vɛhwa a way aŋga.

Mey da ray mayawa ŋga Jan-Baptis

⁵⁷ Kiya ŋga Elizabet ta wuswa cay ŋga yey. A yawa bɛzey mezɛle. ⁵⁸ Meseembew aŋga hay ta sɛkway aŋga hay ma cɛndamara masa Bay Gazlavay ta kar maaya la na, aa sɛmam ta ata Elizabet e.

⁵⁹ Masa bəzey a, ma key luma pal cay na, meseembew anğa hay ta səkway anğa hay heyey a samawa aa kwakwas nğa *mesley mandawal nğa bəzey a ta nğa pey mezəley. A wufam a pamar mezəley *Zakari, mezəley nğa papaha.

⁶⁰ Ama mamaha, a ləvtar: «Kəne ba, mezəley anğa na, *Jan.» ⁶¹ A mbəfdamara, a ləvmar: «Ka zəla anda keđe na, kwara? Ndaw mezəley daa səkway akwar anda keđe daa ba.» ⁶² Ta', aa cəfdamara Zakari, papaha, ta har, amba a sərmara a wufey nğa zəla bəzey a me. ⁶³ Zakari a, ta', aa cəfdəy hwadam kəslparah a nğa wuzleley mezəley a. A wuzlala: «Mezəley anğa, Jan.» Ndəhay tabiya a rəzlam fa mezəley a. ⁶⁴ Wure wure nğene, Zakari a zlar meeguzley dəba, anğa madagazlam saba. Ta', a həlma Gazlavay ta gədan. ⁶⁵ Meseembew anğa hay tabiya mandərzay a katar. Ndəhay daa anğwa daa hwayak nğa *Jude he tabiya, fa kadamara mey a. ⁶⁶ Ndəhay tabiya ma cəndamara mey a, a wulkam daa ray ata, a ləvam: «Bəzey a keđe na, a da tərey na, me?» A ləvam anda keđe maja maaya nğa Bay Gazlavay aa da ray a fara fara.

Zakari a wuzey mey da ray sləra maaya masa Gazlavay ma ka

⁶⁷ Fa dəba ha, *Mesəfney nğa Gazlavay a sawa a ray *Zakari, papən nğa bəzey heyey. A zlar nğa wuzey mey anda *ndaw ma təla mey nğa Gazlavay, a ləvey:

⁶⁸ «Həlmakwa Bay Gazlavay, Gazlavay aləkwa *Israyel hay, maja anğa ta jənta ndəhay anğa hay la, amba a ləhdata.

⁶⁹ Aa ta slərndakwar ndaw masa-gədan la, nğa ləhdandakwar daa mebərey.

Ndaw aha, anğa daa səkway nğa Bay Davit, ndaw ma ka sləra anğa zleezle.

⁷⁰ Bay Gazlavay taa guzlndakwar la dəga zleezle ta mey ndəhay ma təla mey anğa hay.

⁷¹ Ta ləvndakwar la, a da ləhdandakwar dasi har nğa masa-gəra aləkwa hay, leŋ dasi har nğa ndəhay

ma wufam nğa hətmandakwar fa dey ba.

⁷² A wuzdərwa mewufey-vaw anğa la, fa papən nğa papa aləkwa hay,

A sərfada *mejəwey-mey anğa la ta aləkwa.

⁷³ Daa mejəwey-mey a na, Gazlavay taa guzlar la a *Abəraham papən nğa papa aləkwa zleezle, a ləvar,

- 74 a ləhdandakwar la dasi har nga masa-gəra aləkwa hay,
 amba ya kakwa sləra ngada Gazlavay ta mandərzay ba,
- 75 amba ya tərkwə ndəhay maaya fa Gazlavay,
 ndəhay ma ka sləra ta cəved e,
 haa kasl fa meməcey aləkwa.
- 76 Bəz adaw, kah may,
 ka da tərey ndaw ma təla mey nga Bay Gazlavay da
 vad
 maja ka da daw fa mey nga Bay Gazlavay
 nga diyra cəved.
- 77 Ka da wuzdatara a ndəhay nga Gazlavay na,
 Gazlavay a, a da ləhdata
 maja a da mbəkdatara mebərey ata.
- 78 A da ləhdata na, maja anga na, maaya kalah,
 asaya, a sərey dey-ceceh kalah fa ndəhay.
 Fa slərndakwar mewedey da vad anda pas,
- 79 amba a wadatar dey a ndəhay
 ma njam daa ləvaŋ masa fa da məcəm,
 asaya, amba ya hətkwa nga njeý ta zazay.»
- 80 Bəzey a heyey, fa gəley, fa gəley, lengeşl fa səkwa. Fa
 dəba ha, a daw a wuzlah-ley, aa manjakaya fetede, kasl pas
 masa anga ma zlar nga wuzey mey nga Gazlavay fa mey
 nga ndəhay Israyel hay.

2

Mey da ray mayawa nga Yesu (Matiye 1.18-25)

1 Daa masa ata ma yamərwa *Jan-Baptis la na, Agustus,
 bay mahura da ray bay hay daa hwayak hay nga *Rawm, a
 ləvtar a mahura hay amba a sləfmata ndəhay daa hwayak
 anga hay tabiya. ² Ngene, ara mesləfey ndəhay ngeeme.
 Mesləfey ndəhay a ngene na, a key daa masa Kiriniyus fa
 wata ndəhay daa hwayak nga Siri. ³ Ndəhay tabiya a diyam
 nga sləfwa vaw a. Kwa waawa na, a daw aa hwayak anga,
 masa papaha ma yawa da hwad a.

⁴⁻⁵ *Jawzef may, a sləkdey da *Nezeret daa hwayak nga
 *Galile, a sləkdam ta kwakwa anga *Mari, a diyam a
 Betəlehem daa hwayak nga *Jude nga sləfwa vaw. A diyam
 a Betəlehem na, maja Bay *Davít zleezle a yawa da hwad
 a. Jawzef na, anga səkway nga Davít. Mari, kwakwa anga
 ha na, aa ta hwad. ⁶ Ata ma wusam la a Betəlehem na,

kiya nga Mari ta wuswa cay nga yey. ⁷ Mari a yawa bəzey mezəle, mahura anğa. Ta', a mbəza ta zana, a nada aa cek masa gənow hay ma zəmam cek da hwaɗ a maja daa way meney nga mələk hay na, slam nğada ata daa ba.

Maslan nga Bay Gazlavay a wuzdatara mayawa nga Yesu a mecəkwer hay

⁸ Daa hwayak a ngene, mecəkwer hay daha, manatakaya ta tavaɗ da ley. Fa jəɗam gənow ata hay. ⁹ *Maslan nga Bay Gazlavay da vad ta', a wuztar vaw. Mewedey nga Bay Gazlavay a sawa a ray ata. Mecəkwer hay a, a zloram ga, aa wasam pər-par! ¹⁰ Ama maslan a heyey, a ləvtar: «Ka zloram ba, maja ya sawa na, ya handakwar mey maaya masa ma da vəltar meesəmey ga a ndəhay tabiya. ¹¹ Dasi tavaɗ keɗe, da Betəlehem, slala masa Bay *Davit ma yawa zleezle da hwaɗ a, ndaw masa ma da ləhdata ndəhay ta yawa la maja akwar. Ara *Kəriste, Bay Mahura.

¹² Yaw, amba ya wuzdakwara cek nga sərey mey a fara fara, ka da hətfamar bəzey-gevew * mambəzkaya ta zana, manadakaya daa cek masa gənow hay ma zəmam cek da hwaɗ a.»

¹³ Wure wure ngene, maslan hay nga Gazlavay mekele a samawa ga, a tulakamara maslan nga Gazlavay heyey. A həlmamara Gazlavay ta walay. A ləvam:

¹⁴ «Anja ndəhay nga həlmamara Gazlavay da vad, asaya, anja Gazlavay nga vəltar zazay a ndəhay masa aa ma wudta da bəla.»

Mecəkwer hay a diyam a Betəlehem

¹⁵ Fa dəba ha, maslan hay nga Gazlavay heyey a vəham a vad. Ta', mecəkwer hay a, a slam yawa da wuzlah ata, a ləvam: «Bay Gazlavay ma wuzdandakwara cek keɗe na, nakwa la a Betəlehem, amba ya nəkakurwa cek masa ma key fetede.»

¹⁶ A sləkɗam, a diyam ta mewusey-vaw. A hətfamatar ata *Mari ta *Jawzef, leŋ bəzey-gevew manakaya daa cek masa gənow hay ma zəmam cek da hwaɗ a. ¹⁷ Ata ma hətfamatar la na, a kadamatara cek masa maslan nga Gazlavay ma wuzdatara da ray bəzey a heyey. ¹⁸ Ndəhay tabiya ma cəndamara mey masa mecəkwer hay a ma kadamatara na, a rəzlam. ¹⁹ Ama nga Mari na, a pa mey a, aa mevel anğa. Mandaw mandaw fa wulkey da ray a. ²⁰ Fa dəba ha, mecəkwer hay heyey a vəham fa gənow ata

2:11 2.11 Mt 20.30-32; Jan 4.42; SNM 5.31; 13.23; 2Pi 1.11 * **2:12** 2.12 bəzey-gevew: bəzey-ndedez **2:14** 2.14 Iz 57.19; Mt 10.13, 34; Mk 9.50; Lk 1.79; 10.5-6; 12.51; 19.38, 42; 24.36; Jan 4.27; SNM 10.36; Ef 2.14, 17 **2:19** 2.19 2.51

hay. A hēslmar ray a Gazlavay maja aa mahura da ray ndōhay. A hēlmamara da ray cek hay tabiya masa ata ma cōndamērwa, ta masa ata ma hōtmērwa fetede, maja cek hay tabiya ta kam la anda maslan ŋga Gazlavay ma wuzdatara heyey.

A pamar mezōley a Yesu

²¹ Fa dōba ha luma pal, dar ta wuswa cay ŋga sley mandawal ŋga bōzey a, ta pas ŋgene a pamar mezōley Yesu, mezōley masa maslan ŋga Gazlavay da vad ma wuzdara a mamaha daa masa ta key hwad daa ba aran.

²² Fa dōba ŋga *mesley mandawal ŋga bōzey a, pas ta wuswa cay amba *Jawzef ta *Mari † a kam kwakwas ŋga tōrey maaya fa Gazlavay anda kwakwas ŋga Mawiz ma lōvey maja mawuda. Da ray ŋgene, ata Jawzef ta Mari a diyam aa berney ŋga Jeruzelem. Asaya, a handamara bōzey ata ŋga wuzey a Bay Gazlavay, ²³ maja mawuzlalakaya daa *mewey ŋga Bay Gazlavay, a lōvey: «Bōza hay mezōle tabiya ma yamawa ŋgeeme na, ma pam wal ŋgada Bay Gazlavay.»

²⁴ A diyam amba a vōlam cek a Bay Gazlavay. A vōlam na, magwada-gwada hay cew, da daa ba, makurgwadakw hay cew, anda kwakwas ŋga Gazlavay ma lōvey.

Simeyanŋw a hōlma Bay Gazlavay maja Yesu

²⁵ Ndaw da *Jeruzelem e daha, mezōley Simeyanŋw. Ndaw aha, ara ndaw maaya, fa sōpa cōved ŋga Gazlavay ta mevel pal, aa fa sōkwa ndaw masa ma da sawa ŋga lōhdata *Israyel hay. *Mesōfney ŋga Gazlavay aa da ray a.

²⁶ Mesōfney a, ta lōvar la: «Ka da mōcey na, si ka hōtar *Kōriste, *ndaw masa Gazlavay ma wala ŋga lōhdata ndōhay la.» ²⁷ Fa dōba ha, Mesōfney ŋga Gazlavay heyey, a handa aa *Way-mekey-kwakwas ŋga Gazlavay. Ta pas ŋgene, ata *Jawzef ta *Mari ta handamara Yesu, bōzey ata heyey la, aa way a, amba a kam kwakwas da ray a anda *kwakwas ŋga Mawiz ma lōvey. ²⁸ Simeyanŋw a hōtar bōzey a, ta', a humbta a har, a kar suse a Gazlavay, a lōvey:

²⁹ «Wure kedē, Bay Gazlavay, mey masa kah ma lōvya na, ta key cay.

Anda kedē, ka gwa ŋga mbōkdaya,

2:21 2.21 1.31 † **2:22** 2.22 Jawzef ta Mari: Har-gōdan ŋga dērewel hay ta mey Gōrek a lōvey: «...pas ata ta wuswa cay ŋga tōrey maaya...». Dērewel hay mekele a lōvam: «...pas anŋga ta wuswa cay ŋga tōrey maaya...». Ndōhay a wulkam «ata» a wufey ŋga lōvey Jawzef ta Mari. Kwa kwakwas ŋga Mawiz aa guzley da ray ŋgwas daada gway na, ama ndōhay a wulkam Luk aa guzley da ray Jawzef may, maja Jawzef a ta gōsfar la fa Mari daa masa anŋga mawuda.

2:22 2.22-24 Lev 12; Mesl 18.15-16 **2:23** 2.23 Mab 13.2

yah, ndaw ma ka slëra akah, nga mëcey ta zazay.

³⁰ Maja yah, ta dey adaw,

ya ta hëtar ndaw ma da lëhdata ndëhay daa mebörey cay.

³¹ Ka wala ndaw aha na, ngada ndëhay tabiya.

³² Anğa anda slam-mewedey ngada ndëhay da bëla tabiya.

Ndëhay a da hëlmamata ndëhay akah hay Israyel,

maja ndaw aha kedë.»

³³ Ata papaŋ nga Yesu ta mamaha a rëzlam da ray mey masa Simeyanŋw maa guzley da ray bëzey a. ³⁴ Ta', Simeyanŋw a pëstar mey. Fa dëba ha, a lëvar a Mari, mamaŋ nga Yesu: «Gazlavay a wala bëzey kedë amba ndëhay Israyel ga a tëdam aa mebörey, siya hay may, a mbëkdamara mekey mebörey, a sëpmara Gazlavay ta cëved e. Anğa, ndaw ma wuzdatara a ndëhay ara Gazlavay ma wufey nga lëhdata ndëhay daa mebörey, ama ndëhay ga a da ngëldamara ba. ³⁵ A wuzdërwa mewulkey nga ndëhay ga mabadakaya la amba ndëhay tabiya a sëpmara. Kah, mamaha na, mevel akah a tërkesley la anda ndaw ma ngëmka ta dëlaw.»

An a kar suse a Gazlavay

³⁶ Daa *Way-mekey-kwakwas nga Gazlavay heyey, ngwas ma tëla mey nga Gazlavay daha, mezëley An. Anğa, dam nga Fanëwel, sëkway nga Aser. Aa madaŋgwas cay. Daa sabara anğa, a ley zel, a njam mevey maasala. ³⁷ Fa dëba nga zel e ma mëcey la, ngwas a, a njeý taava anğa, ngwas-vagay. Mevey anğa, kwakwar daanğafad a ray a mëfad. Aa daa Way-mekey-kwakwas nga Gazlavay a mandaw mandaw, fa kar slëra a Gazlavay taa vad, taa pas, fa key *daliyam, fa dërey danğay. ³⁸ Masa Simeyanŋw ma pëstar mey cay na, wure wure ngene, An a ngëchey a cakay ata, a kar suse a Gazlavay. Fa dëba ha, aa guzley da ray bëzey a ngada ndëhay tabiya da *Jeruzelem masa fa sëkwmarara amba Gazlavay a lëhdata.

³⁹ Masa ata *Jawzef ta *Mari ma ndëvdamërwa mekey kwakwas a tabiya cay anda kwakwas nga Bay Gazlavay ma lëvey na, a vëhmawa a slala ata, *Nezeret, da *Galile. ⁴⁰ Bëzey a, fa gëley, fa gëley, fa hëtey gëdan, lengesl fa sëkwa. Mepësey-mey nga Gazlavay aa da ray a.

Yesu anğa ta mevey kuraw a ray a cew

⁴¹ Fa mevey a, fa mevey a, ata *Jawzef, papaŋ nga Yesu, ta *Mari, mamaha a diyam a *Jeruzelem nga kawa gwagway

nga *Pak. ⁴² Masa Yesu, anğa ta mevey kuraw a ray a cew na, ta', a ngəlmara, a diyam bama aa gwagway a, anda kwakwas ata ma ləvey. ⁴³ Masa gwagway a daa saba na, a vəhmawa a way, ama Yesu, bəzey ata na, ta njawa sem fa dəba da Jeruzelem e. Ata papaha, ta mamaha, ta səmra daa ba. ⁴⁴ A wulkam na, Yesu aa daa cəved ta ndəhay siya ma diyam ta ata. A kam daa cəved dər pal, ta', a səmra da wuzlah səkway ata hay, ta da wuzlah jam ata hay. ⁴⁵ Ama ta hətmar daa ba. Da ray ngene, a vəham a Jeruzelem nga səpmərwa. ⁴⁶ Nga dər maakar a na, a hətfamar daa *Way-mekey-kwakwas nga Gazlavay. Anğa manjakaya da wuzlah *ndəhay maa sərkada *kwakwas nga Mawiz, anğa fa jəkfatar sləmay, faa cədfafatar mey. ⁴⁷ Ndəhay tabiya ma jəkfamar sləmay, a rəzlam maja lenğesl anğa, asaya, maja mey hay maaya masa anğa ma mbəddatara. ⁴⁸ Ata papaha ta mamaha ma hətmar la na, a rəzlam ga da ray a. Mamaha a ləvar: «Bəz adaw, ka kandar anda kefe na, maja me? Ala ta papakw fa səpmaka, mevel ala ta dəsley sem.» ⁴⁹ A mbəddatara, a ləvtar: «Ka səpmaya maja me? Si ya njeý daa way nga Papay na, ka səmra ba daw?» ⁵⁰ Ama a səmra mey a, a wudey nga ləvey kwara ba.

⁵¹ Ta', Yesu a samawa bama a slala *Nezeret heyey dəba. A cəntar mey. Ama mamaha na, fa wulkadata cek hay a kefe tabiya daa mevel anğa. ⁵² Yesu fa gəley, fa gəley. Lenğesl fa səkwa. Anğa maaya fa Gazlavay lenğ fa ndəhay.

3

Jan-Baptis a wuzey mey nga Gazlavay (Matiye 3.1-12; Mark 1.1-8; Jan 1.19-28)

¹ Masa *Jan-Baptis ma da zla sləra anğa na, Bay Tiber, ta key mevey kuraw a ray a zlam cay daa bay da ray bay hay daa hwayak hay nga *Rawm. *Pawns Pilat anğa bay daa hwayak nga *Jude. *Herawt, aa bay daa hwayak nga *Galile. Məlmaha *Fəlep, anğa bay da Iture ta da Tərakwanit. Lizanias aa bay daa hwayak nga Abilen. ² Ata Han ta Kayif, ata mahura hay da ray ndəhay ma ka kwakwas nga Gazlavay. Daa ngene, Jan-Baptis, bəzey nga *Zakari, aa da wuzlah-ley. Ta', Gazlavay a wuzdara mey anğa. ³ Da ray ngene, *Jan a, a pəkta slam hay tabiya masa gweegwe ta wayam nga Jurden. A wuztar mey nga Gazlavay a ndəhay, a ləvtar: «Mbəddamara menjeý akwar, səmra Gazlavay ta mevel pal, hətam *baptem, amba Gazlavay a mbəkdakwara mebərey akwar.» ⁴ Cek aha ta

key la anda *Izay, *ndaw ma tɔla mey nga Gazlavay zleezle, ma wuzlala daa derewel nga Gazlavay, a lɔvey:

«Ndaw fa wudey da wuzlah-ley, a lɔvey:

Diyamar cɔved ɲgada Bay Mahura,
diymara cɔved e maaya maaya dɔr e.

⁵ Pəshamata lapatam hay cəpa.

Rarakadamata aɲgwa hay, leɲ dɔɲgwalay hay cəpa.

Diymata cɔved hay magəjvadatakaya ɲga tɔram dɔr e,
sabalamata cɔved maaya ba hay.

⁶ Anda keɔe, ndəhay tabiya a hətmar Gazlavay la,
ndaw ma da ləhdandakwar daa mebərey.»

⁷ Daa masa ndəhay ga fa samawa fa Jan-Baptis, amba a katar baptem na, Jan-Baptis a, a lɔvtar: «Hey! akwar bəza hay ɲga kucesl hay! Ma lɔvkwar ka ləham la daa banay masa Gazlavay ma da handərwa a ray akwar na, wa? ⁸ Kam cek maaya, amba ndəhay a sərmara akwar ta mbəɔdamara menjey akwar sem, akwar fa səpmara Gazlavay ta mevel pal. Ka da wulkam daa mevel akwar, ka ləvam: “Papa aləkwa na, ara *Abəraham, maja ɲgene, Gazlavay a da sərfandakwar dey-ceceh.” Ka da ləvam kəne ba, maja ya fa lɔvkwar fara fara, Gazlavay a gwa ɲga tɔrdata aɲgwa hay keɔe ɲga səkway ɲga Abəraham may.

⁹ Wure keɔe, zlambda mangakaya cay ɲga ɲgəmey wudez hay ta slaslalay a cəpa. Kwa wudez wura wura ma yey babəza maaya ba na, a da ɲgəmamara, a pamar awaw fa vɔda.»

¹⁰ Ta', ndəhay makustakaya aa cəɔdamara, a ləvmar: «Kaa, ya da kam na, kwara?» ¹¹ A mbəɔdatara, a lɔvtar: «Ndaw masa zana aɲga hay cew daha na, ɲga vɔlar pal a ndaw masa zana aɲga daa ba. Asaya, ndaw masa cek mezəmey daha na, ɲga wunkamara ta ndəhay masa cek mezəmey daa ba.»

¹² Ndəhay ma cakala budaw a samawa ɲga key baptem may, aa cəɔdamara Jan, a ləvam: «Bay ala, kaa ala na, ya da kam kwara?» ¹³ A mbəɔdatara, a lɔvtar: «Ka daa cəɔdam dala ɲga budaw ma fəna masa ɲgwamna maa cəɔda ba.» ¹⁴ Sewje hay may, a samawa, aa cəɔdamara kəne, a ləvam: «Kaa, ala na, ya da kam kwara?» A mbəɔdatara, a lɔvtar: «Ka da tɔbam dala ɲga ndaw ta gɔdɔɲ ba. Ka daa dɔɔfamatar mey a ray ndəhay ba. Sasəmam da ray dala masa ata ma vɔdamakwara fa mawurɔay ɲga sləra akwar gway.»

¹⁵ Ndəhay na, fa səkwmarə cek maaya ma da key. Da ray ɲgene, kwa waawa da wuzlah ata fa wulkey daa ray aɲga, da Jan a na, ara *Kəriste, *ndaw masa Gazlavay ma wala ɲga ləhdata ndəhay heyey kwa. ¹⁶ Anda kefe, Jan a ləvtar a ndəhay tabiya: «Yah na, ya kakwar baptem ta yam daada gway, ama ndaw mekele ma fənya a sawa la. Kwa ya wusa ɲga pəska zewed ɲga tarak aɲga ba. Aɲga na, a da kakwar baptem ta *Mesəfney ɲga Gazlavay leɲ ta awaw. ¹⁷ Aɲga da gədak ta vəley mekəfey daw da har ɲga wunkey bəz-daw ta cekwesl e. Bəz-daw na, a da həla a wuded ɲga. Ama cekwesl e na, a da par awaw fa vəfa, awaw masa ma məcey ba ɲga sərmataw.»

¹⁸ Anda kefe, Jan a vəltar gədan a ndəhay ta mey hay mekele mekele saya, a wuztar *Mey-maaya-mawiya.

¹⁹ Ama Jan a mbəfar ray a Bay Herawt maja aa ma la Herawdiyat, ɲgwas ɲga məlmaha, ɲga ɲgwas aɲga, asaya, maja aa ma key cek hay mekele mekele maaya ba. ²⁰ Da ray ɲgene, Bay Herawt heyey a key cek maaya ba ma fəna saya, a kəzla Jan aa fərsəne.

Jan-Baptis a kar baptem a Yesu

(Matiye 3.1-12; Mark 1.1-8; Jan 1.19-28)

²¹ Masa *Jan-Baptis fa katar *baptem ɲgada ndəhay tabiya heyey na, Yesu a sawa amba a hətey baptem may. Ta', Jan-Baptis a kar baptem e. Fa dəba ha, Yesu a dərey danɲay. Masa aa fa dərey danɲay na, slam da vad bəfan! a wurey. ²² *Mesəfney ɲga Gazlavay a pawa salay a ray a, a nəkey anda makurgwadakw. Day a cənwa da vad, a ləvey: «Kah na, Bəzey adaw masa yah ma wudə kalah. Ya faa səmey ga da ray akah.»

Ndəhay daa səkway ɲga Yesu

(Matiye 1.1-17)

²³ Masa Yesu ma da zlar sləra aɲga na, aɲga ta mevey kwakwar maakar. Ndəhay a wulkam Yesu na, ara bəzey ɲga *Jawzef.

Jawzef na, bəzey ɲga Heley,

²⁴ Heley na, bəzey ɲga Matat,

Matat na, bəzey ɲga Levi,

Levi na, bəzey ɲga Melki,

Melki na, bəzey ɲga Janay,

Janay na, bəzey ɲga Jawzef,

²⁵ Jawzef na, bəzey ɲga Matatiyas,

Matatiyas na, bəzey ɲga Amus,

Amus na, bəzey nga Nahum,
 Nahum na, bəzey nga Esəli,
 Esəli na, bəzey nga Nagay,
²⁶ Nagay na, bəzey nga Mat,
 Mat na, bəzey nga Matatiyas,
 Matatiyas na, bəzey nga Semeyin,
 Semeyin na, bəzey nga Jawzek,
 Jawzek na, bəzey nga Jawda,
²⁷ Jawda na, bəzey nga Jəwanan,
 Jəwanan na, bəzey nga Reza,
 Reza na, bəzey nga Zarubaabel,
 Zarubaabel na, bəzey nga Salatiyel,
 Salatiyel na, bəzey nga Neri,
²⁸ Neri na, bəzey nga Melki,
 Melki na, bəzey nga Adi,
 Adi na, bəzey nga Kwazam,
 Kwazam na, bəzey nga Elmadam,
 Elmadam na, bəzey nga Er,
²⁹ Er na, bəzey nga Yesu,
 Yesu na, bəzey nga Eliyezer,
 Eliyezer na, bəzey nga Jəwarim,
 Jəwarim na, bəzey nga Matat,
 Matat na, bəzey nga Levi,
³⁰ *Levi na, bəzey nga Simeyan,
 Simeyan na, bəzey nga Juda,
 Juda na, bəzey nga Jawzef,
 Jawzef na, bəzey nga Jawnam,
 Jawnam na, bəzey nga Eliyakim,
³¹ Eliyakim na, bəzey nga Meleya,
 Meleya na, bəzey nga Mena,
 Mena na, bəzey nga Matata,
 Matata na, bəzey nga Natan,
 Natan na, bəzey nga Davit,
³² *Davit na, bəzey nga Jese,
 Jese na, bəzey nga Awbet,
 Awbet na, bəzey nga Bəwaz,
 Bəwaz na, bəzey nga Sala,
 Sala na, bəzey nga Naasan,
³³ Naasan na, bəzey nga Aminadap,
 Aminadap na, bəzey nga Adəmin,
 Adəmin na, bəzey nga Arni,
 Arni na, bəzey nga Esran,
 Esran na, bəzey nga Fares,

3:27 3.27 Salatiyel: 1Mev 3.17; Es 3.2

3:30 3.30-33 Rut 4.18-22; 1Mev 2.1-14

3:31 3.31 Natan: 2Sam 5.14

Fares na, bəzey nga Juda,
³⁴ Juda na, bəzey nga *Jakwap,
 Jakwap na, bəzey nga Izak,
 Izak na, bəzey nga Abəraham,
 Abəraham na, bəzey nga Tara,
 Tara na, bəzey nga Nahwar,
³⁵ Nahwar na, bəzey nga Seruk,
 Seruk na, bəzey nga Ragaw,
 Ragaw na, bəzey nga Pelek,
 Pelek na, bəzey nga Eber,
 Eber na, bəzey nga Sala,
³⁶ Sala na, bəzey nga Kaynam,
 Kaynam na, bəzey nga Arfazat,
 Arfazat na, bəzey nga Sem,
 Sem na, bəzey nga Nəwe,
 Nəwe na, bəzey nga Lemek,
³⁷ Lemek na, bəzey nga Matuzala,
 Matuzala na, bəzey nga Henakw,
 Henakw na, bəzey nga Jaret,
 Jaret na, bəzey nga Meleliyel,
 Meleliyel na, bəzey nga Kaynam,
³⁸ Kaynam na, bəzey nga Enaws,
 Enaws na, bəzey nga Set,
 Set na, bəzey nga Adam,
 Adam a na, bəzey nga Gazlavay.

4

*Bay-malula a wufey nga bata Yesu
 (Matiye 4.1-11; Mark 1.12, 13)*

¹ Fa dəba ha masa *Jan-Baptis ma kar *baptem la a Yesu na, Yesu a vəhwa daa wayam nga Jurdeŋ heyey. *Mesəfney nga Gazlavay aa da ray a, ta', a handa a wuzlah-ley.

² Aa manjakaya fetede dar kwakwar məfad. Bay-malula a sawa a cakay a, a jada nga bata amba a key cek maaya ba. Daa masa Yesu aa da wuzlah-ley a na, anga fa zəmey cek daa ba. Fa dəba ha, may a car dəba. ³ Ta', bay-malula heyey aa guzlar, a ləvar: «Da kah Bəzey nga Gazlavay na, tərda anɣwa kede nga daf taw!» ⁴ Yesu a mbəddara, a ləvar: «Mawuzlalakaya daa derewel nga Gazlavay, a ləvey: "Ndaw na, a njeɣ ta cek mezəmey daada ba."»

⁵ Fa dəba ha, bay-malula heyey a təpda aa slam magəlkaya a vad, wure nɣene ta', a wuzdara hwayak hay masa bay hay ma wamata da bəla cəpa. ⁶ Ta', a ləvar: «Ya

vøldakawa gødan nga wey da ray hwayak hay a kede, ta zley hay da hwað a cøpa. Maja cek hay a kede cøpa mavøldatakaya a har aðaw, ya gwa nga vøldata kwa ngada waawa masa yah ma wufey. ⁷ Anda kede, da kah ma regedey fa mey aðaw la na, cek hay a cøpa ya vøldatakawa la.» ⁸ Yesu a mbøðdara, a løvar: «Mawuzlalakaya daa ðerewel nga Gazlavay, a løyey: “Ka da ragadar na, si ngada Bay Gazlavay akah gway. Dørar dangay ngada Bay Gazlavay pal taava anga.”»

⁹ Asaya, bay-malula a handa aa berney nga *Jeruzelem, a tøpda aa ray nga *Way-mekey-kwakwas nga Gazlavay, ta', a løvar: «Da kah Bøzey nga Gazlavay na, jøvey daa ray nga way kede a hwayak, ¹⁰ maja mawuzlalakaya daa ðerewel nga Gazlavay, a løyey: “Gazlavay a løvtar la a maslan anga hay nga jøðmaka.” ¹¹ Mawuzlalakaya saya, a løyey: “A sløwmaka la a har ata amba salay akah a gurzey fa anywa ba.”» ¹² Yesu a mbøðdara, a løvar: «Mawuzlalakaya daa ðerewel nga Gazlavay, a løyey: “Ka da jada Bay Gazlavay akah ba.”» ¹³ Masa bay-malula ta høtey mey nga jada Yesu daa saba na, ta', a daw, a mbøkda nga pas mekele.

*Yesu a zlar sløra anga daa hwayak nga Galile
(Matiye 4.12-17; Mark 1.14, 15)*

¹⁴ Yesu a vøhwa aa hwayak nga *Galile, ta gødan nga *Mesøfney nga Gazlavay da ray a. Daa hwayak a cøpa, ndøhay a zlamar ngaa guzley da ray a. ¹⁵ Yesu fa wuzey mey nga Gazlavay daa way-mewuzey-mey hay nga Gazlavay. Ndøhay tabiya faa hømdamara.

*Ndøhay da Nezeret a røsmara Yesu
(Matiye 13.53-58; Mark 6.1-6)*

¹⁶ Ta', Yesu a daw a *Nezeret, slala masa aa ma gøley da hwað a. Ta *pas memøskøy-vaw, a mbøzey aa *way-mewuzey-mey nga Gazlavay anda aa ma daw maamandaw. A lecey, a daw fa mey nga ndøhay amba a jøngøy ðerewel nga Gazlavay. ¹⁷ Ta', a vølmar ðerewel mapaðakaya, masa *Izay, *ndaw ma tøla mey nga Gazlavay, ma wuzlala zleezle. A pøska ðerewel e, a høtfey slam mawuzlalakaya ma løyey:

¹⁸ «Mesøfney nga Bay Gazlavay aa da ray aðaw,
Bay Gazlavay ta walaya la amba ya wuzdatara
*Mey-maaya-mawiya ngada masa-viya hay.

A slørdiwa
amba ya løvtar a ndøhay majøwtakaya

dasi har nga bay-malula na,
Gazlavay ta pëskata sem.

A slërdiwa nga wurey dey nga wulaf hay,
nga ləhey ndəhay dasi har nga masa-gəra ata hay.

¹⁹ A slërdiwa amba ya ləvtar dar masa Bay Gazlavay
ma da wuzdərwa maaya anğa a ray ndəhay na,
ta wuswa cay.»

²⁰ Fa dəba ha, pad! pad! a pada dərrewel e heyey,
ta', a vəldara a ndaw ma ka sləra daa way a. A njeý fa
mey ata nga wuzey mey a. Ndəhay cəpa daa way a, fa
nəkmara. ²¹ Yesu a zlar ngaa guzltar dəba, a ləvey: «Mey
mawuzlalakaya masa tasana akwar ma cəndamara kede na,
mey a ta key cay wure kede ngada akwar.»

²² Ndəhay cəpa a ləvam da wuzlah ata: «Mey masa
aləkwa ma cəndakwa fa Yesu kede na, maaya.» A rəzlam
da ray mey anğa hay maaya masa anğa maa guzldata, ta',
a ləvam: «Haya, ara na, bəzey nga *Jawzef, ba diya?»

²³ Da ray ngeney, Yesu a ləvtar: «Fara fara ka daa guzlam
mey-menğey da ray adaw, ka ləvam: “Ndaw ma səra ray
nga slalak, mbəlda ray akah!” Anda meləvey ka da ləvam:
“Ala ma cəndamara sləra akah hay masa kah ma kata da
Kapernayum la cəpa. Yaw, ka kəne da slala akah fedə
may.”»

²⁴ Ta', Yesu aa guzltar saya, a ləvey: «Ya fa ləvkwar fara
fara, kwa ndaw ma təla mey nga Gazlavay wura wura na,
fa təbmara maaya maaya daa hwayak masa aa ma yawa
da hwad a na, daa ba. ²⁵ Wulkam da ray *Eli, ndaw ma
təla mey nga Gazlavay zleezle. Daa masa anğa da bəla
na, mevey maakar ta kiya maakwaw, var ta pawə daa ba.
May mahura ta key la daa hwayak nga *Israyel cəpa. Ya fa
ləvkwar fara fara, daa ngeney, ngwas-vagay hay ga daha
daa hwayak a, ²⁶ ama Gazlavay ta slərda Eli fa ngwas-
vagay hay daa hwayak nga Israyel nga jənta daa ba səlak.
A slərda na, si fa ngwas-vagay masa *Jəwif ba ma njeý da
slala Sarəpta daa hwayak nga Sidanw. ²⁷ Asaya, wulkam
da ray Elize, ndaw ma təla mey nga Gazlavay zleezle. Daa
masa anğa da bəla na, maasəkula hay ga daa hwayak nga
Israyel daha, ama kwa ta pərey ndaw pal dasi ata nga
mbəley daa maasəkula ha daa ba. A pərey na, si Naaman,
ndaw Siri gway.»

4:18 4.18 1.35; 3.16, 22; 4.1, 14; 10.21; 24.49; Mt 1.18, 20; 3.11, 16; 4.1; 12.18,
28, 31-32; 28.19; Mk 1.8, 10, 12; 3.29; SNM 1.2, 5, 8; 2.4, 17, 18 **4:18** 4.18-19
Iz 61.1-2; Mt 11.5; Lk 7.22 **4:18** 4.18-21 1.68 **4:19** 4.19 Lev 25.10 **4:22**
4.22 Jan 6.42 **4:24** 4.24 Jan 4.44 **4:25** 4.25 1Bay 17.1, 8-16 **4:27** 4.27
2Bay 5.1-14

²⁸ Masa ndəhay daa way-mewuzey-mey nga Gazlavay heyey ma cəndamara mey a na, ata tabiya, mevel a catar ga da ray Yesu. ²⁹ Ta', a lacam, a daɗamara, a badamara da wuzlah-way. A handamara aa mey-zelen, amba a təvdamara ngada hwayak. ³⁰ Ama Yesu pat! a bey la da wuzlah ata, ndal! madaw anɗa.

*Yesu a bəley malula da ray ndaw
(Mark 1.21-28)*

³¹ Fa dəba ha, Yesu a daw a Kapernayum daa hwayak nga *Galile. Fetede faa sərkadata ndəhay daa *way-mewuzey-mey nga Gazlavay ta *pas meməskey-vaw. ³² Ndəhay a, a rəzlam da ray meesərkedey anɗa ha, maja aa guzley na, ta gədaŋ masa Gazlavay ma vəldara. ³³ Daa way-mewuzey-mey a nɗene, ndaw daha, aa ta malula da ray. A zlar mewudey ta gədaŋ, a ləvey: ³⁴ «Haya, Yesu, ndaw *Nezeret, walay akah ta ala malula hay me? Ka sawa nɗaa zəɗdandar daw? Ya sərə fara fara, kah na, ndaw nga Gazlavay, masa aa ma slərdərwa nɗa key slərə anɗa.» ³⁵ Yesu aa bəcar a malula da ray ndaw aha, a ləvar: «Njey teete. Bey da ray ndaw keɗe.» Malula da ray ndaw a heyey dac! a təɗda ndaw a, a hwayak fa mey nga ndəhay tabiya, a bey da ray ndaw aha, kwa ta kar cek daa ba. ³⁶ Ndəhay cəpa fetede heyey a rəzlam, aa guzlam da wuzlah ata, a ləvam: «Haya! mey keɗe na, ara səkway nɗa mey wura, masa ndaw aha a təktaɗ ɗay a malula hay nɗa bam da ray ndəhay keɗe na!» ³⁷ Da ray nɗene, sləmay nɗa Yesu fa zəley kwa daa wura daa wura cəpa daa hwayak a.

*Yesu a mbəley masa-macay hay ga
(Matiye 8.14-17; Mark 1.29-34)*

³⁸ Yesu a bey daa *way-mewuzey-mey nga Gazlavay, a daw a way *Simanɗw. Maman nɗa nɗwas nɗa Simanɗw a, vaw fa car, awaw fa vaw ga. Da ray nɗene, aa cəɗamara Yesu nɗa mbəlda. ³⁹ A daw a gəbey a ray a, ta', aa bəcey amba macay a, a mbəkda nɗwas aha. Macay a, mbak! a mbəkda, awaw fa vaw heyey daa saba. Wure nɗene, nɗwas aha pərta! a lecey, ta', a vəltar cek mezəmey.

⁴⁰ Fa dəba ha pas ma kəzley la na, ndəhay tabiya da slala ha masa ndəhay ta macay hay da way ata hay daha, kwa macay hay wura wura, a handamatərwa fa Yesu. A patar har pal pal tabiya a ray, a mbəldata. ⁴¹ Malula hay ga a bam da ray masa-macay hay a, a wudam, a ləvam: «Kah Bəzey nɗa Gazlavay.» Ama Yesu aa bəctar a malula hay a, a təkta nɗaa guzley maja a sərmara anɗa *Kəriste.

*Yesu a wuzey mey daa hwayak nga Jude
(Mark 1.35-39)*

⁴² Slam ma wurey la na, Yesu a bey da wuzlah-way, a daw aa slam masa ndəhay da hwaɗ a daa ba. Ndəhay ga fa səpmara, ta', a hətmar. Masa ata ma hətmar la na, a wuɗam amba Yesu a njeɗ ta ata, a mbəkdata ba. ⁴³ Ama Yesu a ləvtar: «Si ya daw a slala hay mekele may nga wuzey *Mey-maaya-mawiya da ray mewey nga Bay Gazlavay da ray ndəhay, maja Bay Gazlavay a slərɗiwa na, nga key sləra ha kəne.» ⁴⁴ Ta', Yesu a daw a pəkta slala hay a, a wuzey mey nga Gazlavay daa way-mewuzey-mey hay nga Gazlavay mekele mekele daa hwayak nga *Jude.

5

Yesu a zəley ndəhay maakar ngeeme nga key gula anga hay

(Matiye 4.18-22; Mark 1.16-20)

¹ Pas lanɗar daha, Yesu, anɗa da mey dəhwa nga Genezeret. Ndəhay ga makustakaya, fa njanjərdam vaw ngada cakay a, maja a wuɗam a cəndamara mey nga Gazlavay. ² Kwambiwal hay cew daha da mey dəhwa ha. Ndəhay ma kərza ewet, ata da hwaɗ a daa saba, fa pərmata *tabaw ata hay. Yesu a hətatar kwambiwal hay a. ³ Ta', a təpeɗ aa kwambiwal nga ndaw mezəley *Simanɗw. Aa cəɗɗa Simanɗw ha nga ngəchada kwambiwal a nekəɗey ngada wuzlah yam. Masa Simanɗw ma ngəchada kwambiwal a la na, Yesu ta', a njeɗ ta njeɗ a hwaɗ a, fa wuzdatara mey nga Gazlavay a ndəhay da mey dəhwa ha.

⁴ Fa dəba ha masa anɗa ma wuzdatara mey nga Gazlavay la na, a ləvar a Simanɗw: «Ŋgəchada kwambiwal akah aa slam masa yam da hwaɗ a selesen. Fetefe, akwar ta mandala akah hay, kəzlamata tabaw akwar hay aa yam a, ka hətam ewet la.» ⁵ Simanɗw a mbəɗɗara, a ləvar: «Bay ala, tavaɗ tavaɗ keɗe, ala ta gəram la daa ewet e, ama kwa ya ta hətam daa ba səlak. Yaw, da ara kah ma ləɗya na, ya kəzlamata tabaw hay a, aa yam a cəɗɗa.»

⁶ Ta', a kəzlamata tabaw ata hay aa yam, wure nɗene, a kərzamawa ewet ga daa yam a. Tabaw hay a, a zlamar nga ngərey maja ewet ga kalah. ⁷ Anda keɗe, a gəvcamatərwa mandala ata hay daa kwambiwal mekele nga jənmata. Mandala ata hay a, a samawa, a rəhdamata kwambiwal hay cewete ta ewet, haa kwambiwal hay a, a wuɗam nga ndəkwaɗ asi yam. ⁸⁻⁹ Ata Simanɗw *Piyer ta mandala anɗa hay tabiya, mandərzay a katar maja ewet ga masa ata ma

kərzamara ha. Masa Simanjw aha ma hətər maazla keđe na, a regedey fa mey n̄ga Yesu, a ləvar: «Bay Mahura, maaya na, ya n̄gəchey la da cakay akah, maja yah na, ndaw ta mebərey.» ¹⁰ Ata *Jak ta *Jan, bəza hay n̄ga Zebede, ma kam sləra bama ta ata Simanjw, mandərzay a katar may. Da ray n̄gene, Yesu a ləvar a Simanjw: «Ka zlurey ba, dəga tasana ka da zəlwa ndəhay aa cəved n̄ga Bay Gazlavay anda kah ma kərzey ewet keđe.» ¹¹ Ta', a n̄gəchadamata kwambiwal ata hay a rav-zazay, mbak! a mbəkdamata cek ata hay tabiya, a diyam asi Yesu.

*Yesu a pərey ndaw daa maasəkula
(Matiye 8.1-4; Mark 1.40-45)*

¹² Fa dəba ha, Yesu aa da slala langar daha. Ndaw daha maasəkula fa vaw zlap zlap. Ndaw aha a hətər Yesu na, ta', a daw a regedey fa mey n̄ga. A kar ambahw, a ləvar: «Bay adaw, da ka wufey na, ka gwa n̄ga pərya daa maasəkula adaw keđe.» ¹³ Yesu tal! a təlda har n̄ga, a gəsfar, a ləvar: «Ya wufey amba maasəkula akah a pərey. Tərey ndaw mapərkaya dəba!» Wure wure n̄gene, maasəkula fa ndaw aha daa saba. ¹⁴ Ta', Yesu a kəta, a ləvar: «Ka da wuzda cek masa yah ma kakawa keđe kwa a ndaw ba. Ama daw fa *ndaw ma ka kwakwas n̄ga Gazlavay, amba a nəkaka. Fa dəba ha, vəlar cek a Gazlavay anda *kwakwas n̄ga Mawiz ma ləvey, n̄ga wuzey a ndəhay, maasəkula fa vaw akah daa saba.» ¹⁵ Ama ndəhay na, fa kadamara mey da ray Yesu ta gədan ta gədan cəngga. Da ray n̄gene, ndəhay ga a samawa fa vəda, a kusam, amba a jəkam sləmay fa mey masa aa maa guzley, asaya, amba a mbəldata masa-macay hay. ¹⁶ Kwa ndəhay fa samawa ga na, Yesu a n̄jey da cakay ata mandaw mandaw ba, ama a bey la da wuzlah ata, a daw aa slam masa ndəhay da hwad a daa ba, amba a dərey dan̄gay a Gazlavay.

*Yesu a mbəley ndaw maahəlbakaya
(Matiye 9.1-8; Mark 2.1-12)*

¹⁷ Pas pal daha, Yesu faa sərkadata ndəhay. *Fariza hay ta *ndəhay maa sərkada kwakwas n̄ga Mawiz manjatakaya fetede may. A samawa da slala hay mekele mekele da *Galile ta da *Jude, leŋ daa berney n̄ga *Jeruzelem. Bay Gazlavay a vəlar gədan a Yesu n̄ga mbəldata masa-macay hay. ¹⁸ Ndəhay daha, a samawa, a handamawa ndaw maahəlbakaya manakaya da ray bebele. A səpam cəved

amba a mbəzdamara aa way masa Yesu aa da hwađ a, amba a pamara fa mey anğa, ¹⁹ ama a hətam cəved ba maja ndəhay ga kalah. Anda keđe, a təpam aa ray nğa way a, a wuram slam daa ray nğa way a, a təldamara ndaw maahəlbakaya kaa heyey da ray bebele anğa ha ta laza, a wuzlah ndəhay makustakaya ga fa mey nğa Yesu daa way a. ²⁰ Masa Yesu ma nəka ndəhay a, fa təbmara anğa ta gədan nğa mbəlda ndaw ata na, ta', a ləvar a ndaw maahəlbakaya heyey: «Jam adaw, ya fa ləvka mebərey da ray akah daa saba.»

²¹ Ndəhay maa sərkada kwakwas nğa Mawiz ta Fariza hay heyey a cəndamara mey keđe na, a wulkam daa ray ata, a ləvam: «Ara səkway nğa ndaw wura ma pa ray anğa nğa Gazlavay keđe, na! Ma gwa ma mbəkda mebərey nğa ndaw na, wa? Si Gazlavay pal taava anğa ma gwa ma mbəkda mebərey nğa ndaw, ba diya?» ²² Ama Yesu ta səra mewulkey ata sem, aa cəfdəta, a ləvtar: «Ka wulkam anda keđe, maja me? ²³ Ya gwa ya ləvar: “Mebərey akah daa saba”, da daa ba, ya gwa ya ləvar: “Sləkdey, daw ta salay akah.” Dasi mey hay cewete keđe na, masa ta banay nğa ləvey nğada yah na, wura? * ²⁴ Yaw, ya wudey amba ka sərmara yah, *Bəz nğa Ndaw, yah ta gədan nğa mbəkey mebərey nğa ndəhay da bəla.» Anda keđe, Yesu ta', a ləvar a ndaw maahəlbakaya heyey: «Ehe, ya fa ləvka: “Sləkdey, la bebele akah, daw a way.”»

²⁵ Wure wure nğene, ndaw aha a sləkdey, a lecey fa dey ata tabiya, a la bebele anğa heyey, ta', a daw a way ta mehəlmey Gazlavay. ²⁶ Ndəhay tabiya fetede a rəzlam. A həlmamara Gazlavay ta meney ray. A ləvam: «Cek masa nğa menjey aləkwa, ya ta hətkwa daa ba na, ya ta hətkwar la tasana dəba.»

*Yesu a zəla Levi nğa səpa
(Matiye 9.9-13; Mark 2.13-17)*

²⁷ Fa dəba ha masa Yesu ma ka maazla keđe la, a bawa daa way a, a daw, a da nəkey dey na, a ray *ndaw ma cakala budaw mezəley *Levi. Anğa manjakaya fa key sləra daa slam mecekeley budaw. Ta', Yesu aa guzlar, a ləvar: «Sawa, səpya.» ²⁸ Da ray nğene, Levi a, pərta! a sləkdey, a mbəkdata cek anğa hay tabiya, a daw asiya.

5:20 5.20 7.48; Mt 9.2 * **5:23** 5.23 Yesu a wudey nğa ləvey anğa ta gəra nğa ləvey: «Sləkdey, daw ta salay akah», maja a gwamara nğa hətmar cek masa aa ma da ka fara fara. Ama da a ləvey: «Mebərey akah daa saba» na, ta gəra nğa ləvey ba, maja a gwamara nğa hətmar cek aha fara fara ba. **5:24** 5.24 Jan 5.36 **5:28** 5.28 Mt 8.21-22

29 Fa dɔba ha nekɔfey, Levi a kar gwagway mahura ngada Yesu da way anɔa. Ndɔhay ma cakala budaw ta ndɔhay mekele makustakaya ga fetede, a zɔmamara daf nɔa gwagway a bama. 30 *Fariza hay ta *ndɔhay maa sɔrkada kwakwas nɔa Mawiz da wuzlah ata, aa nɔguram mey, a lɔvmatar a *gula hay nɔa Yesu: «Ka zɔmam daf ta ndɔhay ma cakala budaw lej ta ndɔhay ma zlɔba kwakwas nɔa Mawiz na, kwara?» 31 Yesu a mbɔddatara, a lɔvtar: «Ndɔhay masa ata wurwer na, mey ata ta ndaw ma vɔlda slalak daa ba. Ama ma wufey mey nɔa ndaw ma vɔlda slalak na, si ndɔhay masa-macay hay gway. 32 Yaw, ndɔhay ma wulkam ata ndɔhay maaya fa mey nɔa Gazlavay na, Gazlavay ta slɔrdiwa nɔa zɔlta daa ba, ama a slɔrdiwa na, nɔa zɔley ndɔhay masa ta mebɔrey amba a mbɔddamara menjey ata, a sɔpmara Gazlavay ta mevel pal.»

Mey da ray mekey daliyam
(Matiye 9.14-17; Mark 2.18-22)

33 *Fariza hay heyey a lɔvmar a Yesu: «Gula hay nɔa *Jan-Baptis ta pas lanɔar fa kam *daliyam, fa dɔram dangay, asaya, gula ala hay fa kamara kɔne may. Ama gula akah hay na, a zɔmam cek, a sam cek mandaw mandaw na, maja me?» 34 Yesu a mbɔddatara ta mey-menɔgey, a lɔvey: «Da ndaw a zɔlwa ndɔhay aa mekey mɔlak nɔa kwakwa nɔa zɔmey cek na, ndɔhay a, a gwamara a kam daliyam daa masa zel-kwakwa ha aa da cakay ata daw? A kam daliyam ba sɔlak. 35 Ama pas a, a sawa la, masa ata ma da kɔrzamara zel-kwakwa ha. Daa nɔgene dɔba na, a kam daliyam la.»

36 Fa dɔba ha Yesu a nɔgatara mey a saya ta zana, a lɔvey: «Kwa ndaw ma nɔɔrey zana mawiya nɔa dɔpey zana magurma na, daa ba. Da a ka kɔne na, ta nɔsa zana mawiya sem, zana ha fa da cɔmam ta magurma daa ba. 37 Asaya, ndaw a gwa nɔa zlɔrey wuzam meededek e aa kwene-kwene † magurma ba. Da a zlɔra a hwaɗ a na, wuzam a, a mɔsley, a nɔɔra kwene-kwene he la. Wuzam a, a mbɔfey la, asaya, kwene-kwene he a nɔsey la. 38 Si ka zlɔra wuzam meededek e aa kwene-kwene mawiya. 39 Da ndaw fa sey wuzam mamɔslkaya na, a wufey nɔa sey meededek e saba, maja a wulkey wuzam mamɔslkaya na, a fɔna meededek e.»

5:29 5.29 Mt 9.10 5:32 5.32 19.10 5:33 5.33 Mt 6.16-17; 11.18-19; Lk 7.33-34 5:34 5.34 Mt 9.15 † 5:37 5.37 kwene-kwene: Ara cek anda des (gwajakwad) ama makakaya ta ambal.

6

*Yesu, anɔa bay ma wey da ray pas meməskey-vaw
(Matiye 12.1-8; Mark 2.23-28)*

¹ Ta *pas meməskey-vaw daha, ata Yesu ta gula anɔa hay a diyam taa ley nɔa cek anda daw *. Gula anɔa hay heyey a hɔbam cek aha, a babɔmara, aa mbɔdɔmara. ² Maja nɔgene, ndɔhay da wuzlah *Fariza hay a lɔvmatar: «Akwar fa kam cek matəkakaya daa *kwakwas nɔa Mawiz ta pas meməskey-vaw na, maja me?» ³ Yesu a mbɔdɔdara, a lɔvtar: «Akwar ta janɔamara daa derewel nɔa Gazlavay cek masa *Davit ma ka zleezle na, daa ba daw? Ta pas lanɔar daha, ata Davit ta ndɔhay anɔa hay, may fa catar, ama cek mezɔmey fa ata daa ba. ⁴ Maja nɔgene Davit e a mbɔzey aa way nɔa Gazlavay, a tɔbwa peɔ masa mavɔldakaya nɔgada Gazlavay, ta' a zɔmey, asaya, a vɔltar a ndɔhay anɔa hay may. Ama, peɔ e na, kwakwas nɔa Mawiz a vɔley cɔved a ndɔhay tabiya nɔa zɔmamara ba, si ndɔhay ma ka kwakwas nɔa Gazlavay gway.» ⁵ Yesu aa guzltar saya, a lɔvtar: «Ma wey da ray pas meməskey-vaw na, ara yah, *Bɔz nɔa Ndaw.»

*Yesu a diyra har mamɔckaya nɔa ndaw ta pas meməskey-vaw
(Matiye 12.9-14; Mark 3.1-6)*

⁶ Ta *pas meməskey-vaw daha saya, Yesu a daw aa *way-mewuzey-mey nɔa Gazlavay. Ta', aa sɔrkadata ndɔhay daa way a. Ndaw daha fetede, har-zɔmay mamɔckaya. ⁷ *Ndɔhay maa sɔrkada kwakwas nɔa Mawiz ta *Fariza hay, ata fetede may. Fa jɔdɔmara Yesu da a da mbɔley ndaw ta pas meməskey-vaw kwa. A jɔdɔmara anda kede na, amba a hɔtam meɔ nɔa kɔrza Yesu. ⁸ Ama Yesu a sɔra mewulkey ata. Da ray nɔgene, aa guzlar a ndaw masa har mamɔckaya heyey, a lɔvar: «Slɔkɔey, leceɔ fa meɔ nɔa ndɔhay tabiya.» Ndaw aha, ta', a slɔkɔey, a leceɔ. ⁹ Fa dɔba ha, Yesu aa guzltar a ndɔhay ma jɔdɔmara heyey, a lɔvtar: «Yaw, ya wudɔey yaa cɔfdakwar, kwakwas alɔkwa a lɔvey na, kwara? Ta pas meməskey-vaw na, alɔkwa ta cɔved nɔa key maaya a ndaw daw, da daa ba, nɔa key maaya ba daw? Alɔkwa ta cɔved nɔa lɔhey ndaw daa memɔceɔ daw, da daa ba, nɔa mbɔkey ndaw nɔa mɔceɔ daw?» ¹⁰ Ta', Yesu a nɔkta tabiya pal pal dɔgay, fa dɔba ha, aa guzlar a ndaw heyey, a lɔvar: «Tɔldɔrwa har a.» Tal! a tɔldara har a. Har a, ta', a diyey aa slam a. ¹¹ Ama Fariza hay ta ndɔhay maa sɔrkada

* **6:1** 6.1 cek anda daw: Ta meɔ Pɔlta na, mezɔley «alkamaari», ta meɔ Nasara «le blé». **6:1** 6.1 Mew 23.25 **6:2** 6.2 Mab 20.8-10 **6:3** 6.3-4 1Sam 21.2-7; Lev 24.5-9 **6:6** 6.6-11 Mk 2.27-28

kwakwas nga Mawiz heyey na, mevel a catar ga. A zllamar mesley yawa da wuzlah ata, a ləvam: «Ya da kadakwa ndaw Yesu kaa na, kwara?»

Yesu a weley ndəhay meslərey anğa hay kuraw a ray a cew

(Matiye 10.1-4; Mark 3.13-19)

¹² Daa dar hay a nğene, Yesu a daw a anğwa nga dərwa danğay. Fetede tavad tavad anğa fa dərey danğay a Gazlavay. ¹³ Masa slam ma wurey cay na, ta', a zelta gula anğa hay a cakay a. A weley ndəhay kuraw a ray a cew da wuzlah ata, a pata nga ndəhay anğa hay meslərey. ¹⁴ A pey nga ndəhay meslərey a na, *Simanɔw, ndaw masa aa ma par mezəley *Piyer heyey, ta məlmaha *Andəre, *Jak, *Jan, *Fəlep, *Bartelemey, ¹⁵ *Matiye, *Tuma, Jak bəzey nga Alfe, Simanɔw, ndaw da wuzlah ndəhay ma wudam nga ləhdamata ndəhay ata hay dasi har nga masa-gəra ata hay, ¹⁶ Jud bəzey nga Jak, ta Juda Iskariyawt ndaw ma volda Yesu a har masa-gəra anğa hay.

Yesu a mbəley masa-macay hay

(Matiye 4.23-25)

¹⁷ Fa dəba ha, Yesu a pawa salay daa anğwa ta ndəhay anğa hay meslərey. A lacam aa papalah aa slam masa ndəhay anğa hay siya hay ga da hwad a. Ndəhay mekele ga fetede daha a samawa daa hwayak nga *Jude. Kwa daa berney nga *Jeruzelem ta samawa la may. Asaya, ndəhay siya a samawa daa berney nga Tir ta nga Sidanɔw, berney hay masa da mey-bəlay. ¹⁸ Ndəhay a nğene a samawa nga cəney mey nga Yesu, asaya, a samawa amba Yesu a mbəldata daa macay ata hay. Da wuzlah ndəhay a nğene na, ndəhay ta malula da ray daha fa səram banay. Yesu ta', a bəta malula da ray ndəhay a. ¹⁹ Ndəhay tabiya a səpam cəved nga gəsey fa Yesu maja gədan daa vaw anğa fa bawa nga mbəldata ndəhay tabiya.

Mey da ray maaya nga Gazlavay ta banay ma da sawa a ray ndəhay

(Matiye 5.1-12)

²⁰ Masa Yesu ma mbəldata masa-macay hay cay na, a mbədey dey nğada fa ndəhay anğa hay, a ləvtar:

«Akwar masa-viya hay,

maaya nga Gazlavay aa da ray akwar

maja Bay Gazlavay fa wey da ray akwar fara fara.

²¹ Akwar masa may fa cakwar wure kefe,

maaya nga Gazlavay aa da ray akwar
maja Gazlavay a røhdakwar la.

Akwar masa fa tøwam wure kefe,
maaya nga Gazlavay aa da ray akwar
maja kaa sanjøram la.

22 «Da ndøhay fa røsmakwar,
fa mbødmakwar døba,
fa cødmakwar, asaya,
faa guzlam mey hay maaya ba a ray akwar,
maja akwar gula adaw hay, yah, *Bøz nga Ndaw na,
maaya nga Gazlavay aa da ray akwar.

23 Da masa ndøhay a fa kamakwar anda kefe na,
sasømam, jøvam ta meemølkey
maja Gazlavay a pølkwara mawurøy akwar la
maaya maaya da gazlavay da vad.

Papañ nga papa ata hay a sørdamata banay
ta ndøhay ma tøla mey nga Gazlavay zleezle na, køne.

24 Ama akwar masa-zleley hay na,
banay a sawa la a ray akwar
maja akwar ta zømamara wiya akwar cay wure kefe.

25 Akwar masa ma røham sem wure kefe,
banay a sawa la a ray akwar,
maja may a cakwar la.

Akwar masa faa sanjøram wure kefe,
ka da njam daa banay, ka tøwam la.

26 «Akwar masa ndøhay faa hømdamakwar wure kefe,
banay a sawa la a ray akwar.

Ara anda kefe papañ nga papa ata hay zleezle
maa hømdamata ndøhay ma tøla mey ta membørzley.»

Mey da ray mewudfey masa-gøra hay
(Matiye 5.38-48; 7.12a)

27 Yesu a løvtar saya: «Wure kefe ya fa løvkwat, akwar
ndøhay masa ma jøkam slømay fa mey adaw: Wudmata
masa-gøra akwar hay, kamatar maaya a ndøhay masa ma
ngøldamakwar ba, 28 pøsmatar mey a ndøhay masa ma
nøsmakwar, døram danjay maja ndøhay ma sørdamakwar
banay. 29 Da ndaw a kødka a cakay baazlam na, mbøddara
cakay langar saya. Da ndaw a lakawa dawura akah na,
mbøkda nga la, vøldara døy-kece saya. 30 Kwa waawa
maa cødfafaka cek na, vølar. Da ndaw ta ley cek la fa kah

6:21 6.21 CWJ 7.16-17; Jer 31.25; Ps 126.5; Iz 61.3 6:22 6.22 Mt 5.11; Jan
16.2; SNM 5.41; 1Pi 4.14 6:23 6.23 Mt 5.12 6:24 6.24 Mt 19.23-24; Jak 5.1
6:25 6.25 1Kwr 4.8 6:26 6.26 Jak 4.4; Jer 5.31 6:29 6.29 Rm 12.17; 1Kwr
6.7

na, ka daa cɔfda hɔz-hez † ba. ³¹ Wure kedɛ, kamatar cek maaya a ndɔhay, anda akwar ma wudɔam ŋga kamakwara maaya kɔne may.

³² «Da ka wudɔam ndɔhay ma wudɔmakwar daada gway na, ka wulkam Gazlavay a kakwar maaya la maja daw? Maja kwa ndɔhay masa ta meɔɔrey na, fa wudɔmata ndɔhay masa ma wudɔmata kɔne. ³³ Da ka kam cek maaya ŋgada ndɔhay masa ma kamakwar maaya gway na, ka wulkam Gazlavay a kakwar maaya la maja daw? Maja kwa ndɔhay masa ta meɔɔrey na, fa kamara kɔne may. ³⁴ Yaw, da ka vɔlam cek hay a ndɔhay masa ka wulkam wara a vɔhdamakwara gway na, Gazlavay a vɔlkwat cek maaya la maja daw? Maja kwa ndɔhay masa ta meɔɔrey na, fa vɔlmatar cek hay a ndɔhay masa wara a vɔhdamatara kɔne. ³⁵ Ama akwar na, wudɔmata masa-gɔra akwar hay, kamatar maaya, vɔlmatar cek a ndɔhay masa ma gwamara ŋga vɔhdamakwara ba. Da akwar fa kamara anda kedɛ na, Bay Gazlavay da vad a pɔlkwara mawurbay akwar la ga, a tɔrdakwar la ŋga bɔz aŋga hay, maja aŋga na, fa sɔrey dey-ceceh fa ndɔhay masa ma kam suse ba, len fa ndɔhay malamba hay. ³⁶ Kam maaya a ndɔhay anda Papa alɔkwa Bay Gazlavay ma key maaya a ndɔhay.»

*Mey da ray membɔkey meɔɔrey ŋga ndɔhay
(Matiye 7.1-5)*

³⁷ Yesu aa guzɔtar saya, a lɔvtar: «Ka da wulkam daa mevel akwar, ka lɔvam, “Anja manan ŋgaa zɔɔɔey maja meɔɔrey aŋga na” kɔne ba, maja Bay Gazlavay a daa zɔɔɔakwar maja meɔɔrey akwar kɔne may. Ka da mbɔɔɔmatar ray a ndɔhay ba, anda kedɛ Bay Gazlavay a mbɔɔɔkwat ray daa ba may. Mbɔɔɔdamatara meɔɔrey ŋga ndɔhay, Gazlavay a mbɔɔɔɔkwara meɔɔrey akwar la kɔne may. ³⁸ Vɔlam cek a ndɔhay, Gazlavay a vɔlkwat la kɔne. A da kwiykwat ga aa gabal akwar mahura, a rɔɔɔkwara, aa jɔkɔkwara haa a rɔheɔ, siya mbak. Bay Gazlavay a da wakwara cek ta darɔm masa akwar ma wamatara a ndɔhay mekele may.»

³⁹ Fa dɔɔba ha, Yesu aa guzɔtar ta meɔ-mɔnɔgeɔ saya, a lɔvtar: «Ndaw-wulaf a gwa ŋga dɔɔɔa ndaw-wulaf cɔla daw? Da ndaw-wulaf a dɔɔɔa wulaf cɔla na, ata cewete a tɔɔɔam la aa vɔgeɔɔ. ⁴⁰ Yaw, ndaw maa sɔrkey na, a sɔra cek a fɔna ndaw maa sɔrkada ba. Ama da ndaw a taa sɔrkey la

† **6:30** 6.30 hɔz-hez: ŋgɔz-ŋgeɔ ta meɔ Zɔdem **6:35** 6.35 vɔley cek: Lev 25.35-36 **6:37** 6.37 Mt 6.14-15; Mk 11.25-26 **6:38** 6.38 Mk 4.24 **6:39** 6.39 Mt 15.14

maaya maaya na, anġa anda ndaw maa sərkada ha gway.»

⁴¹ Ta', Yesu a nġey mey mekele saya, a lövey: «Ka nəkey dey fa guzer daa dey nġa məlmakw, ama hwadam mahura masa daa dey akah na, ka wulkey da ray a ba na, kwara? ⁴² Ka gwa nġa lövar nġada məlmakw, "Məlma adaw, dġagay ya lakawa guzer daa dey akah la". Anja kah na, hwadam mahura daa dey akah daha, ama ka hətər ba na, kwara? Kah, ndaw masa ta neneh cew! La hwadam daa dey akah la dġagay, amba ka hətər dey nġəf-nġəf nġa ley guzer daa dey nġa məlmakw.»

Mey-menġey ta wudez meyey babəza maaya ta maaya ba (Matiye 7.16-20; 12.33-35)

⁴³ Yesu a lövtar saya: «Fara fara, wudez masa maaya na, a yey babəza maaya ba na, daa ba. Yaw, wudez masa fa betey ta betey na, a yey babəza maaya na, daa ba may. ⁴⁴ Kwa wudez wura wura a da sərey na, fa babəza ha. Anda keġe, ka gwa nġa nġəley səkeġ fa manjaraf ba. Ka gwa nġa nġəley gudav fa bəz-tak ba. ⁴⁵ Ndaw maaya na, fa wuzdərwa cek masa maaya daa mevel anġa maaya. Ndaw malamba may, fa wuzdərwa cek maaya ba daa mevel anġa maaya ba. Fara fara, mey masa ndaw maa guzlda na, fa wuzdərwa cek masa mabadakaya daa mevel anġa.»

Mey-menġey ta way hay cew (Matiye 7.24-27)

⁴⁶ Yesu a lövtar: «Ka zəlmaya "Bay Mahura, Bay Mahura" ama ka kamara cek anda yah ma lövkwar ba na, maja me? ⁴⁷ Wure keġe amba ya wuzdakwara kwa waawa ma sawa fa yah, ma jəkey sləmay fa mey adaw, ma ka cek anda mey a la na, ⁴⁸ ya wa ndaw aha ta ndaw ma wudey nġa lömey way, ma zləġa salay nġa way a maaya maaya kasl fa pərad. A pa salay a, a ray a. Pas masa var ta pawa la, wayam a lawa, a zləra way a, ama a gwa nġa bəzla ba maja salay nġa way a mapakaya maaya da ray pərad. ⁴⁹ Ama ndaw ma cənda mey adaw, ma ka cek anda mey a daa ba na, ya wa ta ndaw ma pey salay nġa way manjar nġa zləġey. Pas masa var ta pawa la, wayam a lawa, a zləra way a, way a kərep! a bəzley cəpa.»

7

Yesu a mbəlda madərlam nġa mahura nġa sewje hay (Matiye 8.5-13)

¹ Masa Yesu ma wuzdatara mey anğa cay tabiya a ndəhay na, ta', a daw a Kapernayum. ² Fetede, ndaw Rawma daha, anğa mahura nğa sewje hay temere. Ndaw a nğene, a wudfa madərlam anğa daha kalah. Ama madərlam a, vaw fa car ga, fa da məcey. ³ Masa ndaw a ma cənda mey da ray Yesu na, ta', a slərey ndəhay mahura hay nğa *Jəwif hay da slala ha nğene fa Yesu nğaa cəfdamərwa nğa sawa amba a mbəlda madərlam anğa ha. ⁴⁻⁵ Ndəhay mahura hay a, a wusam fa Yesu, a kamar ambahw, a ləvmar: «Maaya na, ka jəna mahura nğa sewje hay a. Ara ndaw maaya nğa jəney, maja a wudndakwar aləkwa Jəwif hay kalah, ara anğa ma ləmdakwara *way-mewuzey-mey nğa Gazlavay fede.»

⁶ Masa Yesu ma cənda mey a la na, ta', a diyam bama. A wusam gweegwe ta way nğa mahura nğa sewje hay heyey na, mahura nğa sewje hay a, a slərey jam anğa hay fa Yesu nğa ləvmar: «Mahura nğa sewje hay a ləvey: "Bay adaw, ka da gərwa vaw nğa sawa saba, maja ya wusa amba ka mbəzey a way adaw ba. ⁷ Maja nğene, ya nəka na, ya wusa nğa wusey fa mey akah ba. Ama, da ka ta ləvey mey pal la na, madərlam adaw a mbəley la. ⁸ Ya ləvka anda kefe maja yah na, sewje hay mahura da ray adaw daha, asaya, yah mahura da ray sewje hay mekele may. Da ya ləvar nğada sewje lanğar "daw", a daw. Da ya ləvar nğada ndaw lanğar "sawa", a sawa. Da ya ləvar nğada beke adaw "ka sləra kefe", a ka.»

⁹ Masa Yesu ma cənda mey a kefe la na, a mbafar ara mey ba. A mbəfey dey fa dəba nğada fa ndəhay ma diyam asiya, a ləvtar: «Ya fa ləvkwar, fara fara kwa ya ta hətey ndaw ma paya nğa ndaw anğa fara fara anda ndaw kefe daa ba səlak, kwa da wuzlah səkway adaw hay *Israyel hay, ya ta hətey daa ba.»

¹⁰ Ndəhay masa mahura nğa sewje hay ma slərdata heyey na, a vəhmawa a way, a hətfamar madərlam a, vaw fa car daa saba.

Yesu a sləkɗadərwa bəzey nğa nğwas-vagay daa meməcey

¹¹ Fa dəba ha, Yesu a diyam ta gula anğa hay leŋ ta ndəhay mekele mekele ga a slala Nayiŋ. ¹² Masa gweegwe fa da mbəzam a slala ha na, a cam ray ta ndəhay fa lamawa vagay nğa bəzey nğadaa cəvay. Ara bəzey nğa nğwas-vagay daha. Bəzey anğa ha pal nğene. Ndəhay ga da slala ha fa diyam asi vagay a. ¹³ Masa Bay Mahura ma hətar nğwas aha na, a kar dey-ceceh, a ləvar: «Dəka mevel, ka təway ba!» ¹⁴ Anğa ma ləvar la anda kefe na, ta', a

ngöchey, a gösfar har fa bebele masa vagay da ray a heyey. Ta', ndöhay ma lamara vagay kaa, a lacam. Yesu aa guzlar a vagay a, a lëvar: «Bëz-gula, ya fa lëvka: "Slëkdey!"»¹⁵ Vagay kaa, ta', a slëkdey, a njeý ta njeý, a zlar meeguzley. Yesu a lëvar a mamaha: «Ehe, bëzey akah!»¹⁶ Ndöhay tabiya a rëzlam, a zluram, a hëlmamara Gazlavay, a lëvam: «Tasana, ndaw mahura ma tëla mey nga Gazlavay ta sawa la a wuzlah alëkwa.» A lëvam saya: «Gazlavay ta sawa la nga jöney ndöhay anga hay.»¹⁷ Ndöhay daa hwayak nga *Jude tabiya ta daa hwayak hay masa ta cakay tabiya ta cëndamara cek masa Yesu ma ka kedë la.

*Jan-Baptis a slërdata gula anga hay cew fa Yesu
(Matiye 11.2-19)*

¹⁸ Daa masa *Jan-Baptis anga daa fërsëne na, gula anga hay aa guzlar da ray cek hay tabiya masa Yesu ma kata. Ta', Jan-Baptis a zëlwa gula anga hay cew,¹⁹ a slërdata fa Bay Mahura amba aa cëfdamara, a lëvmar: «Kah na, *Këriste, ndaw ma da sawa nga lëhdata ndöhay heyey daw? Da daa ba, ya sëkwam ndaw mekele ma da sawa daw?»²⁰ Ta', a diyam. Masa ata ma wusam fa Yesu la na, a lëvmar: «Jan-Baptis a slërdandërwa ngaa cëfdaka, a lövey: "Kah na, Këriste, ndaw ma da sawa nga lëhdata ndöhay heyey daw? Da daa ba, ya sëkwam ndaw mekele ma da sawa daw?"»

²¹ Ta pas ngene, Yesu fa mböley masa-macay hay ga, kwa cek mecey wura wura cëpa, fa böley malula hay da ray ndöhay ga, asaya, fa wurey dey nga wulaf hay ga.²² Fa dëba ha, a mbëdätara a ndöhay masa *Jan ma slërdata heyey, a lëvtar: «Diyam, kadamara cek masa akwar ma hëtmar ta dey akwar, ta akwar ma cëndamara ta slëmay akwar a Jan-Baptis a. Lëvmar na, wulaf hay fa hëtmar dey dëba, jegwer * hay fa diyam maaya maaya ta salay ata, maasëkula hay ta sëfam sem, madagazlam hay fa cënam slëmay, ndöhay mamëctakaya fa slëkdamawa daa memöcey, ndöhay masaviya hay fa cëndamara Mey-maaya-mawiya dëba.²³ Ndaw ma mbëkda metëbey-mey adaw ba maja slëra masa yah ma ka na, maaya nga Gazlavay aa da ray a.»

Mey da ray Jan-Baptis

²⁴ Ndöhay masa *Jan-Baptis ma slërdata heyey ma diyam la na, Yesu a zlar maa guzlar da ray Jan-Baptis a, a ndöhay ga da cakay a, a lëvtar: «Akwar ma diyam a wuzlah-ley na,

7:15 7.15 1Bay 17.22-23 **7:16** 7.16 1.68; 19.44; ndaw ma tëla mey nga Gazlavay: Mt 16.14; 21.11, 46; 26.68; Mk 6.15; 8.28; 14.65; Lk 7.39; 9.8, 19; 22.64; 24.19; Jan 4.19; 6.14; 7.40; 9.17 * **7:22** 7.22 jegwer: Ndaw masa salay pal maaya ba. **7:22** 7.22 4.18-19; Mt 11.5

nga nəkwa me? Ka nəkma wa na, guzer masa memed ma wusa daw? Ara anga ba, ba diya? ²⁵ Kaa, akwar ma diyam nga nəkwa na, me? Ka nəkma wa na, ndaw masa ma pey zana maaya fa vaw daw? Anja ndəhay masa ma pam zana maaya fa vaw na, ara ndəhay ma njam daa wiya da way bay hay, ba diya? ²⁶ Wuzdamiwa, ka diyam nga nəkwa na, wa? Ka nəkma wa na, *ndaw ma təla mey nga Gazlavay, ba diya? Ya fa ləvkwar, fara fara ara anga. Ama a fəna ndaw ma təla mey nga Gazlavay la saya, ²⁷ maja *Jan a na, ara ndaw masa mey nga Gazlavay mawuzlalakaya maa guzley da ray a, a ləvey:

“Bay Gazlavay a ləvar a Bəzey anga:

Ehe, ya fa slərey maslan-cəved adaw fa mey akah,
 amba a diykawa cəved akah.”»

²⁸ Yesu a ləvtar saya: «Ya fa ləvkwar fara fara, da wuzlah ndəhay da bəla na, kwa ndaw ma fəna Jan-Baptis daa ba. Ama ndaw mecəhe da wuzlah ndəhay masa Bay Gazlavay fa wey da ray ata na, ndaw aha a fəna Jan-Baptis.

²⁹ «Ndəhay cəpa fetede ma cəndamara mey nga Jan na, ta təbmara mey a la, a sərmara Gazlavay fa key cek ta cəved e. Kwa ma cakala budaw hay ta təbmara la may. Ndəhay a ngene ta təbmara la amba Jan-Baptis a katar *baptem.

³⁰ Ama *Fariza hay ta *ndəhay maa sərkada kwakwas nga Mawiz ta təbmara cek masa Gazlavay ma wudey ngada ata na, daa ba, maja a wudam Jan-Baptis a katar baptem ba.»

³¹ Yesu aa guzltar mey mekele saya, a ləvtar: «Ya da wa səkway nga ndəhay masa wure kedə kaa na, ta me? Ata anda me? ³² Ata anda bəza hay masa manjatakaya fa yam mey da wuzlah ata, a ləvam: “Ala ta famakwar sləlam la, ama akwar ta gərvam daa ba. Ala ta zlamakwar walay vagay la, ama akwar ta təwam daa ba.” ³³ Ya ləvkwar anda kedə na, maja Jan-Baptis ta sawa la nga wuzkwar mey. A zəmey daf anda ndəhay mekele ba, a sey wuzam ba, ama ka ləvam: “Anga ta malula da ray.” ³⁴ Yah, *Bəz nga Ndaw, ya sawa, ya fa zəmey cek, ya fa sey cek anda ndəhay mekele. Ama ka ləvam: “Nəkmara, ndaw a kedə, a wulkey si nga zəmey cek ta nga sey wuzam ngada hwaɗ anga gway. Asaya, anga na, ara jam nga ndəhay ma cakala budaw ta nga ndəhay ma zləba kwakwas nga Mawiz.”

³⁵ Ama yah na, ya fa ləvkwar, ndəhay a da sərmara lenjesl nga Gazlavay, anga maaya na, ta fa ndəhay anga hay tabiya ma təbmara lenjesl e.»

Ngwas ta mebørey a mbødar børdey fa salay nga Yesu

³⁶ Ndaw Fariza daha, a zøla Yesu a way anga nga zømey ðaf. Yesu a daw a way ndaw aha, ta', a njam nga zømey ðaf. ³⁷ Da slala ha ngene ngwas daha, aa fa key mebørey kalah. A cønda masa Yesu fa zømey ðaf da way ndaw Fariza ha na, ta', a daw ta kwalaba marøhkaya ta børdey da har a way ndaw aha. Kwalaba ha nga anywa maavørkwakaya mezøley «*albaarøra». ³⁸ A regedey gweegwe ta salay nga Yesu. A tøway haa matøway a, a gøcey fa salay nga Yesu, a takwadfa salay a ta engwec nga ray anga, a kørza salay a, a sømdfa, ta', a mbøddara børdey heyey fa vødfa.

³⁹ Ndaw Fariza ma zøla Yesu nga zømey ðaf heyey, ma høtar ngwas aha fa takwadfa salay nga Yesu na, a wulkey daa ray anga, a løvey: «Da ndaw keðe fara fara ara *ndaw ma tøla mey nga Gazlavay na, anja a søra ngwas ma gøsfar fa salay keðe na, ara ngwas ta mebørey kalah.» ⁴⁰ Da ray ngene, Yesu aa guzlar a ndaw Fariza ha, a løvar: «*Simanw, ya wuðey ngaa guzka mey pal.» Simanw a mbøddara, a løvar: «Gweguzley taw, Bay aðaw.»

⁴¹ Yesu a løvar: «Ndøhay cew daha, a lam døvaz fa ndaw. Ndaw pal a ley gabal temere zlam. Ndaw langar a ley gabal kwakwar zlam †. ⁴² Ama ata cewete ta gwamara nga pølmara døvaz a daa ba. Anda keðe, ndaw ma vøldatara døvaz a heyey, a mbøkdatara døvaz a. Yaw, dasi ata cewete keðe na, ma da wuðfa ndaw ma mbøkdatara døvaz a kalah na, wa?» ⁴³ Simanw a mbøddara, a løvar: «Ya wulkey ma da wuðfa kalah na, ndaw masa aa ma mbøkðara døvaz ga da ray a heyey.» Ta', Yesu a løvar: «Ahaw fara, ka taa guzley la, ara anga.» ⁴⁴ Fa døba ha, ta', a mbøðey ðey fa ngwas kaa heyey, a løvar a Simanw: «Ka fa høtar ngwas keðe, ba diya? Ya sawa na, a way akah, ama ka ta vølya yam nga pørey salay daa ba. Anga na, ta pøryawa salay la ta matøway, ta takwadayawa la ta engwec nga ray anga.

⁴⁵ Ya sawa a way akah, ka ta tøbya maaya maaya daa ba, ama anga na, døga anga ma mbøzwa a way akah keðe haa wure keðe ta mbøkda nga sømdayawa salay daa ba. ⁴⁶ Ka ta takwadaya mal fa ray daa ba, ama anga ta mbøðya børdey la fa salay aðaw. ⁴⁷ Da ray ngene, ya fa løvka masa anga ma wuðya keðe na, fa wuzðørwa kwa anga ta mebørey ga kalah na, mebørey a daa saba. Ama ndaw ma wulkey anga ta mebørey ga daa ba, amba Bay Gazlavay a mbøkðara

7:36 7.36 11.37 **7:37** 7.37-38 Mt 26.6-7; Mk 14.3 **7:39** 7.39 7.16 † **7:41** 7.41 gabal temere zlam: Ta mey Gørek a løvey «ðeniye temere zlam.» *Deniye* pal na, ara mawurðay nga sløra nga ndaw fa mevørndey. **7:42** 7.42 Mt 18.27
7:44 7.44 MC 18.4; 1Tm 5.10 **7:46** 7.46 Ps 23.5

mebørey a na, ηgene ara ndaw ma wuɗa Gazlavay nekəɗey gway.»

⁴⁸ Fa dɔba ha, Yesu a lɔvar a ηgwas heyey: «Mebørey akah daa saba.» ⁴⁹ Ndəhay masa manjatakaya ηga zəmey daf bama heyey, aa guzlam da wuzlah ata, a lɔvam: «Kede na, ara wa masa ma gwa ηga mbəkey mebørey ηga ndaw kede na!» ⁵⁰ Ama Yesu a lɔvar a ηgwas a heyey: «Bay Gazlavay ta ləhdaka cay daa mebørey, maja kah ma paya ηga ndaw akah fara fara. Daw ta zazay.»

8

Ma pəkam ta Yesu na, wa hay wa?

¹ Fa dɔba ha, Yesu a daw aa berney hay leη a slala hay ηga wuzey *Mey-maaya-mawiya da ray mewey ηga Gazlavay da ray ndəhay. Ndəhay masa ma pəkam ta Yesu na, ara gula anηa hay kuraw a ray a cew ² ta ηgusay masa anηa ma bəley malula da ray ata, ta masa anηa ma mbəldata daa macay. ηgusay a na, ara *Mari da Magdala, ηgwas masa Yesu ma bəley malula maasala da ray a heyey, ³ Zaan, ηgwas ηga Kuza ndaw ma nəkey dey fa zleley ηga Bay *Herawt, leη Suzan, ta ηgusay mekele mekele. ηgusay a na, a jənmata ata Yesu ta gula anηa hay kuraw a ray a cew ta zleley ata hay.

*Mey-menɓey ta ndaw maa kwecey hulfad a ley
(Matiye 13.1-23; Mark 4.1-20)*

⁴ Daa berney hay mekele mekele ndəhay fa samawa fa Yesu. Masa ndəhay ga ata da cakay a na, Yesu ta', aa guzlar ta mey-menɓey, a ləvey:

⁵ «Ndaw mehəvey daha, a daw ηгаа kwecey hulfad a ley anηa. Daa masa anηa faa kwacada hulfad a na, hulfad lanηar a kəzley aa cəved. Ndəhay a diyam ta ray a. Diyan hay a ndamara. ⁶ Siya a kəzley aa slam masa pərad, a pəcwa nekəɗey na, a kweley maja yam daa slam aha daa ba. ⁷ Siya a kəzley a wuzlah hatak. A pəcwa da wuzlah hatak a. Hatak a njanjɔrɗa, a təkā ηga gəley. ⁸ Ama siya a kəzley aa slam maaya, a pəcwa, a gəley, a yey babəza ga, a key temere.» Yesu a ləvtar ta gədan: «Da ndaw, anηa ta sləmay na, ηga cənda mey a maaya maaya.»

⁹ Gula hay ηga Yesu aa cəɗdamara amba a səmra mabara ηga mey-menɓey kede. ¹⁰ Yesu a mbəɗɗatara, a ləvtar: «Gazlavay ta vəkwar cəved la ηga sərey mey hay mabadatakaya da ray mewey anηa da ray ndəhay. Ama

ndəhay siya hay na, ya wuzdatara ta mey-menğey. Anda keđe,

“Fa nəkam dey, ama a hətmar dey ba.

Fa jəkam sləmay, ama a cəndamara ba.”

¹¹ «Ehe, ya wuzdakwara mabara ɲga mey-menğey a. Hulfađ na, ara mey ɲga Gazlavay. ¹² Ndəhay siya ata anda mey-cəveđ masa hulfađ ma kəzley a hwađ a. Ndəhay a fa jəkam sləmay fa mey ɲga Gazlavay, ama bay-malula a sawa, a la mey a la daa mevel ata, amba a təkta ɲga təbmara mey a maja Gazlavay a da ləhdata. ¹³ Ndəhay mekele ata anda slam masa pərađ. A cəndamara mey ɲga Gazlavay, a təbmara ta meesəmey. Ama a hway slaslalay ba. A təbmara ɲga menjey nekədey gway. Anda keđe, ta pas masa cek maaya ba fa batata na, a mbəkdamara mey a. ¹⁴ Hulfađ ma kəzley a wuzlah hatak na, aɲga anda ndəhay mekele ma cəndamara mey ɲga Gazlavay ama a mbəkdamara mey a daa walaɲ maja mewulkey ata aa da ray cek hay mekele mekele, ta da ray zleley leɲ da ray menjey daa wiya da bəla. Anda keđe, sləra masa ata ma kamara na, aɲga anda daw, babəza fa vəfa daa ba, səfteker. ¹⁵ Hulfađ ma kəzley aa slam maaya na, aɲga anda ndəhay siya ma jəkam sləmay, ma təbmara mey a aa mevel ata maaya maaya, a kam cek anda Gazlavay ma wuđe. A təbmara mey a, a mbəkdamara ba. Anda keđe, mey a, a yey daa mevel ata anda hulfađ ma pəcwa ma yey ga.»

Mey-menğey ta petərła

(Mark 4.21-25)

¹⁶ Yesu a ləvtar saya: «Da ndaw ta gədey awaw la aa petərła na, a dəpa ta maɲgayak ba, a pa asi harɲgawaw ba. Ama a pa aa slam mepey petərła ɲga wađa slam daa way a, amba ndəhay ma mbəzam a hwađ a na, a hətmar dey. ¹⁷ Cek hay tabiya mabadakaya, a wuzwa la a palah. Cek masa ndəhay ma sərmara ba na, a sərmara la, asaya, a wuzwa la aa slam-mewede. ¹⁸ Pam leɲgesl amba ka jəkam sləmay maaya maaya. Da ndaw ta təba mey ɲga Gazlavay la na, Gazlavay a jəna la ɲga təba mey a ma fəna ma fəna. Da ndaw ta təba mey ɲga Gazlavay daa ba na, kwa mey a nekədey masa aɲga ma wulkey daa mevel aɲga daha na, Gazlavay a badərwa la tabiya.»

Mamaɲ ɲga Yesu ta məlmaha hay na, ara wa hay wa?

(Matiye 12.46-50; Mark 3.31-35)

19 Fa dɔba ha, ata mamaj nga Yesu ta mɔlmaha hay a diyam fa Yesu, ama ta gwamara nga wusey a cakay a daa ba, maja ndɔhay ga kalah. 20 Ndɔhay fetede aa guzlmara a Yesu, a lɔvmar: «Ata mamakw ta mɔlmakw hay malacatakaya daa ambaw, a samawa fa akah, faa cɔfdamaka.» 21 Ama Yesu a mbɔdfatarara, a lɔvtar a ndɔhay tabiya: «Mamay ta mɔlma adaw hay na, ara ndɔhay masa ma jɔkam slɔmay fa mey nga Gazlavay, ma kam cek anda mey a ma lɔvey.»

Yesu a lacada bɔrgadan da wuzlah dɔhwa
(Matiye 8.23-27; Mark 4.35-41)

22 Ta pas langar daha, Yesu a tɔpam ta gula anɔa hay, aa kwambiwal, a lɔvtar: «Tɔngkwa a dey langar nga dɔhwa.» Ta', a diyam. 23 Daa masa ata fa tɔngam na, Yesu aa daa dar. Wure ngene, bɔrgadan a zlar mekey da ray yam. Kwambiwal heyey, a rɔhey ta yam, ndɔhay da hwad a fa daa zɔdam. 24 Da ray ngene, gula anɔa hay, a ngɔcham a cakay a, a slɔkdamara, a lɔvmar: «Bay Mahura! Bay Mahura! Alɔkwa fa da mɔckwa!»

Yesu ta', a slɔkdey, aa bɔcey ta gɔdan, a tɔka bɔrgadan ta yam ma wusey heyey. Bɔrgadan heyey a key saba, yam a wusey saba. 25 Yesu aa guzltar a gula anɔa hay a, a lɔvtar: «Ka pamaya nga ndaw akwar fara fara ba na, maja me?»

Ama gula anɔa hay a, a zluram, a rɔzlam, aa guzlam da wuzlah ata, a lɔvam: «Ndaw a kaa na, ara wa? Masa aa guzlar kwa ngada bɔrgadan, kwa ngada yam, a cɔnar mey kede na!»

Yesu a bɔley malula hay da ray ndaw
(Matiye 8.28-34; Mark 5.1-20)

26 Ata Yesu ta gula anɔa hay a wusam aa hwayak nga ndɔhay Gɔraza hay ta dey langar nga dɔhwa, dey ta' ngada *Galile. 27 Ata ma wusam la na, Yesu a pawa salay daa kwambiwal a. Ndaw daa berney fetede daha a sawa a cada ray. Ndaw aha, aa ta malula da ray. Menjey ga, ta kɔzley zana fa vaw daa ba. A njey na, da way ba, ama daa cɔvay hay. 28 Daa masa anɔa ma hɔtar Yesu na, a zlar mewudey, a tɔfey asi salay anɔa, aa guzlar ta gɔdan, a lɔvar: «Yesu, Bɔzey nga Gazlavay da vad, ka wudɔy fa yah na, me? Ambahw, ka da sɔrdaya banay ba!» 29 Aa guzley anda kede, maja Yesu ma lɔvar a malula ha nga bey da ray anɔa. Malula ha fa kar mandaw mandaw. Ndɔhay anɔa hay a jɔwmata har ta salay hay ta calalaw amba a njey da way, ama ndaw a, a key gɔdan, a dɔsla calalaw a. Malula ha fa hwada a ley. 30 Ta', Yesu aa cɔfda, a lɔvar: «Mezɔley

akah na, me?» A mbəfdara, a ləvar: «Mezəley adaw na, “ga”.» A ləvey anda kefe maja malula hay ga da ray a daha.
³¹ Malula hay heyey na, a kamar ambahw a Yesu amba a bəlta aa vəged meseleleŋ e ba.

³² Daa slam aha ŋgene, ŋgaɓa ŋga vetem hay ga daha da mecəkwer da aŋgwa. Malula hay da ray ndaw heyey a bərkwamara Yesu ŋga vəltar cəved amba a mbəzam a ray vetem hay a. Yesu ta', a vəltar cəved. ³³ Ta', malula hay a, a bam da ray ndaw aha, a diyam a mbəzam a ray vetem hay a. Wure ŋgene, vetem hay a tabiya a bam ray, a hwam ta gədaŋ ŋgadaa heeleŋ, a tataram, a kwiyaŋ saf! aa yam, a ɓabətam cəpa.

³⁴ Masa mecəkwer hay ŋga vetem hay kaa heyey ma hətmar cek ma key la anda kefe na, a hwam a wuzdamara mey a, a ndəhay daa berney a, leŋ a ndəhay da slala hay masa ta cakay. ³⁵ Ndəhay a, a samawa ŋga nəkey cek mekey fetede he. A wusmawa a cakay Yesu na, a hətfamar ndaw masa Yesu ma bəlta malula hay da ray aŋga heyey. Ndaw aha manjakaya da cakay Yesu, aŋga ta zana fa vaw. A səra leŋgesl dəba. Ndəhay ma samawa ŋga nəkey cek ma key heyey na, mandərzay a katar. ³⁶ Ndəhay fetede ma hətmar Yesu ma bəlta malula hay da ray ndaw heyey, a kadamatara a ndəhay ma samawa ŋga nəkey cek ma key heyey. ³⁷ Anda kefe, ndəhay tabiya daa hwayak ŋga Gəraza hay a ləvmar a Yesu ŋga daw la daa hwayak ata, maja fa zluram ga. Da ray ŋgene, Yesu a təpey aa kwambiwal ŋga daw. ³⁸ Ndaw masa Yesu ma bəlta malula hay da ray aŋga heyey, a kar ambahw a Yesu ŋga vəlar cəved amba a diyam cew e. Ama Yesu ta vəlar cəved ŋga diyam cew e daa ba, a vəhda, a ləvar: ³⁹ «Daw a way akah, ta kadatara cek mahura masa Gazlavay ma kakawa kefe tabiya a ndəhay.» Ta', ndaw aha a daw, a wuzda mey da ray cek masa Yesu ma ka tabiya da ray a heyey ŋgada ndəhay daa berney a tabiya.

Yesu a mbəley ŋgwas ta a sləkɗadərwa dam ŋga Jayirus daa meməcey

(Matiye 9.18-26; Mark 5.21-43)

⁴⁰ Ndəhay ga fa səkwamara Yesu da dey langar ŋga dəhwa ŋga *Galile. Aŋga ma vəhwa la na, ndəhay a təɓmara ta meesəmey. ⁴¹ Ndaw daha mezəley Jayirus. Aŋga *bay-ray ŋga *way-mewuzey-mey ŋga Gazlavay fetede. A wusey fa Yesu, a tədey asi salay aŋga. A kar ambahw ŋga daw a way aŋga, ⁴² maja dam aŋga daha, aŋga pal, mekele daa ba, vaw fa car, fa da məcey. Dam aha, mamba mevey kuraw a ray a cew.

Masa Yesu fa daw a way Jayirus a na, ndəhay fa ngacamara ta kefe ta kefe. ⁴³ Da wuzlah ndəhay a ngene, ngwas daha mambaz fa mbədwa da hwad, dəga mevey kuraw a ray a cew. Ta ndəvda zleley anğa sem cəpa fa dakwter hay, ama kwa ndaw ma gwa a ray macay a daa ba.

⁴⁴ Ngwas aha a ngəchey ngada fa Yesu ta fa dəba, a gəsfar har fa mey nga zana anğa. Wure wure ngene, mambaz anğa heyey taŋ! a dəsley mey. ⁴⁵ Yesu aa cəfdəta ndəhay, a ləvey: «Ma gəsfaya na, wa?» Kwa waawa a ləvey: «Ara yah ba, ara yah ba.» Ta', *Piyer a ləvar: «Bay adaw, ray akah tabiya mazlərkaya ta ndəhay fa ngacamaka kaa na, ka ləvey ma gəsfaya wa na, kwara?» ⁴⁶ Yesu a mbəddara, a ləvar: «Ndaw ta gəsfaya la, maja ya səra gədan daa vaw adaw ta bey la.»

⁴⁷ Ngwas aha, a nəka na, Yesu ta səra sem, a gwa a bəda ray anğa saba. Ta', a daw fa Yesu, aa faa wesey maja fa zlurey. A tədəy asi salay anğa. Ta', a kada fa mey nga ndəhay tabiya a gəsfar har fa zana nga Yesu na, maja me, asaya, a kada Yesu a mbəlda wure wure ngene na, kwara. ⁴⁸ Fa dəba ha, Yesu a ləvar: «Dam adaw, ka ta mbəley cay maja kah ma paya nga ndaw akah fara fara. Daw ta zazay.»

⁴⁹ Masa Yesu faa guzlar ngada ngwas aha aran na, ndaw a sawa ta meslərey da way Jayirus, bay-ray nga way-mewuzey-mey nga Gazlavay heyey, a ləvar: «Dam akah heyey, ta məcey sem. Ka da gərda vaw ta Bay Mahura saba.» ⁵⁰ Ama Yesu ma cənda mey a na, a ləvar a Jayirus: «Mevəl akah a da tədəy ba. Paya nga ndaw akah fara fara gway na, dam akah a mbəley la.»

⁵¹ Masa Yesu ma wusey la a way Jayirus na, kwa a vəley cəved a ndaw nga mbəzey asiya ba, si ma mbəzam asiya na, ata Piyer, *Jan, *Jak, leŋ papaŋ nga dam aha ta mamaha gway. ⁵² Ndəhay tabiya fetede fa təwam, fa wudam maja dam aha. Ama Yesu a ləvtar: «Ka təwam ba. Dam aha ta məcey daa ba, ama a key a ney aa dər.»

⁵³ Ndəhay a, aa sanğəram a ray Yesu maja a sərmara dam aha ta məcey sem. ⁵⁴ Yesu a ngəchey fa dam aha heyey, ta', a kərza fa har, aa guzlar ta gədan, a ləvar: «Bəzey, sləkdey!»

⁵⁵ Mesəfney anğa a vəhwa aa slam a, ta', a sləkdey wure ngene. Yesu a ləvtar nga vəlmar cek mezəmey. ⁵⁶ Papaŋ nga dam aha ta mamaha a rəzlam ga, ama Yesu a kətata, a ləvtar: «Cek masa ma key kefe na, ka da kadamara ngada ndaw ba.»

9

*Yesu a slərdata gula anğa hay kuraw a ray a cew
(Matiye 10.5-15; Mark 6.7-13)*

¹ Yesu a kusta gula anğa hay kuraw a ray a cew, a vøltar gədanŋa key maazla amba a bəlam malula hay wura wura tabiya da ray ndəhay, asaya, amba a mbəlam masa-macay hay. ² Anğa ma vøltar gədanŋa la na, ta', a slərdata ŋga wuzey mey da ray mewey ŋga Gazlavay da ray ndəhay, asaya, ŋga mbəley masa-macay hay. ³ Ta', a ləvtar: «Diyam, ama daa madaw akwar na, ka da lam cek a har ba, ka da lam zlanday ba, ka da lam gabal ba, ka da lam cek mezəmey ba, ka da lam dala ba. Ndaw a da ley zana cew ba. ⁴ Kwa daa slam wura wura ndaw ma təbkwar la a way anğa na, njam a way a ŋgene kasl pas masa akwar ma da diyam. ⁵ Kwa daa slam wura wura ndəhay ma təbmakwar daa ba na, raramatara lagwada fa salay akwar hay amba ka wuzdamatara ata ndəhay ta mebərey, diyam la da slala ha.» ⁶ Ta', gula anğa hay heyey a pəkam da slala hay mekele mekele daa hwayak ŋga *Galile, a wuzam *Mey-maaya-mawiya, a mbəlam masa-macay hay, kwa daa wura daa wura cəpa.

*Ray a həbar a Bay Herawt
(Matiye 14.1-12; Mark 6.14-29)*

⁷ *Herawt, ndaw ma wa hwayak ŋga *Galile ŋgene, a cənda mey da ray ata Yesu ta gula anğa hay. Mey a, a həbar ray maja ndəhay faa guzlam mey hay mekele mekele. Ndəhay a ləvam: «Ndaw aha na, ara *Jan-Baptis ma sləkdəwa daa meməcey.» ⁸ Siya hay a ləvam: «Ara *Eli ma wuzwa vaw.» Mekele hay a ləvam: «Ara ndaw pal dasi ndəhay ma təla mey ŋga Gazlavay zleezle ma sləkdəwa daa meməcey.» ⁹ Ama Herawt a ləvey: «Jan-Baptis na, ya ta dəslra ray sem. Kaa ndaw masa yah ma cənda mey da ray a kefe na, ara wa dəba wa?» Da ray ŋgene, a səpey cəved ŋga hətar Yesu.

*Yesu a vøltar cek mezəmey a ndəhay ma fəna gabal zlam
(Matiye 14.13-21; Mark 6.30-44; Jan 6.1-14)*

¹⁰ Fa dəba ha, ndəhay meslərey ŋga Yesu kuraw a ray a cew heyey a vəhmawa fa Yesu, a kadamara cek hay tabiya masa ata ma kamərwa daa mepəkey ata. Yesu ta', a ŋgəltə taava ata, a diyam aa slam gweegwe ta slala Betsayda. ¹¹ Ama ndəhay ga ma cəndamara ata sem na, a diyam asi

ata. Yesu a tæbta ta meesəmey. A wuztar mey da ray mewey nga Gazlavay da ray ndəhay, asaya, a mbəldata masa-macay hay.

¹² Yaw, mamba pas a kəzley na, gula anğa hay kuraw a ray a cew heyey a ngəcham a cakay a, a ləvmar: «Ləvtar a ndəhay kedə nga diyam a wuzlah-way, da daa ba, a slala hay ta cakay, amba a səpam slam-meney ta cek mezəmey, maja aləkwa da wuzlah-ley.» ¹³ Ama Yesu a ləvtar: «Akwar ta ray akwar, vəlmatar cek mezəmey!» Gula hay a, a mbəddamara, a ləvmar: «Da har ala na, peŋ zlam ta ewet cew gway. Da ka wudəy amba ndəhay tabiya kedə a zəmam cek na, si ya diyam ya hədkamawa kwa.» ¹⁴ Da wuzlah ndəhay a ngene, zel hay a key gabal zlam. Yesu a ləvtar a gula anğa hay a: «Njadamata njakw! njakw! kwakwar zlam, kwakwar zlam.»

¹⁵ Gula anğa hay ta', a njadamata tabiya anda Yesu ma ləvtar. ¹⁶ Fa dəba ha, Yesu hal! a həlta peŋ zlam ta ewet cew heyey, ta', a baŋgada dey a vad, a kar suse a Gazlavay maja cek mezəmey a. Ta', a papəsa, a vəldatara a gula anğa hay amba a wunkamatara a ndəhay a. ¹⁷ Kwa waawa a zəmey haa a rəhey. Ta', gula anğa hay a cakalamara siya nga cek hay a ma mbəkey. Macakalakaya ha, gadakar kuraw a ray a cew.

*Ndəhay a padamara Yesu na, nga wa?
(Matiye 16.13-28; Mark 8.27-9.1)*

¹⁸ Ta pas langar daha, Yesu fa dərey dangay pal taava anğa. Gula anğa hay ata da cakay a. Ta', Yesu aa cəfdəta, a ləvtar: «Yah na, ndəhay a padamaya na, nga wa?» ¹⁹ Gula anğa hay a, a mbəddamara, a ləvmar: «Ndəhay siya a ləvam kah na, *Jan-Baptis. Mekele hay a ləvam kah na, *Eli, *ndaw ma təla mey nga Gazlavay zleezle. Mekele hay saya a ləvam kah na, ndaw pal dasi ndəhay ma təla mey nga Gazlavay zleezle ma sləkəfawa daa meməcey.» ²⁰ Ta', Yesu aa cəfdəta saya, a ləvtar: «Kaa akwar may, ka ləvam yah na, wa?» *Piyer a mbəddara, a ləvar: «Kah na, *Kəriste, *ndaw masa Gazlavay ma wala nga ləhdata ndəhay.»

²¹ Yesu a kətata gula anğa hay, a katar mey, a ləvtar: «Ka da wuzdamara mey a kedə a ndaw ba.» ²² A ləvtar saya: «Si yah, *Bəz nga Ndaw, ya sərey banay la ga dəgay. Mahura hay nga *Jəwif hay, *bay-ray hay nga ndəhay ma ka kwakwas nga Gazlavay, leŋ *ndəhay maa sərkada kwakwas nga Mawiz, a rəsmaya la, fa da təbmara ara

Gazlavay ma slərđiwa na, daa ba. A da kəđmaya vagay. Ama ŋga đar maakar a na, ya sləkđawa la daa meməcey.»

Mey da ray mesəpey Yesu

²³ Ta', Yesu a ləvtar a ndəhay tabiya: «Da ndaw a wuđey ŋga səpya na, si a mbəkda mewulkey da ray ray aŋga, a səpya ta mevel pal, si a bəsa banay ma da sawa a ray aŋga mandaw mandaw maja yah, anda yah ma da məcey fa hwadam mazlanđalakaya. ²⁴ Sərmara, kwa waawa ma wuđey ŋga ləhda heter aŋga na, a key ŋgene, aa zəđda. Ama kwa waawa maa zəđda heter aŋga maja yah na, a key ŋgene, a ləhda heter aŋga ha. ²⁵ Da ndaw a hətey cek hay tabiya masa aŋga ma wuđey da bəla keđe, ama aa zəđda heter aŋga, da daa ba, a nəsa ray aŋga na, mehətey cek hay a tabiya ŋgene, a jəna la daw? ²⁶ Kwa waawa ma paya hwaray fa mey ŋga ndəhay, da daa ba, ma key hwaray ŋga təba mey ađaw na, ŋgene, ta pas masa yah, *Bəz ŋga Ndaw, yah ma da vəhwa ta mewəđey ađaw *, ta gədaŋ mahura ŋga Papay, leŋ ta gədaŋ ŋga maslaŋ aŋga hay da vad' na, ya par hwaray la fa mey ŋga Bay Gazlavay may. ²⁷ Ya fa ləvkwar fara fara, ndəhay siya da wuzlah akwar feđe, fa da məcam daa ba, si ata ma hətmar mewey ŋga Bay Gazlavay la đagay.»

Gula hay ŋga Yesu a hətmar mewəđey ŋga Yesu
(Matiye 17.1-8; Mark 9.2-8)

²⁸ Fa dəba ha luma pal na, Yesu, ta', a ŋgəlta ata *Piyer, *Jaŋ, leŋ *Jak. A təpam a aŋgwa amba Yesu a dərwa daŋgay fetede. ²⁹ Masa aŋga fa dərey daŋgay na, dey aŋga pəla! a mbəđey, zana aŋga a wəđey mabara ndəđ-ndəđ. ³⁰ Wure wure ŋgene, ndəhay daha cew faa guzlam ta Yesu a. Ara ata *Mawiz ta *Eli. ³¹ A wuzmawa vaw daa mewəđey ŋga Gazlavay da vad'. Ata faa guzlam ta ata Yesu da ray sləra aŋga masa aŋga ma da ndəvda ta fa meməcey aŋga da *Jeruzelem. ³² Ata Piyer ta gula hay cew heyey manatakaya cək-w-cək-w daa đar. Ama a sləkđam daa đar, a hətmar mewəđey ŋga Yesu ta ndəhay cew heyey. ³³ Daa masa ndəhay a fa diyam la da cakay Yesu na, Piyer aa guzlar a Yesu, a ləvar: «Bay ala, maaya na, ya njakwa feđe, amba ya kərcam slam hay maakar, pal ŋgada kah, pal ŋgada Mawiz, pal ŋgada Eli.» Ama Piyer a səra mey masa aŋga maa guzlda ba.

9:22 9.22 9.43-45; 17.25; 18.31-34; 24.6-7 **9:23** 9.23-24 14.27; 17.33; Mt 10.38-39; Jaŋ 12.25-26; 1Pi 2.21 * **9:26** 9.26 mewəđey ađaw: Nəka Heb 1.3.
9:26 9.26 12.9; Mt 10.33; 2Tm 1.8; 2.12 **9:27** 9.27 Mt 16.28 **9:28** 9.28-29 5.16 **9:29** 9.29-36 2Pi 1.16-18 **9:31** 9.31 9.22; 13.33 **9:32** 9.32 Jaŋ 1.14

³⁴ Masa Piyer faa guzley na, mekwtene a sawa, a sɔrtata. Mekwtene ma sɔrtata la na, gula anɔa hay heyey a zluram. ³⁵ Daa mekwtene he na, ɗay a cɔnwa, a lɔvey: «Kede he ara Bɔzey aɗaw, masa yah ma wala, jɔkfamar slɔmay.» ³⁶ Fa dɔba nɔa ɗay ma cɔnwa ha na, *gula hay nɔa Yesu a da nɔkam dey na, mbak! Yesu pal taava anɔa. Gula hay nɔa Yesu a, a njam teete, kwa cek masa ata ma hɔtmar na, ta kadamara nɔgada ndɔhay daa ba.

*Yesu a bada cek da ray bɔzey
(Matiye 17.14-18; Mark 9.14-27)*

³⁷ Pepɔrek e, ata Yesu ta gula anɔa hay maakar heyey a pamawa salay da anɔgwa heyey, ndɔhay ga a diyam nɔa cadamɔrwa ray ta Yesu a. ³⁸ Da wuzlah ndɔhay a nɔgene, ndaw daha a zlar mewudey, a lɔvar a Yesu: «Bay aɗaw, ya kaka ambahw. Nɔka bɔzey aɗaw kede, anɔa pal, mekele daa ba, jɔna cey. ³⁹ Anɔa ta cek da ray, ta zlar la na, a wudey, a gucey, maɔgwafakw a bawa da mey. A sɔrda banay kalah, a mbɔkda gweegwe ba. ⁴⁰ Ya ta katar ambahw la a gula akah hay amba a badamara cek da ray bɔzey a, ama ta gwamara daa ba.»

⁴¹ Yesu aa guzley, a lɔvey: «Hey! Akwar ndɔhay marɔzltakaya masa ma pamaya nɔa ndaw akwar fara fara ba kede. Ya da njey ta akwar na, haa ta vara? Ya da bɔskwar na, haa ta vara?» Ta', a lɔvar a ndaw aha: «Handiwa bɔzey akah ha fefe.»

⁴² Masa bɔzey a gweegwe a wusey a cakay Yesu na, cek da ray a cɔkw! a la bɔzey a, ba! a kɔzla a hwayak, a gucey. Ama Yesu aa bɔcar a cek da ray bɔzey a, ta', a mbɔley. Yesu a lɔvar a papaha: «Ehe, bɔzey akah.» ⁴³ Ndɔhay tabiya a rɔzlam, a lɔvam: «Fara fara Gazlavay na, aa ta gɔdan.»

Yesu aa guzley saya da ray memɔcey anɔa ta maslɔkɗawa anɔa

(Matiye 17.22-23; Mark 9.30-32)

Daa masa ndɔhay tabiya fa rɔzlam da ray cek hay tabiya masa Yesu ma kata na, a lɔvtar a gula anɔa hay: ⁴⁴ «Wure kede jɔkam slɔmay maaya maaya, pamara mey kede aa ray: A da kɔzlamaya, yah, *Bɔz nɔa Ndaw, a da vɔldamaya a har ndɔhay.» ⁴⁵ Ama gula anɔa hay ta cɔndamara mey masa Yesu maa guzldatara nɔgene daa ba. Mabara nɔa mey a mabadakaya fa ata, a gwamara nɔa cɔndamara ba ɗagay. A zluram nɔgaa cɔɗdamara Yesu da ray mey a.

*Mahura na, wa?
(Matiye 18.1-5; Mark 9.33-37)*

⁴⁶ Gula hay nga Yesu a kam yawa da wuzlah ata, a wudam amba a sɛrmara mahura dasi ata na, wa. ⁴⁷ Ama Yesu a sɛra mewulkey ata. Ta', a ley bɛzey mecɛhe den! a lacada a cakay a, ⁴⁸ a lɛvtar: «Kwa waawa ma tɛba bɛzey mecɛhe kede la maja a wudya na, a key ngene na, a tɛbey yah, ray adaw. Asaya, kwa waawa ma tɛbya la, a tɛbey ngene na, Bay Gazlavay, ndaw ma slɛrdiwa may. Ndaw masa mecɛhe da wuzlah akwar tabiya na, mahura na, anɗa.»

Ndaw masa-gɛra alɛkwa ba na, ara jam alɛkwa
(Mark 9.38-40)

⁴⁹ Ta', *Jan a mbɛddara a Yesu, a lɛvar: «Bay ala, ala ta hɛtam ndaw daha la fa bɛley malula da ray ndɛhay ta mezɛley akah. Ya wudam nga tɛkmara maja ara ndaw da wuzlah alɛkwa ba.» ⁵⁰ Ama Yesu a mbɛddara, a lɛvar: «Ka da tɛkmara ba. Ndaw masa-gɛra akwar ba na, ara jam akwar.»

Ndɛhay Samari a wudam nga tɛbmara Yesu ba na, maja me?

⁵¹ Masa gweegwe cay Gazlavay a la Yesu fa vɛda a vad na, Yesu a kɛrza mevel nga daw aa berney nga *Jeruzelem.

⁵² Ta', a slɛrey ndɛhay teesɛd fa mey. A diyam a slala daha daa hwayak nga *Samari nga diymar slam-meney.

⁵³ Ama ndɛhay daa slala ha, a gɛmam nga tɛbmata ba, maja a sɛrmara Yesu a wudɛy nga daw a Jeruzelem †. ⁵⁴ Masa gula anɗa hay ata *Jak ta *Jan ma nɛkmara ndɛhay daa slala ha a gɛmam nga tɛbmata ba na, ta', a lɛvmar: «Bay Mahura, ka wudɛy yaa cɛfdamawa awaw nga pawa salay da vad nga zɛma slala ha kede tabiya daw?» ⁵⁵ Yesu pɛla! a mbɛdey dey ngada fa ata, ta', a mbɛdtar ray, a katar mey. [A lɛvtar: «Ma hɛldakwar ngaa guzley anda kede na, mesɛfney wura? Yah, *Bɛz nga Ndaw, ya sawa na, ngaa zɛdey ndɛhay ba, ama nga lɛhdata.]] ⁵⁶ Ta', a diyam aa slala mekele.

Mey da ray mesɛpey Yesu
(Matiye 8.19-22)

⁵⁷ Ata fa diyam daa cɛved, ndaw daha a lɛvar a Yesu: «Kwa aa slam wura wura masa kah ma da daw na, ya daw la asi akah.» ⁵⁸ Yesu a mbɛddara, a lɛvar: «Mbiga hay, ata ta vɛged ata hay, diyan hay, ata ta way ata hay. Ama yah,

9:46 9.46-48 22.24-26 **9:48** 9.48 10.16; 22.26; Mt 10.40; 20.26-27; Mk 10.43-44; Jan 13.20 **9:50** 9.50 11.23; Mt 12.30 **9:51** 9.51 24.50-51; Mt 19.1; Mk 10.1; SNM 1.9 **9:52** 9.52 10.33 † **9:53** 9.53 Ndɛhay Samari, ata masa-gɛra nga Jɛwif hay. Anda kede, a wudam Jɛwif hay da Galile a diyam a Jeruzelem ta daa hwayak ata ba. **9:54** 9.54 2Bay 1.10, 12

*Böz nga Ndaw na, kwa slam nga ney nekədey amba ya məskey vaw da hwaɗ a na, daa ba.»

⁵⁹ A ləvar a ndaw lanɗar: «Sawa asi aɗaw.» Ama ndaw aha a ləvar: «Bay aɗaw, vəlya cəveɗ amba ya daw ya jəhərwa papay la ɗagay.» ⁶⁰ Yesu a mbəɗɗara, a ləvar: «Mbəkdata ndəhay maməctakaya nga jəhmata ndəhay ata hay maməctakaya. Kah na, daw ta wuzey mey da ray mewey nga Gazlavay da ray ndəhay.»

⁶¹ Ndaw lanɗar daha saya a ləvar: «Yah na, ya daw la asi kah Bay aɗaw, ama vəlya cəveɗ amba ya da catərwa har a ndəhay da way ala hay la ɗagay.» ⁶² Yesu a mbəɗɗara, a ləvar: «Ndaw masa fa həvey ta sla hay, a mbədey dey fa dəba na, anɗa letək ta ndaw ma wufey nga daw taa cəveɗ aɗaw, ama a nəkey dey fa dəba aa cəveɗ anɗa magurma. Ndaw anda nɗene na, a gwa mekey sləra nga Bay Gazlavay ba sələk.»

10

Yesu a slərdata ndəhay kwakwar maasala a ray a cew

¹ Fa dəba ha, Bay Mahura a weley gula hay mekele kwakwar maasala a ray a cew, amba a slərdata tabiya cew cew teesəɗ fa mey anɗa aa berney hay cəpa ta a slala hay tabiya masa anɗa ta ray anɗa ma da daw a hwaɗ a. ² A nɗatar mey, a ləvtar: «Cek ta key la ga da ley, ama ndəhay nga kamərwa a way na, pəreh. Anda keɗe, kamar ambahw a bay nga ley a, nga slərwa ndəhay mekele saya a dey a nga kawa cek hay da ley a. ³ Yaw, anda keɗe diyam, ya slərdakwar anda bəz-təbən hay nɗada wuzlah gədey-ley hay. ⁴ Ka da lam dala ba, ka da lam gabal ba, kwa ka da lam tarak hay ba. Ka da lacam daa cəveɗ nga cey har a ndəhay ba. ⁵ Da ka mbəzam a way ndaw nga nɗey, teesəɗ na, ləvam: “Anja way keɗe nga nɗey daa zazay.” ⁶ Da ndaw ma wufey zazay nga nɗey da way anɗa daha na, mepəsey-mey akwar a, a wusfar la. Da ndaw ma wufey zazay da way a daa ba na, mepəsey-mey akwar a, a vəhwa la fa akwar. ⁷ Da ndəhay da way a ta təbmakwar la, nɗam da way a nɗene, zəmam cek, sam cek, masa ndəhay a ma vəldamakwara, maja ndaw ma ka sləra na, aa təde nga hətey mawurbay nga sləra anɗa. Ka da səpmata fa way a fa way a ba. ⁸ Masa akwar ma wusam la aa berney wura wura, da ndəhay fetede a təbmakwar na, cek masa ndəhay a ma da vəldamakwara, zəmamara. ⁹ Mbəldamata masa-macay hay daa berney a, ləvmatar a ndəhay daa berney a:

“Bay Gazlavay ta wuswa la gweegwe ta akwar nga wey da ray akwar.”¹⁰ Ama da ka wusam aa berney wura wura masa ndəhay a gəmam nga təbmakwar ba na, diyam aa slam masa ndəhay ga da hwaɗ a, ləvam:¹¹ “Kwa lagwada daa berney akwar fa salay ala, ya raramakwara amba ya wuzdamakwara akwar ta kam cek maaya ba la. Asaya, si ka səmra Bay Gazlavay ta wuswa la gweegwe ta akwar nga wey da ray akwar!”¹² Yaw, Yesu aa guzlar saya, a ləvey: «Ya fa ləvkwar fara fara, ta pas nga sariya na, Gazlavay a da sərdara banay ta ndəhay daa berney a ηgene ma fəna nga ndəhay daa berney nga *Sadawm.»

Yesu a wuzda banay ma da sawa a ray ndəhay ma təbmara mey anga ba
(Matiye 11.20-24)

¹³ «Haya! ndəhay da slala Kwarazin, banay a sawa la a ray akwar. Haya! ndəhay da slala Betsayda, banay a sawa la a ray akwar. Ya ta key maazla hay la da wuzlah akwar. Da ndəhay daa berney nga Tir ta nga Sidanw ta hətmatar maazla hay a la na, anja ta mbəɗdamara menjey ata sem dəga zleezle, anja ta kəzlam zana nga sak meefərey vaw sem fa vaw, asaya, anja ta pətkwalam sem daa bebəɗes nga wuzwa na, ata ta mbəɗdamara menjey ata da bəla cay.¹⁴ Da ray ηgene, ta pas masa Gazlavay ma da ka sariya da ray bəla na, Gazlavay a da sərdakwar banay ma fəna nga ndəhay daa berney nga Tir ta nga Sidanw.¹⁵ Akwar, ndəhay da Kapernayum may, ka wulkam na, Gazlavay a ηgəlkwar la a vad daw? Ara kəne ba. Sasəkar jak, a da kəzlakwar aa slam nga ndəhay maməɗtakaya.»

¹⁶ Yesu a ləvtar a gula anga hay: «Ndaw masa fa cənkwar mey na, a key ηgene, a cənya mey may. Ndaw masa ma təba mey akwar ba na, a key a təbey mey adaw ba may. Asaya, ndaw ma rəsyə na, a key ηgene a rəsa ndaw ma slərɗiwa.»

Ndəhay kwakwar maasala a ray a cew heyey a vəhmawa da pəkey

¹⁷ Ndəhay meslərey hay kwakwar maasala a ray a cew heyey, a vəhmawa ta meesəmey ga, a ləvmar a Yesu: «Bay Mahura, daa masa ala faa guzlam ta mezəley akah na, kwa malula hay may a cənmandar mey.»

¹⁸ Yesu a mbəɗɗatara, a ləvtar: «Yah, ya ta hətar *Satan la fa təɗwa anda mezəmey nga var ma kawa da vad ηgada

10:9 10.9, 11 11.2 **10:11** 10.11 SNM 13.51; 18.6 **10:12** 10.12 Mt 10.15
10:13 10.13-14 Iz 23.1-16 **10:15** 10.15 Iz 14.13, 15 **10:16** 10.16 9.48; Mt 18.5; Mk 9.37; Jan 13.20 **10:17** 10.17 9.10; Mk 6.30

hwayak. ¹⁹ Yaw, jøkam sləmay, ya ta vəlkwar gədaŋ la ŋga pey salay a ray zezekw hay ta arac hay, asaya, ya ta vəlkwar gədaŋ la ŋga fəna gədaŋ ŋga masa-gəra hay ŋga Bay Gazlavay tabiya. Kwa cek fa da hətfakwar daa ba. ²⁰ Ama ka da sasəsam maja malula hay ma cənmakwar mey ba. Sasəsam na, maja mezəley akwar hay mawuzlalatakaya da gazlavay da vad.»

*Yesu a kar suse a Gazlavay ta meesəmey
(Matiye 11.25-27; 13.16-17)*

²¹ Wure wure ŋgene, *Mesəfney ŋga Gazlavay a vələr meesəmey a Yesu. Ta', Yesu a həlma Gazlavay, a lövey: «Waa Papay Bay Gazlavay, ndaw ma wa slam da vad ta da hwayak, ya fa kaka suse, maja ka ta wuzdərwa maaya akah la a ndəhay ma səra cek ba anda bəza hay mecəhe hay. Ama ŋgada ndəhay masa ta lenjgesl ma səra cek na, ka ta bəda maaya ha sem fa ata. Ahaw Papay, maja ta mbafaka sem ŋga ka kəne.»

²² Ta', a ləvtar a ndəhay: «Papay ta vəldatiwa cek hay tabiya sem asi har adaw. Kwa ndaw pal ma sərya, yah, *Bəz ŋga Ndaw na, daa ba, si Papay. Asaya, kwa ndaw pal ma səra Papay daa ba may, si yah, Bəz aŋga, lenj ndəhay masa yah ma wudəy ŋga wuzdatara.»

²³ Fa dəba ha, ta', a mbədey dey ŋgada fa gula aŋga hay, a ləvtar ŋgada ata taava ata: «Maaya ŋga Gazlavay aa da ray akwar maja akwar ma hətmar cek masa Gazlavay ma ka kefe ta dey akwar. ²⁴ Ama ya fa ləvkwar, ndəhay ma təla mey ŋga Gazlavay zleezle ta bay hay ga, ta wudam la ŋga hətmar cek masa akwar ma hətmar kefe, ama ta hətmar daa ba. Ta wudam la ŋga cəndamara cek masa akwar ma cəndamara kefe, ama ta cəndamara daa ba.»

Mey-menġey ta ndaw Samari

²⁵ Fetefe na, *ndaw maa sərkada kwakwas ŋga Mawiz daha, a wudəy ŋga jada Yesu. Ta', a sləkdey, aa cəfda, a ləvar: «Bay adaw, ya da key amba ya hətey heter mendəvey ba na, me?» ²⁶ Yesu a mbəddara, a ləvar: «Mawuzlalakaya daa kwakwas aləkwa na, kwariya? Masa kah ma janġa na, ka cənda na, kwara?» ²⁷ Ndaw aha, a mbəddara a Yesu, a ləvar: «Mey a, a lövey: “Si ka wudə Bay Gazlavay akah ta mevel akah cəpa, ta mesəfney akah cəpa, ta gədaŋ akah cəpa, ta lenjgesl akah cəpa. Si ka wudə meseembew akah anda kah ma wudə ray akah.”» ²⁸ Yesu a mbəddara, a

løvar: «Yawa, ka ta mbəfdiwa la maaya kalah. Daw ta ka kəne, ka hətəy heter mendəvey ba la.»

²⁹ Ama ndaw aha a wudey amba a bəla hwaray daa dey anġa. Da ray nġene, aa cəfda Yesu saya, a løvar: «Meseembew adaw na, wa?»

³⁰ Yesu aa guzlar saya, a løvar: «Ndaw *Jəwif daha a sləkdey da *Jeruzelem, a daw a Jerikwaw. A da daw na, a har mayal hay. Mayal hay a, a kəzamarā, a kədmara, a mbəkdamara hədek hədek nġa məcey. ³¹ Fa dəba ha, *ndaw ma ka kwakwas nġa Gazlavay daha, a daw taa cəved e nġene. A hətər ndaw masa mayal hay ma kədmara heyey. Ta', a zlenġedey, a daw dərən ta anġa. ³² Fa dəba ha, ndaw ma ka kwakwas nġa Gazlavay mekele daha masa da wuzlah ndəhay nġa *Levi, a daw taa slam aha nġene may. A hətər ndaw masa mayal hay ma kədmara heyey na, ta', a zlenġedey a daw dərən ta anġa, anda ndaw nġeeme heyey saya na, gway. ³³ Ama, ndaw-məlak daha, ara ndaw *Samari, fa daw taa cəved e nġene may. A wusey a cakay ndaw masa mayal hay ma kədmara keđe na, a nəka na, a kar dey-ceceh. ³⁴ Ta', a nġəchey a cakay a, a kar mal ta slalak fa mbəlek e, a mbəzra. Fa dəba ha, a la a ray zənġwaw anġa, ta', a handa aa way meney nġa məlak hay, a nəkfar dey. ³⁵ Pepərek e, masa fa da daw aa mepəkey anġa na, ta' a vəlar dala a bay nġa way a, a løvar: "Nəkfayawa dey fa ndaw keđe. Pas masa ya ta vəhwa cay daa mepəkey adaw na, yah ta ray adaw, ya pəlkawa cek tabiya masa ka maa zəfda maja anġa fa dəba adaw la."» ³⁶ Masa Yesu ma ndəvda mey-menġey keđe cay na, ta', aa cəfda *ndaw maa sərkada kwakwas nġa Mawiz heyey, a løvar: «Da wuzlah ndəhay maakar keđe na, meseembew nġa ndaw masa mayal hay ma kədmara kaa na, wa?» ³⁷ *Ndaw maa sərkada kwakwas nġa Mawiz a, a mbəddara, a løvar: «Meseembew anġa na, ara ndaw masa ma sərkar dey-ceceh.» Ta', Yesu a løvar: «Daw, ta ka kəne.»

Mey da ray ata Marta ta Mari

³⁸ Ata Yesu ta gula anġa hay fa diyam daa cəved. Masa ata ma wusam la a slala daha na, fetede, nġwas daha mezəley Marta, a nġəla Yesu a way anġa. ³⁹ Dam-mamaha daha, mezəley *Mari, cəkwam! a nġey a cakay Bay Mahura, fa jəkey sləmay fa mey anġa masa aa ma kada. ⁴⁰ Marta fa key sləra hay mekele mekele ga daa hejek. Ta', a sawa fa Yesu, a

10:28 10.28 Lev 18.5; Rm 10.5; Gal 3.12; Jan 13.17 **10:33** 10.33 Samari: Mt 10.5; Lk 9.52; 17.11, 16; Jan 4.9, 39-40; SNM 1.8; 8.1, 5, 14-17, 25; 9.31 **10:38** 10.38-40 Jan 11.2; 12.2-3

løvar: «Bay Mahura, dam-mama adaw a mbækdatiwa sløra hay tabiya a ray adaw anda kedfe na, a mbafaka gway daw? Løvar nga sawa nga jønya.» ⁴¹ Yesu a mbæddara, a løvar: «Marta, Marta, ka fa hæba ray akah maja ka fa key cek hay mekele mekele ga. ⁴² Ama cek pal mahura nga key daha. Ara cek masa Mari ma ka kedfe. Ndaw ma gwa nga tæka daa ba.»

11

Mey da ray medørey-dangay
(Matiye 6.9-13; 7.7-11)

¹ Ta pas langar daha, Yesu fa dørey dangay daa slam daha. Masa aa ma ndøvda cay na, ndaw pal dasi gula anga hay, aa cæfda, a løvar: «Bay Mahura, sasærkadandar medørey dangay anda *Jan maa særkadata gula anga hay cey.» ² Yesu a løvtar: «Da akwar fa døram dangay na, løvam:

Papañ Bay Gazlavay,

anja ndøhay tabiya nga namaka ray

maja kah na, Bay Gazlavay pal.

Maaya na, ka wa bøla tabiya.

³ Vøldar cek mezømey nga wusndar fa ðar a, fa ðar a.

⁴ Mbækdandara mebørey ala,

maja ala may, ala fa mbækdamatara mebørey

nga ndøhay ma kamandar cek maaya ba.

Jæfndar amba cek a batandar nga key mebørey ba.»

⁵ Yesu aa guzltar mey-mengey da ray medørey-dangay a gula anga hay, a løvtar: «Da ndaw da wuzlah akwar, jam anga daha na, a daw fa anga ta wuzlah-tavad amba aa cæfda, a løvar: “Jam adaw, vølya peñ maakar yaa døfey cey, ⁶ maja mandala adaw ta sawa la da pøkey ta way adaw, ama cek mezømey amba ya vølar daa ba.” ⁷ Jam anga ha a mbæddara da way da way, a løvar: “Ka sørdaya banay ba. Ya ta gørcæ mey-mbew cay, ala manatakaya ta bøz adaw hay. Ya gwa ya slækdey amba ya vølka peñ ba.”» ⁸ Yesu a løvey saya: «Ya fa løvkwar kwa ndaw aha, a wufey nga slækdey ba na, a slækdey la. A da slækdey na, maja ata jam ba, ama maja da ta vølar daa ba na, jam anga ha a daa cæfda dey ga, hwaray fa da kar daa ba. Anda kedfe, a vølar cek tabiya masa jam anga ha ma wufey la.

⁹ «Yah na, ya fa løvkwar: Cacæfðam cek fa Bay Gazlavay, a vøldakwara la. Søpam cek fa Gazlavay, ka høtam la. Zølam

11:1 11.1 5.16 **11:2** 11.2 ka wa bøla tabiya (mewey nga Gazlavay da ray ndøhay): 4.43; 9.2, 62; 10.9, 11; 17.21; 19.11; SNM 1.6-8; 19.8; 28.23, 31 **11:3** 11.3 12.22-32 **11:7** 11.7-8 18.5

fa mey-mbew, a wurkwara la, ¹⁰ maja kwa waawa maa cəfdafar cek na, a vəlar la. Kwa waawa ma səpey cek fa vəda na, a hətey la. Kwa waawa ma zəley fa mey-mbew na, a wurara la.

¹¹ «Akwar papaŋ ŋga bəza hay, da bəzey akah aa cəfdafaka ewet na, ka vəlar zezekw la daw? ¹² Yaw, da aa cəfdafaka slesled na, ka vəlar arac la daw? ¹³ Akwar ndəhay malamba hay ma!, ka səmra ŋga vəley cek maaya ŋgada bəz akwar hay. Da kəne na, kaa wara Papakw akwar Bay Gazlavay da vad a vəltar Mesəfney anŋa ŋgada ndəhay masa maa cəfdafamara ba na, kwara?»

*Gədan ŋga Bay Gazlavay a fəna gədan ŋga Satan
(Matiye 12.22-30; Mark 3.20-27)*

¹⁴ Pas pal daha Yesu a bəley malula da ray ndaw ma gwa meeguzley ba daha. Masa anŋa ma bəla malula ha cay na, ndaw a, aa guzley dəba. Ndəhay tabiya fetede a rəzlam. ¹⁵ Ama ndəhay siya da wuzlah ata a ləvam: «Ara *Beyelzebul, bay ŋga mesəfney maaya ba hay ma vəlar gədan ŋga bəley malula da ray ndəhay.» ¹⁶ Siya hay a səpam cəved ŋga jadamara, a ləvmar ŋga key maazla ŋga wuzda gədan anŋa a sawa ta fa Bay Gazlavay. ¹⁷ Ama Yesu a səra mewulkey ata, ta', a ləvtar: «Da ndəhay daa hwayak pal a kam vərəm da wuzlah ata na, hwayak a ŋgene a nəsey la. Daa vərəm a ŋgene, way hay a bəzlam la. ¹⁸ Da gula hay ŋga *Satan, a kam vərəm da wuzlah ata na, kaa wara Satan a, a da cəmtar ray ŋga wey da ray ata na, kwara dəba wura? Yaw, ya ləvkwara anda kedə na, maja ka ləvam ya bəley malula da ray ndəhay ta gədan ŋga Beyelzebul. ¹⁹ Da kəne na, kaa gula akwar hay a bəlam malula ta gədan ŋga wa? Ka ləvam ta gədan ŋga Gazlavay, ba diya? Da ray ŋgene, gula akwar hay a, a wuzdamakwara la mey akwar ŋgene ara anŋa ba. ²⁰ Fara fara, ya bəley malula da ray ndəhay na, ara ta gədan ŋga Gazlavay. A wudəy ŋga ləvey, Gazlavay fa wey da ray akwar cay.»

²¹ Yesu a ŋgey mey saya, a ləvey: «Da ndaw masa-gədan fa jəda zleley anŋa ta cek ma ka vərəm na, zleley anŋa ha mapakaya maaya maaya, cek a wusfar ba. ²² Ama da ndaw mekele ma fəna ta gədan a sawa, a kərza ndaw aha, a pəslara cek mekey vərəm anŋa hay tabiya masa anŋa ma jəda zleley anŋa ta anŋa. A həlra zleley anŋa tabiya, a wunkatara a ndəhay anŋa hay.

²³ «Yaw, da ndaw aa ta yah daa ba na, ŋgene ndaw a ara masa-gəra adaw. Asaya, da ndaw a gəmey ŋga jənya

nga bəcwa ndəhay aa cəved adaw ba na, a key ηgene, aa wadatar ray.»

*Mey da ray malula ma vəhwa a ray ndaw saya
(Matiye 12.43-45)*

²⁴ Yesu aa guzley saya, a ləvey: «Da masa malula ta bey sem da ray ndaw na, a daw a pəkey da ley saw, a səpey slam nga məskey vaw. Da ta hətey daa ba na, a ləvey: “Nɣama ya vəhey aa slam adaw masa yah ma bawa da hwad a heyey.” ²⁵ Ta’, a vəhey a ray ndaw aha aa slam anɣa heyey, a hətfar slam aha maɗiykaya maaya maaya. ²⁶ Da ray ηgene, malula ha a daw a ηgəlwa malula hay mekele maasala ma fənmara ta həma. A samawa a ray ndaw a heyey. Anda keɗe, ndaw aha a da sərey banay ma fəna masa ηgeeme.»

Maaya ηga Gazlavay na, aa da ray wa hay wa?

²⁷ Masa Yesu ma kada mey keɗe la na, ηgwas daha da wuzlah ndəhay makustakaya kaa heyey, aa guzlar a Yesu, a ləvar: «Maaya ηga Gazlavay aa da ray ηgwas masa kah ma yawa da hwad anɣa, kah ma sa dəwa anɣa!» ²⁸ Yesu a ləvar: «Ahaw, ama maaya ηga Gazlavay ηga sawa jak na, a ray ndəhay ma jəkam sləmay fa mey ηga Gazlavay, ma kadamara sləra ta mey a.»

*Ndəhay aa cəfdamara Yesu ηga key maazla
(Matiye 12.38-42)*

²⁹ Ndəhay ga fa kusmawa ma fəna ma fəna a cakay Yesu. Yesu a zlar ηgaa guzley, a ləvey: «Ndəhay masa wure keɗe kaa na, maaya ba hay. Aa cəfdam maazla masa da gazlavay da vad ma wuzda ara Gazlavay ma slərɗiwa. Ama a hətmar maazla ha daa ba, si maazla anda ma key ta *Jawnas, *ndaw ma təla mey ηga Gazlavay zleezle. ³⁰ Anda Gazlavay ma ka maazla ta Jawnas zleezle ηgada ndəhay daa berney ηga Niniwe, ara kəne may ta yah, *Bəz ηga Ndaw, ma da tərey ηga maazla ηgada ndəhay masa wure keɗe. ³¹ Yaw, ta pas sariya masa Gazlavay ma da ka na, ηgwas ma key bay daa hwayak ηga Saba zleezle, a lacawa ray la ηga mbəɗkwar ray, akwar ndəhay masa wure keɗe, maja anɣa na, a sawa da dərən ηga cəney mey maaya ηga Bay *Salaməɲw, ndaw ta lenɣesl. Nəkmara, da wuzlah akwar feɗe, ndaw ma fəna Bay Salaməɲw daha! ³² Ta pas sariya na, ndəhay daa berney ηga Niniwe heyey, a lacamawa ray la ηga mbəɗmakwar ray, akwar ndəhay masa wure keɗe,

maja daa masa ata ma cəndamara mey nga Gazlavay masa Jawnas ma wuzdatara na, ta mbəfdamara menjey ata sem. Nəkmara, da wuzlah akwar fede, ndaw ma fəna Jawnas daha!»

Mey-menjey ta slam-mewedey
(Matiye 5.15; 6.22-23)

³³ Yesu aa guzltar ta mey-menjey: «Da ndaw ta gədey awaw la aa petərļa nga wedey slam na, a dəpa ba. Ama a pa aa slam mepey petərļa nga wadā slam daa way a, amba ndəhay ma mbəzam a hwađ a na, a hətmar dey. ³⁴ Bəz nga dey akah na, fa wadā vaw akah anda petərļa ma wadā slam. Da bəz nga dey akah anğa maaya maaya na, kah daa slam-mewedey. Ama da dey akah aa maaya ba na, nğene, kah daa ləvan. ³⁵ Anda keđe, wey vaw anja slam-mewedey daa kah nğene na, nğa tərey nğa ləvan ba. ³⁶ Ama da vaw akah cəpa aa daa slam-mewedey, ləvan da hwađ a kwa kuset kədey daa ba na, nğene, vaw akah a da wedey anda petərļa ma wadā slam.»

Yesu a mbəđtar ray a Fariza hay ta ndəhay maa sərkada kwakwas nğa Mawiz
(Matiye 23.1-36; Mark 12.38-40)

³⁷ Masa Yesu ma ndəvda meeguzley cay na, ndaw Fariza daha a zəla a way anğa nğa zəmey đaf. Ta', a diyam, a mbəzam a way a, a njam nğa zəmey đaf. ³⁸ Ndaw Fariza heyey a rəzley, maja Yesu ta pəra har nğa zəmey đaf anda kwakwas nğa *Fariza hay a ma ləvey na, daa ba. ³⁹ Bay Mahura a ləvar: «Akwar Fariza hay, akwar fa pərmara dəba nğa vəley nğa đaf ta vəley nğa yam akwar hay maaya maaya nğa səpey kwakwas akwar, ama mevel akwar na, marəhkaya ta mewulkey nğa leley, ta nğa key maagway. ⁴⁰ Akwar ndəhay marəzltakaya hay! Gazlavay ma karawa dəba nğa cek hay a na, ta karawa hwađ a daa ba daw? ⁴¹ Ama da ka wuđam mevel akwar nğa tərey maaya fa mey nğa Gazlavay, maaya na, ka vəlmatar cek masa daa vəley akwar hay a masa-viya hay.

⁴² «Banay a sawa la a ray akwar, akwar Fariza hay. Akwar fa wunkamata cek akwar hay tabiya slam kuraw, akwar fa vəldamara slam pal a Gazlavay, kwa cek hay mecəhe mecəhe ma cərda lar, ta gwaslaf nğa lar mekele mekele daa jerne akwar hay na, akwar fa wunkamara kəne may. Ama ka sərfadamara nğa key cek maaya ta cəved e a ndəhay ba. Asaya, ka wuđmara Gazlavay ba. Sasəkar jak,

cek hay a ηgene na, ara cek hay maaya ηga key. Ka da mbəkdamara ηga key cek hay siya hay ba may.

⁴³ «Banay a sawa la a ray akwar, akwar Fariza hay, maja daa *way-mewuzey-mey ηga Gazlavay na, ka wuɗam menjey aa slam maaya masa fa mey. Ka wuɗam ndəhay a camakwar har ta meney ray fa mey ηga ndəhay makus-takaya ga. ⁴⁴ Banay a sawa la a ray akwar, akwar Fariza hay, maja akwar anda cəvay hay ma hətəy ba masa ma katar hezey a ndəhay ma diyam ta ray a, kwa a sərmara ba.»

⁴⁵ Ndaw pal da wuzlah *ndəhay maa sərkada kwakwas ηga Mawiz a mbəɗɗara, a ləvar: «Waa bay ala, kaa guzley anda keɗe na, a key ka cəɗndar ala ndəhay maa sərkada kwakwas may.»

⁴⁶ Yesu a mbəɗɗara, a ləvar: «Akwar ndəhay maa sərkada kwakwas ηga Mawiz may, banay a sawa la a ray akwar, maja akwar fa bamawa kwakwas hay maadakw a maadakw a masa ndəhay a gwamara ηga səpmara ba. Ama ka gəmam ηga jənmata ηga səpey kwakwas hay a, kwa nekəɗey ba. ⁴⁷ Banay a sawa la a ray akwar, akwar masa ma ləmamata cəvay hay ηga ndəhay ma təla mey ηga Gazlavay zleezle ηga mbey, anja ara papan ηga papakw akwar hay ma kəɗmata jak. ⁴⁸ Anda keɗe, akwar fa wuzdamara a ndəhay sləra ηga papan ηga papakw akwar hay ηgene na, a mbafakwar. Ata na, ta kəɗmata ndəhay ma təla mey ηga Gazlavay zleezle sem, akwar kwa ka ləmamata cəvay ata hay maaya maaya. ⁴⁹ Maja ηgene, Bay Gazlavay ma səra cek tabiya, a ləvey: “Ya da slərwa ndəhay ma təla mey aɗaw, ta ndəhay meslərey. A da sərdamata banay ta siya hay da wuzlah ata, siya hay may, a da kəɗmata vagay.”

⁵⁰ Da ray ηgene, mambaz ηga ndəhay ma təla mey ηga Gazlavay tabiya masa ma məcam dəga ηga mezley ηga bəla na, a hufey la a ray ndəhay masa wure keɗe. ⁵¹ A kəɗam teesəɗ na, *Abel. Asaya, ta kəɗam ndəhay mekele mekele la haa kasl fa *Zakari masa ata ma kəɗmara daa walaη ηga slam-mefəkey cek ηgada Gazlavay ta *Way ηga Gazlavay. Fara fara, ya fa ləvkwar, Gazlavay a katar sariya la a ndəhay masa wure keɗe maja ata.

⁵² «Akwar ndəhay maa sərkada kwakwas ηga Mawiz, banay a sawa la a ray akwar maja akwar ta ɓadamara mey ηga Gazlavay sem fa ndəhay anda ndaw ma bəy lekəle ηga mey-slam.»

⁵³ Masa Yesu ma bawa la da way ndaw Fariza heyey na, ndəhay maa sərkada kwakwas nga Mawiz ta Fariza hay, mevel a catar ga. Ta', aa cəfdamara da ray mey hay mekele mekele, ⁵⁴ amba da ta hətam mey maaya ba la na, a dadədfamar mey.

12

*Yesu a patar lengeſl a gula anga hay
(Matiye 10.26, 27)*

¹ Daa masa Yesu fa kam yawa ta *Fariza hay len ta *ndəhay maa sərkada kwakwas nga Mawiz heyey na, ndəhay ga ta kusam la, a key gabal weewe, kwa slam nga lecey daa ba. Yesu aa guzltar a gula anga hay d'agay, a ləvtar: «Wam vaw fa cek ma həsla peŋ nga Fariza hay. Anda meləvey, wam vaw fa Fariza hay, ndəhay masa ta neneh cew. ² Cek tabiya masa ndəhay ma b'adamara, a wuzwa la a palah, cek hay masa ndəhay ma sərmara ba na, a sərmara la. ³ Maja ngene, cek tabiya masa akwar ma kadamara ta tavađ daa ləvan na, ndəhay tabiya a cəndamara la taa pas. Mey tabiya masa akwar maa səkdamara taa səkey da ver na, a wuzdamara la ta gədan daa slam metəley mey.»

*Maaya nga zlurey na, ta wa?
(Matiye 10.28-31)*

⁴ Yesu a ləvtar: «Ya fa ləvkwar, jam ađaw hay, ka da zluram ta ndəhay ma da kəđmakwar vagay ba, maja a da kəđam na, vaw akwar daada gway. Fa dəba ha, fa da gwamara nga kamakwar cek mekele daa saba. ⁵ Amba ya wuzdakwara ndaw masa akwar ma da zluram ta anga. Zluram na, ta Gazlavay gway, maja ta kəđkwar vagay la na, fa dəba ha, a gwa nga kəzlakwar aa vəgeđ nga awaw magaza saya. Fara fara, ya fa ləvkwar, zluram ta anga.

⁶ «Diyan mecəhe mecəhe zlam na, a gwa nga həđkedey dala cew daada, ba daw? Ama Gazlavay a sərta diyan hay a pal pal tabiya. ⁷ Akwar may, kwa engwec nga ray akwar hay na, masləftakaya pal pal tabiya. Ka da zluram ba! Akwar na, Gazlavay a wudkwar a fəna diyan hay mecəhe mecəhe ga ngene, ba daw?»

*Mey da ray mekey sede da ray Yesu
(Matiye 10.32-33; 12.32; 10.19-20)*

⁸ Yesu a ləvtar saya: «Ehe, ya fa ləvkwar saya, kwa waawa ma ləvey fa mey nga ndəhay, anga ndaw ađaw na,

ngene, yah, *Böz nga Ndaw, ya da lövey fa mey nga maslan hay nga Gazlavay da vad ta pas sariya, anga ndaw adaw may. ⁹ Ama ndaw ma lövey fa mey nga ndəhay a sərya ba na, yah, Böz nga Ndaw, ya da lövey fa mey nga maslan hay nga Gazlavay ta pas sariya, ya səra ba may.

¹⁰ «Kwa waawa maa guzley mey maaya ba da ray adaw, yah, Böz nga Ndaw na, Gazlavay a mbəkdara mebərey anga la. Ama ndaw ma cəda *Mesəfney nga Gazlavay na, Gazlavay fa da mbəkdara mebərey anga daa ba səlak.

¹¹ «Da a handamakwar aa *way-mewuzey-mey nga Gazlavay nga key sariya, da daa ba, fa mey nga ndəhay mahura hay ta bay hay amba a kamakwar sariya na, ka da zluram ba, ray akwar a da həbey da ray mey masa akwar ma da mbəddamatara nga löhey ray akwar ba.

¹² Mey masa akwar ma da mbəddamatara na, Mesəfney nga Gazlavay a wuzdakwara la ta pas ngene.»

Mey-mengey ta ndaw masa-zleley marəzlkaya

¹³ Ndaw pal da wuzlah ndəhay ga da cakay Yesu heyey a ləvar: «Bay adaw, ləvar a məlma adaw mahura nga wunkandara zleley nga papa ala ma mbəkdandara cey!»

¹⁴ Yesu a mbəddara, a ləvar: «Jam adaw, ma paya nga dəsley mey da wuzlah akwar ta nga wunkakwara zleley akwar na, wa?» ¹⁵ Fa dəba ha, aa guzlar a ndəhay tabiya, a ləvtar: «Wam vaw, ka da səpam nga key zleley ta har akwar ba. Kwa ndaw, anga ta zleley ga na, heter anga fa da njeý maja zleley a na, daa ba.»

¹⁶ Ta', aa guzlar mey-mengey, a ləvtar: «Ndaw daha, anga ta zleley ga. Ley anga hay ta kam cek la maaya maaya.

¹⁷ Anda kefe, ndaw aha, a wulkey, a lövey: “Slam nga pata cek adaw hay daa saba. Ya da key na, kwara?” ¹⁸ Fa dəba ha, a lövey: “Aha! Ya səra cek masa yah ma da ka. Ngama ya həbta wuded adaw hay cəpa, ya ləmta mahura mahura, ya bəcta daw adaw ta zleley adaw hay tabiya a hwad a. ¹⁹ Fa dəba ha, ya da lövey: Zleley adaw fa da ndəvey daa ba, a key mevey weewe la. Ya da məskey vaw, ya da zəmey cek, ya da sey cek, ya da njeý daa wiya.”

²⁰ «Ama Gazlavay a ləvar a ndaw aha: “Kah na, ndaw marəzlkaya, dasi tavad kefe, ya da la mesəfney akah. Zleley masa kah ma bəca ngene na, ngada wa?”»

²¹ Da ray ngene, Yesu a wuzdatara mey a, a ndəhay da cakay a heyey, a ləvtar: «Ndəhay masa ma bəcam zleley da

bøla keđe ngada ata ray ata na, a key ngene, a kam cek ma mbafar a Gazlavay ba. Ata letek ta ndaw a keđe.»

*Mey da ray mepey Gazlavay nga ndaw fara fara
(Matiye 6.25-34)*

²² Fa dōba ha, Yesu aa guzltar a gula anğa hay, a lōvtar: «Maja ngene, ya fa lōvkwar fara fara, daa menjey akwar na, ray akwar a da hōbey da ray cek mezōmey ta cek mesey ba. Asaya, ray akwar a da hōbey da ray zana nga kōzley fa vaw akwar ba. ²³ Ya lōvkwar anda keđe na, maja cek mezōmey a fōna heter akwar ba, zana may, a fōna vaw akwar ba.

²⁴ «Yaw, wulkam da ray dīyan hay cey! Fa slōkam daa ba, fa ngōmam daw daa ba, kwa wudedf ata hay daa ba, ama Gazlavay fa vōltar cek mezōmey cōnga. Akwar na, ka fōnmata dīyan hay ba daw? ²⁵ Da wuzlah akwar ndaw ma gwa nga pey kwa dār pal a ray dār anğa da bøla ta mewulkey anğa na, wa? ²⁶ Da ka gwamara mekey cek mecōhe ba na, ka hōbam ray da ray cek hay mekele na, maja me?

²⁷ «Nōkmara meefekwey hay da ley cey! Aa fakwam na, kwara? A kam slōra ba, a cam zana ba, ama ya fa lōvkwar, kwa Bay *Salamanjw zleezle ta zleley ga ta gwa nga kōzley zana ma mbey anda meefekwey pal na, daa ba. ²⁸ Gazlavay a ka amba kusaf aa fekwey tasana, ama mandaw na, kusaf a, a wewurey. Da Gazlavay fa key cek maaya ngada kusaf masa awaw ma da wawura anda keđe na, Gazlavay a nōkfakwar dey ma fōna kusaf a ngene daa ba daw? Akwar masa ma pamara Gazlavay nga ndaw akwar fara fara ba ngene, sōmara Gazlavay a kōzlkwar zana la ma fōna meefekwey hay a. ²⁹ Anda keđe, ray akwar a da hōbey mandaw mandaw da ray cek mezōmey ta da ray cek mesey ba. Ka da zluram maja cek hay a ba. ³⁰ Ma hōbam ray maja cek hay a ngene na, ndōhay da bøla keđe masa ma sōmara Gazlavay ba. Ama akwar na, Papakw akwar, Bay Gazlavay, a sōra cek masa akwar ma wudam. ³¹ Anda keđe, sōpam na, Gazlavay nga wey da ray akwar. Fa dōba ha, Bay Gazlavay a vōldakwara cek hay siya la may.»

*Mey da ray mebōcey zleley da gazlavay da vad
(Matiye 6.19-21)*

³² Yesu a lōvtar a gula anğa hay: «Akwar na, ga daa ba anda tōban hay masa nguyer kōdēy, ama ka da zluram ba, maja ta mbafar la a Papakw akwar amba a vōlkwar cek hay maaya masa anğa ma dīytara ngada ndōhay masa

anğa fa wey da ray ata. ³³ Hədkadamata cek akwar hay, wunkamatara dala ha a masa-viya hay. Səpam nğa bəcey zleley * na, aa slam masa menjey nğa sərmataw da vad. Fetede zleley akwar a fa da ndəvey daa ba. Anda kedə, mayal hay a gwamara nğa lalamara daa ba, kwa maaca a gwa nğa nəsa ba. ³⁴ Sərmara, daa slam masa zleley akwar aa da hwad a na, mevel akwar may aa fetede.»

Mey da ray mewey vaw nğa key sləra nğada Gazlavay

³⁵ Yesu a ləvtar: «Njam vaw madiykaya mandaw mandaw nğa key sləra nğada Gazlavay. Ka da məcmata petərļa akwar hay ba, ³⁶ anda ndəhay ma ka sləra ma səkwmarə bay nğa way ma lawa daa gwagway nğa kwakwa ta tavad. A səkwmarə amba a wurmarə mey-mbew fiyaw da masa ta vəhwa cay, fa zəley fa mey-mbew. ³⁷ Da bay nğa way a sawa, a hətfatar ata ta dey na, meesəmey daha nğada ndəhay ma ka sləra hay a. Ya fa ləvkwar fara fara, bay nğa way a, a pa zana nğa sləra fa vaw, a zəltərwa, a njadata, a vəltar cek mezəmey. ³⁸ Kwa a vəhwa ta wuzlah-tavad, kwa ta slam nğaa pərek, a hətfatar ata ta dey na, meesəmey daha nğada ndəhay a.

³⁹ «Jəkam sləmay maaya maaya, da bay nğa way a sərə dər masa ndaw-mayal ma da daw a way anğa na, a mbəkda ndaw-mayal a nğa sləna way anğa ha la daw? ⁴⁰ Yaw, akwar may, wam vaw maaya maaya maja yah, *Bəz nğa Ndaw, ya da vəhwa na, kwa ka sərmara dər a ba.»

*Mey da ray ndaw ma ka sləra maaya ta maaya ba
(Matiye 24.45-51)*

⁴¹ *Piyer aa cəfdə Yesu, a ləvar: «Bay Mahura, kaa guzley ta mey-mənğey kedə na, nğada ala daw, nğada ndəhay tabiya daw?»

⁴² Bay Mahura a mbəddara, a ləvar: «Ndaw ma ka sləra maaya ta lənğesl na, wura? Ndaw ma ka sləra maaya ta lənğesl na, ara ndaw masa bay anğa ma da pa nğa mahura da ray ma ka sləra anğa hay cəpa, amba a vəltar cek mezəmey daa masa may fa catar. ⁴³ Da masa bay anğa ha a sawa a hətfar anğa fa ka sləra ha na, ndaw ma ka sləra ha aa səmey la. ⁴⁴ Ya fa ləvkwar fara fara, bay anğa ha, a da vəldara zleley anğa hay cəpa a har anğa amba a nəkfər dey.

12:32 12.32 Iz 41.14; Lk 22.29 * **12:33** 12.33 zleley: Yesu a wudəy nğa ləvey na, da ka fa kar cek ma mbafar a Gazlavay na, mawurbay akah mapakaya da gazlavay da vad anda zleley akah məbəkəyaya a nəsey ba, a ndəvey ba. **12:33** 12.33 Mt 6.19; 6.20; Lk 11.41; 18.22; SNM 2.45; 4.34-37; Kwa 3.1-2 **12:35** 12.35-36 Mt 25.1 **12:36** 12.36 CWJ 3.20 **12:39** 12.39 Mt 24.43 **12:40** 12.40 Mt 24.42 **12:42** 12.42-44 19.17-19

45 Ama ndaw ma ka slëra masa ma ley mewulkey anğa wal na, a løyey: “Bay adaw fa da vëhwa gweegwe daa ba.” Ta’, a kädta ndëhay ma ka slëra hay mezële hay ta manğusa hay. A zëmey cek, a sey wuzam, a wey. 46 Fa dëba ha, bay anğa ha na, a da vëhwa ta pas masa ndaw ma ka slëra ha fa wulkey da ray a daa ba, asaya, kwa fa da sëra ler e daa ba. Bay anğa ha a da bëla da way anğa, a da sërda banay anda anğa ma da sërdata banay ta ndëhay ma tëba mey nga Gazlavay ba.»

47 Yesu a lëvar saya: «Ndaw ma ka slëra masa ma sëra cek masa bay anğa ma wudëy, ama a wey vaw fa slëra anğa ba, asaya, a key cek masa anğa ma lëvar ba na, ndaw aha, a hëtey mekädëy ga la. 48 Da ndaw ma ka slëra lanğar a sëra cek masa bay anğa ma wudëy ba, ama ta key cek maaya ba la tädë nga kädëy na, a da hëtey mekädëy nekädëy gway. Ndaw masa Gazlavay ta vëlar cek la ga a har anğa na, a daa cëfdafar ga kënë may. Ndaw masa Gazlavay ta vëlar slëra mahura la nga key na, a daa cëfdafar nga ka slëra ha maaya maaya ma fëna.»

*Mey da ray ndëhay ma da wunkam dëy maja Yesu
(Matiye 10.34-36)*

49 Yesu a lëvtar a gula anğa hay: «Ya sawa na, nga pey awaw fa bëla kedë. Ya wudëy na, awaw a, a gädëy dëga wure kedë. 50 Si a sërdamaya banay ga kasl fa memäcey †. Ray adaw fa hëbey kasl pas masa banay a ma da ndëvey.

51 Ka wulkam ya sawa na, ya handawa zazay a bëla daw? Kay! Kënë ba. Ya fa lëvkwar, ya sawa nga wunkey ndëhay.

52 Dëga wure kedë, ndëhay zlam da way, a wunkam la, maakar a cëmam la a ray cew, cew a cëmam la a ray maakar.

53 Yaw, bay nga way a wudkam dëy la ta bözey anğa, bözey a wudkam dëy la ta papaha, ngwas a wudkam dëy la ta dam anğa, dam a wudkam dëy la ta mamaha, maman nga bözey a wudkam dëy la ta ngwas nga bözey anğa, ngwas nga bözey a wudkam dëy la ta maman nga zel e.»

*Mey da ray mesërey cek ma da key wure kedë
(Matiye 16.2-3)*

54 Yesu a lëvtar a ndëhay ga da cakay a: «Anja ka hëtmar gazlavay nga var fa lawa ta mey-anğwa ‡, wure ngene ka lëvam: “Var fa sawa.” Fa dëba ha, var a, a pey fara. 55 Da ka

12:47 12.47 Jak 4.17 † 12:50 12.50 banay ga kasl fa memäcey: Ta mey Gërek, a løyey «ya da hëtey baptem.» 12:50 12.50 Mk 10.38 12:51 12.51 2.14 12:52 12.52-53 14.26; 21.16; Mt 24.10; Mk 13.12 12:53 12.53 Mi 7.6 ‡ 12:54 12.54 var fa lawa ta mey-anğwa: Daa hwayak nga Jëwif hay var a sawa na, ta dey nga Dëhwa Mediterene. Dëhwa ha anğa ta mey-anğwa nga Mafaw hay.

hötmar memed fa kawa ta dey nga Məzam § na, ka ləvam: “Mawurbay a key la.” Fa dəba ha, mawurbay a, a key fara. ⁵⁶ Akwar ndəhay masa ta neneh cew, ka gwamara nga wunkamara cek ma key da bəla ta cek ma key da gazlavay da vad, ama ka səmra cek ma key wure kefe ba na, maja me?»

Si ndaw a dīya mey ta ndaw ma wuda
(Matiye 5.25, 26)

⁵⁷ Yesu a ləvtar saya: «Akwar ta ray akwar ka səmra cek masa maaya nga key ba na, kwara? ⁵⁸ Da ndaw a wudka, akwar fa diyam cew e aa sariya na, dīymara mey a dəga daa cəved. Da daa ba na, a da handaka fa ndaw ma ka sariya, ndaw ma ka sariya ha a da vəldaka a har sewje hay. Sewje hay may, a da kəzlamaka aa fərsəne. ⁵⁹ Ya fa ləvka, ka fa da bawa daa fərsəne he daa ba səlak, si kah ma pəla dəvaz a la tabiya ndav.»

13

Mey da ray membədey menjey

¹ Daa ngene, ndəhay fetefe daha, aa guzlmara a Yesu, a ləvmar: «Bay Pilat ta kədey ndəhay *Galile la vagay daa masa ata fa həram gənaw hay ngada Gazlavay. A cəma mambaz ata ta mambaz nga gənaw hay a.» ² Yesu a mbəddatara, a ləvtar: «Ka wulkam mebərey nga ndəhay Galile hay a ngene a fəna nga Galile hay siya, maja ata ma məcam anda ngene daw? ³ Ya fa ləvkwar a fəna ba səlak! Ama da akwar ta mbəddamara menjey akwar daa ba na, akwar cəpa ka daa zədam kəne may. ⁴ Yaw, wulkam da ray ndəhay kuraw a ray a daəngafad masa way magəlkaya maazəma da slala Siləwe ma bəzlwa a ray ata heyey. Ka wulkam na, a fənmata ndəhay siya da *Jeruzelem ta mebərey daw? ⁵ Ya fa ləvkwar a fənmata ba səlak! Ama da akwar ta mbəddamara menjey akwar daa ba na, akwar cəpa ka daa zədam kəne.»

Mey-menjey ta wudez ma yey ba

⁶ Yesu ta', a nğatar mey, a ləvtar: «Ndaw daha a rəvey wudez aa ley aŋga. Fa dəba ha, a sawa amba a nğəley babəza nga wudez e, ama wudez e, ta yey babəza daa ba.

⁷ Bay nga wudez e, a ləvar a ndaw ma jəda ley aŋga ha: “Nəka wudez kefe, mevey maakar ya fa sawa amba ya nğəley babəza fa vəda, ama babəza fa vəda daa ba. Dəsla wudez e, maja fa təka slam nga maaya.” ⁸ Ama ndaw ma

§ 12:55 12.55 dey nga Məzam: Ara «sud» ta mey Nasara. 13:3 13.3 Ps 7.13
13:6 13.6 Mt 21.19; Mk 11.13

jɔɔa ley a, a mbɔɔɔara, a lɔvar: “Bay aɔaw, mbɔkda ta lɔmla keɔe ɔagay, amba ya gudha si-wurza, ya hɔlar gɔran asiya. ⁹ Da sɔfɔɔ na, a yey la kwa. Da ta yey daa ba cɔngɔ na, ka ɔɔsla.”»

Yesu a mbɔley ngwas ta pas memɔskey-vaw

¹⁰ Ta *pas memɔskey-vaw daha, Yesu faa sɔrkadata ndɔhay daa *way-mewuzey-mey nga Gazlavay. ¹¹ Ngwas daha, aa ta malula da ray mevey kuraw a ray a daangafad. Malula ha ta hurma sem. A gwa nga lecey der e ba. ¹² Masa Yesu ma hɔtar ngwas aha na, ta', a zɔla, a lɔvar: «Mamay, malula masa ma hurmaka ngene na, daa saba.» ¹³ Ta', a par har a ray. Wure wure ngene, ngwas aha ɔɔn! a lecey. A hɔlma Gazlavay.

¹⁴ Ama *bay-ray nga way-mewuzey-mey a, mevel a car maja Yesu ma mbɔley ndaw ta pas memɔskey-vaw ngene. Da ray ngene, aa guzltar a ndɔhay makustakaya daa way a, a lɔvtar: «Dar maakwaw daha nga key slɔra, da ka wudam membɔley na, samawa ta pas hay a ngene, ama ka da samawa ta pas memɔskey-vaw ba!»

¹⁵ Bay Mahura a mbɔɔara a ndaw a, a lɔvar: «Akwar, ndɔhay masa ta neneh cew! Ta pas memɔskey-vaw na, akwar fa pɔskamata sla akwar hay ta zɔngwaw akwar hay da gezlen, ka handamata nga samawa yam, ba diya?

¹⁶ Yaw, ngwas daa sɔkway nga *Abɔraham keɔe, anga majɔwkaya da har *Satan, bay-malula, mevey kuraw a ray a daangafad. Annga na, ya pɔska ta pas memɔskey-vaw ba na, maja me?» ¹⁷ Masa Yesu ma mbɔɔɔara anda keɔe la na, hwaray a katar a masa-gɔra annga hay tabiya. Ama ndɔhay makustakaya na, aa sɔmam da ray slɔra hay mekele mekele maaya masa Yesu ma kata.

Mey-mɔngɔy ta babɔza nga bazlawar len ta cek ma hɔsla makala

(Matiye 13.31-33; Mark 4.30-32)

¹⁸ Fa ɔɔba ha, Yesu aa guzltar, a lɔvtar: «Mewey nga Bay Gazlavay da ray ndɔhay na, annga anda me? Ya da wa na, ta me? ¹⁹ Ya wa ta babɔza nga bazlawar masa ndaw ma la, ma rɔba aa ley annga. Babɔza nga bazlawar aha, ta', a pɔcwa, a gɔley mahura. Diyan hay a ɔiyam way fa mey-har hay a.»

²⁰ Yesu a lɔvtar saya: «Ya da wa mewey nga Bay Gazlavay da ray ndɔhay na, ta me? ²¹ Ya wa ta cek ma hɔsla makala

masa ngwas ma haley kuset kəfey, ma jahada ta hapa nga makala ga, amba a həslərwa tabiya.»

Bay Gazlavay a wey na, da ray wa hay wa?
(Matiye 7.13, 14, 21-23)

²² Yesu fa daw ngada *Jeruzelem, a daw taa berney hay lej ta slala hay, faa sərkadata ndəhay. ²³ Daa ngene ndaw daha, aa cəfda, a ləvar: «Bay Mahura, Gazlavay a da ləhey daa mebərey na, ndəhay nekəfey gway daw?» Ta', Yesu aa guzltar a ndəhay fetede, a ləvtar: ²⁴ «Kam gədan amba ka mbəzam taa mey-mbew meengəlez e aa slam masa Bay Gazlavay fa wey da ray ndəhay. Ya fa ləvkwar, ndəhay ga a jadamara la, amba a mbəzam, ama fa da gwamara daa ba.

²⁵ «Yaw, pas pal bay nga slam aha a da sləkdey nga gərca mey-mbew. Ngene, ka da lacam aa ambaw, ka da zəlam fa mey-mbew, ka ləvam: “Bay ala, wurndara mey-mbew may taw!” Ama a da mbəddakwara, a ləvkwar: “Ya sərkwara ba! Ka samawa na, dama?” ²⁶ Fa dəba ha, ka da zlamar ngaa guzltar, ka ləvam: “Aləkwa ta zəmkwa cek la bama, aləkwa ta sakwa cek la bama, ka taa sərkadandar la daa cəved ala hay mepəkey.” ²⁷ A da ləvkwar saya: “Ya sərkwara ba! Ka samawa na, dama? Akwar ndəhay tabiya masa ma ka cek maaya ba hay, ngəcham la da cakay adaw.”

²⁸ Ta pas masa akwar ma da hətmatar ata *Abəraham, *Izak, *Jakwap, lej ndəhay ma təla mey nga Gazlavay zleezle tabiya, manjatakaya da cakay Bay Gazlavay na, ngene, ka da təwam, ka daa pədam sler maja akwar mambəkdatakaya daa ambaw. ²⁹ Ta pas masa Gazlavay ma da wuzdərwa bay anga na, ndəhay daa səkway hay mekele mekele a samawa la daa slam hay tabiya da bəla, nga key gwagway da vad. ³⁰ Yaw, da wuzlah ndəhay madagway-dakw na, siya a da təram ndəhay ngeeme, asaya, da wuzlah ndəhay ngeeme na, siya a da təram nga madagway-dakw.»

Yesu a təway maja ndəhay daa berney nga Jeruzelem
(Matiye 23.37-39)

³¹ Ta pas ngene, ndəhay da wuzlah *Fariza hay daha a ngəchamawa fa Yesu amba a wuzmar mey, a ləvmar: «Daw la fede aa slam mekele maja Bay *Herawt a wudəy nga kədkə vagay.» ³² Yesu a mbəddatara, a ləvtar: «Diyam ləvmar a mbiga * ha: “Ehe, ya fa bəley malula hay da ray ndəhay, ya fa mbəley masa-macay hay, tasana, mandaw,

13:21 13.21 Mt 13.33 **13:25** 13.25 Mt 25.11-12 **13:27** 13.27 2Tm 2.19

13:30 13.30 Mt 19.30 * **13:32** 13.32 mbiga: Yesu a zəla Bay Herawt «mbiga» maja daa mewulkey nga Jəwif hay, mbiga na, ara cek nga ley ma key cek ta dabaray, ama ndəhay a zluram ta anga ba maja ara cek mecəhe.

nga d̄ar maakar a ya da nd̄ovda sl̄era ad̄aw.”³³ Anda mel̄ovey si ya ley c̄oved, ya daw tasana, mandaw, mandaw lan̄gar saya, maja nd̄ohay a gwamara nga k̄ed̄mara *ndaw ma t̄ela mey nga Gazlavay d̄oreŋ ta *Jeruzelem ba s̄elak.»

³⁴ Fa d̄eba ha, Yesu a l̄ovey: «Haya! Akwar nd̄ohay da Jeruzelem †, akwar nd̄ohay da Jeruzelem, Gazlavay a sl̄erkwar nd̄ohay ma t̄ela mey an̄ga hay na, ka k̄ed̄mata vagay. Asaya, a sl̄erkwar maslan̄ an̄ga hay na, kaa zakamata ta an̄gwa. Ama mandaw mandaw ya wud̄ey amba ya b̄ockwar tabiya akwar anda gwagwar ma b̄octa b̄ez an̄ga hay asi k̄erpasl, ama ka wud̄am ba. ³⁵ C̄ondamara, Gazlavay a da la har an̄ga da ray akwar, Way-mekey-kwakwas akwar a da t̄orey yiden̄. Yah fa l̄ovkwar, akwar fa da h̄etmaya fa dey daa saba haa ta pas masa akwar ma da l̄ovam: “Anja Bay Gazlavay nga p̄esar mey ngada ndaw masa aa ma sl̄erd̄erwa ta mez̄oley an̄ga.”»

14

Yesu a mb̄oley ndaw mambakaya ta mbey

¹ Ta *pas mem̄eskey-vaw, Yesu ta', a daw a way ndaw pal da wuzlah mahura hay nga *Fariza hay nga z̄omey d̄af. Nd̄ohay man̄jatakaya fetede, fa sangalamara Yesu ta d̄ek-vaw da ray cek masa aa ma da ka. ² Ndaw da wuzlah ata daha, mambakaya ta mbey. Ndaw a malacakaya fa mey an̄ga. ³ Yesu ta', aa guzltar ngada *nd̄ohay maa s̄erkada kwakwas nga Mawiz ta ngada Fariza hay, a l̄ovtar: «Kwakwas al̄ekwa a l̄ovey na, kwara? Memb̄oley ndaw masa-macay ta pas mem̄eskey-vaw na, maaya daw, maaya ba daw?» ⁴ Ama nd̄ohay a, a ḡomam nga mb̄ed̄damara ba. Ta', Yesu a ḡesfar har fa ndaw masa-macay heyey, mbal! a mb̄elda, ta', a mb̄ekda nga daw.

⁵ Fa d̄eba ha, aa c̄ed̄fata, a l̄ovtar: «Da ndaw da wuzlah akwar an̄ga ta b̄zey, da daa ba, an̄ga ta sla, yaw, da b̄zey a, da daa ba, sla ha a t̄ed̄ey aa b̄elndaw na, ndaw aha a bad̄erwa fiyaw fiyaw, kwa ta pas mem̄eskey-vaw, daa ba daw?» ⁶ Kwa nd̄ohay a, ta gwamara nga mb̄ed̄damara aa mey nga Yesu a daa ba.

Ndaw a da pa ray an̄ga nga mahura ba

⁷ Yesu fa n̄ekta nd̄ohay ma samawa nga z̄omey d̄af da way ndaw Fariza heyey. A s̄epam slam-men̄jey na, si nga nd̄ohay mahura hay. Maja ngene, Yesu a ngatar mey, a

† 13:34 13.34 Akwar nd̄ohay da Jeruzelem: Daa mey a ked̄e Yesu ta wusey a Jeruzelem daa ba aran̄, ama aa guzley anda an̄ga gweegwe ta ata. 13:35 13.35 Ps 118.26; Ez 10.18-19 14:1 14.1-6 Mk 2.27-28 14:5 14.5 13.15-16; Mt 12.11

løvtar: ⁸ «Da ndaw a zəlkwār nga zəmey daf nga gwagway nga meley kwakwa na, ka da səpey nga njeý aa slam nga ndaw mahura ba. Da kaa tēde ta zəlwa ndaw mahura da ray akah la aa gwagway a kwa. ⁹ Anda keđe, bay nga way a, a sawa, a da ləvka: “Mbəkda slam keđe a ndaw keđe.” Maja nģene, ka da mbəkda slam aha, ka da njeý fa dēba ta hwaray a. ¹⁰ Ama da ta zəlmaka la nga zəmey daf nga gwagway na, daw ta njeý fa dēba, amba bay nga way a, a sawa, a ləvka: “Jam adaw, sawa aa slam nga ndəhay mahura hay keđe.” Anda keđe, a həslka ray fa mey nga ndəhay tabiya daa gwagway a. ¹¹ Yaw, fara fara kwa waawa ma pa ray anģa nga mahura na, Gazlavay a da pa nga mecəhe, asaya, ndaw masa ma nada ray anģa na, Gazlavay a da pa nga mahura.»

¹² Yesu ta', aa guzlar a ndaw ma zəla nga zəmey daf heyey, a ləvar: «Da ka key gwagway na, ka da zəltərwa jam akah hay ba. Asaya, ka da zəltərwa məlmakw hay ba, ka da zəltərwa səkway akah hay ba, kwa meseembew akah hay masa-zleley hay ka da zəltərwa ba. Ka da zəltərwa ba maja ata may, a da zəlmaka kəne. A da pəlmakawa cek masa kah ma vəldatara la. ¹³ Ama da ka key gwagway na, zəlwa masa-viya hay, ndəhay masa maahəlbatakaya hay, ndəhay jegwer hay, leŋ wulaf hay. ¹⁴ Da ka zəlwa ndəhay anda keđe hay nga zəmey daf na, maaya nga Gazlavay a sawa la a ray akah maja ndəhay a na, a gwamara nga vəhdamakawa cek aha ba. Ama Bay Gazlavay a da vəhdakawa ta pas masa ndəhay masa maaya fa mey nga Gazlavay, ma da sləkdamawa daa meməcey.»

*Mey-menģey ta ndəhay mazəltakaya aa gwagway
(Matiye 22.1-10)*

¹⁵ Masa ndaw pal da wuzlah ndəhay ma zəmam daf ta ata Yesu heyey ma cənda mey a la na, ta', a ləvar a Yesu: «Meesəmey daha nģada ndaw ma da zəmey daf nga gwagway daa bay nga Gazlavay da vad.»

¹⁶ Ta', Yesu a mbəfdara ta mey-menģey, a ləvar: «Ndaw daha a key gwagway, ta', a zəlwa ndəhay ga. ¹⁷ Pas tēde nga zəmey cek na, a slərey madərlam anģa fa ndəhay a nga løvtar: “Samawa, maja cek tabiya madiykaya cay!” ¹⁸ Ama ata tabiya a kam ambahw pal pal. Ndaw nģeeme a ləvar a madərlam a: “Ambahw, mbəkdaya maja ya ta hədkey ley la, ya daw ya da nəkərwa.” ¹⁹ Ndaw langar a ləvar: “Ambahw, mbəkdaya maja ya ta hədkawa sla hay kuraw la nga key sləra, ya daw la ya jadatərwa!” ²⁰ Mekele

a ləvar saya: “Ya gwa ya daw ba maja ya ta kwakwa da ver.” ²¹ Madərlam a, a vəhey a cakay bay anɔa, a kadara mey masa ndəhay a ma ləvmar kede. Bay nɔa way a, mevel a car, a ləvar a madərlam anɔa: “Daw fiyaw aa slam masa ndəhay da hwad a daha ta aa walaŋ-way hay. Nɔalwa masa-viya hay, ndəhay masa maahəlbatakaya hay, masa wulaf hay, leŋ ndəhay jegwer hay.” ²² Fa dəba ha nekədey, madərlam a, a vəhwa, a ləvar: “Bay adaw, ya ta zəlwa ndəhay la anda kah ma ləvey, ama slam daa way a daha cəŋga.” ²³ Ta', bay a, a ləvar a madərlam a: “Daw a mey-cəved daa zlərdəy-anɔwa hay, təkətəwa dəy a ndəhay nɔa samawa amba way adaw a rəhey. ²⁴ Ya fa ləvkwar, kwa ndaw pal dasi ndəhay masa yah ma zəltəwa nɔeeme heyey, fa da zəmey dəf nɔa gwagway adaw kede daa saba səlak!”»

Nɔa tərey gula nɔa Yesu na, kwara?

(Matiye 10.37, 38)

²⁵ Fa dəba ha, Yesu fa diyam ta ndəhay ga daa cəved. Yesu pəla! a mbədwa dey nɔada fa ata, a ləvtar: ²⁶ «Da ndaw a wudəy nɔa key gula adaw na, si a wudya a fəna papaha ta mamaha, nɔwas anɔa ta bəz anɔa hay, məlmaha hay ta dam-mamaha hay, kwa heter anɔa. Da daa ba na, a gwa nɔa key gula adaw ba. ²⁷ Kwa waawa ma bəsa banay ma da sawa a ray a maja anɔa ma səpya daa ba na, fa da gwa nɔa key gula adaw daa ba. ²⁸ Da ndaw da wuzlah akwar a wudəy a ləmey way mahura, teesəd na, si a wulkey la dəgay, way a, a key dala we. Fa dəba ha, a nəka da dala anɔa a wusa nɔa kara sləra anɔa ha tabiya la kwa. ²⁹ Da dala a wusa ba, ama da a zlar ma pa salay a cəŋga na, a gwa nɔa ndəvda sləra nɔa way a daa ba. Nɔene, ndəhay tabiya masa ma hətmar way a, a daa saŋgərfamar, ³⁰ a ləvam: “Ndaw kede a zlar meləmey way, ama a gwa nɔa ndəvda ba!”

³¹ «Yaw, da bay a wudəy nɔa key vəram ta bay mekele, si a wulkey da ray ndəhay anɔa hay gabal kuraw dəgay. A wulkey da a gwa ma kədmata ndəhay nɔa bay laŋgar ma sawa ta ndəhay anɔa hay gabal kwakwar cew nɔene la kwa. ³² Da a wulkey fa da gwamara daa ba na, a slərey maslaŋ anɔa hay fa bay laŋgar heyey amba a nɔam ta zazay, daa masa bay a, a lawa dərəŋ dəgay.» ³³ Yesu a wuzdatara: «Anda kede, da kwa waawa da wuzlah akwar ta mbəkdərwə zleley anɔa leŋ ndəhay anɔa hay daa ba na, a gwa nɔa key gula adaw ba.»

Mey da ray manda
(*Matiye 5.13; Mark 9.50*)

³⁴ Yesu a ləvtar: «Manda na, ara cek maaya. Ama da manda ha a cərey saba na, ya da kadakwa amba a cərey saya na, kwara? ³⁵ Manda ha anğa maaya saba. Kwa nğa kwiyeey aa ley, kwa nğa kwiyeey anda gəraŋ, maaya saba. A da həlmara, a kwiydamaara aa papalah saw. Da ndaw anğa ta sləmay na, nğa cənda mey a maaya maaya.»

15

Mey-menğey ta təbaŋ meezədey
(*Matiye 18.12-14*)

¹ Ta pas lanğar daha, ndəhay ma cakala budaw ta ndəhay ma zləba *kwakwas nğa Mawiz, a nğəcham tabiya fa Yesu amba a jəkfamar sləmay. ² *Fariza hay ta ndəhay maa sərkada kwakwas nğa Mawiz aa nğuram mey da wuzlah ata, a ləvam: «Ndaw keđe a təfta ndəhay ma zləba kwakwas nğa Mawiz, asaya, a zəmam dəf bama na, kwara?»

³ Anda keđe, Yesu ta', aa guzltar ta mey-menğey, a ləvtar:

⁴ «Da ndaw da wuzlah akwar, anğa ta təbaŋ hay temere, da pal taa zədey sem na, ndaw aha, a mbəkdata təbaŋ hay kwakwar zlam-letek a ray a zlam-letek da wuzlah-ley, a daw a səpərwa pal meezədey a, haa anğa ma hətərwa daa ba daw? ⁵ Masa anğa ma hətərwa la na, aa səmey ga. A cəpərwa təbaŋ anğa ha fa pepesl *, ⁶ a sawa a way. Masa anğa ma wuswa la na, a zəltərwa jam anğa hay ta meseembew anğa hay, a ləvtar: “Samawa, sasəmkwa bama maja təbaŋ adaw taa zədey la, ya ta hətərwa cay.”

⁷ «Ya fa ləvkwar anğa letek kəne, da gazlavay da vad na, meesəmey daha da ray ndaw pal ta mebərey ma mbədda menjey anğa. Meesəmey a, a fəna meesəmey da ray ndəhay kwakwar zlam-letek a ray a zlam-letek masa menjey ata maaya, ma wudam nğa mbədey menjey ata ba.»

Mey-menğey ta dala meezədey

⁸ Yesu aa guzltar ta mey-menğey saya, a ləvtar: «Yaw, dala nğa nğwas daha sisey sisey † kuraw, ama pal zazad! aa zədey. Ta', a gədey awaw aa petərła, a faca way, a səpa ta dək-vaw kasl aa ma hətar dala ha. ⁹ Masa anğa ma hətar la na, a zəltərwa jam anğa hay ta meseembew anğa hay, a ləvtar: “Samawa, sasəmkwa bama maja dala adaw taa

14:35 14.35 Mt 11.15 **15:1** 15.1-2 Mt 9.10 **15:3** 15.3-7 Jan 10.11-15 **15:4** 15.4 Ez 34.11, 16 * **15:5** 15.5 pepesl: «papay» ta mey Zədem. † **15:8** 15.8 sisey: Daa nğene na, sisey ara dala ga. Ta mey Gərek ara dala təde nğa sləra nğa ndaw ma vərndeey da ley.

zødey la, ya ta høtar cay.” ¹⁰ Yaw, ya fa løvkwar ara letek kəne da wuzlah maslan hay nga Bay Gazlavay da vad na, meesəmey daha maja ndaw pal ta mebərey ma mbəfda menjey anga.»

Mey-menjey da ray papay ta bəza hay cew

¹¹ Yesu aa guzltar ta mey-menjey saya, a ləvtar: «Ndaw daha, bəz anga hay cew. ¹² Masa matabəwa a ləvar a papaha: “Papay, wure kefe, wunkandara cek akah hay masa ala ma da wamara fa dəba akah. Yaw, masa ngada yah na, vəlđiwa.” Ta’, papa ata ha a wunkatara. ¹³ Fa dəba ha dar nekədey na, bəzey matabəwa ha, ta’, a hədkadata cek hay maala nga anga tabiya. A daw ta dala ha aa hwayak dərəŋ. Daa hwayak a ngene, a zlar nga key cek hay malamba, maja ngene, aa kwacada dala anga heyey tabiya. ¹⁴ Masa anga ma ndəvda dala anga sem tabiya na, may mahura a key daa hwayak a, a hətəy cek nga zəmey saba. ¹⁵ Ta’, a daw a key sləra da way ndaw fetede daha. Ndaw aha a slərda a ley nga jədey vetem hay amba a vəltar cek mezəmey. ¹⁶ Bəzey a, a wudəy nga zəmey babəza nga wudez masa vetem hay ma zəmamara, ama ndaw ma vələr cəved daa ba. ¹⁷ A zlar mewulkey da ray cek masa aa ma ka, a ləvey: “Ndəhay ma ka sləra nga papay fa zəmam cek, fa rəham, fa mbəkdamara siya, ama yah na, may fa kəfyə fede! ¹⁸ Nğama ya mbəkda hwayak kefe, ya daw fa papay, ya ləvar: Papay, ya ta key mebərey la fa mey nga Gazlavay, ta fa mey akah. ¹⁹ Wure kefe, ya wusa amba ka zəlyə bəzey akah saba. Nəkya anda ndaw ma ka sləra akah gway.” ²⁰ Ta’, a sləkəfawa, a sawa fa papaha.

«Ama masa a lawa dərəŋ ta way nga papaha dəgay na, papaha a hətar, a kar dey-ceceh. A hway a da cadərwa ray, slaslap! a slasləpa. ²¹ Ta’, bəz anga ha a ləvar: “Papay, ya ta key mebərey la fa mey nga Gazlavay, ta fa mey akah. Wure kefe, ya wusa amba ka zəlyə bəzey akah saba.” ²² Ama, papaha a ləvtar a ma ka sləra anga hay: “Wusmawa vaw, lamawa zana maaya, kəzlamara fa vaw nga bəzey adaw kefe. Lamawa dāŋgwa nga bəz-mey-har, pamara a har. Lamawa tarak, ndəkwdamara a salay. ²³ Dədamərwa bəz-sla maabəlkaya masa aləkwa ma rəfkwa ngene. Hərmara, kakwa gwagway, sasəmkwa, ²⁴ maja bəzey adaw kefe anga anda bəzey maməkəkaya, ama ta sləkəfawa sem, anga anda bəzey maazəkəkaya, ama yah ta hətar sem.” Ta’, ma ka sləra anga hay a kamara anda bay ata ma ləvtar. Anda kefe, ndəhay a zlamar mekey gwagway ta meesəmey.

²⁵ «Daa masa ata fa kamara gwagway a na, bəzey mahura a lawa da ley. Masa anɔa fa sawa da ley na, a cənda baazlam ta gaanɔan nɔa megərvey. ²⁶ Ta', a zəley ndaw ma ka sləra nɔa papaha pal, aa cəfda, a ləvar: "Mekey da way a, me?" ²⁷ Ndaw ma ka sləra ha, a mbəfdara, a ləvar: "Məlmakw ta sawa cay, papakw ta həra bəz-sla masa aləkwa ma rəfkwa heyey sem, maja məlmakw a ta vəhwa sem, aa daha zay." ²⁸ Bəzey mahura heyey a key mevel, a gəmey nɔa mbəzey a way saba. Ama, papaha, ta', a daw fa anɔa, a bərkwa nɔa mbəzey a way. ²⁹ Ama bəzey a, a mbəfdara a papaha, a ləvar: "Papay, jəkey sləmay: mevey weewe ya fa kaka sləra, ya fa təbkawa mey akah mandaw mandaw, ama ka ta vəlya kwa bəz-dakw pal nɔa key gwagway ta mandala adaw hay daa ba. ³⁰ Ama bəzey akah kefe a vəhwa, ta ndəvdatərwa cek akah hay sem tabiya nɔa mesəpey nɔwas-barlaw hay, ama nɔgada anɔa na, ka hərara bəz-sla masa aləkwa ma rəfkwa heyey jak!" ³¹ Papaha a ləvar: "Bəz adaw, kah na, mandaw mandaw aləkwa cew e, cek tabiya masa yah ma wa na, ara nɔa akah. ³² Si ya kakwa gwagway ta meesəmey, maja məlmakw kefe, anɔa na, anda bəzey maməckaya, ama ta sləkɔawa sem, anɔa anda bəzey maazədkaya, ama yah ma hətər sem!"»

16

Mey-məngəy ta gula masa-wewər

¹ Ta pas lanɔar daha, Yesu a nɔgatar mey a gula anɔa hay, a ləvtar: «Ndaw daha aa ta zleley ga. Gula anɔa mahura ma jədra zleley a daha. Ndaw daha a sawa, a ləvar a ndaw masa-zleley a: "Gula akah faa kwacadakawa zleley akah la." ² Bay nɔa gula heyey ta', a zələrwa, a ləvar: "Ya ta cəney mey maaya ba la da ray akah. Wuzdiwa sləra masa kah ma ka tabiya, maja wure kefe ka fa da key gula adaw daa saba!" ³ Gula anɔa kaa heyey a wulkey daa ray anɔa, a ləvey: "Ya da key kwara? Bay adaw a da badaya daa sləra anɔa. Gədan adaw nɔa həvey daa ba. Nɔa rəkey na, hwaray a kaya la. ⁴ Aha! Wure kefe ya səra cek masa yah ma da ka! Nɔgama ya kərzey jam hay. Anda kefe, ta pas masa ta badaya sem daa sləra anɔa na, jam adaw hay a, a nɔgəlmaya a way ata hay." ⁵ Masa aa ma wulkey la anda kefe na, ta', a zəltərwa ndəhay masa ma lam dəvaz nɔa bay anɔa pal pal tabiya. A ləvar a ndaw nɔgeeme: "Dəvaz nɔa bay adaw da har kah na, we?" ⁶ Ndaw aha a mbəfdara, a ləvar: "Mal gwajakwadf temere." A ləvar: "Larawa dərəwel nɔa dəvaz akah fiyaw, nɔey, wuzlala fa vəda kwakwar zlam." ⁷ Ta', aa cəfda ndaw lanɔar saya, a

løvar: “Døvaz nga bay adaw da har akah na, we?” Ndaw aha a mbøddara, a løvar: “Daw sak temere.” A løvar a ndaw aha: “Larawa dferewel nga dövaz akah fiyaw, wuzlala fa vøða kwakwar daanƒafad.” ⁸ Kwa gula ha a key cek ta cøved e ba na, ndaw masa-zleley a, aa hømnda maja a ka sløra aha ta dabaray. Fara fara, ndøhay da bøla keðe a kam cek ta dabaray da wuzlah ata ma føna ndøhay nga Bay Gazlavay.»

⁹ Yesu a løvey saya: «Ya fa løvkwar, zleley da bøla keðe na, kørzadamara jam. Anda keðe, da zleley a ta ndøvey sem na, ka da høtam slam menjey maaya ma ndøvey ba da vad. ¹⁰ Ndaw masa ma key sløra maaya ta cek mecøhe na, a key sløra maaya ta cek mahura la may. Ndaw ma key sløra ta cøved e ba ta cek mecøhe na, a key sløra ta cøved e ba ta cek mahura la may. ¹¹ Da ray ngene, da ka kam sløra maaya ba ta zleley masa ma vøldamakwara a har akwar da bøla keðe na, kaa wara zleley masa fara fara na, ma da vøldakwara na, wa? ¹² Ama da wure keðe ka kam cek hay maaya ba ta zleley masa ndaw ma vøldakwara da bøla keðe na, fa døba ha, Gazlavay a vølkwar zleley la amba ka wamara daw?

(*Matiye 6.24*)

¹³ «Ndaw ma gwa nga key sløra ngada bay hay cew daa ba, maja a da wuða bay lanƒar a føna bay lanƒar, da daa ba, a da nar ray a bay lanƒar, a røsa bay lanƒar. Ka gwamara nga søpmara Gazlavay leŋ zleley cewete daa slam a ba.»

¹⁴ Masa *Fariza hay ma cøndamara mey a keðe na, aa sanƒøram a ray Yesu maja a wuðam dala kalah. ¹⁵ Ta', Yesu a løvtar: «Akwar fa kam cek maaya fa dey nga ndøhay, amba a løvam akwar ndøhay maaya hay. Ama Gazlavay na, a søra mevel akwar. Cek masa ndøhay a nøkmara mahura fa mey ata na, ara cek nga tede fa mey nga Gazlavay.»

Mey hay mekele mekele nga Yesu

(*Matiye 11.13, 12; 5.18; 5.32; 19.9; Mark 10.11-12*)

¹⁶ Yesu a løvtar: «Kwakwas nga *Mawiz ta ndøhay ma tøla mey nga Gazlavay fa wuzdamara mey nga Gazlavay haa kasl *Jan-Baptis. Døga daa ngene, ndøhay fa cøndamara *Mey-maaya-mawiya da ray *mewey nga Gazlavay da ray ndøhay. Kwa waawa fa key gødan amba a mbøzey a wuzlah ndøhay masa Gazlavay ma da wey da ray ata fara fara.

¹⁷ «Slam da vad ta slam da hwayak, anƒa ta gøra amba a ndøvey, ama cek mecøhe mawuzlalakaya daa mey nga

kwakwas nga Mawiz kede ngaa vøsey na, anga ta gøra ma føna saya.

¹⁸ «Yaw, kwa waawa ma bøla ngwas anga, a lawa mekele na, a key ngene, a ley vaw saw da palah. Asaya, kwa waawa ma la ngwas masa zel e ma bøla sem na, a key ngene, a ley vaw saw da palah may.»

Mey-mengey da ray ndaw masa-zleley ta ndaw masa-viya

¹⁹ Yesu aa guzltar ta mey-mengey saya, a løvtar: «Ndaw daha, anga ta zleley ga, a pey zana fa vaw na, maaya masa ndaw ma gwa nga hødka ba. Aa daa wiya mandaw mandaw, fa zømey cek maaya. ²⁰ Ndaw mekele daha, anga masa-viya, mezøley anga Lazar, mbølek fa vaw njaba-njaba. Manakaya fa mey-mbew nga ndaw masa-zleley kaa heyey. ²¹ Aa fa wudey nga gødmey meepøsey nga daf da hwayak daa slam mezømey daf nga ndaw masa-zleley heyey, ama ndaw ma vølar daa ba. Asaya, gødey hay fa samawa, fa ndøfdamara mbølek fa vaw anga.

²² «Fa døba ha nekødey, ndaw masa-viya heyey, pam! a møcey. Maslan hay nga Gazlavay da vad' ta', a samawa, lej! a lamara a vad' a cakay *Abøraham. Ndaw masa-zleley heyey, pam! a møcey may. Ndøhay ta', a jøhmara. ²³ Ndaw masa-zleley kaa fa sørey banay ga da wuzlah ndøhay mamøctakaya. A da bangadfa dey a vad' na, a høtar Abøraham manjakaya døren, Lazar manjakaya da cakay a. ²⁴ Da ray ngene, a wudey, a tølar mey, a løvar: "Papay Abøraham, sørfaya dey-ceceh, slørdørwa Lazar amba a jøhwfa bøz-mey-har anga aa yam na, a gøciwa fa neneh adaw, maja ya fa sørey banay kalah daa awaw kede."

²⁵ «Ama Abøraham a mbøfdara, a løvar: "Bøz adaw, wulkada, daa masa kah da bøla, ka ta høtey zleley la ga, daa ngene, Lazar fa sørey banay. Wure kede, fedde, ala fa døkmar mevel, ama kah, ka fa sørey banay may. ²⁶ Asaya, daa walan ala ta akwar na, vøged selesen daha, cøved nga daw daa ba. Da ray ngene, da ndøhay fedde a wudam nga diyam fetede na, a gwamara nga diyam ba. Asaya, da ndøhay fetede a wudam nga samawa fedde na, a gwamara ba may."

²⁷ «Ndaw masa-zleley kaa heyey a løvar a Abøraham: "Na, ya kaka ambahw papay Abøraham, slørda Lazar a way papay. ²⁸ Mølma adaw hay zlam daha, nga daw nga wuztar, amba a samawa aa slam nga banay kede saba." ²⁹ Abøraham a mbøfdara, a løvar: "Mølmakw hay na, si a

jəkam sləmay fa mey nga *Mawiz leŋ fa mey nga ndəhay ma təla mey nga Gazlavay.”

³⁰ «Ndaw aha a ləvar: “Kəne ba, papay Abəraham. Maaya na, si ndaw ma sləkdey daa meməcey, a daw fa ata, ŋgene, a mbəfdamara menjey ata la.”

³¹ «Ama Abəraham a ləvar: “Da a jəkam sləmay fa mey nga Mawiz ba, asaya, da a cəndamara mey nga ndəhay ma təla mey nga Gazlavay zleezle ba na, ŋgene kwa mey nga ndaw ma sləkdey daa meməcey na, fa da təbmara daa ba may.”»

17

Mey da ray mebərey

(Matiye 18.6-7, 15, 21-22; Mark 9.42)

¹ Yesu a ləvtar a gula aŋga hay: «Fara fara ndəhay ma həldamata ndəhay mandaw mandaw nga key mebərey na, daha. Ama banay a sawa la a ray ndaw masa ma həldata ndəhay nga key mebərey. ² Nğada aŋga na, ŋgama ata ma jəwmar aŋgwa mahura a dəy, a kəzlamara aa bəlay, da ray masa aŋga ma da həlda ndaw pal da wuzlah ndəhay ma təba mey ađaw hay keđe nga key mebərey. ³ Wam vaw maaya maaya fa ray akwar!

«Da məlmakw ta key mebərey la na, kəta. Da ta mbəfda leŋgesl aŋga ha la na, mbəkdara mebərey aŋga ha. ⁴ Kwa da a kaka mebərey dey maasala fa pas pal na, ama da fa vəhwa fa kah dey maasala ha, a ləvka: “Ambahw, ara mebərey ađaw, ambahw, ara mebərey ađaw,” na, mbəkdara mebərey aŋga ha.»

Mey da ray metəbey mey nga Gazlavay

⁵ Ndəhay meslərey nga Yesu a ləvmar a Bay Mahura: «Vəlndar gədaŋ saya amba ya təbmara mey akah ma fəna ma fəna.» ⁶ Bay Mahura a ləvtar: «Da akwar fa təbmara mey nga Gazlavay kwa kuset kədey həma babəza nga bazlawar na, ŋgene ka gwamara nga ləvmar a wudez mahura keđe, “Mədey la fedə, daw ta kəzley aa bəlay” na, a cənkwar mey la.»

Mey da ray ndaw ma ka sləra

⁷ Yesu a ləvey: «Da ndaw da wuzlah akwar gula aŋga fa həvar da ley, da daa ba, fa səkərar dəhway, fa dəba ha, a sawa da ley na, bay aŋga a ləvar la nga sawa fiyaw fiyaw, amba a zəmey cek daw? Fa da ləvar kəne daa ba! ⁸ Sasəkar jak, a da ləvar: “Mbəfdata zana akah hay amba ka diyawa

cek adaw mezəmey, həlyawa cek mezəmey ta cek mesey. Fa dəba ha, ka zəma nga kah may, ka sa nga kah may.”⁹ Da gula ha a kara cek anda bay anğa ha ma ləvar na, a kar suse la daw? ¹⁰ Akwar kwa kəne, da ka kamara sləra tabiya masa Gazlavay ma ləvkwat na, si ka ləvam: “Ala na, gula hay nga tede gway, ya kam sləra masa Gazlavay ma ləvndar nga key gway.”»

Yesu a mbəley ndəhay kuraw daa maasəkula

¹¹ Yesu fa daw a *Jeruzelem, a daw taa kwakway nga hwayak nga *Samari ta hwayak nga *Galile. ¹² A wusey gweegwe ta slala daha na, maasəkula hay kuraw a samawa ngada fa vəda. A lacam dərəj ta anğa. ¹³ A wudam, a ləvam: «Yesu, Bay Mahura, sərɤandar dey-ceceh!» ¹⁴ Masa Yesu ma hətatar na, a ləvtar: «Diyam, wuzdamatara vaw akwar a ndəhay ma ka kwakwas nga Gazlavay.» Masa ata fa diyam, a nəkmara na, vaw ata ta sədey sem. ¹⁵ Ndaw pal da wuzlah ata daha anğa ma hətar vaw anğa ta sədey sem na, a mbədwə dey, a vəhwa fa Yesu, a həlma Gazlavay ta gədan. ¹⁶ A wuswa, a regedey fa mey nga Yesu, a kar suse. Ndaw aha nğene ara ndaw Samari. ¹⁷ Yesu ta', aa cəɤdata ndəhay da cakay anğa, a ləvtar: «Maasəkula hay ma səɤam na, kuraw ba diya? Kaa si ndaw pal ma vəhwa feɤe, siya hay na, ata dama? ¹⁸ Ndaw ma wulkawa nga vəhwa amba a həlma Gazlavay daa ba, si ndaw-mələk keɤe gway daw?» ¹⁹ Fa dəba ha, Yesu a ləvar a ndaw aha: «Sləɤdey, daw, ka ta ləhey cay maja kah ma paya nga ndaw akah fara fara.»

Mey da ray pas masa Bəz nga Ndaw ma da vəhwa (Matiye 24.23-28, 37-41)

²⁰ Fa dəba ha, *Fariza hay aa cəɤdamara Yesu, a ləvmar: «Gazlavay a da wuzdərwa anğa bay na, ta vara?» Yesu a mbəɤdatara, a ləvtar: «Gazlavay ma da wuzdərwa anğa bay na, ara cek masa ndaw ma gwa nga hətar ta dey ba. ²¹ Ndaw a gwa a ləvey “Ehe, a keɤe,” da daa ba “A katay,” na, a gwa a ləvey kəne ba. Sərmara, mewey nga Bay Gazlavay aa da wuzlah akwar wure keɤe.

²² Ta', a ləvtar a gula anğa hay: «Pas a, a sawa la masa akwar ma da wudam nga hətmaya yah, *Bəz nga Ndaw, fa dey kwa ɤar pal, ama ka hətmaya daa ba. ²³ A da ləvmakwar: “Anğa feɤe,” da daa ba “Anğa fataɤay,” ama ka da diyam ba. Ka da hwam aa slam aha ba. ²⁴ Anda

17:10 17.10 1Kwr 9.16-17 **17:12** 17.12 Lev 13.46 **17:14** 17.14 Lev 14.2-32; Mt 8.4; Mk 1.44; Lk 5.14 **17:16** 17.16 10.33 **17:19** 17.19 Mt 9.22 **17:21** 17.21 11.2, 20; Mt 12.28 **17:22** 17.22-24 21.7-24 **17:23** 17.23-24 Mt 24.23-25; Mk 13.21-23

ndəhay ma hətmar var ma zəmey ma wadfa slam da vad ta slam da hwayak tabiya na, yah, Bəz ŋga Ndaw ya da vəhwa na, kəne. ²⁵ Ama teesef na, si ya sərey banay la ga daga. Asaya, ndəhay da bəla wure kede a rəsmaya la. ²⁶ Ta pas masa yah, Bəz ŋga Ndaw ma da vəhwa na, a da key anda cek ma key daa masa Nəwe anga da bəla. ²⁷ Daa ŋgene, ndəhay fa zəmam cek, fa sam cek, fa lam ŋgusay, fa vəldamata dam ata hay a way zel, haa kasl pas masa Nəwe ma mbəzey la aa kwambiwal mahura. Fa dəba ha, var a pawa ga, a rəhda slam da bəla, aa zədfdata ndəhay cəpa. ²⁸ Asaya, pas a, a da key anda cek ma key daa masa *Lut anga da bəla. Daa ŋgene, ndəhay fa zəmam cek, fa sam cek, fa hədfkam cek, fa hədfkadamara cek ata hay, fa sləkam, fa ləmam way. ²⁹ Ama daa masa Lut ma bawa daa berney ŋga *Sadawm la na, awaw təs! təs! a kəzlwa da gazlavay da vad ta cek ma təbey awaw, a paslata tabiya. ³⁰ A da key kəne ta pas masa yah, Bəz ŋga Ndaw, ma da wuzwa vaw.

³¹ «Ta pas a ŋgene, ndaw masa manjakaya daa ambaw, masa cek anga hay a lamawa ta da way na, a da mbəzey ŋga latərwa ba. Da ndaw anga da ley na, a da vəhwa a way ba. ³² Sərfadamara cek ma key ta ŋgwas ŋga Lut! * ³³ Kwa waawa ma wudfey ŋga ləhda heter anga na, a key ŋgene, aa zəfda. Kwa waawa maa zəfda heter anga na, a key ŋgene, a bada. ³⁴ Ya fa ləvkwar, dasi tavad ŋgene, da ndəhay cew manatakaya daa slam a na, a da ŋgəlam pal, a da mbəkdamara lanjar. ³⁵ Da ŋgusay cew fa kəram fa lavar pal na, a da ŋgəlam pal, a da mbəkdamara lanjar. [³⁶ Da ndəhay cew fa həvam da ley na, a da ŋgəlam pal, a da mbəkdamara lanjar.]]»

³⁷ Gula anga hay aa cəfdamara, a ləvmar: «A da key dama, Bay Mahura?» A mbədfdatara, a ləvtar: «Daa slam masa cek maməckaya daha na, kwakucəh hay makustakaya fetede.»

18

Mey-menjgey da ray ŋgwas-vagay ta ndaw ma ka sariya

¹ Fa dəba ha, Yesu a ŋgatar mey a gula anga hay amba a wuzdatara si a dəram danjay mandaw mandaw, a da gəram ba sələk. ² A ləvtar: «Ndaw ma ka sariya daa

17:25 17.25 9.21-22 **17:28** 17.28-29 MC 19.24-25 **17:31** 17.31 Mt 24.17-18; Mk 13.15-16 * **17:32** 17.32 ŋgwas ŋga Lut: ŋgwas ŋga Lut pəla! a mbədfey dey fa dəba daa cəved na, ta tərey sem ŋga manda. Nəka MC 19.26. **17:32** 17.32 MC 19.26 **17:33** 17.33 9.24; Mt 16.25; Mk 8.35 **17:37** 17.37 Jəw 39.30 **18:1** 18.1 11.2; Rm 12.12; Fəl 4.6; Kwa 4.2; 1Tes 5.17

berney daha, a zlurey ta Gazlavay ba, a coney mey nga ndaw ba. ³ Ngwas-vagay daa berney a daha, fa daw fa veda mandaw mandaw, a lever: "Wunkandar ta masagera adaw." ⁴ Ngwas a fa daw mandaw mandaw, ama ndaw aha a gomey nga wunkata ba menjey ga. Fa dɔba ha, ndaw aha, a wulkey daa mevel anga, a lever: "Kwa ya fa zlurey ta Gazlavay daa ba, asaya, kwa ya coney mey nga ndaw ba na, ⁵ ama maja ngwas-vagay kede, fa gerdaya, ngama ya kara sariya anga, ba na, a da hɔbya ray mandaw mandaw."» ⁶ Fa dɔba ha, Bay Mahura aa guzley saya, a lever: «Wulkam da ray mey nga ndaw ma ka sariya maaya ba maa guzley kede. ⁷ Da ndaw maaya ba kede ta jona ngwas kede la na, kaa wara Gazlavay na, a jenta ndohay anga hay mawalatakaya masa fa dɔrmar dangay taa vad, taa pas daa ba daw? A zoney vaw nga jenta la daw? ⁸ Yaw, ya fa lɔvkwat, a jenta la fiyaw fiyaw. Ama daa masa yah, *Bɔz nga Ndaw, fa vɔhwa a bɔla na, ya hɔtfey ndohay ma tɔbmara mey adaw da bɔla la daw?»

Mey-menjey ta ndaw Fariza len ta ndaw ma cakala budaw

⁹ Ndohay siya fa wulkam, ata na, maaya fa mey nga Gazlavay. A nɔkmata ndohay mekele anda ndohay ta meberay. Da ray ngene, Yesu aa guzley mey-menjey da ray ata, ¹⁰ a lever: «Ndohay cew daha, a diyam nga dɔrmawa dangay daa *Way-mekey-kwakwas nga Gazlavay. Ndaw pal, ara ndaw Fariza, ndaw langar, ara *ndaw ma cakala budaw. ¹¹ Masa ata daa Way-mekey-kwakwas nga Gazlavay a na, ndaw Fariza kaa heyey den! a lecey, a dɔrey dangay da hwad da hwad, a lever: "Waa Bay Gazlavay, ya fa kaka suse, maja yah anda ndohay mekele ba. Ata na, mayal hay, ata ndohay ma kam cek maaya ba hay mekele mekele, ata ndohay ma lam vaw saw da palah. Asaya, ya fa kaka suse, maja yah anda ndaw ma cakala budaw kede ba. ¹² Fa luma pal na, ya fa key *daliyam dey cew. Daa cek tabiya masa yah ma hɔtey na, ya fa wunka slam kuraw, ya fa la slam pal, ya fa vɔldakawa." ¹³ Ama ndaw ma cakala budaw kede a lecey dɔren, a wufey nga bangada dey a vad ba, ta', a kɔfa rav maja meberay anga, a lever: "Bay Gazlavay, sɔrfaya dey-ceceh. Yah ndaw ta meberay!"» ¹⁴ Ta', Yesu aa guzlar saya, a lever: «Ya fa lɔvkwat, ndaw ma cakala budaw a, a daw a way na, Gazlavay ta pa sem nga ndaw maaya fa mey anga. Ama ndaw Fariza heyey na, Gazlavay ta pa nga ndaw maaya fa mey anga daa ba. Sɔrmara, kwa waawa

ma gelda ray anga na, Gazlavay a da pa nga mecøhe, ama ndaw masa ma nada ray anga na, Gazlavay a da pa nga mahura.»

*Yesu a pøstar mey a bæza hay
(Matiye 19.13-15; Mark 10.13-16)*

¹⁵ Ndøhay a handamata bæzey ata hay fa Yesu, kwa masa da døba hay amba a patar har a ray, a pøstar mey. Masa gula anga hay ma høtmatar na, a kamatar mey a ndøhay a. ¹⁶ Ama Yesu a løvtar a ndøhay masa ta bæza hay a, nga ngøchadamatørwa. Ta', a løvtar a gula anga hay: «Mbøkdamatørwa bæza hay nga samawa fa yah! Ka da tøkмата ba, maja Gazlavay fa wey da ray ndøhay masa anda bæza hay. ¹⁷ Ya fa løvkwar fara fara, si ka tøba Bay Gazlavay nga wey da ray akah anda bæzey mecøhe ma tøba, da daa ba na, ka fa da mbøzey a wuzlah ndøhay masa Gazlavay ma wey da ray ata na, daa ba.»

Ndaw masa-zleley aa cøfda Yesu da ray mehøtey heter mendøvey ba

(Matiye 19.16-30; Mark 10.17-31)

¹⁸ Ndaw mahura nga *Jøwif hay daha, aa cøfda Yesu, a løvar: «Bay adaw, ndaw masa maaya, ya da key amba ya høtey heter mendøvey ba na, me?» ¹⁹ Yesu a mbøfdara, a løvar: «Ka zølya ndaw maaya na, maja me? Ndaw maaya na, Gazlavay pal taava anga. ²⁰ Yaw, ka søрта mewey hay nga Gazlavay, ba diya? Ara mey hay masa ma løvam: “Ka da ley vaw saw da palah ba, ka da køfey ndaw vagay ba, ka da leley ba, ka mbørzley a ray ndaw ba, natar ray ngada ata papakw ta mamakw.”» ²¹ Ndaw aha, a mbøfdara a Yesu, a løvar: «Døga yah daa zariya adaw na, ya ta zløbta mewey hay a ngene daa ba sølak.» ²² Masa Yesu ma cønda mey anga la na, ta', a løvar: «Cek pal ma mbøkaka daha nga key saya. Hødkadata cek akah hay tabiya, wunkatara dala ha a masa-viya hay. Da ka ta ka la anda kefe na, ka da høtey zleley fa Gazlavay da vad. Masa kah ma vøldatara dala ha cay a masa-viya hay na, sawa, søpya.»

²³ Masa ndaw aha ma cønda mey nga Yesu a la na, anga ta meesømey daa ba, maja zleley anga ga kalah. ²⁴ Masa Yesu ma høtar ndaw aha anga ta meesømey daa ba na, ta', aa guzley, a løvey: «Anga ta banay ga ngada ndøhay masa-zleley amba a tømara Gazlavay nga wey da ray ata. ²⁵ Ahaw, anga ta banay ngada slagwama nga mbøzey taa vøged nga baatal. Ama anga ta banay ga ma føna saya

ngada ndaw masa-zleley nga tɔba Bay Gazlavay nga wey da ray a.»

²⁶ Ndohay ma cɔndamara mey a na, a lɔvam: «Da anda kedɛ na, ma da lohɛy daa mebohɛy na, wa?» ²⁷ Yesu a mbɛɔɔdatara, a lɔvtar: «Cek masa ta banay fa ndohay na, anɔa ta banay fa Gazlavay ba.» ²⁸ *Piyer a lɔvar: «Ehe wure kedɛ, ala ta mbɛkdamatɔrwa cek ala hay sem, amba ya sɔpmaka.» ²⁹ Yesu aa guzltar, a lɔvtar: «Ya fa lɔvkwara fara fara, da ndaw a mbɛkdɔrwa way anɔa ta ndohay da way anɔa cɔpa, anda melohɛy ngwas anɔa, mɔlmaha hay, papaha ta mamaha, leɲ bɔz anɔa hay, amba Bay Gazlavay a wey da ray a na, ³⁰ daa masa anɔa da bɔla kedɛ, a hɔtey cek hay la ga ma fɔna. Asaya, fa dɔba nga mendohɛy nga bɔla na, a hɔtey heter mendohɛy ba la.»

Yesu aa guzley nga dey maakar da ray memohɛy anɔa ta maslɛkdɔwa anɔa

(Matiye 20.17-19; Mark 10.32-34)

³¹ Fa dɔba ha, Yesu a ngɔlta gula anɔa hay kuraw a ray a cew, a lɔvtar: «Jɔkam slɔmay, ehe, wure kedɛ alɛkwa fa nakwa a *Jeruzelem. Cek hay tabiya masa ndohay ma tɔla mey nga Gazlavay zleezle ma wuzlalamara da ray adaw, yah, *Bɔz nga Ndaw na, a da key. ³² Anda melohɛy, a da vɔldamaya a har ndohay masa *Jɔwif hay ba, a daa sanɔeram a ray adaw, a da cɔɔmaya, a da tɔfmaya meesleɓ aa dey, ³³ a da slɔɔmaya ta laway. Fa dɔba ha, a da kɔɔmaya vagay. Nga dar maakar a, ya slɛkdɔwa la daa memohɛy.»

³⁴ Ama gula anɔa hay, kwa ta cɔndamara mey a daa ba, maja mey a mabadakaya fa ata. Anda kedɛ, a sɔrmara cek masa Yesu ma wudey nga lohɛy ba.

Yesu a wurey dey nga ndaw-wulaf

(Matiye 20.29-34; Mark 10.46-52)

³⁵ Yesu a wusey gweegwe ta Jerikwaw. Fetedɛ, ndaw-wulaf daha manjakaya da mey-cɔvedɛ fa rɔkey. ³⁶ Masa aa ma cɔnda ndohay ga fa yam mey, fa diyam taa cɔvedɛ e na, ta', aa cɔɔdata ndohay a, a lɔvtar: «Mekey me?» ³⁷ A lɔvmar: «Yesu ndaw *Nezeret, fa sawa ta kedɛ.» ³⁸ Aa ma cɔnda la anda kedɛ na, a zlar mewudey, a lohɛy: «Yesu, Bɔzey nga *Davit, ambahw sɔrfaya dey-ceceh!»

³⁹ Ndohay ma diyam fa mey, a kamar mey, a lɔvmar nga nɔey teete. Ama ndaw-wulaf a, a wudey ta gɔdanɔ cɔnɔa, a lohɛy: «Bɔzey nga Davit, ambahw sɔrfaya dey-ceceh!» ⁴⁰ Yesu ta', a lecey, a lɔvtar a ndohay da cakay anɔa nga

ngəlmərwa ndaw-wulaf a. Masa wulaf a, ma wusey a cakay a na, Yesu, ta', aa cəfda, a ləvar: ⁴¹ «Ka wufey ya kaka na, me?» Wulaf a, a mbəddara, a ləvar: «Bay mahura, ya wufey ka wuryawa dey adaw amba ya hətar dey cəngə.» ⁴² Yesu a ləvar: «Dey akah nga wurey. Ka ta mbəley cay maja kah ma paya nga ndaw akah fara fara.» ⁴³ Wure wure ngene, dey anga ta', a wurey, a hətar dey dəba. Ta', a daw asi Yesu, a həlma Gazlavay. Masa ndəhay tabiya ma hətmar cek a na, a həlmamara Gazlavay may.

19

Mey da ray Zase, bay nga ndəhay ma cakala budaw

¹ Fa dəba ha, Yesu a wusey a slala Jerikwaw. A daw ta da slala ha. ² Fetede ndaw daha mezəley Zase. Anğa bay nga ndəhay ma cakala budaw, anğa ndaw ta zleley ga. ³ Fa səpey cəved amba a hətar Yesu, ama a gwa nga hətar ba, maja anğa medekwele, ndəhay ga fa təhmar dey. ⁴ Ta', a hway fa mey, a daw a təpey a ray bazlawar da mey-cəved masa Yesu ma da daw ta hwad a amba a hətar Yesu a. ⁵ Masa Yesu ma wusey la aa slam aha na, a banğadfa dey, a ləvar: «Zase, wuswa vaw, pawa salay, tasana ya da ney da way akah.» ⁶ Maja ngene, Zase a wuswa vaw, a pawa salay, a təba Yesu ta meesəmey. ⁷ Ama ndəhay ma hətmar na, aa nguram mey, a ləvam: «Haya! Ndaw aha kefe a da daw nga ney a way ndaw ta mebərey na, kwara!» ⁸ Zase ta', a lecey fa mey nga Bay Mahura, a ləvar: «Nəka, Bay Mahura, wure kefe ya da wunka cek adaw hay slam cew, ya da vəlda slam pal a masa-viya hay. Nğada ndəhay masa yah ma təktar dəy nga pəley dala nga budaw ma fəna na, ya da vəhdatar dala ha həma həma ngene dey məfad.» ⁹ Yesu a ləvar: «Tasana Gazlavay ta ləhdata ndəhay da way kefe cay daa mebərey, maja kah Zase, kah ndaw ma pa Gazlavay nga ndaw akah fara fara anda papaŋ nga papa aləkwa *Abəraham zleezle may. ¹⁰ Fara fara yah, *Bəz nga Ndaw, ya sawa na, nga səpey ndəhay maazədtakaya ta nga ləhdata.»

Mey-menğey ta dala (Matiye 25.14-30)

¹¹ Ndəhay ga fa jəkfamar sləmay fa Yesu, a wulkam Gazlavay a da wuzdərwa anğa bay wure wure ngene, maja anğa gweegwe ta *Jeruzelem. Da ray ngene, Yesu aa guzltar ta mey-menğey saya, ¹² a ləvey: «Ndaw daha, ata nga way

18:42 18.42 Mt 9.22 **19:7** 19.7 Mt 9.10 **19:8** 19.8 Mab 21.37; Ez 33.14-16
19:9 19.9 13.16; SNM 16.31 **19:10** 19.10 Ez 34.16; Mt 9.13; Mk 2.17; Lk 5.32;
1Tm 1.15 **19:11** 19.11 11.2; SNM 1.6

ata ta bay. Aa fa da daw aa hwayak dōren, amba a pamərwa aa bay. Fa dōba ha, a vōhwa aa hwayak anğa. ¹³ Masa aa fa da daw na, ta', a zōltərwa madərլam anğa hay kuraw, a vōltar dala gabal temere temere. Ta', a lōvtar: "Mbōdam har ta dala keđe, kasl pas masa yah ma da vōhwa." Fa dōba ha, ta', a daw.

¹⁴ «Ama ndōhay daa hwayak anğa, a wudmara ba. Da ray nğene, a slōram ndōhay fa dōba anğa, a lōvam: "Ya wudam ndaw keđe nğa key bay ala ba."

¹⁵ «Ta nğene he cōpa, ta pamərwa sem aa bay cōnğa. Ndaw a, ta' a vōhwa aa hwayak anğa. Masa anğa ma vōhwa cay na, ta', a zōltərwa madərլam anğa hay masa aa ma vōltar dala heyey amba a sōra dala masa ata ma hōtam a ray a.

¹⁶ «Madərլam nğeeme, a sawa fa mey anğa, a lōvar: "Bay adaw, ya ta hōtwa gabal temere temere kuraw la ta dala masa kah ma vōldiwa heyey."

¹⁷ «Bay a, a lōvar: "Maaya, ara mey ba. Kah, madərլam maaya. Maja ka ta key slōra ta cōved e la ta cek mecōhe. Anda keđe, ya paka nğa wey da ray berney hay kuraw."

¹⁸ «Madərլam nğa dey cew e, ta', a sawa, a lōvar: "Bay adaw, ya ta hōtwa gabal temere temere zlam la ta dala masa kah ma vōldiwa heyey."

¹⁹ «Bay a, a lōvar a ndaw aha: "Kah na, ya paka nğa wey da ray berney hay zlam."

²⁰ «Ta', madərլam mekele a sawa fa anğa saya, a lōvar: "Bay adaw, tōba dala akah. Ya ta bōda la mahərլakakaya daa bōrtete, ²¹ maja ya fa zlurey ta akah. Kah na, ndaw ma sōrey dey-ceceh fa ndaw ba, ka ley cek daa slam masa kah ma pa ba. Ka nğōmey daw daa slam masa kah ma slōka ba."

²² «Bay a, a lōvar: "Kah, madərլam maaya ba. Mey akah masa kah maa guzlda keđe na, ya da kaka sariya maja. Da ka sōrya, yah, ya sōrey dey-ceceh fa ndaw ba, ya ley cek daa slam masa yah ma pa ba, ya nğōmey daw daa slam masa yah ma slōka ba na, ²³ anja ka vōlda dala ha a har ndaw amba daa mavōhwa adaw keđe, ya tōbərwa dala ha ta yam a ba daw?"

²⁴ «Ta', bay a, a lōvtar a ndōhay da cakay anğa: "Tōbmara dala da har anğa, vōldamara a ndaw masa ma hōtey gabal temere temere kuraw heyey." ²⁵ Ndōhay a, a lōvmar: "Bay ala, nğa anğa gabal temere temere kuraw daha cay, ba diya?" ²⁶ Bay a, a lōvtar: "Ya fa lōvkwar, ndaw masa cek

anğa daha, a da vëlmar a dey a. Ama ndaw masa cek anğa kuset kədəy na, a da təbmara cek aha kuset kədəy a ngene.

²⁷ Yaw, masa-gəra adaw hay masa ma wudam ya key bay ata ba heyey na, kərzamatərwa, handamatərwa, kədmata vagay fa mey adaw fedə.”»

Yesu a daw a Jeruzelem anda bay
(*Matiye 21.1-11; Mark 11.1-11; Jan 12.12-19*)

²⁸ Fa dəba ha, Yesu maa guzley la na, ta', a daw nğadaa berney nğa *Jeruzelem, ndəhay ga fa səpmar wurzay. ²⁹ A wusey a Anğwa nğa *Awliviye, gweegwe ta slala Betfaje leŋ ta slala Betani. Masa anğa ma wusey la fetede na, ta', a slərey gula anğa hay cew teesed nğada slala ha, a ləvtar: ³⁰ «Diyam a slala fa mey aləkwa katay. Da akwar ta wusam a slala ha la na, ka hətfam bəz-zəngwaw majəwkaya la fetede, masa kwa ndaw ta təpey a ray a daa ba aran. Pəskamərwa, handamərwa fedə. ³¹ Da ndaw aa cəfdakwar, a ləvey: “Ka pəskamara ka me?” na, ka mbəddamara, ka ləvmar: “Bay Mahura a wudəy.”»

³² Gula hay cew heyey, ta', a diyam, a hətfamar cek aha anda Yesu ma ləvtar. ³³ Masa ata fa pəskamara bəz-zəngwaw a na, ndəhay nğa zəngwaw a, a ləvmatar: «Ka pəskamara bəz-zəngwaw a, keme?» ³⁴ A mbəddamatara, a ləvmatar: «Bay Mahura a wudəy.» ³⁵ Ta', a handamərwa fa Yesu, a ciyam zana ata hay a ray a. A təpdamara Yesu a ray bəz-zəngwaw a. ³⁶ Masa anğa fa daw na, ndəhay a həslmar ray, a ciyam zana ata hay aa cəved amba a daw ta ray a. ³⁷ Daa ngene, Yesu anğa gweegwe ta berney nğa Jeruzelem. Masa anğa fa daw taa cəved ma bərngawa daa Anğwa nğa Awliviye na, ndəhay anğa hay tabiya fetede faa səmam, a zlamar nğa həlmamara Gazlavay ta gədan maja maazla hay tabiya masa ata ma hətmar. ³⁸ A ləvam: «Anja Bay Gazlavay nğa pəsar mey a Bay masa aa ma slərdərwa ta mezəley anğa. Anja Bay Gazlavay a, nğa handərwa zazay anğa a wuzlah ndəhay. Anja ndəhay nğa həlmamara Gazlavay da vad!»

³⁹ *Fariza hay da wuzlah ndəhay a daha, a ləvmar a Yesu: «Bay, ləvtar a ndəhay akah hay nğa njam teete.» ⁴⁰ Yesu, ta', a mbəddatara, a ləvtar: «Ya fa ləvkwar, da ta njam teete la na, kwa anğwa hay a wudam la.»

Yesu a təway maja ndəhay daa berney nğa Jeruzelem

⁴¹ Masa Yesu ma wusey la gweegwe ta berney nğa *Jeruzelem na, a nəka berney a, ta', a təway maja cek ma da

høtfatar ndøhay da hwað a. ⁴² A lövey: «Akwar ndøhay da Jeruzelem, ya wudey anja tasana keðe na, ka sərmara cek ma da njadakwar daa zazay ta Gazlavay. Ama wure keðe, cek aha ta bey sem fa dey akwar, ka gwamara nga hətmar saba. ⁴³ Pas a, a sawa la, masa masa-gəra akwar hay ma da zlərmakwar ray ta cek hay nga vəram. A gərcamakwar la aa berney a, kwa akwar fa da gwamara nga bawa daa saba. ⁴⁴ A da bəzlmara berney akwar cəpa. Kwa fa da mbəkam anğwa pal da ray cəla daa ba. Akwar ta bəz akwar hay na, a da kəðmakwar cəpa vagay, maja akwar ta pam lenğesl fa pas masa Gazlavay ma sawa nga ləhdakwar na, daa ba!»

Yesu a bəltərwa ndøhay daa Way-mekey-kwakwas nga Gazlavay

(Matiye 21.12-17; Mark 11.15-19; Jan 2.13-22)

⁴⁵ Fa dəba ha, Yesu a mbəzey aa *Way-mekey-kwakwas nga Gazlavay. Fetede na, ndøhay daha fa kam luma. A bəлта ndøhay ma həðkadam cek hay a, ⁴⁶ a ləvtar: «Mawuzlalakaya daa dərewel nga Gazlavay, Gazlavay a lövey: “Way adaw na, ara way amba ndøhay a dərmaya danğay da hwað a.” Ama akwar na, ka tərdamara way a keðe nga slam nga mayal hay!»

⁴⁷ Mandaw mandaw Yesu faa sərkadata ndøhay daa Way-mekey-kwakwas nga Gazlavay. *Bay-ray hay nga ndøhay ma ka kwakwas nga Gazlavay, ta *ndøhay maa sərkada kwakwas nga Mawiz, leŋ mahura hay nga *Jəwif hay, fa səpam cəved nga kəðmara vagay. ⁴⁸ Ama ta hətam cəved nga kərzamara daa ba, maja ndøhay tabiya fa jəkfamar sləmay maaya maaya.

20

Ma vəldara gədan a Yesu na, wa?

(Matiye 21.23-27; Mark 11.27-33)

¹ Ta pas lanğar daha, Yesu faa sərkadata ndøhay daa *Way-mekey-kwakwas nga Gazlavay, fa wuztar *Mey-maaya-mawiya. *Bay-ray hay nga ndøhay ma ka kwakwas nga Gazlavay, ta *ndøhay maa sərkada kwakwas nga Mawiz, leŋ mahura hay mekele nga *Jəwif hay, a samawa fa anğa. ² Aa cəfdamara, a ləvmar: «Wuzdandara, ma ləvka nga kata cek hay a keðe na, wa? Asaya, ma vəlka cəved nga kata na, wa?» ³ Yesu a mbəðdatara, a ləvtar: «Yah may, amba yaa cəfdakwar mey pal. Wuzdamiwa cey. ⁴ Ma

slərdərwa *Jan-Baptis nga katar *baptem a ndəhay na, wa? Gazlavay daw, da daa ba, ndəhay daw?»

⁵ Ta', ndəhay a, a slam yawa da wuzlah ata, a ləvam: «Ya da mbəddakwa aa mey anga ha na, kwara? Da ya ləvkwa: "Ara Gazlavay, ma slərdərwa," na, a da mbəddandakwara, a ləvey: "Kaa ka təbmara mey nga Jan-Baptis a ba na, maja me?" ⁶ Ama, da ya ləvkwa: "Ara ndəhay ma slərdəmərwa" na, ndəhay tabiya a daa zakamandakwar ta angwə a mba a kədməndakwar vagay, maja a wulkam Jan-Baptis a, ara *ndaw ma təla mey nga Gazlavay.» ⁷ Da ray ngene, a mbəddamara, a ləvmar: «Ya sərmara ba.» ⁸ Ta', Yesu a mbəddatara, a ləvtar: «Yaw, da anda keđe na, ya fa da kadakwara ndaw ma vəlya cəvedf nga kata cek hay a keđe na, daa ba may.»

Mey-məngəy da ray ndəhay ma təbmara Bəzey nga Gazlavay ba

(Matiye 21.33-46; Mark 12.1-12)

⁹ Fa dəba ha, Yesu, ta', aa guzltar a ndəhay ta meyməngəy, a ləvtar: «Ndaw daha a key jerne nga wudez hay mezəmey. Ta', a vəlda jerne he a har ndəhay nga kam sləra da hwad a. Cay, ta', a daw aa slam dərənj, a njawa ga fetedə.

¹⁰ A wa təde aa kiya mənğəley babəza nga wudez hay a na, ta', a slərey gula anga pal fa ndəhay ma ka sləra daa jerne he, a mba a təbar babəza nga wudez hay a maala nga anga may. Gula ha, ta', a daw, a wusey aa jerne he. Ama ndəhay a, a kədmərwa, a bəlmərwa ta har ba' kəne. ¹¹ Fa dəba ha, bay nga jerne he, a slərey gula anga mekele saya. Anga may, a kədmərwa anda ndaw ngeeme heyey cənğa, a cədmərwa, ta', a bəlmərwa ta har ba' kəne. ¹² Bay a, ta', a slərey gula anga mekele nga dey maakar saya. Anga na, a kədmara haa a kamar mbəlek fa vaw, aa zakadamara a palah. ¹³ Da ray ngene, bay nga jerne he, a wulkey, a ləvey: "Wure keđe, ya da key na, kwara? Nğama ya slərey bəzey da hwad adaw masa yah ma wuda kalah keđe, da a cənmar mey la kwa." Ta' a slərda. ¹⁴ Ama masa ndəhay ma kam sləra daa jerne heyey, ma hətmar bəzey a fa sawa na, aa guzlam da wuzlah ata, a ləvam: "Nəkmara, ndaw ma sawa katay, ara bəzey ma da wa jerne keđe fa dəba nga papaha. Da ta wuswa la na, ya kədkwa vagay, a mba jerne he a njeý nğada aləkwa." ¹⁵ Masa anga ma wuswa la na, ta' aa zakadamara daa jerne he a palah, a kədmara vagay.»

Yesu aa cəfdata ndəhay fetede, a ləvey: «Wure kefe, ka wulkam bay nga jerne he a da kadata ndəhay a na, kwara? ¹⁶ Yaw, ya fa ləvkwar bay nga jerne he, a da sawa nga kəɗta ndəhay a cəpa vagay, a da vəlda jerne he a har ndəhay mekele.» Masa ndəhay a ma cəndamara mey a kefe na, a ləvam: «Anja Gazlavay nga ka kəne ba!» ¹⁷ Yesu a nəkta, a ləvey: «Da ka wudam cek aha nga key kəne ba na, mey nga Gazlavay mawuzlalakaya ma ləvey:

“Anɗwa meləmey way masa ndəhay ma ləma way
ma kəzlamara ta cakay na,

anja ara anɗwa maaya, ma fənta siya hay jak.”

Mey a kefe na, a wudəy nga ləvey me? ¹⁸ Yaw, kwa waawa ta tədey la a ray anɗwa ha na, a nɗərfey. Da anɗwa ha ta kəzley la a ray ndaw na, a dəga kwəɗ-kwad.»

Ndəhay mahura hay a jadamara Yesu da ray mepəley budaw

(*Matiye 22.15-22; Mark 12.13-17*)

¹⁹ *Ndəhay maa sərkada kwakwas nga Mawiz, ta *bay-ray hay nga ndəhay ma ka kwakwas nga Gazlavay, a sərmara Yesu aa guzley mey-menɗey kefe da ray ata. A wudam nga kərzamara Yesu ta pas a nɗene, ama a zluram ta ndəhay.

²⁰ Da ray nɗene, a zlamar nga jəɗmara. Ta', a walam ndəhay, a slərdamata fa Yesu amba a jəɗam mey da mey anɗa. Ndəhay a, a pamata ray ata hay anda ndəhay maaya. A wudam nga cənam mey maaya ba fa anɗa, amba a kərzamara, a handamara fa ndəhay nga nɗwamna amba a kamar sariya. ²¹ Aa cəɗdamara, a ləvmar: «Bay ala, ya sərmara mey masa kah maa guzlda, ta cek masa kah maa sərkadandara na, ara mey fara fara. Ka nəkta ndəhay cəpa letək fa mey akah. Ka faa sərkadata ndəhay nga nɗam anda Gazlavay ma wudəy fara fara. ²² Anda kefe, ya wudam nɗaa cəɗdamaka, kwakwas aləkwa na, a vəley cəved nɗa pəley budaw a bay mahura *Sezere daw? A vəley cəved ba daw?»

²³ Ama Yesu a səra wewer ata, ta', a ləvtar: ²⁴ «Wuzmaya dala ha pal cey.» Masa ata ma wuzmar dala ha la na, aa cəfdata, a ləvtar: «Fa dala ha kefe, ara dey nga wa? Ara mezəley nga wa?» A mbəɗdamara, a ləvmar: «Ara nga Sezere, bay mahura nga *Rawm.» ²⁵ Ta', Yesu a ləvtar: «Anda kefe, cek masa nga Sezere na, vəldamara a Sezere he. Cek masa nga Gazlavay na, vəldamara a Gazlavay a.»

²⁶ A jəɗam mey da mey anɗa fa dey nga ndəhay tabiya, ama ta hətam mey da hwad anɗa nga kərza daa ba. Sasəkar

mey masa Yesu ma mbəfdatara na, a rəzlam ga da ray a jak, a njam teete.

*Mey da ray masləkdawa nga ndəhay daa meməcey
(Matiye 22.23-33; Mark 12.18-27)*

²⁷ Fa dəba ha, ndəhay *Saduse hay a ngəcham a cakay Yesu. Ndəhay a ngene ara ndəhay ma wulkam, ma ləvam da ndaw ta məcəy sem na, fa da sləkdawa daa meməcey daa ba. Aa cəfdamara Yesu, a ləvmar: ²⁸ «Bay ala, zleezle *Mawiz ta wuzlalandakwar kwakwas la, a ləvey: “Da ndaw məlmaha ta məcəy sem na, da ngwas nga ndaw ma məcəy a, ta yawa bəza hay daa ba na, si məlmaha a la ngwas-vagay a, amba a yamawa bəza hay ngada məlmaha maməckaya ha.” ²⁹ Yaw, məlman hay maasala daha, ata ngaa man, ngaa pan. Məlma ata mahura, leŋ! a ley ngwas. Fa dəba ha, ndaw aha pam! a məcəy, ta hətəy bəzey daa ba. ³⁰ Mambaray a, leŋ! a la ngwas-vagay a, aa pam! a məcəy, ta hətəy bəzey daa ba may. ³¹ Ma səpa nga maakar a, leŋ! a la ngwas-vagay a saya, a məcəy, ta hətəy bəzey daa ba cənga. Anda keđe, ata maasala ata tabiya, ta lamara ngwas aha la, a məcām, ta hətām bəzey ta ngwas aha daa ba. ³² Fa dəba ha masa ta məcām sem na, ngwas aha pam! a məcəy may. ³³ Anda keđe, ta pas masa ndəhay maməctakaya ma da sləkdamawa na, ngwas aha a da key na, ngwas nga wa? Maja ata maasala ata cəpa, ta lamara la nga ngwas ata.»

³⁴ Yesu a mbəfdatara, a ləvtar: «Da bəla keđe, zel fa ley ngwas, ngwas fa ley zel. ³⁵ Ama fa dəba nga meməcey, zel hay ta ngusay masa Gazlavay ma nəkta maaya nga sləkdamawa daa meməcey amba a njam da cakay anga na, ngene zel a ley ngwas daa saba, ngwas a ley zel daa saba. ³⁶ Daa masa ata da cakay Gazlavay na, ata anda maslan anga hay da vad, fa da məcām daa saba. Ta tərām sem bəza hay nga Gazlavay maja ta sləkdamawa sem daa meməcey. ³⁷ Kwa Mawiz zleezle na, ta wuzleley mey la nga wuzey, ndəhay a sləkdamawa la daa meməcey. Yaw, daa masa anga maa guzley da ray awaw megədey da ray kusaf na, a zəla Bay Gazlavay, “Gazlavay masa *Abərahām, *Izak, leŋ *Jakwap ma namar ray.”» ³⁸ Yesu aa guzley saya, a ləvey: «Fa Gazlavay na, ndəhay maməctakaya ta ndəhay ta dey na, ata cəpa ta dey, maja Bay Gazlavay, ara Gazlavay nga ndəhay ta dey, ba na, ara Gazlavay nga ndəhay maməctakaya ba.» ³⁹ Siya hay da wuzlah ndəhay maa sərkada kwakwas nga Mawiz a ləvam: «Bay ala, ka

taa guzley la maaya.» ⁴⁰ Da ray ηgene ndəhay a zluram ηgaa cəfdafamar mey mekele.

*Kəriste, anga bay ηga Davit na, kwara?
(Matiye 22.41-46; Mark 12.35-37)*

⁴¹ Yesu aa cəfdata ndəhay fetede, a ləvey: «Ndəhay a ləvam *Kəriste, *ndaw masa Gazlavay ma wala ηga ləhdata ndəhay na, ara bəzey da hwad Bay *Davit na, kwara?

⁴² Maja Davit ta ray anga, a wuzlala daa derewel ηga *Pəsam, a ləvey:

“Bay Gazlavay a ləvar a Bay adaw Mahura:

Sawa, njeɣ a har-zəmay adaw amba ya wakwa da ray ndəhay

⁴³ haa ta pas masa yah ma da pata masa-gəra akah hay asi salay akah.”

⁴⁴ Yaw, da Davit a zəla Kəriste “Bay Mahura” na, kaa wara Kəriste he ara bəzey da hwad Davit saya na, kwara?»

Yesu a kətata gula anga hay fa ndəhay maa sərkada kwakwas ηga Mawiz

(Matiye 23.1-36; Mark 12.38-40)

⁴⁵ Yesu a patar lengeɣl a gula anga hay fa mey ηga ndəhay tabiya da cakay a, fa jəkfamar sləmay. Aa guzltar a gula anga hay a, a ləvtar: ⁴⁶ «Wam vaw fa *ndəhay maa sərkada kwakwas ηga Mawiz. A wuɣam mepəkey ta dawura hay fa vaw ηga zlepeɣ. A wuɣam ndəhay a camatar har ta meney ray fa mey ηga ndəhay. Daa *way-mewuzey-mey ηga Gazlavay na, a səpam slam-menjeɣ fa mey ηga ndəhay amba ndəhay tabiya a hətmatar. Ta pas gwagway na, a səpam slam-menjeɣ maaya. ⁴⁷ Asaya, fa təbmatara cek hay ηga ηgwas-vagay hay tabiya, ama da ata fa dərəm danɣay na, a njam daa medərey-danɣay a ga, amba ndəhay a ləvam ata maaya. Ya fa ləvkwar, Gazlavay a sərdana banay la, ma fəna ηga ndəhay mekele!»

21

Mey da ray ηgwas-vagay masa-viya ma vəley cek a Gazlavay

(Mark 12.41-44)

¹ Yesu anga daa *Way-mekey-kwakwas ηga Gazlavay. A nəkey dey ta cakay, a hətatar ndəhay masa-zleley hay, fa kwiyam dala aa cek mecekeley dala. ² A həteɣ ηgwas-vagay masa-viya daha, fa kwiyey siseɣ siseɣ cew aa cek aha

may. ³ Da ray ηgene, Yesu a løyey: «Ya fa løykwara fara fara, ηgwas-vagay masa-viya kefe, ta vøley dala la ma fəna ηga ndəhay siya tabiya. ⁴ Ya løykwara anda kefe na, maja ndəhay siya, a vølam dala nekədey daa dey zleley ata hay da way ga. Ama ηgwas-vagay kefe, ta mərğa aηga ha cəpa, a vølda zleley aηga tabiya, masa aηga ma da hədkey cek mezəmey ta aηga.»

Mey da ray mendəvey ηga bəla

(Matiye 24.1-14; Matiye 10.17-22; Mark 13.1-13)

⁵ Ndəhay siya aa guzlam da ray *Way-mekey-kwakwas ηga Gazlavay, a løyam: «Way kefe, madiykaya ta aηgwa ma mbey kalah, ta cek hay maaya ma hədkam ba masa ndəhay ma vøldamata a Gazlavay.» Yesu a løytar: ⁶ «Pas a, a sawa la, cek hay masa akwar ma hətmatar kefe na, a da bəzlam cəpa, kwa aηgwa pal fa da mbəkey da ray cəla daa ba.»

⁷ Aa cəfdamara, a løymar: «Bay ala, cek aha a da key na, ta vara? Ya da sərmara dar a ta wuswa cay na, fa me?»

⁸ Yesu a mbədfatara, a løytar: «Wam vaw, ka da vølmatar cəved a ndəhay ηga fəcmakwar ba. Ya løykwara anda kefe, maja ndəhay ga a samawa la, ta mezəley adaw, a da løyam ara Gazlavay ma walata ηga ləhey ndəhay daa banay. Asaya, a løyam pas masa Gazlavay ma da ləhdata ndəhay ta wuswa cay. Ka da diyam asi ndəhay a ηgene ba! ⁹ Ta pas masa akwar ma da cənam labara ηga vøram hay, ta labara ηga ndəhay ma cakalam mey ta bay ata hay na, ka da zluram ba, maja si cek hay kefe a kam la teesed dāgay. Ama ara mendəvey ηga bəla wure wure ηgene ba.»

¹⁰ Fa dəba ha, aa guzley saya, a løyey: «Hwayak lanğar a da key vøram ta hwayak lanğar, bay lanğar a da key həma a ray bay lanğar. ¹¹ Hwiyak a wusey la ga. May a key la daa hwayak hay mekele mekele, asaya, macay hay a kədam ndəhay la ga. Cek hay ma zlurey ndaw a kam la, asaya, cek hay ma rəzley ndaw a wuzmawa la da gazlavay da vad.

¹² «Ama wuskwaa cek hay a, a da kam na, a kərzamakwar la, a sərdamakwar banay la, a vøldamakwar la amba a kamakwar sariya daa *way-mewuzey-mey ηga Gazlavay hay. A ndəkwdamakwar la aa fərsəne, a handamakwar la fa mey ηga bay hay, ta fa mey ηga mahura hay ηga hwayak hay, maja yah. ¹³ Ka da səram banay a ηgene na, amba ka hətam cəved ηga key sede da ray adaw. ¹⁴ Da ray ηgene, sərmara maaya maaya ka da zluram da ray

mey masa akwar ma daa guzlam ba, ¹⁵ maja ya vɔ̀kwar lenjesl la ngaa guzley mey maaya. Anda keɗe, kwa masa-gɛra akwar hay, fa da gwamara nga tɔ̀damakwar daa ba. ¹⁶ Kwa papakw akwar hay, kwa mamakw akwar hay, kwa mɛlmakw akwar hay, kwa sɛkway akwar hay, kwa jam akwar hay, a wudmakwar la a way bay. Ndɔ̀hay siya da wuzlah akwar na, a kɛɗmata la vagay. ¹⁷ Ndɔ̀hay tabiya a da ngɔ̀damakwar ba, maja yah. ¹⁸ Ama, kwa engwec nga ray akwar pal fa daa zɔ̀ɗey daa ba. ¹⁹ Bɛsmara banay a, anda keɗe, ka hɛtam heter mendɔ̀vey ba la.»

Mey da ray hwayak nga Jeruzelem ma da pɔ̀lhey
(Matiye 24.15-21; Mark 13.14-19)

²⁰ Yesu aa guzltar a gula anɗa hay saya, a lɔ̀vtar: «Da ka hɛtmatar sewje hay ta zlɛmra berney nga *Jeruzelem sem nga key vɛram na, daa ngene, sɛmra berney a gweegwe cay a pɔ̀lhey. ²¹ Anda keɗe, si ndɔ̀hay daa hwayak nga *Jude a hwam nga bawa a anɗwa, si ndɔ̀hay da Jeruzelem a bam, asaya, ndɔ̀hay da slala ta cakay a da mbɔ̀zam aa berney a saba. ²² Daa ngene, Bay Gazlavay a da sɛrdata banay ta ndɔ̀hay daa hwayak a, amba cek hay tabiya mawuzlalakaya daa ɗerewel nga Gazlavay dɔ̀ga zleezle na, a kam fara fara. ²³ Daa ɗar hay a ngene, banay a sawa la a ray ngusay ta hwad ta a ray ngusay masa ta bɔ̀za hay da har, maja banay mahura a sawa la aa hwayak a. Fara fara, Bay Gazlavay a cey mevel la a ray ndɔ̀hay daa hwayak a. ²⁴ Masa-gɛra hay a da kɛɗmata ndɔ̀hay siya vagay ta dɔ̀law, siya, a da tɛrdamata nga beke hay, a da handamata aa hwayak hay mekele mekele da bɛla. Anda keɗe, ndɔ̀hay masa *Jɔ̀wif hay ba, a da wam da ray Jeruzelem, a da sɛrdamata banay haa kasl pas masa mewey ata ha ma ndɔ̀vey.»

Mey da ray ma vɔ̀hwa nga Bɛz nga Ndaw
(Matiye 24.29-31; Mark 13.24-27)

²⁵ Yesu aa guzley saya, a lɔ̀vey: «Daa ngene, ndɔ̀hay a da zluram, a wulkam cek maaya ba a key la maja pas fa mbɔ̀ɗey, kiya fa mbɔ̀ɗey, wurzla hay fa mbɔ̀ɗam. Da bɛla na, sɛkway hay tabiya mandɔ̀zay a da katar maja membey mey nga yam ta vanɗwala nga yam daa bɔ̀lay. ²⁶ Ndɔ̀hay a da wulkam kalah fa cek hay ma da kam da bɛla, anda keɗe mandɔ̀zay a da kɛɗta vagay maja cek hay cɔ̀pa da gazlavay da vad, a wusam la. ²⁷ Fa dɔ̀ba ha, a da hɛtmaya

21:14 21.14-15 12.11-12 **21:16** 21.16 Mi 7.6; Mt 10.35; Lk 12.52-53 **21:18** 21.18 1Sam 14.45; Mt 10.30; Lk 12.7 **21:19** 21.19 CWJ 13.10 **21:20** 21.20-24 19.41-44; 20.16; Mt 22.7 **21:22** 21.22 Mew 32.35; Aw 9.7 **21:25** 21.25 Ps 46.3-4; Mt 24.29

yah, *Bəz nga Ndaw, ya fa sawa daa mekwtene ta gədan mahura, ta mewedey nga Bay Gazlavay. ²⁸ Ama da cek hay a kede fa zlamar mekey na, akwar na, lacam maaya maaya, banğadamata dey akwar hay, maja yah, ndaw ma da ləhdakwar daa banay, gweegwe cay ya wuswa.»

Mey-menğey ta gudav

(Matiye 24.32-35; Mark 13.28-31)

²⁹ Fa dəba ha, Yesu a ngatar mey a gula anğa hay, a ləvtar: «Nəkmara gudav kede ta wudez hay siya. ³⁰ Da masa akwar fa hətmatar gwaslaf hay a fa zlamar nga dedefey na, ka sərmara kiya madaw a ley gweegwe cay. ³¹ Anğa letək kəne, da ka hətmatar cek hay a fa kam anda yah ma ləvkwar kaa na, ka sərmara gweegwe cay, Gazlavay a wuzdərwa bay anğa. ³² Ya fa ləvkwar fara fara, cek hay a kede tabiya, a da kam na, ndəhay masa wure kede ta məcam tabiya daa ba arañ. ³³ Slam da vad ta slam da hwayak a ndəvey la, ama mey adaw na, fa da ndəvey daa ba səlak.»

Yesu a kətata ndəhay da ray ma vəhwa anğa

³⁴ «Wam vaw fa menğey akwar. Wam vaw, ka da mbəkdamara ray akwar nga sey cek haa ka wam ba leñ nga səpey cek mezəmey ta cek mesey kalah ba, asaya, ka da mbəkdamara ray akwar nga wulkey kalah da ray menğey da bəla ba. Ray akwar a da həbey fa cek hay a kede ba, maja pas masa yah ma da vəhwa na, kwa ka sərmara dər a ba, ya da hətfakwar dərfağay, ³⁵ anda ndaw ma kəzey cek ta gadañ. Ta pas nğene, ya da katar sariya a ndəhay da bəla tabiya. ³⁶ Ya fa ləvkwar, wam vaw, dəram dangay mandaw mandaw, amba ka hətam gədan nga ləhey fa cek hay ma da kam tabiya, asaya, nga lecey fa mey adaw, yah, *Bəz nga Ndaw, ta mandərzay ba.»

³⁷ Mandaw mandaw Yesu a vərndey daa *Way-mekey-kwakwas nga Gazlavay, fa wuzey mey. Ama taa kwad na, a daw a nawa daa anğwa nga *Awliviye. ³⁸ Mandaw mandaw taa pərek na, ndəhay ga a diyam fa vəda aa Way-mekey-kwakwas nga Gazlavay, amba a jəkam sləmay fa mey anğa.

22

Juda a vəlda Yesu a har masa-gəra anğa hay

(Matiye 26.1-5, 14-16; Mark 14.1-2, 10-11; Jan 11.47-53)

¹ Gwagway nga peñ manjar cek ma həsla da hwad a mezəley gwagway nga *Pak, gweegwe cay. ² *Bay-ray

hay nga ndohay ma ka kwakwas nga Gazlavay, ta *ndohay maa sarkada kwakwas nga Mawiz, a sɔpam cɔvedɔ amba a kɔdmara Yesu vagay, ama a zɔuram ta zagaba.

³ Fa dɔba ha, *Satan kula! a mbɔzey aa mevel nga Juda, ndaw mezɔley Iskariyawt. Ara gula pal da wuzlah gula hay kuraw a ray a cew nga Yesu. ⁴ Juda ta', a daw a kamawa maɔay ta *bay-ray hay nga ndohay ma ka kwakwas nga Gazlavay leŋ ta mahura hay nga ndohay ma jɔɔa *Way-mekey-kwakwas nga Gazlavay amba a vɔldatara Yesu. ⁵ Bay-ray hay ta mahura hay a, aa sɔmam ga. A lɔvmar da ta vɔldatara Yesu la na, a vɔlmar dala. ⁶ Juda a tɔba nga vɔldatara. A daw a sɔpey cɔvedɔ, amba a vɔldatara Yesu, kwa ndohay a sɔmra ba.

Gula hay nga Yesu a sɔpam slam nga key gwagway nga Pak

(Matiye 26.17-25; Mark 14.12-21; Jan 13.21-30)

⁷ Gwagway nga peŋ manjar cek ma hɔsla da hwadɔ a, ta wuswa cay. Pas a ngene ara pas ma hɔrey bɔz-tɔban hay nga key gwagway nga *Pak. ⁸ Da ray ngene, Yesu a slɔrdata ata *Piyer ta *Jan, a lɔvtar: «Diyam ta diymandakwar slam ta cek mezɔmey amba ya zɔmkwa daf nga gwagway nga Pak!» ⁹ Ata Piyer ta Jan aa cɔɔdamara, a lɔvmar: «Ka wudɔy ya diyam nga diywa slam aha na, dama?» ¹⁰ A mbɔɔdatara, a lɔvtar: «Ehe, jɔkam slɔmay. Diyam aa berney nga *Jeruzelem. Masa akwar fa da mbɔzam aa berney a na, ka cam ray la ta ndaw daha fa daw ta yam daa kwakulam. Diyam asiya. Aa way masa anga ma da mbɔzey na, ¹¹ lɔvmar a bay nga way a: "Bay ala a lɔvey: Way masa yah ma da zɔmam daf nga gwagway nga Pak ta gula aɔaw hay na, aa daa wura?" ¹² Fa dɔba ha, a wuzkwar way mahura da ray way la. Daa way a na, cek hay tabiya daha nga key gwagway a. Ka da diymandakwara cek mezɔmey amba ya zɔmkwa daf nga gwagway a fetede.» ¹³ Fa dɔba ha, a diyam, a hɔɔfamatar cek hay tabiya anda Yesu ma lɔvtar heyey. Ta', a diymata cek hay nga gwagway nga Pak a.

Yesu a zɔmey daf ta ndohay anga hay meslɔrey nga madagway-dakw

(Matiye 26.26-30; Mark 14.22-26; 1 Kwarinti hay 11.23-25)

¹⁴ Masa pas tɔde nga zɔmey daf nga gwagway nga *Pak heyey na, ta', Yesu a diyam aa way heyey, a njam ta ndohay anga hay meslɔrey nga zɔmey daf. ¹⁵ Yesu a lɔvtar: «Ya ta

wufey la fara fara nga zəmey dəf nga gwagway nga Pak kede ta akwar, wara a sərdamaya banay. ¹⁶ Ya fa ləvkwar, kwa ya fa da zəmey dəf nga gwagway nga Pak a daa saba, si ta pas masa Bay Gazlavay ma da wey da ray ndəhay tabiya da vad. Ta pas ngene, mabara nga mey da ray gwagway nga Pak a, a wuzwa la fara fara.»

¹⁷ Fa dəba ha, Yesu leŋ! a la vəley ta cek mesey da hwaɗ a, ta', a kar suse a Bay Gazlavay, a ləvtar: «Təbmara cek kede, samara akwar cəpa. ¹⁸ Ya fa ləvkwar fara fara, dəga wure kede, ya fa da sey cek aha ta akwar daa saba haa kasl pas masa Gazlavay ma da wuzdərwa bay aŋga fara fara.»

¹⁹ Fa dəba ha, leŋ! a ley peŋ, a kar suse a Bay Gazlavay, ta', a wunka, a vəldatara, a ləvtar: «Kede he na, ara vaw adaw mavəldakaya nɣada akwar. Kamara anda kede amba ka sərfadamaya.»

²⁰ Ata ma zəmamara dəf cay na, ta', a vəldatara vəley ta cek mesey da hwaɗ a heyey saya, a ləvtar: «Kede he na, ara mambaz adaw. Mambaz a, a da mbədwa maja akwar. Ta fa mambaz a, Gazlavay a jəwey mey mawiya ta ndəhay aŋga hay. ²¹ Ama nəka, ndaw masa ma daa zəɗɗaya na, aŋga fa zəmey dəf fede ta yah. ²² Fara fara, si yah, *Bəz nga Ndaw, ya məcey anda Gazlavay ma wufey, ama banay a sawa la a ray ndaw masa ma daa zəɗɗaya!» ²³ Aa cəɗdam vaw da wuzlah ata, a ləvam: «Ma da ka cek aha kede na, ara wa?»

Mahura na, wa?

²⁴ Fa dəba ha nekəɗey, *gula hay nga Yesu a kam yawa ga da wuzlah ata, a wuɗam amba a sərmara mahura da wuzlah ata na, wa. ²⁵ Yesu a ləvtar: «Bay hay da bəla kede fa wam da ray ndəhay ta gədaŋ. Ata na, a wuɗam ndəhay ata hay aa həmdamata, a zəlmata bay hay ma ka sləra maaya. ²⁶ Ama nga akwar na, kəne ba. Ndaw masa mahura da wuzlah akwar na, si a tərey anda matabəwa akwar. Ndaw masa ma wakwar na, si a tərey ndaw ma kakwar sləra. ²⁷ Da wuzlah ndaw ma həlrawa dəf ta ndaw ma zəma na, mahura na, wa? Mahura na, ara ndaw ma zəma, ba diya? Ama yah na, yah da wuzlah akwar, anda ndaw ma kakwar sləra.

²⁸ «Akwar na, ndəhay masa dasi adaw mandaw mandaw daa masa ya fa sərey banay, akwar ta mbəkdamaya daa ba. ²⁹ Yah may, ya vəlkwar gədaŋ amba ka wam da ray ndəhay anda Papay ma vəlya gədaŋ nga wey da ray ndəhay. ³⁰ Da

22:20 22.20 Mab 24.8; Jer 31.31; Zak 9.11; Rm 11.27; 2Kwr 3.6; Gal 4.24; Heb 8.6; 9.12 **22:21** 22.21-23 Jan 13.2, 21-30 **22:24** 22.24 Mt 18.1; Mk 9.33-34

22:24 22.24-26 9.46-48 **22:26** 22.26 9.48; Mt 23.11; Mk 9.35 **22:27** 22.27 Jan 13.4-5, 12-17

ray ηgene, pas masa yah ma da wey da ray ndəhay na, akwar may, ka da njam aa slam maaya da cakay adaw, ya da zəmkwa cek, ya da sakwa cek bama. Ka da njam aa slam-menjey nga bay hay, amba ka kamatar sariya ηgada səkway nga *Israyel hay kuraw a ray a cew.»

Mey da ray ata Yesu ta Simanɔw Piyer

(Matiye 26.31-35; Mark 14.27-31; Jan 13.36-38)

³¹ Yesu a ləvar a *Simanɔw *Piyer: «Simanɔw, Simanɔw, jəkey sləmay, *Satan ta hətey cəved la amba a kəfkwar * anda ndaw ma kəfey daw nga wunkey bəz-daw ta cekwesl e. ³² Ama ya ta dərar dangay la a Gazlavay maja kah, amba ka mbəkda nga təba mey adaw ba. Pas masa ka ta vəhwa sem a fa yah cənga na, vəltar gədan a məlmakw hay may.» ³³ Piyer a ləvar: «Bay Mahura, kwa a handamaka aa fərsəne na, ya səpka la, amba ya njakwa cew e, asaya, kwa a kədmaka vagay na, ya məkwa la cew e.» ³⁴ Yesu a mbəddara, a ləvar: «Ya fa ləvka, Piyer, tasana wuskwaa gwagwalak a da cey dāy na, ka ta ləvey cay dey maakar, ka sərya ba, ka sərya ba.»

Mey da ray mewey vaw maja banay

³⁵ Fa dəba ha, Yesu a ləvtar a gula anɔa hay: «Ta pas masa yah ma slərdakwar, dala da har daa ba, gabal daa ba, tarak daa ba heyey na, ka ta huraam cek daa slam aha la daw?» A mbəddamara, a ləvmar: «Ya ta huraam cek daa ba.» ³⁶ A ləvtar: «Ama wure kedə na, ndaw masa dala anɔa daha, nga la a har, ndaw masa gabal anɔa daha, nga la. Ndaw masa dəlaw anɔa daa ba, nga hədkada zana anɔa, nga hədkawa dəlaw dəba. ³⁷ Daa dərəwel nga Gazlavay, mey mawuzlalakaya da ray adaw a ləvey: “Anɔa masləfkaya da wuzlah ndəhay ma kəda ndəhay vagay!” Fara fara, si cek a kaya la anda mey mawuzlalakaya da ray adaw a cəma.» ³⁸ Gula anɔa hay a ləvmar: «Bay Mahura, dəlaw hay cew kedə daha.» A mbəddatara, a ləvtar: «Mey a kedə mak.»

Yesu a dərey dangay daa Anɔwa nga Awliviye

(Matiye 26.36-46; Mark 14.32-42)

³⁹ Fa dəba ha, Yesu ta', a bey daa berney nga *Jeruzelem, a daw ηgadaa Anɔwa nga *Awliviye anda anɔa ma daw mandaw mandaw taa kwad. Gula anɔa hay ta', a diyam asiya. ⁴⁰ Anɔa ma wusey la fetedə na, ta', aa guzlar a gula

22:30 22.30 Mt 19.28 * **22:31** 22.31 kəfkwar: Ata Piyer ta gula hay nga Yesu siya. **22:31** 22.31 22.3 **22:32** 22.32 Mt 16.18; Jan 21.15-17 **22:34** 22.34 22.61; Mt 26.75; Mk 14.72 **22:35** 22.35 9.2-3; 10.4 **22:37** 22.37 Iz 53.12 **22:39** 22.39 21.37; Mt 26.30; Mk 14.26; Jan 18.1 **22:39** 22.39-46 5.16

anġa hay, a ləvtar: «Dəram danġay a Gazlavay nġa jənkwar amba cek a batakwar nġa key mebərey ba.» ⁴¹ Fa dəba ha, ta', a daw ta cakay, dəreŋ nekədey. Da ndaw aa zekey anġwa na, a wusey aa slam aha. Ta', a regedey, a dərey danġay, ⁴² a ləvey: «Papay, da ka wudey na, ka gwa ka nġəchada banay keđe dəreŋ ta yah. Ta kəne he cəpa na, ka da ka anda yah ma wudey ba, ama ka anda kah ma wudey.»

[⁴³ Daa slam aha nġene, *maslan nġa Bay Gazlavay da vad, ta', a pawa salay nġa vəlar gədan. ⁴⁴ Fa dəba ha, Yesu a dərey danġay ta gədan anġa cəpa maja mevel anġa fa tədey kalah. Mawurbay fa vaw anġa fa vavawa, fa gəcey anda mambaz ma gəcey a hwayak.]

⁴⁵ Anġa ma dərey danġay cay na, ta', a sləkdey, a vəhwa fa gula anġa hay. A hətfatar na, ata cək-w-cək-w daa đar maja ta wulkam la ga, a gəram. ⁴⁶ A ləvtar: «Ka nam maja me? Sləkdam, dəram danġay a Gazlavay nġa jənkwar amba cek a batakwar nġa key mebərey ba.»

A kərzamara Yesu

(Matiye 26.47-56; Mark 14.43-50; Jan 18.3-11)

⁴⁷ Masa Yesu ta ndəvda meeguzley daa ba aran na, ndəhay ga fa samawa ta ata Juda, ndaw pal dasi gula anġa hay kuraw a ray a cew heyey. Juda ha, aa fa mey ata. A nġəchey fa Yesu amba a car har anda mandala anġa fara fara. ⁴⁸ Ama Yesu a ləvar: «Juda, ka caya har amba kaa zəđdaya, yah, *Bəz nġa Ndaw daw?»

⁴⁹ Masa ndəhay nġa Yesu ma hətmar cek aha na, aa cəđamara Yesu, a ləvmar: «Bay Mahura, ka wudey ya kəđmata ndəhay a ta dəlaw hay daw?» ⁵⁰ Ndaw pal da wuzlah ata, a nġəma madərlam nġa *ndaw mahura da ray ndəhay ma ka kwakwas nġa Gazlavay ta dəlaw, cərah! a cərha sləmay ta dey nġa zəmay. ⁵¹ Ama Yesu a ləvey: «Cay, mak! Mbəkdamata nġa wam nġa ata.» A gəsfar har fa sləmay nġa ndaw aha, sləmay a, ta', a kəfey aa slam a.

⁵² Fa dəba ha, ta', aa guzltar nġada *bay-ray hay nġa ndəhay ma ka kwakwas nġa Gazlavay, ta nġada mahura hay nġa ndəhay ma jəđa *Way-mekey-kwakwas nġa Gazlavay, leŋ nġada mahura hay nġa *Jəwif hay masa ma samawa nġa kərzamara, a ləvtar: «Ka samawa nġa kərzamaya ta dəlaw, ta zlanday faa har faa har anda yah ndaw-mayal na, maja me? ⁵³ Mandaw mandaw yah da wuzlah akwar daa Way-mekey-kwakwas nġa Gazlavay, akwar ta səpmaya nġa kərzey daa ba. Ama pas a keđe ara pas akwar, amba ka kam cek anda akwar ma wudam da

ray adaw, asaya, ara pas nga *Satan, bay nga ləvan, ma da ka sləra anga da ray adaw.»

Piyer a ləvey a səra Yesu ba

(*Matiye 26.57, 58, 69-75; Mark 14.53, 54, 66-72; Jan 18.12-18, 25-27*)

⁵⁴ Masa ata ma kərzamara Yesu cay na, ta', a handamara a way *ndaw mahura da ray ndəhay ma ka kwakwas nga Gazlavay. *Piyer fa səpta ta meedəren e. ⁵⁵ Da way ndaw mahura da ray ndəhay ma ka kwakwas a na, awaw magədkaya da palah-way daha. Piyer a daw cəkwan! a nje y a cakay ndəhay manjatakaya da mey awaw a. ⁵⁶ Dam ma ka sləra da way a daha, a hətər Piyer manjakaya da mey awaw a. Ta', a nəkfa, a ləvey: «Ndaw keđe na, ara gula nga Yesu.» ⁵⁷ Ama Piyer ma cənda anda keđe na, a cada mey, a ləvey: «Kay! ngwas keđe, ya səra ndaw a ba.» ⁵⁸ Menjey nekəfey, ndaw mekele a hətər Piyer saya, a ləvar: «Kah na, ndaw pal dasi gula anga hay.» Ama Piyer a mbəddara a ndaw aha, a ləvar: «Kay! yah dasi ata ba.» ⁵⁹ Fa dəba ha, menjey zəbat a saya na, ndaw mekele aa guzley ta gədan, a ləvey: «Fara fara, ndaw keđe na, ara gula anga, maja anga ndaw *Galile.» ⁶⁰ Ama Piyer a mbəddara, a ləvar: «Ndaw keđe! ya səra mey masa kah ma wudfey nga ləvey keđe ba.»

Wure wure ngene, masa ta ndəvda maa guzley daa ba aran na, gwagwalak a cey dəy. ⁶¹ Bay Mahura Yesu pəla! a mbəfey dey fa Piyer, a nəkfa. Piyer a sərfada mey masa Bay Mahura ma ləvar: «Wuskwaa gwagwalak a da cey dəy tasana na, ka ta ləvey cay dey maakar ka sərya ba, ka sərya ba.» ⁶² Piyer ta', a bawa aa ambaw, a təway ga, a zəley marava.

Ndəhay aa sanğəram da ray Yesu

(*Matiye 26.67, 68; Mark 14.65*)

⁶³⁻⁶⁴ Ndəhay ma jədmara Yesu a, aa sanğərfamar. A sərtamara dey anga ta zana, a kədmara, ta', aa cəfdamara, a ləvmar: «Səra ma kədkə keđe na, wa? Wuzdandara cey!»

⁶⁵ Aa guzlmər mey hay mekele mekele, a cədmara.

Yesu fa mey nga ndəhay ma sla yawa nga Jəwif hay

(*Matiye 26.59-66; Mark 14.55-64; Jan 18.19-24*)

⁶⁶ Fa dəba ha, slam ma wurey cay na, mahura hay nga *Jəwif hay, *bay-ray hay nga ndəhay ma ka kwakwas nga Gazlavay, leŋ *ndəhay maa sərkada kwakwas nga Mawiz, a kusam. A ləvmatar a ndəhay ma jədmara Yesu nga handamərwa Yesu a fa mey ata, nga key sariya. Ta', a

handamərwa Yesu a, fa mey ata. ⁶⁷ Ndəhay mahura hay heyey ta', aa cəfdamara, a ləvmar: «Da kah *Kəriste, *ndaw masa Gazlavay ma wala n̄ga ləhdata ndəhay heyey na, kadandara.» Yesu a mbəddatara, a ləvtar: «Kwa ya kadakwara yah Kəriste na, akwar fa da təbmara daa ba. ⁶⁸ Da yaa cəfdakwar mey pal na, akwar fa da mbəfdamiwa daa ba. ⁶⁹ Dəga wure keđe, yah, *Bəz n̄ga Ndaw, ya da n̄jey ta har-zəmay n̄ga Bay Gazlavay Mawaca-waca.» ⁷⁰ Ata tabiya a ləvmar: «Kaa kah na, Bəzey n̄ga Gazlavay dəba daw?» A mbəddatara, a ləvtar: «Ahaw, anda akwar ma ləvam, yah, Bəzey n̄ga Gazlavay.» ⁷¹ Da ray n̄gene, aa guzlam, a ləvam: «Aləkwa ta ray aləkwa, ta cəndakwa cay da mey an̄ga, ya səpkwa ndaw n̄gaa guzln̄dakwar da ray a na, keme seme!»

23

Yesu fa mey n̄ga Bay Pilat

(*Matiye 27.1-2, 11-14; Mark 15.1-5; Jan 18.28-38*)

¹ Mahura n̄ga *Jəwif hay makustakaya heyey tabiya, a sləkdam, a handamara Yesu fa mey n̄ga Bay Pilat. ² Fetede, a zlamar n̄ga mbərzlafamar, a ləvam: «Ya hətfamar ndaw keđe fa n̄sa hwayak ala, fa həldata ndəhay n̄ga vəldamara budaw a bay Rawma ba! A ləvey an̄ga *Kəriste, bay mahura.»

³ Pilat aa cəfda Yesu, a ləvar: «Kah na, bay n̄ga Jəwif hay fara daw?» Yesu a mbəddara, a ləvar: «Anda kah ma ləvey.»

⁴ Pilat aa guzltar a *bay-ray hay n̄ga ndəhay ma ka kwakwas n̄ga Gazlavay len̄ a ndəhay makustakaya fetede, a ləvtar: «Ya ta hətey mebərey fa ndaw keđe təde n̄ga kərza daa ba.» ⁵ Ama ndəhay a, a mbərzlam cən̄ga, a ləvam: «Fa caradata ndəhay daa hwayak n̄ga ndəhay Jəwif hay tabiya n̄ga key cek maaya ba ta fa mewuzey mey an̄ga hay mekele mekele. A zlarawa da *Galile, haa a wuswa fede.»

Yesu fa mey n̄ga Bay Herawt

⁶ Ama masa Pilat ma cənda Yesu a sawa da *Galile na, ta', aa cəfdata ndəhay da cakay a, a ləvtar: «Ndaw keđe ara ndaw Galile fara daw?»

⁷ Masa Pilat ma cənda Yesu a sawa da Galile, hwayak masa *Herawt ma wa na, ta', a slərdara a Bay Herawt, maja daa dar a n̄gene Bay Herawt a, an̄ga da *Jeruzelem fetede may.

⁸ Masa Bay Herawt a ma hətar Yesu na, aa səmey ga maja dəga zleezle, an̄ga fa wufey n̄ga hətar, maja an̄ga fa cəney

mey da ray a. A wulkey daa mevel anɗa na, da Yesu a key maazla meedey anɗa la kwa. ⁹ Bay Herawt a, aa cɛɗɗafar mey hay mekele mekele, ama kwa Yesu a mbəɗɗara ba. ¹⁰ *Bay-ray hay ɗga ndəhay ma ka kwakwas ɗga Gazlavay, ta *ndəhay maa sərkaɗa kwakwas ɗga Mawiz ata fetede. A dadəɗɗafamar mey masa maadaku a. ¹¹ Bay Herawt a, ta sewje anɗa hay aa sanɗərfamar, a cəɗmara. Ta', a pamar zana maaya membey fa vaw, a vəhdamara fa Bay Pilat saya. ¹² Daa ba na, ata Bay Herawt ta Bay Pilat a cəmam ba, ama mezley dɔga ta pas ɗgene ata jam.

A dɛslmara sariya ɗga Yesu

(Matiye 27.15-26; Mark 15.6-15; Jan 18.39-19.16)

¹³ Masa Bay *Herawt ma vəhda Yesu sem fa Pilat saya na, ta', Pilat a kusta *bay-ray hay ɗga ndəhay ma ka kwakwas ɗga Gazlavay, ta mahura hay ɗga *Jəwif hay, leɗ zagaba, ¹⁴ a ləvtar: «Akwar ta handamərwa ndaw kede la fa yah, ka ləvam fa nəsə hwayak ala. Ama ya taa cəɗɗa la meedey akwar, kwa ya ta hətəy mebərey anda akwar ma ləvam na, daa ba. ¹⁵ Bay Herawt may, ta hətəy mebərey a daa ba kəne. Ta', a vəhdərwa fa aləkwa cəɗga. Fara fara ndaw kede ta key mebərey tede ɗgaa zədey heter anɗa na, daa ba. ¹⁶ Yaw, ya sləɗa gway na, ya mbəkda.»

[¹⁷ Fa mevey a, fa mevey a, gweegwe gwagway ɗga *Pak na, Pilat a pəskatar ndaw pal daa fərsəne ɗgada ndəhay daa hwayak a.]

¹⁸ Ama ndəhay tabiya fetede a zlamar mewudey ta gəɗaɗ, a ləvam: «Kəɗndara ndaw kede vagay! Pəskandar Barabas!» ¹⁹ A kəzlamara Barabas aa fərsəne na, maja anɗa ma həldata ndəhay ɗga kam baazlam a ray bay ɗga berney a ta anɗa ma kədey ndaw vagay.

²⁰ Pilat ta', aa guzltar ɗgada zagaba saya maja a wufey ɗga mbəkda Yesu. ²¹ Ama ndəhay a, a wudam ta gəɗaɗ, a ləvam: «Dəra fa hwadam mazlanɗalakaya! Dəra fa hwadam mazlanɗalakaya!»

²² Pilat ta', aa guzley ɗga dey maakar, a ləvtar: «Cek maaya ba masa anɗa ma key na, wura? Maja kwa ya ta hətəy mebərey fa anɗa tede ɗgaa zədey mesəfney anɗa na, daa ba. Ya da sləɗa gway na, ya mbəkda.» ²³ Ama a wudam ta gəɗaɗ, aa cəɗɗamara, a ləvam: «Ya wudam Yesu na, ka dəra fa hwadam mazlanɗalakaya.» Mewudey ata ha a fənar ray a Pilat. ²⁴ Ta', a təba ɗga key anda ata maa cəɗɗamara. ²⁵ A pəskatara ndaw masa ata ma wudam ɗga pəskey heyey. Ndaw a na, a kəzlamara aa fərsəne,

maja anġa ma hõldata ndõhay nġa key baazlam a ray bay nġa berney a ta anġa ma kõdefey ndaw vagay heyey. Ta', a võldatara Yesu amba a kamar cek anda ata ma wudam.

*A dõrmara Yesu fa hwadam mazlanġalakaya
(Matiye 27.32-44; Mark 15.21-32; Jan 19.17-27)*

²⁶ Daa masa fa handamara Yesu nġa dõrey na, a cadamara ray ta *Simanġw, ndaw da Siren fa sawa da ley. Sewje hay kaw! a kõrzamara Simanġw a, a pamara hwadam mazlanġalakaya heyey a ray anġa, a handa fa dõba nġa Yesu.

²⁷ Ndõhay ga fa diyam asiya, asaya, nġusay fa diyam asiya ta matõway. ²⁸ Ama Yesu põla! a mbõdwa dey fa nġusay a, a lõvtar: «Nġusay da *Jeruzelem, ka tõwam maja yah ba, ama tõwam maja ray akwar, ta maja bõz akwar hay! ²⁹ Maja pas nġa banay a sawa la masa ndõhay a da lõvam: “Meesõmey daha nġada nġusay dõrlay hay, masa ta yam bõza hay daa ba, masa ta võlam dõwa a bõza hay daa ba sõlak!” ³⁰ Ndõhay a da zlamar nġaa guzley nġada anġwa hay, a lõvam: “Bõzlmawa a ray ala!” ta nġadaa heelenġ hay, “Põshamandar!” ³¹ Da fa gõdmar awaw fa hwadam meendõbek e nġaa wurey na, kaa wara hwadam makwalakaya na, a gõdmar kõlmedek! daa ba daw?» *

³² Ta', a handamawa ndõhay mekele cew, ndõhay a, ara mayal hay, amba a kõdmatata ta ata Yesu daa slam a vagay. ³³ A wusam aa slam masa ata ma zõlmara «tetesl nġa ray.» Ta', a dõrmara Yesu aa slam aha, lenġ mayal hay cew heyey. Mayal hay a na, a dõrmata fa hwadam mekele hay a cakay Yesu, pal ta har-zõmay, lanġar ta har-gula. ³⁴ Yesu a lõvey: «Papay, mbõkdatara mebõrey nġa ndõhay kedfe † maja a sõrmara cek masa ata ma kamara ba.»

Ndõhay ma dõrmara Yesu a, a kõdam caca amba a wunkamara zana anġa hay da wuzlah ata. ³⁵ Ndõhay tabiya malacatakaya fetedfe, fa nõkmara cek mekey. Mahura hay nġa *Jõwif hay aa sanġõrfamar, a lõvam: «Anġa ta lõhey ndõhay la daa memõcey. Da masa anġa *Kõriste, *ndaw masa Gazlavay ma wala nġa lõhdata ndõhay na, nġa lõhda

23:29 23.29 21.23 **23:30** 23.30 Aw 10.8; CWJ 6.16 * **23:31** 23.31 Yesu a wa hwadam meendõbek e ta anġa ray anġa, ndaw masa ta mebõrey daa ba. A wa hwadam makwalakaya ta ndõhay Jõwif hay masa ta mebõrey ga. Anda kedfe, Yesu a lõvey Jõwif hay a da sõram banay ma fõna banay masa anġa ma sõra kedfe. Nõka Ez 21.3. **23:31** 23.31 1Pi 4.17 **23:33** 23.33 Iz 53.12 † **23:34** 23.34 ndõhay kedfe: Ndõhay a wulkam Yesu aa guzley da ray Jõwif hay ma wudam nġa dõrmara fa hwadam. Ndõhay mekele a wulkam Yesu aa guzley da ray sewje hay nġa Rawm ma dõrmara. Ndõhay mekele saya a wulkam Yesu aa guzley da ray ndõhay tabiya fetedfe. **23:34** 23.34 Ps 22.19; Mt 5.44; Lk 6.28; SNM 7.60

ray anğa taw!» ³⁶ Sewje hay, aa sanğərfamar may. A nğəçham a cakay a, a vəlmar wuzam maakwiyan a, a ləvmar: ³⁷ «Da kah, bay nğa Jəwif hay na, ləhda ray akah, ta har akah taw!» ³⁸ A wuzlalam mey, a sləpmara fa hwadam masa ata mazlangalamara fa vəda heyey, a ləvam: «Ndaw keđe, ara bay nğa Jəwif hay.»

³⁹ Ndaw pal da wuzlah mayal hay cew madərtakaya da cakay Yesu heyey na, a cəda Yesu, a ləvey: «Kah na, Kəriste, ba diya? Ləhda ray akah dəba taw, amba ka ləhdandar may!» ⁴⁰ Ama ndaw-mayal lanğar a kar mey, a ləvar: «Kah madərkaya anda anğa. Ka zlurey ta Gazlavay ba daw?» ⁴¹ Aləkwa na, sariya aləkwa təde fa sləra aləkwa maaya ba. Ama anğa na, kwa ta key mebərey daa ba səlak.» ⁴² Ta', aa guzley saya, a ləvey: «Yesu, pas masa kah ma da vəhwa nğa zəma bay akah na, sərfadaya may.» ⁴³ Yesu a mbəddara, a ləvar: «Ya fa ləvka fara fara, mezley dəga tasana, ya da njakwa cew e daa slam maaya da vad.»

Meməcey nğa Yesu

(Matiye 27.45-56; Mark 15.33-41; Jan 19.28-30)

⁴⁴⁻⁴⁵ Ta pas ngene, mamba wuzlah-pas na, pas sərat! a sərtey. Ləvan a key daa hwayak tabiya haa bərey maakar nğaa kwad. Daa *Way nğa Gazlavay zana ma gərca *Slam masa Gazlavay aa da hwad a na, a nğərey pədak! cew da wuzlah. ⁴⁶ Yesu a wudey ta gədan, a ləvey: «Papay, ya mbəkdaakawa mesəfney adaw a har akah.» Masa anğa maa guzley la anda keđe na, pam! a məcey. ⁴⁷ Mahura nğa sewje hay nğa Rawma hay, ma hətar cek aha ma key anda ngene na, a həlma Gazlavay, a ləvey: «Fara fara ndaw keđe, ara ndaw maaya!» ⁴⁸ Ndəhay tabiya makustakaya fetede nğa nəkey dey fa cek ma key daa slam aha na, ta hətmar cek aha la, ata tabiya a vəhmawa a way ata hay ta mekədey rav. ⁴⁹ Jam nğa Yesu hay tabiya, ta nğusay ma samawa asiya dəga da *Galile, malacatakaya dərən, fa nəkam dey fa cek ma key tabiya.

A jəhmara vagay nğa Yesu

(Matiye 27.57-61; Mark 15.42-47; Jan 19.38-42)

⁵⁰⁻⁵¹ Ndaw daha mezəley *Jawzef. Ara ndaw da slala Arimate daa hwayak nğa *Jəwif hay. Ndaw aha aa maaya fa mey nğa Gazlavay. Fa səkwa mewey nğa Bay Gazlavay. Ara ndaw da wuzlah ndəhay mahura hay ma sla yawa nğa

23:35 23.35-36, 39 Ps 22.8; 109.3-5 **23:36** 23.36 Ps 69.22 **23:37** 23.37-38
Mt 27.11 **23:43** 23.43 2Kwr 12.3 **23:44-45** 23.44-45 Am 8.9 **23:46** 23.46
Ps 31.6; SNM 7.59 **23:47** 23.47 manjar mebərey: Mt 27.19; SNM 3.14; 7.52;
22.14 **23:49** 23.49 8.2-3; Ps 38.12

Jəwif hay. Ama ta pas masa ndəhay a ma kamar sariya a Yesu amba a kədmara vagay na, Jawzef e, ta təba mewulkey ata daa ba, ta təba sləra ata masa ata ma kamara na, daa ba. ⁵² Masa Yesu ma məcey la na, Jawzef e a daw fa Bay Pilat, aa cəfdarawa ŋga vəldara vagay ŋga Yesu amba a jəha. Ta', Bay Pilat a vəlar cəved ŋga jəha. ⁵³ Anda kefe, Jawzef e, a padərwa salay ta vagay a fa hwadam mazlanjalakaya heyey. A mbəza ta maslaga, a handa aa cəvay maavərkwakaya daa pərad. Cəvay a ŋgene, kwa ta pam vagay mekele a hwad a daa ba aran. ⁵⁴ Ta pas ŋgene na, luma ŋga Gajava. Gweegwe pas a kəzley amba *pas meməskey-vaw a zley.

⁵⁵ Ŋgusay masa ma ləgdamərwa Yesu dəga da *Galile heyey, ta', a diyam bama ta ata Jawzef heyey. A wuzadam dey aa cəvay a, a nəkmara a pamara vagay ŋga Yesu na, kwara. ⁵⁶ Fa dəba ha, a vəham a way ata hay, a wam vaw ta cek hay mezey maaya leŋ mal ŋga tekwedey fa vagay ŋga Yesu. Ta pas meməskey-vaw, ŋgusay a, a məskam vaw anda *kwakwas ŋga Mawiz ma ləvey.

24

Yesu a sləkdəwa daa meməcey

(Matiye 28.1-10; Mark 16.1-8; Jan 20.1-10)

¹ Fa dəba ŋga *pas meməskey-vaw, pərek pərek ta pas luma ŋga Gudal, ŋgusay ma wam vaw ta cek hay mezey maaya heyey a lamata cek hay a, a diyam a mey cəvay ŋga Yesu. ² A hətfamar beeler mahura da mey cəvay a, magədbalakaya ta cakay. ³ A mbəzam aa cəvay a, ama ta hətfamar vagay ŋga Bay Mahura Yesu daa ba. ⁴ Daa ŋgene, ray ata a həbey. Ta', ndəhay cew daha a wuzmatar vaw. Zana ŋga ndəhay a, a wadəm mabara ndəf-ndəf. ⁵ Ŋgusay a, mandərzay a katar, a jəkwdamara ray a hwayak. Ndəhay a, a ləvmatar: «Ka səpmara ndaw masa ta dey da wuzlah ndəhay maməctakaya na, kwara? ⁶ Anŋa fede daa saba, ta sləkdəwa sem daa meməcey. Sərfadamara mey masa anŋa maa guzldakwara da *Galile heyey, a ləvkwar: ⁷ “Si a vəldamaya, yah, *Bəz ŋga Ndaw, a har ndəhay ta mebərey amba a dərmaya fa hwadam mazlanjalakaya. Ŋga dər maakar a, ya sləkdəwa daa meməcey.”»

⁸ Da ray ŋgene, a sərfadamara mey ŋga Yesu maa guzltar heyey. ⁹ Ta', a sləkdəm da mey cəvay a, a diyam, a kadamatara cek hay ma kam tabiya a *gula hay ŋga Yesu kuraw a ray a letək, leŋ ŋgada gula anŋa hay siya.

¹⁰ Nğusay a na, ara ata *Mari da Magdala, Zaan, leŋ Mari mamari ŋga *Jak ta nğusay mekele ma ləgdamata. Ara ata ma wuzdamara mey a, a ndəhay meslərey ŋga Yesu. ¹¹ Ama ndəhay meslərey ŋga Yesu a, a wulkam mey masa nğusay ma kadamara keđe na, ara mey saw kəne. A təbmara ba. ¹² Ta ŋgene he cəpa, *Piyer pərta! a lecey, a hway a mey cəvay a cəŋga. A wusey, ta', a gəbey, a wuzedey dey aa cəvay a, ama kwa ta hətey cek mekele daa ba, si maslaga. Ta', a vəhwa a way aŋga, ray a həbar da ray cek masa aa ma hətərwa.

Yesu a wuztar vaw a gula aŋga hay cew daa cəved ŋga Emayus

(Mark 16.12, 13)

¹³ Ta pas a ŋgene masa Yesu ma sləkɗawa daa meməcey na, gula aŋga hay cew fa diyam ŋgada slala mezəley Emayus. Slala ha na, a key kələmeeter kuraw a ray a letək ta *Jeruzelem. ¹⁴ Ata faa guzlam da ray cek masa ma key cəpa daa ɗar hay a ŋgene. ¹⁵ Masa ata faa guzlam, fa kam yawa da wuzlah ata na, Yesu a kərzata daa cəved, ta', a diyam bama. ¹⁶ Ata fa hətmar maaya maaya, ama cek ma təkta ŋga səmra ara Yesu na, daha. ¹⁷ Vaw ata tabiya maməckaya. Yesu aa cəɗɗata, a ləvtar: «Masa akwar fa samawa keđe na, ka kam maɗay na, da ray me?» Ta', a lacam. ¹⁸ Ndaw dasi ata pal, mezəley Kəliyawpas, a ləvar: «Ndaw aɗaw, kah, ndaw-mələk da Jeruzelem keđe daw? Ka ta cənda mey masa ma key daa ɗar hay a keđe daa ba daw?» ¹⁹ Ta', aa cəɗɗata, a ləvtar: «Mekey ara mey a?»

A mbəɗdamara, a ləvmar: «Mey ma key da ray Yesu, ndaw Nezeret. Ara *ndaw ma təla mey ŋga Gazlavay mahura. Aŋga ta gəɗar daa sləra aŋga, daa meeguzley maaya fa mey ŋga Gazlavay leŋ fa mey ŋga ndəhay tabiya. ²⁰ Ama *bay-ray hay ŋga ndəhay aləkwa hay ma ka kwakwas ŋga Gazlavay leŋ mahura aləkwa hay ta handamara la fa Rawma hay, a kamar sariya, a ɗərmara fa hwadam mazlaŋgalakaya ŋga məcey. ²¹ Ala na, ya wulkam ara aŋga ma da ləhdandakwar aləkwa *Israyel hay daa banay. Ama ta ŋgene he cəpa, tasana kaa ɗar maakar aŋga ma məcey*. ²²⁻²³ Nğusay da wuzlah ala hay daha, ŋga fene taa pərek, ta diyam la a mey cəvay aŋga, ama ta hətmərwa vagay aŋga daa ba. A vəhmawa, a ləvmandar: “Maslaŋ hay ŋga Gazlavay da vad a wuzmandar vaw, a ləvmandar:

24:19 24.19 7.16 * **24:21** 24.21 tasana kaa ɗar maakar aŋga ma məcey: Daa masa Yesu ma məcey fa hwadam mazlaŋgalakaya na, gula aŋga hay ray ata fa həbey, a səmra cek ma da key saba. Ta pas ŋgene ɗar maakar, a wulkam Gazlavay fa da key cek ŋga jəna Yesu daa saba. **24:21** 24.21 1.68; 2.38

Yesu ta sləkɔdawa sem daa meməcey, anɔa ta dey.” Mey nɔa nɔusay a ma cəndamərwa kedə na, a həbndar ray. ²⁴ Ndəhay da wuzlah ala siya ta diyam la a mey cəvay a may. A hətmərwa cek aha anda nɔusay ma kadamandara heyey. Ama Yesu na, ta hətmərwa daa ba.»

²⁵ Da ray nɔgene, Yesu a ləvtar: «Haya, akwar ndəhay manjar lenɔesl. Akwar ndəhay ma wusam vaw nɔa təba mey nɔa ndəhay ma təla mey nɔa Gazlavay ma wuzdamara zleezle tabiya ba. ²⁶ Si *Kəriste a sərey banay la dɔgay, fa dəba ha, a daw a vad a nɔey aa slam anɔa mewedey na, ka sərmara ba daw?» ²⁷ Ta’, Yesu a wuzdatara mey masa maa guzley da ray a daa dərewel nɔa Gazlavay tabiya. A zlar ma wuzdatara ta fa dərewel hay nɔa *Mawiz, fa dəba ha, a wuzdatara mey daa dərewel hay nɔa ndəhay ma təla mey nɔa Gazlavay tabiya.

²⁸ Masa ata ma wusam gweegwe ta slala masa gula anɔa hay cew ma wudam nɔa daw a hwad a heyey na, Yesu a key anda a mbəkdata, a daw fa mey. ²⁹ Ama a kamar ambahw, a ləvmar: «Njakwa fede bama maja pas fa da kəzley, gweegwe tavad cay.» Anɔa ta’, a vəhwa, a diyam, a mbəzam aa way. ³⁰ Fa dəba ha, a nɔam bama nɔa zəmey daf. Yesu len! a ley pen, a kar suse a Gazlavay, ta’, a wunka, a vəldatara. ³¹ Cek ma təkta nɔa sərmara heyey na, daa saba, a sərmara ara Yesu dəba. Ama wure wure nɔgene, a hətmər da cakay ata ha saba. ³² Da ray nɔgene, aa guzlam da wuzlah ata, a ləvam: «Daa masa aləkwa daa cəved, anɔa fa wuzdandakwara mey daa dərewel nɔa Gazlavay heyey na, mevel aləkwa fa kəsley anda lanja, ba diya?»

³³ Wure nɔgene, a sləkɔdam a vəham a Jeruzelem. A hətfamatar *gula hay nɔa Yesu kuraw a ray a letək heyey makustakaya ta ndəhay ata hay. ³⁴ Ndəhay makustakaya heyey aa guzlmatar a gula hay cew heyey teesed, a ləvmatar: «Fara fara Bay Mahura ta sləkɔdawa sem daa meməcey! Ta wuzar vaw la a *Simanw!» ³⁵ Gula hay cew heyey ta’, a kadamatara cek tabiya masa ma key daa cəved nɔa Emayus heyey, asaya, a wuzdamatara a sərmara ara Yesu na, daa masa anɔa fa wunka pen.

Yesu a wuztar vaw a gula anɔa hay

(Matiye 28.16-20; Mark 16.14-18; Jan 20.19-23; SNM 1.6-8)

³⁶ Ama gula hay cew heyey, ta ndəvdamara nɔaa guzley daa ba aran na, Yesu a daw a wuzlah ata, a ləvtar: «Anja Gazlavay nɔa njadakwar daa zazay.»

³⁷ Mandərzay a katar, a zluram, aa wasam maja a wulkam ara mamayam. ³⁸ Ama Yesu a ləvtar: «Ka zluram na, maja me? Akwar ta mewulkey cew cew, maja me? ³⁹ Nəkmata har adaw hay, ta salay adaw hay. Fara fara ara yah! Tatəmamaya, nəkmaya maaya maaya amba ka səmra fara fara ara yah. Maja mamayam na, anğa ta aslaw nğa vaw ta tetesl anda akwar ma hətmaya kedə na, daa ba, ba diya?» ⁴⁰ Daa masa anğa faa guzltar anda kedə na, a wuzdatara har anğa hay, ta salay anğa hay. ⁴¹ A təbmara mey a, maaya maaya ba aran maja ata daa meesəmey ga. Ray ata fa həbəy, Yesu ta', aa cəfdata, a ləvtar: «Cek mezəmey da har akwar fede daha daw?»

⁴² Ta', a vəlmar ewet mafəkakaya. ⁴³ Leŋ! a la, ta', a zəma fa mey ata. ⁴⁴ Fa dəba ha, a ləvtar: «Daa masa aləkwa bama heyey na, ya ta ləvkwar la, mey tabiya masa mawuzlalakaya daa dərewel nğa *kwakwas nğa Mawiz, ta daa dərewel nğa ndəhay ma təla mey nğa Gazlavay, leŋ daa *Pəsam hay na, si mey a tabiya, a key cəma.» ⁴⁵ Ta', a wurtara leŋgesl, amba a səmra mabara nğa mey daa dərewel nğa Gazlavay. ⁴⁶ Fa dəba ha, a ləvtar: «Mawuzlalakaya zleezle, a ləvey: "Si *Kəriste a sərey banay, a məcey, nğa dər maakar a, a sləkəfawa daa meməcey. ⁴⁷ Si a wuzdamara mey da ray membəfey menjey, ta da ray membəkey mebərey, nğada ndəhay da bəla tabiya ta mezəley nğa Kəriste. A da zlamara da *Jeruzelem." ⁴⁸ Ara akwar ma da wuzdamatara cek hay masa akwar ma hətmatar kedə a ndəhay. ⁴⁹ Yah, ya da slərdakwara Mesəfney masa Papay ma ləvey a da vəldakwara heyey. Ama si ka njam daa berney nğa Jeruzelem dəgay, kasl pas masa Gazlavay ma da vəlkwar gədaŋ ma sawa da vad.»

Bay Gazlavay a la Yesu a vad
(Mark 16.19-20; SNM 1.9-11)

⁵⁰ Fa dəba ha, Yesu ta', a badata gula anğa hay daa berney a, a diyam gweegwe ta Betani. Fetede, ta', a banğadfa har, a pəstar mey. ⁵¹ Daa masa aa fa pəstar mey na, ta', a mbəkdata, Bay Gazlavay a la a vad. ⁵² Gula anğa hay a, a ragadam nğa həlmamara. Ta', a vəhmawa a *Jeruzelem ta

24:37 24.37 Mt 14.26; Mk 6.49 **24:41** 24.41-43 Jan 21.5, 10; SNM 10.41 **24:44** 24.44 24.27; Jan 5.39; Mawiz: SNM 7.9-10, 25-27, 35, 37-39; Jan 5.46; ndəhay ma təla mey nğa Gazlavay: Iz 52.13-53.12; Aw 6.2; Pəsam hay: Ps 22.69 **24:45** 24.45 24.25-27, 32; Jan 20.9 **24:46** 24.46 9.21-22; Mt 26.56; Mk 14.49; 1Kwr 15.3-4; SNM 17.2-3; 28.23 **24:47** 24.47 3.3; SNM 1.8; 5.31; 11.18; 17.30-31; 20.21; Rm 15.19 **24:48** 24.48 SNM 1.8, 22; 2.32; 3.15; 4.33; 10.39-41; 13.31 **24:48** 24.48-49 SNM 5.32; Jan 15.26-27 **24:49** 24.49 4.18 **24:50** 24.50-51 9.51; Mk 16.19; SNM 1.9; 3.21

meesəmey ga. ⁵³ Mandaw mandaw ata daa *Way-mekey-
kwakwas nga Gazlavay, fa həlmamara Gazlavay.

Mey-maaya-mawiya masa Jan ma wuzlala Mey da ray Mey-maaya-mawiya masa Jan ma wuzlala

Jan na, ara ndaw da wuzlah gula hay nga Yesu kuraw a ray a cew. Ara gula masa Yesu ma wudfa kalah (13.23; 21.20). Annga melman nga Jak, papa ata Zebede (Mt 4.21).

Derewel e anga wal nekofey ta masa Matiye, Mark, len Luk ma wuzlalamata. Jan na, a wuzda mabara nga mey nga Yesu, asaya aa guzley da ray slera masa Yesu ma ka. Jan a wufey ndohay a sarmara Yesu Koriste na, ara Mey nga Gazlavay masa aa daha ta Gazlavay daga bala ta zley daa ba araj. Mey nga Gazlavay a na, ta terey la nga ndaw-magadan. Ta sawa la a bala, amba ndohay a taram nga beza hay nga Gazlavay.

Daga daa faselawal 2 haa faselawal 12, Jan aa guzley da ray maazla hay maasala ma ruzla ndaw masa Yesu ma kata. Ta fa maazla hay a na, ya sarkwa Yesu aa Bezey nga Gazlavay fara fara.

Daga daa faselawal 13 haa faselawal 21, Jan aa guzley da ray Yesu ma da mbakda bala. Aa guzley da ray Yesu ma ketata gula anga hay da ray menjey ata fa dafa nga memocey anga (13-16). Aa guzley da ray Yesu ma derar dangay a Gazlavay, ma kar ambahw amba a mbakdata gula anga hay asi har nga Gazlavay (17). Aa guzley da ray ndohay ma kersamara Yesu nga kofey vagay (18-19). Asaya, aa guzley da ray Yesu ma slakdawa daa memocey len da ray Yesu ma wuztar vaw a gula anga hay amba a veltar gadan (20-21).

Daa derewel e kefe na, mey mekele mekele daha nga voley gadan a ndohay:

Gazlavay a wudfa ndohay kalah (3.16-17)

Yesu a lovey: «Yah na, daf mevoley heter mendovey ba.» (6.35, 48)

Yesu a lovey: «Yah na, slam-mewedey.» (8.12; 9.5)

Yesu a lovey: «Yah na, mey-slam nga taban hay.» (10.7, 9)

Yesu a lovey: «Yah na, ndaw-mecakwer maaya.» (10.2-4, 11, 14)

Yesu a løyey: «Yah, ray adaw na, ya sləkɔdatərwa ndəhay daa meməcey, asaya, ya vəltar heter mendəvey ba.» (11.25-26)

Yesu a løyey: «Yah na, cəved ma handata ndəhay ηgada fa Gazlavay.» (14.6)

Mey da ray Yesu Kəriste, ma zəlmara Mey ηga Gazlavay

¹ Masa *Gazlavay ta ləma bəla daa ba arəη na, ndaw ma zəlmara Mey ηga Gazlavay aa daha cay. Mey a manjakaya ta Gazlavay *. Mey a na, ara Gazlavay a ray aηga. ² Masa Gazlavay ta zlar ηga ləmtərwa cek hay tabiya daa ba arəη na, Mey a manjakaya ta Gazlavay. ³ Gazlavay a katərwa cek hay tabiya ta fa ndaw aha. Kwa Gazlavay ta key cek manjar aηga na, daa ba. ⁴ Ara aηga ma vəltar heter a cek hay tabiya. Aηga fa wadatar dey a ndəhay amba a njam aa slam-mewedey, a sərmara cek masa fara fara. ⁵ Aηga na, slam-mewedey, aηga fa wedey daa ləvaη. Ləvaη a, ta gwa ηga sərta daa ba səlak.

⁶ Zleezle, ndaw daha mezəley *Jan †. Gazlavay ta slərdərwa la fa ndəhay. ⁷ A sawa ηga wuzdatara a ndəhay mey da ray slam-mewedey a, amba kwa waawa a təbə mey aηga da ray slam-mewedey a. ⁸ Fara fara, Jan na, ara slam-mewedey a ba. Ama a sawa na, amba a wuzey mey da ray a gway.

⁹ Ndaw ma zəlmara Mey ηga Gazlavay heyey na, ara slam-mewedey fara fara. Masa aηga ma sawa a bəla na, a wadatar dey ηga ndəhay tabiya. ¹⁰ Ndaw ma zəlmara Mey heyey ta sawa la a bəla. Gazlavay a ləma bəla na, ta fa aηga. Ama ndəhay da bəla ta sərmara ara aηga na, daa ba. ¹¹ Aηga ta sawa la aa hwayak aηga, ama ndəhay daa hwayak aηga ha ta təbmara daa ba. ¹² Ama ηgada ndəhay ma təbmara ta masa ma pamara ηga ndaw ata fara fara na, ta vəltar gədaη la ηga tərey bəza hay ηga Gazlavay.

¹³ A tərām bəza hay ηga Gazlavay na, anda bəzey ma yawa da hwad ηgwas ba, asaya, anda mewulkey ηga ndaw-magədaη ma wudfey ηga yey bəzey ba. Ama a tərām bəza hay ηga Gazlavay na, maja ara Gazlavay a, ray aηga ma wudfey amba a tərām bəz aηga hay.

* **1:1** 1.1 Yesu ara Gazlavay ray aηga. Nəka Mt 1.23; Rm 9.5; Fəl 2.6; Kwa 1.19; 2.9; Tit 2.13; Heb 1.3; 2Pi 1.1; 1Jη 5.20. **1:1** 1.1-2 MC 1.1-2.4; Jan 17.5; Fəl 2.6; 1Jη 1.1-2; CWJ 19.13-16 **1:3** 1.3-4 1.9-10; 5.26; 1Kwr 8.6; Kwa 1.16-17; Heb 1.2; CWJ 3.14 **1:5** 1.5 MC 1.3-4 † **1:6** 1.6 Jan masa keɔe na, ara Jan-Baptis. Nəka Jan 1.15. **1:6** 1.6 Mt 3.1 **1:8** 1.8 1.20 **1:9** 1.9-10 8.12; 17.25; 1Jη 2.8 **1:12** 1.12 1Jη 3.1; Gal 3.26; 4.5 **1:13** 1.13 3.3, 5-6; 1Pi 1.23; 1Jη 3.9

¹⁴ Yaw, Mey aha, ta tōrey la nga ndaw-magədan, ndaw a ta njeý la da wuzlah ala. Maaya anğa a ndəvey ba, ta wuzdərwa mey masa fara fara la da ray Gazlavay. Ala ta hətmar gədan anğa la. Gədan a na, ara gədan nga Bəzey-mendulej masa Papaha ma vəldara.

¹⁵ Daa masa Janj ma hətmar na, a wuzey mey da ray a saya, a wudey ta gədan, a ləvey: «Kede ara ndaw masa yah maa guzley zleezle da ray a heyey, ya ləvey: “Ndaw a sawa la fa dəba adaw. Anğa na, a fənya ta gədan, maja daa masa ya ta yawa daa ba aranj na, ndaw aha aa daha cay.”»

¹⁶ Ndaw aha, aa maaya kalah. Maaya anğa a ndəvey ba. Maaya anğa ha aa da ray aləkwa tabiya. Maja ngene, aa fa pəsndakwar mey kalah ma fəna ma fəna. ¹⁷ Gazlavay a vəldandakwara *mewey anğa na, ta har *Mawiz. Ama maaya anğa ta mey masa fara fara da ray a na, a sawa ta fa *Yesu *Kəriste. ¹⁸ Kwa ndaw pal ta hətmar Gazlavay ta dey anğa daa ba səlak. Ama Bəzey-mendulej masa aa letek ta Gazlavay, manjakaya ta Papaha Bay Gazlavay na, ta wuzdandakwara Gazlavay a la.

Mey da ray Janj-Baptis

(Matiye 3.1-12; Mark 1.1-8; Luk 3.1-18)

¹⁹⁻²⁰ Pas pal daha, mahura hay nga *Jəwif hay da *Jeruzelem a sləram ndəhay ma ka kwakwas nga Gazlavay ta ndəhay *Levi hay † ta fa Janj. A sləram ngaa cəfdamərwa, anğa na, wa? Janj ta bey mey ta bey daa ba. Ta zlurey nga mbəfdatara daa ba, a wuzdatara, a ləvtar: «Kəriste, ndaw masa Gazlavay ma wala nga ləhdata ndəhay na, ara yah ba.» ²¹ Aa cəfdamara saya, a ləvmar: «Kaa kah na, wa? Kah na, *Eli daw?» A mbəfdatara, a ləvtar: «Kay! yah na, Eli ba.» Aa cəfdamara saya, a ləvmar: «Kah na, *ndaw ma təla mey nga Gazlavay § masa ala fa səkwmarə heyey daw?» Janj a mbəfdatara, a ləvtar: «Kay! yah na, ndaw a ba.» ²² Ta', aa cəfdamara saya, a ləvmar: «Kaa kah na, wa dəba wa? Wuzdandara amba ya diyam, ya kadamatara ngada ndəhay ma slərdamandərwa. Ka pada ray akah na, nga wa?»

1:14 1.14 Gal 4.4; Fəl 2.7; 1Tm 3.16; Heb 2.14; 1Jn 4.2; gədan nga Bəzey-mendulej masa Papaha ma vəldara: Mt 17.2; Janj 2.11; 1Jn 1.1-3 **1:15** 1.15 1.24-27, 30; 5.31-34, 36 **1:17** 1.17 7.19; Mab 31.18 **1:18** 1.18 6.46; 14.8-9; Mab 33.20; Mt 11.27; 1Tm 6.16; 1Jn 4.12 † **1:19-20** 1.19 ndəhay Levi hay: Ara ndəhay ma jənmata ndəhay ma ka kwakwas. Ara ata ma jədmara Way-mekey-kwakwas nga Gazlavay, a nəkfamar dey. Asaya, ara ndəhay ma zla walay daa Way a, aa sərkadamata ndəhay. **1:19-20** 1.19-27 5.33 **1:19-20** 1.20 3.28 § **1:21** 1.21 Daa Mewey hay 18.15, Mawiz a ləvtar a Jəwif hay fa dəba anğa na, ndaw ma təla mey mekele anda anğa a sawa la. Nəka Janj 1.25; 6.14; lej 7.40. **1:21** 1.21 Mt 2.14; Janj 6.14

23 *Janj a mbəfdatara, a ləvtar: «Yah na, “ndaw ma wudey da wuzlah-ley, ma ləvey: Bay aləkwa mahura fa sawa, diymara cəved anğa dər e.”

Mey a keđe na, ara anda Izay, ndaw ma təla mey nğa Gazlavay maa guzley zleezle da ray adaw.»

24 Da wuzlah ndəhay ma slərdamata fa Janj heyey na, *Fariza hay daha may. 25 Aa cəfdamara, a ləvmar: «Da kah, *Kəriste, *ndaw masa Gazlavay ma wala nğa ləhdata ndəhay ba, da kah, Eli ba, asaya, da kah ndaw ma təla mey nğa Gazlavay heyey ba na, kaa ka katar *baptem a ndəhay na, kwara?» 26 Janj a mbəfdatara, a ləvtar: «Yah na, ya kakwar baptem ta yam, ama ndaw da wuzlah akwar daha, masa ka səmbara ba. 27 Anğa na, a da sawa fa dəba adaw, kwa ya fa da wusa nğa pəska zewed nğa tarak anğa daa ba.»

28 Mey a keđe tabiya, a key da slala Betani masa da dey lanğar nğa dəhwa nğa Jurdeñ, slam masa Janj ma katar baptem a ndəhay da hwađ a.

Janj-Baptis a wuzey mey da ray Yesu

29 Pepərek e, *Janj a hətar Yesu fa sawa nğada fa vəda, ta', aa guzley, a ləvey: «Nəkmara, Bəz-təban nğa Gazlavay *, ma da la mebərey nğa ndəhay da bəla. 30 Ara ndaw masa yah maa guzley zleezle da ray a heyey, ya ləvey: “Ndaw a sawa la fa dəba adaw. Anğa na, a fənya ta gədan, maja daa masa ya ta yawa daa ba aran na, ndaw aha aa daha cay.”

31 Zleezle na, yah ta ray adaw, ya səra ara wa ba. Ama ya sawa nğa wuzdatara ndaw aha a *Israyel hay ta *baptem masa yah ma ka ta yam.»

32 Janj a wuzey mey da ray ndaw aha, a ləvey: «Yah ma hətar *Mesəfney nğa Gazlavay la ta dey adaw fa pawa salay da gazlavay da vad anda makurgwadakw, a njeý a ray a.

33 Daa masa yah ma hətar na, kwa ya ta səra daa ba aran, ama Bay Gazlavay ma slərđiwa nğa katar baptem a ndəhay ta yam ta wuzdiwa la, a ləvya: “Ndaw masa kah ma da hətar Mesəfney adaw ma da pawa salay a ray a na, ara anğa ma da katar baptem a ndəhay ta Mesəfney adaw.”

34 Fara fara, yah, Janj, ya ta hətar la ta dey adaw. Ya gwa

1:23 1.23 Iz 40.3 **1:25** 1.25-26 1.33; Mt 21.25 **1:27** 1.27 1.15; SNM 13.25

1:28 1.28 10.40; Mt 3.13 * **1:29** 1.29 Bəz-təban nğa Gazlavay: Ara mezəley nğa Yesu. Anda meləvey, anğa anda bəz-təban masa Jəwif hay ma hərmara nğada Gazlavay amba Gazlavay a mbəkdatara mebərey ata. **1:29** 1.29 1.36; Iz 53.6-7; 1Pi 1.19; 1Jñ 2.2; CWJ 5.6 **1:30** 1.30 1.15 **1:32** 1.32 Mt 3.16

nga key sede da ray a, ya lövey ndaw aha ara Bözey nga Gazlavay.»

Gula hay nga Yesu ngeeme na, wa hay wa?

³⁵ Pepërek e, ata *Jan-Baptis ta gula anğa hay cew, ata daa slam mekey *baptem heyey saya. ³⁶ Masa *Jan ma hëtar Yesu fa daw na, a lövtar: «Nëkmara, katafay na, *Böz-tëban nga Gazlavay.»

³⁷ Gula hay nga Jan heyey a cëndamara mey a na, ta', a diyam asi Yesu. ³⁸ Yesu a mbëdey dey fa dëba na, a hëtar gula hay nga Jan heyey fa sëpmar wurzay, ta', aa cëfdata, a lövtar: «Ka sëpam fa yah na, me?» A mbëdamara, a lövmar: «*Raabi*, slam akah menjey na, dama?» (*Raabi* na, anda melövey ndaw maa sërkadata ndëhay.) ³⁹ A mbëdatara, a lövtar: «Samawa taw, ka hëtmär la.» Da ray nğene, a diyam, a sërmara slam anğa menjey heyey, a njam bama fetedë haa pas a közley. (Daa masa ata ma cam ray ta Yesu na, gweegwe pas nğaa kwad.)

⁴⁰ Ndaw pal dasi ndëhay cew masa ma cëndamara mey nga Jan-Baptis ma diyam asi Yesu heyey na, ara *Andëre, mëlmanğ nga *Simanğw *Piyer. ⁴¹ Ata ma mbëkdamara Yesu la na, Andëre a cam ray teesed na, ta mëlmaħa Simanğw. A lövar: «Ya ta hëtmär *Këriste la.» (Këriste anda melövey *ndaw masa Gazlavay ma wala nga lähdata ndëhay.) ⁴² Ta', a handa Simanğw fa Yesu. Yesu a nëka Simanğw na, ta', a lövar: «Kah na, Simanğw, bözey nga Jan, ama dëga wure kedë, a da zëlmaka Sefas.» (Yaw, Sefas na, a wudëy nga lövey «Përad» †.)

Yesu a zëlta ata Fëlep ta Nataniyel nga key gula anğa hay

⁴³ Pepërek e, Yesu a wudëy nga daw aa hwayak nga *Galile. A daw a hëtfar *Fëlep, ta', a lövar: «Sawa, sëpya.» ⁴⁴ (Fëlep ara ndaw daa berney nga Betsayda, berney masa ata *Andëre ta *Piyer ma njam da hwad a.) ⁴⁵ Fa dëba ha, Fëlep a cam ray ta Nataniyel, a lövar: «Sërfada zleezle na, *Mawiz ta wuzleley la daa dërewel nga kwakwas anğa da ray ndaw ma da sawa, ba diya? Asaya, ndëhay ma tëla mey nga Gazlavay ta wuzlalam la da ray a may, ba diya? Ala ta hëtmär ndaw aha la. Ara Yesu, bözey nga *Jawzef. Ndaw aha, a sawa da *Nezeret.» ⁴⁶ Nataniyel a mbëddara, a lövar: «Cek maaya a gwa a bawa da Nezeret may daw?» Fëlep a mbëddara, a lövar: «Sawa taw, ka hëtar la.»

1:34 1.34 Bözey nga Gazlavay: 1.49; 5.18-23; 10.36; 11.27; 20.31; Mt 3.17; 27.54; SNM 9.20 **1:36** 1.36 1.29 **1:40** 1.40-42 Mt 4.18-20 **1:41** 1.41 4.25 † **1:42** 1.42 Përad: Ara «Piyer» ta mey Gërek. Ta mey Hebëre may ara «Sefas». **1:42** 1.42 Mt 10.2; 16.18 **1:45** 1.45 Mew 18.15; Iz 9.5; 42.1-4; Ez 34.23; Mi 5.1-3

⁴⁷ Masa Yesu ma hëtar Nataniyel fa sawa fa vëdä na, aa guzley da ray a, a lövey: «Nëka, ndaw kedë na, ara ndaw *Israyel fara fara. Mevel anğa maaya, a mbërzley ba.»

⁴⁸ Nataniyel aa cëfdä, a lövar: «Ka sërya fa me?» Yesu a mbëddara, a lövar: «Dëga Fëlep ta zëlkawa daa ba aran na, ya ta hëtkä sem dasi wudez.» ⁴⁹ Nataniyel a mbëddara dëba, a lövar: «Bay adaw, kah na, Bëzey nğa Gazlavay, kah bay nğa Israyel hay!» ⁵⁰ Yesu a mbëddara, a lövar: «Ka tëba mey adaw maja yah ma lövka yah ma hëtkä la dasi wudez heyey daw? Yaw, ka hëtey maazla hay ma fëna nğene la saya.»

⁵¹ Ta', Yesu aa guzley saya, a lövey: «Ya fa lövkwär fara fara, ka da hëtmär slam da vad mawurkaya. Maslan hay nğa Gazlavay † fa tëpam a vad, fa bërngamawa a hwayak, maja yah, Bëz nğa Ndaw.»

2

Maazla masa Yesu ma ka ngeeme

¹ Fa dëba ha ðär cew na, gwagway nğa meley kwakwa da Kana daa hwayak nğa *Galile daha. Maman nğa Yesu, anğa fetedë daa gwagway a. ² Ta zëlmata ata Yesu ta gula anğa hay la aa gwagway a may. ³ Yaw, masa gwagway a ta ndövey daa ba aran na, wuzam * daa saba. Maman nğa Yesu, ta', aa guzlar a Yesu, a lövar: «Wuzam daa saba kaa na, kwara?» ⁴ Yesu a mbëddara, a lövar: «Mamay, walay alëkwa da hwad a me? Pas masa yah ma da wuzda vaw adaw nğada ndëhay, yah na, wa na, ta wuswa daa ba aran.»

⁵ Ta', maman nğa Yesu aa guzlar nğada ma ka slëra hay daa gwagway a, a lövtar: «Cek masa anğa ma da lövkwär tabiya nğa key na, kamara.»

⁶ Fetedë gëzla hay daha maakwaw, gëzla pal na, a key liter temere. Ara gëzla hay masa *Jëwif hay ma pam yam a hwad a nğa përey har ta nğa përey cek ata hay anda kwakwas ata ma lövey. ⁷ Yesu aa guzlar nğada ma ka slëra hay heyey, a lövtar: «Rëhdamata gëzla hay kedë ta yam.» Ta', ma ka slëra hay a, a rëhdamata pece pece. ⁸ Fa dëba ha, Yesu aa guzlar, a lövtar: «Wure kedë kam yam a nekëdëy, handamara nğada bay-ray nğa slëra nğa gwagway a.» Ta',

1:49 1.49 1.34; 12.13; Mt 27.42 † **1:51** 1.51 Maslan hay nğa Gazlavay: Mesëfney a kar a Jakwap, a nëka sasal majëkdakaya dëga da hwayak kasl a gazlavay a vad. Maslan hay nğa Gazlavay fa tëpam a gazlavay a vad, fa bërngamawa a hwayak ta fa sasal a. Ta fa mesëfney a nğene, Jakwap a sëra Gazlavay aa ta anğa. Nëka MC 28.12. **2:1** 2.1-11 4.46 * **2:3** 2.3 wuzam: Wuzam a na, ara yam nğa babëza nğa wudez mamëslkaya. **2:4** 2.4 7.6, 30; 8.20; 12.23; 13.1; 17.1; Lk 22.53 **2:6** 2.6 Mk 7.3-4

a kamar, a handamar. ⁹ Bay-ray a, aa cəkda yam a, ama ta tərey sem n̄ga wuzam. A səra wuzam a, a sawa ta wura ba. Ama ndəhay ma ka sləra hay heyey na, a sərmara. Bay-ray n̄ga sləra n̄ga gwagway a, ta', a zələrwa zel-kwakwa ha, ¹⁰ aa guzlar, a ləvar: «Kwa waawa ma key gwagway n̄ga meley kwakwa na, a vəltar teesəd a ndəhay mazəltakaya na, wuzam mecərey kalah. Fa dəba ha, da masa ndəhay mazəltakaya ha ta sam wuzam la ga na, a vəltar masa ma cərey pəreh, ba diya? Ama n̄ga kah na, wuzam masa ma cərey kalah na, ka bəda haa wure keđe daw?»

¹¹ Yesu a ka maazla n̄ga n̄geeme keđe na, da Kana daa hwayak n̄ga Galile. Ta fa maazla ha keđe a wuzdərwa gədan̄ n̄ga. Da ray n̄gene, gula n̄ga hay a pamara n̄ga ndaw ata fara fara. ¹² Fa dəba ha, ta', a sləkdam, a diyam a Kapernayum ta ata mamaha, məlmaha hay, leŋ gula n̄ga hay. A njamawa fetede đar nekədey.

Yesu a bəltərwa ndəhay ma ka filaw daa Way-mekey-kwakwas n̄ga Gazlavay

(Matiye 21.12, 13; Mark 11.15-17; Luk 19.45, 46)

¹³ Gwagway n̄ga *Jəwif hay masa ata ma zəlmara *Pak gweegwe cay. Ta', Yesu a sləkdey, a daw a *Jeruzelem n̄ga kawa gwagway a. ¹⁴ Masa n̄ga ma wusey la na, a mbəzey aa *Way-mekey-kwakwas n̄ga Gazlavay. Fetede, a hətfey ndəhay ma ka filaw n̄ga sla hay, n̄ga təban̄ hay leŋ n̄ga makurgwadakw hay. Asaya, a hətfey ndəhay manjatakaya daa slam ata hay membədey dala. ¹⁵ Ta', a cəmey laza n̄ga key laway, a bəltərwa ndəhay ma ka filaw tabiya ta təban̄ ata hay, leŋ sla ata hay daa Way-mekey-kwakwas n̄ga Gazlavay a palah. A bəzlta taabal hay n̄ga ndəhay ma mbədam dala heyey. Dala kwakwac! kwakwac! aa kwecey. ¹⁶ Aa guzlar n̄gada ndəhay ma hədkadam makurgwadakw hay, a ləvtar: «Badamata cek hay a keđe la tabiya fede! Ka da tərđamara way n̄ga Papay, Bay Gazlavay, n̄ga way ma ka filaw ba.»

¹⁷ Daa masa *gula hay n̄ga Yesu ma hətmar cek masa Yesu ma ka na, a sərfadamara mey mawuzlalakaya daa đerewel n̄ga Gazlavay ma ləvey: «Bay Gazlavay, way akah na, ya wuđa kalah, haa ya vəlda ray adaw maja way a.»

¹⁸ Mahura hay daa Way-mekey-kwakwas n̄ga Gazlavay, aa guzlar a Yesu, a ləvmar: «Key maazla n̄ga wuzdandara kah ta cəved̄ n̄ga kata cek hay a keđe.» ¹⁹ Yesu a mbəđdatara, a ləvtar: «Bəzlmara Way-mekey-kwakwas

2:11 2.11 maazla: 2.23; 3.2; 4.54; 6.26; 11.47-48; 20.30; SNM 2.22; Rm 15.19

2:12 2.12 Mt 4.13 **2:13** 2.13 6.4; 11.55; 12.12; Mab 12.1-14 **2:16** 2.16 Lk 2.49

2:17 2.17 Ps 69.10 **2:18** 2.18 2.11

nga Gazlavay keċe, ɗar maakar ya lɔma la aa slam a.»
²⁰ Ta', ndɔhay a, a mbɔɗdamara, a lɔvmar: «Haya! Mevey kwakwar mɔfad a ray a maakwaw, fa lɔmamara way a keċe. Ama kah, ka lɔvey ka lɔma la aa slam a ɗar maakar na, kwara!»

²¹ Yaw, Yesu maa guzley da ray Way-mekey-kwakwas nga Gazlavay na, a key a ngey mey da ray ray anɗa.

²² Masa Yesu ma slɔkɗawa la daa memɔcey na, gula anɗa hay a sɔrfadamara mey da ray Way-mekey-kwakwas masa Yesu maa guzlda heyey. Da ray ngey, a tɔbmara mey daa ɗerewel nga Gazlavay mawuzlalakaya zleezle, asaya, a tɔbmara mey masa Yesu maa guzlda.

Yesu na, a sɔra cek daa mevel nga ndaw-magɔɗan

²³ Masa Yesu aa da *Jeruzelem nga key gwagway nga *Pak heyey na, ta key maazla hay la fetede. Ndɔhay ga a tɔbmara mey anɗa maja ata ma hɔtmar maazla hay masa aa ma kata.

²⁴ Ama ta ngey he cɔpa, Yesu ta pata nga ndɔhay anɗa hay fara fara na, daa ba, maja a sɔra mewulkey nga ndɔhay a tabiya. ²⁵ Asaya, a wuɗey kwa ndaw a kadar mey da ray ndɔhay ba, maja a sɔra cek daa mevel nga ndaw-magɔɗan.

3

Ata Yesu ta Nikwedem

¹ Ndaw daha, mezɔley Nikwedem. Ara ndaw Fariza masa da wuzlah mahura hay nga *Jɔwif hay. ² Dasi tavad pal daha, ndaw aha a daw a hɔtɗar Yesu, aa guzlar, a lɔvar: «Bay aɗaw, ya sɔrmara ara Gazlavay ma slɔrdakawa nɗaa sɔrkadata ndɔhay. Ya sɔrmara, ma gwa nga key maazla hay anda kah ma kata keċe na, si ndaw ma sawa ta fa Gazlavay.»

³ Yesu a mbɔɗɗara, a lɔvar: «Ehe, ya fa lɔvka fara fara, da ndaw ta yawa nga dey cew daa ba na, aa da wuzlah ndɔhay masa Gazlavay fa wey da ray ata na, daa ba.» ⁴ Nikwedem aa cɔɗɗa saya, a lɔvar: «Ndaw ta key mahura cay na, a gwa nga yawa nga dey cew saya daw? A gwa nga vɔhey a hwad mamaha nga yawa nga dey cew daw?»

⁵ Yesu a mbɔɗɗara, a lɔvar: «Fara fara, ya fa lɔvka saya, da ndaw ta yawa ta fa yam, leɗ ta fa *Mesɔfney nga Gazlavay daa ba na, aa da wuzlah ndɔhay masa Gazlavay fa wey da ray ata na, daa ba. ⁶ Ndaw ma yawa da hwad ndaw-magɔɗan na, ara ndaw gway, ama ndaw ma yawa ta fa Mesɔfney nga Gazlavay na, Mesɔfney nga Gazlavay

2:19 2.19 Mt 26.61; 27.40; SNM 6.14 **2:21** 2.21 1Kwɗ 6.19 **2:22** 2.22 1.45; 12.16; 14.26; Lk 24.6-8, 27 **2:23** 2.23 2.11; 6.29; 7.31; 8.30; 9.38; 10.42; 11.45; 12.42; 20.29, 31; 16.9 **3:1** 3.1 Nikwedem: 7.50; 19.39 **3:2** 3.2 Mt 22.16; Janj 2.11 **3:3** 3.3 1.13 **3:5** 3.5 Tit 3.5

a, aa da ray a. ⁷ Ya ta ləvka la, si akwar ndəhay tabiya ka yamawa ŋga dey cew. Yaw, ka da rəzley da ray mey a ba. ⁸ Wulkey da ray memed mekey cey. Kwa daa wura daa wura na, fa key anda aa ma wufey. Ka fa cənda meebərey a, ama ka səra a sawa dama ba, ka səra a daw ama ba. Ndaw ma yawa ta fa Mesəfney ŋga Gazlavay na, aa kəne may.»

⁹ Ta', Nikwedem a mbəddara, a ləvar: «Cek aha a da key na, kwara?»

¹⁰ Yesu a mbəddara, a ləvar: «Kah, ndaw mahura maa sərkadata ndəhay da *Israyel, ba diya? Kaa ka səra cek aha ba, kwara? ¹¹ Yaw, ya fa ləvka fara fara, yaa guzlam na, da ray cek masa ala * ma sərmara. Ya wuzam mey na, da ray cek masa ala ma hətmar ta dey ala. Ama akwar na, ka wufam ŋga təbmara mey ala ha ba. ¹² Nəka, da ya faa guzlkwar da ray cek hay ma kam da bəla kedde na, ka gəmam ŋga təbmara mey adaw ba. Kaa wara yaa guzlkwar da ray cek hay masa da gazlavay da vad na, ka da təbmara kwara? ¹³ Kwa ndaw pal da bəla ta təpey a gazlavay a vad na, daa ba. Si yah, *Bəz ŋga Ndaw ma bərnəgawa da vad a. ¹⁴ Zleezle masa *Mawiz aa da wuzlah-ley na, ta vədey zezekw ŋga bərey magaza la. A jəwa fa hwadam, ta', a banğada a vad. Yah, Bəz ŋga Ndaw, a da dərmaya fa hwadam, a da banğadamaya a vad anda ŋgene may, ¹⁵ amba kwa waawa ma paya ŋga ndaw anğa fara fara na, a hətey heter mendəvey ba.»

¹⁶ Yaw, Gazlavay a wudta ndəhay da bəla kalah, haa a slərdərwa Bəzey anğa mendulen amba kwa waawa ma pa ŋga ndaw anğa fara fara na, aa zədey ba, ama a hətey heter mendəvey ba. ¹⁷ Gazlavay a slərdərwa Bəzey anğa a bəla na, ŋga katar sariya a ndəhay ŋgaa zədam ba, ama ŋga ləham daa meebərey ta fa anğa.

¹⁸ Ndaw ma təba mey ŋga Bəzey anğa na, Gazlavay fa da kar sariya amba aa zədey na, daa ba. Ama ndaw ma təba mey anğa ba na, Gazlavay ta kar sariya cay la, maja aa ma pa Bəzey-mendulen ŋga Gazlavay ŋga ndaw anğa fara fara ba. ¹⁹ Ahaw, Gazlavay ta slərdərwa Mewedey † anğa la a bəla, ama ndəhay a wufam mewedey a ba. A wufam na, ləvan jak, maja ata fa kam cek hay malamba. Yaw, Gazlavay a da katar sariya ŋgaa zəddata na, maja. ²⁰ Kwa waawa

3:6 3.6 6.63 **3:8** 3.8 Ekz 11.5 * **3:11** 3.11 ala: Anda meləvey, Yesu ta ndəhay mekele ma wuzam mey fara fara da ray Gazlavay. **3:11** 3.11 3.32; 8.26 **3:12** 3.12 12.32; 14.1-3; 17.5 **3:13** 3.13 MM 30.4; Rm 10.6 **3:14** 3.14 Mesl 21.9; Janj 8.28; 12.32-34; 18.32 **3:15** 3.15 20.31 **3:16** 3.16 3.36; 5.24; Rm 8.32; 1Jn 3.1; 4.9-10; 5.11, 13 **3:17** 3.17 12.47 **3:18** 3.18 5.22 † **3:19** 3.19 Mewedey a na, ara Yesu. Ləvan na, ara bay-malula. **3:19** 3.19 8.12

ma key cek malamba na, a key a rësa mewedey a, kwa fa da daw aa mewedey a daa ba. A zlurey maja cek hay malamba masa anğa ma kata ha, a da wuzmawa. ²¹ Ama ndaw masa fa key cek hay maaya na, a mbəzey aa mewedey a la, amba ndəhay a hətmatar cek hay maaya masa anğa ma kata na, ara cek hay masa Gazlavay ma wudëy.

Jan-Baptis a wuzey mey da ray Yesu saya

²² Fa dəba ha, ata Yesu ta gula anğa hay a sləkdam da *Jeruzelem, a diyam aa slam mekele daa hwayak nğa *Jude he, a njam fetedë ta gula anğa hay a, a katar *baptem a ndəhay. ²³ *Jan-Baptis may, fa katar baptem a ndəhay. A katar baptem a na, da Enanw gweegwe ta slala mezəley Salim, maja yam ga fetedë daha. Ndəhay fa diyam fa ata, fa kamatar baptem. ²⁴ Daa nğene, ta kərzamara Jan-Baptis aa fərsəne daa ba aran.

²⁵ Gula hay nğa Jan-Baptis siya fa kam yawa ta ndaw *Jəwif daha da ray mepərey ta mepərey cek hay nğa tərey maaya fa mey nğa Gazlavay anda kwakwas nğa Jəwif hay ma ləvey. ²⁶ Gula hay nğa Jan-Baptis heyey a diyam fa *Jan a, a ləvmar: «Bay ala, ka fa sərfada ndaw masa akwar cew e da dey lanğar nğa wayam nğa Jurden heyey, ba diya? Nəka, ndəhay ga fa diyam la nğada fa vəfa, aa fa katar baptem kaa na, kwara?»

²⁷ Jan-Baptis e, a mbədfatara, a ləvtar: «Ma gwa nğa key cek anda nğene na, si ndaw masa Gazlavay ma vələr gədan. ²⁸ Akwar ray akwar ta cəndamara la ta sləmay akwar, yah ma ləvkwar: “Yah na, *Kəriste, *ndaw masa Gazlavay ma wala nğa ləhdata ndəhay ba. Ama yah na, ndaw masa Gazlavay ma slərdərwa teesed da ray a nğa diyey cəved anğa.” ²⁹ Akwar fa sərmara, da ndaw a ley nğwas na, nğwas aha ara nğada ndaw aha. Ama gula-manğasl manjakaya da cakay a nğa jəna, a cənda dəy anğa na, aa səmey. Ara anda kedë, wure kedë yah daa meesəmey masa fara fara. ³⁰ Anja sləmay nğa ndaw aha nğa zəley ma fəna nğa yah.»

Mey da ray Yesu, ndaw ma sawa ta da vad

³¹ Ndaw ma sawa ta da gazlavay da vad na, a fənta ndəhay tabiya. Ndaw masa da bəla na, ara ndaw-magədan gway. Anda kedë, aa guzley na, si da ray cek hay masa ma kam da bəla gway. Ndaw ma sawa ta da gazlavay da vad na, [a fənta ndəhay tabiya.] ³² Anda kedë, aa guzley da

3:20 3.20 Ef 5.11-13 **3:21** 3.21 1Jn 2.4 **3:22** 3.22 4.1-2 **3:24** 3.24 Mt 4.12; 14.3 **3:26** 3.26 1.29-34 **3:27** 3.27 19.11; 1Kwr 4.7; Heb 5.4 **3:28** 3.28 1.20; Mal 3.1; Mt 11.10 **3:29** 3.29 Mt 9.15 **3:31** 3.31 8.23; 15.19; 1Jn 4.5

ray cek masa anġa ma hətər ta dey anġa, ta masa anġa ma cənda ta sləmay anġa, ama ndəhay a təbmara mey anġa ha ba cənġa. ³³ Ndaw masa ma təba mey anġa ha la na, a key a wuzdatara a ndəhay na, Gazlavay ara ndaw ma mbərzley ba fara fara. ³⁴ Ndaw masa Gazlavay ma slərdərwa na, aa guzley mey hay nġa Gazlavay, maja Gazlavay ta vəlda Mesəfney anġa tabiya sem a ray a. ³⁵ Gazlavay Papanġ, a wudə Bəzey anġa, ta vələr gədanġ la amba a wey da ray cek hay cəpa. ³⁶ Kwa waawa ma pa Bəzey a nġa ndaw anġa fara fara na, a hətəy heter mēndəvey ba la. Ama kwa waawa ma təbra mey anġa ba na, fa da hətəy heter mēndəvey ba daa ba. Anda keđe, Gazlavay fa cey mevel da ray a mandaw mandaw.

4

Mey da ray ata Yesu ta nġwas Samari daha

¹⁻³ Ndəhay *Fariza hay a cəndamara na, *gula hay nġa Yesu ga, a fəna nġa *Jan-Baptis, asaya, Yesu fa katar *baptem a ndəhay ga, a fəna Jan-Baptis a. (Fara fara na, Yesu, ta ray anġa ta key baptem kwa nġada ndaw pal daa ba. Ama ara gula anġa hay ma kamara gway.) Masa Yesu ma cənda mey masa Fariza hay maa guzldamara heyey na, a sləkdey daa hwayak nġa *Jude, a vəhey a *Galile. ⁴ Nġa wusey a Galile he na, si a daw ta da *Samari.

⁵ Daa madaw anġa ha na, a wusey aa hwayak nġa Samari, a slala Sikar gweegwe ta ley daha. Ara ley masa *Jakwap ma vəldara zleezle nġada bəzey anġa *Jawzef. ⁶ Bəndaw nġa Jakwap a fetede daha. Yesu a gərey nġa madaw. Ta', a məskey vaw da mey bəndaw a. Ara gweegwe da wuzlah-pas.

⁷ Wure nġene, nġwas Samari daha, a daw nġa tədkawa yam daa bəndaw a. Ta', Yesu a ləvar: «Vəlya yam nġa sey cey.» ⁸ Daa nġene, gula hay nġa Yesu ata sem a slala nġa hədkawa cek mezəmey. ⁹ Nġwas Samari kaa, a mbəddara a Yesu, a ləvar: «Kah na, ndaw *Jəwif, ba diya? Kaa, kaa cəfdey yam nġa sey fa yah, nġwas Samari na, kwara?» (Nġwas aha aa guzley anda keđe na, maja ndəhay Jəwif hay a zləram ta ndəhay Samari hay ba sələk.) ¹⁰ Yesu a mbəddara, a ləvar: «Da ka səra maaya masa Gazlavay ma ka nġada ndaw, asaya, da ka sərya, yah, ndaw maa cəfdafaka yam nġa sey keđe na, anġa ara kah ma daa

3:32 3.32 3.11 **3:35** 3.35 5.20; 10.17; 13.3; 14.10; 17.2; Mt 11.27; 28.18 **3:36**
 3.36 3.16 **4:1-3** 4.1-2 3.22 **4:4** 4.4 4.9; Lk 9.52; 17.11, 16; SNM 8.4-25 **4:5**
 4.5 MC 33.19; 48.22 **4:9** 4.9 2Bay 17.29-41; Es 4.1-3; Mt 10.5; Lk 9.52-53

cəfdafaya yam jak. Anda keđe, ya da vəlka yam masa ma völey heter mendövey ba.»

¹¹ Nğwas a, a ləvar: «Papay adaw, cek metədkey yam fa kah daa ba, asaya, bəndaw a, aa selesen. Kaa ka da hətərwa yam ma völey heter mendövey ba ha na, dama? ¹² Bəndaw a keđe na, ara papañ nga papa ala Jakwap ma zləndara. Anğa ta bəz anğa hay leñ gənwaw anğa hay ta sam yam a la may. Kaa kah na, ka fəna Jakwap daw?»

¹³ Yesu a ləvar: «Kwa waawa ma sey yam a keđe, yam a kar la cənga. ¹⁴ Ama ndaw ma da sey yam masa yah ma da vəldara na, kwa yam fa da kar daa saba səlak. Yam a, a da njeý daa anğa, a ndövey ba, asaya, a da vəlar heter mendövey ba.» ¹⁵ Nğwas a, a mbəddara, a ləvar: «Papay adaw, völya yam a may taw, amba yam a kaya saba, asaya, amba ya sawa nga tədkey yam fedə saba na!»

¹⁶ Yesu aa guzlar, a ləvar: «Daw, zələrwa zel akah, samawa fedə.» ¹⁷ Nğwas a, a mbəddara, a ləvar: «Yah na, zel adaw daa ba.» Yesu a ləvar: «Kah maa guzley la, ara anğa. Ahaw, zel akah daa ba, ¹⁸ maja ka ta ley zel hay la zlam, asaya, ndaw masa akwar cew e wure keđe na, ara zel akah ba fara. Ka taa guzley la ara anğa.»

¹⁹ Nğwas a, a ləvar: «Papay adaw, ya nəkaka keđe na, kah, *ndaw ma təla mey nga Gazlavay. ²⁰ Papañ nga papa ala hay a dəräm danğay ngada Gazlavay na, daa anğwa keđe. Ama akwar Jəwif hay, ka ləvam slam medərey-danğay ngada Gazlavay na, si da *Jeruzelem gway.»

²¹ Yesu a mbəddara, a ləvar: «Kwakwa, jəkfaya sləmay. Pas a, a wuswa la masa ndəhay a da dərmar danğay a Papay, Bay Gazlavay, kwa daa wura daa wura. Fa da diyam nga dərwa danğay daa anğwa keđe ta da Jeruzelem daada na, daa ba. ²² Akwar Samari hay, akwar fa dəräm danğay, ama ka sərmara ndaw masa akwar ma dərmar danğay a ba. Ala Jəwif hay na, ya sərmara ndaw masa ala ma dərmar danğay, maja ndaw ma da ləhdata ndəhay na, a bawa daa səkway ala Jəwif hay. ²³ Pas a fa sawa, ta wuswa cay, masa ndəhay ma nam ray a Bay Gazlavay Papañ fara fara na, a namar ray la ta mevel pal ta fa gədañ nga Mesəfney anğa. Bay Gazlavay Papañ a wudta ndəhay ma namar ray anda ngene. ²⁴ Gazlavay na, ara Mesəfney, ndaw a gwa nga hətər ta dey ba. Anda keđe, ndəhay ma namar ray na, si a namar ray ta mevel pal, ta fa gədañ nga Mesəfney anğa.»

²⁵ Nğwas a, a mbəddara, a ləvar: «Ya səra *Kəriste, *ndaw

masa Gazlavay ma wala nga ləhdata ndəhay na, a sawa la. Da masa ta sawa cay na, a wuzdandara cek hay tabiya maaya maaya la.» ²⁶ Yesu a mbəfdara, a ləvar: «Kəriste he na, ara yah, ndaw masa maa guzka kefe.»

²⁷ Daa masa Yesu faa guzlam ta ngwas Samari kefe heyey na, gula anga hay a vəhmawa, a rəzlam ga maja aa faa guzley ta ngwas. Ama kwa ndaw pal taa cəfda ngwas aha: «Ka wudey fa ndaw a me?» na, daa ba. Asaya, kwa ndaw pal taa cəfda Yesu: «Kaa guzlam ta ngwas aha maja me?» na, daa ba.

²⁸ Ngwas aha, mbak! a mbəkda kwakulam anga da mey yam a, ta', a vəhey a slala. A daw a ləvtar a ndəhay: ²⁹ «Samawa ta nəkmara ndaw katay cey, aa guzlya da ray cek masa yah ma kata tabiya! Da ara Kəriste, ndaw masa Gazlavay ma wala nga ləhdata ndəhay heyey kwa!»

³⁰ Ndəhay a, a bamawa daa berney a, ta', a diyam ngada fa Yesu a.

³¹ Masa ngwas aha ta vəhey sem a slala heyey na, gula hay nga Yesu aa guzmar a Yesu a, a ləvmar: «Bay ala, zəmey cek dəba.» ³² Yesu a mbəfdatara, a ləvtar: «Cek adaw mezəmey daha masa akwar ma sərmara ba.» ³³ Gula anga hay aa cəfdam vaw da wuzlah ata, a ləvam: «Haya! Ndaw mekele ta handar cek nga zəmey la daw?»

³⁴ Yesu a mbəfdatara saya, a ləvtar: «Cek adaw mezəmey na, ara mekey cek ma mbafar a ndaw ma slərđiwa, asaya, ara nga ndəvda sləra masa aa ma vəldiwa nga key. ³⁵ Ka wulkam, ka ləvam: “Wure kefe mendərey kiya məfad nga kawa cek da ley.” Yah na, ya fa ləvkwar, nəkam dey, cek da ley ta key cay, mendərey nga kawa. ³⁶ Ndaw ma karawa cek da ley a na, ta hətəy mawurbay nga sləra anga cay. Da ray ngene, ndaw ma sləka cek aha ta ndaw ma karawa cek aha da ley aa səmam daa slam a. Ara kəne may, ngada ndaw ma zəlwa ndəhay nga hətəy heter mendəvey ba. ³⁷ Mey a daha a ləvey: “Ndaw a sləka daw, ama ma da karawa a way na, ndaw mekele.” Mey a kefe ara anga fara. ³⁸ Ya ta slərdakwar la nga kawa cek da ley masa akwar ma həvmara ba. Ma həvmara na, ndəhay mekele, ama ara akwar ma da zəmam wiya da ray cek ata ha.»

³⁹ Ndəhay Samari hay ga da slala ha, a pamara Yesu nga ndaw ata fara fara maja ngwas aha ma ləvtar: «Ndaw aha aa guzlya da ray cek hay masa yah ma kata tabiya.»

⁴⁰ Maja ngene, ata ma wusmawa fa Yesu heyey na, a kamar ambahw nga njeý ta ata. Yesu, ta', a njeý ta ata đar cew,

anğa faa sərkadata. ⁴¹ Masa ata ma cəndamara mey anğa ha la na, ndəhay ga mekele saya a təbmara mey a. ⁴² Ta', aa guzmar a nğwas a, a ləvmar: «Ya pamara nğa ndaw ala fara fara na, ara maja kah ma ləvndar heyey daada ba, ama maja ala ma cəndamara mey anğa ta sləmay ala. Wure kefe, ya ta sərmara cay, fara fara ara anğa ndaw ma da ləhdata ndəhay da bəla.»

Yesu a mbəlda bəzey nğa ndaw mahura nğa nğwamna

⁴³ Yesu ma key la đar cew da *Samari na, ta', a daw aa hwayak nğa *Galile * heyey dəba. ⁴⁴ Yesu ta ray anğa taa guzley la, a ləvey: «Ndaw ma təla mey nğa Gazlavay na, ndəhay daa hwayak anğa a rəsmara.» ⁴⁵ Ama masa Yesu ma wusey la a Galile na, ndəhay fetede, a təbmara maaya maaya, maja ata ma hətmar maazla hay masa anğa ma kata la tabiya daa masa ata ma diyam aa gwagway nğa *Pak da *Jeruzelem.

⁴⁶ Yesu ta', a daw a Kana saya, daa hwayak nğa Galile he, a slala masa aa ma tərda yam nğa wuzam heyey. Fetede, ndaw mahura nğa nğwamna daha, bəzey anğa vaw fa car. Bəzey a, a lawa da Kapernayum. ⁴⁷ Masa ndaw aha ma cənda Yesu ta sləkdey sem da *Jude nğada Galile na, anğa may, ta', a sləkdey a daw fa Yesu a, a kar ambahw amba a diyam cew e, nğa mbəldərwa bəzey anğa da Kapernayum, maja bəzey anğa ha fa da məcey. ⁴⁸ Yesu a ləvar: «Akwar siya hay, da ka ta hətam maazla hay ma rəzla ndaw daa ba na, anja akwar fa da təbmara mey adaw daa ba, ba diya?» ⁴⁹ Ndaw mahura nğa nğwamna heyey a mbəfdara, a ləvar: «Bay adaw, nakwa la fiyaw fiyaw maja bəzey adaw a fa bərzley.» ⁵⁰ Yesu a mbəfdara, a ləvar: «Daw a way, bəzey akah a mbəley la.»

Ndaw aha, a təba mey nğa Yesu heyey, ta', a daw. ⁵¹ Masa anğa fa daw nğada way na, ndəhay ma ka sləra anğa hay a cadamara ray daa cəved, a ləvmar: «Bəzey akah ta mbəley cay.» ⁵² Ndaw aha aa cəfdəta, a ləvtar: «Bəzey a, a key nğama ha na, dəga nğa vara?» A mbəfdamara, a ləvmar: «A kar nğama, awaw fa vaw daa saba na, dəga nğaa kwana ta bərey pal nğaa pas.» ⁵³ Anda kefe, ndaw aha, a səra bəzey anğa a key nğama na, daa masa Yesu maa guzlar, ma ləvar: «Bəzey akah a mbəley la» heyey. Da ray nğene, anğa ta ndəhay da way anğa tabiya a pamara Yesu nğa ndaw ata

4:42 4.42 1Jn 4.14 * **4:43** 4.43 Nezeret, slala masa Yesu ma gəley da hwad a na, aa da Galile. **4:44** 4.44 Mt 13.57 **4:46** 4.46 2.1-11 **4:46** 4.46-53 Mt 8.5-13 **4:48** 4.48 Mk 13.22; 1Kwr 1.22

fara fara. ⁵⁴ Kede he, ara maazla nga dey cew e masa Yesu ma ka daa masa anga ma slækdey da Jude ngada Galile.

5

Yesu a mbelda ndaw maahelbakaya

¹ Fa dɔba ha, *Jɔwif hay a kam gwagway da *Jeruzelem. Yesu, ta', a daw aa gwagway a may. ² Daa berney nga Jeruzelem e, gweegwe ta mey-mbew mahura membɔzey aa berney a, mezɔley Slam-membɔzey nga tɔban hay, wurak nga yam daha. Wurak a na, a zɔlmara ta mey *Hebɔre «Betzata». Ray a mazlɔrkaya ta balak hay zlam. ³ Dasi balak hay a na, masa-bɔle hay ga manatakaya: wulaf hay daha, jegwer * hay daha, maahelbatakaya hay daha. [Ata manjatakaya fa sɔkwɔmara amba yam a wusey, ⁴ maja *maslan nga Bay Gazlavay fa pawa salay aa wurak aha, fa wusa yam a. Ndaw ma mbɔzey teesɛf aa yam ma wusey a na, a mbɔley kwa daa macay wura wura cɔpa.] ⁵ Fetede, ndaw daha anga maahelbakaya dɔga mevey kwakwar maakar a ray a daangafad. ⁶ Masa Yesu ma hɔtar ndaw aha manakaya na, a sɔra anga maahelbakaya menjey ga. Ta', aa cɔfda, a lɔvar: «Ka wudey nga mbɔley daw?» ⁷ Ndaw aha a mbɔddara, a lɔvar: «Bay adaw, masa yam fa wusey daa wurak na, kwa ndaw nga mbɔzdaya aa yam a daa ba. Da ya lɔvey, ya daw may na, ndaw mekele ta mbɔzey sem teesɛf da ray adaw.»

⁸ Yesu aa guzlar, a lɔvar: «Slækdey, la gegɔded akah, daw ta salay akah.» ⁹ Wure wure ngene, ndaw aha ta mbɔley sem, ta', a la gegɔded anga, a daw.

Yesu a mbelda ndaw a na, ta pas meməskey-vaw. ¹⁰ Masa mahura hay nga Jɔwif hay ma hɔtmar ndaw aha fa la gegɔded anga na, aa guzlar, a lɔvar: «Tasana na, *pas meməskey-vaw, ba diya? Kaa kwakwas alɔkwa a vɔlka cɔved nga la gegɔded akah gway daw?» ¹¹ A mbɔddara, a lɔvar: «Ndaw ma mbɔdaya na, a lɔvya “La gegɔded akah, daw ta salay akah.”» ¹² Mahura hay nga Jɔwif hay aa cɔfdamara saya, a lɔvar: «Ara ndaw a wura, ma lɔvka “la gegɔded akah, daw” kede na!» ¹³ Ama ndaw aha na, a sɔra ndaw masa ma mbelda ha saba, maja Yesu taa zɔdfar sem da wuzlah ndɔhay ga fetede.

¹⁴ Fa dɔba ha, Yesu a cam ray ta ndaw aha daa *Way-mekey-kwakwas nga Gazlavay, ta', a lɔvar: «Nɔka, wure

4:53 4.53 2.23 **4:54** 4.54 2.11 * **5:3** 5.3 jegwer: Ndaw masa salay pal maaya ba. **5:8** 5.8-9 Mt 9.6-7 **5:9** 5.9 5.16, 18; 7.21-22; 9.14; Mk 2.27-28
5:10 5.10 Mab 20.8-10; Jer 17.21-22 **5:13** 5.13 6.15; 11.54; 12.36; Mt 8.18; 13.36

keđe, ka ta mbøley cay. Ka da key mebørey saba, daa ba na, banay mahura ma fəna keđe, a hətfaka la.» ¹⁵ Ndaw aha ta', a daw fa mahura hay nga Jəwif hay heyey, a ləvtar: «Ara Yesu ma mbəldaya.» ¹⁶ Da ray ngene, a zlamar nga cekeley mey fa Yesu, maja aa ma mbəlda ndaw aha ta pas meməskey-vaw. ¹⁷ Yesu ta', aa guzltar, a ləvtar: «Papay Bay Gazlavay fa key sləra mandaw mandaw, yah may, ya key sləra mandaw mandaw anda anğa.» ¹⁸ Mahura hay nga Jəwif hay heyey a səpam dabaray ta gədanj ta gədanj nga kədmara Yesu vagay maja aa maa guzltar a. Ma catar mevel na, mey da ray pas meməskey-vaw daada saba, ama maja aa ma zəla Gazlavay Papaha. Ngene, a key a pa ray anğa nga Gazlavay.

Mey da ray gədanj masa Gazlavay ma vəldara a Yesu

¹⁹ Yesu aa guzltar a mahura hay nga *Jəwif hay ma cakalafamar mey heyey, a ləvtar: «Ya fa ləvkwar fara fara, yah Bəzey nga Gazlavay, ya gwa nga key cek taava adaw ba. Ya nəkey dey na, fa cek masa Papay ma ka, fa dəba ha, ya ka anda anğa. ²⁰ Fara fara, Papay na, a wudya, yah Bəzey anğa, asaya, aa fa wuzdatiwa cek hay tabiya masa anğa ray anğa ma kata. A da wuzya cek hay ga ma rəzlam ndaw ma fəna masa akwar ma hətmar keđe. Ka rəzlam la ga maja.

²¹ Yaw, Papay fa sləkfdadatərwa ndəhay daa meməcey, fa vəltar heter. Yah, Bəzey anğa may, ya da vəltar heter a ndəhay masa yah ma wudəy nga vəldatara. ²² Yaw, ma da katar sariya a ndəhay na, ara Papay ba, ama ara yah, maja ta vəlya cəved la nga katar sariya a ndəhay, ²³ amba ndəhay a namaya ray anda ata ma namar ray a Papay. Da ndaw a naya ray, yah, Bəzey anğa ba na, fa da nar ray a Papay, ndaw ma slərđiwa daa ba may.

²⁴ «Ya fa ləvkwar fara fara, da ndaw fa jəkey sləmay fa mey adaw, asaya, da ndaw fa təba mey nga Papay, ndaw ma slərđiwa na, ndaw aha ta hətey heter mendəvey ba cay. Sariya ngaa zədda daa ba, ama ta sləkfdawa sem daa meməcey. ²⁵ Ya fa ləvkwar fara fara, pas a, a sawa la, ta wuswa cay, masa ndəhay maməctakaya a da cəndamara day adaw, yah, Bəzey nga Gazlavay. Ndəhay ma cəndamara, ma təbmara mey adaw na, a da njam ta dey. ²⁶ Papay aa ta gədanj nga vəley heter. Anda keđe, ta

5:14 5.14 Mt 9.2; Jak 5.16 **5:15** 5.15 9.11 **5:18** 5.18 mekədey Yesu vagay: Mt 14.5; Jan 7.1, 25; 8.37, 40; 11.53; a zəla Gazlavay Papaha: 1.34; 3.3 5; 8.16-19; 10.17-18, 29-38; 14.8-11, 20, 28; 15.9-10; 16.27-28; 17.1-26 **5:19** 5.19 1.34 **5:20** 5.20 3.35 **5:21** 5.21 Rm 4.17; Ef 2.5; Jan 11.25 **5:22** 5.22 3.18; 5.27, 30; 9.39; 12.47-48; SNM 10.42; 1Jn 2.28 **5:23** 5.23 Fəl 2.10-11 **5:24** 5.24 3.16; 5.22; 6.35; 8.51; 10.28; 11.25-26; 14.6; 17.2; 20.31; 1Jn 2.25; 3.14 **5:25** 5.25 11.43; Mk 5.41; Lk 7.14

vəldiwa gədan a la ngada yah, Bəzey anğa may, amba ya veltar heter a ndəhay. ²⁷ Asaya, ta vəlya cəved la nga katar sariya a ndəhay, maja yah, *Bəz nga Ndaw. ²⁸⁻²⁹ Pas a, a wuswa la masa ndəhay da vөгed a da cəndamara dəy adaw, asaya, a da bamawa daa cəvay ata hay. Ka da rəzlam fa cek hay a ngene ba. Anda keđe, ndəhay manjar mebərey na, a da sləkdəfəmwə daa meməcey, a da hətam heter mēndəvey ba, ama ndəhay ta mebərey na, yah, Bəzey nga Gazlavay, ya da katar sariya nğaa zəddata.

³⁰ «Yah na, ya gwa nga key cek taava adaw ba, ama si ta gədan nga Gazlavay. Da ya fa key sariya a ndaw na, ya ka anda Gazlavay ma ləvyə. Sariya masa yah ma da ka na, aa fara fara, maja ya ka ta cəved e anda Gazlavay, ndaw ma slərđiwa, ma ləvyə nga ka.»

Mey da ray ndəhay ma kam sede da ray Yesu

³¹ Yesu aa guzley saya, a ləvey: «Da ya key sede da ray adaw na, kaa wara ndəhay a da sərmara mey masa yah maa guzlda, ara mey fara fara na, kwara? ³² Ama ara ndaw mekele ma key sede da ray adaw. Ya səra, sede masa aa ma ka da ray adaw a na, aa fara fara. ³³ Akwar na, ka ta sləram ndəhay fa *Jan-Baptis la. Anğa taa guzlkwar la da ray mey masa fara fara. ³⁴ Ama yah na, walay adaw ta ndaw amba a key sede da ray adaw na, daa ba. Yaa guzlkwar da ray Jan-Baptis na, ya wudəy amba ka təbmara Gazlavay a ləhdakwar daa mebərey. ³⁵ Jan-Baptis a na, anğa anda petərla magədkaya nga wadə slam kwedek! kwedek! Pas pal daha akwar taa səmam la daa mewedəy anğa ha. ³⁶ Cek ma fəna mey masa Jan-Baptis maa guzley da ray adaw na, daha. Cek aha na, ara sləra masa Papay ma vəldiwa nga key. Sləra masa yah ma ka ha na, fa wuzda fara fara ara Papay ma slərđiwa. ³⁷ Papay, ndaw ma slərđiwa may, anğa ray anğa taa guzley la da ray adaw, yah, Bəzey anğa. Ama akwar ma cəndamara dəy anğa daa ba, akwar ma hətmar ta dəy akwar daa ba may. ³⁸ Akwar fa rəsmara mey anğa, maja akwar fa təbmara mey adaw, yah, Bəzey anğa masa anğa ma slərđiwa na, daa ba.

³⁹ «Akwar faa sərkam mey nga Gazlavay maaya maaya amba ka hətam heter mēndəvey ba ta fa vəda. Ahaw, fara fara mey nga Gazlavay a na, aa guzley da ray adaw.

⁴⁰ Ama nga hətey heter mēndəvey ba ha na, ka wudam nga samawa fa yah ba.

5:26 5.26 1.4 **5:28-29** 5.29 11.24 **5:30** 5.30 4.34 **5:31** 5.31-32 5.36
5:33 5.33-34 1.15, 19, 34 **5:36** 5.36 10.25, 38; 14.10-11; 15.24, 27 **5:37** 5.37
1.34; Mab 20.19; Mew 4.12 **5:38** 5.38 16.9 **5:39** 5.39 Lk 24.27, 44; SNM
13.27; 17.11; 2Tm 3.15-16; 1Pi 1.10-11

⁴¹ «Yah na, ya fa səpey amba ndəhay aa həmdamaya daa ba. ⁴² Ama akwar na, ya səra mewulkey akwar. Akwar fa wudmara Gazlavay daa ba. ⁴³ Yah na, ara Papay Bay Gazlavay ma slərđiwa, ka gəmam ŋga təbmaya ba. Ama da ndaw mekele a sawa saw ŋga ray anġa gway na, ka təbmara jak. ⁴⁴ Ka wudam amba ndəhay aa həmdamakwar. Ama ka wudam amba Gazlavay masa fara fara aa həmdakwar ba jak. Kaa wara ka da təbmara mey adaw na, kwara?»

⁴⁵ «Ka wulkam ara yah ma da wudkwar fa mey ŋga Gazlavay daw? Ara yah ba, ara *Mawiz ma da wudkwar, ndaw masa akwar ma wulkam a ləhdakwar la. ⁴⁶ Da fara fara akwar ta təbmara mey ŋga Mawiz la na, ka təbmara mey adaw la may, maja Mawiz a, a wuzleley na, da ray adaw. ⁴⁷ Da ka təbmara mey ŋga Mawiz ma wuzlala da ray adaw a ba na, kaa wara ka da təbmara mey adaw na, kwara?»

6

Yesu a vəltar cek mezəmey a ndəhay ma fəna gabal zlam (Matiye 14.13-21; Mark 6.30-44; Luk 9.10-17)

¹ Fa dəba ha, Yesu a sləkdey, a zləŋgey a dey lanġar ŋga dəhwa ŋga *Galile. A zəlmara dəhwa ha saya, dəhwa ŋga Tiberiyat. ² Ndəhay ga fa səpmar wurzay, maja ata ma hətam maazla hay masa Yesu ma kata ŋga mbəley masa-macay hay. ³ Ata Yesu ta gula anġa hay, ta', a təpam aa ray ŋga anġwa, a njam fetede. ⁴ Daa ŋgene, gwagway ŋga *Jəwif hay mezəley *Pak gweegwe cay. ⁵ Yesu a banġada dey na, a hətəy ndəhay ga fa samawa ŋgada fa vəda. Ta', aa cəfda *Fəlep, a ləvar: «Ya da hədkakurwa cek mezəmey ŋgada ndəhay tabiya kede na, dama?» ⁶ Yesu aa guzlar anda ŋgene na, a key a jada Fəlep maja anġa na, ta səra cek masa aa ma da ka sem. ⁷ Fəlep a mbəddara, a ləvar: «Kwa gabal temere cew * na, fa da wusa ŋga hədkawa cek mezəmey amba kwa waawa a hətəy nekədey nekədey na, daa ba.» ⁸ Gula mekele da wuzlah gula anġa hay mezəley *Andəre, masa məlman ŋga *Simanġw *Piyer, aa guzlar, a ləvar: ⁹ «Bəz-gula fede daha, anġa ta peŋ † zlam leŋ ewet cew. Kaa ŋgada ndəhay ga kede na, a da wusey wa?»

5:41 5.41 7.18 **5:44** 5.44 5.41 **5:45** 5.45 Mew 31.24-29 **5:46** 5.46 Mew 18.15, 18; Lk 24.27; Janj 6.14; SNM 3.22; 7.37 **5:47** 5.47 Lk 16.29-31 **6:2** 6.2 Mt 6.25; Janj 2.23 **6:3** 6.3 anġwa: Mt 5.1; 15.29; Mk 3.13; 6.46; Lk 22.39

6:4 6.4 2.13 * **6:7** 6.7 gabal temere cew: Ta mey Gərek a ləvey «deniye» temere cew. *Deniye* pal na, ara mawurbay ŋga sləra ŋga ndaw fa mevrəndey.

6:8 6.8 Andəre: 1.40; 12.22; Mt 4.18; Mk 13.3 † **6:9** 6.9 peŋ: Peŋ kede na, a tamara ta hapa ŋga cek anda daw mezəley «orge» ta mey Nasara. Ara daf ata masa ata ma zəmamara mandaw mandaw.

¹⁰ Yesu aa guzltar a gula anɗa hay, a lɔvɗar: «Lɔvmatar a ndɔhay nɗa njam a hwayak.» Daa slam a nɗene kwakwas mapɔckaya daha, ta', a njam fetede. Zel hay daa slam aha, a key gabal zlam. ¹¹ Yesu hal! a hɔlta peɗ hay a, a kar suse a Gazlavay, fa dɔba ha, a wunkatara a ndɔhay a. A hɔla ewet, a ka kɔne saya. A zɔmamara, a rɔham, siya mbak! ¹² Masa ata ma rɔham cay na, Yesu aa guzltar a gula anɗa hay, a lɔvɗar: «Cakalamara siya masa mambɔkakaya, kwa kuset keɗe a da nɔsey nɗa tede ba.» ¹³ Gula hay nɗa Yesu a cakalamara siya nɗa peɗ zlam masa ata ma zɔmamara heyey na, a rɔhey gadakar kuraw a ray a cew.

¹⁴ Masa ndɔhay ma hɔtmar maazla masa Yesu ma ka na, aa guzlam, a lɔvam: «Fara fara, ndaw keɗe ara *ndaw ma tɔla mey nɗa Gazlavay masa ma lɔvam zleezle a da sawa a bɔla heyey.» ¹⁵ Ama Yesu a sɔra a da samawa nɗa pamara aa bay nɗa gɔɗan. Maja nɗene, a mbɔkdata, a tɔpey nɗada anɗwa saya, a nɗey taava anɗa fetede.

*Yesu a daw ta salay da ray dɔhwa nɗa Galile
(Matiye 14.22-33; Mark 6.45-52)*

¹⁶ Taa kwad a nɗene, *gula hay nɗa Yesu a bɔnɗamawa daa anɗwa nɗada mey dɔhwa. ¹⁷ Ta', a tɔpam aa kwambiwal, a diyam a Kapernayum a dey langar nɗa dɔhwa ha. Tavad a kɔrzata daa masa ata fa tɔnɗam. Ama Yesu ta wusey a cakay ata daa ba aran. ¹⁸ Memed fa key ga. Yam fa cewesley. ¹⁹ Masa gula hay nɗa Yesu a, fa diyam ta kwambiwal, a key kɔlemeeter zlam da daa ba maakwaw na, a hɔtmar Yesu gweegwe ta ata, fa daw ta salay da ray yam a. Da ray nɗene, mandɔrzay a katar. ²⁰ Ama Yesu aa guzltar, a lɔvɗar: «Ara yah, ka da zluram ba!» ²¹ Da ray nɗene, a wudam nɗa lamara aa kwambiwal a, ama wure wure nɗene, kwambiwal a ta wusey sem a rav-zazay aa slam masa ata ma diyam aha.

Nɔɔhay ga a sɔpmara Yesu

²² Pepɔrek e, ndɔhay ga ma lamawa ta dey langar nɗa dɔhwa heyey, a nɔkmara na, ara kwambiwal pal daa slam aha daada. Asaya, a sɔpmara Yesu ta tɔpey aa kwambiwal a ta gula anɗa hay daa ba, ama ara gula anɗa hay taava ata ma tɔpam aa kwambiwal a nɗa tɔnɗey a dey langar nɗa dɔhwa. ²³ Ama fa dɔba ha, kwambiwal hay mekele a samawa da Tiberiyat, aa slam masa ndɔhay ga ma zɔmam peɗ masa Bay Mahura ma kar suse a Gazlavay maja heyey.

²⁴ Yaw, ndɔhay ga heyey, a nɔkmara na, ata Yesu ta gula

anġa hay, ata fetede daa saba. Da ray nġene, a tɔpam kwambiwal hay ma samawa da Tiberiyat heyey, a diyam nġada Kapernayum, a sɔpmara Yesu.

Yesu, anġa daf ma vɔley heter mendɔvey ba

²⁵ Ndɔhay ga heyey a tɔngam ta kwambiwal hay a hɔtfamar Yesu aa ta dey lanġar nġa dɔhwa. Ta', aa cɔfdamara, a lɔvmar: «Bay ala, ka sawa fede kaa na, kwara? Ka wuswa nġa vara?» ²⁶ Yesu a mbɔfdatara, a lɔvtar: «Ya fa lɔvkwar fara fara, ka sɔpmaya na, maja akwar ma hɔtam maazla masa yah ma ka ba. Ama ka sɔpmaya na, maja akwar ma zɔmam cek haa ka rɔham.

²⁷ Ka da sɔpam nġa hɔtey daf ma da nɔsey da bɔla kefe ba. Ama sɔpam nġa hɔtey daf mevɔley heter mendɔvey ba. Daf mevɔley heter mendɔvey ba ha na, ara yah, *Bɔz nġa Ndaw ma da vɔldakwara, maja Papay, Bay Gazlavay, ta wuzda la ara anġa ma vɔldiwa ġɔdan a.»

²⁸ Ndɔhay a, aa cɔfdamara Yesu saya, a lɔvmar: «Bay ala, kaa ya da kam slɔra ma mbafar a Gazlavay na, wura?»

²⁹ Yesu a mbɔfdatara, a lɔvtar: «Slɔra ma mbafar a Gazlavay na, ara mepey ndaw masa anġa ma slɔrdɔrwa nġa ndaw anġa fara fara.»

³⁰ Aa guzlmara a Yesu, a lɔvmar: «Kandar maazla masa ala ma da hɔtmar ta dey ala, amba ya sɔrmara ara Gazlavay ma slɔrdakawa, asaya, ya pamaka nġa ndaw ala fara fara. Kaa ka da kandar maazla ha na, wura? ³¹ Zleezle, papan nġa papa alɔkwa hay ta zɔmam cek mezɔley “man” † la da wuzlah-ley. Mawuzlalakaya daa dɔrewel nġa Gazlavay, a lɔvey: “Ta vɔltar cek mezɔmey la ma kwiywa ta da vad.”»

³² Yesu a mbɔfdatara, a lɔvtar: «Ya fa lɔvkwar fara fara, ma vɔlkwar cek mezɔmey ma kwiywa ta da vad na, ara *Mawiz ba, ama ara Gazlavay Papay ma vɔlkwar cek mezɔmey masa fara fara ma kwiywa ta da vad. ³³ Ahaw, cek mezɔmey masa Gazlavay ma vɔldakwara na, ara ndaw ma pawa salay ta da vad. Ara anġa ma da vɔltar heter mendɔvey ba a ndɔhay da bɔla.» ³⁴ A mbɔfdamara a Yesu dɔba, a lɔvmar: «Bay ala, na vɔlndar cek mezɔmey a nġene mandaw mandaw taw!»

³⁵ Yesu a mbɔfdatara saya, a lɔvtar: «Yah na, daf mevɔley heter mendɔvey ba. Da ndaw ta sawa la asi adaw na, may fa da car daa saba, asaya, da ndaw ma paya la nġa ndaw anġa fara fara na, yam fa da kar daa saba may. ³⁶ Ya

6:26 6.26 2.11 **6:27** 6.27 6.35 **6:29** 6.29 2.23 † **6:31** 6.31 “man”: Ara cek mezɔmey masa Gazlavay ma vɔldatara nġada ndɔhay Israyel hay daa masa ata da wuzlah-ley mevey kwakwar mɔfad. **6:31** 6.31 Ps 78.24; Mab 16.4, 31; Janj 6.49 **6:33** 6.33 6.41, 51 **6:34** 6.34 4.15; Mt 6.11 **6:35** 6.35 4.13-14; 6.48-58; 7.37

taa guzlkwar la, ya lœvkwar: “Akwar ma hœtmaya la ta dey akwar, ama ka tœbmara mey adaw ba cœnga.” ³⁷ Ndœhay tabiya masa Papay ma vœldatiwa na, a samawa la asi adaw. Ndaw ma sawa asi adaw na, ya fa da bœla daa ba, ³⁸ maja ya pawa salay da vad na, ŋga key cek anda yah ma wufey ba, ama ŋga key cek anda Gazlavay, ndaw ma slœrdiwa, ma wufey. ³⁹ Gazlavay, ndaw ma slœrdiwa, a wufey ndœhay masa aa ma vœldatiwa na, yaa zœfey kwa pal da wuzlah ata ba. Ama ya da slœkdadaterwa daa memœcey ta pas masa bœla ma da ndœvey. ⁴⁰ Cek ma mbafar a Papay na, anja ndœhay tabiya ma sœrmaya, yah, Bœzey aŋga, ta ma pamaya ŋga ndaw ata fara fara na, ŋga hœtam heter mendœvey ba. Ya da slœkdadaterwa daa memœcey ta pas masa bœla ma da ndœvey.»

⁴¹ Masa Yesu ma lœvey «Yah na, daf ma pawa salay ta da vad» heyey na, *Jœwif hay aa ŋguram mey da ray a, ⁴² a lœvam: «Aŋga na, Yesu, bœzey ŋga *Jawzef, ba diya? Alœkwa fa sœrmatakwa ata papaha ta mamaha kaa gway na! Kaa aa guzley, a lœvey aŋga daf ma pawa salay ta da vad na, kwara?»

⁴³ Yesu a mbœdɔdara, a lœvtar: «Mbœkdamara meengurey-mey. ⁴⁴ Kwa ndaw ma gwa ŋga sawa asi adaw ta gœdan aŋga na, daa ba. Si Papay, ndaw ma slœrdiwa, ma handœrwa. Yaw, ya da slœkdadœrwa daa memœcey ta pas masa bœla ma da ndœvey. ⁴⁵ Ndœhay ma tœla mey ŋga Gazlavay ta wuzlalam la, a lœvam: “Ara Gazlavay ma daa sœrkadata ndœhay tabiya.” Yaw, kwa waawa ma jœkey slœmay fa Papay, ma tœba meesærkedey aŋga na, a sawa la asi adaw. ⁴⁶ Sœrmara na, kwa ndaw pal ma hœtar Papay daa ba, si yah, ndaw ma sawa ta fa aŋga gway. ⁴⁷ Ya fa lœvkwar fara fara, ndaw ma paya ŋga ndaw aŋga fara fara la na, ta hœtey heter mendœvey ba cay. ⁴⁸ Yah na, daf mevœley heter mendœvey ba. ⁴⁹ Zleezle papan ŋga papakw akwar hay ta zœmam cek mezœmey la da wuzlah-ley, ama ta ŋgene he cœpa ta mœcam sem cœnga. ⁵⁰ Ama ndaw ma zœma daf ma pawa salay ta da vad na, fa da mœcey daa ba. ⁵¹ Yah na, daf mevœley heter mendœvey ba ma pawa salay ta da vad. Da ndaw ma zœmey daf a la na, a da njeý ŋga sœrmataw. Daf masa yah ma da vœldakwara ha na, ara aslaw ŋga vaw adaw. Ya vœlda amba ndœhay da bœla a hœtam heter mendœvey ba.»

⁵² Jəwif hay a kam yawa ta gədan da ray mey a keđe, aa cəfdam vaw da wuzlah ata, a ləvam: «Ndaw aha keđe a da vəldandakwara aslaw nga vaw anğa nga zəmey na, kwara?»

⁵³ Da ray ngene, Yesu aa guzltar, a ləvtar: «Ya fa ləvkwar fara fara, da akwar ma zəmam aslaw nga vaw adaw daa ba, asaya, da akwar ma sam mambaz adaw, yah, Bəz nga Ndaw, daa ba na, ngene, akwar fa da hətam heter mendəvey ba daa ba. ⁵⁴ Ndaw masa fa zəmey aslaw nga vaw adaw ta masa fa sey mambaz adaw na, ta hətey heter mendəvey ba cay. Yaw, ya da sləkɗadərwa daa meməcey ta pas masa bəla ma da ndəvey. ⁵⁵ Maja aslaw nga vaw adaw na, ara cek mezəmey masa fara fara, asaya, mambaz adaw na, ara cek mesey masa fara fara. ⁵⁶ Ndaw ma zəmey aslaw nga vaw adaw ta ma sey mambaz adaw na, a da njeý macəmkaya ta yah, yah may, ya da njeý macəmkaya ta anğa. ⁵⁷ Papay, ndaw ma slərɗiwa, aa ta dey, ya njeý dasi har anğa. Anda keđe, ndaw masa fa zəmey aslaw nga vaw adaw na, a da njeý dasi har adaw may. ⁵⁸ Yah na, ɗaf ma pawa salay ta da vad. Daf a ara anda cek mezəmey masa papay nga papakw akwar hay ma zəmamara zleezle ba, maja ta zəmamara cek aha la, ta məcám sem cənğa. Ama ndaw ma zəma ɗaf masa yah ma da vəldara keđe na, a da njeý ta dey nga sərmataw.» ⁵⁹ Keđe he, ara meesərkedey nga Yesu daa *way-mewuzey-mey nga Gazlavay da Kapernayum.

Mey da ray heter mendəvey ba

⁶⁰ Masa ndəhay a ma cəndamara mey nga Yesu la na, ndəhay ga da wuzlah ata masa ma diyam asiya heyey a ləvam: «Mey anğa ha keđe na, aa ta banay nga cəney. Ma da gwa nga jəkfar sləmay na, wa?»

⁶¹ Ama Yesu ta sərə sem ndəhay a faa nguram mey da ray mey anğa ha. Ta', aa guzltar, a ləvtar: «Mey adaw a keđe na, fa həbkwat ray daw? ⁶² Yaw, kaa da wara akwar ma da hətmaya, yah, *Bəz nga Ndaw, fa təpey aa slam masa yah ma pawa salay da hwaɗ a na, ka da ləvam kwara? ⁶³ Ara *Mesəfney nga Gazlavay ma vəltar heter a ndəhay. Ndaw-magədan taava anğa na, a gwa nga njeý ta gədan anğa daada ba. Mey masa yah maa guzldakwara keđe na, a sawa ta fa Mesəfney nga Gazlavay, a vəltar heter a ndəhay. ⁶⁴ Ama ndəhay siya da wuzlah akwar, a təbmara mey adaw a ba.»

Dəga zleezle, Yesu a sərta ndəhay masa ma da təbmara mey anğa ba, asaya, a səra ndaw ma da vəlda a har masa-gəra anğa hay nğa kədəy vagay. ⁶⁵ Yesu aa guzltar saya, a ləvtar: «Ara maja ngene, yah ma ləvkwar kwa ndaw ma gwa nğa sawa asi adaw ta gədan anğa na, daa ba, si Papay ma vəlar cəved nğa sawa gway.»

⁶⁶ Dəga anğa maa guzley ngene na, ndəhay ga dasi ndəhay ma diyam asi Yesu a, a mbəkdamara, a diyam asiya saba. ⁶⁷ Yesu, ta', aa guzltar a gula anğa hay kuraw a ray a cew, a ləvtar: «Kaa akwar may, ka wudam nğa diyam na, gway daw?» ⁶⁸ *Simanw *Piyer a mbəddara, a ləvar: «Bay ala, ya diyam na, fa wa dəba wa? Mey akah na, a vəley heter mendəvey ba a ndəhay, ba diya? ⁶⁹ Wure kefe, ala ta sərmara cay, ya təbmara, kah na, ndaw nğa Gazlavay masa aa ma slərdərwa nğa key sləra anğa.» ⁷⁰ Yesu a mbəddatara, a ləvtar: «Ma walakwar, akwar kuraw a ray a cew kefe na, ara yah, ba diya? Ama ndaw pal da wuzlah akwar daha na, anğa gula nğa *Satan, bay-malula.» ⁷¹ Yesu aa guzley na, da ray Juda, bəzey nğa Simanw Iskariyawt. Juda ha na, kwa anğa da wuzlah gula anğa hay kuraw a ray a cew heyey na, ara anğa ma da vəlda Yesu a har masa-gəra anğa hay nğa kədəy vagay.

7

Mey da ray Yesu ta məlmaha hay

¹ Fa dəba ha, Yesu a pəkey daa hwayak nğa *Galile. A wudəy nğa daw nğa pəkey daa hwayak nğa *Jude ba, maja mahura hay nğa *Jəwif hay fetede fa səpmara nğa kədəy vagay. ² Daa ngene *gwagway nğa Way-mekərcey * gweegwe cay. ³ Ta', məlmaha hay aa guzltar, a ləvmar: «Sləkdey la da Galile fede, daw aa hwayak nğa Jude amba ndəhay ma səpmaka a hətmar sləra masa kah ma ka ta dey ata. ⁴ Maja kwa waawa, da a wudəy ndəhay tabiya nğa sərmara na, a bey cek masa aa ma ka fa dey nğa ndəhay ba. Ka fa key maazla hay mekele mekele anda kefe, kata fa mey nğa ndəhay tabiya amba a səpmaka.» ⁵ Kwa məlman nğa Yesu hay a ta ray ata na, fa pamara Yesu a nğa ndaw ata fara fara daa ba. ⁶ Yesu a mbəddatara, a ləvtar: «Pas masa maaya nğada yah na, ta wuswa daa ba aran, ama nğada akwar na, kwa pas wura wura na, anğa maaya. ⁷ Akwar na, ndəhay da bəla fa da hətam cəved nğa rəsmakwar daa

6:64 6.64 13.11; 16.9 **6:67** 6.67-69 Mt 16.15-20; Mk 1.24 **6:71** 6.71 12.4

7:1 7.1 5.18 * **7:2** 7.2 gwagway nğa Way-mekərcey: Ara gwagway mahura nğa Jəwif hay. A kamara dar daangafad da Jeruzelem, daa hwayak nğa Jude.

7:2 7.2 Lev 23.33-34; Mew 16.13-15 **7:5** 7.5 16.9 **7:6** 7.6 2.4

ba, ama yah na, fa rəsmaya, maja ya fa wuzdatərwa cek hay malamba masa ata ma kamata. ⁸ Akwar na, diyam aa gwagway a. Yah na, ya fa da daw daa ba, maja pas adaw ta wuswa daa ba aran.» ⁹ Fa dəba ha masa Yesu maa guzley la anda keɗe na, ta', a njeɗ da Galile he cənɗa.

Yesu aa sərkaɗata ndəhay daa gwagway nɗa Way-mekərceɗ

¹⁰ Masa məlman nɗa Yesu hay ata sem la aa gwagway heyey na, Yesu ta', a daw aa gwagway a may, ama a səhwey ta səhwey, kwa ndaw ma hətər daa ba. ¹¹ Mahura hay nɗa *Jəwif hay a səpmara daa gwagway a, a ləvam: «Ndaw a heyey aa dama?»

¹² Ndəhay ga daa gwagway a faa səkam mey da ray Yesu a, siya hay a ləvam: «Ara ndaw maaya.» Ndəhay siya may, a ləvam: «Kay! Ara ndaw maaya ba, fa betey ndəhay.» ¹³ Kwa ndaw ta gwa nɗaa guzley da ray Yesu fa mey nɗa ndəhay daa ba, maja a zluram ta mahura hay nɗa Jəwif hay.

¹⁴ Masa gwagway a heyey ta key cay ɗar məfaɗ na, Yesu ta', a daw aa *Way-mekey-kwakwas nɗa Gazlavay, aa sərkaɗata ndəhay. ¹⁵ Mahura hay nɗa Jəwif hay ma cəndamara mey nɗa Yesu a na, a rəzlam, a ləvam: «Haya! Ndaw a kaa meeme, taa sərkey nɗa sərey mey nɗa Gazlavay daa ba, ama a sərta mey hay a maaya maaya na, kwara?»

¹⁶ Yesu a mbəɗɗatara, a ləvtar: «Mey masa yah maa sərkaɗatara a ndəhay keɗe na, ara mey adaw ba, ama ara mey nɗa Gazlavay, ndaw ma slərɗiwa. ¹⁷ Mey masa yah maa sərkaɗatara a ndəhay, da ara mey nɗa Gazlavay, da daa ba, da ara mey adaw na, ndaw ma wuɗey nɗa key cek ma mbafar a Gazlavay na, a sərə la. ¹⁸ Ndaw maa sərkaɗata ndəhay ta gəɗan nɗa gway na, a key nɗene, a səpey amba ndəhay aa həmdamara. Ama ndaw maa sərkaɗata ndəhay amba ndəhay aa həmdamara ndaw ma slərɗərwa na, nɗene ara ndaw maaya ma mbərzley ba. ¹⁹ Zleezle *Mawiz ta wuzkwar kwakwas hay la nɗa səpey, ba diya? Ama kwa ndaw pal da wuzlah akwar ta səpa kwakwas a ta cəveɗ e daa ba. Kaa ka səpmaya nɗa kəɗey vagay na, maja me?» ²⁰ Ndəhay a mbəɗɗamara, a ləvmar: «Kah na, ta malula da ray. Ma wuɗey nɗa kəɗka vagay na, wa?»

²¹ Yesu a mbəɗɗatara, a ləvtar: «Pas pal daha, ya ta mbəley ndaw la ta *pas meməskey-vaw. Akwar ta rəzlam la ga maja. ²² Wulkam cey, Mawiz ta wuzkwar kwakwas la

nga *mesley mandawal. Kwakwas nga mesley mandawal a, a zley na, fa Mawiz ba, ama dōga fa papan nga papakw akwar hay zleezle. Kwa ta pas meməskey-vaw na, akwar fa slam mandawal nga bōza hay. ²³ Akwar fa slam mandawal nga bōzey kwa ta pas meməskey-vaw amba kwakwas nga Mawiz a zlēbey ba. Kaa ka cam mevel a ray adaw maja yah ma mbōley ndaw ta pas meməskey-vaw na, kwara? ²⁴ Ka da wulkam da ray ndaw, ka lōvam anga maaya, da daa ba, anga maaya ba maja akwar ma hōtmar ta dey gway na, kōne ba. Ama wulkam maaya maaya da ray cek masa ndaw aha ma ka amba kaa guzlam fara fara ta cōved e.»

Mey da ray ndōhay maa guzlam da ray Kōriste

²⁵ Ndōhay siya da *Jeruzelem aa guzlam da wuzlah ata, a lōvam: «Kede na, ara ndaw masa ata ma sōpmara nga kōdey vagay heyey, ba diya? ²⁶ Nōkmara, anga faa guzley fa mey nga ndōhay. Kaa aa guzlmara saba kwara? Mahura alōkwa hay ta sōpmara la fara fara ara *Kōriste, *ndaw masa Gazlavay ma wala nga lōhdata ndōhay heyey fara daw? ²⁷ Yaw, Kōriste ma da sawa na, ya sōrkwa slam masa anga ma sawa da hwad a ba. Ama ndaw kede na, ya sōrkwa slam masa anga ma sawa, ba diya?»

²⁸ Daa masa Yesu faa sōrkadata ndōhay daa *Way-mekey-kwakwas nga Gazlavay na, aa guzley ta gōdan, a lōvey: «Akwar na, ka sōrmaya fara daw? Asaya, ka sōpmara slam masa yah ma sawa da hwad a fara fara daw? Ya sawa na, nga ray adaw ba, ama ara ndaw ma slōrdiwa. Ndaw a, aa maaya fara fara. Akwar na, ka sōpmara ndaw aha ba.

²⁹ Yah na, ya sōra ndaw aha, maja ya sawa da cakay a, asaya, ara anga ma slōrdiwa.»

³⁰ A sōpam cōved amba a kōrzamara Yesu, ama kwa ndaw pal ta pafar har daa ba, maja pas anga ta wuswa daa ba aran. ³¹ Ta ngene he cōpa, ndōhay ga fa tōbmara mey anga cōnga. Aa guzlam, a lōvam: «*Ndaw masa Gazlavay ma wala nga lōhdata ndōhay ma da sawa na, a key maazla hay ma fōna nga ndaw kede la daw?»

Yesu a lōvey ndōhay fa da hōtmar daa saba na, maja me?

³² Mey masa ndōhay maa sōkdamara da ray Yesu heyey na, *Fariza hay ta cōndamara sem. Da ray ngene, Fariza hay a, ta *bay-ray hay nga ndōhay ma ka kwakwas nga Gazlavay, a slōram ndōhay ma jōcfa *Way-mekey-kwakwas nga Gazlavay nga kōrzamōrwa Yesu. ³³ Yesu ta', aa guzley, a

løvey: «Ya da njeý da cakay akwar da bəla kedə na, nekəđey gway. Fa dəba ha, ya da daw a cakay ndaw ma slərđiwa.

³⁴ Ka səpmaya la, ama akwar fa da hətmaya daa saba, maja ka gwamara ŋga diyam aa slam masa yah ma da daw a hwad a ba.»

³⁵ Mahura hay ŋga *Jəwif hay aa cəfdam vaw da wuzlah ata, a ləvam: «A da daw na, ta', ama may ama, amba ya hətkwar saba na! A da daw fa ndəhay aləkwa hay Jəwif hay ma njam da wuzlah Gərek hay daw? A daa sərkadatərwa Gərek hay daw? ³⁶ Aa guzley, a løvey: “Ka səpmaya la, ama akwar fa da hətmaya daa saba, maja ka gwamara ŋga diyam aa slam masa yah ma da daw a hwad a ba.” Mey a kedə na, a wudəy ŋga løvey me?»

Mey da ray yam ma vəley heter mēndəvey ba

³⁷ Dar ŋga madagway-dakw ŋga *gwagway ŋga Way-məkərceý na, ara đar mahura ma fənta đar hay siya ŋga gwagway a. Ta pas ŋgene, Yesu a leceý ta leceý fa meý ŋga ndəhay, aa guzley ta gəđan, a løvey: «Da ndaw yam fa kar na, ŋga sawa fa yah ŋga sey. ³⁸ Yaw, mawuzlalakaya daa đerewel ŋga Gazlavay, a løvey: “Ndaw ma paya ŋga ndaw anga fara fara la na, yam ma vəley heter mēndəvey ba fa vavawa daa mevel anga”.» ³⁹ Yesu maa guzley anda kedə na, da ray *Mesəfney ŋga Gazlavay. Ndəhay masa ma pamara Yesu ŋga ndaw ata fara fara na, a hətam Mesəfney aha la. Daa ŋgene, Yesu ta vəldərwa Mesəfney a, a bəla daa ba aran, maja Yesu ta təpeý a vad ŋga njeý aa slam anga mewedəy daa ba aran.

Ndəhay a wudkam đay da wuzlah ata maja Yesu

⁴⁰ Masa ndəhay ma cəndamara meý ŋga Yesu la na, ndəhay siya da wuzlah ata aa guzlam, a ləvam: «Fara fara, ndaw kedə ara *ndaw ma təla meý ŋga Gazlavay ma da sawa heyey.» ⁴¹ Ndəhay siya a ləvam: «Ara *Kəriste, *ndaw masa Gazlavay ma wala ŋga ləhdata ndəhay.»

Mekele hay saya a ləvam: «Kəriste he a da sawa na, daa hwayak ŋga *Galile daw? ⁴² Mawuzlalakaya daa đerewel ŋga Gazlavay a løvey: “Kəriste, ndaw masa Gazlavay ma wala na, a da bawa daa səkway ŋga Bay *Davít, a da yawa da Betəlehem, slala masa Bay Davít e ma yawa zleezle da hwad a.”» ⁴³ Anda kedə, ndəhay a, a wudkam đay da wuzlah ata maja Yesu. ⁴⁴ Ndəhay siya da wuzlah ata a

wufam nga kərzamara Yesu, ama kwa ndaw pal ta pafar har daa ba.

Mahura hay nga Jəwif hay a təbmara mey nga Yesu ba

⁴⁵ Masa ndəhay ma jəfa *Way-mekey-kwakwas nga Gazlavay ma vəhmawa la na, *bay-ray hay nga ndəhay ma ka kwakwas nga Gazlavay ta *Fariza hay aa cəfdamata, a ləvmatar: «Akwar ma kərzamərwa daa saba maja me?» ⁴⁶ Ndəhay ma jəfa Way-mekey-kwakwas heyey a mbəfdamatara, a ləvmatar: «[Jga menjey ala, ya ta hətam ndaw maa guzley maaya anda anga daa ba.» ⁴⁷ Fariza hay aa guzlmatar saya, a ləvmatar: «Yaw, akwar may ta fəckwar sem aa cəved anga ngene may daw? ⁴⁸ Ala Fariza hay na, ala fa təbmara mey nga ndaw aha daa ba. Kwa ndaw mahura nga *Jəwif hay pal fa təba mey nga ndaw aha daa ba may. ⁴⁹ Ndəhay ma təbmara mey anga ngene na, ara ndəhay ma sərmara *kwakwas nga Mawiz ba, ara ndəhay masa Gazlavay ta nəsta sem.» ⁵⁰ Nikwedem, masa ma daw fa Yesu zleezle heyey na, anga da wuzlah Fariza hay a. Ta', a mbəfdatara, a ləvtar: ⁵¹ «Kwakwas aləkwa a vəley cəved nga kərzey ndaw anda kedə ba. Si ya jəkfakwar sləmay, ya sərkwa cek masa aa ma ka la d'agay.» ⁵² Fariza hay siya a mbəfdamara, a ləvmar: «Kah may, kah ndaw *Galile daw? Janja d'erewel nga Gazlavay amba ka səra kwa *ndaw ma təla mey nga Gazlavay pal masa ndaw Galile na, daa ba.»

Mey da ray ngwas daha ma ley vaw saw da palah

[⁵³ Fa dəba ha, aa wadam ray, kwa waawa a daw a way anga.

8

¹ Masa *Fariza hay maa wadam ray cay na, ta', Yesu a daw aa Anɣwa nga *Awliviye. ² Pepərek e, slam bəŋ-bəŋ na, ta', a vəhwa aa *Way-mekey-kwakwas nga Gazlavay. Ndəhay ga a nɣəcham a cakay a, ta', a njeɣ, aa sərkadata. ³ *Ndəhay maa sərkada kwakwas nga Mawiz ta Fariza hay a handamawa ngwas daha fa mey nga Yesu a. Nɣwas aha a kərzamərwa fa ley vaw saw da palah. Deŋ! a lacadamara nɣwas aha a wuzlah ndəhay tabiya, ⁴ aa guzlmatar a Yesu, a ləvmar: «Bay ala, ehe, nɣwas kedə, ya kərzamərwa fa ley vaw saw da palah. ⁵ Kwakwas nga Mawiz a ləvey kwa nɣwas wura wura ma ley vaw saw da palah anda kedə na, si meezekey anga ta anɣwa vagay. Kaa kah na, ka wulkey kwara?»

⁶ Aa guzlmara a Yesu anda keƙe na, a wudam a ngamar gadaɗ amba a hɛtam dabaray nga dadadɛfamar mey. Ama Yesu ta', aa cɛdkwey, a tɛhwey cek ta har fa hwiyak.

⁷ Ndɛhay kaa heyey na, faa guzlmara cɛnga, faa guzlmara cɛnga. Ta', Yesu a, a lecey, aa guzltar, a lɛvtar: «Da ndaw pal dasi akwar ngene manjar mebɛrey daha na, nga ley aɗgwa ha nga hazaka teesɛf cey.»

⁸ Fa dɛba ha, Yesu ta', aa cɛdkwey saya, a tɛhwey cek fa hwiyak saya. ⁹ Masa ndɛhay ma handamɛrwa ngwas heyey ma cɛndamara Yesu maa guzley anda keƙe la na, a sɛhwam pal pal, ndɛhay mahura hay teesɛf, mendɛrey Yesu taava aɗga, ngwas a malacakaya fa mey aɗga. ¹⁰ Yesu ta', a lecey, aa guzlar a ngwas a, a lɛvar: «Kwakwa, ndɛhay ma handamakawa heyey na, ata ama dɛba ama? Ndaw pal da wuzlah ata ta hazakaka la daw?» ¹¹ Ngwas aha a mbɛɗdara, a lɛvar: «Daa ba, bay adaw.» Yesu a lɛvar: «Yah may, ya fa da hazakaka daa ba. Daw, ama dɛga tasana ka da key mebɛrey saba.»]

Yesu aa guzley da ray ray aɗga

¹² Yesu aa guzltar a ndɛhay makustakaya daa Way-mekey-kwakwas heyey saya, a lɛvtar: «Ma waɗa slam da bɛla na, ara Yah. Ndaw ma sɛpya na, fa da pɛkey daa lɛvan daa saba, ama a da njeɗ daa slam-mewedeɗ masa ma vɛley heter mendɛvey ba.» ¹³ *Fariza hay aa guzlmara, a lɛvmar: «Ka faa guzley da ray akah ta mey akah. Maja ngene, mey masa kah maa guzlda ha na, ara mey fara fara ba.»

¹⁴ Yesu a mbɛɗdatara, a lɛvtar: «Kwa ya faa guzley da ray adaw ta mey adaw na, ama mey masa yah maa guzlda ha, ara mey fara fara. Ara mey fara fara na, maja ya sɛra slam masa yah ma sawa da hwad a, asaya, ya sɛra slam masa yah ma da daw a hwad a may. Ama akwar na, ka sɛmara slam masa yah ma sawa da hwad a ba, ka sɛmara slam masa yah ma da daw a hwad a ba may. ¹⁵ Akwar na, ka wulkam da ray ndaw, ka lɛvam ndaw keƙe aɗga maaya, da daa ba, aɗga maaya ba, maja akwar ma hɛtmar ta dey daada gway. Mewulkey akwar ngene, ara mewulkey nga ndaw-magɛdaɗ. Ama yah na, yaa guzley da ray ndaw ba.

¹⁶ Yaw, da ya taa guzley la da ray ndaw na, a key ngene, yaa guzley fara fara, maja ara yah taava adaw maa guzley da ray ndaw aha ba, ama ala ta Papay, ndaw ma slɛrɗiwa.

17 Mawuzlalakaya daa kwakwas akwar, a løyey, da ndøhay cew taa guzlam la letek da ray cek na, ara mey fara fara, ba diya? 18 Yah na, ya faa guzley da ray adaw ta mey adaw. Papay, ndaw ma slørdiwa faa guzley da ray adaw may.»

19 Fariza hay aa cøfdamara, a løymar: «Papakw a na, aa dama?» Yesu a mbøfdatara, a løyvar: «Akwar na, ka sørmaya ba, ka sørmara Papay ba may. Da ka sørmaya na, anja ka sørmara Papay la may.»

20 Yesu aa guzlda mey a kedø na, anga manjakaya gweegwe ta slam mecekeley dala daa *Way-mekey-kwakwas nga Gazlavay. Aa faa sørkadata ndøhay daa Way a, ama kwa ta kørzamara daa ba, maja pas anga ta wuswa daa ba aran.

Yesu a patar lengesl ngada ndøhay ma tøbmara mey anga ba

21 Yesu aa guzltar saya, a løyvar: «Yah na, ya da daw. Fa døba ha, ka søpmaya la, ama akwar fa da høtmaya daa saba. Anda kedø, ka da møcam ta mebørey da ray. Aa slam masa yah ma da daw na, akwar fa da gwamara nga diyam a hwad a daa ba.» 22 Mahura hay nga *Jøwif hay aa guzlam da wuzlah ata, a løyvam: «Ndaw aha aa guzley, a løyey, aa slam masa anga ma da daw na, ya gwakwa nga nakwa ba. A løyey anda kedø na, a da køfa ray anga vagay kwa!» 23 Yesu a mbøfdatara, a løyvar: «Akwar na, ndøhay da ray hwayak kedø. Ama yah na, ya sawa da gazlavay da vad. Akwar na, ndøhay nga bøla kedø, ama yah na, ndaw nga bøla kedø ba.

24 Maja ngene, ya ta løykwar la: “Ka da møcam ta mebørey da ray.” Da ka tøbmara “Yah na, ara Yah” * ba na, fara fara, ka da møcam ta mebørey da ray.» 25 Aa cøfdamara Yesu, a løymar: «Kah na, wa?» Yesu a mbøfdatara, a løyvar: «Yah na, ndaw masa yah ma wuzdakwara døga zleezle heyey. 26 Mey hay ga da ray akwar daha amba yaa guzley da ray a. Anda kedø, ya da mbødkwar ray maja mebørey akwar. Fara fara, mey masa yah ma kada a ndøhay na, ara mey masa yah ma cøndørwa fa ndaw ma slørdiwa. Anga na, ndaw maa guzley mey fara fara.»

27 Yesu maa guzley anda kedø na, da ray Papaha, Bay Gazlavay. Ama ndøhay a, a cøndamara ba. 28 Maja ngene, Yesu aa guzltar saya, a løyvar: «Da masa akwar ma bangadamanya, yah, *Bøz nga Ndaw cay fa hwadam mazlanjalakaya na, daa ngene, ka sørmara la “Yah na,

8:17 8.17 Mew 19.15 **8:18** 8.18 5.36; 1Jn 5.9 **8:19** 8.19 5.18; 16.3 **8:20** 8.20 2.4 **8:21** 8.21 8.14 **8:23** 8.23 3.31 * **8:24** 8.24 Yah na, ara Yah: Gazlavay a wuzar vaw a Mawiz, a løyvar: «Mezøley adaw na, “Yah na, ara Yah”» Nøka Mab 3.14, asaya, nøka Iz 43.10. **8:24** 8.24 13.19

ara Yah." Asaya, ka sɛrmara la, yah na, ya gwa nga key cek taava adaw ba, ama ya kedey na, mey masa Papay maa sɛrkadiwa. ²⁹ Ndaw ma slɛrdiwa na, anɔa ta yah, ta mbɛkdaya taava adaw daa ba. Ya fa key cek mandaw mandaw ma mbafar.» ³⁰ Masa Yesu maa guzley la anda ngene na, ndɔhay ga a tɔbmara mey anɔa.

Beke hay na, wa hay wa?

³¹ Yesu aa guzltar ngada *Jɔwif hay masa ma tɔbmara mey anɔa dɔba, a lɔvtar: «Da akwar ta tɔbmara mey adaw la, ka mbɛkdamara ba na, ngene akwar gula adaw hay fara fara. ³² Anda kede, ka sɛrmara mey masa fara fara la, mey a, a da pɛskakurwa daa beke.»

³³ A mbɛddamara, a lɔvmar: «Ala na, ndɔhay daa sɛkway nga *Abɔraham, kwa ndaw pal dasi ala masa beke na, daa ba sɛlak! Kaa ka lɔvndar mey a, a da pɛskandar daa beke na, kwara?» ³⁴ Yesu a mbɛddatara, a lɔvtar: «Ya fa lɔvkwara fara fara, kwa waawa ma key mebɔrey na, anɔa beke maja mebɔrey fa wa. ³⁵ Nɔka, beke na, a slɛfmara a wuzlah ndɔhay masa da way bay anɔa ba, ama bɔzey nga ndaw nga way a na, a slɛfmara a wuzlah ndɔhay da way a. ³⁶ Anda kede, da ara yah, Bɔzey nga Gazlavay, ma pɛskakwar daa beke na, ka da njam akwar beke hay saba fara fara. ³⁷ Ahaw, ya sɛra akwar na, ndɔhay daa sɛkway nga Abɔraham. Ama akwar fa sɛpmaya nga kɔfey vagay, maja mey adaw ta mbɛzkwar aa mevel daa ba. ³⁸ Yah na, ya kedey mey masa Papay ma wuzdiwa. Akwar na, ka kam cek masa papakw akwar ma kadakwara.»

³⁹ A mbɛddamara saya, a lɔvmar: «Ala na, ndɔhay daa sɛkway nga Abɔraham.» Yesu a lɔvtar: «Da akwar ndɔhay daa sɛkway nga Abɔraham na, anɔa ka kam cek anda anɔa ma ka la. ⁴⁰ Ama wure kede, akwar fa sɛpmaya nga kɔfey vagay, yah, ndaw masa ma wuzdakwara mey masa yah ma cɔndɛrwa ta slɛmay adaw fa Gazlavay. Ya fa lɔvkwara, Abɔraham na, ta key cek anda akwar ma kamara kaa na, daa ba. ⁴¹ Akwar na, akwar fa kam cek anda papakw akwar ma ka.»

A mbɛddamara a Yesu, a lɔvmar: «Ala na, bɔza hay nga ndaw mekele ba, Papa ala na, pal, ara Bay Gazlavay.»

⁴² Yesu a mbɛddatara, a lɔvtar: «Da Gazlavay ara Papakw akwar na, anɔa ka wudmaya la, maja ya sawa da cakay a, asaya, yah fede maja anɔa. Ya sawa na, nga ray adaw

ba, ama ara anġa ma slərđiwa. ⁴³ Kaa ka cəndamara meý adaw ba na, maja me? Ara maja akwar ma gəmam nġa jəkam sləmay fa meý adaw ba. ⁴⁴ Anda keđe, papakw akwar na, *Satan, bay-malula. Ka kam cek hay cəpa na, masa ma mbafar a papakw akwar a gway. Dəga daa mezley nġa bəla na, papakw akwar, bay-malula ha, fa kəđta ndəhay vagay. Asaya, a nġey daa cəved masa fara fara ba səlak, maja meý masa fara fara fa bawa da meý anġa daa ba. Membərzley na, aa da meý anġa, maja ara ndaw membərzley. Membərzley tabiya na, a sawa ta fa vəđa. ⁴⁵ Yah na, ya faa guzlkwar meý masa fara fara. Da ray nġene, ka təbmara meý adaw ba cənġa. ⁴⁶ Ndaw pal da wuzlah akwar ma gwa nġa ləvya ya ta key mebərey la na, wa? Kaa da ya faa guzlkwar meý masa fara fara na, ka təbmara ba, maja me? ⁴⁷ Ndaw ma ləvey Gazlavay ara Papaha na, a jəkfar sləmay fa Gazlavay a. Ama akwar na, bəza hay nġa Gazlavay ba. Ara maja nġene, akwar ma jəkam sləmay fa meý anġa ba may.»

Yesu a fəna Abəraham na, kwara?

⁴⁸ *Jəwif hay a mbəđdamara a Yesu, a ləvmar: «Ala maa guzlmaka, ya ləvam kah, ndaw *Samari nġa tede, kah ta malula da ray heyey na, ara anġa fara.» ⁴⁹ Yesu a mbəđdatara, a ləvtar: «Kay, malula da ray adaw daa ba, ama a key ya həslar ray a Papay. Akwar na, ka gəmam nġa həslmaya ray ba. ⁵⁰ Kaazla yah ta ray adaw, ya fa wuđey ndaw nġa həslya ray daa ba, ama ndaw pal daha, a həslya ray la, ara anġa ma da dəsla meý a. ⁵¹ Ya fa ləvkwar fara fara, ndaw ma cənya meý na, fa da məceý daa ba nġa sərmataw.»

⁵² Jəwif hay heyey a mbəđdamara, a ləvmar: «Wure keđe, ya ta sərmara cay, kah na, ta malula da ray fara, maja *Abəraham ta məceý sem, ndəhay ma təla meý nġa Gazlavay ta məcam sem may. Kaa kah na, ka ləvey: “Ndaw ma cənya meý na, fa da məceý daa ba nġa sərmataw” na, kwara? ⁵³ Abəraham, papan nġa papa ala hay ma!, ta məceý sem. Kaa kah na, ka fəna Abəraham a daw? Asaya, ndəhay ma təla meý nġa Gazlavay may ta məcam sem. Kaa ka pa ray akah na, nġa wa may wa?»

⁵⁴ Yesu a mbəđdatara, a ləvtar: «Da ya fa həsley ray na, mehəsley-ray adaw a, ara cek nġa tede. Ma həslya ray na, ara Papay, ndaw masa akwar ma ləvam: “Ara Gazlavay ala” heyey. ⁵⁵ Ama ka sərmara ndaw a ba, si yah pal ma səra.

Da ya løyey ya sēra ba na, ŋgene yah, ndaw membērzley anda akwar. Ama yah na, ya sēra ndaw aha, asaya, ya fa jōkfar slōmay, ya fa tēba mey anġa. ⁵⁶ Abēraham, papan ŋga papakw akwar, taa sōmey la ga maja a wulkey a hētar masawa adaw la a bēla. Ahaw, ta hētar la, taa sōmey la maja.» ⁵⁷ Da ray ŋgene, Jōwif hay aa guzlmā, a lōvmā: «Mevey akah a wusa kwakwar zlam ba kaa gway na, ka hētērwā Abēraham a na, dama?» ⁵⁸ Yesu a mbēddatara, a lōvtar: «Ya fa lōvkwar fara fara, dōga Abēraham ta yawa daa ba arān na, “Yah na, ara Yah.”» ⁵⁹ Da ray ŋgene, mahura hay ŋga Jōwif hay aa kwalam anġwa ŋgaa zekey Yesu a vagay. Ama Yesu ta', a bēy, a bawa la daa *Way-mekey-kwakwas ŋga Gazlavay.

9

Yesu a wurey dey ŋga ndaw-wulaf

¹ Pas pal daha, Yesu fa pōkey daa berney ŋga *Jeruzelem. Fetede, a hētēy ndaw daha. Ndaw aha, anġa wulaf dōga ŋga mayawa anġa. ² Gula hay ŋga Yesu aa cōfdamara Yesu a, a lōvmā: «Bay ala, ndaw kede a yawa, anġa wulaf na, maja me? Ara maja mebērey anġa daw? Da daa ba, maja mebērey ŋga ata papaha ta mamaha daw?»

³ Yesu a mbēddatara, a lōvtar: «Ara maja mebērey anġa ba, asaya, ara maja mebērey ŋga ata papaha ta mamaha ba may. Ndaw aha, anġa wulaf na, ara amba Gazlavay a ka slōra anġa da ray a. ⁴ Pas, aa daha dāgay kaa na, maaya na, ya kakwa slōra ŋga ndaw ma slōrdiwa, ba na, ya da hētēkwa har saba, maja tavād fa da key, kwa ndaw fa da gwa ŋga ka slōra ha daa saba. ⁵ Daa masa yah da bēla kede na, ara yah ma wadā bēla ha.»

⁶ Fa dēba ha, anġa maa guzley la anda kede na, tef! a tōfey meeslēb a hwayak, ta', a dēy hahay ta meeslēb e, a kwarara fa dey ŋga ndaw-wulaf heyey, ⁷ a lōvar: «Daw ta pērarawa dey daa wurak ŋga yam ŋga Silōwe.» (Silōwe he a wudēy ŋga lōvey «ndaw-meslērey.») Ta', ndaw-wulaf heyey a daw a pērarawa dey daa wurak a, a vōhwa na, a hētētar dey dēba.

⁸ Meseembew anġa hay ta ndōhay ma hētmar maamandaw fa rōkey heyey na, a hētmar anġa fa hētētar dey dēba, a lōvam: «Kede na, ara ndaw ma rōkey maamandaw fede heyey, ba diya?» ⁹ Ndōhay siya a lōvam: «Ahaw, ara anġa.» Siya hay may a lōvam: «Ara anġa ba, ara ndaw ma

lawa cōla.» Ndaw a, a lōvtar: «Ahaw, ara yah, ndaw-wulaf heyey.» ¹⁰ Ta', ndōhay a, aa cōfdamara, a lōvmar: «Kaa, dey akah a wurey kwara?» ¹¹ Ndaw a, a mbōddatara, a lōvtar: «Ndaw mezōley Yesu daha, ta', a dey hahay, a kwarayawa fa dey adaw, fa dōba ha, a lōvya nga daw nga pōrarawa dey daa wurak nga yam nga Silōwe. Da ray ngene, ta', ya daw. Masa yah ma pōrarawa cay na, ya hōtar dey dōba.» ¹² Ndōhay a, aa cōfdamara, a lōvam: «Ndaw aha, anga dama?» A lōvtar: «Ya sōra ba.»

¹³ Ta', a handamara ndaw masa Yesu ma wurara dey heyey fa *Fariza hay, ¹⁴ maja Yesu a dey hahay, a wurara dey nga ndaw a na, ta *pas memōskey-vaw. ¹⁵ Fa dōba ha, Fariza hay a, aa cōfdamara ndaw aha saya, a lōvmar: «Haa ka hōtar dey anda kedē na, ndaw aha, a kada na, kwara?» A lōvtar: «A kwarayawa hahay fa dey. Ta', ya pōra dey a, cay, ta', ya hōtar dey dōba.» ¹⁶ Ndōhay siya da wuzlah Fariza hay a, a kam yawa da wuzlah ata. Siya hay a lōvam: «Ndaw ma key cek anda kedē na, ara Gazlavay ma slōrdōrwa ba, maja a key slōra ta pas memōskey-vaw, ara cek masa kwakwas alōkwa ma tōka sem, ba diya?» Siya hay a lōvam saya: «Ndaw ta mebōrey da ray na, a gwa nga key maazla anda kedē daw?» Anda kedē, a kam yawa ga haa a wudkam dāy da wuzlah ata.

¹⁷ Fa dōba ha, ta', aa cōfdamara ndaw masa Yesu ma wurara dey heyey saya, a lōvmar: «Kaa kah may, ka da lōvey da ray ndaw ma wurkawa dey kedē na, kwara?» A mbōddatara, a lōvtar: «Yah na, ya lōvey ara *ndaw ma tōla mey nga Gazlavay.»

¹⁸⁻¹⁹ Ndaw aha a yawa anga wulaf, ama wure kedē dey anga ta wurey sem na, mahura hay nga *Jōwif hay a tōbmara mey a ba, si ata maa cōfdamata ata papaha ta mamaha la dagay. Ta', a zōlmatōrwa, a lōvmatar: «Kedē na, ara bōzey akwar daw? A yawa na, fara fara anga wulaf daw? Yaw, kaa wure kedē anga fa hōtar dey na, kwara?» ²⁰ A mbōddamatara, a lōvmatar: «Fara fara, ya sōrmara ara bōzey ala, a yawa na, anga wulaf. ²¹ Ama ya sōrmara cek ma key ta anga ba, asaya, ya sōrmara ndaw ma wurara dey kedē ba may. Cacōfdamara anga ray anga, ara bōzey saya daw? A gwa nga wuzdakwara.» ²² Ata papaha ta mamaha aa guzlam anda kedē na, maja fa zluram ta mahura hay nga Jōwif hay masa da wuzlah Fariza hay heyey. Mahura hay a, ta cōmam dāy ata sem, a lōvam kwa waawa ma pa Yesu la nga *ndaw masa Gazlavay ma wala nga lōhdata ndōhay na, ngene a badamara ndaw aha daa *way-mewuzey-mey nga

Gazlavay. ²³ Ara maja ṅgene, ata papaha ta mamaha heyey maa guzlam, ma ləvam: «Ara bəzey saba, cacəfdamara taw!»

²⁴ Fariza hay a, a zəlmərwa ndaw masa Yesu ma wurara dey heyey saya, a ləvmar: «Wuzdandara fara fara ta mezəley ṅga Gazlavay, maja ala na, ya sərmara ndaw ma wurkawa dey kefe, ara ndaw ta mebərey.» ²⁵ A mbəddatara, a ləvtar: «Ayəwa, da aa ta mebərey, da aa ta mebərey daa ba na, ya səra ba. Ama yah ma sərey na, cek pal. Zleezle na, yah wulaf, ama wure kefe, dey adaw ta wurey cay, ya fa hətar dey dəba.» ²⁶ Ndəhay a, a ləvmar saya: «Kaa ndaw aha na, a kaka me? A wurkawa dey a na, kwara?» ²⁷ A mbəddatara, a ləvtar: «Yah ma wuzdakwara cay, ama ka wudam ṅga jəkfamaya sləmay ba. Kaa ka wudam ya wuzdakwara saya na, kwara? Ayəwa, da ka wudam ṅga key gula anṅa hay may kwa?» ²⁸ Da ray ṅgene, a cəfdmara ndaw aha, a ləvam: «Hey! Gula anṅa na, kah! Ala na, gula hay ṅga *Mawiz. ²⁹ Ala na, ya sərmara Gazlavay taa guzlar la a Mawiz, ama ndaw kefe na, ya sərmara a sawa dama, ba.»

³⁰ Ndaw a, a mbəddatara, a ləvtar: «Aayaa! Akwar ta rəzmaya sem, maja ka sərmara ndaw a, a sawa na, dama ba. Kaa, anṅa na, ta wuryawa dey adaw sem! ³¹ Ya sərkwa ndəhay ta mebərey na, Gazlavay a jəkfatar sləmay ba. Ama da ndaw a nar ray a Gazlavay, a kar cek anda aa ma wufey na, ṅgene, a jəkfar sləmay la. ³² Dəga ṅga menjey aləkwa na, ya ta cənkwa ndaw ma wurey dey ṅga ndaw ma yawa, anṅa wulaf la daw? ³³ Da ndaw aha, ara Gazlavay ma slərdərwa ba na, a gwa ṅga key cek anda kefe ba.» ³⁴ A mbəddamara, a ləvmar: «Kah na, ndaw ta mebərey fara fara dəga ṅga mayawa akah, kaa ka wufey ṅgaa sərkadandar cek may daw?» Da ray ṅgene, ta', a badamara daa way-mewuzey-mey ṅga Gazlavay.

³⁵ Yesu a cənda na, ta badamara ndaw masa anṅa ma wurara dey heyey sem. Ta', a daw a həftar, a ləvar: «Kah ma pa *Bəz ṅga Ndaw la ṅga ndaw akah fara fara daw?» ³⁶ Ndaw a, a mbəddara, a ləvar: «Bəz ṅga Ndaw na, ara wa, Bay Mahura? Wuzdiwa cey, amba ya pa ṅga ndaw adaw fara fara na!» ³⁷ Yesu a ləvar: «Ka fa hətar ndaw aha ta dey akah, ara yah, ndaw maa guzka kefe!» ³⁸ Ndaw aha, a ləvar: «Ya paka ṅga ndaw adaw fara fara, Bay Mahura!» Ta', ndaw aha a regedey fa mey anṅa.

Yesu a wata wulaf hay ta ndəhay ta mebərey

³⁹ Yesu aa guzley ta mey-menjey dɔba, a lɔvey: «Ya sawa a bɔla keɔe ŋga wuzdatara a ndɔhay na, wulaf hay a da hɔtmar dey, ndɔhay ma hɔtmar dey may, a da tɔram wulaf hay.»

⁴⁰ Ndɔhay *Fariza hay siya masa da cakay a, a cɔndamara Yesu maa guzley anda keɔe na, ta', aa cɔfdamara, a lɔvmar: «Kaa, ala na, wulaf hay may daw?» ⁴¹ Yesu a mbɔɔdatara, lɔvtar: «Da akwar ndɔhay wulaf hay na, ŋgene fara fara akwar ta meɔɔrey daa ba. Ama wure keɔe, ka lɔvam akwar fa hɔtmar dey, maja ŋgene, ka da njam ta meɔɔrey da ray.»

10

Mey-menjey ta ndaw-mecɔkwer

¹ Yesu aa guzltar saya, a lɔvtar: «Ya fa lɔvkwara fara fara, ndaw ma mbɔzey a gezlen tɔban hay taa mey-mbew ba, ama a mbɔzey ta ray-way na, ndaw a ŋgene ara ndaw-mayal ma sla ɔay ŋga ndaw. ² Ama ndaw ma mbɔzey a gezlen tɔban hay taa mey-mbew na, ndaw a ŋgene ara mecɔkwer * ŋga tɔban hay a. ³ Ndaw ma jɔɔta tɔban hay ta tavaɔ a wurara mey-mbew ŋgada mecɔkwer e, asaya, tɔban aŋga hay, a cɔndamara ɔay aŋga. A zɔlta tɔban hay a pal pal ta mezɔley ata, a badatɔrwa a palah. ⁴ Masa ta badatɔrwa cɔpa cay na, mecɔkwer e, a kɔzley fa mey ata, tɔban hay a, a sɔpmar wurzay maja a sɔrmara ɔay aŋga.»

⁵ Anda keɔe, da ara ndaw mekele na, tɔban hay a fa da sɔpmara daa ba sɔlak, ama a da hwam ta ndaw aha maja a sɔrmara ɔay aŋga ba.»

⁶ Yesu aa guzltar ta mey-menjey anda keɔe, ama ndɔhay a cɔndamara mabara ŋga mey a ba.

Yesu a lɔvey, aŋga ndaw-mecɔkwer maaya

⁷ Yesu aa guzley saya, a lɔvey: «Ya fa lɔvkwara fara fara, yah na, mey-slam ŋga tɔban hay. ⁸ Ndɔhay tabiya ma samawa teesɔ da ray aɔaw † ma mbɔzam a gezlen tɔban hay a na, ara mayal hay ma bɔzla ndɔhay. Ama tɔban hay a, ta cɔnmatar mey daa ba. ⁹ Yah na, mey-slam. Da ndaw a mbɔzwa ta fa yah na, ya lɔhda. Ndaw a, a gwa a mbɔzey, a bawa ta mandɔrzay ba. Asaya a gwa ŋga hɔtey

9:39 9.39 5.22 **9:40** 9.40 Mt 15.14; 23.26 **9:41** 9.41 15.22 * **10:2** 10.2
mecɔkwer: Ara bay ŋga tɔban hay, a kɔzley fa mey ŋga tɔban aŋga hay. **10:4**
10.4 10.27; CWJ 14.4 **10:6** 10.6 16.25 † **10:8** 10.8 Ndɔhay tabiya ma samawa
teesɔ da ray aɔaw: Yesu aa guzley feɔe na, da ray ndɔhay ma tɔla mey ŋga
Gazlavay ba. Ama aa guzley da ray ndɔhay ma pamara ray ata ŋga Kɔriste,
ndaw ma da lɔhdata ndɔhay daa meɔɔrey. **10:8** 10.8 Jer 23.1-2; Ez 34.2-3

cek mezəmey. ¹⁰ Ndaw-mayal a sawa na, nga leley, nga kədey ndaw vagay, asaya, ngaa zədey ndaw. Ama yah na, ya ta sawa la a bəla amba ndəhay a hətam heter mendəvey ba ma fəna ma fəna.

¹¹ «Yah na, ndaw-mecəkwer maaya. Ndaw-mecəkwer maaya na, a vəlda ray anğa maja təban anğa hay. ¹² Ndaw ma səkərey maja dala daada gway na, ara ndaw-mecəkwer fara fara ba. Təban hay masa anğa ma səkərata na, ara nga anğa hay ba. Da ndaw aha a hətar gədey-ley fa sawa ngada fa təban hay a na, a hway, a mbəkdata. Anda kefe, gədey-ley a kərzey təban hay a, siya hay, a kwakwacam ray.

¹³ Ndaw ma səkərey maja dala, ma hway, ma mbəkdata təban hay na, aa fa wulkey fa təban hay a daa ba.

¹⁴ «Yah na, ndaw-mecəkwer maaya. Ya sərta təban adaw hay, təban adaw hay may a sərmaya, ¹⁵ anda Papay ma sərya, yah may, ya səra Papay. Ya vəlda ray adaw maja təban adaw hay. ¹⁶ Səkway nga təban adaw hay mekele daha †, ama ata da wuzlah təban hay kefe daa ba. Si ya handatərwa a wuzlah kefe hay may, amba a cəndamara dəy adaw. A da cəmam ta təban hay a kefe, a da njam daa slam a, dasi har nga ndaw-mecəkwer pal.

¹⁷ «Papay fa wudya maja ya da vəlda ray adaw nga məcey, amba fa dəba ha, ya sləkəfawa daa meməcey.

¹⁸ Kwa ndaw ma gwa ngaa zədda ray adaw na, daa ba, si yah ma təba nga vəlda ray adaw nga məcey. Ya gwa nga vəlda ray adaw nga məcey, asaya, ya gwa nga hətar aa slam a. Kefe na, ara cek masa Papay ma ləvyə nga key.»

¹⁹ Masa Yesu maa guzley la anda kefe na, *Jəwif hay a kam yawa da wuzlah ata saya. ²⁰ Ndəhay ga da wuzlah ata a ləvam: «Anğa ta cek da ray, anğa malula. Ka jəkam sləmay fa mey anğa na, maja me?» ²¹ Ndəhay siya a ləvam: «Ndaw ta cek da ray na, aa guzley anda kefe ba. Malula na, a gwa nga wurey dey nga ndaw-wulaf daw?»

Mey da ray Jəwif hay ma rəsmara Yesu saya

²² Fa mevey a, fa mevey a, *Jəwif hay fa kam gwagway nga sərfedey mewurey *Way-mekey-kwakwas nga Gazlavay da *Jeruzelem. Daa ngene, gwagway a ta wuswa

10:9 10.9 14.6; Ps 23.2; Ez 34.14 **10:11** 10.11 ndaw-mecəkwer maaya: Ps 23.1; Ez 34.11-16; Jer 23.3; Mt 18.12-14; Heb 13.20; CWJ 7.1; a vəlda ray anğa: 15.13; Rm 5.8; 1Jn 3.16 **10:12** 10.12 SNM 20.29 **10:14** 10.14 10.27; 2Tm 2.19
10:15 10.15 Mt 11.27 † **10:16** 10.16 Səkway nga təban adaw hay mekele daha: Yesu aa guzley da ray ndəhay masa Jəwif hay ba hay ma da təbmara mey anğa. **10:16** 10.16 11.52; Iz 56.8; Ez 34.23-24; 1Pi 2.25 **10:17** 10.17 3.35; 5.18 **10:18** 10.18 4.34 **10:19** 10.19 9.16 **10:20** 10.20 8.48

cay saya. Ara ta kiya memed. ²³ Yesu fa pøkey dasi balak masa ata ma zølmara Balak nga *Salamanjw daa Way-mekey-kwakwas nga Gazlavay a. ²⁴ Fetede, Jøwif hay a zølmar ray, a løvmar: «Ka fa høbndar ray kalah kaa na, haa ta vara? Da kah *Køriste, *ndaw masa Gazlavay ma wala nga løhdata ndøhay heyey na, kadandara la fara fara gway taw!»

²⁵ Yesu a mbødfdatara, a løvtar: «Ya ta kadakwara cay, ama akwar ma tømbara daa ba. Maazla hay tabiya masa yah ma kata na, ara ta gødan nga Papay. Maazla hay a fa wuzda mey da ray adaw. ²⁶ Ama akwar na, ka tømbara ba maja akwar da wuzlah ndøhay adaw hay ba. ²⁷ Ndøhay adaw hay a na, ata anda tøbaj hay, a sømbara day adaw, ya sørta pal pal. Da ya fa daw na, ata fa søpmaya wurzay.

²⁸ Ya da vøltar heter mendøvey ba, fa daa zødam daa ba nga sømataw. Kwa ndaw ma da gwa nga pøslata dasi har adaw na, daa ba. ²⁹ Papay, ndaw ma vødatiwa na, a fønta cek hay tabiya. Anda kede, kwa ndaw fa da gwa nga pøslata dasi har nga Papay na, daa ba may. ³⁰ Ala ta Papay na, sløra ala letek.»

³¹ Jøwif hay aa kwalam anjwa saya amba aa zakamara Yesu vagay. ³² Ama Yesu a mbødfdatara, a løvtar: «Ya ta key maazla hay maaya la ga fa mey akwar ta gødan nga Papay. Kaa ka daa zakamaya ta anjwa vagay na, maja maazla wura?» ³³ Jøwif hay a, a mbødfdamara, a løvmar: «Ya ta wudam ngaa zakamaka ta anjwa vagay maja maazla maaya masa kah ma ka na, daa ba. Ama ya wudam ngaa zakamaka na, maja kah ma cøfa Gazlavay. Asaya, kah na, ndaw-magødan nga tede gway na, kaa ka pa ray akah nga Gazlavay na, kwara?»

³⁴ Yesu a mbødfdatara, a løvtar: «Daa kwakwas akwar mawuzlalakaya, Gazlavay a løvey: “Akwar na, gazlavay hay.” ³⁵ Ya fa sørkwa mey mawuzlalakaya daa dèrewel nga Gazlavay na, meevøsey anjga daa ba, ba diya? Daa dèrewel nga Gazlavay a zølam gazlavay hay na, ndøhay masa Gazlavay maa guzltar. ³⁶ Yah na, Papay ta walaya la, ta slørdiwa la a bøla. Ya ta løvey la, yah na, Bøzey nga Gazlavay, ama ka løvam a key ya cøfa Gazlavay a. Kaa, kaa guzlam anda kede na, kwara? ³⁷ Da ya fa kata sløra hay masa Papay ma vødatiwa daa ba na, ngene akwar fa da tømbara mey adaw daa ba. ³⁸ Ama da ya fa kata, ka tømbara ba cønga na, tømbara mey adaw maja maazla

hay masa yah ma kata tarah taw, amba ka sɛrmara maaya maaya Papay aa ta yah, yah may, yah ta Papay.»

³⁹ Mahura hay nga Jɛwif hay a sɛpam cɛved nga kɛrzamara Yesu saya. Ama Yesu ta lɛhfatar sem.

⁴⁰ Yesu ta', a zlɛngɛy a dey-wayam nga Jurdeŋ saya, aa slam masa *Jan-Baptis ma zlar nga katar *baptem a ndɛhay da hwad a heyey. Ta', a njeɛ fetede dɛr ga. ⁴¹ Ndɛhay ga a samawa a cakay a, aa guzlam da ray a, a lɛvam: «Jan-Baptis na, ta key maazla kwa dey pal daa ba, ama mey masa aa maa guzlda da ray ndaw aha kedɛ na, ara mey fara fara, membɛrzley da hwad a daa ba.»

⁴² Anda kedɛ, ndɛhay ga fetede a pamara Yesu nga ndaw ata fara fara.

11

Yesu, a slɛkɛdɛrwa Lazar daa memɛceɛy

¹⁻² Ndaw da slala Betani daha mezɛley Lazar. Dam-mamaha hay cew daha, ara ata Marta ta *Mari. Mari a na, ara ngwas masa ma wucar bɛrdeɛy fa salay nga Bay Mahura Yesu, ma takwada ta enɛwɛc nga ray anɛa heyey. Pas pal daha, vaw a car a Lazar. ³ Dam-mamaha hay a, ta', a slɛram ndaw fa Yesu nga lɛvmar: «Bay adaw, jam akah masa kah ma wudɛa kalah heyey na, aa maaya daa ba.»

⁴ Yesu ma cɛnda mey a la na, ta', a lɛvtar a gula anɛa hay: «Macay nga Lazar a na, fa da kɛda daa ba. Ama a key amba a wuzdɛrwa gɛdaŋ nga Bay Gazlavay, asaya, amba ndɛhay a hɛslmaya ray, yah, Bɛzey anɛa.»

⁵ Yesu na, a wudɛa ata Marta ta Mari leŋ Lazar a kalah.

⁶ Ama, masa aa ma cɛnda Lazar aa daa macay na, ta nɛene he cɛpa, aa manjakaya daa slam aha cɛnɛa haa dɛr cew.

⁷ Fa dɛba ha, ta', a lɛvtar a gula anɛa hay: «Vɛhkwa aa hwayak nga *Jude.» ⁸ Gula anɛa hay a, a mbɛdɛdamara, a lɛvmar: «Kay! Bay ala, daa dɛr hay a kedɛ na, *Jɛwif hay siya fetede fa sɛpmaka ngaa zekey ta anɛwa vagay, ba diya? Kaa ka wudɛy ya vɛhkwa a Jude saya na, kwara?»

⁹ Yesu a lɛvtar: «Daa mevɛrndeɛy pal na, bɛrey kuraw a ray a cew, ba diya? Fara fara, da ndaw a pɛkey taa pas na, a hɛtar dey maaya maaya, a tɛdeɛy ba, maja slam fa wedɛy. ¹⁰ Yaw, da ndaw a pɛkey ta tavad na, a tɛdeɛy maja lɛvaŋ.» ¹¹ Masa anɛa maa guzley anda kedɛ na, ta', a lɛvtar saya: «Jam alɛkwa Lazar ta neɛy sem aa dɛr, ama ya daw la

nga sləkɔfadərwa.» ¹² Gula anɔa hay a, a mbəɔɔdamara, a ləvmar: «Bay ala, da a key a ney aa ɔar na, a sləkɔɔey la.» ¹³ Fara fara, Yesu a wuɔey nga ləvtar na, Lazar ta məcey sem, ama gula anɔa hay a, a cəndamara na, anda ara ɔar fara gway. ¹⁴ Ta', Yesu a kadatara mabara nga mey a ɔəba, a ləvtar: «Lazar ta məcey sem. ¹⁵ Ya faa səmey maja yah ma daw fa Lazar a daa ba araɔ. Wure keɔe amba ka təbmara mey aɔaw na, nakwa la fa vəɔa.»

¹⁶ Anda keɔe, *Tuma masa ata ma zəlmara Didim * a ləvtar a gula hay siya: «Nakwa la, aləkwa may, amba ya məckurwa bama ta Bay aləkwa.»

Mey da ray Yesu, ndaw ma vəley heter mendəvey ba

¹⁷ Masa Yesu ma wusey cay a Betani heyey na, a cənda Lazar ta key ɔar məfaɔ cay daa cəvay. ¹⁸⁻¹⁹ Ndəhay *Jəwif hay ga ta samawa la da *Jeruzelem aa vagay a, maja slala Betani ta Jeruzelem na, ata gweegwe, a key kəlemeeter maakar gway. A samawa nga camatar har nɔgada ata Marta ta *Mari maja vagay nga məlma ata ha.

²⁰ Masa Marta ma cənda Yesu fa sawa na, ta', a hway nga caɔərwa ray. Mari na, manjakaya da way. ²¹ Marta a ləvar a Yesu a: «Bay Mahura, da kah ma sawa la fiyaw na, anja məlma aɔaw fa da məcey daa ba. ²² Ta nɔgene he cəpa, ya səra, kwa wure keɔe cek masa kah maa cəɔɔey fa Gazlavay na, a vəɔdakawa la.» ²³ Ta', Yesu a mbəɔɔɔara, a ləvar: «Məlmakw a na, a sləkɔɔawa la daa meməcey.» ²⁴ Marta a ləvar: «Ahaw, ya səra na, a sləkɔɔawa la ta pas mendəvey nga bəla, masa ndəhay tabiya ma da sləkɔɔamawa daa meməcey.»

²⁵ Ta', Yesu a mbəɔɔɔara, a ləvar: «Yah, ray aɔaw na, ya sləkɔɔadətərwa ndəhay daa meməcey, asaya, ya vəltar heter mendəvey ba. Ndaw ma paya nga ndaw anɔa fara fara na, kwa a məcey na, a sləkɔɔawa la daa meməcey a. ²⁶ Asaya, ndaw ma hətey heter mendəvey ba ha maja aa ma paya nga ndaw anɔa fara fara na, fa da məcey daa ba nga sərmataw. Ka wulkey da ray mey a keɔe na, kwara? Ka təba mey a, aa mevel akah daw?» ²⁷ Marta a mbəɔɔɔara, a ləvar: «Ahaw, Bay Mahura, ya təba. Ya səra kah na, *ndaw masa Gazlavay ma wala nga ləhɔdata ndəhay. Kah na, Bəzey nga Gazlavay, ndaw masa aa ma ləvey a sawa la a bəla heyey.»

Yesu, a təway maja Lazar

11:11 11.11 Mt 9.24 * **11:16** 11.16 Didim: Ara ta mey Gərek anda mələvey «cek nga dey». **11:16** 11.16 Mk 14.31; Rm 6.8; Tuma: 20.24 **11:21** 11.21 11.32 **11:24** 11.24 5.29; 6.40, 54; Dan 12.2 **11:25** 11.25 5.21, 24; 8.51 **11:27** 11.27 1.34; 4.25

²⁸ Masa Marta maa guzley la anda keđe na, ta', a vøhey a way. Aa sèkar mey a *Mari, a løvar: «Bay Mahura ta sawa la, faa cødfaka.»

²⁹ Mari a cønda na, ta', a sløkdøy wure ñgene, a daw fa Yesu, ³⁰ maja Yesu a na, ta wusey a slala ha daa ba aran, ama anğa daa slam masa Marta ma cadərwa ray heyey cønğa. ³¹ *Jøwif hay ma samawa ñga camar har a Mari heyey, a nøkmara na, Mari ta sløkdawa sem da way, a bawa fiyaw. A wulkam na, Mari a, a daw a mey cøvay ñga tøwawa. Ta', a søpmar wurzay.

³² Mari a wusey aa slam masa Yesu aa da hwađ a. Anğa ma høtar Yesu a na, ta', a tøđey asi salay anğa, a løvar: «Bay Mahura, da kah ma sawa la fiyaw na, anja mølma adaw fa da møcey daa ba.» ³³ Yesu a nøka na, ata Mari ta Jøwif hay da cakay a heyey, fa tøwam. Da ray ñgene, mevel ñga Yesu a kuđferey, ³⁴ aa cødfata, a løvtar: «Ka jøhmara vagay a na, dama?» A mbøđdamara, a løvmar: «Bay Mahura, sawa, nøka taw!» ³⁵ Yesu ta', a tøway. ³⁶ Jøwif hay a, aa guzlam da wuzlah ata, a løvam: «Nøkmara ceý, fa tøway, a wuđa Lazar a kalah!» ³⁷ Ama siya hay da wuzlah ata a løvam: «Anğa ma wurara dey ñga ndaw-wulaf heyey na, kaa a gwa ñga tøka memøcey ñga Lazar a ba daw?»

Yesu, a sløkdadərwa Lazar daa memøcey

³⁸ Fa døba ha, mevel ñga Yesu a kuđferey saya, ta', a daw a mey cøvay heyey. Cøvay a na, ara vøged maavørkwakaya daa anğwa mahura, beeler da mey a. ³⁹ Yesu a løvtar: «Gødbalamara beeler da mey a.» Marta, dam-mamanj ñga ndaw mamøckaya ha, a mbøđdara a Yesu, a løvar: «Bay Mahura, a da zafandakwar, maja ta key đar møfad cay daa cøvay.» ⁴⁰ Yesu a mbøđdara, a løvar: «Ya ta løvka daa ba daw? Da kah ma tøba mey adaw la na, ka høtar gødanj ñga Gazlavay la.»

⁴¹ Fa døba ha, ta', a gødbalamara beeler heyey døba. Yesu a banğadfa dey a vadf, a løvey: «Papay, ya kaka suse maja kah ma jøkfaya slømay. ⁴² Ya søra ka fa jøkfaya slømay mandaw mandaw, ama yaa guzley anda keđe na, amba ndøhay da cakay adaw keđe a tøbmara ara kah ma slørdiwa a bøla.» ⁴³ Masa Yesu maa guzley la anda keđe na, ta', a wudey ta gødanj, a løvey: «Lazar, bawa!» ⁴⁴ Lazar ndaw mamøckaya heyey pat! a bawa, har ta salay majøwtakaya ta maslaga, yaw, dey anğa may masørtakaya ta zana. Yesu a løvtar a ndøhay: «Pøskamara, mbøkdamara ñga daw.»

A wudam nga kədmara Yesu vagay
(*Matiye 26.1-5; Mark 14.1, 2; Luk 22.1, 2*)

⁴⁵ *Jəwif hay tabiya ma samawa nga camar har a *Mari heyey ta hətmar maazla masa Yesu ma ka la. Siya hay da wuzlah ata a pamara Yesu nga ndaw ata fara fara. ⁴⁶ Ama ndəhay siya na, a diyam fa *Fariza hay, a kadamatara cek masa Yesu ma ka. ⁴⁷ Masa ata ma cəndamara cay na, ta', *bay-ray hay nga ndəhay ma ka kwakwas nga Gazlavay ta Fariza hay a zəlmətərwa mahura hay masa ma sla yawa nga Jəwif hay nga kusey da ray mey a, a ləvmatar: «Ndaw a fa key maazla kalah kaa na, ya da kakwa na, kwara? ⁴⁸ Da mbak! ya mbəkda kwa nga key maazla hay anda keđe na, ngene ndəhay tabiya a da təbmara mey anga. Anda keđe, mahura hay nga *Rawm a da samawa, a da pəlhamara Way-mekey-kwakwas aləkwa, asaya, a da paslamata ndəhay aləkwa hay.»

⁴⁹ Ndaw pal da wuzlah ata daha mezəley Kayif. Ara *ndaw mahura da ray ndəhay ma ka kwakwas nga Gazlavay ta mevey a ngene. Ta', aa guzltar, a ləvtar: «Akwar kaa na, kwa ka səram cek ba. ⁵⁰ Cəndamara, maaya na, ndaw pal a məcey maja aləkwa tabiya, da ray Rawma hay ma da samawa nga paslamandakwar tabiya daa hwayak aləkwa.»

⁵¹ Mey masa Kayif maa guzldatara ngene na, ara mewulkey anga ba. Ama maja ta mevey a ngene, anga mahura nga ndəhay ma ka kwakwas nga Gazlavay na, Gazlavay ta vələr gədan la ngaa guzley da ray cek ma da key: si Yesu a məcey maja Jəwif hay tabiya. ⁵² Yesu a məcey na, maja Jəwif hay daada ba, ama a məcey amba a cəmtar ray nga bəza hay nga Gazlavay masa maakwacatakaya ray da bəla cəpa ndav.

⁵³ Dəga ta pas ngene, a jəwmara mey ata nga kədey Yesu vagay. ⁵⁴ Ara maja ngene, Yesu a mbəkda mepəkey da wuzlah Jəwif hay. Ta', a daw aa slala fetede daha mezəley Efərayim gweegwe ta wuzlah-ley. A njam fetede ta gula anga hay.

⁵⁵ Daa ngene gwagway nga Jəwif hay mezəley «*Pak» gweegwe cay a wuswa. Ndəhay ga da slala hay mekele mekele a diyam a *Jeruzelem. A diyam na, dəga gwagway a aran amba a diyam vaw, nga tərey maaya fa mey nga Gazlavay nga key gwagway a. ⁵⁶ Ndəhay a, a səpmara Yesu. Masa ata daa *Way-mekey-kwakwas nga Gazlavay

na, aa guzlam da wuzlah ata, a ləvam: «Ndaw aha, a sawa la aa gwagway a daw? A sawa daa ba daw? Ka wulkam na, kwara?»⁵⁷ Aa guzlam anda kede na, maja bay-ray hay nga ndəhay ma ka kwakwas nga Gazlavay ta Fariza hay taa guzlmatar la, a ləvam: «Kwa waawa ma səra slam masa Yesu aa da hwaɗ a na, nga kada amba ma daw ma kərzarawa.»

12

*Mari a mbəɗar bəɗdey fa salay nga Yesu
(Matiye 26.6-13; Mark 14.3-9)*

¹ Mendərey ɗar maakwaw nga key gwagway nga *Pak. Daa ɲgene, Yesu a sləkɗey, a daw a Betani. Betani na, ara slala nga Lazar, ndaw masa Yesu ma sləkɗadərwa daa meməcey heyey. ² Masa aɲga ma wusey la fetede na, ta', a tamar ɗaf. Marta a həlra ɗaf a. Lazar aa da wuzlah ndəhay masa Yesu ma zəmamara ɗaf a bama. ³ *Mari a lawa reta nga liter nga bəɗdey mezəley «*nar», bəɗdey a, a həɗkey ba. Ta', a mbəɗara fa salay nga Yesu. Fa dəba ha, Mari a, a takwaɗa ta ɲgwec nga ray aɲga. Slam daa way a cəpa a zey bəɗdey a. ⁴ Da ray ɲgene, gula pal da wuzlah *gula hay nga Yesu mezəley Juda Iskariyawt, ndaw ma da vəlda Yesu a har masa-gəra aɲga hay heyey, aa guzley, a ləvey: ⁵ «Anja a vəldandakwara bəɗdey a na, ya həɗkadakwa dala ga *, ya vəldakwa dala ha ɲgada masa-viya hay, ba daw?» ⁶ Aa maa guzley anda ɲgene na, ta wulkey ta masa-viya hay fara fara daa ba, ama a wuɗey nga lala dala ha maja aɲga ndaw-mayal. Ara aɲga ma kərza dala nga ata Yesu ta gula aɲga hay, fa dəba ha, a lala dala ha ɲgada aɲga. ⁷ Maja ɲgene, Yesu aa guzlar, a ləvar: «Mbəkda ɲgwas aha ceɗ! A key kaa na, a ɗiya vaw aɗaw ɲgadaa cəvay cay. ⁸ Masa-viya hay na, akwar mandaw mandaw bama, ama yah na, ya fa da njeɗ da wuzlah akwar nga mandaw mandaw daa ba.»

A wuɗam nga kəɗmara Lazar vagay

⁹ *Jəwif hay ga a cəndamara na, Yesu sem a Betani. Da ray ɲgene, ta', a diyam a Betani a. A diyam na, maja Yesu daada ba, ama a wuɗam nga hətmərwa Lazar, ndaw masa Yesu ma sləkɗadərwa daa meməcey heyey, fa dey.

¹⁰ Daa ɲgene, *bay-ray hay nga ndəhay ma ka kwakwas

11:56 11.56 7.11 **12:1** 12.1-3 11.1-2 **12:2** 12.2 Lk 10.40 **12:3** 12.3
Lk 7.37-38 **12:4** 12.4 Juda Iskariyawt: 6.71; 13.2, 27; 18.2; Mt 10.4 * **12:5**
12.5 dala ga: Ta mey Gərek a ləvey «deniye» temere maakar. *Deniye* pal na, ara
mawurbay nga sləra nga ndaw fa meværndey. **12:5** 12.5 Iz 58.7; Mt 19.21;
Jak 2.15-16 **12:7** 12.7 19.40 **12:8** 12.8 Mew 15.11 **12:9** 12.9 11.43-44

nga Gazlavay a jəwam mey da wuzlah ata nga kədey Lazar vagay may. ¹¹ A jəwmara mey a na, maja ndəhay Jəwif hay ga fa təbmara mey ata daa saba. Ama a təbam na, mey nga Yesu dəba, maja aa ma sləkdəderwa Lazar a daa meməcey.

Yesu a mbəzey a Jeruzelem anda bay
(*Matiye 21.1-11; Mark 11.1-11; Luk 19.28-40*)

¹² Pepərek e, ndəhay ga ma diyam nga key gwagway nga *Pak da *Jeruzelem heyey, a cəndamara na, Yesu fa sawa a Jeruzelem e. ¹³ Maja ngene, a dəslmawa mey-har hay nga wudez hay anda gendew, a diyam nga cadamərwa ray ta Yesu a. A wudam ta gədan, a ləvam: «*Hawzana! Həlmakwa Bay Gazlavay! Anja Bay Gazlavay nga pəsar mey a Bay nga *Israyel hay, ndaw masa aa ma slərdərwa ta mezəley anja.»

¹⁴ Fetede, Yesu a hətey bəz-zəngwaw daha, ta', a təpey a ray a. Ara anda mawuzlalakaya daa dərəwel nga Gazlavay zleezle, ma ləvey:

¹⁵ «Ndəhay daa berney nga *Siyanw,

ka da zluram ba.

Nəkmara, bay akwar fa sawa da ray bəz-zəngwaw.»

¹⁶ Daa ngene, gula anja hay a cəndamara cek ma key da wuzlah ata ba. Ama, masa Yesu ma təpey la a vad nga njeý aa slam-mewedey na, a sərfadamara anja mey nga Gazlavay maa guzley la da ray a, asaya, ndəhay ta kamar cek la a Yesu anda mey a maa guzley.

¹⁷ Ndəhay tabiya masa da cakay Yesu daa masa aa ma zəla Lazar daa cəvay, ta aa ma sləkdəderwa daa meməcey heyey na, fa kadamara mey a ngada ndəhay siya. ¹⁸ Maja ngene, ndəhay ga ma cəndamara mey a na, a samawa nga cadamara ray ta Yesu. A samawa na, maja ata ma cəndamara anja ma ka maazla ha. ¹⁹ *Fariza hay aa guzlam da wuzlah ata, a ləvam: «Ndaw a kede na, ya gwakwa a ray a ba! Ehe, nəkmara, ndəhay tabiya fa səpmar wurzay cənga!»

Ndəhay Gərek hay a səpmara Yesu

²⁰ Ndəhay ma diyam a *Jeruzelem nga həlmey Bay Gazlavay daa gwagway nga *Pak na, Gərek hay da wuzlah ata daha may. ²¹ Gərek hay a, a diyam a cakay *Fəlep, ndaw ma sawa da Betsayda daa hwayak nga *Galile. Ta', aa guzmar, a ləvmar: «Bay ala, ya wudam nga cey ray ta Yesu.»

²² Følep a slækðey, a daw aa guzlar a *Andøre. Fa døba ha, ta', a diyam cewete, aa guzlmara a Yesu. ²³ Yesu a mbødfdatara, a løvtar: «Pas a ta wuswa cay amba Gazlavay a wuzdərwa gədan adaw, yah, *Bøz nga Ndaw. ²⁴ Ya fa løvkwar fara fara, da hulfad nga daw a kəzley a hwayak, ta pəshey daa ba na, a da njeý salalay a kəne. Ama da ta pəshey sem aa hwiýak na, a pəcwa, a gəley, a key ray mahura. ²⁵ Anda keðe, kwa waawa ma wuða heter anga na, a key ngeñe, aa zəfda. Ama kwa waawa ma wuða heter anga ba da bəla keðe na, a key ngeñe, a bəda nga hətəy heter mēndəvey ba. ²⁶ Kwa waawa ma wuðey nga kaya sləra na, si a səpya. Aa slam masa yah ma da daw na, ndaw ma ka sləra adaw a sawa la asi adaw. Papay a da həslar ray ngada ndaw ma ka sləra adaw a.»

Yesu aa guzley da ray mēməcey anga

²⁷ «Wure keðe, ray adaw fa həbey. Ya daa guzley na, ya ləvey me? Ya fa da ləvey, Papay, ləhdəya daa banay ma da sawa a ray adaw wure keðe na, daa ba, maja ya sawa a bəla na, nga bəsa banay a keðe. ²⁸ Papay, wuzdərwa gədan akah amba ndəhay a həslmaka ray.» Maja ngeñe, dāy a cənwa da gazlavay da vad, a ləvey: «Yah ta wuzdərwa gədan adaw cay, ama ya wuzdərwa la saya.» ²⁹ Ndəhay makustakaya fetede ma cəndamara dāy a na, aa guzlam, a ləvam: «Ara var maa bəcey.» Ndəhay siya a ləvam: «Ara maslan nga Gazlavay da vad maa guzlar.»

³⁰ Ama Yesu aa guzltar, a løvtar: «Day a, aa guzlwa na, ngada yah ba, ama ngada akwar. ³¹ Wure keðe, pas a ta wuswa cay amba Gazlavay a katar sariya a ndəhay da bəla. Wure keðe, pas a ta wuswa cay nga bəley bay-malula, ndaw ma wa bəla keðe. ³² Ama yah, da ta banğadamaya cay fa hwadam mazlanğalakaya a vad nga mēcey na, ya da ngəlta ndəhay tabiya a cakay adaw.» ³³ Yesu aa guzley anda keðe na, a wuðey a wuzda a da mēcey na, kwara.

³⁴ Zagaba tabiya a mbødfdamara, a ləvmara: «Ya ta janğamara la daa dərəwel nga kwakwas ala, a ləvey *Kəriste, *ndaw masa Gazlavay ma wala nga ləhdata ndəhay na, a da njeý nga sərmataw, ba diya? Kaa kah, ka ləvey a da banğadamara *Bøz nga Ndaw a vad na, kwara? Bøz nga Ndaw a na, ara wa?»

³⁵ Yesu a mbødfdatara, a løvtar: «Mewedəy aa da cakay akwar, a da njeý nekəðey gway. Daa masa mewedəy a, aa

12:23 12.23 2.4; 12.16 **12:24** 12.24-25 Mt 10.39; 16.24-25; 1Kwr 15.36 **12:26** 12.26 14.3; 17.24 **12:27** 12.27 12.23; Mt 26.38 **12:28** 12.28 17.1; Mt 3.17; 17.5 **12:31** 12.31 5.22; 14.30; 16.11 **12:32** 12.32-34 3.14 **12:33** 12.33 18.32 **12:34** 12.34 Ps 89.37; 110.4; Ez 37.25; Jan 12.23; 3.14

da cakay akwar keɗe na, pɔkam da hwaɗ a, amba lɔvan a hɔɓfakwar saba. Da ndaw fa pɔkey daa lɔvan na, a sɛra slam masa aa ma da daw a hwaɗ a ba. ³⁶ Daa masa mewedeɓey a, aa da cakay akwar keɗe na, si ka tɔbmara aa mevel akwar, amba ka tɔram nga ndɔhay nga mewedeɓey.» Masa Yesu maa guzɓar la anda keɗe na, ta', a ngɔchey dɔren ta ata, a beɓ.

Mey nga Izay da ray Jɔwif hay ma tɔbmara meɓ nga Yesu ba

³⁷ Yesu ta key maazla hay la ga fa meɓ nga *Jɔwif hay, ama ta ngene he cɔpa, Jɔwif hay a ta pamara Yesu nga ndaw ata fara fara daa ba cɔnga. ³⁸ Anda keɗe, meɓ masa *Izay, *ndaw ma tɔla meɓ nga Gazlavay, maa guzɓey zleezle da ray Yesu heyey na, ta key la. Izay a, a lɔvey:

«Bay Gazlavay, ma tɔba meɓ akah
masa ala ma kadamara na, wa?
Bay Gazlavay, ka wuzdɔrwa gɔɗan akah na,
ngada wa hay wa?»

³⁹ Yaw, Jɔwif hay a ta gwamara nga tɔbmara meɓ nga Yesu a daa ba. Ara anda Izay a maa guzɓey zleezle saya, a lɔvey:

⁴⁰ «Gazlavay ta wulfatara dey ata sem
amba a hɔtmar dey saba.

Ta rɔzɓta sem
amba a sɔrmara lenɓesɓ saba.

Anda keɗe, fa da mbɔdam dey ngada fa Gazlavay
amba ya mbɔldata na, daa ba.»

⁴¹ Izay ma lɔvey anda keɗe na, maja aa ma hɔtar gɔɗan nga Yesu, ta', aa guzɓey da ray Yesu a.

⁴² Ta ngene he cɔpa na, mahura hay nga Jɔwif hay ga ta pamara Yesu la nga ndaw ata fara fara cɔnga, ama a wuzdamɔrwa a palah ba. A zɓuram ta *Fariza hay maja a da badamata daa *way-mewuzey-mey nga Gazlavay.

⁴³ Anda keɗe, a wuzdam na, ndɔhay ngaa hɔmdamata da ray Gazlavay ma daa hɔmdata jak.

Mey nga Yesu a kɔrzata ndɔhay ta sariya

⁴⁴ Yesu aa guzɓey ta gɔɗan, a lɔvey: «Ndaw ma paya nga ndaw anɓa fara fara na, a key ngene, a peɓ yah taava aɗaw ba, ama a pa ndaw ma slɔrɗiwa nga ndaw anɓa fara fara may. ⁴⁵ Yaw, ndaw ma hɔtya la na, ta hɔtar ndaw ma slɔrɗiwa sem may. ⁴⁶ Yah na, ndaw ma wada bɔla. Ya ta sawa la amba kwa waawa ma paya nga ndaw anɓa fara fara

12:35 12.35-36 7.33; 8.12 **12:36** 12.36 5.13 **12:37** 12.37 16.9 **12:38**
12.38 Iz 53.1; Rm 10.16 **12:40** 12.40 Iz 6.10 **12:41** 12.41 Iz 6.1-3 **12:42**
12.42 2.23; 9.22 **12:43** 12.43 7.18 **12:44** 12.44 5.24 **12:45** 12.45 14.9;
5.18

na, a njeý daa lõvarj saba. ⁴⁷ Da ndaw a cõnda mey adaw, a pafar lenjesl ba na, ñgene ara yah ma da kar sariya ñгаа zõdda ba. Maja yah na, yah ma sawa a bõla ñga katar sariya a ndõhay ñгаа zõdam daa ba. Ama ya sawa na, amba ndõhay da bõla a lõham daa mebõrey. ⁴⁸ Ndaw ma wudya ba, asaya, ndaw ma tõba mey adaw ba na, cek ma da kar sariya na, daha: ara mey adaw ma da kõrza ta sariya ta pas mendõvey ñga bõla. ⁴⁹ Mey masa yah ma kada na, ara mey adaw ba, ama ara Papay, ndaw ma slõrdiwa, ma balayawa mey a amba yaa guzlda, ya wuzda a ndõhay. ⁵⁰ Ahaw, ya sõra na, mey anja a da võlkwar heter mendõvey ba. Anda kede, mey masa yah ma kada na, ya kada anda Papay ma lõvya.»

13

Yesu a põtara salay ñga gula anja hay

¹ Masa gwayway ñga *Pak anda mandaw na, Yesu a sõra pas ñga memõcey anja ta wuswa cay, a da mbõkda bõla kede, a da võhey ñgada fa Papaha. Yesu na, ta wudta ndõhay anja hay da bõla sem. Ta pas ñgene aa fa wuzda na, a wudta kalah cõnja.

² Taa kwad a ñgene, Yesu a zõmam daf ta gula anja hay. Anja *Satanj, bay-malula, ta bata Juda, bõzey ñga *Simanjw Iskariyawt cay, amba Juda ha a võlda Yesu a har masa-gõra anja hay. ³ Yesu na, fa sõra Gazlavay Papanj ta võldara gõdanj sem ñga wey da ray cek hay cõpa. A sõra anja na, a sawa ta fa Gazlavay. Asaya, a sõra pas pal a da võhey fa Gazlavay a, a vad. ⁴ Da ray ñgene, Yesu ta', a mbõkda mezõmey daf, a slõkdfey a cõkwa zana masa mahura fa vaw, ta', a jõwey zana mekele aa labay. ⁵ Cay, a kawa yam aa taasa, a põtara salay ñga gula anja hay, a takwadatara yam a ta zana majõwkaya daa labay heyey.

⁶ Yesu a wusey ta'! fa Simanjw *Piyer na, Simanjw Piyer e, a lõvar: «Bay Mahura, kah ta ray akah, amba ka põryawa salay daw?» ⁷ Yesu a mbõddara, a lõvar: «Cek masa yah ma ka kede na, ka sõra mey da ray a wure kede ba aranj. Ama ñgada fa mey nekõdfey na, ka sõra mey da ray a la.» ⁸ Piyer a mbõddara saya, a lõvar: «Kay! Kah ta ray akah, ka põryawa salay ba!» Yesu a lõvar: «Da ya ta põrkawa salay daa ba na, kwa ka fa da hõtey cek fa yah daa ba may.» ⁹ Simanjw Piyer a mbõddara, a lõvar: «Bay Mahura, da anda kede na, ka da põrya na, salay daada ba, ama põrtiwa har

hay ta ray cəpa may.» ¹⁰ Yesu a ləvar saya: «Da ndaw ma pərey sem na, a wufey nga pərey vaw tabiya saba, si salay gway, maja dəlay fa vəfa daa saba, ba diya? Akwar gula adaw hay na, akwar tabiya mapərtakaya ama si ndaw pal manda-pərey.» ¹¹ Yesu maa guzley anda kefe na, a səra ndaw ma da vəlda a har masa-gəra anğa hay. Ara maja nğene, anğa ma ləvey: «Akwar cəpa mapərtakaya ba.»

¹² Masa Yesu ma pərtara salay cay na, ta', a kəzla zana anğa mahura heyey fa vaw, a vəhey aa slam anğa mezəmey daf. Ta', aa guzlar a gula anğa hay a, a ləvtar: «Akwar ta sərmara cek masa yah ma kakwara kefe la daw?»

¹³ Nəka, akwar fa zəlmaya "Bay Mahura", asaya, "ndaw maa sərkadakwar". Ahaw, akwar maa guzlam la ara anğa fara, yah na, ndaw maa sərkadakwar, asaya, yah Bay akwar Mahura. ¹⁴ Anda kefe, da yah Bay akwar Mahura, asaya, da yah ndaw maa sərkadakwar ma pərkwara salay na, si akwar may ka pəram salay nga ndaw a, nga ndaw a da wuzlah akwar may. ¹⁵ Yah ma ka anda kefe na, amba ka kamara kəne may. ¹⁶ Ya fa ləvkwar fara fara, ndaw ma ka sləra nga ndaw na, a fəna bay nga sləra ha ba səlak, asaya, ndaw-meslərey na, a fəna ndaw ma slərda ba səlak.

¹⁷ Wure kefe akwar ma sərmara cay, da akwar fa kamara anda kefe na, maaya nga Gazlavay a sawa la a ray akwar.

¹⁸ «Yah maa guzley anda kefe na, da ray akwar cəpa ba. Ahaw, ndəhay masa yah ma walata na, ya səra mewulkey ata tabiya. Ama maaya na, mey mawuzlalakaya daa dərəwel nga Gazlavay zleezle a key fara. Mey a, a ləvey: "Ndaw masa yah ma zəmam daf cew e daa vəley pal ta tərey sem nga masa-gəra adaw." ¹⁹ Ya kadakwara mey a la teesəf dəga wure kefe amba da cek aha ma da key nğene ta wuswa cay na, ka sərmara "Yah na, ara Yah". ²⁰ Ya fa ləvkwar fara fara, ndaw ma təba ndaw masa yah ma slərda na, a key nğene, a təbey na, yah, ray adaw. Yaw, da ndaw ta təbya la na, a key nğene, a təbey ndaw ma slərđiwa.»

Juda a da vəlda Yesu a har masa-gəra hay

(Matiye 26.20-25; Mark 14.17-21; Luk 22.21-23)

²¹ Masa Yesu maa guzley la anda kefe na, ray anğa a həbey, a ləvey: «Ya fa ləvkwar fara fara, ndaw pal da wuzlah akwar a vəldaya la a har masa-gəra adaw hay nga kədmaya vagay.» ²² Gula hay nga Yesu a nəkam vaw aa dey aa dey, ama kwa ta sərmara ndaw masa Yesu maa guzley

13:10 13.10 15.3 **13:11** 13.11 6.64, 70-71 **13:12** 13.12-14 Mt 20.24-28; 23.8-12; Lk 22.27; 1Tm 5.10 **13:15** 13.15 1Jn 2.6; Fəl 2.5; 1Pi 2.21 **13:16** 13.16 15.20; Mt 10.24 **13:17** 13.17 Jak 1.25 **13:18** 13.18 Ps 41.10; Jan 17.12
13:19 13.19 8.24; 14.29; 16.4 **13:20** 13.20 Mt 10.40

da ray a na, daa ba. ²³ Gula pal dasi ata manjakaya da cakay Yesu a, gula ha ara gula masa Yesu ma wuɗa kalah.

²⁴ *Simanɗw *Piyer a kəbɗar dey a gula ha amba gula ha aa cəfɗa Yesu aa guzley na, da ray wa. ²⁵ Ta', gula ha a gənsley ɗgada fa Yesu, aa cəfɗa, a ləvar: «Bay Mahura, ma da vɛldaka a har masa-gəra akah hay na, wa?» ²⁶ Yesu a mbəddara, a ləvar: «Amba ya cey ɗaf, ya key lar fa vɛɗa, ya tɛldara a ndaw. Ndaw a ɗgene na, ara ndaw ma da vɛldaya a har masa-gəra aɗaw hay.» Yesu a cey ɗaf dɛɓa, a key lar fa vɛɗa, ta', a tɛldara a Juda, bəzey ɗga Simanɗw Iskariyawt. ²⁷ Dəga daa masa Juda ha ma tɛɓa ɗaf da har Yesu a ɗgene na, wure wure ɗgene *Satanɗ, bay-malula, a mbəzey aa mevel ɗga Juda ha. Cay, Yesu ta', aa guzlar dɛɓa, a ləvar: «Cek masa kah ma wuɗey ɗga ka na, ka la fiyaw gway taw!»

²⁸ Kwa ndaw pal dasi gula hay a ma sɛra Yesu aa guzlar anda ɗgene maja me na, daa ba. ²⁹ Gula hay siya a wulkam na, Yesu a wuɗey ɗga slərda Juda ha ɗga hɛɗkawa cek hay ɗga gwagway, da daa ba, aa cəfɗa ɗga vɛltar cek a masa-viya hay maja ara aɗga ma kərza dala ata. ³⁰ Masa Juda ma tɛɓa ɗaf da har Yesu heyey la na, ta', a bawa fiyaw aa ambaw. Daa ɗgene, tavaɗ ta key cay.

Mey da ray mewey mawiya

³¹ Masa Juda ma bawa sem aa ambaw heyey na, Yesu aa guzley a ləvey: «Dəga wure keɗe, gɛɗanɗ aɗaw, yah, *Bəz ɗga Ndaw, fa wuzwa amba ndəhay a həslmaya ray. Asaya, yah, Bəz ɗga Ndaw, ya fa wuzda gɛɗanɗ ɗga Gazlavay amba ndəhay a həslmar ray. ³² [Maja ya fa wuzda gɛɗanɗ ɗga Gazlavay a ndəhay na,] Gazlavay a da wuzda gɛɗanɗ aɗaw a ndəhay may. Gweegwe cay a wuzdərwa gɛɗanɗ a. ³³ Bəz aɗaw hay, ya fa da njeɗ ta akwar ga daa saba. Ka da sɛpmaya, ama ya ləvkwar anda yah ma ləvtar a mahura hay ɗga *Jəwif hay heyey: Aa slam masa yah ma da daw na, akwar fa da gwamara ɗga diyam a hwaɗ a daa ba.

³⁴ Ehe, ya vɛlkwar *mewey mawiya: Wudam vaw. Maaya na, ka wudam vaw anda yah ma wudkwar keɗe. ³⁵ Da masa akwar fa wudam vaw na, ndəhay tabiya a sɛmra la akwar gula aɗaw hay.»

Mey da ray ata Piyer ta Yesu

(Matiye 26.31-35; Mark 14.27-31; Luk 22.31-34)

13:23 13.23 19.26; 20.2; 21.7, 20 **13:27** 13.27 13.2 **13:29** 13.29 12.6 **13:31** 13.31-32 17.1 **13:33** 13.33 8.14 **13:34** 13.34 15.12, 17; 1Jɗ 2.7-8; 3.11, 23; 4.11; 2Jɗ 5-6 **13:35** 13.35 1Jɗ 3.14

36 *Simanjw *Piyer aa cəfda Yesu, a ləvar: «Bay Mahura, ka da daw na, ama?» Yesu a mbəddara, a ləvar: «Aa slam masa yah ma da daw kede na, ka gwa n̄ga səpya wure kede ba aranj, ama ka səpya la fa dəba ha.» 37 Piyer a ləvar: «Bay Mahura, ya gwa n̄ga səpka wure kede ba na, maja me? Si ya məcey maja akah.» 38 Yesu a mbəddara, a ləvar: «Kah na, ka gwa n̄ga məcey maja yah fara daw? Ya fa ləvka fara fara, wuskwaa gwagwalak a da cey day na, ka ta ləvey cay dey maakar, ka sərya ba, ka sərya ba.»

14

Mey da ray cəved ma daw ngada fa Gazlavay Papay

1 Yesu aa guzltar a gula an̄ga hay, a ləvtar: «Ka daa ləkam saba. Pamara Gazlavay n̄ga ndaw akwar fara fara, asaya, pamaya n̄ga ndaw akwar fara fara may. 2 Fa Papay Bay Gazlavay da vad na, slam hay n̄ga n̄jey suha daha. Ara maja n̄gene, yah maa guzlkwar, ya ləvkwar: “Ya da daw n̄ga diykwat slam da vad.” 3 Masa yah ma daw cay n̄ga diykwara slam aha na, ya vəhwa la n̄ga n̄gəlkwat amba ka njam aa slam masa yah ma da n̄jey a hwad a may. 4 Slam masa yah ma da daw a hwad a na, ka sərmara cəved e.»

5 *Tuma aa cəfda, a ləvar: «Bay Mahura, slam masa kah ma da daw a hwad a na, ya sərmara ba. Kaa wara ya da sərmara cəved e na, kwara?» 6 Yesu a mbəddara, a ləvar: «Yah na, cəved ma handata ndəhay n̄gada fa Gazlavay. Yah na, ndaw ma wuzda mey fara fara da ray Gazlavay. Asaya, yah na, ndaw ma vəltar heter mendəvey ba a ndəhay. Da ndaw a wud̄ey n̄ga daw fa Papay na, si a sawa ta fa yah. 7 Da ka sərmaya na, ka sərmara Papay la may. Dəga tasana, ka sərmara Papay a, akwar ta hətmar la ta dey akwar.»

8 *Fəlep a ləvar: «Bay Mahura, wuzdandara Papakw a na, cay gway taw!» 9 Yesu a mbəddara, a ləvar: «Dəga zleezle aləkwa bama kaa na, ka sərya ba cəngga daw, Fəlep? Ndaw ma hət̄ya la na, a key n̄gene, a hət̄ey Papay a gway. Kaa ka ləvyā wuzdandara Papay a na, maja me dəba me? 10 Yah ta Papay, asaya, Papay aa ta yah na, ka səra ba daw? Mey cəpa masa yah maa guzldakwara tabiya kede na, a sawa ta fa yah ba. Ama ara Papay masa aa ta yah heyey ma ka sləra an̄ga. 11 Təbmara mey adaw masa yah ma ləvkwar, yah ta Papay, Papay may aa ta yah. Da ka təbmara maja yah maa guzlkwar kede ba na, təbmara maja maazla hay masa yah ma kata tarah taw! 12 Ya fa ləvkwar fara fara, ndaw ma

paya nga ndaw anga fara fara na, a kata maazla hay masa yah ma kata la may. A da key maazla hay mahura ma fəna, maja yah na, ya da vəhey * a cakay Papay a vad. ¹³ Cek hay tabiya masa akwar maa cəfdamara nga key ta mezəley adaw † na, ya kakwara la amba yah, Bəz nga Ndaw, ya wuzdatara gədan nga Papay a ndəhay amba a həslmar ray. ¹⁴ Yaw, da akwar faa cəfdafamaya cek nga key ta mezəley adaw na, ya kakwara cek aha la.»

Mey da ray Mesəfney nga Gazlavay ma da sawa

¹⁵ Yesu aa guzltar a gula anga hay saya, a ləvtar: «Da akwar fa wudmaya na, si ka namar ray a *mewey adaw.

¹⁶ Ya dərər dangay la a Papay amba a slərkwər ndaw mekele nga jənkwar. Ndaw a, a da njeý ta akwar nga sərmataw. ¹⁷ Ara Mesəfney ma wuzda meý masa fara fara da ray Gazlavay. Ndəhay da bəla ‡ a gwamara nga təbmara daa ba, maja a hətmər ta dey ata daa ba, asaya, a sərmara ba. Ama akwar na, ka sərmara, maja anga da wuzlah akwar, asaya, aa daa akwar.

¹⁸ «Ya fa da mbəkdakwar taava akwar anda matawak hay na, daa ba. Ya vəhwa la a wuzlah akwar. ¹⁹ Menjeý nekəfey fedə, ndəhay da bəla kedə fa da hətmaya daa saba. Ama akwar na, ka hətmaya la maja yah ta dey. Akwar may, ka da njam ta dey anda yah. ²⁰ Da pas a ta wuswa cay na, ka sərmara la, Papay aa ta yah, akwar ta yah, yah may, yah ta akwar.

²¹ «Ndaw ma təba mewey adaw, asaya, ma nar ray na, ndaw a ngea a wudya. Nəka, Papay na, a wudə ndaw ma wudya. Yah may, ya wudə ndaw masa ma wudya, ya wuzar vaw ngada anga.»

²² Ta', Jud aa cəfda, a ləvar: «Bay Mahura, ka da wuzey vaw na, ngada ala gway, ama ngada ndəhay da bəla cəpa ba na, maja me?» Maa cəfda ha na, ara Jud mekele, ba na, ara Juda Iskariyawt ba. ²³ Yesu a mbəddara, a ləvar: «Ndaw ma wudya na, a cənya meý la may. Anda kedə, Papay a wudə la may. Ala ta Papay ya da diyam fa ndaw

* **14:12** 14.12 ya da vəhey: Yesu a daw fa Bay Gazlavay a vad, a da slərwa Mesəfney nga Gazlavay a ray ndəhay anga hay. Asaya, a kar ambahw a Gazlavay maja ndəhay anga hay amba a hətam gədan nga key sləra nga Gazlavay. Nəka Jan 14.16-17. † **14:13** 14.13 ta mezəley adaw: Anda meləvey, medərey-dangay ta gədan masa Yesu ma vəldara, asaya, aa cəfdey cek masa ma mbafar a Yesu. **14:13** 14.13 15.16; 17.1 **14:15** 14.15 14.21, 23; 15.10; 1Jn 5.3; 2Jn 6 **14:16** 14.16 7.39; 14.26; 15.26; 16.7, 13; 20.22; 1Jn 3.24; 4.13; SNM 1.4; 2.4 ‡ **14:17** 14.17 Ndəhay da bəla: Ndəhay masa ma wulkam da ray Gazlavay ba, a səpam na, si cek hay da bəla gway. Nəka Jan 15.18-25. **14:17** 14.17 1Kw 2.10-16 **14:19** 14.19 16.16; 8.14 **14:20** 14.20 5.18 **14:21** 14.21 14.15

aha, ya da njam daa slam a. ²⁴ Ndaw ma wudya ba na, a cɔnya mey daa ba may. Mey masa yah maa guzlda keɗe na, ara mey adaw ba, ama ara mey nga Papay, ndaw ma slərɗiwa.

²⁵ «Ya fa kadakwara cek hay a tabiya, daa masa yah da wuzlah akwar keɗe ɗagay. ²⁶ Cay na, Papay a slərkwar Mesəfney anga la ta mezəley adaw. Ara Mesəfney a ma da jɔnkwar. A daa sərkaɗakwara cek hay tabiya. Asaya, a da sərfaɗakwara mey hay cɔpa masa yah ma kadakwara.

²⁷ «Ya mbəkɗakwar daa zazay, njam ta zazay adaw. Zazay adaw a na, anga wal ta zazay nga ndəhay da bəla. Anda keɗe, ka daa ləkam ba, ka da zluram ba. ²⁸ Akwar ma cəndamara la, yah ma ləvey: “Ya daw la fa Papay, fa dɔba ha, ya vəhwa la fa akwar, ba diya?” Da ka wudmaya na, ngene, kaa sɔmam la da ray yah ma da daw fa Papay a, maja Papay na, aa mahura da ray adaw. ²⁹ Ya kadakwara mey a la teesɗ ɗəga wure keɗe amba da cek aha ma da key ngene ta wuswa cay na, ka tɔbmara mey adaw ma fəna.

³⁰ Kwa ya fa daa guzlkwar ga daa saba, maja bay-malula, ndaw ma wa bəla keɗe, fa sawa. Ama kwa fa da gwa nga kaya cek daa ba səlak. ³¹ Ama a sawa na, amba ndəhay da bəla a sərmara ya fa wuda Papay, asaya, ya fa kata cek hay tabiya anda anga ma ləvyə nga kata. Yaw, lacam! Nakwa la!»

15

Yesu a ləvey anga wudez ma yey babəza maaya

¹ Yesu aa guzltar a gula anga hay, a ləvtar: «Yah na, wudez * masa fara fara ma yey babəza maaya. Bay nga wudez e na, ara Papay. ² Mey-har adaw hay cɔpa masa ma yam babəza ba na, Papay a ɗəslta. Ama masa ma yam babəza na, aa kəlhata amba a yam babəza ma fəna.

³ Mey masa yah ma wuzɗakwara keɗe na, ta pərkwara mevel akwar sem. ⁴ Njam macəmkaya ta yah anda yah manjakaya macəmkaya ta akwar. Mey-har nga wudez maɗəslkaya sem na, a gwa nga yey babəza saya daw? Anga

14:23 14.23 CWJ 3.20 **14:24** 14.24 7.16 **14:26** 14.26 14.16 **14:27** 14.27 16.33; 20.19, 21 **14:28** 14.28 8.14 **14:29** 14.29 13.19 **14:30** 14.30 12.31

14:31 14.31 15.10; Mt 26.46 * **15:1** 15.1 wudez masa fara fara ma yey babəza maaya: Wudez e na, a zəlmara ta mey Pəлта «inabohi». Zleezle Gazlavay a wa wudez e keɗe ta Israyel hay. Ama Israyel hay ta tɔram sem nga cek nga tede maja ata ma mbəɗmar dɔba a Gazlavay. Anda keɗe, ata anda wudez ma yey babəza maaya ba. Nəka Jeremey 2.21. **15:1** 15.1 Aw 10.1; Ps 80.9-12 **15:2** 15.2 Mt 3.10 **15:3** 15.3 13.10

letek kōne, da akwar macēmƙaya ta yah daa ba na, ka da tōram cek ŋga tede.

⁵ «Yah na, wudez. Akwar na, mey-har hay a. Da ndaw macēmƙaya ta yah, yah may macēmƙaya ta ndaw aha na, menjey ŋga ndaw aha a key la maaya fa mey ŋga Gazlavay. Maja da akwar macēmƙaya ta yah daa ba na, akwar fa da gwamara ŋga key kwa meeme daa ba sōlak. ⁶ Da ndaw aa macēmƙaya ta yah daa ba na, a da hazakadamara ndaw aha ta cakay anda mey-har hay ŋga wudez madəsltakaya ma hazakadamara ta cakay, fa dōba ha, a kweley. A kusmamara, a pam awaw fa vōfa ŋga wewurey. ⁷ Da akwar macēmƙaya ta yah, asaya, da akwar fa tōbmara mey adaw mandaw mandaw na, cacōfdam kwa cek wura wura, ka hōtam la. ⁸ Da akwar fa kam maaya mandaw mandaw na, ndōhay a sōmara la akwar gula adaw hay. Anda keƙe, ndōhay a da hōlmamara Papay maja. ⁹ Ya fa wudƙwar anda Papay ma wudya may. Njam daa mewudfey-vaw adaw. ¹⁰ Da akwar fa namar ray a mewey adaw na, ka njam la daa mewudfey-vaw adaw. Ara anda yah ma nar ray a mewey ŋga Papay, yah manjakaya daa mewudfey-vaw anja may.

¹¹ «Yaa guzlkwar anda keƙe na, amba kaa sōmam anda yah maa sōmey keƙe may, asaya, amba ka njam daa meesōmey masa fara fara. ¹² Ehe, ya kadakwara mewey adaw: Wudam vaw anda yah ma wudƙwar keƙe. ¹³ Ndaw ma vōlda heter anja ŋga mōcey maja jam anja hay na, ŋgene ara mewudfey-vaw mahura. ¹⁴ Da akwar fa kamara cek masa yah ma lōvkwar ŋga key na, ŋgene akwar jam adaw hay. ¹⁵ Ya fa da zōlkwar ndōhay ma ka slōra adaw hay daa saba maja ndaw ma ka slōra na, a sōra cek masa bay anja ma key tabiya ba. Ama ya zōlkwar jam adaw hay, maja cek tabiya masa yah ma cōndērwa fa Papay na, ya ta wuzdakwara cay. ¹⁶ Ma walamaya ŋga key bay akwar na, ara akwar ba. Sasōkar jak, ara yah ma walakwar. Ya walakwar na, amba ka diyam, ka kamara slōra adaw, slōra ha a da njey ŋga sōmataw. Anda keƙe, Papay a da vōldakwara cek masa akwar maa cōfdafamara ta mezōley adaw. ¹⁷ Cek masa yah ma wudfey fa akwar na, wudam vaw.»

15:4 15.4-5 6.56; 15.7, 10, 16; Rm 11.17-18; 2Kwr 3.5; 4.7; 1Jn 2.6, 28; 3.6, 24
15:6 15.6 Mt 7.19 **15:7** 15.7 15.16 **15:8** 15.8 14.13; 17.1 **15:9** 15.9
 13.1; 5.18 **15:10** 15.10 14.15 **15:11** 15.11 16.22, 24; 17.13; 1Jn 1.4 **15:12**
 15.12 13.34; 1Jn 4.11 **15:13** 15.13 10.11 **15:16** 15.16 14.13; 15.7; 16.23-24;
 Mt 18.19; 1Jn 3.22; 5.14-15; Janj 6.70; 13.18 **15:17** 15.17 13.34

Mey da ray ndəhay ma da rəsmata ata Yesu ta gula anğa hay

¹⁸ Yesu aa guzltar a gula anğa hay saya, a ləvtar: «Da ndəhay da bəla fa rəsmakwar na, sərmara a rəsam teesed na, yah. ¹⁹ Da akwar anda ndəhay da bəla keđe na, anja a wudmakwar la maja akwar ndəhay ata hay. Ama akwar na, ndəhay ata hay ba, maja ara yah ma walakwar wal da wuzlah ata. Ata ma rəsmakwar na, maja. ²⁰ Sərfadamara mey masa yah maa guzlkwar heyey: “Ndaw ma ka sləra nğa ndaw na, a fəna bay nğa sləra ha ba.” Da ta sərdamaya banay la na, a sərdamakwar banay la kəne may. Yaw, da ta cənmaya mey la na, a cənmakwar mey la may. ²¹ A da sərdamakwar banay a na, maja yah. A kamara anda keđe na, maja a sərmara ndaw ma slərđiwa a bəla ba. ²² Da yah ma sawa a bəla nğa wuzdatara mey nğa Gazlavay daa ba na, anja mebərey da ray ata nğa kərzata daa ba. Ama wure keđe masa yah ma sawa a bəla nğa wuzdatara mey nğa Gazlavay sem keđe na, ata ta mey nğaa guzley nğa ləhdata daa mebərey ata daa ba. ²³ Ndaw ma rəsyə na, a key nğene, a rəsa Papay may. ²⁴ Yah ma key maazla hay masa ndaw ma gwa nğa kata ba la da wuzlah ata. Anja da daa ba na, mebərey da ray ata daa ba. Ama wure keđe masa ata ma hətmatar maazla hay a ta dey ata la kaa na, a rəsmandar ta Papay cənğa gway. ²⁵ Ama cek aha, a key anda mawuzlalakaya daa kwakwas ata, ma ləvey: “A rəsmaya nğa tede gway.”»

²⁶ Yesu aa guzltar a gula anğa hay saya, a ləvtar: «Sərmara, ndaw ma da jənkwar a sawa la. A da sawa ta fa Papay. Masa yah ma daw cay a cakay Papay na, ya slərdakwara la. Ndaw aha na, ara *Mesəfney nğa Gazlavay, a da wuzdatara cəved masa fara fara a ndəhay. A da key sede da ray adaw. ²⁷ Akwar may, ka da kam sede da ray adaw, maja dəga yah ma zla sləra adaw na, aləkwa bama haa wure keđe.

16

¹ «Yah ma ləvkwar anda keđe na, amba kwa da fa sərdamakwar banay na, ka təbmara mey adaw cənğa, ka mbəkdamara ba. ² A da bəlmakwar daa way-mewuzey-mey hay nğa Gazlavay. Asaya pas a, a wuswa la masa ndəhay ma da kədmakwar vagay na, a wulkam a key nğene, a kamar cek maaya nğada Gazlavay. ³ A da kam cek maaya ba

15:18 15.18 7.7 **15:20** 15.20 13.16 **15:21** 15.21 16.3 **15:22** 15.22 9.41
15:23 15.23 Lk 10.16; Jan 5.23; 1Jn 2.23 **15:24** 15.24 5.36 **15:25** 15.25 Ps
69.5; 35.19 **15:26** 15.26 1.15; 5.36; 14.16; 1Jn 5.6-9 **15:27** 15.27 1.14; SNM
1.8; 1Jn 1.2; 4.14 **16:2** 16.2 9.22

anda keḏe na, maja ta sɛrmara Papay daa ba, asaya, maja ta sɛrmaya daa ba may. ⁴ Ama ya wuzdakwara anda keḏe na, amba da pas a ta wuswa cay, fa kamakwar anda keḏe na, ka sɛrfadamara yah ma wuzdakwara cay la.»

Mey da ray Mesɛfnɛy nga Gazlavay ma da ka slɛra anɔa
 Yesu aa guzltar saya, a lɛvtar: «Dɛga yah ma zla slɛra aḏaw, yah ma wuzdakwara mey a daa ba na, maja yah daha da cakay akwar ḏagay. ⁵ Wure keḏe, ya da daw a cakay ndaw ma slɛrɛdiwa, kwa ndaw pal dasi akwar ma daa cɛḏfaya: “Ka daw ama?” na, daa ba. ⁶ Ama akwar ta mewulkey kalah maja yah ma lɛvkwar anda keḏe he. ⁷ Yaw, ya faa guzlkwar mey masa fara fara, anɔa maaya nɔgada akwar amba ya vɛhey fa Papay a vad. Fara fara, da ya ta vɛhey daa ba na, *Mesɛfnɛy nga Gazlavay, ndaw ma da jɛnkwar heyey, fa da sawa daa ba. Ama da ya ta vɛhey la na, ya slɛrdakwara la. ⁸ Da ta wuswa cay na, a da wuzdatara a ndɛhay da bɛla mey masa fara fara amba a sɛrmara meberɛy ata, amba a sɛrmara cɛved masa maaya, asaya, amba a sɛrmara sariya masa Gazlavay ma da ka. ⁹ A da sɛrmara meberɛy ata na, maja ata ma pamaya nɔga ndaw ata fara fara ba. ¹⁰ A da sɛrmara cɛved masa maaya na, maja ya fa da vɛhey nɔgada fa Papay, akwar fa da hɛtmaya daa saba. ¹¹ A da sɛrmara sariya masa Gazlavay ma ka na, maja Gazlavay ta kar sariya cay a bay-malula, ndaw ma wa bɛla keḏe.

¹² «Ya fa wuḏfɛy nɔgaa guzlkwar da ray cek hay ga, ama wure keḏe na, anɔa ta banay amba ka cɛndamara. ¹³ Da masa Mesɛfnɛy ma wuzda mey masa fara fara da ray Gazlavay heyey ta wuswa cay na, a da wuzdakwara mey masa fara fara da ray cek hay tabiya. Mey masa aa ma daa guzlda na, a sawa ta fa gɛɗan nɔga ba. Ama a daa guzley mey masa anɔa ma cɛndɛrwa da vad. A da wuzdakwara cek ma da key nɔgada fa mey. ¹⁴ Mesɛfnɛy a na, a da wuzdɛrwa gɛɗan aḏaw amba ndɛhay a hɛslmaya ray maja cek hay tabiya aa ma wuzdakwara na, a cɛndɛrwa fa yah.

¹⁵ Cek hay tabiya masa Papay ma wata na, yah ma wata may. Ara maja nɔgene, yah maa guzlkwar, ya lɛvey cek hay tabiya masa Mesɛfnɛy a ma wuzdakwara na, a cɛndɛrwa fa yah.»

Mey da ray gula hay nga Yesu ma da tɛwam ta ma daa sɛmam

16:3 16.3 15.21 **16:4** 16.4 13.19 **16:5** 16.5 8.14 **16:6** 16.6 16.22 **16:7**
 16.7 14.16 **16:8** 16.8 SNM 24.25 **16:9** 16.9 2.23; 5.38; 6.36, 64; 7.5; 10.26;
 12.37 **16:11** 16.11 12.31 **16:13** 16.13 14.16; 15.26; SNM 16.6-10; 1Jn 2.27
16:14 16.14 17.1 **16:15** 16.15 17.10

¹⁶ Yesu aa guzltar a gula anɗa hay saya, a lɔvtar: «Menjey nekɔdey fefe, akwar fa da hɛtmaya fa dey daa saba. Fa dɛba ha nekɔdey na, ka hɛtmaya la saya.» ¹⁷ Maja nɗene, gula anɗa hay siya aa guzlam da wuzlah ata, a lɔvam: «Aa guzldakwar, a lɔvey: “Menjey nekɔdey fefe, ka hɛtmaya fa dey daa saba. Fa dɛba ha nekɔdey na, ka hɛtmaya la saya.” Yaw, a lɔvey saya: “Ya da daw fa Papay a vad.” Mey hay a keɗe na, a wuɗey nɗa lɔvey me? ¹⁸ A lɔvey: “Menjey nekɔdey” na, a wuɗey nɗa lɔvey me? Mey a, a cɔney ba.»

¹⁹ Yesu a sɛra gula anɗa hay fa wuɗam nɗaa cɔɗɗamara. Anda keɗe, ta', aa guzltar, a lɔvtar: «Ya taa guzlkwar la, ya lɔvkwar: “Menjey nekɔdey fefe, akwar fa da hɛtmaya fa dey daa ba. Fa dɛba ha nekɔdey na, ka hɛtmaya la saya.” Kaa cɔɗɗam vaw da wuzlah akwar na, nɗa sɛrey mey a keɗe daw? ²⁰ Ya fa lɔvkwar fara fara, cay na, ka tɔwam la, kaa haram la da wuzlah akwar, ama ndɔhay da bɛla siya na, aa sɔmam la. Ka lalɔkam la, ama fa dɛba ha, kaa sɔmam la.

²¹ «Wulkam da ray nɗwas ta hwaɗ taw! Da masa fa da yey na, hwaɗ a, a sɛrɗa banay. Ama da bɛzey ta yawa cay na, a sɛrfada banay a saba, aa sɔmey maja aa ma hɛtey bɛzey mawiya. ²² Wure keɗe akwar may, daa mewulkey, ama ya hɛtkwar la saya. Anda keɗe, ka daa sɔmam, kwa ndaw ma da tɔkakwar nɗaa sɔmey a daa ba sɔlak. ²³ Ta pas a nɗene, ka sɛrmata cek hay cɔpa la, akwar fa daa cɔɗɗafamaya nɗa sɛrey cek daa saba. Yaw, ya fa lɔvkwar fara fara, da kaa cɔɗɗam kwa meeme fa Papay ta mezɔley aɗaw na, Papay a, a vɔldakwara la. ²⁴ Haa wure keɗe, ka taa cɔɗɗam cek ta mezɔley aɗaw daa ba aran. Anda keɗe, cacɔɗɗam cek, ka hɛtam la amba ka njam daa meesɔmey masa fara fara.»

Mey da ray gɔɗan nɗa Yesu da ray bɛla

²⁵ Yesu aa guzltar a gula anɗa hay saya, a lɔvtar: «Yah maa guzlkwar tabiya na, ta mey-menɗey. Yaw, pas a, a wuswa la masa yah ma daa guzlkwar ta mey-menɗey saba, ya da kadakwara mabara nɗa mey da ray Papay. ²⁶ Ta pas nɗene na, ka daa cɔɗɗam cek fa Papay ta mezɔley aɗaw. Ka da wulkam ara yah ma daa cɔɗɗakwara Papay kwa? Kay, kɔne ba, ama ara akwar ta ray akwar ma daa cɔɗɗamara, ²⁷ maja Papay a ta ray anɗa a wuɗkwar. A wuɗkwar na, maja akwar ma wuɗmaya, asaya, maja akwar ma tɔbmara ya sawa na, da fa anɗa. ²⁸ Ya sawa a bɛla keɗe na, da cakay Papay. Wure keɗe, ya da mbɔkda bɛla ha, ya da vɔhey nɗada fa Papay a.»

²⁹ Gula anja hay a mbəɸdamara, a ləvmar: «Nəka, wure keɸe, ka fa wuzdərwa mey a maaya maaya, ka faa guzley ta mey-menjegey daa saba. ³⁰ Wure keɸe, ala fa sərmara, kah na, ka sərtə cek hay tabiya. Cek masa ndaw ma wufey njaaa cəɸɸaka na, ka ta səra sem. Maja njeene, ya təbmara, kah na, ka sawa da fa Gazlavay.»

³¹ Yesu a mbəɸdatara, a ləvtar: «Wure keɸe na, akwar ma təbmara la, ya sawa da fa Gazlavay dəba daw? ³² Yaw, pas a, a sawa la, ta wuswa cay, masa akwar tabiya ka daa kwacam ray pal pal, kwa waawa a da daw a way anja, ka da mbəkdamaya taava aɸaw. Ama fara fara, yah taava aɸaw ba, maja Papay aa ta yah. ³³ Yah maa guzlkwar mey tabiya keɸe na, amba akwar masa macəmkaya ta yah keɸe, ka njam daa zazay. Ka səram banay la da bəla keɸe, ama kam gədaŋ. Yah na, ya ta fəna bəla ha sem ta gədaŋ.»

17

Yesu a dərey danjay maja gula anja hay

¹ Fa dəba ha, Yesu maa guzltar cay a gula anja hay heyey na, ta', a baŋgaɸa dey a vad, a dərey danjay a Gazlavay, a ləvey: «Papay, pas masa yah ma da sərey banay na, ta wuswa cay. Wuzdərwa gədaŋ aɸaw, yah Bəzey akah, a ndəhay, amba yah may, ya wuzdərwa gədaŋ akah a ndəhay.

² Ka ta vəlya gədaŋ la nja wey da ray ndəhay tabiya da bəla. Anda keɸe, ya da vəltar heter mendəvey ba njaada ndəhay masa kah ma vəldatiwa asi har aɸaw. ³ Heter mendəvey ba ha na, ara amba ndəhay a sərmaka, kah na, Gazlavay pal masa fara fara, asaya, ara amba a sərmaya, yah Yesu *Kəriste masa kah ma slərdərwa. ⁴ Masa yah da bəla keɸe na, ya ta wuzdatara gədaŋ akah cay a ndəhay. Asaya, yah ma ndəvda sləra masa kah ma vəldiwa nja key cay cəpa. ⁵ Wure keɸe, Papay Bay Gazlavay, vəhdaya fa mey akah, həslya ray saya, anda kah ma həslya ray daa masa yah da cakay akah dəga bəla ta zlar nja ləmey daa ba araŋ heyey.

⁶ «Yah ma wuzdaka la a ndəhay masa kah ma walata da bəla nja njam asi har aɸaw, amba a sərmaka. Ahaw, ndəhay a na, ara nja akah hay, ama kah ma vəldatiwa la asi har aɸaw, anda keɸe, fa cənmaka mey. ⁷ Wure keɸe, a sərmara cek hay tabiya masa nja yah na, a samawa ta fa kah. ⁸ A sərmara na, maja mey masa kah ma wuzdiwa

16:32 16.32 Zak 13.7; Mt 26.31, 56 **16:33** 16.33 7.7; 14.27; 1Jn 5.4 **17:1**
 17.1 2.4; 11.4; 12.16, 23, 41; 13.31-32; 14.13; 15.8; 16.14; 17.10, 22, 24 **17:2** 17.2
 3.35; 5.24; Mt 28.18 **17:3** 17.3 1Jn 5.20 **17:4** 17.4 4.34 **17:5** 17.5 1.1-2;
 8.58; 17.24 **17:6** 17.6 17.26

na, yah ma wuzdatara la, ta cəndamara la. A sərmara fara fara ya sawa da fa kah, asaya, ta təbmara la ara kah ma slərđiwa.

⁹ «Ya dərey dənğay na, maja ndəhay a, ba na, maja ndəhay da bəla cəpa ba. Ahaw, ya dərey dənğay maja ndəhay masa kah ma vəldatiwa asi har adaw. Ata na, ndəhay akah hay. ¹⁰ Yaw, ndəhay adaw hay tabiya na, ara ndəhay akah hay. Asaya, ndəhay akah hay tabiya na, ara ndəhay adaw hay. Ya fa wuzda gədan adaw ta fa ndəhay masa kah ma vəldatiwa ha. ¹¹ Menjey nekədəy fedə, ya da mbəkda bəla. Ata na, ata da bəla kedə mandaw mandaw. Ya da vəhey nğada fa kah. Papay Bay Gazlavay pal, nəkfatar dey ta gədan akah, gədan masa kah ma vəldiwa heyey. Anda kedə, a da njam macəmkaya pal anda aləkwa cew e macəmkaya pal. ¹² Daa masa ala bama heyey na, ya ta nəkfatar dey la ta gədan masa kah ma vəldiwa. Yah ma nəkfatar dey la, kwa ndaw pal taa zədəy daa ba, si ndaw masa ma daa zədəy cənğa, anda mey nğa Gazlavay mawuzlalakaya zleezle * ma ləvey heyey. ¹³ Papay, wure kedə, ya fa da vəhey fa kah. Yaa cəfdaka anda kedə daa masa yah da bəla kedə amba ndəhay a, aa səmam anda yah maa səmey, a njam daa meesəmey masa fara fara.

¹⁴ Yah na, yah ma wuzdatara mey akah la a ndəhay adaw hay, ama ndəhay siya da bəla fa rəsmata, maja ata na, ara ndəhay nğa bəla saba. Yah may, yah ndaw nğa bəla ba.

¹⁵ Papay, ya taa cəfdaka amba ka badata da bəla kedə la na, daa ba, ama yaa cəfdaka na, amba ka nəkfatar dey maja bay-malula a da katar cek maaya ba. ¹⁶ Ata na, ara ndəhay nğa bəla kedə ba anda yah ndaw nğa bəla kedə ba may. ¹⁷ Mey akah na, ara mey masa fara fara. Tərdata ndəhay a nğa ndəhay akah hay ta fa mey akah masa fara fara ha. ¹⁸ Ehe, ya fa slərdata fa ndəhay da bəla anda kah ma slərđiwa may. ¹⁹ Yah na, ya vəldakawa heter adaw maja ata, amba ata may, a təram ndəhay akah hay fara fara ta fa mey akah masa fara fara kedə.

²⁰ «Ya dərey dənğay na, maja ndəhay adaw hay kedə daada ba, ama ya dərey dənğay maja ndəhay ma da pamaya nğa ndaw ata fara fara ta fa mey masa ata ma da wuzdamatara. ²¹ Anda kedə, maaya na, ndəhay a njam macəmkaya pal anda kah Papay, kah ta yah, yah may, yah ta kah. Maaya na, a njam ta aləkwa, amba ndəhay

17:10 17.10 15.8 **17:11** 17.11-12 6.39; 13.18; macəmkaya pal: 10.30; 17.21-23;

Gal 3.28 * **17:12** 17.12 mey nğa Gazlavay mawuzlalakaya zleezle: Nəka Ps 41.10ta Jan 13.18. **17:13** 17.13 15.11 **17:14** 17.14 7.7; 8.23 **17:15** 17.15 Mt 6.13; 2Tes 3.3; 1Jn 5.18 **17:18** 17.18 20.21

siya da bēla a sērmara ara kah ma slērdiwa. ²² Yah ma vēldatara gēdanj masa kah ma vēldiwa heyey cay amba a njam macēmkaaya pal anda yah ta kah macēmkaaya pal may. ²³ Yah macēmkaaya ta ata anda kah macēmkaaya ta yah. Anda keḏe, a da njam macēmkaaya pal maaya maaya ma fēna, amba ndēhay siya da bēla a sērmara ara kah ma slērdiwa a bēla, asaya, amba a sērmara ka fa wuḏta anda kah ma wuḏya.

²⁴ «Papay, ahaw, kah ma vēldatiwa ndēhay a la. Aa slam da vad masa yah ma da njea a hwaḏ a na, ya wuḏey anja ya njam bama ta ata. Anda keḏe, a hētmar gēdanj masa kah ma vēldiwa heyey la, aa sēmam da ray a. Vēldiwa gēdanj a, maja ka fa wuḏya dēga bēla ta lēmey daa ba aranj. ²⁵ Papay, ndaw ma ka cek ta cēveḏ e, ndēhay siya ga da bēla na, ta sērmaka daa ba aranj. Yah na, ya ta sērka cay, asaya, ndēhay aḏaw hay ta sērmara cay ara kah ma slērdiwa a bēla. ²⁶ Papay, ya ta wuzdaka la a ndēhay aḏaw hay a, amba a sērmaka. Ya wuzdaka la amba a sērmaka cēnga, amba a wuḏam vaw anda kah ma wuḏya kalah keḏe, asaya, amba ya njea macēmkaaya ta ata.»

18

A kērzamara Yesu

(Matiye 26.47-56; Mark 14.43-50; Luk 22.47-53)

¹ Masa Yesu ma dērey danjay cay na, ta', a diyam ta gula anja hay a dey lanjar nja wayam nja Sedēranjw. Fetede na, jerne daha. A mbēzam ta gula anja hay a, aa jerne he. ² Yaw, Juda, ndaw ma da vēlda Yesu a har masa-gēra anja hay heyey, a sēra slam aha, maja Yesu ta diyam la dey weewe a hwaḏ a ta gula anja hay a. ³ Juda a njeley sewje hay ga, asaya, a njeley ndēhay ma jēḏa *Way-mekey-kwakwas nja Gazlavay. Ara *bay-ray hay nja ndēhay ma ka kwakwas nja Gazlavay ta *Fariza hay ma slērdamata. Ta', a diyam aa jerne he dēba. Ata cēpa ta cek hay nja vēram, ta petērta hay, lej awaw mandēvḏatakaya fa har fa har.

⁴ Yesu na, ta sēra cek ma da hētmar sem. Da ray njea, a njechey njea fa ata, aa cēḏata, a lēvtar: «Ka sēpam na, wa?» ⁵ A mbēḏamara, a lēvmar: «Ya sēpam Yesu ndaw *Nezeret.» Ta', a lēvtar: «Yesu a na, ara yah.» Juda, ndaw ma da vēlda Yesu a heyey, aa da wuzlah ata. ⁶ Masa Yesu a maa guzley, ma lēvey: «Yesu a na, ara yah» heyey na,

a zloram. Da ray ngene, a ngocham ta dōba ta dōba, a tōfam zlabēla'-la'-la' a hwayak. ⁷ Ta', Yesu aa cōfdata saya, a lōvtar: «Ka sōpam na, wa?» A mbōdāmara, a lōvmar: «Ya sōpam Yesu ndaw Nezeret.» ⁸ Yesu a lōvtar: «Yah ma lōvkwār la Yesu a na, ara yah. Da ka sōpam yah na, mbōkdamata ndōhay siya kedē nga diyam!» ⁹ A key anda kedē na, amba mey nga Yesu daa medōrey-dangay anga heyey a key. Mey a, a lōvey: «Kwa ya taa zōdēy ndaw pal dasi ndōhay masa kah ma vōdatiwa heyey na, daa ba.»

¹⁰ *Simanḡw *Piyer na, anḡa ta dōlaw da har. Ta', a mōdōrwa daa way a, a ngōma madōrlam nga *ndaw mahura da ray ndōhay ma ka kwakwas nga Gazlavay kaa heyey, cōrah! a cōrhara slōmay ta dey nga zōmay. A zōlmara ndaw masa Simanḡw ma cōrhara slōmay a na, Malkus. ¹¹ Ama ta', Yesu aa guzlar a Piyer, a lōvar: «Mada dōlaw akah aa way a. Ka wulkey banay masa Papay ma wudēy ya sōra na, nga wusfaya ba daw?»

A handamara Yesu fa Han

¹² Sewje hay ga ta *bay-ray ata lenj ndōhay ma jōfa *Way-mekey-kwakwas nga Gazlavay masa mahura hay nga *Jōwif hay ma slōrdamata heyey na, a kōrzamara Yesu dōba, a jōwmara. ¹³ A handamara teesēd na, a way Han *. Han aha na, ara mesey nga Kayif. Kayif e may, ara ndaw mahura da ray ndōhay ma ka kwakwas nga Gazlavay ta mevey a ngene. ¹⁴ Daa ngene na, Kayif a taa guzltar la ngada mahura hay nga Jōwif hay, a lōvtar: «Maaya na, ndaw pal a mōcey, da ray alōkwa Jōwif hay tabiya ma da paslakwa.»

*Piyer a cey mey a lōvey anḡa gula nga Yesu ba
(Matiye 26.69, 70; Mark 14.66-68; Luk 22.55-57)*

¹⁵ Ata *Simanḡw *Piyer ta gula nga Yesu lanḡar daha a sōpmar wurzay nga Yesu a. *Ndaw mahura da ray ndōhay ma ka kwakwas nga Gazlavay a, a sōra gula nga Yesu lanḡar a. Da ray ngene, ta', gula ha a mbōzam ta Yesu a, a way ndaw mahura ha. ¹⁶ Ama Piyer na, anḡa ta daa ambaw, gweegwe fa mey-mbew. Gula lanḡar masa ndaw mahura ha ma sōra heyey na, ta', a bawa aa ambaw, aa cōfda dam ma jōfa mey-mbew e nga mbōzdōrwa Piyer. Ta', Piyer a mbōzey. ¹⁷ Dam ma jōfa mey-mbew e aa cōfda Piyer, a

18:9 18.9 6.39 **18:10** 18.10 Lk 22.36, 38 **18:11** 18.11 Mt 20.22; 26.39

* **18:13** 18.13 Han ta key mahura da ray ndōhay ma ka kwakwas nga Gazlavay la teesēd da ray Kayif. Da ray ngene, Jōwif hay ga fa pamara nga ndaw mahura da ray ndōhay ma ka kwakwas cōnḡa. **18:13** 18.13 18.24; Lk 3.2 **18:14** 18.14 11.49-50 **18:15** 18.15-16 Mt 26.28

løvar: «Hey! kah na, ndaw pal dasi gula hay nga ndaw aha may, ba diya?» Piyer a mbøddara, a løvar: «Kay! Yah na, gula anga ba.»

¹⁸ Ndøhay ma ka sløra fetede len ndøhay ma jøða *Way-mekey-kwakwas nga Gazlavay heyey ta gøðam awaw la, fa søtmara maja memed fa key. Piyer heyey aa da cakay ata, fa søtey awaw a may.

Yesu fa mey nga Han

(Matiye 26.59-66; Mark 14.55-64; Luk 22.66-71)

¹⁹ *Ndaw mahura da ray ndøhay ma ka kwakwas nga Gazlavay aa cøfða Yesu da ray gula anga hay ta da ray mey masa aa maa sørkadatar a ndøhay. ²⁰ Yesu a mbøddara, a løvar: «Ya taa guzley la fa mey nga ndøhay tabiya, ya taa sørkedey ndøhay la mandaw mandaw daa *way-mewuzey-mey nga Gazlavay ta daa *Way-mekey-kwakwas nga Gazlavay masa *Jøwif hay ma cømam tabiya a hwad a. Yah ma bey mey ta bey daa ba sølak. ²¹ Kaa, kaa cøfðaya na, maja me? Daw fa ndøhay ma cøndamara mey adaw, cacøfðata, ata na, a sørmara mey masa yah ma wuzdatara ha maaya maaya.»

²² Daa masa Yesu faa guzley anda kede na, ndaw pal dasi ndøhay ma jøða Way-mekey-kwakwas fetede, a sløngar matapa-har a Yesu. Ta', aa guzlar, a løvar: «A mbøðam mey ngada *ndaw mahura da ray ndøhay ma ka kwakwas nga Gazlavay na, køne daw?» ²³ Yesu a mbøddara, a løvar: «Da yah maa guzley mey maaya ba la na, wuzdiwa taw. Yaw, da yah maa guzley mey maaya la na, anja ka køðya fa me?» ²⁴ Fa døba ha, Han a løvtar a ndøhay heyey nga handamara fa Kayif, ndaw mahura da ray ndøhay ma ka kwakwas nga Jøwif hay ta mevey a ngenene. Yesu a, majøwkaya cønnga.

Piyer a cey mey a løvey anga gula nga Yesu ba cønnga

(Matiye 26.71-75; Mark 14.69-72; Luk 22.58-62)

²⁵ Masa *Simanw *Piyer fa søtey awaw fetede heyey na, ndøhay fetede he, aa cøfðamara, a løvmar: «Kah na, gula pal da wuzlah gula hay nga ndaw aha may, ba diya?» Ama Piyer a cada mey, a løvey: «Kay! yah na, gula anga ba.»

²⁶ Fetede, ndaw ma ka sløra nga *ndaw mahura da ray ndøhay ma ka kwakwas nga Gazlavay daha. Ndaw aha ara sækway nga ndaw masa Piyer ma cørhara slømay heyey. Ndaw aha, aa guzlar a Piyer, a løvar: «Kah na, yah ma høkwar la ta ata ndaw aha daa jerne, ba diya?» ²⁷ Piyer a cada mey cønnga. Daa ngenene, gwagwalak ta', a cey day.

Yesu fa mey nga Bay Pilat

(Matiye 27.1, 2, 11-14; Mark 15.1-5; Luk 23.1-5)

²⁸ Perek perek, a badamara Yesu da way Kayif, a handamara a way Pilat, Bay Rawma. Ama mahura hay nga *Jëwif hay na, a mbëzam a way a ba, maja a wudam nga zlebmarara kwakwas ata ba, anda keɗe amba a gwamara nga zomey ɗaf nga gwagway nga *Pak. ²⁹ Maja ngene, Bay Pilat, a bawa aa ambaw, a hëtfatar. Ta', aa cëfɗata, a lëvtar: «Ka kërzamërwa ndaw a keɗe na, a kawa me?» ³⁰ A mbëɗdamara, a lëvmar: «Da ta key cek malamba daa ba na, anja ya handamërwa fa kah la daw?» ³¹ Bay Pilat a mbëɗɗatara, a lëvtar: «Akwar ta ray akwar, ngëlmara ndaw a, ɗëslmara sariya anga anda kwakwas akwar ma lëvey.» Mahura hay nga Jëwif hay a mbëɗdamara, a lëvmar: «Ala na, ta cëvedɗ nga këɗey ndaw vagay daa ba.» ³² Cek aha, a key anda keɗe na, amba Yesu a mëcey fa hwadam mazlangalakaya anda aa ma lëvey a da mëcey heyey.

³³ Bay Pilat a mbëzey ta ray ngada way, a zëla Yesu. Ta', aa cëfɗa, a lëvar: «Kah na, bay nga Jëwif hay daw?» ³⁴ Yesu a mbëɗɗara, a lëvar: «Kaa guzley anda keɗe na, ara mewulkey akah daw, da daa ba, ara ndëhay ma kadamakawa daw?» ³⁵ Bay Pilat a mbëɗɗara, a lëvar: «Yah na, ndaw Jëwif daw? Ara sëkway akah hay ta *bay-ray hay nga ndëhay ma ka kwakwas akwar hay ma handamakawa fa yah keɗe. Kaa ka key maaya ba na, me?» ³⁶ Yesu a mbëɗɗara, a lëvar: «Ya wey da ray ndëhay na, da bëla keɗe ba. Da yah bay da bëla keɗe na, anja gula aɗaw hay a këɗam vaw la amba mahura hay nga Jëwif hay a kërzamaya ba. Ama wure keɗe, ya fa wey da ray ndëhay da bëla keɗe daa ba.» ³⁷ Da ray ngene, Bay Pilat aa cëfɗa, a lëvar: «Kaa kah na, bay ɗëba daw?» Yesu a mbëɗɗara, a lëvar: «Anda kah ma lëvey, yah bay. Ya yawa, ya sawa a bëla na, nga wuzɗatara mey masa fara fara a ndëhay. Kwa waawa ma sëpey cëvedɗ masa fara fara na, ara ndaw ma jëkey slëmay fa mey aɗaw.» ³⁸ Bay Pilat a mbëɗɗara, a lëvar: «Mey masa fara fara na, mey wura?»

A kamar sariya a Yesu

(Matiye 27.15-31; Mark 15.6-20; Luk 23.13-25)

Masa Bay Pilat maa guzley la anda keɗe na, ta', a bawa aa ambaw saya fa mey nga Jëwif hay. A lëvtar: «Yah na, yah ma hëtey cek tëɗe nga këɗey ndaw keɗe vagay na, daa ba.

³⁹ Yaw, anda kwakwas akwar ma wufey na, si ya pɛskakwar ndaw pal daa fɛrsɛne ta gwagway nga *Pak. Anda kefe, ka wudam na, ya pɛskakwar bay nga *Jɛwif hay daw?» ⁴⁰ A wudam, a lɛvam: «Kay! ka mbɛkda ndaw kefe ba. Ama pɛskandar na, Barabas.» Barabas a na, ara ndaw-mayal ma sla day nga ndaw.

19

¹ Ta', Bay Pilat a lɛvtar a sewje hay nga slɛɔmara Yesu ta laway. ² Sewje hay a cam hatak, a paɔfamar ray anda gursaw nga bay. Asaya, a kɛzɔmar zana magaza nga bay hay fa vaw. ³ Ta', a ngɛcham a cakay a, a sasanɔeram a ray a, a lɛvmar: «Zay daw, bay nga Jɛwif hay?» Fa dɛba ha, kan! kan! a vɛɔmar matapa-har.

⁴ Ta', Bay Pilat a bawa aa ambaw saya, aa guzɔtar a Jɛwif hay, a lɛvtar: «Dagay, jɛkam slɛmay! Ya da badakwara ndaw aha aa ambaw amba ka sɛrmara kwa ya ta hɛtey cek maaya ba masa anɔa ma ka na, daa ba.» ⁵ Yesu ta', a bawa aa ambaw dɛba. Anɔa ta gursaw nga hatak heyey da ray, leɔ zana magaza heyey fa vaw. Pilat aa guzɔtar, a lɛvtar: «Ehe ndaw aha!»

⁶ Ama masa *bay-ray hay nga ndɛhay ma ka kwakwas nga Gazlavay ta ndɛhay ata hay ma hɛtmar na, a wudam ta gɛɔan, a lɛvam: «Dɛra fa hwadam mazlanɔalakaya! Dɛra fa hwadam mazlanɔalakaya!» Pilat aa guzɔtar saya, a lɛvtar: «Ehe, ngɛɔmara ndaw aha, dɛrmara ta har akwar fa hwadam mazlanɔalakaya ha, maja yah na, kwa yah ma hɛtey cek maaya ba masa anɔa ma ka na, daa ba.» ⁷ Jɛwif hay a mbɛɔdamara, a lɛvmar: «Kwakwas ala daha, anda kwakwas a ma lɛvey na, si mekɛɔey ndaw aha kefe vagay maja taa guzley la, a lɛvey anɔa Bɛzey nga Gazlavay.»

⁸ Masa Bay Pilat ma cɛnda anɔa ma lɛvey anɔa Bɛzey nga Gazlavay na, mandɛrzay a kar ta gɛɔan ta gɛɔan. ⁹ A mbɛzey a way saya, ta', aa cɛɔɔa Yesu a, a lɛvar: «Kah na, ka sawa dama?» Ama kwa Yesu ta mbɛɔɔara daa ba. ¹⁰ Da ray ngene, Bay Pilat aa guzɔlar, a lɛvar: «Kaa guzley ba kefe na, ngada yah, ba diya? Ka sɛra, yah na, ya gwa nga mbɛkɔaka, da daa ba, ya gwa nga dɛrka fa hwadam mazlanɔalakaya, ba diya?» ¹¹ Yesu a mbɛɔɔara, a lɛvar: «Ka gwa nga wey da ray aɔaw ba, si Bay Gazlavay ma vɛɔka cɛved. Anda kefe, ndaw ma vɛɔɔaya asi har akah kefe ta key mebɛrey sem ma fɛnka.» ¹² Masa Bay Pilat ma cɛnda mey a kefe na, a sɛpey cɛved amba a mbɛkɔda Yesu. Ama Jɛwif hay a,

a wudam ta gədanj, a ləvam: «Da kah ma mbəkda ndaw kede sem na, ŋgene, kah jam ŋga bay mahura *Sezere *saba. Kwa waawa ma pa ray anga ŋga bay na, ara masa-gəra ŋga bay mahura Sezere, ba diya?»

¹³ Masa Bay Pilat ma cənda mey a kede saya na, ta', a badərwa Yesu aa ambaw saya. A njeý a ray janja anga mekey sariya mapakaya da ray slam macacəlkaya ta anɣwa mezəley ta mey *Hebəre «Gabata». ¹⁴ Ara ta pas mediýey vaw ŋga key gwagway ŋga Pak. Ta wuzlah-pas † na, Bay Pilat a ləvtar a Jəwif hay a: «Ehe bay akwar.» ¹⁵ Ama a wudam ta gədanj, a ləvam: «Kəda vagay! Kəda vagay! Dəra fa hwadam mazlanɣalakaya.» Bay Pilat a mbəɸdatara, a ləvtar: «Bay akwar gway na, ka wudam ya dərkwara fa hwadam mazlanɣalakaya gway daw?» *Bay-ray hay ŋga ndəhay ma ka kwakwas ŋga Gazlavay a mbəɸdamara, a ləvmar: «Bay ala mahura mekele na, daa ba, si bay Sezere gway.» ¹⁶ Anda kede, Bay Pilat a vəɸdatara Yesu amba a dərmarara fa hwadam mazlanɣalakaya. Ta', a kəzamarara Yesu dəba.

*A dərmarara Yesu fa hwadam mazlanɣalakaya
(Matiye 27.32-44; Mark 15.21-32; Luk 23.26-43)*

¹⁷ A badamərwa Yesu daa berney. Daa masa fa badamərwa ha na, Yesu fa la hwadam mazlanɣalakaya masa ata ma da dərmarara fa vəɸa. A handamarara ŋgadaa slam mezəley ta mey *Hebəre «Gwalgwata», anda meləvey, «slam anda tetesl ŋga ray ŋga ndaw.» ¹⁸ Fetede, sewje hay ta', a dərmarara Yesu fa hwadam mazlanɣalakaya ha. A dəraram ndəhay cew saya a cakay a, pal ta har-zəmay, lanɣar ta har-gula, Yesu na, aa da wuzlah.

¹⁹ Bay Pilat ta', a ləvtar a ndəhay ŋga wuzlalam mey ma ləvey: «Yesu ndaw *Nezeret, bay ŋga *Jəwif hay.» Asaya, a ləvtar ŋga sləpmara fa hwadam masa Yesu mazlanɣalakaya fa vəɸa heyey. ²⁰ Jəwif hay ga ta janɣamara mey mawuzlalakaya ha la maja slam masa ata ma dərmarara Yesu a na, anga gweegwe ta berney a. Asaya, ndəhay ga ta janɣamara mey a la maja mey a mawuzlalakaya na, ta mey Hebəre ta mey Leteñ leñ ta mey Gərek ‡. ²¹ Maja ŋgene, *bay-ray hay ŋga ndəhay ma ka kwakwas ŋga Jəwif hay aa

* **19:12** 19.12 Sezere ara bay mahura ŋga Rawma hay ma wey da ray hwayak hay ga, kwa hwayak ŋga Jəwif hay may. **19:12** 19.12 18.37; Lk 23.2; SNM 17.7

† **19:14** 19.14 ta wuzlah-pas: Ta mey Gərek a ləvey «bərey maakwaw.» Da Janj a sləfa anda Jəwif hay na, bərey maakwaw ara ta wuzlah-pas fa aləkwa Mafaw hay. Da Janj a sləfa anda Rawma hay na, ara slam beñ! beñ! fa aləkwa. Nəka Mk 15.25. ‡ **19:20** 19.20 Mey Hebəre ara mey Jəwif, Leteñ ara mey Rawma, Gərek ara mey masa ndəhay ga ma cəndamarara daa hwayak hay mekele mekele ŋga Rawm.

guzlmar, a ləvmar: «Ka da mbəkda mey a mawuzlalakaya “Bay n̄ga Jəwif hay” anda n̄gene ba. Ama mbədda, wuzlala: “Ndaw aha ta ləvey la: Yah na, yah bay n̄ga Jəwif hay”.»
 22 Bay Pilat a mbəddatara, a ləvtar: «Cek masa yah ma wuzlala sem na, a da n̄jey mawuzlalakaya anda n̄gene.»

23 Masa sewje hay ma dərmarə Yesu fa hwadam mazlan̄galakaya cay na, ta', a həlmata zana an̄ga hay, a wunkamara slam məfad, fa sewje he fa sewje he. Mambəkakaya zana an̄ga maazəma masa mezəvey a daa ba dəga da vad haa kasl a hwayak. 24 Sewje hay a, aa guzlam da wuzlah ata a ləvam: «Ya da n̄gərkwa zana ha ta n̄gərey ba, ama kədkwa caca amba ndaw pal a la.» Cek aha a key anda mey n̄ga Gazlavay mawuzlalakaya zleezle ma ləvey: «Ta wunkamara zana adaw hay sem da wuzlah ata, zana maazəma na, a kədam caca amba ndaw pal a la.» Yaw, keđe he ara cek masa sewje hay ma kamara.

25 Ata mamaŋ n̄ga Yesu, ta dam-mamaha, ta *Mari n̄gwas n̄ga Kəlawpas, leŋ Mari da Magdala, malacatakaya da cakay hwadam mazlan̄galakaya masa ata ma dərmarə Yesu fa vəda heyey. 26 Yesu a nəka mamaha. Gula n̄ga masa aa ma wudə kalah heyey may, aa da cakay mamaha ha. Ta', Yesu aa guzlar a mamaha, a ləvar: «Mamay, n̄gene na, bəzey akah.» 27 Ta', aa guzlar a gula n̄ga ha, a ləvar: «Ŋgene na, mamakw.» Dəga ta pas a n̄gene gula n̄ga Yesu a ta', a n̄gəla Mari a way an̄ga.

(*Matiye 27.45-56; Mark 15.33-41; Luk 23.44-49*)

28 Daa n̄gene, Yesu a sərə ta ndəvda slərə an̄ga cay. Ta', aa guzley, a ləvey: «Yam fa kaya.» Aa guzley anda keđe na, amba mey mawuzlalakaya daa dərrewel n̄ga Gazlavay zleezle heyey na, a key. 29 Fetede, kwakulam daha marəhkaya ta yam n̄ga babəza n̄ga wudez meekwerek e. Sewje hay a jəhwəbam cek anda gagəmay aa yam a heyey, a tərvađamara fa mey n̄ga zlanday, a təldamara a mey Yesu. 30 Yesu maa səba yam n̄ga babəza n̄ga wudez meekwerek e heyey cay na, ta', aa guzley, a ləvey: «Slərə adaw tabiya, ta ndəvey cay.» Fa dəba ha, a jəkwdə ray, pam! a məcey.

Sewje a sləka Yesu aa cakay

31 Yesu a məcey na, ta pas masa *Jəwif hay fa diyam vaw n̄gadaa *pas meməskey-vaw. Ta pas a n̄gene, mahura hay

nga Jëwif hay a wudam vagay hay a njam fa hwadam mazlanjalakaya hay heyey saba, asaya, maja pas meməskey-vaw § a ngene a fənta pas hay meməskey-vaw siya. Da ray ngene, ta', aa cəfdamara Bay Pilat nga ngərfey salay * hay nga ndəhay fa hwadam mazlanjalakaya, asaya, nga padamatərwa salay da ray hwadam hay a. ³² Anda kedə, sewje hay a ngərfamara salay hay nga ndaw ngeeme ta nga ndaw nga dey cew e masa madərtakaya da cakay Yesu heyey dəba. ³³ A wusam nga ngərfamara salay hay nga Yesu may na, a hətfamar ta məcey sem. Anda kedə, kwa ta ngərfamara salay anga hay daa saba. ³⁴ Ama sewje pal da wuzlah ata, ta', a sləka ta zəwet aa cakay. Wure ngene, mambaz ta yam a mbədwə. ³⁵ Ndaw ma kada mey a kedə na, ta hətar la ta dey anga †. Mey masa aa ma kada na, ara mey fara fara. Yaw, anga na, a sərə ara mey fara fara. Anda kedə, a kada mey a na, amba akwar may, ka təbmara mey a. ³⁶ Cek hay a tabiya ma kam kedə na, anda mey nga Gazlavay mawuzlalakaya zleezle, ma lövey: «Kwa fa da ngərfamar tetesl pal daa ba.» ³⁷ Asaya, mey nga Gazlavay mawuzlalakaya mekele daha, a lövey: «A hətmar ndaw masa ata ma sləkmara la.»

A jəhmara vagay nga Yesu

(*Matiye 27.57-61; Mark 15.42-47; Luk 23.50-56*)

³⁸ Fa dəba ha, ndaw da slala Arimate daha, mezəley *Jawzef. Ta', a daw fa Bay Pilat ngaa cəfdarawa vagay nga Yesu amba a jəha. Jawzef e na, ara ndaw ma təba mey nga Yesu, ama ta wuzda vaw anga daa ba maja a zlürey ta mahura hay nga *Jëwif hay. Bay Pilat ta vəlar cəved la. Anga ta', a daw a la vagay a. ³⁹ Nikwedem, ndaw masa ma hətfar Yesu a ta tavad heyey, ta', a diyam cew e ta Jawzef nga jəhey vagay a. Nikwedem ta ley mal mezey maaya nga cek mezəley «*mir» majahadəkaya ta cek mezəley «aləwes» la a har, a fəna kəlew kwakwar maakar. ⁴⁰ Ata cewete ta', a lamara vagay nga Yesu a, a zləngmara ta maslaga, a takwadəmar mal heyey anda Jëwif hay ma kamara daa masa ata fa da zləngam vagay. ⁴¹ Daa slam masa ata ma dərmara Yesu a na, jerne daha. Daa jerne he cəvay mawiya daha, kwa ta pam vagay a hwad a daa ba aran. ⁴² A jəhmara

§ 19:31 19.31 Pas meməskey-vaw a, a fənta pas meməskey-vaw siya na, maja ara ta gwagway nga Pak. * 19:31 19.31 meṅgərfey salay: A ngərfamatara salay na, amba a məcam fiyaw. 19:31 19.31 Mew 21.22-23 19:34 19.34 1Jn 5.6 † 19:35 19.35 Janj aa guzley da ray anga ray anga. Nəka Janj 19.26; 20.2; leṅ 21.24. 19:35 19.35 15.27; 21.24 19:36 19.36 Ps 34.20-21; Mab 12.46 19:37 19.37 Zak 12.10; CWJ 1.7 19:38 19.38 9.22 19:39 19.39 3.1-2 19:40 19.40 12.7

Yesu aa cəvay a na, maja ara hakwad, *pas meməskey-vaw gweegwe cay, asaya, maja cəvay a gweegwe fetede.

20

Yesu a sləkdawa daa meməcey

(Matiye 28.1-8; Mark 16.1-8; Luk 24.1-12)

¹ Taa pərek ta luma nga Gudal, slam beŋ! beŋ! *Mari da Magdala, a daw nga nəkərwa cəvay nga Yesu. A wusey a mey cəvay a, a da nəkey dey na, beeler mahura ma gərca mey nga cəvay a manğəchadakaya ta cakay. ² Anda keđe, takw! a həla mahway ngada fa ata *Simanɥw *Piyer ta gula lanğar masa Yesu ma wuda kalah heyey. Ta', aa guzltar, a ləvtar: «Ta lamara vagay nga Bay Mahura Yesu sem daa cəvay, ya səmra a pamara aa wura ba.»

³ Da ray ngene, ata Piyer ta gula lanğar heyey, a sləkdam, a diyam a mey cəvay a. ⁴ Ata cewete, a hwam ta hway, ama gula lanğar heyey a hway a fəna Piyer, a wusey teesəd a mey cəvay a. ⁵ Ta', a wuzedey dey aa cəvay a, a hətey da hwad a na, maslaga hay makwiyyatakaya, ama ta mbəzey aa cəvay a daa ba. ⁶ Simanɥw Piyer a wusey fa dəba anğa, ta', a mbəzey aa cəvay a. A hətatar maslaga hay makwiyyatakaya, ⁷ asaya, a hətar zana masa ata ma sləwdamara ray nga Yesu ta anğa heyey. Zana ha na, macəmkaya ta maslaga hay heyey ba, ama mapadəkaya wal ta cakay. ⁸ Gula lanğar ma wusey teesəd heyey, a mbəzey aa cəvay a may, a hətatar cek hay a, anda keđe, a təba ma sləkdawa nga Yesu daa meməcey. ⁹ Ama *gula hay nga Yesu ta cəndamara mey nga Gazlavay masa ma ləvey Yesu a da sləkdawa daa meməcey na, daa ba aran. ¹⁰ Fa dəba ha, ta', gula hay cew heyey a vəham a way ata hay.

Yesu a wuzar vaw a Mari da Magdala

(Matiye 28.9, 10; Mark 16.9-11)

¹¹ Daa ngene, *Mari da Magdala ta', a vəhey a mey cəvay a. Deŋ! a lecey a mey cəvay a, fa təway. Masa anğa fa təway a na, ta', a wuzedey dey aa cəvay a. ¹² A da nəkey dey na, a ray maslan hay nga Gazlavay cew ta zana hay mabara fa vaw. Ata manjatakaya cəma daa slam masa ata ma pamara vagay nga Yesu heyey, pal manjakaya daa slam-ray, pal daa slam-salay. ¹³ Maslan hay nga Gazlavay heyey aa cəfdamara, a ləvmar: «Kwakwa, ka təway me?» A mbəddatara, a ləvtar: «Ta lamara vagay nga Bay adaw Mahura sem, ya səra a pamara aa wura ba.»

¹⁴ Masa ngwas aha maa guzley la anda kede, a da mbøfey dey na, a ray Yesu malacakaya fetede, ama kwa ta sèra ara anga na, daa ba. ¹⁵ Yesu a, aa cøfda, a løvar: «Kwakwa, ka tøway me? Ka søpey na, wa?» Ngwas aha, a wulkey na, ara ndaw ma jøfda jerne he, ta', aa guzlar, a løvar: «Papay adaw, da ara kah ma la na, wuzdiwa slam masa kah ma pa amba ya larawa aa slam a taw?» ¹⁶ Yesu ta', a zøla, a løvar: «Mari!» Masa Mari ma cønda mezøley anga la na, pøla! a mbøfey dey ngada fa Yesu, ta', aa guzlar ta mey *Hebøre, a løvar: «Rabuni,» anda meløvey «bay adaw».

¹⁷ Yesu aa guzlar, a løvar: «Mbøkdaya, ka da zøndaya vaw ba, maja ya ta tøpey fa Papay a vad daa ba arañ. Ama kah na, daw ta løvtar a mølma adaw hay, ya tøpey la fa Papay masa anga Papakw akwar may, fa Gazlavay masa anga Gazlavay akwar may.» ¹⁸ Ta', Mari da Magdala a daw fa *gula hay nga Yesu døba, a kadatara, a løvtar: «Ya ta høtar Bay Mahura Yesu la.» Asaya, Mari a kadatara mey masa Yesu a ma løvar.

Yesu a wuztar vaw a gula anga hay

(Matiye 28.16-20; Mark 16.14-18; Luk 24.36-49)

¹⁹ Taa kwad ta luma nga Gudal a ngene, *gula hay nga Yesu makustakaya daa way daha. Ta gørcamata mey-slam hay sem ta lekøle maja ata fa zluram ta mahura hay nga *Jøwif hay. Ta', Yesu a daw a lecey a wuzlah ata, a løvtar: «Anja Gazlavay nga njadakwar daa zazay.»

²⁰ Masa anga ma løvtar la anda kede na, ta', a wuzdatara har anga hay ta cakay anga. Gula hay nga Yesu a, taa sømam la ga maja ata ma høtmar Bay Mahura ha. ²¹ Yesu aa guzltar saya, a løvtar: «Anja Gazlavay nga njadakwar daa zazay. Anda Papay, Bay Gazlavay, ma slørdiwa a bøla na, yah may, ya slørdakwar nga key sløra adaw.»

²² Masa anga maa guzltar anda kede la na, ta', a søfney a ray ata, a løvtar: «Tøbam *Mesøfney nga Gazlavay a ray akwar. ²³ Da ka mbøkdamara mebørey nga ndaw na, Gazlavay a mbøkðara la may. Ama da akwar ma mbøkdamara mebørey nga ndaw daa ba na, Gazlavay fa da mbøkðara daa ba may.»

Tuma a key yawa

²⁴ Yaw, daa masa Yesu ma wuztar vaw a gula anga hay na, *Tuma, masa ata ma zølmara Didim *, gula pal dasi gula

20:14 20.14 21.4; Lk 24.16 **20:17** 20.17 mølma adaw hay: Rm 8.29; Heb 2.11-12 **20:19** 20.19 9.22; 14.27; 20.1 **20:20** 20.20 19.34; 20.25, 27 **20:21** 20.21 17.18 **20:22** 20.22 14.16 **20:23** 20.23 Mt 18.18 * **20:24** 20.24 Didim: anda meløvey "cek nga dey".

anğa hay kuraw a ray a cew, anğa da wuzlah ata daa ba. ²⁵ Masa Tuma ma sawa la a wuzlah ata na, a ləvmar: «Ala ta hətmar Bay Mahura la.» Ama Tuma a mbədfatara, a ləvtar: «Da yah ma hətar vevek † nga mbəlek fa har nga medərey heyey daa ba, da yah ma pa bəz-mey-har adaw aa vevek nga mbəlek e daa ba, asaya, da yah ma pa har adaw aa cakay anğa daa ba na, ngene, ya fa da təba Yesu ta sləkdawa sem daa meməcey na, daa ba.»

²⁶ Luma pal fa dəba ha na, *gula hay nga Yesu a kusam aa way heyey saya. Tuma anğa da wuzlah ata dəba. Mey-slam hay magərcatakaya ta lekəle, ama Yesu ta' a sawa, a lecey a wuzlah ata, a ləvtar: «Anja Gazlavay nga njadakwar daa zazay.» ²⁷ Fa dəba ha, Yesu a ləvar a Tuma: «Təldərwa bəz-mey-har akah fedə, nəkta har adaw hay. Asaya, təldərwa har akah, pa aa cakay adaw. Mbəkda mekey yawa, təba ya ta sləkdawa sem daa meməcey.» ²⁸ Tuma a mbəfdara, a ləvar: «Kah na, Bay adaw Mahura, kah na, Gazlavay adaw!» ²⁹ Yesu a ləvar: «Kah ma təba mey a kedə na, maja kah ma hətya ta dey akah, ba diya? Maaya nga Gazlavay aa da ray ndəhay ma təbmara ya ta sləkdawa sem daa meməcey, masa kwa ta hətmaya ta dey ata daa ba.»

Mey da ray Mey-maaya-mawiya masa Janj ma wuzlala

³⁰ Yesu ta key maazla hay la ga mekele mekele meedey gula anğa hay, ama maazla hay a tabiya mawuzlalatakaya daa dərewel kedə daa ba. ³¹ Mey hay tabiya masa mawuzlalatakaya daa dərewel kedə na, ara amba ka təbmara, Yesu na, ara Bəzey nga Gazlavay, ara *ndaw masa Gazlavay ma wala nga ləhdata ndəhay. Anda kedə, da akwar fa təbmara mey anğa na, ka da hətam heter mendəvey ba ta fa anğa.

21

Yesu a wuztar vaw a gula anğa hay maasala

¹ Fa dəba ha dər nekədey na, Yesu a wuztar vaw a gula anğa hay saya. A wuztar vaw na, da mey dəhwa nga Tiberiyat. Ehe, mey da ray Yesu ma wuztar vaw a gula anğa hay a. ² Ata *Simanw *Piyer, *Tuma masa ata ma zəlmara Didim, Nataniyel ndaw da Kana daa hwayak nga *Galile, ta bəza hay nga Zebede, leŋ *gula hay nga Yesu cew mekele, ata tabiya daa slam a. ³ Simanw Piyer a ləvtar: «Ya daw la aa ewet.» Ndəhay siya kedə heyey a mbəfdamara, a ləvmar: «Ala may, ya diyam asi akah.» Da ray ngene, ta', a

20:24 20.24 Tuma: 11.16; 14.5; 20.27; 21.2 † **20:25** 20.25 vevek: vavay, vevelek **20:26** 20.26 20.19 **20:29** 20.29 1Pi 1.8 **20:30** 20.30 1.14; 2.11 **20:31** 20.31 3.15; 1Jn 5.13

diyam, a tɔpam aa kwambiwal. Tavaɗ tavaɗ ata daa ewet e, ama kwa ta kɔrzam daa ba.

⁴ Taa pɔrek masa pas fa bawa na, Yesu a daw, a njeɣ a mey dɔhwa ha. Ama gula anɣa hay ta sɔrmara ara anɣa na, daa ba. ⁵ Ta', Yesu aa guzltar, a lɔvtar: «Bɛz adaw hay, akwar ma kɔrzam ewet e la daw?» A mbɔɗdamara, a lɔvmar: «Ala ma kɔrzam daa ba.» ⁶ Yesu a lɔvtar saya: «Lamara *tabaw akwar, kɔzlamara ta dey nɣa zɔmay, ka kɔrzamawa la.»

Da ray nɣene, a kɔzlamara tabaw ata anda Yesu ma lɔvtar. A hɔtam ewet ga da hwaɗ a. A gwamara nɣa ɗaɗamɔrwa tabaw a, aa kwambiwal saba, maja ewet ga kalah da hwaɗ a. ⁷ Ta', gula masa Yesu ma wuɗa kalah heyey a lɔvar a Piyer: «Ara Bay Mahura!» Masa Simanɣw Piyer ma cɔnda ara Bay Mahura na, ta', a kɔzla zana fa vaw maja ta cɔkwa zana sem amba a kɔrzey ewet. Ta', a jɔvey daa kwambiwal gɔv! aa yam, a daw nɣada fa Yesu. ⁸ Yaw, gula hay nɣa Yesu siya na, ata gweegwe cay a rav-zazay, mendɔrey a wusa meeter temere saba. A diyam ta kwambiwal. Daa nɣene, fa ɗaɗamara tabaw ata marɔhkaya ta ewet ga da hwaɗ a heyey.

⁹ A bɔrɣamawa daa kwambiwal. Masa ata ma bɔrɣamawa cay na, a hɔtam zay-awaw ta ewet da ray a lej peɣ. ¹⁰ Yesu aa guzltar, a lɔvtar: «Hɔlmawa ewet masa akwar ma kɔrzamɔrwa nɣene nekɔɗey.» ¹¹ Simanɣw Piyer a tɔpeɣ aa kwambiwal a, ta', a ɗaɗarawa tabaw a marɔhkaya kaf! ta ewet hay ga mahura hay da hwaɗ a heyey. Ewet hay a tabiya temere ta kwakwar zlam a ray a maakar. Tabaw a marɔhkaya kaf!, ama kwa ta nɣɔrey daa ba. ¹² Yesu a lɔvtar: «Samawa, zɔmam cek.» Yaw, kwa gula pal da wuzlah ata ta key gɔɗan nɣaa cɔɗa kah na, wa na, daa ba gway, maja a sɔrmara fara fara ara Bay Mahura. ¹³ Yesu a nɣɔchey, a la peɣ heyey, a wunkatara a gula anɣa hay, asaya, a la ewet da ray zay-awaw, a vɔɗdatara. ¹⁴ Dɔga nɣa maslɔkɗawa nɣa Yesu daa memɔceɣ na, ta pas nɣene, ara nɣa dey maakar a masa anɣa ma wuztar vaw a gula anɣa hay.

Yesu aa cɔɗa Piyer

¹⁵ Masa ata ma ndɔvdamara mezɔmey cek cay na, Yesu aa cɔɗa *Simanɣw *Piyer, a lɔvar: «Simanɣw, bɔzey nɣa *Jan, ka wuɗya a fɔnta ndɔhay keɗe daw?» Piyer a mbɔɗɗara, a lɔvar: «Ahaw, Bay Mahura, ka fa sɔra ya wuɗka.» Yesu a

lëvar: «Nëkfatar dey fa ndøhay adaw hay, anda ndaw ma nëkfatar dey fa böz-tøbanj anja hay.» ¹⁶ Ta', Yesu a lëvar nja dey cew saya: «Simanjw, bözey nja Jan, ka wudya daw?» Piyer a mbøddara, a lëvar: «Ahaw, Bay Mahura, ka fa sèra ya wudka.» Yesu a lëvar: «Key mecækwer nja ndøhay adaw hay anda ndaw ma sækørey tøbanj anja hay.» ¹⁷ Ta', Yesu a lëvar nja dey maakar: «Simanjw, bözey nja Jan, ka wudya daw?» Piyer na, ray anja ta høbey sem maja Yesu maa cøfda nja dey maakar, a lëvar: «Ka wudya daw, ka wudya daw?» Ta', a mbøddara, a lëvar: «Bay Mahura, kah na, ka sèrta cek hay cøpa, ka fa sèra ya wudka.» Yesu a lëvar: «Nëkfatar dey fa ndøhay adaw hay anda ndaw ma nëkfatar dey fa tøbanj anja hay. ¹⁸ Yaw, ya fa løvka fara fara, daa masa kah daa gula akah na, ma diya vaw akah ngada pøkey na, kah ta ray akah. Ka fa daw kwa aa wura aa wura. Ama da kah ta key maraw cay na, ka da bangadata har akah hay amba ndaw mekele a diykawa vaw akah. A da handaka kwa aa slam masa kah ma wudfey nja daw ba.»

¹⁹ Ta mey a kefe na, Yesu a wudfey nja wuzda sækway nja memøcey nja Piyer. Piyer a da hølma Gazlavay ta fa memøcey anja ha. Fa døba ha, Yesu a lëvar a Piyer: «Sawa, søpya.»

Mey da ray gula masa Yesu ma wudfa kalah

²⁰ *Piyer a mbøfey dey fa døba, a da nøkey dey na, a ray gula masa Yesu ma wudfa kalah heyey. Gula ha fa søptar wurzay. Ara gula masa ma gønsley ngada fa Yesu daa masa ata fa zømam daf, maa cøfda, ma løvey: «Bay Mahura ma da vøldaka a har masa-gøra akah hay na, wa?» heyey.

²¹ Piyer ma høtar la na, ta', aa cøfda Yesu, a lëvar: «Bay Mahura, kaa ma da høtfar a gula kefe na, me?» ²² Yesu a mbøddara, a lëvar: «Da ya wudfey a njeý ta dey da bøla kefe haa kasl mavøhwa adaw na, mey akah da hwad a me? Kah na, sawa, søpya.»

²³ Mey a, a cøney fa ndøhay nja Yesu siya na, anda gula ha fa da møcey daa saba. Fara fara Yesu ta lëvar a Piyer, gula ha fa da møcey daa saba na, daa ba. Ama a lëvar na, «Da ya wudfey a njeý ta dey da bøla kefe haa kasl mavøhwa adaw na, mey akah da hwad a me?»

²⁴ Yaw, gula ha na, ara ndaw ma høtatørwa cek hay a kefe ta dey anja, ara anja ma wuzdatara a ndøhay, asaya, ara anja ma wuzlatørwa aa dferewel kefe may. Ala na, ya sømara mey hay a kefe ara mey hay masa fara fara.

21:15 21.15-17 ndaw ma nëkfatar dey fa böz-tøbanj anja hay: 10.14-16; SNM 20.28; 1Pi 5.2 **21:18** 21.18 2Pi 1.14 **21:19** 21.19 13.36 **21:20** 21.20 13.23, 25 **21:24** 21.24 15.27; 19.35

²⁵ Yesu ta key cek hay la mekele mekele ga. Anja da cek hay a mawuzlalatakaya cɔpa pal pal fa dɛrewel na, ya wulkey slam da bɛla keɛɛ ɲga pata dɛrewel hay a daa ba.

Slëra nga Ndëhay Meslërey nga Yesu Mey da ray ðerewel nga Slëra nga Ndëhay Meslërey

Derewel keðe ara ðerewel nga dey cew masa Luk ma wuzlala. A wuzda mezley nga Egëliz hay zleezle. Derewel e a zley ta mey da ray Gazlavay ma la Yesu a vad (fasëlawal 1) leŋ Mesëfney nga Gazlavay ma pawa salay a ray ndëhay nga Yesu (fasëlawal 2). Fa dëba ha, daa fasëlawal 3 haa 12, Luk aa guzley da ray ndëhay ma wuzdamara mey nga Yesu dëga da Jeruzelem haa a Samari. Ndëhay a na, ara ata Piyer, Etiyen leŋ Jak.

Fasëlawal 13 haa 20 aa guzley da ray Pawl mepëkey ngeeme, nga dey cew, leŋ nga dey maakar nga wuzey Mey-maaya-mawiya daa hwayak hay nga Gërek hay ta nga Rawma hay.

Fasëlawal 21 haa 28 aa guzley da ray sariya masa ndëhay Rawma hay ma kamara a Pawl maja Jëwif hay ma wudmara, a wudam nga këdmara vagay. Asaya, da ray bay-ray hay nga Rawma hay ma slërdamara Pawl a Rawm nga key sariya fa mey nga Bay Sezere.

Mey mahura daa ðerewel keðe na, ara mey ma lövey: «[...] ta pas masa Mesëfney nga Gazlavay ma da pawa salay a ray akwar na, ka hëtam gëdanj la. Fa dëba ha, ka da kam sede da ray adaw. Ka da kam sede teesed na, fa mey nga ndëhay da Jeruzelem, fa dëba ha, fa mey nga ndëhay da Jude, fa mey nga ndëhay da Samari, leŋ fa mey nga ndëhay da bëla tabiya.» (SNM 1.8)

Daa ðerewel e keðe na, mey mekele mekele daha nga vëley gëdanj a ndëhay:

Mey da ray mevëley cek a masa-viya hay (20.35)

Pawl a wuzey mey da ray Gazlavay (17.24-31)

Mey ngeeme

¹ Waa *Teyewfil,

Daa ðerewel adaw ngeeme na, ya ta wuzlalaka mey da ray Yesu la. Daa ðerewel e ya ta wuzlalatakawa cek hay tabiya masa Yesu ma kata la, leŋ mey masa anga maa sërkatadata a ndëhay, dëga ta pas masa anga ma zla slëra anga da bëla ²⁻³ haa kasl pas masa *Gazlavay ma la a vad. Masa *Yesu anga da bëla na, anga ta weley ndëhay

anğa hay meslërey la. Fa dëba ha, Yesu a, a mëcey, ta', a slëkdawa daa memëcey, a wuztar vaw a ndëhay anğa hay. Fa dëba nga maslëkdawa anğa daa memëcey na, ðar kwakwar mëfad, anğa fa wuztar vaw maaya maaya ta fa cek hay mekele mekele, amba ndëhay meslërey a, a sërmara fara fara anğa ta dey. Asaya, aa guzltar da ray mewey nga Gazlavay da ray ndëhay. A këtata da ray cek hay masa ata ma da kamara na, ta gëdan ma sawa ta fa *Mesëfney nga Gazlavay.

⁴ Ta pas langar daha na, Yesu fa zëmam ðaf daa slam a ta ndëhay anğa hay meslërey. Ta', a këtata, a lövey: «Papay a lövey a vëlkwar cek la. Ya ta kadakwara cay, ba diya? Njam daa berney nga *Jeruzelem fëde, sëkwmar a cek aha.

⁵ *Jan a katar *baptem a ndëhay na, ta yam, ama daa ðar hay nekëfey fëde, ka hëtam baptem la ta Mesëfney nga Gazlavay.»

Bay Gazlavay a la Yesu a vad

⁶ Ndëhay meslërey nga Yesu a makustakaya da cakay a, aa cëfdamara, a lövmar: «Bay Mahura, ka da diya hwayak nga *Israyel amba ka wey da ray a na, wure kefe daw?»

⁷ Yesu a mbëddatara, a lövtar: «Akwar na, mey akwar da hwad a me? Ara Papay ma pa pas a, ara anğa pal ma wa ðar a. ⁸ Ama ta pas masa *Mesëfney nga Gazlavay ma da pawa salay a ray akwar na, ka hëtam gëdan la. Fa dëba ha, ka da kam sede da ray adaw. Ka da kam sede teesëd na, fa mey nga ndëhay da *Jeruzelem, fa dëba ha, fa mey nga ndëhay da *Jude ta fa mey nga ndëhay da *Samari, lej fa mey nga ndëhay da bëla tabiya.»

⁹ Fa dëba ha Yesu ma ndëvda mey hay kefe la na, Gazlavay ta', a la a vad, ndëhay da cakay a fa nëkmara, mekwtene sërat! a sërta, a hëtmar Yesu a saba. ¹⁰ Ata fa nëkam dey a vad aa slam masa Gazlavay ma la Yesu a cënga. Wure wure ngene, ndëhay cew daha malacatakaya da wuzlah ata, ta zana mabara fa vaw, ¹¹ a lövmatar: «Akwar, ndëhay *Galile hay, akwar malacatakaya, fa nëkam dey ngada vad ngada vad na, maja me? Yesu masa Bay Gazlavay ma la da wuzlah akwar a vad kefe na, a vëhwa la, anda akwar ma hëtmar anğa ma daw ngada vad kefe.»

A lam ndaw mekele aa slam a nga Juda Iskariyawt

1:2-3 1.2-3 10.41; 13.31; 28.23; Lk 24.36-42, 46-51; 1Tm 3.16 **1:4** 1.4-5 Lk 3.16; 24.49; Jan 14.16 **1:6** 1.6 Lk 24.21 **1:7** 1.7 Mk 13.32 **1:8** 1.8 Lk 24.47-48; ka da kam sede da ray adaw: 1.21-22; 2.32; 3.15; 5.32; 10.39; Jan 15.27
1:9 1.9 Lk 24.51; Jan 6.62; 1Pi 3.22 **1:10** 1.10 Lk 24.4 **1:11** 1.11 Lk 21.27;
 CWJ 1.7

¹² Fa dëba ha, ndëhay meslërey nga Yesu a bërngamawa daa Aŋgwa nga *Awliviye. A vëhmawa a *Jeruzelem, aŋgwa ha dërenj daa ba, a key këlemeeter pal gway.

¹³ Masa ata ma wusmawa la a Jeruzelem na, ta', a tëpam aa way da ray way, aa slam masa ata ma kusam mandaw mandaw da hwaď a. Ndëhay meslërey a na, ara *Piyer, *Jaŋ, *Jak, *Andëre, *Fëlep, *Tuma, *Bartelemey, *Matiye, Jak bëzey nga Alfe, *Simanw, ndaw da wuzlah ndëhay ma wuďam nga lëhdamata ndëhay ata hay dasi har nga masagëra ata hay, leŋ Jud bëzey nga Jak. ¹⁴ Ata tabiya fa kusam mandaw mandaw nga dërey dangay a Gazlavay ta mevel pal. A kusam na, ta ŋgusay mekele mekele, ta *Mari, mamaŋ nga Yesu, leŋ ta mëlmanj nga Yesu hay.

¹⁵ Daa ďar hay a ŋgene, ndëhay ma tëba mey nga Yesu makustakaya daa slam a, a key temere ta kwakwar cew. Ta', Piyer a lecey a wuzlah ata, a lëvtar: ¹⁶⁻¹⁷ «Mëlma aďaw hay, Juda aŋga zleezle na, da wuzlah alëkwa, alëkwa masa Yesu ma walandakwar amba ya kakwa slëra ŋgada Bay Gazlavay. Ama ara aŋga ma wuzdatara cëved a ndëhay nga kërzey Yesu. Zleezle na, Bay *Davit taa guzley la ta gëdanj nga *Mesëfney nga Gazlavay da ray cek masa Juda ma da ka. Yaw, mey daa ďerewel nga Gazlavay a ŋgene ta key la fara fara anda mawuzlalakaya.»

¹⁸ Juda heyey, ta hëtey dala la maja cek malamba masa aŋga ma ka ha. Ta dala ha na, a hëďkada ley. Da ley aŋga ha, a tëďey, hwaď pëcakw! a pëckwey, tanday zad! a palah, pam! a mëcey. ¹⁹ Ndëhay da Jeruzelem tabiya ta cëndamara mey a la. Da ray ŋgene, a zëlmara ley a ta mey ata «Hakëldama,» anda melëvey, ley nga mambaz.

²⁰ Piyer a lëvey saya: «Mawuzlalakaya daa ďerewel nga *Pësam hay, a lëvey:

“Anja way aŋga, nga tërey yidenj,
ndaw nga njeý a hwaď a ba.”

Yaw, mawuzlalakaya saya, a lëvey:

“Si ndaw mekele a la slëra aŋga.”

²¹⁻²² «Da ray ŋgene, maaya na, ndaw mekele a sawa asi alëkwa amba a key sede da ray maslëkďawa nga Bay Mahura Yesu. Si ya walakwa ndaw masa ala ma pëkam la bama ta ata Yesu aa wura aa wura. Ndaw masa alëkwa ma da walakwa na, si ndaw aha aŋga ta ala dëga ta pas masa *Jaŋ-Baptis ma kar *baptem a Yesu haa kasl pas masa Gazlavay ma la Yesu a da wuzlah alëkwa a vad.»

²³ Fa dëba ha masa ata ma cëdamara mey nga Piyer la na, a lam ndëhay cew. Ara ata *Jawzef, masa ndëhay ma zëlmara Barsabas, mehëlmey Justus, lej Matiyas. ²⁴ Ta', a dëram danğay a Bay Gazlavay, a lëvam: «Bay Gazlavay, ka sërta mevel nga ndëhay tabiya, wuzndar ndaw pal dasi ndëhay cew kedë masa kah ma wudëy ²⁵ nga key *ndaw-meslërey nga Yesu aa slam a nga Juda. Juda na, ta mbëkda slëra ha sem nga daw aa slam masa anğa ma wudëy.»

²⁶ Ta', a wuzlalamata mezëley ata cewete nga weley ndaw pal dasi ata. Ma da bawa na, mezëley nga Matiyas. Da ray nğene, a pamara Matiyas a dey ndëhay meslërey kuraw a ray a pal heyey.

2

Mesëfney nga Gazlavay a pawa salay a ray ndëhay nga Yesu

¹ Masa pas nga gwagway nga *Pantekwat ta wuswa cay, ndëhay ma tëba mey nga Yesu tabiya makustakaya daa slam a. ² Wure wure nğene, a cëdamara cek ma kawa ta da vad anda memed maa bërey. Cek aha a rëhda way masa ata manjatakaya da hwad a heyey. ³ A hëtam cek anda neneh hay nga awaw ma gëdëy. Neneh hay a, a wunkam, a njam a ray ata pal pal tabiya. ⁴ Ata tabiya marëhtakaya ta *Mesëfney nga Gazlavay. A zlamar meeguzley ta mey hay mekele mekele masa ata ma sërmara ba, anda Mesëfney a ma vëldatara nğaa guzley.

⁵ Yaw, da *Jeruzelem e na, *Jëwif hay masa ma sëpam cëved nga Gazlavay ta mevel pal fetedë daha. A samawa daa hwayak hay da bëla tabiya. ⁶ Ata ma cëdamara cek maa bërey heyey la na, a kusmawa ga. Ata tabiya a rëzlam maja kwa waawa fa cënda mey anğa fa ndëhay ma tëba mey nga Yesu a, ata faa guzlam ta mey hay a. ⁷ A rëzlam, a wulkam, aa cëfdam vaw da wuzlah ata, a lëvam: «Ndëhay maa guzlam mey kedë, ata tabiya ndëhay daa hwayak nga *Galile, ba diya? ⁸ Kaa kwa waawa fa cënda mey anğa fa ndëhay a faa guzlam na, kwara?»

⁹ «Alëkwa fedë na, ndëhay ma samawa daa hwayak nga Parte, daa hwayak nga Medi ta daa hwayak nga Elam, daa hwayak nga Mezapawtami, daa hwayak nga *Jude, daa hwayak nga Kapadëwas, daa hwayak nga Panw, daa

1:24 1.24 Jan 2.24-25 **1:26** 1.26 MM 16.33 **2:1** 2.1 Lev 23.15-21; Mew 16.9-11 **2:3** 2.3-4 Lk 3.16 **2:4** 2.4 Ata tabiya marëhtakaya ta Mesëfney nga Gazlavay: 4.31; 6.3, 5; 7.55; 8.17; 10.44; 11.15, 24; 13.9; 15.8; 19.2, 6; meeguzley ta mey hay mekele mekele masa ata ma sërmara ba: 4.31; 10.45-46; 19.6; 1Kwr 12.10; 14.2-12 **2:7** 2.7 1.11

hwayak nga Azi, ¹⁰ daa hwayak nga Fërizi, daa hwayak nga Pamfili, daa hwayak nga *Ejip, leŋ daa hwayak nga Libi masa gweegwe ta berney nga Siren. Asaya, da wuzlah alëkwa na, ndëhay ma samawa da *Rawm daha, ¹¹ ndëhay ma samawa da Këret daha, ta ndëhay Arap hay daha may. Da wuzlah alëkwa, siya hay ara ndëhay daa sëkway nga Jëwif hay, ta siya hay ma mbëzam nga sëpey kwakwas nga Jëwif hay. Ama alëkwa tabiya, ya fa cëndakwa ata faa guzlam ta mey hay mekele mekele masa daa hwayak alëkwa da ray slëra mahura masa Gazlavay ma ka!»

¹² Anda keŋe na, ata tabiya a rëzlam, a sërmara nga key kwara ba, aa guzlam da wuzlah ata, a lëvam: «Cëk aha keŋe a wuŋey nga lëvey kwara?» ¹³ Ama ndëhay siya hay, aa sanŋëram a ray ndëhay ma tëba mey nga Yesu kaa heyey, a lëvam: «Ata tabiya mawatakaya ta wuzam.»

Piyer a wuztar mey a ndëhay makustakaya

¹⁴ Da ray ŋgene, *Piyer ta', a lacam ta ndëhay meslërey kuraw a ray a pal heyey, aa guzley ta gëdan fa mey nga ndëhay makustakaya heyey, a lëvtar: «Akwar ndëhay *Jëwif hay daa hwayak nga *Jude, leŋ akwar ndëhay tabiya ma samawa daa hwayak hay mekele mekele a *Jeruzelem, jëkam slëmay maaya maaya fa mey masa yah ma da wuzdakwara keŋe amba ka sërmara mabara nga mey a. ¹⁵ Ndëhay keŋe fa wam anda akwar ma lëvam na, daa ba, maja anŋa kaa na, pas ŋгаа përek, pas ma hëla maaca ðagay. ¹⁶ Ama wure keŋe cëk aha keŋe a key na, anda Jëwel, *ndaw ma tëla mey nga Gazlavay zleezle, ma lëvey:

¹⁷ "Gazlavay a lëvey,

Ta pas masa bëla gweegwe cay a ndëvey na,

ya vëltar Mesëfney aŋaw la a ndëhay tabiya.

Da ray ŋgene, bëz akwar hay mezële ta dam akwar hay,

a tëram la nga ndëhay ma tëla mey aŋaw hay.

Gula akwar hay na, ya da wuztar cëk hay mawiya

masa Yah ma da kata.

Maraw hay da wuzlah akwar may,

mesëfney a katar la amba ya wuztar cëk hay.

¹⁸ Ahaw, daa ðar hay a ŋgene,

ya vëltar Mesëfney aŋaw la a ndëhay

ma ka slëra aŋaw hay,

mezële hay ta manŋusa hay tabiya,

a da tëram *ndëhay ma tëla mey aŋaw hay.

¹⁹ Ya key maazla hay la da gazlavay da vad,

ya key cëk hay ma rëzla ndaw la da ray hwayak.

Mambaz, ta awaw, leŋ kakas a bamawa la.

- 20 Pas fa da wedey daa saba,
 kiya a da mbëdëy magaza anda mambaz.
 Fa dëba ha, Bay Mahura a vëhwa la
 amba a key sariya da bëla.
 Ta pas a ñgene, ndëhay a hëtmär gëdanj anja la,
 a da sërmara pas a ara pas mahura ma fëna siya hay.
- 21 Anda kefe, kwa waawa maa cëfda Bay Mahura
 nga lëhda na, Bay Mahura a lëhda la.”»
- 22 Piyer a lövey saya: «Akwar, *Israyel hay, jëkfamaya
 slëmay fa mey adaw kefe. Yesu ndaw *Nezeret na,
 Gazlavay ta wuzdakwara la anja na, wa. Ka sërmara
 fara fara maja Gazlavay ta key maazla hay la mahura ma
 rëzla ndaw ta har anja da wuzlah akwar. Maazla hay a
 na, fa wuzdakwara gëdanj nga Gazlavay aa ta Yesu a.
- 23 Ndaw aha, Gazlavay ta vëlda la a har akwar anda aa ma
 wudëy. Dëga zleezle Gazlavay ta sëra cek masa akwar ma
 da kamara sem. Cek aha na, ara akwar ma vëldamara Yesu
 a har ndëhay ma sëra Gazlavay ba, amba a këdmara vagay
 fa hwadam mazlangalakaya heyey. Akwar ta këdmara la,
 24 ama Gazlavay ta slëkdadërwa sem, a badërwa daa banay
 nga memëcey maja gëdanj nga memëcey a gwa a ray a ba.
- 25 Ehe, zleezle Bay *Davit maa guzley da ray Yesu, a lövey:
 “Ya fa hëtar Bay Mahura mandaw mandaw fa mey adaw,
 anja manjakaya ta har-zëmay adaw amba ya zlurey
 ba.
- 26 Da ray ñgene, mevel adaw faa sëmey,
 ya zley walay ta meesëmey.
 Kwa ya mëcey la na,
 ya fa sëkwa cek masa Gazlavay ma da kayawa,
- 27 ya da njeý ta zazay maja ya sëra kah, Bay Gazlavay,
 ka mbëkda mesëfney adaw
 aa slam nga ndëhay mamëctakaya daa ba,
 kwa ka fa da mbëkda vaw adaw,
 yah, ndaw ma ka slëra akah,
 nga zey daa cëvay daa ba may.
- 28 Ka ta wuzdiwa cëvedj nga hëtey heter mendëvey ba la,
 Ya daa sëmey ga, maja kah manjakaya ta yah.”»
- 29 Piyer a lövtar saya: «Mëlma adaw hay Jëwif hay, ya
 gwa yaa guzlkwar mey masa fara fara da ray Davit e, Davit
 masa papanj nga papa alëkwa zleezle. Ya fa lövkwar anja
 ta mëcey sem, ta pëshamara sem aa cëvay. Cëvay anja ha,
 haa kasl tasana, aa daha fefe. 30 Anja na, ndaw ma tëla

2:21 2.21 22.16; Rm 10.13 2:22 2.22 Lk 24.19; Jan 3.2; SNM 2.43; 4.30;
 5.12-16; 6.8; 14.3; 15.12; 19.11-12; Rm 15.19; Heb 2.4 2:23 2.23 3.15; 4.28;
 7.52; Lk 23.33; 1Tes 2.15 2:24 2.24 3.15; Lk 24.5 2:25 2.25-28 Ps 16.8-11
 2:27 2.27 13.35 2:29 2.29 1Bay 2.10; SNM 13.36

mey nga Gazlavay, a sëra Gazlavay ta jëwey mey la ta anga, a lëvar: “Fa dëba akah, ya da pey ndaw pal daa sëkway akah nga key bay anda kah.” ³¹ Da ray ngene, Davit a sëra cek masa Gazlavay ma da ka ngada fa mey. A sëra *ndaw masa Gazlavay ma wala nga lëhdata ndëhay na, Gazlavay a slëkcfadërwa la daa memëcey. Davit e, aa guzley da ray maslëkcfawa nga *Këriste daa memëcey a, a lëvey Gazlavay ta mbëkda ndaw aha da wuzlah ndëhay mamëctakaya daa ba, vaw anga ta zey daa cëvay daa ba. ³² Yesu kefe na, Gazlavay ta slëkcfadërwa sem daa memëcey, ala tabiya fa kam sede da ray a. ³³ Gazlavay ta la sem a vad, a pa aa slam maaya a har-zëmay anga. Gazlavay Papan, ta’, a vëlar Mesëfney anga masa anga ma lëvar a da vëldara. Ta’, Yesu a slërdandakwara Mesëfney a, a ray alëkwa. Ara Mesëfney a ma vëldakwar gëdan nga key cek masa akwar ma hëtmär ta masa akwar ma cëndamara wure kefe. ³⁴ Ya sërkwa Davit ta ray anga ta tëpey a vad na, daa ba. Ama aa guzley da ray Këriste zleezle, a lëvey:

“Bay Gazlavay a lëvar a Bay adaw Mahura:

Sawa, njeý ta har-zëmay adaw

³⁵ haa kasl pas masa yah ma da pata masa-gëra akah hay asi salay akah.”»

³⁶ Piyer a lëvtar saya: «Si Israyel hay tabiya a sërmara fara fara, ndaw masa Gazlavay ma pa nga Bay Mahura ta nga ndaw masa ma da lëhdata ndëhay na, ara Yesu, ndaw masa akwar ma dërmara fa hwadam mazlanjalakaya heyey.»

³⁷ Ndëhay makustakaya heyey, a cëndamara mey a kefe na, mevel a tëdftar ga. A lëvmar ngada Piyer ta ngada ndëhay meslërey siya hay: «Kaa ya da kam na, kwara, mëlma ala hay?»

³⁸ Piyer a mbëddatara, a lëvtar: «Mbëddamara menjey akwar, sëpmara Gazlavay ta mevel pal. Cacëfdam *baptem ta mezëley nga Yesu Këriste, amba Gazlavay a mbëkdakwara mebërey akwar. Anda kefe, Gazlavay a vëlkwar Mesëfney anga la. ³⁹ Gazlavay a lëvey, a vëldatara Mesëfney anga la a ndëhay. A lëvey a da vëldakwara ngada akwar, ngada bëz akwar hay, ta ngada ndëhay masa dëren, ndëhay tabiya masa Gazlavay, Bay alëkwa, ma da zëlta.»

2:30 2.30 2Sam 7.12-13, 16 **2:31** 2.31 Ps 16.10 **2:32** 2.32 1.8 **2:33** 2.33 aa slam maaya a har-zëmay nga Gazlavay: 2.34; 3.13; 5.30-34; 7.55-56; Mk 16.19; Lk 20.42; 22.69; Rm 8.34; Ef 1.20; Kwa 3.1; Heb 8.1; 1Pi 3.22; Gazlavay Papan, ta’, a vëlar Mesëfney anga masa anga ma lëvar a da vëldara: 1.4; Jan 14.16-17; 15.26 **2:34** 2.34-35 Ps 110.1; Lk 20.42-43; Heb 1.13 **2:36** 2.36 3.15 **2:37** 2.37 16.30; Lk 3.10, 12, 14 **2:38** 2.38 3.19; Lk 3.3 **2:39** 2.39 Iz 57.18-19; Ef 2.17

⁴⁰ Ta', Piyer aa guzltar mey mekele mekele saya amba a tëbmara mey annga nga vëltar gëdan. A lëvtar: «Wudkam ta ndëhay malamba da bëla wure kedë, amba Bay Gazlavay a lëhdakwar daa sariya ma da kërzata.» ⁴¹ Ndëhay ga da wuzlah ndëhay a ngene, a tëbmara mey nga Piyer, ta', a hëtam baptem. Ta pas ngene, ndëhay a key gabal maakar ma samawa a dey ndëhay ma tëba mey nga Yesu.

Menjey nga ndëhay ma tëba mey nga Yesu

⁴² Mandaw mandaw ndëhay ma tëba mey nga Yesu fa jëkam slëmay fa meesërkedey nga ndëhay annga hay meslërey ta mevel pal, a njam macëmkaya pal anda mëlman hay, fa wunam peñ nga sërfezey memëcey nga Yesu, fa dëram dangay a Gazlavay daa slam a. ⁴³ Ndëhay meslërey hay a fa kam maazla hay mekele mekele nga wuzdërwa gëdan nga Bay Gazlavay aa ta ata. Ndëhay tabiya a rëzlam da ray maazla hay a, a namar ray a Bay Gazlavay maja. ⁴⁴ Ndëhay ma tëba mey nga Yesu na, macëmkaya day letek, a wunkamara zleley ata hay da wuzlah ata. ⁴⁵ Anda melëvey, a hëdkadamata ley ata hay ta cek ata hay, a wunkamara dala ha da wuzlah ata tabiya. Kwa waawa a hëtey cek masa tëde nga wusa. ⁴⁶ Mandaw mandaw fa kusam aa *Way-mekey-kwakwas nga Gazlavay ta mevel pal. Da way ata hay na, a zëmam daf daa slam a ta meesëmey, ta mevel maaya. ⁴⁷ Ata fa hëlmamara Gazlavay. Ndëhay tabiya aa hëmdamata. Mandaw mandaw Bay Mahura fa zëlwa ndëhay mekele mekele masa ma lëham sem daa meberëy ngadaa dey ata.

3

Ndaw maahëlbakaya ma hëtar salay annga

¹ Ta pas langar daha, ata *Piyer ta *Jan fa diyam aa *Way-mekey-kwakwas nga Gazlavay nga dërwa dangay. Ara ta pas ngaa kwad, pas tëde medërey-dangay nga *Jëwif hay.

² Gweegwe ta mey-mbew nga Way-mekey-kwakwas a, mey-mbew ma zëlmara «Mey-mbew Membey,» ndaw daha manjakaya fetedë. Ndaw aha, maahëlbakaya dëga nga mayawa annga. Mandaw mandaw ndëhay fa handamërwa, a njadamara fetedë, amba a rëkey dala fa ndëhay ma mbëzam aa Way-mekey-kwakwas a. ³ Ta pas ngene, ndaw aha a hëttatar ata Piyer ta Jan fa diyam aa Way-mekey-kwakwas a. Ta', aa cëdfafatar dala. ⁴ Ata Piyer ta Jan

a nëkfamara, Piyer a lëvar: «Nëkfandar.» ⁵ Ndaw aha a nëkfata maaya maaya, a wulkey daa ray anja, a lëvey: «A da vëlmaya cek.» ⁶ Ama Piyer a lëvar: «Dala da har adaw na, daa ba sëlak, ama cek masa da har adaw na, ya vëldakawa la. Ta gëdanja nga Yesu *Këriste, ndaw *Nezeret, ya fa lëvka, slëkdfey, daw ta salay akah.» ⁷ Ta', Piyer a kërza fa har-zëmay, a slëkdfada. Wure wure ngenë, salay nga ndaw aha, ta jerey cay. ⁸ Ta', a lecey, a jëvey, a zlar madaw. A mbëzam aa Way-mekey-kwakwas nga Gazlavay ta ata Piyer ta Janj heyey. Anja fa daw, fa jëvey, fa hëlma Gazlavay. ⁹ Ndëhay masa daa Way-mekey-kwakwas a tabiya a hëtmar anja fa daw, fa hëlma Gazlavay. ¹⁰ A sërmara ara ndaw masa salay maahëlbakaya ma njeý fa Mey-mbew Membey nga rëkey heyey. Ata tabiya a rëzlam ga da ray cek ma key ta anja, a sërmara cek masa ata ma da kam ba.

Piyer a wuzey mey daa Way-mekey-kwakwas nga Gazlavay

¹¹ Ata *Piyer ta *Janj lej ndaw masa salay maahëlbakaya heyey, ata dasi balak nga *Way-mekey-kwakwas nga Gazlavay mezëley «Balak nga *Salamanjw.» Ndaw aha, a gëmey nga mbëkdata ata Piyer ta Janj ba. Ndëhay tabiya fetede a hwamawa ngada fa ata, maja a rëzlam ga da ray ndaw masa salay maahëlbakaya heyey.

¹² Masa Piyer ma hëtatar ndëhay fa samawa na, a lëvtar: «Akwar ndëhay *Israyel hay, ka rëzlam anda kedë na, maja me? Ka nëkfamandar me? Ka wulkam ndaw kedë salay anja a jerey nga daw kaa na, ara ta gëdanja ala daw, da daa ba, maja ala ma kam cek maaya ta cëved e fa mey nga Gazlavay daw? Kay, këne ba! ¹³ Ara Gazlavay ma mbëlda ndaw aha, Gazlavay masa *Abëraham, *Izak, lej *Jakwap, papañ nga papa alëkwa hay zleezle, ma namar ray. Ara Gazlavay ma wuzdandakwara anja fa hëslar ray a Yesu, ndaw ma ka slëra anja. Akwar ta ray akwar, ka ta vëldamara Yesu a la a har mahura hay, kwa Pilat a wufey nga mbëkda, ama akwar ta tëfmara daa ba. ¹⁴ Yesu na, ara ndaw pal masa maaya ma sawa ta fa Gazlavay. Ama akwar ka wufmara ba, ka lëvmar a Pilat na, nga pëskakwar ndaw ma këfa ndaw vagay jak. ¹⁵ Anda kedë, ndaw ma vëltar heter a ndëhay jak na, akwar ta këfmara sem, ama Gazlavay ta slëkdfadërwa sem daa memëcey. Ala ta ray ala fa kam sede da ray maslëkdawa anja ha. ¹⁶ Ndaw masa

akwar ma hëtmär da cakay adaw kefe na, ka sërmara. Salay anğa a jerey na, ara ta gëdanğ nga Yesu, maja ala ma pamara Yesu a nğa ndaw ala fara fara. Maja ala fa pamara Yesu nğa ndaw ala fara fara na, mbal! a mbëley maaya maaya anda akwar tabiya ma hëtmär ta dey akwar kefe.

¹⁷ «Ama wure kefe, mëlma adaw hay, ya sëra cek masa akwar ta mahura akwar hay ma kamara a Yesu na, a key ka sërmara ba. ¹⁸ Cek aha ma key kefe na, Gazlavay ta wuzda la ta mey ndëhay ma tëla mey anğa hay zleezle, a lëvey, si cëma *Këriste masa anğa ma da slërdërwa na, a sërey banay. ¹⁹ Maja nğene, ya fa lëvkwar: mbëfdamara menjey akwar; mbëfdmawa dey nğada fa Bay Gazlavay, amba a mbëkdakwara mebërey akwar. ²⁰ Anda kefe, Gazlavay a mëskadakwar vaw la. A slërkwar Këriste la, anda melëvey, Yesu, ndaw masa aa ma wala nğa lëhdakwar dëga zleezle heyey. ²¹ Wure kefe si Yesu a njawa da gazlavay da vad dğagay, haa kasl pas masa Gazlavay ma da dıyta cek hay tabiya mawiya anda anğa ma lëvey zleezle. Gazlavay taa guzley la da ray mey a ta mey ndëhay ma tëla mey anğa hay. ²² Ara anda kefe *Mawiz maa guzley zleezle, a lëvey: “Bay Gazlavay masa akwar ma namar ray, a da slërkwar *ndaw ma tëla mey anda yah. Ndaw a na, ara ndaw daa sëkway akwar anda yah may. Mey tabiya masa anğa ma daa guzldakwara na, jëkam slëmay fa vëda.

²³ Kwa waawa ma cënar mey a ndaw a ba na, Gazlavay a bada la da wuzlah ndëhay anğa hay, nğaa zëdfey.”

²⁴ «Yaw, fara fara, ndëhay ma tëla mey nğa Gazlavay ga, dëga fa *Samiyel ta ndëhay ma tëla mey nğa Gazlavay mekele mekele fa dëba anğa, ata tabiya ta wuzdamara mey da ray cek hay masa ma kam wure kefe la. ²⁵ Mëlma adaw hay, Gazlavay maa guzley ta mey ndëhay ma tëla mey anğa hay kefe na, ara nğada akwar. Gazlavay a jëwam mey ta papa alëkwa hay zleezle, a lëvar a Abëraham: “Ya pëstar mey la a ndëhay da bëla tabiya ta fa sëkway akah.” *Mejëwey-mey a kefe na, ara nğada akwar may. ²⁶ Anda kefe, Gazlavay ta wuzdakwara Yesu, ndaw ma ka slëra anğa la. A slërdërwa na, nğada akwar dğagay. A slërdërwa amba a kakwar maaya, nğa mbëfdakwara menjey akwar maaya ba nğene.»

4

Ata Piyer ta Janğ fa mey nğa ndëhay ma ka sariya nğa

3:16 3.16 Mt 9.22 **3:17** 3.17 Lk 23.34; 1Tm 1.13 **3:18** 3.18 5.42; Lk 24.27, 44-46 **3:19** 3.19 2.38 **3:22** 3.22-23 Mew 18.15, 19; SNM 7.37 **3:24** 3.24 3.18 **3:25** 3.25 MC 12.3; Gal 3.8, 16 **3:26** 3.26 13.46; 18.6; Rm 1.16

Jëwif hay

¹ Masa ata *Piyer ta *Janj faa guzlmatar a ndëhay makustakaya heyey na, ndëhay ma ka kwakwas nga Gazlavay, ta *bay-ray nga ndëhay ma jëdfa Way-mekey-kwakwas, lej ndëhay *Saduse hay, a samawa a cakay ata. ² Mevel fa catar maja ata Piyer ta Janj faa sërkadamata ndëhay, a lëvmatar ndëhay mamëctakaya a da slëkdfamawa daa memëcey maja Yesu ta slëkdfawa sem daa memëcey.

³ Mahura hay heyey, ta', a kërzamata ata Piyer ta Janj a, a handamata, a gërcamata aa fërsëne. Ama ta kamatar sariya ta pas ñgene daa ba, maja pas daa saba. ⁴ Ta ñgene he cëpa, ndëhay ga da wuzlah ndëhay makustakaya ma cëndamara mey nga Piyer heyey ta tëbmara mey nga Yesu la cënga. Anda kefe, ndëhay ma tëba mey nga Yesu ta sëkam la a dey a, a key gabal zlam.

⁵ Pepërek e, bay-ray hay nga *Jëwif hay, ta mahura hay nga Jëwif hay, lej *ndëhay maa sërkada kwakwas nga Mawiz, a kusam fetede da *Jeruzelem. ⁶ Da wuzlah ndëhay makustakaya ha na, ara ata Han, *ndaw mahura da ray ndëhay ma ka kwakwas nga Gazlavay, Kayif, Janj, Alekzandëre lej ndëhay siya tabiya da way Han. ⁷ Ta', a handamatërwa ata Piyer ta Janj heyey, a lacadamata fa mey ata, ndaw masa ma hëtar salay anga heyey aa da cakay ata. A cacëdfamata ata Piyer ta Janj, a lëvmatar: «Ka mbëldamara ndaw masa salay maahëlbakaya kefe na, ta gëdanj wura? Ma vëldakwara gëdanj nga key maazla kefe na, wa?»

⁸ Piyer, marëhkaya ta *Mesëfney nga Gazlavay, ta', a mbëdfatara, a lëvtar: «Akwar, bay-ray hay ta mahura ala hay, ⁹ kaa cëdfamandar tasana maja ala ma kam cek maaya ñgada ndaw maahëlbakaya kefe, daw? Kaa cëdfamandar, ndaw aha a hëtar salay anga na, kwara, ba diya? ¹⁰ Yaw, akwar cëpa ta ndëhay *Israyel hay tabiya, si ka sërmara ndaw malacakaya fa mey akwar kefe na, a hëtar salay anga ta gëdanj nga Yesu *Këriste, ndaw *Nezeret. Ara anga masa akwar ma dërmara fa hwadam mazlangalakaya nga mëcey, ama Gazlavay ta slëkdfadërwa sem daa memëcey.

¹¹ Mawuzlalakaya daa dërewel nga Gazlavay da ray Yesu, a lëvey:

“Anjwa masa akwar, ndëhay ma lëma way,
 ma këzlamara ta cakay na,
 anja ara anjwa maaya, ma fënta siya hay jak.”

4:1 4.1 Lk 22.4, 52 **4:1** 4.1-2 ndëhay Saduse hay: 5.17; 23.8; Lk 20.27 **4:2** 4.2 2.24; 4.33; 17.18; 26.23 **4:3** 4.3 5.18 **4:4** 4.4 2.41 **4:7** 4.7 Lk 20.2
4:8 4.8 2.4 **4:10** 4.10 3.6; 3.15 **4:11** 4.11 Ps 118.22; Lk 20.17; 1Pi 2.4-7

¹² Ahaw, ya fa lëvkwar, Gazlavay a lëhdata ndëhay daa meberëy na, si ta fa Yesu gway. Ndaw mekele da bëla kefe masa Gazlavay ma vëlar gëdan nga lëhey ndëhay daa meberëy na, daa ba sëlak.»

¹³ Mahura hay ma sla yawa nga Jëwif hay fetefe heyey na, a nëkmara na, ata Piyer ta Jan fa zluram daa ba sëlak. A rëzlam ga, maja a sërmara, ata Piyer ta Jan, ara ndëhay anda siya hay gway, ta jangam daa ba. A sërfadamara ata Piyer ta Jan ta pëkam la ta ata Yesu. ¹⁴ Masa mahura hay ma sla yawa ha ma hëtmär ndaw masa ma hëtar salay anga heyey malacakaya da cakay ata Piyer ta Jan na, kwa ta gwamara nga mbëddamatara daa saba. ¹⁵ Da ray ngene, mahura hay a, a badamatërwa la daa way a, a zlamar mesley yawa da wuzlah ata. ¹⁶ A lëvam: «Ya da kadamatakwa ndëhay kefe na, kwara? Maja ndëhay da Jeruzelem tabiya a sërmara fara fara Gazlavay ta key maazla mahura la ta fa ata. Ya gwakwa ya rëskwa maazla ha kefe ba. ¹⁷ Ama amba mey kefe a daw fa mey fa mey saba, asaya amba ndëhay mekele a cëndamara ba na, si ya tëktakwa ndëhay cew kefe. Ya tëktakwa a da wuzdamara mey da ray Yesu a ndëhay saba sëlak.»

¹⁸ Ta', a zëlmata saya, a tëkmata ngaa sërkedey ndëhay da ray mey nga Yesu, asaya, a tëkmata kwa nga key mafay nga maaya ta ndëhay da ray Yesu. ¹⁹ Ama ata Piyer ta Jan a mbëddamatara, a lëvmatar: «Akwar ta ray akwar, nëkmara mey kefe cey. Maaya fa mey nga Gazlavay na, ya tëbam mey akwar da ray mey nga Gazlavay daw? ²⁰ Ala na, si cëma yaa guzlam da ray cek hay masa ala ma hëtmär ta dey ala ta masa ala ma cëndamara ta slëmay ala.»

²¹⁻²² Mahura hay ma sla yawa nga Jëwif hay kaa heyey ta hëtam mey nga sërdamata banay daa ba, maja ndëhay tabiya fa hëlmamara Gazlavay maja maazla ha. Ndaw masa ma hëtar salay anga ta maazla heyey, mevey anga a fëna kwakwar mëfad. Maja mahura hay a ta hëtam mey da ray ata daa ba na, a kamatar mey ta gëdan saya, ta' a mbëkdamata.

Medërey-dangay nga ndëhay nga Yesu

²³ Fa dëba ha, mahura hay ma sla yawa nga *Jëwif hay heyey ma mbëkdamata ata *Piyer ta *Jan la na, ta', a vëham fa ndëhay ata hay. A kadamatara mey masa *bay-ray hay nga ndëhay ma ka kwakwas nga Gazlavay ta mahura hay nga Jëwif hay kaa heyey ma lëvmatar. ²⁴ Ndëhay ata hay a, a jëkfamatar slëmay. Ata tabiya ta', a dëram dangay ngada

Gazlavay ta mevel pal, a lëvam: «Bay Gazlavay, Mawaca-waca, ara kah ma lëma slam da vad ta cek hay da hwađ a, ara kah ma lëma slam da hwayak ta cek hay da hwađ a, ara kah ma ka bëlay ta cek hay da hwađ a. ²⁵ Ara kah maa guzley zleezle ta mey ndaw akah, *Davít, papaŋ nga papa ala. Ka wuzdara ta fa Mesëfney akah amba a lëvey:

“Ndëhay masa Jëwif hay ba fa yam mey na, maja me? A slam yawa nga tede nga nësey Bay Gazlavay na, maja me?”

²⁶ Bay hay da bëla keđe fa cakalam mey, mahura hay fa kusam nga key vëram ta Bay Gazlavay leŋ ta ndaw masa aŋga ma wala.”

²⁷ Ahaw, cek aha ta key la anda keđe. Fara fara, Bay *Herawt ta *Pawns Pilat ta ndëhay masa Jëwif hay ba, ta *Israyel hay, ata tabiya ta kusam la daa berney a keđe, da ray Yesu, ndaw ma ka slëra akah masa kah ma wala nga lëhdata ndëhay.

²⁸ Ata ma kamata cek hay tabiya keđe na, a kamara anda kah Bay Gazlavay ma wufey nga ka ta gëdaŋ akah dëga zleezle. ²⁹ Wure keđe, Bay Gazlavay, nëka, ata fa kamandar mey ta gëdaŋ. Vëlndar gëdaŋ ŋgada ala, ndëhay ma ka slëra akah hay, nga wuzey mey akah ta mandërzay daa dey ba sëlak. ³⁰ Wuzdërwa gëdaŋ akah! Mbëldata masa-macay hay, key maazla hay nga wuzwa gëdaŋ akah aa ta ala, ta gëdaŋ nga Yesu, ndaw ma ka slëra akah.»

³¹ Ata ma ndëvdamara medërey-danğay la na, slam masa ata ma kusam da hwađ a, a wusey gëđ-ged. Ata tabiya marëhtakaya ta *Mesëfney nga Gazlavay, a wuzdamara mey nga Gazlavay ta mandërzay daa dey saba.

Ndëhay nga Yesu a jënam vaw da wuzlah ata

³² Ndëhay ma tëba mey nga Yesu tabiya a njam mewulkey ata letek, mevel ata macëmkyaya pal. Ndaw masa ma lëvey: «Zleley ađaw na, yah pal ma wa» na, daa ba. Ama a wunkamara zleley ata hay da wuzlah ata. ³³ Ndëhay meslërey nga Yesu a kam sede da ray maslëkdawa nga Bay Mahura Yesu daa memëcey na, ta gëdaŋ nga Gazlavay. Ata tabiya, Bay Gazlavay ta pëstar mey la ga. ³⁴ Da wuzlah ata na, kwa ndaw ma hurey cek mezëmey daa ba. Ndaw masa ley aŋga daha, da daa ba, way aŋga daha na, a hëdkada. A handërwa dala ha ³⁵ a har ndëhay meslërey a. Ndëhay meslërey a, a wunkamatara dala ha ŋgada ndëhay masa daa *mecëmey-ray nga ndëhay nga Yesu. A vëldamara

4:24 4.24 Mab 20.11; Ps 146.6 **4:25** 4.25-26 Ps 2.1-2 **4:27** 4.27 Herawt: Lk 23.7-11; Pawns Pilat: Lk 23.1 **4:28** 4.28 2.23 **4:29** 4.29 Ef 6.19 **4:30** 4.30 2.22 **4:31** 4.31 2.4 **4:32** 4.32-35 2.44-45; 6.1; Lk 14.33; 18.22

dala ha ngada ndaw a ndaw a tõe nga wusa. ³⁶ Ndaw da wuzlah ndëhay nga Yesu a daha, mezëley *Jawzef. Annga ndaw daa sækway nga *Levi, a yawa da Sipëre. Ndëhay meslërey a, a zëlmara na, *Barnabas, anda melëve «ndaw ma vëltar gëdan a ndëhay.» ³⁷ Ley annga daha. A hëdkada ley a. Fa dëba ha, a handërwa dala ha, a vëldatara a ndëhay meslërey hay.

5

Mey da ray ata Ananiyas ta ngwas annga Safira

¹ Ndaw daha mezëley *Ananiyas ta ngwas annga Safira, a cëmdamara dëy ata letëk. Ta', Ananiyas a hëdkada ley ata. ² A wunka dala ha cew, ta', a bada siya. Siya may, a handatara a ndëhay meslërey heyey, a vëldatara anda ara dala nga ley ata ha cëpa. Ngwas annga a sëra cek masa zel e ma ka. ³ Ama *Piyer a lëvar: «Ananiyas, ka mbëkda *Satan amba a mbözey aa mevel akah na, maja me? Ka ta badërwa siya nga dala nga ley akah ha sem. Anda kede, ka ta mbözla *Mesëfney nga Gazlavay sem. ⁴ Daa masa kah ma hëdkada daa ba na, kah ma wa, ba diya? Kwa kah ma hëdkada la kede, kah ma wa dala ha. Ka wulkey daa ray akah nga key cek kede na, maja me? Ka mbözley kaa na, ndëhay ba, ama ka mbözley Gazlavay.»

⁵ Masa Ananiyas ma cënda mey a la anda kede na, a tõe, pam! a mëcey. Mandërzay a katar kwa ara mey ba, a ndëhay ma cëdamara mey a. ⁶ Ta', gula hay a samawa, a mbözmara vagay a, a badamërwa, a diyam a pëshamara aa cëvay.

⁷ Ler maakar fa dëba ha na, ngwas annga, a wuswa. Ama a sëra cek masa ma key ta zel e ba. ⁸ Piyer aa cëfda, a lëvar: «Kadiwa, ka hëdkadamara ley akwar na, dala ha kede tar daw?» A mbëddara, a lëvar: «Ahaw, ya hëdkadamara këne.» ⁹ Anda kede, ta', Piyer a lëvar: «Ka cëmdamara dëy akwar ta zel akah, nga jedey Mesëfney nga Gazlavay na, maja me? Ehe, gula hay ma pëshamara zel akah, ata fa mey-slam. A da pëshamaka këne may.» ¹⁰ Wure wure ngene, ngwas aha a tõe fa mey annga, pam! a mëcey. Gula hay kede heyey a mbözamawa, a hëtfamara ta mëcey sem. Ta', a lamara, a handamara, a pëshamara a cakay zel e. ¹¹ Fa dëba ha, mandërzay a katar ga ara mey ba ngada ndëhay daa Egëliz tabiya ta ngada ndëhay ma cëdamara mey a.

Ndëhay meslërey nga Yesu a kam maazla hay

¹² Ndøhay meslørey nga Yesu fa kam maazla hay ga da wuzlah ndøhay nga wuzdørwa gødan nga Gazlavay. Fa ðar a, fa ðar a, ndøhay ma tøba mey nga Yesu tabiya fa diyam aa *Way-mekey-kwakwas nga Gazlavay, fa kusam fetede ta mevel pal dasi Balak nga *Salamanjw heyey. ¹³ Ndøhay siya ma tømbara mey nga Yesu fara fara ba na, a wufam nga kusey ta ata ba, maja a zluram, ama ndøhay tabiya faa hømdamata ndøhay ma tøba mey nga Yesu a cønga. ¹⁴ Mandaw mandaw ndøhay fa samawa a dey a, a dey a, zel hay, ngusay, fa tømbara mey nga Bay Mahura, a cømam a dey ndøhay nga Yesu heyey. ¹⁵ Maja ndøhay meslørey nga Yesu a fa kam maazla hay ta gødan nga Gazlavay na, ndøhay a handamawa masa-macay hay a mey-cøved. A handamatørwa fetede, a nadamata a ray bebele hay, da daa ba, a ray gegødef hay, amba da masa *Piyer fa daw taa cøved e ngene na, meezed anga a wusey a ray siya hay, a mbølam. ¹⁶ Ndøhay ga a samawa da slala hay mekele mekele masa gweegwe ta berney nga *Jeruzelem, a handamawa masa-macay hay, ta ndøhay masa ta malula da ray. Ndøhay a tabiya ta mbølam sem.

A sørdamata banay ta ndøhay meslørey nga Yesu

¹⁷ Yaw, *ndaw mahura da ray ndøhay ma ka kwakwas nga Gazlavay ta ndøhay da cakay a, anda meløvey ndøhay masa da wuzlah *Saduse hay, sølenj a katar ga ta ndøhay meslørey nga Yesu heyey. A slam yawa amba a sørdamata banay. ¹⁸ Ta', a kørzamata meedey ndøhay tabiya, a handamata aa førsøne. ¹⁹ Ama dasi tavað ngene, maslanj nga Gazlavay a pawa salay da vad, a wura mey-slam nga førsøne he, a badatørwa ndøhay meslørey heyey, a løvtar: ²⁰ «Diyam aa *Way-mekey-kwakwas nga Gazlavay, wuzdamatara mey hay tabiya da ray heter mawiya a ndøhay.» ²¹ Ndøhay meslørey heyey a cønmar mey a maslanj a. Slam bøn-bøn na, ta', a diyam, a mbøzam aa Way-mekey-kwakwas nga Gazlavay heyey, a zlamar ngaa sørkadamata ndøhay.

Daa ngene, ndaw mahura da ray ndøhay ma ka kwakwas nga Gazlavay ta ndøhay da cakay a, a kusmatørwa bay-ray hay nga Jøwif hay tabiya nga sley yawa. Ta', a sløram ndøhay nga ngølmatørwa ndøhay meslørey nga Yesu kaa heyey daa førsøne. ²² Ndøhay heyey a wusam aa førsøne he na, ta høtfamatar ndøhay meslørey nga Yesu daa ba. Ta', a vøhmawa, a kadamatara a ndøhay mahura hay ma sla yawa kaa heyey, ²³ a løvmatar: «Ala ta høtfamatar daa ba. Ya

wusam na, mey-slam magërcakaya maaya maaya, ndëhay ma jëdmata ata fa mey-slam a, ama ya wurmara mey-slam a, ya mbëzam aa way a na, ndëhay a, ata da hwad a daa saba.»

²⁴ *Bay-ray nga ndëhay ma jëda Way-mekey-kwakwas nga Gazlavay, ta *bay-ray hay nga ndëhay ma ka kwakwas nga Gazlavay kaa heyey a cëndamara na, mey a, a hëftar ray, a sërmara cek ma key ta ndëhay meslërey kaa heyey ba. ²⁵ Ndaw daha, ta', a sawa, a lëvtar: «Ehe, jëkam slëmay, ndëhay masa akwar ma ndëkwdamata aa fërsëne heyey na, ata daa Way-mekey-kwakwas nga Gazlavay, faa sërkadamata ndëhay.»

²⁶ Ta', bay nga ndëhay ma jëda Way-mekey-kwakwas nga Gazlavay ta sewje anga hay a diyam, a ngëlmatërwa ndëhay meslërey heyey. Sewje hay a, ta kamatar mey ta gëdanj daa ba, maja a zluram ndëhay a daa zakamata ta anjwa. ²⁷ Fa dëba ha masa sewje hay a ma ngëlmatërwa la na, ta', a lacadamata fa mey nga mahura hay ma sla yawa ha. *Ndaw mahura da ray ndëhay ma ka kwakwas nga Gazlavay heyey aa cëfdata, ²⁸ a lëvtar: «Ala ta tëkmakwar sem nga wuzey mey a ndëhay da ray ndaw aha, ama akwar fa kamara cënga. Fara fara, akwar ta wuzdamara mey a sem a ndëhay tabiya da *Jeruzelem. Asaya, ka wudam ndëhay tabiya a wulkam na, ara ala ma këdmara ndaw aha, ba diya?»

²⁹ *Piyer ta ndëhay meslërey siya a mbëddamara, a lëvmar: «Si cëma ya cënmär mey a Gazlavay da ray ala ma da cënmatar mey a ndëhay. ³⁰ Akwar ta këdmara Yesu la vagay fa hwadam mazlanjalakaya. Ama Gazlavay nga papanj nga papa alëkwa hay ta slëkdadërwa sem daa memëcey. ³¹ Yesu a na, ara ndaw masa Gazlavay ma la a vad a har-zëmay anga. A pa nga ndaw mahura, Bay ma lëhdata ndëhay. A ka kënë amba a wurey cëved ngada ndëhay *Israyel hay nga mbëddamara menjey ata, nga sëpam Gazlavay ta mevel pal, amba Gazlavay a mbëkdatara mebërey ata. ³² Ala na, ya fa kam sede da ray cek hay a kede. *Mesëfney nga Gazlavay fa key sede da ray a kënë may, Mesëfney masa Gazlavay ma vëldatara a ndëhay ma cënmär mey.»

³³ Ndëhay mahura hay ma sla yawa heyey a cëndamara na, mevel a catar ga ara mey ba, a wudam nga këdmata vagay. ³⁴ Ama ndaw Fariza pal da wuzlah ata daha, mezëley anga Gamaliyel. Anja ndaw mahura maa sërkada

*kwakwas nga Mawiz, ndëhay tabiya faa hëmdamara. Ta', a lecey da wuzlah mahura hay ma sla yawa kaa heyey, a lëvtar a ndëhay nga badamatërwa ndëhay meslërey nga Yesu a dëgay. ³⁵ Fa dëba ha a lëvtar a mahura hay ma sla yawa ha: «Akwar Israyel hay, wam vaw da ray cek masa akwar ma da kamatara a ndëhay kefe. ³⁶ Sërfadamara, zleezle ndaw mezëley Tewdas ta sawa la, a lëvey: "Yah, ndaw mahura." Ndëhay ga, a key temere mëfad ma sëpmara. Ama ndëhay mekele hay ta këdmara sem vagay. Ndëhay ma sëpmara tabiya heyey, taa kwacam ray sem, mey a daa saba. ³⁷ Fa dëba anga, ndaw daha mezëley Juda, ndaw *Galile. Anga ta sawa la daa dëfar hay masa ndëhay fa slëfam vaw. Anga ha na, ta hëldata ndëhay la nga sëpmara, ndëhay ga ta diyam la asiya. Fa dëba ha, ta', a këdmara vagay saya, ndëhay ma diyam asiya heyey taa kwacam ray sem may. ³⁸ Da ray ngene, ya fa lëvkwar: ka da hëbam ray maja ndëhay a kefe saba, mbëkdamata nga diyam. Mewulkey ata ta slëra ata ha, da a sawa ta fa gëdan nga ndaw-magëdan na, a ndëvey la. ³⁹ Ama da mewulkey ata ta slëra ata ha a sawa ta fa gëdan nga Gazlavay na, ngene ka gwamara ngaa zëddamara daa ba. Wam vaw, ka da këdam vaw ta Gazlavay ba.»

Mahura hay ma sla yawa heyey, ta', a tëbmara mey anga. ⁴⁰ A zëlmätërwa ndëhay meslërey heyey. A slëdmata, a lëvmatar: «Ka da wuzam mey da ray Yesu saba.» Ta', a mbëkdamata.

⁴¹ Ndëhay meslërey a, a slëkdam, a mbëkdamata ndëhay ma sla yawa heyey, ta', a diyam ta meesëmey maja Gazlavay ta nëkta la, ata tëde nga sërey banay maja Yesu.

⁴² Mandaw mandaw ata fa diyam aa Way-mekey-kwakwas nga Gazlavay lëj a way ndëhay mekele mekele. Ata faa sërkadamatara *Mey-maaya-mawiya da ray Yesu a ndëhay fetëde, kwa a mbëkdamara ba. Ata fa wuzdamatara Yesu na, *ndaw masa Gazlavay ma wala nga lëhdata ndëhay.

6

A walam ndëhay maasala nga jëney ndëhay meslërey nga Yesu

¹ Daa ngene, ndëhay ma tëba mey nga Yesu fa sëkmawa, a dey a, a dey a. Da wuzlah ata na, *Jëwif hay maa guzlam mey Gërek daha. A yam mey ta Jëwif hay mekele daa hwayak a ngene, a lëvam: «[J]gwas-vagay hay masa

5:34 5.34 Gamaliyel: 22.3 5:36 5.36 21.38 5:37 5.37 Lk 2.2; 13.1-2 5:40 5.40 4.18; 5.28 5:41 5.41 Lk 6.22-23; 1Pi 4.13 5:42 5.42 Yesu na, ndaw masa Gazlavay ma wala nga lëhdata ndëhay daa mëbërey: 9.22; 17.3; 18.5, 28; Lk 24.25-27

da wuzlah ala, fa hëtam cek mezëmey masa ata ma wunkamatara mandaw mandaw na, daa ba.» ² Da ray ñgene, ndëhay meslërey kuraw a ray a cew heyey, ta', a kusmata ndëhay ma tëba mey nga Yesu tabiya, a lëvmatar: «Ala na, ya mbëkdamara mewuzey mey nga Gazlavay, amba ya wunkam ðaf na, a zlerda ba. ³ Mëlma ala hay, maaya na, ka walam *ndëhay maasala da wuzlah akwar, masa ndëhay faa hëmdamata, masa marëhtakaya ta *Mesëfney nga Gazlavay, ndëhay masa ta lenjesl, amba ya vëldamatara slëra ha asi har ata. ⁴ Ala na, ya vëldamara ray ala nga dërey dangay a Gazlavay, ta nga wuzey mey anga.»

⁵ Mey a kedë a mbafatar a ndëhay tabiya. Ta', a walam Etiyen, ndaw ma tëba mey nga Yesu maaya maaya, marëhkaya ta Mesëfney nga Gazlavay, leñ *Fëlep, Përakwar, Nikanawr, Timanw, Parmanas, asaya, Nikwala, ndaw Antiyaws masa ma mbëkda kwakwas anga zleezle nga sëpey kwakwas nga Jëwif hay. ⁶ Ta', a handamatërwa ndëhay maasala ha fa ndëhay meslërey heyey. Ndëhay meslërey a, ta', a dëram dangay, a pamatar har a ray, amba a kamara slëra ata ta gëdanj nga Gazlavay.

⁷ Yaw, mey nga Gazlavay fa daw fa mey fa mey. Da *Jeruzelem ndëhay ma tëba mey nga Yesu fa sëkmawa a dey a, a dey a. Ndëhay ga ma ka kwakwas nga Gazlavay a tëbmara mey nga Yesu may.

A kërzamara Etiyen

⁸ Etiyen na, Bay Gazlavay ta pësar mey la ga, a vëlar gëdanj anga. Da ray ñgene, anga fa key maazla hay ga ma rëzley ndaw da wuzlah ndëhay. ⁹ Ama ndëhay siya hay a zlamar nga cakalafamar mey. Ara *Jëwif hay ma samawa daa berney nga Siren leñ daa berney nga Alekzandëri. Ata da wuzlah ndëhay ma kusam daa *way-mewuzey-mey nga Gazlavay masa ata ma zëlmara «Way nga ndëhay ma bamawa daa beke.» Mekele hay ma cakalafamar mey na, a samawa daa hwayak nga Silisi leñ daa hwayak nga Azi. A zlamar nga key yawa ta Etiyen e. ¹⁰ Ama ta gwamara a ray a daa ba, maja aa guzltar ta lenjesl masa *Mesëfney nga Gazlavay ma vëldara.

¹¹ Da ray ñgene, a diyam, a vëlmatar dala a ndëhay amba a mbërzlam a ray Etiyen e, a lëvam: «Ya cëndamara na, ndaw kedë fa cëfa *Mawiz, fa cëfa Gazlavay.» ¹² A hëldamata ndëhay cëpa, ta mahura hay nga Jëwif hay, leñ

ndëhay maa sërkada kwakwas nga Mawiz. Ta', a diyam, a kërzamara Etiyen, a handamara fa mahura hay ma sla yawa nga Jëwif hay. ¹³ Ta', a ngëlmaawa ndëhay membërzley, amba a lëvam: «Mandaw mandaw, ndaw kefe faa guzley mey maaya ba da ray *Way-mekey-kwakwas nga Gazlavay ta da ray kwakwas nga Mawiz. ¹⁴ Ya cëndamara, a lëvey: "Yesu, ndaw *Nezeret, a bözla Way alëkwa mekey kwakwas nga Gazlavay la, a mbëdfdata kwakwas masa Mawiz maa sërkadandakwara la mekele."» ¹⁵ Ndëhay tabiya manjatakaya daa way mesley yawa fetede a nëkmara Etiyen ndëzl a, dey anga fa wedey anda dey nga maslan nga Gazlavay da vad.

7

Etiyen aa guzltar ngada mahura hay ma sla yawa nga Jëwif hay

¹ *Ndaw mahura da ray ndëhay ma ka kwakwas nga Gazlavay aa cëfda Etiyen, a lëvar: «Mey masa ata ma kadamara kefe na, fara fara daw?»

² Etiyen a mbëdfdara, a lëvey: «Mëlma adaw hay, ta papay hay, jëkfamaya slëmay. Gazlavay masa manjakaya daa slam ma wedey na, ta wuzar vaw la a *Abëraham, papañ nga papa alëkwa, daa masa anga daa hwayak nga Mezapawtami, ta yingey aa berney nga *Haranj daa ba aran.

³ Gazlavay a lëvar: "Bey daa hwayak akah, mbëkdata səkway akah hay, daw aa hwayak masa yah ma da wuzdakawa." ⁴ Da ray ngene, Abëraham a slëkdey daa hwayak nga ndëhay *Kalde, a daw a njeý aa berney nga Haranj. Fa dëba nga memëcey nga papaha, Gazlavay, ta', a lëvar nga yingey da Haranj a ngadaa hwayak mekele.

Maja ngene, a sawa aa hwayak nga Kana, masa alëkwa *Jëwif hay da hwad a wure kefe. ⁵ Ta', a njeý aa hwayak a, ama daa ngene, Gazlavay ta vëldara hwayak a ngada Abëraham daa ba aran, kwa slam nekëdey nga pey salay daa hwayak a ngene ta hëtey ngada anga daa ba aran. Daa ngene, Abëraham bëzey anga daa ba aran, ama Gazlavay ta lëvar la, a da vëldara hwayak a ngene amba a wey da ray a, asaya amba bëza hay nga bëz anga hay a wamara fa dëba anga.

⁶ Gazlavay a lëvar saya: "Bëza hay nga bëz akah hay a da njam daa hwayak nga ndëhay mekele. Ndëhay a, a da wamata, a da kam beke nga ndëhay a, a da sërdamata banay haa mevey temere mëfad. ⁷ Ama fa dëba ha ya da katar sariya a ndëhay ma kadamata beke

he, wara bëza hay a, a bamawa daa hwayak a, a vëhmawa, a ragadamaya la daa slam aha kedë.” ⁸ Ta', Bay Gazlavay a jëwam mey ta Abëraham. *Mejëwey-mey aha na, ara ta fa *mesley mandawal. Anda kedë, Abëraham a yawa *Izak. Fa dëba ha luma pal na, a slara mandawal. Izak a slara nga bëzey anga, *Jakwap këne. Jakwap may, a slatara nga bëz anga hay kuraw a ray a cew * këne. Ma yamatërwa sëkway alëkwa hay kuraw a ray a cew kedë na, ara bëza hay nga Jakwap.

⁹ «Papan nga papa alëkwa hay a, masa bëza hay kuraw a ray a cew nga Jakwap heyey, sëlëj a katar da ray *Jawzef, mëlma ata. Ta', a hëdkadamara nga key beke daa hwayak nga *Ejip. Ama Gazlavay aa ta anga, ¹⁰ fa jëdë, a lëhda daa banay anga hay tabiya. *Farawan, bay daa hwayak nga Ejip, a wulkey maaya da ray Jawzef maja Gazlavay ta vëlar lëjgesl la. Farawan, ta', a pa Jawzef nga ndaw mahura daa hwayak anga, ta da way anga tabiya.

¹¹ «Fa dëba ha, may ta key la ga daa hwayak nga Ejip ta daa hwayak nga Kana tabiya. Banay ga da ray ndëhay a daha. Papan nga papa alëkwa hay, bëza hay nga Jakwap heyey, a hëtam cek mezëmey saba. ¹² Ama Jakwap ma cënda cek mezëmey daha da Ejip na, ta', a slëldata bëz anga hay. Ngene ara meslërey ngeeme. ¹³ A diyam nga dey cew na, Jawzef ta', a wuztar vaw a mëlma ha hay. Da ray ngene, Farawan, a sërta sëkway nga Jawzef hay. ¹⁴ Fa dëba ha, Jawzef ta', a slërey mëlma ha hay nga ngëlmërwa papaha Jakwap ta ndëhay da way anga tabiya nga samawa, amba a njam bama. Ndëhay a tabiya ata kwakwar maasala a ray a zlam. ¹⁵ Ta', Jakwap a daw a njey a Ejip. A mëcwa fetedë. Bëz anga hay may, masa papan nga papa alëkwa hay tabiya, a mëcam fetedë. ¹⁶ Fa dëba ha, a handamata vagay ata hay aa hwayak nga Sikem, amba a pëshamatërwa fetedë aa cëvay nga Abëraham. Cëvay a na, ara cëvay masa Abëraham ma hëdka fa bëza hay nga Hamawr da Sikem e zleezle, a vëltar dala anda ata ma wudam.

¹⁷ «Pas masa Gazlavay ma da ka cek anda anga ma lëvar a Abëraham zleezle na, gweegwe cay. Anda kedë, ndëhay

* **7:8** 7.8 bëz anga hay kuraw a ray a cew: Sëkway hay kuraw a ray a cew nga Israyel hay na, ara ndëhay daa sëkway nga Ruben, daa sëkway nga Simeyanjw, daa sëkway nga Levi, daa sëkway nga Juda, daa sëkway nga Isakar, daa sëkway nga Zabulanjw, daa sëkway nga Jawzef, daa sëkway nga Benjamen, daa sëkway nga Dan, daa sëkway nga Naftali, daa sëkway nga Gat, lëj daa sëkway nga Aser. Nëka MC 35.23-26. **7:8** 7.8 MC 17.9-14; 21.2-4; 25.26; 29.31-30.24; 35.16-18 **7:9** 7.9 MC 37.11, 28; 39.2, 21 **7:10** 7.10 MC 41.37-44 **7:11** 7.11-12 MC 41.54; 42.1-2, 5 **7:13** 7.13 MC 45.1, 3, 16 **7:14** 7.14-15 MC 45.9-10, 18; 46.6-7, 27 **7:16** 7.16 MC 23.3-16; 49.29-30; 50.13; Jes 24.32; Heb 11.9, 13

*Israyel hay masa daa beke daa hwayak nga Ejip heyey fa yam a dey a, a dey a. Ata ga fetede. ¹⁸ Ta', a pam bay mekele da Ejip, bay a, a sëra Jawzef ba. ¹⁹ Bay a ñgene, ta key wewer sem da ray səkway aləkwa hay Israyel hay, a sërdata banay ta papanj nga papa aləkwa hay heyey. A təktaɾ d̄ay a ndëhay Israyel hay a, nga kəzlamata bəz ata hay gevew saw, amba a məcam.

²⁰ «Daa d̄ar a ñgene, a yamərwa *Mawiz, anga bəzey membey, ma mbafar a Gazlavay. A gəley da way papaha kiya maakar. ²¹ Fa dəba ha, a badamərwa, a kəzlamara, ama dam nga Bay Farawanj leñ! a la. Ta', a gəla anda bəzey da hwaɗ anga. ²² Da ray ñgene, Mawiz aa sərkey cek hay tabiya masa ndëhay da Ejip ma sərmara. Mawiz a tərey ndaw masa ta gədanj, ta fa mey masa aa ma wuzda, asaya ta fa slëra masa aa ma ka.

²³ «Masa Mawiz ma key mevey kwakwar məfad̄ cay na, a jəwey vaw nga daw nga nəktərwa məlmaha hay Israyel hay. ²⁴ Masa anga ma wusey la na, a hətar ndaw Ejip fa kəda ndaw ata. Ta', a daw a jəna ndaw ata ha, a kəɗey vaw aa slam a nga anga, a kəda ndaw Ejip kaa heyey vagay. ²⁵ Mawiz a wulkey na, məlmaha hay Israyel hay a sərmara ara ta fa anga Gazlavay ma da badatərwa da Ejip, ama ata na, a sərmara ba.

²⁶ «Pepərek e saya, Mawiz a hətfatar Israyel hay cew fa kədam vaw. A wuɗey nga wunkata amba a njam daa zazay, a ləvtar: “Haya, ndëhay keɗe, akwar na, məlmanj hay, ba diya? Kaa ka kədam vaw na, kwara?” ²⁷ Ama ndaw masa ma cakala mey na, a dəkda Mawiz, a ləvar: “Ma paka nga bay nga kandar sariya na, wa? ²⁸ Ka wuɗey ka kəɗya vagay anda kah ma kəda ndaw Ejip ngaa kwana heyey daw?” ²⁹ Mawiz a cənda ndaw kaa maa guzlar anda keɗe na, mandərzay a kar, ta', a hway aa hwayak nga Madiyanj. Manjakaya daa hwayak a na, anga ndaw-məlak. A yawa bəza hay mezəle hay cew fetede.

³⁰ «Fa dəba ha mevey kwakwar məfad̄ saya, Mawiz aa da wuzlah-ley, gweegwe ta anɗwa nga Sinay. Maslanj nga Gazlavay a pawə salay da vad̄, a wuzar vaw daa awaw, da wuzlah gwaslaf. ³¹ Mawiz a hətar na, a rəzley. Masa anga fa ngəchey a cakay a amba a nəka maaya maaya na, a cənda d̄ay nga Bay Gazlavay maa guzla da hwaɗ a, a ləvar: ³² “Yah, Gazlavay masa papanj nga papakw akwar hay ma ragadamar. Ahaw yah, Gazlavay masa Abəraham,

Izak, lej Jakwap ma namar ray.” Mawiz a zlurey, aa wesey, a wudëy nga nëka saba. ³³ Bay Gazlavay a lëvar: “Cëkwa tarak da salay la, maja slam masa kah malacakaya da hwađ a keđe na, slam aha ara slam masa Gazlavay aa da hwađ a. ³⁴ Fara fara, ya fa hëtar banay nga ndëhay adaw hay da Ejip, ya fa cënda matëway ata. Da ray ngene, ya pawa salay na, amba ya lëhdata daa beke. Wure keđe na, daw, ya slërdaka a Ejip.”

³⁵ «Yaw, Mawiz aha ara ndaw masa zleezle Israyel hay a ma wudmara ba, ma lëvmar: “Ma paka nga bay nga kandar sariya na, wa?” heyey. Ama Mawiz a na, ara ndaw masa Gazlavay ma pa nga bay amba a lëhdata Israyel hay daa beke. Gazlavay a pa nga bay nga lëhdata na, ta fa maslan ma wuzar vaw da wuzlah gwaslaf heyey. ³⁶ Ara Mawiz ma badatërwa Israyel hay da Ejip ta maazla hay masa anğa ma kata maja Gazlavay aa ta anğa. A kata maazla hay a na, daa hwayak nga Ejip, da mey Bëlay Magaza, lej da wuzlah-ley haa a key mevey kwakwar mëfad. ³⁷ Ara Mawiz a saya ma lëvta a Israyel hay: “Gazlavay a slërkwar *ndaw ma tëla mey la mekele daa sëkway akwar anda anğa ma slërdiwa keđe may.” ³⁸ Daa masa Jëwif hay makustakaya da wuzlah-ley heyey na, ara Mawiz a, ma handa mey ngada papan nga papa alëkwa hay, mey masa maslan nga Gazlavay da vad maa guzlar daa anğwa nga Sinay. Asaya, ara anğa ma tëbërwa *mewey nga Gazlavay ma vëley heter a ndëhay, amba a wuzdandakwara.

³⁹ «Ama papan nga papa alëkwa hay a, a wudam nga cënmara mey a Mawiz a ba, a tëbmara mey anğa ba, a wudam nga vëham a Ejip e cënga. ⁴⁰ Da ray ngene, a lëvmar a *Aranw, “Kandakwar kuley hay nga jënnakwar daa mëpëkey alëkwa hay. Mawiz ma badandakurwa da Ejip kaa na, ya sërkwa cek ma kar ba.” ⁴¹ Ta’, a vëdam cek anda bëz-sla, a ragadamar, a tamara anda kuley ata, a kam gwagway ta mëesëmey maja cek aha masa ata ma kamara ta har ata. ⁴² Ama Gazlavay pëla! a mbëđfatar dëba, a mbëkdata nga ragadam a wurzla hay da vad anda mawuzlalakaya daa đërewel nga ndëhay ma tëla mey nga Gazlavay zleezle. Daa đërewel e, Gazlavay a lëvey:

“Akwar ndëhay Israyel hay, daa masa akwar ma njam
mevey kwakwar mëfad da wuzlah-ley na,
akwar ta hërmaya gënow hay la daw?

Akwar ta vëlmaya cek hay la daw?

7:35 7.35 Mab 2.14; 3.2 **7:36** 7.36 Mab 7.3; 14.21-29; 16.1-17.16; Mesl 14.33; 20.1-11 **7:37** 7.37 3.22-23 **7:38** 7.38 Mab 19.1-20.17; SNM 7.53; Gal 3.19
7:39 7.39 Mesl 14.3 **7:40** 7.40-41 Mab 32.1-8 **7:42** 7.42-43 Am 5.25-27;
Malakw: Lev 18.11

⁴³ Daa ba sëlak! Ama ka tam na, kuley hay mekele mekele. Akwar ta lamara kuley mezëley Malakw la ta way a, a har. Asaya, akwar ta lamara kuley malëmkaya
anda wurzla mezëley Refan la.

Maja akwar ma lëmamata kuley hay a kedë,
ka ragadamatar na,
ya handakwar la këlen
ma fëna hwayak nga Babilanw saya.”»

⁴⁴ Etiyen a lëvtar saya: «Papan nga papa alëkwa hay ta kërca way la zleezle da wuzlah-ley nga pey *akwatay nga mejëwey-mey nga Gazlavay a hwaɔ a, a pëkam ta anga. Ara Gazlavay ma wuzdara a Mawiz, a da kërca way aha na, kwara. Fa dëba ha, Mawiz ta kërca la anda Gazlavay ma wuzdara ha. ⁴⁵ Papan nga papa alëkwa hay ta pëkam la ta Way-mekërcey aha, haa kasl Jesëwe ma key bay-ray ata. Ta pas masa Jesëwe ma key bay-ray ata na, Gazlavay a bëlta ndëhay masa Jëwif hay ba daa hwayak kedë fa mey fa mey, amba Jëwif hay a wamara hwayak a. Way-mekërcey nga Gazlavay ta ambal a na, aa daha haa kasl pas masa *Davit ma zëma bay anga. ⁴⁶ Davit ta hëtey maaya nga Gazlavay la, aa cëfda Gazlavay nga vëlar cëved amba a lëmar way mawiya ngada Gazlavay masa Jakwap ma ragadar. ⁴⁷ Ama, fa dëba ha, ara Bay *Salamanw ma lëmra way mawiya ha ngada Gazlavay.

⁴⁸ «Ama Bay Gazlavay da vad a njeý daa way masa ndëhay ma lëmamara ta har ata ba. Anda *ndaw ma tëla mey nga Gazlavay zleezle ma lëvey:

⁴⁹ “Bay Gazlavay a lëvey:

Slam da vad na, ara slam nga bay adaw,
slam da hwayak may, ara slam-mepey-salay adaw.

Ka lëmamaya na, way wura?

Slam adaw memëskey-vaw na, wura?

⁵⁰ Ara yah ma kata slam hay tabiya, ba diya?”»

⁵¹ Etiyen a lëvtar saya: «Akwar ndëhay ray mangërdakaya hay! Akwar fa wudmara Gazlavay ta mevel akwar pal daa ba, ka cënmar mey ba sëlak! Mandaw mandaw, ka wudam *Mesëfney nga Gazlavay a key slëra daa akwar ba. Akwar na, anda papakw akwar hay zleezle.

⁵² *Ndaw ma tëla mey nga Gazlavay, masa papan nga papakw akwar hay ta sërdamara banay daa ba na, daha daw? Ndëhay ma wuzdamara mey da ray ndaw pal

7:44 7.44 way mekërcey: Mab 25.9, 40 **7:45** 7.45 Jes 3.14-17; 18.1; 2Sam 6

7:46 7.46 Ps 132.1-5 **7:47** 7.47 2Sam 7.5-7; 1Bay 6.1-38 **7:48** 7.48 17.24-25

7:49 7.49-50 Iz 66.1-2 **7:51** 7.51 Mab 32.9; 33.5; Jer 4.4; Rm 2.28-29; ka

wudam Mesëfney nga Gazlavay a key slëra daa akwar ba: Iz 63.10; Ez 2.3-5

masa maaya ma da sawa na, ara papakw akwar hay a ma kədmata vagay, ba diya? Wure keđe, akwar may, ka taa dədfamar mey la a ndaw masa maaya ha keđe, ka ta kədmara sem vagay. ⁵³ Akwar na, Gazlavay ta slërdakwara kwakwas anğa la ta har maslan anğa hay da vad. Ama akwar ta səpmara kwakwas a daa ba.»

Aa zakamara Etiyen ta anğwa

⁵⁴ Ndëhay ma ka sariya heyey, mevel a catar a ray Etiyen ara mey ba. A zam har maja mevel ta catar la ga da ray mey masa Etiyen ma kada. ⁵⁵ Ama Etiyen, marəhkaya ta *Mesəfney nga Gazlavay, a nəkey dey a vad, a hətər mewedey nga Gazlavay, a hətər Yesu malacakaya ta harzəmay nga Gazlavay. ⁵⁶ Ta', a ləvey: «Ehe, slam da vad mawurkaya, ya fa hətər *Bəz nga Ndaw malacakaya ta harzəmay nga Gazlavay.»

⁵⁷ Masa ata ma cəndamara Etiyen ma ləvey anda keđe la na, a wudam ta gədan, a dəzlmata sləmay ata hay ta har. Ata tabiya a cəmam a ray a, ⁵⁸ a dađamara, a badamara la daa berney, aa zakamara ta anğwa. Masa ata fa daa zakamara na, a mbəkdamatərwa jəbe ata hay fa ndaw mezəley *Sawl. ⁵⁹ Daa masa ata faa zakamara na, Etiyen e a dərey danğay a Gazlavay, a ləvey: «Bay Mahura Yesu, təba mesəfney adaw.» ⁶⁰ Ta', a regedey, a wudey ta gədan, a ləvey: «Bay Gazlavay, mbəkdatara mebərey ata ha keđe.» Anğa ma ləvey anda keđe la na, pam! a məcey.

8

^{1a} Meməcey nga Etiyen e, a mbafar a Sawl.

Sawl a sərdata banay ta ndëhay nga Yesu

^{1b-3} Ta', ndëhay ma səpa cəved nga Gazlavay ta mevel pal a lamara vagay nga Etiyen, a pəshamara aa cəvay. A təwam ga maja meməcey anğa ha. Ta pas a nğene, banay mahura a sawa a ray ndëhay ma təba mey nga Yesu da *Jeruzelem. *Sawl a, a səpey cəved nga nəsta ndëhay a. A daw a səpta ndëhay mezəle hay, ta nğusay fa way a, fa way a. A kərzata, a handata aa fərsəne. Daa nğene, ndëhay nga Yesu siya aa kwacam ray pal pal aa slam hay mekele mekele daa hwayak nga *Jude len daa hwayak nga *Samari. Ndëhay daa *mecəmey-ray nga ndëhay nga Yesu masa mambəkakaya da Jeruzelem na, si ndëhay meslërey

gway. ⁴ Ndëhay maa kwacam ray heyey, fa pëkam kwa aa wura aa wura, fa wuzam *Mey-maaya-mawiya.

Fëlep a wuzey Mey-maaya-mawiya daa hwayak nga Samari

⁵ Nga *Fëlep na, ta', a daw aa berney mahura daa hwayak nga *Samari. Masa anga ma wusey la fetede na, a wuztar mey a ndëhay daa berney a da ray *Këriste, *ndaw masa Gazlavay ma wala nga lëhdata ndëhay. ⁶ Ndëhay daa berney a, a diyam, a kusam amba a cëdamara mey anga, a nëkmara maazla hay masa anga ma kata. Maja ngene, a jëkam slëmay maaya maaya fa mey masa Fëlep ma kadatara. ⁷ Malula a bey da ray ndëhay ga ta mewudey ta gëdan, ndëhay masa maahëlbatakaya ta jegwer hay a hëtmatar salay ata hay aa slam a. ⁸ Da ray ngene, ndëhay daa berney a aa sëmam ga, ara mey ba.

⁹ Daa berney a ngene, ndaw daha mezëley *Simanw. Masa Fëlep ta daw aa berney a daa ba aran na, Simanw fa key maazla hay ga, ama maazla hay a na, a sawa ta fa Gazlavay ba. Ta rëzley ndëhay ga la da Samari ta maazla hay a. A pa ray anga nga ndaw mahura. ¹⁰ Maja ngene, ndëhay tabiya, bëza hay ta mahura hay daa hwayak a na, a tëbmara mey anga. Aa guzlam da ray a, a lëvam: «Anga na, ara ndaw ta gëdan masa ma zëlmara "gëdan mahura nga Gazlavay."» ¹¹ Ndëhay fetede a tëbmara mey nga Simanw a maaya maaya maja ta njeý la ga da wuzlah ata, ta rëzlta la ta maazla hay mekele mekele masa aa ma kata. ¹² Ama ta pas ngene, Fëlep a sawa, a wuztar *Mey-maaya-mawiya da ray Yesu Këriste, ta da ray mewey nga Gazlavay da ray ndëhay. Ndëhay masa ma tëbmara mey nga Fëlep e, ta hëtam *baptem la, kwa zel hay kwa ngusay. ¹³ Simanw, ndaw ma key maazla heyey, ta', a tëba mey a may. Fa dëba ha, a hëtey baptem, ta' a daw asi Fëlep, a mbëkda saba. A rëzley maja aa ma hëtatar maazla hay mahura masa Fëlep ma kata ta gëdan nga Gazlavay.

¹⁴ Fa dëba ha, ndëhay meslërey nga Yesu da *Jeruzelem a cëdamara na, ndëhay da Samari ma tëbmara mey nga Gazlavay la. Ta', a slërmatar ata *Piyer ta *Jan. ¹⁵ Masa ata Piyer ta Jan ma wusam la fetede na, ta', a dëram danggay a Gazlavay maja ndëhay a. Aa cëfdamara amba Mesëfney anga a sawa a ray ata. ¹⁶ A dëram danggay a Gazlavay da ray ndëhay a na, maja *Mesëfney nga Gazlavay ta sawa kwa a ray ndaw pal dasi ata daa ba aran. Cek masa ata ma hëtam na, ara baptem ta mezëley nga Yesu Bay Mahura gway.

¹⁷ Da ray ñgene, ata Piyer ta Jan a pamatar har a ray. Ta', ndëhay a, a hëtam Mesëfney nga Gazlavay dëba.

¹⁸ Masa Simanjw ma hëttatar ndëhay ma hëtam Mesëfney nga Gazlavay maja ndëhay meslërey a ma pamatar har a ray heyey na, ta', a vëltar dala ñgada ata Piyer ta Jan heyey, ¹⁹ a lëvtar: «Vëlmaya gëdan a may, amba da ya ta pey har la a ray kwa waawa na, ndaw a hëtey Mesëfney nga Gazlavay may.» ²⁰ Ama Piyer a mbëddara, a lëvar: «Anja Gazlavay nga zëddaka ta dala akah ha cëpa, maja gëdan masa Gazlavay ma vëlda a ndëhay anja hay na, ka fa wulkey ka gwa nga hëdka ta dala. ²¹ Wure kedë mey akah daa slëra nga Gazlavay kedë daa ba, maja mevel akah ta mewulkey akah maaya ba fa mey nga Gazlavay. ²² Mbëkda mekey mebërey, cacëfdëy ambahw fa Gazlavay maja mebërey akah. Da Gazlavay a mbëkdakawa mewulkey maaya ba daa mevel akah la kwa. ²³ Ya nëka mevel akah na, matara. Kah ndaw masa sëlej, kah beke nga mebërey.» ²⁴ Ta', Simanjw heyey a mbëddatara ñgada ata Piyer ta Jan heyey, a lëvtar: «Ambahw, akwar ta ray akwar, dërmar dangay a Gazlavay maja yah, amba mey masa akwar ma lëvam kedë na, a hëtfaya ba.»

²⁵ Masa ata Piyer ta Jan ma kam sede la da ray mey nga Bay Mahura Yesu, ma wuzdamatara la a ndëhay da Samari na, ta', a vëham a Jeruzelem. Ata fa diyam daa cëved na, a wuzam Mey-maaya-mawiya da slala hay mekele mekele daa hwayak nga Samari.

Ata Fëlep ta ndaw Etiyawpi

²⁶ Maslan nga Gazlavay a lëvar a *Fëlep: «Slëkdëy, daw ta da wurza taa cëved ma daw da *Jeruzelem ñgadaa berney nga Gaza. Cëved e a daw ta wuzlah ley.» ²⁷⁻²⁸ Fëlep, ta', a slëkdëy, a daw. Daa cëved ñgene, a hëtar ndaw Etiyawpi fa daw a way. Anja ndaw mahura, *maanngwadakaya nga key madërlam nga Kandas, ñgwas, bay ma wa hwayak nga Etiyawpi. Ara anja ma kërza dala nga Kandas a tabiya. Ndaw Etiyawpi a ta daw la a Jeruzelem, nga ragadar a Bay Gazlavay. Fa vëhwa ñgada way ta seret nga pëles. Anja fa jengëy dërewel nga *Izay, *ndaw ma tëla mey nga Gazlavay zleezle. ²⁹ *Mesëfney nga Gazlavay a lëvar a Fëlep: «Daw asi ndaw ta seret katay.»

³⁰ Fëlep, ta', a hway, a kërza ndaw aha daa cëved. Masa anja ma cënda ndaw a fa jengëy daa dërewel nga Izay, ndaw ma tëla mey nga Gazlavay na, ta', Fëlep aa cëfda, a lëvar: «Ka fa cënda mey daa dërewel masa kah ma janja

ngene daw?» ³¹ Ndaw Etiyawpi heyey a mbëddara: «Da ndaw ta kadiwa daa ba na, ya da cënda kwara?» Ta', a lëvar a Fëlep heyey nga tëpwa aa seret anga ha. Fëlep, ta', a tëpey, a njeý a cakay a. ³² Mey daa ðerewel nga Gazlavay masa anga ma janga ha na, mey a, a lëvey:

«Anga na, anda tëban ma handamara nga hërey,
 anga anda bëz-tëban ma tëway ba
 kwa masa fa handamara nga sley engwec anga,
 ta wura mey anga nga tëway anda ngene daa ba may.

³³ A pam dey a ray a ba anda cek saw,
 a kamar sariya ta cëved e ba.

Anga ta mbëkey bëzey da bëla
 nga zëley slëmay anga daa ba,
 maja ta ndëvdamara heter anga da bëla sem.»

³⁴ Ndaw Etiyawpi heyey a lëvar a Fëlep: «Ambahw, kadiwa cey! Ndaw ma tëla mey nga Gazlavay kaa na, aa guzley da ray wa? Aa guzley da ray anga ray anga daw, da ray ndaw mekele daw?» ³⁵ Ta', Fëlep a wuzdara mey daa ðerewel nga Gazlavay a. A zla ta fa mey masa ndaw a ma janga keðe heyey, a wuzar mey da ray *Mey-maaya-mawiya nga Yesu. ³⁶ Masa ata fa diyam daa cëved, a wusam a mey yam daha. Ta', ndaw Etiyawpi a, a lëvar: «Ehe, yam keðe daha. Ma tëkya nga hëtey *baptem na, me?» [³⁷ Fëlep a lëvar: «Da ka ta tëba mey nga Yesu la ta mevel pal na, ka gwa nga hëtey baptem.» Ndaw Etiyawpi a mbëddara, a lëvar: «Ya ta tëba Yesu *Këriste la, anga Bëzey nga Gazlavay.»] ³⁸ Ta', ndaw Etiyawpi a, a lëvar a ndaw ma kërza ray nga pëles nga lacada seret. Ata Fëlep ta ndaw Etiyawpi a, a pamawa salay, a mbëzam aa yam. Fëlep ta', a kar baptem a ndaw aha. ³⁹ Masa ata fa bamawa daa yam na, Mesëfney nga Gazlavay leñ! a la Fëlep. Ndaw Etiyawpi a, a hëtar saba, ama fa daw ta meesëmey ga.

⁴⁰ Wure ngene, Fëlep a nëkey dey na, anga daa berney nga Azawtus. A daw ta mewuzey Mey-maaya-mawiya da slala hay tabiya daa cëved haa kasl a wusey aa berney nga Sezere.

9

Sawl a tëba Yesu Bay Mahura (SNM 22.6-16; 26.12-18)

¹ Daa ðar hay a ngene, *Sawl heyey fa sërdata banay ta ndëhay ma sëpa cëved nga Bay Mahura Yesu cënga. A lëvtar a da këðta vagay. Ta', a daw fa *ndaw mahura da

ray ndëhay ma ka kwakwas nga Gazlavay da *Jeruzelem.

² Aa cëfda ndaw aha nga wuzlalar leeter hay amba a handatara a *bay-ray hay daa way-mewuzey-mey hay nga Gazlavay daa berney nga Damas. A ka anda kefe, amba da ta hëtey ndëhay, kwa mezële hay, kwa ngusay, masa ma sëpa cëved nga Yesu fetede la na, a kërzatërwa, a handatërwa a Jeruzelem.

³ Annga fa daw daa cëved ma daw a Damas a, gweegwe cay a wusey na, wure wure ngene, slam a wadawa përây! da gazlavay da vad a ray a. ⁴ Ta', a tëfey a hwayak, a cëney day nga ndaw ma zëla ta da vad, a lëvar: «Sawl, Sawl, ka sërdaya banay anda kefe na, maja me?» ⁵ Sawl heyey aa cëfda, a lëvar: «Bay Mahura, kah na, wa?» Day nga ndaw ma zëla heyey a mbëddara, a lëvar: «Ara yah, Yesu, ndaw masa kah ma sërda banay. ⁶ Ama slëkdey, daw a Damas dagay. Fetede, a wuzdamakawa cek masa kah ma da ka la.» ⁷ Ndëhay masa ma diyam ta Sawl a, ata malacatakaya kwa ta gwamara nga wurey mey daa ba maja mandërzay fa katar kalah. Ata fa cëndamara day nga ndaw maa guzley, ama ta hëtmär ndaw aha daa ba. ⁸ Sawl a lecey, a wura dey, ama a gwa nga hëtar dey saba. Ta', ndëhay a, a kërzamara fa har, a handamara a Damas. ⁹ Dar maakar, a hëtar dey ba, a zëmey cek ba, kwa a sey yam ba.

¹⁰ Daa berney nga Damas a, ndaw ma sëpa cëved nga Yesu fetede daha mezëley *Ananiyas. Bay Mahura a wudëy nga wuzar cek masa aa ma da ka. Maja ngene a zëla, a lëvar: «Ananiyas!» Ananiyas a zlar mey: «Away, Bay Mahura, yah kefe!» ¹¹ Bay Mahura a lëvar: «Slëkdey, daw wure wure kefe aa Cëved Cër-cër, sëpa way nga Juda. Fetede, cacëfda ndaw daha mezëley Sawl, ndaw daa berney nga Tars. Annga fa dërey dangay. ¹² Daa medërey-dangay a, cek a wuzar, a hëtar ndaw mezëley Ananiyas, ma daw fa vëda nga par har a ray, amba dey annga a wurey, a hëtar dey saya.»

¹³ Ananiyas a mbëddara, a lëvar: «Bay Mahura, ndëhay ga taa guzlmaya la da ray ndaw aha. A lëvmaya annga ta sërdata banay la ga ta ndëhay akah hay da Jeruzelem. ¹⁴ Annga ma sawa fede kaa na, ara bay-ray hay nga ndëhay ma ka kwakwas nga Gazlavay ma vëlmërwa cëved nga kërzey ndëhay tabiya ma tëba mey akah.» ¹⁵ Ta', Bay Mahura a lëvar a Ananiyas: «Slëkdey, daw, maja ya ta wala ndaw aha sem amba a kaya slëra, a wuzdatara mey da ray

adaw a ndëhay masa *Jëwif hay ba hay, a bay ata hay, len a ndëhay *Israyel hay. ¹⁶ Yah, ta ray adaw, ya da wuzdara banay masa anğa ma da sëra ga daa slëra ha maja yah.»

¹⁷ Ananiyas, ta', a slëkdey, a daw. A ndëkwey a way heyey, a hëtfar Sawl, ta', a par har a ray, a lëvar: «Sawl, mëlma adaw, Bay Mahura Yesu a slërdiwa fa akah. Ara anğa ma wuzka vaw daa cëved masa ka fa sawa fedë. A slërdiwa amba ka hëtar dey cënga, amba Bay Gazlavay a rëhdaka ta Mesëfney anğa.» ¹⁸ Wure nğene, cek hay anda meesëftey nğa ewet a këzlmawa daa dey nğa Sawl a. Dey anğa wur! a wurey. A slëkdey, a kamar *baptem. ¹⁹ Fa dëba ha, ta', a zëmey cek, a hëtar gëdan anğa saya.

Sawl a wuzey mey nğa Gazlavay da Damas

Sawl ta njawa la dër nekëdey ta ndëhay ma tëba mey nğa Yesu da Damas. ²⁰ Wure wure nğene, ta', a daw aa *way-mewuzey-mey nğa Gazlavay fetedë, a wuztar mey a ndëhay, a lëvtar Yesu na, ara Bëzey nğa Gazlavay.

²¹ Ndëhay masa ma cëndamara mey anğa tabiya a rëzlam, a lëvam: «Ndaw kedë na, ara ndaw maa zëddata ndëhay nğa Yesu da *Jeruzelem heyey, ba diya? A sawa fedë kaa na, nğa kërzata amba a handata fa *bay-ray hay nğa ndëhay ma ka kwakwas nğa Gazlavay heyey, ba diya?»

²² Ama fa dër a, fa dër a, *Sawl fa wuzey mey maaya maaya ma fëna ma fëna, a lëvey Yesu na, ara *ndaw masa Gazlavay ma wala nğa lëhdata ndëhay. Anda kedë, *Jëwif hay daa berney nğa Damas a, a sërmara a da mbëfdamara aa mey anğa kwara saba.

²³ Fa dëba ha dër ga, Jëwif hay a slam yawa amba a këdmara Sawl a vagay. ²⁴ Jëwif hay a fa jëdmara mey-mbew hay nğa berney a taa vad, taa pas, amba a kërzamara Sawl a, a këdmara vagay. Ama wewer masa ata ma kamara na, Sawl a, ta cënda sem. ²⁵ Da ray nğene, ta tavad, gula anğa hay, ta', a sëhwdamara a cakay mahwal nğa Damas, a pamara aa cakarak, a tëdamara ta laza taa manğalaw nğa mahwal a kasl a hwayak a dey lanğar nğa berney a.

Sawl a vëhwa a Jeruzelem

²⁶ Fa dëba ha, *Sawl a vëhwa a *Jeruzelem *, a sëpey cëved nğa cëmey ta ndëhay ma tëba mey nğa Yesu, ama ndëhay nğa Yesu a, a zluram ta anğa, a wulkam anğa ta tërey ndaw ma tëba mey nğa Yesu fara fara daa ba. ²⁷ Ama

9:15 9.15 13.2; 22.21; 23.11; 26.1; 27.24; Rm 1.5 **9:16** 9.16 20.23; Lk 21.12; 2Kwr 11.23-28 **9:17** 9.17 19.6 **9:20** 9.20 17.2; Lk 22.70 **9:21** 9.21 8.1; 9.13-14 **9:22** 9.22 5.42 **9:23** 9.23 23.12 **9:23** 9.23-25 2Kwr 11.32-33

* **9:26** 9.26 Sawl ta vëhwa a Jeruzelem fiyaw fiyaw daa ba, ama menjey ga. Nëka Gal 1.17-21. **9:26** 9.26-27 9.3-6, 20; Gal 1.18

*Barnabas na, ta', a ngëla, a handa fa ndëhay meslërey nga Yesu. A kadatare mey da ray Sawl ma hëtar Bay Mahura daa cëved nga Damas, ta mey masa Bay Mahura maa guzldara. A wuzdatara mey da ray Sawl a daa masa Sawl fa wuzda mey nga Yesu da Damas ta mandërzay daa dey daa ba.

²⁸ Dëga ta pas ngene, Sawl a njam ta ndëhay nga Yesu fetedë. A pëkam ta ata da Jeruzelem. A wuzey mey da ray Bay Mahura Yesu a ndëhay ta mandërzay daa dey daa ba. ²⁹ Aa guzltar a *Jëwif hay maa guzlam mey Gërek, a kam yawa ta ata. Ama ata na, a sëpam cëved nga këdmara vagay. ³⁰ Mëlmanj hay daa mey nga Yesu a cëdamara Jëwif hay a fa wudam nga këdmara vagay na, a ngëlmara aa berney nga Sezere da mey-bëlay, ta', a mbëzdamara aa kwambiwal nga daw aa berney nga Tars †.

³¹ Yaw, daa ngene, ndëhay daa *mecëmey-ray nga ndëhay nga Yesu daa hwayak nga *Jude, daa hwayak nga *Galile, lej daa hwayak nga *Samarî na, manjatakaya ta zazay. Fa dar a, fa dar a, fa hëtam gëdanj daa metëbey-mey nga Yesu ma fëna ma fëna. Daa menjey ata na, fa namar ray a Gazlavay. *Mesëfney nga Gazlavay aa ta ata. Maja ngene, mecëmey-ray hay a fa sëkmawa a dey a, a dey a.

Ene, ndaw maahëlbakaya, a hëtar salay anga

³² *Piyer fa pëkey kwa aa wura aa wura. Pas langar daha a daw nga nëkwa ndëhay ma tëba mey nga Yesu daa berney nga Lida. ³³ Daa berney a ngene, ndaw daha mezëley Ene, salay maahëlbakaya. Aa manakaya mevey daangafad, a gwa a lecey ba. Piyer a hëtar ndaw aha na, ³⁴ ta', a lëvar: «Ene, Yesu *Këriste ta mbëldaka sem. Lecey, pada gegëdedë akah ta har akah.» Wure ngene, ndaw aha a lecey. ³⁵ Ndëhay tabiya daa berney nga Lida ha ta ndëhay da Saranjw, a hëtmarr ndaw aha, maja ngene, ta', a tëbmara mey nga Bay Mahura Yesu.

Tabita a slëkdawa daa memëcey

³⁶ Daa berney nga Jawpe ngwas daha mezëley Tabita. Ara ngwas ma tëba mey nga Yesu. A zëlmara ta mey Gërek «Dawurkas,» anda melëvey «meweney.» Anga mandaw mandaw fa key slëra maaya, fa jënta masa-viya hay. ³⁷ Ama vaw, ta', a car, pam! a mëcey. Masa anga ma mëcey la na, ta', a përmara vagay a, a pamara aa way da ray way. ³⁸ Ndëhay nga Yesu da Jawpe a cëdamara na, *Piyer aa da Lida fetedë. Berney nga Lida ha gweegwe ta berney

9:27 9.27 Barnabas: 4.36-37; 11.22-30; 12.25; 13.1-4, 7, 43-50; 14.12, 20; 15.2-12, 22, 35-39; 1Kwr 9.6; Gal 2.1, 9, 13 † **9:30** 9.30 Tars: Ara berney masa Sawl ma yawa da hwad a (SNM 22.3). **9:30** 9.30 11.25; Gal 1.21

nga Jawpe. Ta', a slëram ndëhay cew fa vëda, amba aa cëfdamërwa, a lëvmar: «Ambahw, nakwa la fa ala fiyaw cey!»³⁹ Masa Piyer ma cënda anda kedë na, ta', a diyam ta ndëhay kaa heyey a Jawpe, kwa ta zënam vaw daa ba. A wusam, a ngëlmara Piyer, a handamara aa way masa da vad da ray way heyey. Ngusay fa yidëñ hay tabiya masa fetedë, a ngëchamawa a cakay Piyer, fa tëwam, a wuzdamara zana ata hay masa Tabita ma tëftara daa masa anga ta dey.⁴⁰ Fa dëba ha Piyer a badatërwa ndëhay tabiya aa ambaw, a regedey, a dërey danggay a Gazlavay. Ta', a mbëdëy dey fa vagay a, a lëvar: «Tabita, slëkdëy.» Tabita a wura dey. Masa anga ma hëtar Piyer na, ta', a slëkdëy, a njeý.⁴¹ Piyer a kërza fa har, a jëna nga lecey. Ta', a zëltërwa ngusay fa yidëñ hay heyey len ndëhay ma tëba mey nga Yesu fetedë, a wuzdatara Tabita heyey, a hëtmara anga ta dey.⁴² Mey a, a wusey fa ndëhay daa berney nga Jawpe tabiya. Ndëhay ga a tëbmara mey nga Bay Mahura.⁴³ Piyer ta njeý la ga daa berney nga Jawpe da way ndaw ma këfda ambal, mezëley *Simanjw.

10

Piyer a wuzar mey nga Gazlavay ngada Kwerney

¹ Ndaw daa berney nga Sezere daha mezëley Kwerney. Anga mahura nga sewje hay temere. Ata da wuzlah sewje hay nga Rawma hay mezëley «Sewje hay ma samawa da Itali.»² Ndaw aha fa sëpa cëved nga Gazlavay ta mevel pal. Anga ta ndëhay da way anga hay ndav fa namar ray a Gazlavay anda *Jëwif hay. Fa jënta masa-viya hay ga da wuzlah Jëwif hay, fa dërey danggay a Gazlavay mandaw mandaw.

³ Ta pas langar daha, ta pas ngaa kwad bërëy maakar, Gazlavay a wuzar cek a Kwerney a. A hëtar *maslan nga Gazlavay ma sawa da vad maaya maaya ta dey anga, maslan a mbëzey fa vëda. Ta', a zëla: «Kwerney!»⁴ Kwerney a nëka maslan nga Gazlavay a, mandërzay a kar, a lëvar: «Bay adaw, mekey me?» Maslan nga Gazlavay kaa a mbëddara, a lëvar: «Gazlavay ta cënda medërey-danggay akah la, ta hëtkä la masa kah fa jënta masa-viya hay. Cek hay a kedë a mbafar. Da ray ngene, aa fa sërfadaka.»⁵ Wure kedë, slërey ndëhay aa berney nga Jawpe nga zëlwa ndaw daha mezëley *Simanjw, masa mehëlmey *Piyer.⁶ Anga da way ndaw daha ma këfda ambal mezëley Simanjw, way anga da mey-bëlay.»⁷ Masa maslan nga Gazlavay

maa guzlar heyey ma vëhey la na, Kwerney, ta', a zëlwa madërlam anğa hay cew ta sewje pal da wuzlah sewje anğa hay masa daa slëra anğa. Sewje he ngene, ara ndaw ma sëpa cëved nğa Gazlavay ta mevel pal. ⁸ Ta', a kadatara cek tabiya ma kam. Fa dëba ha, ta', a slërdata aa berney nğa Jawpe fa Piyer.

⁹ Pepërek e, ndëhay masa Kwerney ma slërdata heyey ata daa cëved gweegwe a wusam a Jawpe heyey. Gweegwe ta wuzlah-pas na, Piyer ta', a tëpëy aa papalah da ray way nğa dërey dangay a Gazlavay. ¹⁰ Masa anğa fa dërey dangay na, may fa car, a wudëy daf nğa zëmey. Daa masa fa tamar daf a na, Gazlavay ta', a wuzar cek. ¹¹ A hëtar slam da vad mawurkaya, cek anda gwedeere a pawa salay a hwayak, cakay hay mëfad mabanğadatakaya. ¹² Daa gwedeere he, cek hay nğa ley mekele mekele da hwad a, cek hay masa salay mëfad, cek hay ma diyam ta hwad ta hwad, lej diyan hay. ¹³ Day a cënwa da vad, a lëvey: «Piyer, lecey, sley dëy nğa cek hay a kedë, zëmey!» ¹⁴ Ama Piyer a mbëddara, a lëvar: «'A'a, Bay Mahura, nğa menjey adaw, cek masa kwakwas ala ma tëka sem na, ya ta zëmey daa ba aran.» ¹⁵ Day heyey, ta', a cënwa saya, a lëvar: «Cek masa Gazlavay ma lëvey maaya nğa zëmey na, ka da pada nğa cek maaya ba na, kënë ba.» ¹⁶ Day a, a cënwa dey maakar, fa dëba ha, cek aha ta', a vëhey aa slam a, a vad.

¹⁷ Piyer fa wulkada cek masa Gazlavay ma wuzdara, a wudëy nğa lëvar na, me. Daa ngene, ndëhay masa Kwerney ma slërdata heyey faa cëfdam ndëhay, a lëvam: «Way nğa Simanğw na, dama?» Ta', a diyam, a lacam daa ambaw dëgay. ¹⁸ A zëlam, a lëvam: «Ndaw mezëley Simanğw, masa mehëlmey Piyer daha na, anğa fedë daw?» ¹⁹ Piyer a lawa daa slam medërey-dangay heyey, fa wulkey da ray cek masa Gazlavay ma wuzdara. Ta', *Mesëfney nğa Gazlavay a lëvar: «Ehe, ndëhay daha maakar fa sëpmaka.

²⁰ Slëkdëy, bërngëy fa ata amba ka diyam bama. Ka da zlurey ba, maja ara Yah ma slërdatërwa.» ²¹ Piyer, ta', a bërngëwa fa ndëhay a, a lëvtar: «Ara yah, ndaw masa akwar ma sëpmara. Ka samawa na, kwara?» ²² Ndëhay a, a mbëddamara, a lëvmar: «Ya samawa na, Kwerney, mahura nğa sewje hay, ma slërdandërwa. Anğa na, ndaw maaya fa Gazlavay, kwa anğa ndaw Jëwif ba, anğa fa sëpa mey nğa Gazlavay anda Jëwif hay. Jëwif hay tabiya faa hëmdamara. Ndaw a na, maslan nğa Gazlavay da vad ta sawa la fa vëda, a lëvar nğa sawa nğa ngëlka a way anğa, amba a

jøkey slëmay fa mey masa kah ma da kadara.» ²³ Piyer, ta', a ngëlta ngada way, a vëltar slam nga ney dasi tavad a ngene.

Piyer a daw a way Kwerney

Pepërek e, a slëkdam, a diyam ta ata Piyer heyey. Mëlmaha hay siya daa mecëmey-ray nga ndëhay nga Yesu da Jawpe a lëgdamata. ²⁴ Pepërek e saya, a wusam aa berney nga Sezere. Daa ngene, Kwerney ta zëltërwa sækway anga hay, ta jam anga hay masa fara fara la, ata makustakaya, fa sækwmata. ²⁵ *Piyer a wusey a way Kwerney. Masa anga fa mbëzey a way a na, Kwerney, ta', a car har, a regedey fa mey anga. ²⁶ Ama Piyer, ta', a slëkdada, a lëvar: «Lecey, yah na, ndaw anda akah.» ²⁷ Piyer faa guzlam ta Kwerney haa kasl ata ma wusam a palah-way. Fetede Piyer a hëtfey ndëhay ga makustakaya da way Kwerney a. ²⁸ A lëvtar: «Akwar, ka sëmara kwakwas nga *Jëwif hay ta tëka ndaw Jëwif sem nga ndækwey a way ndëhay masa Jëwif hay ba hay, asaya, ta tëka sem kwa nga pëkey ta ata. Ama, Gazlavay ta wuzdiwa la, ya da nëka kwa waawa aa mazlëbkaya, a da kaya hezey na, köne ba. ²⁹ Da ray ngene, masa kah ma zëlyawa na, ya ta zlurey nga sawa daa ba. Ya wudey ya sëra ka zëlyawa na, kwara?»

³⁰ Kwerney a mbëfdara, a lëvar: «Anga kaa dar maakar, ta bërey maakar ngaa kwad anda kede, ya fa dërey dangay da way adaw. Daa ngene, ndaw daha a sawa a cakay adaw ta zana fa vaw ma wedey ndëf-ndedf, ³¹ a lëvya: “Kwerney, Gazlavay ta cënda medërey-dangay akah la. Fa sërfada masa kah ma jënta masa-viya hay heyey. ³² Anda kede, slërey ndëhay aa berney nga Jawpe nga zëlwa ndaw mezëley *Simanw masa mehëlmey Piyer. Anga da way ndaw mezëley Simanw ma këfda ambal, way anga da mey-bëlay.” ³³ Wure ngene, ta', ya slërey ndëhay fa kah nga ngëlmakawa kede. Suse, maja kah ma sawa. Wure kede na, ala tabiya makustakaya fa mey nga Gazlavay nga jøkey slëmay fa mey masa Bay Mahura ma vëldakawa nga wuzdandara.»

Piyer a wuzey Mey-maaya-mawiya ngada Kwerney ta ndëhay da way anga

³⁴ Ta', *Piyer a zlar mewuzey mey, a lëvey: «Wure kede ya sëra fara fara Gazlavay a weley ndëhay ta weley ba.

³⁵ Anda melëvey, ndaw ma nar ray a Gazlavay, ma key

cek ta cøved e na, kwa anga daa sækway wura wura, Gazlavay a tæba la. ³⁶ Gazlavay ta slërdërwa mey anga la a ndëhay *Israyel hay. Mey a na, ara *Mey-maaya-mawiya ma njadandakwar daa zazay ta fa Yesu *Køriste, Bay Mahura nga ndëhay tabiya. ³⁷ Ka sèrmara cek ma key daa hwayak nga *Galile haa aa hwayak nga *Jude fa dæba ha masa *Jan-Baptis ma wuzey mey ta aa ma katar *baptem a ndëhay heyey, ba diya? ³⁸ Ka sèrmara na, Gazlavay ta wala Yesu, ndaw *Nezeret la, a vølar Mesøfney anga ta gødan anga. Yesu a, a pøkta hwayak hay mekele mekele, a katar maaya a ndëhay, a pøskatërwa ndëhay tabiya masa dasi har nga bay-malula, a mbøldata. A kata slëra hay a anda kedë na, maja Gazlavay aa ta anga.

³⁹ «Ala na, ndëhay masa ma høtmar la ta dey ala, ya kam sede da ray cek hay masa anga ma kata tabiya da *Jeruzelem ta daa hwayak hay mekele mekele nga *Jøwif hay. Ta dørmara la fa hwadam mazlanjalakaya, a kødmara vagay. ⁴⁰ Ama nga ðar maakar a, Gazlavay ta slëkdadërwa sem daa memøcey. Ta', a vølar cøved nga wuzwa vaw a ndëhay. ⁴¹ A wuzwa vaw a na, ngada ndëhay tabiya ba, ama ngada ala, ndëhay masa aa ma walata ngeeme nga key sede da ray a. Ala na, ta zømam cek la, ta sam cek la bama ta Yesu a fa dæba ha masa Gazlavay ma slëkdadërwa cay daa memøcey. ⁴² Gazlavay a løvndar ya wuzdamatara mey anga a ndëhay, ya kam sede da ray a, ya løvam, Yesu ara ndaw masa Gazlavay ma pa nga key sariya a ndëhay masa ta dey ta a ndëhay mamøctakaya. ⁴³ Ndëhay ma tøla mey nga Gazlavay tabiya taa guzlam la da ray Yesu a, a løvam kwa waawa ma pa Yesu nga ndaw anga fara fara na, Gazlavay a mbøkðara mebørey anga la ta fa gødan nga mezøley anga.»

Ndëhay masa Jøwif hay ba a høtam Mesøfney nga Gazlavay

⁴⁴ Daa masa *Piyer faa guzley ðagay, *Mesøfney nga Gazlavay a pawa salay a ray ndëhay tabiya ma jøkam slømay fa mey anga. ⁴⁵ Ndëhay *Jøwif hay ma tæba mey nga Yesu ma samawa ta ata Piyer fetedë heyey a røzlam ga, maja Gazlavay ta vøltar Mesøfney anga la a ray ndëhay masa Jøwif hay ba hay may. ⁴⁶ Ndëhay Jøwif hay a, a cøndamara ndëhay a faa guzlam ta mey hay mekele

10:35 10.35 Jan 9.31 **10:36** 10.36 Iz 52.7; Rm 3.25-26; 5.1; 2Kwr 5.18; Kwa 1.20; CWJ 19.16 **10:38** 10.38 Lk 4.18; 13.16; Jan 3.2 **10:39** 10.39-40 3.15
10:41 10.41 1.4; Lk 24.30-31, 41-43; Jan 21.12-13 **10:42** 10.42 17.31; Rm 14.9; 2Tm 4.1; 1Pi 4.5 **10:43** 10.43 13.38; Jer 31.34 **10:44** 10.44-46 2.4

mekele masa ata ma sërmara ba, fa hëslmar ray a Gazlavay. Ta', Piyer a lëvey: ⁴⁷ «Wure kefe ndëhay kaa ta hëtam Mesëfney nga Gazlavay cay anda alëkwa may. Kaa ya gwakwa nga tëktakwa nga hëtey *baptem ta yam daw?»

⁴⁸ Da ray ngene, a lëvtar nga kamatar baptem ta mezëley nga Yesu *Këriste. Ta', aa cëfdamara Piyer nga njeý ta ata ðar nekëdey.

11

Piyer aa guzley fa mey nga ndëhay nga Yesu da Jeruzelem

¹ Ndëhay meslërey nga Yesu ta mëlman hay daa mey nga Yesu masa daa hwayak nga *Jude, a cëndamara na, ndëhay masa *Jëwif hay ba ta tëbmara mey nga Gazlavay la may.

² Ta pas masa *Piyer ma vëhwa a *Jeruzelem na, Jëwif hay ma tëba mey nga Yesu a slam mey a ray a, ³ a lëvmar: «Ka mbëzey a way ndëhay masa Jëwif hay ba hay, masa mandawal manjar nga sley, ka zëmam cek bama daa slam a na, kwara!» ⁴ Ta', Piyer a wuzdatara cek hay ma kam dëga nga mezley. A kadatara pal pal, a lëvtar:

⁵ «Yah daa berney nga Jawpe, ya fa dërey dangay a Gazlavay, daa ngene, ta', Gazlavay a wuzya cek. Ya hëtar cek daha, a pawa salay da gazlavay da vad a cakay adaw, cek aha anda gwedeere, cakay hay mëfad mabangadatakaya. ⁶ Ya nëkey dey maaya maaya a hwad a na, ya hëtey cek hay ta salay mëfad mëfad, cek hay nga ley hay, cek hay ma diyam ta hwad ta hwad, leñ dïyan hay.

⁷ Ya cënda ðay ma lëvya: "Piyer, lecey, sley ðay nga cek hay a kefe, zëmey!" ⁸ Ama ya mbëddara, ya lëvar: "'A'a, Bay Gazlavay, nga menjeý adaw, cek masa kwakwas ala ma tëka sem na, ya ta zëmey daa ba aran." ⁹ Day heyey, ta', aa guzlya saya, a lëvey: "Cek masa Gazlavay ma lëvey maaya nga zëmey na, ka da pada nga cek maaya ba na, këne ba."

¹⁰ «Cek a kefe a key dey maakar, fa dëba ha cek aha tabiya, ta', a vëhey aa slam a, a vad. ¹¹ Wure wure ngene, ndëhay maakar a wusmawa a way ndaw masa ala da hwad a. Ara ndaw daa berney nga Sezere daha ma slërdatërwa fa yah. ¹² *Mesëfney nga Gazlavay a lëvya: "Daw ta ata, ka da zlurey ba." Ta', ya diyam bama aa hwayak nga Sezere. Mëlma adaw hay maakwaw daa mey nga Yesu da Jawpe masa da cakay adaw fefe, ta', ya diyam bama. Ya wusam, ala tabiya ya mbëzam a way ndaw aha. ¹³ Ndaw a, a kadandara cek masa anga ma hëtar da way anga. A lëvndar *maslan nga Bay Gazlavay da vad, ta wuzar

vaw la, a lecey fa mey anğa, a lëvar: “Slërey ndøhay aa berney nga Jawpe nga ngëlwa ndaw mezëley *Simanw, masa mehëlmey Piyer. ¹⁴ Anğa na, a wuzdakawa cëved ma da lëhdakwar ta ndøhay da way akah la.”

¹⁵ «Masa ya fa zlar nğaa guzltar na, Mesëfney nga Gazlavay a pawa salay a ray ata cëpa anda anğa ma pawa salay a ray ala nğeeme. ¹⁶ Daa nğene, ya sërfada mey nga Bay Mahura zleezle, ma lëvey: “*Jan a katar *baptem a ndøhay na, ta yam, ama akwar, ka hëtam baptem la ta Mesëfney nga Gazlavay.” ¹⁷ Gazlavay a vëltar Mesëfney anğa, anda anğa ma vëldandara Mesëfney a daa masa ala ma tëbmara mey nga Bay Mahura Yesu *Këriste. Anda kedë, yah na wa, nga tëka Gazlavay nga key cek masa aa ma wufey na!»

¹⁸ Masa ata ma cëndamara mey kedë la na, a mbëkdamara meyey-mey. Ta', a hëlmamara Gazlavay, a lëvam: «Kwa nğada ndøhay masa Jëwif hay ba hay na, fara fara Gazlavay ta wurtar cëved cay amba a mbëkdamara menjey ata, a sëpmara Gazlavay ta mevel pal. Maja nğene, ata may, a hëtam heter mendøvey ba la.»

Mecëmey-ray nga ndøhay nga Yesu da Antiyaws

¹⁹ Ta pas masa ata ma këdmara Etiyen heyey vagay na, fa dëba ha, a zlamar nga sërdamata banay ta ndøhay ma tëba mey nga Yesu. Ndøhay nga Yesu a, aa kwacam ray pal pal. Siya nga ndøhay a, a diyam kasl aa hwayak nga Fenisi, aa hwayak nga Sipëre, ta aa berney nga Antiyaws. A wuzam mey nga Gazlavay na, si a ndøhay *Jëwif hay gway.

²⁰ Ama ndøhay siya da wuzlah ndøhay maa kwacam ray heyey masa ndøhay Sipëre hay ta ndøhay Siren hay na, ta wusam la a Antiyaws. Fetedë, ta wuzmatar *Mey-maaya-mawiya la da ray Bay Mahura Yesu *Këriste, a ndøhay masa Jëwif hay ba hay may. ²¹ Gëdan nga Bay Mahura aa ta ata. Maja nğene, ndøhay ga a tëbmara mey anğa, a sëpmara cëved anğa.

²² Ndøhay daa *mecëmey-ray nga ndøhay nga Yesu da *Jeruzelem a cëndamara mey aha. Da ray nğene, a slëram *Barnabas a Antiyaws. ²³⁻²⁴ Barnabas a na, anğa ndaw maaya, marëhkaya ta *Mesëfney nga Gazlavay, fa pa Yesu nga ndaw anğa fara fara. Masa anğa ma wusey la a Antiyaws a na, a hëtar slëra masa Gazlavay ma ka da wuzlah ndøhay a ta fa maaya anğa. Barnabas aa sëmey ga maja maaya nga Gazlavay a. Ta', a vëltar gëdan a ndøhay

tabiya. A lëvtar: «Namar ray a Bay Mahura mandaw mandaw ta mevel akwar çëpa, ka da mbëkdamara ba.» Maja ngene, ndëhay ga a tëbmara mey nga Bay Mahura.

²⁵ Fa dëba ha Barnabas, ta', a daw aa berney nga Tars, a sëpërwa *Sawl. ²⁶ Masa anga ma hëtar la na, a ngëlërwa aa berney nga Antiyaws. Ta', a njam cew e mevey pal daa mecëmey-ray nga ndëhay nga Yesu da Antiyaws a. Ata faa sërkadam ndëhay ga fetedë. Ara daa berney a ngene, ata ma zlamar nga zëlmata ndëhay nga Yesu «Këretiyen hay.»

²⁷ Daa ngene, ndëhay ma tëla mey nga Gazlavay siya a slëkdam da Jeruzelem, a diyam a Antiyaws. ²⁸ Ndaw pal dasi ata daha mezëley Agabus. A lecey, a wuzda mey masa Mesëfney nga Gazlavay ma wuzdara, a lëvey: «May mahura a key la fa bëla ndav.» Fara fara may a na, ta key la daa masa Këlawt aa daa bay. ²⁹ Masa anga ma lëvtar anda kedë la na, ndëhay nga Yesu fetedë a cëmdamara day ata. A wulkam maaya na, kwa waawa a slërwa cek tëdë ta gëdan anga, nga jëney mëlman hay daa mecëmey-ray nga ndëhay nga Yesu daa hwayak nga *Jude. ³⁰ Ta', a kamara këne. Cek hay macakalakaya ha na, a slërdamara ta har ata Barnabas ta Sawl nga vëley a *bay-ray hay daa mecëmey-ray nga ndëhay nga Yesu da Jude.

12

Bay Herawt a sërdata banay ta ndëhay ma tëba mey nga Yesu

¹ Daa ngene, Bay *Herawt a zlar ma sërdata banay ta ndëhay mekele mekele daa *mecëmey-ray nga ndëhay nga Yesu. ² A këda *Jak ta dëlaw vagay. Jak a na, ara mëlman nga *Jan. ³ Bay Herawt a nëka na, *Jëwif hay faa sëmam maja anga ma këda Jak vagay. Ta', a kërza *Piyer saya, a kërza aa fërsëne. A kërza Piyer na, daa dar hay nga gwagway mezëley «*Gwagway nga pen manjar cek ma hësla da hwad a.» ⁴ Ta', a lëvtar a sewje hay nga jëdmara. Sewje hay a, ata mëfad, mëfad dey mëfad a. Bay Herawt a, a wudëy nga kar sariya a Piyer meedey ndëhay tabiya fa dëba nga gwagway nga *Pak. ⁵ Anda kedë, Piyer magërcakaya daa fërsëne, ama ndëhay daa mecëmey-ray nga ndëhay nga Yesu heyey fa dëram dangay a Gazlavay mandaw mandaw ta mevel pal maja anga.

Maslan nga Gazlavay da vad a badërwa Piyer daa fërsëne

⁶ Slam ma da wurwa amba Bay *Herawt a kar sariya a *Piyer na, ta tavad a ñgene, Piyer majëwkaya ta calalaw hay cew manakaya da wuzlah sewje hay cew ma jëdmara heyey. Sewje hay mekele fa jëdmara mey-slam nga fërsëne he saya. ⁷ Ta', *maslan nga Bay Gazlavay da vad a sawa, slam daa way a, a wedey përay! Maslan a, a wusa Piyer aa cakay, a slëkdada, a lëvar: «Slëkdey fiyaw!» Masa maslan a faa guzlar na, calalaw hay heyey a kwiyam da har Piyer.

⁸ Maslan a, a lëvar: «Diya vaw akah, pata tarak akah hay a salay.» Piyer, ta', a ka anda maslan a ma lëvar. Maslan a lëvar saya: «Slëlha zana akah fa vaw, sëpya.» ⁹ Piyer aa da siya, a bamawa daa fërsëne kasl ambaw. Ama Piyer ta sëra cek masa maslan a ma kara ñgene ara cek fara fara na, daa ba. A wulkey ara mesëfney ma kar. ¹⁰ Masa ata fa diyam na, a mbëkdamatërwa sewje hay ñgeeme, a mbëkdamatërwa sewje hay nga dey cew e, a wusam fa mey-mbew nga bërey nga fërsëne masa ma bawa ñgadaa berney. Mey-mbew e a wurey taava anga. Ta', a bamawa daa fërsëne he. A diyam taa cëved ma daw taa berney a. Fa dëba ha nekëdey na, maslan nga Gazlavay a sem, a daw, a mbëkda Piyer fetede.

¹¹ Daa slam aha ñgene, Piyer, a sëra cek masa ma key ta anga na, ara cek fara fara. A lövey: «Wure kedë, ya sëra fara fara ara Bay Gazlavay ma slërwa maslan anga, nga lëhdaya dasi har nga Herawt, asaya, daa cek maaya ba tabiya masa ndëhay *Jëwif hay ma wudam nga kamaya.»

¹² Masa Piyer ma sëra cek aha ma key anda kedë la na, ta', a daw a way *Mari, maman nga Jan-Mark. Ndëhay ga makustakaya fetede, fa dëram dangay a Gazlavay. ¹³ Piyer a zëley fa mey-mbew, a këfa kwetëj *. Dam ma key slëra da wuzlah ata fetede daha mezëley Rawde. Ta', a sawa nga nëka ma këfa kwetëj e na, ara wa. ¹⁴ A wusey fa mey-mbew. Masa aa ma cënda ara dëy nga Piyer na, aa sëmey ga ara mey ba. Kwa nga wura mey-mbew e na, ta wura daa ba, ama a hway ta ray ngada way fa ndëhay da way a heyey, a lëvtar: «Piyer malacakaya fa mey-mbew.» ¹⁵ Ndëhay kaa a mbëkdamara ngada dam aha, a lëvmar: «Malula fa kaka daw?» Ama anga fa lëvtar, fa lëvtar: «Fara fara ara anga.» Ndëhay a, a lëvam: «Da ara maslan anga kwa †.»

¹⁶ Ama Piyer, fa zëley, fa këfa kwetëj nga mey-mbew cënga, kwa ta mbëkda daa ba. Ta', a wurmara mey-mbew heyey. Masa ata ma hëtmara ara anga na, a rëzlam ga.

12:7 12.7-10 5.19 **12:12** 12.12 Jan-Mark: 12.25; 13.13; 15.37; Kwa 4.10

* **12:13** 12.13 kwetëj: parawal † **12:15** 12.15 maslan anga: Ndëhay Jëwif hay a wulkam maslan nga Gazlavay fa ndaw a fa ndaw a na, daha, fa jëda ndaw a ndaw a. Maslan a, a gwa a wuzwa vaw anda ndaw aha. Nëka Mt 18.10.

17 Piyer heyey, ta', a banqadatar har nga njam teete, ta', a kadatara mey da ray cek masa Bay Gazlavay ma ka nga badërwa daa fërsëne. A lëvtar: «Kadamara mey kefe ngada *Jak ta ngada mëlman hay mekele daa *mecëmey-ray nga ndëhay nga Yesu.» Ta', a mbëkdata, a daw aa slam mekele.

18 Cay, slam ta', a wurey, sewje hay heyey a wuram mey hëbak a hëbak a, a sërmara nga key kwara ba. A lëvam: «Piyer a key na, kwara?» 19 Bay Herawt heyey, ta', a slërey ndëhay aa wura aa wura nga sëpmërwa Piyer e, ama ta hëtmërwa daa ba. Da ray ngene, Bay Herawt aa cëfdata sewje hay ma jëdmara Piyer heyey, ta', a lëvtar a ndëhay mekele nga këfmata vagay. Fa dëba ha, ta', Bay Herawt a, a slëkdey daa hwayak nga *Jude, a daw aa berney nga Sezere, a njawa fetede dar nekëdey.

Memëcey nga Bay Herawt

20 Daa ngene, Bay *Herawt mevel anga fa cey a ray ndëhay daa berney nga Tir ta ndëhay daa berney nga Sidanw. Ndëhay daa berney hay a, a hëdkam cek mezëmey na, daa hwayak nga Bay Herawt a. Da ray ngene, a cëmdamara dëy ata, a sëpam cëved nga daw fa vëfa. Maja ngene, a vëlam dala a Bëlastus, madërlam mahura nga Bay Herawt amba a hëtam cëved nga wusey fa Herawt nga kar ambahw.

21 Masa pas nga key ambahw a Bay Herawt a heyey ma wuswa cay na, Herawt a pawa zana nga bay fa vaw, a daw, a njeý aa jannga anga fa mey nga ndëhay a, a zlar meeguzley. 22 Aa faa guzley na, ndëhay tabiya fetede a wudam, a lëvam: «Maa guzley kaa na, ara Gazlavay, ba na, ndaw ba.» 23 Wure wure ngene, maslan nga Gazlavay da vad a këfa Herawt a, maja anga ma tëba ndëhay a ma hëslmar ray, a pa ray anga nga Gazlavay. Ta', mëtal hay a zëmamara, fa dëba ha, a mëcey.

24 Yaw, mey nga Gazlavay na, fa daw fa mey, fa mey. Ndëhay masa ma tëba mey nga Gazlavay a, fa sëkmawa, a dey a, a dey a.

25 Fa dëba ha ata *Barnabas ta *Sawl ma ndëvdamara slëra ata da *Jeruzelem la na, a vëham aa berney nga Antiyaws. A diyam bama ta ata Jan-Mark.

13

A walamata ata Barnabas ta Sawl

¹ Daa *mecëmey-ray nga ndëhay nga Yesu daa berney nga Antiyaws masa da Siri na, ndëhay ma tëla mey nga Gazlavay daha, asaya, ndëhay maa sërkadam mey nga Gazlavay daha. Ndëhay a na, ara ata *Barnabas, Simeyanjw masa ma pamar slëmay-wazlay «Matara», Lusiyus, ndaw Siren, Manayanj masa ma gëlam ta Bay *Herawt daa slam a, lej *Sawl. ² Ta pas langar daha, ata fa dëram dangay a Gazlavay, fa kam *daliyam. Ta', *Mesëfney nga Gazlavay a lëvtar: «Pamatiwa ata Barnabas ta Sawl wal nga key slëra masa yah ma zëlta maja.» ³ Anda kedë, fa dëba ha masa ata ma ndëvdamara mekey daliyam ta medërey-dangay cay na, a pamatar har a ray ata Barnabas ta Sawl heyey, ta', a mbëkdamata nga diyam aa slëra ha.

Ata Barnabas ta Sawl daa hwayak nga Sipëre

⁴ Anda kedë, *Mesëfney nga Gazlavay a slërdara ata *Barnabas ta *Sawl. A diyam aa berney nga Selesi. Fetedë, a ndëkwam aa kwambiwal nga daw aa hwayak nga Sipëre masa da wuzlah bëlay. ⁵ A wusam aa berney nga Salamin daa hwayak nga Sipëre he. Fetedë, a wuzdamara mey nga Gazlavay a ndëhay *Jëwif hay daa *way-mewuzey-mey nga Gazlavay a. Janj-Mark, aa da wuzlah ata nga jënta.

⁶ A pëkmara hwayak a tabiya haa kasl a wusam aa berney nga Pafaws. Fetedë, a hëtfamar ndaw Jëwif mezëley Bar-Yesu. Anja fa key maazla hay ma sawa ta fa Gazlavay ba. A mbërzley, a lëvey anja *ndaw ma tëla mey nga Gazlavay. ⁷ Bar-Yesu a, anja madërlam nga bay nga hwayak a. Bay a, mezëley Serziyas Pawlas, anja ndaw ta lengesl. A zëltërwa ata Barnabas ta Sawl a way anja, maja a wudëy nga cëney mey nga Gazlavay fa ata. ⁸ Bar-Yesu, ndaw ma ka maazla ha, a zëlmara ta mey Gërek, Elimas. Ama Elimas na, a wudëy mey nga ata Barnabas ta Sawl ba. A sëpey cëved amba a tëka bay a nga tëba mey nga Gazlavay.

⁹ Da ray ngene, Sawl, masa ata ma zëlmara ta mey Gërek Pawl, marëhkaya ta Mesëfney nga Gazlavay, a nëkfa ndaw aha, ¹⁰ a lëvar: «Kah ndaw membërzley! Kah, ndaw ma tëknata ndëhay tabiya! Kah, bëzey nga bay-malula! Kah, masa-gëra nga cek hay maaya tabiya! Slëra masa Bay Gazlavay ma ka na, ara slëra maaya ta cëved e. Ama kah, ka fa sëpey cëved mandaw mandaw nga nësa slëra ha! ¹¹ Ehe, wure kedë, Bay Gazlavay a da nëska, ka da wulfey. Haa dar nekëfey, ka fa da hëtar mewedey nga pas daa ba.» Wure wure ngene, slam tabiya a tërey lëvanj fa mey anja, a hëtar

dey saba. A sөpëy ndaw nga d'ada fa har. ¹² Bay heyey ma hөtar cek ma key anda kedë la na, a rөzley ga da ray mey nga Bay Mahura Yesu, ta', a tөba mey nga Gazlavay.

Ata Pawl ta Barnabas da Antiyaws daa hwayak nga Pisidi

¹³ Fa dөba ha, Pawl ta ndëhay ma lөgdamara a tөpam aa kwambiwal, a slөkdam daa berney nga Pafaws. A tөngam bөlay, a diyam a Perze masa daa hwayak nga Pamfili. Fetedë na, Jan-Mark a mbөkdata, a vөhwa a *Jeruzelem.

¹⁴ Ata na, a slөkdam daa berney nga Perze he, a diyam a Antiyaws daa hwayak nga Pisidi. Ta *pas memөskey-vaw, a diyam, a njam aa *way-mewuzey-mey nga Gazlavay fetedë.

¹⁵ Daa way a, ndëhay a jangamara d'erewel nga *kwakwas nga Mawiz lej nga ndëhay ma tөla mey. Fa dөba ha, *bay-ray hay daa way a, a slөram ndaw fa ata Pawl ta *Barnabas ngaa guzlar, a lөvtar: «Mөлma ala hay, da akwar ta mey daha nga vөltar gөdөnj a ndëhay makustakaya kedë na, ka gwamara ngaa guzlam wure kedë.» ¹⁶ Pawl, ta', a slөkdey, a lecey, a banğad'a har anğa, a zlar meeguzley, a lөvey:

«Akwar, ndëhay Israyel hay, ta akwar masa daa sөkway nga Jөwif hay ba ma sөpam mey nga Gazlavay, jөkfamaya slөmay. ¹⁷ Gazlavay masa ndëhay *Israyel hay ma namar ray na, ta walata papanj nga papa alөkwa hay la zleezle. Ta sөkdata la ga daa masa ata daa hwayak nga *Ejip. Fa dөba ha, ta badatөrwa la daa hwayak nga Ejip ta gөdөnj anğa mahura. ¹⁸ A key mevey kwakwar mөfad anğa fa nөkfatar dey da wuzlah-ley. ¹⁹ Fa dөba ha, a paslata sөkway hay maasala da *Kananj cөpa, a vөldatara hwayak a, a ndëhay Israyel hay nga wamara. ²⁰ Mevey masa Israyel hay ata daa beke ta masa ata da wuzlah-ley na, a key mevey temere mөfad ta kwakwar zlam.

«Fa dөba ha, a patar bay-ray hay nga jөnta papanj nga papa alөkwa hay a, haa kasl fa *ndaw ma tөla mey nga Gazlavay mezөley Samiyel ma sawa. ²¹ Daa nğene, ta', aa cөfdam bay. Anda kedë, Gazlavay a vөltar *Sawl, bөzey nga Kis, daa sөkway nga Benjamenj nga key bay ata. A wa hwayak a, mevey kwakwar mөfad. ²² Ta', Gazlavay a bada Sawl daa bay, a patar *Davit nga bay ata. Gazlavay aa guzley da ray a, a lөvey: "Ya ta hөtey ndaw ma mbafaya la, ara Davit, bөzey nga Jese. A da key slëra tabiya masa yah ma wudëy." ²³ Daa sөkway nga Davit e na, Gazlavay

13:11 13.11 9.8; 22.11 **13:13** 13.13 13.5; 15.38 **13:14** 13.14 17.2 **13:15** 13.15 15.21 **13:17** 13.17 Mab 1.7; Mew 5.15 **13:18** 13.18 Mab 16.35; Mesl 14.33-34; Mew 29.4 **13:19** 13.19 Mew 7.1; Jes 14.1 **13:20** 13.20 NMH 2.16; 1Sam 3.20 **13:21** 13.21 1Sam 8.5, 19; 10.21; 11.15 **13:22** 13.22 1Sam 16.12; 13.14

ta bawa ndaw pal la ma da lëhdata Israyel hay anda aa ma lövey zleezle *. Ndaw aha na, ara Yesu. ²⁴ Wuskwaa Yesu a da zlar slëra annga na, *Jan-Baptis ta wuzdatara la a ndëhay Israyel hay tabiya, a lëvtar: “Mbëdëdamara menjey akwar, mbëkdamara mekey mebörey, hëtam *baptem.” ²⁵ Mamba Jan-Baptis a ndëvda slëra annga na, a lëvtar a ndëhay: “Ka wulkam yah na, wa? Yah na, ndaw masa akwar ma sëkwmarä heyey ba. Ama jëkam slëmay, ndaw ma da sawa fa dëba adaw daha, a fënya, kwa ya wusa nga pëska zewed nga tarak annga ba.”»

²⁶ Pawl a lëvtar saya: «Mëlma adaw hay, akwar masa daa sëkway nga *Abëraham, ta masa daa sëkway nga *Jëwif hay ba ma namar ray a Gazlavay, Gazlavay ta slërdandakwara *Mey-maaya-mawiya la ngada alëkwa amba a lëhdandakwar daa mebörey. ²⁷ Fara fara, ndëhay da Jeruzelem ta bay-ray ata hay ta sërmara Yesu ara wa na, daa ba. Mey nga ndëhay ma tëla mey nga Gazlavay masa ata ma janngamara mandaw mandaw ta pas memëskey-vaw na, ta cëndamara daa ba may. Ama ta pas masa ata ma kamar sariya a Yesu nga këdëy vagay na, ta kamara la anda mey a ma lövey. ²⁸ Kwa ta hëtam mey fa annga tëdë nga kar sariya nga këdëy vagay na, daa ba. Ta ngene he cëpa, ta', a kamar ambahw a Pilat nga këdä vagay. ²⁹ Masa ata ma kamar cay tabiya anda dërewel nga Gazlavay maa guzley da ray Yesu a na, ta', a bërngadamërwa da ray hwadam, a pëshamara aa cëvay. ³⁰ Ama Gazlavay ta slëkëfadërwa sem daa memëcey. ³¹ Yesu ta wuztar vaw la a ndëhay dër weewe, ndëhay masa zleezle ata ma pëkam bama daa hwayak nga *Galile haa kasl a Jeruzelem. Wure kedë, ndëhay a fa kam sede da ray a fa mey nga Israyel hay.

³² «Ala may, ya fa wuzdamakwara mey maaya da ray cek masa Gazlavay ma lëvtar zleezle a papan nga papa alëkwa hay a katara la heyey. ³³ Wure kedë Gazlavay ta kandakwara cek aha la ngada alëkwa, böz ata hay, ta fa maslëkëdäwa nga Yesu daa memëcey. Annga letëk ta mey mawuzlalakaya daa *Pësam cew ma lövey:

“Kah na, Bözey adaw,
dëga tasana yah Papakw.”

³⁴ Yaw, Gazlavay ta slëkëfadërwa la daa memëcey, amba kwa a zey ba sëlak. Zleezle Gazlavay ta lövey la:

* **13:23** 13.23 Gazlavay ta lëvar la a Davit, ndaw pal daa sëkway annga a bawa la nga lëhdata Israyel hay, a da wey nga sërmataw. Nëka 2Sam 7.11-16. **13:23** 13.23 Iz 11.1; Rm 1.3; CWJ 5.5 **13:24** 13.24 Lk 3.3 **13:25** 13.25 Lk 3.15-16 **13:27** 13.27 3.17 **13:28** 13.28 Lk 23.4, 14-15, 21-23 **13:29** 13.29 Lk 23.50-56 **13:30** 13.30 3.15 **13:31** 13.31 1.3, 8 **13:32** 13.32-33 Ps 2.7; Rm 1.3-4

“Ya pëskwar mey la, anda yah ma lëvar a Davit.

Fara fara, ya kakwara cek aha la.”

³⁵ Maja ngene, mawuzlalakaya daa dërewel mekele saya, a lëvey:

“Ndaw ma ka slëra akah na,

ka fa da mbëkda nga zey daa cëvay daa ba sëlak.”

³⁶ Davit e, daa masa anga ta dey na, fa key slëra anda Gazlavay ma wufey. Ta’, a mëcey, a pëshamara aa cëvay a cakay papan nga papaha hay, vaw anga na, ta zey sem.

³⁷ Ama ndaw masa Gazlavay ma slëkdadërwa daa memëcey na, ta zey daa ba. ³⁸ Mëlma adaw hay, si ka sërmara fara fara, ala fa wuzdamakwara, Gazlavay a mbëkdatara mebërey nga ndëhay na, ta fa Yesu. Gazlavay ta mbëkdakwara mebërey akwar maja akwar ma sëpmara kwakwas nga Mawiz na, daa ba. ³⁹ Ama kwa waawa ma pa Yesu nga ndaw anga fara fara na, Gazlavay ta mbëkdara mebërey anga sem.

⁴⁰ Maja ngene, wam vaw fa mey nga ndëhay ma tëla mey hay zleezle ma kadamara, amba cek masa ata ma kadamara ha a wusfakwar ba. Ndëhay a, a lëvam:

⁴¹ “Akwar ndëhay ma rësmara mey nga Gazlavay, nëkmara!

Ka da rëzlam, fa dëba ha, ka daa zëdam,

maja yah, Bay Gazlavay,

ya da key slëra mahura ta pas masa akwar ta dey kecfë.

Kwa ndaw ta wuzdakwara mey da ray slëra ha la na,

akwar fa da tëbmara daa ba.”»

⁴² Masa ata Pawl ta Barnabas heyey ma bamawa daa way-mewuzey-mey nga Gazlavay la na, ndëhay a, a lëvmatar nga vëhmawa ta pas memëskey-vaw mekele ma da sawa, amba aa guzlmatar da ray mey a saya. ⁴³ Fa dëba ha ndëhay maa waham ray cay na, ndëhay ga ta diyam la asi ata Pawl ta Barnabas. Ma diyam a na, ara Jëwif hay ta ndëhay siya hay ma mbëzam nga sëpey kwakwas nga Jëwif hay. Daa maday ata ta ndëhay a na, ata Pawl ta Barnabas a vëlmatar gëdan amba a njam mandaw mandaw daa maaya nga Gazlavay.

⁴⁴ Masa pas memëskey-vaw mekele heyey ma wuswa cay na, har-gëdan nga ndëhay daa berney a, a kusam nga cëney mey da ray Bay Mahura Yesu. ⁴⁵ Ama Jëwif hay a nëkmata ndëhay ga makustakaya fetedë na, sëlën a katar. A cëdmara Pawl, a wufam mey anga ba. ⁴⁶ Ata Pawl ta Barnabas heyey ta’, aa guzlmatar ta mandërzay daa dey daa ba, a lëvmatar: «Teesed na, anja si cëma ya

wuzdamakwara mey nga Gazlavay ngada akwar Jëwif hay dagay. Ama, ka tëbmara mey a ba. Anda keđe akwar fa wuzdamara, akwar tëde nga njam da vad ta Gazlavay nga sërmataw ba. Da ray ngene, ya mbëkdamakwar, ya diyam fa ndëhay mekele masa Jëwif hay ba. ⁴⁷ Ehe, Bay Gazlavay ta vëldar *mewey anga la, a lëvey:

“Ya ta paka la nga wedey fa mey nga ndëhay
masa Jëwif hay ba hay,
amba ka wuzdatara a ndëhay tabiya da bëla
ya da lëhdata na, kwara.”»

⁴⁸ Ndëhay masa Jëwif hay ba ma cëndamara mey a na, aa sëmam ga. Aa hëmdamara mey nga Bay Gazlavay. Ndëhay masa Gazlavay ma walata la nga hëtey heter mendëvey ba na, a tëbmara mey nga Yesu.

⁴⁹ Anda keđe, ndëhay fa wuzdamara mey nga Bay Gazlavay kwa daa wura daa wura daa hwayak a ngene.

⁵⁰ Ama Jëwif hay da Antiyaws a hëldamata ngusay masazleley hay ma sëpa kwakwas nga Jëwif hay len ndëhay mahura hay daa berney a, nga sërdamata banay ta ata Pawl ta Barnabas. A bëlmatërwa daa hwayak ata. ⁵¹ Ata Pawl ta Barnabas, a raramara lagwada fa salay ata hay †. Ta', a diyam aa berney nga Ikwaniyum. ⁵² Ama ndëhay ma sëpa cëved nga Yesu da Antiyaws a na, a njam daa meesëmey fara fara, ata marëhtakaya ta *Mesëfney nga Gazlavay.

14

Ata Pawl ta Barnabas a wuzam mey nga Gazlavay da Ikwaniyum

¹ Ata Pawl ta *Barnabas a wusam aa berney nga Ikwaniyum. A diyam aa *way-mewuzey-mey nga Gazlavay fetede anda ata ma diyam da Antiyaws. A wuzmatar mey da ray Yesu a ndëhay maaya maaya haa ndëhay masa *Jëwif hay ta ndëhay masa Jëwif hay ba hay ga fetede, a tëbmara mey a. ² Ama Jëwif hay siya a gëmam nga tëbmara mey a ba. Anda keđe, a hëldamata ndëhay masa Jëwif hay ba hay nga wulkam maaya ba da ray ndëhay ma tëba mey nga Yesu. ³ Ta ngene he cëpa, ata Pawl ta Barnabas ta

13:46 13.46 3.26; 18.6 **13:47** 13.47 Iz 49.6 **13:48** 13.48 11.18 **13:49** 13.49 2.41 † **13:51** 13.51 raramara lagwada fa salay ata hay: Da Jëwif hay fa pëkam daa hwayak nga Jëwif hay ba hay na, a raramara lagwada fa salay ata hay len fa zana ata hay maja a wulkam lagwada ha a da zlehtë. Yesu a lëvtar a gula anga hay, da ndëhay daa berney a tëbmara mey ata da ray anga ba na, nga raramara lagwada fa salay ata hay kënë. Nëka Mt 10.14; Lk 9.5. Anda keđe, ata Pawl ta Barnabas a wuzdamatara a ndëhay daa berney a na, ata ta mebërey, mey nga ata Pawl ta Barnabas da hwad a daa saba. **13:51** 13.51 18.6; Lk 9.5

14:1 14.1 17.2 **14:2** 14.2 13.45

njam la ga da Ikwaniyum a cəŋga. A wuzam mey da ray Bay Mahura ta mandərzay daa dey ba. A kam sede da ray Gazlavay, aa guzlam da ray maaya aŋga. Bay Gazlavay a wuzdərwa mey ata na, ara mey fara fara, a vəltar gədanŋa key maazla hay ma rəzla ndaw. ⁴ Ta', ndəhay daa berney a, a wunkam cew maja mey a. Siya hay a təbam mewulkey ŋga Jəwif hay, siya hay may a təbam mewulkey ŋga ndəhay meslërey a.

⁵ Daa dər hay a ŋgene, ndəhay Jəwif hay ta ndəhay masa Jəwif hay ba hay leŋ bay ata hay na, a cəmdamara d̄ay ata pal. A wudam ŋga sərdamata banay ta ata Pawl ta Barnabas, a wudam ŋga zakamata ta aŋgwa vagay.

⁶ Masa ndəhay meslërey cew keđe ma cəndamara mey a la na, a hwam da Ikwaniyum, a diyam ŋgadaa berney ŋga Listəra, ŋgadaa berney ŋga Derbe masa daa hwayak ŋga Likwani, leŋ aa slala hay mekele mekele daa hwayak a.

⁷ Fetede may, ta wuzam *Mey-maaya-mawiya la.

Ata Pawl ta Barnabas a wuzam mey ŋga Gazlavay da Listəra

⁸ Da Listəra, ndaw daha maahəlbakaya dəga ŋga mayawa aŋga, a gwa ma daw ba. ⁹ Aa fa jəkey sləmay fa mey masa Pawl maa guzlda. Pawl a nəkfa, a səra ndaw a fa təba mey ŋga Yesu, a gwa a hətar salay aŋga la. ¹⁰ Pawl aa guzlar ta gədanŋ, a ləvar: «Sləkdey, lecey deŋ! ta salay akah!» Ndaw a, ta', a jəvey, a zlar ma daw ta salay aŋga.

¹¹ Ndəhay a hətmar cek masa Pawl ma ka, a zlamar ŋga wudey ta mey ata Likwani, a ləvam: «Kuley hay ta samawa la fa aləkwa, a təram anda ndəhay.» ¹² A pamata ata Pawl ta *Barnabas ŋga kuley hay, ta', a zəlmara Barnabas *Zus * ta mezəley ŋga kuley ata. A zəlmara Pawl may Hermes † maja ara Pawl maa guzltar. ¹³ Way ŋga kuley mezəley Zus aa gweegwe ta mey-slam ŋga berney a. Ta', ndaw ma ta kuley a, a handawa gusanŋ hay ta meefekwey hay fa mey-slam ŋga way ŋga kuley a, amba a tamata ata Barnabas ta Pawl anda kuley ata hay.

¹⁴ Ama masa ata Barnabas ta Pawl ma cəndamara mey a keđe la na, a ŋgərmata zana ata hay, a hwam a wuzlah ndəhay a ta mewudey, a ləvam: ¹⁵ «Haya! Akwar ndəhay keđe, ka kam keđe na, səkway ŋga me? Ala na, ndəhay anda akwar, ba diya? Ya samawa fede ŋga wuzmakwar

14:3 14.3 2.22 **14:5** 14.5 14.19; 2Tm 3.11 **14:6** 14.6 Mt 10.23 **14:8** 14.8 3.2 **14:11** 14.11 28.6 * **14:12** 14.12 Zus: Ndəhay Gərek hay na, kuley ata hay mekele mekele daha. Zus ara kuley mahura da ray kuley hay siya hay.
† **14:12** 14.12 Hermes: Hermes ara kuley masa ma təla mey ŋga Zus ta ŋga kuley hay siya hay. **14:13** 14.13-15 10.25-26; Dan 2.46

*Mey-maaya-mawiya. Ya fa lõvmakwar, mbëkdamara metey kuley hay masa ma gwa nga jënkwar ba ngene. Mbëd'mawa dey fa Gazlavay, ndaw masa annga daha ta dey nga sërmataw, ma lõma slam da vad ta cek hay da hwad a, ma lõma slam da hwayak ta cek hay da hwad a, ara annga ma ka bëlay ta cek hay da hwad a. ¹⁶ Zleezle na, a mbëkdata ndëhay da bëla tabiya masa *Jëwif hay ba hay nga sëpam cëved anda ata ma wudam. ¹⁷ Ta ngene he cëpa, Gazlavay fa wuzdërwa gëdan annga da wuzlah ata mandaw mandaw cënga ta fa maaya annga masa annga ma ka. Annga fa pakwar var, fa vëlkwar cek mezëmey fa mevey a fa mevey a anda akwar ma wudam, fa rëhdakwar ta cek mezëmey, faa sëmdakwar ga.»

¹⁸ Kwa ata maa guzlmatar la anda kedë na, ata Barnabas ta Pawl a tëkmata ndëhay a ta banay nga mbëkdamara metey kuley a.

¹⁹ Fa dëba ha, Jëwif hay ma samawa da Antiyaws masa daa hwayak nga Pisidi, leñ Jëwif hay ma samawa da Ikwaniyum, a hëldamata ndëhay daa berney nga Listëra ngaa zakamara Pawl ta anngwa vagay. Ta', aa zakamara, a d'ad'amara la daa berney a ngada palah maja a wulkam annga ta mëcey sem. ²⁰ Ama ndëhay ma tëba mey nga Yesu na, a kusam a cakay a. Pawl heyey, ta', a slëkdey, a vëhwa aa berney a.

Ata Pawl ta Barnabas a vëhmawa a Antiyaws masa da Siri

Pepërek e, Pawl, ta', a diyam ta Barnabas aa berney nga Derbe. ²¹ A wuzam *Mey-maaya-mawiya da Derbe he. Ndëhay ga fetedë a tëbmara mey nga Yesu. Ta', ata Pawl ta *Barnabas a vëham aa berney nga Listëra, fa dëba ha, a vëham aa berney nga Ikwaniyum, leñ a Antiyaws masa daa hwayak nga Pisidi. ²² Daa berney hay a, a vëlmatar gëdan a ndëhay ma tëba mey nga Yesu fetedë nga jaram maaya maaya daa cëved nga Yesu. A lõvmatar: «Si ya sërkwä banay ga amba ya mbëzkwa aa slam masa Gazlavay fa wey da hwad a.» ²³ Daa mecëmey-ray hay nga ndëhay nga Yesu tabiya na, a walam ndëhay nga key *bay-ray hay. Masa ata ma walamata cay na, a kam *daliyam, a dëram danggay a Gazlavay maja ata. Ta', ata Pawl ta Barnabas a vëldamata ndëhay a, a har Bay Mahura masa ata ma pamara nga ndaw ata fara fara, amba a jëdta.

²⁴ A diyam ta daa hwayak nga Pisidi, a wusam aa hwayak nga Pamfili. ²⁵ Da Pamfili a na, ngeeme, a wuzam mey nga Gazlavay daa berney nga Perze, fa dëba ha a diyam a wuzam mey daa berney nga Ataliya. ²⁶ Da Ataliya ha na, a diyam ta kwambiwal a Antiyaws masa daa hwayak nga Siri. Ara da Antiyaws a zleezle ndëhay nga Yesu fetede ma dëram dangay maja ata Pawl ta Barnabas amba Gazlavay a pëstar mey nga key slëra anga, slëra masa wure kede ata ta kamara cay.

²⁷ Masa ata ma wusam a Antiyaws a la na, a kusmata ndëhay daa *mecëmey-ray nga ndëhay nga Yesu fetede. A kadamatara cek hay tabiya masa Gazlavay ma ka ta ata. Asaya, a wuzdamatara cek hay masa Gazlavay ma ka nga wurtara cëved ngada ndëhay masa *Jëwif hay ba hay amba a pamara Yesu nga ndaw ata fara fara. ²⁸ Ata Pawl ta Barnabas ta njam la ga fetede ta ndëhay ma tëba mey nga Yesu.

15

Ndëhay nga Yesu a kusam da Jeruzelem

¹ Ndëhay siya hay a samawa daa hwayak nga *Jude ngadaa berney nga Antiyaws masa da Siri, aa sërkadamata mëlman hay daa mey nga Yesu, a lëvmatar: «Da akwar ma tëbmara *mesley mandawal anda *kwakwas nga Mawiz ma lëvey daa ba na, Gazlavay fa da lëhdakwar daa mebërey daa ba may.» ² Ata Pawl ta *Barnabas na, ta tëbmara mey a daa ba. Ta', a kam yawa ga ta ndëhay a da ray mey a. Mëlma ata hay daa mey nga Yesu da Antiyaws heyey, a walamata ata Pawl ta Barnabas lej ndëhay mekele da wuzlah ata, amba a diyam a *Jeruzelem ngaa guzlwa ta ndëhay meslërey hay, ta *bay-ray hay daa *mecëmey-ray nga ndëhay nga Yesu da ray mey a.

³ Da ray ngene, ndëhay daa mecëmey-ray da Antiyaws a, a vëlmatar cek hay nga jënta daa madaw ata a Jeruzelem. Ndëhay a, a diyam taa hwayak nga Fenisi lej taa hwayak nga *Samari, fa diyam ta meeguzley da ray ndëhay masa *Jëwif hay ba hay, a lëvam ata ta mbëkdamara mekey mebërey sem, a tëbam mey nga Yesu dëba. Da ray ngene, masa mëlma ata hay daa mey nga Yesu tabiya fetede ma cëndamara na, aa sëmam ga. ⁴ A wusam a Jeruzelem na, ndëhay daa mecëmey-ray nga ndëhay nga Yesu, ta bay-ray hay, lej ndëhay meslërey nga Yesu a tëbmata ta meesëmey. Ata Pawl ta Barnabas a wuzdamatara cek hay tabiya masa

Gazlavay ma ka ta fa ata. ⁵ Ama ndøhay *Fariza hay siya ma tøba mey nga Yesu na, a slëkdam, a løyam: «Ndøhay masa Jøwif hay ba hay na, si a tømbara nga sley mandawal, si ya løyमतar nga sèpam kwakwas nga Mawiz.»

⁶ Ndøhay meslërey a, ta bay-ray hay a, a kusam tabiya da slam a nga nøkey mey a. ⁷ Masa ata fa kam yawa ga da ray mey a na, *Piyer ta', a slëkdey, a løyey: «Mølma adaw hay, ka sèrmara zleezle Gazlavay a walaya da wuzlah akwar na, nga wuzey *Mey-maaya-mawiya a ndøhay masa Jøwif hay ba hay, amba a cøndamara, a tømbara mey nga Yesu. ⁸ Gazlavay na, ara ndaw ma sèra mevel nga ndøhay tabiya. Annga ma vøltar Mesøfney annga la a ndøhay masa Jøwif hay ba hay anda aa ma vøldandakwara may. Anda kefe, fa wuzdərwa, annga fa tømta ndøhay a. ⁹ Gazlavay ta wunkandakwar ta ndøhay masa Jøwif hay ba hay na, daa ba. Ta pørtara mevel ata la, maja ata ma tømbara mey nga Yesu. ¹⁰ Kaa wure kefe, ka jadamara Gazlavay na, maja me? Ka wufam ka tøkमतar day a ndøhay ma tømba mey nga Yesu nga sèpey kwakwas nga Mawiz na, maja me? Kwa papaŋ nga papa aløkwa hay, kwa aløkwa, ya gwakwa nga sèpkwa kwakwas a tabiya ba! ¹¹ Sasøkar jak, ya fa sèrkwa Gazlavay a løhdandakwar na, ta fa maaya nga Bay Mahura Yesu, letek ta ndøhay Jøwif hay ba hay may!»

¹² Wure ŋgene, ndøhay makustakaya tabiya fetede a njam teete, a jøkam slømay fa ata Barnabas ta Pawl. A wuzdamatara mey da ray maazla hay tabiya ma røzla ndaw masa Gazlavay ma vøltar gødaŋ nga ka da wuzlah ndøhay Jøwif hay ba hay. ¹³ Masa ata ma ndøvdamara mey ata cay na, *Jak a zlar meeguzley may, a løyey: «Mølma adaw hay, jøkam slømay! ¹⁴ Wure kefe *Simanw Piyer ta kadandakwara mey da ray pas masa Gazlavay ma zlar nga nøkfatar dey fa ndøhay Jøwif hay ba hay la. Døga ta pas ŋgene a weley ndøhay da wuzlah ata nga tøyey ndøhay annga hay. ¹⁵ Mey a, aa letek ta mey nga ndøhay ma tøla mey nga Gazlavay mawuzlalakaya daa dferewel nga Gazlavay, ma løyey:

¹⁶ Bay Gazlavay a løyey:

“Way nga *Davit * ta bøyley sem.

Fa døba ha, ya vøhwa la,

15:4 15.4 15.12 **15:7** 15.7 10.1-43 **15:8** 15.8 2.4; 10.44 **15:9** 15.9 10.35

15:10 15.10-11 15.19; Gal 2.16; 3.10-12; Ef 2.5-8 **15:12** 15.12 2.22 * **15:16** 15.16 Way nga Davit: Aa guzley da ray søkway nga Davit, da daa ba, da ray aa ma wey da ray Israyel.

ya lëma way a † la,
ya lacada aa slam a.

17 Anda keđe, ndëhay siya a sëpmaya la, yah Bay Gazlavay,
kwa ndëhay daa hwayak hay wura wura tabiya,
masa yah ma zëлта nga key ndëhay adaw hay na,
a sëpmaya la.

Ehe, Bay Gazlavay a lëvey anda keđe.

A key cek hay anda keđe na,
ara cek hay masa 18 aa ma wudëy nga wuzdatërwa
dëga zleezle.”»

19 Jak a lëvtar saya: «Maja mey a keđe, ya wulkey
maaya na, ndëhay Jëwif hay ba hay ma mbëđmawa dey
fa Gazlavay na, ya sërdamatakwa banay ba. 20 Ama,
wuzlalamatakwa leeter, ya lëvmatakwa a da zëmam aslaw
nga kuley nga zlëbta ba, a da lam vaw saw ba, a da zëmam
aslaw nga cek metërđey ta tërđey ba, asaya, a da zëmam
mambaz ba. 21 Maja dëga zleezle haa wure keđe na, fa
wuzam mey da ray kwakwas nga Mawiz da slala hay tabiya,
asaya, fa janğamara mey a daa way hay mewuzey mey nga
Gazlavay ta *pas memëskey-vaw.»

*A slërmatar leeter a ndëhay nga Yesu masa Jëwif hay ba
hay*

22 Masa *Jak ma ndëvda mey anğa la na, ndëhay
meslërey, ta *bay-ray hay, leŋ ndëhay daa *mecëmey-ray
nga ndëhay nga Yesu tabiya, a cëmdamara đay ata. Ta', a
walam ndëhay da wuzlah ata, amba a slërdamata aa berney
nga Antiyaws ta ata Pawl ta *Barnabas. A walam na, Jud
ma zëlmara Barsabas, leŋ Silas. Ata cewete faa hëmdamata
da wuzlah mëlmanğ hay fetëđe. 23 A wuzlalamatar leeter a
har. Daa leeter e, a lëvam:

«Ara ala, mëlma kw akwar hay masa ndëhay meslërey
nga Yesu, ta bay-ray hay nga mecëmey-ray nga ndëhay
nga Yesu ma wuzlalamakwara leeter keđe.

Akwar masa Jëwif hay ba hay, ma tëba mey nga Yesu
da Antiyaws, daa hwayak nga Siri, leŋ daa hwayak nga
Silisi, ya camakwar har.

† **15:16** 15.16 ya lëma way a: Masa Gazlavay ma lëvey a lëma way nga Davit
e la na, ara mey-menğey da ray maslëkdawa nga Yesu daa memëcey, ta da ray
metëpey anğa a vad nga key Bay Mahura nga sëkway hay tabiya da bëla nga
sërmataw. **15:16** 15.16-18 Am 9.11-12; Iz 45.21 **15:19** 15.19 Gal 5.3 **15:20**
15.20 15.29; 21.25; aslaw: 1Kwr 8.1-13; 10.23-33; meley-vaw saw: Lev 18.6-18;
aslaw nga cek metërđey ta tërđey: Lev 17.15; mambaz: Lev 17.10-14 **15:21**
15.21 13.15 **15:22** 15.22-29 11.18; 16.4

²⁴ Ya cëndamara ndëhay da wuzlah ala hay ta diyam la fa akwar. A hëbmakwar ray, a mbëddamakwara lengesl ta mey ata hay. Ama ara ala ma slërdamata ba. ²⁵ Da ray ngene, ya cëndamara d'ay ala pal, ya kam mad'ay da ray mey a, ta', ya walam ndëhay amba ya slërdamata fa akwar. A diyam ta ata Pawl ta Barnabas ndëhay masa ala ma wud'mata kalah. ²⁶ Ata Pawl ta Barnabas a na, ara ndëhay masa ma vëldamara ray ata sem nga key slëra nga Bay alëkwa Mahura Yesu *Këriste. ²⁷ Da ray ngene, ya slërmakwar Jud ta Silas, amba a wuzdamakwara mey a letek anda ala ma wuzlalamakwara kefe. ²⁸ Maja ta mbafar la a *Mesëfney nga Gazlavay leŋ ngada ala, amba ya vëlmakwar *mewey mekele saba, si mewey hay masa ala ma wuzlalamakwara kefe gway. Ehe, ala fa lëvmakwar: ²⁹ ka da zëmam aslaw nga kuley ba, ka da zëmam mambaz ba, ka da zëmam aslaw metërd'ey ta tërd'ey ba, ka da lam vaw saw ba. Da akwar ta tëkmata ray akwar hay la fa cek hay a kefe na, akwar ta kam maaya la.

Gazlavay nga njadandakwar daa zazay anga.»

³⁰ Ta', a mbëkdamata ndëhay masa ata ma walamata nga slërey heyey nga diyam aa berney nga Antiyaws. Masa ata ma wusam la na, ta', a kusmata ndëhay daa mecëmey-ray nga ndëhay nga Yesu fetede, a vëldamatara leeter heyey. ³¹ Ndëhay nga Yesu fetede a jangamara leeter e, aa sëmam ga da ray a, mey da hwad' a, a vëltar gëdan. ³² Ata Jud ta Silas heyey na, ata ndëhay ma tëla mey nga Gazlavay. Aa guzlmatar mey hay ga a mëlman hay daa mey nga Yesu. A vëlmatar gëdan amba a njam daa cëved nga Yesu. ³³ Ta', a njamawa nekëd'ey fetede. Fa dëba ha, a wud'am nga vëhmawa fa ndëhay ma slërdamata heyey. Da ray ngene, mëlma ata hay fetede heyey, a lëvmatar: «Diyam ta zazay. Ka camatar har a ndëhay ma slërdamakurwa may.» [³⁴] †

³⁵ Ata Pawl ta Barnabas na, a njamawa da Antiyaws a. Ata ta ndëhay mekele ga, faa sërkadamata ndëhay, fa wuzam *Mey-maaya-mawiya nga Bay Mahura.

Ata Pawl ta Barnabas a wudkam d'ay

³⁶ Fa dëba ha nekëd'ey, Pawl a lëvar a *Barnabas: «Nakwa la fa mëlma alëkwa hay daa mey nga Yesu daa berney hay mekele mekele masa alëkwa ma wuzmatakwar mey nga Bay Mahura zleezle, amba ya nëkakurwa menjey ata na, aa kwara.» ³⁷ Barnabas na, a wud'ey a ngëla Jan-Mark

asi ata. ³⁸ Ama Pawl a tëba ba, maja Janj-Mark a, ta mbëkdatërwa la daa hwayak nga Pamfili. A mbëkdatërwa na, daa masa slëra ata, ta ndëvey daa ba aran. ³⁹ Ata Pawl ta Barnabas a kam yawa ga. Ta', a wudkam day. Da ray ngene, Barnabas a ngëla Janj-Mark, a diyam cew e, a tëngam ta kwambiwal aa hwayak da wuzlah bëlay mezëley Sipëre. ⁴⁰ Ama Pawl na, a ngëla Silas may. Mëlma ata hay daa mey nga Yesu fetede a dëram dangay a Gazlavay maja ata, amba Gazlavay a pëstar mey. Ata Pawl ta Silas, ta', a diyam. ⁴¹ A diyam a slala hay mekele mekele daa hwayak nga Siri lej daa hwayak nga Silisi. A vëlmatar gëdanj a ndëhay daa mecëmey-ray hay nga Yesu fetede.

16

Timawte a lëgdata ata Pawl ta Silas

¹ Fa dëba ha, Pawl a daw aa berney nga Derbe, asaya, a daw aa berney nga Listëra. Fetede, ndaw ma tëba mey nga Yesu daha mezëley Timawte. Mamaha dam *Jëwif ma tëba mey nga Yesu, ama papaha na, ndaw Gërek. ² Mëlmanj hay daa mey nga Yesu da Listëra, ta daa berney nga Ikwaniyum faa hëmdamara. ³ Pawl a wudëy Timawte a lëgda aa slëra anja, ta', a ngëla. A slara mandawal maja Jëwif hay da slala hay fetede na, a sërmara papaha ara ndaw Gërek. ⁴ A diyam, a pëkam aa berney hay mekele mekele. Daa berney hay a na, a kadamatara mey majëwkaya nga ndëhay meslërey, ta nga *bay-ray hay nga ndëhay nga Yesu da *Jeruzelem heyey ngada ndëhay ma tëba mey nga Yesu fetede. A lëvmatar nga tëbmara mey a. ⁵ Da ray ngene, ndëhay daa *mecëmey-ray nga ndëhay nga Yesu a hëtam gëdanj nga tëbey mey nga Yesu ma fëna ma fëna. Fa dër a, fa dër a, ndëhay fa sëkmawa.

Gazlavay a wuzar cek a Pawl da Tërwas

⁶ Fa dëba ha, ata Pawl ta ndëhay ma lëgdamara a wudam a diyam nga wuzey mey nga Gazlavay daa hwayak nga Azi, ama *Mesëfney nga Gazlavay, a vëltar cëved ba. Da ray ngene, a diyam taa cëved ma daw ta daa hwayak nga Fërizi, lej taa cëved ma daw ta daa hwayak nga Galati.

⁷ Masa ata ma wusam gweegwe ta hwayak nga Misi la na, a sëpam cëved nga daw aa hwayak nga Bitini, ama Mesëfney nga Yesu a vëltar cëved ba. ⁸ Ta', a diyam taa hwayak nga Misi, a wusam aa berney nga Tërwas

da mey-bëlay. ⁹ Ta tavad, Gazlavay a wuzar cek a Pawl. Pawl a hëtar ndaw Masadëwan daha malacakaya, ndaw aha fa kar ambahw, a lëvar: «Sawa a Masadëwan amba ka jëndar.» ¹⁰ Fa dëba ha masa Gazlavay ma wuzdara cek aha cay a Pawl na, wure ñgene, ya sëpam * cëved ñga tëngëy ta kwambiwal a Masadëwan, maja ya sërmara ara Gazlavay ma zëldar, amba ya wuzmatar Mey-maaya-mawiya a ndëhay daa hwayak a.

Lidi a tëba mey ñga Bay Mahura da Fëlepi

¹¹ Da Tërwas na, ya tëpam aa kwambiwal, ya diyam kasl aa hwayak da wuzlah bëlay mezëley Samawtëras. Pepërek e, ya tëngam aa berney ñga Niyapawlis. Ya pam salay. ¹² Ta', ya diyam ta salay aa berney ñga Fëlepi masa berney mahura daa hwayak ñga Masadëwan. Berney ñga Fëlepi a na, ara berney masa Rawma hay ma wamara †. Ta', ya ñjam daa berney a, ðar nekëdey.

¹³ Ta *pas memëskey-vaw, ta', ya bamawa daa berney a, ya diyam a mey wayam daha, maja ya wulkam da ya hëtfam slam medërey-dangay ñga *Jëwif hay fetede la kwa. Masa ala ma hëtam slam medërey-dangay a la na, ta', ya ñjam, yaa guzlmatar a ñgusay makustakaya fetede. ¹⁴ Ñgwas pal da wuzlah ata daha mezëley Lidi, a sawa daa berney ñga Tiyatir. Ara ñgwas ma ka filaw ñga zana magaza ma hëdkey ba. Anğa ñgwas Jëwif ba, ama fa nar ray a Gazlavay anda Jëwif hay. A jëkfandar slëmay, Bay Mahura a wurara mevel anğa amba a tëba mey masa Pawl ma kada. ¹⁵ Anda kede, ta', a hëtam *baptem ta ndëhay da way anğa tabiya. A lëvndar: «Da ka nëkmara, ya fa tëba mey ñga Bay Mahura Yesu fara fara na, samawa, ñjam a way adaw.» A kandar ambahw ta mevel anğa ndav ñga daw a way anğa.

Ata Pawl ta Silas daa fërsëne daa berney ñga Fëlepi

¹⁶ Ta pas langar daha, ala fa diyam aa slam medërey-dangay heyey saya na, ta', ya cam ray ta dam beke daha. Anğa ta fakalaw da ray, a wudkey har. Bay anğa hay fa hëtam dala ga maja anğa ma wudkey har aha. ¹⁷ Dam beke he a sawa asi ala ta ata Pawl ta mewudey, a lëvey: «Ndëhay kede ara ndëhay ma kam slëra ñga Bay Gazlavay Mawaca-waca. Ata fa wuzmakwar cëved masa akwar ma da lëham daa mebërey ta da hwad a.» ¹⁸ Aa fa ka anda

* **16:10** 16.10 Luk, ndaw ma wuzlala ðerewel kede, a kada mey da ray ata ma pëkam bama ta ata Pawl, Silas, leñ Timawte. † **16:12** 16.12 berney masa Rawma hay ma wamara: Har-gëdan ñga ndëhay fetede na, Rawma hay. Ndëhay daa berney a, a sëpam mewey hay ñga Rawm ta cëved e anda ndëhay daa berney ñga Rawm ma sëpmara. **16:13** 16.13 17.2 **16:14** 16.14 17.4 **16:15** 16.15 8.36 **16:16** 16.16 19.24 **16:17** 16.17 19.15; Lk 4.34, 41

kedë dar ga haa Pawl a cey mevel a ray a. Pawl a, pëla! a mbëdey dey, a lëvar a fakalaw da ray dam aha: «Fakalaw, ya fa lëvka ta mezëley nga Yesu *Këriste, bey da ray dam kedë.» Wure ngene, fakalaw kaa heyey, ta', a bey da ray dam aha. ¹⁹ Bay annga hay a, a nëkmara na, fa hëtam dala fa vëdë daa saba. Da ray ngene, ta', a kërzamata ata Pawl ta Silas. A dëdamata fa mahura hay nga Rawma hay, a handamata aa slam mekey sariya nga ndëhay tabiya. ²⁰ A handamata fa mey nga ndëhay Rawma hay ma ka sariya hay, a lëvmatar: «Ndëhay kedë fa handamawa mey aa berney alëkwa. Ara ndëhay *Jëwif hay, ²¹ ata faa sërkadamata ndëhay ta kwakwas mekele, kwakwas masa alëkwa Rawma hay ma tækakwa sem.»

²² Ndëhay tabiya fetedë a cëmam a ray ata Pawl ta Silas. Ndëhay ma ka sariya hay a lëvmatar a ndëhay nga cëkwmatara zana fa vaw nga ata Pawl ta Silas nga gëdan, asaya, a lëvmatar nga slëdmata ta laway. ²³ Masa ata ma slëdmata la ga na, ta', a handamata aa fërsëne, a lëvmar a ndaw ma jëdë fërsëne he nga jëdëta maaya maaya. ²⁴ Masa ndaw ma jëdë fërsëne ma cënda anda kedë na, ta', a handata aa way masa da wuzlah daa fërsëne he, a ndëkwdatara salay aa hwadam.

²⁵ Ta wuzlah-tavaf na, ata Pawl ta Silas a dëram dangay a Gazlavay, a hëlmamara Gazlavay ta walay. Ndëhay siya majëwtakaya daa fërsëne he fa jëkfamatar slëmay. ²⁶ Wure wure ngene, hwiyak a wusey, salay nga way nga fërsëne he a wusey. Mey-slam hay tabiya a wuram, calalaw hay masa ata ma jëwmata ndëhay tabiya ta annga na, a pëskam. ²⁷ Ndaw ma jëdë fërsëne he a slëkdey daa dar, a nëkta mey-slam hay mawurtakaya, a wulkey da ndëhay daa fërsëne he ta hwam sem kwa. Da ray ngene, a mëdërwa dëlaw annga, amba a këdë ray annga. ²⁸ Ama Pawl aa guzlar ta gëdan, a lëvar: «Ka da këdë ray akah ba! Ala tabiya, ala daha!»

²⁹ Ndaw ma jëdë fërsëne heyey, ta', aa cëdëy awaw nga nëkey dey, a wusey vaw, a mbëzey aa slam masa ata Pawl ta Silas da hwaf a heyey. A tëdëy asi salay ata, ta meewesey maja aa fa zlurey. ³⁰ Ta', a badatërwa daa slam aha, aa cëfdata, a lëvtar: «Bay adaw hay, ya da key kwara amba ya lëhey daa mebërey na!» ³¹ Ata Pawl ta Silas a mbëddamara, a lëvmar: «Pa Bay Mahura Yesu nga ndaw akah fara fara, a lëhdaka la daa mebërey, kah ta ndëhay da way akah.» ³² Ta', a wuzdamara mey nga Bay Mahura, ngada annga, ta ngada ndëhay da way annga tabiya. ³³ Dasi

tavað a ñgene na, ndaw ma jëða fërsëne heyey, ta', a ñgelta ata Pawl ta Silas, a përtara mbëlek ata hay nga meslëdey heyey. Aña ta ndëhay da way aña tabiya, ta', a hëtam *baptem wure ñgene. ³⁴ Ta', a handata ata Pawl ta Silas a way aña, a vëltar cek mezëmey. Aña ta ndëhay da way aña tabiya aa sëmam ga, maja ata ma pamara Gazlavay nga ndaw ata fara fara.

³⁵ Fa dëba ha, slam ma wurey la na, ndëhay Rawma hay ma ka sariya hay, a slëram sewje hay nga lëvmar a ndaw ma jëða fërsëne nga mbëkdata ata Pawl ta Silas heyey nga diyam. ³⁶ Ndaw ma jëða fërsëne heyey a daw a lëvar a Pawl: «Ndëhay Rawma hay ma ka sariya hay ta vëlmaya cëved la nga mbëkdakwar. Anda keðe, ka gwamara ka bam, ka diyam ta zazay.» ³⁷ Ama Pawl a lëvtar a sewje hay ma slërdamatërwa heyey: «Ta kam sariya da ray ala daa ba sëlak, ama a slëdmandar meedey ndëhay tabiya, yaw, ala na, ndëhay Rawma hay may! A handamandërwa aa fërsëne, ama wure keðe, a wudam nga mbëkdamandar, ya diyam ta mayal a na, kwara dëba wura? A key ba. Si ndëhay ma ka sariya ha, a samawa, ata ray ata, a mbëkdamandar.» ³⁸ Sewje hay heyey, a diyam, a mbëdmatara mey masa ata Pawl ta Silas ma lëvmatar heyey a ma ka sariya hay a. Masa ata ma cëndamara ata Pawl ta Silas ata ndëhay Rawma hay na, a zluram. ³⁹ Daa ñgene, a diyam ata ray ata fa ata Pawl ta Silas heyey, a kamatar ambahw. Ta', a badamatërwa daa fërsëne he, a lëvmatar nga diyam la daa berney ata. ⁴⁰ Masa ata Pawl ta Silas heyey ma bamawa la daa fërsëne na, ta', a diyam a way Lidi. A hëtfamatar mëlma ata hay ma tëba mey nga Yesu fetede, a vëlmatar gëdan. Ta', a diyam aa slam mekele saya.

17

Ata Pawl ta Silas daa berney nga Tesalawnik

¹ Ata Pawl ta Silas a diyam taa berney nga Amfipawlis len taa berney nga Apawlani, a wusam a Tesalawnik. Fetede, *way-mewuzey-mey nga Gazlavay daha. ² Pawl, ta', a daw aa way a, nga dërwa dangay anda aña ma ka mandaw mandaw. Pawl fa daw fa luma ha fa luma ha ta *pas memëskey-vaw luma maakar, fa kam yawa ta ndëhay makustakaya daa way a da ray dërewel nga Gazlavay. ³ Faa sërkatata ndëhay maaya maaya da ray dërewel nga Gazlavay, a lëvey si *Këriste na, a sërey banay, a mëcey, fa

dëba ha, a slëkdawa daa memëcey. Pawl a lëvtar: «Yesu masa yah ma wuzkwar mey da ray a wure kedë kaa na, ara Këriste, *ndaw masa Gazlavay ma wala nga lëhdata ndëhay.» ⁴*Jëwif hay siya fetede a tëbmara mey a, a diyam asi ata Pawl ta Silas. Ndëhay siya hay ga da wuzlah Gërek hay masa ma sëpam mey nga Gazlavay anda Jëwif hay ta ngusay ga masa daa sëkway nga ndëhay mahura hay, a tëbmara mey a may.

⁵ Ama Jëwif hay siya may, sëlëj a katar. Ta', a kusam ndëhay saw kënë daa cëved hay. Ndëhay a, a diyam a kusmata ndëhay, a hëldamata nga yam mey daa berney a. Ta', a diyam a way ndaw nga Yesu, mezëley Jasanw, a sëpmata ata Pawl ta Silas amba a handamata fa mey nga ndëhay ma ka sariya. ⁶ Ama ta hëtfamatërwa daa ba. Da ray ngene, ta', a dadamërwa Jasanw ta mëlman hay mekele mekele daa mey nga Yesu, a handamatërwa fa mey nga mahura hay ma wamara berney a. A wudam, a lëvam: «Ndëhay kedë na, fa hëldamata ndëhay nga nësa hwayak kwa daa wura daa wura cëpa. Wure kedë, ta wusmawa la fede saya. ⁷ Jasanw ta tëbta la nga njam da way anga. Ndëhay a tabiya a tëbmara mewey nga Bay *Sezere saba, a lëvam bay mekele daha mezëley Yesu.» ⁸ Masa Jëwif hay a ma lëvam anda kedë la na, mevel nga mahura hay daa berney a, ta nga ndëhay makustakaya tabiya a kudferey ta gëdan. ⁹ Ndëhay mahura hay a, a tëkmatar dëy ngada ata Jasanw ta ndëhay makërzatakaya heyey nga pëlam dala a ngwamna, amba baazlam a key saba. Ta', a mbëkdamata.

Ata Pawl ta Silas a diyam aa berney nga Bere

¹⁰ Ta tavad a ngene mëlman hay daa mey nga Yesu a slërdamata ata Pawl ta Silas aa berney nga Bere. A wusam fetede, a diyam aa *way-mewuzey-mey nga Gazlavay.

¹¹ Ndëhay daa berney nga Bere he, mevel ata maaya, ata anda ndëhay daa berney nga Tesalawnik ba. A wudam nga jëkey slëmay fa mey da ray Yesu maaya maaya. Fa dër a, fa dër a, fa jangam mey nga Gazlavay amba a sëpmara mey masa Pawl ma kada na, ara mey fara fara. ¹² Da ray ngene, ndëhay *Jëwif hay ga da wuzlah ata a tëbmara mey nga Yesu. Ngusay Gërek hay ga masa-zleley hay, lëj ndëhay Gërek hay ga ta tëbmara mey a la may.

¹³ Ama Jëwif hay da Tesalawnik ma cëndamara Pawl fa wuzey mey nga Gazlavay daa berney nga Bere saya na, ta', a diyam a Bere he may. A zlamar nga hëldamata

ndøhay daa berney a. ¹⁴ Da ray ñgene, mëlman hay daa mey nga Yesu fetede, a bam daa berney a ta ata Pawl. A handamara Pawl a, a mey-bølay, ama ata Silas ta Timawte na, manjatakaya da Bere he. ¹⁵ Ndøhay ma handamara Pawl aha na, a diyam bama kasl aa berney nga Aten. Fetede Pawl a løvtar: «Løvmatar ñgada ata Silas ta Timawte nga samawa fa yah fiyaw fiyaw.» Ta', ndøhay a, a vøhmawa a Bere.

Pawl daa berney nga Aten

¹⁶ Masa Pawl fa sækwta ata Silas ta Timawte daa berney nga Aten na, aa fa pøkey, a høtey kuley hay ga fetede. Da ray ñgene, ray aña a høbey. ¹⁷ A kam yawa daa *way-mewuzey-mey nga Gazlavay fetede ta *Jøwif hay leñ ta ndøhay Jøwif hay ba hay masa ma namar ray a Gazlavay. Asaya, fa ðar a, fa ðar a, aña fa daw aa luma, fa kam yawa ta ndøhay fetede. ¹⁸ Da wuzlah ndøhay ma kam yawa ha na, ndøhay ma tømbara meesærkedeý nga *Epikur hay * ta ndøhay ma tømbara meesærkedeý nga Søtawik hay † daha. A zlamar mekey yawa ta aña may. Ndøhay siya hay a løvam da ray a: «Ndaw masa baazlam kalah kede a wufey nga løvey na, kwara?» Siya hay a løvam: «A key aa sèrkadandakwar mey da ray kuley hay daa hwayak mekele kwa.» Ndøhay a løvam anda kede maja Pawl fa wuzey mey da ray Yesu ta da ray maslækðawa daa memøcey. ¹⁹ Ta', a ñgølmara Pawl, a handamara fa ndøhay mahura ma sla yawa. Ndøhay ma sla yawa ha mezøley ata na, Ariyawpaz ‡. A løvam: «Meesærkey mawiya masa kah ma kada kede na, ya wudam ka wuzdandara, ²⁰ maja meesærkedeý akah ha ala ta cøndamara ta slømay ala daa ba aran. Ya wudam ya sømbara mabara nga mey a.» ²¹ Yaw, ndøhay Aten hay tabiya, ta mëlak hay ma njam daa berney a na, a kam slëra saba, si fa jøkam slømay fa meesærkey hay mawiya mekele mekele, a kam maðay da ray a.

²² Ta', Pawl a lecey fa mey nga ndøhay ma sla yawa heyey, a løvtar: «Ndøhay Aten hay, ya nøka na, akwar fa søpmara kwakwas nga kuley akwar hay ta cøved e. ²³ Ya søra maja daa masa ya fa pøkey daa berney akwar kede na, ya ta høtey

17:13 17.13 14.5, 19; 1Tes 2.14-16 **17:17** 17.17 17.2, 4 * **17:18** 17.18 Epikur hay: Ara gula hay nga ndaw Gørek mezøley Epikur. A wudam nga sørey banay ba. A wudam menjey daa zazay ta meesømey gway. † **17:18** 17.18 Søtawik hay: Ara gula hay nga ndaw Gørek mezøley Zenew. A wulkam da ray mekey slëra maaya, kwa anja slëra ha ta banay na, a bømbara gway. **17:18** 17.18 4.2; 1Kwr 1.22 ‡ **17:19** 17.19 Ariyawpaz: Ara mezøley nga aña da Aten, slam masa ndøhay mahura hay ma sla yawa daa berney a ma kusam aa slam aha. Fa døba ha, a zølmata ndøhay ma sla yawa hay a Ariyawpaz.

kuley akwar hay la ga malëmtakaya. Daa slam lanjar ya ta hëtey slam metey kuley la mawuzlalakaya fa vëdë, a lëvey: “Kuley ma sërey ba.” Kwa ka sërmara kuley a ba, akwar fa ragadamar. Ama wure kedë ya ta sawa la nga wuzdakwara mey da ray a. ²⁴ Gazlavay na, ara ndaw ma lëma bëla ta cek hay da hwađ a tabiya. Anja Bay Mahura da ray cek hay da vad ta da hwayak. Anja na, a njeý daa way masa ndëhay ma lëmamara ta har ba. ²⁵ Aa fa wudëy amba ndëhay a kamar cek na, daa ba, maja ara anja ma vëlda heter leñ mesëfney a ndëhay tabiya da bëla, ara anja ma vëlda kwa meeme tabiya. ²⁶ Ndaw masa Gazlavay ma lëma pal ngeeme na, ara ta fa anja Gazlavay ma zlar nga key sëkway hay nga ndëhay tabiya, amba a njam da bëla kedë. Asaya, Gazlavay ta pata đar hay masa ndëhay ma da njam da bëla cay, ta pata kwakway nga hwayak ata hay cay. ²⁷ A lëmtërwa ndëhay na, amba a sëpmara, da kaa tëdë a hëtfamar la kwa. Ama fara fara na, Gazlavay aa dërenj kwa ta waawa ba.

²⁸ «Ara anda mawuzlalakaya, a lëvey:

“Ya hëtkwa heter nga sëfney na, maja anja.

Ya hëtkwa gëdaj nga pëkey na, maja anja.

Alëkwa ta dey na, maja anja.”

Anda ndëhay siya hay da wuzlah akwar ma zla walay hay ma lëvam:

“Alëkwa may, bëz anja hay.”

²⁹ «Alëkwa na, bëza hay nga Gazlavay. Anda kedë, ya da wulkakwa Gazlavay na, ara kuley ba. Anja anda kuley mavëđkaya ta bërey magaza ba sëlak, asaya, anja anda kuley mađëzlkaya ta anjwa ba. Kuley hay a kedë na, ara cek hay masa ndëhay ma kamata ta har ata, ta lenjesl ata.

³⁰ Gazlavay ta cey mevel da ray ndëhay zleezle na, daa ba, maja daa ngene ndëhay a sërmara mey anja ba đagay. Ama, wure kedë, a lëvtar a ndëhay da bëla tabiya kwa daa wura daa wura nga mbëđdamara menjeý ata, nga sëpmara ta mevel pal. ³¹ Bay Gazlavay a lëvtar a ndëhay tabiya anda kedë na, maja anja ta pa đar a cay nga key sariya da bëla. A da ka sariya ha ta cëved e ta fa ndaw pal masa anja ma wala. Ta wuzdërwa la a ndëhay tabiya fara fara ara ndaw aha ma da ka sariya ha maja Gazlavay ta slëkđadërwa ndaw a sem daa memëceý.»

³² Masa ndëhay ma cëndamara Pawl ma kada mey da ray maslëkđawa daa memëceý la na, ndëhay siya hay aa

sanjërffamar. Ama siya hay a lëvam: «Ya wudam ka sawa, ka kadandara mey a kedë ta pas mekele saya.» ³³ Pawl, ta', a daw, a mbëkdata. ³⁴ Ndëhay siya da wuzlah ata, a diyam asi Pawl, a tëbmara mey a. Ara ata Deni, ndaw mahura da wuzlah ndëhay ma sla yawa nga Ariyawpaz a, ta ngwas mezëley Damaris, lej ndëhay mekele mekele hay may.

18

Pawl daa berney nga Kwarinti

¹ Fa dëba ha, Pawl a slëkdey da Aten, a daw aa berney nga Kwarinti. ² Fetede, a hëtfey ndaw *Jëwif daha mezëley Akilas, ndaw aha a yawa daa hwayak nga Panjw. Akilas a, a sawa daa berney nga *Rawm masa daa hwayak nga Itali na, menjey ga daa ba. A samawa na, ta ngwas anga Përesil, maja Këlawt, bay mahura nga hwayak hay masa berney nga Rawm ma wata, ta bëlta Jëwif hay sem tabiya daa berney a. Pawl, ta', a daw fa ata Akilas ta Përesil, ³ a njam bama, a kam slëra daa slam a, maja slëra ata letëk. A kam way-mekërcey * nga hëdkedey. ⁴ Mandaw mandaw ta *pas memëskey-vaw, a daw aa *way-mewuzey-mey nga Gazlavay fetede, a wuzdatara mey da ray Yesu a ndëhay Jëwif hay, kwa a ndëhay Gërek hay tabiya makustakaya daa way a. A sëpey nga kusta ta mey amba ndëhay a, a tëbmara mey a.

⁵ Masa ata Silas ta Timawte ma samawa la daa hwayak nga Masadëwan na, Pawl a mbëkda mekey way-mekërcey dagay. A wuztar *Mey-maaya-mawiya mandaw mandaw a Jëwif hay, a lëvtar Yesu na, ara *Këriste, *ndaw masa Gazlavay ma wala nga lëhdata ndëhay. ⁶ Ama Jëwif hay a, a wudam mey nga Pawl ba, a cëdmara. Da ray ngene, Pawl a rara lagwada fa zana anga a ray ata, aa guzltar ta gëdan, a lëvtar: «Ka gëmam nga tëbmara mey a ba, anda kedë, Gazlavay a kakwar sariya la ngaa zëddakwar. Sërmara, ngene na, mey adaw da hwad a daa ba. Wure kedë, ya mbëkdakwar, ya daw la, ya wuzdatara mey a, a ndëhay masa Jëwif hay ba hay.» ⁷ Pëla! a mbëdtar dëba. A bawa daa way-mewuzey-mey nga Gazlavay heyey, a daw a way ndaw mezëley Titiyus Justus. Anga ndaw Jëwif ba ma nar ray a Gazlavay anda Jëwif hay. Way anga aa da cakay way-mewuzey-mey nga Gazlavay a. ⁸ Kërispus, *bay-ray nga way-mewuzey-mey nga Gazlavay a, a tëba mey nga

18:2 18.2 Akilas: Rm 16.3; 1Kwr 16.19; 2Tm 4.19 * **18:3** 18.3 way-mekërcey: Ata na, a kam way-mekërcey ta ambal, da daa ba, ta zana macakaya ta engwec nga dahway. **18:3** 18.3 20.33-34; 1Kwr 4.12; 9.12-18; 1Tes 2.9; 2Tes 3.7-9

18:5 18.5-6 3.26; 5.42 **18:5** 18.5-11 11.18 **18:6** 18.6 13.51; 20.26

Bay Mahura Yesu. Ndøhay da way annga hay a tøbmara mey a may. Ndøhay Kwarinti hay ma jøkam slømay fa Pawl na, ata ga, a tøbmara mey nga Yesu, a høtam *baptem.

⁹ Ta pas langar daha ta tavad, mesøfney a kar a Pawl. Daa mesøfney a, Bay Mahura a løvar: «Ka da zlurey nga wuzey mey adaw ba, ka da njeý teete ba, wuzdatara a ndøhay cønga, ¹⁰ maja yah manjakaya ta kah. Kwa ndaw fa da gwa nga kørzaka nga sørdaka banay daa ba, maja ndøhay adaw hay ga daa berney a kede daha.» ¹¹ Da ray ngene, Pawl manjakaya daa berney a mevey pal ta kiya maakwaw, fa wuzdatara mey nga Gazlavay a ndøhay fetede.

¹² Masa Galiyaw, annga guverner daa hwayak nga Akay na, Jøwif hay, ta', a cømdamara døy ata a ray Pawl. A kørzamara, a handamara fa mey nga ndøhay ma ka sariya fetede. ¹³ A løvam: «Ndaw kede fa tøknaata ndøhay nga dørey danngay a Gazlavay taa cøved mekele masa ma nøndakwara kwakwas aløkwa.»

¹⁴ Anja Pawl fa da mbøddatara, ama Galiyaw ta', aa guzley, a løvtar a Jøwif hay: «Akwar Jøwif hay, da ndaw a kede ta key mebørey mahura la, da daa ba, ta key cek masa maaya ba mekele la na, ngene, ya jøkfwakwar slømay la. ¹⁵ Ama ka handamawa yawa da ray meesørkey akwar, da ray mezøley nga ndøhay akwar hay, ta da ray kwakwas akwar na, anda kede, si akwar ta ray akwar, ka kamara sariya ha. Yah na, ya tøba nga key sariya da ray søkway nga mey hay anda kede ba.» ¹⁶ Ta', a bøltørwa daa slam mekey sariya ha. ¹⁷ Ndøhay tabiya a kørzamara Sawsten, bay-ray nga way-mewuzey-mey nga Gazlavay fetede, a kødmara fa mey-mbew nga way mekey sariya ha. Ama Galiyaw ta wulkey da ray mekødey a daa ba sølak.

Pawl a vøhwa aa berney nga Antiyaws daa hwayak nga Siri

¹⁸ Fa døba ha, Pawl a njeý dør ga da Kwarinti ta mølman hay daa mey nga Yesu fetede. Ta', a mbøkdata, a diyam ta ata Pøresil ta Akilas aa berney nga Senkøre amba a lam kwambiwal nga daw aa hwayak nga Siri. Da Senkøre na, Pawl ta høja ray annga la †, maja ta mbadfar la a Gazlavay, a løvar a da kar cek, wure kede, ta ka cek aha cay. Ta', a tøpam aa kwambiwal, a diyam aa hwayak nga Siri. ¹⁹ A wusam aa berney nga Efez. Pawl a mbøkdata ata Pøresil ta

18:8 18.8 8.36 **18:9** 18.9-10 Iz 41.10; Jer 1.8; 1Kwr 2.3-4 **18:13** 18.13 6.13
18:14 18.14-15 23.29; 25.18-20; Janj 18.31 † **18:18** 18.18 ta høja ray annga la:
 («ta høza ray» ta mey Gudal) Da ndaw Jøwif a mbadfar a Gazlavay nga key cek na, a mbøkda ray køne, a høja ba, a sla ba haa cek aha ma key. Fa døba ha, a høja ray annga, a vøldara engwec ehe a Gazlavay. Nøka Mesl 6.5-21.

Akilas nga njam fetede. Ta', a daw aa *way-mewuzey-mey nga Gazlavay, a kam yawa ta *Jëwif hay daa way a. ²⁰ Siya hay aa cëfdamara nga njeý nekëdey fa ata saya, ama Pawl a tëba ba. ²¹ A mbëkdata, a lëvtar: «Da Gazlavay ta tëba la na, ya vëhwa la fa akwar saya.»

Ta', a slëkdey daa berney nga Efez ta kwambiwal, a daw.

²² A wusey aa berney nga Sezere, a pey salay, a daw a *Jeruzelem nga catar har a ndëhay daa *mecëmey-ray nga ndëhay nga Yesu fetede. Fa dëba ha, a daw aa berney nga Antiyaws masa da Siri. ²³ A njawa fetede nekëdey, a daw a pëkwa daa hwayak nga Galati ta daa hwayak nga Fërizi, a daw a slala hay mekele mekele fetede. A vëltar gëdanj a ndëhay nga Yesu tabiya.

Apalaws a wuzey mey da ray Yesu

²⁴ Ndaw *Jëwif daha mezëley Apalaws, a daw, a wusey a Efez. A yawa daa berney nga Alekzandëri. Apalaws a na, ara ndaw ma sëra meeguzley maaya maaya, asaya, a sëra dërewel nga Gazlavay maaya maaya. ²⁵ Ndëhay taa sërkadamara maaya maaya la da ray Bay Mahura Yesu. A sërey na, si *baptem nga *Janj-Baptis gway, ama fa wuzdatara mey da ray Yesu a ndëhay ta meesëmey, aa sërkadata ta cëved e cënga. ²⁶ A wuzey mey daa *way-mewuzey-mey nga Gazlavay fa dër a, fa dër a. Aa guzley ta mandërzay daa dey daa ba. Ata Përesil ta Akilas a cëndamara na, ta', a ngëlmërwa a way ata, a wuzmar mey nga Gazlavay amba a sëra ma fëna saya. ²⁷ Fa dëba ha, Apalaws a wudey nga daw aa hwayak nga Akay. Mëlmanj hay daa mey nga Yesu da Efez, ta', a vëlmar gëdanj, a wuzlalamatar leeter ngada ndëhay ma tëba mey nga Yesu da Akay a, amba a tëbmara maaya maaya. Ta', Apalaws a daw. Masa Apalaws ma wusey la na, a jëney ndëhay ga ma tëba mey nga Yesu fetede maja maaya nga Gazlavay aa da ray a. ²⁸ Apalaws a kadatara mey a Jëwif hay fa mey nga ndëhay tabiya, a wuzdatara na, mewulkey ata, aa dër e ba. A wuzdatara daa dërewel nga Gazlavay, fara fara Yesu na, ara *ndaw masa Gazlavay ma wala nga lëhdata ndëhay.

19

Pawl daa berney nga Efez

¹ Daa masa Apalaws anga daa berney nga Kwarinti daa hwayak nga Akay heyey na, Pawl, ta', a daw ta daa anjwa hay, a wusey kasl aa berney nga Efez. A hëtfey ndëhay

ma tëba mey nga Yesu nekëfey fetede. ² Ta', aa cëfdata, a lëvtar: «Akwar ta hëtam *Mesëfney nga Gazlavay la ta pas masa akwar ma tëbmara Yesu daw?» A mbëddamara, a lëvmar: «Ïnga menjey ala na, ala ma cënam mey da ray Mesëfney nga Gazlavay daa ba.» ³ Pawl aa cëfdata, a lëvtar: «Anda kefe, ka hëtam *baptem na, wura?» A mbëddamara, a lëvmar: «Ya hëtam baptem nga *Jan.» ⁴ Pawl a lëvtar: «Zleezle Jan a key baptem na, ngada ndëhay masa ma wufam nga mbëddamara menjey ata maaya ba. Jan a, a lëvtar a ndëhay *Jëwif hay, ndaw daha a sawa la fa dëba anga. Maaya na, a pamara nga ndaw ata fara fara. Ndaw a na, ara Yesu.» ⁵ Masa ata ma cëndamara mey a kefe la na, ta', a hëtam baptem ta mezëley nga Yesu Bay Mahura. ⁶ Pawl a patar har a ray. Mesëfney nga Gazlavay a sawa a ray ata, aa guzlam ta mey mekele mekele masa ata ma sërmara ba, a zlamar ma wuzdamara mey masa Gazlavay ma vëldatara nga kedey. ⁷ Ndëhay a tabiya a key kuraw a ray a cew.

⁸ Kiya maakar, Pawl fa daw fa daw aa *way-mewuzey-mey nga Gazlavay. Fetede, aa guzltar a ndëhay ta mandërzay daa dey ba da ray mewey nga Gazlavay da ray ndëhay. A kam yawa ta Jëwif hay a, aa guzltar mey mekele mekele amba a tëbmara mey da ray Yesu. ⁹ Ama ndëhay siya hay da wuzlah ata a gëmam nga tëbmara mey a ba. Aa guzlam mey maaya ba da ray cëved nga Bay Mahura fa mey nga ndëhay tabiya fetede. Da ray ngene, Pawl, mbak! a mbëkdata, ta', a ngëlta ndëhay masa nga Yesu, a diyam bama. Anda kefe, mandaw mandaw Pawl fa daw nga wuzey mey a ndëhay daa lekwel nga ndaw daha mezëley Tiranus. ¹⁰ Aa fa ka kënë haa kasl mevey cew. Maja ngene, ndëhay daa hwayak nga Azi tabiya, kwa Jëwif hay, kwa ndëhay masa Jëwif hay ba, ta hëtam nga cëney mey nga Bay Mahura Yesu la.

Mey da ray bëza hay nga Seva

¹¹ Gazlavay fa key maazla hay mekele mekele ma rëzley ndaw ta fa Pawl. ¹² Daa ngene, ndëhay a lamatërwa zana nga slëra nga Pawl ta zana anga hay mekele mekele masa ma gësam la fa vaw anga, a handamara fa masa-macay hay. Anda kefe, ndaw masa macay ma gësey ta anga na, a mbëley. Ndaw masa ta malula da ray ma gësey ta anga may, malula ha a bey.

13 Daa ðar hay a ñgene, *Jëwif hay daha, fa pëkam nga bëley malula da ray ndëhay. A jadamara nga bëley malula da ray ndëhay ta mezëley nga Bay Mahura Yesu. Anda kefe, a lëvmar a malula: «Ala fa lëvmaka ta mezëley nga Yesu, masa Pawl ma wuzda mey da ray a, bey da ray ndaw kefe.» 14 Bëza hay maasala nga ndaw daha mezëley Seva, ata fa kamara këne may. Seva na, ara ndaw da wuzlah *bay-ray hay nga ndëhay ma ka kwakwas nga Gazlavay. 15 Ama pas pal daha na, malula a mbëdðatara, a lëvtar: «Yesu na, ya sëra. Pawl may, ya sëra mey da ray a. Kaa akwar na, wa hay wa?» 16 Ndaw masa ta malula kaa heyey na, ta', a hway a ray ata. A fënta tabiya ta gëdan, a këdta, a katar mbëlek fa vaw, a ñgërtara zana fa vaw, haa bëza hay a, a bamawa da way aña, a hwam ta vaw ba' këne.

17 Masa Jëwif hay, ta ndëhay Jëwif hay ba hay daa berney nga Efez e ma cëdamara mey a la na, ata cëpa, mandërzay a katar, a hëlmamara Bay Mahura Yesu ma fëna ma fëna.

18 Ndëhay ga masa ma tëbmara mey nga Yesu a diyam, a wuzdamara cek hay maaya ba hay masa ata ma kamara zleezle fa mey nga ndëhay tabiya, a kam ambahw maja. 19 Ndëhay ga masa ma kam slalak nga nësey ndëhay na, a handamatërwa ðerewel ata hay masa ta mey hay ma nësey ndëhay mawuzlalakaya da hwad a na, aa kërmata ta awaw fa mey nga ndëhay tabiya. Dala nga ðerewel hay a tabiya na, ga kalah *. 20 Anda kefe, ta fa gëdan nga Bay Gazlavay, ndëhay ga a cëdamara mey nga Bay Mahura Yesu. Ndëhay ma tëbmara mey a, fa sëkmawa a dey a, a dey a.

Ndëhay a yam mey da Efez

21 Fa dëba nga cek hay a kefe ma kam la na, Pawl a wulkey maaya na, a daw a *Jeruzelem. A wudëy a daw aa hwayak nga Masadëwan ta aa hwayak nga Akay ðagay, wara a daw a Jeruzelem e. A lëvey: «Da yah ma wusey la a Jeruzelem na, si ya daw aa berney nga *Rawm may.»

22 Ta', a slërey ndëhay cew ma jënmara aa hwayak nga Masadëwan. Ndëhay a, ara ata Timawte ta Eraste. Ama Pawl na, a njeý daa hwayak nga Azi ðar nekëðey.

23 Daa ðar hay a ñgene, ndëhay a yam mey ga da Efez da ray cëved nga Bay Mahura Yesu. 24 Ndaw daa berney a daha, mezëley Demetëriyus. A wëðey cek hay mecëhe mecëhe nga bërey ma hëdkey ba, masa ma nëkam anda

19:13 19.13 3.6; Lk 9.49-50 19:15 19.15 16.17 19:17 19.17 5.11 * 19:19 19.19 dala ga kalah: Ndëhay a wulkam a key dala nga slëra daa mevey pal nga ndëhay temere ta kwakwar maakwaw. 19:20 19.20 2.41 19:21 19.21 23.11; Rm 1.10, 13 19:23 19.23 9.2; 2Kwr 1.8

way-mekey-kwakwas nga kuley mezëley Artemis †. Annga ta ndëhay ma ka slëra ha fa hëtam dala ga ta slëra ha ngene. ²⁵ Demetëriyus ta', a zëltërwa gula annga hay ta ndëhay ma ka slëra hay anda annga, a lëvtar: «Akwar ndëhay kefe, ka sërmara slëra alëkwa kefe fa handandakwar zleley ga. ²⁶ Ama akwar ta ray akwar fa cëndamara, akwar fa hëtmara cek masa ndaw mezëley Pawl ma ka. A lëvtar a ndëhay na, "Kuley masa ndëhay ma kamara ta har na, ara cek ma jëney ndaw ba." Maja ngene, ndëhay ga da Efez kefe ta mbëddamara mewulkey ata sem, a tëbmara mey annga. Ma tëbmara mey annga na, ara ndëhay daa berney kefe daada ba, ama kwa ndëhay ga daa hwayak nga Azi tabiya. ²⁷ Da cek aha fa key anda kefe na, ndëhay a da rësmara slëra alëkwa ha. A da rësam slëra alëkwa daada ba, ama ndëhay a da mbëkdamara meregedey daa way-mekey-kwakwas nga kuley Artemis may. Fara fara kuley Artemis na, ara kuley mahura masa ndëhay daa wura daa wura daa hwayak nga Azi ta da bëla tabiya ma ragadamar. Ama da ndëhay ta tëbmara mey nga Pawl kefe la na, kuley a, fa da zëldamara slëmay daa saba.»

²⁸ Masa ndëhay ma cëndamara mey masa Demetëriyus ma kada anda kefe la na, mevel a catar ga. A wudam, a lëvam: «Artemis, kuley nga ndëhay Efez hay na, ara kuley mahura!» ²⁹ Mewudey a, a cëney fa ndëhay mekele mekele daa berney a na, ta', lëngesl ata a mbëdey. Ndëhay a dadamata ata Gayus ta Aristarke, ndëhay daa hwayak nga Masadëwan masa ma lëgdamara Pawl, a hwam tabiya ngada bërakw.

³⁰ Pawl a wufey nga daw fa ndëhay a, ama ndëhay ma tëbmara mey nga Yesu a tëkmara. ³¹ Ndëhay da wuzlah mahura hay ma wamara hwayak nga Azi na, ara jam hay nga Pawl. A slërmawa ndëhay fa vëdë, a lëvmar a da daw a bërakw a ba.

³² Ndëhay makustakaya tabiya fetede na, ray ata ta hëbey sem, fa yam mey saw këne. Ndëhay siya a wudam, a lëvam mey pal, siya hay a wudam, a lëvam mey mekele. Ama har-gëdan nga ndëhay da wuzlah ata na, a sërmara a kusam maja me ba. ³³ Ndaw *Jëwif daha, mezëley Alekzandëre. Jëwif hay mekele a walamara da wuzlah ndëhay Jëwif hay siya, a lacadamara fa mey nga ndëhay makustakaya amba a wuzdatara mey a maaya maaya. Alekzandëre

† **19:24** 19.24 Artemis: Ara kuley masa ndëhay ma ragadamar daa hwayak nga Azi ta daa hwayak nga Akay zleezle. A wulkam ara kuley mangusa. Way-mekey-kwakwas nga Artemis masa daa berney nga Efez e ara way mahura membey masa ma rëzлта ndëhay da bëla zleezle. **19:24** 19.24 16.16 **19:26** 19.26 17.29 **19:29** 19.29 Aristarke: 20.4; 27.2; Kwa 4.10

a banğada har ngaa guzley, a wudey a wuztar mey a ndëhay makustakaya ha. ³⁴ Ama masa ata ma sërmara anğa ndaw Jëwif na, a zlamar ma wudam ta d'ay pal, a lëvam: «Artemis, kuley nga ndëhay Efez hay na, ara kuley mahura!» Haa ler cew, ata fa wudam anda keđe.

³⁵ Sekëreter mahura † daa berney a, a tækta nga yey mey, ta', a njam teete. Sekëreter e a lëvtar: «Akwar ndëhay da Efez, ndëhay tabiya a sërmara anğwa nga kuley nga Artemis na, a kəzlwa da gazlavay da vad. Asaya, a sërmara ara ndëhay daa berney nga Efez ma jëdmara way-mekey-kwakwas nga kuley mahura ha ta anğwa nga kuley a. ³⁶ Ndaw ma da rësa mey keđe na, daa ba. Da ray nğene, si ka njam teete, ka wulkam maaya maaya d'agay. ³⁷ Ka handamatërwa ndëhay a keđe na, maja me? Ta lalamawa cek daa way a la daw? Ta cëdmara kuley a la daw? ³⁸ Dar hay daha mapakaya nga key sariya. Ndëhay ma ka sariya hay daha. Da Demetëriyus ta ndëhay anğa hay a wudam nga wudey ndëhay na, nğama a diyam a d'ëslmara sariya ha fa ata. ³⁹ Da ka wudam nga d'iyey mey mekele ma fëna keđe saya na, si ka handamara mey a fa mecëmey-ray mahura nga nğwamna nga nëka mey a. ⁴⁰ Ama da ray cek ma key tasana keđe na, a gwamara nga pamandakwar mebërey, a da lëvam alëkwa fa wudkwa nga nësey mewey nga *bay-ray hay daa berney a. Maja da mahura hay aa cëfdamandakwar da ray mekusey a keđe na, alëkwa fa da gwakwa nga mbëfdamatakwara daa ba.» ⁴¹ Fa dëba ha masa sekëreter heyey maa guzltar la anda keđe na, ta', a lëvtar a ndëhay makustakaya heyey nga diyam.

20

Pawl a pëkey da Masadëwan leŋ daa hwayak nga Gërek

¹ Fa dëba ha masa baazlam da Efez heyey ta ndëvey cay na, Pawl, ta', a kusta ndëhay ma tëba mey nga Yesu fetedë. Aa guzltar mey mekele mekele nga vëltar gëdan. Cay, a catar har a ndëhay a, a mbëftar mey, a wunkam, ta', a daw aa hwayak nga Masadëwan. ² Masa anğa fa pëkey daa hwayak a na, a vëltar gëdan a ndëhay ma tëba mey nga Yesu fetedë ta mey hay mekele mekele ga. Fa dëba ha, a wusey aa hwayak nga Gërek hay *. ³ A njeý daa hwayak a kiya maakar. Masa fa da ndëkwey aa kwambiwal nga daw aa hwayak nga Siri na, a cënda *Jëwif hay ta cëmdamara

† **19:35** 19.35 Sekëreter mahura: ara ndaw mahura daa berney, ndaw ma handa mey nga nğwamna nga Rawm a ndëhay mahura hay daa berney a. Anğa ndaw da wuzlah ndëhay ma wamara berney a. **20:1** 20.1 11.23 * **20:2** 20.2 hwayak nga Gërek hay: Ara mezëley mekele nga hwayak nga Akay.

daw ata cay amba a kədmara vagay. Da ray ηgene, a wulkey maaya na, a vøhey, a daw a Siri taa cəved ma daw a Masadəwan. ⁴ Pawl a diyam na, ta ata Sawpater, bəzey nga Pirus daa berney nga Bere, Aristarke ta Sekundus ndəhay daa berney nga Tesalawnik, Gayus ndaw daa berney nga Derbe, leη Timawte, Tisik ta Tərawfim ndəhay daa hwayak nga Azi. ⁵ Ndəhay a keđe na, a diyam teesəd fa mey ala †, a səkwmandar da Tərwəs. ⁶ Fa dəba nga Gwagway nga peη manjar cek ma həsla da hwađ a, ala na, ya sləkdam daa berney nga Fəlepi, ya ndəkwan aa kwambiwəl, ya diyam a Tərwəs. Dar zlam fa dəba ha na, ya wusam a Tərwəs a, ya hətfamatar fetede. Ya njam luma pal.

Pawl a vəhwa fa ndəhay da Tərwəs

⁷ Ta pas luma nga Dəram taa kwađ, ya kusam nga zəmey daf nga sərfedey meməcey nga Yesu. Pawl ta', aa guzlar a ndəhay makustakaya. Anğa faa guzley, faa guzley, kasl wuzlah-tavađ, maja slam ta wurey la na, a da daw aa slam mekele. ⁸ Daa way da ray way masa ala makustakaya da hwađ a, petərļa hay daha ga daa way a. ⁹ Bəz-gula daha mezəley Yutik manjakaya daa feneeter nga way masa ala makustakaya da hwađ a ha. Pawl fa wuzey mey, fa wuzey mey, gula kaa heyey a gərey nga menjey. Dar a kar, ta', a ney aa đar. Masa aa daa đar na, ta', a tədwa da ray way masa nga maakar a da vađ a hwayak. Ndəhay a sləkdamara, ama ta məcey sem. ¹⁰ Pawl, ta', a bəηgawa, a daw a ray bəz-gula ha, a ney a ray a, humbat! a humbta, a ləvtar a ndəhay: «Ka təwam ba, aa ta dey.» ¹¹ Ta', Pawl a vøhey aa way da ray way heyey, a wuna peη, a zəmamara daa slam a. Aa guzley haa slam ma wurey. Fa dəba ha, ta', a daw. ¹² Bəz-gula heyey na, anğa maaya maaya ta mbəley cay. Ndəhay a ηgəlmara, a diyam a way. Masa ata ma hətmar bəz-gula heyey ma mbəley cay na, mevel ata a dəkey, kwa ara mey ba.

Pawl a daw da Tərwəs aa berney nga Mile

¹³ Pawl a wudəy nga daw a Asaws ta salay đagay. Da ray ηgene, a ləvndar nga daw ta kwambiwəl fa mey a Asaws. Ta', ya diyam, ya səkwmara daa Asaws a amba ya diyam bama. ¹⁴ Masa anğa ma hətfandar la da Asaws na, a ndəkwey aa kwambiwəl may, ta', ya diyam aa berney nga Mitilen. ¹⁵ Ya sləkdam fetede, ta kwambiwəl. Pepərek e, ya wusam aa kwakway nga hwayak da wuzlah bəlay

20:4 20.4 19.29; Timawte: 16.1; Tisik: Ef 6.21; Tərawfim: 21.29 † **20:5** 20.5 ala: Luk, ndaw ma wuzlala mey a keđe, a cəmam ta Pawl saya. **20:7** 20.7 2.42, 46 **20:10** 20.10 1Bay 17.21

mezëley Kiyaw. Pepërek e mekele, ya tənğdamara bəlay, ya diyam aa hwayak da wuzlah bəlay mekele mezëley Samaws. Pepërek e mekele saya na, ya wusam aa berney nga Mile. ¹⁶ Ya diyam a Mile, ya mbəkdamara berney nga Efez na, maja Pawl fa wufey nga njey daa hwayak nga Azi ga daa ba. Anğa fa wusey vaw nga daw aa berney nga *Jeruzelem, amba wuskwaa đar nga gwagway nga *Pantekwat a da wuswa na, anğa ta wusey cay.

Pawl aa guzltar a bay-ray hay nga ndëhay nga Yesu da Efez

¹⁷ Masa Pawl aa daa berney nga Mile na, ta', a slërwa a Efez nga zëley *bay-ray hay daa *mecëmey-ray nga ndëhay nga Yesu fetede. ¹⁸ Masa bay-ray hay a ma wusam la a cakay a, a Mile na, Pawl a ləvtar: «Dəga yah ma sawa fa akwar ngeeme aa hwayak nga Azi keđe na, ka sərmara menjey adaw da wuzlah akwar mandaw mandaw na, anğa kwara. ¹⁹ Ya kar slëra a Bay Mahura na, ta meney ray, ta matəway daa dey, asaya, ya ta sərey banay la ga maja *Jəwif hay fa səpam cəved nga kəđmaya vagay. ²⁰ Ka sərmara kwa ya ta bəy cek fa akwar masa ma jənkwar na, daa ba səlak. Ya fa wuzdakwara mey nga Gazlavay, ya faa sərkadakwara kwa daa papalah, kwa da way akwar hay. ²¹ Ya faa guzltar a Jəwif hay ta a ndëhay masa Jəwif hay ba hay, amba a mbəđdamara menjey ata, a mbəđam dey fa Gazlavay, a səpmara ta mevel pal, a pamara Bay aləkwa Mahura Yesu nga ndaw ata fara fara. ²² Wure keđe, ya fa daw a *Jeruzelem maja *Mesəfney nga Gazlavay ma təkya đay nga daw, ama ya səra cek ma da hətfaya fetede ba. ²³ Cek masa yah ma sərey na, kwa daa berney wura wura Mesəfney nga Gazlavay fa wuzdiwa, a sərdamaya banay la, a kəzlamaya la aa fərsəne. ²⁴ Ama kwa ya məcəy, kwa yah ta dey, nğada yah na, a mbafaya gway. Cek mahura nğada yah na, ara nga ndəvey slëra masa Bay Mahura Yesu ma vəldiwa a har adaw nga key. Slëra ha, ara mewuzey *Mey-maaya-mawiya da ray maaya nga Gazlavay.

²⁵ «Ya ta pəkey la da wuzlah akwar tabiya, ya ta wuzkwar mey la da ray mewey nga Gazlavay da ray ndëhay. Ama wure keđe, ya səra kwa ndaw pal dasi akwar fa da hətya daa saba. ²⁶ Da ray nğene, ya fa ləvkwar dəga tasana, da ndaw dasi akwar taa zəđey la na, mey adaw da hwađ a daa ba, ²⁷ maja ya ta wuzdakwara mey hay tabiya la da ray cek masa Gazlavay ma wufey nga ka. Kwa ya ta bəy mey

fa akwar daa ba. ²⁸ Ya fa lëvkwar, wam vaw fa ray akwar, jëdfmata ndëhay tabiya masa Mesëfney nga Gazlavay ma vëldakwara asi har akwar anda mecëkwer ma jëdta tëban anga hay. Kam mecëkwer nga ndëhay daa mecëmey-ray nga ndëhay nga Gazlavay. Ata na, Gazlavay a pata wal ngada anga ta fa memëcey nga Bëzey anga. ²⁹ Ya sëra, pas masa ya ta daw sem na, ndëhay a mbëzmawa la a wuzlah akwar anda wagalak hay ma diyam a wuzlah tëban hay. A da nësmata ndëhay daa mecëmey-ray nga ndëhay nga Yesu. ³⁰ Kwa ndëhay da wuzlah akwar may, a mbëzlam la, amba a tëknmata ndëhay ma tëba mey nga Yesu nga diyam asi ata. ³¹ Anda kede, wam vaw fa ray akwar. Sërfadamara, mevey maakar yah da wuzlah akwar, taa vad, taa pas, ya ta këtckwar la pal pal tabiya akwar, haa ya tëway maja akwar.

³² «Wure kede, ya fa vëldakwar a har Gazlavay, ya këtckwar nga sërfedey mey da ray maaya nga Gazlavay. Anga na, a gwa a vëlkwar gëdan nga tëbey mey nga Yesu ma fëna ma fëna, a gwa a vëlkwar cek hay maaya masa anga ma fëdatara a ndëhay anga hay tabiya. ³³ Dey ta kaya fa dala akwar, ta zleley akwar daa ba. Dey ta kaya kwa fa zana nga ndaw pal daa ba. ³⁴ Akwar ta ray akwar ka sërmara ya ta key slëra la ta har adaw, amba ya hëtey dala nga hëdkey cek mezëmey ngada yah ta ngada ndëhay ma lëgdamaya. ³⁵ Anda kede, yah ma wuzdakwara la, si ka kam slëra amba ka jënmata ndëhay masa-viya hay. Sërfadamara mey nga Bay Mahura Yesu maa guzley ta mey anga, ma lëvey heyey: “Ndaw ma vëley cek, aa ta meesëmey a fëna ndaw ma tëba cek aha.”»

³⁶ Masa Pawl ma ndëvda meeguzley la na, ndëhay tabiya a ragadam. Pawl ta', a dërey dangay a Gazlavay ta ndëhay a daa slam a. ³⁷ Fa dëba ha, ndëhay tabiya a tëwam, cacam! a cacëmamara fa dadak, a camar har nga daw ta zazay. ³⁸ A tëwam ga na, maja anga ma lëvtar: «Akwar fa da hëtmaya daa saba.» Ta', a lëgdamara kasl aa slam metëpey kwambiwal.

21

Pawl a daw aa berney nga Jeruzelem

¹ Masa ala ma mbëkdamatërwa *bay-ray hay da Efez heyey cay na, ta', ya diyam ta kwambiwal cer aa hwayak

20:28 20.28 1Pi 5.2 **20:28** 20.28-31 11.23 **20:29** 20.29 Mt 7.15; Jan 10.12
20:30 20.30 Gal 4.17; 1Jn 2.19 **20:31** 20.31 19.10; 1Tes 2.11-12; 2Kwr 11.28
20:32 20.32 26.18; 1Tes 5.23-24; 2Tes 1.11-12 **20:33** 20.33-34 18.3 **20:35**
20.35 Mt 10.8 **20:38** 20.38 20.25

da wuzlah bëlay mezëley Kwas. Pepërek e, ya diyam ya wusam aa hwayak da wuzlah bëlay mekele mezëley Rawdes. Da fetede, ta', ya diyam ta kwambiwal aa berney nga Patara. ² Da Patara ha, ya hëtam kwambiwal mekele ma daw aa hwayak nga Fenisi, ta', ya ndëkwam a hwaď a, ya diyam. ³ Masa ala da wuzlah bëlay na, ya hëtmam hwayak nga Sipëre ta har-gula, ama ya diyam na, ngadaa hwayak nga Siri. Ta', kwambiwal a lecey da Tir daa hwayak nga Siri heyey, amba a padamata salay ta cek hay da hwaď a. ⁴ Daa ngene ya pam salay, ya diyam, ya hëtfam ndëhay ma tëba mey nga Yesu fetede. Ta', ya njam bama ta ata luma pal. *Mesëfney nga Gazlavay a wuztar cek ma da kar a Pawl da *Jeruzelem. Da ray ngene, ndëhay a, a lëvmar a Pawl na, a da daw a Jeruzelem e ba. ⁵ Ama masa ala ma kam luma pal la ta ata na, ta', ya slëkdam, ya diyam a pëkey. Ata tabiya ta ngwas ata hay, ta bëz ata hay, a lëgdamandërwa daa berney a haa a palah. Ya wusam a mey-bëlay na, ta', ya ragadam, ya dëram dëngay a Gazlavay. ⁶ Masa ala ma dëram dëngay cay na, ta', ya cam har pal pal da wuzlah ala tabiya, ya ndëkwam aa kwambiwal. Ata may, ta', a vëham a way ata hay.

⁷ Ya diyam ta kwambiwal da Tir aa berney nga Pëtawlemayis. Fetede, ya pam salay. Ya camatar har a mëlma ala hay daa mey nga Yesu, ya njam ďar pal bama. ⁸ Pepërek e, ta', ya diyam, ya wusam aa berney nga Sezere. Fetede, ndaw ma wuzey mey da ray Yesu daha mezëley *Fëlep. Anğa na, ara ndaw pal da wuzlah *ndëhay maasala * masa ata ma walamata da Jeruzelem heyey. Ya diyam, ya njam da way anğa. ⁹ Dam anğa hay mëfaď, ta diyam a way zel daa ba aran, fa wuzam mey masa Gazlavay ma wuzdatara. ¹⁰ Masa ya ta njam cay ďar ga fetede na, *ndaw ma tëla mey daha mezëley Agabus a sawa da *Jude aa berney a. ¹¹ Ta', a wuswa fa ala, leŋ! a la senter nga Pawl, a jëwta salay anğa hay ta har anğa hay, a lëvey: «Ehe, Mesëfney nga Gazlavay a lëvey: “*Jëwif hay daa hwayak nga Jeruzelem a da jëwmara ndaw nga senter keďe anda yah ma jëwa har aďaw ta salay aďaw keďe, a da vëdamara a har ndëhay Jëwif hay ba hay.”»

¹² Masa ala ma cëndamara mey a keďe la na, ala ta ndëhay nga Yesu daa Sezere he, ya kamar ambahw a Pawl, a da daw a Jeruzelem e ba. ¹³ Ama Pawl a mbëďdandara, a lëvey: «Ka

21:4 21.4 10.19; 21.11 **21:5** 21.5 20.36 * **21:8** 21.8 ndëhay maasala: Ara ndëhay maasala mawalatakaya nga jëney ngwas fa yiden hay da Jeruzelem. Nëka SNM 6.1-6. **21:8** 21.8 6.5; 8.5, 40 **21:9** 21.9 2.17 **21:10** 21.10 11.28
21:11 21.11 20.23; 21.33; Rm 15.31

tëwam na, maja me? Ka wudam ka pamaya mandërzay aa dey daw? Yah na, kwa a jëwmaya, kwa a këdmaya vagay da Jeruzelem e maja Bay Mahura Yesu na, cay.» ¹⁴ Anda kedë, ala ta gwamara nga mbëddamara mewulkey anga daa ba. Da ray ngene, mbak! ya mbëkdamara nga daw, ya lëvmar: «Bay Mahura Yesu nga key anda aa ma wufey.»

¹⁵ Ya njam fetedë d'ar nekëdëy saya, ta', ya diyam vaw, ya diyam a Jeruzelem.

¹⁶ Ndëhay ma tëba mey nga Yesu siya da Sezere, ta', a lëgdamandar a way ndaw daha mezëley Mënasanjw. Ara ndaw daa hwayak nga Sipëre ma tëba mey nga Yesu dëga zleezle. Ya nam da way anga fetedë.

Pawl a daw a nëkërwa Jak

¹⁷ Masa ala ma wusam la a *Jeruzelem na, mëlman hay daa *mecëmey-ray nga ndëhay nga Yesu a tëbmandar ta meesëmey. ¹⁸ Pepërek e, ala ta ata Pawl, ta', ya diyam a way *Jak. *Bay-ray hay tabiya nga mecëmey-ray nga ndëhay nga Yesu makustakaya fetedë. ¹⁹ Pawl, ta', a catar har, a wuzdatara cek hay tabiya maaya maaya, cek hay masa Gazlavay ma kata da wuzlah ndëhay masa *Jëwif hay ba hay ta fa slëra anga. ²⁰ Ndëhay a ma cëndamara mey a ngene na, ta', a hëlmamara Gazlavay. A lëvmar a Pawl: «Mëlma ala, ka sëra da wuzlah ndëhay Jëwif hay na, ndëhay ma tëba mey nga Yesu, a key gabal weewe. Ata tabiya a wudam mey nga *kwakwas nga Mawiz kalah cënga. ²¹ Ndëhay a, a cëndamara ka fa wuztar mey a Jëwif hay tabiya masa daa hwayak mekele hay, ka lëvtar nga mbëkdamara kwakwas nga Mawiz. Asaya, ka fa lëvtar a da slamatara mandawal nga bëz ata hay ba, a da sëpam kwakwas nga Jëwif hay saba. ²² Fara fara, kah ma sawa fedë kaa na, a cëndamara la. Ya da kakwa na, kwara? ²³ Maaya na, ka ka cek masa ala ma da lëvmaka kedë. Nëka, ndëhay mëfad fedë daha ta mbadëamar la a Gazlavay.

²⁴ Pas masa ata ma da kam kwakwas a Gazlavay nga ndëvey *mëbedëy ata ha na, gweegwe a wuswa. A da kam kwakwas a Gazlavay amba a tëram ndëhay mazlëbtakaya saba, fa dëba ha a hëjmata ray ata hay †. Maaya na, ka diyam bama, ka hëdkatar cek hay nga key kwakwas a ta dala akah. Anda kedë, ndëhay tabiya a da sërmara mey hay masa ata ma cëndamara da ray akah na, ara mëbërzley. Asaya, a sërmara kah, ta ray akah, ka fa nar ray a kwakwas

21:13 21.13 20.24 **21:14** 21.14 Lk 22.42 **21:18** 21.18 15.13; Gal 1.19

21:19 21.19 11.18 **21:21** 21.21 mesley mandawal: 16.3; Gal 3.25, 28; 5.2

21:23 21.23-24 Mesl 6.13-21 † **21:24** 21.24 Nëka 18.18ta mey da ray a.

nga Mawiz a may. ²⁵ Ngada ndëhay masa Jëwif hay ba hay ma tëba mey nga Yesu na, ala ta diymara mey a cay, ya ta wuzlalamatar leeter la da ray a, ya lëvmatar, a da zëmam aslaw nga kuley ba, a da zëmam mambaz ba, a da zëmam aslaw metërdey ta tërdey ba, a da lam vaw saw ba.»

²⁶ Masa ata ma lëvmar anda kefe la na, Pawl, ta', a daw ta ndëhay mëfad heyey. Pëpërek e, a kam kwakwas a Gazlavay amba a tëram ndëhay mazlëbtakaya saba. Ata Pawl ta ndëhay mëfad heyey ta', a mbëzam aa *Way-mekey-kwakwas nga Gazlavay. A diyam fa ndëhay ma ka kwakwas nga Gazlavay fetede, a lëvmatar: «Mëndërey dar maasala amba ya tëram ndëhay masa mazlëbtakaya saba. Masa ala ta tëram ndëhay masa mazlëbtakaya ba cay na, ya vëhmawa la nga vëley cek a Gazlavay.»

A kërzamara Pawl daa Way-mekey-kwakwas nga Gazlavay

²⁷ Mamba dar maasala heyey a ndëvey, *Jëwif hay mekele ma samawa daa hwayak nga Azi a hëtmär Pawl daa *Way-mekey-kwakwas nga Gazlavay. A hëldamata ndëhay tabiya fetede nga kërzamara Pawl, ta', a kërzamara. ²⁸ A wudam, a lëvam: «Ndëhay *Israyel hay, jënmandar! Ehe, ndaw masa maa sërkatata ndëhay kwa daa wura daa wura ta mey maaya ba da ray ndëhay Israyel hay lej da ray *kwakwas nga Mawiz, asaya, da ray Way-mekey-kwakwas nga Gazlavay heyey na, a kefe. Wure kefe kwa ndëhay masa Jëwif hay ba hay na, ta ngëltërwa sem aa Way-mekey-kwakwas nga Gazlavay amba a zlëbmara way a!»

²⁹ A lëvam anda kefe maja ata ma hëtmatar ata Pawl ta Tëräwfim, ndaw Efez, daa berney nga *Jeruzelem. A wulkam Pawl ta mbëzda la aa Way-mekey-kwakwas nga Gazlavay. ³⁰ Mey a kefe a cëney fa ndëhay tabiya da Jeruzelem na, a hwamawa da slala hay mekele mekele, a kusam aa way a. A kërzamara Pawl, a badamërwa aa ambaw. Ta', a gërcamata mey-slam hay nga Way-mekey-kwakwas a fiyaw fiyaw. ³¹ Masa ata fa da këdmara vagay na, *bay-ray nga sewje hay nga *Rawm a cënda ndëhay da Jeruzelem tabiya fa yam mey. ³² Wure wure ngene, a hëlwa sewje hay ta sewje mahura hay da ray sewje hay a, a hwamawa fa ndëhay makustakaya heyey. Masa ndëhay makustakaya ha ma hëtmatar la na, ta', a mbëkdamara Pawl, a këdmara saba. ³³ *Bay-ray nga sewje hay heyey, ta', a daw fa Pawl, a kërza, a lëvtar a sewje hay nga jëwmara ta calalaw cew. Ta', aa cëfdata ndëhay makustakaya, a lëvey:

«Ara na, wa? A key na, me?» ³⁴ Ndëhay tabiya a lëvam mey wal wal. Bay a ta cënda mey a maaya maaya daa ba, maja ndëhay fa yam mey kalah. Da ray ngene, a lëvtar a sewje anga hay nga handamara Pawl aa way nga sewje hay. ³⁵ Masa ata ma wusam la fa slam metëpey nga mbëzey ngada way a na, sewje hay a lamara ta ley, maja ndëhay fa kam hëma a ray a. ³⁶ Ndëhay ga fa diyam asiya, fa wudam, a lëvam: «Këdmara vagay! Këdmara vagay!»

Pawl a kada mabara nga mey anga

³⁷ Masa ata fa da mbëzdamara Pawl aa way nga sewje hay heyey na, Pawl a lëvar a *bay-ray nga sewje hay a: «Ka vëlya cëved ngaa guzka la daw?» *Bay-ray nga sewje hay heyey aa cëfda, a lëvar: «Ka sëra meeguzley mey Gërek daw? ³⁸ Kah na, ndaw *Ejip ma hëldata ndëhay nga këfey vaw daa d'ar hay a kedë ba daw? Ara kah ma handatërwa ndëhay gabal mëfad a wuzlah-ley nga nësa mewey nga *Rawm heyey, ba diya?» ³⁹ Pawl a mbëddara, a lëvar: «Yah, ndaw *Jëwif. Ya yawa da Tars daa hwayak nga Silisi, berney masa ndëhay ma zëldamara slëmay. Ambahw, vëlya cëved, amba yaa guzltar a ndëhay kedë.» ⁴⁰ Bay-ray nga sewje hay heyey, ta', a vëlar cëved. Pawl den! a lecey aa slam metëpey ngada way heyey, ta', a banqada har amba ndëhay a sërmara fa wufey ngaa guzley. Ndëhay a cëpa, a njam teete, ta', aa guzltar ta mey *Hebëre.

22

¹ Pawl a lëvtar: «Waa papay hay, ta mëlma adaw hay Jëwif hay, jëkam slëmay fa mey adaw masa yah ma da lëvkwar wure kedë da ray cek ma key ta yah.» ² Masa ata ma cëndamara anga faa guzley ta mey ata Hebëre na, a njam teete ma fëna, ma fëna, a jëkam slëmay. Ta', Pawl a lëvtar dëba:

³ «Yah na, ndaw Jëwif, ya yawa da Tars daa hwayak nga Silisi. Ama ya gëley da *Jeruzelem fedë, ya ta jëngëy la fa Gamaliyel, ndaw maa sërkadaya ta cëved e da ray kwakwas nga papay nga papa alëkwa hay. Yah ndaw ma key slëra ngada Gazlavay ta mevel adaw cëpa anda akwar tasana kedë may. ⁴ Ya ta sërdata banay la ga ta ndëhay ma sëpa cëved nga Yesu haa ndëhay a, a mëcam. Ya ta kërzey zel hay lej ngusay la, ya ndëkwdata aa fërsëne. ⁵ *Ndaw mahura da ray ndëhay ma ka kwakwas nga Gazlavay ta mahura hay nga Jëwif hay tabiya a sërmara mey masa yah ma kada na, ara mey fara fara. Ta vëlmaya leeter hay masa

ata ma wuzlalamatara a mëlman hay Jëwif hay daa berney nga Damas la a har. Leeter hay a, a vëlmaya cëved nga daw a Damas a nga kërzawa ndëhay ma sëpam cëved nga Yesu, amba ya jëwtërwa, ya handatërwa a Jeruzelem, amba mahura hay a kamatar sariya nga sërdamata banay.»

*Pawl a kada mey da ray pas masa anga ma tëba Yesu
(SNM 9.1-19; 26.12-18)*

⁶ «Mamba wuzlah-pas, ya fa daw daa cëved. Gweegwe ya wusey aa berney nga Damas na, wure wure ngene, slam a wadawa përay! da gazlavay da vad a ray adaw. ⁷ Ya tëdey a hwayak, ya cënda dëy ma lëvya: “*Sawl, Sawl, ka sërdaya banay anda kefe na, maja me?” ⁸ Ya mbëddara, ya lëvey: “Bay Mahura, kah na wa?” A mbëddiwa, a lëvya: “Ara yah, Yesu, ndaw *Nezeret, masa kah ma sërda banay.” ⁹ Ndëhay masa dasi adaw na, ta hëtmär slam-mewedëy a la, ama ta cëndamara dëy masa maa guzlya na, daa ba. ¹⁰ Ta’, ya cacëfda, ya lëvar: “Bay Mahura, kaa ya da key na, kwara?” A mbëddiwa, a lëvya: “Slëkdey, daw aa berney nga Damas. Fetede, a da wuzdamakawa cek hay tabiya masa Gazlavay ma walaka nga kata.” ¹¹ Slam-mewedëy kaa heyey ta wulfayawa dey sem, ndëhay dasi adaw heyey, ta’, a dëdamaya fa har, a handamaya aa berney nga Damas a.

¹² «Daa berney a ngene, ndaw mezëley *Ananiyas daha, aa fa sëpa cëved nga Gazlavay ta mevel pal, fa sëpa *kwakwas nga Mawiz ta cëved e, *Jëwif hay daa berney nga Damas a tabiya faa hëmdamara. ¹³ A sawa a hëtfaya, a lecey a cakay adaw, a lëvya: “Sawl, mëlma adaw, dey akah nga wurey aa slam a.” Wure wure ngene, dey adaw ta’, a wurey aa slam a, ya hëtar Ananiyas a maaya maaya. ¹⁴ Ananiyas ta’, a lëvya: “Gazlavay masa papañ nga papa alëkwa hay ma ragadamar ta walaka la, amba ka sëra slëra masa anga ma wudëy ka kara, amba ka hëtar ndaw pal ma key cek ta cëved e ta dey akah, asaya, amba ka cënda dëy anga. ¹⁵ Maja ngene, ka da key sede da ray ndaw aha, ka da wuztar mey a ndëhay tabiya da ray cek masa kah ma hëtar ta da ray cek masa kah ma cënda. ¹⁶ Kaa wure kefe ka sëkwey na, me? Slëkdey, hëtey *baptem, cacëfda Bay Mahura nga jënka, amba Gazlavay a mbëkdakawa mebërey akah.»»

*Mey da ray Gazlavay ma slërda Pawl fa ndëhay Jëwif hay
ba hay*

¹⁷ Pawl a løyey saya: «Fa dëba ha ya vëhwa a *Jeruzelem. Pas pal daha, ya fa dërey dangay daa *Way-mekey-kwakwas nga Gazlavay na, Gazlavay a wuzya cek, ¹⁸ ya hëtar Bay Mahura. Ta', a løyva: "Wusey vaw, bey fiyaw da Jeruzelem kedë, maja ndëhay daa berney a kedë fa da tëbmara mey masa kah ma da kada da ray adaw na, daa ba." ¹⁹ Ya mbëddara, ya lëvar: "Bay Mahura, ata na, a sërmara fara fara, ya ta daw la aa *way-mewuzey-mey nga Gazlavay mekele mekele, ya kërzawa ndëhay ma tëba mey akah hay, ya këfta, ya këzlata aa fërsëne. ²⁰ Etiyen, ndaw ma key sede da ray akah na, ta pas masa ata ma këdmara vagay na, yah ta ray adaw, yah daha fetedë. Masa ata ma këdmara vagay la na, ta mbafaya la. Yah ma jëftara jëbe hay nga ndëhay ma këdmara ha." ²¹ Ama Bay Mahura a løyva cënga: "Daw, ya slërdaka dërenj fa ndëhay masa *Jëwif hay ba hay.»

Pawl fa mey nga bay-ray nga sewje hay nga Rawm

²² Ndëhay makustakaya heyey fa jëkam slëmay fa Pawl haa kasl fa mey anga madagway-dakw, ma løyey: «Daw, ya slërdaka dërenj fa ndëhay masa *Jëwif hay ba hay.» Masa ata ma cëndamara mey a la na, ta', a wudam, a lëvam: «Lamara ndaw kedë, këdmara vagay! Ka da mbëkdamara nga njeý ta dey ba!» ²³ A wudam ta gëdan, aa zakadamata zana ata hay a vad, a hëlam hwiyak a vad. ²⁴ *Bay-ray nga sewje hay heyey a lëvtar a ndëhay anga hay nga handamara aa way nga sewje hay heyey. A lëvtar nga slëdmara ta laway amba a wuzdërwa ndëhay makustakaya a wudam a ray a na, maja me. ²⁵ Ama masa ata ma jëwmara cay nga slëdëy na, Pawl a lëvar a mahura nga sewje hay masa da cakay a: «Akwar ta cëved nga slëdëy ndaw Rawma masa sariya manjar nga key aran daw?» ²⁶ Masa mahura nga sewje hay ma cënda mey a kedë la na, ta', a daw fa *bay-ray ata heyey, aa cëfda, a lëvar: «Ka wudëy nga kar a ndaw kedë na, me? Ndaw aha ara ndaw Rawma.» ²⁷ Bay-ray nga sewje hay heyey, ta', a daw fa Pawl, aa cëfda, a lëvar: «Kadiwa, kah na, ndaw Rawma daw?» Pawl a mbëddara, a lëvar: «Ahaw.» ²⁸ Bay-ray nga sewje hay heyey a lëvar: «Yah ma da tërey nga ndaw Rawma kedë na, ya ta vëley dala la ga.» Pawl a mbëddara, a lëvar: «Ama yah na, ndaw Rawma dëga nga mayawa adaw maja papay ndaw Rawma.» ²⁹ Ndëhay ma da slëdmara ngaa guzley heyey, a cëndamara anga ma løyey anda kedë na, a ngëcham la da cakay a. Masa bay-ray nga sewje hay kaa

heyey ma cënda Pawl anğa ndaw Rawma na, a zlurey maja anğa ma jëwa ta calalaw*.

Pawl fa mey nga ndëhay mahura hay ma sla yawa nga Jëwif hay

³⁰ *Bay-ray nga sewje hay heyey, a wudfey a sëra fara fara *Jëwif hay a wudmara Pawl na, maja me. Da ray ngene, pepërek e, ta', a pëska Pawl, a lëvtar a *bay-ray hay nga ndëhay ma ka kwakwas nga Gazlavay lej a ndëhay mahura hay ma sla yawa nga Jëwif hay tabiya nga kusam. Ta', a handërwa Pawl, a lacada fa mey ata.

23

¹ Pawl ta', a nëkfata ndëhay mahura hay ma sla yawa makustakaya kaa heyey, a lëvtar: «Mëlma adaw hay, yah na, ya sëra daa mevel adaw slëra masa yah ma ka ngada Gazlavay haa kasl tasana na, anğa maaya.» ² *Ndaw mahura da ray ndëhay ma ka kwakwas nga Gazlavay fetedë daha mezëley *Ananiyas. A lëvtar a ndëhay malacatakaya da cakay Pawl a nga slëngmar maarawa. ³ Ta', Pawl a lëvar: «Gazlavay a këdka la, kah ndaw masa ta neneh cew! Kah manjakaya nga kaya sariya anda mey nga *kwakwas nga Mawiz ma lëvey, ama ka fa sëpa kwakwas a daa ba maja ka fa lëvtar a ndëhay nga këdmaya anda kedë.»

⁴ Ndëhay da cakay a, a lëvmar: «Haya! Ka cëfa *ndaw mahura da ray ndëhay ma ka kwakwas nga Gazlavay na, kwara?» ⁵ Pawl a mbëdëdatara, a lëvtar: «Mëlma adaw hay, yah na, ya sëra ara ndaw mahura ba. Mawuzlalakaya da dërewel nga Gazlavay, a lëvey: “Ka daa guzley mey maaya ba da ray bay nga ndëhay akah hay ba.”»

⁶ Pawl a sëra da wuzlah ndëhay mahura hay ma sla yawa makustakaya ha na, *Saduse hay daha, *Fariza hay daha. Maja ngene, aa guzley ta gëdanj fa mey ata, a lëvey: «Mëlma adaw hay, yah ndaw Fariza, bëzey nga ndaw Fariza. A kamaya sariya kedë na, maja ya fa sëkwa maslëkdawa nga ndëhay daa memëcey.» ⁷ Anğa ma lëvey la anda kedë na, Fariza hay ta Saduse hay a, a zlamar mekey yawa, ndëhay makustakaya heyey a wunkam cew. ⁸ Ndëhay Saduse hay a wulkam ndëhay mamëctakaya a slëkdamawa daa memëcey daa ba. Asaya, a lëvam maslanj hay nga Bay Gazlavay da vad daa ba, kwa mesëfney hay wura wura daa ba may. Ama Fariza hay a lëvam cek hay a

* **22:29** 22.29 Nga sërdey banay ta ndaw Rawma manjar sariya nga key na, mewey nga Rawm a wëley cëved ba. **23:1** 23.1 24.16 **23:2** 23.2-3 Lev 19.15; Mt 23.27-28; Jan 18.22-23 **23:5** 23.5 Mab 22.27 **23:6** 23.6 26.5; 24.21; Fël 3.5-6

ngene tabiya na, daha. ⁹ Ndëhay fa kam baazlam ta gëdan ta gëdan, ndëhay maa sërkada kwakwas nga Mawiz masa Fariza hay, ta', a slëkdam, a kam mey ta gëdan, a lëvam: «Ala ta hëtam mebërey fa ndaw kefe kwa nekëfey daa ba. Da maslan nga Gazlavay da vad ma sawa maa guzlar kwa, da daa ba, mesëfney kwa.»

¹⁰ Yawa ha fa key ta gëdan ta gëdan. Bay-ray nga sewje hay heyey a zlurey, a wulkey Jëwif hay a, a da pëwmara Pawl. Da ray ngene, a lëvtar a sewje anga hay nga diyam, nga ngëlmërwa Pawl la da wuzlah ndëhay a. Ta', a handamara aa way nga sewje hay.

¹¹ Dasi tavad a ngene, Bay Mahura Yesu a wuzar vaw a Pawl, a lëvar: «Ka da zlurey ba! Anda kah ma key sede da ray adaw da *Jeruzelem kefe na, si ka daw ka key sede da ray adaw daa berney nga *Rawm may.»

Jëwif hay a cëmdamara dëy ata nga këfey Pawl vagay

¹² Pëpërek e, *Jëwif hay a kusam, a cëmdamara dëy ata pal. A mbadam, a lëvam a zëmam dëf ba, a sam yam ba, si ata ma këdmara Pawl vagay la dëgay. ¹³ Ndëhay a, ata a fëna ndëhay kwakwar mëfad. ¹⁴ Ta', a diyam fa *bay-ray hay nga ndëhay ma ka kwakwas nga Gazlavay, ta fa mahura hay nga Jëwif hay, a lëvmatar: «Ala ta mbadam sem, tasana, ya zëmam dëf ba, ya sam yam ba, si ala ma këdmara Pawl vagay la. ¹⁵ Wure kefe, akwar ta ndëhay mahura hay ma sla yawa nga Jëwif hay mekele, si ka slëram fa bay-ray nga sewje hay nga *Rawm nga handërwa Pawl fa akwar. Ka lëvmar ka wudam amba ka cacëfdamara saya, ka nëkmara mey anga maaya maaya. Ama, ala na, ya da lacam aa cëved, amba ya këdmara vagay daa masa anga ta wuswa fa akwar daa ba araj.»

¹⁶ Masa ata maa guzlam ngene na, bëzey nga damaman nga Pawl a ta cënda mey a sem. Ta', a daw a mbëzey aa way nga sewje hay heyey, a kadara mey a, a Pawl. ¹⁷ Pawl, ta', a zëlwa ndaw pal da wuzlah mahura hay da ray sewje hay a, a lëvar: «Handa gula kefe fa bay-ray akwar, a da kadar mey daha.» ¹⁸ Ndaw kaa ta', a handa gula kefe fa bay-ray ata heyey, a wusam, a lëvar: «Pawl, ndaw daa fërsëne heyey a zëlya, a lëvya ya handërwa gula kefe fa akah, mey anga daha nga kadakawa.» ¹⁹ *Bay-ray nga sewje hay kaa, a ngëla gula ha ta cakay. Ta', aa cëfda, a lëvar: «Ka lëvey na, kwara?» ²⁰ Gula kaa a mbëfdara, a lëvar: «Jëwif hay ta cëmdamara dëy ata cay pal, amba aa

cëfdamaka mandaw ka handa Pawl fa ndëhay mahura hay ma sla yawa nga Jëwif hay. A lëvam a wudam amba aa cëfdamara maaya maaya saya. ²¹ Ama ka da tëba mey ata ba, maja ndëhay a fëna kwakwar mëfad fa jëdmara daa cëved. Ata tabiya ta mbadam sem, a lëvam a zëmam daf ba, a sam yam ba, si ata ma këdmara Pawl la vagay d'agay. Ata ta mbadam sem, a kamara la. A sëkwam kaa na, mey masa kah ma da mbëddatara.» ²² Da ray ngene, bay-ray nga sewje hay heyey a lëvar a gula ha: «Mey masa kah ma kadiwa këde na, ka da wuzda kwa a ndaw ba.» Fa dëba ha, ta', a lëvar nga daw.

Bay-ray nga sewje hay a slërda Pawl fa Guverner Fëlekes

²³ Fa dëba ha, *bay-ray nga sewje hay heyey, ta', a zëlwa mahura nga sewje hay cew, a lëvtar: «Kusam sewje hay temere cew, ta sewje hay masa ma diyam ta pëles hay kwakwar maasala, lej sewje hay masa ta zëwet hay temere cew. Akwar cëpa diyam vaw, nga daw aa berney nga Sezere ta bërey zlam-letek nga tavad. ²⁴ Asaya, sëpam pëles hay ngada Pawl, amba a tëpey, ka handamara ta zazay fa Guverner Fëlekes.» ²⁵ Ta', a wuzleley leeter, a lëvey:

²⁶ «Ara yah Këlawt Liziyas ma wuzlalakawa leeter këde, ngada akah, bay adaw mahura, Guverner Fëlekes. Ya caka har.

²⁷ Ya wudëy yaa guzka da ray ndaw këde. *Jëwif hay ma kërzamara, a wudam nga këdmara vagay. Masa yah ma cënda la anga ndaw Rawma na, ta', ya daw ta sewje hay, ya lëhdërwa dasi har ata. ²⁸ Ya wudëy nga sëra a wudmara na, maja me. Anda këde, ta', ya handa fa ndëhay ata hay mahura ma sla yawa nga Jëwif hay. ²⁹ Ya nëka a wudmara na, da ray mey nga kwakwas ata gway. Aa ta key mebërey tëde kwa nga këda vagay, kwa nga ndëkwda aa fërsëne na, daa ba. ³⁰ Ama ya cënda na, Jëwif hay ta cëmdamara d'ay ata cay nga këdmara vagay. Ya slërdakawa fiyaw fiyaw këde na, maja. Ya lëvtar a ndëhay ma wudmara na, nga diyam nga wudmara fa akah.

Këde ara mey adaw ngada akah.»

³¹ Ta', sewje hay, a ngëlmërwa Pawl anda bay-ray ata ma lëvtar. A handamara dasi tavad a ngene aa berney nga Antipatëris. ³² Pëpërek e, sewje hay ma diyam ta salay, ta', a vëhmawa a way, a mbëkdamata sewje hay ta pëles hay nga handamara Pawl a. ³³ A wusam a Sezere heyey.

Ta', a vëldamara leeter e a Guverner Fëlekes, Pawl may, a mbëkdamërwa asi har anğa. ³⁴ Guverner kaa a janğa leeter e, ta', aa cëfda Pawl, a lëvar: «Kah na, daa hwayak wura?» Pawl a mbëddara, a lëvar: «Yah, ndaw Silisi.» ³⁵ Daa nğene, Fëlekes a lëvar: «Da ndëhay ma wudmaka ta samawa la na, yaa cëfda la da ray mey a.» Ta', a lëvtar a sewje hay nga jëdmara daa way meney mahura nga guverner masa Bay *Herawt ma lëma.

24

Jëwif hay a wudmara Pawl saya da Sezere

¹ Fa dëba ha ðar zlam, *Ananiyas, *ndaw mahura da ray ndëhay ma ka kwakwas nga Gazlavay, a wusey a Sezere. Mahura hay nga *Jëwif hay mekele mekele, lenj ndaw mezëley Tertulus ma sëra mewey nga Rawma hay a diyam bama ta ata Ananiyas a. A wusam fa mey nga Guverner Fëlekes a, amba a wudmara Pawl. ² Ta', a zëlmërwa Pawl. Masa Pawl ma wuswa a cakay ata la na, Tertulus a zlar nğaa guzlar da ray a, a guverner, a lëvey:

«Waa bay ala mahura Fëlekes, ala manjatakaya ta zazay fara fara maja kah. Ka ta ðiya hwayak alëkwa la amba cek tabiya da hwað a, a daw maaya maaya, maja kah ndaw ta lenğesl maaya. ³ Ndëhay tabiya daa hwayak alëkwa fa tëbmara cek masa kah ma ka tabiya, ala fa kamaka suse. ⁴ Ama ya wudëy ya gërdaka ta mey hay ga ba. Da ray nğene, ya kaka ambahw nga jëkey slëmay fa mey ala nekëfey, maja kah ndaw maaya ma sëra dey-ceceh fa ndaw.

⁵ Ya nëkmara ndaw kefe na, ndaw makëwkaya kalah, ara anğa ma handërwa meyey-mey a wuzlah ndëhay Jëwif hay da bëla tabiya. Anğa ndaw mahura nga ndëhay ma sëpam cëved membërzley masa ma zëlmata *Nezeret hay.

⁶ Asaya, anğa na, a wudëy nga zlëba *Way-mekey-kwakwas nga Gazlavay. Ara maja nğene, ala ma kërzamërwa. [Ya wudam amba ya kamar sariya anda *mewey nga Jëwif hay ma lëvey, ⁷ ama Liziyas, *bay-ray nga sewje hay ta', a sawa, a tëba da har ala ta gëdanj. ⁸ Ta', Liziyas a, a lëvtar a ndëhay ma wudmara ha, nga samawa fa mey akah kefe.] Da ka cacëfda Pawl a na, ka sëra la, ya wudmara na, da ray mey fara fara.» ⁹ Jëwif hay fetëde a lëvam: «Fara fara, mey masa Tertulus maa guzley kaa na, ara anğa.»

Pawl a kada mabara nga mey anğa fa mey nga Fëlekes

¹⁰ Guverner Fëlekes kaa heyey a lar har, a lëvar a Pawl nğaa guzley. Pawl, ta', a lëvey: «Ya sëra, mevey ga ara kah

ma ka sariya daa hwayak kedë. Anda kedë, mevel adaw faa sëmey ga, amba ya kada mabara nga mey adaw fa mey akah. ¹¹ Masa yah ma daw a *Jeruzelem nga ragadawa a Gazlavay na, a fëna ðar kuraw a ray a cew ba. Da kaa cëfða mey a na, ka hëtfar la kënë. ¹² Kwa ndaw ta hëtfaya masa ala fa kam yawa ta ndaw daa *Way-mekey-kwakwas nga Gazlavay na, daa ba. Asaya, ndaw ta hëtfaya masa ya fa hëldata ndëhay nga yey mey daa way hay mewuzey mey nga Gazlavay, kwa daa berney na, daa ba. ¹³ Ata ma wudmaya kaa na, ndaw da wuzlah ata ma gwa ma wuzdakawa mey a, ara mey fara fara daha daw? ¹⁴ Ama ya wuzdakawa, yah na, ya fa ragadar a Gazlavay masa papaj nga papa ala hay ma ragadamar. Ya ragadar na, ta mesëpey cëved nga Yesu. Ata na, a lëvam cëved e ara cëved ma mbërzley ndëhay. Ama ya fa tëba *kwakwas nga Mawiz tabiya, ta mey mawuzlalakaya daa ðerewel hay nga ndëhay ma tëla mey nga Gazlavay tabiya may. ¹⁵ Yah, ya pa lenjesl adaw si a ray Gazlavay, ya tëba mey ma lëvey a da slëkðadatërwa ndëhay maaya ta ndëhay maaya ba hay daa memëcey. Kwa ndëhay a ma wudmaya kedë na, fa pam lenjesl a ray mey a may. ¹⁶ Da ray ñgene, ya fa key slëra ta mevel pal amba mandaw mandaw mevel adaw a njeý maaya fa Gazlavay lenj fa mey nga ndëhay.

¹⁷ «Masa yah ma mbëkda berney nga Jeruzelem mevey ga la na, ta', ya vëhwa aa berney a, ya handatar dala nga jëney ndëhay masa-viya hay da wuzlah sëkway adaw hay *Jëwif hay ta nga key kwakwas a Gazlavay. ¹⁸ A hëtfamaya daa Way-mekey-kwakwas nga Gazlavay. Daa ñgene, ya fa ndëvda mekey kwakwas nga Gazlavay amba ya tërey ndaw mazlëbkaya saba. Ndëhay da cakay adaw ga daa ba, ya fa key baazlam daa ba. ¹⁹ Ama Jëwif hay daa hwayak nga Azi ata fetedë. Da ata ta mey da ray adaw daha na, anja ara ata ha ma da wudmaya fa mey akah jak. ²⁰ Da daa ba na, kaa cëfðata ndëhay fa mey akah kedë nga kadamakawa mebërey masa yah ma ka ta pas masa ata ma kërzamaya, ma handamaya fa mey nga ndëhay mahura hay ma sla yawa nga Jëwif hay taw. ²¹ Fara fara, fa mey nga ndëhay ma sla yawa na, ya ta lecey la, ya lëvey: "Ya fa sëkwa pas masa Gazlavay ma da slëkðadatërwa ndëhay daa memëcey." A wudmaya fa mey akwar kaa na, maja mey a kedë daw?»

²² Fëlekes na, a sëra mey da ray cëved nga Yesu maaya

maaya. A gëmey nga dësla sariya ha wure ngene ba, a lëvtar: «Ya da dësla sariya akwar na, si ta pas masa Liziyas, *bay-ray nga sewje hay heyey, ma sawa.» Ta', a lëvtar nga diyam a way. ²³ A lëvar a mahura nga sewje hay ma jëdmara Pawl nga jëdmara maaya maaya daa fërsëne, ama a da sërdamara banay ba, nga vëlmatar cëved a jam anja hay ma samawa nga jënmara.

Pawl fa mey nga Fëlekes

²⁴ Dar nekëdey fa dëba ha, Fëlekes, ta', a samawa ta ngwas anja Dërusil, dam *Jëwif. Ta', a slërey, a zëlmërwa Pawl, amba a cënda mey da ray metëbey-mey nga Yesu *Këriste. ²⁵ Pawl, ta', aa guzltar da ray menjey ma mbafar a Gazlavay, ta da ray menjey ta mewey vaw fa cek hay saw, lej da ray sariya masa Gazlavay ma da ka ta pas mendëvey nga bëla. Pawl fa wuzda mey a ngene na, Fëlekes a zlurey, ta', a lëvey: «Wure kedë, mey a mak d'agay. Mbëkdaya. Pas masa yah ma hëtey har la na, ya zëlka la saya.» ²⁶ Asaya a wulkey na, Pawl a vëlar dala la, da ray ngene, a zëla Pawl dey weewe nga key maday.

²⁷ Fa dëba ha mevey cew, guverner mekele a njey aa slam a nga Fëlekes, mezëley nga ndaw aha na, Parsiyus Festus. Fëlekes na, a gëmey nga pëskarawa Pawl daa fërsëne ba maja a wudëy Jëwif hay aa sëmam da ray a.

25

Pawl fa mey nga Guverner Festus

¹ Festus a wuswa aa hwayak nga *Jëwif hay nga key guverner fetedë. Fa dëba ha d'ar maakar, a slëkdëy daa berney nga Sezere, a daw a *Jeruzelem. ² Da Jeruzelem e, *bay-ray hay nga ndëhay ma ka kwakwas nga Gazlavay, ta mahura hay nga Jëwif hay a samawa fa vëda, a wudmara Pawl saya. A kamar ambahw a Festus, ³ aa cëfdamara nga vëltar cëved amba a handatara Pawl a Jeruzelem e. Aa cëfdamara na, maja ta cëmdamara d'ay ata cay, amba a këdmara Pawl vagay daa cëved. ⁴ Ama Festus a mbëddatara, a lëvtar: «Pawl aa daa fërsëne daa berney nga Sezere. Yah kwa ya vëhey la fetedë daa d'ar hay a kedë. ⁵ Maaya na, ya diyam bama ta mahura akwar hay a Sezere he. Da ndaw a ta key cek maaya ba la na, a wudmara fetedë.»

⁶ Festus a njawa ta ata da Jeruzelem e, a key d'ar daan'gafad, da daa ba kuraw gway. Ta', a vëhwa aa berney nga Sezere. Pepërek e, a njey aa slam mekey sariya, a lëvey

nga handamërwa Pawl. ⁷ Masa ata ma wusdamërwa Pawl la na, Jëwif hay ma samawa da Jeruzelem a zlërmay ray. A wudmara, a mbërzlafamar a ray, ta mey hay maadakw a maadakw a hay ga. Ama ata ta ray ata, a gwamara nga wuzdamara mey da ray mey hay a fara fara ba. ⁸ Pawl, ta', a kada mabara nga mey annga, a lëvey: «Ya ta key meberëy da ray kwakwas nga Jëwif hay daa ba, ya ta zlëba *Way-mekey-kwakwas nga Gazlavay daa ba. Kwa *Sezere, bay mahura nga *Rawm na, yah ta key meberëy fa vëda daa ba.»

⁹ Yaw, Festus a wudëy aa sëmdata Jëwif hay. Da ray ngene, aa cëfda Pawl, a lëvar: «Ka tëba nga daw a Jeruzelem daw? Fetede a da kamaka sariya fa mey adaw da ray mey masa ata ma wudmaka maja kedë.» ¹⁰ Pawl a mbëddara, a lëvar: «Wure kedë, yah malacakaya daa slam mekey sariya nga bay mahura nga Rawm. Da sariya a key ta cëved e na, anja maaya sariya adaw a, a key fedë. Ya ta key meberëy fa Jëwif hay daa ba. Kah ta ray kah, ka sëra maaya maaya. ¹¹ Da ya ta key meberëy la tëde nga këdëy vagay na, ngene, këdmaya, ya tëba nga mëcey. Ama ata ma wudmaya kedë na, ara membërzley. Da ray ngene, ndaw ma da gwa nga vëldaya asi har ata daa ba. Anda kedë, yah na, yaa cëfdey cëved nga hendey sariya adaw fa Sezere, bay mahura nga Rawm.» ¹² Festus a slam yawa ta ndëhay annga hay. Fa dëba ha, ta', a lëvar a Pawl: «Ka taa cëfdey cëved la nga daw fa mey nga Sezere, bay mahura nga Rawm. Anda kedë, ya vëlka cëved, ka daw fa annga.»

Pawl fa mey nga Bay Agëripa

¹³ Dar nekëdëy fa dëba ha, Bay Agëripa ta dam-mamaha Berenis, a diyam aa berney nga Sezere nga cey har a Festus. ¹⁴ A njam d'ar ga daa berney a. Da ray ngene, Festus ta', a kadara mey da ray Pawl heyey a Bay Agëripa ha, a lëvar: «Ndaw fedë daha, aa daa fërsëne dëga fa Bay Fëlekes. ¹⁵ Masa yah da *Jeruzelem na, *bay-ray hay nga ndëhay ma ka kwakwas nga Gazlavay ta mahura hay nga *Jëwif hay, a wudmara fa yah, aa cëfdamaya nga dësla sariya annga ha nga këda vagay. ¹⁶ Ama ya lëvtar, kwakwas nga Rawma hay a lëvey na, ndëhay Rawma hay a vëldamara ndaw masa ndëhay ma wudmara nga këdëy vagay saw saw ba. Si ndaw masa ata ma wudmara a sawa fa mey nga ndëhay ma wudmara ha, a cënda mey ata la d'agay. Fa dëba ha, ndaw masa ata ma wudmara ha a kada mabara nga mey annga. ¹⁷ Ta', ya samawa fedë ta Jëwif hay aha. Ya ta njey ga daa

ba, pepërek e gway na, ta', ya daw aa slam nga sariya, ya lëvtar nga handamërwa ndaw aha. ¹⁸ Ndëhay ma wudmara ha, ta', a samawa. Ya wulkey na, a wudmara da ray anğa ma key cek malamba hay. Ama, anja këne ba. ¹⁹ Si ata ma kam yawa da ray kwakwas ata, ta da ray ndaw daha mezaley Yesu. Ndaw aha ta mëcey sem, ama Pawl a lëvtar ta slëkdawa sem daa memëcey, anğa ta dey. ²⁰ Ya sëra nga dësla mey a ba. Da ray ngene, ta', yaa cëfda Pawl, ya lëvar: "Ka tëba ma daw a Jeruzelem amba a dëslmakawa sariya akah fetede daw?" ²¹ Ama Pawl a lëvya, a wudëy a njeý daa fërsëne, a sëkwa sariya anğa fa Bay Mahura *Sezere gway. Anda kedë, ya lëvtar nga jëdmara dëgay, wara ya slërda fa Sezere he.» ²² Bay Agëripa a lëvar a Festus: «Yah may, ya wudëy ya cënda mey nga ndaw aha.» Festus a mbëdëdara, a lëvar: «Mandaw na, ka cënda mey anğa ha la.»

²³ Taa përek, Bay Agëripa ta Berenis a diyam ta ndëhay anğa hay, fa hëslmatar ray. A mbëzam aa slam mekey sariya ta bay-ray hay nga sewje hay, leñ mahura hay daa berney a. Festus a lëvtar nga ngëlmërwa Pawl. Ta', a handamërwa Pawl a. ²⁴ Festus a lëvey: «Waa, Bay mahura Agëripa, ta ndëhay tabiya masa fedë, akwar fa hëtmar ndaw kedë, masa Jëwif hay tabiya ma wudmara fa yah. A wudmara da Jeruzelem, ta', a samawa a wudmara fedë may. Ata tabiya a lëvmaya ta gëdan, ya da mbëkda ba, si ya këda vagay. ²⁵ Ama nga yah na, yah ta hëtey meberëy fa vëda masa tëde nga këda vagay na, daa ba. Yaw, maja anğa ta ray anğa, taa cëfdey cëved la amba bay mahura nga *Rawm a dëslra sariya ha na, ya wulkey maaya ya slërdara fetede. ²⁶ Ama ya sëra mey masa yah ma da wuzlalar a bay mahura nga Rawm aha da ray sariya ha ba. Ara maja ngene, yah ma handërwa fa mey akwar, teesed na, fa mey akah dëgay, Bay Agëripa. Cacëfda, amba ya sëra cek masa yah ma da wuzleley da ray a, a bay mahura nga Rawm. ²⁷ Daa mewulkey adaw, da ya slërda ndaw fa bay mahura nga Rawm nga dëslra sariya da ray a, ama ya ta wuzdara mey masa ata ma wudmara maja daa ba na, ngene, a cëney ba.»

26

Pawl a kadara mabara nga mey anğa a Agëripa

¹ Bay Agëripa a lëvar a Pawl: «Ya vëlka cëved nga kada mabara nga mey akah.» Pawl, ta', a banğadë har anğa, a zlar nga kada mabara nga mey anğa, a lëvey: ² «Waa

Bay Agëripa, tasana yah faa sëmey ga, nga kada mabara nga mey adaw fa mey akah, da ray mey masa *Jëwif hay ma wudmaya tabiya, ³ maja kah na, ka sëra mey da ray kwakwas nga Jëwif hay maaya maaya. Asaya, ka sëra mey hay masa Jëwif hay ma kam yawa da ray a. Da ray ñgene, jëkfaya slëmay ta dëk-vaw cey.

⁴ «Yaw, Jëwif hay tabiya a sërmara menjey adaw dëga daa zariya adaw haa wure kedë. A sërmara, menjey adaw da wuzlah ndëhay adaw hay, ta da *Jeruzelem. ⁵ Jëwif hay a kedë, a sërmaya dëga zleezle. Da a wudam na, a gwamara ma kam sede da ray adaw. A sërmara daa menjey adaw na, ya ta sëpa *kwakwas nga Mawiz la ta gëdanj adaw ndav maja yah ndaw Fariza. *Fariza hay na, ara ndëhay Jëwif hay ma sëpam kwakwas nga Mawiz ta gëdanj ata cëpa, ma fëna ndëhay mekele hay. ⁶ Wure kedë, fa kamaya sariya na, maja yah ma pa lenjesl adaw a ray cek masa Gazlavay ma lëvtar a papañ nga papa ala hay zleezle a katara la heyey. ⁷ Cek masa Gazlavay ma lëvtar a da katara ha na, sëkway ala hay kuraw a ray a cew tabiya fa pam lenjesl a ray a, a wudam nga hëtmär. Da ray ñgene, taa vad, taa pas, ata fa ragadamar a Bay Gazlavay. Waa Bay Agëripa, Jëwif hay a, a wudmaya na, maja. ⁸ Akwar Jëwif hay, Gazlavay a slëkfadatërwa ndëhay daa memëcey la, kaa ka tëbmara mey a ba na, maja me?

⁹ «Zleezle yah ta ray adaw, ya ta wulkey la, maaya na, si ya sëpey wewer mekele mekele amba ya nësa mezëley nga Yesu, ndaw *Nezeret. ¹⁰ Kedë ara cek masa yah ma ka da Jeruzelem. *Bay-ray hay nga ndëhay ma ka kwakwas nga Gazlavay ta vëlmaya cëved la nga kërzey ndëhay ga ma tëba mey nga Yesu, ta', ya ndëkwdata aa fërsëne. Masa ata fa kamatar sariya nga këdmata vagay na, ya lövey maaya. ¹¹ Ya daw ya sërdata banay dey weewe daa way hay mewuzey mey nga Gazlavay tabiya. Ya tëktar dëy nga rësmara Yesu. Mevel ta caya la a ray ata kwa ara mey ba. Da ray ñgene, ya ta daw la ya sëptërwa kwa daa hwayak nga ndëhay Jëwif hay ba hay, ya sërdatërwa banay.»

Pawl a kada pas masa anga ma tëba Yesu

(SNM 9.1-19; 22.6-16)

¹² «Ara maja ñgene, yah ma daw aa berney nga Damas. Ara *bay-ray hay nga ndëhay ma ka kwakwas nga Gazlavay ma slërdamaya. Ya daw na, ta leeter da har masa ata ma wuzlalamara nga vëlya cëved nga kërzawa ndëhay.

¹³ Yaw, Bay Agëripa, ta wuzlah-pas ya fa daw daa cëved,

ya hëtar slam ma wadawa a ray adaw. A wadawa da gazlavay da vad, ama a fëna mewedey nga pas. A wedey da ray adaw, ta ndëhay dasi adaw. ¹⁴ Ala tabiya ya tëdam a hwayak. Yah na, ta', ya cëney dëy nga ndaw maa guzlya ta mey *Hebëre, a lëvya: “*Sawl, Sawl, ka sërdaya banay anda kedë na, maja me? Kah fa nësa ray akah anda sla ma mbëzley zlanday nga mecëkwer anga.” ¹⁵ Ta', yaa cëfda, ya lëvar: “Bay Mahura, kah na wa?” Bay Mahura a mbëdëdiwa, a lëvya: “Ara yah, Yesu ndaw masa kah ma sërda banay. ¹⁶ Ama slëkdey, lecey ta lecey. Ya wuzka vaw kedë na, maja ya ta walaka sem amba ka tërey ndaw ma ka slëra adaw. Ka da key sede da ray adaw, ka lëvtar a ndëhay mey da ray kah ma hëtya tasana kedë. Asaya, ka da kadatara cek masa yah ma da wuzdakawa. ¹⁷ Ya slërdaka fa *Jëwif hay, lenj fa ndëhay daa sëkway hay mekele. Kwa da a kamaka cek maaya ba na, ya lëhdaka la dasi har ata. ¹⁸ Ya slërdaka fa ata na, amba ka wurtara lenjesl ata, amba ka badatërwa daa lëvanj ngadaa slam-mewedey. Ya slërdaka fa ata, amba ka badatërwa dasi har nga *Satanj bay-malula, a mbëdëmawa dey ngada fa Gazlavay. Da ata ma pamaya la nga ndaw ata fara fara na, ya mbëkdatara mebërey ata la, asaya a hëtam slam-menjey la da wuzlah ndëhay nga Gazlavay.”»

Pawl aa guzley da ray slëra anja

¹⁹ Pawl a lëvey saya: «Waa Bay Agëripa, dëga mezley ta pas masa Bay Mahura ma wuzya vaw da vad ngenë na, ya fa pey lenjesl a ray a, ya fa ka cek aha anda aa ma wuzdiwa. ²⁰ Anda kedë, ya zlar nga wuzey mey ngeeme na, a ndëhay daa berney nga Damas, fa dëba ha, ya wuzdatara mey a, a ndëhay da *Jeruzelem, a ndëhay da *Jude tabiya, lenj a ndëhay *Jëwif hay ba hay daa hwayak mekele mekele may. Ya lëvtar: “Si ka mbëdëdamara menjey akwar, mbëdam dey fa Gazlavay, sëpmara ta mevel pal. Kam slëra maaya fa mey nga Gazlavay nga wuzdërwa na, akwar ta mbëdëdamara menjey akwar sem.” ²¹ Ara maja ngenë, Jëwif hay ma kërzamiwa daa *Way-mekey-kwakwas nga Gazlavay, a wudam nga këdëmaya vagay. ²² Ama haa kasl tasana kedë, Gazlavay fa jënya. Maja ngenë, wure kedë yah malacakaya fa mey akwar, ya fa wuzda mey nga Gazlavay fa mey nga ndëhay tabiya, kwa a mahura hay, kwa a ndëhay wura wura cëpa. Ya wuzey na, si mey nga *Mawiz ta mey nga ndëhay ma tëla mey nga Gazlavay maa guzlam da ray cek ma da key. A lëvam ²³ *Këriste a sërey banay la. Anja, ara ndaw ngeeme da wuzlah ndëhay mamëctakaya ma da

slëkdamawa daa memëcey. Maja maslëkdawa anja daa memëcey a na, a wuzdatara mewedey nga Gazlavay a Jëwif hay ta a ndëhay daa sëkway hay mekele tabiya.»

Pawl a lëvar a Bay Agëripa nga tëba mey nga Yesu

²⁴ Masa Pawl fa kada mabara nga mey anja anda kefe na, ta', Festus a kar mey ta gëdan, a lëvar: «Pawl, ray akah ta mbëdey sem, mesërey cek akah kalah ngene, ta nëskawa lenjesl sem.» ²⁵ Pawl a mbëddara, a lëvar: «Waa bay mahura, lenjesl adaw, ta nësey daa ba. Mey masa yah ma kada kefe na, ara mey saw ba, ama ara mey fara fara.» ²⁶ Bay Agëripa na, a sëra mey a kefe. Ya gwa ngaa guzlar ta mandërzay daa dey ba, maja ya wulkey a sëra mey da ray cek hay a tabiya, maja cek hay a mabadakaya daa ba, fa key fa dey nga ndëhay tabiya. ²⁷ Waa Bay Agëripa, ka tëba mey nga ndëhay ma tëla mey nga Gazlavay, ba diya? Yah na, ya sëra, ka fa tëba mey ata.» ²⁸ Ta', Agëripa a mbëddara, a lëvar: «Ka wulkey ka gwa nga tërdaya ndaw nga Yesu wure wure kefe la gway daw?» ²⁹ Pawl a mbëddara, a lëvar: «Yah fa dërey dangay a Gazlavay, amba kwa wure kefe, kwa ngada fa mey, kah ta ndëhay ma cëndamara mey adaw tasana kefe tabiya, ka tëram anda yah, ama a da jëwmakwar ta calalaw kefe ba may tarah.»

³⁰ Fa dëba ha, Bay Agëripa, ta Guverner Festus, ta Berenis heyey lej ndëhay tabiya da cakay ata, a slëkdam, a diyam. ³¹ Masa ata ma ngëcham la nekëdey na, aa guzlam da wuzlah ata, a lëvam: «Ndaw kefe ta key mebërey tëde nga këdey vagay ta nga ndëkwey anja aa fërsëne na, daa ba.» ³² Fa dëba ha, Agëripa a lëvar a Festus: «Ya gwakwa ya mbëkdakwa ndaw kefe, ama a key saba maja anja taa cëfdey cëved sem nga daw fa *Sezere, bay mahura da *Rawm.»

27

A slërdamara Pawl aa berney nga Rawm

¹ Masa ta slam yawa cay amba ya diyam * aa hwayak nga Itali ta kwambiwal na, ta', a vëldamata ata Pawl, ta dangay hay siya a har ndaw mezëley Juliyus, mahura nga sewje hay. Anja mahura da wuzlah sewje hay nga Rawm, masa ata ma zëlmata «Sewje hay nga Bay Agustus.»

² Ta', ya ndëkwam aa kwambiwal ma sawa daa berney

26:23 26.23 3.15; Iz 49.6; Lk 24.46-47; 1Kwr 15.20 **26:26** 26.26 Jan 18.20

26:28 26.28 11.26 **26:31** 26.31 23.29 **26:32** 26.32 25.11-12 * **27:1** 27.1

ya diyam: Luk, ndaw ma wuzlala mey hay kefe, a lëvey "ya diyam" na, maja ta cëmam la ta ata Pawl saya, a diyam bama haa a Rawm. **27:1** 27.1 25.12

nga Adëramit. Kwambiwal a, a daw ngadaa slam-mepey-salay mekele mekele ta dey bëlay nga hwayak nga Azi. Ta', ya diyam. Ala bama ta ata ndaw daha mezëley Aristarke, ndaw Masadëwan daa berney nga Tesalawnik. ³ Pepërek e, ya wusam aa berney nga Sidanjw. Juliyus, a sërfar dey-ceceh a Pawl, ta', a vëlar cëved nga pey salay nga daw aa berney a nga nëktërwa jam anga hay, amba a jënmara.

⁴ Fa dëba ha, ya tëpam aa kwambiwal saya. Ya gwamara nga diyam dër e ba, maja memed fa kawa a ray ala. Ta', ya diyam ta cakay hwayak da wuzlah bëlay mezëley Sipëre masa memed fa key ga daa ba. ⁵ Ya tëngam a dey bëlay gweegwe ta hwayak nga Silisi leñ hwayak nga Pamfili, ta', ya wusam a Mira daa hwayak nga Lisi. ⁶ Fetede, mahura nga sewje hay heyey a sëpey kwambiwal mekele. A hëtnar kwambiwal ma sawa daa berney nga Alekzandëri ma daw ngadaa hwayak nga Itali. Ta', a tëpdandar aa kwambiwal a.

⁷ Dar ga, ala fa diyam nekëdey, nekëdey. Ya wusam gweegwe ta berney nga Kënit na, banay daha ga nga daw maja memed faa bërey. Memed e a tëkndar nga daw fa mey, ta', ya slapalam ta fa slam da wuzlah bëlay mezëley Salmawne, nga wusey a dey langar nga hwayak da wuzlah bëlay mezëley Këret, dey masa memed daa ba. ⁸ Ya diyam ta banay taa kwakway nga hwayak a, ya wusam aa slam da Këret mezëley Slam-mepey-salay Maaya, masa gweegwe ta berney nga Laze.

⁹ Daa madaw ala ha na, ya ta kam dër ga sem. Ndëhay ta kamara *daliyam nga mbëkey mebërey sem. Anda melövey, piya † gweegwe a wuswa, madaw ta kwambiwal a key saba maja bërgadan fa key. Maja ngene, Pawl a lövey:

¹⁰ «Waa jam adaw hay, ya sëra madaw alëkwa kefe a kandakwar banay ga la. Kwambiwal ta cek hay da hwad a, a da ndëkwam asi yam, a daa zëdam. Ma daa zëdam na, cek hay a daada ba, ama kwa alëkwa ray alëkwa may.»

¹¹ Mahura nga sewje hay heyey a cënda mey nga Pawl ba, ama a cëney na, mey nga ndaw ma hwada kwambiwal ta bay nga kwambiwal a gway. ¹² Slam-mepey-salay fetede na, anga maaya nga lecey kwambiwal a hwad a ta piya ba. Daa ngene har-gëdan nga ndëhay a, a wudam nga diyam. Da a gwamara ma wusam na, a wudam a diyam aa slam-mepey-salay daa berney nga Fenikis, amba a njam fetede ta

27:2 27.2 19.29 **27:3** 27.3 24.23; 28.2 † **27:9** 27.9 piya: Daa hwayak hay a fetede, piya a key ta kiya masa kalan daa hwayak nga ndëhay Mafaw hay. Anda melövey, piya fetede a key ta kiya mesëfed haa kasl kiya ma daw a ley. Anda kefe, maja ta piya ha na, madaw taa bëlay ta kiya ha maaya ba, maja bërgadan fa key kalah. **27:9** 27.9-10 2Kwr 11.26

piya ha. Berney nga Fenikis na, aa daa hwayak nga Këret da wuzlah bëlay heyey. Slam-mepey-salay da Fenikis ha na, aa ta har-gula nga ndaw ma nëkey dey ngada mey-angwa lenj ta har-zëmay nga ndaw ma nëkey dey ngada wurza.

Bërgadanj a key da ray bëlay

¹³ Fa dëba ha, memed ta dey nga Mëzam a kawa nekëdey. A wulkam a hëtam cëved la nga wusey a Fenikis anda ata ma wudam. Da ray ngene, a dëdamërwa bërey mandandal a ma lacada kwambiwal, a pamara a hwad a. Ta', a diyam ta mey kwakway nga hwayak nga Këret. ¹⁴ Ama fa dëba ha nekëdey bërgadanj ta', a kawa. Bërgadanj a na, a zëlmara Erakilanjw †, a sawa taa angwa nga Këret. ¹⁵ A fëna kwambiwal ta gëdanj. Ya gwamara nga handamara kwambiwal a dër e saba. Mbak! ya mbëkdamara, memed e nga handa. ¹⁶ Fa dëba ha, ya diyam ta dëba hwayak mekele mecëhe da wuzlah bëlay mezëley Kwada. Hwayak a, a tëka memed nekëdey ma da sawa ngada ray ala. Fetede, ya banjadamërwa kwambiwal mecëhe § ngadaa kwambiwal mahura maja kwambiwal mecëhe a daa zëdey, ama aa ta banay ga maja memed e kalah. ¹⁷ Masa ndëhay ma hwada kwambiwal a ma pamara kwambiwal mecëhe heyey la aa kwambiwal mahura na, ta', a tëkëlam laza fa kwambiwal mahura heyey. Asaya, ta', a këzlam cek aa bëlay nga tëka kwambiwal nga daw a rav-zazay nga hwayak nga Libi maja a zluram da a wusam haa a rav-zazay a na, a da slënam aa mawurbay. Fa dëba ha, mbak! a mbëkdamara kwambiwal a amba memed a handa aa wuzlah bëlay. ¹⁸ Memed e, fa key, fa key ta gëdanj cënga. Anda kedë, pepërek e, a këzlamata cek hay nga filaw masa daa kwambiwal a aa bëlay. ¹⁹ Pepërek e mekele, memed e fa key cënga. Cek hay masa maadakw a maadakw a fa kwambiwal a na, ndëhay ma hwada a cëkwmata, a hazakadamata aa bëlay ta har ata. ²⁰ Dar ga, ya hëtmär pas ba, ya hëtmatar wurzla hay ba, maja bërgadanj a. Fa key ta gëdanj, ta gëdanj haa ya wulkam ya lëham la na, daa ba.

²¹ Menjey ga, ndëhay daa kwambiwal a ta zëmam cek daa ba. Pawl ta', a lecey fa mey ata tabiya, a lëvtar: «Haya, jam adaw hay, anja da akwar ma tëbmara mey adaw la na, ya ta slëkëdakurwa daa hwayak nga Këret daa ba. Da alëkwa ma slëkëdakurwa da Këret e daa ba na, anja cek alëkwa hay kedë fa da nësam daa ba, fa daa zëdam daa ba. ²² Ama wure

† 27:14 27.14 Erakilanjw: Ara memed ma kawa taa walanj nga dey angwa lenj nga dey nga Pëлта. Ara bërgadanj mahura, a nësey cek hay ga. § 27:16 27.16 kwambiwal mecëhe: Ara kwambiwal nga lëhdata ndëhay da masa kwambiwal mahura ta nësey sem da wuzlah bëlay. 27:18 27.18 Jaw 1.5

kede, ya fa lëvkwar, kërzamara mevel, kwa ndaw pal dasi alëkwa fa daa zëfey daa ba, si kwambiwal ma daa zëfey gway. ²³ Dasi tavad kede, Gazlavay, ndaw masa ma walaya, masa yah ma ragadar, ta slërwa maslanj anga la da vad fa yah. ²⁴ A lëvya: "Pawl, ka da zlurey ba, fara fara si ka wusey, ka lecey fa mey nga Bay *Sezere da *Rawm nga kaka sariya. Gazlavay a lëhdata ndëhay tabiya daa kwambiwal kede la, aa zëdam daa ba maja maaya anga aa da ray akah." ²⁵ Da ray ngene, jam adaw hay, kërzamara mevel, ka da zluram ba, maja ya sëra Gazlavay a ka la fara fara anda anga ma lëvya. ²⁶ Ama si kwambiwal a lecey a ray hwiyak da wuzlah bëlay la dëgay.»

²⁷ Dar kuraw a ray a mëfad, memed e fa dëkdandar daa bëlay nga Mediterene cënga. Ta wuzlah-tavad, ndëhay ma hwada kwambiwal a wulkam na, ala gweegwe ya wusam a ray-dëgar. ²⁸ Ata a padamërwa salay ta bërey majëwkaya fa kwambiwal a, amba a wamara yam a. A hëtfamar yam a selesen, a key meeter kwakwar maakar a ray a maasala. A diyam fa mey nekëfey, a wamara yam saya, a hëtfamar yam a selesen, a key meeter kwakwar cew a ray a daanëgafad. ²⁹ A zluram maja memed a da handa kwambiwal fa anëgwa. Da ray ngene, a padamatërwa salay ta bërey hay mëfad mandandal a mandandal a ma lacada kwambiwal fa dëba nga kwambiwal a. A sëkwam slam nga wurey, ama slam a wurfatar gweegwe ba. ³⁰ Ndëhay ma hwada kwambiwal a, a wudam ma bamawa da hwad a amba a lëham. Ta', a padamërwa salay ta kwambiwal mecëhe heyey aa yam. A kam anda a da padamatërwa salay ta bërey mandandal a mandandal a ma lacada kwambiwal fa mey nga kwambiwal mahura. ³¹ Ama Pawl a lëvtar a sewje hay, ta ngada mahura ata: «Da ndëhay ma hwada kwambiwal a, a njam a hwad a ba na, akwar fa da gwamara nga lëhey daa bëlay a daa ba.» ³² Sewje hay heyey ta', a dëslmara laza ma kërza kwambiwal mecëhe, a mbëkdamara aa yam, a daw.

³³ Gweegwe slam a wurey na, ta', Pawl a zëлта ndëhay tabiya nga zëmey daf, a lëvtar: «Akwar ta bësmara banay la dëdar kuraw a ray a mëfad, akwar ta zëmam kwa meeme daa ba. ³⁴ Maaya na, ya zëmkwa daf nga hëtey gëdanj nga lëhey. Kwa enëgwec pal fa ray nga ndaw da wuzlah akwar fa daa zëfey daa ba.» ³⁵ Masa anga ma lëvey la anda kede na, lenj! a ley penj, a kar suse a Gazlavay fa mey ata tabiya, ta', a hëbey, a zëmey. ³⁶ Da ray ngene, ata

tabiya a kërzamara mevel. Fa dëba ha, a zëmam pey e may. ³⁷ Ala daa kwambiwal a tabiya a key temere cew ta kwakwar maasala a ray a maakwaw. ³⁸ Masa ata ma rëham la na, ta', a këzlamara cek anda daw daa kwambiwal a aa yam, maja a wudam kwambiwal a, a key dadakw ba.

Vangwala nga yam a hëba kwambiwal

³⁹ Fa dëba ha slam ma wurey la na, ndëhay ma hwada kwambiwal a hëtmar hwiyak, ama a sërmara slam aha ba. Daa slam aha, a hëtmar slam masa maaya nga lecey kwambiwal da ray-dëgar, mawurbay da hwad a. Da a gwamara na, anja a wudam nga handamara kwambiwal fetede, a wudam a mbëkdamara fetede. ⁴⁰ Da ray ngene, ta', a dëslmara laza nga bërey mëfad mandandal a mandandal a heyey, a mbëkdamata aa yam. Ta', a pëskamata laza hay masa ma jëwa hwadam ma hwada kwambiwal. Ta', a bangadamarara zana fa mey nga kwambiwal amba memed a handa a rav-zazay. ⁴¹ Ama kwambiwal kaa a daw, a hëtfey slam, yam da hwad a ga daa ba, dey! a lecey aa mawurbay daa yam a, mey a, caca'! aa mawurbay a, kwa a wusey ba sëlak. Vangwala nga yam a sawa a hëba hwadam fa dëba.

⁴² Maja ngene, sewje hay a wudam a këdmata ndëhay dangay hay vagay maja a zluram ndëhay a, a daa ndavam, a da lëham. ⁴³ Ama mahura nga sewje hay a wudfey ma lëhda Pawl, ta', a tëkta siya hay nga këdmata ndëhay dangay hay a. A lëvtar a ndëhay ma sërmara mendendevey nga jëvam teesed aa yam a, amba a wusam kasl a rav-zazay. ⁴⁴ Siya hay, a lëhmawa na, a kërzam har ta hwadam hay nga kwambiwal mahëbkaya. Anda këde, ala tabiya ma lëhmawa sem a palah, kwa cek ma kandar daa ba sëlak.

28

Pawl anga daa hwayak da wuzlah bëlay mezëley Malta

¹ Fa dëba ha, masa ala ma lëham la aa hwayak da wuzlah bëlay a na, ya cëndamara a lëvam hwayak a mezëley Malta. ² Ndëhay fetede ta tëbmandar la maaya maaya ta meesëmey. Var fa pey, memed daha. Maja ngene, ndëhay a, a gëdmandar awaw mahura, a ngëlmandar a cakay awaw a. ³ Pawl ta', a hëlwa sasam, a pa fa awaw a, anja kucesl daa sasam a daha. Awaw a car a zezekw e, a bawa, a za Pawl fa har, aa slëpet e fa har a. ⁴ Ndëhay daa hwayak a, a hëtmar zezekw kaa maslëptakaya fa har anga, a lëvam da wuzlah ata: «Fara fara ndaw këde, ara ndaw ma këda ray nga ndaw. Kwa ta lëhwa sem daa bëlay na, kuley alëkwa

masa ma mbëd̄tar ray a ndëhay na, ta hufar sem a ray, ta vëlar cëved̄ nga njey ta dey daa ba.» ⁵ Ama Pawl, ta', a kuca har, a këzla zezekw e aa awaw. Kwa ta cënda mecey nga zezekw e daa ba sëlak. ⁶ Ndëhay fa nëkmara, a wulkam, a lëvam: «Har an̄ga a da hësley, da daa ba, an̄ga ray an̄ga a da mëcey wure ngene.» Ama a njam ga, a nëkmara kwa cek ta kar a Pawl daa ba. Da ray ngene, a hëtam mewulkey mekele saya, aa guzlam da ray a, a lëvam: «An̄ga na, ara kuley ma tërey nga ndaw.»

⁷ Bay nga hwayak a, mezëley Pubëliyus. Way an̄ga ta ley an̄ga hay aa gweegwe ta slam masa ala ma pam salay. An̄ga ta tëb̄ndar la a way an̄ga ta meesëmey. Ya njam da way an̄ga ha d̄ar maakar. ⁸ Papan̄ nga Pubëliyus a, aa manakaya, aa gwa ba, awaw fa vaw, fa kuhwey zay mambaz mambaz. Pawl ta', a daw fa vëd̄fa, a dërey dangay a Gazlavay, a par har a ray, ta', a mbëlda. ⁹ Fa dëba ha, masa-macay hay mekele mekele tabiya daa hwayak a, a samawa fa Pawl, ta', Pawl a mbëldata. ¹⁰⁻¹¹ Ndëhay daa hwayak nga Malta ha, a vëlm̄andar cek hay mekele mekele nga hësl̄mandar ray. Ya kam kiya maakar daa hwayak a. Masa ala fa da mbëzam aa kwambiwal amba ya diyam na, ta', a vëlm̄andar cek hay tabiya nga jënndar daa madaw ala ngada *Rawm saya.

Pawl a wusey a Rawm

Ya diyam ta kwambiwal ma sawa daa berney nga Alekzandëri. Kwambiwal a ta njey la ta piya daa hwayak nga Malta ha. A zëlm̄ara kwambiwal a «Kuley Mawusa hay *.» ¹² Ya tëngam ta kwambiwal a, ya wusam aa berney nga Sirakuz, ya njam feted̄e d̄ar maakar. ¹³ Ta', ya slëkd̄am da Sirakuz a ta kwambiwal a, ya diyam ta mey-bëlay, ya wusam aa berney nga Reziyaw. Pepërek e, memed̄ ta dey nga Mëzam a zlar nga kawa, ta', ya diyam. Fa dëba ha d̄ar cew ya wusam aa berney nga Puzawl, ya pam salay. ¹⁴ Daa berney a, ya hëtfam mëlman̄ hay daa *mecëmey-ray nga Yesu. A zëlm̄andar amba ya njam ta ata luma pal. Ara anda ked̄e, ala ma diyam ngada *Rawm. ¹⁵ Yaw, mëlman̄ hay daa mecëmey-ray nga Yesu daa berney nga Rawm a cëndamara mey da ray ala. Masa ata ma cëndamara na, ta', a samawa a cadamandar ray daa cëved̄ ma daw a Rawm a. Siya hay a samawa a cadamandar ray daa luma nga Apiyus. Mekele hay a samawa a cadamandar ray da slala mezëley

28:5 28.5 Mk 16.18; Lk 10.19 **28:6** 28.6 14.11 * **28:10-11** 28.11 Kuley Mawusa hay: Ara kuley hay masa ndëhay Gërek ma hwada kwambiwal ma ragadamar. Kwa cek maacadakaya anda kuley hay a na, fa mey nga kwambiwal a daha.

Way-Maakar-Mezëmey-Cek. Masa Pawl ma hëtatari na, a kar suse a Gazlavay, mevel anja a dëkey, a hëtey gëdanj. ¹⁶ Masa ala ma wusam a Rawm la na, sewje mahura fetede a vëlar cëved a Pawl nga njeý daa way daha taava anja, ama sewje pal fa jëda daa way a.

Pawl fa mey nga Jëwif hay da Rawm

¹⁷ Fa dëba ha dar maakar, Pawl a zëltërwa mahura hay nga *Jëwif hay da *Rawm a way anja. A kusta, a lëvtar: «Mëlma adaw hay, ya sëra ya ta key cek maaya ba ngada ndëhay alëkwa hay na, daa ba, kwa ya ta nësa kwakwas nga papanj nga papa alëkwa hay na, daa ba may, ama ta kërzamiwa la da *Jeruzelem, a vëldamaya a har Rawm hay. ¹⁸ Ata ta cacëfdamaya la da ray cek masa yah ma ka. Fa dëba ha, ta wudam la nga mbëkdamaya maja ta hëtam mebërey masa tëde nga këdya vagay na, daa ba.

¹⁹ Ama Jëwif hay ta tëbmara nga mbëkdamaya daa ba, da ray ngene, dabaray adaw mekele daa ba, si ya lëvtar nga handamërwa sariya adaw fa bay mahura nga Rawm. Ama ya ta sawa nga wudey sëkway adaw hay na, daa ba.

²⁰ Ehe, yah ma zëlkurwa na, maja kedë, amba ya hëtkwar, yaa guzlkwar. A jëwmaya ta calalaw kedë na, maja yah ma pa lëngesl adaw a ray ndaw masa alëkwa Jëwif hay ma sëkwakwa.»

²¹ Jëwif hay a mbëddamara, a lëvmar: «Ala ta hëtam leeter fa Jëwif hay masa daa hwayak nga *Jude da ray akah daa ba. Asaya, kwa ndaw pal da wuzlah mëlma ala hay ma samawa daa hwayak a ta handandar mey maaya ba da ray akah daa ba may. ²² Ama ya wudam ya cëndamara mey da hwad akah, maja ya sërmara ndëhay daa hwayak hay mekele mekele fa rësmata ndëhay ma tëba mey anda akah.»

²³ Ta', mahura hay nga Jëwif hay a, a pam dar masa ata ma da kusam ta Pawl saya.

Pawl a wuzey mey nga Gazlavay da Rawm

Masa dar a ma wuswa la na, ndëhay ga a kusam a way Pawl. Dëga ngaa përek haa pas ngaa kwad Pawl fa wuztar mey nga Gazlavay. A kadatara Bay Gazlavay a wey da ray ndëhay na, kwara. A jëngëy dërewel da ray kwakwas nga Mawiz ta dërewel hay nga ndëhay ma tëla mey nga Gazlavay, amba ndëhay a, a mbëddamara lëngesl ata hay, a tëbmara Yesu na, ara *ndaw masa Gazlavay ma wala nga lëhdata ndëhay. ²⁴ Siya hay a tëbmara mey nga Pawl, ama siya hay a gëmam nga tëbmara ba. ²⁵ Daa ngene, a kam

yawa da wuzlah ata maja mewulkey ata wal wal. Masa ata fa da diyam na, Pawl ta', aa guzltar mey pal saya, a lëvtar: «Mey masa *Mesëfney nga Gazlavay maa guzley a papan nga papakw akwar hay ta mey *Izay, *ndaw ma tëla mey nga Gazlavay zleezle heyey na, ara mey fara fara.

²⁶ Mesëfney a, a lëvar:

“Daw, lëvtar a ndëhay a:

Akwar fa jëkam slëmay maaya maaya,
ama ka cëndamara ba.

Akwar fa nëkam dey maaya maaya,
ama ka hëtmar dey ba.

²⁷ Maja ndëhay a, a gëmam nga cënam mey ba,
a dëzlmata slëmay ata hay,
a dëpmata dey ata hay.

A kamara këne amba a hëtmar dey ba,
a jëkam slëmay ba,
a tëbmara mey a, aa mevel ata ba.

Da ray ngene, fa da mbëddamara menjey ata
amba ya mbëldata na, daa ba.”»

²⁸ Pawl a lëvtar saya: «Anda këde, sërmara, Gazlavay a slërdërwa mey da ray melëhey daa mebërey na, a ndëhay masa *Jëwif hay ba hay. Ata na, a cëndamara mey a la!»
[²⁹ Fa dëba nga mey a këde, Jëwif hay a diyam ta mekey yawa ta gëdan da wuzlah ata.]

³⁰ Yaw, mevey cew Pawl manjakaya daa way masa anga fa pëley dala maja. Anga fa tëbta ndëhay tabiya ma samawa nga nëkmara. ³¹ Anga fa wuzey mey da ray mewey nga Gazlavay da ray ndëhay, aa sërkadata ndëhay da ray Bay Mahura Yesu *Këriste ta mandërzay daa dey daa ba. Kwa ndaw ma tëka daa ba.

Leeter masa Pawl ma wuzlalatar a Rawma hay Mey da ray

Leeter n̄gada Rawma hay

Pawl ma wuzlala leeter kedē na, ta daw aa berney n̄ga Rawm daa ba araŋ. A wuzlala na, daa masa aŋga daa mepøkey aŋga n̄ga dey maakar. A wufey n̄ga daw a Rawm n̄ga vøltar gødan̄ a ndøhay fetedē. Fa døba ha, a wufey ndøhay da Rawm a jønmara n̄ga daw aa hwayak mekele. A wuzlala leeter e na, da way Gayus da Kwarinti (16.23). Ara Febe, n̄gwas ma jønta ndøhay daa mecømey-ray n̄ga ndøhay n̄ga Yesu da Senkøre, slala masa gweegwe ta Kwarinti, ma handa leeter e a Rawm (16.1-2).

Daa leeter e, Pawl a wuzlalatar da ray meesørkedey aŋga da ray Yesu. Da ndaw a wufey n̄ga n̄jey maaya fa mey n̄ga Gazlavay na, si a pa Yesu n̄ga ndaw aŋga fara fara gway, ba na, cek mekele daa ba (1.17).

Daa mecømey-ray n̄ga ndøhay n̄ga Yesu da Rawm na, Jøwif hay daha, asaya, ndøhay masa Jøwif hay ba hay daha. Jøwif hay a fa søpmara kwakwas ata cøŋga. Ndøhay mekele mekele a wulkam ndøhay masa Jøwif hay ba hay si a søpmara kwakwas n̄ga Jøwif hay may. Pawl a løvey, kwakwas n̄ga Jøwif hay na, a løhey ndaw ba. N̄ga løhey na, si ndaw a tøba mey n̄ga Yesu ta gødan̄ n̄ga Mesøfney n̄ga Gazlavay. Ara daa fasølawal 1 haa 8 Pawl maa guzley anda kedē.

Daa fasølawal 9 haa 11, Pawl a løvey kwa har-gødan̄ n̄ga Jøwif hay a tømbara mey da ray Yesu ba na, a wulkey pas pal na, a tømbara la.

Daa fasølawal 12 haa 16 Pawl aa guzley da ray men̄jey n̄ga ndøhay n̄ga Yesu daa Egøliz leŋ da wuzlah ndøhay da bøla. Pawl a ndøvda leeter e na, ta mecey-har a ndøhay ga.

Daa dærewel e kedē na, mey mekele mekele daha n̄ga vøley gødan̄ a ndøhay:

Mey da ray meløhey daa mebørey (3.23; 6.23; 10.9)

Mesøfney n̄ga Gazlavay a jønta ndøhay daa men̄jey ata

(8)

Cek masa ndaw ma da høtar maja aŋga maaya fa mey n̄ga Gazlavay (5.1-5)

Mey da ray men̄jey ta mewufey-vaw (13.8-10)

¹ Ara yah Pawl ma wuzlalakwara leeter keḏe. Yah ndaw ma ka slëra nga *Yesu *Këriste. Ara *Gazlavay ma walaya nga key *ndaw-meslërey nga Yesu, a paya nga wuzey mey anga maaya mawiya. ² *Mey-maaya-mawiya ha na, Gazlavay a lövey dëga zleezle a da slërdërwa ta fa ndëhay ma tëla mey anga. Mey nga ndëhay ma tëla mey anga ha na, mawuzlalakaya daa ðerewel nga Gazlavay. ³⁻⁴ Mey-maaya-mawiya ha na, ara mey da ray Bay alëkwa Mahura Yesu Këriste, Bëzey nga Gazlavay. A tërey nga ndaw-magëdan, a yawa daa sëkway nga Bay *Davit. Ama Gazlavay ta wuzdërwa la fara fara, ara Bëzey anga masa ta gëdan daa masa anga ma slëkdadërwa daa memëcey ta gëdan nga Mesëfney anga. ⁵ Gazlavay ta wuzdiwa maaya anga la ta fa Yesu Këriste he. A paya nga ndaw-meslërey nga Yesu amba ya wuzdatara Mey-maaya-mawiya a ndëhay daa sëkway hay wura wura cëpa. Ya wuzdatara na, amba ndëhay a, a tëbmara mey anga, a namar ray. Anda keḏe, ya fa hëslar ray a Këriste. ⁶ Akwar Rawma hay may, akwar da wuzlah ndëhay a ngene, maja Yesu Këriste ta zëlkwar la nga tërey ndëhay anga hay.

⁷ Ya fa cakwar har, akwar ndëhay cëpa da *Rawm, akwar masa Gazlavay ma wudkwar kalah. Gazlavay ta zëlkwar la, ta tërdakwar la nga ndëhay anga hay.

Anja Papa alëkwa, Bay Gazlavay, ta Bay alëkwa Mahura Yesu Këriste nga pësmakwar mey, asaya, nga njadamakwar daa zazay.

Pawl a wufey nga daw nga nëktërwa Rawma hay

⁸ Yaw, teesëḏ na, ya fa kar suse a Papay Bay Gazlavay ta fa Yesu *Këriste maja akwar tabiya. Ya fa kar suse he na, maja ndëhay da bëla tabiya fa zëldamakwar slëmay maja akwar ma tëbmara mey nga Yesu Këriste. ⁹ Gazlavay a sëra, daa masa ya fa dërey dangay na, ya fa sërfadakwar. Ya fa kar slëra ta mevel pal daa masa ya fa wuzda *Mey-maaya-mawiya da ray Bëzey anga. ¹⁰ Ya faa cëḏḏa mandaw mandaw daa medërey-dangay adaw amba a vëlya cëveḏ nga daw fa akwar anda aa ma wufey. ¹¹ Ahaw, ya wufey fara fara nga hëtkwar fa dey amba ya vëlkwar gëdan ma sawa ta fa *Mesëfney nga Gazlavay. Anda keḏe, ka da hëtam gëdan ma fëna ma fëna daa cëveḏ nga Yesu. ¹² Ya wufey nga lövey na, ya da daw fa akwar a na, amba ya jënkwa vaw nga vëley gëdan da wuzlah alëkwa. Anda

1:1 1.1 SNM 9.3-15; 26.16; Gal 1.15-16 **1:2** 1.2 3.21; 1Pi 1.10-12 **1:3-4** 1.3-4 Mt 1.1; 20.30-31; SNM 13.33; 2Tm 2.8 **1:5** 1.5 11.13; 15.15-18; Gal 1.1; 2.7, 9
1:7 1.7 zazay: 5.1; 15.33; 16.20; 1Kwr 7.15 **1:8** 1.8 16.19; 1Tes 1.8 **1:9** 1.9-10 15.23; SNM 19.21; Ef 1.16

meløvey, ya da høtey gødanj maja akwar ma tøbmara mey nga Yesu. Akwar may, ka da høtam gødanj maja yah ma tøba mey nga Yesu.

¹³ Mølma adaw hay, maaya na, ka sørmara ya ta wulkey la dey ga nga daw fa akwar, ama ya ta høtey har nga daw daa ba aran. Ya wudëy nga daw fa akwar a na, nga kawa sløra nga jønkwar nga daw fa mey fa mey daa cøved nga Yesu anda yah ma jøntørwā ndøhay daa hwayak hay mekele mekele may. ¹⁴ Si ya wuzda Mey-maaya-mawiya a ndøhay tabiya, kwa ngada ndøhay daa berney hay nga Gørek hay, kwa ngada ndøhay daa slam hay mekele, asaya, kwa ngada ndøhay ta lengersl ma søra cek, kwa ngada ndøhay ma søra cek ba. ¹⁵ Ara maja ngene, yah ma wudëy nga daw fa akwar Rawma hay may nga wuzdakwara Mey-maaya-mawiya.

Mey-maaya-mawiya aa ta gødanj nga løhey ndøhay

¹⁶ Ya fa da zlurey nga wuzey *Mey-maaya-mawiya na, daa ba, maja Mey-maaya-mawiya aa ta gødanj nga Gazlavay nga løhdata ndøhay ma pamara Yesu nga ndaw ata fara fara daa mebørey. Gazlavay a løhey teesed na, ndøhay *Jøwif hay, fa døba ha, ndøhay masa Jøwif hay ba. ¹⁷ Mey-maaya-mawiya na, fa wuzdørwā Gazlavay a nøkta ndøhay, ata maaya fa mey anga na, kwara. A da nøkta ndøhay, ata maaya na, ta fa ata ma pamara Yesu nga ndaw ata fara fara gway, ba na, cek mekele daa ba. Ara anda mawuzlalakaya daa d'erewel nga Gazlavay, ma løvey: «Ndaw masa maaya fa mey nga Gazlavay na, ara ndaw ma pa Gazlavay a nga ndaw anga fara fara. Anda kedë, a høtey heter mendøvey ba la.»

Ndøhay tabiya ata ta mebørey na, maja me?

¹⁸ Gazlavay da vad fa cey mevel da ray mebørey nga ndøhay magødanj tabiya. Ata fa kam cek hay malamba ngada ndøhay, a namar ray a Gazlavay ba sølak. Anda kedë, Gazlavay a da katar sariya maja ata fa tøkmeta ndøhay siya nga sørey mey masa fara fara da ray Gazlavay. ¹⁹ A da sørdana banay maja cøved mawuzdakaya maaya maaya cay ngada kwa waawa amba a sørey cek da ray Gazlavay. Ara Gazlavay a, ray anga, ma wuzdatara cøved e fa mey ata. Ama ata ta søpmara cøved e daa ba. ²⁰ Fara fara, ndaw a gwa nga høtar Gazlavay ta dey ba, ama døga anga ma løma bøla haa wure kedë, ndøhay a gwamara nga

1:13 1.13 1Kwr 9.19-22 **1:14** 1.14 Kwa 3.11 **1:16** 1.16 2.9; SNM 13.46; 2Tm 1.8; 1Kwr 1.18, 24 **1:17** 1.17 3.21-30; fasølawal 4; 10.4-13; Hab 2.4; Gal 3.9-12; Føl 3.9; Heb 10.38 **1:18** 1.18 2.5, 8; Ef 5.6; 2Tes 2.12 **1:19** 1.19-20 Jøw 12.9; Ps 19.2-5; SNM 17.27-28; 1Kwr 1.21

sərmara ta fa cek hay masa anğa ma katərwa. Cek hay a na, fa wuzdərwa Gazlavay aa ta gədan mendəvey ba nğa sərmataw, asaya, anğa Gazlavay Mawaca-waca. Anda keđe, fa mey nğa Gazlavay na, mey ata nğa wurey amba Gazlavay a sərfatar dey-ceceh fa mebərey ata na, daa saba. ²¹ Ndəhay a fa sərmara Gazlavay na, daha. Ama a namar ray ba, a kamar suse ba anda ara Gazlavay ata ba. A wulkam na, a ray cek hay nğa tede. Ata na, anda ata daa ləvan maja cek maaya ta maaya ba na, a sərmara ba. ²² A pamara ray ata nğa ndəhay ta lenğesl ma səra cek, anja ara ndəhay manjar-lenğesl. ²³ Gazlavay masa ta gədan, ndaw masa ta dey nğa sərmataw na, ata fa namar ray daa ba. Sasəkar a nam ray na, nğada cek mavədkaya ta bərey anda ndaw-magədan masa ma da məcey jak. Asaya, a nam ray na, nğada cek hay masa ata ma vədmata ta har ata hay aa slam a nğa dīyan hay, aa slam a nğa cek hay masa salay məfad lej aa slam a nğa zezekw hay.

²⁴ Ara maja nğene, Gazlavay ma mbəkdata sem amba a kam cek hay ma ka hezey masa ata ma wudam. Anda keđe, fa nəsmara vaw ata ta cek hay ma ka hwaray. ²⁵ Yaw, ta mbəkdamara mey masa fara fara da ray Gazlavay sem amba a jəkam sləmay fa mey membərzley. A ragadam na, nğada cek hay masa Gazlavay ma katərwa jak, a namatar ray. Ama Gazlavay ta ray anğa masa ma katərwa cek hay a na, ta mbəkdamara sem jak. Anğa na, Gazlavay pal masa ndəhay ma da həlmamara nğa sərmataw. *Amen.

²⁶ Ara maja nğene, Gazlavay ta mbəkdata sem amba a kam cek hay malamba ma ka hwaray anda ata ma wudam kalah daa mevel ata. Nğusay a mbəkdamara meney ta zel hay anda maamandaw, a nam ta nğusay cəla ata hay. Nğene ara cek malamba, ara cek nğa key kəne ba. ²⁷ Zel hay may kəne, a mbəkdamara meney ta nğusay. A wudam na, si nğa nam ta zel hay cəla ata hay. Zel a ney ta zel cəla na, ara cek ma ka hwaray kalah. Anda keđe, fa handamawa banay nğada ray ata, təđe ta sləra ata maaya ba ha nğene.

²⁸ Ndəhay a nğene ta wudam nğa sərmara Gazlavay daa ba. Ara maja nğene Gazlavay ma mbəkdata sem amba a wulkam saw, a kam cek ta cəved e ba. ²⁹ Cek hay maaya ba daa mevel ata daha. Ata fa kam cek masa ta cəved e daa ba, fa sərdamata banay ta ndəhay, fa kam dey fa cek nğa ndəhay, fa kam maagway, fa kam səlen, fa kədam ndəhay vagay, fa kam baazlam da wuzlah ata, fa kam wewer fa cek

nga ndəhay, fa fəcam ndəhay. Asaya, ata fa slam mey a ray ndəhay, ³⁰ fa kam mbadfa fa ndəhay, a wudmara Gazlavay ba, fa cəfam vaw saw, fa zlapam, faa həmdamara ray ata. Mandaw mandaw ata fa səpam wewer hay mekele mekele nga key cek hay maaya ba a ndəhay. A namatar ray ngada papa ata hay ta mama ata hay ba. ³¹ Ata manjar lengesl, aa guzlam ta neneh cew cew, a wudam vaw pəreh, a səram dey-ceceh fa ndaw ba. ³² Ama, ata fa sərmara, ndəhay ma kam cek hay maaya ba anda ngene na, Gazlavay a katar sariya la. Ndəhay anda ngene hay na, ata təde nga kədey vagay maja mebərey ata. Ta ngene he cəpa, fa kam cek hay malamba ma fəna ma fəna, asaya, aa həmdamata ndəhay mekele ma kam cek hay malamba anda ata.

2

Gazlavay a da katar sariya a ndəhay na, kwara?

¹ Jam adaw hay, da akwar fa mbədmatar ray a ndəhay na, mey akwar nga wurey amba Gazlavay a sərfakwar dey-ceceh fa mebərey akwar na, daa ba, maja akwar ta mebərey anda ata may. Da ka mbədmatar ray a ndəhay na, a key ngene, ka mbədam ray ngada akwar ray akwar, maja akwar fa kam cek maaya ba letək anda ata. ² Ya sərkwā Gazlavay a key sariya la, a da sərdata banay ta ndəhay ma kam cek hay malamba. Sariya nga Gazlavay a na, ara ta cəved e fara fara.

³ Akwar ndəhay ma kam cek hay malamba, ka mbədmatar ray ngada ndəhay mekele ma kam cek malamba anda akwar na, ka wulkam Gazlavay a kakwar sariya ngaa zəddakwar daa ba daw? ⁴ Gazlavay na, ara ndaw maaya, a sərda banay ta ndaw fiyaw fiyaw maja mebərey anga ba. Anga fa bəsa mebərey a, kaa ka rəsmara Gazlavay a jak na, kwara? Anga ma kakwar maaya ngene na, amba ka mbəddamara menjey akwar, ba diya?

⁵ Akwar, ndəhay masa ray manğərdakaya ngene, ka wudam amba ka mbəddamara menjey akwar ba. Anda kede, akwar fa cəhadamawa sariya nga Gazlavay ngada ray akwar ma fəna ma fəna. Yaw, ta pas masa Gazlavay ma da cey mevel a ray ndəhay ta mebərey fara fara na, a da katar sariya təde ta mebərey ata. ⁶ A da pəlra mawurbay a ndaw a, a ndaw a, təde fa sləra maaya ta maaya ba masa anga ma ka.

1:29 1.29 Gal 5.19-21; 2Tm 3.2-4 **2:1** 2.1 Ps 50.16; Mt 7.2 **2:4** 2.4 SNM 17.30; 2Pi 3.9, 15 **2:5** 2.5 Iz 2.11-21 **2:6** 2.6 1Kwr 3.13-15; 2Kwr 5.10; Ef 6.8; Mt 16.27

⁷ Ndohay masa ma sɔpam nga key maaya mandaw mandaw na, a wudam Gazlavay a hɛsɫar ray, a njadata aa slam anɔa mewedey, a wudam nga hɛtey heter mendovey ba. Gazlavay a da vɛlda heter mendovey ba ha na, ngada ata. ⁸ Ama ndohay masa ma kam hɛma a ray Gazlavay, ma rɛsmara mey masa fara fara, ma sɔpam nga key cek hay malamba mandaw mandaw na, Gazlavay a ceɣ mevel la ga a ray ata, a sɛrdata banay la.

⁹ Ahaw, ndohay masa ma kam cek hay malamba na, a sɛram banay la ga, a tɛwam la. Ma da sɛrey banay teesɛf na, ndohay *Jɛwif hay, fa dɛba ha, ndohay daa sɛkway hay siya tabiya may. ¹⁰ Ama ndohay ma kam cek hay maaya na, Gazlavay a da hɛsɫar ray, a njadata daa zazay aa slam anɔa mewedey. A da ka kɛne ngada ndohay anɔa hay tabiya, teesɛf na, ngada Jɛwif hay, fa dɛba ha, ngada ndohay daa sɛkway hay siya tabiya may, ¹¹ maja Gazlavay na, a weley ndohay ta weley ba.

¹² Gazlavay ta wuzdara kwakwas anɔa la a *Mawiz. Da ndohay masa ma sɛrmara kwakwas a ba, a kam mebɛrey na, ndohay a, aa zɛɛdam la tabiya, ama a daa zɛɛdam na, maja kwakwas a ba. Jɛwif hay na, a sɛrmara kwakwas a. Ata may, da a zɛɛbmara kwakwas a na, Gazlavay a katar sariya la anda kwakwas a ma lɛvey. ¹³ Gazlavay a nɛkta ndohay, ata maaya fa mey anɔa na, maja ata ma cɛndamara kwakwas a ta slɛmay daada ba, ama maja ata ma kamara cek anda kwakwas a ma lɛvey.

¹⁴ Yaw, ndohay mekele masa Jɛwif hay ba, ma sɛrmara kwakwas nga Mawiz ba na, ta pas langar ata ray ata fa kam cek hay anda kwakwas nga Mawiz a ma lɛvey cɛnɔa. Anda kedɛ, kwa a sɛrmara kwakwas a ba na, ata fa sɛrmara nga key cek hay ta cɛved e cɛnɔa. ¹⁵ Menjeɣ ata na, fa wuzda Gazlavay ta wuzdatara kwakwas a sem, aa daa mevel ata. Asaya, ta pas mekele, mewulkey ata fa wuzdatara cek masa ata ma kamara maaya ta maaya ba. ¹⁶ Fara fara, pas pal Gazlavay a katar sariya la a ndohay ta fa Yesu *Kɛriste. Ta pas nɔgene, Gazlavay a da wuzdɛrwa mewulkey masa mabadakaya daa mevel nga ndaw a, nga ndaw a. *Mey-maaya-mawiya masa yah ma wuzda na, fa lɛvey kɛne.

Jɛwif hay a sɛrmara kwakwas nga Mawiz ba na, maja me?

¹⁷ Kaa akwar *Jɛwif hay na, kwara? Ka lɛvam akwar na, Jɛwif hay, asaya, ka wulkam ka lɛvam cek hay tabiya ata ta cɛved e maja ka sɛrmara *kwakwas nga Mawiz, ka zɛlapam

ka ləvam akwar ndəhay ɲga Gazlavay. ¹⁸ Ka sərmara cek masa Gazlavay ma wudey, asaya, kwakwas ɲga Mawiz fa wuzdakwara cəved ɲga sərey cek masa maaya ta maaya ba. ¹⁹ Ka wulkam na, ka gwamara ɲga wuzmatar cəved ɲgada ndəhay masa wulaf hay * daw? Asaya, ka wulkam na, akwar ndəhay ma wadəfamar dey a ndəhay masa daa ləvanj daw? ²⁰ Ndəhay ma səra cek ba na, ka wulkam ka gwamara ɲga kətmata la daw? Asaya, ka wulkam na, ka gwamara ɲga sərkadamata bəza hay † daw? Ka wulkam anda kede maja ka ləvam kwakwas ɲga Mawiz ta wuzdakwara cek hay sem cəpa ta fa mey masa fara fara. ²¹ Ehe, jəkam sləmay, akwar ndəhay masa maa sərkadamata ndəhay siya, kaa sərkam ray akwar ba na, maja me? Akwar ndəhay ma kətmata ndəhay siya ɲga leley ba, kaa ka lalam na, kwara? ²² Asaya, akwar fa ləvmatar a ndəhay ka da lam vaw saw ba, kaa ka lam vaw saw saya na, kwara? Ka ləvam saya ka tam kuley ba, kaa ka lalamata cek hay da ver-kuley hay saya na, kwara? ²³ Akwar fa zlapam kalah, ka ləvam ka sərmara kwakwas ɲga Mawiz, ama akwar fa zləbmara kwakwas a saya na, kwara? Anda kede, a key ka pamar hwaray a Gazlavay. ²⁴ Ara anda mawuzlalakaya daa dərəwel ɲga Gazlavay ma ləvey: «Ndəhay siya faa guzlam mey maaya ba da ray Gazlavay maja akwar Jəwif hay.»

²⁵ Akwar Jəwif hay, ka ləvam Gazlavay a sərkwara ta fa *mesley mandawal. Da akwar fa səpmara kwakwas ɲga Mawiz ta cəved e na, mesley mandawal a, a jənkwar la. Ama da akwar fa səpmara kwakwas a ta cəved e daa ba na, mesley mandawal a ara cek ɲga tede ɲgada akwar, fa da jənkwar daa ba. ²⁶ Anda kede, da ndaw mandawal manjar ɲga sley, a səpa kwakwas ɲga Mawiz ta cəved e na, Gazlavay a nəka ndaw a anda ndaw maslakaya mandawal ba daw? ²⁷ Da ray ɲgene, ndəhay daa səkway hay mekele mandawal manjar ɲga sley masa ma səpmara kwakwas ta cəved e, a mbədmakwar ray la. A da mbədmakwar ray na, maja akwar Jəwif hay, akwar ta kwakwas akwar mawuzlalakaya, asaya, akwar fa slam mandawal, ama ta ɲgene he cəpa, akwar fa zləbmara kwakwas a cəɲga. ²⁸ Ndaw a da sərey anɲa ndaw Jəwif fara fara na, ta fa me? A da sərey anɲa ndaw Jəwif fara fara na, ta fa cek masa

2:17 2.17 9.4; Iz 48.1 * **2:19** 2.19 wulaf hay, ndəhay masa daa ləvanj: Pawl a wudey ɲga guzley da ray ndəhay masa Jəwif hay ba masa ma sərmara Gazlavay ba. **2:19** 2.19 Mt 15.14 † **2:20** 2.20 bəza hay: Pawl aa guzley da ray bəza hay fara fara ba, ama da ray ndəhay masa ma sərmara mey ɲga Gazlavay maaya maaya ba aranj. **2:21** 2.21 Mt 23.3-4; Janj 7.19 **2:24** 2.24 Ez 36.20 **2:25** 2.25 1Kwr 7.19; Gal 5.3 **2:26** 2.26 Gal 5.6

ndaw ma gwa nga hëtar ta dey fa vaw anga daada ba, anda melövey, ta fa mesley mandawal daada ba. ²⁹ Ama ndaw Jëwif fara fara na, ara ndaw masa Gazlavay ma mbëfdara mevel anga sem. Ndaw maslakaya mandawal fara fara na, ara ndaw masa *Mesëfney nga Gazlavay fa key slëra daa mevel anga, ba na, ara ndaw masa ma sëpey kwakwas mawuzlalakaya daada ba. Ndaw masa Jëwif fara fara na, ara ndaw masa Gazlavay maa hëmda, ba na, ara ndaw masa ndaw-magëdan maa hëmda ba.

3

Ndaw masa manjar mebërey na, daha daw?

¹ Da anda kefe na, *Jëwif hay a fënmata ndëhay mekele fa mey nga Gazlavay na, ta me? *Mesley mandawal na, ara cek ma jëney ndaw daw? ² Ahaw, Jëwif hay a fënmata ndëhay mekele na, ta cek hay ga. Teesëd na, Gazlavay a vëldatara mey anga na, ngada Jëwif hay a. ³ Fara fara, ndëhay ga da wuzlah ata fa tëbmara mey nga Gazlavay daa ba. Kaa Gazlavay na, a mbëdda mewulkey anga, a ka cek anda aa ma lövey saba maja ata daw? ⁴ Kay, fa da mbëdda daa ba. Kwa ndëhay tabiya fa mbëzlam na, Gazlavay a da ka cek anda anga ma lövey cënga. Ara anda mawuzlalakaya daa dërewel nga Gazlavay ma lövey:

«Kah, Bay Gazlavay, mey akah tabiya
ara mey fara fara ta cëved e.

Da ndaw aa dëdfaka mey na,
ka gwa nga wuzda ara mebërey akah ba.»

⁵ Da kwa ndëhay siya a da lëvam mebërey masa alëkwa ma kakwa fa wuzdërwa maaya nga Gazlavay na, ya da lökwa kwara? Yaa guzley kaa na, anda ndëhay magëdan maa guzlam may. Kaa da Gazlavay a sërdandakwar banay maja mebërey alëkwa na, ya gwakwa nga lövey Gazlavay a na, fa key cek ta cëved e daa saba daw? ⁶ Kay, këne ba! Gazlavay na, ara ndaw ma key cek ta cëved e. Da Gazlavay fa key cek ta cëved e daa ba na, kaa a da katar sariya a ndëhay ta cëved e na, kwara?

⁷ Da kwa ndaw a lövey, mekey cek ta cëved e ba na, fa wuzdatara ngada ndëhay Gazlavay ara ndaw maa guzley mey fara fara, nga wuzdërwa gëdan anga. Da këne na, Gazlavay a daa zëddata ndëhay maja mebërey ata na, fa me dëba me? ⁸ Ndëhay siya fa lëvam: «Kakwa cek hay maaya ba amba ndëhay a sëmara Gazlavay na, ara ndaw

maaya kalah.» Ahaw, a ləvam anda keđe ba, kwara? Kwa ndəhay siya na, faa guzlam maaya ba da ray adaw, a ləvam ya faa guzley anda keđe may. Sariya a təddata ndəhay a la, təde fa mewulkey ata maaya ba ha ŋgene.

Ndaw ma key cek anda Gazlavay ma wudey na, daha daw?

⁹ Kaa wure keđe na, kwara? Aləkwa *Jəwif hay na, ya fənmatakwa ndəhay siya hay daw? Kay, ya fənmatakwa ba səlak! Ya ta wuzdakwara cay, ndəhay Jəwif hay ta ndəhay masa Jəwif hay ba cəpa na, mebərey fa fəntar ray. ¹⁰ Ara anda mawuzlalakaya daa dərewel ŋga Gazlavay ma ləvey: «Kwa ndaw masa maaya fa mey ŋga Gazlavay na, daa ba, kwa ndaw pal daa ba səlak.

¹¹ Kwa ndaw masa ta ləŋgesl ma səra cek na, daa ba, kwa ndaw pal ma wudey ŋga səpa cəved ŋga Gazlavay na, daa ba.

¹² Ata cəpa ta mbəkdamara cəved ŋga Gazlavay sem. Ata cəpa daa slam a ta mbədmar dəba sem a Gazlavay. Kwa ndaw ma key cek maaya na, daa ba.

Kwa ndaw pal daa ba səlak.

¹³ Mey ma bawa da mey ata na, maaya ba anda cəvay mawurkaya ma zey.

Neneh ata na, fa təkната ndəhay kalah.

Ndəvez ŋga mey ata na, a kədey ndaw vagay anda mewer ŋga zezekw.

¹⁴ Mey ma bawa da mey ata na, ara mey meedəwek e, ma nəsa ndaw.

¹⁵ Salay ata na, fa həldata ŋga wusey vaw fiyaw fiyaw ŋga kədey ndəhay vagay.

¹⁶ Kwa daa wura daa wura daa mepəkey ata na, fa nəsam cek hay, fa sərdamata banay ta ndəhay.

¹⁷ Asaya, a sərmara ma handawa zazay a wuzlah ndəhay ba.

¹⁸ Ata na, a zluram ta Gazlavay ba səlak.»

¹⁹ Ahaw, aləkwa fa sərkwa, cek hay tabiya masa *kwakwas ŋga Mawiz maa sərkada na, ara ŋgada ndəhay masa Gazlavay ma vəldatara kwakwas a. Anda keđe, kwa ndaw ma gwa ŋga wura mey amba a diya ray aŋga na, daa ba, ndəhay cəpa ta mebərey fa mey ŋga Gazlavay. ²⁰ Maja ŋgene, ndaw masa maaya fa mey ŋga Gazlavay maja aŋga ma səpa kwakwas ŋga Mawiz tabiya na, daa ba. Kwakwas a, a wuzwa na, mebərey ŋga ndəhay gway.

Ndohay a da taram maaya fa mey nga Gazlavay na, kwara?

²¹ Wure kede, Gazlavay ta wuztar caved la a ndohay amba a pata nga ndohay maaya fa mey anga. Caved e na, kwa mey nga *kwakwas nga Mawiz da hwad a daa ba selak. Ama kwakwas a, lej ndohay ma tala mey nga Gazlavay taa guzlam la da ray caved e daga zleezle, a levam Gazlavay a wuzwa caved la mawiya. ²² Gazlavay ma pata nga ndohay maaya fa mey anga na, maja ata ma pamara Yesu *Keriste nga ndaw ata fara fara. Gazlavay a pey nga ndohay maaya fa mey anga na, ndohay tabiya masa ma tarmara mey nga Yesu, maja Gazlavay a weley ndohay ta weley ba.

²³ Ndohay tabiya ta kam meborey la. Anda kede, ata doren ta maaya nga Gazlavay. ²⁴ Ama Gazlavay ta sɔrfatar dey-ceceh la, a tɔrdata nga ndohay maaya fa mey anga ta fa Yesu Keriste, ndaw masa ma lɔhdata daa meborey. A ka kane na, ara nga maaya, ba na, ta cek ba. ²⁵ Ara Yesu a masa Gazlavay ma volda nga mɔcey amba a mbɔkdatara meborey nga ndohay ta fa mambaz anga. Ara mambaz a ma mbɔdwa fa hwadam mazlangalakaya ngada ndohay ma pamara nga ndaw ata fara fara. Gazlavay a ka anda kede na, amba a wuzdatara a ndohay, anga na, ndaw ma ka cek ta caved e. Ahaw, daa masa anga ma sɔrdata banay ta ndohay maja meborey ata masa zleezle daa ba heyey na, Gazlavay ta ka cek ta caved e la. ²⁶ Daa ngene, Gazlavay ta bɔsa meborey a la. Gazlavay a ka cek ta caved e wure kede may, maja ta fa memɔcey nga Yesu na, a gwa nga key sariya ta caved e. Asaya, a gwa nga pata ndohay masa ma tarmara mey nga Yesu nga ndohay maaya fa mey anga.

²⁷ Da anda kede na, alɔkwa ta caved nga zlepey maja alɔkwa ma kadakwa slɔra maaya ta kwakwas nga Mawiz daw? Kay! alɔkwa ta caved daa ba. Alɔkwa ta caved daa ba na, maja me? Maja cek mahura fa mey nga Gazlavay na, ara mesɔpey kwakwas ba, ama ara metɔbey-mey nga Yesu.

²⁸ Ahaw, ya sɔrmara fara fara Gazlavay a nɔka ndaw anga maaya fa mey anga na, maja ndaw a ma tɔba mey nga Yesu, ba na, maja anga ma sɔpa kwakwas nga Mawiz tabiya ba.

²⁹ Ka wulkam Gazlavay na, ara Gazlavay nga *Jɔwif hay daada daw? Ndohay masa Jɔwif hay ba na, ara Gazlavay ata may, ba diya? Ahaw, fara fara anga na, ara Gazlavay nga ndohay masa Jɔwif hay ba may, ³⁰ maja Gazlavay na, anga

3:21 3.21-22 1.2, 17 **3:22** 3.22 2.11; 3.9; 10.12; 11.32 **3:23** 3.23 5.2, 12; 8.18-20; MC 3.19 **3:24** 3.24 5.17; Ef 2.8; Tit 3.7 **3:25** 3.25 mambaz: Mt 26.28; Ef 2.13; Kwa 1.20; Heb 9.12-14; 1Jn 1.7; CWJ 1.5; 5.9; zazay: 5.1; 2Kwr 5.18-21; Ef 2.14-16; Kwa 1.20; ndaw ma ka cek ta caved e: 1.17; 3.3-4 **3:27** 3.27 3.1, 21, 31; 8.2 **3:28** 3.28 Gal 2.16 **3:29** 3.29-30 3.22; 4.11-12

pal. Da Jëwif hay a pamara Yesu nga ndaw ata fara fara na, Gazlavay a tərdata nga ndəhay maaya la fa mey anğa. Yaw, da ndəhay daa səkway mekele a pamara Yesu nga ndaw ata fara fara na, Gazlavay a tərdata la nga ndəhay maaya fa mey anğa may. ³¹ Anda keđe, da ya pakwa Yesu nga ndaw aləkwa fara fara na, a wufey nga ləvey aləkwa fa tərđakwa kwakwas nga Mawiz nga cek nga tede daw? Kay, kəne ba! Sasəkar aləkwa fa kərzakwa kwakwas a maaya maaya ta har cew cew jak.

4

Gazlavay a tərda Abəraham maaya fa mey anğa

¹ Yaw, kaa ya wulkakwa da ray *Abəraham, dede aləkwa zleezle na, kwara? Ta hətəy cek ta gədan anğa la daw? ² Da Gazlavay ta pa Abəraham nga ndaw maaya fa mey anğa la ta fa sləra anğa masa maaya * na, anja Abəraham a, təđe a zlepey. Ama ta gwa nga zlepey fa mey nga Gazlavay daa ba. ³ Ara anda mawuzlalakaya daa đerewel nga Gazlavay ma ləvey: «Abəraham a təba mey masa Gazlavay ma ləvar. Anda keđe, Gazlavay a nəka na, anğa ndaw maaya fa mey anğa, maja anğa ma pa nga ndaw anğa fara fara.»

⁴ Ndaw ma key sləra na, a hətəy dala. Dala ha ara mawurbay nga sləra anğa, ba na, a vəldamara nga tede ba. ⁵ Ama ndaw ma nəkey dey fa sləra anğa ba, a pa Gazlavay nga ndaw anğa fara fara na, Gazlavay a pa ndaw a la nga ndaw maaya fa mey anğa. Ara Gazlavay ma gwa nga pa ndaw ta mebərey nga ndaw maaya fa mey anğa maja Gazlavay a nəka na, ndaw a ma təba mey anğa la. ⁶ Zleezle Bay *Davit taa guzley la letək kəne. A ləvey ndəhay masa Gazlavay ma pata nga ndəhay maaya fa mey anğa kwa ta nəka sləra ata daa ba na, mepəsey-mey nga Gazlavay aa da ray ata.

⁷ Maaya nga Gazlavay aa da ray ndəhay
masa Gazlavay ma mbəkdatara mebərey ata sem.

Maaya nga Gazlavay aa da ray ndəhay
masa Gazlavay ma nəkey dey fa mebərey ata saba.

⁸ Maaya nga Gazlavay aa da ray ndəhay
masa Gazlavay ma sləfa mebərey ata saba.

⁹ Davit e maa guzley anda keđe na, a wufey nga ləvey maaya nga Gazlavay aha aa da ray ndəhay masa maslakaya

3:31 3.31 6.15; 8.2-4 * **4:2** 4.2 Daa masa Yesu aa da bəla na, Jëwif hay a ləvam Abəraham na, ara ndaw maaya fa mey nga Gazlavay maja sləra masa aa ma ka. (Nəka Jak 2.21-23.) Ama Pawl a ləvey Abəraham na, ara ndaw maaya fa mey nga Gazlavay maja anğa ma pa Gazlavay nga ndaw anğa fara fara. (Nəka 4.9leŋ Gal 3.6-9.) **4:2** 4.2 Jak 2.21 **4:3** 4.3 MC 15.6; Gal 3.6; Jak 2.23 **4:6** 4.6-8 Ps 32.1-2

mandawal daada gway daw? Kay, kəne ba! Maaya nga Gazlavay a na, aa da ray ndəhay masa mandawal manjar nga sley may. Ahaw, ya ta ləvkwa la: «Gazlavay a nəka na, Abərahām anğa ndaw maaya fa mey anğa, maja anğa ma pa nga ndaw anğa fara fara.» ¹⁰ Masa Gazlavay ma tərda Abərahām a nga ndaw maaya fa mey anğa na, daa masa anğa ta sla mandawal cay daw, daa ba daw? Fara fara daa ngene na, Abərahām a ta sla mandawal daa ba aran. ¹¹ Daa masa Abərahām ma sla mandawal daa ba aran na, Gazlavay ta nəka cay anğa ndaw maaya fa mey anğa, maja anğa ma pa Gazlavay a nga ndaw anğa fara fara. Fa dəba ha, Gazlavay ta', a ləvar nga sla mandawal. *Mesley mandawal a ngene na, fa wuzda anğa ndaw maaya fa mey nga Gazlavay. Anda kefe, Abərahām na, ara papaŋ nga ndəhay masa mandawal manjar nga sley, masa ma təbmara mey nga Gazlavay. ¹² Asaya, anğa papaŋ nga ndəhay masa mandawal maslakaya may. Ya wufey nğaa guzley kefe na, da ray ndəhay maslakaya mandawal cəpa ba, ama yaa guzley na, da ray ndəhay maslakaya mandawal masa ma pamara Gazlavay nga ndaw ata anda papa aləkwa Abərahām ma pa Gazlavay nga ndaw anğa fara fara daa masa anğa ta sla mandawal daa ba aran.

Gazlavay a da vəltar a ndəhay ma pamara nga ndaw ata fara fara na, me?

¹³ Gazlavay a ləvar nğada *Abərahām ta nğada bəza hay ma da yamawa da hwaɸ anğa na, a da vəldatara bəla cəpa nğada ata. Gazlavay a da vəldatara bəla ha na, ara maja Abərahām ma nar ray a *kwakwas nga Mawiz ba, ama maja aa ma pa Gazlavay a nga ndaw anğa fara fara. Ara maja ngene, Gazlavay ma pa nga ndaw maaya fa mey anğa. ¹⁴ Anja da Gazlavay a da vəltar cek a ndəhay maja ata ma səpam kwakwas daada na, ngene, mepey Gazlavay nga ndaw fara fara, ara cek nga tede. Asaya, anja cek masa Gazlavay ma ləvey a da vəldatara ha na, ara cek nga tede may. ¹⁵ Yaw, da ndəhay a zləbmara kwakwas na, Gazlavay a cey mevel. Ama da anja kwakwas daa ba na, ndəhay a da zləbam me?

¹⁶ Anda kefe, cek maaya masa Gazlavay ma da vəlda na, a da vəldatara nğada ndəhay masa ma pamara nga ndaw ata fara fara. A da vəldatara na, nga maaya maja a wufey ndaw kalah. Gazlavay ma ləvey a da vəltar cek heyey na, ara nğada bəza hay ma da yamawa da hwaɸ Abərahām

tabiya. A da vølda cek aha na, ngada ndøhay ma tøba mey anga masa ma søpmara kwakwas nga Mawiz daada ba, ama ngada ndøhay mekele tabiya ma pamara nga ndaw ata anda Abøraham zleezle. Abøraham na, ara papa aløkwa, aløkwa tabiya ndav. ¹⁷ Ara anda mawuzlalakaya daa ðerewel nga Gazlavay, Gazlavay a løvar a Abøraham: «Ya ta paka la nga papanj nga sækway hay ga.» Yaw, fa mey nga Gazlavay na, Abøraham ara papa aløkwa. Anga ta pa Gazlavay la nga ndaw anga fara fara, Gazlavay ma sløkfadatørwa ndøhay daa memøcey, asaya, ma gwa nga kata cek hay masa ma kam daa ba aran. ¹⁸ Kwa ndøhay siya a wulkam Gazlavay a gwa nga vølar cek ngada Abøraham anda aa ma løvar heyey daa ba na, Abøraham a fa pa Gazlavay nga ndaw anga fara fara cønga. Anda kefe, anga ta tørey la nga «papanj nga sækway hay ga» anda Gazlavay maa guzlar, a løvar: «Bøza hay da hwad akah a laslam la ga anda wurzla hay.» ¹⁹ Daa masa Gazlavay maa guzlar ngene na, Abøraham a key mevey temere. Abøraham a søra anga maraw, gødanj anga daa saba, asaya, a søra ngwas anga Sara na, anga madanngwas cay. Ta ngene he cøpa, Abøraham fa tøba Gazlavay a kar cek la anda aa ma løvar cønga. ²⁰ Fara fara, anga fa tøba mey masa Gazlavay ma løvar. A wulkey cew cew da ray cek masa Gazlavay ma da vøldara ba. Ama fa høtey gødanj ma føna ma føna daa metøbey-mey nga Gazlavay, fa høslar ray. ²¹ Yaw, Abøraham a søra Gazlavay aa ta gødanj nga kara cek anda aa ma løvar. ²² Ara maja ngene, Gazlavay ma pa nga ndaw maaya fa mey anga. ²³ Mey ma løvey: «Gazlavay a pa nga ndaw maaya fa mey anga» na, mawuzlalakaya daa ðerewel nga Gazlavay na, ngada Abøraham daada ba, ²⁴ ama mey a mawuzlalakaya ngada aløkwa may. Da aløkwa fa pakwa Gazlavay nga ndaw aløkwa fara fara, Gazlavay ma sløkfadørwa Bay aløkwa Mahura Yesu daa memøcey na, Gazlavay a, a pandakwar nga ndøhay maaya fa mey anga la may. ²⁵ Yesu a na, Gazlavay ta vølda la a har ndøhay nga møcey maja mebørey aløkwa. Fa døba ha, ta sløkfawa sem daa memøcey amba Gazlavay a pandakwar nga ndøhay maaya fa mey anga.

5

Cek masa ndaw ma da høtar maja anga maaya fa mey nga Gazlavay na, wura?

4:16 4.16 Gal 3.7 **4:17** 4.17-18 MC 15.5; 17.4-5; 2Kwr 1.9; Heb 11.12, 19
4:19 4.19-20 MC 17.1-6; Heb 11.11 **4:21** 4.21 MC 18.14; Lk 1.37 **4:22** 4.22
4.3 **4:23** 4.23-24 10.9; 15.4 **4:25** 4.25 Iz 53.4-5, 10; Rm 8.32-34; 1Kwr 15.17

¹ Ahaw, Gazlavay a tærdandakwar nga ndøhay maaya fa mey anga na, maja alækwa ma pakwa nga ndaw alækwa fara fara. Anda keðe, alækwa manjatakaya daa zazay fa mey anga maja Bay alækwa Mahura, Yesu *Køriste. ² Ara Yesu ma vøldakwar cøved amba ya sækwa maaya nga Gazlavay maja alækwa fa pakwa nga ndaw alækwa fara fara. Alækwa majaratakaya daa mey anga ta fa maaya anga ha. Asaya, alækwa faa sækwa maja ya sækwa ya høkwa mewedey anga la a ray alækwa. ³ Ara ngene daada ba, ama alækwa faa sækwa saya daa masa alækwa fa sækwa banay, maja banay a, a jønndakwar nga bøsey banay hay mekele mekele. ⁴ Mefbøsey banay na, a vøley gødan a ndaw nga jerey. Yaw, da alækwa majaratakaya na, ya sækwa ya da høkwa cek masa Gazlavay ma løvey a vøldandakwara la heyey. ⁵ Cek aha na, fa da pandakwar hwaray daa ba, maja Gazlavay ta wuzdørwa mewudøy-vaw anga sem ta fa Mesøfney anga masa aa ma vøldandakwara.

⁶ Daa masa alækwa ta gødan nga løhda ray alækwa daa ba na, Køriste ta møcey la maja alækwa, alækwa ndøhay ma kam høma a ray Gazlavay. A møcey a na, ta pas masa Gazlavay ma wala ðar a. ⁷ Ya sækwa anga ta banay amba ndaw a tøba nga møcey aa slam a nga ndaw ma ka cek ta cøved e. Ayøwa, da kwa ndaw a gwa nga møcey aa slam a nga ndaw meekwed-mey kwa. ⁸ Ama kwa alækwa ta mebørey na, ta ngene he cøpa, Køriste ta møcey la maja alækwa cønga. Ara anda keðe Gazlavay ma wuzda, anga fa wudndakwar kalah. ⁹ Wure keðe, Gazlavay ta tærdandakwar la nga ndøhay maaya fa mey anga ta fa mambaz nga Yesu ma mbøðwa daa memøcey anga. Anda keðe, ya sækwa fara fara Yesu Køriste a løhdandakwar la, Gazlavay fa da ceý mevel da ray alækwa daa saba. ¹⁰ Daa masa alækwa masa-gøra hay nga Gazlavay na, Gazlavay a ta cømdakwar ðay la ta anga ray anga, ta fa memøcey nga Bøzey anga. Wure keðe, alækwa macømkaya ðay ta anga. Anda keðe, ya sækwa fara fara a løhdandakwar la maja Bøzey anga ma slækðawa sem daa memøcey. ¹¹ Ara keðe daada ba, ama alækwa faa sækwa da ray Gazlavay maja Bay alækwa Mahura Yesu Køriste may. Ara maja anga, alækwa macømkaya ta Gazlavay.

5:1 5.1 3.21-30; Gazlavay a tærdandakwar nga ndøhay maaya fa mey anga: 3.25-26 **5:2** 5.2 maaya nga Gazlavay: 3.21; 6.14; 2Kwr 6.1; 12.9; Gal 1.6; 5.4; Ef 2.5-8; 1Pi 1.10-11; 4.13-14; 5.10, 12; mepey Yesu ndaw alækwa fara fara: Rm 3.24; 8.17-18; mewedey anga: 8.17-18; 9.23; 1Kwr 2.7; 2Kwr 3.18; 4.17; Kwa 1.27; 3.4; 1Tes 2.12; 2Tm 2.10; 1Pi 5.1 **5:3** 5.3-5 Jak 1.2-3, 12; 1Pi 1.5-7 **5:5** 5.5 8.39; Ps 22.6; Heb 6.19 **5:6** 5.6-7 1Pi 3.18 **5:8** 5.8 Jan 3.16 **5:9** 5.9 1.18; 1Tes 1.10 **5:10** 5.10 2Kwr 5.18-20; Kwa 1.20-22 **5:11** 5.11 8.31

Mey da ray Adam ta Kəriste

¹² Mebərey a sawa a bəla na, ta fa ndaw pal mezəley *Adam. Ndəhay a məcam na, maja mebərey a. Anda keđe, meməcey fa paslata ndəhay da bəla maja ndəhay tabiya ata ta mebərey. ¹³ Dəga Gazlavay ta wuzdara kwakwas anğa a *Mawiz daa ba aran na, mebərey aa daha da bəla cay. Ama daa masa kwakwas a daa ba aran na, Gazlavay fa sləfa mebərey nğa ndəhay daa ba may. ¹⁴ Ama ta ngene he cəpa dəga fa Adam haa kasl fa Mawiz na, ndəhay tabiya ta ləham fa meməcey daa ba cənğa. Adam ta cənar mey a Gazlavay daa ba. Kwa ndəhay a ta kam mebərey anda Adam a daa ba na, ta məcam sem cənğa. Ya gwakwa nğa wa Adam a na, ta ndaw ma da sawa.

¹⁵ Ama Adam a na, ata letək ta ndaw ma da sawa ha ba. Mebərey nğa Adam anğa wal ta cek maaya masa Gazlavay ma da vəldatara a ndəhay maja mewudəy-vaw anğa. Ahaw, fara fara ndəhay ga ta məcam sem maja mebərey nğa ndaw pal. Ama, Gazlavay a katar maaya la ma fəna a ndəhay ga. A da katar maaya ha na, ta fa ndaw pal mezəley Yesu *Kəriste. ¹⁶ Cek masa ndəhay ma hətam ta fa Gazlavay na, a fəna cek masa ndəhay ma hətam ta fa ndaw pal mezəley Adam. Ara anğa ma handərwa mebərey a bəla. Anda keđe, mebərey masa ndaw pal ma ka ha na, sariya nğa Gazlavay ta təfdata ndəhay sem maja. Ama maaya masa Gazlavay ma katara a ndəhay na, a pata ndəhay a nğa ndəhay maaya fa mey anğa. Anda keđe, kwa ndəhay a, ata ta mebərey ga na, sariya nğa Gazlavay fa da təfdata daa ba. ¹⁷ Ahaw, fara fara ndaw pal ta key mebərey la. Anda keđe, meməcey ta kəfta ndəhay tabiya sem maja ndaw aha. Ama ndaw mekele daha wal, ara Yesu Kəriste. Ara ta fa anğa, Gazlavay ma katar maaya a ndəhay ma fəna ma fəna, a ndəvey ba, a cəmtar dəy ta anğa ray anğa. Maja ngene, ndəhay a hətam heter mendəvey ba la, asaya, a da wam da ray cek hay bama.

¹⁸ Nəka, ndəhay tabiya na, sariya ta təfdata sem maja mebərey nğa ndaw pal, Adam. Ama ndaw pal daha, ara Yesu Kəriste. Anğa na, ara ndaw ma key cek maaya ta cəved e. Ara ta fa anğa Gazlavay a pata ndəhay nğa ndəhay maaya fa mey anğa. Da ray ngene, ndəhay a hətam heter mendəvey ba la. ¹⁹ Ahaw, ndəhay ga ata ta mebərey maja ndaw pal daha ma cənar mey a Gazlavay ba. Ama ndaw pal daha, ara Yesu Kəriste. Anğa na, ta cənar mey la a Gazlavay.

Da ray ηgene, ndəhay ga ta təram ηga ndəhay maaya la fa mey ηga Gazlavay maja ndaw aha.

²⁰ Gazlavay ta wuzdatara kwakwas anja la a ndəhay. Anda keɔe, ndəhay fa kam mebərey ma fəna ma fəna. Ama daa masa ndəhay fa kam mebərey ma fəna ma fəna na, Gazlavay fa key dey-ceceh, fa wuzdatara mewuɔey-vaw anja ma fəna ma fəna a ndəhay may. ²¹ Mebərey a hətey gəɔaη da ray ndəhay ηгаа zəɔɔdata na, ta fa meməcey. Ama wure keɔe maaya ηga Gazlavay aa da ray ndəhay. Gazlavay na, aa ta gəɔaη ηga pata ndəhay ηga ndəhay maaya fa mey anja. A wuzdərwa maaya anja ha amba ya hətkwa heter mendəvey ba ta fa Bay aləkwa Mahura Yesu Kəriste.

6

Ndaw ηga Yesu a key mebərey mandaw mandaw daw?

¹ Kaa wure keɔe na, ya da ləvkwa kwara? Maaya na, ya kakwa mebərey mandaw mandaw amba Gazlavay a sərɔandakwar dey-ceceh, a wuɔndakwar ma fəna ma fəna daw? ² Kay, kəne ba səlak! Ta dey ηga mebərey na, aləkwa anda ndəhay maməctakaya. Mebərey a gwa a wandakwar saba. Kaa wara ya njakwa mandaw mandaw daa mebərey na, kwara dəba wura? ³ Ka sərmara maaya maaya daa masa aləkwa ma hətkwa *baptem na, aləkwa macəmkaya ta Yesu *Kəriste. Anda meləvey, aləkwa ma məckwa la ta anja may. ⁴ Daa masa aləkwa maməctakaya ta Kəriste daa yam ηga baptem na, ηgene anda aləkwa mapəshatakaya ta anja amba menjey aləkwa a tərey mawiya. Menjey aləkwa a tərey mawiya na, letek anda Gazlavay Papan ma sləkɔadərwa Yesu daa meməcey ta gəɔaη anja masa maaya kalah.

⁵ Ahaw, aləkwa ma məckwa la anda anja, anda keɔe, aləkwa macəmkaya ta anja. Da ray ηgene, ya da sləkɔakurwa daa meməcey anda anja may. ⁶ Ya sərkwaa daa masa Yesu ma məcey fa hwadam mazlangalakaya na, menjey aləkwa masa zleezle aa fa hwadam a ta pas ηgene may amba menjey aləkwa masa zleezle he a ndəvey. Anda keɔe, aləkwa beke ηga mebərey saba, ⁷ maja ndaw masa maməckaya na, mebərey a wa saba. ⁸ Yaw, da aləkwa maməctakaya ta Kəriste na, ya sərkwaa ya da njakwa ta dey bama ta anja may. ⁹ Ya sərkwaa fara fara Kəriste na, ta sləkɔawa sem daa meməcey. Yaw, anja fa da məcey daa

saba, meməcey fa da wey da ray a daa ba may. ¹⁰ Kəriste ta məcəy la dey pal maja ndəhay tabiya. Ta fa meməcəy anğa ha na, mebərey a gwa a wandakwar saba. Wure keđe na, anğa ta dey, manjakaya da cakay Gazlavay. ¹¹ Akwar may, akwar kəne. Sərmara, akwar na, maməctakaya, mebərey fa wakwar daa saba. Wure keđe, akwar ta dey, manjatakaya ta Gazlavay maja akwar macəmkaya ta Yesu Kəriste.

¹² Anda keđe, ka da vəlmar cəved a mebərey nğa wey da ray vaw akwar ma da məcəy ngene ba. Cek hay maaya ba masa akwar ma wudam kalah na, ka da pamara mewulkey akwar a ray a ba. ¹³ Ka da vəldamara vaw akwar nğada mebərey amba a tərda vaw akwar nğa cek ma ka sləra malamba ba. Ama vəldamara ray akwar na, nğada Gazlavay anda ndəhay masa maməctakaya ma sləkdəməwada daa meməcəy. Vəldamara ray akwar tabiya a Gazlavay amba a tərda akwar nğa ndəhay ma ka cek maaya ta cəved e. ¹⁴ Anda keđe, ara mebərey ma da wey da ray akwar saba, maja akwar fa səpmara *kwakwas nğa Mawiz daa saba, ka səpam na, nğa hətəy maaya nğa Gazlavay.

Aləkwa na, ndəhay ma ka cek maaya daw, maaya ba daw?

¹⁵ Kaa ya da kakwa na, kwara? Da aləkwa fa səpkwa *kwakwas nğa Mawiz daa saba, ya səpkwa maaya nğa Gazlavay na, aləkwa ta cəved nğa key mebərey daw? Kay, daa ba! ¹⁶ Ka sərmara da ka vəldamara ray akwar nğada ndaw, ka ləvmar ka namar ray la na, akwar ma tərəm sem nğa beke anğa hay, ba diya? Anda keđe, da akwar ma vəlmar cəved sem a mebərey nğa wey da ray akwar na, ngene akwar beke hay nğa mebərey a, asaya, akwar fa cəhadəməwada meməcəy a ray akwar. Ama da akwar fa namar ray a Gazlavay na, akwar ta tərəm sem nğa beke anğa hay, anda keđe, a pakwar la nğa ndəhay maaya fa mey anğa. ¹⁷ Zleezle na, akwar beke nğa mebərey, ama wure keđe akwar fa təbmara mey nğa Gazlavay masa ndəhay maa sərkadamakwara ta mevel pal. Ya kakwa suse a Gazlavay maja. ¹⁸ Gazlavay ta pəskakwar sem daa beke nğa mebərey. Anda keđe, ka da kam cek masa maaya ta cəved e. ¹⁹ Ya wakwara mey a ta beke keđe na, maja anğa ta banay nğada akwar amba ka cəndamara mey a. Zleezle na, akwar anda beke hay. Ka ta vəldamara ray akwar la nğa key cek hay malamba ma həldakwar nğa rəsa Gazlavay. Ama wure keđe na, vəldamara ray akwar tabiya nğada Gazlavay amba ka kam cek masa maaya ta cəved e

anda akwar na, beke anɗa hay. Anda keɗe, menjey akwar a mbafar la a Gazlavay.

²⁰ Zleezle daa masa akwar beke nɗa meɓerey na, ka wuɗam nɗa key cek masa maaya ta cɔved e ba. ²¹ Daa nɗene na, akwar fa kam cek hay malamba masa fa pakwar hwaray wure keɗe. Kaa cek maaya masa akwar ma hɗam da hwaɗ a na, me? Sasɗakar cek hay a nɗene na, fa handawa memɗeey a ray akwar jak, ba diya? ²² Wure keɗe na, Gazlavay ta pɗskakwar sem daa beke nɗa meɓerey. Anda keɗe, akwar ndɗohay ma ka slɗra nɗa Gazlavay. Cek maaya masa akwar ma hɗam na, ara menjey akwar maaya ma mbafar a Gazlavay. Asaya, menjey akwar a, a da vɗlkwar heter mendɗvey ba nɗa sɗrmataw. ²³ Nɗaka, cek mehɗtey fa meɓerey na, ara memɗeey. Ama cek masa Gazlavay ma vɗlda nɗa maaya na, ara heter mendɗvey ba maja alɗkwa macɗmkaya ta Yesu *Kɗriste, Bay alɗkwa mahura.

7

Kwakwas nɗa Mawiz a da wey da ray alɗkwa saba na, ta vara?

¹ Mɗlma aɗaw hay, ya faa guzlkwar, akwar masa ma sɗrmara *kwakwas nɗa Mawiz. Ka sɗrmara kwakwas a, a wey da ray ndaw na, daa masa ndaw aha anɗa ta dey gway. ² Wakwa mey a ta nɗwas da way zel. Daa masa zel e aa ta dey ɗagay na, nɗwas a, aa ta cɔved nɗa ley zel mekele daa ba, maja kwakwas nɗa Mawiz a vɗlar cɔved ba. Ama da zel e ta mɗeey sem na, nɗwas a, aa ta cɔved nɗa ley zel mekele, kwakwas a, a tɗka saba. ³ Anda keɗe, da nɗwas masa zel e aa ta dey, a ley zel mekele na, nɗene nɗwas aha ta ley vaw sem da palah. Ama da zel e ta mɗeey sem na, kwakwas a, a vɗlar cɔved nɗa ley zel mekele. Nɗene, ara meley-vaw saw da palah ba.

⁴ Mɗlma aɗaw hay, nɗada akwar na, aa letek kɗne may, kwakwas nɗa Mawiz fa wey da ray akwar daa saba. Akwar anda ndɗohay mamɗctakaya maja *Kɗriste ta mɗeey la aa slam a nɗa akwar. Wure keɗe, akwar na, nɗada anɗa, ndaw masa Gazlavay ma slɗkɗadɗrwa daa memɗeey. Akwar macɗmkaya ta anɗa amba ka kamar slɗra maaya ma mbafar. ⁵ Zleezle daa menjey alɗkwa na, alɗkwa fa kakwa cek hay saw anda mevel alɗkwa ma wuɗey gway. Kwakwas nɗa Mawiz a wuzdandakwara cek hay masa ma kar meɓerey a ndaw. Masa alɗkwa ma sɗrtakwa cek hay a la na, sasɗakar alɗkwa fa katakwa ma fɗna ma fɗna

jak. Cek hay a fa hældandakwar nga key sløra maaya ba ma handawa memøcey a ray aløkwa. ⁶ Zleezle aløkwa anda beke hay maja kwakwas nga Mawiz, aløkwa anda ndøhay magøcatakaya daa førsøne. Wure kefe, aløkwa mapøskatakaya dasi har nga kwakwas a, amba ya kakwa sløra ngada Gazlavay taa cøved mekele mawiya masa *Mesøfney nga Gazlavay ma wuzdandakwara. Ya kakwa sløra ngada Gazlavay taa cøved magurma masa kwakwas nga Mawiz ma wuzdandakwara saba.

Kwakwas nga Mawiz a wuzwa na, me?

⁷ Kaa wure kefe na, ya da løvkwa kwara? *Kwakwas nga Mawiz na, ara cek maaya ba daw? Kay, køne ba. Anja da kwakwas a daa ba na, ya fa da søra mebørey daha na, daa ba. Kwakwas a, a løvey: «Ka da kam dey fa cek nga ndaw ba.» Anja da kwakwas a ta løvey køne daa ba na, ya søra mekey dey fa cek nga ndaw na, ara mebørey la daw?

⁸ Ama kwakwas a ta wurar cøved sem a mebørey nga key sløra daa yah. Mebørey a ta hældaya la nga key dey fa cek nga ndaw. Anja da kwakwas a daa ba na, mebørey fa da høtey gødan da ray ndaw daa ba. ⁹ Zleezle daa masa ya søra mey da ray kwakwas a ba na, yah ta dey, ya fa wey nga yah. Ama daa masa ya ta cønda mey da ray kwakwas a cay na, mebørey ta høtey gødan sem da ray adaw. ¹⁰ Da ray ngene, yah na, anda ndaw mamøckaya. Gazlavay ta vøldørwa kwakwas aha la amba ndøhay a høtam heter. Ama ngada yah na, kwakwas a ta cøhadaya memøcey sem a ray. ¹¹ Ama masa yah ma cønda mey da ray kwakwas a la na, kwakwas a ta wurar cøved sem a mebørey nga key sløra daa yah. Mebørey a ta høtey cøved sem nga tøkna ya ta fa kwakwas a. Anda kefe, mebørey a ta cøhadaya memøcey sem a ray.

¹² Fara fara, kwakwas nga Mawiz na, anga maaya, mebørey da hwad a daa ba. Asaya, mey hay da ray kwakwas a na, a samawa fa Gazlavay. Ata maaya, mebørey da hwad a daa ba. A jønta ndøhay nga key cek ta cøved e. ¹³ Anda kefe, cek masa maaya na, a gwa nga handawa memøcey a ray adaw daw? Kay, køne ba! Ma handørwa memøcey a ray ndaw na, ara mebørey. Mebørey a ta høtey cøved sem ta fa cek masa maaya nga handaya memøcey a ray. A key anda kefe na, amba ndøhay a sørmara mebørey ara cek maaya ba kalah ta fa kwakwas a.

7:5 7.5 6.21 7:6 7.6 6.7; 8.2-4; 2Kwr 3.6 7:7 7.7 Mew 5.21; MC 2.16-17;
3.6 7:7 7.7-13 4.15 7:8 7.8 1Kwr 15.56 7:9 7.9 5.13 7:10 7.10 Lev
18.5 7:11 7.11 MC 3.13 7:12 7.12 1Tm 1.8

Cek maaya ta maaya ba a cəmam daa ndaw na, kwara?

¹⁴ Ya sərkwā *kwakwas ŋga Mawiz na, a sawa ta fa Gazlavay, ama aləkwa na, ndəhay magədan̄ gway. Ya ta tərkwā beke ŋga mebərey sem. ¹⁵ Fara fara, cek masa yah ma ka na, ya ka maja me na, ya səra ba, maja cek maaya masa yah ma wufey na, ya ka ba. Ama ya key na, cek masa yah ma wufey ba jak. ¹⁶ Da ya key cek masa yah ma wufey ba na, ŋgene, ya təba, ya səra kwakwas a na, aŋga maaya. ¹⁷ Anda kefe, da ya key cek maaya ba na, ara yah ma ka ba. Ara mebərey masa daa yah ma ka cek aha. ¹⁸ Ahaw, ya səra yah ta gədan̄ ŋga key cek maaya ta cəved̄ e na, daa ba. Anda meləvey yah na, ndaw-magədan̄. Ya wufey ŋga key cek maaya ta cəved̄ e, ama gədan̄ adaw daa ba. ¹⁹ Yaw, cek maaya masa yah ma wufey ŋga ka na, ya fa ka daa ba, ama ya key na, cek maaya ba masa yah ma wufey ŋga ka ba jak. ²⁰ Da ya key cek maaya ba masa yah ma wufey ŋga ka ba na, a wufey ŋga ləvey ara yah ma ka ba. Ara mebərey masa daa yah ma ka cek aha.

²¹ Ya wufey ŋga key cek maaya, ama ya da key na, cek masa maaya ba gway. Kefe ara cek masa yah ma saŋgala daa menjey adaw. ²² Daa mevel adaw na, ya fa wufey fara fara ŋga səpa *kwakwas ŋga Gazlavay. ²³ Ama ya nəka na, cek maaya ba ma fənya ray daha. Cek aha fa təkā mewulkey adaw ŋga key cek masa maaya. Cek maaya ba ha ma fənya ray a na, ta tərdaya sem ŋga beke ŋga mebərey. ²⁴ Ay! Yah na, ndaw ta matəway daa dey. Yah na, meməcey aa da ray adaw. Ma da ləhdaya daa meməcey a na, wa? ²⁵ Ara Gazlavay ma da ləhdaya ta fa Bay aləkwa Mahura Yesu *Kərīste. Ara maja ŋgene, ya fa kar suse ta mevel adaw cəpa.

Anda kefe, daa mewulkey adaw na, ya wufey ŋga səpa kwakwas ŋga Gazlavay. Ama maja yah ndaw-magədan̄ na, ya key na, cek masa ma handaya mebərey a ray jak.

8

Mesəfney ŋga Gazlavay a jənta ndəhay daa menjey ata na, kwara?

¹ Wure kefe ndəhay masa macəmkaya ta Yesu *Kərīste na, sariya ŋga Gazlavay fa da təfdata daa ba. ² Mebərey fa da hətey gədan̄ ŋga handawa meməcey a ray aləkwa daa saba, maja gədan̄ ŋga *Mesəfney ŋga Gazlavay aa

da ray aləkwa. Gədan̄ nga Mesəfney nga Gazlavay a, a vəlndakwar heter mawiya ta fa Yesu Kəriste.

³ *Kwakwas nga Mawiz na, a gwa nga key sləra anda Gazlavay ba, maja bəle nga ndaw-magədan̄ ta tərda kwakwas a sem nga cek manjar gədan̄. Gazlavay aa ta gədan̄ ma fəna kwakwas nga Mawiz. Gazlavay a wuzda an̄ga na, a wufey nga cəney mebərey fa sləmay an̄ga ba səlak, a kar sariya a ndaw-magədan̄ maja mebərey an̄ga. Anda keđe, ta slərdərwa Bəzey an̄ga la a bəla, a tərey nga ndaw-magədan̄, vaw an̄ga anda aləkwa ndəhay ma ka mebərey. Gazlavay a ka anda keđe, nga ləhdata ndəhay daa mebərey ta fa meməcey nga Bəzey an̄ga ha. Anda keđe, ta fəna gədan̄ nga mebərey sem ta fa Bəzey an̄ga ha. ⁴ Gazlavay a ka anda keđe na, amba ya tərkwə ndəhay ma ka cek ta cəved e fara fara anda kwakwas a ma wufey ya kakwa. Ya kakwa na, anda mewufey nga ndaw-magədan̄ saba, ama ya kakwa anda Mesəfney nga Gazlavay ma wufey.

⁵ Ndəhay ma səpam nga njeý anda ndəhay magədan̄ ma wudam na, a wulkam mandaw mandaw da ray cek masa ma mbafatar gway. Ama ndəhay ma kam cek anda Mesəfney nga Gazlavay ma wufey na, a wulkam mandaw mandaw da ray cek masa ma mbafar a Mesəfney a. ⁶ Da ndaw a wulkey mandaw mandaw da ray cek masa ma mbafar gway na, a key n̄gene, a cəhadəwa meməcey a ray an̄ga. Ama da ndaw a wulkey mandaw mandaw a ray cek ma mbafar a Mesəfney nga Gazlavay na, n̄gene, Gazlavay a da vəlar heter mawiya, asaya, a da njada daa zazay.

⁷ Ndəhay ma wulkam mandaw mandaw da ray cek masa ma mbafatar a vaw ata hay na, ata masa-gəra hay nga Gazlavay. Ata fa səpmara kwakwas nga Gazlavay daa ba, kwa a gwamara nga key sləra ta kwakwas a ba. ⁸ Ndəhay ma səpam nga key cek masa ma mbafatar a vaw ata hay gway na, ndəhay a, fa da mbafamar a Gazlavay daa ba.

⁹ Ama akwar na, akwar fa kam cek ma mbafar a vaw akwar hay daa ba. Ka səpam na, cek masa ma mbafar a Mesəfney nga Gazlavay maja Mesəfney a, aa da ray akwar. Ndaw masa Mesəfney nga Kəriste da ray a daa ba na, ndaw aha ara ndaw nga Kəriste ba. ¹⁰ Da Kəriste aa daa mevel akwar na, Mesəfney nga Gazlavay a vəlkwə heter mawiya la maja aa ma pakwar nga ndəhay maaya fa meý an̄ga. Kwa ka məcəma la, vaw akwar a zey la maja mebərey na, ka hətəma heter mawiya la. ¹¹ Asaya, da Mesəfney nga Gazlavay ma sləkfdərdəwa Yesu Kəriste daa meməcey aa

da ray akwar na, ηgene Gazlavay a da sləkɗadakurwa daa meməcey may. Anda keɗe, a da sləkɗadakurwa ha na, ta gədaη ηga Mesəfney aηga masa da ray akwar a.

¹² Məlma adaw hay, ara maja ηgene si ya njakwa anda Mesəfney ηga Gazlavay ma wudey, ba na, anda vaw aləkwa ma wudey ba. ¹³ Yaw, da akwar fa kam cek masa ma mbafar a vaw akwar gway na, ka məcama la. Ama da akwar fa vəlmar cəved a Mesəfney ηga Gazlavay ηga jənkwar ηga mbəkda mekey cek hay maaya ba na, ηgene, ka hətam heter mawiya la. ¹⁴ Ndəhay cəpa masa ma vəlmar cəved a Mesəfney ηga Gazlavay ηga wey da ray ata na, ndəhay a ηgene, ara bəza hay ηga Gazlavay.

¹⁵ Mesəfney masa akwar ma təbmara ηga wey da ray akwar a na, fa da tərdakwar ηga beke hay daa ba, akwar fa da njam ta mandərzay daa dey daa saba. Ama Mesəfney ηga Gazlavay a, a da tərdakwar ηga bəza hay ηga Gazlavay, a da jəndakwar ηga zəla Gazlavay a: «Aba», anda meləvey, «Papay.» ¹⁶ Mesəfney a, fa wuzdandakwara daa mevel aləkwa na, aləkwa bəza hay ηga Gazlavay fara fara. ¹⁷ Ahaw, aləkwa na, bəza hay ηga Gazlavay. Anda keɗe, ya hətkwa cek masa aηga ma bəda maja aləkwa la. Ya da hətkwa cek aha na, bama daa slam a ta Kəriste maja da aləkwa ma sərkwana banay la bama ta Kəriste na, ya da njakwa bama ta aηga daa slam aηga mewedeɗey may.

Mey da ray mewedeɗey ηga Kəriste

¹⁸ Ya səra, banay masa aləkwa ma sərkwana wure keɗe kaa na, ara cek mecəhe ηga tede. Fara fara, slam-mewedeɗey ηga Gazlavay masa aa ma vəldandakwara na, aηga maaya, a wam ta banay masa aləkwa ma sərkwana wure keɗe ba.

¹⁹ Cek hay tabiya masa Gazlavay ma katərwa na, cek hay a fa səkwamara ɗar masa Gazlavay ma da wuzdatərwa bəz aηga hay daa slam aηga mewedeɗey amba ɗar a, a wuswa fiyaw fiyaw. ²⁰ A səkwamara maja cek hay tabiya masa Gazlavay ma katərwa na, ta təram sem ηga cek ηga tede. Ara cek hay a ma wudam ηga key kəne ba, ama ara Gazlavay ma la har aηga da ray ata. Ta ηgene he cəpa, fa səkwamara Gazlavay ηga ka sləra aηga da ray ata cəηga.

²¹ Sləra ha na, ara Gazlavay ma da pəskatərwa dasi har ηga ndaw ma nəsta, ma tərdata ηga beke. Anda keɗe, cek hay a tabiya a da hətam mewedeɗey ηga Gazlavay bama daa slam

a ta bəza hay nga Gazlavay. A da wam nga ata anda bəza hay nga Gazlavay.

²² Ya sərkwā dəga mezley nga bəla haa wure kefe, cek hay tabiya masa Gazlavay ma katərwa na, fa səram banay, a njaram anda ngwas ma da yey. ²³ Ma səram banay a daa masa ata fa səkwmara na, ara cek hay a daada ba, ama aləkwa may fa njarakwa daa mevel aləkwa. Aləkwa na, ndəhay masa Gazlavay ma vəlndakwar Mesəfney anga teesed da ray cek hay mekele masa anga ma da vəldandakwara. Anda kefe, aləkwa fa səkwa kwa pas masa Gazlavay ma da tərdatakwar nga bəz anga hay fara fara, a da pəskandakwar dasi har nga ndaw ma nəsndakwar, amba kwa waawa a wey ray anga.

²⁴ Gazlavay ta ləhdandakwar sem daa mebərey ama ya sərtakwa cek hay masa Gazlavay ma da ka da ray aləkwa tabiya ba aran. Aləkwa fa sərkwā fara fara ya hətkwa cek hay a la. Da ndaw ta hətar cek masa aa ma səkwa sem ta dey anga na, a səkwa cek aha saba maja cek aha aa fa dey anga cay. Ma da səkwa cek masa anga ma hətar sem ngene na, wa dəba wa? ²⁵ Aləkwa na, fa səkwa kwa cek masa aləkwa ma hətkwa ta dey aləkwa daa ba aran. Anda kefe, ya bəskwa mevel nga səkwa cek aha ta zazay.

²⁶ *Mesəfney nga Gazlavay fa jəndakwar may, maja aləkwa gədan pəreh daa cəved nga Gazlavay. Kwa ya sərkwā cek masa aləkwa ma daa cəfdakwa fa Gazlavay ba. Ama Mesəfney nga Gazlavay a, ta ray anga, fa dərər dangay a Gazlavay aa slam a nga aləkwa. Aa cəfda Gazlavay ta mevel pal, aa guzlar a Gazlavay ta mey masa ma fənar ray a ndaw-magədan ngaa guzley. ²⁷ Gazlavay ma səra cek daa mevel nga ndaw na, a cənda cek masa Mesəfney anga ma wudəy, maja Mesəfney a faa cəfda Gazlavay amba a jənta ndəhay anga hay anda Gazlavay ma wudəy.

²⁸ Ngada ndəhay ma wudməra Gazlavay, ndəhay masa Gazlavay ma zəlta nga key cek anda anga ma wudəy na, ya sərkwā cek hay tabiya masa ata ma hətam na, ara Gazlavay ma ka amba a tərey nga cek maaya ngada ata.

²⁹ Dəga zleezle na, Gazlavay ta walata ndəhay anga hay cay. Asaya, ara anga ma wudəy nga tərdata ndəhay anga hay a anda Bəzey anga. A ka anda kefe na, amba Bəzey anga a tərey bəzey maa-mey-ndaw da wuzlah ndəhay nga Gazlavay masa anda məlman hay ga. ³⁰ Yaw, ndəhay masa Gazlavay ma walata ngene na, Gazlavay ta zəltərwa la nga

8:23 8.23 2Kwr 5.2-5; Ef 4.30
2Kwr 4.18 **8:27** 8.27 Ps 139.1
1.18; Heb 1.6

8:24 8.24 2Kwr 5.7; Heb 11.1
8:28 8.28 Jəw 2.10; Ef 1.11

8:25 8.25
8:29 8.29 Kwa

key ndəhay anğa hay may. Daa masa aa ma zəлта ha na, ta pata la nğa ndəhay maaya fa mey anğa may. Asaya, ndəhay masa aa ma pata nğa ndəhay maaya fa anğa na, ta handata sem aa slam anğa mewedey may.

Gazlavay a wudndakwar mandaw mandaw

³¹ Kaa wure kedə na, mey mambəkakaya nğa ləvey daha saya daw? Gazlavay aa ta aləkwa, kaa ma da gwa a ray aləkwa na, wa? ³² Gazlavay ta bədərwa Bəzey anğa daa ba, ama ta slərdərwa la a bəla nğa məcey maja aləkwa tabiya. Anda Gazlavay ma slərdandakwara Bəzey anğa na, fara fara a vəldandakwara cek hay tabiya la may.

³³ Ma gwa nğa mbədtar ray nğada ndəhay masa Gazlavay ma walata na, wa? Kwa ndaw pal ma gwa daa ba, maja ara Gazlavay ma tərdata nğa ndəhay masa maaya fa mey anğa. ³⁴ Ndəhay masa Gazlavay ma walata na, ma gwa nğa təfdata ta sariya na, wa? Kwa ndaw pal ma gwa daa ba, maja Yesu *Kəriste ta məcey la, ta sləkɖawa sem daa meməcey, wure kedə aa manjakaya ta har-zəmay nğa Gazlavay, fa dərey dangay maja aləkwa. ³⁵ Ma da wunkandakwar ta Kəriste amba a wudndakwar saba na, me? Kwa aləkwa daa banay, kwa mewulkey fa həbndakwar ray, kwa ndaw a cakalafandakwar mey, kwa aləkwa daa may, kwa aləkwa daa viya, kwa anja ndaw a wudəy nğa kandakwar cek maaya ba, kwa ndaw a kəfndakwar vagay na, cek hay a cəpa nğene, a gwa nğa wunkandakwar ta Kəriste ba. ³⁶ Anda mawuzlalakaya daa dərəwel nğa Gazlavay, ma ləvey:

«Bay Gazlavay, ndəhay fa səpmandar mandaw mandaw nğa kədey vagay maja ala ndəhay akah hay. Fa mey nğa ndəhay na, ala * anda təban hay masa ma handamata nğa hərey.»

³⁷ Ta nğene he cəpa, ya kakwa bay-gula la da ray banay hay a nğene tabiya ta gədan nğa ndaw ma wudndakwar kalah.

³⁸ Ahaw, ya sərə fara fara cek ma gwa ma wunkandakwar ta ndaw masa ma wudndakwar kalah ha na, daa ba. Kwa ya məckwa, kwa aləkwa ta dey, kwa maslan hay nğa Gazlavay, kwa gədan nğa bay hay masa da bəla kedə ta gədan nğa mesəfney hay masa daa memed, kwa cek hay ma kam wure kedə ta cek hay ma da kam nğada fa mey, ³⁹ kwa maazla

8:30 8.30 1.7; 5.2; 2Tes 2.13-14 **8:31** 8.31 Ps 118.6 **8:31** 8.31-34 Iz 50.8-9

8:32 8.32 5.8; Jan 3.16 **8:34** 8.34 4.25; SNM 2.33; Heb 7.25; 1Jn 2.1 **8:35**

8.35 2Kwr 5.14 * **8:36** 8.36 ala: Daa Ps 44.23aa guzley da ray səkway nğa Jəwif hay, ama fedə na, Pawl aa guzley da ray ndəhay nğa Yesu. **8:36** 8.36 Ps 44.23; 2Kwr 4.11 **8:37** 8.37 1Jn 5.4-5 **8:38** 8.38 Ef 1.21; 1Kwr 3.22; 15.24; 1Pi 3.22

hay da gazlavay da vad, kwa daa vøgedŋ nga awaw magaza, kwa cek wura wura mekele masa Gazlavay ma katørwa, kwa meeme cøpa a gwa nga wunkandakwar ta mewudøy-vaw nga Gazlavay ba. Ara mewudøy-vaw masa anŋa ma wuzdørwa ta fa Yesu Køriste, Bay aløkwa Mahura.

9

Mey da ray Israyel hay, ndøhay masa Gazlavay ma walata

¹ Mey masa yah ma daa guzlda kede na, ara mey fara fara, ya mbørzley ba, maja yah na, ndaw nga *Køriste. Asaya, *Mesøfney nga Gazlavay fa wa mewulkey adaw, mewulkey adaw a fa wuzda, mey masa yah ma kada kede na, ara mey fara fara. ² Ya wudøy nga løyey na, mewulkey fa da køfya, mevel fa caya mandaw mandaw ³ da ray sækway adaw hay *Jøwif hay. Ala na, nga way ala pal. Da Gazlavay a søra na, nga nøyaya, nga wunkandar ta Køriste amba mølma adaw hay Jøwif a døyam. ⁴ Ata daa sækway nga *Israyel hay. Gazlavay ta walata sem nga tøram böz anŋa hay, ta wuzdatara gødan anŋa la, ta jøwam mey la ta ata, ta wuzdatara kwakwas anŋa la, ta wuztar cøvedŋ la amba a dørmar danŋay, ta wuzdatara cek maaya masa aa ma løyey a da vøldatara heyey la. ⁵ Ata na, ndøhay daa sækway nga papanŋ nga papa aløkwa hay zleezle *. Yesu Køriste may, daa masa anŋa ndaw-magødan na, anŋa ndaw daa sækway a. Ama ta nŋene he cøpa na, ta tømara mey anŋa daa ba. Køriste he na, ara ndaw ma wata cek hay tabiya. Anja ndøhay nga hølmmara Gazlavay nga sørmataw. Amen.

⁶ Ya wudøy nga løyey mey masa Gazlavay maa guzlda na, ta key anda aa ma løyey daa ba na, køne ba. Mey a ta key la. Ama ya wudøy nga løyey, Israyel hay na, ara ndøhay nga Gazlavay cøpa ba. ⁷ *Abøraham ta yey bøza hay la. Ama bøza hay a cøpa na, ara böz anŋa hay fara fara anda Gazlavay ma løyey ba, maja Gazlavay taa guzlar la zleezle a Abøraham a, a løyar: «Ara ta fa bøza hay nga böz akah *Izak, slømay akah ma da zøley.» ⁸ Anda meløyey, bøza hay masa Abøraham ma yatørwa na, ata tabiya bøza hay nga Gazlavay ba. Ama bøza hay nga Gazlavay fara fara na, ara bøza hay masa Abøraham ma yatørwa maja Gazlavay ma

8:39 8.39 5.5; Jan 3.16; 2Kwr 13.13; Ef 1.4; 2.4; 1Tes 1.4; 2Tes 2.16 **9:2** 9.2-3 Mab 32.32 **9:4** 9.4 sækway nga Israyel hay: Mab 4.22; Aw 11.1; gødan nga Gazlavay: Mab 16.10; 24.16-17; 40.34-35; mejøwey-mey: MC 17.7; Mab 24.7-8; kwakwas anŋa: Mab 20-24; Gazlavay a da ka cek anda anŋa ma løyey: 3.2, 4; 4.13, 17; Gal 3.6, 14 * **9:5** 9.5 papanŋ nga papa aløkwa hay: Anda meløyey, Abøraham, Izak, lej Jakwap ta böz anŋa hay kuraw a ray a cew. **9:5** 9.5 15.8; Mab 3.6, 15; Køriste: Mt 1.1; Rm 1.3-4 **9:6** 9.6 3.3-4; 2.28-29 **9:7** 9.7 MC 21.12; Mt 3.9

løvar a da vølar bəza hay ga heyey. ⁹ Mey masa Gazlavay ma løvar a Abəraham a zleezle a da vølar cek heyey na, mey a, a lövey: «Haa kasl səfed anda kedə na, ya vəhwa la. Daa ŋgene, Sara ta yawa bəzey mezəle cay.»

¹⁰ Yaw, ara ŋgene daada ba. Rebeka may, ta yawa la, a yawa bəza hay cew. Ata ŋga papa ata pal. Papa ata ha na, ara dede aləkwa Izak zleezle. ¹¹⁻¹² Gazlavay a løvar a Rebeka: «Bəzey mahura na, a da kar sləra ŋgada mecəhe.» Gazlavay maa guzlar anda kedə na, daa masa bəza hay a, a sərmara ma key cek masa maaya ta maaya ba, ba aran, ara daa masa ata da hwađ mama ata đagay. Gazlavay ma lövey anda kedə na, ŋga wuzda aŋga na, fa key cek mandaw mandaw anda aa ma wufey. A weley ndaw masa aa ma wufey. A walata na, maja sləra masa ndaw a ma ka ba. ¹³ Anda mawuzlalakaya daa đerewel ŋga Gazlavay ma lövey:

«Ya weley na, Jakwap. Ezayu na, ya wuđa ba.»

¹⁴ Da kəne na, ya da lövkwa kwara dəba wura? Gazlavay a na, ara ndaw ma key cek ta cəved e ba dəba daw? Kay, kəne ba! ¹⁵ Gazlavay ta løvar la a *Mawiz zleezle: «Da ya wufey ŋga key maaya a ndaw na, ya ka. Asaya, da ya wufey ŋga sərey dey-ceceh fa ndaw na, ya sərfar.»

¹⁶ Anda kedə, da Gazlavay a kar maaya a ndaw na, ara maja ndaw a ma wufey ba, asaya, maja sləra ŋga ndaw a ma ka ba, ama ara maja Gazlavay ma sərfar dey-ceceh. ¹⁷ Daa đerewel ŋga Gazlavay na, Gazlavay a løvar a *Farawan, bay ŋga *Ejip: «Yah ma paka aa bay na, amba ya wuzdərwa gədan adaw ta fa kah, asaya, amba ndəhay da bəla cəpa a zəldamaya sləmay.» ¹⁸ Anda kedə, Gazlavay a gwa ŋga sərfar dey-ceceh a ndaw masa aa ma wufey, asaya, a gwa ŋga tərda ndaw ŋga macarakaya anda aa ma wufey.

Gazlavay a gwa ŋga key cek anda aa ma wufey

¹⁹ Da kwa ndaw a da lövya: «Da anda kedə na, Gazlavay a mbədtar ray a ndəhay na, fa me dəba me? Ndəhay a gwamara ŋga təkmarā cek masa aa ma wufey ŋga ka daw?» ²⁰ Kah ndaw-magədan ŋga tede, kah na, wa may wa, amba ka kada yawa ta Gazlavay na! Manğayak maləmkaya na, a gwa ŋga løvar a ndaw ma ləma: «Ka ləmya anda kedə na, maja me daw?» Kay, a gwa ba! ²¹ Ndaw ma ləma manğayak a gwa ŋga key cek ta hahay ŋga meləmey anda aa ma wufey. A gwa ŋga wunka hahay a cew, pal a

9:8 9.8 Gal 3.7; 4.23 **9:9** 9.9 MC 18.10, 14 **9:10** 9.10-12 MC 25.21-23; Rm 11.6 **9:13** 9.13 Mal 1.2-3 **9:14** 9.14 3.5; Mew 32.4 **9:15** 9.15 Mab 33.19; Mt 20.1-15 **9:16** 9.16 Ef 2.8 **9:17** 9.17 Mab 9.16 **9:18** 9.18 Mab 4.21; 7.3; 9.12; 14.4; 1Pi 2.8 **9:20** 9.20 Iz 29.16; 45.9

lɔmda maŋgayak wal membey kalah, laŋgar may, a lɔmda maŋgayak masa saw kɔne.

²² Yaw, da Gazlavay a ka anda ndaw ma lɔma maŋgayak na, mey akah da hwaɗ a me? Gazlavay a wuɗey ŋga wuzɗɔrwa na, aŋga fa cey mevel da ray ndɔhay, asaya, a wuɗey ŋga wuzɗɔrwa gɔɗaŋ aŋga a ndɔhay. Ama ndɔhay masa anja aŋga ma da cey mevel da ray ata ta masa aŋga ma da katar sariya ŋгаа zɔɗɗata na, fa bɔsta kwa ara mey ba cɔŋga. ²³ Gazlavay fa bɔsta na, amba a wuzɗatara gɔɗaŋ aŋga a ndɔhay. A wuɗey ŋga pa gɔɗaŋ aŋga ha a ray ndɔhay masa aŋga ma sɔrfatar dey-ceceh. Ta diyta la dɔga zleezle amba a hɔtam gɔɗaŋ aŋga ha. ²⁴ Ndɔhay a na, ara alɔkwa. Gazlavay a zɔlndakwar na, da wuzlah ndɔhay *Jɔwif hay daada ba, ama da wuzlah ndɔhay daa sɔkway mekele hay may. ²⁵ Ara anda Gazlavay maa guzley ta mey Awze, *ndaw ma tɔla mey aŋga, ma lɔvey:

«Ndɔhay masa ata ndɔhay aɗaw hay zleezle ba na,
ya da zɔlta ndɔhay aɗaw hay.

Nɔhay masa ya wuɗta ba zleezle na,
ya da zɔlta ndɔhay aɗaw hay mawuɗtakaya kalah.

²⁶ Daa slam masa yah ma lɔvtar la a ndɔhay:

“Akwar ndɔhay aɗaw hay ba” na,
yah, Gazlavay masa ta dey,
ya da zɔlta “bɔz aɗaw hay”..»

²⁷ *Izay, ndaw ma tɔla mey ŋga Gazlavay may, taa guzley la da ray *Israyel hay, a lɔvey: «Anja kwa Israyel hay ata ga a slɔfam ba anda mawurbay da wayam na, Gazlavay a da lɔhey daa meɓɔrey na, ndɔhay nekɔɗey da wuzlah ata gway. ²⁸ Fara fara Bay Gazlavay a da ka slɔra aŋga cɔpa fiyaw fiyaw da bɔla anda aa ma lɔvey.» ²⁹ Yaw, anda Izay a maa guzley dɔga zleezle saya, a lɔvey:

«Da Bay Gazlavay ma wa slam da vad tabiya
ta mbɔkndakwar ndɔhay nekɔɗey
daa sɔkway alɔkwa daa ba na,
anja ŋgene, ya ta paslakwa sem sle’
anda ndɔhay daa berney ŋga Sadawm ta ŋga Gwamar.»

Mey da ray mepey Yesu ŋga ndaw fara fara

³⁰ Kaa wure keɗe, ya da lɔvkwa na, kwara? Ya lɔvkwa ndɔhay *Jɔwif hay ba na, fa sɔpam cɔved amba Gazlavay a pata ŋga ndɔhay maaya fa mey aŋga na, daa ba. Ama Gazlavay a pata ŋga ndɔhay maaya fa mey aŋga na, maja

ata ma pamara *Kəriste nga ndaw ata fara fara. ³¹ *Israyel hay na, fa səpam *kwakwas nga Mawiz amba Gazlavay a pata nga ndəhay maaya fa mey anğa. Ama ta hətam amba a pata nga ndəhay maaya fa mey anğa ha anda kwakwas a ma wudəy na, daa ba. ³² Ta hətam daa ba maja me? Maja a wulkam Gazlavay a da pata nga ndəhay maaya fa mey anğa na, ta fa cek masa ata ma kamara gway. Fa pamara Gazlavay nga ndaw ata fara fara na, daa ba. Anda kedə, salay ata ta kədəy sem fa anğwa mekey mecembədəy a ndəhay, ³³ anda mawuzlalakaya daa dərewel nga Gazlavay ma ləvey: «Nəka, daa berney nga Siyanw na, ya da pey anğwa mekey mecembədəy a ndəhay, ara anğwa ma təfdata ndəhay. Ama kwa waawa ma zləmbey ta anğwa † ha na, a zəley marava daa ba səlak.»

10

Mey da ray Jəwif hay ma da ləham

¹ Məlma adaw hay, cek masa yah ma wudəy ta mevel adaw cəpa na, anja Gazlavay nga ləhdata səkway adaw hay *Jəwif hay daa mebərey. Ya fa dərey dangay mandaw mandaw maja ata. ² Ya gwa ya ləvey ata na, ta vəldamara ray ata la ta mevel ata cəpa nga səpey cəved nga Gazlavay. Kwa ta səpmara cəved e la ta mevel ata cəpa na, ama ta sərmara cəved masa fara fara na, daa ba. ³ Ata ta sərmara nga səpey cəved masa amba Gazlavay a pata nga ndəhay maaya fa mey anğa na, daa ba. A səpam amba Gazlavay a pata nga ndəhay maaya fa mey anğa na, ta fa cek hay masa ata ma kamara ta har ata gway. Anda kedə, cəved fara fara masa Gazlavay ma da pata nga ndəhay maaya fa mey anğa na, a wudam ba. ⁴ Fara fara, dəga *Kəriste ma sawa a bəla na, gədanj nga *kwakwas nga Mawiz ta ndəvey sem. A key anda kedə, amba Gazlavay a pey nga ndəhay maaya fa mey anğa na, ndəhay ma pamara nga ndaw ata fara fara.

Mey da ray ndəhay daa səkway wura wura ma da ləham

⁵ Masa *Mawiz maa guzley zleezle da ray ndaw ma wudəy amba Gazlavay a pa nga ndaw maaya fa mey anğa maja aa ma səpa kwakwas anğa na, a ləvey: «Ndaw ma səpa kwakwas a mandaw mandaw, ma rəsa ba səlak na, a hətey heter la ta fa kwakwas a.» ⁶ Ama cəved amba Gazlavay a

9:30 9.30 10.20 **9:31** 9.31 10.2-3 **9:32** 9.32 4.4-5 † **9:33** 9.33 anğwa: A wudəy nga ləvey Yesu. Kwa waawa ma zləmbey ta anğwa ha na, anda meləvey, kwa waawa ma təba mey nga Yesu a. **9:33** 9.33 Iz 8.14; 28.16; 1Pi 2.6-8 **10:1** 10.1 9.1-3 **10:2** 10.2 SNM 22.3 **10:3** 10.3 1.17 **10:4** 10.4 Gal 3.24-25
10:5 10.5 Lev 18.5; Gal 3.12

pa ndaw nga ndaw maaya fa mey anga maja aa ma pa nga ndaw anga fara fara na, cøved e anga wal. Mawuzlalakaya daa ðerewel nga Gazlavay da ray cøved e, a løyey: «Kah ndaw-magødan, ka da wulkey daa mevel akah, ka løyey ma da tøyey a gazlavay a vad na, wa?» na, ka da løyey køne ba. Anda meløyey, ka da løyey «Ma da tøyey a gazlavay a vad nga bønngadørwa *Køriste na, wa?» na, ka da løyey køne ba. ⁷ Asaya, «Ma da gwa nga mbøzey a wuzlah ndøhay mamøctakaya na, wa?» na, ka da løyey køne ba may. Anda meløyey, ka da wulkam amba ndaw a daw a wuzlah ndøhay mamøctakaya nga zølwa Køriste na, køne ba. ⁸ Mawuzlalakaya daa ðerewel nga Gazlavay, a løyey: «Mey nga Gazlavay aa da cakay akah, ba na, dørenj ta kah ba. Aa da baazlam akah ta daa mevel akah.» Yaw, mey a na, ara mey masa ala ma wuzdamatara ngada ndøhay amba a tøbmara. ⁹ Da kah ta mey akah, kah maa guzley la fa mey nga ndøhay, ka løyey: «Yesu na, ara Bay Mahura,» asaya, da ka ta tøba la ta mevel akah cøpa Gazlavay ta sløkdadørwa sem daa memøcey na, ngene, Gazlavay a løhdaka la. ¹⁰ Ndaw ma pa Gazlavay nga ndaw anga fara fara la na, Gazlavay a, a pa ndaw aha nga ndaw maaya fa mey anga la. Asaya, ndaw maa guzley ta mey anga, a løyey: «Yesu ara Bay Mahura» na, Gazlavay a løhda ndaw a la. ¹¹ Ahaw, mawuzlalakaya daa ðerewel nga Gazlavay, a løyey: «Kwa waawa ma pa Gazlavay nga ndaw anga fara fara na, a zøley marava daa ba sølak.» ¹² Anda keðe, ndaw *Jøwif ta ndaw Jøwif ba na, ata letek. Ata cøpa bay ata na, pal, ara Bay Mahura, ndaw ma katar maaya daa masa ata faa cøfdamara nga jønta. ¹³ Anda mawuzlalakaya daa ðerewel nga Gazlavay, ma løyey: «Kwa waawa maa cøfða Bay Mahura nga løhda na, Bay Mahura ha a løhda la.»

¹⁴ Kaa da ndøhay ta pamara Bay Mahura ha nga ndaw ata fara fara daa ba na, a daa cøfdamara nga løhdata na, kwara? Yaw, kaa da ndøhay ta cøndamara mezøley nga Bay Mahura ha daa ba na, a da pamara nga ndaw ata fara fara ha na, kwara? Asaya, kaa da ndaw ta wuzey mey da ray Bay Mahura ha daa ba na, ndøhay a da cøndamara mey da ray a na, kwara? ¹⁵ Kaa da ndøhay maslørdatakaya nga wuzey mey a daa ba na, a da wuzdamara mey da ray Bay Mahura ha na, kwara? Anda mawuzlalakaya daa ðerewel nga Gazlavay, ma løyey: «Cek ma mbey anda ndøhay ma diyam nga wuzey *Mey-maaya-mawiya a ndøhay na, daa ba.» ¹⁶ Ama ndøhay tabiya ta tøbmara Mey-maaya-mawiya

ha aa mevel ata na, daa ba. Ara anda *Izay, *ndaw ma tēla mey nga Gazlavay maa guzley zleezle, ma lōvey: «Waa Bay Gazlavay, ma tēba mey ala masa ala ma wuzdamara da ray akah na, wa?»¹⁷ Anda keđe, amba ndaw a tēba mey nga Gazlavay na, si a cēnda mey a la d'agay. Mey masa aa ma cēnda ha na, ara mey nga Kēriste.

¹⁸ Da anda keđe na, ya wuđeey nga sēra Jēwif hay na, ta jēkam slēmay fa Mey-maaya-mawiya ha daa ba fara daw? Fara fara, ta jēkam slēmay la. Ara anda mawuzlalakaya daa đerewel nga Gazlavay, ma lōvey:

«Ndēhay ta diyam la nga wuzey mey nga Gazlavay da bēla tabiya.

Day ata ta cēney la aa wura aa wura cēpa, kwa aa slam masa dōrej.»

¹⁹ Ya wuđeey nga sēra saya, *Israyel hay na, ta cēdamara mey a daa ba fara daw? Fara fara ta cēdamara la, ama ta gēmam nga tēbmara daa ba. Ya sēra anda keđe na, maja Gazlavay taa guzlar la dēga zleezle ta mey Mawiz, a lōvey:

«Ya da tērdakwar nga ndēhay ma ka sēlej fa ndēhay daa sēkway hay saw kōne.

Ya da ka amba mevel akwar a cey a ray ndēhay masa daa sēkway hay manjar lenjesl.»

²⁰ Fa dēba ha Izay may, ta zluzey ngaa guzley daa ba, a lōvey:

«Gazlavay a lōvey:

Ndēhay masa ta sēpmaya daa ba na, ta hētmaya la ta dey ata.

Ya ta wuzda vaw adaw la ngada ndēhay masa kwa maa cēfdamara mey adaw daa ba.»

²¹ Da ray ndēhay Israyel hay na, Gazlavay taa guzley la saya ta mey Izay, a lōvey:

«Ya vērndeey hipas, har adaw mawurkaya nga tēbtērwa ndēhay ma kam hēma a ray adaw amba a vēmawa, ama ata ta cēnmaya mey daa ba.»

11

Mey da ray Gazlavay ma sērfatar dey-ceceh a Israyel hay

¹ Yaw, ya wuđeey nga sēra saya, da anda kaa na, Gazlavay ta mbēdtar dēba sem a ndēhay anga hay *Israyel hay daw? Kay, daa ba sēlak! Yah ray adaw na, yah ndaw Israyel, yah daa sēkway nga Benjamenj. Benjamenj e may, ara ndaw daa sēkway nga *Abēraham. ² Fara fara, Gazlavay ta

10:16 10.16 Iz 53.1; Janj 12.38 **10:17** 10.17 Janj 17.20 **10:18** 10.18 Ps 19.5

10:19 10.19 Mew 32.21; Rm 11.11 **10:20** 10.20 Iz 65.1; Rm 9.30 **10:21**

10.21 Iz 65.2 **11:1** 11.1 SNM 22.30; 2Kwr 11.22; Gal 1.13-14; Fēl 3.5

mbødtar dōba a ndøhay anga hay Israyel hay masa aa ma walata dōga zleezle na, daa ba. Ka sərɔfadamara mey mawuzlalakaya daa ɔerewel nga Gazlavay da ray *Eli ma tøway fa mey nga Gazlavay maja Israyel hay heyey saba daw? A løyey: ³ «Waa Bay Gazlavay, ta kəɔmata ndøhay ma tōla mey akah hay sem cōpa vagay, mendørey yah pal taava aɔaw. Fa səpmaya nga kəɔey vagay may. Asaya, ta bəzlmata slam hay mefəkey cek ngada kah sem.» ⁴ Kaa Gazlavay a mbøɔdara a Eli a na, kwariya? A mbøɔdara, a løyar: «Kay, mendørey kah pal taava akah ba! Ya ta bøy ndøhay gabal maasala la ngada yah. Ara ndøhay masa ta namar ray ngada kuley mezøley Bal daa ba.» ⁵ Yah, Pawl, ya fa løykwar, kwa haa wure keɔe na, anga letek kōne may, Gazlavay ta mbøkey ndøhay siya la da wuzlah Israyel hay masa anga ma walata maja anga ma sərɔfatar dey-ceceh. ⁶ Gazlavay a walata ndøhay a na, maja anga ma sərɔfatar dey-ceceh, ba na, maja sløra ata ba. Anja da a walata maja sløra ata na, ngene ta sərɔfatar dey-ceceh daa ba.

⁷ Kaa wure keɔe, mey a, a wuɔey nga løyey na, kwara? Israyel hay na, ta hətam cek masa ata ma səpmara na, daa ba, si ndøhay nekəɔey masa Gazlavay ma walata na, ta hətam la. Har-gəɔarəŋ nga ndøhay da wuzlah ata na, ta wuɔam nga cəndamara ɔay nga Gazlavay na, daa ba. ⁸ Anda mawuzlalakaya daa ɔerewel nga Gazlavay, ma løyey: «Gazlavay ta ngərɔɔatara ray ata sem, ta wulfatara dey ata sem, ta dəzltara slømay ata sem, haa wure keɔe ata kōne cəŋga.» ⁹ Bay *Davit taa guzley la saya, a løyey:

«Cek hay masa ata ma zəmamara ngene na,
 nga kərzata fa ɔay anda ngam-ngam ma kərzey cek,
 anja nga tøyey nga vøgeɔ amba a təɔam a hwad a,
 a səram banay təɔe fa sløra ata.

¹⁰ Anja dey ata nga wulfey amba a hətmar dey saba,
 anja nga gəɔdamara dōba mandaw mandaw
 maja banay ata.»

¹¹ Ya wuɔey nga səra mey a saya, *Jøwif hay ma zlanɔadam daa cəveɔ nga Gazlavay na, ta zlanɔadam sem nga tar fara daw? Kay, daa ba səlæk. Ama maja mebørey masa ata ma kamara na, ndøhay masa Jøwif hay ba hay ata ta cəveɔ nga løyey daa mebørey. A key anda ngene na, amba Jøwif hay a, a kam səløy ta ndøhay masa Jøwif hay ba hay. ¹² Jøwif hay ta kam mebørey la, maja ngene, Gazlavay ta katar maaya la a ndøhay da bəla tabiya. Jøwif hay

ta zlanɣadam sem daa cøved ŋga Gazlavay, maja ŋgene, Gazlavay ta', a pøstar mey a ndøhay masa Jøwif hay ba hay. Yaw, da Gazlavay ta katar maaya la a ndøhay masa Jøwif hay ba hay maja Jøwif hay ta zlanɣadam sem daa cøved ŋga na, kaa wara a katar maaya ma føna ta pas masa ndøhay Jøwif hay tabiya ma da vøhmawa fa vøða ŋga løhey, ba daw?

Mey da ray ndøhay masa Jøwif hay ba hay ma da løham

¹³ Wure keðe, ya wudey ŋgaa guzlkwar ŋgada akwar ndøhay masa *Jøwif hay ba hay. Yah na, *ndaw-meslørey ŋga Yesu masa Gazlavay ma slørdørwaa ŋga wuzey mey ŋgada akwar ndøhay masa Jøwif hay ba hay. Ya faa sømey ga da ray sløra aðaw a. ¹⁴ Ya wudey na, søkway aðaw hay Jøwif hay a nøkam dey fa sløra masa yah ma ka da wuzlah ndøhay masa Jøwif hay ba hay, a søpam cøved amba Gazlavay a løhdata may. ¹⁵ Masa Gazlavay ma mbøðtar døða sem a ndøhay aðaw Jøwif hay na, ta', a cømtar ðay ŋga ndøhay siya da bøla ta ŋga ray ŋga. Da anda keðe na, ta pas masa Gazlavay ma da tøbta aa slam a na, ma da key na, me? Cek maaya a key la. Ndøhay masa mamøctakaya a sløkðamawa la daa memøcey.

¹⁶ Sømara, da ta cam peŋ la teesed ŋga vøley ŋgada Gazlavay na, peŋ e siya tabiya na, ara ŋga Gazlavay a may. Asaya, da a vølmar slaslalay hay ŋga wudez na, mey-har hay ŋga wudez e cøpa ŋgada ŋga may. ¹⁷ Søkway ŋga *Israyel hay na, ŋga anda wudez maaya marøvkaya masa mey-har hay siya maðøsltakaya. Ama akwar masa Jøwif hay ba na, akwar anda mey-har hay ŋga wudez saw manjøbtakaya fa wudez maaya marøvkaya masa mey-har hay siya maðøsltakaya heyey. Wure keðe, ka da høtam cek maaya maja akwar manjøbtakaya fa wudez maaya heyey.

¹⁸ Da anda kaa na, ka da røsmata ndøhay masa anda mey-har hay ŋga wudez maðøsltakaya ŋgene ba. Akwar fa zlapam da ray ata na, maja me? Akwar na, mey-har hay gway. Ma kørza slaslalay na, ara mey-har hay ba, ama ara slaslalay ma kørza mey-har hay, ba diya?

¹⁹ Da kwa ndøhay siya da wuzlah akwar a daa guzlam, a løvam: «Gazlavay a ðøslta mey-har hay a na, amba a njøbey yah aa slam aha.» ²⁰ Ahaw, køne fara. Ama Gazlavay a ðøslta na, maja ata ma pamara ŋga ndaw ata fara fara daa ba. Yaw, ŋga ma njøbkwar aa slam ata na, maja akwar ma pamara ŋga ndaw akwar fara fara. Maja ŋgene, ka da zlapam saba, ama maaya na, ka zluram ta Gazlavay.

²¹ Jəwif hay na, ara ndəhay masa mapatakaya anda mey-har nga wudez masa maaya. Da Gazlavay ta sərfatar dey-ceceh daa ba na, ka wulkam a sərfakwar dey-ceceh la daw?

²² Nəkmara, Gazlavay na, a gwa a key maaya a ndaw, asaya, a gwa a cey mevel a ray ndaw may. Anğa na, fa cey mevel da ray ndəhay masa ma zlangadəm sem daa cəved anğa. Ama faa həmdakwar, akwar ndəhay masa daa cəved anğa. Si ka kamar cek ma mbafar mandaw mandaw, da daa ba na, a da dəsłkwar anda mey-har hay nga wudez e may. ²³ Jəwif hay na, da ata ta vəhmawa sem aa cəved nga Gazlavay, a pamara nga ndaw ata fara fara na, Gazlavay a, a njębta la aa slam ata fa wudez masa maaya heyey saya, maja Gazlavay aa ta gədan nga vəhdatərwa, a njębta aa slam ata cənga. ²⁴ Akwar ndəhay masa Jəwif hay ba, akwar na, anda mey-har hay nga wudez saw da ley masa ma dəsłmərwa nga njębey fa wudez masa maaya. Yaw, da Gazlavay ta gwa nga ka cek masa ta banay anda keđe sem na, ka wulkam anğa ta banay amba a vəhdatərwa Jəwif hay masa mapatakaya ta cakay heyey aa slam ata daw?

Mey da ray Israyel hay ma da ləham daa mebərey

²⁵ Məlma adaw hay, ya wufey ka sərmara mey mabadakaya daha, amba ka pamara ray akwar nga ndəhay ma səra cek kalah ba. Ahaw, *Israyel hay siya na, ray ata manğərdakaya. Ama ta pas masa ndəhay *Jəwif hay ba hay masa Gazlavay ma wufey nga ləhdata ta ləham cay na, Israyel hay siya hay a na, a mbəddamara menjey ata la, a pamara Gazlavay nga ndaw ata fara fara. ²⁶ Anda keđe na, Gazlavay a ləhdata ndəhay Israyel hay la cəpa anda mawuzlalakaya daa dərəwel anğa ma ləvey:

«Ndaw ma da ləhdata ndəhay a da bawa

daa anğwa nga *Siyanjw* .

A da mbəkdatara mebərey nga ndəhay daa səkway nga Jakwap.

²⁷ Keđe he na, ara *mejəwey-mey adaw ta ata ta pas masa yah ma da mbəkdatara mebərey ata.»

²⁸ Ata ta təbmara *Mey-maaya-mawiya daa ba, anda keđe, ta təram sem nga masa-gəra hay nga Gazlavay. A key anda keđe na, amba akwar ndəhay Jəwif hay ba hay na, Gazlavay a ləhdakwar daa mebərey. Ama taa slam langar Gazlavay ta walata la maja ata na, ndəhay anğa hay mawudtakaya kalah, asaya, maja ta jəwam mey la ta papan nga papa ata hay zleezle. ²⁹ Da Gazlavay ta wala ndaw sem, asaya, da

11:25 11.25 Mt 24.14; Jan 10.16 * **11:26** 11.26 anğwa nga Siyanjw: A wufey nga ləvey ndəhay Jəwif hay, da daa ba, berney nga Jeruzelem. **11:26** 11.26-27 Iz 59.20-21; 27.9; Jer 31.33-34

ta kar maaya la a ndaw a na, a da njeý anda ñgene, fa da mbødda mewulkey aña daa ba. ³⁰ Akwar ndøhay masa Jøwif hay ba hay na, zleezle akwar fa namar ray a Gazlavay daa ba. Ama Gazlavay ta sørfakwar dey-ceceh la wure keðe, maja ndøhay Jøwif hay ma namar ray ba. ³¹ Wure keðe masa ata ma namar ray a Gazlavay ba ñgene na, Gazlavay ta sørfakwar dey-ceceh la aa slam a ñga ata. A key anda keðe amba ata may, a mbøddamara menjeý ata amba Gazlavay a sørfatar dey-ceceh. ³² Yaw, anda keðe, Gazlavay na, ta vøltar cøved la a ndøhay tabiya amba a namar ray ba. A ka anda keðe amba aña may, a sørfatar dey-ceceh a ndøhay ndav.

Mey da ray gødan ñga Gazlavay

³³ Nøka! Gazlavay fa sørfatar dey-ceceh fara fara a ndøhay. Aña ndaw ta lengeßl, a sërta cek hay tabiya. Cek masa daa mevel aña na, ndaw ma gwa ñga søra daa ba. Cek masa aa ma wuðey ñga ka na, ndaw ma gwa ñga søra daa ba. ³⁴ Anda mawuzlalakaya daa ðerewel ñga Gazlavay ma løvey:

«Ma søra mewulkey ñga Gazlavay na, wa?

Ma gwa ñga køta Bay Gazlavay na, wa?

³⁵ Ma vølar cek a Gazlavay

ma føna cek masa aa ma vøldara na, wa?

Kwa ndaw pal daa ba sølak.»

³⁶ Ma lømtørwa cek hay cøpa na, ara aña. Fa nøkfatar dey fa cek hay a tabiya amba cek hay a, a njam na, dasi har aña. Anja ndøhay ñga hølmmara Gazlavay ñga sørmataw. *Amen.

12

Ya da kakwar sløra a Gazlavay na, kwara?

¹ Mølma aðaw hay, Gazlavay ta sørfakwar dey-ceceh la ga kalah. Anda keðe, ambahw, vøldamara ray akwar tabiya ñgada aña. Da ka vøldamara ray akwar tabiya ñgada aña ha na, a key ñgene, ka vølmar cek maaya ma mbafar. Keðe ara cøved masa fara fara ñga ney ray a Gazlavay.

² Ka da søpam kwakwas ñga ndøhay masa da bøla keðe ba. Vølmar cøved a Gazlavay ñga wey da ray akwar amba mewulkey akwar a mbøðey, mevel akwar a key maaya. Da akwar fa kamara anda keðe na, ka sørmara cek masa Gazlavay ma wuðey la. Anda meløvey, ka sørmara cek masa maaya, ma mbafar, masa fara fara anda aña ma wuðey.

11:29 11.29 3.3-4; 15.8 **11:32** 11.32 3.22; Gal 3.22 **11:33** 11.33 Jøw 11.7; Ps 139.17 **11:34** 11.34 Jøw 15.8; Iz 40.13 **11:35** 11.35 Jøw 41.3 **11:36** 11.36 16.27; 1Kwr 8.6 **12:1** 12.1 6.13; 1Pi 2.5 **12:2** 12.2 Ef 4.22-24; 1Tes 5.21

³ Gazlavay na, ta kaya maaya la, ta paya la nga ndaw anga meslərey. Ara maja ngene, ya fa ləvkwar ngada akwar tabiya, ndaw a da pa ray anga nga ndaw mahura ma fəna gədan anga ba. Ama kwa waawa nga nəka gədan anga amba a səra anga na, kwara. Kwa waawa nga nəka menjey anga təfe ta masa aa ma təba mey nga Gazlavay ngene na, cay gway. ⁴ Ka səmra kwa waawa da wuzlah akwar na, anga ta vaw pal, ama mezəvey hay fa vaw a na, ata ga. Kwa mezəvey wura wura na, anga ta sləra anga wal. ⁵ Aləkwa may kəne, aləkwa ga, ama aləkwa cəpa ya ta tərkwə sem nga vaw pal maja aləkwa macəmkaya ta *Kəriste. Aləkwa tabiya macəmkaya pal anda mezəvey nga vaw macəmkaya fa vaw nga ndaw pal. ⁶ Gazlavay ta vəldakwar gədan la mekele mekele anda aa ma wufey nga vəlda a ndaw a, ndaw a. Anda kefe, kwa waawa nga kada sləra ta gədan masa Gazlavay ma vəldara ha. Da ndaw anga ta gədan nga təley mey nga Gazlavay na, nga təley mey masa Gazlavay ma wuzdara ngene gway. ⁷ Da ndaw aa ta gədan nga jəney ndəhay na, maaya a jənta. Da ndaw aa ta gədan ngaa sərkedey ndəhay na, maaya aa sərkadata. ⁸ Da ndaw aa ta gədan nga dəktar mevel a ndəhay amba a hətam gədan na, maaya a dəktar mevel. Da ndaw aa ta gədan nga wunka cek anga ta ndəhay na, nga vəlda ta mevel maaya. Da ndaw aa ta gədan nga key *bay-ray daa *mecəmey-ray nga ndəhay nga Yesu na, nga ka sləra anga ta cəved e. Da ndaw aa ta gədan nga key maaya a ndəhay masa daa banay na, nga katara ta meesəmey.

⁹ Si ka wufam vaw da wuzlah akwar ta mevel pal, ba na, ka da wufam vaw ta mey daada ba. Ka da təbmara nga key cek hay malamba ba. Ama səpam na, nga key cek masa maaya ta cəved e. ¹⁰ Wufam vaw da wuzlah akwar maja akwar cəpa na, məlman hay daa mecəmey-ray nga ndəhay nga Yesu. Anja kwa waawa nga nar ray a ndaw a, ndaw a da wuzlah akwar ta mevel maaya. ¹¹ Vəldamara ray akwar nga key sləra ta gədan akwar cəpa. Ka da tərəm ndəhay masa-mayaf hay ba. Kamar sləra a Bay Mahura ta mevel akwar ndav. ¹² Akwar fa səkwam cek masa Gazlavay ma ləvey a da vəldakwara. Anda kefe, sasəmam mandaw mandaw. Da akwar daa banay na, bəsmara banay a. Kam gədan nga dərey danjay mandaw mandaw. ¹³ Ndəhay

12:3 12.3 1.5; Mt 20.26; 1Kwr 12.11, 28; Ef 4.17 **12:4** 12.4-5 1Kwr 12.27
12:6 12.6-8 1Kwr 12.4-11; 12.27-14.40; 1Pi 4.10-11 **12:7** 12.7-8 SNM 6.1-3;
 2Kwr 9.5, 7 **12:9** 12.9 2Kwr 6.6; 8.24; 1Tm 1.5; 1Pi 1.22; 1Kwr 13.4-7 **12:10**
 12.10 14.15; Jan 13.14-15; Gal 5.13; 6.3, 10; Ef 4.2; Fəl 2.2-3 **12:11** 12.11 8.9;
 Gal 5.25; CWJ 3.15 **12:12** 12.12 5.2-3; 8.24-25; Mt 24.13, 22; Lk 18.1; 1Kwr
 10.13; 1Tes 2.14

nga Gazlavay masa cek ata hay daa ba na, jønmeta, asaya, tømata maaya maaya a way akwar hay.

¹⁴ Ndøhay masa ma sørdamakwar banay na, cacødfamara Gazlavay nga pøstar mey. Cacødfam na, amba Gazlavay a pøstar mey, ba na, a nøsta ba. ¹⁵ Yaw, da ndøhay ata daa meesømey na, sasømam bama. Da ndøhay ata daa matøway na, tøwam bama. ¹⁶ Akwar da wuzlah akwar na, njam ðay macømkaya letek. Ka da søpam nga tørey mahura da ray ndøhay siya daa mecømey-ray akwar ba. Kwa sløra masa wura wura na, kamara ta meney ray. Ka da pamara ray akwar nga ndøhay ma søra cek hay kalah ba.

¹⁷ Da ndaw ta kakwar cek maaya ba la na, ka da madamara a ndaw a ba. Ama søpam na, nga key cek hay masa maaya masa ndøhay maa hømdamara. ¹⁸ Anja da ka gwamara na, kam cek hay masa tøðe ta gøðan akwar amba ka njam ta ndøhay tabiya daa zazay. ¹⁹ Jam adaw hay, da ndaw ta kakwar cek maaya ba la na, ka da madamara a ndaw a ba. Mbøkdamara amba Gazlavay a cey mevel a ray a, maja mawuzlalakaya daa ðerewel nga Gazlavay, Gazlavay a løyey: «Cek masa ndaw ma ka maaya ba na, ma da pøla na, yah. Ara yah, ma da kar cek maaya ba.»

²⁰ Mawuzlalakaya daa ðerewel nga Gazlavay saya, a løyey: «Da masa-gøra akah, may fa car na, vølar cek nga zømey. Da yam fa kar na, vølar yam nga sey. Da ka fa ka køne na, hwaray a kar la, a mbøðda menjey anga la.» ²¹ Ka da mbøkda ray akah nga høbey maja ndaw ma kaka cek maaya ba amba ka madara na, køne ba. Ama si ka key cek maaya amba ka key bay-gula da ray cek maaya ba ha.

13

Mey da ray meney ray ngada bay-ray hay nga ngwamna

¹ Maaya na, kwa waawa a natar ray ngada *bay-ray hay nga ngwamna, maja kwa waawa ma key bay-ray na, ara Gazlavay ma vøldara. Yaw, bay-ray hay tabiya nga ngwamna na, ara Gazlavay ma pata. ² Anda kedø, kwa waawa ma natar ray ba na, a key ngenø a mbøkda cøved masa Gazlavay ma wudøey. Ndaw ma natar ray a bay-ray hay a ba na, sariya a tøðda la. ³ Ndaw ma key cek ta cøved e na, a zlurey ta bay-ray hay nga ngwamna ba, ama ndaw ma key cek ta cøved e ba na, si a zlurey ta ata.

12:13 12.13 Gal 6.10; Heb 13.2 **12:14** 12.14 Mt 5.44 **12:15** 12.15 Jøw 30.25; 1Kwr 12.26; 2Kwr 11.29 **12:16** 12.16 MM 3.7; 1Kwr 1.10-11, 19-20, 27-28; 8.1
12:17 12.17 MM 20.22; 1Kwr 6.7; 1Tes 5.15; 1Pi 3.9 **12:19** 12.19 Mew 32.35; Mt 5.39 **12:20** 12.20 MM 25.21-22; Mt 5.44 **13:1** 13.1 MM 8.15-16 **13:1** 13.1-7 SNM 5.29; Tit 3.1; 1Pi 2.13-14; CWJ 13; 20.4

Ka wudam nga zlurey ta bay-ray hay nga ngwamna ba, ba diya? Anda kede, si ka kam cek ta coved e amba aa hɛdamakwar. ⁴ Fara fara bay-ray hay nga ngwamna na, fa kamar slɛra ngada Gazlavay nga jɛnkwar amba ka kam cek ta coved e. Ama da akwar fa kam cek ta coved e daa ba na, si ka zluram ta bay-ray hay a, maja ata ta gɛdan nga sɛrdamakwar banay. A da sɛrdamakwar banay a na, nga tede ba. Da ndɛhay ma ka cek ta coved e ba, bay-ray hay a fa sɛrdamata banay na, a key ngene, a kamar slɛra a Gazlavay. Anda kede, ata fa wuzdamɛrwa na, Gazlavay fa cey mevel a ray ndɛhay ma ka cek ta coved e ba. ⁵ Da anda kede na, aŋga maaya amba ka namatar ray a bay-ray hay nga ngwamna. Ka namatar ray na, maja Gazlavay ma da sɛrdakwar banay daada ba, ama maja ka sɛrmara ara cek ta coved e.

⁶ Ara maja ngene, akwar ma pɛlam budaw may. Ndɛhay ma cakala budaw a na, ara ndɛhay masa Gazlavay ma pata nga ka slɛra ha. ⁷ Cek masa ndɛhay nga ngwamna ata ta coved ngaa cɛdfafamakwar na, vɛldamatara. Da ara budaw na, vɛldamatara a ndɛhay ma cakala budaw a. Da ara dala nga cek mekele masa ngwamna maa cɛdfafakwar na, vɛldamara. Da ara nga ney ray ngada bay-ray hay nga ngwamna na, namatar ray.

Mey da ray menjey ta mewudɛy-vaw

⁸ Ka da njam ta dɛvaz nga ndaw da ray akwar ba. Ama dɛvaz pal da ray akwar daha amba ka pɛlmara mandaw mandaw. Dɛvaz a na, ara mewudɛy-vaw da wuzlah akwar. Ndaw ma wudɛy ndaw na, a key a nar ray fara fara ngada kwakwas nga Gazlavay. ⁹ Gazlavay a lɛvey: «Ka da ley vaw saw ba, ka da kɛdɛy ndaw vagay ba, ka da leley ba, ka da key dey fa cek nga ndaw ba.» *Mewey hay a kede ta siya hay cɛpa na, macɛmkaya daa mey pal ma lɛvey: «Wudɛ meseembew akah anda kah ma wudɛ ray akah.» ¹⁰ Ndaw ma wudɛy ndaw na, kwa fa da kar cek maaya ba ngada ndaw aha daa ba. Anda kede, da ka wudɛy ndaw na, a key ngene, ka nar ray maaya maaya a kwakwas nga Gazlavay.

Mey da ray mewey vaw nga sɛkwey Yesu ma da vɛhwa

¹¹ Wure kede na, ka sɛrmara, pas a ta wuswa cay. Ara pas masa akwar ma da slɛkɛfam daa ɛar. Ahaw, pas masa Gazlavay ma da lɛhdakwar da bɛla kede na, aa gweegwe cay. Pas a na, aa gweegwe da ray pas masa akwar ma

təbmara mey nga Yesu təlam heyey. ¹² Tavad fa ndəvey^{*}, mamba slam a wurey[†]. Anda keđe, ya da kakwa cek maaya ba anda ndəhay daa ləvanj saba. Ama jəwkwa vaw ta cek hay ma ka vəram nga key bay-gula da ray cek hay maaya ba anda ndəhay daa slam-mewedey. ¹³ Maaya na, menjey aləkwa a key maaya anda ndəhay daa slam-mewedey. Anda meləvey, ya da kakwa wasa malamba ba, ya da wakwa ba, ya da lakwa vaw saw da palah ba, ya da kakwa cek hay malamba ba, ya da tərkwə vaw ba, asaya, ya da kakwa sələnj fa cek nga ndaw ba may. ¹⁴ Anja maaya na, ka vəlmar cəved a Bay Mahura Yesu *Kəriste nga wey da ray akwar. Cek hay malamba masa akwar ma wudam kalah na, ka da kamara saba.

14

Mey da ray ndəhay masa ta gədanj leŋ da ray ndəhay masa ta gədanj pəreh

¹ Ndəhay masa ta gədanj pəreh daa mey nga Gazlavay na, təbmata a wuzlah akwar. Ka da mbədfmatar ray da ray mewulkey ata ba. ² Ya wudəy ngaa guzlkwar na, da ray cek mezəmey. Ndəhay siya a wulkam na, cek hay tabiya mezəmey. Anda keđe, ata na, a zəmamara cek hay tabiya. Ama ndaw masa ta gədanj pəreh daa mey nga Gazlavay na, a zlurey nga zəmey cek wura wura^{*}, a zəmey na, si gwaslaf nga lar daada gway. ³ Anda keđe, ndaw masa ma zəmey aslaw na, a da rəsa ndaw masa ma zəmey gwaslaf nga lar daada gway ba. Yaw, ndaw masa ma zəmey gwaslaf nga lar daada gway na, a da mbədar ray a ndaw masa ma zəmta cek hay tabiya ba may, maja ata cewete Gazlavay ta təbta sem, ta mbəkdata daa ba. ⁴ Kaa kah na, wa amba ka mbədar ray a ndaw ma ka sləra nga ndaw mekele na! Da ndaw a, a key sləra maaya, da a key sləra maaya ba na, si bay anja ma da nəka sləra anja ha gway. Fara fara, ndaw a, a key sləra ta cəved e la, maja Bay Mahura, bay anja, aa ta gədanj nga jəna ndaw ma ka sləra ha nga key sləra maaya.

13:11 13.11 Ef 5.14-16; 1Kwr 7.29-31 **13:11** 13.11-12 1Tes 5.5-8 ^{*} **13:12** 13.12 tavad fa ndəvey: Ara mey-menjey da ray bəla keđe ta ndəhay ma kam mebərey. A wudəy nga ləvey bəla gweegwe a ndəvey. [†] **13:12** 13.12 mamba slam a wurey: Ara mey-menjey da ray maaya nga Gazlavay ma da sawa a ray ndəhay. Ara pas masa aləkwa ma da njakwa ta Gazlavay da vad. **13:12** 13.12 Ef 5.11; 6.11, 13; 1jŋ 2.8 **13:13** 13.13 Lk 21.34; Ef 5.18 **13:14** 13.14 Fəl 2.5; Kwa 3.15 **14:1** 14.1 15.7 **14:1** 14.1-15.6 1Kwr 8.1-13; 9.22; 10.23-33; Kwa 2.16, 20-22; 1Tm 4.4-5; Heb 13.9 ^{*} **14:2** 14.2 a zlurey nga zəmey cek wura wura: Ndəhay a zluram nga zəmey cek wura wura na, maja aslaw masa kwakwas nga Jəwif hay ma təkə sem, a wudam nga zəmey ba, asaya, a wudam nga zəmey aslaw nga kuley ba. **14:2** 14.2 Dan 1.8; 1Kwr 10.25-28

⁵ Ndaw mekele a wulkey ɗar hay mekele na, maaya a fəna ɗar hay siya. Ndaw mekele saya a wulkey ɗar hay cəpa na, ata letək. Anda keɗe, anja kwa waawa ŋga səra cek masa anja ma wulkada daa mevel anja maaya maaya.

⁶ Ndaw masa ma wulkey ɗar hay mekele a fəna siya hay na, a key ŋgene, a wuɗey ŋga həslar ray a Bay Mahura Yesu. Yaw, ndaw masa ma zəmta cek hay cəpa na, a key ŋgene, a wuɗey ŋga həslar ray a Bay Mahura may, maja fa kar suse a Gazlavay fa cek hay masa anja ma zəmta ha. Asaya, ndaw masa ma zəmta cek hay cəpa ba na, a key ŋgene, a wuɗey ŋga həslar ray a Bay Mahura may, maja fa kar suse a Gazlavay fa cek hay masa anja ma zəmta ha.

⁷ Ya sərkwā, kwa aləkwa ta dey da bəla keɗe, kwa aləkwa ta məkwa sem na, ya wakwa ray aləkwa ba. ⁸ Daa masa aləkwa ta dey keɗe na, aləkwa manjatakaya ŋga kar sləra a Bay Mahura. Yaw, da masa aləkwa ma məkwa sem may, ya məkwa na, ŋga həslar ray a Bay Mahura. Anda keɗe, kwa aləkwa ta dey, kwa aləkwa mamətakaya na, aləkwa cəpa ndəhay ŋga Bay Mahura Yesu *Kərīste. ⁹ Sərmara, Kərīste ta məcey la, ama ta sləkɗawa sem daa meməcey a ŋga key bay ŋga ndəhay masa ta dey ta masa mamətakaya.

¹⁰ Da anda keɗe na, kah, ka mbəɗar ray a məlmakw, ka me? Kah, ka rəsa məlmakw, ka me? Aləkwa cəpa na, ya da nakwa fa mey ŋga Gazlavay, a kandakwar sariya. ¹¹ Anda mawuzlalakaya daa ɗerewel ŋga Gazlavay, ma ləvey:

«Yah, Bay Gazlavay masa ta dey, ya fa ləvey fara fara,
ndəhay tabiya a da ragadam fa mey aɗaw,
kwa waawa a da həslya ray,
a da ləvey yah na, Gazlavay anja.»

¹² Anda keɗe, kwa waawa a da kada cek masa anja ma ka fa mey ŋga Gazlavay.

Mey da ray mepey leŋgesl fa məlmanj hay mekele mekele

¹³ Da anda keɗe na, ya da mbəɗtakwar ray a məlma aləkwa hay saba. Ka da kam cek ŋga həlda məlmakw akwar ŋga key mebərey ba. ¹⁴ Yah na, yah ndaw ŋga Bay Mahura Yesu. Anda keɗe, ya səra fara fara, cek matəkakaya ŋga zəmey na, daa ba. Ama da ndaw a wulkey cek keɗe anja maaya ba ŋga zəmey na, cek aha aa maaya ba na, ŋgada anja gway. ¹⁵ Anda keɗe, da məlmakw a ceɗ mevel a ray akah maja kah ma zəmey cek wura wura na, ŋgene ka ta səpey mewuɗey-vaw daa ba. *Kərīste a məcey na, maja

14:5 14.5 Gal 4.10 **14:6** 14.6 1Tm 4.3-5 **14:7** 14.7-9 2Kwr 5.14-15; Gal 2.19-20 **14:10** 14.10 2.6 **14:11** 14.11 Iz 45.23-24 **14:12** 14.12 Gal 6.5
14:13 14.13 1Kwr 10.32; 1Jn 2.10 **14:14** 14.14 14.23; Mt 15.11; SNM 10.15;
Tit 1.15

anğa may. Maaya na, anja cek masa kah ma zəma na, aa zədda məlmakw ba. ¹⁶ Da ka wulkey cek aha anğa maaya nğa key, ama ka nəka ndəhay fa pamara nğa cek maaya ba na, ngene, ka da ka ba. ¹⁷ Mewey nğa Bay Gazlavay da ray ndəhay na, ara mey da ray cek mezəmey ta cek mesey ba. Ama mewey nğa Gazlavay da ray ndəhay na, ara menjey maaya fa Gazlavay, menjey daa zazay, asaya, menjey daa meesəmey masa Mesəfney anğa ma vəldərwa. ¹⁸ Yaw, da ndaw a kar sləra a Kəriste anda kefe na, a mbafar a Gazlavay la, asaya, ndəhay aa həmdamara ndaw a la may.

¹⁹ Maja ngene, kakwa gədan nğa key cek ma handawa zazay ta nğa key cek ma jəndakwar nğa hətey gədan daa mey nğa Gazlavay da wuzlah aləkwa. ²⁰ Ka da nəsmara sləra nğa Gazlavay ta cek mezəmey ba. Ahaw, fara fara cek mezəmey cəpa na, anğa maaya, ama da cek mezəmey a da həlda məlmakw nğa key mebərey na, ngene, nğama kah ma zəma ba. ²¹ Nğama na, ka zəmam aslaw ba, ka sam wuzam ba. Kwa cek wura wura masa ma həlda məlmakw nğa key mebərey na, mbəkdamara. ²² Mey masa akwar ma təbmara da ray mezəmey cek ta da ray mezəmey cek ba na, ka da wuzdamara a ndaw ba, si akwar ta Gazlavay gway. Ndaw masa ma key cek ta mevel anğa cəpa, a wulkey cew cew ba na, maaya nğa Gazlavay aa da ray a. ²³ Ama ndaw masa fa wulkey cew cew da ray cek mezəmey, a zəma cek aha na, ngene, Gazlavay a kar sariya la nğaa zədda maja ta zəma cek aha ta mevel pal daa ba. Yaw, kwa meeme masa ndaw ma ka ta mevel cew cew na, a key ngene, a key mebərey.

15

Mey da ray mekey maaya nğada ndəhay

¹ Aləkwa ndəhay masa ta gədan daa mey nğa Gazlavay *, maaya na, ya jəntakwa ndəhay masa ta gədan pəreh daa mey a. Ya da kakwa cek masa ma mbafandakwar daada ba. ² Maaya na, kwa waawa a key cek masa ma mbafatar a ndəhay amba a jənta ndəhay nğa hətey gədan daa mey nğa Gazlavay a dey a, a dey a. ³ Ya sərkwə fara fara, *Kəriste na, ta key cek masa ma mbafar nğada ray anğa na, daa ba. Ama anda mawuzlalakaya daa dərewel nğa Gazlavay, ma ləvey: «Ndəhay ta cədmaka la, kah

14:15 14.15 1Kwr 8.1, 11-13; Gal 6.10 **14:17** 14.17 Mt 6.31-33; 1Kwr 8.8; Gal 5.22-24 **14:21** 14.21 1Kwr 8.13 **14:23** 14.23 14.14 * **15:1** 15.1 ndəhay masa ta gədan daa mey nğa Gazlavay: Fede Pawl a wufey nğa ləvey ndəhay masa ta gədan na, ara ndəhay ma səpam kwakwas nğa Mawiz saba, ama ara ndəhay ma pamara Yesu nğa ndaw ata fara fara. **15:1** 15.1-2 14.1-2; 1Kwr 8.1-2; 10.23-24

Gazlavay, ama mecədey a ta vəhwa sem a ray adaw †.»

⁴ Cek hay tabiya masa mawuzlalakaya daa dɛrewel nga Gazlavay zleezle na, ara ngaa sɛrkadandakwar mey masa fara fara, amba ya pakwa lenjesl fa cek masa Gazlavay ma ləvey a vɛldandakwara la heyey. Ya pakwa lenjesl na, maja mey mawuzlalakaya daa dɛrewel nga Gazlavay fa vɛldandakwar gɛdan, asaya, fa jɛndakwar amba ya bɛskwa banay. ⁵ Anja Gazlavay ndaw ma vɛltar gɛdan a ndəhay ta ma dɛktar mevel a ndəhay nga vɛlkwar mewulkey maaya amba ka njam akwar macəmkaya dɛy pal anda Yesu Kəriste ma wudɛy. ⁶ Anda kedɛ, akwar tabiya daa slam a, ka da cəmdamara dɛy akwar pal nga hɛlmey Gazlavay papan nga Bay aləkwa Mahura, Yesu Kəriste.

Mey da ray ndəhay cəpa ma da hɛlmamara Bay Gazlavay

⁷ Təbmata ndəhay siya hay anda *Kəriste ma təbkwar. Təbmata amba a hɛslmar ray a Gazlavay. ⁸ Ya fa lɛkwara fara fara, Kəriste a sawa a bɛla na, nga katar slɛra ngada *Jəwif hay amba a wuzdatara Gazlavay na, ara ndaw ma mbərzley ba. A sawa na, nga key cek masa Gazlavay ma ləvtar a papan nga papa ata hay zleezle a katara la heyey. ⁹ Asaya, a sawa na, amba ndəhay masa Jəwif hay ba a hɛslmar ray a Gazlavay maja maaya anga, anda mawuzlalakaya daa dɛrewel nga Gazlavay zleezle, ma ləvey:

«Ara maja kedɛ, yah ma da hɛslka ray
fa mey nga ndəhay masa Jəwif hay ba hay.
Ya da hɛlmaka ta walay.»

¹⁰ Mawuzlalakaya daa dɛrewel nga Gazlavay saya, a ləvey:
«Akwar ndəhay masa Jəwif hay ba,
sasəmam daa slam a ta ndəhay nga Gazlavay.»

¹¹ Mawuzlalakaya saya, a ləvey:
«Akwar ndəhay Jəwif hay ba, hɛlmamara Bay Gazlavay.
Anja kwa ndaw daa səkway wura wura
nga hɛlma Bay Gazlavay.»

¹² *Izay, *ndaw ma tɛla mey nga Gazlavay taa guzley la saya,
a ləvey:
«Ndaw a yawa la daa səkway nga Jese,
a da key bay nga ndəhay masa Jəwif hay ba may.
Ndəhay masa Jəwif hay ba na,
mewulkey ata aa da ray ndaw aha amba a ləhdata.»

† **15:3** 15.3 mecədey a ta vəhwa sem a ray adaw: Fedɛ a wudɛy nga ləvey
«mecədey a vəhwa a ray Yesu Kəriste». **15:3** 15.3 Ps 69.10 **15:4** 15.4
1Kwr 10.11; 2Tm 3.16 **15:5** 15.5 12.16; Fɛl 2.2-5 **15:7** 15.7 14.1 **15:8**
15.8 Mt 15.24; SNM 3.25-26 **15:9** 15.9 Ps 18.50; Rm 11.13 **15:10** 15.10 Mew
32.43 **15:11** 15.11 Ps 117.1 **15:12** 15.12 Iz 11.10

¹³ Anja Gazlavay, ndaw ma vøltar gødan a ndøhay amba a pam lenjesl a ray a heyey na, ngaa sømdakwar mandaw mandaw, anja nga njadakwar daa zazay maja akwar ma pamara nga ndaw akwar fara fara. Anda kede, cek masa anga ma da vøldakwara ha na, akwar fa sækwmara ta gødan nga *Mesøfney nga Gazlavay.

Mey da ray sløra nga Pawl

¹⁴ Mølma adaw hay, yah ta ray adaw ya fa løvkwat, ya søra, fara fara akwar na, ndøhay ma wudam nga key cek maaya. Ka sørmara mey masa fara fara, ka gwamara nga køtmata ndøhay mekele ta mey a. ¹⁵ Ta ngene he cøpa, daa leeter adaw kede, mey hay masa akwar ma cøndamara cay døga zleezle na, ya sørfadakwara saya, ya zlurey ba. Ya zlurey ba na, maja Gazlavay ma kaya maaya la, ¹⁶ a paya nga key sløra nga Yesu *Køriste ngada ndøhay masa *Jøwif hay ba hay. Yah ma vølda ray adaw la fara fara ngada Gazlavay nga wuzey Mey anga maaya mawiya. Ya wuzdatara mey a, a ndøhay masa Jøwif hay ba, amba a tøram nga cek mavøldakaya ngada anga masa ma mbafar kalah, cek masa *Mesøfney nga Gazlavay ma pa wal ngada Gazlavay a. ¹⁷ Anda kede, ya faa sømey ga da ray sløra nga Gazlavay masa yah ma ka maja yah na, macømkaya ta Yesu Køriste. ¹⁸ Kwa ya fa da gwa ngaa guzley da ray cek mekele na, daa ba, si da ray sløra masa Køriste ma ka ta fa yah, amba a handatørwa ndøhay masa Jøwif hay ba hay nga namar ray a Gazlavay. A handatørwa na, ta fa mey masa yah ma wuzda lej ta fa cek masa yah ma kata. ¹⁹ Asaya, a handatørwa na, ta fa maazla hay mekele mekele ma røzley ndaw masa anga ma kata lej ta fa gødan nga Mesøfney anga. Anda kede, yah ma wuzda *Mey-maaya-mawiya nga Køriste la døga da *Jeruzelem haa kasl aa hwayak nga Iliri. Ya ta wuzda mey a la tabiya maaya maaya daa slam hay a ngene. ²⁰ Anda meløvey, ya wuzey mey a na, daa hwayak hay masa ndøhay ma cøndamara mey da ray Køriste daa ba aran. Ya wufey nga wuzey mey a daa hwayak hay masa ndøhay ma cøndamara mey da ray Køriste cay ba, maja ndøhay a da wulkam ara anda ya lømey way a ray salay nga way masa ndaw mekele ma pa. ²¹ Ya ka anda kede na, ya wufey nga key anda mawuzlalakaya daa dferewel nga Gazlavay, ma løvey:

«Ndøhay masa ta wuzdamatara mey

da ray a daa ba aran na, a høtmar la ta dey ata.

Ndohay masa kwa ta cənam mey
da ray a daa ba na, a cəndamara mey a la.»

Pawl a wufey nga daw a Rawm

²² Yah ma wulkey la dey ga nga daw fa akwar a *Rawm, ama ya ta hətey har daa ba maja sləra ha keđe. ²³ Mevey ga, ya ta wufey la nga daw fa akwar, ama sləra ta təkya sem. Wure keđe na, yah ma ndəvda sləra adaw cay daa hwayak hay feđe. ²⁴ Ya wufey nga daw fa akwar dəba nga njawa nekədey nga kawa matakwan akwar. Fa dəba ha, ya daw la aa hwayak nga Espay. Yaw, ya wufey ka jənmaya nga daw ngadaa hwayak a. ²⁵ Ama wure keđe na, ya wufey nga daw fa ndəhay nga Gazlavay da *Jeruzelem dāgay nga jəntərwa, ²⁶ maja ndəhay daa *mecəmey-ray nga ndəhay nga Yesu da Masadəwan ta da Akay ta cakalam dala la nga jəney masa-viya hay daa mecəmey-ray nga ndəhay nga Yesu da Jeruzelem e. ²⁷ Ara mevel ata ma wufey nga cekeley dala ha. Ama fara fara si a jənmata ndəhay a maja ara cek anda dəvaz. Ya ləvey anda keđe na, maja ndəhay da Masadəwan ta da Akay a ata *Jəwif hay ba, ama ta hətam maaya nga Gazlavay la ta fa Jəwif hay. Anda keđe, anga maaya amba ndəhay Jəwif hay ba hay a, a jənmata ndəhay Jəwif hay ta zleley ata hay may. ²⁸ Da yah ma ndəvdərwa sləra ha cay da Jeruzelem e, asaya, da yah ma vəldatara dala macakalakaya heyey cay a ndəhay fetede na, ngene, ya daw aa hwayak nga Espay dəba, ama ya da daw na, ta fa akwar. ²⁹ Ya səra, da yah ma wusey la fa akwar na, *Kəriste a pəskwar mey la maja yah ma daw a.

³⁰ Məlma adaw hay, ambahw, kakwa gədaŋ nga dərey danğay a Gazlavay ta mevel aləkwa cəpa maja yah. Yaa cəfdakwar kaa na, ta mezəley nga Bay Mahura Yesu Kəriste, asaya, yaa cəfdakwar maja mewufey-vaw masa *Mesəfney nga Gazlavay ma handərwa a wuzlah aləkwa. ³¹ Dəram danğay na, amba ndəhay ma səra Yesu Kəriste ba da *Jude a sərdamaya banay ba. Dəram danğay saya, amba cek masa yah ma da handatara a ndəhay nga Yesu da Jeruzelem heyey na, a təbmara ta meesəmey. ³² Anda keđe, da Gazlavay ta təba la na, ya wusey la fa akwar ta meesəmey. Da yah ma wusey la na, ya məskey vaw la nekədey da wuzlah akwar. ³³ Anja Gazlavay, ndaw ma handawa zazay mandaw mandaw a ray ndəhay, nga njeý ta akwar tabiya. *Amen.

15:21 15.21 Iz 52.15 **15:22** 15.22-24 1.9-13 **15:25** 15.25 SNM 19.21; 20.22; 24.17 **15:26** 15.26 1Kwr 16.1; 2Kwr 8.1-9; Gal 2.10 **15:27** 15.27 1Kwr 9.11
15:30 15.30 2Kwr 1.11; Ef 6.18-19; Kwa 4.3; 2Tes 3.1-2 **15:31** 15.31 SNM 21.10-11; 1Tes 2.14-15 **15:32** 15.32 1.7 **15:33** 15.33 1Tes 5.23

16

Pawl a catar har a ndəhay siya da Rawm

¹ Ya faa guzlkwar da ray dam-mama aləkwa Febe, ηgwas ma jənta ndəhay daa *mecəmey-ray ηga ndəhay ηga Yesu da Senkəre. ² Təbmara ηgwas aha maaya maaya ta mezəley ηga Bay aləkwa Mahura. Təbmara na, anda ndəhay ηga Yesu ma təbam ndəhay. Da cek fa vəfa daa ba na, jənmara maja anga ta jəney ndəhay la ga. Kwa yah may, ta jənya la.

³ Camatar har ηgada ata Pəriska ta zel e Akilas. Ara ndəhay masa ala ma kam sləra ηga Yesu *Kəriste bama.

⁴ Ara ndəhay masa ma vəldamara ray ata la amba a ləhdamaya daa meməcey. Ya fa katar suse ga. Ma katar suse he na, yah daada ba, ama ndəhay cəpa masa daa mecəmey-ray ηga ndəhay ηga Yesu Kəriste masa *Jəwif hay ba fa kamatar suse may.

⁵ Camatar har a ndəhay ηga Yesu masa ma kusam da way ata.

Camar har a Epayinet, jam adaw masa yah ma wuɖa kalah, ndaw masa ma təba mey ηga Kəriste ηgeeme daa hwayak ηga Azi.

⁶ Camar har a *Mari, ηgwas masa ma kakwar sləra la ga.

⁷ Camatar har ηgada ata Andərawnikus ta Juniyas. Ara səkway adaw hay, ya ta zəmam dangay la bama. Ata na, ara ndəhay meslərey ηga Yesu masa ndəhay ma sərmata maaya maaya. Ata na, a təbmara mey ηga Kəriste teesed da ray adaw.

⁸ Camar har a Ampəliyatus, jam adaw masa yah ma wuɖa kalah daa mecəmey-ray ηga ndəhay ηga Yesu Bay Mahura.

⁹ Camar har a Urben, ndaw masa aləkwa ma kakwa sləra ηga Kəriste bama. Camar har saya ηgada jam adaw Estakis.

¹⁰ Camar har a Apel, ndaw masa ma sərey banay ga maja Kəriste, ama ta njeɣ la anga ndaw ηga Yesu fara fara cənga.

Camatar har ηgada ndəhay da way Aristawbul may.

¹¹ Camar har a səkway adaw Herawdiyanɣw.

Camatar har ηgada ndəhay daa səkway ηga Narsis ma təbmara mey ηga Bay Mahura.

¹² Camatar har ηgada ata Tərifən ta Tərifawz, ndəhay masa ma kam sləra la ga ηgada Bay Mahura.

Camar har may ngada jam adaw Persit, masa yah ma wuda kalah. Ara ngwas ma key slera la ga ngada Bay Mahura.

¹³ Camar har ngada Rufus, ndaw masa fa sapa mey nga Gazlavay ta coved e. Camar har a mamaha masa ma wadaya vaw anda anga mamay.

¹⁴ Camatar har ngada ata Asinkerit, Folegwan, Hermes, Patarawbas, Hermas, asaya, camatar har ngada melman hay daa meceme-ray nga ndohay nga Yesu masa ata bama.

¹⁵ Camatar har ngada Filalagw, Juley lej Nere ta dammamaha. Camar har ngada Awlimpas, asaya, camatar har ngada ndohay nga Yesu masa ata bama.

¹⁶ Cam har da wuzlah akwar cpa pal pal, akwar melman hay daa Yesu Keriste. Ndohay daa meceme-ray nga ndohay nga Keriste cpa a camakwar har.

Mey nga madagway-dakw

¹⁷ Melma adaw hay ya fa kakwar ambahw, pam lengesl ta ndohay ma handamawa mewudkey-day a wuzlah akwar maja a da nesmara meeserkey masa akwar ma cendamara da ray *Keriste. Ka da njam ta ata daa slam a ba. ¹⁸ Fara fara, sakway nga ndohay anda ngene na, fa kamar slera a Keriste Bay alakwa Mahura daa ba, ama a kam slera na, maja hwad ata daada gway. Faa zoddamata ndohay masa ma sora cek ba ta mey ata hay maaya maaya masa ma betey ndohay. ¹⁹ Ndohay tabiya a sarmara akwar fa namar ray ngada Bay Mahura, ara maja ngene, ya faa somey ga da ray akwar. Cek mahura na, pam lengesl nga wunkey cek masa maaya ta maaya ba. Cek masa maaya ba na, ka da kamara ba. ²⁰ Gazlavay, ndaw ma handawa zazay a ndohay na, a fona *Satan la ta gedan, a da pa Satan a asi salay akwar. Anja maaya nga Bay alakwa Mahura Yesu nga njei ta akwar.

²¹ Timawte, ndaw masa ala ma kam slera cew e, a cakwar har. Ndohay adaw hay ata Lusiyus, Jasanw lej Sawsipater a camakwar har may.

²² Yah Tertiyus, ndaw ma wuzlala mey nga Pawl tabiya daa leeter kede, ya fa cakwar har ta mezoley nga Bay Mahura Yesu, ndaw masa ma camndakwar.

²³ Gayus, ndaw masa yah ma njei da way anga a cakwar har. Ara ndaw masa ndohay nga Yesu ma kusam da way anga nga dorey dangay. Eraste, ndaw ma korza dala nga

ngwamna daa berney fede, ta mөлma alөkwa Kartus a camakwar har may.

[²⁴ Anja maaya nga Bay alөkwa Mahura Yesu Kөriste nga njeý ta akwar tabiya. *Amen.]

Mehөлmey Gazlavay

²⁵ Hөлmakwa Bay Gazlavay. Anğa na, a gwa a vөлkwar gөdan nga njeý daa cөved anğa ta fa *Mey-maaya-mawiya masa yah ma wuzdatara a ndөhay da ray Yesu *Kөriste. Zleezle na, Mey-maaya-mawiya ha mabadakaya fa dey nga ndөhay. ²⁶ Ama wure keđe na, meý a ta wuzwa cay ta fa ndөhay ma tөla meý anğa ma wuzlalamara zleezle da ray Kөriste. Anda keđe, sөkway hay masa *Jөwif hay ba da bөla tabiya ta jөkam slөmay fa meý a la anda Gazlavay ma lөvey, Gazlavay masa aa ta dey nga sөrmataw. A wudөy ndөhay tabiya a jөkam slөmay fa Mey-maaya-mawiya ha, amba a tөbmara, a namar ray.

²⁷ Anja ndөhay nga hөлmamara Gazlavay nga sөrmataw! Ara anğa pal taava anğa, ndaw ma sөra cek. Hөлmakwa maja Yesu Kөriste. *Amen.

Leeter masa Pawl ma wuzlala ngeeme a

Kwarinti hay

Mey da ray

Leeter ngeeme ngada Kwarinti hay

Pawl a wuzlala leeter ngada ndəhay daa mecəmey-ray nga Yesu daa berney nga Kwarinti na, daa masa anga daa berney nga Efez. (SNM 18.1-21).

Kwarinti na, ara berney mahura daa hwayak nga Gerek hay. Berney aha aa da mey-bəlay mahura. Anda keɗe daa berney a, ndəhay ga ma samawa daa hwayak hay mekele mekele daha, a ragadam ngada kuley hay mekele mekele may. Menjey ata na, maaya ba. Cek hay maaya ba masa ata ma kamara na, fa nəsta ndəhay daa mecəmey-ray nga Yesu. Maja ngene, Pawl a wuzlalatar leeter hay məfad. Da wuzlah leeter hay a na, cew ata daha daa Derewel nga Gazlavay haa wure keɗe, cew hay may taa zəɗam sem.

Pawl a wuzlala leeter e maja a cənda na, da wuzlah ndəhay daa mecəmey-ray nga Yesu, mey mekele mekele daha: fa təram vaw da wuzlah ata (fasəlawal 1 haa 4), fa kam cek malamba (fasəlawal 5), fa wudam vaw da wuzlah ata (fasəlawal 6), mey da ray meley ngwas (fasəlawal 7), mey da ray menjey da wuzlah ndəhay ma ta kuley hay, ma zəmamara aslaw nga kuley a (fasəlawal 8 haa 10), mey da ray mezəmey ɗaf nga sərfeɗey meməcey nga Yesu (fasəlawal 11), mey da ray gəɗan nga Mesəfney nga Gazlavay masa Gazlavay ma vəlda a ndaw a, ndaw a, nga key sləra mekele mekele daa mecəmey-ray nga ndəhay nga Yesu (fasəlawal 12 haa 14), leŋ mey da ray ndəhay nga Yesu ma da sləkɗamawa daa meməcey (fasəlawal 15).

Daa leeter e keɗe na, mey mekele mekele daha nga vəley gəɗan a ndəhay:

Mewuɗey-vaw (fasəlawal 13)

Mey da ray gəɗan masa Mesəfney nga Gazlavay ma vəldatara a ndəhay anga hay nga key sləra anga. (fasəlawal 12 haa 14)

Mecey-har

¹ Ara yah Pawl ma wuzlalakwa leeter keɗe, yah ndaw masa *Gazlavay ma wala nga key *ndaw-meslərey nga

*Yesu *Køriste. Ya wuzlalamara na, ala ta mөлma alөkwa Sawsten.

² Ya wuzlalamara leeter keđe ngada akwar, ndөhay daa *mecөmey-ray nga ndөhay nga Yesu masa daa berney nga Kwarinti, akwar masa Gazlavay ma walakwar wal amba ka njam macөmkaya ta Yesu Køriste. A walakwar bama ta ndөhay tabiya masa fa dөrmar dangay a Bay alөkwa Mahura Yesu Køriste, kwa daa wura daa wura. Anğa na, Bay ata Mahura, asaya, anğa na, Bay ala Mahura may.

³ Anja Papa alөkwa, Bay Gazlavay, ta Bay alөkwa Mahura Yesu Køriste nga pөsmakwar mey, asaya, nga njadamakwar daa zazay.

Mey da ray maaya nga Gazlavay da ray ndөhay anğa hay daa berney nga Kwarinti

⁴ Ya fa kar suse a Gazlavay adaw mandaw mandaw maja maaya anğa ma pawa salay a ray akwar ta fa Yesu *Køriste.

⁵ Daa masa akwar macөmkaya ta Yesu Køriste na, Gazlavay ta kakwar maaya la ga amba ka kamar slөra. Anda keđe, ta vөlkwar gөdөnj nga wuzey mey anğa a ndөhay la, asaya, ta vөlkwar lenğesl la nga cөnda mey anğa hay tabiya.

⁶ Mey da ray Køriste masa ala ma wuzdamakwara na, aa daa mevel akwar mandaw mandaw. ⁷ Anda keđe, akwar masa fa sөkwmara Bay alөkwa Mahura Yesu Køriste ma da wuzwa vaw na, Gazlavay ta vөlkwar gөdөnj la nga key slөra wura wura tabiya. ⁸ Ara Gazlavay ma da vөlkwar gөdөnj anğa nga njey maaya fa mey anğa haa pas masa Bay alөkwa Mahura ma da vөhwа nga key sariya amba a hөtfakwar manjar mebөrey. ⁹ Gazlavay ta zөlkwar la amba ka njam macөmkaya ta Bөzey anğa, Yesu Køriste, Bay alөkwa Mahura. Gazlavay na, cek masa aa ma lөvey a ka la na, a ka la fara fara.

Ndөhay nga Yesu da Kwarinti a wudkam dөy

¹⁰ Mөлma adaw hay, ya fa kakwar ambahw ta mezөley nga Bay alөkwa Mahura Yesu *Køriste amba ka cөmam dөy. Ka da wudkam dөy da wuzlah akwar ba. Njam macөmkaya ta mevel letek, ta mewulkey letek. ¹¹ Mөлma adaw hay, yaa guzley anda keđe na, maja ndөhay daa sөkway nga Kelөwe ta kadamiwa la, a lөvmaya, akwar fa tөram vaw ta tөrey da wuzlah akwar. ¹² Ehe, jөkam slөmay fa cek masa yah ma wudөy ngaa guzlkwar. Akwar ta mewulkey wal wal da wuzlah akwar. Ndөhay siya a lөvam a sөpam na,

1:1 1.1 Gal 1.1; Sawsten: SNM 18.17 **1:2** 1.2 2Kwr 1.1; SNM 18.1 **1:5** 1.5 2Kwr 8.7 **1:7** 1.7 2Tes 1.7; Tit 2.13 **1:8** 1.8 Fөл 1.6; 1Tes 3.13; 5.23 **1:9** 1.9 10.13; 1Tes 5.24; 2Tes 3.3 **1:10** 1.10-11 3.3; 11.18; 2Kwr 12.20; Ef 4.2-6; Fөл 2.2; Janj 17.21-23

yah, Pawl. Siya hay a ləvam a səpam na, Apalaws. Siya hay a ləvam a səpam na, *Piyer. Siya hay mekele saya a ləvam a səpam na, Kəriste. ¹³ Ka wulkam na, Kəriste anğa mawunkakaya weewe daw? Yah, Pawl na, ya ta məcey la fa hwadam mazlanğalakaya maja akwar daw? Akwar ta hətam *baptem ta mezəley adaw la daw?

¹⁴ Ya fa kar suse a Gazlavay maja ya ta key baptem ngada ndaw da wuzlah akwar daa ba, ama si ngada ata Kərispus ta Gayus daada gway. ¹⁵ Anda keđe, kwa ndaw pal fa da ləvey ta hətey baptem la ta mezəley adaw na, daa ba. ¹⁶ A', fara, ya ta katar baptem la ngada ata Estefanas ta ndəhay da way anğa. Ayəwa, da ya ta key baptem ngada ndəhay mekele la kwa, ya səra ba. ¹⁷ Kəriste a slərđiwa na, nğa katar baptem a ndəhay ba, ama a slərđiwa nğa wuzey *Mey-maaya-mawiya. Daa masa ya fa wuzda Mey-maaya-mawiya na, ya wuzda ta mewulkey nğa ndaw-magədan ba. Ya ka anda keđe na, amba meməcey nğa Kəriste da ray hwadam mazlanğalakaya a tərey nğa cek nğa tede ba.

Yesu Kəriste a wuzdərwa gədan ta lenğesl nğa Gazlavay

¹⁸ Ndəhay masa ma zlanğadam sem daa cəved nğa Gazlavay na, a wulkam mey da ray meməcey nğa *Kəriste fa hwadam mazlanğalakaya na, ara mey nğa tede. Ama ngada aləkwa, ndəhay masa Gazlavay ma ləhdata cay na, ya sərkwə meməcey nğa Kəriste a wuzwa gədan nğa Gazlavay nğa ləhdata ndəhay. ¹⁹ Mey nğa Gazlavay a ləvey:

«Ndəhay ma sərmara cek na,

ya da tərda mesərey cek ata ha nğa cek nğa tede.

Ndəhay masa ta lenğesl na,

ya da tərda lenğesl ata ha nğa cek nğa tede.»

²⁰ Da kəne na, ndəhay ma sərmara cek na, mesərey cek ata ha, a da vəltar me? Yaw, *ndəhay maa sərkwada kwakwas nğa Mawiz na, meesərkedey ata ha a jənta fa mey nğa Gazlavay la daw? Ndəhay ma ka yawa wure keđe kaa na, mekey yawa ata ha a vəltar me? Gazlavay ta wuzda cay, mesərey cek da bəla kaa na, ara cek nğa tede, a ləhey ndaw ba.

²¹ Ndəhay da bəla keđe a səram cek hay mekele mekele. Ta hətmar cek masa Gazlavay ma ka ta lenğesl anğa la, ama kwa ta sərmara Gazlavay daa ba. Maja nğene, a mbafar a Gazlavay amba ndəhay ma təba mey anğa a ləham na, ta fa

1:12 1.12 3.4; Apalaws: 3.5-6, 22; 4.6; 16.12; SNM 18.24; 19.1; Piyer: 1Kwr 3.22; 9.5; 15.5; Gal 2.911-14; 2Kwr 10.7 **1:14** 1.14 Kərispus: SNM 18.8; Gayus: Rm 16.23-24 **1:16** 1.16 Estefanas: 16.15 **1:18** 1.18 Rm 1.16; 2Kwr 4.3 **1:19** 1.19 Iz 29.14; Jəw 12.13, 17; Iz 19.12-14; 44.25 **1:19** 1.19-20 3.18-20; Mt 11.25; Rm 1.22

mey masa ala ma wuzdamara da ray meməcey nga Yesu fa hwadam mazlanğalakaya. Mey masa ala ma wuzdamara ha na, ndəhay da bəla a padamara nga cek nga tede.

²² Anda kede, *Jəwif hay a wudam nga hətey maazla amba a səmərə mey masa ala ma wuzdamara na, ara mey fara fara. Gərek hay na, a wudam nga sərey cek ta lenğesl ata gway. ²³ Ama ala na, ya wuzam mey da ray Kəriste ma məcey fa hwadam mazlanğalakaya. Jəwif hay ma cəndamara mey a na, a cam mevel, a wulkam a key ya cədmara Gazlavay. Ndəhay masa Jəwif hay ba ma cəndamara mey a na, a ləvam ara mey nga tede. ²⁴ Ama ndəhay masa Gazlavay ma zəlta, kwa Jəwif hay, kwa Jəwif hay ba, ngada ata na, Kəriste a wuzwa gədan nga Gazlavay, asaya, a wuzwa lenğesl maaya nga Gazlavay. ²⁵ Cek nga Gazlavay masa ndəhay ma wulkam ara cek nga tede na, cek aha, anğa ta lenğesl maaya a fəna lenğesl nga ndaw-magədan. Sləra nga Gazlavay masa ndəhay ma wulkam a ka anda ndaw masa-bəle na, sləra ha, makakaya ta gədan ma fəna gədan nga ndaw-magədan.

²⁶ Məlma adaw hay, wulkam cey. Akwar masa Gazlavay ma zəlkwar na, akwar səkway nga ndəhay wura? Fa dey nga ndəhay da bəla na, ndəhay ta lenğesl ga da wuzlah akwar daa ba. Asaya, ndəhay ta gədan, leñ ndəhay mahura hay da wuzlah akwar ga daa ba. ²⁷ Sasəkar jak, Gazlavay a weley na, ndəhay masa ndəhay da bəla * ma wulkam ara cek hay nga tede amba a patar hwaray a ndəhay masa ta lenğesl. Gazlavay a weley na, ndəhay masa ndəhay ma wulkam ata masa-bəle hay amba a patar hwaray a ndəhay masa ta gədan. ²⁸ Gazlavay a weley na, ndəhay saw nga tede masa ndəhay ma rəsmata amba aa zəfdata ndəhay mahura hay. ²⁹ Maja ngene, kwa ndaw pal fa da zlepey fa mey nga Gazlavay daa ba. ³⁰ Yaw, ara maja sləra masa Gazlavay ma ka, akwar macəmkaya ta Yesu Kəriste. Gazlavay a vəlndakwar lenğesl na, ta fa Kəriste he. Ara ta fa Yesu Kəriste he saya, Gazlavay ma pandakwar nga ndəhay maaya fa mey anğa, a waləndakwar wal ngada anğa, asaya, a ləhdəndakwar daa meməcey. ³¹ Anda kede, a key anda mawuzlalakaya daa dərewel nga Gazlavay, ma ləvey: «Da ndaw a wudəy nga zlepey na, nga zlepey da ray sləra masa Bay Gazlavay ma ka gway.»

1:21 1.21 Rm 1.19-20 **1:22** 1.22 Mt 12.38; Jan 4.48; SNM 17.18, 32 **1:23** 1.23 2.14; Gal 3.1; 5.11 **1:24** 1.24 1.18; 2.5; Kwa 2.3 **1:25** 1.25 2Kwr 13.4

1:26 1.26 Jan 7.48 * **1:27** 1.27 ndəhay da bəla: Ara ndəhay ma namar ray a Gazlavay ba. Nəka 1Kwr 5.10. **1:27** 1.27-28 Rm 12.16; Jak 2.5; Lk 1.51-53; 6.20 **1:30** 1.30 2Kwr 5.21 **1:31** 1.31 1.29; 2.2; 4.7; Jer 9.22-23; 2Kwr 10.17; 11.30; 12.5; Ef 2.9

2

Pawl a wuzey mey da ray meməcey nga Yesu

¹ Məlma adaw hay, masa yah ma daw fa akwar nga wuzdakwara mey mabadakaya nga Gazlavay heyey na, ya taa guzley ta mey masa mazlədkaya daa ba, asaya, ya taa guzley ta mey masa ma həbkwar ray daa ba. ² Daa masa yah da wuzlah akwar na, ya ta kərza mevel la nga wulkey si da ray Yesu *Kəriste ma məcey fa hwadam mazlanğalakaya gway. ³ Daa ngene, yah masa-bəle, mandərzay fa kaya, ya faa wesey. ⁴ Masa ya fa wuzdakwara mey nga Gazlavay na, ya taa guzley ta mewulkey nga ndaw-magədan amba ka təbmara mey adaw na, daa ba. Ama ara gədan nga *Mesəfney nga Gazlavay ma wuzdakwara mey adaw a na, ara mey fara fara. ⁵ Da ray ngene, ka pamara Yesu nga ndaw akwar fara fara na, ara maja lenğesl nga ndəhay ba, ama ara maja gədan nga Gazlavay.

Mey da ray lenğesl maaya nga Gazlavay

⁶ Ta ngene he cəpa, ala faa sərkadamata ndəhay ma təbmara mey nga Gazlavay maaya maaya ta lenğesl masa fara fara da ray a. Yaa sərkadamata na, nga sərey cek ta lenğesl nga ndaw-magədan ba, asaya, ta lenğesl nga bay hay da bəla kefe ba, bay hay masa Gazlavay ma daa zəfdata. ⁷ Ama mesərey cek masa ala maa guzlam da ray a kefe na, ara ta lenğesl nga Gazlavay. Ara cek mabadakaya dəga zleezle fa dey nga ndəhay. Dəga bəla ta zley daa ba arañ na, Gazlavay ta wufey la nga ləhdandakwar ta fa lenğesl e amba ya mbəzkwa aa slam anğa mewedey.

⁸ Bay hay ma wam da bəla kefe ta sərmara lenğesl e daa ba. Da ta sərmara la na, anja ta dərmara Bay aləkwa Mahura, ndaw masa ta gədan, fa hwadam mazlanğalakaya daa ba. ⁹ Cek masa Gazlavay ma ka ha na, anğa anda mawuzlalakaya daa dərewel nga Gazlavay ma ləvey:

«Cek masa Gazlavay ma diya

ngada ndəhay masa aa ma wudta na,

ara cek ma fəna mewulkey nga ndaw-magədan.

Kwa ndaw pal ta hətar cek aha ta dey anğa daa ba,

kwa ndaw pal ta cənda ta sləmay anğa daa ba may.»

¹⁰ Ara ngada aləkwa Gazlavay ma wuzdandakwara cek aha ngene ta fa Mesəfney anğa. Mesəfney a, a sərta cek hay tabiya, kwa mewulkey nga Gazlavay mabadakaya na, a səra.

¹¹ Ndaw na, a sɛra mewulkey nga ndaw mekele daw? Si ndaw aha ray anɔa ma sɛra mewulkey anɔa, ba diya? Anɔa letek ta Gazlavay may, ma sɛra mewulkey nga Gazlavay na, wa? Si Mesɛfney anɔa. ¹² Mesɛfney masa da ray alɛkwa na, a sawa ta fa ndɛhay magɛdan ba, ama ara Mesɛfney masa Gazlavay ma vɛldandakwara amba ya sɛrmatakwa cek hay maaya tabiya masa Gazlavay ma vɛldandakwara.

¹³ Daa masa ala faa guzlmatar a ndɛhay na, yaa guzlmatar ta mey masa ndɛhay maa sɛrkadamandar ta lenɔesl ata ba, ama ara *Mesɛfney nga Gazlavay maa sɛrkadandar ngaa guzley. Anda kedɛ, ala fa wuzdamara mey masa fara fara da ray Gazlavay. Ya wuzdamara na, ngada ndɛhay masa ta Mesɛfney nga Gazlavay da ray ata. ¹⁴ Ndaw masa ta Mesɛfney nga Gazlavay da ray a daa ba na, a gwa nga tɛba mey nga Mesɛfney nga Gazlavay ba. A cɛnda mey a ba, a wulkey ara mey nga tede, maja ma gwa nga nɛka mey a ta ma gwa nga cɛnda na, si ndaw ta Mesɛfney nga Gazlavay da ray a gway. ¹⁵ Ndaw ta Mesɛfney nga Gazlavay na, a gwa nga nɛkta cek hay tabiya, a sɛrta cek hay maaya ta maaya ba. Ama ndaw aha na, ndaw ma gwa nga sanɔala daa ba. ¹⁶ Anɔa letek anda mey nga Gazlavay mawuzlalakaya ma lɛvey:

«Ma sɛra mewulkey nga Bay Gazlavay na, wa?

Ma da slar yawa a Bay Gazlavay na, wa?»

Ama alɛkwa * na, mewulkey alɛkwa letek ta nga Kɛriste.

3

Mey da ray ndɛhay ma ka slɛra nga Gazlavay

¹ Mɛlma adaw hay, ngaa guzley ngada akwar anda yah maa guzley ngada ndɛhay masa ta *Mesɛfney nga Gazlavay da ray na, ya gwa ba. Ama yaa guzlkwar na, anda ngada ndɛhay da bɛla ma kam cek anda ata ma wudam gway, maja akwar anda bɛza hay mecɛhe daa cɛved nga *Kɛriste.

² Yaa sɛrkadakwar na, cek masa ta gɛra ba aran. Anɔa letek anda bɛzey ma sey dɛwa ma zɛmey daf ba aran. Akwar may, kwa wure kedɛ, mey masa ta gɛra na, ka cɛndamara ba aran anda bɛzey ma gwa nga zɛmey daf ba aran, ³ maja lenɔesl akwar na, anda nga ndɛhay da bɛla daada gway. Akwar fa kam sɛlɛn da wuzlah akwar, akwar fa tɛram vaw da wuzlah akwar. Da ray ngene, mewulkey akwar na, anda nga ndɛhay da bɛla daada gway. Menjey

2:12 2.12 Rm 8.15 **2:13** 2.13 2.4; 12.10 **2:14** 2.14 1.18, 23; Jan 3.5-12;

2Kwr 3.14-18 * **2:16** 2.16 alɛkwa: Pawl ta ndɛhay mekele ta Mesɛfney nga Gazlavay da ray ata. **2:16** 2.16 Iz 40.13; Rm 11.34 **3:1** 3.1 Jan 16.12 **3:2** 3.2 Heb 5.12-13; 1Pi 2.2

akwar na, anda nga ndəhay da bəla gway may. ⁴ Da ndaw da wuzlah akwar a ləvey: «Ya səpey na, Pawl,» ndaw mekele a ləvey: «Ya səpey na, Apalaws,» mey hay a kefe na, ara mewulkey nga ndaw da bəla, ba daw?

⁵ Apalaws na, wa? Yah Pawl na, wa? Ala na, ndəhay ma ka sləra nga Gazlavay gway. A slərdandərwa amba ka təbmara mey da ray Kəriste. Kwa waawa da wuzlah ala, a key sləra masa Gazlavay ma vəldara. ⁶ Ala na, anda ndəhay mehəvey *. Yah na, ndaw ma sləka cek, Apalaws na, ndaw ma mbədar yam. Ama Gazlavay na, ndaw ma gəlda cek aha. ⁷ Maja ngene, ndaw ma sləka cek ta ndaw ma mbədar yam na, ara ndəhay nga tede. Ara Gazlavay pal ma gwa nga gəlda cek aha, ara anga ma wey da ray a. ⁸ Ndaw ma sləka cek ta ndaw ma mbədar yam na, ata letək, Gazlavay a da pəlar kwa ngada waawa tədə fa sləra anga. ⁹ Ala cew e na, ala fa kam sləra ngada Gazlavay. Akwar na, anda ley nga Gazlavay.

Asaya, akwar na, anda way nga Gazlavay maləmkaya. ¹⁰ Gazlavay ta vəlya gədan la nga zley sləra ha. Yah na, anda ndaw meləmey way, ma pa salay nga way maaya maaya ta anɣwa. Wure kefe, ndaw mekele ta sawa la nga ləma way a. Ama si kwa waawa a pey ləngesl maaya maaya daa meləmey way a. ¹¹ Salay nga way mapakaya cay, ara Yesu Kəriste. Ndaw ma gwa nga pey salay nga way mekele daa saba. ¹² Da ray salay nga way a na, ndəhay siya a ləmamara way a ta bərey maaya, siya hay ta anɣwa maaya, ndəhay mekele may a kədmara ta hwadam, siya hay a kərcamara ta guzer, da daa ba, ta panay. ¹³ Ta pas masa Gazlavay ma da ka sariya na, sləra nga kwa waawa a wuzwa la fa dey nga ndəhay, maja ta pas a ngene na, awaw magədkaya a wuzdərwa sləra maaya ta maaya ba nga ndaw a nga ndaw a la. ¹⁴ Da way masa ndaw ma ləma taa wurey daa ba na, ngene, a hətəy mawurbay nga sləra anga la. ¹⁵ Da way masa ndaw ma ləma taa wurey sem na, ngene, a hətəy mawurbay nga sləra anga daa ba. Ndaw aha na, a ləhey la, ama meləhey a na, ta banay, anda ndaw meləhey daa awaw.

¹⁶ Ka səmra fara fara, akwar na, anda way masa

3:3 3.3 1.10-11; Gal 5.19-20 **3:4** 3.4-5 1.12 * **3:6** 3.6 ndəhay mehəvey: Pawl a wufey nga ləvey ara anga ma zlar nga wuzey mey nga Gazlavay da Kwarinti. Fa dəba ha, Apalaws a daw, a vəltar gədan ta mey a saya. Ama ara Gazlavay ma gwa nga jənta ndəhay da Kwarinti amba a diyam fa mey fa mey daa cəved nga Gazlavay. **3:6** 3.6 SNM 18.4, 11, 24-28 **3:8** 3.8 4.5 **3:9** 3.9 Mt 13.3-9; Ef 2.20-21; 1Pi 2.4-6 **3:10** 3.10 1Kwr 15.10 **3:11** 3.11 Iz 28.16; SNM 4.11-12 **3:13** 3.13-15 Rm 2.6; 2Kwr 5.10 **3:15** 3.15 Jud 23

Gazlavay ma njeɗ da hwaɗ a, asaya, Mesəfney nga Gazlavay aa da mevel akwar. ¹⁷ Ndaw ma bəzla way masa Gazlavay ma njeɗ da hwaɗ a na, Gazlavay aa zəɗɗa ndaw aha la may, maja way a, ara way ngada Gazlavay taava anɗa. Way masa Gazlavay ma njeɗ da hwaɗ a ha na, ara akwar, ray akwar.

¹⁸ Wam vaw, ka da batam ray akwar ba. Da ndaw da wuzlah akwar, a wulkey a sərey cek kalah da bəla keɗe na, nga key anda a səra cek ba, amba a tərey ndaw ma səra cek masa fara fara. ¹⁹ Yaa guzley anda keɗe na, maja mesərey cek da bəla keɗe na, ara cek nga tede fa mey nga Gazlavay. Maja ngene, mey nga Gazlavay aa guzley a ləvey: «Gazlavay a kərzata ndəhay ma səra cek hay la anda ndaw ma kərzey cek ta gadaɗ. A kərzata na, maja wewer ata maaya ba masa ata ma kamara ngene.» ²⁰ Mey nga Gazlavay faa guzley saya, a ləvey: «Bay Gazlavay na, a səra mewulkey nga ndəhay ma səra cek hay. A səra mewulkey ata ha na, ara cek nga tede.» ²¹ Anda keɗe, ndaw a da zlepey maja ndaw ba, maja cek hay tabiya na, ngada akwar. ²² Anda meləvey, yah Pawl, Apalaws leɗ *Piyer na, ala tabiya ngada akwar. Bəla keɗe, menjeɗ ta dey, leɗ meməcey na, ara ngada akwar. Asaya, cek hay ma kam wure keɗe ta cek hay ma da kam ngada fa mey na, ara ngada akwar. ²³ Ama akwar na, ngada Kəriste, Kəriste may, ngada Gazlavay.

4

Mey da ray ndəhay meslərey nga Yesu Kəriste

¹ Sərmara, ala na, ndəhay ma ka sləra nga *Kəriste. Mey nga Gazlavay masa mabadakaya na, Gazlavay ta mbəkɗandara la a har ala amba ya wuzdamatara a ndəhay. ² Da a mbəkam cek a har ndaw amba a nəkey dey fa vəɗa na, si ndaw aha a nəkar dey fara fara anda ndaw ma mbəkɗara ha ma ləvar. ³ Da akwar, da daa ba, ndəhay ma ka sariya da bəla keɗe, fa nəkmara sləra aɗaw anda maaya ba, ngada yah na, a təɗya mevel ba. Kwa yah may, ya gwa nga nəka sləra aɗaw ba. ⁴ Cek masa yah ma ka maaya ba na, ya səra ba, ama nga ləvey yah ndaw maaya na, ya gwa nga ləvey kəne ba may, maja ma da ɗəsla mey da ray aɗaw na, ara Bay Mahura pal taava anɗa. ⁵ Maja ngene, ka daa guzlam maaya ba da ray sləra nga ndəhay ba. Səkwmarara ɗar masa Bay Mahura Yesu ma da ka sariya.

Ta pas masa aa ma da vohwa na, a wuzdatərwa cek hay mabadatakaya masa daa ləvanj la a palah. Cek hay masa ndəhay ma wulkam daa mevel ata na, a wuzdatərwa la may. Anda keɗe, Gazlavay a da həlma kwa waawa təɗe fa sləra masa aa ma ka.

⁶ Məlma adaw hay, ya ta wuzkwar cek la da ray ala ta Apalaws amba a jənkwar ŋgaa sərkey cek hay maaya maaya. Ya wudɗey ka kam anda ala, anda mey a daha, ma ləvey: «Mey majəwkaya masa mawuzlalakaya cay na, ndaw a da zləŋgey ta ray a ba.» Anda keɗe, ka da həslmar ray a ndaw lanjar, ka rəsmara ndaw lanjar na, kəne ba. ⁷ Ma pa kwa waawa da wuzlah akwar ŋga ndaw mahura da ray ndəhay siya na, wa? Ma vəldakwara cek hay tabiya na, ara Bay Gazlavay, ba diya? Da ara Gazlavay ma vəldakwara na, kaa ka zlapam anda ara Gazlavay ma vəldakwara ba, kwara?

⁸ Ka wulkam akwar ta hətam cek hay tabiya cay! Akwar na, ndəhay masa-zleley hay dəba! Akwar na, bay hay, ama ala na, bay hay ba. Mewulkey akwar a ŋgene na, fara daw? Da akwar bay hay fara na, ara cek maaya amba ya zəmkwa bay a bama daa slam a. ⁹ Ala ndəhay meslərey ŋga Yesu Kəriste na, ya wulkey Gazlavay ta pandar sem ŋga ndəhay mecəhe hay. Ala na, anda ndəhay masa sariya ta kərzata sem, ma da kadamata wasa ŋga kəɗey vagay fa mey ŋga ndəhay tabiya. A kamara kəne fa mey ŋga ndəhay da bəla ta fa mey ŋga maslanj hay ŋga Gazlavay.

¹⁰ Ndəhay a pamandar ŋga ndəhay ma ka cek hay saw maja ala fa wuzam mey da ray Kəriste. Ama akwar na, ndəhay ta lenjesl maja akwar macəmkaya ta Kəriste. Ala anda ndəhay masa-bəle hay, ama akwar na, masa-gədanj hay. Ala na, ndəhay a hətmandar fa dey ba, ama akwar na, ndəhay fa həslmakwar ray. ¹¹ Haa wure keɗe, may fa candar, yam fa kandar, zana fa vaw ala gwanjada-day-day, ndəhay fa sərdamandar banay, ala fa pəkam saw, way ala hay daa ba, ¹² ya kam sləra ta gədanj ala ŋga hətey cek ŋga zəmey. Da ndəhay a cəɗmandar na, yaa cəɗamara Gazlavay ŋga katar maaya. Da ndəhay a sərdamandar banay na, ya bəsmara gway. ¹³ Da ndəhay aa guzlam maaya ba da ray ala na, yaa guzlmatar ta mey maakwad a. Haa wure keɗe, fa dey ŋga ndəhay na, ala anda cek hay makwiydakaya da ray-təkal, ala anda cek hay ŋga tede.

14 Ya wuzlalakwara mey keɗe na, nga pakwar hwaray ba, ama amba ya kɛtkwar anda akwar bɛz aɗaw hay masa yah ma wuɗta kalah. 15 Kwa ndɛhay ga a slɛfam ba faa sɛrkadamakwar da ray Kɛriste, ama papakw akwar na, ara yah pal gway. Yah anda papakw akwar na, maja akwar macɛmkaya ta Yesu Kɛriste daa masa yah ma wuzdakwara *Mey-maaya-mawiya. 16 Anda keɗe, ya kakwar ambahw, kam cek anda yah ma ka. 17 Ara maja ngene, ya fa slɛrdakwara Timawte, bɛz aɗaw masa yah ma wuɗta kalah, aɗga ndaw ma key slɛra ta cɛved e daa mecɛmey-ray nga Bay Mahura. Ya slɛrdakwara na, amba aa sɛrkadakwara cek masa yah ma ka daa menjey aɗaw daa cɛved nga Kɛriste saya. A daa sɛrkadakwara na, anda yah maa sɛrkadata ndɛhay daa *mecɛmey-ray nga ndɛhay nga Yesu mandaw mandaw kwa daa wura daa wura cɛpa.

18 Ndɛhay siya da wuzlah akwar fa zlapam maja a wulkam na, ya fa da vɛhey fa akwar daa saba. 19 Ama da Gazlavay ta tɛba la na, gweegwe ya vɛhey fa akwar saya. Da masa yah ma wusey la na, ya hɛtfatar ndɛhay ma zlapam hay a la. Anda keɗe, ya da saɗgalawa na, mey masa ata maa guzldamara daada ba, ama ya da saɗgalawa slɛra masa ata ma kamara may. 20 Ya fa sɛrkwa, mewey nga Bay Gazlavay da ray ndɛhay na, a wuzwa ta fa gɛɗaɗ nga *Mesɛfney nga Gazlavay, ba na, a wuzwa ta fa mey meeguzley gway ba.

21 Akwar, ka wuɗam na, kwara? Ka wuɗam ya sawa fa akwar ta laway da har daw? Da daa ba, ya sawa ta mevel maaya amba ya wuzdakwara ya fa wuɗkwar daw?

5

Mey da ray ndaw ma key cek malamba

1 Ya fa cɛnda fa ndɛhay daa wura daa wura, a lɛvam ndaw da wuzlah akwar daha fa ley vaw saw. Kwa ndɛhay ma sɛrmara Gazlavay ba na, fa kam cek anda aɗga ma ka ngene daa ba. A lɛvmaya ndaw a fa ney ta ngwas nga papaha. 2 Sasɛkar ka tɛwam ba jak daw? Ka zlapam na, kwara? Ndaw ma key cek anda ngene na, si ka bɛlmara la da wuzlah akwar *. 3 Yah na, yah da wuzlah akwar fetede ba, ama mevel aɗaw aa ta akwar. Ya ta dɛsla mey da ray ndaw ma key cek malamba anda ngene cay anda yah da wuzlah akwar. 4 Ya dɛsla mey a na, ta mezɛley nga

4:15 4.15 Gal 4.19 **4:16** 4.16 11.1; Fɛl 3.17; 1Tes 1.6 **4:17** 4.17 Timawte: 16.10; SNM 16.1; 2Kwr 1.1 **4:19** 4.19 da Gazlavay ta tɛba la: SNM 18.21; Jak 4.15 **4:20** 4.20 2.4; 15.24 **4:21** 4.21 2Kwr 1.23; 13.10 **5:1** 5.1 Lev 18.8

* **5:2** 5.2 da wuzlah akwar: A wuɗfey nga lɛvey, daa mecɛmey-ray nga ndɛhay nga Yesu. **5:2** 5.2 6.12; 10.23 **5:3** 5.3-4 Kwa 2.5

Bay aləkwa Mahura Yesu. Anda kedē, ta pas masa akwar macēmƙaya daa slam a na, mevel adaw a da njeƙ ta akwar, asaya, gēdan ɗga Bay aləkwa Mahura a da njeƙ ta akwar may. ⁵ Daa mecēmey akwar a ɗgene, veldamara ndaw aha a bay-malula ɗga sērda banay ta vaw aɗga, amba Gazlavay a lēhda mesēfney aɗga ta pas masa Bay aləkwa Mahura ma da vōhwa.

⁶ Ka zlapam na, maja me? Mezlepey na, ara cek maaya ba. Ka sērmara cek ma hēsla hapa ɗga makala kuset kēdey na, a gwa ɗga hēsla hapa ɗga makala madakaya ga, ba diya? Aɗga letēk kōne, mebōrey ɗga ndaw pal na, a gwa ɗga nōsa mecēmey-ray akwar tabiya. ⁷ Anda ala *Jōwif hay maa zakadamara cek ma hēsla peɗ da way ala hay masa gwagway ɗga *Pak gweegwe cay na, akwar may, bōlmara ndaw aha la maja aɗga na, anda cek ma hēsla peɗ maaya ba da wuzlah akwar. Anda kedē, ka da tēram anda hapa ɗga makala madakaya tēlam manjar cek ma hēsla da hwad a. Ya sēra fara fara Gazlavay ta tērdakwar sem manjar mebōrey ta fa memōcey ɗga *Kōriste. Anda Jōwif hay ma hērmara bēz-tēban ɗgada Gazlavay ta gwagway ɗga Pak na, Kōriste na, aɗga anda bēz-tēban aləkwa ma mōcey maja aləkwa. ⁸ Anda kedē, kakwa gwagway! Ama ya kakwa gwagway a na, ta peɗ manjar cek ma hēsla da hwad a. Anda melōvey, mbēkdakwa mekey maagway. Tērkwa ndōhay manjar mebōrey, ndōhay maaya masa ma ka cek ta cōved e.

⁹ Daa leeter adaw lanƙar daha na, ya ta wuzlalakwar la, ya lōvkwar ka da cōmam dāy ta ndōhay ma lam vaw saw ba. ¹⁰ Yaa guzley na, da ray ndōhay ɗga bēla kedē ba. Da bēla kedē na, ndōhay ma lam vaw saw, ndōhay ma kam dey fa cek hay ɗga ndōhay, mayal hay leɗ ndōhay ma tam kuley hay daha. Da ndaw a lōvey a njeƙ ta ndōhay a daa slam a ba na, ɗgene si a mbēkda bēla kedē kwa. ¹¹ Ama yaa guzley na, da ray ndōhay ma sēpam cōved ɗga Yesu Kōriste. Da ndaw a lōvey aɗga fa sēpa cōved ɗga Yesu, fa dōba ha, a ley vaw saw, da daa ba, a key dey fa cek ɗga ndaw, da daa ba, a tey kuley hay, da daa ba, a cōdey ndaw, da daa ba, a sey wuzam, a wey, da daa ba, a leley na, ɗgene, ka da njam ta ndaw aha daa slam a ba. Kwa daf na, ka da zōmam daa slam a ba may. ¹²⁻¹³ Ndōhay ma sēpam cōved ɗga Yesu ba na, ara yah ma da katar sariya ba. Ara Gazlavay ma da katar sariya. Ama akwar na, si ka sanƙalamata ndōhay da wuzlah akwar, ba diya? Mey ɗga Gazlavay mawuzlalakaya,

a løyey: «Ndaw ma key cek malamba na, bølmarala da wuzlah akwar.»

6

Mey da ray sariya

¹ Da ndaw da wuzlah akwar ta tōram vaw la ta ndaw mekele da wuzlah akwar na, ndaw aha a wuda fa ndəhay ma ka sariya masa ma sōrmara Gazlavay ba na, kwara? A da wuda fa ndəhay a ŋgene ba sōlak. Anja maaya na, a wuda fa ndəhay ŋga Gazlavay.

² Ka sōrmara, ma da ka sariya ŋgada ndəhay da bēla tabiya na, ara ndəhay ŋga Gazlavay, ba diya? Da ara akwar ndəhay ŋga Gazlavay ma da kamatar sariya a ndəhay da bēla na, kaa cek mecəhe anda ŋgene, ka gwamara ŋga dōslmara mey da ray a ba na, kwara? ³ Sōrmara, kwa maslan hay ŋga Gazlavay da vad* na, ara aləkwa ma da kamatakwar sariya. Yaw, da ara anda kedē na, kaa ya gwakwa ŋga dōsley mey hay da bēla kedē ba na, maja me?

⁴ Ndəhay masa ma sōrmara Gazlavay ba na, mey ata ta akwar, ndəhay ma tēba mey ŋga Yesu, daa ba. Da kōne na, ka handamara mey ma key da wuzlah akwar ŋgada fa ata amba a dōslmakwara na, kwara? ⁵ Yaa guzlkwar anda kedē na, amba hwaray a kakwar. Fara fara, ndaw pal masa ta lenjesl da wuzlah akwar ŋga dīykwara mey hay na, daa ba daw? ⁶ Nəkmara cek masa akwar ma kamara! Akwar fa wudam vaw da wuzlah akwar, asaya, ka wudam vaw a na, fa mey ŋga ndəhay ma sōrmara Gazlavay ba. Ŋgene na, ara cek maaya daw?

⁷ Fara fara, akwar fa wudam vaw da wuzlah akwar. Mewudey vaw akwar a ŋgene a wudēy ŋga løyey akwar fa kam cek maaya anda Gazlavay ma wudēy na, daa ba sōlak. Da ndaw a kakwar cek maaya ba, da daa ba, a lalakwar na, maaya na, ka bōsmara gway, ka da wudmara ba. ⁸ Ma kam cek maaya ba ŋgada ndəhay na, ara akwar ta ray akwar jak. Kwa mōlmakw akwar hay siya daa cōved ŋga Yesu na, akwar fa lalamatara cek ata hay. ⁹ Ka sōrmara fara fara, ndəhay ma kam cek maaya ba na, fa da mbōzam aa slam masa Gazlavay fa wey da vad na, daa ba. Pam lenjesl, ka da fēcām ray akwar ba. Sōrmara, ndəhay ma kam cek malamba, ndəhay ma ta kuley hay, ndəhay ma lam vaw saw da palah, zel hay ma lam vaw ta zel cēla ta ŋgusay ma lam vaw ta ŋgwas cēla, ¹⁰ ndəhay ma lalam

5:12-13 5.12-13 Mew 13.6 **6:2** 6.2-3 Rm 5.17; 2Pi 2.4; Jud 6; CWJ 1.6 * **6:3** 6.3 maslan hay ŋga Gazlavay da vad: Ara maslan hay siya masa ma rōsmara Gazlavay zleezle. Nəka Jud 6; 2Pi 2.4. **6:7** 6.7 Mt 5.39-40; Rm 12.17 **6:9** 6.9-10 15.50; Gal 5.19-21

cek hay nga ndohay mekele, ndohay ma kam dey fa cek nga ndohay, ndohay ma sam wuzam ma wam, ndohay ma kam mbada fa ndohay ley ndohay ma bezla ndohay, fa da mbazam aa slam masa Gazlavay fa wey da vad na, daa ba. ¹¹ Zleezle na, ndohay da wuzlah akwar fa kam cek maaya ba kane. Ama wure kede na, Bay alakwa Mahura Yesu *Keriste ta *Mesafney nga Gazlavay alakwa ta permakwar sem, akwar manjar meborey, ta walamakwar sem wal ngada Gazlavay, ta tordamakwar sem nga ndohay maaya fa mey nga Gazlavay.

Mey da ray menjey maaya ma mbafar a Gazlavay

¹² Ndohay siya da wuzlah akwar fa wulkam, a lovam: «Cek matokakaya nga key na, daa ba.» Ahaw fara, cek matokakaya daa ba, ama cek hay siya fa da jenkwar daa ba. Ya wulkey yah ta coved nga key cek wura wura tabiya, ama ya fa da volda ray adaw nga torey beke nga cek hay a na, daa ba. ¹³ Akwar fa wulkam saya, ka lovam: «Gazlavay a karawa cek mezomey maja hwad, a karawa hwad may maja cek mezomey.» Ahaw fara, ama Gazlavay a ka la amba a ndavdata cek hay a cewete. Gazlavay a lomrawa vaw nga ndaw na, nga key cek malamba ta anga ba. Ama a lomrawa na, amba ya sapkwa Bay alakwa Mahura Yesu *Keriste. Asaya, ara Bay Mahura ma wey da ray vaw nga ndaw. ¹⁴ Gazlavay ta slakdadarwa Bay alakwa Mahura Yesu sem daa memocey, alakwa may, a da slakfandakurwa daa memocey ta gedan anga.

¹⁵ Ka sarmara vaw akwar hay na, ata anda mezovey hay nga vaw nga Keriste, ba daw? Ya gwa ya camda mezovey hay nga vaw nga Keriste a dey nga ngwas-barlaw daw? Kane na, fa da key daa ba selak. ¹⁶ Ndaw ma nam ta ngwas-barlaw na, vaw ata ta torey sem anda ndaw pal na, ka sarmara ba daw? Ara anda mawuzlalakaya daa dferewel nga Gazlavay, ma lovey: «Ata cewete, a teram anda ndaw pal.» ¹⁷ Ndaw ma volda ray anga a Bay Mahura Yesu na, mevel anga ta nga Bay Mahura ha na, ata letek.

¹⁸ Maja ngene, ka da lam vaw saw ba. Meborey hay mekele cəpa masa ndohay ma kamara na, a njeý fa vaw ata ba. Ama ndaw ma ley vaw saw na, a key ngene, a nesa vaw anga. ¹⁹ Vaw akwar ara slam-menjey nga *Mesafney nga Gazlavay na, ka sarmara ba daw? Gazlavay a veldakwara Mesafney anga amba a njeý daa akwar. Vaw akwar hay

6:11 6.11 Tit 3.3-7; Heb 9.14; 1Jn 1.7 **6:12** 6.12 8.9; 10.23; Gal 5.13; 1Pi 2.16

6:13 6.13 Mt 15.17-19; 1Tes 4.3 **6:14** 6.14 15.15, 20; Rm 6.4; 8.11; 2Kwr 4.14

6:15 6.15 12.27 **6:16** 6.16 MC 2.24; Mt 19.5; Ef 5.31 **6:17** 6.17 Jan 17.21-23;

Rm 8.9-11; 2Kwr 3.17-18; Gal 2.20

na, ara akwar ma wamara ba, ama ara Gazlavay ma wa.
²⁰ Gazlavay ta mbødkurwa sem ngada anga ta cek maaya
 nga læhdakwar daa mebørey. Maja ngene, hølmar ray a
 Gazlavay ta cek masa akwar ma kamara ta vaw akwar.

7

Mey da ray meley ngwas

¹ Wure keðe, amba ya mbøfdakwara aa mey masa akwar
 maa cøfdamaya daa leeter akwar heyey. Ka lõvmaya,
 maaya na, ndaw a ley ngwas ba. ² Ama, maja ndøhay fa
 lam vaw saw ngene na, ngama kwa waawa nga ley ngwas,
 ngwas may, nga ley zel. ³ Maaya na, zel a vøldara vaw a
 ngwas anga, ngwas may, a vøldara vaw a zel e. ⁴ Ngwas
 na, a gwa nga wa vaw anga ba, ama ara zel e ma wa. Ndaw-
 mezøle may, a gwa nga wa vaw anga ba, ama ara ngwas
 anga ma wa. ⁵ Anda keðe, ka da tøkam vaw da wuzlah
 akwar ba, si daa maðay akwar nga ðar nekøðey amba ka
 ðeram danjay a Gazlavay kwa. Fa døba ha, kamara anda
 maamandaw cønga. Da daa ba na, akwar fa da gwamara
 nga jøðmara vaw akwar daa ba, *Satan a da batakwar.

⁶ Yaa guzlkwar anda keðe na, a key, ya tøkakwar ðay ba,
 ama a key, ya vølkwar cøved amba ka kamara køne. ⁷ Da
 anda yah ma wuðey na, ya wuðey ndøhay tabiya a njam
 manjar ngwas anda yah. Ama Gazlavay a vølda gødan
 ngada ndøhay na, wal wal. Ngada ndaw lanjar a vølar
 gødan nga ley ngwas, ngada ndaw lanjar, a vølar gødan
 nga njeý manjar ngwas.

⁸ Wure keðe na, ya wuðey ngaa guzltar ngada ndøhay
 masa manjar ngusay ta ngada ngwas-vagay hay. Maaya
 na, ka njam køne manjar ngwas anda yah, da daa ba,
 manjar zel. ⁹ Ama da ka gwamara nga bøsmara ba na,
 maaya na, zel a ley ngwas, da daa ba, ngwas a ley zel.
 Ngama zel a ley ngwas, da daa ba, ngwas a ley zel da ray
 mewuðey nga ley vaw saw ngene ma da fønkwar ray.

¹⁰ Yaw, wure keðe ya wuðey ngaa guzltar a ndøhay masa
 ta ngusay, asaya, a ngusay masa ta zel hay masa ata daa
 *mecømey-ray nga ndøhay nga Yesu. Yaa guzley na, ara
 meý afaa ba, ama ara Yesu Bay Mahura maa guzley, a
 lõvey: ngwas a da bey dasi zel e ba. ¹¹ Da ngwas a mbøkda
 zel e na, nga njeý kwa a ley zel mekele ba. Da a wuðey nga
 ley zel saya na, nga vøhey asi zel e magurma nga ðiyørwa
 meý ata aa slam a. Zel may, a da bøla ngwas anga ba.

¹² Wure keƙe, ya wuƙey ɲɔaa guzley ɲɔada ndəhay mekele. Mey masa yah ma daa guzlda keƙe na, ara mey ɲɔa Bay Mahura saba, ama ara mey aƙaw gway. Ya fa ləvkwar, da ndaw ma təba mey ɲɔa Yesu *Kəriste aa ta ɲɔwas masa ma təba mey ɲɔa Yesu Kəriste ba, asaya, da ɲɔwas a ta təba la ɲɔa njeɣ ta aɲɔa na, a da bəla ɲɔwas aha ba. ¹³ Aɲɔa letek kəne may, da ɲɔwas ma təba mey ɲɔa Yesu aa ta zel masa ma təba mey ɲɔa Yesu ba, asaya, da zel e ta təba la ɲɔa njeɣ ta aɲɔa na, ɲɔwas aha a da bey ba. ¹⁴ Yaa guzley anda keƙe na, maja ndaw masa ma təba mey ɲɔa Yesu daa ba araɲ kaa na, aɲɔa gweegwe ta Gazlavay maja aɲɔa macəmkaya ta ɲɔwas aɲɔa masa ma təba mey ɲɔa Yesu sem. ɲɔada ɲɔwas masa ma təba mey ɲɔa Yesu daa ba araɲ kwa kəne may, aɲɔa gweegwe ta Gazlavay maja zel e. Da daa ba na, bəz ata hay fa da njam maaya fa mey ɲɔa Gazlavay daa ba. Ama fara fara bəz ata hay na, ata da wuzlah ndəhay ɲɔa Gazlavay. ¹⁵ Ama da ndaw ma təba mey ɲɔa Yesu ba fa wuƙey ɲɔa bəla ɲɔwas aɲɔa ma təba mey ɲɔa Yesu na, mbəkdamara ɲɔa bəla. Anda keƙe, ndaw ma təba mey ɲɔa Yesu, kwa da ara zel, kwa da ara ɲɔwas na, ata macəmkaya daa saba. Mbəkdamata ɲɔa wunkam ta zazay, maja Gazlavay a zəlkwurwa na, ɲɔa njeɣ daa zazay. ¹⁶ Kah, ɲɔwas ma təba mey ɲɔa Yesu, ka səra fara fara, zel akah a ləhey la daa mebərey maja kah daw? Kah, ndaw ma təba mey ɲɔa Yesu, ka səra fara fara, ɲɔwas akah a ləhey la daa mebərey maja kah daw?

Mey da ray menjeɣ ɲɔa ndəhay masa Gazlavay ma zəla

¹⁷ Cek mahura daa mey a keƙe na, ara mey masa yah maa sərkatatara a ndəhay ɲɔa Yesu daa mecəmey-ray hay tabiya. Maaya na, kwa waawa a ka sləra masa Gazlavay ma vəldara ɲɔa ka, asaya, ɲɔa njeɣ anda daa masa Gazlavay ma zəla. ¹⁸ Da Gazlavay a zəla ndaw ta sla mandawal daa ba araɲ na, ɲɔgene, a da sla mandawal saba. Yaw, da Gazlavay a zəla ndaw ta sla mandawal sem na, ɲɔa njeɣ ta mandawal aɲɔa maslakaya ha, kwa a key cek ba. ¹⁹ Kwa mandawal maslakaya, kwa manjar ɲɔa sley na, ara cek ɲɔa tede, maja a jəney ndaw fa mey ɲɔa Gazlavay ba. Cek mahura na, ara meney ray a *mewey ɲɔa Gazlavay. ²⁰ Si kwa waawa a njeɣ anda daa masa Gazlavay ma zəla. ²¹ Daa masa Gazlavay ma zəlka na, kah beke daw? Da kəne na, ka da wulkey ba. Ama da kah ta cəved amba ka pəska ray akah daa beke na, səpa cəved e. ²² Beke masa Bay Mahura *Kəriste ma zəla na, ta

7:14 7.14 Rm 11.16 **7:15** 7.15 menjeɣ daa zazay: 14.33; Rm 12.18; 14.19; 2Kwr 13.11; Kwa 3.15; Heb 12.14 **7:16** 7.16 1Pi 3.1 **7:18** 7.18 Gal 5.1 **7:19** 7.19 Rm 2.25-29; Gal 5.6

bawa sem daa beke maja anɔa macɛmkaya ta Bay Mahura ha. Yaw, ndaw-beke ba masa Kɛriste ma zɛla may, ta tɔrey sem beke nɔa Kɛriste he. ²³ Gazlavay ta mbɔdkurwa sem nɔgada anɔa ta cek maaya nɔa lɛhdakwar daa meɔrey. Ka da tɔram beke nɔa ndɔhay saba. ²⁴ Mɛlma adaw hay, kwa waawa nɔa nɔey anda daa masa Gazlavay ma zɛla.

Mey nɔgada ndɔhay manjar nɔgwas leɔ nɔgada nɔgwas-vagay hay

²⁵ Wure keɔe, ya wuɔey nɔgaa guzlar nɔgada ndɔhay masa manjar nɔgusay, ta nɔgada nɔgusay masa manjar zel hay. Mey a na, ara Bay Mahura ma wuzdiwa ba, ama ara mewulkey adaw gway. Ta nɔgene he cɔpa, jɛkfamaya slɛmay cɔnɔa maja yah na, Gazlavay ta sɔrfaya dey-ceceh la, amba yaa guzley meɔ masa fara fara ta gɔdan nɔa Bay Mahura.

²⁶ Maaya na, ndɔhay a nɔam anda ata manjatakaya gway. Yaa guzley anda keɔe, maja wure keɔe banay hay kalah.

²⁷ Da ndaw anɔa ta nɔgwas na, a da bɛla nɔgwas anɔa ha ba. Da ndaw nɔgwas anɔa daa ba na, a da ley nɔgwas ba. ²⁸ Ama da ndaw a ley nɔgwas na, ara meɔrey ba, da sabara a ley zel na, ara meɔrey ba. Sɔrmara, ndɔhay ma lam nɔgwas, da daa ba, nɔgusay ma lam zel na, a sɔram banay la ga da bɛla keɔe. Ya fa wuɔey banay a, a sawa a ray akwar ba.

²⁹ Mɛlma adaw hay, ya fa lɔvkwɔr, dɔr nɔa key slɛra nɔa Gazlavay ga daa saba. Anda keɔe, dɔga wure keɔe, ndɔhay ta nɔgusay na, nɔa nɔam anda ata ta nɔgusay daa ba. ³⁰ Ndɔhay masa fa tɔwam na, nɔa nɔam anda ata daa matɔway daa ba. Ndɔhay daa meesɛmey, nɔa nɔam anda ata daa meesɛmey daa ba. Ndɔhay ma hɔdkam cek, nɔa nɔam anda cek hay masa ata ma hɔdkamata ha nɔgene na, ara nɔgada ata ba. ³¹ Ndɔhay ma kam slɛra ta cek hay da bɛla keɔe, nɔa nɔam anda ata fa kam slɛra ta cek hay a daa ba. Ya lɔvkwɔr anda keɔe, maja bɛla keɔe fa da nɔey ga daa ba.

³² Ya wuɔey na, ray akwar a hɔbey ba. Ndaw masa ta ley nɔgwas daa ba na, mewulkey anɔa aa da ray Bay Mahura, a wuɔey nɔa key cek ma mbafar a Bay Mahura. ³³ Ama ndaw masa ta nɔgwas na, mewulkey anɔa aa da ray cek hay da bɛla, a wuɔey nɔa key cek nɔa mbafar a nɔgwas anɔa.

³⁴ Anda keɔe, lenɔgesl anɔa fa hɔbey. Asaya, nɔgwas manjar zel, da daa ba, sabara na, mewulkey anɔa aa da ray Bay Mahura. A wuɔey nɔa vɛlda mevel anɔa ta vaw anɔa cɔpa

7:22 7.22 Ef 6.6; Flm 16; 1Pi 2.16 **7:23** 7.23 6.20 **7:25** 7.25 1Tm 1.12-14

7:26 7.26 Jer 16.1-4; SNM 14.22; 1Tes 1.6; 3.3-4 **7:28** 7.28 Lk 21.23 **7:29**

7.29-31 Rm 13.11-13; 1Pi 4.7; Fɔl 4.5 **7:31** 7.31 1Jn 2.17 **7:33** 7.33 Lk 14.20

a Gazlavay. Ngwas masa ta zel na, mewulkey anga aa da ray cek hay da bəla. A wufey nga kar cek ma mbafar a zel e.

³⁵ Yaa guzlkwar anda keɗe na, nga jənkwar, ba na, a key ya təkakwar ɗay ba. Ama ya wufey na, ka kam cek ta cəved e, asaya, ka kamar sləra a Bay Mahura ta mevel pal.

³⁶ Ya wufey ngaa guzlkwar wure keɗe da ray bəz-gula ta kwakwa anga masa ta larawa a way daa ba araj. Da bəz-gula ha, a wulkey anga fa kar cek maaya ba a kwakwa anga, maja fa zənar vaw nga larawa, asaya, da anga fa wufey nga ney ta anga na, nga larawa a way anga anda aa ma wufey, ara mebərey ba. ³⁷ Ama da bəz-gula ha fa wulkey daa ray anga, a ləvey, maaya na, a la kwakwa anga ba, asaya, da ndaw a təkər ɗay ba, da a bəsa nga njeɗ kəne na, ngene, ara cek maaya. ³⁸ Yaw, ndaw ma ley kwakwa na, a key ngene, a key cek maaya. Ndaw ma ley kwakwa ba na, a key ngene, a key cek maaya ma fəna saya.

³⁹ Ngwas masa zel e ta məceɗ daa ba araj na, anga ta cəved nga ley zel mekele daa ba. Ama da zel e ta məceɗ sem na, anga ta cəved nga ley zel mekele anda aa mewufey, ama nga ley na, ndaw masa ma təba meɗ nga Yesu *Kəriste.

⁴⁰ Ama fa yah na, ngama a ley zel ba, maja da anga pal taava anga na, a da njeɗ maaya maaya da ray masa anga da way zel. Keɗe he ara mewulkey aɗaw. Ya wulkey yah may, yah ndaw masa ta *Mesəfney nga Gazlavay da ray.

8

Mey da ray aslaw nga kuley

¹ Wure keɗe na, ya daa guzley da ray aslaw nga kuley. Fara fara, aləkwa tabiya, ya sərkwā cek anda akwar ma ləvam. Mesərey cek na, fa zlapadata ndəhay. Ama mewufey-vaw na, fa vəltar gəɗan a ndəhay daa *mecəmey-ray nga ndəhay nga Yesu. ² Da ndaw a zlepey, a wulkey a sərey cek kalah, ngene, cek masa Gazlavay ma wufey na, a səra ba araj. ³ Ama ndaw ma wufa Gazlavay ta mevel anga pal na, Gazlavay a səra ndaw aha.

⁴ Yaw, aslaw nga kuley na, ya zəmkwa daw? Ya zəmkwa ba daw? Ya sərkwā kuley na, ara cek nga tede. Asaya, ya sərkwā Bay Gazlavay na, anga pal. ⁵ Fara fara, cek hay da gazlavay da vad ta da bəla daha masa ndəhay fa ragadamatar anda ngada Gazlavay. Cek hay a na, ara kuley hay. Kuley hay a na, ata ga. Asaya, bay hay mekele mekele

7:39 7.39 Rm 7.2-3 **8:1** 8.1 SNM 15.29; Rm 12.16; mewufey-vaw: 13.1-7; 14.1; 16.14; Jan 13.34; Rm 15.1-2; 2Kwr 8.7-8, 24; Gal 6.10; Ef 5.2 **8:1** 8.1-13 Rm 14.1-15.6 **8:3** 8.3 13.12; Gal 4.9 **8:4** 8.4 10.19-20; Mew 4.35, 39; 6.4-5; Gal 4.8-9

daha fa wam da ray ndohay, anda ata na, gazlavay nga ndohay a. ⁶ Ama ngada alakwa na, Gazlavay anga pal letek, ara Papa alakwa. Cek hay tabiya da belā na, ara anga ma katərwa. Menjey alakwa na, ara ngada anga. Bay Mahura na, anga pal may, ara Yesu *Kəriste. Gazlavay a katərwa cek hay tabiya ta fa anga. Ara anga ma vɛndakwar heter.

⁷ Ama ndohay siya da wuzlah akwar a sɛrmara mey masa fara fara ha kedɛ ba. Haa wure kedɛ fa zɛmam aslaw nga kuley, anda ata fa tam kuley cɛnnga. Ata ta gɛdan daa cɛved nga Gazlavay daa ba aran. Maja ngenɛ, a wulkam aslaw nga kuley masa ata ma zɛmamara na, ta nɛsta sem fa mey nga Gazlavay. ⁸ Sɛrmara, cek mezɛmey na, fa da tɛrdandakwar nga ndohay maaya fa mey nga Gazlavay na, daa ba. Da ya zɛmkwa aslaw nga kuley na, a jɛnndakwar ba, da ya zɛmkwa ba na, a nɛsey cek ba may.

⁹ Akwar na, ta cɛved nga zɛmey kwa meeme anda akwar ma wudam. Ama pam lenjesl! Da daa ba, ndohay masa ta gɛdan pɛreh daa mey nga Gazlavay na, a da kam mebɛrey maja akwar. ¹⁰ Yaw, wulkey da ray ndaw masa ta gɛdan pɛreh daa mey nga Gazlavay. Da a hɛtka, kah, ndaw masa ma sɛra cek, ka fa zɛmey aslaw daa way nga kuley na, ngenɛ, a hɛlda ndaw aha nga zɛmey aslaw nga kuley a daa ba daw? ¹¹ Maja ngenɛ, mɛlmakw masa ta gɛdan pɛreh ngenɛ, masa Kəriste ma mɛcey maja anga na, a da zlenjedɛy daa cɛved masa maaya maja mesɛrey cek akah ha ngenɛ. ¹² Da akwar fa kamar kɛne na, ngenɛ a key ka kamatar cek maaya ba a mɛlmakw akwar hay masa ta gɛdan pɛreh, asaya, a key ka dakalamatara mevel ata. Ka kam cek maaya ba ngenɛ na, ngada mɛlmakw akwar hay daada ba, ama a key ka kamar cek maaya ba ngada Kəriste ray anga may. ¹³ Maja ngenɛ, da mɛlma adaw a zlenjedɛy daa cɛved masa maaya maja cek masa yah ma zɛma na, ngenɛ, ya fa da zɛmey aslaw daa saba sɛlak amba mɛlma adaw a zlenjedɛy ba.

9

Mey da ray ndohay meslɛrey nga Yesu

¹ Yah na, ndaw ma waya ba, ya key cek anda yah ma wudɛy, ba diya? Yah na, *ndaw-meslɛrey nga Yesu. Ya ta hɛtar Bay alakwa Mahura Yesu la ta dey adaw *, ba diya? Fara fara, ara maja slɛra adaw ngada Bay Mahura

8:6 8.6 12.5-6; Jan 1.3-4; Ef 4.5-6; Kwa 1.16 **8:7** 8.7-12 10.23-33 **8:8** 8.8-9

Rm 14.13, 15, 17, 21; Gal 5.13 * **9:1** 9.1 Gazlavay a wuzar cek a Pawl, a hɛtar Bay Mahura daa masa anga fa dɛrey dangay da Jeruzelem. (SNM 22.14, 18; Gal 1.16)

Yesu, akwar ma tɔbmara mey anɔa. ² Kwa da ndɔhay siya a tɔbmara yah na, ndaw-meslɔrey nɔa Yesu ba, ama akwar na, ka sɔrmara fara fara yah ndaw-meslɔrey nɔa Yesu. Akwar macɔmkaya ta Bay Mahura Yesu maja yah ma wuzdakwara *Mey-maaya-mawiya. Nɔene, fa wuzdɔrwa yah na, ndaw-meslɔrey nɔa Yesu fara fara.

³ Ndɔhay maa guzlam mey maaya ba a ray adaw na, ya da mbɔddatara nɔgada ata, ya lɔvtar: ⁴ yah ta cɔved nɔa hɔtey cek mezɔmey ta nɔa sey cek maja slɔra masa yah ma ka, ba daw? ⁵ Ndɔhay meslɔrey hay mekele nɔa Bay Mahura Yesu *Kɔriste ta mɔlmaha hay lej *Piyer ata ta nɔgusay, fa pɔkam bama. Kaa yah na, ta cɔved nɔa ley nɔgwas ma tɔba mey nɔa Yesu, ya pɔkam cew e, ba daw? ⁶ Ma da key slɔra nɔa hɔtey cek mezɔmey na, si ala ta *Barnabas gway daw?

⁷ Ndaw-sewje ma hɔtey mawurbay nɔa slɔra anɔa ba, daha daw? Ndaw ma rɔvey wudez, cek ma tɔka nɔa zɔmey babɔza nɔa wudez e daha daw? Mecɔkwer nɔa gɔnaw hay, cek ma tɔka nɔa sey dɔwa nɔa gɔnaw hay a daha daw?

⁸ Mey masa yah maa guzlda kedɔe na, ara mewulkey nɔa ndɔhay magɔdan daada ba, kwa *kwakwas nɔa Mawiz na, faa guzley kɔne may. ⁹ Mawiz ta wuzleley la, a lɔvey: «Daa masa sla fa key slɔra da ley na, ka da par beben a mey ba.» Ka wulkam, Gazlavay fa wulkey na, da ray sla hay daada daw? ¹⁰ Kay, kɔne ba! Gazlavay aa guzley anda kedɔe na, nɔgada alɔkwa. Ndaw mehɔvey na, a wulkey a da hɔtey cek mezɔmey. Maaya na, a zɔmey cek masa anɔa ma hɔva ha may. Ndaw ma dɔgey daw na, maaya na, a zɔmey daw a may. ¹¹ Ala fa wuzdamakwara mey nɔa Gazlavay anda ndaw ma slɔkey hulfad a ley. Yaw, da ka vɔlmandar cek maja na, a kafakwar kalah daw? ¹² Da ndɔhay mekele ata ta cɔved nɔa hɔtey cek mezɔmey fa akwar na, ala may, ala ta cɔved nɔa hɔtey cek mezɔmey fa akwar ma fɔnta, ba diya? Anja nɔa key na, kɔne, ama kwa ala taa cɔdfafamakwar cek nɔa jɔnndar daa ba. Sasɔkar jak, banay hay tabiya na, ala fa bɔsmara, maja ala ta wudam nɔa key cek ma tɔkta ndɔhay nɔa cɔndamara Mey-maaya-mawiya da ray Kɔriste na, daa ba.

¹³ Ka sɔrmara ndɔhay ma ka slɔra daa *Way-mekey-kwakwas nɔa Gazlavay na, fa hɔtam cek mezɔmey fa slɔra masa ata ma kamara ha nɔene. Ndɔhay ma hɔram gɔnaw nɔa vɔley a Gazlavay na, a gwamara nɔa zɔmam

9:1 9.1-2 4.9, 15; 15.8-10; 2Kwr 2.14-17; 3.1-3; 5.18-20; 10.7-8, 13; 11.5, 13; 12.11-13; Gal 1.1 **9:4** 9.4 Lk 10.7-8; Mt 10.10 **9:6** 9.6 Barnabas: SNM 4.36; 11.22-26; slɔra masa Pawl ma key nɔa hɔtey cek mezɔmey: SNM 18.3 **9:9** 9.9 Mew 25.4; 1Kwr 10.11; 1Tm 5.18 **9:11** 9.11 9.4; Rm 15.27; Gal 6.6 **9:12** 9.12 SNM 20.34-35; 2Kwr 11.9

aslaw masa ata ma vøldamara a Gazlavay a ñgene may.

¹⁴ Anña letek køne ñgada ndøhay ma wuzdamara Mey-maaya-mawiya may, maja Bay aløkwa Mahura Yesu ta løvey la, ndøhay ma wuzdamara Mey-maaya-mawiya na, ñga høtam cek mezømey fa sløra ata ha.

¹⁵ Ama, yah na, ya taa cøfdøey cek daa ba sølak. Ka wulkam ya wuzlalakwara leeter keðe na, amba ka slørmaya cek daw? Kay, køne ba! Da yaa cødfafakwar cek maja sløra adaw na, kwa ya fa da høtey cek amba ya zlepey daa saba. Anda keðe, ñgama yah ma møcey. ¹⁶ Nñgada yah

na, mewuzey Mey-maaya-mawiya ara cek amba ya zlepey ta anña ba, maja ara sløra masa Gazlavay ma tøkya ðay ñga ka. Da ya wuzda Mey-maaya-mawiya ha ba na, banay a høtfaya la. ¹⁷ Da ara mewulkey adaw taava adaw ñga wuzey Mey-maaya-mawiya a ndøhay na, anja ñgene na, maaya a pølmiwa mawurbay ñga sløra adaw. Ama ara Gazlavay ma tøkya ðay ñga ka sløra ha. Anda keðe, ya key na, sløra masa mavøldakaya ñgada yah ñga key gway.

¹⁸ Kaa, mawurbay adaw na, daa ba daw? Mawurbay adaw na, daha. Ara mewuzey Mey-maaya-mawiya ñga tede. Yah ta cøved ñgaa cødfafatar cek hay fa ndøhay maja ya fa wuzda Mey-maaya-mawiya, ama kwa ya taa cøfdøey cek daa ba sølak.

Mey da ray Mey-maaya-mawiya ma daw fa mey fa mey

¹⁹ Yah na, kwa ndaw ma tøkya ðay ñga key cek na, daa ba. Ama, ya ta vølda ray adaw la ñga tørey beke ñga ndøhay tabiya amba ya jøney ndøhay ga ma føna ma føna ñga tøbey mey da ray Yesu *Køriste. ²⁰ Daa masa yah da wuzlah *Jøwif hay na, ya ñjey, ya key cek anda ata ma kamara,

amba ya jønta ñga tøbey mey da ray Yesu Køriste. Kwakwas ñga *Mawiz na, anña ta gødan da ray adaw daa ba, ama da yah da wuzlah ndøhay ma søpa kwakwas a na, si ya key cek anda ata ma kamara, amba ya jønta ñga tøbey mey da ray Yesu Køriste. ²¹ Da yah da wuzlah ndøhay ma søpam kwakwas ñga Mawiz ba na, ya key cek anda ata ma kamara,

amba ya jønta ñga tøbey mey da ray Køriste may. Ya ta løvey ya søpa *mewey ñga Gazlavay ba na, daa ba, maja fara fara, ya fa søpa mewey ñga Køriste. ²² Daa masa yah da wuzlah ndøhay ma tøba mey ñga Yesu masa ta gødan pøreh na, si ya key cek anda ata ma kamara, amba ya jønta ñga tøbey mey da ray Yesu Køriste. Ya kata cek hay wal wal tabiya anda ndøhay tabiya ma kamara, amba ndøhay

mekele mekele a ləham. ²³ Ya kata cek hay a tabiya keđe na, amba *Mey-maaya-mawiya a daw fa mey fa mey, asaya, amba Gazlavay a pəsyə mey, anda anğa ma pəstar mey a ndəhay mekele may.

²⁴ Daa kwakurda nğa mahway na, ndəhay ga ma hwam, ama ndaw ma da key bay-gula nğa hətey cek na, ndaw pal gway. Yaw, akwar may, kam gədan nğa hway anda bay-gula daa kwakurda ha amba ka hətey cek. ²⁵ Kwa waawa ma wudey nğa key kwakurda na, si a vəlda ray anğa, a mbəkdata cek hay mekele mekele ma nəsa ndaw, aa sərkey maaya maaya la dagay. A vəlda ray anğa anda keđe na, nğa key bay-gula, nğa hətey cek. Ama cek masa anğa ma da hətər fa mawurbay anğa nğene na, fa da njeý ga daa ba. Aləkwa na, ya vəldakwa ray aləkwa anda nğene amba ya hətəkwə cek masa ma da njeý nğa sərmatəw. ²⁶ Maja nğene, yah na, ya hway saw daa kwakurda ba. Asaya, yah na, anda ndaw mewedey har. Har adaw a daw a ley ba. ²⁷ Yah na, ya fa sərda banay ta vaw adaw, ya fa kəta vaw adaw ta gədan ta gədan, ya fa wey da ray vaw adaw amba yah, ndaw masa ma wuzda Mey-maaya-mawiya a ndəhay na, Gazlavay a kəzlaya ta cakay ba.

10

Mey da ray kuley hay

¹ Məlma adaw hay, ya wudey ka sərfaðamara cek masa Gazlavay ma ka ta papañ nğa papa aləkwa hay zleezle daa masa ata fa səpmar wurzay nğa *Mawiz. Gazlavay ta sərtata la ta mekwteñe * tabiya ata. Asaya, ata tabiya ta zləngam la ta daa Bəlay Magaza. ² Ata tabiya, Gazlavay ta katar *baptem la daa mekwteñe leñ daa bəlay a, amba a cəmta ta Mawiz. ³ Ata tabiya, ta zəmam cek ma sawa ta fa Gazlavay la daa slam a, ⁴ asaya, ta sam yam ma sawa ta fa Gazlavay la may. Yam masa ata ma samara ha na, a bawa daa pərad masa Gazlavay ma vəldatara. Pərad aha fa daw asi ata. Pərad aha na, ara *Kəriste. ⁵ Ta nğene he cəpa, ndəhay ga da wuzlah ata, a kam cek ma mbafar a Gazlavay ba. Maja nğene, ta məcam sem da wuzlah-ley.

⁶ Cek hay a ma kam nğene na, a pandakwar leñgesl amba cek hay malamba masa papañ nğa papa aləkwa hay ma

9:22 9.22 Rm 1.13; 2Kwr 5.11; 11.29 **9:24** 9.24-25 Fəl 3.12-14; 2Tm 2.4-6; 4.7-8; Jak 1.12; 1Pi 5.4; CWJ 2.10 **9:27** 9.27 Rm 8.13; 13.14 * **10:1** 10.1 Nəka Mab 13.21 ta 14.22-29. Mekwtene he a wuzwa Gazlavay aa ta ata. Mezləngey bəlay a wuzwa Gazlavay ma ləhdata sem. **10:1** 10.1 Mab 13.21; 14.21-29
10:3 10.3 Mab 16.13-35; Mew 8.3; Ps 78.24-25 **10:4** 10.4 Mab 17.6; Mesl 20.11; Ps 78.15 **10:5** 10.5 Mesl 14.29-30; Ps 78.31; Heb 3.17; Jud 5

kamara ngene na, ya kakwa ba. ⁷ Ndohay siya da wuzlah ata ta tam kuley hay la. Annga letek anda ma wuzlalakaya zleezle daa dferewel nga Gazlavay, a ləvey: «Da mey kuley, ndohay a njam nga zəmey cek ta nga sey wuzam. Fa dəba ha, a lacam, a gərvam da mey kuley a.» † Akwar na, ka da tam kuley anda ata ba. ⁸ Ndohay siya da wuzlah ata ta lam vaw saw la da palah, maja ngene, ndohay gabal kwakwar cew a ray a maakar (23.000) ta məcam la pas pal. Aləkwa na, ya da lakwa vaw saw da palah anda ata ba. ⁹ Ndohay siya da wuzlah ata ta jadamara Bay Gazlavay la, haa zezekw hay a zamata, ta', a məcam. Aləkwa na, ya da jadakwa Bay Mahura Kəriste anda ata ma jadamara Bay Gazlavay ba. ¹⁰ Ndohay siya da wuzlah ata taa nguram mey la ‡, maja ngene, maslan nga Bay Gazlavay masa ma kəfey ndaw vagay ta kəfta sem vagay. Akwar na, ka daa nguram mey anda ata ba.

¹¹ Cek hay maaya ba ma hətfatar papan nga papa aləkwa hay a ngene na, amba ndohay a pam lenjesl. Ta wuzlalamata cek hay a ma kam ngene la aa dferewel nga Gazlavay amba a pandakwar lenjesl, aləkwa masa ta dey da bəla masa fa da ndəvey kefe. ¹² Maja ngene, ndaw ma wulkey aa majarakaya na, si a wey vaw, da daa ba na, a da təfey. ¹³ Banay ma sawa a ray akwar nga jadakwar na, aa letek ta banay ma sawa a ray ndohay tabiya. Gazlavay na, cek masa aa ma ləvey a ka la na, a ka fara fara. Gazlavay a, a jənkwar la, anda kefe, cek ma da jadakwar nga fənkwar ta gədan daa ba. Da masa banay fa sawa a ray akwar nga jadakwar na, Gazlavay a da vəkwar gədan amba ka bəsmara banay a, asaya, a vəkwar cəved amba ka ləham.

¹⁴ Anda kefe, jam adaw hay, hwam dərənj ta kuley hay.

¹⁵ Yaa guzkwar anda kefe kaa na, maja ya sərə akwar ndohay ta lenjesl. Mey masa yah maa guzlda kefe na, ara mey fara fara. Akwar ta ray akwar, wulkam da ray mey a cey! ¹⁶ Daa masa aləkwa fa zəmkwa daf nga sərfezey meməcey nga Kəriste na, aləkwa fa kakwa suse a Gazlavay maja cek mesey daa vəley, ya sərkwā aləkwa macəmkaya ta Kəriste maja mambaz anga. Daa masa aləkwa fa zəmkwa pej na, ya sərkwā aləkwa macəmkaya ta Kəriste maja vaw anga. ¹⁷ Ma zəmamara pej e na, aləkwa ga, ama pej e na, anga pal gway. Maja ngene, aləkwa macəmkaya pal.

10:6 10.6 Mesl 11.4, 34; Ps 106.14 † **10:7** 10.7 Megərvey ata ngene, a həldata nga ley vaw saw da palah. Nəka Mab 32.6. **10:8** 10.8 Mesl 25.1-9 **10:9** 10.9 Mesl 21.5-6 ‡ **10:10** 10.10 Nəka Mesl 16.41; 17.5, 10. **10:10** 10.10 Mesl 14.2, 36; 16.41; 17.6-15; Ps 106.25-27; Heb 3.17-18 **10:11** 10.11 7.29-31; Rm 15.4 **10:12** 10.12 Gal 6.1 **10:13** 10.13 1.9; Jak 1.13-14 **10:14** 10.14 1Jn 5.21 **10:16** 10.16 11.24-25; Lk 22.17-20 **10:17** 10.17 12.27

18 Wulkam da ray ndəhay *Israyel hay zleezle, ata fa həram gənaw hay da ray slam-mefəkey cek a Gazlavay. Ndəhay ma zəmam aslaw mavəldakaya ngada Gazlavay na, ata macəmkaya ta Gazlavay. 19 Yaw, mey a kefe, a wufey nga ləvey na, kwara? A wufey nga ləvey, kuley ta aslaw nga kuley a na, ara cek hay fara fara ba. 20 Ama da ndəhay ma səmərə Gazlavay ba fa tam kuley na, a vəldamara aslaw a, a mesəfney maaya ba hay, ba na, a Gazlavay ba. Ya wufey na, ka cəmam ta mesəfney maaya ba hay a ba. 21 Ka sam cek masa mavəldakaya ngada mesəfney maaya ba hay, asaya, ka sam cek nga sərfedey meməcey nga Bay Mahura saya na, kwara? Ka zəmam dəf masa mavəldakaya ngada mesəfney maaya ba hay, asaya, ka zəmam dəf nga sərfedey meməcey nga Bay Mahura saya na, kwara? 22 Da ya kakwa kəne na, Bay Mahura a da ce y mevel a ray aləkwa, ba diya? Ka wulkam na, ya fənkwa Bay Mahura ta gədan daw?

Mey da ray cek ma da jənta ndəhay nga səpey mey nga Gazlavay

23 Ndəhay siya da wuzlah akwar, fa wulkam, a ləvam: «Cek matəkakaya nga key na, daa ba.» Ahaw, fara, cek matəkakaya daa ba, ama cek hay tabiya maaya nga key ba. «Cek matəkakaya nga key na, daa ba.» Ama cek hay tabiya a gwamara nga jənmata ndəhay daa *mecəmey-ray nga ndəhay nga Yesu ba. 24 Ka da nəkam dey fa cek hay ma jənmakwar daada ba, ama nəkam dey fa cek hay ma jənam ndəhay mekele may.

25 Aslaw tabiya masa akwar ma hətam daa luma na, ka gwamara nga hədkamara, ka zəmamara. Ka da wulkam da ray a ba səlak, ka daa cəfdamara ara aslaw nga me ba. 26 Yaa guzley anda kefe na, maja mawuzlalakaya daa dərewel nga Gazlavay, a ləvey: «Bəla ta cek hay da hwad a tabiya na, ara nga Bay Gazlavay.»

27 Anda kefe, da ndaw ma təba mey nga Yesu *Kəriste ba ta zəlkwār la nga zəmey dəf da way aŋga, da akwar ma təbmara la nga daw a way aŋga ha na, dəf masa ata ma vəldamakwara na, zəmamara, ka da wulkam da ray a ba səlak, ka daa cəfdamara ara aslaw nga me ba. 28 Ama da ndaw a ləvkwar: «Aslaw kefe, ara aslaw nga kuley» na, ŋgene, ka da zəmamara ba. Ka zəmamara ba maja ndaw ma kadakwara ŋgene, a da wulkey. 29 Yaa guzley na, maja

10:18 10.18 Lev 7.11-21 **10:19** 10.19 8.4 **10:20** 10.20 Mew 32.17; Ps 106.37; CWJ 9.20 **10:21** 10.21 2Kwr 6.15-16 **10:22** 10.22 Mew 32.21 **10:23** 10.23 6.12; 8.7-12 **10:23** 10.23-33 Rm 14.1-15.6 **10:24** 10.24 10.32; 13.5; Rm 15.1-2; Fəl 2.4 **10:25** 10.25 Rm 14.2 **10:26** 10.26 Ps 24.1; 89.12 **10:28** 10.28 8.7

mewulkey akwar ba, ama maja mewulkey nga ndaw aha. Fara fara, cek matəkakaya nga zəmey na, daa ba. Kaa, ya da key cek anda mewulkey nga ndaw mekele na, maja me?
³⁰ Da ya zəmey cek na, ya kar suse a Gazlavay maja cek aha. Kaa ndaw aa guzley maaya ba da ray adaw maja yah ma zəma cek masa yah ma kar suse sem a Gazlavay maja na, kwara?

³¹ Maja ngene, kwa ka zəmam cek, kwa ka sam cek, kwa ka kam cek wura wura na, kamara amba sləmay nga Bay Gazlavay a zəley. ³² Ka da kam cek masa ma həldata ndəhay nga kam mebərey ba, kwa ngada ndəhay *Jəwif hay, kwa ngada ndəhay masa Jəwif hay ba hay, kwa ngada ndəhay daa mecəmey-ray nga ndəhay nga Yesu, ka da kam ba. ³³ Njam anda yah, cek hay tabiya masa yah ma ka na, ya wudəy amba a mbafatar a ndəhay tabiya. Ya nəkey dey na, fa cek ma da jənya yah taava adaw ba, ama ya fa nəkey dey fa cek ma da jəney ndəhay ga may, amba Gazlavay a həldata daa mebərey.

11

¹ Yah na, ya fa key cek anda Kəriste. Akwar may, kam cek anda yah ma ka.

Mey da ray ngwas ta zel fa mey nga Gazlavay

² Ya fa həlmakwar maja akwar fa sərfadamaya mandaw mandaw, asaya, maja akwar fa kamata cek hay anda yah maa sərkadakwa.

³ Ama ya wudəy na, ka sərmara, *Kəriste na, anğa *bay-ray nga ndəhay tabiya, zel na, anğa bay-ray nga ngwas anğa, Gazlavay may, anğa bay-ray nga Kəriste. ⁴ Da ndaw-mezəle fa dərar dangay a Gazlavay, asaya, fa wuzey mey nga Gazlavay fa mey nga ndəhay ta jikwew da ray na, ngene a key a rəsa Kəriste, ndaw masa ma wa. ⁵ Ngwas may, da anğa fa dərar dangay a Gazlavay, da daa ba, fa wuzey mey nga Gazlavay fa mey nga ndəhay na, a da mbəkda ray ba' kəne ba, nga jəwey adikwaw a ray, da daa ba na, a key ngene, a rəsa zel e. Ngwas aha na, hwaray a da kar anda ngwas masa ray mahəjkaya. ⁶ Da ngwas a jəwey adikwaw a ray ba na, nga həja ray * anğa. Ama, maja mehəjey ray, da daa ba, mesley ray, a key hwaray na, ngene nga jəwey adikwaw a ray.

⁷ Da ndaw-mezəle fa da dərar dangay a Gazlavay na, a da pey jikwew a ray ba, maja anğa na, a lawa Gazlavay, asaya,

10:30 10.30 Rm 14.6; 1Tm 4.4 **10:31** 10.31 Kwa 3.17 **10:32** 10.32 Rm 14.13

10:33 10.33 9.19-22 **11:1** 11.1 4.16 **11:2** 11.2 2Tes 2.15; 3.6 **11:3** 11.3

3.23; MC 3.16; Ef 5.23 * **11:6** 11.6 a həja ray: a həza ray

aa fa wuzdərwa gədan̄ ŋga Gazlavay. Ama ŋgwas na, aa fa wuzdərwa gədan̄ ŋga zel e. ⁸ Gazlavay ta ley tetesl daa vaw ŋga ŋgwas ŋga ləmey ndaw-mezəle na, daa ba. Ama a ley na, tetesl daa vaw ŋga ndaw-mezəle ŋga ləmey ŋgwas. ⁹ Gazlavay ta ləma ndaw-mezəle maja ŋgwas na, daa ba, ama a ləma ŋgwas maja ndaw-mezəle. ¹⁰ Maja ŋgene, ŋgwas na, si a jəwey adikwaw a ray maja maslan̄ hay ŋga Gazlavay † da vad. Mejəwey adikwaw a ray ŋgene a wuzwa an̄ga fa nar ray a zel e. ¹¹ Ama daa menjey aləkwa ta Bay Mahura na, ŋgwas a wa ray an̄ga ba, ndaw-mezəle may, a wa ray an̄ga ba. ¹² Kwa Gazlavay a ləma ŋgwas ta tetesl ŋga ndaw-mezəle na, ama ara ŋgwas ma yarawa ndaw-mezəle cəŋga. Ata cewete na, ara Gazlavay ma ləmtərwa, Gazlavay masa ma katərwa cek hay tabiya.

¹³ Akwar ta ray akwar, wulkam cey: ŋgwas na, a dərar dan̄gay a Gazlavay ray ba' kəne fa mey ŋga ndəhay na, maaya daw? ¹⁴ Kwa waawa a səra da ndaw-mezəle an̄ga ta en̄gwec fa ray ga na, ara hwaray ŋgada ndaw aha. ¹⁵ Ama ŋgwas, da an̄ga ta en̄gwec fa ray səlep səlep na, ara cek maaya kalah ŋgada an̄ga, maja Gazlavay a vəldara en̄gwec maazəma na, amba a bərda ray an̄ga. ¹⁶ Da ndaw fa key yawa da ray mey a na, si a səra kwakwas ala mekele da ray mey a keđe na, daa ba. Kwa kwakwas mekele ŋga ndəhay daa *mecəmey-ray hay ŋga Yesu da ray mey a na, daa ba may.

Mey da ray mezəmey daf ŋga sərfeđey meməcey ŋga Bay Mahura Yesu
(Matiye 26.26-29; Mark 14.22-25; Luk 22.14-20)

¹⁷ Ehe, ya wuđey ŋgaa guzlkwar mey mekele daha. Ya fa da kakwar suse maja mey a daa ba. Mekusey akwar tabiya na, fa dīykwar daa ba, ama a key a nəskwar jak. ¹⁸ Cek ŋgeeme na, ya fa cənda fa ndəhay, a ləvam daa mekusey akwar ŋga dərey dan̄gay a Gazlavay na, akwar fa walam vaw ta weley da wuzlah akwar. Ya wulkey taa slam lan̄gar na, akwar fa kamara kəne fara. ¹⁹ Yaw, maaya na, mewudkey-đay a key da wuzlah akwar amba ndəhay ma səpmara mey ŋga Yesu ta cəveđ e, a səram kwa. ²⁰ Daa mekusey akwar akwar fa zəmam daf, ama ara ŋga sərfeđey meməcey ŋga Bay Mahura fara fara ba, ²¹ maja kwa waawa

11:7 11.7 MC 1.26-27 **11:8** 11.8-9 MC 2.18-23; 1Tm 2.13 † **11:10** 11.10 maja maslan̄ hay ŋga Gazlavay: Ndəhay a wulkam Pawl a wuđey ŋga ləvey maslan̄ hay ŋga Gazlavay na, ata da wuzlah ndəhay daa medərey-dan̄gay. Anda keđe, a wudam cek hay tabiya a kam ta cəveđ e. Ndəhay mekele a wulkam a ləvam maslan̄ hay na, fa sərtamara ray ata fa mey ŋga Gazlavay may. Nəka Iz 6.2.

11:18 11.18 1.10-11 **11:19** 11.19 Mew 13.2-4; 1Jn 2.19

fa wusey vaw nga zōma daf anga. Anda keđe, ndōhay siya, may fa catar, ama siya hay, fa wam. ²² Akwar na, ta way akwar hay, ba diya? Zōmamatərwa daf a, samatərwa cek akwar hay a da way akwar hay gway taw. Ka wudam nga rəsmata ndōhay daa mecəmey-ray nga ndōhay nga Yesu daw? Ka wudam nga pamatar hwaray a ndōhay masa-viya hay daw? Ka wudam yaa guzlkwar na, kwara? Ka wulkam na, ya kakwar suse la daw? Kay! Ya fa da kakwar suse daa ba səlak.

²³ Cek masa yah maa sərkadakwara keđe na, ara Bay Mahura Yesu maa sərkadīwa. Dasi tavad masa ata ma da vōldamara Bay Mahura Yesu a har masa-gəra anga hay nga sərdamara banay na, Yesu a, lej! a ley peŋ, ²⁴ a kar suse a Gazlavay maja, a wunka, ta', aa guzley, a ləvey: «Keđe he, ara vaw adaw mavōldakaya ngada akwar. Kamara anda keđe amba ka sərfađamaya.» ²⁵ Masa ata ma ndōvdamara mezəmey daf la na, lej! a la vōley ta cek mesey da hwad a, ta', aa guzley saya, a ləvey: «Keđe he na, ara mambaz adaw. Ta fa mambaz a, Gazlavay a jəwey mey mawiya ta ndōhay anga hay. Da akwar fa da samara na, kamara anda yah ma ka keđe amba ka sərfađamaya.» ²⁶ Anda keđe, ta pas masa akwar fa zōmamara peŋ keđe ta akwar fa samara cek aha keđe na, ngene, akwar fa wuzdamara mey da ray meməcey nga Bay Mahura, dəga wure keđe haa kasl ma vəhwa anga.

²⁷ Anda keđe, da ndaw a zōma peŋ, a sa cek mesey nga Bay Mahura saw saw na, a key ngene, a key mebərey maja anga ma rəsa vaw ta mambaz nga Bay Mahura ha. ²⁸ Da ray ngene, si ndaw a nəka ray anga la dāgay, fa dəba ha, a gwa nga zəmey peŋ e, ta nga sey cek mesey a.

²⁹ Ndaw ma zōma peŋ ta ma sey cek mesey a ta meney ray ba na, ngene, ta wulkey da ray meməcey nga Bay Mahura daa ba. Anda keđe, Gazlavay a da cey mevel da ray a.

³⁰ Ara maja ngene, masa-macay hay ta masa-bəle hay ga da wuzlah akwar daha. Asaya, siya hay ga ta məcəm sem.

³¹ Da kwa waawa da wuzlah aləkwa a nəka ray anga la dāgay, wara cay a zəmey daf nga sərfađey meməcey nga Bay Mahura na, ngene, Gazlavay fa da cey mevel a ray aləkwa daa ba. ³² Ama, da Bay Gazlavay fa sərdandakwar banay na, a key ngene, a kətndakwar amba ta pas masa Gazlavay ma da katar sariya a ndōhay da bəla na, sariya ha, a kərzandakwar anda ndōhay siya hay ba.

11:22 11.22 Jak 2.5-6 **11:23** 11.23-25 10.16; Mt 26.26-28 **11:25** 11.25 mejəwey-mey: Jer 31.31-34; Lk 22.20; 2Kwr 3.6; Heb 8.6; mambaz: Mab 24.6-8; Heb 9.12 **11:26** 11.26 Mt 26.29 **11:27** 11.27 11.20-22; Heb 10.29 **11:28** 11.28 2Kwr 13.5 **11:32** 11.32 Heb 12.5-6; CWJ 3.19

³³ Anda kedē, mēlma adāw hay, da masa akwar ta kusam la ŋga zəmey daf ŋga sərfeɖey meməcey ŋga Bay Mahura na, səkwam vaw da wuzlah akwar la dāgay. ³⁴ Da ndaw may fa car na, ŋga zəmwa daf da way aŋga la dāgay, amba daa masa akwar makustakaya na, Gazlavay a ceɣ mevel a ray akwar ba. Da ray mey hay mekele na, da masa ya ta wusey la fa akwar na, ya dīyta mey hay a la.

12

Mey da ray gədan masa Mesəfney ŋga Gazlavay ma vəldatara a ndəhay

¹ Mēlma adāw hay, wure kedē ya daa guzlkwar da ray gədan mekele mekele masa *Mesəfney ŋga Gazlavay ma vəlda ŋgada ndaw a, ndaw a maja mewuɖey-vaw aŋga. Ya wuɖey na, ka cəndamara mey da ray gədan a maaya maaya. ² Ka sərmara daa masa akwar ta tərām ndəhay ŋga Yesu *Kəriste daa ba aran na, akwar fa tam kuley hay. Kuley hay na, aa guzlam ba, ama akwar fa vəldamara ray akwar a kuley hay ŋga wamakwar ma fəna ma fəna, ka gwamara ŋga jaram ba. ³ Maja ŋgene, ya wuɖey na, ka sərmara fara fara, da ndaw aŋga ta Mesəfney ŋga Gazlavay da ray a na, ndaw aha, a gwa ŋгаа guzley, a ləvey: «Kuse! Yesu ŋga nəsey» na, daa ba. Ama, da ndaw aa guzley, a ləvey: «Yesu ara Bay aləkwa Mahura» na, ŋgene, ndaw aha aa guzley ta gədan ŋga Mesəfney ŋga Gazlavay.

⁴ Gədan masa Mesəfney ŋga Gazlavay ma vəldatara a ndəhay ŋga key sləra aŋga na, a wuzwa wal wal fa ndaw a fa ndaw a, ama ara Mesəfney a pal ŋgene ma vəldatara a ndəhay. ⁵ Sləra hay masa Bay Mahura Yesu ma vəldatara ŋgada ndəhay na, ata wal wal may, ama ya kakwa sləra ŋgada Bay Mahura pal gway. ⁶ Gazlavay a vəltar gədan wal wal ŋgada ndəhay ŋga key sləra aŋga, ama ara Gazlavay pal ma vəlda gədan ŋga key sləra hay a tabiya.

⁷ Gədan ŋga Mesəfney ŋga Gazlavay fa wuzwa vaw wal wal ŋgada kwa waawa da wuzlah akwar. A key anda ŋgene na, ŋga jəney ndəhay tabiya. ⁸ Mesəfney ŋga Gazlavay a vəlar lenɣesl maaya ŋgada ndaw ŋгаа guzley maaya. Ŋgada ndaw lanɣar, Mesəfney a, a vəlar gədan ŋga sərey cek hay amba a wuzdatara a ndəhay. ⁹ Ŋgada ndaw lanɣar saya, Mesəfney ŋga Gazlavay a vəlar gədan ŋga təbey mey ŋga Yesu fara fara aa mevel aŋga. A səra a gwa a key cek ma fəna gədan aŋga ta fa Mesəfney ŋga Gazlavay a. Ŋgada

ndaw mekele, Mesəfney nga Gazlavay a vəlar gədanj nga mbəley masa-macay hay. Ara Mesəfney nga Gazlavay a pal ηgene ma vəlda gədanj nga key sləra hay a. ¹⁰ A vəlar ηgada ndaw lanjar gədanj nga key maazla hay. ηgada ndaw mekele, a vəlar gədanj nga təley mey masa Gazlavay ma wuzdara. ηgada ndaw mekele, a vəlar gədanj nga sərey sləra nga Mesəfney nga Gazlavay ta nga sərey sləra nga mesəfney maaya ba. ηgada ndaw lanjar saya, a vəlar gədanj ηgaa guzley ta mey hay mekele mekele masa anja ma cənda ba. ηgada ndaw lanjar saya, a vəlar gədanj nga mbəfdey mey masa ndaw ma cənda ba. ¹¹ Ara Mesəfney nga Gazlavay a pal taava anja ma gwa nga vəlda gədanj nga key sləra hay a tabiya. Mesəfney a, a wunkey gədanj mekele mekele anda aa ma wufey ηgada kwa waawa.

Mey da ray mecəmey-ray nga ndəhay nga Kəriste

¹² Yaw, vaw nga ndaw-magədanj na, anja pal, ama mezəvey hay mekele mekele daha. Kwa mezəvey hay ga fa ndaw daha, ama vaw na, anja pal gway. *Kəriste na, aa kəne may. ¹³ Daa masa aləkwa ma hətkwa *baptem na, aləkwa tabiya ta təkwa vaw pal sem ta gədanj nga *Mesəfney nga Gazlavay pal. Aləkwa tabiya, kwa *Jəwif hay, kwa ndəhay masa Jəwif hay ba, kwa beke hay, kwa beke hay ba, Gazlavay a vəldakwar na, Mesəfney anja ha ηgene pal.

¹⁴ Vaw nga ndaw na, anja ta mezəvey pal daada ba, ama anja ta mezəvey hay ga. ¹⁵ Da salay a ləvey: «Yah mezəvey nga vaw ba maja yah na, har ba», kwa da aa guzley kəne na, anja mezəvey nga vaw ba fara daw? ¹⁶ Da sləmay a ləvey: «Yah mezəvey nga vaw ba, maja yah na, dey ba», kwa da aa guzley kəne na, anja mezəvey nga vaw ba fara daw? ¹⁷ Da vaw nga ndaw ara dey daada na, ηgene ndaw aha a da jəkey sləmay ta me? Da vaw nga ndaw, ara sləmay daada na, ηgene ndaw aha a da cənda mezey nga cek hay ta me? ¹⁸ Ama Gazlavay ta katərwa mezəvey hay nga vaw la tabiya aa slam anja, aa slam anja, anda aa ma wufey. ¹⁹ Da Gazlavay a pey mezəvey nga vaw pal daada na, ηgene, ara vaw ba. ²⁰ Ya sərkwə, mezəvey hay nga vaw na, ata ga, ama vaw na, anja pal gway.

²¹ Anda kedə, dey a gwa a ləvey: «Walay adaw ta har daa ba» na, kəne ba. Asaya, ray a gwa a ləvey: «Walay adaw ta salay daa ba» na, kəne ba. ²² Sasəkar jak, mezəvey nga vaw masa kah ma pa nga cek nga tede ηgene, da mezəvey

a daa ba na, ka mæcey. ²³ Mezəvey hay ɲga vaw masa ma mbafandakwar ba na, ya wakwa vaw ta aɲga jak, ba diya? Mezəvey hay ɲga vaw masa aləkwa ma badatakwa fa dey ɲga ndəhay na, ya pakwa lenɲesl kalah na, a ray ata jak, ba diya? ²⁴ Mezəvey hay ɲga vaw masa ma mbam na, ɲga ata, ya pakwa lenɲesl a ray ata ba. Gazlavay a pata mezəvey ɲga vaw ɲga ndaw cəpa, a həsltar ray. A həsltar ray ma fəna na, ɲgada mezəvey hay masa ma nəkam anda cek ɲga tede. ²⁵ A patərwa mezəvey hay tabiya aa slam a na, amba vaw a wunkey ba, asaya, amba mezəvey hay a jənam vaw da wuzlah ata. ²⁶ Da mezəvey ɲga vaw pal fa sərey banay na, mezəvey hay ɲga vaw tabiya a səram banay asiya may. Da fa həslmar ray a mezəvey ɲga vaw pal na, mezəvey hay siya tabiya aa səmam may.

²⁷ Yaw, akwar na, vaw ɲga Kəriste. Kwa waawa na, aɲga mezəvey pal ɲga vaw ɲga Kəriste he. ²⁸ Daa *mecəmey-ray ɲga ndəhay ɲga Yesu na, Gazlavay ta pey ndəhay la mekele mekele ɲga key sləra aɲga. Ngeeme na, a pey ndəhay meslərey ɲga Yesu. Nga dey cew e na, a pey ndəhay ma təla mey aɲga. Nga dey maakar a na, a pey ndəhay maa sərkada ndəhay. Asaya, ɲgada ndəhay mekele a vəltar gədan ɲga key maazla hay. Nɲgada ndəhay mekele, a vəltar gədan ɲga mbəley masa-macay hay. Nɲgada ndəhay mekele, a vəltar gədan ɲga jəney ndəhay. Nɲgada ndəhay mekele, a vəltar gədan ɲga key *bay-ray. Nɲgada ndəhay mekele saya, a vəltar gədan ɲgaa guzley ta mey hay mekele mekele masa ata ma səmara ba. ²⁹ Ndəhay tabiya na, ata ndəhay meslərey ɲga Yesu daw? Ndəhay tabiya na, fa təlam mey ɲga Gazlavay daw? Ndəhay tabiya na, faa sərkadamatara mey ɲga Gazlavay a ndəhay daw? Ndəhay tabiya na, fa kam maazla hay daw? ³⁰ Ndəhay tabiya na, fa mbəlam ndəhay daa macay daw? Ndəhay tabiya na, faa guzlam ta mey hay masa ata ma səmara ba daw? Ndəhay tabiya na, fa mbəɸdamara mey hay masa ndəhay ma cəndamara ba a ndəhay mekele daw? ³¹ Ama sləra hay masa Mesəfney ɲga Gazlavay ma vəldatara a ndəhay ma fənta siya hay na, kamara ta mevel pal.

Mey da ray mewudfey-vaw

Wure keɸe, ya da wuzkwar cəveɸ maaya ma fənta cəveɸ hay mekele.

13

¹ Kwa yaa guzley ta mey hay mekele mekele, kwa yaa guzley ta mey nga maslan hay nga Gazlavay, ama da ya wufey ndaw ba na, ngene, yah na, letek ta gwanḡwanḡ, da daa ba, ta mawiyar ma wurzley sləmay. ² Da Gazlavay a vəlya gədan nga təley mey anḡa a ndəhay, kwa ya sərta cek hay tabiya, kwa ya cənda mey hay nga Gazlavay masa mabadatakaya, kwa ya təba mey nga Gazlavay kalah haa ya gwa ya ləvar ngada anḡwa: «Sləkəfey, daw», fa dəba ha, anḡwa ha a daw na, kwa ta ngene he cəpa, da ya wufey ndaw ba na, ngene, yah cek nga tede. ³ Da ya wunkatara cek adaw hay tabiya a ndəhay masa-viya hay, kwa da ya vəlda ray adaw nga wewurey maja ndəhay, ama da ya wufey ndaw ba na, ngene kwa fa da jənya daa ba.

⁴ Ndaw ma wufey ndaw na, a bəsta ndəhay tabiya, a key cek hay maaya ngada ndəhay, a key sələn fa ndəhay ba, a zlepey ba, a gəlda ray anḡa ba. ⁵ Ndaw ma wufey ndaw na, a key cek ma ka hwaray ba, a wulkey da ray cek hay ngada anḡa taava anḡa ba, a cey mevel ba, a pey mey aa mevel ba. ⁶ Ndaw ma wufey ndaw na, aa səmey da ray cek hay maaya ba hay ba, ama aa səmey da ray cek hay masa maaya fara fara. ⁷ Ndaw ma wufey ndaw na, a bəsa cek ma key maaya ba tabiya fa mey anḡa, a wuzda ba, a təba mey nga Gazlavay mandaw mandaw, a wulkey Gazlavay a da dīyta cek hay tabiya, asaya, a bəsta cek hay wura wura cəpa.

⁸ Mewufey-vaw na, fa da ndəvey daa ba sələk. Ama, metəley-mey nga Gazlavay na, a ndəvey la. Gədan ngaa guzley mey hay mekele mekele masa ndəhay ma cəndamara ba na, a ndəvey la. Yaw, mesərey-cek may, a ndəvey la. ⁹ Fara fara, cek hay a, a ndəvam la, maja mesərey-cek aləkwa ta metəley-mey nga Gazlavay na, a wuzdatərwa cek hay cəpa ba, si nekəfey gway. ¹⁰ Ama ta pas masa Gazlavay ma da wuzdandakwara cek masa maaya tabiya na, cek masa aləkwa ma sərkwə nekəfey heyey na, a ndəvey la.

¹¹ Daa masa yah daa bəzey na, ya faa guzley anda bəza hay, ya fa wulkey anda bəza hay, asaya, ya fa cəndata cek hay anda bəza hay. Ama wure kefe na, ya ta tərey ndaw mahura sem, ya ta mbəkda mekey cek hay anda bəza hay sem. ¹² Wure kefe, aləkwa fa hətmatakwa cek hay maaya maaya daa ba, ya nəktakwa cek hay anda ndaw ma nəkey cek daa banḡəra manəskaya. Ama pas pal na, ya da

høtmatakwa cek hay tabiya fa dey aløkwa maaya maaya. Wure kede na, mesørey-cek adaw, anğa nekødey gway. Pas a, a wuswa la masa yah ma da sərta cek hay tabiya maaya maaya anda Gazlavay ma sərya maaya maaya kede may.

¹³ Yaw, cek hay maakar daha fa da ndøvam daa ba. Cek hay a na, ara metøbey-mey nğa Gazlavay, mesøkwey cek fa Gazlavay, leŋ mewudəy-vaw. Cek hay maakar ata kede na, fa da ndøvam daa ba, ama cek mahura da wuzlah ata na, ara mewudəy-vaw.

14

Mey mekele saya da ray gødan masa Mesøfney nğa Gazlavay ma vødatara a ndøhay

¹ Teesed na, səpam nğa wudəy vaw da wuzlah akwar. Asaya, vødamara ray akwar may nğa høtey gødan masa *Mesøfney nğa Gazlavay ma vødatara nğada ndøhay nğa key sløra anğa. Vødamara ray akwar kalah na, nğa høtey gødan nğa tøley mey masa Gazlavay ma wuzdara nğada ndøhay. ² Ndaw maa guzley mey hay masa ma cøney ba na, a key nğene, aa guzlar a Gazlavay, ba na, aa guzley nğada ndøhay ba, maja ndøhay a cøndamara mey masa anğa maa guzlda ha ba. Aa guzley nğene na, ta gødan nğa Mesøfney nğa Gazlavay, aa guzley da ray cek hay mabadatakaya.

³ Ama *ndaw ma tøla mey masa Gazlavay ma wuzdara na, a key nğene, aa guzltar a ndøhay. Mey anğa a vøltar gødan a ndøhay, a jønta amba a tøbmara mey nğa Gazlavay maaya maaya, asaya, a døktar mevel. ⁴ Ndaw maa guzley mey masa ndøhay ma cøndamara ba na, nğene, mey a, a jøney anğa ray anğa gway. Ndaw ma tøla mey masa Gazlavay ma wuzdara na, a key nğene, a jønta ndøhay daa *mecømey-ray nğa ndøhay nğa Yesu tabiya.

⁵ Ya wudəy na, akwar tabiya, kaa guzlam ta mey masa ndøhay ma cøndamara ba, ama ya wudəy ma føna saya na, ka tølām mey masa Gazlavay ma wuzdakwara may. Da ndaw aa guzley ta mey masa ndøhay ma cøndamara ba, maaya na, ndaw nğa mbødda mey a daha amba mey a, a jønta ndøhay tabiya daa mecømey-ray nğa ndøhay nğa Yesu. Da ndaw nğa mbødda mey a daa ba na, nğene, ndaw ma tøla mey masa Gazlavay ma wuzdara na, a jønta ndøhay a føna ndaw maa guzley ta mey masa ndøhay ma cøndamara ba.

⁶ Məlma adaw hay, da ya daw fa akwar, yaa guzlkwar ta mey mekele mekele masa akwar ma cəndamara ba, ηgene, mey a, a da jənkwar na, kwara? Da ya kadakwara mey mabadakaya ηga Gazlavay ba, da ya wuzdakwara cek hay mekele ba, da ya təley mey masa Gazlavay ma wuzdiwa ba, asaya, da yaa sərkadakwar ba na, ηgene, a key ya jənkwar daw?

⁷ Anğa letək ta cek hay ma ka walay anda sləlam ta ganjaval. Da ka fa sləlam saw na, ndaw a da cənda d̄ay ηga walay masa kah ma fa ha na, kwara? Da ka kəda ganjaval saw na, ndaw a da cənda d̄ay ηga walay masa kah ma kəda ha na, kwara? ⁸ Mefey taalam ηga zəley ndəhay ηgadaa vərəm na, kəne may. Da ndaw ma fa taalam a maaya maaya daa ba na, ndaw fa da sərə ara madaw ηgadaa vərəm na, daa ba. ⁹ Nğada akwar may kəne. Da kaa guzlam mey masa ndəhay ma cəndamara ba, ndəhay a da cəndamara mey masa akwar maa guzldamara ha na, kwara? Anda keḑe, mey akwar a, a da tərey ηga cek ηga tede.

¹⁰ Mey hay mekele mekele ga daha da bəla. Kwa səkway wura wura faa guzley ta mey anğa na, a cənda. ¹¹ Anda keḑe, da ndaw aa guzlya ta mey anğa, ama ya cənda mey a ba na, ndaw a ηgene anğa ndaw-mələk fa mey adaw. Yah may, yah mələk fa mey anğa. ¹² Yaw, maja akwar fa wudam ηga hətey gədan ηga key sləra hay masa Mesəfney ηga Gazlavay ma vəldatara ηgada ndəhay anğa hay na, maaya na, ka səpam ηga hətey teesəd na, gədan ηga key sləra hay ma gwa ηga jənmata ndəhay daa mecəmey-ray ηga ndəhay ηga Yesu.

¹³ Maja ηgene, ndaw masa ta gədan ηгаа guzley ta mey masa ndəhay ma cəndamara ba na, ηga dərey danğay a Gazlavay amba Mesəfney ηga Gazlavay a vələr gədan ηga mbədda mey a ta mey masa ndəhay ma cəndamara. ¹⁴ Da ya dərər danğay a Gazlavay ta mey masa yah ma cənda ba na, fara fara mevel adaw fa dərey danğay, ama yah na, kwa ya cənda ba sələk.

¹⁵ Anda keḑe, ya da key na, kwara? Ya da dərey danğay ta mey masa yah ma cənda ba ta gədan ηga Mesəfney ηga Gazlavay, asaya, ya da dərey danğay ta mey adaw ta lenğesl adaw may. Ya da zley walay ta mey masa yah ma cənda ba ta gədan ηga Mesəfney ηga Gazlavay, asaya, ya da zley walay ta mey adaw ta lenğesl adaw may. ¹⁶ Da kah, ka fa kar suse a Gazlavay ta mey masa ndəhay ma cəndamara ba na, ndaw ma sərə mey ηga Gazlavay ba da wuzlah akwar na, a gwa ηga təba, a ləvey: «*Amen» na, kwara? A gwa ba,

maja a cōnda mey masa kah maa guzlda ha ba. ¹⁷ Kwa ka fa kar suse a Gazlavay maaya maaya daa medōrey-danggay a na, ama medōrey-danggay a, a gwa nga jōna ndaw aha ba.

¹⁸ Ya fa kar suse a Gazlavay maja ya faa guzley mey hay ga masa ndōhay ma cōndamara ba a fōnkwar. ¹⁹ Ama, da masa yah da wuzlah ndōhay nga Yesu makustakaya na, ngama yah maa guzley mey pal ta mey masa ndōhay ma cōndamara amba yaa sōrkadata, da ray yah ma daa guzley ga ta mey masa ndōhay ma cōndamara ba.

²⁰ Mōlma adaw hay, daa menjey akwar na, ka da wulkam anda bōza hay ba, ama wulkam anda ndōhay ma sōrmara mey nga Gazlavay maaya maaya. Ka da kam cek malamba daa slōra akwar ba. Tōram anda bōza hay da mey dōwa masa ma sōrmara nga key cek malamba ba.

²¹ Mawuzlalakaya daa dferewel nga Gazlavay, a lōvey:

«Bay Gazlavay a lōvey:

“Ya daa guzltar a ndōhay adaw hay ta mey masa ata ma cōndamara ba.

Ahaw, ya daa guzltar ta mey nga ndōhay daa hwayak mekele.

Ama ta ngene he cōpa na, ndōhay adaw hay fa da jōkfamaya slōmay daa ba cōnga.”»

²² Anda kedē, ngada ndōhay ma tōba mey nga Yesu ba, meeguzley ta mey masa ndōhay ma cōndamara ba na, ara cek ma wuzwa ngada ata, Gazlavay a katar sariya la. Ngada ndōhay ma tōba mey nga Yesu na, kōne ba. Ngada ata, metōley-mey nga Gazlavay na, ara cek ma wuzwa Gazlavay aa da wuzlah ata. Ngada ndōhay ma tōba mey nga Yesu ba na, kōne ba.

²³ Wulkam cey: da masa akwar ndōhay nga Gazlavay makustakaya tabiya, ndōhay ma tōba mey nga Yesu ba, da daa ba, ndōhay ma samawa nga jōkam slōmay saw a samawa a wuzlah akwar, a hōtfamakwar akwar faa guzlam ta mey hay masa ndōhay ma cōndamara ba na, a padamakwar nga ndōhay ta malula da ray, daa ba daw?

²⁴ Ama da akwar tabiya fa tōlam mey masa Gazlavay ma wuzdakwara, ndōhay ma tōba mey nga Yesu ba ta ndōhay ma samawa nga jōkam slōmay saw a samawa, a hōtfamakwar na, mey a, a da wuzdatara mebōrey ata. Asaya, mey akwar a, a da vōltar mewulkey da ray menjey ata maaya ba, ²⁵ cek hay ma badatakaya daa mevel ata, a da wuzwa a palah. Maja ngene, a da ragadamar a Gazlavay, a

da hɛlmamara, asaya, a da lɛvam: «Fara fara, Gazlavay aa da wuzlah akwar.»

Mekey cek ta cɛved e daa mecɛmey-ray nga ndɛhay nga Yesu

²⁶ Maja ngene, mɛlma adaw hay daa *mecɛmey-ray nga ndɛhay nga Yesu, ka da kam na, kwara? Da masa akwar makustakaya daa slam a na, ndaw pal da wuzlah akwar nga zley walay, ndaw mekele ngaa sɛrkadata ndɛhay ta mey nga Gazlavay, ndaw mekele nga wuzda cek masa Gazlavay ma wuzdara a ndɛhay, ndaw mekele ngaa guzley ta mey masa ndɛhay ma cɛndamara ba, ndaw mekele saya nga mbɛdda mey a, a ndɛhay. Ka kamata cek hay tabiya ngene na, nga jɔney ndɛhay daa mecɛmey-ray nga ndɛhay nga Yesu amba a diyam fa mey fa mey. ²⁷ Da ndaw aa guzley ta mey masa ndɛhay ma cɛndamara ba na, ndɛhay cew, da daa ba, maakar gway ngaa guzlam pal pal, ndaw pal nga mbɛdda mey masa ata maa guzldamara ha a ndɛhay. ²⁸ Da ndaw nga mbɛdda mey a daa ba na, ngene, ndaw maa guzley ta mey masa ndɛhay ma cɛndamara ba ha na, a daa guzley ta gɛdan fa mey nga ndɛhay ba, ama ngaa guzley da hwad da hwad ngada ray anga ta ngada Gazlavay gway.

²⁹ Ngada ndɛhay ma tɛla mey nga Gazlavay na, ndɛhay cew, da daa ba, maakar ngaa guzlam gway, ndɛhay siya na, nga jɔkam slɛmay da mey a ara mey nga Gazlavay fara fara kwa. ³⁰ Daa masa ndaw masa faa guzley na, da Gazlavay a wuzar mey a ndaw mekele daa mekusey akwar na, maaya na, ndaw masa ngeeme a njei teete dagay. ³¹ Akwar tabiya akwar, akwar ta cɛved nga tɛley mey nga Gazlavay, ama gwaguzlam pal pal amba ndɛhay tabiya aa sɛrkam maaya maaya, asaya, amba a hɛtam gɛdan. ³² Ndaw masa aa ta gɛdan nga tɛley mey nga Gazlavay na, ara anga ma wey da ray gɛdan aha, ³³ maja mekey cek ta cɛved e ba na, a mbafar a Gazlavay ba. Gazlavay a wufey na, ya njakwa ta zazay.

Njam anda ndɛhay daa mecɛmey-ray nga ndɛhay nga Yesu siya. ³⁴ Masa akwar makustakaya daa slam a na, ngusay nga njam teete. Ata ta cɛved ngaa guzley daa ba, nga namatar ray a zel hay anda mawuzlalakaya daa *mewey nga Gazlavay. ³⁵ Da mey daha masa ata ma cɛndamara ba na, a daa cɛfdamara daa mekusey a ba, ama ngaa cɛfdamata fa zel ata hay da way. Ngwas aa guzley daa mekusey nga ndɛhay nga Yesu na, maaya ba.

14:25 14.25 Iz 45.14; Jan 4.17-19

14:26 14.26 8.1; 12.7-10; 14.4; Ef 4.11-13

14:29 14.29 SNM 17.11; 1Tes 5.21

14:33 14.33 7.15

14:34 14.34-35 11.3;

Ef 5.22; 1Tm 2.12

³⁶ Ka wulkam mey nga Gazlavay a zlawana, fa akwar gway daw? Ka wulkam mey nga Gazlavay a wusey na, fa akwar daada daw? ³⁷ Da ndaw a wulkey aa ta gədan nga *Mesəfney nga Gazlavay, da daa ba, aa ta gədan nga wuzey mey nga Gazlavay na, nga səra, mey masa yah ma wuzlalakwara keɗe na, ara mey masa Bay Mahura ma wuzdiwa. ³⁸ Da ndaw aha a jəkey sləmay fa mey masa yah ma wuzlalakwara keɗe ba na, ŋgene, Gazlavay fa da səra ndaw aha daa ba.

³⁹ Da ray ŋgene, məlma aɗaw hay, səpam teesəɗ na, gədan nga təley mey nga Gazlavay. Asaya, da ndəhay faa guzlam ta mey hay masa ndəhay ma cəndamara ba na, ka da təkмата ba. ⁴⁰ Cek masa mahura na, si ka kamata cek hay tabiya daa mekusey akwar maaya maaya, asaya, ka kamata ta cəveɗ e.

15

Mey da ray masləkɗawa nga Yesu Kəriste daa meməcey

¹ Məlma aɗaw hay, ya wuɗey ŋgaa guzlkwar saya da ray *Mey-maaya-mawiya masa yah ma wuzdakwara zleezle masa akwar ma təbmara. Ahaw, akwar ta təbmara mey a la fara fara aa mevel akwar. ² Ta fa metəbey Mey-maaya-mawiya ha na, Gazlavay a ləhdakwar la, ama si akwar fa təbmara anda yah ma wuzdakwara, ka mbəkdamara ba. Da daa ba na, metəbey mey a ŋgada akwar na, ara cek ŋga tede.

³ Ya taa sərkaɗakwara mey masa Yesu maa sərkaɗiwa la. Mey masa mahura da hwad a na, ara *Kəriste ma məcey maja mebərey aləkwa anda mawuzlalakaya daa ɗerewel nga Gazlavay. ⁴ Ta jəhmara la, ŋga ɗar maakar a ta sləkɗawa sem daa meməcey anda mawuzlalakaya daa ɗerewel nga Gazlavay. ⁵ Masa aŋga ma sləkɗawa cay daa meməcey a na, ta wuzar vaw la a *Piyer, asaya, ta wuztar vaw la a ndəhay aŋga hay meslərey siya. ⁶ Fa dəba ha, ndəhay aŋga hay a fəna temere zlam ta hətmar la ata cəpa daa slam a may. Ndəhay ma hətmar na, har-gədan da wuzlah ata, ata daha ta dey ɗagay, ama siya hay ta məcam sem. ⁷ Ta wuzar vaw la a *Jak. Fa dəba ha, ta wuztar vaw la a ndəhay aŋga hay meslərey tabiya saya.

⁸ Fa dəba ata tabiya, kwa yah anda bəzey masa ma yawa rav-baŋ na, ta wuzya vaw la may. ⁹ Dasi ndəhay meslərey

nga Yesu Kəriste tabiya na, yah mecəhe da wuzlah ata. Yah na, ya wusa amba a zəlmaya *ndaw-meslərey ba, maja ya ta sərdata banay la ta ndəhay daa *mecəmey-ray nga ndəhay nga Yesu Kəriste. ¹⁰ Ama maja mepəsey-mey nga Gazlavay da ray adaw na, ya ta tərey ndaw masa akwar ma hətmar wure kefe la. Mepəsey-mey anğa ha na, ara cek nga tede ngada yah ba, sasəkar jak, ya ta key sləra la ga, ma fəna ndəhay meslərey mekele. Ma ka sləra ha na, ara yah ta gədaŋ adaw ba, ama fara fara ara maja mepəsey-mey nga Gazlavay aa da ray adaw. ¹¹ Anda kefe, kwa da ara yah ma wuzda Mey-maaya-mawiya, kwa da ara ndəhay meslərey mekele na, ara cek letək. Ala tabiya ala, ya wuzam mey letək masa akwar ma təbmara aa mevel akwar.

Mey da ray ndəhay ma da sləkdamawa daa meməcey

¹² Ala fa wuzdamara ya ləvam *Kəriste ta sləkdamawa sem daa meməcey. Kaa, ndəhay siya da wuzlah akwar a ləvam ndəhay fa da sləkdamawa daa meməcey daa ba na, kwara? ¹³ Da fara fara ndəhay fa da sləkdamawa daa meməcey daa ba na, ŋgene, Kəriste ta sləkdamawa daa meməcey daa ba may. ¹⁴ Da fara fara Kəriste ta sləkdamawa daa meməcey daa ba na, ŋgene, mey nga Gazlavay masa ala ma wuzdamara na, ara mey nga tede, ka təbmara mey a nga tede may.

¹⁵ Da kəne na, ala ta mbərzlam sem a ray Gazlavay maja ala ta ləvmatar la a ndəhay, Gazlavay ta sləkdamawa Kəriste sem daa meməcey. Ama da ndəhay fa da sləkdamawa daa meməcey daa ba na, ŋgene, Gazlavay ta sləkdamawa Kəriste daa meməcey daa ba may. ¹⁶ Da Gazlavay fa da sləkdamawa ndəhay daa meməcey daa ba na, ŋgene, Kəriste may, Gazlavay ta sləkdamawa daa meməcey daa ba. ¹⁷ Da Gazlavay ta sləkdamawa Kəriste daa meməcey daa ba na, ŋgene, ka təbmara mey anğa nga tede, asaya, akwar ta mebərey cəŋga. ¹⁸ Anda meləvey saya, ndəhay ma təbmara mey nga Kəriste masa ma məcam sem na, taa zədam sem. ¹⁹ Da aləkwa fa pakwa Kəriste nga ndaw ma da jənnakwar fara fara, ama da a jənnakwar daa masa aləkwa da bəla daada na, ŋgene, anja matəway daa dey aləkwa a fəna nga ndəhay mekele la.

²⁰ Ama fara fara na, Kəriste ta sləkdamawa sem daa meməcey. Anğa na, ara ndaw masa ma sləkdamawa teesəf daa meməcey. Anda kefe, a wuzwa fara fara ndəhay mekele a sləkdamawa la daa meməcey may.

15:9 15.9 Ef 3.8; Gal 1.13-14 **15:9** 15.9-10 1Tm 1.12-16 **15:10** 15.10 2Kwr 11.23 **15:11** 15.11 1.12; Gal 1.17-18; 2.6-9 **15:15** 15.15 SNM 1.22; 4.33; 5.30-32 **15:17** 15.17 15.3; Rm 4.25 **15:18** 15.18 1Tes 4.13 **15:20** 15.20 6.14; Kwa 1.18

²¹ Meməcey a sawa a bəla na, ta fa ndaw pal, mezəley *Adam. Yaw, ma wura cəved amba ndəhay a sləkdamawa daa meməcey na, ara ndaw pal may, mezəley Yesu Kəriste.

²² Ndəhay tabiya a məcəm maja ata macəmkaya ta Adam aha. Ama ndəhay tabiya masa macəmkaya ta Kəriste na, a sləkdamawa la daa meməcey anda anğa may.

²³ Ama kwa waawa a da sləkdamawa daa meməcey na, fa dəle fa dəle. Kəriste ta sləkdamawa sem teesəd daa meməcey. Ta pas masa aa ma da vəhwa na, ndəhay anğa hay a sləkdamawa la daa meməcey may.

²⁴ Fa dəba ha, bəla a ndəvey la. Kəriste a daa zəddata mesəfney hay maaya ba hay ta gədan nğa bay ata hay tabiya. A da key bay-gula da ray bay hay ma wam da bəla. Fa dəba ha, a da vəldara bay anğa a Gazlavay Papan aa slam a.

²⁵ Ama si Kəriste a wey da ray cek hay tabiya haa kasl Gazlavay Papan ma pata masa-gəra anğa hay tabiya asi salay anğa dəgay.

²⁶ Masa-gəra nğa madagwaydakw masa Gazlavay ma daa zədda na, ara meməcey.

²⁷ Yaw, mawuzlalakaya daa dərewel nğa Gazlavay, a ləvey: «Gazlavay ta pata cek hay tabiya la asi har nğa Bəzey anğa.» Ahaw, mawuzlalakaya anda ngene, ama fara fara, Gazlavay na, fa da njeý asi har nğa Bəzey anğa daa ba, maja ara anğa ma pata cek hay tabiya asi har nğa Bəzey anğa ha. ²⁸ Masa Gazlavay Papan ta pata cek hay tabiya cay asi har nğa Bəzey anğa na, Bəzey anğa ha may, a da vəlda ray anğa asi har nğa Papaha masa ma vəldara cek hay tabiya. Anda keđe, Gazlavay Papan a da wey maaya maaya da ray cek hay tabiya.

²⁹ Wulkam da ray ndəhay siya da wuzlah akwar ma hətam *baptem maja ndəhay maməctakaya cey. Da fara fara ndəhay maməctakaya a sləkdamawa daa meməcey daa ba na, a hətam baptem maja ndəhay maməctakaya na, maja me?

³⁰ Asaya, da ndəhay maməctakaya fa sləkdamawa daa ba na, ala ta ray ala, ya fa vəldamara ray ala nğa sərey banay mandaw mandaw na, maja me? ³¹ Ahaw, mandaw mandaw ya fa hətar meməcey ta dey adaw. Məlma adaw hay, ya kadakwara cek hay tabiya keđe na, maja fara fara ya faa səmey da ray akwar, akwar masa macəmkaya ta Yesu Kəriste Bay aləkwa Mahura. ³² Fede da Efez, masa-gəra hay ga daha, ya ta kədey vaw la ta ata anda ta cek

15:21 15.21-22 15.45-49; MC 3.17-19; Rm 5.12, 14, 18 **15:22** 15.22 2Kwr 5.17
15:23 15.23 15.51-52; 1Tes 4.16 **15:24** 15.24 Dan 2.44 **15:25** 15.25 Ps 110.1;
 Mt 22.44 **15:26** 15.26 CWJ 1.18; 20.14; 21.4 **15:27** 15.27 Ps 8.6 **15:28**
 15.28 Rm 11.36 **15:30** 15.30 Rm 8.36 **15:31** 15.31 2Kwr 4.10-11

hay nga ley masa-høma. Da ya kødefey vaw anda ñgene maja mewulkey nga ndaw-magødan daada na, mekødefey-vaw a, a da jønya na, kwara? Da ndøhay mamøctakaya a sløkdøfaw daa ba na, ñgene, a key anda mey daha ma løyey: «Zømkwa cek, sakwa cek, mandaw na, aløkwa daa saba.» ³³ Pam lenjesl, maja da akwar fa pøkam ta ndøhay ma kam cek malamba na, akwar may ka kam cek malamba la anda ata. ³⁴ Kam cek ta cøved e, ka da kam cek malamba saba. Ndøhay siya da wuzlah akwar daha masa ma sørmara Gazlavay ba. Yaa guzlkwar anda kedø na, nga pakwar hwaray.

Mey da ray vaw nga ndaw ma sløkdøfaw daa memøcey

³⁵ Da kwa ndaw a gwa a wulkey daa ray anga, a løyey: «Gazlavay a da sløkdøfaw ndaw daa memøcey na, kwara? Vaw nga ndaw ma sløkdøfaw daa memøcey, a da nøkey na, kwara?» ³⁶ Ndaw ma wulkey anda ñgene na, ara ndaw manjar lenjesl. Hulfad masa kah ma sløka a ley na, a pøcwa ama masa masløkakaya cøma na, a zey. ³⁷ Hulfad masa kah ma sløka, kwa ara daw, kwa ara meeme na, ka sløkey na, babøza daada gway, ka sløka ta panay a tabiya ba. ³⁸ Hulfad hay na, ata wal wal, gwaslaf hay a may, ata wal wal. Masa kah ma sløka la na, Gazlavay a pøcrawa, a key gwaslaf anda Gazlavay ma wufey.

³⁹ Cek hay tabiya masa ta mesøfney na, ata ta vaw wal wal may. Anda meløyey, vaw nga ndaw-magødan na, anga wal ta nga gønaw hay, wal ta nga diyan hay, asaya, wal ta nga ewet hay.

⁴⁰ Cek hay da gazlavay da vad daha, cek hay da bøla daha may. Membey nga cek hay da gazlavay da vad anga wal ta membey nga cek hay da bøla. ⁴¹ Mewedey nga pas na, anga wal, mewedey nga kiya na, anga wal may. Mewedey nga wurzla hay anga wal saya, kwa da wuzlah wurzla hay na, mewedey ata wal wal.

⁴² Masløkdøfaw daa memøcey na, køne may. Vagay masa ta pøshamara cay na, anga anda hulfad, a da zey. Vaw masa ma sløkdøfaw daa memøcey na, fa da zey daa ba sølak. ⁴³ Masa ta pøshamara vagay cay aa cøvay na, vagay a, a da zey, ara cek nga tede, asaya, a mbey fa dey ba. Ama masa ta sløkdøfaw cay daa memøcey na, a zey ba, a njeý anga ta gødan, asaya, a mbey fa dey kalah. ⁴⁴ Da a pøsham vagay na, a pøsham ñgene, aslaw nga vaw gway. Masa ta sløkdøfaw cay na, a tøyey vaw masa *Mesøfney nga

Gazlavay ma ləma mawiya. Aləkwa ta vaw da bəla keɗe, ba diya? Sərmara, ya həkwa vaw mekele la masa Mesəfney nga Gazlavay ma ləma. ⁴⁵ Ara anda mawuzlalakaya daa ɗerewel nga Gazlavay, ma ləvey: «*Adam masa ngeeme na, ara ndaw-magədan masa Gazlavay ma vəlar heter.» Adam masa nga madagway-dakw na, ara *Kəriste ma tərey nga Mesəfney ma vəltar heter mawiya a ndəhay.

⁴⁶ Vaw masa Mesəfney nga Gazlavay ma ləma na, ara vaw ngeeme ba. Anda keɗe, masa ngeeme na, ara vaw nga ndaw-magədan da bəla keɗe ɗagay, fa dəba ha, vaw masa Mesəfney nga Gazlavay ma ləma. ⁴⁷ Adam, ndaw ngeeme na, ara ndaw-magədan masa Gazlavay ma ləma ta hwiyak. Ama Adam nga dey cew e na, a pawa salay da gazlavay da vad. ⁴⁸ Ndəhay magədan na, vaw ata anda vaw nga ndaw masa Gazlavay ma ləma ta hwiyak. Ndəhay da gazlavay da vad na, vaw ata anda vaw nga ndaw ma pawa salay da gazlavay da vad may. ⁴⁹ Wure keɗe na, vaw aləkwa anda vaw nga ndaw masa Gazlavay ma ləma ta hwiyak. Pas pal na, vaw aləkwa a da tərey anda vaw nga ndaw ma pawa salay da gazlavay da vad.

⁵⁰ Məlma adaw hay, ya fa ləvkwar, aa slam masa Gazlavay fa wey da vad na, ndaw fa da mbəzey a hwaɗ a ta vaw masa da bəla keɗe daa ba. Cek hay ma da zam na, a gwa nga cəmam ta cek hay ma da njam nga sərmataw ba.

⁵¹ Jəkam sləmay, ya daa guzlkwar da ray cek mabadakaya *: ndəhay siya da wuzlah aləkwa tabiya fa da məcəm daa ba, ama aləkwa tabiya, vaw aləkwa a da mbəɗey. ⁵² A da key na, daa masa fa famara taalam nga madagway-dakw. Vaw aləkwa a da mbəɗey fiyaw fiyaw anda ndaw ma kəbcey dey. Masa ta famara taalam cay na, ndəhay mamətakaya a sləkɗamawa la daa meməcey ta vaw masa ma da məcəy saba. Aləkwa siya masa ta dey, aləkwa tabiya vaw aləkwa a da mbəɗey. ⁵³ Anda meləvey, vaw aləkwa ma da zey na, a da tərey nga vaw ma da zey saba. Ahaw, vaw aləkwa ma da məcəy na, a da tərey nga vaw ma da məcəy saba. ⁵⁴ Masa vaw aləkwa ta mbəɗey cay kəne na, ngeene, mey mawuzlalakaya daa ɗerewel nga Gazlavay a da key fara fara anda mawuzlalakaya ha. Mey a, a ləvey: «Meməcey daa saba, Gazlavay ta fəna meməcey sem ta gədan.»

⁵⁵ «Haya, bay-meməcey, gədan akah na,

15:45 15.45 MC 2.7; Jan 6.63; 2Kwr 3.6, 17 **15:45** 15.45-49 15.21-22 **15:49**

15.49 MC 5.3 * **15:51** 15.51 cek mabadakaya: Pawl aa guzley da ray pas masa Kəriste ma da vəhwa. **15:51** 15.51 1Tes 4.15 **15:52** 15.52 taalam: Mt 24.31; 1Tes 4.16 **15:53** 15.53 2Kwr 5.4 **15:54** 15.54 Iz 25.8

an̄ga ama d̄ɔba ama?

Haya, bay-mem̄ɔcey, l̄ɔvat akah
masa kah ma m̄ɔlta nd̄ɔhay ta an̄ga na,
an̄ga ama d̄ɔba ama?»

⁵⁶ L̄ɔvat ma m̄ɔlta nd̄ɔhay n̄ga m̄ɔcam na, ara meb̄ɔrey. Kwakwas n̄ga *Mawiz na, fa v̄ɔlar ḡɔdan̄ a meb̄ɔrey n̄gaa z̄ɔd̄data nd̄ɔhay. ⁵⁷ Ama h̄ɔlmakwa Gazlavay, maja ara an̄ga ma v̄ɔlndakwar ḡɔdan̄ n̄ga f̄ɔna mem̄ɔcey ta fa Bay al̄ɔkwa Mahura Yesu K̄ɔriste.

⁵⁸ Maja n̄gene, m̄ɔlma ad̄aw hay mawud̄takaya, kam ḡɔdan̄, kwa cek a da v̄ɔhdakwar n̄gada fa d̄ɔba ba. Kamara sl̄ɔra n̄ga Bay Mahura Yesu mandaw mandaw ta mevel pal. Ka s̄ɔrmara sl̄ɔra masa akwar ma kamara ta ḡɔdan̄ an̄ga na, ara cek masa n̄ga tede ba.

16

Mey da ray mecekeley dala n̄gada nd̄ɔhay da Jeruzelem

¹ Ya daa guzlkwar wure keɔɔe na, da ray mey n̄ga dala masa akwar ma da cakalamara n̄gada nd̄ɔhay n̄ga Yesu da *Jeruzelem. Ka da kamara anda yah ma l̄ɔvtar n̄gada nd̄ɔhay daa *mec̄ɔmey-ray n̄ga nd̄ɔhay n̄ga Yesu da Galati may. ² Fa luma ha, fa luma ha na, kwa waawa da wuzlah akwar n̄ga ley dala daa dey masa an̄ga ma h̄ɔtar t̄ɔɔe ta ḡɔdan̄ an̄ga, n̄ga cakala, amba da masa yah ma wusey la fa akwar na, ka cakalam dala mekele saba. ³ Yah ma wusey la fa akwar na, ya sl̄ɔrdata nd̄ɔhay masa akwar ma walamata n̄ga handamara dala akwar a, a Jeruzelem la. Ya sl̄ɔrdata la ta leeter da har masa yah ma da wuzlalatara da ray dala ha. ⁴ Da maaya ya daw may na, n̄gene, ya diyam la bama daa slam a.

Mey da ray cek masa Pawl ma da ka

⁵ Ya fa da daw aa hwayak n̄ga Masad̄ɔwan amba ya cam ray ta nd̄ɔhay daa mec̄ɔmey-ray hay n̄ga Yesu fetede. Fa d̄ɔba ha, ya wusey la fa akwar. ⁶ Aȳɔwa, da ya n̄jey la fa akwar nek̄ɔɔey kwa, da ya nd̄ɔvda kiya n̄ga memed̄ la fa akwar kwa. Anda keɔɔe, masa ya fa da mb̄ɔkdakwar cay na, ka j̄ɔnmaya la kwa n̄ga daw aa slam wura wura mekele. ⁷ Da ya wusey fa akwar amba ya n̄jey nek̄ɔɔey gway na, ya wud̄ɔey ba. Ama da Bay Mahura ta t̄ɔba la na, ya wud̄ɔey n̄ga n̄jey fa akwar ga.

⁸ Ya njeý la da Efez haa kasl gwagway nga *Pantekwat ma wuswa, ⁹ maja ya ta hëteý har la ga nga key slëra maaya nga Gazlavay, asaya, masa-gëra hay ga fede daha.

¹⁰ Da Timawte ta wusey la fa akwar na, tëbmara maaya maaya, amba a njeý ta mandërzay daa dey ba, maja anga fa key slëra nga Bay Mahura anda yah may. ¹¹ Kwa ndaw a da rësa ba sëlak. Jënmara amba a vëhwa fa yah ta zazay, maja ya fa sëkwta fede, anga ta mëlman hay mekele *.

¹² Da ray mëlma alëkwa Apalaws na, ya ta kar ambahw la dey weewe, ya lëvar, maaya na, a daw ta mëlman hay mekele ma da diyam fa akwar, ama a wudey nga daw wure kefe ba sëlak. Ama, da masa ta hëteý har la na, a daw la.

Mey nga madagway-dakw

¹³ Ka da nam ðar ba, njam maaya maaya daa cëved nga Gazlavay, ka da zluram ba, kam gëdan. ¹⁴ Cek hay tabiya masa akwar ma kamata na, kamara ta mewudey-vaw.

¹⁵ Mëlma adaw hay, ka sërmara Estefanas ta ndëhay da way anga, ba diya? Ata na, ndëhay masa ngeeme ma tëbmara meý nga Yesu *Këriste daa hwayak nga Akay. Ta vëldamara ray ata la nga jëney ndëhay nga Yesu. Ya kakwar ambahw, ¹⁶ ndëhay anda ngene na, namatar ray. Asaya, namatar ray a ndëhay ma kam slëra bama ta ata.

¹⁷ Ya faa sëmey da ray ata Estefanas, Fartunatus leñ Akaykus ma samawa fa yah. Masa yah ma hëtatara na, anda ya hëteý ngene na, akwar tabiya akwar. ¹⁸ Ta dëkmaya mevel la anda ata ma dëkmakwar mevel may. Sëkway nga ndëhay anda ngene na, hëslmatar ray.

¹⁹ Ndëhay nga Yesu daa mecëmey-ray hay daa slam hay mekele mekele daa hwayak nga Azi a camakwar har. Ata Akilas ta ngwas anga Përiska †, leñ ndëhay nga Yesu masa ma kusam da way ata na, a camakwar har maaya maaya ta mezëley nga Bay Mahura Yesu. ²⁰ Ndëhay nga Yesu tabiya fede, a camakwar har may. Akwar tabiya, cam har da wuzlah akwar cëpa pal pal, anda akwar mëlman hay.

²¹ *Yah, Pawl, ya cakwar har.* Ara yah ta har adaw, ma wuzlalakwara mecey-har a kefe.

16:8 16.8-9 SNM 19.8-10 **16:10** 16.10 Timawte: 4.17 * **16:11** 16.11 Ndëhay mekele a wulkam na, meý Gërek a lövey: «maja ala ta mëlman hay mekele fa sëkwmarra fede.» **16:12** 16.12 Apalaws: 1.12 **16:13** 16.13 15.38; Ps 31.25; Ef 6.10 **16:14** 16.14 8.1; Jan 13.34; Rm 13.8-10; 2Kwr 6.6; Gal 6.10; Ef 5.2 **16:15** 16.15 Rm 16.5; Estefanas: 1.16 **16:18** 16.18 Fël 2.29; 1Tes 5.12 † **16:19** 16.19 Përiska: A zëlmara daa slam mekele Përesil. Nëka SNM 18.2. **16:19** 16.19 Rm 16.5; Azi: CWJ 1.4, 11 **16:20** 16.20 Rm 16.16 **16:21** 16.21 Gal 6.11; Kwa 4.18; 2Tes 3.17; Flm 19

²² Ndaw ma wuda Bay Mahura ba na, anja Gazlavay nga nɔsa. «*Maranata.*» Anja Bay alɔkwa Mahura nga sawa.

²³ Anja maaya nga Bay alɔkwa Mahura Yesu nga njeɣ ta akwar.

²⁴ Akwar ndɔhay nga Yesu Kɔriste, ya fa wudkwar, akwar tabiya akwar.

Leeter masa Pawl ma wuzlala nga dey cew a Kwarinti hay Mey da ray Leeter nga dey cew ngada Kwarinti hay

Leeter e keɗe na, ara Pawl ma wuzlalatara ngada ndəhay daa mecəmey-ray nga Yesu daa berney nga Kwarinti. A wuzlalatara na, daa masa anɗa daa hwayak nga Masadəwan (2.13; 7.5; 9.2).

Pawl a wuzlala leeter keɗe na, maja a wufey nga vəhey a Kwarinti saya nga dey maakar. A da vəhey a na, maja anɗa ma cəney mey hay mekele mekele fetede ma daw ba. Asaya, Pawl a wufey wuskwaa a da wusey a Kwarinti na, ta diymata mey hay a cay.

Da wuzlah ndəhay daa mecəmey-ray nga Yesu da Kwarinti a na, ndəhay maa sərkaɗa ndəhay ta cəved e ba daha (11.3-6). Ndəhay a fa pamara ray ata nga ndəhay meslərey nga Yesu ma fəna Pawl. A ləvam Pawl fa key sləra ta cəved e daa ba (1.15-18). A mbərzɗafamar a ray Pawl, a ləvam ta zəma dala masa ata ma cakalamara ngada masa-viya hay da Jeruzelem heyey sem (12.16-18). Anda keɗe, Pawl a wuzdatara daa leeter e keɗe, menjey anɗa na, aa maaya daa masa anɗa da wuzlah ata, fa key sləra ta cəved e. (1.12; 12.12).

Daa leeter e keɗe na, mey mekele mekele daha nga voley gəɗaɗ a ndəhay:

Gazlavay a wuzdərwa gəɗaɗ anɗa mahura ta fa aləkwa ndəhay ma təba mey anɗa (4.1-17)

Mewedeɗy ta ləvaɗ na, a cəmam ba (6.14-18)

Mecey-har

¹ Ara yah Pawl, masa *Gazlavay ma walaya nga key ndaw-meslərey nga *Yesu *Kəriste. Ara ala ta Timawte ma wuzlalamakwara leeter keɗe.

Ya wuzlalamakwara ngada akwar ndəhay daa *mecəmey-ray nga ndəhay nga Yesu daa berney nga Kwarinti, asaya, ngada akwar ndəhay ma təba mey nga Yesu daa hwayak nga Akay * tabiya.

* **1:1** 1.1 Akay: Ara hwayak mahura nga Gerek hay, Kwarinti ara berney da hwaɗ a. **1:1** 1.1 Gal 1.1; Timawte: 1Kwr 4.17

² Anja Papa aləkwa, Bay Gazlavay, ta Bay aləkwa Mahura Yesu Kəriste n̄ga pəsmakwar mey, asaya, n̄ga njadamakwar daa zazay.

Pawl a kar suse a Gazlavay

³ Həlmakwa Gazlavay, Papan̄ n̄ga Bay aləkwa Mahura Yesu *Kəriste. Ara Gazlavay Papan̄ ma sərey dey-ceceh fa ndəhay mandaw mandaw, asaya, ara an̄ga ma dəktar mevel a ndəhay kwa daa banay wura wura cəpa. ⁴ Daa banay tabiya masa ala fa sərmara keđe na, Gazlavay fa vəlndar gədan̄. A ka kəne na, amba ya dəkmatar mevel a ndəhay siya ma səram banay mekele mekele anda an̄ga ma dəkndar mevel may. ⁵ Ya sərmara Kəriste ta sərey banay la ga, ala may, fa səram banay. Anda keđe, Gazlavay fa dəkndar mevel daa banay a maja ala macəmkaya ta Kəriste.

⁶ Da ala fa səram banay na, ara amba Gazlavay a vəlkwar gədan̄, asaya, amba a ləhdakwar daa mebərey. Fara fara, da Gazlavay fa vəlndar gədan̄ na, ara amba a vəlkwar gədan̄ n̄ga bəsey banay masa ala ma bəsmara may. ⁷ Wure keđe, ya ta sərmara cay, akwar ta mbəkdamara cəved n̄ga Gazlavay daa ba səlak, asaya, akwar ta bəsmara banay la anda ala. Da ray n̄gene, Gazlavay fa vəlkwar gədan̄ anda an̄ga ma vəlndar gədan̄ may.

⁸ Məlma adaw hay, maaya na, ka sərmara ala ta səram banay la daa hwayak n̄ga Azi. Fara fara, ala ta səram banay la ga. Banay a, ta fənndar ray sem. Ala ta wulkam amba ya n̄jam ta dey na, daa ba. ⁹ Ya ləvam na, ya da məcmawa fetedə. Ama cek aha a key kəne na, amba ya sərmara gədan̄ ala daada na, a wusa ba, si gədan̄ n̄ga Gazlavay, maja ara an̄ga ma sləkɗadatərwa ndəhay daa meməcey.

¹⁰ Gazlavay ta ləhdandar sem daa meməcey a n̄gene. Asaya, a ləhdandar la daa banay hay mekele mekele. Ahaw, mewulkey ala aa da ray a, fara fara a ləhdandar la daa banay hay mekele mekele. ¹¹ Akwar may, maaya na, ka jənmandar daa medərey-dan̄gay. Anda keđe, ara ndəhay ga ma da dəram dan̄gay maja ala. Yaw, Gazlavay a təba medərey-dan̄gay a la, maja n̄gene, ndəhay ga a da kamar suse.

Pawl a mbəɗda mewulkey an̄ga

¹² Ya sərmara, daa menjey ala da bəla keđe na, ala fa kam cek ta cəved e n̄gada ndəhay tabiya. Ahaw, ya kam cek ta cəved e ma fəna na, da wuzlah akwar. Ala fa səpam n̄ga key cek ma mbafar a Gazlavay mandaw mandaw, ya b̄am

mey ta bey ba. Kede he ara cek maa sɛmdandar. Akwar ma sɛmra menjey ala da wuzlah akwar la. Yaw, ara Gazlavay ma jɛndar nga ka kɛne. Ma jɛndar nga njey a na, ara mewulkey nga ndaw-magɛdan ba, ama ara mepɛsey-mey nga Gazlavay ma vɛlndar gɛdan. ¹³⁻¹⁴ Sɛmra mey masa ala ma wuzlalamakwara daa leeter ala hay na, mey mabadakaya da hwaɗ a daa ba, ka gwamara nga cɛndamara mey a maaya maaya. Ama haa wure kede na, akwar ma cɛndamara mey a tabiya daa ba arɛn. Yaw, ya wulkam maaya na, ka cɛndamara mey kede maaya maaya. Ya wuɗam ka cɛndamara ta pas masa Bay Mahura Yesu ma da vɛhwa na, kaa sɛmam la da ray ala, anda ala ma daa sɛmam da ray akwar may.

¹⁵⁻¹⁶ Fara fara, ya sɛra, ka cɛndamara mey aɗaw la. Anda kede, ya ta wuɗey la nga daw fa akwar a Kwarinti, fa dɛba ha, ya daw a Masadɛwan. Anja ya da vɛhwa da Masadɛwan na, ta fa akwar saya, amba ka jɛnmaya nga daw aa hwayak nga *Jude. Anda kede, da masa yah ma daw nga dey cew la na, ya jɛnkwar la dey cew. Ama ya ta hɛtey har nga daw fa akwar daa saba. ¹⁷ Yah ma wuɗey nga daw fa akwar a saba na, nga maaya daw? Kay, nga maaya ba. Maja da yah, Pawl, ya ta wulkey la nga key cek na, ara anda ndɛhay da bɛla kede ma wulkam ba. Yah na, ndaw ma wulkey cew cew ma lɛvey: «Ahaw, ya ka cek kede la,» fa dɛba ha, «Kay, ya ka saba» na, kɛne ba.

¹⁸ Gazlavay ta ray anɗa a sɛra mey masa yah ma kadakwara na, ara mey cew cew ba. ¹⁹ Maja Yesu *Kɛriste, Bɛzey nga Gazlavay, masa yah Pawl, Silas len Timawte ma wuzmakwar mey da ray a na, aa guzley mey cew cew ba, aa guzley mandaw mandaw na, mey masa fara fara. ²⁰ Ara ta fa Yesu, Gazlavay ma lɛvey «Ahaw», a da kata cek hay tabiya masa aa ma lɛvey. Ara maja Yesu a, alɛkwa fa lɛvkwa «*Amen» nga hɛlma Bay Gazlavay. ²¹ Asaya, ara Gazlavay ma vɛlndakwar gɛdan amba ya njakwa daa mecɛmey-ray nga ndɛhay nga Kɛriste. Ara anɗa ma walandakwar. ²² Ta slɛrdɛrwa Mesɛfney anɗa la a ray alɛkwa. Mesɛfney anɗa ha, ara anda cek matɛhkaya fa dangay alɛkwa nga wuzey alɛkwa na, ndɛhay anɗa hay, amba a vɛlndakwar cek hay maaya mekele masa aa ma bɛadata ngada alɛkwa.

²³ Wure kede ya fa lɛvey fa mey nga Gazlavay, da ya mbɛrzley na, Gazlavay nga kɛɗya. Yah ma vɛhey fa akwar a Kwarinti daa saba na, ara maja ya wuɗey nga sɛrdakwar

1:12 1.12 2.17; 1Kwr 1.17, 19, 31; 2.13; Heb 13.18 **1:13-14** 1.14 5.12; Fɛl 2.16 **1:15-16** 1.15-16 1Kwr 16.5-6 **1:17** 1.17 1Kwr 4.18-19 **1:18** 1.18 1.23
1:19 1.19 SNM 18.5 **1:22** 1.22 5.5; Rm 8.15-16, 23; Ef 1.13-14

banay saba. ²⁴ Slëra ala na, ara nga tøkmaqwar ðay nga tøbey mey nga Yesu daw? Kay! Këne ba, maja akwar fa tøbmara mey nga Yesu Këriste maaya maaya, akwar fa mbëkdamara daa ba. Cek masa ala ma wuðam fa akwar na, ara nga key slëra daa slam a bama, amba kaa sëmam.

2

¹ Da ray ngene, ya wulkey nga vøhey fa akwar saba na, maja ka da wulkam kalah saya. ² Yaw, da ka da wulkam kalah maja yah ma daw fetede na, yah may, ya daa sëmey na, kwara? Kwa ndaw pal ma daa sëmdaya daa ba, maja akwar ta ray akwar faa sëmam daa ba may. ³ Maja ngene, ya ta wuzlalakwar leeter mekele la, maja yah ma daw fa akwar daa saba ha. Anja da yah ma daw la na, ya fa daa sëmey da ray akwar daa ba. Kaa anja ma daa sëmdaya na, akwar, ba diya? Ta ngene he cøpa na, ya fa pakwar nga ndøhay adaw hay cønga. Ya sëra fara fara da ya faa sëmey na, akwar may ka daa sëmam. ⁴ Daa masa ya fa wuzlalakwara leeter e na, yah ta matøway daa dey, mevel fa tøfyä, mewulkey fa da køfyä. Ya wuzlalakwara na, amba ka cam mevel ba, ama amba ka sërmara ya fa wuðkwar kalah cønga.

Mey da ray ndaw daha ma key mebørey

⁵ Mølma adaw hay, da ndaw da wuzlah akwar ta key cek malamba la na, a ka cek aha ngada yah ba, ama ngada akwar tabiya may. Da ta membørzley da hwað a daa ba na, a ka cek aha ngada har-gødan nga ndøhay da wuzlah akwar. ⁶ Ndaw aha na, ndøhay ga ta køtmara la, ta mbøðmar ray la. Ama wure keðe na, cay døba. ⁷ Maja ngene, si ka mbëkdamara mebørey anja, døkmar mevel, da daa ba na, mevel anja a da tøðey, mewulkey a da køða.

⁸ Anda keðe, ya faa cøðakwar, kamar cek amba a sëra, akwar fa wuðmara cønga. ⁹ Yah ma wuzlalakwara leeter heyey na, amba ya sëra da akwar fa tøbmara mey masa yah ma kadakwara heyey tabiya kwa. Ahaw, akwar fa tøbmara mey adaw maja akwar ma køtmara ndaw aha. Wure keðe, si ka mbëkdamara mebørey anja. ¹⁰ Yaw, da akwar ma mbëkdamara mebørey nga ndaw la na, yah may, ya mbëkdara la. Anda meløvey, da ndaw ta kaya cek maaya ba la na, cay gway, ya mbëkdara mebørey anja. Ya mbëkdara mebørey anja fa mey nga *Këriste na, maja akwar. ¹¹ Ya mbëkdara mebørey anja na, amba *Satan,

bay-malula, a hōtey gōdan̄ da ray aləkwa saba. Ya sərkwā bay-malula ha na, an̄ga ta wewer kalah.

Pawl daa berney n̄ga Tərwas

¹² Yah Pawl, ya sləkdey daa hwayak n̄ga Azi, ta', ya daw aa berney n̄ga Tərwas n̄ga wuzey *Mey-maaya-mawiya da ray *Kərīste. Fetede na, ya n̄ka Yesu Bay Mahura ta diyawa cōved maaya maaya n̄ga wuzey mey an̄ga cay. ¹³ Ama mevel adaw ta tōdey sem maja yah ma hōtar mēlma aləkwa Tit fetede daa ba. Da ray n̄gene, ya ta mbəkdatərwa ndōhay da Tərwas a sem, ta', ya daw aa hwayak n̄ga Masadōwan.

¹⁴ Ama ta n̄gene he cōpa na, hēlmakwa Gazlavay. Ara an̄ga ma njadandakwar macēm̄kaya ta Kərīste. A lōgdandar a wuzlah ndōhay an̄ga hay n̄ga wuzdatara a ndōhay, Kərīste na, fa key bay-gula da ray masa-gōra an̄ga hay. Fa slōrdandar aa wura aa wura n̄ga wuzey mey da ray Yesu Kərīste amba ndōhay a sōrmara Yesu a. Mesōrey Yesu na, an̄ga anda cek mezey maaya, ma zey aa wura aa wura cōpa. ¹⁵ Ahaw, ala na, anda cek mezey maaya masa Kərīste ma vōldara a Gazlavay. Cek mezey maaya ha na, ara n̄gada ndōhay tabiya maja ala fa wuzdamara mey n̄ga Kərīste n̄gada ndōhay masa Gazlavay ma da lōhdata daa mebōrey lej n̄gada ndōhay ma daa zōfam. ¹⁶ N̄gada ndōhay masa Gazlavay ma da lōhdata n̄gene na, ala ma tōram sem anda cek mezey maaya. Anda kefe, a tōbmara mey ala la, asaya, a hōtam heter mendōvey ba la. Yaw, n̄gada ndōhay masa faa zōfam na, ala anda cek mamōckaya ma zafatar. Anda kefe, mezey a faa zōfdata. Kaa ta gōdan̄ ala daada na, ya gwamara n̄ga key cek anda kefe daw?

¹⁷ Ndōhay ga fa wuzam mey n̄ga Gazlavay amba a hōtam dala anda ndōhay ma ka filaw hay. Ala na, anda ata ba. Ara Gazlavay ma slōrdandar n̄ga key slōra an̄ga. Ya wuzdamara mey n̄ga Gazlavay ta mevel pal fa mey an̄ga, ta gōdan̄ n̄ga Kərīste.

3

Mey da ray slōra n̄ga Pawl daa Mejōwey-mey Mawiya

¹ Da ray mey a kefe na, ndōhay da wuzlah akwar a da lōvam, ala fa zlapam saya daw? Kay, kōne ba! Yaw, akwar fa wud̄am amba ya wuzlalamakwar leeter n̄ga wuzey ala na, ndōhay meslōrey n̄ga Yesu daw? Asaya, amba ndōhay mekele a sōrmara ala ndōhay meslōrey n̄ga Yesu na, ala fa

2:11 2.11 1Pi 5.8 **2:12** 2.12 1Kwr 16.9 **2:13** 2.13 1Tes 3.1; Tit: 2Kwr 7.6, 13-14; 8.6, 16, 23; 12.18; Gal 2.1, 3; 2Tm 4.10; Tit 1.4; Masadōwan: 7.5; SNM 20.1
2:15 2.15 1Kwr 1.18 **2:16** 2.16 ya gwamara n̄ga key cek daw?: 3.5-6 **2:17** 2.17 4.2; Fəl 1.15-17; 1Tes 2.3, 5, 10; 1Pi 4.11

wuƒam ka wuzlalamandar leeter da ray a daa ba. Ndohay mekele hay na, fa wuƒam leeter hay anda ngene, ama ala na, anda ata ba. ² Aa slam a nga leeter e na, ara akwar ray akwar. Akwar anda leeter da har ala, mawuzlalakaya daa mevel ala amba kwa waawa a gwa nga janƒa, a sɛra.

³ Ahaw fara, akwar na, anda leeter masa *Kɛriste ma wuzlala, masa aa ma slɛrdɛrwa ta fa ala. Ta wuzlala leeter e ta har daa ba, ama a wuzlala ta fa *Mesɛfney nga Gazlavay, Gazlavay ndaw masa anƒa daha ta dey nga sɛrmataw. Asaya, leeter e mawuzlalakaya fa beeler * ba, ama mawuzlalakaya daa mevel nga ndohay.

⁴ Ala ma lɔvam anda keƒe na, maja ala fa pamara Gazlavay nga ndaw ala fara fara ta fa Kɛriste. ⁵ Ala ta ray ala na, ya ta wusmara nga ka slɛra ha daa ba, ama ara Gazlavay ma vɛlndar gɛdanƒa nga ka. ⁶ Fara fara, ara anƒa ma vɛlndar gɛdanƒa nga ka slɛra ha nga wuzdamatara *Mejɔwey-mey Mawiya masa Gazlavay ma jɔwa ta ata ngada ndohay. Mejɔwey-mey Mawiya ha na, ara anda kwakwas mawuzlalakaya zleezle heyey saba, ama ara meney ray ngada Mesɛfney nga Gazlavay. Nɛka, kwakwas mawuzlalakaya zleezle na, aa zɛfey ndaw. Ama Mesɛfney nga Gazlavay na, a vɔley heter mendɔvey ba ngada ndaw.

⁷ Zleezle *mewey hay kuraw daa *kwakwas nga Mawiz na, mawuzlalakaya fa beeler. Daa ngene, Gazlavay fa wuzda mewedey anƒa a ndohay. Yaw, mewedey a ta wadawa la a ray *Mawiz ara mey ba, haa *Israyel hay a gwamara nga nɛkmara Mawiz a saba maja a latar dey. Ama mewedey a ta njeƒa daa ba. Fara fara, kwakwas nga Mawiz na, aa zɛfey ndaw. Ama fa wuzdɛrwa mewedey nga Gazlavay a ndohay cɛnƒa. ⁸ Kaa slɛra nga Mesɛfney nga Gazlavay a wuzwa mewedey nga Gazlavay ma fɛna kwakwas nga Mawiz ba kwara? ⁹ Nɛka, kwakwas a, a katar sariya ngaa zɛfdata. Anja da kwakwas ma key sariya ha ta wuzdɛrwa mewedey nga Gazlavay la na, kaa Mejɔwey-mey Mawiya a fɛna ba kwara? Ara ta fa vɛda Gazlavay ma pandakwar nga ndohay maaya fa mey anƒa, ba diya?

¹⁰ Anda keƒe, mewedey ma sawa ta fa kwakwas zleezle na, ata letek ta mewedey masa mawiya keƒe ba. Mewedey masa mawiya a fɛna ta gɛdanƒa, a tɛrda masa magurma nga

3:1 3.1 5.12; 10.12; SNM 18.27 **3:2** 3.2 1Kwr 9.1-2 * **3:3** 3.3 beeler: Pawl a wulkey a ray mewey hay kuraw nga Gazlavay mawuzlalakaya fa beeler ngada Mawiz. (Nɛka Mab 24.12.) Jeremey ta lɔvey la mewey mawiya na, mawuzlalakaya daa mevel nga ndohay. (Nɛka Jer 31.33.) **3:3** 3.3 Mab 24.12; Jer 31.33; Ez 36.26 **3:5** 3.5 2.16; Rm 15.18 **3:6** 3.6 Janƒ 6.36; Rm 7.5-6; 8.2, 6, 10; 1Kwr 11.25 **3:7** 3.7 Mab 34.29-30 **3:9** 3.9 Rm 8.2, 33; Gal 3.10

cek nga tede. ¹¹ Ahaw, kwakwas masa zleezle na, a njeý nekødeý gway, ama ta wuzdørwa mewedeý nga Gazlavay la. Yaw, anja da kwakwas a ñgene a gwa nga wuzdørwa mewedeý nga Gazlavay na, kaa Mejøwey-mey Mawiya, ma da njeý nga sørmataw, a wuzdørwa mewedeý nga Gazlavay ma føna kwakwas a daa ba daw?

¹² Maja ñgene, daa meesørkey ala na, ala faa guzlam ta mandørzay daa dey daa ba, maja ya sørmara meý a, ara meý fara fara. ¹³ Zleezle Mawiz ta sørta dey anja la ta zana maja a nøka mewedeý nga Gazlavay da ray a fa ndøvey. Anda keðe, a wudeý Israyel hay nga sørmara mewedeý a fa ndøvey ba. Ala na, ya ðam cek anda anja ba. ¹⁴ Israyel hay a na, a gømam nga cøndamara ba. Kwa haa wure keðe, ray ata manjødakaya cønga. Ahaw, da fa janjam meý daa ðerewel hay nga *Mejøwey-mey Magurma na, a cøndamara ba, anda dey ata masørtakaya ta zana cønga. Ndaw masa ta zana masørtakaya daa dey na, si Køriste ma gwa nga la zana masørtakaya ha amba a cønda meý a. ¹⁵ Haa wure keðe, da fa janjam daa ðerewel hay nga Mawiz na, a cøndamara ba cønga, anda lenjesl ata masørtakaya ta zana. ¹⁶ Ama da ndaw ta mbødda menjeý anja sem, a sawa asi Bay Mahura na, zana ma sørta dey anja ñgene ta ley sem. ¹⁷ A key anda keðe maja Bay Mahura na, Mesøfney nga Gazlavay aa da ray a. Nøka, da Mesøfney nga Gazlavay aa da ray kwa waawa na, ndaw aha fa da njeý beke nga kwakwas nga Mawiz daa saba. ¹⁸ Anda keðe, aløkwa tabiya ma tøba meý nga Yesu na, dey aløkwa masørtakaya ta zana daa saba. Aløkwa fa wuzdakurwa mewedeý nga Bay Mahura Yesu amba ndøhay a høtmar. Ta fa mewedeý a na, aløkwa ma tøkwa sem letek ta anja. Yaw, mewedeý a na, fa sawa ta gødan ta gødan a ray aløkwa. Keðe he ara sløra masa Bay Mahura ma ka ta fa Mesøfney nga Gazlavay.

4

Pawl a wuzey meý nga Gazlavay

¹ Gazlavay ta sørfandar dey-ceceh la. Ta', a vøldar sløra masa ala fa kamara keðe. Ara maja ñgene, ala fa møcmara vaw daa ba, kwa ala fa da mbøkdamara sløra ha daa ba.

² Ala na, fa da ndøkwdamara ray ala aa cek hay ma ka hwaray masa ndøhay maðadamata ta ðey na, daa ba. Ala fa søpam cøved nga føceý ndøhay daa ba, asaya, ala fa jahadømara meý nga Gazlavay ta meý hay membørzley na, daa ba. Ama ala na, fa kam sløra amba ndøhay a sørmara

mey masa fara fara maaya maaya. Anda keɗe, ta fa slɛra ala masa Gazlavay ma sɛra anɗa maaya na, ya wudam ndɛhay tabiya nɗa pamandar nɗa ndɛhay ma ka slɛra ta cɛved e.

³ Ndɛhay mekele fa cɛndamara *Mey-maaya-mawiya masa ala ma wuzdamara na, daa ba. Ata anda dey ata masɛrtakaya ta zana. Ndɛhay a nɗene na, ara ndɛhay daa cɛved maa zɛɗey ndaw. ⁴ Ndɛhay a, a cɛndamara Mey-maaya-mawiya ba na, maja *Satan, bay-malula, ma wa bɛla keɗe, a tɛrdata ndɛhay a nɗa ndɛhay manjar lenɗesl, a nɗam daa lɛvan. Anda keɗe, ndɛhay a fa da hɛtmar mewɛɗey nɗa Mey-maaya-mawiya daa ba. Mewɛɗey a na, fa wuzdɛrwa gɛɗan nɗa *Kɛriste. Kɛriste he na, a lawa Gazlavay kɛrad!

⁵ Daa slɛra ala nɗa mewuzey mey nɗa Gazlavay na, yaa guzlam da ray ala, ray ala ba, ama yaa guzlam na, da ray Yesu Kɛriste. Anɗa na, Bay Mahura da ray ndɛhay tabiya. Ala na, ndɛhay ma ka slɛra nɗada akwar maja Yesu. ⁶ Daa masa Gazlavay ma lɛma bɛla na, a lɛvey: «Anɗa slam-lɛvan nɗa wɛɗey.» Yaw, ara Gazlavay a nɗene ma handɛrwa mewɛɗey anɗa a ray ala may. A ka anda keɗe amba ya hɛtmar mewɛɗey a fa wɛɗey fa dey nɗa Kɛriste. Ara maja nɗene, ala fa wuzdamara Mey-maaya-mawiya nɗa Kɛriste nɗada ndɛhay.

⁷ Ala na, ndɛhay magɛɗan gway, gɛɗan fa ala daa ba, anda manɗayak nɗa hahay. Ama mewɛɗey a na, aa da ray ala, anɗa maaya kalah. Gazlavay a ka anda keɗe nɗa wuzwa gɛɗan mahura nɗa ka slɛra ha na, a sawa ta fa vɛɗa, ba na, ta fa ala ba.

⁸ Ala ta sɛram banay la mekele mekele, ama banay a ta fɛnɗdar ray daa ba. Ala ta zluram la, ama ala ta mɛcmara vaw daa ba. ⁹ Masa-gɛra ala hay fa sɛrdamandar banay, ama Gazlavay aa ta ala cɛnɗa. Fa bɛɗslamandar a hwayak, ama ala ma mɛcam daa ba. ¹⁰ Ndɛhay fa sɛpmandar nɗa kɛɗey vagay anda ata ma kɛɗmara Yesu heyey. Ama ala ta dey cɛnɗa, amba ndɛhay a sɛrmara Yesu may, anɗa ta dey.

¹¹ Ahaw, daa menjey ala na, ndɛhay fa sɛpmandar nɗa kɛɗey vagay maja ala fa sɛpmara cɛved nɗa Yesu. Kwa ala ndɛhay magɛɗan ma da mɛcam na, ama ala ta dey cɛnɗa. Anda keɗe, ndɛhay a sɛrmara Yesu may, anɗa ta dey. ¹² Da ray nɗene, ala fa sɛram banay haa kasl fa memɛcey maja Mey-maaya-mawiya, amba ka hɛtam heter mendɛvey ba.

4:2 4.2 2.17; 6.4 **4:3** 4.3 1Kwr 1.18 **4:4** 4.4 bay-malula, ma wa bɛla keɗe: Jan 12.31; Ef 2.2; a lawa Gazlavay kɛrad!: Kwa 1.15; Heb 1.3 **4:5** 4.5 1.24 **4:6** 4.6 MC 1.3; Iz 9.1; 2Kwr 3.18; 1Pi 2.9 **4:8** 4.8 1.8; 7.5; 11.23-29
4:10 4.10 1.5; Rm 6.8; Gal 6.17; Fɛl 3.10-11 **4:11** 4.11 Rm 8.35-36; 1Kwr 15.31
4:12 4.12 Kwa 1.24

¹³ Mawuzlalakaya daa dferewel nga Gazlavay, a løyey: «Yah ma pa Gazlavay nga ndaw adaw fara fara la, ara maja ngene, yah ma wuzda mey annga.» Ala na, kōne may, ala fa pamara Gazlavay nga ndaw ala fara fara. Ara maja ngene, ala fa wuzdamara mey a, a ndōhay. ¹⁴ Ya sōrmara ara Gazlavay ma slōkfdadōrwa Bay Mahura Yesu daa memōcey, yaw, a slōkfdadandōrwa la may amba ya njakwa bama ta Yesu a. A da handandakwar, alōkwa cōpa, fa mey nga Yesu a. ¹⁵ Slōra masa ala ma kamara, ta banay masa ala ma bōsmara kefe na, ara maja akwar, amba maaya nga Gazlavay a sawa a ray ndōhay ma fōna ma fōna. Anda kefe, ndōhay ga a da kamar suse a Gazlavay, a hōlmamara.

Pawl a mbōkda slōra nga Gazlavay ba na, maja me?

¹⁶ Ara maja ngene, ala fa da mbōkdamara slōra ha daa ba sōlak. Kwa gōdanj ala pōreh, ama daa mevel ala na, ala fa hōtam gōdanj nga Gazlavay a dey a saya mandaw mandaw.

¹⁷ Nōka, banay masa ala ma sōrmara kaa na, a ndōvey la pas pal. Yaw, ya hōtam mewedey la a ray ala maja banay a. Mewedey a na, a fōnta cek hay cōpa, a da njej nga sōrmataw. Da masa mewedey a, aa da ray ala na, banay masa ala ma sōrmara kefe na, ya wulkam ara cek mecōhe gway. ¹⁸ Mewulkey ala na, aa da ray cek hay da bōla kefe ba, ama ya wulkam da ray cek nga Gazlavay masa ndaw ma gwa nga hōtar ta dey ba. Ya sōrkwa cek hay masa alōkwa ma hōtmatakwa ta dey da bōla kefe na, a da njam nekōdefey gway, ama cek hay ma hōtam ta dey ba na, a njam nga sōrmataw.

5

¹ Da bōla kefe, vaw alōkwa fa da njej ga daa ba. Vaw alōkwa na, annga anda way-mekōrcey ma da pōrey dey pal. Ama ya sōrkwa Gazlavay a vōlndakwar vaw mekele mawiya la da gazlavay da vad, annga anda way ma da njej nga sōrmataw. Way a na, ara ndaw-magōdanj ma lōma ba, ama ara Gazlavay ma lōma. ² Nōka, wure kefe da bōla kaa na, alōkwa fa tōwkwa. Fara fara, alōkwa fa wudkwa amba Gazlavay a vōldandakwara way masa da gazlavay da vad a. ³ Anda kefe, ta pas masa alōkwa ma mbōzkwa la aa way a na, mesōfney alōkwa fa da njej taava annga manjar vaw na, daa ba. ⁴ Daa masa alōkwa ta vaw alōkwa anda way-mekōrcey da bōla kefe na, ya fa njarakwa anda ndaw meley cek maadakw a. Ta ngene he cōpa na, alōkwa

fa wudkwa nga cəkwakwa vaw aləkwa masa ma da məcey keđe anda ndaw mecəkwey zana fa vaw na, daa ba. Ama ya wudkwa na, Gazlavay a vəldakwar vaw mekele masa ma da njeý nga sərmataw anda ndaw mekəzley zana mawiya. Anda keđe, vaw masa ma da njeý nga sərmataw, a njeý aa slam a nga vaw masa ma da məcey. ⁵ Yaw, ara Gazlavay ma diyndakwar amba ya hətkwa vaw mawiya kəne. Ta slərdərwa Mesəfney anga la teesəd a ray aləkwa nga wuzwa a da vəldandakwara vaw mawiya maaya masa anga ma bada ngada aləkwa.

⁶ Ara maja ngene, aləkwa fa kərzakwa mevel mandaw mandaw daa menjeý aləkwa da bəla. Ya sərkwaa daa masa aləkwa ta vaw aləkwa da bəla keđe na, aləkwa dərəj ta Yesu Bay Mahura. ⁷ Anda meləvey na, ya ta hətkwar Yesu a ta dey aləkwa daa ba aran, ama aləkwa fa pakwa nga ndaw aləkwa fara fara cənga. ⁸ Ahaw, aləkwa fa kərzakwa mevel mandaw mandaw daa menjeý aləkwa da bəla. Ama ya wudkwa na, ya mbəkdakwa vaw aləkwa da bəla keđe amba ya nakwa, ya njakwa ta Bay Mahura bama. ⁹ Yaw, maja ngene kwa masa aləkwa ta vaw aləkwa da bəla keđe aran, da daa ba, kwa masa aləkwa ma wuskwa cay fa vəða na, cek masa aləkwa ma wudkwa kalah na, ara nga kar cek masa ma mbafar. ¹⁰ Maja aləkwa cəpa na, ya wuskwa la fa mey nga *Kəriste amba a kandakwar sariya. A da nəkta cek hay maaya ta maaya ba masa aləkwa ma kakwa da bəla. Yaw, a da pəlar mawurbay a ndaw a, a ndaw a, təđe fa sləra anga.

Mey da ray Yesu ma cəmtar dəy nga ndəhay ta Gazlavay

¹¹ Ya sərkwaa, Bay Mahura Yesu a kandakwar sariya la. Maja ngene, ala fa namar ray ta mevel ala cəpa. Anda keđe, si ya səpam cəved nga jənmata ndəhay nga sərey mey masa fara fara. Gazlavay na, a sərndar maaya maaya. Asaya, ya wulkey na, akwar may, ka sərmaya fara fara.

¹² Mey tabiya masa ala maa guzldamara keđe na, ndəhay da wuzlah akwar a wulkam, a key ya zlapam cənga daw? Kay, kəne ba. Ama ya wuzmakwar na, mey da ray ala amba kaa səmam da ray sləra ala. Fa dəba ha, da ndəhay siya fa slam mey a ray ala na, ka gwamara nga lacafamandar a ray, ka kam sede da ray ala. Ndəhay ma slam mey a ray ala ha na, ara ndəhay ma zlapam fa sləra ata da bəla keđe gway, a wulkam fa cek hay masa daa mevel ata ba.

5:4 5.4 1Kwr 15.53-54 **5:5** 5.5 1.22 **5:7** 5.7 1Kwr 13.12; 1Pi 1.8-9 **5:8** 5.8 Fəl 1.23 **5:9** 5.9 Kwa 1.10; 1Tes 4.1 **5:10** 5.10 11.15; Iz 2.12; Dan 7.9-10; 12.2; SNM 17.31; Rm 2.6; 1Kwr 3.13-15; 4.5; Fəl 3.19; 2Tes 1.7-10 **5:11** 5.11 4.2; 6.4; 1Kwr 9.22

¹³ Ndohay siya a wulkam ala na, ndohay manjar lenjesl. Yaw, da ala ndohay manjar lenjesl na, ara maja ala ma veldamara ray ala ngada Gazlavay. Ama da ala ndohay ta lenjesl na, ara nga jənmakwar. ¹⁴ Fara fara, sləra masa ala ma kamara na, ya kamara maja *Kəriste fa wudndakwar kalah. Aləkwa fa sərkwā, anḡa na, ta məcey sem aa slam a nḡa ndohay tabiya. Anda meləvey, ndohay tabiya ta məcam sem ta anḡa may. ¹⁵ Fara fara, Yesu a məcey aa slam a nḡa ndohay tabiya na, amba ndohay da bəla a njam anda ata ma wudam saba, ama amba a njam nḡa səpey cəved nḡa Yesu. A səpmara cəved nḡa Yesu a na, maja anḡa ma məcey, ta anḡa ma sləkɗawa daa meməcey maja ata.

¹⁶ Ara maja keɗe, ya sərmata ndohay ta fa cek ata hay da bəla saba. Ahaw, fara fara zleezle na, ya sərmara Kəriste na, anda ndohay magədan ma wulkam, ama wure keɗe, ala fa wulkam da ray a kəne saba. ¹⁷ Ndaw masa macəmkaya ta Kəriste na, ta tərey sem nḡa ndaw mawiya. Menjey anḡa masa zleezle ta mbəɗey sem, ta tərey sem mawiya.

¹⁸ Ara Gazlavay ma ka cek aha tabiya. Ara Gazlavay ma cəmdakwar ta anḡa ray anḡa ta fa meməcey nḡa Kəriste. Wure keɗe, Gazlavay ma vəɗndar sləra la. Sləra ha na, ara nḡa wuzey mey nḡada ndohay mekele masa Gazlavay ma wudəy nḡa cəmey ta ata. ¹⁹ Anda meləvey, Gazlavay a slərdərwa Kəriste na, maja a wudəy nḡa cəmey ta ndohay tabiya. A sləfa mebərey ata saba. Anda keɗe, a slərdandar na, nḡa wuzey mey a ndohay masa Gazlavay ma wudəy nḡa cəmey ta ata ha.

²⁰ Ala na, ndohay meslərey nḡa Kəriste. Ara anda Gazlavay ta ray anḡa ma zəlkwar maja ara anḡa ma balandar mey. Anda keɗe, ya kamakwar ambahw ta mezəley nḡa Kəriste, samawa asi har nḡa Gazlavay, amba ka cəmam ta anḡa. ²¹ Yesu Kəriste na, ta key mebərey daa ba səlak. Ama Gazlavay ta pa sem nḡa ndaw ta mebərey aa slam a nḡa aləkwa, amba da aləkwa macəmkaya ta Kəriste he na, Gazlavay a pakwar nḡa ndohay maaya fa mey anḡa.

6

Mey da ray sləra nḡa ndaw-meslərey nḡa Yesu

¹ Wure keɗe, Gazlavay aa ta ala daa sləra masa ala ma kamara cəpa. Gazlavay ma kakwar maaya la. Anda keɗe,

5:12 5.12 1.14; 3.1 **5:14** 5.14 Jan 17.23; Rm 8.35; Gal 2.20; Ef 3.19; 5.2, 25; 1Jn 3.16 **5:15** 5.15 Rm 6.3-4; 7.4; 14.7-9 **5:17** 5.17 Iz 43.19; Rm 6.4; Gal 6.15; Ef 4.24; CWJ 21.5 **5:18** 5.18 Rm 5.10 **5:19** 5.19 Rm 3.24-26; Kwa 1.20
5:20 5.20 Mt 10.40; Iz 52.7 **5:21** 5.21 Jan 8.46; Rm 8.3; 1Kwr 1.30; Gal 3.13; Heb 4.15

ala fa kamakwar ambahw, ka da tɔrdamara maaya nga Gazlavay a nga cek nga tede ba. ² Wulkam fa mey nga Gazlavay maa guzley zleezle, ma lɔvey:

«Ta pas masa amba ya kakwar maaya na,
ya ta jɔkfakwar slɛmay la.

Ta pas masa amba ya lɔhdakwar na,
ya ta jɔnkwar la.»

Nɔkmara dɔɓa taw, wure keɗe pas a ta wuswa cay amba Gazlavay a kakwar maaya, fara fara pas a ta wuswa cay amba a lɔhdakwar.

³ Ala fa wuɗam nga key cek kwa wura wura nga tɔkta ndɔhay nga tɔɓmara mey nga Gazlavay na, daa ba, maja ya wuɗam ndɔhay a slam mey a ray slɛra ala ba. ⁴ Ama daa slɛra ala ha cɔpa na, ala fa wuzdamara, ala na, ndɔhay ma ka slɛra nga Gazlavay fara fara.

Kwa ala daa banay,
kwa fa pamandar dey a ray daa ba,
kwa cek fa fɛnndar ray,
ala fa bɛsmara gway.

⁵ Nɔka, ta kɔɗmandar la,
ta handamandar la aa fɛrsɛne,
asaya, ta hɔldamata ndɔhay la nga key hɛma a ray ala.
Ahaw, slɛra ta fɛnndar ray la haa ya gwamara nga ney ba,
asaya, ya gwamara nga hɔtey cek mezɔmey ba.

⁶ Fara fara, ala na, fa kam cek ma mbafar a Gazlavay,
ya sɛrmara mey nga Gazlavay fara fara,
ala ndɔhay meekweɗ-mey, mevel ala maaya,

*Mesɔfney nga Gazlavay aa da ray ala.

Asaya, ya wuɗmata ndɔhay ta mevel pal.

⁷ Ala fa wuzdamara mey masa fara fara a ndɔhay,
maja Gazlavay fa vɛlndar gɔɗaɗ.

Yaw, ta fa cek hay a keɗe tabiya na, ala fa wuzdamara,
ala na, ndɔhay ma ka slɛra nga Gazlavay fara fara.

Cek ala ma ka vɛram ta masa-gɛra ala hay,
ta cek ala ma jɔɗndar fa masa-gɛra ala hay na,
ara mekey cek ta cɔved e keɗe fa mey nga Gazlavay.

⁸ Ndɔhay siya faa hɛmdamandar,
siya hay may, fa rɛsmandar.

Ndɔhay siya saya fa namandar ray,
siya hay may, fa cɔɗmandar.

Ala na, ndɔhay maa guzlam mey masa fara fara,
ama ta ɗgene he cɔpa, a padamandar
nga ndɔhay membɔrzley.

⁹ A ləvam saya, ala na, ndaw ma sərndar daa ba,
ama anja ndəhay tabiya a sərmandar jak, ba diya?

Ndəhay a wulkam na,
ala fa da njam ga da bəla daa ba,
ama nəkmara taw, ala daha ta dey cəŋga.

Ta sərđamandar banay la ga,
ama ta kəđmandar vagay daa ba.

¹⁰ Ata fa kamandar cek ma ka matəway aa dey,
ama ala mandaw mandaw daa meesəmey cəŋga.

Ndəhay a nəkmandar na, ala anda masa-viya hay,
ama ala fa jənam ndəhay ga
ŋga hətey menjey maaya fa Gazlavay.

Ndaw a nəkndar anda cek ala daa ba,
ama fara fara cek ma həcndar na, daa ba səlak.

¹¹ Akwar ndəhay da Kwarinti, ala na, ma kadamakwara
mey daa mevel ala la cəpa, kwa ya ta cam mey fa akwar
daa ba səlak. ¹² Ala na, ya wudmakwar kalah, ama ma
wudmandar ba na, akwar jak. ¹³ Ehe, ya faa guzlkwar
anda akwar bəz adaw hay, wudmandar anda ala ma
wudmakwar may, wudmandar ma fəna ma fəna ta mevel
pal.

Mewedey ta ləvaŋ na, a cəmam daw?

¹⁴ Ya fa ləvkwar fara fara, ndəhay ma təba mey ŋga Yesu
ba na, ka da cəmam dəy ta ata ba. Cek maaya ta cek maaya
ba a cəmam aa slam a daw? Mewedey ta ləvaŋ na, a cəmam
aa slam a daw? ¹⁵ Ata *Kəriste ta *Satan, bay-malula na,
a cəmam dəy daw? Yaw, ndaw ma təba mey ŋga Yesu ta
ndaw ma təba mey ŋga Yesu ba na, cəved ata letek daw?

¹⁶ Asaya, kuley hay na, slam ata daa *Way-mekey-kwakwas
ŋga Gazlavay daha daw? Aləkwa na, anda Way-mekey-
kwakwas ŋga Gazlavay, Gazlavay, ndaw masa anŋa daha ta
dey ŋga sərmataw. Ara anda aa ma ləvey: «Yah, Gazlavay,
ya da njeŋ ta ndəhay adaw hay. Yah na, Gazlavay ata, ata
may, ndəhay adaw hay.» ¹⁷ Ara maja ŋgene, Bay Gazlavay
a maa guzltar a ndəhay anŋa hay, a ləvtar:

«Wudkam ta ndəhay malamba hay,
ka da njam daa slam a saba.

Njam manjar mebərey,
anda keđe, yah na, ya təbkwar la ŋga ndəhay adaw
hay.

¹⁸ Yah na, Papakw akwar,

akwar may, bəz adaw hay, mezəle hay ta manğusa hay. Ara Bay Gazlavay masa ta gədan ma fənta cek hay cəpa maa guzley anda kefe.»

7

¹ Ahaw, jam adaw hay, mey hay tabiya masa Gazlavay ma ləvey kefe na, a kandakwara la anda aa ma ləvey. Anda kefe, si ya mbəkdwakwa cek hay tabiya masa ma zləba, kwa vaw aləkwa, kwa mesəfney aləkwa *. Si ya nakwar ray a Gazlavay, anda kefe, ya da njakwa maaya fa mey anğa.

Pawl aa səmey da ray Kwarinti hay

² Wudmandar maaya maaya dəba. Ala ta kam cek maaya ba nğada ndaw pal dasi akwar na, daa ba. Ala ma nəsam ndaw daa cəved nğa Gazlavay na, daa ba. Ala ta fəcam cek nğa ndaw pal dasi akwar na, daa ba. ³ Yaa guzley anda kefe na, a key ya mbəfkwar ray ba. Ara anda yah ma ləvey, ala fa wudmakwar kalah, kwa cek fa da wunkandakwar na, daa ba səlak. Kwa da ara nğa njeý ta dey, kwa da ara nğa məceý na, aləkwa bama cənğa. ⁴ Ahaw, ya səra na, akwar ndəhay adaw hay fara fara. Ya faa səmey da ray akwar. Yah na, ya ta sərey banay la ga, ama mevel adaw ta dəkey la, ya faa səmey ga cənğa.

⁵ Kwa daa masa ala ma wusmawa a Masadəwan fefe na, ya ta hətam cəved nğa məskey vaw daa ba, maja banay hay mekele mekele daha. Ndəhay ta cakalafamandar mey la, asaya, ray ala ta həbey la da ray cek hay mekele mekele.

⁶ Ama Gazlavay na, ara ndaw ma dəkar mevel a ndaw masa lenğesl anğa ta mbəfey sem maja banay ma hətfar. Ara anğa ma slərdərwa Tit nğa dəkndar mevel may.

⁷ Ma dəkndar mevel e na, ara masawa nğa Tit e daada ba, ama ara mey masa anğa ma kadandara da ray akwar may. Ahaw, Tit e, a ləvndar akwar ta dəkmar mevel la may, asaya, akwar fa wudam nğa hətmaya fa dey cənğa. Akwar fa zəlam marava da ray cek maaya ba masa akwar ma kamara, asaya, akwar fa wudam nğa key gədan nğa jənmaya fa masa-gəra adaw hay. Masa yah ma cənda mey a kefe na, yah daa meesəmey ara mey ba.

⁸ Leeter masa yah ma wuzlalakwara heyey na, ya səra ta wulkadakwar la ga. Anja dey pal daha, ya da zəley marava da ray a, maja leeter e nğene ta wulkadakwar la. Ama ya fa da zəley marava da ray leeter e daa saba. ⁹ Wure

6:18 6.18 2Sam 7.14; Iz 43.6; Am 4.13; CWJ 11.17 * **7:1** 7.1 cek masa ma zləba mesəfney aləkwa: Ara mewulkey nğa zlepeý, nğa key maagway, da daa ba, nğa key cek hay maaya ba mekele mekele. **7:1** 7.1 1Jn 3.3 **7:2** 7.2 6.13; 12.17 **7:3** 7.3 6.11; Fəl 1.7 **7:4** 7.4 6.10 **7:5** 7.5 2.13; 4.8 **7:6** 7.6 1.3-4; Tit: 2.13 **7:8** 7.8 2.4

keɗe, ya faa sɔmey da ray leeter e. Yaa sɔmey maja leeter e ma wulkadakwar da ray malamba akwar hay daada ba, ama yaa sɔmey maja mewulkey akwar a ta mbəɗɗakwara menjey akwar sem. Mewulkey akwar a ɲgene a mbafar a Gazlavay. Anda keɗe, leeter ala ha na, ta kakwar cek maaya ba na, daa ba səlak. ¹⁰ Anda meləvey, da ndaw fa wulkey da ray menjey aɲga maaya ba amba a mbəɗɗa anda Gazlavay ma wuɗey na, mewulkey aɲga ɲgene na, a mbəɗɗara menjey aɲga la. Ara anda keɗe, Gazlavay ma da ləhda ndaw a daa mebərey. Kwa waawa ma wulkey anda ɲgene, a zəley marava da ray a daa ba. Ama da mewulkey ɲga ndaw anda ɲga ndəhay da bəla ma mbəɗɗamara menjey ata ba na, ɲgene he, ara mewulkey ma hendey ndaw aa meməcey.

¹¹ Fara fara, mewulkey akwar ɲgene a mbafar a Gazlavay. Nəkmara cek masa aɲga ma ka fa akwar dəba taw. Wure keɗe, akwar ma mbəɗɗamara menjey akwar cay. Ka wuɗam ɲga wuzdamara, akwar na, da wuzlah ndəhay ma kam mebərey ba. Akwar ma cam mevel la da ray mebərey ɲga ndəhay da wuzlah akwar. Akwar ma zɓuram la. Akwar fa wuɗam ɲga hətmaya fa dey saya. Yaw, ka wuɗam ɲga key cek masa Gazlavay ma wuɗey dəba, ka wuɗam ɲga kətmara ndaw masa ma key cek maaya ba heyey. Wure keɗe, daa mey a keɗe, akwar fa wuzdamara kwa ta fa meeme na, akwar ta zay da mey.

¹² Ya fa ləvkwar, fara fara leeter masa yah ma wuzlalakwara heyey na, ara maja ndaw ma key cek maaya ba ɲgene daada ba, asaya, ara maja ndaw masa ndaw a ma kar cek maaya ba ɲgene daada ba may. Ama ya wuzlala na, amba ya wuzdakwara fara fara fa mey ɲga Gazlavay, akwar fa wuɗmaya ta mevel pal.

¹³ Ara maja ɲgene, mevel ala ma dəkey cay wure keɗe. Ahaw, mevel ala ma dəkey cay, ama yaa sɔmam ma fəna ma fəna na, maja Tit aa daa meesəmey maja ray aɲga fa həbey da ray akwar tabiya fetede daa saba.

¹⁴ Nəka, daa masa yah ma slərda Tit e fa akwar na, yah maa həmdakwar la meedeɗ aɲga. Anda keɗe, akwar ta pamaya hwaray daa ba. Mey masa ala ma ləvmakwar mandaw mandaw na, ara mey masa fara fara. Anda keɗe, cek masa yah maa həmdakwar fa mey ɲga Tit maja na, akwar fa wuzdamara fa mey ɲga Tit e ta fa sləra akwar, meehəmey a, ara aɲga fara. ¹⁵ Daa masa Tit ma wusey fa akwar na, akwar ma təbmara la maaya maaya, ka namar ray, ka cənmar mey. Anda keɗe, daa masa aɲga fa sərfada

cek masa akwar ma kamar tabiya na, a wudƙwar ma fəna ma fəna. ¹⁶Yah Pawl may, ya faa səmey da ray akwar maja akwar ndəhay adaw hay fara fara.

8

Dala nga jəney ndəhay daa mecəmey-ray nga ndəhay nga Yesu

¹ Məlma adaw hay, ya wudƙam nga kadamakwara cek masa ndəhay nga Yesu daa hwayak nga Masadəwan ma kamara. Cek aha fa wuzdərwa na, maaya nga Gazlavay aa da ray ata. ² Ndəhay a ta sərəm banay la, ama ata daa meesəmey cənga. Ata cəpa masa-viya hay, ama a vələm ta har cew cew, ta vələm dala la ga nga key sləra nga Gazlavay. ³ Ya fa ləvkwar fara fara, ata ta vələm dala la tədə ta gədaŋ ata, haa a fəna gədaŋ ata ha. Ara ata ta ray ata ma samawa fa ala, ⁴ a kamandar ambaw, aa cəfdamandar amba ya vəlmatar cəvedŋ nga jənmata ndəhay daa *mecəmey-ray nga ndəhay nga Yesu da *Jeruzelem may. ⁵ Nəka, cek masa ata ma kamara na, ta fəna masa ala ma wulkam da ray a sem. Teesedŋ na, a vəldamara ray ata ŋgada Bay Mahura, fa dəba ha, a təbmara mey ala amba a kamara cek anda Gazlavay ma wudfey.

⁶ Da fa akwar na, Tit ta zlarawa cay nga cakalarawa dala ha. Ara maja ŋgene, ala ma ləvmar amba a vəhey fa akwar saya nga ndəvdərwa sləra masa maaya ŋgene.

⁷ Akwar na, fa huram cek daa ba. Anda meləvey, akwar ma təbmara mey nga *Kəriste la maaya maaya, akwar fa wuzdamara *Mey-maaya-mawiya ta cəvedŋ e. Gazlavay ta wurkwara lenjesl la nga sərəy mey masa fara fara. Akwar ma vəldamara ray akwar la cəpa nga key sləra aŋga, asaya, ka wudmandar kalah. Yaw, maja akwar fa huram cek daa ba kede na, maaya na, ka wuzdamara akwar ta meesəmey nga vələy dala ha ta har cew cew.

⁸ Məlma adaw hay, yah maa guzley anda kede na, a key ya təkakwar dāy nga vələy dala ba. Ama yaa guzlkwar da ray ndəhay siya hay maa səmam nga vələy dala, amba ka hətam gədaŋ, ka wuzdamərwa mewudfey-vaw akwar ŋgada ndəhay siya hay may. ⁹ Ka səmra Bay aləkwa Mahura Yesu Kəriste na, ta kakwar maaya la. Aŋga na, aa daa wiya fa Bay Gazlavay da vadŋ, ama ta mbəkdərwa wiya ha la, a sawa a bəla, a tərey nga ndaw masa-viya, maja

akwar. A terey nga ndaw masa-viya na, amba ka hetam wiya da gazlavay da vad may.

¹⁰ Yah maa guzley kefe na, a key ya takakwar day ba. Ama ya wufey ka sarmara mewulkey adaw da ray mevoley dala ha. Nga mevofey ara akwar ma wulkam teesef nga voley dala. Ara akwar ma cakalamara dala ha teesef. Maaya na, ka ndovdamara mecekeley dala ha dɔba.

¹¹ Wure kefe, kamara slɔra ha ta mevel akwar cɔpa anda akwar ma zlamara ngeeme, ndovdamara mecekeley dala ha la. Vɔlam dala ha na, tɔfe ta gɔdan akwar. ¹² Maja da ndaw a voley cek a Gazlavay ta meesamey, ta mevel anga cɔpa, asaya, tɔfe ta gɔdan anga na, Gazlavay a tɔba la. Ama da cek anga daa ba na, Gazlavay a sɔra.

¹³ Ka da wulkam a key ya sɔrdakwar banay amba ndohay siya a njam daa wiya na, kɔne ba. Ama ya wufey na, ndohay tabiya nga njam kal kal. ¹⁴ Wure kefe na, cek mezamey fa akwar suha. Anda kefe, anga maaya amba ka jɔnmata ndohay masa cek mezamey fa ata pɔreh. Yaw, ta pas masa cek mezamey fa akwar pɔreh, ama fa ata suha na, a jɔnmakwar may. Anda kefe, ka da njam kal kal. ¹⁵ Mey adaw kefe na, aa letek ta mey nga Gazlavay maa guzley da ray cek mezamey ma kɔzlwa ta da vad zleezle, a lɔvey:

«Ndohay masa ma hɔlmawa cek mezamey a ga la na,
ta katar kalah daa ba.
Ndohay ma hɔlmawa nekɔfey na,
ta katar pɔreh daa ba may.»

Tit a da diyam ta mandala anga hay a Kwarinti

¹⁶ Ya kamar suse a Gazlavay maja Tit ta wufey la nga jɔnkwar anda ala may. Ta wufey la nga jɔnkwar ta mevel pal. Ara Gazlavay ma ka amba Tit e, a tɔba nga jɔnkwar.

¹⁷ Tit e ta tɔba la anda ala ma lɔvmar nga daw fa akwar saya. Ara maja ala ma lɔvmar daada ba, ama ara anga ta ray anga ma wufey nga daw fa akwar a. ¹⁸ Ya slɔram ndaw pal da wuzlah ala la nga diyam cew e. Ndaw aha na, ndohay daa mecamey-ray hay nga Yesu tabiya faa hɔmdamara kalah maja slɔra anga maaya daa mewuzey *Mey-maaya-mawiya. ¹⁹ Ala ma da slɔrdamara na, ara maja kefe daada ba. Ama ara ndohay daa *mecamey-ray nga ndohay nga Yesu ma walamara amba ya pɔkam bama nga jɔnndar daa mecekeley dala heyey. Slɔra maaya masa ala ma kamara kefe na, ya kamara nga hɔslar ray a Bay Mahura, ray anga, asaya, nga wuzwa na, ya wufam nga jɔney ndohay kalah.

²⁰ Ala fa wam vaw nga kørzey dala masa akwar ma cakalamərwa ga kefe amba ndəhay a slam mey a ray sləra ala ha ba. ²¹ Anda kefe, ya wudfam nga key sləra maaya na, fa dey nga Bay Gazlavay daada ba, ama fa dey nga ndəhay may.

²² Ya sləram ndaw mekele la da wuzlah ala, asi ata Tit e saya. Ndaw a na, ala ta sanğalamara la dey weewe daa sləra hay masa anğa ma kata. Anda kefe, ya sərmara, anğa ta vəlda ray anğa la nga key sləra ngada Gazlavay. Wure kefe, ta vəlda ray anğa la ma fəna saya ngada akwar maja aa ma cəney mey maaya da ray akwar. ²³ Tit na, ala mandaw mandaw cew e, ara ndaw masa ala fa kam sləra cew e nga jənkwār. Yaw, ndəhay cew ma diyam ta Tit e na, ara ndəhay masa ndəhay daa mecəmey-ray hay nga Yesu ma slərdamata fa akwar. A kam sləra ha na, amba ndəhay a həslmar ray a *Kəriste. ²⁴ Wudmata fa mey nga ndəhay tabiya amba ndəhay daa mecəmey-ray hay ma slərdamata heyey a cəndamara, asaya, amba a sərmara masa ala maa həmdamakwar heyey na, anja fara.

9

Mey da ray mevəley cek a Gazlavay ta meesəmey

¹ Məlma adaw hay, kwa yah maa guzlkwar da ray dala masa ala ma da slərdamara ngada ndəhay nga Yesu da *Jeruzelem heyey daa saba na, cay gway. ² Ya səra na, akwar may, fa wudfam nga jənmata. Yah ma kadatara mewulkey akwar nga jənmata ndəhay da Jeruzelem sem a ndəhay daa hwayak nga Masadəwan, ya ləvtar: «Ndəhay daa hwayak nga Akay * ta złamar cay dəga nga mevədey nga jəney ndəhay nga Yesu da Jeruzelem.» Masa ndəhay da Masadəwan ma cəndamara sləra akwar masa maaya ngene na, a vəltar gədan a ndəhay ga da wuzlah ata nga jəney ndəhay da Jeruzelem e may. ³ Ehe, ya fa slərdakwara ata Tit ta ndəhay cew ngene nga jənmakwar nga cekeley dala ha taazak, amba yah maa həmdakwar kefe na, a tərey nga cek nga tede ba. Anda kefe, da ala ma wusam la fa akwar na, ya hətfamar cek hay tabiya madiytakaya cay, anda yah ma ləvey. ⁴ Da masa ala ma wusam la fa akwar ta ndəhay da Masadəwan a, asaya, da dala ha manjar nga cekeley na, hwaray a da kaya fa mey ata, maja ya ta ləvtar cay ka cakalamara dala ha la fara fara. Ngada akwar may, hwaray a kakwar la. ⁵ Ara maja ngene, yah ma wulkey

8:23 8.23 Tit: 2.13 **8:24** 8.24 7.14; 8.7-8 **9:1** 9.1 8.1-4; Rm 15.26 * **9:2** 9.2 Akay: Ara hwayak mahura nga Gerek hay, Kwarinti ara berney da hwaf a. **9:3** 9.3 8.22, 24

nga slərdata ndəhay maakar ηgene teesef fa mey adaw. Ya wufey amba a jənmakwar nga cekeley dala ha taazak, anda akwar ma ləvmandar. Anda kefe, wuskwaa ya da wusey na, akwar ma cakalamara cay. Ngene, mecekeley dala ha a da wuzwa na, ara akwar ma wufam nga cakalamara ta mevel pal, ba na, ta menjərbey-mey ba.

⁶ Sərfadamara, mey daha a ləvey: «Ndaw ma sləkey nekədey na, a da hətey cek nekədey may. Yaw, da a sləkey ga na, a da hətey cek ga may.» ⁷ Anda kefe, si ndaw a vəley cek anda aa ma wufey. Ka da vəldamara ta menjərbey-mey ba. Ndaw a da təkakwar dəy ta təkəy ba may. Ama vəldamara na, ta meesəmey, maja Gazlavay a wufey na, ndaw masa ma vəley cek ta meesəmey. ⁸ Sərmara, Gazlavay na, anğa ta gədanη nga vəlkwar cek hay ga. Anda kefe, kwa meeme fa da həckwar daa ba səlak. Ka da hətam cek hay masa ma fəna amba ka vəldamara nga key sləra ma mbafar a Gazlavay. ⁹ Ara anda mey nga Gazlavay mawuzlalakaya, ma ləvey:

«Ndaw masa maaya na,
har anğa mawurkaya nga jəney masa-viya hay.

Maaya anğa masa anğa ma ka ηgene,
anğa daha nga sərmataw.»

¹⁰ Ma vəlda hulfad nga sləkey ta ma vəlda dəf nga zəmey a ndəhay na, ara Gazlavay. A da vəlkwar hulfad hay cəpa masa akwar ma wufam nga sləkey may. Hulfad a, a da pəcwa, a da yey ga. Anda kefe, ka da kamatar maaya ηgada ndəhay ma fəna ma fəna. ¹¹ Fara fara, a vəlkwar cek hay la ga mekele mekele amba ka gwamara nga jənmata ndəhay siya hay ma fəna ma fəna. Anda kefe, ndəhay ga a da həlmamara Gazlavay maja cek masa akwar ma vəldamatara ta har ala amba ya handamatara. ¹² Cek masa akwar ma vəldamara ηgene na, ara nga jənta ndəhay nga Gazlavay da Jeruzelem masa daa banay daada ba, ama amba ndəhay ga a kamar suse a Gazlavay maja may. ¹³ Ndəhay ma da hətmar cek masa akwar ma da kamara ηgene na, a da həlmamara Gazlavay maja akwar fa cənmar mey a Gazlavay. Anda kefe, akwar fa wuzdamara na, akwar fa təbmara *Mey-maaya-mawiya nga *Kəriste. Yaw, ndəhay a da həlmamara Gazlavay maja akwar ndəhay masa har mawurkaya nga jəney ndəhay nga Gazlavay da Jeruzelem, asaya, maja akwar ndəhay ma jənam ndəhay cəpa. ¹⁴ A da wufmakwar kalah maja maaya nga Gazlavay

ga da ray akwar. Anda keɗe, a da dɔram dangay maja akwar. ¹⁵ Hɛlmakwa Gazlavay maja maaya anɗa kalah.

10

Mey da ray gɔɗanɗa nga Pawl maja anɗa ndaw-meslɔrey nga Yesu

¹ Yah, Pawl, ta ray adaw, ambahw, ya wuɗey ngaa guzlkwar cey. Ndɔhay faa guzlam da ray adaw, a lɔvam, da masa yah da wuzlah akwar na, ya zluɗey ta akwar. Ama da ya ta ngɔchey sem nekɔɗey ta akwar na, yaa bɔcey taa bɔcey, mandɔrzay a kaya ba. Fara fara, yah na, ya wuɗey ngaa key ndaw maaya meekweɗ-mey anda *Kɔriste. ² Anda keɗe, ya kakwar ambahw, maaya na, ka mbɔɗdamara menjey akwar, amba da yah ma wusey la fa akwar na, ka tɔkmaya ɗay ngaa bɔckwar ba. Asaya, ndɔhay ga da wuzlah akwar a wulkam saw, a lɔvam ya key slɔra na, anda ndɔhay ngaa bɛla gway. Ndɔhay ma lɔvam anda ngene na, ya daa bɛctar taa bɔcey.

³ Fara fara, ala ndɔhay magɔɗanɗa, ama daa slɔra ngaa Gazlavay na, ya kam vɔram anda ndɔhay magɔɗanɗa ba.

⁴ Cek ala hay ma ka vɔram a na, a sawa da bɛla keɗe ba, ama ara Gazlavay ma vɔldandara. Cek hay a na, ata ta gɔɗanɗa ngaa pɛlhata slam hay masa masa-gɔra ngaa Gazlavay ma ɓam a hwaɗ a. Asaya, ta cek hay a na, ya gwamara ngaa gɔrcamatara mey ngaa ndɔhay maa guzlam saw ta membɔrzley. ⁵ Asaya, ta cek hay a na, ya gwamara ngaa nɛsmara mey ngaa ndɔhay ma zlapam saw, ma tɔkmata ndɔhay ngaa sɔrey Gazlavay. Ta cek hay a na, ya wuɗam ngaa mbɔɗdamara mewulkey ata maaya ba tabiya amba a tɔɓmara mey ngaa Kɔriste. ⁶ Da akwar fa wuzdamara, akwar fa namar ray fara fara a Kɔriste na, anda keɗe, ya da kɔtmata ndɔhay siya masa ma namar ray ba.

⁷ Nɔka, akwar na, ka wulkam fa cek hay masa ma hɔtey fa dey gway. Da ndaw a lɔvey, anɗa ndaw ngaa Kɔriste na, maaya a sɔra ala na, ndɔhay ngaa Kɔriste anda anɗa may.

⁸ Bay Mahura Yesu ma pandar ngaa mahura na, a pandar amba ya nɛsmakwar ba, ama amba ya jɔnmakwar. Kwa ya fa zlepey kalah maja na, hwaray fa da kaya daa ba. ⁹ Yaw, ka da wulkam a key ya zluradakwar ta leeter adaw hay ba. ¹⁰ Ndɔhay siya fa lɔvam: «Daa leeter hay ngaa Pawl na, Pawl a tɔctar ɗay a ndɔhay ngaa key cek masa ta banay ngaa key, asaya, aa bɔcey taa bɔcey. Ama da aa da wuzlah alɔkwa

na, a pəskey vaw ba, a gucey ta gucey, mey masa anğa maa guzlda na, ara mey nğa tede.» ¹¹ Ndaw maa guzley anda nğene na, si a wulkey maaya maaya, a səra cek masa ala ma wuzlalamara ta wuzleley kaa na, ya kamara la da masa ala ma wusam la fa akwar.

¹² Ndəhay siya fa pamata ray ata nğa mahura hay. Fara fara ya gwa nğa wa ray adaw, ya ləvey yah letek ta ata ba. A nəkam dey na, fa ray ata gway, a ləvam ndaw ma fənta daa ba. Ata na, ndəhay manjar ləngesl. ¹³ Ala na, ya fa zlapam anda nğene daa ba. Ama ya zlapam na, da ray sləra masa Gazlavay ma vəldandara nğa key gway. Daa masa Gazlavay ma wusdandar fa akwar heyey na, ya ta zləngdamara kwakway nğa sləra ala daa ba. Ya zlapam na, da ray sləra masa Gazlavay ma vəldandara ha gway. ¹⁴ Daa masa ala ma diyam fa akwar na, ya ta zləngdamara slam masa Gazlavay ma vəldar cəved nğa key sləra da hwaɸ a na, daa ba. Fara fara, ala ta wusam la teesed fa akwar nğa kadakwara *Mey-maaya-mawiya nğa Kəriste. ¹⁵ Anda kede, ala fa da zlapam da ray sləra masa ndəhay mekele ma kamara na, daa ba, maja sləra ata ha na, wal ta masa nğa Gazlavay ma vəldandara. Ala fa səkwam na, amba ka təbmara mey nğa Yesu ma fəna ma fəna, amba sləra ala da wuzlah akwar a key maaya ma fəna saya. Ta nğene he cəpa, ala fa da zləngdamara slam masa Gazlavay ma slandara na, daa ba. ¹⁶ Fa dəba ha, ya gwamara nğa diyam aa hwayak hay mekele masa dərən ta akwar nğa wuzwa Mey-maaya-mawiya nğada ndəhay fetede. A da key anda kede maja sləra masa ndəhay mekele ma kamara sem daa slam masa Gazlavay ma vəldatara na, ya wudam nğa zlepey da ray a ba.

¹⁷ Yaw, mawuzlalakaya daa dərəwel nğa Gazlavay, a ləvey: «Da ndaw a wudəy nğa zlepey na, nğa zlepey da ray sləra masa Bay Gazlavay ma ka gway.» ¹⁸ Ahaw, fara fara ndaw maaya na, ara ndaw masa Gazlavay maa həmda, ba na, ara ndaw masa maa həmda ray anğa ba.

11

Mey da ray ndəhay ma pamara ray ata nğa ndəhay meslərey nğa Yesu

¹ Ambahw, vəlmaya cəved wure kede amba yaa guzlkwar anda ndaw manjar-ləngesl cey. Fara fara, yaa cəfdakwar, bəsmara mey adaw. ² Mevel fa caya da ray ndəhay

ma batamakwar ngene, maja ya wudkwar kalah anda Gazlavay ma wudkwar. Ka sɛrmara yah na, anda papakw akwar, ya ta pakwar la anda dam-sabara masɛpkaya ngada ndaw pal daha. Ndaw aha na, ara *Kɛriste masa yah ma da handakwar fa vɛda, akwar maaya maaya manjar nga nɛsey. ³ Ama ya fa zlurey, da a da mbɛddamakwara lenjesl nga wudkakwar ta Kɛriste amba ka sɛpmara maaya maaya saba kwa. A da key anda *Ev ma tɛba mey nga zezekw ma bata zleezle heyey. ⁴ Kwa waawa ma sawa ngaa sɛrkadakwar mey masa fara fara ba na, ka vɛlmar cɛved na, kwara? Ndɛhay anda ngene na, aa guzlam da ray Yesu mekele, ba na, da ray Yesu masa ala maa guzlam da ray a ba. Mesɛfney masa akwar ma hɛtam fa ata na, ara *Mesɛfney nga Gazlavay masa akwar ma hɛtam heyey ba. Asaya, ata fa wuzam *Mey-maaya-mawiya wal ta masa akwar ma tɛbmara heyey. Ama ta ngene he cɛpa, akwar fa jɛkfamatar slɛmay cɛnga na, kwara?

⁵ Ndɛhay masa akwar ma wulkam ara ndɛhay meslɛrey maaya ngene na, a fɛnmaya ba sɛlak. ⁶ Ayɛwa, da maja yah na, ya sɛra meeguzley maaya maaya ba kwa, ama ya sɛrta cek hay masa yah maa guzley da ray a cɛnga. Cek masa yah ma sɛra na, ya ta wuzdakwara la maaya maaya dey weewe.

⁷ Zleezle masa yah ma wuzdakwara Mey-maaya-mawiya nga Gazlavay heyey na, yah maa cɛdfafakwar cek daa ba, ba diya? Anda kedɛ, ya ta nada ray adaw la fa mey akwar amba ya gɛldakwar daa mey nga Gazlavay. Ya key ngene na, ara mebɛrey daw? ⁸ Daa masa ya fa wuzey mey fa akwar heyey na, ma jɛnmaya ta dala na, ara ndɛhay daa *mecɛmey-ray nga ndɛhay nga Yesu daa slam mekele. Yaw, ya ta hɛley dala ata la amba ya jɛnkwar. ⁹ Daa ngene na, mɛrga fa kaya, ama yah taa cɛdfafakwar cek daa ba, maja ndɛhay nga Yesu da Masadɛwan ta samawa la nga vɛlmaya cek hay mekele mekele masa fa yah daa ba. Anda kedɛ, ya taa cɛdfafakwar cek daa ba. Kaazla kwa ya fa daa cɛdfafakwar cek daa ba may. ¹⁰ Fara fara, kwa ndaw da slala wura wura masa daa hwayak akwar Akay ma gwa nga tɛkya nga zlepey maja yah maa cɛdfafakwar cek ba na, daa ba. Ya lɛvkwar anda kedɛ na, ta mezɛley nga Kɛriste, ndaw masa anga daha ta yah. ¹¹ Ka wulkam yah maa cɛdfafakwar cek daa ba heyey na, a key ya wudkwar ba

daw? Kay, kōne ba. Kwa Gazlavay ta ray anġa na, a sēra ya fa wudkwar.

¹² Mewulkey adaw kaa na, ya fa da mbōdda daa ba cēnġa. Anda keċe, ndōhay maa sērkadam mey masa fara fara ba fa da hētam dabaray nġa zlepey da ray ala daa ba. A gwamara nġa lōvey slēra ala letek na, daa ba. ¹³ Ndōhay a nġene na, ara ndōhay meslōrey masa fara fara ba. A mbērzlam kalah daa slēra ata. A pamara ray ata nġa ndōhay meslōrey nġa Kōriste. ¹⁴ Mey a keċe, a rēzley ndaw ba, maja kwa ta pas lanġar na, *Satanġ, bay-malula, ray anġa, fa pa ray anġa nġa maslanġ nġa Gazlavay mewedeŷ. ¹⁵ Yaw, da Satanġ, ray anġa, fa ka anda keċe na, kaa wara ndōhay ma ka slēra anġa, a pamara ray ata nġa ndōhay nġa Gazlavay ma ka cek ta cōved e, ba kwara? Ta pas masa Gazlavay ma da ka sariya na, a sērdata banay la fa slēra ata ha.

Mey da ray banay nġa Pawl

¹⁶ Ambahw, yaa guzlkwar saya, ndaw a da wulkey, yah na, ndaw manjar-lenġesl ba. Da akwar fa wulkam kōne na, vēlmaya cōved amba ya zlepey nekōdeŷ may. ¹⁷ Fara fara, mey masa yah maa guzlda keċe na, a mbafar a Bay Mahura ba. Da ya fa zlepey na, ya daa guzley anda ndaw manjar-lenġesl. ¹⁸ Ndōhay ga fa zlapam kalah da ray cek hay da bōla. Yah may, ya wudeŷ nġa zlepey kōne.

¹⁹ Akwar na, ka wulkam ka lōvam akwar ndōhay ma sēra cek hay, ba diya? Kaa ka bōsmara ndaw manjar-lenġesl na, kwara?

²⁰ Ahaw, ndōhay fa tērdamakwar nġa beke hay, faa fiymakwara cek akwar hay, fa lalamakwara cek hay cōpa, fa rōsmakwar, asaya, fa slōnġmakwar matapa-har. Ta nġene he cōpa, akwar fa bōsmara gway. ²¹ Ambahw, yah na, hwaray fa kaya nġa lōvkwar, maja vaw adaw ta pōskey nġa kakwar kwa meeme anda ata daa ba.

Wure keċe, amba yaa guzley anda ndaw manjar-lenġesl. Ya zlepey da ray cek hay anda ndōhay mekele ma zlapam may. ²² Ndōhay a lōvam ata na, *Hebōre hay. Kaa yah na, ndaw Hebōre he may. A lōvam ata na, *Israyel hay. Kaa yah na, ndaw Israyel ehe may. A lōvam ata na, ndōhay daa sēkway nġa *Abōraham. Yaw, yah may, ndaw daa sēkway nġa Abōraham a, ba diya? ²³ Asaya, a lōvam, ata na, ndōhay ma ka slēra nġa *Kōriste. Yah may, yah ndaw ma ka slēra nġa Kōriste ma fōnta jak, ba diya? Ya faa guzlkwar wure keċe na, anda ndaw manjar-lenġesl fara fara. Ya lōvey, yah na, ya fa ka slēra nġa Gazlavay ma

fənta. Yah na, ta kəzlamaya la aa fərsəne dey ga ma fənta, ta kədmaya la dey ga ma fənta, asaya, ya ta sərey banay la ga haa kasl fa meməcey. ²⁴ Mahura hay nga *Jəwif hay ta slədmaya la, laway kwakwar maakar a ray a zlam-letek haa dey zlam. ²⁵ Mahura hay daa hwayak nga *Rawm ta kədmaya la ta zlanday dey maakar. Pas pal daha, ndəhay ta hazakamaya la ta anɣwa haa kasl fa meməcey. Asaya, kwambiwal ta təddaya la aa yam dey maakar. Dey pal daha na, a mbəkdiwa daa yam a, ya vərndawa, ya nawa daa yam a. ²⁶ Ya ta pəkey la aa hwayak hay ga. Ya ta sərey banay la. Anda meləvey, wayam a wudəy nga laya dey weewe, mayal hay a wudam nga lalamata cek adaw hay, a wudam nga kədmaya. Ndəhay Jəwif hay səkway adaw hay leŋ ndəhay masa Jəwif hay ba ta sərdamaya banay la. Fara fara, yah ma sərey banay la daa wura daa wura, kwa daa berney hay, kwa da wuzlah-ley, kwa daa bəlay, yah ma sərey banay la ga. Asaya, ndəhay ma mbəzlam, ma ləvam ata na, ndəhay nga Yesu, ta sərdamaya banay la may. ²⁷ Ahaw, yah ma key sləra la haa ya sərey banay ga. Ta pas lanɣar ya ney ba, may fa caya, yam fa kaya. Ta pas lanɣar si ya key *daliyam. Asaya, ya hətey zana nga kəsley fa vaw ba, memed a wudəy nga kəfya. ²⁸ Banay mekele mekele daha, ama ya fa da kadatərwa siya daa saba. Daa nɣene na, mewulkey adaw aa da ray cek pal daha. Ya wulkey mandaw mandaw da ray ndəhay daa mecəmey-ray hay nga Yesu tabiya, ²⁹ maja yah na, da ndaw anɣa masa-bəle daa mey nga Gazlavay na, bəle anɣa ha a wusfaya may. Da ndaw a key mebərey na, a gəfya fa mevel anda awaw.

³⁰ Da ya ləvey si ya həsley ray na, nɣene ya da həsley ray da ray bəle adaw. ³¹ Gazlavay, Papan nga Bay aləkwa Mahura Yesu, a səra yah na, ya mbəzley ba. Anja ndəhay nga həlmamara nga sərmataw. ³² Zleezle masa yah daa berney nga Damas, Aretas, bay nga hwayak a na, ta pey ndaw la nga wey da ray berney a. Ndaw ma wey da ray berney a ta', a weley ndəhay nga lacam aa cəved ma bawa daa berney a amba a kəzlamaya. ³³ Ama ndəhay ma təba mey nga Yesu fetede a pamaya aa lelek, a jəwam zewed fa vəda, a təldamaya nɣada dəbay taa manɣalaw nga mahwal nga berney a. A bərnɣadamaya a hwayak, a dəba berney a. Anda kedə, yah ma ləhwa sem dasi har nga ndəhay a.

11:23 11.23 sləra: 1Kwr 15.10; fərsəne: SNM 16.23 **11:23** 11.23-29 4.8-12; 1Kwr 4.11-13; 12.26 **11:24** 11.24 Mew 25.3 **11:25** 11.25 SNM 14.19; 16.22
11:26 11.26 SNM 9.23; 14.5 **11:27** 11.27 6.5 **11:29** 11.29 1Kwr 9.22; Gal 6.2
11:30 11.30 12.5; 1Kwr 1.31 **11:31** 11.31 1.23 **11:32** 11.32-33 SNM 9.23-25

12

Yesu Bay Mahura a wuzar cek hay a Pawl

¹ Wure keɗe si ya zlepey cɛnɛa. Ahaw, ya sɛra na, mezlepey a ara cek nɛa tede. Ama ya wuɗey nɛaa guzley da ray cek hay masa yah ma hɛtatar ta dey aɗaw, masa Bay Mahura ma wuzdatiwa.

² Ya sɛrey ndaw pal daha *, ara ndaw nɛa Kɛriste. Gazlavay a la fa vɛɗa a vad, cay, ta', a vɛhwa. Anɛa kaa mevey kuraw a ray a mɛfaɗ fa dɛba ha. Ayɛwa, da ndaw aha ma daw la a vad ta vaw anɛa fara, da daa ba, da ara cek anda mesɛfney ma kar kwa, yah na, ya sɛra ba, si Gazlavay ma sɛra gway. ³⁻⁴ Ahaw, fara fara Gazlavay ta la ndaw a la a vad a cakay a. Da ndaw aha ta daw la ta vaw anɛa fara, da daa ba, da ara cek anda mesɛfney ma kar kwa, yah na, ya sɛra ba, si Gazlavay ma sɛra gway. Mey masa anɛa ma cɛndɛrwa da vad a na, ndaw-magɛɗan a gwa nɛaa guzlda mey a ba. Ara mey masa ndaw-magɛɗan aa ta cɛvɛɗ nɛa wuzda daa ba may.

⁵ Anda keɗe, ya da zlepey da ray cek aha ma key nɛgene. Ama maja cek mekele masa ma hɛtfaya na, ya fa da zlepey da ray a daa ba, si da ray cek ma wuzda yah na, ndaw masa-bɛle. ⁶ Kwa anɛa da ya fa zlepey na, ya faa guzley saw anda ndaw manjar-lɛngesl daa ba, maja ya fa zlepey da ray cek hay masa fara fara. Ama ya da nɛy teete amba ndɛhay a pamaya nɛa ndaw ga ma fɛna cek masa ata ma hɛtmar fa yah ba, da daa ba, ma fɛna cek masa ata ma cɛndamara fa yah ba may.

⁷ Nɛka, yah na, anɛa tɛɗe ya zlepey da ray cek hay masa Bay Mahura ma wuzdatiwa keɗe. Ama ya ta zlepey daa ba maja cek fa caya mandaw mandaw. Cek aha a slɛkya anda hatak. Ara meslɛrey nɛa *Satan, bay-malula, nɛa kɛɗɗaya vaw. Cek ma caya ha na, ara amba ya zlepey saba. ⁸ Haa ya dɛrar danɛay dey maakar a Bay Mahura nɛa nɛgɛhada banay keɗe la dɛren ta yah. ⁹ Ama a mbɛɗɗiwa, a lɛvya: «Maaya aɗaw da ray akah na, a wusa amba ka bɛsa banay a gway, maja da ndaw, anɛa masa-bɛle na, gɛɗan aɗaw a key slɛra la daa ndaw aha maaya maaya jak.» Da ara anda keɗe na, yah daa meesɛmey, ya zlepey da ray bɛle aɗaw keɗe amba gɛɗan nɛa *Kɛriste a nɛy daa yah. ¹⁰ Ara maja keɗe mevel aɗaw ma dɛkey kwa da ray bɛle aɗaw a, kwa a cɛɗmaya, kwa a cakalafamaya mey, kwa a sɛrdamaya

* **12:2** 12.2 ndaw pal daha: Ndaw aha na, ara Pawl a, ray anɛa. A wuzda ray anɛa feɗe ba na, maja a wuɗey nɛa zlepey kalah ba. **12:5** 12.5-6 11.16, 30; 12.1; 1Kwr 1.31 **12:7** 12.7 Gal 3.13-14; Jɛw 2.6 **12:9** 12.9 Iz 40.29-31; Rm 5.2; Fɛl 4.13

banay dey ga, kwa yah ta mewulkey kalah maja Kəriste na, ya daa səmey cəŋga. Ya səra, da yah masa-bøle na, Kəriste a da vølya gədaŋ ma fəna jak.

Mewulkey ŋga Pawl da ray ndəhay Kwarinti hay na, kwara?

¹¹ Nəka, ya ta zlepey la, ya taa həmda ray adaw la anda ndaw manjar-leŋgesl, ama ara akwar ma kamara, ba na, ara mebørey adaw ba. Anja ma daa həmdamaya na, akwar jak ba diya? Kwa anja ka ləvam ya sərey cek ba, ama ndəhay masa akwar ma wulkam ara ndəhay meslərey masa maaya heyey na, a fənmaya ba səlak. ¹² Daa masa yah da wuzlah akwar heyey na, ya ta bəsa la ŋga key sləra mandaw mandaw ta akwar cəŋga. Gazlavay ta jənya la ŋga key maazla hay mekele mekele. Maazla hay a, a wudam ŋga ləvey na, yah *ndaw-meslərey ŋga Yesu fara fara. ¹³ Yaw, cek hay maaya masa yah ma katara ŋgada ndəhay ŋga Yesu daa hwayak hay mekele na, yah ma kakwara daa ba daw? Ayəwa, da maja yah maa cəfdafakwar cek ŋga jənya daa ba heyey kwa. Da ŋgene ara mebørey na, ambahw, mbəkdamiwa mebørey a.

¹⁴ Wure keđe, ya ta diya vaw cay ŋga daw fa akwar saya, ŋga dey maakar. Masa yah ma wusey la na, ya fa daa cəfdafakwar cek ŋga jənya daa ba cəŋga. Ya daw na, maja zleley akwar ba, ama maja akwar ray akwar gway. Nəka, yah na, anda papakw akwar. Ma vəlmatar cek ŋga zəmey a bəza hay mecəhe na, ara papa ata hay, ba na, ara bəza hay ma vəlmatar ŋgada papa ata hay ba. ¹⁵ Kwa yaa zədda dala adaw cəpa maja akwar, kwa ya vəlda ray adaw cəpa kasl fa meməcey maja akwar, ŋgada yah na, a kaya cek ba. Ya daa səmey cəŋga. Ayəwa, ka wudmaya saba kaa na, maja da ya fa wudkwar kalah kwa.

¹⁶ Akwar na, ka sərmara ya ta sərdakwar banay amba ka vəlmaya cek ŋgada yah na, daa ba. Ama ndəhay siya da wuzlah akwar fa ləvam: «Pawl na, a pa ray anga ŋga ndaw maaya, ama anga ndaw masa-wewer. Ta təknađkwara dala aləkwa sem.» ¹⁷ Kaa ya təknađkwara dala akwar ha na, kwara? Ndaw pal dasi ndəhay masa yah ma slərdata fa akwar heyey na, ta təknađkwara cek akwar hay daa ba, ba diya? ¹⁸ Nəka, ya ta kar ambahw la a Tit ŋga daw fa akwar, ata ta məlma aləkwa laŋgar masa akwar ma sərmara maaya maaya heyey. Kaa Tit e ta təknađkwara cek akwar hay sem daw? Cek masa Tit ma karawa fa akwar

ngene na, ara cek letek ta masa yah ma ka may, ba diya? Mewulkey ala na, letek.

¹⁹ Dəga zleezle, ka wulkam a key ya wufam nga məfey ray ala daa mey hay a kefe daw? Ara kəne ba! Yaa guzlam na, fa mey nga Gazlavay anda *Kəriste ma wudey. Jam adaw hay, ala faa guzlmakwar na, maja ya wufam amba ka hətam gədan nga daw fa mey fa mey daa cəved nga Gazlavay. ²⁰ Ya fa zlurey da ya da wusey fa akwar a na, menjey akwar a da mbafaya ba kwa. Da ara anda ngene na, menjey adaw a da mbafakwar ba may. Ya zlurey ya da hətfakwar, akwar fa təram vaw ta tərey, siya hay fa kam səleŋ fa ndəhay siya, akwar fa cam mevel da wuzlah akwar, asaya, akwar fa wufkam dəy, akwar fa cədam vaw ta cədey, akwar fa slam mey ta sley da wuzlah akwar, akwar fa zlapam, asaya, akwar fa kam cek saw. ²¹ Ayəwa, yah ma da vəhey fa akwar a na, ya zlurey, da Gazlavay aləkwa a da paya hwaray fa mey akwar kwa. Ya fa zlurey saya maja da ya da hətfey ndəhay malamba hay ga fa kam mebərey anda zleezle cəŋga kwa. Anda meləvey, ata ta mbəkdamara mewulkey ata maaya ba ngene daa ba. A wulkam mandaw mandaw nga key cek ma nəsa ndaw, a lam vaw saw, asaya, a kam cek ma ka hwaray cəŋga. Da ata ta mbəkdamara mewulkey ata hay maaya ba ngene daa ba na, ya da təway fa mey akwar maja ata.

13

Pawl a patar lenğesl a Kwarinti hay nga madagway-dakw

¹ Ya da daw fa akwar kaa na, nga dey maakar, ba diya? Da yah ma wusey la na, ya da zəlmatakurwa ndəhay ma kam cek malamba hay. Ya daa cəfdamatakwa anda mawuzlalakaya daa dərewel nga Gazlavay, ma ləvey: «Kwa cek wura wura maaya ba masa ndaw ma ka, nga sərey mey da ray a fara fara na, maaya na, ndəhay cew, da daa ba, maakar a nəkmara mey a, a kam sede da ray mey a.»

² Daa masa yah ma daw fa akwar nga dey cew heyey na, yah ma patar lenğesl la ngada ndəhay ma kam mebərey ta ngada ndəhay siya cəpa. Ahaw, wure kefe na, yah dərəŋ ta akwar ama ya ləvkwar saya, da yah ma wusey la fa akwar nga dey maakar na, ya fa da sərfatar dey-ceceh a ndəhay cəpa ma kam mebərey daa ba. ³ Akwar na, ka wufam ya wuzdakwara ara *Kəriste ma balaya mey ngaa guzley daw? Fara fara, ya fa wuzdakwara, Kəriste he na, ara ndaw

masa-bøle fa mey akwar ba, ama aa fa key sløra da wuzlah akwar ta gødan anga. ⁴ Fara fara, daa masa ata ma dørmara Køriste fa hwadam mazlanjalakaya heyey na, ta tørey sem nga ndaw masa-bøle, ama ta sløkdawa sem daa memøcey ta gødan nga Gazlavay. Anda kefe, ala macømkaya ta anga kefe na, ala masa-bøle hay may. Ama ya wuzdamakwara la, ala daha ta dey bama ta anga ta gødan nga Gazlavay.

⁵ Wulkam da ray menjey akwar, nøkmara ray akwar cey, akwar fa pamara Yesu nga ndaw akwar fara fara daw? Akwar fa sørmara na, Yesu Køriste aa ta akwar, ba diya? Da ka sørmara anga ta akwar ba na, ngene, akwar fa pamara Yesu nga ndaw akwar fara fara daa ba. ⁶ Asaya, ya wufey na, ka sørmara fara fara, ala fa pamara Yesu nga ndaw ala fara fara ta fa cek masa ala ma kamara. ⁷ Ya døram danjay a Gazlavay amba cek masa maaya ba na, ka kamara ba sølak. Ya wufam nga pamara ray ala nga ndøhay ma ka cek ta cøved e na, daa ba. Kwa da akwar fa sørmara cek hay masa ma wuzda ala ndøhay meslørey nga Yesu ba na, ya wufam amba ka kam cek masa maaya ngada ndøhay cønga. ⁸ Anda kefe, ya køfam vaw na, amba mey masa fara fara a daw fa mey fa mey gway. Mey masa fara fara ha na, ya wufam nga nøsmara ba. ⁹ Ahaw, da akwar ta gødan daa cøved nga Gazlavay na, kwa anja gødan ala pøreh na, ya daa sømam cønga. Anda kefe, ala fa dørmardanjay a Gazlavay amba a jønkwar nga daw fa mey fa mey daa cøved anga. ¹⁰ Mølma adaw hay, ka sørmara yah ma wuzlalakwara mey hay masa daa leeter kefe teesed na, maja me daw? Ara maja ta pas masa yah ma da wusey fa akwar na, maaya na, ndøhay tabiya ta mbøddamara menjey ata cay. Anda kefe, ya fa da kakwar mey ta key na, daa saba. Fara fara, Gazlavay ta vølya gødan la nga kakwar mey, amba ka diyam fa mey fa mey daa cøved anga, ama ta vølya gødan amba ya nøskwar na, daa ba sølak.

Mey nga madagway-dakw

¹¹ Mølma adaw hay, wure kefe mey adaw daa saba. Njam daa meesømey. Maaya na, ka diyam fa mey fa mey daa cøved nga Gazlavay, ka vølmatar gødan a ndøhay mekele da wuzlah akwar, ka cømam fay, ka njam daa zazay. Anda kefe, Gazlavay ndaw ma wufa ndaw, ndaw ma njadata ndøhay daa zazay, a nøkfakwar dey la may.

13:4 13.4 12.9-10; 1Kwr 1.25; Føl 2.7-8 **13:10** 13.10 13.2; 10.8; 1Kwr 4.21
13:11 13.11 Jan 14.27; Rm 15.33; 1Kwr 7.15; Ef 6.23; Føl 4.9; 1Tes 5.23; 2Tes 3.16; Heb 13.20; 1Pi 5.14

¹² Cam har da wuzlah akwar cɛpa pal pal, anda akwar mɛlmanɛ hay. Yaw, ndɛhay ma tɛba mey nga Yesu cɛpa fedɛ a camakwar har may.

¹³ Anja maaya nga Bay alɛkwa Mahura Yesu *Kɛriste nga njeɣ ta akwar, anja mewudɛy-vaw nga Gazlavay nga njeɣ ta akwar, asaya, anja *Mesɛfney nga Gazlavay nga cɛmkwar ray tabiya.

Leeter masa Pawl ma wuzlalatara a Galat hay Mey da ray leeter ngada Galat hay

Leeter e keɗe na, ara Pawl ma wuzlalatara ngada ndəhay daa mecəmey-ray nga Yesu daa hwayak nga Galati fa dəba masawa anɗa fa ata (SNM 16.6; 18.23). Daa leeter keɗe na, Pawl a ləvey: «Cek mahura na, ara mepey Yesu Kəriste nga ndaw fara fara ta mewuɗey ndəhay mekele.» (5.6)

Da wuzlah ndəhay nga Yesu da Galati na, Jəwif hay daha, Jəwif hay ba hay daha may. Jəwif hay siya a ləvam si ndəhay Jəwif hay ba hay a təbmara mewey hay tabiya nga Jəwif hay, si a slam mandawal anda Jəwif hay amba a təram ndəhay nga Yesu. Pawl a ləvey, mey ata ha nɗene, ara mey nga Gazlavay ba, maja ndaw a gwa nga tərey ndaw maaya fa mey nga Gazlavay ta fa cek masa anɗa ma ka ba, ama si ta fa mepey Yesu nga ndaw fara fara gway. (2.15-21)

Daa fasəlawal 5 haa 6, Pawl a ləvey si ndəhay nga Yesu a njam maaya maaya, a jənam vaw da wuzlah ata maja mewuɗey-vaw nga Kəriste. Gazlavay ta vəlndakwar Mesəfney anɗa la nga jəndakwar nga njeɗ maaya kəne may.

Daa leeter e keɗe na, mey mekele mekele daha nga vəley gədaŋ a ndəhay:

Kwakwas nga Mawiz a gwa nga tərda ndaw maaya fa mey nga Gazlavay ba, ama ara Yesu ma tərda ndaw maaya fa mey nga Gazlavay (3.10-14)

Mey da ray cek hay maaya ma sawa ta fa Mesəfney nga Gazlavay (5.22-23)

Mecey-har

¹ Ara yah, Pawl, ma wuzlalakwara leeter keɗe. Yah *ndaw-meslərey nga *Yesu *Kəriste. Ara ndaw ma walaya nga key ndaw-meslərey a ba, asaya, ara ndəhay ma slərdamiwa ba. Ma pamaya nga ndaw-meslərey na, ara Yesu Kəriste he ta ray anɗa leŋ *Gazlavay Papan ma sləkdadərwa Yesu a daa meməcey.

² Ala macəmtakaya ta məlma aləkwa hay siya feɗe, ya camakwar har, akwar ndəhay daa mecəmey-ray hay nga Yesu daa hwayak nga Galati.

³ Anja Papa aləkwa, Bay Gazlavay, ta Bay aləkwa Mahura Yesu Kəriste n̄ga pəsmakwar mey, asaya, n̄ga njadamakwar daa zazay. ⁴ Kəriste ta vəlda ray an̄ga la maja mebərey aləkwa, amba a ləhdandakwar da bəla masa maaya ba kefe. Kəriste he ma ka anda kefe na, a key a nar ray a mey masa Gazlavay Papa aləkwa ma wufey. ⁵ Anja ndəhay n̄ga həlmamara Gazlavay n̄ga sərmataw. *Amen.

Mey da ray Mey-maaya-mawiya

⁶ Gazlavay ma zəlkwar amba ka səpmara na, menjey a ga daa ba. A zəlkwar na, maja aa ma sərey dey-ceceh fa akwar ta fa mewufey-vaw n̄ga *Kəriste. Wure kefe, akwar fa mbəkdamara Gazlavay a, akwar fa təb̄am *Mey-maaya-mawiya mekele. Ya fa rəzley ga da ray akwar maja. ⁷ Fara fara Mey-maaya-mawiya mekele na, daa ba. Ama ndəhay mekele daha fa həb̄makwar ray. A wufam n̄ga nəsmara Mey-maaya-mawiya n̄ga Kəriste. ⁸ Ala ta wuzdamakwara Mey-maaya-mawiya ha la. Anda kefe, da ndaw mekele, kwa ala, kwa maslan̄ n̄ga Gazlavay da vad, a wuzkwar Mey-maaya-mawiya mekele wal na, anja Gazlavay n̄ga nəsa.

⁹ Ala ta kadamakwara la, ama ya kadakwara wure kefe saya. Da ndaw a wuzkwar Mey-maaya-mawiya mekele wal ta masa akwar ma təb̄mara kefe na, anja Gazlavay n̄ga nəsa ndaw aha.

¹⁰ Yaw, wure kefe ka wulkam na, ya fa səpey amba ndəhay aa həmdamaya daw? Kay, kəne ba! Ya səpey na, amba Gazlavay aa həmdaya. Asaya, ka wulkam ya fa səpey amba ya mbafatar a ndəhay daw? Kay, kəne ba, maja da ya fa səpey amba ya mbafatar a ndəhay cən̄ga na, anja n̄gene, ya fa da key ndaw ma ka sləra n̄ga Kəriste daa ba.

Pawl a tərey ndaw-meslərey n̄ga Yesu na, kwara?

¹¹ Məlma adaw hay, ya wufey ka sərmara *Mey-maaya-mawiya masa yah ma wuzdakwara na, ara mewulkey n̄ga ndəhay ba. ¹² Mey a na, ara ndaw ma kadiwa ba, ara ndaw maa sərkadiwa ba, ama ara Yesu *Kəriste ma wuzdiwa mey a.

¹³ Akwar ta cəndamara mey da ray menjey adaw zleezle la, daa masa ya fa səpey kwakwas n̄ga *Jəwif hay. Daa n̄gene, ya ta sərd̄ata banay la ga kalah ta ndəhay daa mecəmey-ray hay n̄ga Yesu. Ya ta wufey la n̄gaa zəf̄data cəpa. ¹⁴ Ya ta nar ray la a kwakwas n̄ga Jəwif hay ma fənta Jəwif hay mekele masa mandala adaw hay. Ya ta vəlda

1:4 1.4 2.20; Mt 20.28; Jan 1.29; 2Kwr 5.21; Ef 5.2; 1Tm 2.6; Tit 2.14; Heb 9.12-14, 26; 1Jj 5.19 **1:6** 1.6 Heb 12.15 **1:7** 1.7 5.8, 10; 2.4; SNM 15.1, 24 **1:8** 1.8-9 1Kwr 16.22 **1:10** 1.10 1Tes 2.4-6 **1:11** 1.11-12 1.1 **1:13** 1.13-14 SNM 8.3; 9.1; Fəl 3.5-6; 1Kwr 15.9

mevel adaw la cəpa a kwakwas nga papan nga papa ala hay zleezle.

¹⁵ Ama Gazlavay ta sərfaya dey-ceceh la, ta walaya sem dəga ya ta yawa daa ba aran, ta zəlya la amba ya tərey ndaw ma ka sləra anğa maja a mbafar. ¹⁶ Gazlavay ta wuryawa dey la, ta wuzdiwa Bəzey anğa la amba ya wuzdatara Mey-maaya-mawiya da ray a, a ndəhay masa Jəwif hay ba hay. Daa ngene, kwa ya taa cəfdəy ndaw nga slaya yawa daa ba. ¹⁷ Asaya, ya ta daw a *Jeruzelem nga jəkey sləmay fa ndəhay meslərey nga Yesu masa ngeeme daa ba may. Ama wure wure ngene, ya ta daw la aa hwayak nga Arap hay. Fa dəba ha, ta', ya vəhwa aa berney nga Damas.

¹⁸ Fa dəba ha, mevey maakar na, ya ta daw la aa berney nga Jeruzelem amba ya camawa ray ta *Piyer, ya sərmawa vaw. Ya njamawa cew e luma cew gway. ¹⁹ Fetede, ya ta hətəy *ndaw-meslərey mekele daa ba, si *Jak, məlman nga Bay aləkwa Mahura gway. ²⁰ Mey masa yah ma wuzlalakwara kedə na, ara mey fara fara. Gazlavay a səra a key ya mbərzley ba. ²¹ Fa dəba ha, ta', ya daw aa hwayak nga Siri ta nga Silisi. ²² Maja ngene, ndəhay daa mecəmey-ray hay nga ndəhay nga Kəriste daa hwayak nga *Jude ta hətəmaya ta dey ata daa ba. ²³ Ama ata fa cənam mey masa ndəhay mekele maa guzlam da ray adaw ma ləvam: «Ndaw ma sərdandakwar banay zleezle heyey na, wure kedə fa wuzda Mey-maaya-mawiya masa aa ma wudəy nga nəsa heyey.» ²⁴ Ta', ndəhay a, a həlmamara Gazlavay maja yah.

2

Ndəhay meslərey nga Yesu a təbmara Pawl

¹ Fa dəba ha, mevey kuraw a ray a məfad, ta', ya diyam ta *Barnabas a *Jeruzelem saya. Ya ta nğəla Tit la may. ² Yah ma daw a Jeruzelem e na, maja Gazlavay ma ləvya, maaya na, ya daw. Fetede, ala ta gucam la ta cakay ta *bay-ray hay nga ndəhay ma təba mey nga Yesu. Ya ta kadatare mey da ray *Mey-maaya-mawiya masa yah ma wuzdatara a ndəhay masa *Jəwif hay ba la, maja ya wudəy sləra adaw masa yah ma ka ta masa ya fa ka wure kedə a tərey nga cek nga tede ba. ³ Tit masa ma ləgdaya na, ara ndaw Gərek. Ama kwa ta təkmar dəy nga sley mandawal anda Jəwif hay na, daa ba. ⁴ Ama ndəhay ma təbmara mey nga Yesu fara fara ba ta samawa la a wuzlah ala, a wudam nga təkmar dəy a Tit e

1:15 1.15-16 Jer 1.5; SNM 9.3-5; 22.21; Rm 1.5; 1Kwr 9.1; 15.10 **1:18** 1.18
SNM 9.26-28 **1:19** 1.19 Mt 13.55 **1:21** 1.21 SNM 9.30 **2:1** 2.1-2 1Kwr
15.2; Fəl 2.16; Barnabas: SNM 4.36; Tit: 2Kwr 2.13 **2:1** 2.1-10 SNM 15.1-19
2:2 2.2 2.6, 9

nga sley mandawal. Ndohay a, a samawa a wuzlah ala na, ta mayal a, amba a sanġalamandar da ala fa wam ray ala maja ala macəmkaya ta Yesu *Kəriste kwa. A wudam nga tərdamandar beke hay nga kwakwas nga Jəwif hay cəngə.

⁵ Ala ta təbmatara mey ata kwa nga menjey nekədfey daa ba sələk. Mey-maaya-mawiya masa fara fara keđe na, ya wudam a nəsmara ba, amba a njeý nga mey masa fara fara ngada akwar.

⁶ Daa masa ya fa kadatara mey da ray Mey-maaya-mawiya masa yah ma wuzdatara a ndohay na, bay-ray hay heyey masa ata ma zəlmata mahura hay ta pam mey mekele a ray Mey-maaya-mawiya ha daa ba. Yaw, da ata mahura hay, da ata mahura hay ba, ngada yah na, ara cek nga tede, maja fa mey nga Gazlavay na, ndohay tabiya ata letək.

⁷ Ama sasəkar jak, a sərmara Gazlavay ta vəlyə sləra la nga wuzey Mey-maaya-mawiya anda aa ma vəldara ngada *Piyer. Ngada yah na, a ləvyə nga wuzey Mey-maaya-mawiya a ndohay masa Jəwif hay ba hay, ngada Piyer may, a ləvar nga wuzey Mey-maaya-mawiya a ndohay Jəwif hay.

⁸ Yaw, ara Gazlavay ma vəlar gədaŋ a Piyer nga tərey *ndaw-meslərey nga Yesu ngada fa Jəwif hay. Ara Gazlavay a ma vəlyə gədaŋ nga tərey ndaw-meslərey nga Yesu ngada fa ndohay Jəwif hay ba hay may. ⁹ Ata *Jak ta Piyer leŋ *Jaŋ masa ndohay ma təba mey nga Yesu ma zəlmata bay-ray ata hay na, a sərmara Gazlavay ta vəldiwa sləra keđe la fara fara nga key maja maaya anġa. Maja nġene, a gagazamandar har ngada ala ta Barnabas, anda meləvey, mey ala ta ata letək. Ala ta wulkam la daa slam a ta ata amba ala ta Barnabas ya diyam nga wuzdamatara Mey-maaya-mawiya a ndohay masa Jəwif hay ba hay. Ata may, a diyam a wuzdamatara ngada ndohay Jəwif hay. ¹⁰ Aa cəfdamandar na, cek pal gway. Ara nga jəney masa-viya hay daa *mecəmey-ray nga ndohay nga Yesu da Jeruzelem. Ara cek masa yah ma ka ta mevel adaw cəpa.

Mey da ray ata Piyer ta Pawl daa berney nga Antiyaws

¹¹ Fa dəba ha, *Piyer a sawa aa berney nga Antiyaws daa hwayak nga Siri. Ya ta mbədar ray la maja aa ma key cek maaya ba. ¹² Yaw, daa masa Piyer ma wuswa a Antiyaws na, aa fa zəmey daf ta ndohay masa *Jəwif hay ba hay. Ama fa dəba ha, ndohay Jəwif hay masa da cakay *Jak ma wusmawa na, Piyer a mbəkda mezəmey daf ta ndohay Jəwif hay ba ha, a nġəchey ta cakay. A ka anda keđe na, maja a zlurey ta Jəwif hay ma ləvam si ndohay masa Jəwif

hay ba tabiya a slam mandawal. ¹³ Anda keđe, Piyer na, ara ndaw masa ta neneh cew. Ndəhay Jəwif hay mekele ma təba mey nga Yesu ta təram ndəhay masa ta neneh cew la anda Piyer e may. Kwa *Barnabas ta ray anğa ta tərey ndaw masa ta neneh cew sem anda ata may. ¹⁴ Daa masa yah ma hətatar ata fa nəsmara *Mey-maaya-mawiya masa fara fara daa menjey ata nğene na, ta', yaa guzlar nğada Piyer fa mey nga ndəhay tabiya: «Kah ndaw Jəwif, ama ka ta səpa kwakwas nga ndəhay Jəwif hay na, daa ba. Ka ta key cek la anda ndəhay masa Jəwif hay ba ma kamara. Anda keđe, ka ləvtar a ndəhay masa Jəwif hay ba nga səpey kwakwas nga Jəwif hay na, maja me?»

Ndaw a tərey maaya fa mey nga Gazlavay na, kwara?

¹⁵ Ala na, *Jəwif hay fara fara ma yey ta yey. Ala na, wal ta ndəhay daa səkway hay mekele. Ndəhay a na, fa səpmara *kwakwas nga Mawiz daa ba, ata ndəhay ta mebərey. ¹⁶ Ama ya sərmara ndaw aa maaya fa mey nga Gazlavay maja aa fa səpa kwakwas nga Mawiz na, kəne ba, si aa fa pa Yesu nga ndaw anğa fara fara. Ala may, ya ta pamara Yesu *Kəriste he la nga ndaw ala fara fara amba ya təram ndəhay maaya fa mey nga Gazlavay. Ala maaya fa mey nga Gazlavay na, maja ala fa səpmara kwakwas nga Mawiz daa ba, ama maja ala fa təbmara mey nga Kəriste. Mesəpey kwakwas nga Mawiz na, a tərda ndaw maaya fa mey nga Gazlavay ba səlak.

¹⁷ Ala Jəwif hay ma təbmara mey nga Yesu na, ala fa pamara Kəriste nga ndaw ala fara fara amba ya təram ndəhay maaya fa mey nga Gazlavay. Daa masa ala fa pamara Kəriste nga ndaw ala fara fara na, a padamandar nga ndəhay ta mebərey maja ala fa səpmara kwakwas nga Mawiz daa saba. Da anda keđe na, Kəriste fa mbəzdandar aa mebərey daw? Kay, kəne ba səlak. ¹⁸ Da ndaw a mbəkda meney ray a kwakwas nga Mawiz maja a səra fa da jəna daa ba, ama fa dəba ha, a vəhwa nga nar ray cəngəna na, anda keđe, ndaw aha ta key mebərey sem. ¹⁹ Daa mesəpey kwakwas nga Mawiz na, ya ta tərey la anda ndaw maməckaya. Anda meləvey, kwakwas nga Mawiz na, ara cek nga tede nğada yah. Ara kwakwas a ma tərdaya anda ndaw maməckaya amba ya njey ta dey nga kar sləra nğada Gazlavay. Daa masa ata ma dərmara Kəriste fa hwadam mazlanğalakaya nga məcey na, ara anda a dəram na, yah, nga məcey may. ²⁰ Anda meləvey, menjey adaw masa anda zleezle na, daa saba, ama wure keđe Kəriste aa ta yah. Maja

2:12 2.12 SNM 11.3 **2:16** 2.16 3.10-12; Rm 3.20-30 **2:17** 2.17 Rm 2.17-3.20

2:19 2.19 6.14; Rm 7.6; 6.2-4

ngene, cek hay tabiya masa yah ma kata daa masa yah ta dey da bēla kede na, ya kata ta meney ray a Bəzey nga Gazlavay. A wudya kalah, a vōlda heter anğa nga mōcey maja yah. ²¹ Gazlavay a pandakwar nga ndəhay maaya fa mey anğa na, ara maja aləkwa fa səpkwa kwakwas nga Mawiz ba, ama ara maja dey-ceceh anğa gway. Ya fa da rəsa maaya nga Gazlavay a kede daa ba. Da ndaw a gwa nga tōrey maaya fa mey nga Gazlavay maja aa fa səpa kwakwas nga Mawiz na, anja nğene na, memōcey nga Kəriste ara cek nga tede.

3

Gazlavay a da ləhda ndaw na, kwara?

¹ Akwar Galat hay na, manjar lenğesl. Ta wuzdamakwara mey da ray memōcey nga Yesu *Kəriste fa hwadam mazlanğalakaya la maaya maaya fa mey akwar tabiya, ba diya? Kaa ma batakwara na, wa? ² Ya wudey nğaa cəfdakwar mey pal. Gazlavay ta vəlkwara Mesəfney anğa la. A vōldakwara na, maja akwar ma səpmara *kwakwas nga Mawiz daw? Kay, kəne ba. Aa ma vōldakwara na, maja akwar ma jəkam sləmay fa *Mey-maaya-mawiya, asaya, maja akwar ma təbmara mey a, aa mevel akwar. ³ Daa masa akwar ma zlamar nga səpey cəved nga Yesu, ka səpmara na, ta gədan nga *Mesəfney nga Gazlavay, ba diya? Kaa wure kede, ka mbəkdamara Mesəfney nga Gazlavay a, ka kam sləra ta gədan akwar daada na, maja me? Akwar ndəhay manjar lenğesl anda kede na, kwara? ⁴ Akwar ta səram banay la ga amba ka təbmara mey nga Yesu. Mesərey banay akwar a nğene na, ara cek nga tede daw? Anja nga tōrey nga cek nga tede ba. ⁵ Yaw, Gazlavay a vəlkwara Mesəfney anğa na, maja akwar ma səpmara kwakwas nga Mawiz daw? Kay, kəne ba. Gazlavay a key maazla hay da wuzlah akwar na, maja akwar ma səpmara kwakwas nga Mawiz daw? Kay, kəne ba. Ama Gazlavay a vəlkwara Mesəfney anğa, a key maazla hay da wuzlah akwar na, maja akwar ma jəkam sləmay fa Mey-maaya-mawiya ta akwar ma təbmara mey a, aa mevel akwar.

⁶ Wulkam da ray *Abəraham taw, mawuzlalakaya daa derewel nga Gazlavay, a ləvey: «Abəraham a pa Gazlavay nga ndaw anğa fara fara. Ara maja nğene, Gazlavay ma pa nga ndaw maaya.» ⁷ Anda kede na, səpmara, ndəhay ma pamara Gazlavay nga ndaw ata fara fara na, ara bəza hay

nga Abərahām fara fara. ⁸ Mawuzlalakaya daa d̄erewel nga Gazlavay zleezle da ray cek ma da key, a ləvey Gazlavay a tərdata ndəhay masa *Jəwif hay ba nga ndəhay maaya fa mey anğa. A ka anda kedē na, maja ata ma pamara Gazlavay a nga ndaw ata fara fara. Mey maaya kedē na, Gazlavay taa guzdara la d̄əga zleezle a Abərahām, a ləvar: «Ndəhay daa səkway hay tabiya a hətam mepəsey-mey adaw la ta fa kah.» ⁹ Abərahām ta pa Gazlavay la nga ndaw anğa fara fara, maja n̄gene, Gazlavay ta pəsar mey la. Yaw, ndəhay tabiya masa ma pamara Gazlavay nga ndaw ata fara fara na, Gazlavay ta pəstar mey la may anda Abərahām a.

¹⁰ Ndəhay tabiya ma wulkam ata maaya fa mey nga Gazlavay maja ata fa səpmara kwakwas nga Mawiz na, Gazlavay a nəsta la. Ara anda mawuzlalakaya daa d̄erewel nga Gazlavay ma ləvey: «Kwa waawa ma səpa kwakwas nga Mawiz tabiya masa mawuzlalakaya daa d̄erewel nga Gazlavay mandaw mandaw ba na, Gazlavay a nəsa la.»

¹¹ Fara fara, ndaw fa da t̄orey maaya fa mey nga Gazlavay maja anğa fa səpa kwakwas nga Mawiz na, daa ba. Yaa guzley anda kedē na, maja mey nga Gazlavay a ləvey: «Ndaw masa maaya fa mey nga Gazlavay na, ara ndaw ma pa Gazlavay nga ndaw anğa fara fara. Anda kedē, a hətəy heter mendəvey ba la.» ¹² Ama mawuzlalakaya saya daa d̄erewel nga Gazlavay, a ləvey: «Kwa waawa ma səpa kwakwas nga Mawiz mandaw mandaw, ma rəsa ba səlak na, a hətəy heter la.» Mey a, a wudəy nga ləvey, mesəpey kwakwas nga Mawiz na, ara cek wal ta mepey Gazlavay nga ndaw fara fara.

¹³ Yaw, Gazlavay ta nəsndakwar sem maja aləkwa fa səpkwa kwakwas nga Mawiz ta cəved e daa ba. Ama Kərīste ta sawa la a bəla, ta la menəsey aləkwa sem a ray anğa amba a ləhdandakwar daa menəsey a. Ara anda mawuzlalakaya daa d̄erewel nga Gazlavay, ma ləvey: «Ndaw masa ata ma ləwmara fa hwadam * na, Gazlavay ta nəsa sem.» ¹⁴ Yesu Kərīste a ka cek aha anda kedē na, amba Gazlavay a pəstar mey a ndəhay masa Jəwif hay ba, letək anda Gazlavay ma pəsar mey a Abərahām heyey. Asaya, kwa waawa ma pa Kərīste nga ndaw anğa fara fara na, a

3:7 3.7 Rm 4.11-12 **3:8** 3.8 MC 12.3 **3:9** 3.9 Rm 4.16 **3:10** 3.10 Mew 27.26; Jak 2.10 **3:11** 3.11 Hab 2.4; Rm 1.17; 3.20 **3:12** 3.12 Lev 18.5; Rm

10.5 * **3:13** 3.13 ma ləwmara fa hwadam: Mawuzlalakaya daa Mew 21.22-23, a ləvey, da masa a kədam ndaw vagay maja aa ma key cek maaya ba na, a ləwmara vagay a fa hwadam nga par hwaray. Pawl a wudəy nga ləvey na, meməsey nga Yesu fa hwadam mazlanjalakaya na, aa kəne. **3:13** 3.13 Mew 21.23; Rm 8.3; 2Kwr 5.21

høtey Mesəfney nga Gazlavay la masa aa ma lövey zleezle a da vøldatara a ndəhay anğa hay heyey.

Kwakwas nga Mawiz na, a gwa ngaa vəsa mey masa Gazlavay ma jəwa daw?

¹⁵ Məlma adaw hay, ya wudəy ya wakwara mey masa Gazlavay ma jəwa ta cek ma key mandaw mandaw daa menjey aləkwa. Yaw, da ndəhay cew, a jəwam mey ta cəved e fa mey nga ndəhay na, kwa ndaw a gwa ngaa vəsa mey a ba, kwa ndaw a gwa nga pey a dey a ba.

¹⁶ Fara fara, Gazlavay ta ləvar la a *Abərahā a da pəsar mey ngada anğa ta ngada bəzey ma da yawa da hwad anğa. Mawuzlalakaya daa dərəwel nga Gazlavay, ta lövey ngada bəza hay ma da yamawa da hwad anğa cəpa na, daa ba. Anda melövey, ndəhay ga ba. Ama aa guzley na, da ray bəzey da hwad anğa pal letek gway, anda melövey *Kərīste. ¹⁷ Ehe, mabara nga mey masa yah ma wudəy ngaa guzldakwara ha: Gazlavay ta jəwey mey la ta Abərahā, asaya, ta ka la amba mey ata majəwkaya ha a pəskey ba. Fa dəba ha, mevey temere məfad ta kwakwar maakar na, Gazlavay a wuztar *mewey anğa a *Jəwif hay amba a səpmara. Mewey a, fa da pəska *mejəwey-mey nga ata Gazlavay ta Abərahā daa ba, fa da nəsa mejəwey-mey a daa ba may. ¹⁸ Yaw, da Gazlavay a pəskwar mey la maja akwar ma səpmara *kwakwas nga Mawiz na, anja ngene ara mepəsey-mey masa anğa melövey heyey saba. Ama a da pəskwar mey na, maja anğa ma lövey a pəskwar mey la. Anda keđe, Gazlavay a kar maaya a Abərahā † na, maja aa ma lövey a kara la.

¹⁹ Da anda keđe na, Gazlavay a wuzdatara mewey a, a Jəwif hay na, maja me? Gazlavay a wuzdatara mewey a na, amba ndəhay a səpmara cek maaya ba masa ata ma kamara. Gazlavay a wuzdatara mewey a na, nga njey nekədey haa kasl masawa nga bəzey da hwad Abərahā heyey. Ara bəzey masa Gazlavay ma ləvar a Abərahā a da pəsar mey heyey. Gazlavay ta wuzdərwa kwakwas a la ta fa maslan anğa hay da vad. Maslan anğa hay a ta wuzdamərwa la ta fa ndaw ma cəmtar dəy a ndəhay ta Gazlavay ‡. ²⁰ Ndaw ma cəma dəy na, a dīyey mey da wuzlah ndəhay cew. Ama daa masa Gazlavay ma jəwey mey ta Abərahā na, ara

3:14 3.14 3.2-5; Jwl 3.1-2 **3:16** 3.16 MC 12.7; 17.7-8 **3:17** 3.17 Mab 12.40
 † **3:18** 3.18 Gazlavay a kar maaya a Abərahā: Nəka Galat hay 3.14ta SNM 2.17, Gazlavay a lövey: «Ya vøltar Mesəfney adaw la a ndəhay tabiya.» **3:18**
 3.18 Rm 4.14; 11.6 ‡ **3:19** 3.19 Ndaw ma cəmtar dəy a ndəhay ta Gazlavay fefe na, ara Mawiz. **3:19** 3.19 Rm 4.15; maslan nga Gazlavay da vad: SNM 7.38, 53; Heb 2.2

anğa pal taava anğa ma ka gway, ndaw ma cəmtar dəy na, daa ba.

Kwakwas nğa Mawiz a jənta ndəhay na, kwara?

²¹ *Kwakwas nğa Mawiz na, aa guzley wal ta mey daa *mejəwey-mey nğa Gazlavay daw? Kay, kəne ba! Da fara fara kwakwas nğa Mawiz a vəltar heter mawiya a ndəhay na, anja Gazlavay a pata ndəhay nğa ndəhay maaya fa mey anğa la ta fa kwakwas a may. ²² Ama mawuzlalakaya daa dərəwel nğa Gazlavay na, ndəhay tabiya da bəla, mebərey fa wey da ray ata. Ara anda keđe amba Gazlavay a vəldatara cek masa aa ma ləvey a da vəldatara a ndəhay ma təbmara mey nğa Yesu *Kəriste. A vəldatara na, maja ata fa pamara Yesu nğa ndaw ata fara fara.

²³ Zleezle daa masa ala ndəhay *Jəwif hay ma təbmara mey nğa Kəriste daa ba arañ na, kwakwas nğa Mawiz ta jəfndar la anda ndəhay daa fərsəne haa kasl Gazlavay ma wuzdandara cəved nğa təbey mey nğa Kəriste. ²⁴ Ara anda keđe, kwakwas nğa Mawiz ma jəfndar haa kasl masawa nğa Kəriste a bəla. A sawa na, amba ya təram ndəhay maaya fa mey nğa Gazlavay, maja ala ma pamara Kəriste he nğa ndaw ala fara fara. ²⁵ Wure keđe na, ala fa təbmara mey nğa Kəriste, kwakwas nğa Mawiz fa da jəfndar daa saba.

²⁶ Akwar tabiya bəza hay nğa Gazlavay maja akwar fa təbmara mey nğa Yesu Kəriste, anda meləvey, akwar macəmkaya ta Yesu Kəriste. ²⁷ Akwar ta hətam *baptem la, maja ngene, akwar macəmkaya ta Kəriste. Wure keđe, akwar ta təram sem anda Kəriste he ta ray anğa. ²⁸ Wure keđe, ndəhay Jəwif hay ta ndəhay Jəwif hay ba na, ata letək fa mey nğa Gazlavay. Kwa beke hay ta ndəhay ma wam ray ata, kwa zel hay ta nğusay, ata letək fa mey nğa Gazlavay. Anda meləvey, akwar tabiya, akwar letək fa mey nğa Gazlavay maja akwar macəmkaya ta Yesu Kəriste. ²⁹ Yaw, da akwar ndəhay nğa Kəriste na, anda keđe, akwar bəza hay ma yamawa da hwaď *Abəraham may. Maja ngene, Gazlavay a da pəskwar mey anda aa ma ləvey a da pəsar mey nğada Abəraham ta nğada bəza hay da hwaď anğa heyey.

4

Gazlavay a pata ndəhay nğa bəz anğa hay na, kwara?

3:20 3.20 Mew 6.4 **3:21** 3.21 Rm 7.13; 8.2 **3:22** 3.22 Rm 3.9-30; 11.32
3:23 3.23 4.3 **3:24** 3.24-25 Rm 10.4 **3:26** 3.26 4.5, 7; Janj 1.12; Rm 8.14-17
3:27 3.27 Rm 6.3; Ef 4.24 **3:27** 3.27-28 Rm 10.12; 1Kwr 12.13; Kwa 3.9-11
3:29 3.29 3.7, 14, 18; 4.7

¹ Ehe, ya wudey ngaa guzlkwar saya: wulkam da ray bəzey ma da wa zleley nga papaha taw. Daa masa anɗa bəzey daɗay na, kwa zleley tabiya masa mapakaya ngada anɗa na, a gwa a wa ba aran, anɗa anda beke. ² Daa ngene, ndəhay a nəkfamar dey, asaya, a nəkfamar dey fa cek anɗa hay may. A nəkfamar dey na, haa kasl pas masa papaha ma ləvey bəzey a ta gəley cay. ³ Aləkwa na, anda bəzey a may. Daa masa aləkwa ma sərkwā cek masa Gazlavay ma wudey fara fara daa ba aran na, aləkwa beke hay nga cek hay mekele mekele masa ndəhay ma namatar ray da bəla kefe.

⁴ Ama daa masa Gazlavay ma wusdərwa dər a cay na, ta', a slərdərwa bəzey anɗa a bəla. Bəzey a, a tərey nga ndaw-magədan, a yawa da hwaɗ ngwas. Ta səpa *kwakwas nga Mawiz la. ⁵ Gazlavay a ka anda kefe na, amba bəzey anɗa ha a ləhdata ndəhay ma səpmara kwakwas nga Mawiz a, asaya, amba Gazlavay a, a tərđandakwar nga bəz anɗa hay.

⁶ Ahaw, akwar na, bəz anɗa hay fara fara. Ya sərkwā maja Gazlavay ta slərwa Mesəfney nga Bəzey anɗa la a ray aləkwa tabiya. Ara Mesəfney a, ma mbəzey aa aləkwa amba ya zəlkwa Gazlavay «Aba,» anda meləvey, Papay.

⁷ Yaw, maja cek hay tabiya masa Gazlavay ma kakwara kefe na, akwar beke hay saba, ama akwar bəza hay nga Gazlavay. Asaya, maja akwar bəza hay nga Gazlavay na, Gazlavay a da vəkwar cek hay maaya tabiya masa aa ma dīytara ngada bəz anɗa hay.

Menjey nga Galat hay a həbar ray a Pawl

⁸ Zleezle, daa masa akwar ma səpmara mey fara fara da ray Gazlavay daa ba aran na, akwar beke hay, akwar fa nam ray ngada mesəfney hay ma samawa ta fa Gazlavay ba. ⁹ Ama wure kefe, ka səpmara mey fara fara da ray Gazlavay, ngama ya ləvey, Gazlavay a sərkwā fara fara. Kaa, ka vəham nga səpey mesəfney hay a, kwara dəba wura? Ara cek hay masa-bəle, a gwamara nga jənmakwar ba. Ka wudam nga tərey beke ata hay saya na, maja me?

¹⁰ Akwar fa walam dər hay mekele ma fənta siya hay, asaya, akwar fa walam kiya hay, ta gwagway hay lej mevey hay ma fənta siya hay nga key kwakwas. ¹¹ Ray adaw fa həbey fa menjey akwar, maja sləra adaw masa yah ma ka da wuzlah akwar a da tərey nga cek nga tede kwa.

¹² Məlma adaw hay, ya fa kakwar ambahw, təram anda yah, beke nga *kwakwas nga Mawiz saba, maja ya ta tərey

la anda akwar ndəhay masa *Jəwif hay ba hay. Zleezle na, akwar ta kamaya cek maaya ba daa ba. ¹³ Akwar fa sərfadamara yah ma wuzdakwara *Mey-maaya-mawiya ngeeme na, maja vaw fa caya. ¹⁴ Daa ngene, macay adaw a, ta sərdakwar banay la. Ama kwa akwar ta rəsmaya daa ba, akwar ta bəldamaya mey daa ba. Sasəkar jak, akwar ta təbmaya la anda yah na, *maslan nga Gazlavay da vad, da daa ba, anda yah na, Yesu *Kəriste. ¹⁵ Daa ngene, akwar ta meesəmey ga, ama wure keɗe, kaa səmam saba na, kwara? Ya sərə fara fara daa ngene anja da ka gwamara na, akwar ta wuzlkamatərwa dey akwar hay la nɗada yah. ¹⁶ Kaa wure keɗe, ya ta tərey masa-gəra akwar sem maja ya faa guzlkwar mey fara fara daw?

¹⁷ Ndəhay ma wudam amba ka səpam kwakwas nga Mawiz heyey na, fa daɗamakar amba mewulkey akwar a tərey anda nga ata. Ama a kamara anda ngene na, nga nəskwar, ba na, nga dīykwār ba. A wudam ka wudkam ta yah, ka mbəkdamaya, ka təbam mewulkey ata. ¹⁸ Da ndəhay a cəmam dāy ta akwar nga key cek maaya na, ngene, ara cek maaya mandaw mandaw, kwa daa masa yah da wuzlah akwar, kwa daa masa yah da wuzlah akwar daa ba. ¹⁹ Akwar masa anda bəz adaw hay, ya fa sərey banay maja akwar saya. Mesərey banay adaw a na, anda hwaɗ ma car nɗada nɗwas ma da yey. Ya da sərey banay a haa kasl mewulkey akwar ma tərey anda nga Kəriste. ²⁰ Ya wudəy nga daw nga njeɗ ta akwar wure keɗe amba ya slakwar yawa. Fara fara, ray adaw fa həbey, maja ya sərə cek masa yah ma da kakwara ba.

Mey da ray bəza hay cew nga Abəraham

²¹ Akwar ndəhay ma wudam nga neɗ ray a *kwakwas nga Mawiz, ya wudəy nɗaa cəɗɗakwar: akwar ta cəndamara kwakwas nga Mawiz maa guzley na, daa ba daw? ²² Mawuzlalakaya daa dərəwel nga Gazlavay, a ləvey na, *Abəraham nɗa ta bəza hay cew. Bəzey lanɗar na, ara nɗwas beke mezəley Agar ma yarawa. Bəzey lanɗar may, ara nɗwas masa beke ba mezəley Sara ma yarawa. ²³ Bəzey ma yawa ta nɗwas beke na, a yawa ta fa mewulkey nga ndaw-magədaɗ. Ama bəzey ma yawa ta nɗwas masa beke ba na, a yawa maja Gazlavay ma ləvar a Abəraham a da vələr bəzey.

²⁴ Ya gwa ya wata nɗusay cew keɗe ta *mejəwey-mey hay cew masa Gazlavay ma jəwa ta ndəhay. Agar nɗwas beke

na, a wuzwa mejøwey-mey nga Gazlavay ta *Mawiz daa aŋgwa nga Sinay zleezle. Bøza hay masa Agar ma yatørw a tøram beke anda aŋga. ²⁵ Agar a na, mapakaya anda mejøwey-mey nga Gazlavay masa aa ma jøwa daa aŋgwa nga Sinay daa hwayak nga Arap hay heyey. Aa mapakaya saya anda berney nga *Jeruzelem wure kedfe, maja ndøhay daa berney a, ata beke nga kwakwas nga Mawiz. ²⁶ Ama Jeruzelem masa da gazlavay da vad na, aŋga anda Sara, ŋgwas masa beke ba. Ara aŋga mama aløkwa. ²⁷ Ara anda mawuzlalakaya daa ðerewel nga Gazlavay ma løvey: «Sesømey Jeruzelem, kah anda ŋgwas-dørlay masa ta yey bøzey daa ba.

Wudey ta meesømey, kah anda ŋgwas

masa hwad ta car nga mayawa bøzey daa ba,

Maja ŋgwas-dørlay masa zel e a wudfa saba na,

a da høtey bøza hay ga ma føna nga ŋgwas ta zel e.»

²⁸ Mølma adaw hay, akwar na, bøza hay nga Gazlavay anda *Izak, bøzey nga ŋgwas masa beke ba masa Gazlavay ma løvey zleezle a da vøldara a Abøraham heyey. ²⁹ Daa ŋgene, bøzey ma yawa ta fa mewulkey nga ndaw-magødan na, fa sərda banay ta bøzey masa ma yawa ta fa gødan nga *Mesøfney nga Gazlavay. Wure kedfe, ndøhay fa kamara køne may. ³⁰ Ama mawuzlalakaya daa ðerewel nga Gazlavay, a løvey na, kwara? A løvey na: «Bøla ŋgwas beke la ta bøzey aŋga. Bøzey nga ŋgwas masa beke ba na, a da zøma way nga papaha tabiya, ama bøzey nga ŋgwas beke na, kwa fa da zømey cek nga papaha daa ba sølak.» ³¹ Yaw, ŋgwas beke na, aløkwa bøz aŋga hay ba, ama aløkwa bøza hay nga ŋgwas masa beke ba ma yamawa ta gødan nga Mesøfney nga Gazlavay.

5

Nðøhay nga Yesu a da tøram beke nga kwakwas nga Mawiz saya na, kwara?

¹ *Køriste ta pøskandakurwa sem dasi har nga *kwakwas nga Mawiz amba ya wakwa ray aløkwa fara fara. Da ray ŋgene, kam gødan, wam ray akwar, ka da vølmar cøved a ndaw nga tørdakwar beke nga kwakwas nga Mawiz saba.

² Jøkfamaya slømay, yah Pawl, ya faa guzlkwar, da ka slam mandawal amba ka søpam kwakwas nga Mawiz saya na, ŋgene, cek masa Køriste ma ka ŋgada akwar na, ara cek nga tede. ³ Yaw, ya fa køtkwar saya, kwa waawa ma

təba ŋga sla mandawal na, si a səpa kwakwas ŋga Mawiz a tabiya, kwa a mbəkey kwakwas a pal ba. ⁴ Da akwar fa səpam ŋga terey maaya fa mey ŋga Gazlavay ta fa kwakwas ŋga Mawiz na, ŋgene, ka ta wudkam sem ta Kəriste. Maaya ŋga Gazlavay aa da ray akwar daa ba səlak. ⁵ Ala na, ya səmra Gazlavay a pandar ŋga ndəhay maaya la fa mey anŋa maja ala fa pamara Kəriste ŋga ndaw ala fara fara. Ta fa gədan ŋga *Mesəfney ŋga Gazlavay ala fa səkmara amba Gazlavay a pandar ŋga ndəhay maaya fa mey anŋa ha. ⁶ Yaw, ŋgada ndaw macəmkaya ta Yesu Kəriste na, ta sla mandawal la, kwa ta sla daa ba na, fa da mbəfey cek fa anŋa daa ba. Cek mahura na, ara mepey Yesu Kəriste ŋga ndaw fara fara ta mewufey ndəhay mekele.

⁷ Zleezle na, akwar fa kam gədan ŋga daw fa mey fa mey daa cəved ŋga Yesu. Kaa wure kefe, ma təkakwar ŋga səpa mey masa fara fara na, wa dəba wa? ⁸ Mey hay masa ndəhay maa guzdamara ŋga batakwar na, mey hay a, ara mey hay ŋga Gazlavay ba, maja ara Gazlavay a ma walakwar. ⁹ Mey hay maaya ba ŋgene a da zəvey fa mey fa mey, anda cek ma həsla hapa ŋga makala na, anŋa kuset kəfey, ama a həsla hapa ŋga makala madakaya cəpa. ¹⁰ Ta ŋgene he cəpa, ya səra mewulkey akwar na, fa da key wal ta ŋga yah daa ba, maja aləkwa tabiya macəmkaya ta Yesu Kəriste. Ndaw masa ma həbkwar ray na, kwa da ara waawa na, Gazlavay a kar sariya la.

¹¹ Məlma adaw hay, ndəhay fa mbərzlafamaya, a ləvam ya fa wuzey mey, ya ləvey si ndəhay a slam mandawal cəŋga. Kaa da anda kefe na, a sərdamaya banay maja me dəba me? Ndəhay fa sərdamaya banay cəŋga kefe na, a wuzwa fara fara yaa sərkadata ndəhay amba a ləham na, si ta fa meməcey ŋga Kəriste fa hwadam mazlanŋalakaya gway. ¹² Ndəhay ma həbmakwar ray da ray *mesley mandawal na, anja ŋga njam anda gənan hay maanŋwadatakaya.

¹³ Məlma adaw hay, Gazlavay a zəlkwar na, amba ka tərām ndəhay ma wam ray ata. Ama mewey ray akwar aha na, ta vəkwar cəved ŋga key cek hay maaya ba ma bawa daa mewulkey ŋga ndaw-magədan na, daa ba. Sasəkar jak, wufam vaw da wuzlah akwar, asaya, jənam vaw da wuzlah akwar. ¹⁴ Kwakwas ŋga Mawiz cəpa na, macəmkaya tabiya daa mewey pal ma ləvey: «Si ka wufa meseembew

akah anda kah ma wuda ray akah.» ¹⁵ Ama da akwar fa zam vaw da wuzlah akwar, asaya, akwar fa zomam vaw da wuzlah akwar anda genaw hay masa-homa na, si ka pam lenjesl, ka mbekdamara cek hay a ngene, da daa ba na, ka daa zadam ray akwar.

Mey da ray mewulkey nga ndaw-magadan ta slera nga Mesafney nga Gazlavay

¹⁶ Ehe, jakam slamay, ya fa lovkwar, völmär cöved a *Mesafney nga Gazlavay nga wey da ray akwar. Anda kede, akwar fa da kam cek hay maaya ba ma bawa daa mewulkey nga ndaw-magadan na, daa saba. ¹⁷ Cek hay maaya ba masa mevel nga ndaw-magadan ma wufey nga ka na, ata wal ta cek hay masa Mesafney nga Gazlavay ma wufey ya kakwa. Asaya, cek hay masa Mesafney nga Gazlavay ma wufey ya kakwa na, ata wal ta cek hay masa mevel nga ndaw-magadan ma wufey nga ka. Cek hay a na, ata wal wal, a comam ba. Ara maja ngene, ka gwamara nga key cek mandaw mandaw anda akwar ma wudam ba. ¹⁸ Ama da Mesafney nga Gazlavay fa wey da ray akwar na, ngene *kwakwas nga Mawiz fa da wey da ray akwar daa saba.

¹⁹ Ya sarkwa fara fara, cek hay masa mevel nga ndaw-magadan ma wufey nga ka na, ara meley-vaw saw, mewulkey mandaw mandaw da ray cek hay ma nosa ndaw, lej mekey cek hay ma ka hwaray. ²⁰ Asaya, cek hay masa mevel nga ndaw-magadan ma wufey nga ka na, ara meney ray a kuley hay, mekey maazla hay maaya ba, merösey vaw, mewudkey day, mekey sölenj, mecey-mevel kalah, mesöpey nga föney ndaw mekele, meweley vaw ta weley, lej mewudkey day ta ndöhay mekele. ²¹ Yaw, cek hay masa mevel nga ndaw-magadan ma wufey nga ka na, mekele daha saya, ara mekey maagway fa cek nga ndaw, mewey ta wuzam, mekusey daa slam a nga key cek hay malamba lej mekey cek hay mekele mekele masa malamba anda kede hay. Ya ta kätkwar la, ama wure kede, ya kätkwar saya, ndöhay ma kam cek anda kede hay na, fa da njam da wuzlah ndöhay masa Gazlavay fa wey da ray ata na, daa ba.

²² Ama da Mesafney nga Gazlavay fa wey da ray ndaw na, ndaw a, a key slera maaya, anga anda wudez ta slaslalay maaya ma yey baböza. Cek hay maaya ma sawa ta fa Mesafney nga Gazlavay na, ara mewufey-vaw, meesömey, zazay, mebösey banay, mesörey dey-ceceh fa ndaw, mekey

maaya, mekey cek ta cøved e mandaw mandaw, ²³ metørey nga ndaw meekwed-mey, lej mewey vaw fa mekey cek hay saw. Yaw, kwakwas nga Mawiz na, a tækta ndøhay nga key cek hay anda kefe ba.

²⁴ Ndøhay nga Yesu *Køriste na, ta mbækdamara cek hay maaya ba masa ata ma wudam nga kamara sem. A mbækdamara na, ara anda a dørmata cek hay maaya ba ha fa hwadam mazlangalakaya. ²⁵ Ara Mesøfney nga Gazlavay ma vøldakwar menjey mawiya. Da ray ngene, vølkwar cøved a Mesøfney nga Gazlavay a nga wey da ray aløkwa. ²⁶ Ya da gølkwa ray ba, ya da padatakwa ndøhay mekele nga cek hay saw ba, asaya, ya da kakwa sølenj da wuzlah aløkwa ba may.

6

Mey da ray ndøhay nga Yesu ma da jønam vaw

¹ Mølma adaw hay, da ka høtam ndaw da wuzlah akwar fa key mebørey na, ara akwar ndøhay masa ta *Mesøfney nga Gazlavay da ray kefe ma da jønmara ndaw aha, ma da vøhdamørwa aa cøved maaya. Ama ka da jønmara ha na, ta mevel maaya ta mey maakwad a. Kwa waawa da wuzlah akwar nga wey vaw maja a da tøfey aa mebørey nga ndaw aha. ² Da banay da wuzlah akwar daha na, jønam vaw. Da masa akwar fa kamara køne na, a key ngene, ka namar ray a mewey nga *Køriste.

³ Da ndaw a wulkey anga mahura, anja anga mahura ba na, a key ngene, a bømey ray anga. ⁴ Kwa waawa nga nøka menjey anga. Da a nøka aa maaya na, ngaa sømey da ray menjey anga ha gway, ba na, a da wulkey da ray menjey nga ndaw mekele ba. ⁵ Yaw, kwa waawa nga nøkey dey fa sløra anga masa Gazlavay ma vøldara.

⁶ Asaya, kwa waawa maa sørkey mey nga Gazlavay na, maaya a wunkamara cek anga hay ta ndaw maa sørkada ha.

Mey-menjey da ray menjey nga ndaw ta makawa cek hay da ley

⁷ Ka da bømam ray akwar ba, Gazlavay a wudfey ndaw nga kada wasa ba. Cek wura wura masa ndaw ma sløka a ley na, a da kawa da ley a na, cek aha. ⁸ Anda meløvey, da ndaw a key cek ma mbafar a vaw anga daada gway

5:22 5.22 Ef 5.9 **5:23** 5.23 1Tm 1.9; 2Pi 1.6 **5:24** 5.24 2.19; 6.14; Rm 6.6; Kwa 3.5; 1Jn 3.6 **5:25** 5.25 5.16; 1Kwr 6.19; Ef 4.30 **5:26** 5.26 Rm 12.10; Føl 2.3 **6:1** 6.1 Mt 18.15; Jak 5.19; 1Kwr 10.12 **6:2** 6.2 1Kwr 9.21; 2Kwr 11.29
6:3 6.3 1Kwr 4.7 **6:5** 6.5 Rm 2.6; 14.12 **6:6** 6.6 1Kwr 9.11, 14

na, ηgene, a daa zəɗda ray aηga. Ama da a key cek ma mbafar a *Mesəfney ηga Gazlavay na, ηgene, a da hətəy heter mendəvey ba ma sawa ta fa Mesəfney ηga Gazlavay a. ⁹ Da anda keɗe na, si ya kakwa cek hay maaya ηgada ndəhay, ya da gərkwā ba. Fara fara, da masa ya ta gərkwā daa ba, pas a ma wuswa cay na, ya hətkwā mawurbay ηga sləra aləkwa la. ¹⁰ Anda keɗe, daa masa aləkwa ma hətkwā har la kaa na, kakwa maaya a ndəhay tabiya. Kakwa maaya ma fəna saya na, ηgada ndəhay ma təba mey ηga Yesu *Kərīste.

Mey ηga madagway-dakw

¹¹ Nəkmara, mey ηga madagway-dakw keɗe na, mawu-zlalakaya mahura mahura, *ara yah ma wuzlalakwara ta har adaw*. ¹² Ndəhay daha fa təkmaƙwar ɗay ηga səpey *kwakwas ηga Mawiz ta fa *mesley mandawal. A təkmaƙwar ɗay a na, maja mewulkey ηga ndaw-magəɗan gway. A kamara anda keɗe na, a wuɗam ndəhay aa həmdamata. Asaya, a wuɗam ηga wuzey mey da ray meməcey ηga *Kərīste fa hwadam mazlanƙalakaya ba, maja ndəhay *Jəwif hay a da sərdamata banay. ¹³ Kwa ndəhay ma sla mandawal hay a ta ray ata na, fa namar ray a kwakwas ηga Mawiz tabiya daa ba. A wuɗam si ka slam mandawal na, amba a zlapam da ray akwar maja akwar ma təbmara mey ata.

¹⁴ Yah na, ya faa səmey si da ray meməcey ηga Bay aləkwa Mahura Yesu Kərīste fa hwadam mazlanƙalakaya gway, kwa ya faa səmey da ray cek mekele na, daa ba. Maja meməcey ηga Yesu Kərīste fa hwadam a na, ya nəkta cek hay da bəla keɗe anda cek hay ηga tede fa mey adaw. Yah may, anda ndaw ma məcey fa hwadam mazlanƙalakaya masa ta mbəkdata cek hay da bəla sem. ¹⁵ Kwa ndaw ta sla mandawal la, kwa ta sla daa ba na, fa da mbəɗey cek daa ba. Cek mahura na, ara Gazlavay ma tərdandakwar ηga ndəhay mawiya.

¹⁶ Anja Gazlavay ηga vəltar zazay, ηga sərfatar dey-ceceh a ndəhay ma səpmara mey a keɗe, leη a ndəhay daa səkway ηga *Israyel masa ma təbmara mey ηga Gazlavay fara fara.

¹⁷ Dəga wure keɗe, anja ndaw ηga həbya ray saba maja vevek * ηga mbəlek fa vaw adaw fa wuzdərwa yah ndaw ηga Yesu.

6:8 6.8 Jan 3.6; 6.63; Rm 8.6, 13 **6:9** 6.9 2Tes 3.13 **6:10** 6.10 Jan 13.34; Rm 12.10; 13.8; 14.15; 1Kwr 8.1; fasəlawal 13; 2Kwr 8.7-8; Gal 5.6, 13-14; Ef 5.2; Fəl 2.2; 1Tes 3.12; 4.9; 1Tm 1.5; Heb 13.1; 2Pi 1.7 **6:11** 6.11 1Kwr 16.21 **6:12** 6.12 5.2, 11 **6:14** 6.14 1Kwr 1.23, 29, 31; 2.2; Gal 2.19 **6:15** 6.15 5.6; Rm 6.3-4; 2Kwr 5.17; Ef 4.24 **6:16** 6.16 Ps 125.4-5 * **6:17** 6.17 vevek: vavay, vevələk **6:17** 6.17 2Kwr 4.10

¹⁸ Məlma adaw hay, anja maaya nga Bay aləkwa Mahura Yesu Kəriste nga njeý ta akwar tabiya. *Amen.

Leeter masa Pawl ma wuzlalatar a Efez hay Mey da ray Leeter ngada Efez hay

Leeter e keɗe na, ara Pawl ma wuzlalatar ngada ndəhay daa mecəmey-ray nga Yesu daa berney nga Efez, asaya ngada ndəhay daa mecəmey-ray hay mekele mekele nga Yesu daa berney hay gweegwe ta Efez e. Pawl a wuzlala leeter e na, daa masa anɗa daa fərsəne. A kəzlamara aa fərsəne he na, maja anɗa ma wuzey Mey-maaya-mawiya. Ma handa leeter e a Efez na, ara Tisik (6.21).

Pawl a sərta ndəhay mekele mekele daa mecəmey-ray nga Yesu da Efez na, maja ta wuzey mey nga Gazlavay la fetede mevey maakar (SNM 19-20).

Mey mahura masa daa leeter keɗe na, ara cek masa Gazlavay ma wudey nga ka (1.10). «Cek masa aa ma wudey nga ka ha na, ara mecəmey ray nga cek hay da gazlavay da vad ta cek hay da bəla tabiya asi har nga Bay pal, Kəriste.» Cek masa aa ma wudey nga ka ha, a da key na, ta fa mecəmey-ray nga ndəhay nga Yesu.

Daa leeter keɗe na, Pawl aa guzley da ray Gazlavay ma wudta ndəhay kalah (1-2.10). Fa dəba ha, aa guzley da ray Jəwif hay ta Jəwif hay ba hay ma təram nga səkway pal ta fa Kəriste (2.11–3.13). Pawl a kətata Efez hay amba a njam maaya maaya, a təbmara mey nga Yesu ma fəna ma fəna, a njam anda ata ma njam zleezle saba (fasəlawal 4 haa 6).

Daa leeter e keɗe na, mey mekele mekele daha nga vəley gədaŋ a ndəhay:

Gazlavay ta kandakwar maaya la ta fa Yesu Kəriste
(fasəlawal 1 haa 2)

Si zel hay a wudmata ngwas ata hay, ngusay a namatar
ray a zel ata hay (5.22-33)

Mey da ray ma key vəram ta bay-malula (6.10-20)

Mecey-har nga Pawl a Efez hay

¹ Ara yah, Pawl, ma wuzlalakwara leeter keɗe, yah ndaw masa *Gazlavay ma wala nga key *ndaw-meslərey nga *Yesu *Kəriste.

Leeter keɗe ara ngada akwar, ndəhay nga Gazlavay daa berney nga Efez, akwar macəmkaya ta Yesu Kəriste, asaya, akwar ma təbmara mey anɗa ta mevel pal.

² Anja Papa aləkwa, Bay Gazlavay, ta Bay aləkwa Mahura Yesu Kəriste n̄ga pəsmakwar mey, asaya n̄ga n̄jadamakwar daa zazay.

Cek hay maaya masa Gazlavay ma vəldatara a ndəhay ta fa Yesu Kəriste

³ Həlmakwa Gazlavay, Papan̄ n̄ga Bay aləkwa Mahura Yesu *Kəriste. Mepəsey-mey an̄ga kwa wura wura ma sawa ta da vad̄, aa da ray aləkwa. Ya hət̄kwa mepəsey-mey a na, maja aləkwa macəm̄kaya ta Kəriste. ⁴ Sərfadamara, dəga Gazlavay ta ləma bəla daa ba aran̄ na, ta walandakwar sem n̄ga cəmey ta Kəriste, amba ya tər̄kwa ndəhay maaya fa mey an̄ga, ndəhay masa ta mebərey ba. Gazlavay a wud̄ndakwar kalah, ⁵ maja n̄gene, ta walandakwar sem dəga zleezle n̄ga tərey bəz an̄ga hay ta fa Yesu Kəriste. Gazlavay a ka kəne na, maja ta mbafar la, a wud̄fey n̄ga ka kəne. ⁶ Da ray n̄gene, həlmakwa Gazlavay maja aa ma wud̄ndakwar kalah. A wuzdər̄wa mewud̄fey-vaw a na, ta fa sləra masa Bəzey an̄ga mawud̄kaya kalah ma ka n̄gada aləkwa.

⁷ Maja aləkwa macəm̄kaya ta Kəriste na, Gazlavay ta ləhdandakurwa sem dasi har n̄ga bay-malula, asaya, ta mbək̄dandakwara mebərey sem ta fa mambaz n̄ga Yesu ma mbədf̄wa daa meməcey an̄ga. Anda ked̄e, Gazlavay a wuzdandakwara mesərey dey-ceceh an̄ga ta mewud̄fey-vaw an̄ga ha na, aa ga kalah n̄gada aləkwa. ⁸ Ta kandakwar maaya la ga kalah, ta və̄ndakwar ləngesl maaya la, ⁹ ta wuzdandakwara cek masa mabadakaya dəga zleezle sem, anda meləvey, cek masa aa ma wud̄fey n̄ga ka ta fa Kəriste.

¹⁰ Ta pas masa d̄ar a ta wuswa cay na, a da ndəvda cek masa aa ma wud̄fey n̄ga ka ha. Cek masa aa ma wud̄fey n̄ga ka ha na, ara n̄ga cəmtar ray a cek hay da gazlavay da vad̄ ta cek hay da bəla tabiya asi har n̄ga Bay pal, Kəriste.

¹¹ Gazlavay ta wud̄fey sem amba cek hay tabiya a kam maaya maaya anda an̄ga ma wud̄fey n̄ga ka. Ta wud̄fey sem dəga zleezle n̄ga walandar ala *Jəwif hay wal amba ya təram ndəhay an̄ga hay macəm̄kaya ta Kəriste. ¹² Da ray n̄gene, ala ndəhay masa n̄geeme ma pamara Kəriste n̄ga ndaw ala fara fara na, ala fa həlmamara Bay Gazlavay maja maaya an̄ga kalah. ¹³ Akwar ndəhay masa Jəwif hay ba hay may, akwar ta cəndamara *Mey-maaya-mawiya la.

1:3 1.3 2.6; 2Kwr 1.3 **1:4** 1.4 5.27; Jan̄ 15.16; 17.24; 2Tes 2.13 **1:5** 1.5 Jan̄ 1.12 **1:6** 1.6 Mt 3.17; Rm 5.2; Kwa 1.13 **1:7** 1.7 meləhey dasi har n̄ga bay-malula: Kwa 1.13-14; mambaz: Ef 2.13; Rm 3.25-26; Kwa 1.20; 1Jn̄ 5.7; mewud̄fey-vaw an̄ga ga kalah: Ef 2.7 **1:9** 1.9-10 1.22; Kwa 1.16, 20 **1:11** 1.11 1.4; Rm 8.28-29

Ara mey maaya fara fara ma ləhdakwar maja akwar ma pamara Kəriste nga ndaw akwar fara fara. Maja ngene, Gazlavay ta vəkwar Mesəfney anğa la a ray akwar anda aa ma ləvey zleezle a da vəldatara a ndəhay anğa hay. Mesəfney a na, ara anda cek matəhkaya fa dangay nga sərey akwar na, ndəhay anğa hay. ¹⁴ Maja aləkwa ma hətkwa *Mesəfney nga Gazlavay na, ya sərkwə fara fara Gazlavay a da vəldandakwara cek hay maaya tabiya masa anğa ma ləvey a da vəldatara a ndəhay anğa hay heyey. Ya da hətkwa cek hay a na, daa masa aləkwa ta ləhkwa cay daa cek hay maaya ba da bəla kefe *. Anda kefe, həlmakwa Bay Gazlavay maja aa ta gədanj.

Pawl a kar suse a Gazlavay daa medərey-dangay

¹⁵ Anda kefe, dəga yah ma cənda akwar fa təbmara mey nga Bay aləkwa Mahura Yesu, ta akwar fa wudmata ndəhay nga Gazlavay cəpa na, ¹⁶ ya fa key suse a Gazlavay maja akwar mandaw mandaw. Daa masa ya fa dərey dangay a Gazlavay na, ya fa sərfaadakwar. ¹⁷ Ya fa dərey dangay a Gazlavay nga Bay aləkwa Mahura Yesu *Kəriste. Gazlavay a, ara Papanj ta gədanj. Yaa cəfda amba a vəkwar lengesl, a wuzdakwara ray anğa amba ka sərmara maaya maaya. ¹⁸ Asaya, ya faa cəfda Gazlavay amba a pa mewedey anğa aa mevel akwar, amba ka sərmara cek hay maaya kalah masa aa ma da vəldakwara. Da ray ngene, cek hay maaya kalah ha na, akwar fa səkwmara maja ka sərmara ka hətam la fara fara. Ka hətam la fara fara, maja Gazlavay a zəlkwar nga tərey bəz anğa hay. Ya faa cəfda saya amba ka sərmara mepəsey-mey anğa masa maaya ara mey ba, masa aa ma dīya amba a vəldatara a ndəhay anğa hay. ¹⁹ Asaya, ya faa cəfda Gazlavay amba ka sərmara gədanj anğa ma jəndakwar, aləkwa ndəhay ma təba mey nga Yesu. Gədanj anğa ha na, a fənta gədanj hay nga cek hay tabiya. ²⁰ Ara gədanj masa ma sləkfadərwa Kəriste daa meməcey. Ara gədanj a saya ma təpda Kəriste he a vad nga njeý aa slam maaya ta har-zəmay nga Gazlavay. ²¹ Fetede, Kəriste he fa wey da ray mesəfney hay maaya ta maaya ba hay tabiya masa ma wam da ray cek hay tabiya da vad ta da bəla. Gədanj nga Yesu na, a fənta gədanj nga bay hay tabiya ma wam wure kefe da bəla ta nga bay hay tabiya ma da wam

1:13 1.13 4.30; 2Kwr 1.22; Kwa 1.5 * **1:14** 1.14 Ya da hətkwa cek hay maaya tabiya masa Gazlavay ma ləvey a da vəldandakwara na, ta pas masa Bay Mahura Yesu ma da vəhwa a bəla (Rm 8.23). **1:14** 1.14 4.30; 2Kwr 1.22 **1:16** 1.16 Kwa 1.3 **1:17** 1.17 5.17; MM 2.6; Kwa 1.9-10 **1:18** 1.18 4.4; Kwa 1.12 **1:19** 1.19-20 2Kwr 13.4; Kwa 2.12 **1:20** 1.20 SNM 2.33; Kwa 3.1

ngada fa mey. ²² Ahaw, Gazlavay ta pata cek hay tabiya sem asi har nga Kəriste. Asaya a pa Kəriste nga *bay-ray nga mecəmey-ray nga ndəhay anğa hay. ²³ Yaw, mecəmey-ray nga ndəhay anğa hay na, ara anda vaw anğa. Kəriste fa wuzwa vaw a ndəhay tabiya da bəla. A wuzwa vaw na, ta fa mecəmey-ray nga ndəhay anğa hay a. Ara anğa ma vəltar heter a cek hay tabiya kwa daa wura daa wura cəpa.

2

Gazlavay a vəlndakwar heter na, ta fa Yesu

¹ Zleezle masa akwar ta təbmara mey nga *Kəriste daa ba aran na, akwar anda ndəhay maməctakaya, maja akwar ta mebərey, akwar fa kam cek hay malamba. ² Daa ngene, menjey akwar na, maaya ba, anda ndəhay da bəla kefe ma sərmara Gazlavay ba. Akwar fa təbmara mey nga *Satan, bay-malula, ma wey da ray mesəfney maaya ba hay ma pəkam daa memed da bəla. Bay-malula ha na, anğa fa wata ndəhay ma rəsmara mey nga Gazlavay haa wure kefe.

³ Daa masa aləkwa ma təbkwa mey nga Kəriste daa ba aran na, aləkwa kəne may, maja daa ngene na, ya kakwa cek hay maaya ba tabiya anda mevel aləkwa ma wufey. Aləkwa fa kakwa cek hay tabiya anda lenjesl aləkwa ta vaw aləkwa ma wufey. Maja cek hay maaya ba hay a na, Gazlavay a da cey mevel ga a ray aləkwa anda aa ma cey mevel a ray ndəhay siya may.

⁴ Ama Gazlavay na, ara ndaw ma sərey dey-ceceh fa ndaw. Ta wufndakwar la ga kalah. ⁵ Da ray ngene, kwa daa masa aləkwa anda ndəhay maməctakaya maja mebərey aləkwa na, Gazlavay ta cəmndakwar la ta Kəriste, ta vəlndakwar heter mawiya la. Sərfadamara, ara ta fa maaya nga Gazlavay a, akwar ma ləham daa mebərey.

⁶ Gazlavay ta sləkfdandakurwa sem daa meməcey daa slam a ta Yesu Kəriste na, maja aləkwa macəmkaya ta Kəriste he. Asaya, ta njadandakwar sem daa slam a ta anğa da gazlavay a vad nga wey da ray cek hay tabiya.

⁷ A wuzdərwa maaya anğa ngada aləkwa ta fa Yesu Kəriste anda kefe na, amba a wuzdatara a ndəhay ngada

1:21 1.21 6.12; Rm 8.38; Gal 4.8-9; Kwa 1.13, 16, 20; 2.9-10, 15, 20 **1:22** 1.22 1.10; 4.15; 5.23; Ps 8.7; Kwa 1.18; 2.19 **1:23** 1.23 mecəmey-ray nga ndəhay nga Yesu ara anda vaw anğa: 2.16; 4.1-16, 25; 5.30; 1Kwr 12.4-11, 27; Kwa 2.19; Kəriste aa daa mecəmey-ray nga ndəhay anğa hay: 2.14, 18; 4.1-6; Kwa 3.15; Gazlavay a njeý ta ndəhay anğa hay: 3.19; 4.10 **2:1** 2.1 2.5 **2:2** 2.2 6.12; Jan 12.31; 14.30; SNM 26.18; 1Jn 2.16 **2:3** 2.3 5.6, 8; Rm 1.28; Kwa 3.6 **2:4** 2.4 Rm 8.39; 9.16; Jak 5.11 **2:5** 2.5 2.8; Rm 3.24; 6.13; Kwa 2.12-13 **2:6** 2.6 1.3; Kwa 2.12; 3.1

fa mey, mesərey dey-ceceh anğa ta mewudəy-vaw anğa ha na, anğa ga kalah.

⁸ Yaw, ara ta fa maaya anğa ha Gazlavay ma ləhdakwar daa mebərey maja akwar ma təbmara mey nğa Yesu. Akwar ma ləham a na, ara ta gədan akwar ba, ama ara Gazlavay ma vəldakwara gədan nğa ləhey a. ⁹ Gazlavay ma ləhdakwar na, ara maja sləra akwar maaya masa akwar ma kamara ba. Anda keđe, ka da zlapam maja ba. ¹⁰ Yaw, ara Gazlavay ma ka amba ya cəmkwa ta Yesu Kəriste. Da ray ngene, Gazlavay ta vəldakwar heter mawiya la amba ya kakwa sləra hay masa maaya kalah. Sləra hay masa maaya hay a na, Gazlavay ta dīyndakwara cay amba ya kakwa.

Jəwif hay ta Jəwif hay ba hay macəmkaya pal ta fa Yesu Kəriste

¹¹ Da ray ngene, wulkam, zleezle akwar na, kwara? Akwar ta yamawa daa səkway nğa *Jəwif hay daa ba. Jəwif hay a, a zəlmakwar na, ndəhay manda-sla mandawal hay. Ata na, a ləvam ata ndəhay maslatakaya mandawal. Ama *mesley mandawal na, ara cek masa ndəhay ma kamara fa vaw ata hay gway. ¹² Ahaw, daa ngene na, akwar dərenj ta *Kəriste, *ndaw masa Gazlavay ma wala nğa ləhdata ndəhay. Akwar na, ndəhay daa səkway nğa *Israyel hay ba, akwar mələk hay. Akwar daa *mejəwey-mey nğa Gazlavay ta Israyel hay daa ba. Daa mejəwey-mey a, Gazlavay a ləvtar a da njeý ta ata nğa mandaw mandaw. Akwar manjatakaya da bəla, Gazlavay aa ta akwar daa ba, ka njam na, nğa ray akwar gway. ¹³ Ama akwar masa dərenj ta Gazlavay heyey na, wure keđe, akwar macəmkaya ta Yesu Kəriste. Gazlavay ta nğəchadakurwa la a cakay a, ta fa mambaz nğa Kəriste ma mbədfwa daa meməcey anğa.

¹⁴ Fara fara, ara Kəriste ta ray anğa ma handərwa zazay a wuzlah aləkwa. A handərwa zazay a daa masa anğa ma cəmtar dəy a ndəhay Jəwif hay ta ndəhay Jəwif hay ba hay, nğa key səkway pal. Zleezle na, ndəhay Jəwif hay ta ndəhay Jəwif hay ba hay a nğəlam vaw ba. Mengəley-vaw ata ba ngene na, ta tərey sem anda zlenjer da wuzlah ata ma wunkata. Anda keđe, ta fa meməcey nğa Yesu na, zlenjer e, ta pəlhey sem. ¹⁵ *Kwakwas nğa Mawiz na,

2:7 2.7 1.7; Rm 5.20 **2:8** 2.8 Mt 20.15; Jan 4.10; SNM 15.11; Gal 2.16 **2:9** 2.9 Rm 3.28; 1Kwr 1.31; 2Tm 1.9; Tit 3.5 **2:10** 2.10 Tit 2.14 **2:11** 2.11 5.8; mesley mandawal: Gal 5.6; Fəl 3.3 **2:11** 2.11-13 Rm 11.17 **2:12** 2.12 Rm 9.4; 1Kwr 15.19; Kwa 1.21-22; 1Tes 4.13; Gazlavay aa ta akwar ba: 2.19 **2:13** 2.13 akwar masa dərenj ta Gazlavay: 2.17; 3.6; mambaz: 1.7; Gal 1.4 **2:14** 2.14 zazay: 2.16; 4.3; Kwa 1.20; aləkwa səkway pal maja Yesu: 1.23; Rm 10.12; 1Kwr 12.13; Gal 3.28

mewey hay ga da hwaɗ a daha. Ama Kəriste ta ngəchada kwakwas a sem ta cakay, amba a cəmtar ɗay nga ndəhay Jəwif hay ta ndəhay Jəwif hay ba hay nga tərey səkway pal macəmkaya ta anɗa. Ara maja ngene, zazay daha da wuzlah səkway hay cew e. ¹⁶ Ta fa meməcey anɗa fa hwadam mazlanɗalalakaya na, Kəriste ta vavəsa menjəleyvaw ba da wuzlah səkway hay cew keɗe heyey sem nga tərey səkway pal. Anda keɗe, ta fa meməcey anɗa ha na, ta cəmtar ɗay cay ta Gazlavay.

¹⁷ Kəriste a sawa na, nga wuzey *Mey-maaya-mawiya ma handawa zazay ngada akwar Jəwif hay ba hay ma sərmara Gazlavay ba zleezle, ta ngada ala Jəwif hay masa ma sərmara Gazlavay. ¹⁸ Yaw, ara ta fa Kəriste he aləkwa cəpa ma hətkwa cəved nga daw a cakay Gazlavay, Papan, ta fa gəɗan nga Mesəfnay anɗa pal.

¹⁹ Anda keɗe, akwar ndəhay masa Jəwif hay ba hay na, akwar mələk hay saba, akwar maslah hay saba. Ama wure keɗe na, akwar səkway pal ta ndəhay nga Gazlavay, akwar ndəhay daa vəgeɗ nga way pal ta ndəhay nga Gazlavay.

²⁰ Akwar na, anda anɗwa hay ma ɗəzla way. Salay nga way a na, ara ndəhay meslərey nga Yesu ta ndəhay ma təla mey nga Gazlavay. Yesu Kəriste ta ray anɗa na, ara anɗwa mahura ma vələr gəɗan a way a. ²¹ Ara ta fa Yesu Kəriste he, way a ma njeɗ maaya maaya ta gəɗan, a səkey, a key mahura amba way a, a tərey way nga Bay Gazlavay.

²² Maja akwar macəmkaya ta Kəriste na, Kəriste he ta cəmkwar la ta ndəhay anɗa hay mekele amba akwar may, ka tərām anda way a. Ara way masa Gazlavay ma njeɗ da hwaɗ a ta fa Mesəfnay anɗa.

3

Pawl a wuzey Mey-maaya-mawiya ngada ndəhay Jəwif hay ba hay

¹ Ara maja ngene, yah Pawl, ya fa ɗərey ɗanɗay maja akwar mandaw mandaw. Yah daa fərsəne maja sləra nga Yesu *Kəriste, masa yah ma ka ngada akwar *Jəwif hay ba hay. ² Akwar ma cəndamara mey da ray sləra masa Gazlavay ma vəldiwa nga key maja akwar la, ba diya? A vəldiwa sləra ha na, maja maaya anɗa. ³ Gazlavay ta wuzdiwa mey masa maɓadəkaya ɗəga zleezle sem amba

2:15 2.15 2Kwr 5.17; Kwa 2.14 **2:16** 2.16 1.23; Rm 5.10; Kwa 1.20-22 **2:17** 2.17 Iz 57.18-19; SNM 2.39 **2:18** 2.18 3.12; Rm 5.2 **2:19** 2.19 2.12; 3.6; Heb 12.22-23 **2:20** 2.20 Mt 16.18; 1Kwr 3.10-11; CWJ 21.14 **2:21** 2.21 1Kwr 3.16
2:22 2.22 1Pi 2.5 **3:1** 3.1 fərsəne: 4.1; Fəl 1.7; Kwa 4.18; Flm 1, 9 **3:1** 3.1-3 Kwa 1.25

ya sɛra mey a. Yaw, daa leeter keɗe na, ya taa guzlkwar la nekɔɗey da ray mey mabadakaya ha. ⁴ Masa akwar fa jaŋgamara leeter he na, ka sɛrmara la, yah na, ya sɛra mey masa mabadakaya da ray Kɛriste maaya maaya. ⁵ Zleezle na, Gazlavay ta wuzdatara mey mabadakaya ha a ndɔhay daa ba. Ama wure keɗe, ta wuzdatara la ta fa Mesɔfney aŋga ŋgada ndɔhay masa aa ma walata wal ŋga tɔrey ndɔhay meslɔrey ŋga Yesu ta ŋga tɔrey ndɔhay ma tɔla mey aŋga hay. ⁶ Ehe, mey mabadakaya ha na, a lɔvey Jɔwif hay ba hay na, a hɔtam cek hay maaya masa Gazlavay ma diytara ŋgada ndɔhay aŋga hay la letek ta ndɔhay Jɔwif hay. Jɔwif hay ba hay ta Jɔwif hay na, ta tɔram sem anda vaw pal ta fa Kɛriste. Asaya, cek masa Gazlavay ma lɔvey a da vɔldatara a ndɔhay aŋga hay na, ndɔhay Jɔwif hay ba hay a da hɔtam letek anda ndɔhay Jɔwif hay may. A hɔtam cek hay maaya keɗe na, maja ata ma tɔbmara *Mey-maaya-mawiya, asaya, maja ata macɛmkaya ta Yesu Kɛriste.

⁷ Mey-maaya-mawiya ha na, Gazlavay ta paya la ŋga wuzda a ndɔhay maja maaya aŋga. Ara ta fa gɔɗaŋ aŋga, yah ma tɔrey ndaw ma ka slɛra aŋga ha. ⁸ Yah na, ndaw mecɔhe da wuzlah ndɔhay ŋga Gazlavay tabiya. Ta ŋgene he cɔpa, Gazlavay ta sɛrfaya dey-ceceh la, ta paya la ŋga wuzey Mey-maaya-mawiya a ndɔhay Jɔwif hay ba hay. Ya fa wuzdatara mepɔsey-mey ma sawa ta fa Kɛriste. Cek maaya daa mepɔsey-mey a tabiya na, ndaw-magɔɗaŋ a gwa a sɛra ba. ⁹ Asaya, a paya ŋga wuzda mey mabadakaya zleezle heyey a ndɔhay tabiya, amba a sɛrmara cek hay a, a da kam na, kwara. Ara Gazlavay, ndaw ma lɔma slam da vad ta slam da hwayak, ma baɗa mey a dɔga zleezle.

¹⁰ Ama wure keɗe ta wuzɗɔrwa sem ta fa ndɔhay daa *mecɔmey-ray ŋga ndɔhay ŋga Yesu. A wuzɗɔrwa ta fa ata na, amba maslaŋ aŋga hay da vad ta *bay-ray ata hay a sɛrmara lenɓesl maaya ŋga Gazlavay ma sɔrey cek hay mekele mekele cɔpa. ¹¹ Dɔga bɔla ta zlar ŋga lɔmey daa ba araŋ na, Gazlavay a, a ka kɔne maja ta wuɗey sem. A ka na, ta fa Yesu Kɛriste, Bay alɔkwa Mahura. ¹² Anda keɗe, ya gwakwa ŋga ŋgɔchakwa asi har ŋga Bay Gazlavay ta mandɔrzay daa dey daa ba maja alɔkwa macɛmkaya ta Yesu Kɛriste, asaya, maja alɔkwa ndɔhay ma pamara Yesu ŋga ndaw alɔkwa fara fara. ¹³ Maja ŋgene, ya kakwar ambahw, ka da mɔcmara vaw akwar maja yah ma sɔrey

3:3 3.3 3.6 **3:4** 3.4 Rm 16.24; 2Kwr 11.6 **3:5** 3.5 Kwa 1.26 **3:6** 3.6 mey mabadakaya: 1.9-10; 2.13-14, 18-19; 3.9-11; Rm 16.25; Kwa 1.26-27 **3:8** 3.8 ndaw mecɔhe: 1Kwr 15.8-10; Gal 1.13-16; Fɔl 3.6-8; 1Tm 1.12-16 **3:9** 3.9 1.4
3:10 3.10 1.21, 23 **3:12** 3.12 Rm 5.2; Heb 4.16; 10.19

banay maja akwar ba. Banay yah ma sɛra keɔe na, sasɛkar jak a da kakwar maaya ŋgada fa mey.

Mey da ray mewuɔey-vaw ŋga Yesu Kɛriste

¹⁴ Ara maja ŋgene, yah ma regeɔey fa mey ŋga Gazlavay Papan, ŋga dɛrar danɔay maja akwar. ¹⁵ Ara anɔa ma patar mezɔley a sɛkway hay da gazlavay da vad ta da bɛla cɛpa, maja anɔa Papa alɛkwa. ¹⁶ Gazlavay aa ta gɔɔan, cek hay tabiya ata dasi har anɔa. Da ray ŋgene, ya fa dɛrar danɔay amba a vɛlkwar gɔɔan ta fa Mesɔfney anɔa. Anda keɔe, gɔɔan anɔa ha ŋga njeɔ daa akwar ma fɛna ma fɛna.

¹⁷ Anja *Kɛriste ŋga njeɔ daa mevel akwar maja anɔa ndaw akwar fara fara. Asaya, anja akwar ŋga wuɔmara Gazlavay, anja akwar ŋga wuɔdam vaw da wuzlah akwar. Da akwar fa wuɔdam vaw kɛne na, ka da hɛtam gɔɔan anda wuɔez masa slaslalay a dɛren daa vɛgeɔ, da daa ba, anda way malɛmkaya maaya maaya wurza ha mapakaya ta anɔgwa. ¹⁸ Anda keɔe, akwar ta ndɛhay ŋga Gazlavay siya, ka sɛmara la, Yesu Kɛriste na, fa wuɔndakwar kalah. Ka sɛmara la, mewuɔey-vaw anɔa ha na, kwakway a daa ba. ¹⁹ Ahaw, mewuɔey-vaw anɔa ha na, ta fɛna lenɔesl ŋga ndaw-magɔɔan sem. Ama ya fa dɛrey danɔay amba ka sɛmara mewuɔey-vaw anɔa ha fara fara cɛnɔa. Anda keɔe, ka da hɛtam menjeɔ maaya letɛk anda ŋga Gazlavay, asaya, Gazlavay a, ray anɔa, a da njeɔ ta akwar mandaw mandaw.

²⁰ Yaw, Gazlavay a, a gwa ŋga vɛlnɔakwar cek ma fɛna masa alɛkwa maa cɛɔɔafakwar, asaya, a gwa ŋga kandakwar cek masa ma fɛna mewulkey alɛkwa, maja anɔa fa key slɛra daa mevel alɛkwa ta gɔɔan anɔa.

²¹ Hɛlmakwa Bay Gazlavay maja ndɛhay daa *mɛcɛmey-ray ŋga ndɛhay ŋga Yesu lenɔ maja Yesu Kɛriste he ray anɔa. Anja ndɛhay ŋga hɛlmamara Gazlavay ŋga sɛmataw. *Amen.

4

Mey da ray mɛcɛmey-ray ŋga ndɛhay ŋga Yesu

¹ Maja cek hay tabiya masa Gazlavay ma kakwara ta fa *Kɛriste na, yah Pawl, ya fa kɛtkwar, yah ndaw masa daa fɛrsɛne maja Bay alɛkwa Mahura. Akwar masa Gazlavay ma zɛlkwar ŋga tɛrey bɛz anɔa hay na, ya fa kɛtkwar amba menjeɔ akwar a key anda aa ma wuɔey. ² Anda melɔvey, daa cek hay masa akwar ma kamara cɛpa na, kamara ta

meney ray, ta meekwed-mey, ka da cam mevel saw saw ba. Da ndəhay da wuzlah akwar ta kamakwar cek hay maaya ba la na, bəsmara gway, wudam vaw da wuzlah akwar. ³ *Mesəfney nga Gazlavay ta cəmkwar ray la pal. Anda keɗe, kam gədan amba ka njam macəmkaya daa zazay. ⁴ Aləkwa ndəhay daa *mecəmey-ray nga ndəhay nga Yesu na, aləkwa ma tərkwā sem anda vaw pal. Ara Mesəfney nga Gazlavay pal da ray aləkwa. Asaya, aləkwa masa Gazlavay ma zəndakwar na, aləkwa fa səkwakwa cek hay maaya letək masa Gazlavay ma da vəldatara a ndəhay anga hay.

⁵ Bay aləkwa Mahura, anga pal. Mey masa aləkwa ma təbkwa, anga pal. *Baptem, anga pal. ⁶ Gazlavay masa aləkwa ma nakwar ray may, anga pal. Anga Papa aləkwa tabiya, fa wey da ray aləkwa tabiya, fa key sləra da wuzlah aləkwa tabiya, asaya, aa daa mevel aləkwa tabiya.

⁷ Ama Kəriste ta vəndakwar gədan la wal wal nga key sləra anga. A vəldandakwara gədan a na, ta har cew cew, anda aa ma wudəy nga vəlda sləra a ndaw a, a ndaw a. ⁸ Ara maja ngene, mawuzlalakaya daa ɗerewel nga Gazlavay, a ləvey:

«Daa masa anga ma təpey a vad na,

Ta handata masa-gəra anga hay

masa aa ma kərzatərwa daa vəram la.

Fa dəba ha, ta', a vəley cek hay mekele mekele a ndəhay.»

⁹ Yaw, mey ma ləvey: «Anga ma təpey a vad na,» a wudəy nga ləvey kwara? Mey a, a wudəy nga ləvey na, Kəriste ta pawa salay la a bəla feɗe ɗagay. ¹⁰ Kəriste ma pawa salay a bəla heyey na, ara anga saya ma təpey a vad haa a wusey a cakay Bay Gazlavay, amba a wey da ray cek hay kwa daa wura daa wura cəpa. ¹¹ Gədan masa wal wal a na, ara Kəriste he ta ray anga ma vəltar a ndəhay. A vəltar gədan a siya hay nga tərey ndəhay meslərey anga hay, siya hay nga tərey ndəhay ma təla mey nga Gazlavay, siya hay may nga wuzey *Mey-maaya-mawiya a ndəhay. Siya hay saya a vəltar gədan nga tərey anda mecəkwer hay nga ndəhay ma təba mey nga Yesu, aa sərkadamata ndəhay da ray mey nga Gazlavay. ¹² Kəriste he a ka kəne na, amba ndəhay a, a jənmata ndəhay nga Gazlavay nga key sləra ngada anga. Anda keɗe, ndəhay daa mecəmey-ray nga ndəhay

4:2 4.2 5.2; Rm 8.13; Gal 6.8; Kwa 3.9; Kwa 3.12-13 **4:3** 4.3 2.14-16; Kwa 3.14-15 **4:4** 4.4 1.23; 2.18 **4:5** 4.5 Jan 10.16; 1Kwr 8.6; baptem: Mt 28.19; Rm 6.3-4 **4:6** 4.6 1Kwr 12.6 **4:7** 4.7 Rm 12.3, 6; 1Kwr 12.11 **4:8** 4.8 Ps 68.19 **4:9** 4.9 Jan 3.13 **4:10** 4.10 1.23 **4:11** 4.11 1Kwr 12.28

nga Kəriste, a hətam gədan daa mey nga Gazlavay la ma fəna ma fəna.

¹³ Ahaw, aləkwa tabiya ya cəmkwa ray la pal daa metəbey-mey pal nga Bəzey nga Gazlavay, asaya, ya da sərkwə Bəzey a fara fara. Da ray ngene, ya da tərkwə ndəhay manğaratakaya daa mey nga Gazlavay, anda meləvey, ya da tərkwə ndəhay maaya kalah anda Kəriste.

¹⁴ Anda kefe, aləkwa anda bəza hay saba, aləkwa anda hwahwayak masa memed ma həla saw saw saba. Yaw, ndəhay ma mbərzlam fa da gwamara nga batamandakwar ta meesərkedey ata, amba ya təbkwa membərzley ata ha ngaa zəfdandakwar na, daa saba.

¹⁵ Maaya na, ya mbərzlakwa ba, ya wuzkwa mey maaya fara fara da ray Gazlavay, asaya, ya wudkwa vaw da wuzlah aləkwa. Da aləkwa fa kakwa kəne na, ya nakwa la fa mey fa mey haa ya tərkwə anda Kəriste. Anğa na, *bay-ray nga ndəhay daa mecəmey-ray anğa. ¹⁶ Ara anğa ma cəmtar ray nga ndəhay anğa hay anda vaw nga ndaw pal maləmkaya ta mezəvey hay mekele mekele. Da mezəvey nga vaw hay cəpa ata wurwer na, ngene vaw tabiya a gəley, a hətəy gədan. Ara kəne may ngada ndəhay daa mecəmey-ray nga ndəhay nga Yesu. Da ndəhay a, fa wudam vaw da wuzlah ata, asaya, da kwa waawa fa ka sləra anğa na, mecəmey-ray a, a hətəy gədan la ma fəna ma fəna.

Pawl a kətata Efez hay nga mbəddamara menjey ata

¹⁷ Ara maja ngene, yah, Pawl, ya fa kətkwar, asaya, ya fa pakwar lenğesl ta mezəley nga Bay aləkwa Mahura, ya ləvkwar: ka da njam anda ndəhay ma sərmara Gazlavay ba saba. Mewulkey nga ndəhay a na, saw kəne. ¹⁸ Ata daa ləvan. Cek masa Gazlavay ma wudəy na, a gwamara nga cəndamara ba. Ata mələk hay fa mey nga Gazlavay, ta hətam heter mendəvey ba na, daa ba, maja a gəmam nga cəndamara ba səlak, a sərmara Gazlavay ba. ¹⁹ Hwaray daa dey ata daa ba, a kam cek anda mevel ata ma wudəy. Fa lam vaw saw da palah mandaw mandaw, fa kam cek hay malamba mekele mekele may.

²⁰ Ama akwar na, aa sərkadamakwar da ray *Kəriste na, anda ngene ba. ²¹ Akwar ta cəndamara mey da ray Kəriste la, ba diya? Akwar masa macəmkaya ta Yesu na, taa sərkadamakwara mey fara fara masa Yesu a ma wuzdandakwara la, ba diya? ²² Zleezle na, ka wudam nga

4:12 4.12 1Kwr 14.26 **4:13** 4.13 Kwa 1.28 **4:14** 4.14 1Kwr 14.20; Heb 5.13-14; Jak 1.6 **4:15** 4.15 1.22 **4:15** 4.15-16 5.2 **4:16** 4.16 1.23; 2.21-22; 4.13, 25; Kwa 2.19 **4:17** 4.17-18 5.8; Rm 1.21; 1Pı 1.14 **4:19** 4.19 Kwa 3.5

key cek hay malamba ma bata ndaw. Cek hay malamba hay a ta nəskwar sem. Yaw, maaya na, ka mbəkdamara menjey akwar masa zleezle ŋgene, anda ndaw ma mbəkda zana magurma. ²³ Mbəkdamara mevel akwar ta lenjesl akwar tabiya. ²⁴ Təbmara menjey mawiya masa Gazlavay ma diykwara anda ndaw ma kəzley zana mawiya fa vaw. Menjey a na, ara menjey maaya ta cəved e, ma mbafar a Gazlavay anda mey ŋga Gazlavay masa fara fara maa sərkadandakwara.

²⁵ Da ray ŋgene, ka da mbərzlam saba. Maaya na, kwa waawa ŋгаа guzley mey maaya fara fara a ndaw, maja aləkwa tabiya macəmkaya anda vaw pal. ²⁶ Da mevel fa cakwar na, wam vaw, ka kam mebərey ba. Ka da vərndam daa mecey-mevel haa pas a kəzley ba. ²⁷ Ka da vəlmar cəved ŋgada bay-malula ŋga wey da ray akwar ba. ²⁸ Da ndaw fa leley na, anja ŋga leley saba. Ama maaya na, ŋga key sləra maaya ta har anga, amba a hətəy cek, a jəney ndəhay masa-viya hay may. ²⁹ Ka daa guzlam mey malamba a ndəhay ba. Ama da akwar faa guzlam na, gwaguzlam mey maaya ma jənta ndəhay daa mey ŋga Gazlavay, mey maaya ma diyta ndəhay masa ma jəkfamakwar sləmay.

³⁰ Ka da kam cek ma car mevel a *Mesəfney ŋga Gazlavay ba, maja Mesəfney a, ara anda cek matəhkaya fa danɣay akwar ŋga sərey akwar na, ndəhay ŋga Gazlavay. Mesəfney a, a da njey a ray akwar haa ta pas masa Gazlavay ma da ləhdakwar daa cek hay maaya ba da bəla keɖe.

³¹ Mbəkdamara mepəley cəhwal ta mepey mey aa mevel da ray ndaw, leŋ mecey-mevel da ray ndaw. Mbəkdamara mekey baazlam da wuzlah akwar ta mekey mbaɖa fa ndaw. Cek hay malamba tabiya anda keɖe na, ŋgəcham dərəŋ ta ata. ³² Anda keɖe, təram ndəhay maaya, wudam vaw, səram dey-ceceh da wuzlah akwar. Mbəkdamatara mebərey ŋga ndəhay da wuzlah akwar anda Gazlavay ma mbəkdamakwara mebərey akwar ta fa Kəriste may.

5

Mey da ray menjey maaya ŋga ndəhay ma təba mey ŋga Yesu

¹ Wure keɖe, akwar na, bəza hay ŋga Gazlavay mawudtakaya. Da ray ŋgene, kam cek maaya anda

4:23 4.23 Rm 12.2 **4:24** 4.24 MC 1.26-27; 2Kwr 5.17; Kwa 3.10 **4:25** 4.25 4.16; Zak 8.16-17; Kwa 3.8-9 **4:26** 4.26 Jak 1.19-20 **4:28** 4.28 1Tes 4.11
4:29 4.29 5.4; Kwa 3.8; 4.6; Jak 3.10 **4:30** 4.30 1.13-14; Iz 63.10; Rm 8.23; Gal 5.25 **4:32** 4.32 Mt 6.14; 18.22-35; Kwa 3.12-13

Gazlavay ma ka. ² Daa menjey akwar tabiya na, wudam vaw da wuzlah akwar anda *Kəriste ma wudndakwar. Ta vølda ray anġa la nġa mæcey maja alækwa, anda gənwaw masa ndəhay ma hərmara zleezle nġa vøley a Gazlavay. Anda keċe, a mbafar a Gazlavay anda cek mezey maaya.

³ Akwar na, ndəhay nġa Gazlavay. Da ray nġene, da wuzlah akwar na, anġa maaya ba nġa ley vaw saw da palah, ta nġa key cek hay ma ka hwaray, leŋ nġa key dey fa cek nġa ndaw. Səkway nġa cek hay anda nġene na, kwa nġa cəney da wuzlah akwar ba səlak. ⁴ Ka daa guzlam mey hay saw ba, asaya, ka daa guzlam mey hay ma ka hwaray ba. Mey hay anda nġene na, maaya ba. Maaya na, ka kam suse a Gazlavay. ⁵ Sərmara maaya maaya, ndəhay ma lam vaw saw da palah, ta ndəhay ma kam cek hay ma ka hwaray na, fa da mbəzam aa slam masa Kəriste ta Gazlavay fa wam da vad na, daa ba. Fa da hətam cek hay maaya masa Gazlavay ma da vøldatara a ndəhay anġa hay na, daa ba. Asaya, ndəhay ma kam dey fa cek nġa ndaw na, fa da mbəzam aa slam aha daa ba may, maja da fa kam dey fa cek nġa ndaw na, a ragadamar a cek aha aa slam a nġa Gazlavay.

⁶ Ara maja cek hay malamba hay nġene, Gazlavay ma da cey mevel a ray ndəhay ma namar ray ba. Da ray nġene, ka da vølmatar cəved a ndəhay nġa batamakwar ta mey hay saw ba. ⁷ Kwa ka da cəmam ta ndəhay anda nġene ba səlak. ⁸ Zleezle na, akwar daa ləvaŋ. Ama wure keċe na, akwar daa slam-mewedey maja akwar macəmkaya ta Bay Mahura. Anda keċe, kam cek anda ndəhay ma njam daa slam-mewedey, ⁹ maja ndəhay ma njam daa slam-mewedey na, a kam cek maaya, a kam cek ta cəved e, a mbəzlam ba. ¹⁰ Səpam nġa key cek masa ma mbafar a Gazlavay. ¹¹ Ka da kam cek hay malamba anda ndəhay daa ləvaŋ ma kamara ba. Cek hay masa ata ma kamara nġene na, ara cek nġa tede. Ama wuzdamara cek masa ata ma kamara maaya ba ha nġene. ¹² Fara fara, kwa nġaa guzley da ray cek hay masa ata ma kamara ta mebey a nġene na, a key hwaray. ¹³ Ama da cek malamba maḃadakaya ta wuzwa sem a palah na, ndəhay a hətmar maaya maaya, a sərmara ara cek malamba. ¹⁴ Anda meləvey, daa slam-mewedey na, cek malamba a hətey maaya maaya. Ara maja nġene mey daha fa ləvey:

5:1 5.1 Mt 5.48; 1Jn 3.1 **5:2** 5.2 3.17-18; 4.2, 15-16; 1Kwr 8.1; 2Kwr 5.14; Gal 6.10; Føl 2.2; Kwa 2.2; 3.14-15; a vølda ray anġa: Gal 1.4; Heb 10.5-10 **5:3** 5.3 Kwa 3.5 **5:3** 5.3-5 Gal 5.19-21 **5:4** 5.4 4.29; Kwa 3.8 **5:5** 5.5 Rm 5.17
5:6 5.6 Rm 1.18; Ef 2.3; Kwa 2.4, 8; 3.6 **5:8** 5.8 ləvaŋ: 2.3, 11-12; 4.17-18, 22; Kwa 3.7; Tit 3.3; slam-mewedey: Jan 8.12; Kwa 1.13; 1Pi 2.9 **5:9** 5.9 Gal 5.22-23 **5:10** 5.10 Rm 12.2; 1Tes 5.22 **5:13** 5.13 Jan 3.20-21

«Kah, ndaw masa manakaya,
Slækdey daa ðar.

Kah, ndaw masa mamæckaya,
Slækðawa daa memæcey a.

Amba mewedey nga Këriste a sawa a ray akah.»

¹⁵ Da ray ñgene, wam vaw fa menjey akwar, ka da kam cek hay anda ndøhay manjar lenjesl hay ba. Ama kam cek hay anda ndøhay ta lenjesl maaya. ¹⁶ Da akwar ma høtam har la nga key cek maaya na, kamara, maja wure keðe na, ndøhay fa kam cek hay malamba kalah. ¹⁷ Anda keðe, ka da røzlam ba, ama søpam na, nga sørey cek maaya masa Bay Mahura ma wudfey fa akwar.

¹⁸ Ka da sam wuzam nga wey ba, maja wuzam na, a nøsa menjey nga ndaw. Ama vølmar cøved a *Mesøfney nga Gazlavay nga njej daa mevel akwar mandaw mandaw.

¹⁹ Zlam walay da wuzlah akwar ta meesømey, walay hay masa Mesøfney nga Gazlavay ma vølkwat gøðan nga zla. Zlam walay hay daa *Pøsam hay *, ta walay hay mekele ma hølma Bay Gazlavay. Zlamar walay hay nga hølma Bay akwar Mahura, hølmamara ta mevel akwar cøpa. ²⁰ Kamar suse a Gazlavay Papa aløkwa maja cek hay tabiya. Kamar suse mandaw mandaw ta mezøley nga Bay aløkwa Mahura Yesu Këriste.

Mey da ray menjey nga ñgwas ta zel e

²¹ Akwar ndøhay masa ma namar ray a *Këriste na, nam ray a ndaw a, a ndaw a da wuzlah akwar may.

²² Akwar ñgusay, namatar ray a zel akwar hay, ara cek ma mbafar a Bay Mahura. ²³ Maja zel na, ara *bay-ray nga ñgwas, anda Këriste ma key bay-ray nga ndøhay daa mecømey-ray anga. Mecømey-ray nga ndøhay anga hay a na, ara anda vaw anga. Ara Këriste he ma løhdata ndøhay daa mecømey-ray anga ha daa mebørey. ²⁴ Da ray ñgene, anda ndøhay daa mecømey-ray nga Këriste ma namar ray a Këriste he na, akwar ñgusay may, namatar ray a zel akwar hay daa cek hay tabiya masa akwar ma kamara.

²⁵ Akwar zel hay may, wudmata ñgwas akwar hay anda Këriste ma wudta ndøhay daa mecømey-ray anga. Ta vølda

5:14 5.14 Iz 26.19; 60.1; Rm 13.11; Jak 5.8 **5:16** 5.16 Kwa 4.5 **5:17** 5.17
1.17; Rm 12.2 **5:18** 5.18 MM 23.31-35; Rm 13.13 * **5:19** 5.19 Pøsam hay na,
ara walay hay masa Bay Davit ta ndøhay Jøwif hay mekele ma zlamata zleezle.
Walay hay a na, mawuzlalatakaya daa mey nga Gazlavay nga *Mejøwey-mey
Magurma. Ta mey Pølta a zølmara «*Jabuura*». **5:19** 5.19-20 Ps 33.2-3; Kwa
3.16-17; Heb 13.15 **5:21** 5.21 1Pi 5.5 **5:21** 5.21-6.9 Kwa 3.18-4.1; 1Pi
2.18-3.7; 1Tm 2.1-13; Tit 2.1-10; 1Jn 2.12-17 **5:22** 5.22 1Kwr 14.34-35 **5:22**
5.22-24 Kwa 3.18; Tit 2.5; 1Pi 3.1 **5:23** 5.23 1.22; 1Kwr 11.3

ray anġa la nġa məcey maja ata, ²⁶ amba a tərdata nġa ndəhay maaya manjar mebərey ta fa yam nġa *baptem, asaya, ta fa mey anġa. ²⁷ Kəriste a vəlda ray anġa na, amba a təbta ndəhay daa mecəmey-ray anġa anda ndaw ma ley kwakwa membey, asaya, amba ndəhay anġa hay a, a tərām ndəhay mapərtakaya, kwa mebərey ta cek maaya ba fa ata na, daa ba. ²⁸ Ara anda keċe, zel may, si a wuċa nġwas anġa anda anġa ma wuċa ray anġa. Ndaw ma wuċa nġwas anġa na, a key nġgene, a wuċey ray anġa. ²⁹ Fara fara, ndaw ma wuċa ray anġa ba na, daa ba. Ama kwa waawa fa zəmey cek, fa wey vaw ta ray anġa anda Kəriste ma wey vaw ta ndəhay daa mecəmey-ray anġa may. ³⁰ Kaa aləkwa na, ndəhay daa mecəmey-ray nġa Kəriste, ba diya? ³¹ Mawuzlalakaya daa mey nġa Gazlavay, a ləvey: «Maja nġgene, ndaw-mezəle a mbəkda papaha ta mamaha, amba a cəmam ta nġwas anġa, a tərām anda ndaw pal.» ³² Mey a keċe na, mey mahura mabadakaya da hwaċ a daha. Yah na, ya fa ləvkwar, mey a keċe aa guzley da ray Kəriste ta ndəhay daa mecəmey-ray anġa. ³³ Mey a faa guzley may nġgada akwar. Anja kwa waawa da wuzlah akwar nġa wuċa nġwas anġa anda anġa ma wuċa ray anġa. Akwar nġusay may, kwa waawa nġa nar ray a zel e.

6

Menjey nġa bəza hay da cakay papa ata hay ta mama ata hay na, kwara?

¹ Akwar bəza hay, akwar macəmkaya ta Bay Mahura, cənmatar mey a papakw akwar hay ta mamakw akwar hay maja ara cek maaya. ²⁻³ *Mewey nġa Gazlavay daha fa ləvey: «Natar ray nġgada ata papakw ta mamakw.» Mewey a keċe na, ara mewey nġeeme daa masa Gazlavay ma ləvey a da kandakwar cek maaya, da aləkwa ta səpkwa mey a la. Cek maaya ha na, ara «Ka hətām zazay la, ka njam la ga da bəla keċe.»

⁴ Akwar papañ hay may, ka da kam cek nġa catar mevel a bəz akwar hay ba. Ama, kətmata, sasərkadamata maaya maaya anda Bay Mahura ma wuċey.

Mey da ray beke hay ta ndəhay ma wamata

⁵ Akwar beke hay, namatar ray a bay akwar hay da bəla keċe ta mevel pal, cənmatar mey. Namatar ray anda akwar

5:25 5.25 3.19 5:25 5.25-28 1.23; Kwa 3.19; 1Pi 3.7 5:26 5.26 baptem: Rm 6.3-4; Tit 3.5; Heb 10.22 5:27 5.27 1.4; 2Kwr 11.2; Fəl 1.10; Kwa 1.22 5:30 5.30 1.23; 1Kwr 12.27 5:31 5.31 MC 2.24 5:32 5.32 CWJ 19.7 6:1 6.1 Kwa 3.20 6:2-3 6.2-3 Mew 5.16 6:4 6.4 Kwa 3.21

ma namar ray a *Kəriste. ⁶ Ka da cənmatar mey na, fa dey ata daada amba aa həmdamakwar ba, ama kam cek masa Gazlavay ma wudəy ta gədaŋ akwar cəpa, maja akwar na, anda beke hay ŋga Kəriste. ⁷ Kamatar sləra a bay akwar hay ta meesəmey anda ka kamara na, ŋgada Bay Mahura, ba na, ŋgada ndaw-magədaŋ ba. ⁸ Sərmara, da ndaw ta key sləra maaya la kwa anğa beke, kwa anğa beke ba na, Bay Mahura a pəlra mawurbay anğa la.

⁹ Yaw, akwar ndəhay ma wamata beke hay may, kərzamata beke akwar hay ta cəved e, ka da həlmatar dey ba. Si ka sərmara na, akwar ta beke akwar hay a na, Bay akwar pal da gazlavay da vad daha. Anğa na, a weley ndaw ta weley ba, a nəkta ndəhay tabiya letək fa mey anğa.

Ma da key vərəm ta bay-malula na, ta me?

¹⁰ Ehe, mey adaw mekele ŋgada akwar: Njam macəmkaya ta Bay Mahura amba ka hətam gədaŋ anğa masa mahura. ¹¹ Jəwmata vaw akwar hay ta cek hay ma ka vərəm masa Gazlavay ma vəldakwara. Anda kefe, ta pas masa bay-malula fa da batakwara na, ka hətam gədaŋ la ŋga fəna wewer anğa. ¹² Ya da kakwa vərəm na, ta ndəhay magədaŋ ba, ama ta *bay-ray hay ŋga mesəfney maaya ba hay masa ta gədaŋ ga, ma wam da ray cek hay daa ləvan da bəla kefe. Asaya, ya da kakwa vərəm na, ta mesəfney maaya ba hay ma wam da vad. ¹³ Ara maja ŋgene, lamata cek hay tabiya ma ka vərəm masa Gazlavay ma vəldakwara heyey. Anda kefe, da masa pas ŋga vərəm ta wuswa cay na, ka jaram la fa masa-gəra akwar hay. Ka da kam vərəm ta masa-gəra akwar hay a haa mendəvey a. Fa dəba ha, ka da lacam deŋ e! akwar bay-gula hay.

¹⁴ Jəwmata vaw akwar hay maaya maaya, anda meləvey, njam ta mey masa fara fara ta membərzley da hwaɸ a daa ba. Mey masa fara fara ha na, ara anda senter masa ndaw-sewje ma jəwda vaw amba a key vərəm ta gəra ba. Kam cek ta cəved e. Mekey cek ta cəved e na, ara anda zana ŋga bərey masa sewje ma bərdə fa dadak ŋga key vərəm. ¹⁵ Diyam vaw ŋga wuzey *Mey-maaya-mawiya ma handawa zazay. Mediyey vaw a na, ara anda tarak masa sewje ma pa a salay amba a jerey.

¹⁶ Daa cek hay masa akwar ma kamata cəpa na, pamara Yesu ŋga ndaw akwar fara fara mandaw mandaw. Ka

6:5 6.5-8 Kwa 3.22-25; 1Tm 6.1-2; Tit 2.9-10; 1Pi 2.18-21 **6:6** 6.6 1Kwr 7.22
6:8 6.8 2Kwr 5.10; Kwa 3.24-25 **6:9** 6.9 Kwa 3.25; 4.1; Jak 2.1 **6:10** 6.10
Jan 15.5; 1Kwr 16.13 **6:11** 6.11 Jak 4.7 **6:11** 6.11-17 2Kwr 10.4; 1Tes 5.8;
Iz 59.17 **6:12** 6.12 1.21; 2.2; 1Pi 5.8-9 **6:13** 6.13 Rm 13.12 **6:14** 6.14 Iz
11.5 **6:15** 6.15 Iz 52.7; Rm 10.15

kamara kōne na, ara anda mbaray masa sewje ma kərza a har. Ta mbaray a, ka da jaram fa ləvat hay tabiya ta awaw da mey a masa bay-malula ma da məlkwār ta anḡa. ¹⁷ Sərmara na, Gazlavay ta ləhdakwar cay. Meləhey a ḡgene na, ara anda jikwew ḡga bərey masa sewje ma pa a ray ḡga key vərəm. Mey ḡga Gazlavay masa Mesəfney anḡa ma vəldakwara na, kəzamarā maaya maaya, ara anda dələw ḡga key vərəm ta bay-malula.

¹⁸ Dəram danḡay mandaw mandaw ta ḡdaḡ masa *Mesəfney ḡga Gazlavay ma vəldakwara. Cacəfdamara Gazlavay ḡga jənkwar kwa daa meeme tabiya. Daa medərey-danḡay akwar na, ka da ḡram ba, mayad a da kakwar ba. Dəram danḡay maja ndəhay tabiya ma təbmara mey ḡga Gazlavay. ¹⁹ Daa medərey-danḡay akwar a na, sərfadamaya may, amba Gazlavay a balaya mey hay maaya maaya ta pas masa yah ma daa guzley fa mey ḡga ndəhay. Cacəfdamara Gazlavay amba yaa sərkadatara mey mabadakaya daa Mey-maaya-mawiya a ndəhay ta mandərzay daa dey daa ba. ²⁰ Yesu *Kəriste ta walaya la ḡga key ndaw anḡa meslərey, amba ya wuzda Mey-maaya-mawiya ha. Ara maja ḡgene, ata ma kəzlamaya aa fərsəne. Da ray ḡgene, dəram danḡay maja yah, amba ya wuzda Mey-maaya-mawiya fa mey ḡga ndəhay ta cəved e, anda Gazlavay ma wudəy.

Mey ḡga madagway-dakw

²¹ Ya fa wudəy amba ka sərmara menjey adaw fedə. Da ray ḡgene, Tisik masa məlma aləkwa daa cəved ḡga *Kəriste, a kadakwara sləra adaw ta menjey adaw ha la. Anḡa ndaw masa yah ma wuda kalah, anḡa fa key sləra ḡga Bay Mahura ta mevel pal. ²² Maja ḡgene, ya fa slərdakwara Tisik e amba ka sərmara menjey ala fedə, asaya, amba a vəlkwār ḡdaḡ.

²³ Akwar məlma adaw hay, anja Gazlavay Papa aləkwa ta Bay aləkwa Mahura Yesu Kəriste ḡga njadamakwar daa zazay, ḡga handamawa mewudəy-vaw a wuzlah akwar, asaya, ḡga njadamakwar daa metəbey-mey. ²⁴ Anja maaya ḡga Gazlavay ḡga njeḡ ta ndəhay tabiya ma wudmāra Bay aləkwa Mahura Yesu Kəriste ta mewudəy-vaw masa fara fara mendəvey ba.

6:17 6.17 Iz 40.2; Heb 4.12 **6:18** 6.18-19 3.14; Lk 18.1; SNM 4.29; Rm 15.30; Kwa 4.2-4 **6:20** 6.20 3.2; 2Kwr 5.20; Kwa 4.4 **6:21** 6.21-22 Tisik: SNM 20.4; Kwa 4.7-8; 2Tm 4.12; Tit 3.12 **6:23** 6.23 zazay, mewudəy-vaw: 2Kwr 13.11
6:24 6.24 Gal 6.18; 1Pi 1.8

Leeter masa Pawl ma wuzlalatar a Fəlepi hay Mey da ray Leeter ngada Fəlepi hay

Egəliz daa berney nga Fəlepi na, ara Pawl ma pa. A pa daa masa anğa fa pəkey nga dey cew nga wuzey Mey-maaya-mawiya (SNM 16.6-40). Pawl a wuzlalatar leeter keđe a Fəlepi hay na, daa masa anğa daa fərsəne. A wuđeý nga katar suse maja mejəney ata (1.13).

Har-gədan nga ndəhay a wulkam Pawl aa daa fərsəne da Rawm, siya a ləvam aa daa fərsəne da Sezere, siya hay saya a ləvam aa daa fərsəne da Efez.

Fəlepi hay a, a cəndamara Pawl aa daa fərsəne. Da ray nge ta', a cakalam dala, a slərdamara Epafərawdıt nga handara a Pawl. Asaya, a ləvmar a Epafərawdıt e nga njamawa ta Pawl amba a jəna daa sləra (4.10-20). Feteđe vaw ta car la ga a Epafərawdıt. Anğa ma key ngama la na, ta', Pawl a ləvar nga vəhwa fa Fəlepi hay nga katar suse.

Mey mahura nga Pawl daa leeter e keđe na, ara meý da ray Yesu (2.6-11). Yesu ta mbəkdərwa bay anğa ta mewedeý anğa sem da vad amba a nar ray a Gazlavay, a key cek anda Gazlavay ma wuđeý. Maja nge, Gazlavay ta', a pa nga ndaw mahura da ray cek hay tabiya. Maja nge, Pawl a ləvtar a Fəlepi hay nga bəsmara banay amba a hətam cek maaya ma fəna.

Kwa Pawl anğa daa fərsəne, ta sərey banay la ga maja Yesu, ama ta nge he cəpa, a ləvey anğa ta meesəmey maja aa ma pa Yesu nga ndaw anğa fara fara. Meesəmey a nge daha da wuzlah ndəhay masa macəmkaya ta Bay Mahura, kwa ata daa banay kwa ata ta gədan pəreh.

Daa leeter e keđe na, meý mekele mekele daha nga vəley gədan a ndəhay:

Mey da ray menjey nga Yesu (2.5-11)

Mey da ray menjey nga ndəhay nga Yesu (2.14-15)

Mey da ray ma daw fa meý fa meý daa meý nga Gazlavay (3.12-14)

Mey da ray meesəmey mandaw mandaw (4.4)

Ka da wulkam ba səlak (4.6, 19)

Mecey-har

¹ Ara yah Pawl leñ Timawte, ndəhay ma ka sləra nga *Yesu *Kəriste, ma wuzlalamakwara leeter keđe.

Ya wuzlalamakwara ngada akwar, ndøhay nga *Gazlavay tabiya daa berney nga Følepi, akwar masa macømkaya ta Yesu Køriste. Asaya, ta ngada akwar, *bay-ray hay, ta ndøhay ma jøna ndøhay nga Yesu.

² Anja Papa aløkwa, Bay Gazlavay, ta Bay aløkwa Mahura Yesu Køriste nga pøsmakwar mey, asaya, nga njadamakwar daa zazay.

Pawl a key ambahw a Gazlavay maja Følepi hay

³ Daa masa ya fa wulkey da ray akwar na, ya fa kar suse a Papay Bay Gazlavay maja akwar. ⁴ Daa masa ya fa dørey danjay a Gazlavay maja akwar na, ya faa sømey, ⁵ maja døga akwar ma tøbmara mey nga Yesu haa wure kefe, akwar fa jønmayya nga wuzey *Mey-maaya-mawiya. ⁶ Gazlavay ta zla sløra maaya ha la da wuzlah akwar. Ya søra fara fara a handa la fa mey fa mey, haa aa mendøvey a ta pas masa Yesu *Køriste ma da vøhwa. ⁷ Masa ya fa wulkey da ray akwar tabiya ta meesømey kaa na, ara cek maaya kalah, maja ya fa wudkwar kalah. Akwar ta vølmaya gødan la. Ngene, kwa wure kefe yah daa førsøne, kwa yah fa mey nga ndøhay ma ka sariya, ya fa wuzdatara Mey-maaya-mawiya na, ara mey fara fara. Maja ngene, akwar tabiya ta høtam mepøsey-mey nga Gazlavay la anda yah. ⁸ Ahaw, ya fa wudkwar tabiya ta mewudfey-vaw ma sawa ta fa Yesu Køriste. Gazlavay a søra, mey adaw kefe ara mey masa fara fara.

⁹ Daa medørey-danjay adaw a Gazlavay maja akwar na, ya faa cøfda amba ka wudam vaw ma føna ma føna, amba ka sømara mey masa fara fara maaya maaya, asaya, amba ka sømara cek masa maaya nga key. ¹⁰ Anda kefe, ka sømara nga wunkey cek maaya ta maaya ba la amba ta pas masa Køriste ma da vøhwa na, a høtfakwar, akwar ndøhay maaya, manjar mebørey. ¹¹ Asaya, ka da kam cek maaya ta cøved e mandaw mandaw ta gødan nga Yesu Køriste. Anda kefe, ndøhay a da namar ray a Gazlavay, a da hølmmara.

Cek ma tøka Mey-maaya-mawiya nga daw fa mey fa mey na, daha daw?

¹² Mølma adaw hay daa *mecømey-ray nga ndøhay nga Yesu, ya wudfey ka sømara kwa ya fa sørey banay na, banay a, ta jøna *Mey-maaya-mawiya la nga daw fa mey fa mey.

1:1 1.1 Timawte: 1Kwr 4.17 **1:3** 1.3 Rm 1.8-10; 1Kwr 1.4; 1Tes 1.2-3 **1:6** 1.6 2.13; pas masa Køriste ma da vøhwa: 1.10 **1:7** 1.7 2Kwr 7.3; Ef 3.1 **1:8** 1.8 1Kwr 16.24; 2Kwr 5.14 **1:9** 1.9 Kwa 1.9-10 **1:10** 1.10 Rm 12.2; Ef 5.27; Heb 5.14; pas masa Køriste ma da vøhwa: 1Kwr 1.8; 2Kwr 5.10; Føl 1.6; 2.16
1:11 1.11 Jan 15.8; Jak 3.17

¹³ Fara fara, ndəhay tabiya ma jədmara way ŋga bay, ta ndəhay mekele tabiya fede, a sərmara yah daa fərsəne na, maja *Kəriste. ¹⁴ Asaya, har-gədan ŋga məlma adaw hay ta pamara Bay Mahura Yesu la ŋga ndaw ata ma fəna ma fəna maja yah daa fərsəne. Da ray ŋgene, ta hətam gədan la ŋga wuzdamara mey ŋga Gazlavay fa mey fa mey, ta mandərzay daa dey daa ba.

¹⁵ Ya səra fara fara, ndəhay siya hay da wuzlah ata, a wuzdamara mey da ray Kəriste ta səleŋ maja yah, a wudam ŋga nəsmara mezəley adaw. Ama siya hay na, a wuzdamara mey a ta mevel maaya. ¹⁶ Ndəhay a, a kamara anda kefe na, maja fa wudmaya, a sərmara Bay Gazlavay ma slərđiwa fede amba ya wuzdatara Mey-maaya-mawiya na, ara mey masa fara fara. ¹⁷ Ndəhay masa səleŋ hay heyey, a wuzdamara mey da ray Kəriste na, a key ŋgene, a wudam ŋga key sləra ŋga Gazlavay ta cəved e ba, ama a wudam ŋga sərdamaya banay saya a ray masa yah daa fərsəne kefe.

¹⁸ Kwa a wuzdamara mey ŋga Kəriste ta mevel maaya, kwa ta mevel maaya ba na, mey adaw da hwad a me? Kwa a wuzdamara kwara kwara na, yah na, ya faa səmey maja mey ŋga Kəriste fa daw fa mey fa mey. Ahaw, yaa səmey la ma fəna, ¹⁹ maja ya səra, banay hay a ŋgene a da ka amba ya ləhey * maja medərey-dangay akwar ŋgada Bay Gazlavay maja yah, ta mejəney ma sawa ta fa Mesəfney ŋga Yesu Kəriste †.

²⁰ Cek masa yah ma səkwa, masa yah ma wufey kalah na, ya wufey hwaray a kaya da ray menjey adaw ba səlak. Anda kefe, ya wufey ya njeŋ ta gədan dəga wure kefe haa ŋga sərmataw amba ndəhay a namar ray a Kəriste maja yah, kwa yah ta dey, kwa a kədmaya vagay. ²¹ Ŋgada yah, cek mahura daa menjey adaw na, ara Kəriste. Yaw, meməcey na, ara cek adaw mehətey. ²² Ama da yah ta dey na, ya gwa ya key sləra maaya ŋga jəney ndəhay la saya. Wure kefe, ya səra cəved masa yah ma da ley saba. ²³ Ya fa wulkey cew cew. Ya wufey kalah na, ya mbəkda bəla kefe amba ya daw ya njam ta Kəriste. Ara cek maaya kalah. ²⁴ Ama cek mahura ma fəna saya na, si ya njeŋ ta dey amba ya jənkwar dğay. ²⁵ Maja ŋgene, ya fa səra

1:12 1.12 Ef 3.1; 2Tm 2.9 **1:15** 1.15-17 2Kwr 2.17 * **1:19** 1.19 ya ləhey: Pawl a ləvey mey letek ta masa daa Jəw 13.16. Ndəhay a wulkam Pawl fa wulkey da ray meləhey dasi har ŋga ndəhay ma nəsmara mezəley anğa, da daa ba, a gwa a bawa daa fərsəne, da daa ba, a daw a njeŋ ta Yesu da vad. † **1:19** 1.19 Mesəfney ŋga Yesu Kəriste: Ara Mesəfney ŋga Gazlavay. Ara Yesu Kəriste ma slərdərwa. Nəka Jan 14.16. **1:19** 1.19 Rm 15.30 **1:21** 1.21 Gal 2.20; Kwa 3.3-4 **1:23** 1.23 2Kwr 5.8-9

fara fara ya njeý da bəla keđe la dʒagay, asaya, ya səra ya da njeý ta akwar tabiya amba ya jənkwar ŋga təba mey ŋga Gazlavay ma fəna ma fəna, asaya, amba kaa səmam daa cəved aŋga. ²⁶ Ta pas masa yah ma da daw fa akwar saya na, ka həlmamara Yesu Kəriste la ma fəna saya, maja yah ta akwar.

Si menjeý akwar a key letek anda Mey-maaya-mawiya ma ləvey

²⁷ Cek mahura na, si menjeý akwar a key letek anda *Mey-maaya-mawiya ŋga *Kəriste ma ləvey. Kwa ya ta həteý har la ŋga daw fa akwar, kwa ya ta həteý har daa ba, ya wudəy ya cənda na, akwar manjatakaya maaya maaya daa mey ŋga Gazlavay, mevel akwar macəmkaya letek, akwar fa kədam vaw ta mevel pal, amba ndəhay a təbmara Mey-maaya-mawiya ha ta mevel maaya. ²⁸ Ka da zluram ta masa-gəra akwar hay ba səlak. Akwar ma zluram ba ŋgene na, fa wuzda masa-gəra akwar hay a ata daa cəved ŋga meezəfey, ama akwar na, daa cəved ŋga meləhey. Ara cek masa Gazlavay ma ka. ²⁹ Ahaw, Bay Gazlavay ta kakwar maaya la amba ka təbmara mey ŋga Kəriste. Ŋga təbey mey aŋga daada ba, ama amba ka səram banay maja aŋga may. ³⁰ Zleezle daa masa yah da cakay akwar na, akwar ma hətmaya la ya fa kədeý vaw ta masa-gəra hay daa sləra ŋga Yesu. Wure keđe, akwar fa cəndamara ya fa kədeý vaw saya. Akwar may fa kədam vaw daa sləra ha anda yah.

2

Kam cek anda Yesu Kəriste ma ka

¹ Akwar macəmkaya ta *Kəriste keđe na, fa vəlkwar gədaŋ, ba diya? Mewudəy-vaw aŋga fa vəlkwar gədaŋ, ba diya? Akwar macəmkaya ta *Mesəfney ŋga Gazlavay, ba diya? Akwar fa səram dey-ceceh fa ndəhay, ba diya? ² Anda keđe, ya fa ləvkwar, wudəam vaw, cəndamara dʒay akwar letek, cəndamara mevel akwar letek, mewulkey akwar letek, amba yaa səmey ma fəna ma fəna. ³ Ka da kam cek maja ray akwar daada ba. Ka da pamata ray akwar ŋga mahura hay ba, ama nəkmata ndəhay anda a fənmakwar, namatar ray. ⁴ Kwa waawa a da səpeý cek ŋga jəna ray aŋga daada ba, ama ŋga jəney ndəhay mekele da wuzlah akwar may.

⁵ Da wuzlah akwar na, kam cek anda Yesu Kəriste ma ka.

- 6 Anğa na, letek ta Gazlavay, ama ta nğene he cəpa,
ta səpey cəved amba a pa ray anğa
anda Gazlavay daa ba.
- 7 Ama mbak! a mbəkdərwa bay * anğa
ta mewedey anğa da vad,
a pa ray anğa nğa ndaw ma ka sləra nğa ndəhay,
a yawa, anğa ndaw-magədan.
- Daa masa anğa ndaw-magədan na,
8 a pa ray anğa nğa mecəhe,
a nar ray a Gazlavay mandaw mandaw
haa a vəlda ray anğa nğa məcey,
kwa fa hwadam mazlanğalakaya †.
- 9 Ara maja nğene, Gazlavay leŋ! a la aa slam da vad,
slam maaya ma fənta slam hay tabiya.
A par mezəley ma fəna mezəley nğa cek hay cəpa.
- 10 Da ray nğene, cek hay tabiya kwa da vad,
kwa da bəla keđe, kwa ndəhay maməctakaya hay,
a da həslmar ray a Yesu a,
a da ragadamata merenğwez ata hay fa mey anğa.
- 11 Asaya, ndəhay tabiya a da wuzdamara Yesu Kəriste na,
ara Bay Mahura.
Anda keđe, a da həlmamara Gazlavay Papan maja.

Wadəm anda wurzla hay ma wadəm da gazlavay da vad

12 Jam adaw hay, daa masa yah da wuzlah akwar na,
akwar fa cənmar mey a Gazlavay mandaw mandaw. Nğene
ara cek maaya. Ama kwa wure keđe yah da wuzlah akwar
daa ba keđe na, cənmar mey mandaw mandaw anda yah da
wuzlah akwar cənğa. Nğene ara cek maaya ma fəna saya.
Da ray nğene, kamara sləra masa Gazlavay ma vəldakwara
haa mendəvey a, ta meney ray ga fa mey anğa. Anda
keđe, akwar fa wuzdamara Gazlavay ta ləhdakwar sem.

13 Kamara anda keđe maja ara Gazlavay ma ka sləra anğa
daa mevel akwar, amba ka wudəm nğa key cek masa ma
mbafar, asaya, amba ka hətam gədan nğa key cek maaya
masa anğa ma wufey nğa key.

14 Daa menjey akwar tabiya na, ka da kam cek ta
meenğurey-mey ba, ta meyey-mey ba, 15 amba ka təram
nğa ndəhay masa mey da ray ata daa ba, manjar mebərey.

2:6 2.6 Jan 1.1-2; 17.5; Heb 1.3 * **2:7** 2.7 mbak! a mbəkdərwa bay anğa: Nəka Jan 17.5. **2:7** 2.7 Jan 1.14; Rm 8.3; 2Kwr 8.9; Heb 2.14, 17 † **2:8** 2.8 hwadam mazlanğalakaya: Nğa Jəwif hay na, meməcey fa hwadam mazlanğalakaya na, ara cek ma key hwaray kalah. Nəka Gal 3.13. **2:8** 2.8 Jan 10.17; Heb 5.8; 12.2 **2:9** 2.9 SNM 2.33; Ef 1.21; Heb 1.4 **2:10** 2.10-11 Iz 45.23; Jan 5.23; Rm 10.9; CWJ 5.13 **2:13** 2.13 1.6; Jan 15.5; Rm 7.18; 15.18; 1Kwr 12.6; 15.10; 2Kwr 3.5

Anda meləvey, da wuzlah ndəhay manjar nğa kətey ta ndəhay manəstakaya hay da bəla keđe na, ka da njam, akwar bəza hay nğa Gazlavay, mebərey fa akwar daa ba. Anda keđe, ka da wadəm da wuzlah ata anda wurzla hay ma wadəm da gazlavay da vad, ¹⁶ maja akwar fa wuzdamatara mey ma vəltar heter mendəvey ba. Da akwar fa kamara anda keđe na, ta pas masa *Kəriste ma da vəhwa, ngene ya gwa ya həsley ray la fa mey nğa Gazlavay maja akwar. Ngene, a wuzdərwa sləra adaw masa yah ma ka ta gədaŋ la a palah, ara sləra saw ba.

¹⁷ Metəbey mey akwar ara anda cek mevəley a Gazlavay. Kwa da ndəhay a kədmaya vagay, meməcey adaw a tərey anda cek mevəley a Gazlavay a dey cek masa akwar ma vəldamara a Gazlavay. Da anda keđe na, ya faa səmey, ya wufey amba akwar may kaa səmam anda yah. ¹⁸ Akwar may, maaya na, kaa səmam kəne, anda keđe, sasəmkwa daa slam a.

Mey da ray ata Timawte ta Epafərawdıt

¹⁹ Ya fa wulkey fara fara, da Bay Mahura Yesu ta wufey la na, daa dər a keđe ya slərda Timawte la fa akwar. Masa ta vəhwa cay na, a kadiwa mey masa aa ma cəndərwa fa akwar, amba mey a, a vəlya gədaŋ. ²⁰ Ndaw fa wulkey da ray akwar anda yah na, daa ba, si Timawte pal. Anğa na, fa wulkey fara fara da ray akwar. ²¹ Ndəhay siya hay tabiya a səpam cek si nğada ata gway, a wulkam da ray cek masa Yesu *Kəriste ma wufey ba. ²² Ama Timawte na, ka səmərə ya kam sləra cew e amba *Mey-maaya-mawiya a daw fa mey fa mey. Anğa ta jənya la ga anda bəzey ma kam sləra ta papaha. Da ray ngene, akwar ta saŋgalamara la, ka səmərə anğa ndaw ma ka sləra ta cəved e. ²³ Anda keđe, ya wufey nğa slərey fa akwar na, anğa. Ya da slərda na, ta pas masa ta dəslmərə sariya adaw cay. ²⁴ Asaya, ya wulkey da Bay Mahura ta wufey la na, yah may, gweegwe cay, ya daw fa akwar.

²⁵ Məlma aləkwa Epafərawdıt, ndaw masa akwar ma slərdamiwa amba a sawa a jənya daa cek hay masa yah ma wufey heyey na, ala ta kam sləra la cew e. Anğa ta jənya la, anda ndaw ma jəney mandala anğa daa vərəm. Ama wure keđe, ya wulkey si ya slərdakwara, ²⁶ maja matakəwam akwar tabiya fa kar, a wufey nğa hətkwar fa dey. Ta wulkey la ga, maja akwar ma cəndamara vaw ta

2:15 2.15-16 1.10; Mew 32.5; Dan 12.3; Mt 5.14; 10.16; 1Kwr 1.31; 2Kwr 1.14; Gal 2.1-2; Ef 5.8; 1Tes 2.19 **2:17** 2.17 Rm 15.16; 2Tm 4.6; 1Jn 3.16 **2:18** 2.18 3.1; 4.4 **2:19** 2.19 1.1 **2:20** 2.20 SNM 16.2 **2:21** 2.21 2Tm 4.10 **2:25** 2.25 4.18

car la. ²⁷ Fara fara vaw ta car la ga, nekədey a məcey. Ama Gazlavay ta sərfar dey-ceceh la, ta mbəlda sem. A sərey dey-ceceh na, fa anğa pal ba, ama fa yah may. A wudey amba ya sərey banay ma fəna ma fəna ba. ²⁸ Yaw, ya wudey ya slərdakwara fiyaw fiyaw amba da masa akwar ma hətmar la saya na, kaa səmam. Anda kecfə, yah kwa, ya gwa ya wulkey ga saba. ²⁹ Ta pas masa ta wusey la na, təbmara ta meesəmey ga, maja anğa məlmakw akwar daa mecəmey-ray nğa Bay Mahura. Həslmar ray nğada ndaw masa anda ngene, ³⁰ maja nekədey a məcey daa sləra nğa Kəriste. Ta təba la nğa vəlda kwa heter anğa amba a jənya maja akwar tabiya.

3

Gazlavay a pata ndəhay nğa ndəhay maaya fa mey anğa na, kwara?

¹ Məlma adaw hay, ehe, ya ləvkwar saya, sasəmam maja akwar macəmkaya ta Bay Mahura Yesu. Yah na, ya gərey ba nğa wuzlalakwar mey masa ya ta wuzdakwara sem, amba a jənkwar nğa njeý daa cəved maaya.

² Pam lenğesl ta ndəhay ma ka cek hay maaya ba hay, makəwtakaya anda gədey hay. Ata na, ara ndəhay ma ləvam si ka slam mandawal * amba Gazlavay a təbkwar anda ndəhay anğa hay. ³ Ndəhay maslakaya mandawal fara fara na, ara aləkwa, maja aləkwa ndəhay nğa Gazlavay. Aləkwa fa dərkwə danğay a Gazlavay ta gədan nğa Mesəfney anğa. Asaya, aləkwa fa həslkwa ray maja Yesu *Kəriste. Aləkwa fa pakwa lenğesl aləkwa a ray kwakwas masa ndəhay ma kamara na, daa ba. ⁴ Da kwakwas a ara cek maaya na, anja ngene yah may, ya pa lenğesl adaw la a ray a. Da ndaw a wulkey a ləhey la maja kwakwas a na, yah may, ya fəna ndaw a ngene la ga ta mewulkey.

⁵ Yah ndaw *İsrayel, daa səkway nğa Benjamen. Yah na, ndaw *Hebəre masa fara fara maja papay ta mamay na, ara ndəhay Hebəre hay fara fara. Ya yawa, ya key luma pal, a slamiwa mandawal. Ndəhay ma səpa *kwakwas nğa Mawiz fara fara na, yah da wuzlah ata, maja yah ndaw Fariza. ⁶ Ya ta səpa kwakwas nğa Mawiz la maaya maaya kalah haa ya sərdəta banay ga ta ndəhay ma təba mey nğa Yesu. Da ndaw a wulkey Gazlavay a pa nğa ndaw maaya fa

2:29 2.29 1Kwr 16.16, 18 **3:1** 3.1 2.18 * **3:2** 3.2 ndəhay ma ləvam si ka slam mandawal: Ndəhay a ara ndəhay maaya ba maja a slam mandawal nğa terey maaya fa Gazlavay ama mevel ata na, ta mbəfdamara daa ba. **3:2** 3.2 2Kwr 11.13 **3:3** 3.3 Rm 2.28-29 **3:4** 3.4 2Kwr 11.18, 21 **3:5** 3.5 Lk 1.59; Rm 11.1

mey anğa maja aa ma səpa kwakwas nğa Mawiz na, anja daa nğene, yah ndaw maaya, mey da ray adaw daa ba.

⁷ Cek hay masa yah ma kata zleezle nğene na, ya nəkta anda cek hay ma jənmaya. Ama wure kefe, yah ndaw nğa Kəriste kaa na, ya nəkta cek hay a anda cek hay nğa tede. ⁸ Fara fara, ya nəka kwa meeme anda cek nğa tede. Ya nəka anda cek nğa tede na, maja cek maaya ma fəna cek hay tabiya daha. Cek maaya ha na, ara mesərey Yesu Kəriste, Bay adaw. Ara maja anğa, yah ma mbəkdata cek hay tabiya, ya nəkta anda zay nğa tede, amba ya tərey ndaw nğa Kəriste, ⁹ ya njam ala macəmkaya cew e. Zleezle ya ləvey, yah, ndaw maaya fa mey nğa Gazlavay maja ya fa səpa kwakwas nğa Mawiz. Ama wure kefe, ya fa da ləvey kəne daa saba. Gazlavay a paya nğa ndaw maaya fa mey anğa na, maja yah ma təba mey nğa Kəriste. Ara Gazlavay ma paya nğa ndaw maaya fa mey anğa, maja yah ma pa Kəriste nğa ndaw adaw fara fara. ¹⁰ Kwa cek mekele masa yah ma wudəy na, daa ba. Ya wudəy na, si nğa sərey Kəriste ta gədan anğa masa ma sləkfdadərwa daa meməcey. Asaya, ya wudəy ya sərey banay anda anğa ma səra, ya wudəy ya tərey anda anğa daa masa anğa ma məcey. ¹¹ Da anda kefe na, ya wulkey Gazlavay a sləkfdadiwa la daa meməcey anda Kəriste.

Mekey gədan nğa daw fa mey fa mey daa cəved nğa Gazlavay

¹² Ya gwa ya ləvey ya ta tərey sem anda *Kəriste na, daa ba. Anda meləvey, ya gwa ya ləvey ya key mebərey saba na, kəne ba. Ama ya fa key gədan ma fəna ma fəna amba ya təba Kəriste ta har cew cew, maja Yesu Kəriste ta təbya sem nğada anğa. ¹³ Məlma adaw hay, ya gwa ya ləvey ya ta tərey sem anda Kəriste na, daa ba aran. Ama wure kefe, ya fa key gədan nğa key cek pal daha, ya wulkey da ray cek fa dəba adaw ba, ama ya wudəy nğa daw fa mey fa mey. Ya hway ta gədan anda ndəhay ma kam kwakurda, amba ya hətey cek masa ya ta hətər daa ba aran. ¹⁴ Ya hway ta cəved e, kasl aa mendəvey a, maja Gazlavay fa zəlya da vad amba a vəlđiwa cek nğa mahway adaw maja Yesu Kəriste.

¹⁵ Yaw, aləkwa masa mawiya daa cəved nğa Gazlavay saba kaa na, si ya kakwa kəne. Da akwar fa səpam nğa key cek wal na, Gazlavay a jənkwar la nğa səra cek masa maaya nğa key ta cəved e. ¹⁶ Cek mahura na, nakwa mandaw

mandaw taa cəvedŋ nga Gazlavay masa ngeeme aləkwa ma nakwa da hwađ a.

¹⁷ Məlma adaw hay, akwar tabiya kam cek anda yah. Nəkam dey fa ndəhay ma kam cek anda ala, kamara kəne.

¹⁸ Ndəhay ga menjey ata fa wuzdərwa ata na, masa-gəra hay nga Kəriste † ma məcey fa hwadam mazlanğalakaya. Ya ta kadakwara mey a keđe la dey ga. Wure keđe, ya fa kadakwara saya ta matəway daa dey. ¹⁹ Pas masa đar ata daa saba na, Bay Gazlavay a da kəzlata aa awaw magaza. A wuđam cəvedŋ nga Bay Gazlavay ba səlak, ama lenğesl ata, mapakaya mandaw mandaw da ray cek hay masa mevel ata ma wuđey. A kam cek hay ma ka hwaray, ama faa səmam da ray cek hay a. A wulkam si da ray cek hay da bəla keđe gway. ²⁰ Ama nğada aləkwa na, wulkakwa da ray slam da vadŋ, way aləkwa menjey fara fara. Aləkwa fa səkwakwa Yesu Kəriste, Bay aləkwa Mahura ma da sawa da vadŋ. Ara ndaw ma da ləhdandakwar. ²¹ Vaw aləkwa masa ta gədaŋ daa ba, ma da məcey keđe na, Yesu a da tərda nga vaw masa ta gədaŋ, letek ta vaw anğa. A da tərda vaw aləkwa na, ta gədaŋ masa anğa ma da wey da ray cek hay tabiya ta anğa.

4

¹ Da ray ngene, məlma adaw hay mawuđtakaya, njam maaya maaya daa cəvedŋ nga Bay Mahura anda yah ma ləvkwar. Ya fa wuđkwar kalah, matakam akwar fa kaya, ya wuđey nga hətkwar fa dey saya. Ya faa səmey da ray akwar, maja akwar ma wuzdamara sləra adaw ara sləra maaya.

Cek hay maaya nga key

² Waa Evawdi ta Sintik, nğusay daa *mecəmey-ray nga ndəhay nga Yesu, ya kakwar ambahw, cəmam đay maja akwar macəmkaya ta Bay Mahura. ³ Yaw, kah Sizige *, məlma adaw maaya masa yah ma kakwa sləra cew e, ya kaka ambahw may, jənta nğusay a amba a njam daa zazay. Ya ləvka anda keđe na, maja ala ta kəđam vaw la ga bama ta nğusay a daa sləra, amba ndəhay mekele mekele a təbmara Mey-maaya-mawiya. Ala ta nğusay a, ya ta kam sləra la

3:16 3.16 Gal 6.15-16 **3:17** 3.17 1Kwr 4.16; 1Pi 5.3 † **3:18** 3.18 masa-gəra nga Kəriste: Ndəhay a wulkam Pawl aa guzley da ray ndəhay ma ləvam ata ndəhay nga Yesu ama mey da ray meməcey nga Yesu a tərdata ndəhay maaya fa Gazlavay na, a cəndamara ba. A wulkam si ndaw a səpa kwakwas nga Mawiz amba a tərey maaya fa Gazlavay. Nəka 3.2. **3:18** 3.18 1Kwr 1.23; Gal 6.12
3:19 3.19 Rm 16.18 **3:20** 3.20 Ef 2.6; Heb 13.14 **3:21** 3.21 Rm 8.29; 1Kwr 15.25, 28, 43-53; Kwa 3.4 **4:1** 4.1 1Tes 2.19-20 * **4:3** 4.3 Sizige: Ara mezəley ta mey Gərek ma wuđey nga ləvey «mandala daa sləra».

bama ta ata Kəlemanj lej ndəhay mekele hay ma jənmaya daa sləra ha. Gazlavay ta wuzlala mezəley ata sem cəpa aa dərəwel ŋga ndəhay ma da hətam heter mēndəvey ba.

⁴ Sasəmam mandaw mandaw maja akwar macəmkaya ta Bay Mahura. Ya fa ləvkwar saya, sasəmam.

⁵ Kam cek maaya amba ndəhay tabiya a nəkmakwar akwar ndəhay meekwed-mey hay. Kamara kəne maja gweegwe † Bay Mahura a vəhwa. ⁶ Ka da wulkam ba sələk, ama daa cek hay tabiya ma fənkwar ray na, kadamara a Gazlavay, dərmar danğay, cacəfdamara ŋga jənkwar, kamar suse. ⁷ Da akwar fa kamara anda kefe na, Gazlavay a njadakwar la daa zazay, maja akwar macəmkaya ta Yesu *Kəriste. Zazay a, a fəna leŋgesl ŋga ndaw. Da zazay a daha na, akwar fa da wulkam daa ba.

Kam cek hay maaya

⁸ Məlma adaw hay, ya wufey ya ndəvda mey adaw dəbə. Ya ləvkwar, pamara leŋgesl akwar a ray cek hay maaya, masa ndəhay maa səmam da ray a. Anda meləvey, mey masa fara fara, cek masa ndəhay maa həmdamara, cek masa ta cəved e, cek manjar ŋga zləbey, cek ma mbafatar a ndəhay, lej cek masa ndəhay maa guzlam da ray a maaya.

⁹ Cek hay a tabiya masa yah maa sərkadakwara, lej masa akwar ma təbmara, masa akwar ma cəndamara fa yah, ta masa akwar ma hətmar fa yah na, kadamara sləra. Da akwar ta kadamara sləra ta cek hay a cəpa la na, Gazlavay, ndaw ma njadata ndəhay daa zazay, a njey la ta akwar.

Pawl a katar suse a Fəlepi hay

¹⁰ Ya fa kar suse a Bay Mahura Yesu, ya faa səmey ga maja akwar ta hətam cəved ŋga jənmaya la saya. Zleezle, akwar fa wulkam da ray adaw fara fara ŋga jənmaya, ama menjey ga, akwar ta hətam cəved daa ba, si wure kefe.

¹¹ Ya ləvkwar anda kefe na, a key ya rəkey maja viya fa kaya ba. Yah na, ya taa sərkey sem ŋga njey ta meesəmey da ray cek da har adaw gway. ¹² Anda meləvey, kwa yah daa viya, kwa zleley adaw ga, ya səra menjey kəne. Kwa cek mezəmey daha, kwa may fa caya, kwa ya ta cek hay ga ma fənmaya ta gədanj, kwa cek a wusya ba na, ya taa sərkey menjey ta zazay cay. Kwa daa banay, kwa daa wiya,

4:3 4.3 SNM 3.5 **4:4** 4.4 2.18 † **4:5** 4.5 gweegwe: Mey Gərek a ləvey: «Bay Mahura gweegwe.» Ndaw a gwa ŋga cənda anda mawuzlalakaya, da daa ba, a gwa ŋga cənda «Bay Mahura aa gweegwe ta aləkwa mandaw mandaw».

4:5 4.5 1.10; Rm 13.11-12; 1Kwr 16.22; Heb 10.25; Jak 5.8; 1Tes 5.1-2 **4:6** 4.6 Ps 37.5; Mt 6.25; 1Pi 5.7 **4:7** 4.7 Jan 14.27; Kwa 3.15 **4:8** 4.8 Rm 12.17-18

4:9 4.9 3.17; 1Kwr 13.11 **4:11** 4.11 1Tm 6.6-8; Heb 13.5

¹³ ya gwa ya key cek tabiya maja *Kəriste fa vəlyə gədaŋ.

¹⁴ Ta ŋgene he cəpa na, akwar ta jənmaya la ga daa banay adaw cəŋga.

¹⁵⁻¹⁶ Akwar, Fəlepi hay, sərfadamara zleezle masa yah ma zlar ŋga wuzey *Mey-maaya-mawiya ŋgeeme fetede heyey. Daa masa yah da Tesalawnik na, akwar ta slərmaya cek hay la dey ga ŋga jənya. Masa yah ma mbəkdərwa hwayak ŋga Masadəwan tabiya la na, ndəhay daa Egəliz hay mekele ta jənmaya daa ba, si akwar gway. ¹⁷ Ka da wulkam a key ya səpey dala fa akwar ba, ama ya wufey ka kamara anda kede maja ya səra Bay Gazlavay a pəskwar mey la maja cek hay a masa akwar ma vəldamiwa. ¹⁸ Ya fa ləvkwar, cek hay tabiya masa akwar ma slərdamiwa ta har Epafərawdit na, ta wusdərwa la. Cek aha ta wusya la haa a fəna masa yah ma wufey. Wure kede na, cek ma həcyə daa saba. Cek hay masa akwar ma vəldamiwa ha na, aa maaya kalah a mbafar a Gazlavay anda cek hay mevəley ŋgada ŋga masa mezey maaya. ¹⁹ Gazlavay aləkwa ŋga ta zleley masa ma ndəvey ba. Da ray ŋgene, cek masa da har akwar daa ba na, a vəlkwar la, maja akwar macəmkaya ta Yesu Kəriste. ²⁰ Anja ndəhay ŋga həlmamara Gazlavay Papa aləkwa mandaw mandaw ŋga sərmataw. *Amen.

Mey ŋga madagway-dakw

²¹ Camatar har a ndəhay ŋga Gazlavay tabiya macəmkaya ta Yesu *Kəriste. Məlma aləkwa hay daa *mecəmey-ray ŋga ndəhay ŋga Yesu masa ala bama fedə a camakwar har may. ²² Asaya, ndəhay ŋga Yesu tabiya, a camakwar har. Fara fara ma camakwar har a ga kalah na, ndəhay ma ka sləra da way bay da *Rawm.

²³ Anja maaya ŋga Bay Mahura Yesu Kəriste ŋga njeý ta akwar.

Leeter masa Pawl ma wuzlalatara a Kwalaws hay Mey da ray

Leeter ngada Kwalaws hay

Leeter e keđe na, Pawl a wuzlala daa masa anğa daa fərsəne (4.3, 10, 18). Ndəhay ga a wulkam anğa daa berney nğa Rawm. Pawl a wuzlalatara leeter e keđe ngada ndəhay nğa Yesu daa berney nğa Kwalaws. Ara Pawl ma handa Mey-maaya-mawiya fa ndəhay a ba, ama ara Epafəras (1.7). Pawl a wuzlala leeter e na, maja Epafəras ta sawa la fa Pawl a, a ləvar ndəhay fa batamata ndəhay ta meesərkey maaya ba (Fəl 1.23). Ara ata Tisik ta Awnezim ma handamara leeter e a ndəhay da Kwalaws (4.7-8). Daa nğene ta wuzlalar la ngada ndəhay nğa Yesu daa berney nğa Efez leŋ a Filemanjw may.

Da wuzlah ndəhay daa Egəliz da Kwalaws a na, ndəhay mekele mekele daha faa sərkadam ndəhay saw. Jəwif hay siya aa sərkadam ndəhay saw, a ləvam: «Da ndaw fa təba mey nğa Yesu fara fara na, si ndaw a, a səpa kwakwas nğa Jəwif hay may.» Gərek hay na, a wulkam saw, a ləvam Gazlavay, anğa maaya, ama ara anğa ma wa bəla ba. A wulkam Yesu na, ndaw ta vaw anda aləkwa ba, da daa ba, anğa ndaw saw gway. Pawl a wuzlala leeter keđe nğa ləvtar mewulkey nğa Jəwif hay ta Gərek hay nğene na, anğa maaya ba.

Daa leeter e keđe Pawl a ləvtar mey masa fara fara na, ara Kəriste, ndaw masa Gazlavay ma wala nğa ləhdata ndəhay. Yesu Kəriste aa ta gədanj da ray cek hay tabiya, «maja ara ta fa anğa, Gazlavay ma ləmta cek hay tabiya da vad ta cek hay tabiya da bəla...» (1.16). Kəriste ta məcəy la fa hwadam mazlanjalakaya, ta sləkɔfawa sem daa meməcəy. Anda keđe, a wuzwa aa ta gədanj da ray cek hay tabiya (2.14-15). Si Jəwif hay a təbmara mey nğa Yesu amba a ləham, maja kwakwas ata fa da ləhdata daa ba (2.20-23). Daa mendəvey nğa leeter e na, Pawl aa guzltar da ray menjey maaya nğa ndəhay nğa Yesu, kwa da wuzlah ndəhay daa Egəliz, kwa da way ata hay, kwa da wuzlah ndəhay da bəla.

Daa leeter e keđe na, mey mekele mekele daha nğa vəley gədanj a ndəhay:

Yesu na, a lawa Gazlavay kərad! (1.13-20)

Menjey ta Yesu (2.6-7)

Mezley walay a Gazlavay (3.16)

Mekətey ngada ngusay, ngada zel hay, leŋ ngada bəza hay (3.18-21)

Mecey-har

¹ Ara yah, Pawl, ma wuzlalakwara leeter keŋe, yah ndaw masa *Gazlavay ma wala nga key *ndaw-meslərey nga *Yesu *Kəriste. Ya wuzlalamara na, ala ta məlma aləkwa Timawte.

² Leeter e keŋe, ara ngada akwar, ndəhay nga Gazlavay daa berney nga Kwalaws, akwar, məlma adaw hay macəmkaya ta Kəriste, masa ma təbmara mey anga ta mevel pal.

Anja Papa aləkwa, Bay Gazlavay, nga pəskwar mey, nga njadakwar daa zazay.

Pawl a kar suse a Gazlavay maja Kwalaws hay

³ Daa masa ala fa dəram dangay a Gazlavay, Papan nga Bay aləkwa Mahura Yesu *Kəriste, maja akwar na, ala fa kamar suse mandaw mandaw. ⁴ Ya kamar suse na, maja ya cəndamara akwar fa pamara Yesu Kəriste nga ndaw akwar fara fara. Asaya, ya kamar suse maja akwar fa wudmata ndəhay nga Gazlavay cəpa. ⁵ Yaw, ka təbmara mey nga Yesu, ka wudam vaw da wuzlah akwar na, maja akwar fa səkwmarə cek hay masa ka sərmara fara fara ka hətam la, cek hay masa Gazlavay ma diykwara da vad. Zleezle masa akwar ma cəndamara *Mey-maaya-mawiya, masa fara fara na, akwar taa sərkam la da ray cek hay masa akwar ma da hətmatar da vad a. ⁶ Mey-maaya-mawiya ha, fa daw fa mey fa mey da bəla tabiya, fa mbəŋda mevel nga ndəhay amba a kam cek maaya. Anda keŋe, fa mbəŋdakwara mevel akwar amba ka kam cek maaya may. A mbəŋdakwara mevel akwar a na, dəga ta pas masa akwar ma cəndamara mey a, ta masa akwar ma sərmara fara fara, maaya nga Gazlavay aa da ray akwar.

⁷ Ara Epafəras, mandala aləkwa masa yah ma wudkwa kalah, maa sərkadakwara mey da ray maaya nga Gazlavay a. Ya kam sləra daa slam a. Ara ndaw ma key sləra nga Kəriste ta cəved e aa slam ala. ⁸ Ara anga maa guzldar da ray mewudəy-vaw da wuzlah akwar masa *Mesəfney nga Gazlavay ma vəldakwara.

⁹ Maja ngene, dəga ta pas masa Epafəras ma wuzdandara mey da ray akwar na, ala ta mbəkdamara medərey-dangay a Gazlavay maja akwar daa ba. Yaa cəŋdamara Gazlavay

amba cek masa ma mbafar na, ka sɛrmara maaya maaya. Asaya, yaa cɛfdamara Gazlavay amba Mesɛfney anɔa a vɛlkwar lenɔesl, a jɛnkwar nɔa cɛney cek hay da ray Gazlavay maaya maaya. ¹⁰ Anda keɛɛ, daa menjey akwar, ka da kam cek hay masa Bay Mahura Yesu ma wuɛɛy, ka da kam cek hay ma mbafar mandaw mandaw. Maja nɔgene, ka da kam slɛra wura wura tabiya maaya, ka da sɛrmara Gazlavay ma fɛna ma fɛna. ¹¹ Ya dɛram dangay saya na, amba Gazlavay, ndaw manjakaya daa slam-mewewey, a vɛlkwar gɛdan nɔa mahura, amba ka bɛsmara banay ta dɛk-vaw. ¹² Anda keɛɛ, ka da kamar suse a Gazlavay, Papa alɛkwa, ta meesɛmey. Ara nɔa ma wurkwara cɛved, amba akwar may, ka hɛtam cek masa aa ma bɛda nɔgada ndɛhay nɔa hay daa slam nɔa mawafakaya.

¹³ Papa alɛkwa a badandakurwa daa lɛvan nɔa bay-malula, a pandakwar a har Bɛzey nɔa mawudkaya kalah.

¹⁴ Ara Bɛzey nɔa ha ma vɛlda heter nɔa, amba a pɛskandakwar dasi har nɔa bay-malula, asaya, Gazlavay a mbɛkdandakwara mebɛrey alɛkwa ta fa Bɛzey nɔa ha.

Yesu Kɛriste, nɔa mahura da ray cek hay tabiya

¹⁵ Kwa ndaw pal ta hɛtar Gazlavay daa ba, ama Bɛzey nɔa, Yesu *Kɛriste, masa ndɛhay ma hɛtmar na,

a lawa Gazlavay a, a key cek anda nɔa.

Yesu a, ara Bɛzey mahura nɔa Gazlavay, ara nɔa mahura da ray cek hay tabiya masa Gazlavay ma lɛmtɛrwa.

¹⁶ Nɔa mahura maja ara ta fa nɔa, Gazlavay ma lɛmta cek hay tabiya da vad ta cek hay tabiya da hwayak,

cek hay tabiya masa alɛkwa ma gwakwa nɔa nɛktakwa ta dey

lenj cek hay tabiya masa ma hɛtam ba.

Ta fa Bɛzey nɔa ha, aa ta lɛmtɛrwa cek hay masa ta gɛdan la,

kwa maslan nɔa hay da vad, kwa bay hay da bɛla,

ta *bay-ray hay nɔa mesɛfney maaya ba hay lenj kuley hay.

Yaw, Gazlavay a lɛmtɛrwa cek hay a tabiya na,

ta fa har nɔa Bɛzey nɔa ha,

asaya, a lɛmtɛrwa nɔgada Bɛzey nɔa ha *.

1:9 1.9-10 Ef 1.17; Fɛl 1.9 **1:10** 1.10 Ef 4.1; 2.10; Fɛl 1.27 **1:11** 1.11-12 Rm 5.2; Ef 1.18 **1:13** 1.13-14 Jan 5.18; Lk 22.53; SNM 26.18; Ef 1.6, 7, 21; 2.2; 6.12 **1:15** 1.15 Jan 1.18; 2Kwr 4.4; 1Tm 6.16; Heb 1.3 **1:16** 1.16 ta fa har[...]nɔgada Bɛzey nɔa: Nɛka 1Kwr 8.6ta Rm 11.36. **1:16** 1.16 1.13; Jan 1.3, 19; Heb 1.2

17 Kəriste he na, anğa daha dəga bəla ta zley daa ba aran.
Ara ta fa anğa, cek hay tabiya mapatakaya
daa slam ata hay ta cəved e.

18 Ara anğa bay-ray nğa ndəhay daa Egəliz.
A wey da ray ndəhay daa Egəliz a
anda ray nğa ndaw ma wey da ray vaw anğa.
Ndəhay daa Egəliz na, ara anda vaw anğa.

Heter mawiya na, a zley ta fa anğa.
Anğa na, ara Bəzey mahura,
ara anğa ma sləkəfawa teesed daa meməcey.
Maja ngene, a fənta cek hay tabiya.

19 Kəriste anğa mahura da ray cek hay tabiya na,
maja ta mbafar la a Gazlavay amba mevel nğa Kəriste
he
a key letek ta mevel anğa.

20 Asaya, Gazlavay ta slərdərwa Bəzey anğa ha la
amba a cəmtar dəy kwa a cek hay da vad,
kwa a cek hay da hwayak, cəpa ta anğa.

Ta handawa zazay la, a handərwa na,
ta fa mambaz nğa Bəzey anğa ma mbədfwa
fa hwadam mazlanğalakaya.

21 Zleezle akwar na, ta mbədfmar dəba la a Gazlavay,
akwar masa-gəra anğa hay maja akwar ta mewulkey maaya
ba, asaya, maja akwar ma kam cek hay maaya ba. 22 Ama
wure kefe, Gazlavay ta cəmkwar dəy la ta fa Bəzey anğa,
maja Bəzey anğa ha ta tərey ndaw-magədan la, ta məcey la
fa hwadam mazlanğalakaya. A cəmkwar dəy na, amba ka
təram ndəhay maaya fa mey anğa manjar mebərey, masa
ndaw a gwa ma mbədfkwar ray ba. 23 Anda kefe, si ka
pamara Yesu nğa ndaw akwar fara fara mandaw mandaw,
ka da njam ta mevel cew cew ba, ama njam ta mevel
pal. Cek hay masa ka sərmara fara fara ka hətam la da
vad na, səkwmara, ka da mbəkdamara ba. Cek hay masa
akwar ma səkwmara ha na, ara anda akwar ma cəndamara
daa *Mey-maaya-mawiya. Mey-maaya-mawiya ha, ara mey
masa ndəhay ma wuzdamara a ndəhay da bəla cəpa. Kwa
yah, Pawl, sləra adaw na, ara nğa wuzey mey a may.

Sləra masa Pawl ma ka nğada Egəliz

24 Wure kefe, ya faa səmey da ray banay ma sawa a ray
adaw maja akwar. Zleezle *Kəriste ta sərey banay la. Yah fa
sərey banay may maja mecəmey-ray nğa Egəliz masa anda

1:17 1.17 Jan 1.1; 8.58 **1:18** 1.18 bay-ray nğa ndəhay daa Egəliz: 2.19; 3.15;
Ef 1.22-23; teesed: SNM 4.2; 26.23; 1Kwr 15.20; CWJ 1.5 **1:19** 1.19 2.9-10; Jan
1.16; Ef 1.23 **1:20** 1.20 Rm 3.25-26; Ef 1.9-10, 21; 2.13-16 **1:21** 1.21-22 Rm
5.10; Ef 2.12-13; 5.27 **1:23** 1.23 2.7; Ef 3.17; 1Tm 3.16; Heb 3.6

vaw nga Kəriste he. Ya serey banay a na, amba ya ndəvda sləra anɡa. ²⁵ Ya ta terey ndaw ma ka sləra nɡada ndəhay daa Egəliz la, maja ara Gazlavay ma vəlđiwa sləra ha a har adaw amba ya wuzdakwara mey anɡa tabiya nɡada akwar masa *Jəwif hay ba hay. ²⁶ Mey a na, zleezle mabadakaya. Ndəhay a sərmara mey a ba. Ama wure keđe, Gazlavay ta wuzdərwa la a ndəhay anɡa hay. ²⁷ Gazlavay a wufey nɡa wuzdatara cek masa aa ma wufey nɡa ka. Cek aha na, ara cek maaya kalah ma handawa mepəsey-mey a ray səkway hay tabiya. Mey a masa mabadakaya ma wuzwa a palah na, ara Yesu Kəriste ma njeý aa mevel akwar. Ara maja Yesu a, akwar fa sərmara Gazlavay a da mbəzđakwar aa slam anɡa maaya.

²⁸ Anda keđe, mey masa ala ma wuzdamara a ndəhay tabiya na, ara mey da ray Kəriste. Da ray nɡene, ala fa kətmata ndəhay tabiya, ala faa sərkadamatar cek hay ta lenɡesl masa Gazlavay ma vəldandara. Ya kam sləra anda keđe na, amba ndəhay tabiya masa daa cəved nɡa Kəriste, a tərəm ndəhay manɡaratakaya daa mey nɡa Gazlavay. ²⁹ Ara maja keđe, ya key sləra ta gəđan tabiya masa Kəriste ma vəlđiwa, amba ya ndəvda sləra ha.

2

¹ Yaw, ya wufey na, ka sərmara ya fa key gəđan maja akwar Kwalaws hay, maja ndəhay da Lawdise, len maja ndəhay mekele masa ma sərmaya ba. ² Ya fa key gəđan, maja akwar tabiya na, amba ya vəlkwara gəđan nɡa təbey mey nɡa Gazlavay ma fəna ma fəna, asaya amba ka wudam vaw da wuzlah akwar ta mevel pal. Ya fa key gəđan maja ya wufey ka sərmata cek hay masa Gazlavay ma wuzdatərwa da ray Kəriste, amba ka wulkam cew cew da ray cek hay a ba. Ya wufey ka sərmara maaya maaya anda keđe na, amba Gazlavay a pəskwar mey ta mepəsey-mey mekele mekele tabiya. Anda keđe, ka da sərmara mey mabadakaya nɡa Gazlavay maaya maaya. Mey mabadakaya ha na, ara Kəriste. ³ Ara ta fa Kəriste he, ya gwakwa nɡa hətakwa lenɡesl, ya gwakwa nɡa sərkwa cek maaya masa mabadatakaya da har anɡa.

⁴ Yaa guzlkwar anda keđe na, amba ndaw a batakwara ta mey hay ma mbəđda lenɡesl nɡa ndaw ba. ⁵ Kwa yah da wuzlah akwar daa ba na, ama mevel adaw aa ta akwar mandaw mandaw cənɡa. Ya faa səmey maja ya sərə, akwar

1:24 1.24 2Kwr 1.5; 11.23-29; Ef 3.13 **1:25** 1.25 Ef 3.1-3 **1:26** 1.26-27 2.2; 4.4; Ef 3.6 **1:27** 1.27 maaya nɡa Gazlavay: 3.4; Rm 5.2; Ef 1.18 **1:28** 1.28 Ef 4.13 **1:29** 1.29 Ef 3.20; Fəl 4.13 **2:2** 2.2 1.26-27; Ef 5.2 **2:3** 2.3 MM 2.4-5; 1Kwr 1.24, 30; Ef 3.19 **2:4** 2.4 2.8; Rm 16.18

fa kam cek hay ta cøved e, asaya, akwar fa pamara Køriste nga ndaw akwar fara fara, akwar fa wulkam cew cew daa ba.

Pam lenjesl ta ndøhay ma wudam nga batamakwar

⁶ Wure kede, akwar ta tømara Yesu *Køriste la amba a key Bay akwar Mahura. Anda kede, njam, kam cek anda anga ma wudey. ⁷ Yaw, njam ta anga, anda wudez masa slaslalay a dørej daa vøged. Tømara mey nga Yesu ma føna ma føna anda ata maa sørkadamakwara. Kamar suse a Gazlavay mandaw mandaw.

⁸ Pam lenjesl ta ndøhay maa guzlam saw maja a da batamakwar ta meesørkey ata hay. Meesørkey a, a sawa ta fa Køriste ba, ama a sawa ta fa kwakwas hay masa ndøhay ma kamara lenj ta fa cek hay mekele mekele masa ndøhay ma namatar ray da bøla kede. ⁹ Si ka jøkam slømay fa Køriste gway, maja kwa daa masa anga ma njej da bøla na, a lawa Papaha Bay Gazlavay, mevel anga na, letek ta nga anga. ¹⁰ Akwar macømkaya ta Køriste ngene na, ka høtam heter mawiya ma sawa ta fa anga la, heter e ngene a hækwar daa ba. Køriste he anga mahura da ray ndøhay, anga mahura da ray kuley hay, anga mahura da ray maslanj hay nga Bay Gazlavay da vad, anga mahura kwa da ray cek hay tabiya.

¹¹ Zleezle na, Gazlavay ta løvtar la a *Jøwif hay nga slam mandawal amba a wuzdamara fara fara ata ndøhay anga hay. Ama daa mecømey akwar ta Køriste na, Gazlavay ta kakwar cek mekele la anda *mesley mandawal a. Cek aha na, ara membødey mevel akwar maaya ba ma høldakwar nga key mebørey. Gazlavay a ka ta fa har nga ndaw ba, ama ta fa Køriste. ¹² Masa ata ma kamakwar *baptem na, ta pas ngene ara anda akwar daa cøvay ta Yesu Køriste daa slam a. Daa masa akwar fa bamawa daa yam nga baptem e na, anga anda akwar ta sløkdamawa daa memøcey sem ta Køriste he, maja ka sørmara Gazlavay aa ta gødanj nga sløkfdatørwa ndøhay daa memøcey. Gazlavay ta wuzdørwa gødanj anga ha la ta pas masa aa ma sløkfdatørwa Køriste daa memøcey.

¹³ Zleezle na, akwar anda ndøhay mamøctakaya maja akwar ta mebørey, asaya, maja akwar da wuzlah ndøhay nga Gazlavay ba, ka søpmara *mewey nga Gazlavay ba. Ama wure kede, Gazlavay ta sløkfdadakurwa sem ta Køriste amba a vølkwar heter mawiya.

Gazlavay ta mbækdandakwara mebørey alækwa hay sem cəpa.

¹⁴ Zleezle na, alækwa ta mebørey

maja alækwa ma zləbkwa mewey ŋga Gazlavay.

Ama Gazlavay ta mbækdandakwara mebørey alækwa ha sem.

A mbækdandakwara na,

anda ndaw ma pøley døvaz da ray ndaw mekele.

A mbækdandakwara ta fa Kəriste

masa aa ma mæcey fa hwadam mazlanḡalakaya.

¹⁵ Maja memæcey anḡa ha na,

Gazlavay ta təba gədanḡ da har kuley hay

ta da har madərlam hay ŋga bay-malula sem.

Ta key bay-gula la da ray ata.

Ta wuzda la fa mey ŋga ndəhay tabiya a fənta ta gədanḡ.

¹⁶ Yaw, anda keḡe, ka da jəkam sləmay fa ndaw ma wuḡey ŋga həbkwar ray ta mey ŋga kwakwas da ray cek mezəmey ta da ray cek mesey ba. Asaya, ka da jəkam sləmay fa ndaw ma həbkwar ray da ray mekey gwagway ŋga Jəwif hay ba, kwa da ray mekey gwagway ŋga maslawa ŋga kiya ba, kwa da ray *pas meməskey-vaw ba. ¹⁷ Kwakwas hay a ŋgene na, ata anda meezeḡ ŋga cek fara fara ma da sawa. Cek aha fara fara na, ara Kəriste. ¹⁸ Ndəhay mekele fa kam cek amba ndəhay a wulkam ata ndəhay meekweḡ-mey hay. Ata fa dəram danḡay a maslanḡ hay ŋga Gazlavay. Mandaw mandaw ata fa zlapam, a ləvam Gazlavay fa wuztar cek. Da fa ləvmakwar akwar daa cəveḡ maaya ba na, ka da təbmara ba! Ndəhay a ŋgene, ata fa zlapam ŋga tede, mewulkey ata na, ara mewulkey ŋga ndaw-magədanḡ. ¹⁹ Ndəhay a ŋgene, ata macəmkaya ta Kəriste ba. Kəriste na, ara *bay-ray ŋga ndəhay daa Egəliz. A wey da ray ndəhay daa Egəliz a anda ray ŋga ndaw ma wey da ray vaw tabiya. Ndəhay ma təbmara mey anḡa na, ata anda vaw anḡa. Ndəhay macəmkaya ta anḡa na, fa hətam gədanḡ ta fa anḡa. Ata macəmkaya daa slam a na, anda vaw ŋga ndaw mazəvkaya ta dəmbazl hay. Ndəhay a, fa hətam gədanḡ ta fa Gazlavay ŋga təbey mey anḡa ma fəna ma fəna, anda anḡa ma wuḡey.

²⁰⁻²¹ Ka sərmara, akwar maməctakaya ta Kəriste. Da ray ŋgene, gədanḡ ŋga cek hay mekele mekele masa ndəhay ma namatar ray da bəla keḡe fa da wam da ray akwar daa saba. Yaw, akwar fa njam, ka kam cek hay anda ndəhay ma sərmara Yesu ba na, maja me? Kwakwas ata hay fa ləvam:

“Ka da lamara cek keƒe ba!”, “Ka daa cəkdamara cek keƒe ba!”, da daa ba, “Ka da wusmara cek keƒe ba!” Ka namatar ray a kwakwas ata hay a ηgene na, maja me? ²² Da ndəhay fa səpmara kwakwas hay a ηgene na, kwakwas hay a, aa zədam la. Kwakwas hay a na, ara mey hay matəktakaya ta meesərkey masa ndəhay magədaŋ ma kamara. ²³ Fara fara, ndəhay a wulkam kwakwas hay a, ara cek maaya ma vəley leŋgesl, maja fa dərəm dangay anda mevel ata ma wuƒey, fa nam ray, fa sərəm banay ta vaw ata hay. Da ray ηgene, ndəhay a nəkmata kwakwas hay a anda cek maaya. Ama kwakwas hay a, a gwamara ηga jənmara ndaw ba, maja a gwamara ηga jənmara ndaw ηga wey da ray leŋgesl anga ba, a gwamara a təkmarā ndaw ηga key cek malamba ba.

3

Gazlavay a vəlkwar menjey mawiya ta fa Kəriste

¹ Ka səpmara Gazlavay ta sləkɗadandakurwa sem daa meməcey ta *Kəriste daa slam a. Da ray ηgene, pamara leŋgesl akwar a ray cek hay ηga Gazlavay da vad, daa slam masa Kəriste manjakaya da hwad a, ta har-zəmay ηga Gazlavay. ² Mandaw mandaw wulkam da ray cek hay ηga Gazlavay da vad a. Ka da wulkam da ray cek hay da bəla ba.

³ Ka pamara leŋgesl akwar a ray cek hay da vad a na, maja menjey akwar zleezle daa masa akwar ta səpmara Kəriste daa ba araŋ na, ta ndəvey sem, ama wure keƒe, menjey akwar mawiya aa mabadakaya da har Kəriste maja akwar macəmkaya ta Gazlavay. ⁴ Ta pas masa Kəriste, ndaw ma vəlkwar heter, ma da wuzwa vaw na, akwar may, ka da wuzmawa vaw ta anga daa mewedey anga.

⁵ Yaw, da ray ηgene, mbəkdamara mekey cek hay maaya ba da bəla. Anda meləvey, mbəkdamara meley vaw saw, mewulkey ηga key cek maaya ba ma nəsa ndaw, mesəpey ηga key cek hay maaya ba ma ka hwaray, mesəpey ηga key cek malamba, asaya, mekey dey fa cek ηga ndəhay. Mekey dey fa cek ηga ndəhay na, ara anda mepey cek aha, aa slam a ηga Gazlavay. ⁶ Keƒe na, ara cek hay maaya ba hay masa Gazlavay ma da ceɣ mevel a ray ndəhay ma namar ray ba.

⁷ Zleezle daa masa akwar fa kam cek hay malamba fa mey ηga Gazlavay na, menjey akwar a, ta key la anda ηga ata ha may.

2:20-21 2.20 2.9-10; Gal 4.3-5, 9 **2:20-21** 2.21-22 Iz 29.13; Mt 15.9; 1Tm 4.3; Heb 13.9 **3:1** 3.1 2.12; Ef 1.20 **3:2** 3.2 Mt 6.33 **3:3** 3.3 Rm 6.4; 2Kwr 5.14 **3:4** 3.4 Gal 2.20; Fəl 1.21; mewedey ηga Gazlavay: 1.27; Fəl 3.21; 1Kwr 15.43; 1Jη 3.2 **3:5** 3.5 Rm 6.6, 11; Gal 5.24; Ef 4.19; 5.3 **3:5** 3.5-8 Gal 5.19-21
3:6 3.6 Ef 5.6 **3:7** 3.7 Rm 1.18; Ef 5.8

⁸ Ama wure keɗe, mbəkdamara mecey-mevel, mekey cek nga ceɗ mevel a ndaw, mekey maagway, mecəɗey-vaw, meeguzley mey saw. Mbəkdamata cek hay keɗe tabiya.

⁹ Asaya, ka da mbərzlam da wuzlah akwar ba, maja akwar ta mbəkdamara menjey akwar zleezle sem, asaya, maja akwar ta mbəkdamara sləra masa akwar ma kamara zleezle sem may. ¹⁰ Akwar ndəhay mawiya. Gazlavay ta vəndakwar menjey mawiya la, aa fa dīya menjey a mandaw mandaw amba a tərey anda nga anɗa, amba ka sərmara Gazlavay maaya maaya. ¹¹ Anda keɗe, cek ma wunkata ndəhay *Jəwif hay ta səkway hay mekele daa saba, cek ma wunkata ndəhay maslatakaya mandawal ta ndəhay manda-slam mandawal na, daa saba. Kwa ndəhay marəzltakaya hay, kwa ndəhay ma səra cek ba, kwa beke hay, leŋ ndəhay masa beke hay ba na, ata letək fa mey nga Gazlavay. Ama cek mahura na, ara Kəriste. Anɗa daa mevel nga ndəhay anɗa hay tabiya.

¹² Gazlavay a walakwar, a tərdakwar ndəhay anɗa hay. Anɗa fa wudkwar. Da ray nɗene, daa menjey akwar cəpa na, səram dey-ceceh fa ndəhay, njam ta mevel maaya, kam sləra ta meney ray, təram ndəhay meekweɗ-mey, ka da cam mevel saw saw ba. ¹³ Ka da cam mevel da wuzlah akwar ba. Da ndaw ma kaka cek maaya ba la na, mbəkdamara mebərey anɗa ha. Mbəkdamatara mebərey nga məlmakw akwar hay anda Bay aləkwa Mahura Yesu ma mbəkdamakwara mebərey aləkwa hay may. ¹⁴ Cek mahura na, wudam vaw da wuzlah akwar, maja da akwar fa wudam vaw da wuzlah akwar na, ka da njam macəmkaya tabiya daa slam a ta mevel pal. ¹⁵ Anɗa zazay nga Kəriste nga wa mevel akwar. Gazlavay a zəlkwar nga nɗey daa slam a na, amba ka hətam zazay anɗa ha nɗene. Kamar suse mandaw mandaw. ¹⁶ Pamara mey nga Kəriste aa mevel akwar maaya maaya. Sasərkam da wuzlah akwar nga nɗey maaya ta Gazlavay. Kətam vaw da wuzlah akwar ta leŋgesl fara fara. Zlamar walay nga *Pəsam hay, zlamar walay nga həlma, asaya, zlamar walay hay masa Mesəfney anɗa ma kadakwara. Zlamar walay a Gazlavay ta mevel akwar cəpa, kamar suse. ¹⁷ Daa cek hay cəpa masa akwar ma kamara ta mey hay cəpa masa akwar maa guzlam na, kamara ta mezəley nga Bay Mahura Yesu. Kamara ta mekey suse a Gazlavay, Papa aləkwa, maja Yesu.

3:8 3.8 Ef 4.29; 5.4 **3:9** 3.9 Ef 4.22, 25 **3:10** 3.10 MC 1.26-27; Ef 4.24
3:11 3.11 2.11; Gal 3.28; 1Kwr 12.13 **3:12** 3.12-15 Ef 4.2-4 **3:13** 3.13 Ef
4.32 **3:14** 3.14 Ef 5.2 **3:15** 3.15 1.18, 20; 2Kwr 13.11; Ef 1.23; 4.4 **3:16**
3.16-17 Ef 5.19-20; Heb 13.15

Mey da ray menjey nga ndəhay nga Yesu

¹⁸ Akwar ŋusay, namatar ray a zel akwar hay, maja meney ray na, ara cek maaya ma mbafar a Bay Mahura Yesu.

¹⁹ Akwar zel hay may, wudmata ŋgwas akwar hay, ka da kam həma a ray ata ba.

²⁰ Akwar bəza hay, cənmatar mey a papakw akwar hay ta a mamakw akwar hay daa cek hay cəpa, maja mecəney-mey akwar a ŋgene na, a mbafar a Bay Mahura Yesu.

²¹ Akwar papan hay, ka da kam cek ŋga catar mevel a bəz akwar hay ba, maja har ata a da rəwey ŋga key cek maaya.

²² Akwar beke hay, namatar ray a bay akwar hay da bəla kede daa cek hay tabiya. Ka namatar ray na, daa masa ata da cakay akwar ŋga mbafatar daada ba, ama namatar ray kwa da masa ata da cakay akwar daa ba may. Sasəkar jak, kamatar sləra ta mevel pal maja akwar fa namar ray a Bay aləkwa Mahura Yesu. ²³ Kwa sləra wura wura masa akwar ma kamara na, kamara ta mevel pal, kamara sləra ha anda ŋgada Bay aləkwa Mahura, ba na, anda ŋgada ndaw-magədan ba. ²⁴ Ka səmara Bay Mahura masa akwar ma kamar sləra na, ara *Kəriste. Ara Bay Mahura ha ma da pəlkwara mawurbay ŋga sləra akwar a, a da vəldakwara cek masa aa ma bada da vad ŋgada ndəhay ŋga hay. ²⁵ Ama ndəhay ma kam maagway na, Gazlavay a pəltara la anda sləra masa ata ma kamara. Gazlavay na, a weley ndaw ta weley ba.

4

¹ Akwar bay hay, kamatar cek a beke akwar hay ta cəved e. Sərfadamara Bay akwar da vad daha may.

Ndəhay nga Gazlavay a da kam na, me?

² Mandaw mandaw dərmar dangay a Gazlavay. Mayad a da kakwar daa medərey-dangay akwar ba, asaya, kamar suse.

³ Daa medərey-dangay akwar, sərfadamandar may, cacəfdamara Gazlavay ŋga diyndara cəved maaya ŋga wuzey mey ŋga amba yaa sərkadamatara mey mabadakaya da ray *Kəriste a ndəhay. Ka səmara, wure kede yah daa fərsəne na, maja mey a. ⁴ Dəram dangay a Gazlavay ŋga jənya daa mewuzey mey a, amba yaa guzltar a ndəhay na, a cəndamara mey a maaya maaya, anda Gazlavay ma ləvyə ŋga ka sləra ha.

⁵ Wam vaw maaya maaya fa menjey akwar da wuzlah ndəhay ma təbmara mey nga Yesu Kəriste ba. Mandaw mandaw da masa akwar ta hətam har la na, jənmata ndəhay a nga sərmara mey nga Kəriste may. ⁶ Da masa akwar faa guzlam na, gwaguzlam mey hay maaya masa ndəhay ma wudam nga jəkey sləmay fa vəda. Anda kefe, da ndaw aa cəfdakwar da ray Yesu na, ka sərmara mey masa akwar ma da mbəddamara.

Mecey-har nga madagway-dakw

⁷ Tisik, masa məlma aləkwa daa cəved nga Yesu *Kəriste, ndaw masa yah ma wuda kalah, anga fa key sləra nga Bay Mahura Yesu ta mevel pal. Ala cew ala ndəhay ma ka sləra nga Bay Mahura ha. Tisik e na, a kadakwara cek hay cəpa la da ray adaw. ⁸ Maja ngene, ya fa slərdakwara amba ka sərmara menjey ala fefe, asaya, amba a vəkwar gədan. ⁹ Ya fa slərdana ta Awnezim, məlma aləkwa mawudkaya daa *mecəmey-ray nga ndəhay nga Yesu. Anga na, ara ndaw ma səpa cəved nga Yesu Kəriste ta mevel pal. Ara ndaw ma sawa fa akwar. Ata cewete, a kadamakwara mey da ray cek hay fefe la cəpa.

¹⁰ Aristarke, masa anga wure kefe daa fərsəne ta yah, fa cakwar har. *Mark, ndaw daa səkway nga *Barnabas, fa cakwar har may. Ara ndaw masa yah maa guzlkwar da ray a heyey. Yaw, da masa ta wusey la fa akwar na, təbmara maaya maaya. ¹¹ Jesəwe *, masa ata ma zəlmara Justus, fa cakwar har may. Ndəhay maakar a kefe, ara Jəwif hay ma təbmara mey nga Yesu masa ma jənmaya daa sləra amba ndəhay a təbmara Gazlavay nga bay ata. A vəlmaya gədan ga. Wure kefe, Jəwif hay mekele fa jənmaya fefe na, daa ba, si ara ndəhay maakar a kefe, ma jənmaya gway.

¹² Epafəras, ndaw akwar, fa cakwar har may. Anga ndaw ma ka sləra nga Yesu Kəriste fara fara. Mandaw mandaw fa dərey dangay a Gazlavay ta mevel pal maja akwar. Fa dərey dangay amba ka mbəkdamara metəbey mey nga Yesu ba, ka təram ndəhay mangaratakaya daa mey nga Gazlavay, asaya, amba ka sərmara maaya maaya cek masa ma mbafar a Gazlavay. ¹³ Fara fara ya fa səra Epafəras aha fa sərey banay daa sləra maja akwar, asaya, maja ndəhay nga Yesu da Lawdise ta ndəhay da Hirapawlis. ¹⁴ *Luk, dakwter masa ala ma wudmara kalah, leŋ Demas fa camakwar har may.

4:5 4.5 Ef 5.16 **4:6** 4.6 Ef 4.29; 1Pi 3.15 **4:7** 4.7 Tisik: Ef 6.21-22 **4:9** 4.9 Awnezim: Flm 10-12 **4:10** 4.10 Aristarke: SNM 19.29; 27.2; Flm 24; Mark: SNM 12.12 * **4:11** 4.11 Jesəwe: Ta mey Gərek mawuzlalakaya «Yesu». Jesəwe ara Yesu ta mey Hebəre. **4:12** 4.12 Epafəras: 1.7; Flm 23 **4:14** 4.14 Luk: 2Tm 4.11; Flm 24; Demas: 2Tm 4.10

¹⁵ Camatar har a ndəhay nga Yesu da Lawdise, asaya, camar har a Nimfa, leŋ a ndəhay nga Yesu ma kusam da way aŋga.

¹⁶ Masa akwar ma jaŋgamara leeter masa yah ma wuzlalakwa keɗe la na, slərdamatara a ndəhay daa Egəliz da Lawdise amba a jaŋgamara may. Ndəhay daa Egəliz da Lawdise nga slərdamakwara leeter masa yah ma wuzlalatara amba ka jaŋgamara may. ¹⁷ Ləvmar a Arkip nga pey leŋgesl fa sləra masa Bay Mahura Yesu ma vəldara, nga key gədaŋ amba a ndəvda.

¹⁸ *Ara yah, Pawl, ta har aɗaw, ma wuzlalakwa mecey-har a keɗe.* Sərfadamara yah na, yah daa fərsəne. Anja maaya nga Gazlavay nga njeɗ ta akwar.

**Leeter masa Pawl ma wuzlala
ngeeme a
Tesalawnik hay
Mey da ray
Leeter masa Pawl ma wuzlala
ngeeme a Tesalawnik hay**

Leeter e keɗe, ara Pawl ma wuzlalatara a Tesalawnik hay. Ndəhay ga a wulkam ara ɗerewel mawuzlalakaya teesɗ da ray siya hay daa Mejəwey-mey Mawiya. Pawl a wuzlalamara leeter e na, ata bama ta ata Silas leŋ Timawte. Ara maja ngeene, Pawl ma ləvey: «Ala, ala» dey weewe (1.1).

Tesalawnik na, ara berney masa ndəhay fa kam filaw ga da hwaɗ a. Ara maja ngeene, Jəwif hay ta ndəhay daa hwayak hay mekele mekele daa berney a daha. Masa Pawl aa daa berney a na, Jəwif hay siya ta təbmara meesərkedey aŋga daa ba. Da ray ngeene, mevel a catar, a wuɗam mey aŋga ba. Anda keɗe, ndəhay daa mecəmey-ray nge Yesu fetede, a səhwdamata ata Pawl ta Silas aa berney nge Bere ta tavad (SNM 17.10). Fa dəba ha, Pawl a daw a Aten.

Masa Pawl aŋga daa berney nge Aten na, ta', a slərda Timawte fa Tesalawnik hay amba a cəndərwa mey da ray menjey ata daa cəved nge Yesu (3.1-3). Timawte a vəhwa a hətfar Pawl da Kwarinti. A ləvar a Pawl, ndəhay da Tesalawnik fa təbmara mey nge Yesu ma fəna ma fəna. Ta ngeene he cəpa na, ndəhay a, a wulkam Yesu a da vəhwa ta vara. Ndəhay ma məcam masa aŋga ta vəhwa daa ba aran na, a da diyam ama? Pawl ta mbəɗɗatara la aa mey ata ha daa leeter e keɗe daa fasəlawal 4 ta 5. Ama teesɗ na, a ləvtar a wuɗta kalah, a wuɗey nge hətatar fa dey saya (1.2-3.13). Asaya a vəltar gədaŋ nge njeŋ daa cəved nge Yesu, nge daw fa mey fa mey daa cəved e (4.1-12).

Daa leeter e keɗe na, mey mekele mekele daha nge vəley gədaŋ a ndəhay:

Menjey maaya ma mbafar a Gazlavay (4.1)

Yesu a vəhwa la (4.13-5.11)

Cek hay maaya masa ndəhay nge Yesu ma da kamara (5.12-22)

Cek masa Gazlavay ma wuɗey fa ndəhay (5.16-18)

Mecey-har

¹ Ara yah, Pawl, ma wuzlala leeter keɗe. Ala ta ata Silas leŋ Timawte, ya camakwar har, akwar ndəhay daa Egəliz

da Tesalawnik, akwar masa macəmkaya ta *Gazlavay Papa aləkwa leŋ ta Bay aləkwa Mahura *Yesu *Kəriste.

Anja Gazlavay ŋga pəskwar mey, asaya ŋga njadakwar daa zazay.

Pawl a kar suse a Gazlavay maja Tesalawnik hay

² Daa masa ala fa dərəm danğay a Gazlavay na, ala fa wulkam da ray akwar mandaw mandaw, ala fa kamar suse a Gazlavay maja akwar tabiya. ³ Asaya, daa medərey-danğay ala a Gazlavay Papa aləkwa na, ala fa sərfadamara sləra masa akwar ma kamara, maja akwar fa pamara Yesu ŋga ndaw akwar fara fara. Ala fa sərfadamara akwar fa kam sləra ta gədan maja ka wudmara Yesu, asaya, akwar fa pam leŋgesl mandaw mandaw a ray cek masa ka sərmara ka hətam la ta fa Bay aləkwa Mahura Yesu *Kəriste.

⁴ Məlma adaw hay daa *mecəmey-ray ŋga ndəhay ŋga Yesu, ya sərmara Gazlavay a wudkwar kalah, asaya, ta walakwar la ŋga key ndəhay anğa hay. ⁵ Sərmara daa masa ala fa wuzdamakwara *Mey-maaya-mawiya na, mey a, a wusey fa akwar na, ara ta mey meeguzley daada ba, ama ta gədan ŋga *Mesəfney ŋga Gazlavay may. Mey masa ala maa guzldamara na, ya sərmara ara mey fara fara. Daa masa ala da wuzlah akwar na, ka sərmara menjey ala. Ya ta kam cek la ŋga jənkwar.

⁶ Akwar na, akwar fa kam cek anda ala, asaya, akwar fa kam cek anda Bay Mahura Yesu. Akwar ta səram banay la ga, ama ka ta təbmara mey ŋga Gazlavay la cəŋga, ka təbmara ta meesəmey, meesəmey masa Mesəfney ŋga Gazlavay ma vəldakwara. ⁷ Anda keđe, akwar fa kam cek maaya haa ndəhay ŋga Gazlavay tabiya da Masadəwan leŋ da Akay a nəkam dey fa akwar, a kamara kəne. ⁸ Fara fara mey ŋga Bay aləkwa Mahura a zlawana, fa akwar haa a wusey fa ndəhay da Masadəwan leŋ da Akay. Asaya, kwa ndəhay daa wura, daa wura, fa cəndamara akwar fa təbmara mey ŋga Gazlavay. Da ray ŋgene, ala fa daa guzlmatar da ray metəbey-mey akwar na, daa saba,

⁹ maja ndəhay a fa zəldamakwar sləmay, a ləvam akwar ta təbmandar la maaya maaya daa masa ala da wuzlah akwar. Asaya, a ləvam akwar ta mbəkdamara metey kuley sem amba ka səpam Gazlavay masa ta dey, Gazlavay masa fara fara. ¹⁰ Anda keđe, akwar fa səkwamara Bəzey ŋga Gazlavay ma da vəhwa da gazlavay da vad. Bəzey a na,

⁶ Akwar na, akwar fa kam cek anda ala, asaya, akwar fa kam cek anda Bay Mahura Yesu. Akwar ta səram banay la ga, ama ka ta təbmara mey ŋga Gazlavay la cəŋga, ka təbmara ta meesəmey, meesəmey masa Mesəfney ŋga Gazlavay ma vəldakwara. ⁷ Anda keđe, akwar fa kam cek maaya haa ndəhay ŋga Gazlavay tabiya da Masadəwan leŋ da Akay a nəkam dey fa akwar, a kamara kəne. ⁸ Fara fara mey ŋga Bay aləkwa Mahura a zlawana, fa akwar haa a wusey fa ndəhay da Masadəwan leŋ da Akay. Asaya, kwa ndəhay daa wura, daa wura, fa cəndamara akwar fa təbmara mey ŋga Gazlavay. Da ray ŋgene, ala fa daa guzlmatar da ray metəbey-mey akwar na, daa saba,

⁹ maja ndəhay a fa zəldamakwar sləmay, a ləvam akwar ta təbmandar la maaya maaya daa masa ala da wuzlah akwar. Asaya, a ləvam akwar ta mbəkdamara metey kuley sem amba ka səpam Gazlavay masa ta dey, Gazlavay masa fara fara. ¹⁰ Anda keđe, akwar fa səkwamara Bəzey ŋga Gazlavay ma da vəhwa da gazlavay da vad. Bəzey a na,

⁹ maja ndəhay a fa zəldamakwar sləmay, a ləvam akwar ta təbmandar la maaya maaya daa masa ala da wuzlah akwar. Asaya, a ləvam akwar ta mbəkdamara metey kuley sem amba ka səpam Gazlavay masa ta dey, Gazlavay masa fara fara. ¹⁰ Anda keđe, akwar fa səkwamara Bəzey ŋga Gazlavay ma da vəhwa da gazlavay da vad. Bəzey a na,

1:1 1.1 Silas: 2Kwr 1.19; 2Tes 1.1; 1Pi 5.12; Timawte: 1Kwr 4.17; Tesalawnik: SNM 17.1 **1:2** 1.2-3 2.13; Fəl 1.3; Kwa 1.3; 2Tes 1.3; 2.13 **1:3** 1.3 5.1-2 **1:4** 1.4 2Tes 2.13, 16 **1:5** 1.5 1Kwr 4.20 **1:6** 1.6 SNM 17.5-9; 2Kwr 6.10; 2Tes 3.7, 9 **1:8** 1.8 Rm 1.8 **1:9** 1.9 Jan 17.3; SNM 14.15

ara Yesu masa Bay Gazlavay ma slækfadərwa daa meməcey heyey. Ara anğa ma da ka amba Gazlavay a ceɣ mevel a ray aləkwa ba ta pas masa Gazlavay ma da ka sariya.

2

Mey da ray sləra nğa Gazlavay masa Pawl ma ka da Tesalawnik

¹ Məlma ala hay daa *mecəmey-ray nğa ndəhay nğa Yesu, akwar ta ray akwar, ka sərmara ala ma diyam fa akwar heyey na, ara nğa tede ba. ² Asaya, ka sərmara daa masa ala ma wusam fa akwar daa ba aran na, ndəhay daa berney nğa Fəlepi ta sərdamandar banay la, ta cədmandar la. Masa ala ma wusam la fa akwar na, ndəhay ga ta kam həma la a ray ala may. Ama Gazlavay ta vəlndar gədan la, amba ya wuzdamakwara Mey anğa maaya mawiya cənğa.

³ Masa ala fa wuzam meɣ da ray cəveɔ maaya a ndəhay na, ya wuzdamara na, ta membərzley da hwad a daa ba, asaya, ala fa kam sləra ta mevel maaya, ala fa batam ndəhay daa ba. ⁴ Ama Gazlavay ta sanğalandar la, ta səra la, ala ndəhay anğa hay fara fara. Anda keɔe, ta vəldandara *Mey-maaya-mawiya ha la amba ya wuzdamara a ndəhay. Maja nğene, yaa guzlam na, amba a mbafatar a ndəhay ba, ama amba a mbafar a Gazlavay ma səra mevel ala.

⁵ Ka sərmara daa masa ala da wuzlah akwar na, ala faa guzlam meɣ maaya maaya nğa mbafakwar nğa fəcmakwar daa ba, ala fa wulkam amba ya batam cek fa ndəhay na, daa ba. Mey masa ala ma kadamara, kwa Gazlavay na, a səra ara meɣ fara fara. ⁶ Ala ta wudam amba kwa waawa a həlmandar na, daa ba. Kwa akwar, kwa ndəhay mekele, ala ta wudam amba ndaw a həlmandar na, daa ba.

⁷ Ala na, ya gwamara nğa weɣ da ray akwar maja ala ndəhay meslərey nğa Yesu. Ama ala ta kamara kəne daa ba. Ala na, ndəhay meekweɔ-mey da wuzlah akwar anda mamən maaya ma nəkey dey fa bəz anğa hay. ⁸ Ala fa wudmakwar kalah. Da ray nğene, ala ta wuzdamakwara Mey-maaya-mawiya nğa Gazlavay la. Ama ala ta meesəmey nğa key cek mekele ma fəna saya. Ala ta meesəmey ga nğa vəldamara kwa ray ala maja akwar, maja ala ta wudmakwar sem kalah. ⁹ Məlma ala hay daa mecəmey-ray nğa ndəhay nğa Yesu, sləra masa ala ma kamara ta gədan ta gədan nğada akwar na, akwar fa sərfadamara, ba diya? Daa masa ala fa wuzdamakwara Mey-maaya-mawiya nğa

1:10 1.10 5.1-2, 9; Rm 5.9 **2:1** 2.1 1.5, 9 **2:2** 2.2 SNM 16.19-24; 17.1-9
2:3 2.3 2Kwr 4.2 **2:4** 2.4 Jer 11.20; 1Tm 1.11; Gal 1.10; Ef 3.2 **2:5** 2.5 2.10; SNM 20.33; 2Kwr 1.23 **2:6** 2.6 Jan 5.41, 44

Gazlavay na, ala ta mæskam vaw daa ba, ala ta kam slæra la taa vad, taa pas, amba ya njam fa har akwar ba.

¹⁰ Daa masa ala da wuzlah akwar, akwar ndøhay ma tæba mey nga Yesu na, menjey ala anga maaya na, maja ala fa jækam slømay si fa Gazlavay, ala fa kam cek ta cøved e, asaya, kwa ndøhay faa guzlam mey maaya ba da ray ala daa ba. Kwa akwar na, ka særmara menjey ala. Gazlavay may, a særa. ¹¹ Asaya, ka særmara ala ta kam cek la kwa ngada waawa da wuzlah akwar anda papaŋ ma key cek ngada bæz anga hay. ¹² Ala fa vølmakwar gødan, ala fa døkmakwar mevel, asaya, ala faa guzlmakwar mandaw mandaw amba ka njam, ka kam cek anda Gazlavay ma wudfey. Ara anga ma zølkwar nga njej a wuzlah ndøhay masa anga fa wey da ray ata amba ka særmara maaya anga.

¹³ Yaw, ala fa kamar suse a Gazlavay mandaw mandaw saya na, maja daa masa ala fa wuzdamakwara mey nga Gazlavay na, akwar ta jækam slømay la. Akwar ta tæbmara mey a anda mey nga ndøhay magødan daa ba, ama ka tæbmara na, anda mey nga Gazlavay. Fara fara mey a, ara mey nga Gazlavay. Mey a, a vølkwar gødan ngada akwar ndøhay nga Gazlavay. ¹⁴ Mølma ala hay daa mecømey-ray nga ndøhay nga Yesu, ndøhay akwar hay ta særdamakwar banay la anda *Jøwif hay ma særdamata banay ta ndøhay daa Egøliz hay nga Gazlavay daa hwayak nga *Jude. Anda kefe, akwar anda ndøhay ma tæba mey nga Yesu *Kæriste daa hwayak nga Jude he masa Jøwif hay ma særdamata banay. ¹⁵ Jøwif hay na, ta kødmata ndøhay ma tæla mey nga Gazlavay la zleezle. Jøwif hay mekele hay ta kødmara Bay Mahura Yesu la vagay. Asaya, Jøwif hay mekele hay saya ta særdamandar banay la may. Ndøhay a ngene, Gazlavay faa sømey da ray ata daa ba. Ata masa-gøra hay nga ndøhay tabiya. ¹⁶ A tækmandar nga wuzey mey nga Gazlavay a ndøhay masa Jøwif hay ba hay, mey masa ma da løhdata. Jøwif hay a, ata ta mebørey ga, ama ata fa kam mebørey mandaw mandaw a dey a, a dey a. Anda kefe, Gazlavay a bøsa mebørey ata ha saba, a cey mevel a ray ata, a katar sariya.

Pawl a wudfey nga daw nga næktørwæ Tesalawnik hay saya

¹⁷ Mølma ala hay daa *mecømey-ray nga ndøhay nga Yesu, ala na, ta wudkam la ta akwar nga ðar nekøfey,

ama mevel ala an̄ga ta akwar c̄n̄ga. Ala ta kam ḡdan la n̄ga v̄hey fa akwar, maja ala fa wudam n̄ga h̄tmakwar fa dey saya. ¹⁸ Ara maja n̄gene, ala ta wudam la n̄ga v̄hey fa akwar. Fara fara yah, Pawl, ta ray adaw, ya ta k̄dey vaw la dey weewe n̄ga daw fa akwar, ama *Satan ta t̄kndar sem. ¹⁹ Ya wudam n̄ga v̄hey fa akwar na, maja akwar nd̄ohay masa ala fa pamara mewulkey ala a ray akwar, akwar nd̄ohay ma v̄lmandar mees̄mey, asaya, ara akwar ma da wuzdamandara ala ta kam sl̄era maaya la. Maja n̄gene, ya daa s̄mam fa mey n̄ga Bay al̄ekwa Mahura Yesu ta pas masa an̄ga ma da v̄hwa. ²⁰ Fara fara ala fa h̄lmamara Bay al̄ekwa Mahura maja akwar, asaya, ala faa s̄mam maja akwar.

3

¹ Masa ala ma c̄nam mey da ray akwar daa ba heyey na, ya gwamara n̄ga b̄smara ba. Anda kede, ala ta wulkam la, maaya na, ya n̄jam da Aten taava ala, ² ya sl̄erdamara Timawte fa akwar. Timawte he na, ara m̄elma al̄ekwa daa mec̄mey-ray n̄ga nd̄ohay n̄ga Yesu, ala ma kam sl̄era n̄ga Gazlavay bama n̄ga wuzey *Mey-maaya-mawiya da ray *K̄riste. Da ray n̄gene, ya ta sl̄erdamara la fa akwar n̄ga j̄nkwar, asaya, n̄ga v̄lkwar ḡdan daa mey n̄ga Yesu.

³ Ya sl̄erdamara na, amba banay masa akwar ma s̄m̄mara na, a mb̄dda len̄gesl kwa n̄ga waawa da wuzlah akwar ba. Akwar na, ka s̄m̄mara maaya maaya, banay hay a na, ara cek ma key daa men̄jey al̄ekwa, al̄ekwa nd̄ohay n̄ga Gazlavay. ⁴ Daa masa ala da wuzlah akwar na, ya ta l̄vmakwar la, ya da s̄rkwa banay. Ka s̄m̄mara fara fara banay a, ta wuswa la. ⁵ Da ray n̄gene, daa masa ala ma gwamara n̄ga v̄hey fa akwar daa ba heyey na, ya gwamara n̄ga b̄smara ba. Ta', ya sl̄erda Timawte fa akwar amba ya c̄nda mey da ray akwar, da akwar fa t̄b̄mara mey n̄ga Yesu c̄n̄ga may kwa. Ya zlurey maja Satan a da batakw̄ar. Da ta batakw̄ar sem na, sl̄era masa ala ma kamara da wuzlah akwar heyey na, a da t̄rey n̄ga cek n̄ga tede.

⁶ Timawte ta daw la fa akwar, wure kede ta v̄hwa cay fa ala. Taa guz̄lndar mey maaya la da ray akwar, a l̄vey akwar ta ḡdan daa mey n̄ga Yesu, asaya, akwar fa wudam vaw da wuzlah akwar. A l̄vey saya, akwar fa s̄rfadamandar maaya maaya c̄n̄ga. Akwar fa wudam n̄ga h̄tmandar saya anda ala ma wudam n̄ga h̄tmakwar

saya may. ⁷ Məlma ala hay daa mecəmey-ray nğa ndəhay nğa Yesu, ala fa səram banay kalah, ama daa masa ala ma cəndamara, akwar ta gədan daa mey nğa Yesu na, mey a ta vəldar gədan la ga. ⁸ Wure keđe, ala ta meesəmey ma fəna ma fəna maja akwar fa təbmara mey nğa Bay Mahura ta mevel pal. ⁹ Fara fara, ala faa səmam ga maja akwar. Ala fa kamar suse a Gazlavay, ama kwa ya kamar suse həma kwara na, suse ala ha a wusa ba. ¹⁰ Ala fa dəram dangay taa vad, taa pas mandaw mandaw ta mevel pal amba ya hətmakwar fa dey, asaya, amba yaa sərkadamakwar cek masa akwar ma səmara daa ba aran da ray cəved nğa Gazlavay.

¹¹ Anja Gazlavay Papa aləkwa ta ray anğa len Bay aləkwa Mahura Yesu nğa wurmandara cəved amba ya diyam fa akwar. ¹² Asaya, anja Bay aləkwa Mahura nğa ka amba ka wudam vaw da wuzlah akwar ma fəna ma fəna, asaya, amba ka wudmata ndəhay tabiya anda ala ma wudmakwar may. ¹³ Anja Bay aləkwa Mahura nğa vəlkwar gədan amba cek malamba a njeý aa mevel akwar ba, asaya, amba ta pas masa anğa ma da vəhwa a bəla ta ndəhay anğa hay na, akwar ndəhay maaya manjar mebərey fa mey nğa Gazlavay Papa aləkwa.

4

Mey da ray menjey maaya ma mbafar a Gazlavay

¹ Məlma ala hay daa *mecəmey-ray nğa ndəhay nğa Yesu, wure keđe ya wudam nğaa guzlmakwar da ray cek mekele. Zleezle na, ala taa sərkadamakwar la da ray menjey maaya ma mbafar a Gazlavay. Fara fara menjey akwar a, aa kəne. Ama wure keđe, ala faa cəfdamakwar ta mezəley nğa Bay Mahura Yesu, ala faa cəfdamakwar ta mevel pal amba ka səpam menjey maaya ma mbafar a Gazlavay ma fəna ma fəna.

² Ala taa sərkadamakwar la da ray cek hay nğa key, maja ara Bay Mahura Yesu ma pandar nğaa sərkada. Ka səmara cek hay masa ala maa sərkadamakwara ha, ba diya? ³ Gazlavay a wudey na, ka təram ndəhay manjar mebərey, ka da lam vaw saw ba. ⁴ Maaya na, kwa waawa da wuzlah akwar a səra nğa njeý maaya maaya ta nğwas anğa anda Gazlavay ma wudey, amba ndəhay aa guzlam maaya ba da ray menjey akwar ba. ⁵ Ka da səpam nğa key cek malamba ba. Ma kam cek anda nğene na, ara ndəhay

ma sɛrmara Gazlavay ba. ⁶ Da ray mey a keɔde na, ndaw a da kar cek maaya ba a mɛlmaha ba, a da bata ba sɛlak, maja Bay alɛkwa Mahura a da sɛrdata banay ta ndɛhay ma kam cek malamba anda ɲgene. Ala ta kɛtmakwar la zleezle da ray cek aha. ⁷ Yaw, Gazlavay ta zɛlndakwar ɲga key cek hay malamba daa ba, ama a zɛlndakwar na, amba ya tɛrkwa ndɛhay maaya fa mey aɲga. ⁸ Ndaw ma rɛsa mey a keɔde na, a rɛsey ɲgene na, ndaw ba, ama a rɛsey Gazlavay ma vɛlkwar Mesɛfney aɲga. Mesɛfney aɲga ha na, maaya, manjar meɔɔrey.

⁹ Akwar fa wuɔdam vaw da wuzlah akwar. Da ray ɲgene, ala fa da wuzlalamakwar da ray mewuɔdey-vaw na, daa saba, maja Bay Gazlavay taa sɛrkadakwar cay ɲga wuɔdey vaw da wuzlah akwar. ¹⁰ Fara fara, akwar fa wuɔdam vaw da wuzlah akwar, akwar fa wuɔmata ndɛhay ɲga Yesu tabiya masa daa hwayak ɲga Masadɛwan. Mɛlma ala hay daa mecɛmey-ray ɲga ndɛhay ɲga Yesu, ya kamakwar ambahw amba ka wuɔdam vaw ma fɛna ma fɛna saya. ¹¹ Asaya, kam gɛɔɔɔn amba ka ɲjam daa zazay, amba kwa waawa a nɛkey dey fa slɛra masa fa mey aɲga, amba kwa waawa a zɛmey cek si ta fa mawurbay aɲga, anda ala ma kɛtmakwar zleezle. ¹² Da akwar fa kamara kɛne na, ndɛhay ma tɛɔba mey ɲga Yesu ba a namakwar ray la. Asaya, akwar fa da rɛkam cek fa ndɛhay daa ba.

Mey da ray pas masa Bay Mahura Yesu ma da vɛhwa

¹³ Mɛlma ala hay daa *mecɛmey-ray ɲga ndɛhay ɲga Yesu, ya wuɔdam ka sɛrmara cek ma da key da ray ndɛhay ɲga Yesu mamɛctakaya amba ka tɛwam anda ndɛhay mekele ba. Ndɛhay mekele he na, fa pam lenɲesl ɲga hɛtey heter ɲga ɲjey ta Yesu ɲga sɛrmataw daa ba. ¹⁴ Ya sɛrkwa Yesu ta mɛcey sem, fa dɛɔba ha, ta slɛkɔfawa sem daa memɛcey. Da ray ɲgene, sɛrmara fara fara ndɛhay ɲga Yesu mamɛctakaya na, Gazlavay a slɛkɔfadatɛrwa la daa memɛcey amba a ɲjam ta Yesu a.

¹⁵ Mey masa ala ma daa guzlmakwar wure keɔde na, ara mey masa Bay Mahura Yesu maa sɛrkadatara a ndɛhay. Mey a, a lɛvey, ta pas masa Yesu ma da vɛhwa a bɛla na, alɛkwa masa ta dey da bɛla keɔde, alɛkwa fa da nakwa teesɛɔ da ray ndɛhay mamɛctakaya ɲga ceɲ ray ta aɲga daa ba. ¹⁶ Anda melɛvey, ta pas ɲgene, Gazlavay aa guzlwɛ la ta gɛɔɔɔn. Maslan ɲga mahura a wuɔdey la ta

4:7 4.7 4.3; 1Pi 1.15-16 **4:8** 4.8 1Kwr 6.19-20 **4:9** 4.9 Jer 31.33-34; Gal 6.10; Ef 5.2 **4:10** 4.10 2Tes 3.4 **4:11** 4.11 2.9; Ef 4.28; 2Tes 3.10, 12 **4:12** 4.12 1Kwr 5.12-13; Kwa 4.5 **4:13** 4.13 1Kwr 15.18-19; Ef 2.12 **4:13** 4.13-17 5.1-2; 1Kwr 15.51-52 **4:14** 4.14 Rm 14.9; 1Kwr 15.3-4, 12, 20 **4:15** 4.15 1Kwr 7.10, 25

gədan, dəy nga taalam nga Gazlavay a cənwa la. Fa dəba ha, Bay aləkwa Mahura Yesu ta ray anğa, a pawa salay da vad. Ndəhay anğa hay maməctakaya na, a sləkdamawa la daa meməcey teesed, ¹⁷ fa dəba ha, aləkwa masa ta dey na, Gazlavay a həlndakwar la ta ndəhay maməctakaya heyey aa mekwtene, amba ya cakwa ray ta Yesu daa memed da vad. Anda keđe, ya da njakwa nga sərmataw ta Bay aləkwa Mahura Yesu. ¹⁸ Maja nğene, dəkam mevel da wuzlah akwar ta mey a keđe.

5

Ma da diyey vaw nga səkwey Yesu ma da vəhwa na, kwara?

¹ Məlma ala hay daa *mecəmey-ray nga ndəhay nga Yesu, mey da ray pas masa Yesu ma da vəhwa na, ala fa da wuzlalamakwar da ray a daa ba, ² maja akwar ta ray akwar, ka sərmara pas masa Yesu ma da vəhwa na, a sərey ba, anğa anda pas masa ndaw-mayal ma da mbəzey a way ndaw ta tavad ma sərey ba. ³ Da masa ndəhay fa ləvam: «Ala daa zazay, cek ma da hətfandar daa ba» na, nğene, banay a da sawa a ray ata dərfafoy anda hwađ ma car nğada nğwas ma da yawa. Ndəhay ma wulkam anda nğene na, fa da ləham daa ba səlak. ⁴ Ama, akwar, məlma ala hay daa mecəmey-ray nga ndəhay nga Yesu na, akwar ndəhay masa ma njam daa ləvan ba. Da ray nğene, pas masa Yesu ma da vəhwa na, fa da hətfakwar dərfafoy anda ndaw-mayal ma hətfey ndaw na, daa ba. ⁵ Akwar tabiya na, ndəhay ma njam daa slam-mewedfey, ma səkwmarə pas nga Yesu ma da vəhwa. Aləkwa ndəhay ma njam daa ləvan ba, asaya, aləkwa ndəhay nga tavad ba.

⁶ Maja nğene, ya da njakwa anda ndəhay mekele ba. Ya da nakwa đar ba, ama njakwa ta mewey vaw, asaya, pakwa ləngesl fa ray aləkwa. ⁷ Ndəhay a nam na, ta tavad. Ndəhay a sam wuzam, a wam na, ta tavad may. ⁸ Ama aləkwa na, ndəhay ma səkwmarə pas nga Yesu ma da vəhwa. Da ray nğene, pakwa ləngesl fa ray aləkwa. Njakwa mandaw mandaw daa metəbey-mey nga Yesu, asaya, wuđkwa vaw da wuzlah aləkwa. Menjey anda keđe na, ara anda ndaw ma bərđa dadak anğa ta zana nga bərey nga key vəram. Pakwa ləngesl fa meləhey masa aləkwa ma hətkwa ta fa Yesu. Mepey ləngesl fa meləhey a na, ara anda ndaw ma

4:16 4.16 1Kwr 15.23 **4:17** 4.17 Jan 12.26; Rm 5.17; Fəl 3.20 **5:2** 5.2 1.2-3, 10; 2.19; 3.13; 5.23; Mt 24.36; Fəl 4.5; 2Tes 1.7, 10; 2.1-2; anda pas masa ndaw-mayal ma sawa: Mt 24.43; 2Pi 3.10; CWJ 3.3; 16.15 **5:3** 5.3 Jer 6.14-15; Mt 24.39 **5:5** 5.5-8 Rm 13.11-12; Ef 5.8-9

pey jikwew nga b̄orey ngadaa v̄eram. ⁹ Yaw, Gazlavay a walandakwar na, amba a s̄erdandakwar banay ba. Ama a walandakwar amba a l̄ohdandakwar ta fa Bay al̄ekwa Mahura Yesu *K̄oriste. ¹⁰ Yesu K̄oriste he ta m̄ocey la maja al̄ekwa amba ya njakwa daa slam a ta aṅga. Pas masa aa ma da v̄ehwa, kwa al̄ekwa ta dey, kwa al̄ekwa mam̄ectakaya na, ya njakwa la daa slam a ta aṅga. ¹¹ Da ray ṅgene, v̄elam ḡodaṅ da wuzlah akwar, j̄onam vaw da wuzlah akwar nga t̄obey mey nga Yesu ma f̄ona ma f̄ona anda akwar ma kamara wure keḏe.

Mey nga madagway-dakw

¹² M̄elma ala hay daa *m̄ec̄omey-ray nga nd̄ohay nga Yesu, ya kamakwar ambahw, namatar ray a nd̄ohay ma kam sl̄era nga Gazlavay da wuzlah akwar. Ata na, ara nd̄ohay masa Bay Mahura ma pata nga *bay-ray hay da wuzlah akwar, amba a k̄etmakwar nga s̄opey c̄oved aṅga.

¹³ Namatar ray maaya maaya, asaya, wudmata maja ata fa kam sl̄era nga Gazlavay. Njam ta zazay da wuzlah akwar.

¹⁴ M̄elma ala hay daa m̄ec̄omey-ray nga nd̄ohay nga Yesu, ya kamakwar ambahw, k̄etmata masa-mayad hay, v̄elmatar ḡodaṅ a nd̄ohay masa ta mand̄orzay daa dey, j̄onmata nd̄ohay masa-b̄ole daa mey nga Gazlavay. B̄esmata nd̄ohay tabiya. ¹⁵ Wam vaw! Da ndaw a kakwar cek maaya ba na, ka da kamar cek maaya ba k̄one ba. Ama daa menjey akwar na, kam ḡodaṅ mandaw mandaw amba ka kam cek hay maaya da wuzlah akwar, asaya, amba ka kam cek maaya ṅgada nd̄ohay tabiya.

¹⁶ Njam mandaw mandaw daa mees̄omey. ¹⁷ D̄eram daṅgay a Gazlavay mandaw mandaw, ka da ḡeram ba.

¹⁸ Kamar suse a Gazlavay, kwa daa meeme c̄opa, maja a wudfey amba akwar nd̄ohay nga Yesu *K̄oriste na, ka kamara k̄one.

¹⁹ Ka da t̄okmara sl̄era nga *Mes̄ofney nga Gazlavay ba. ²⁰ Ka da r̄esmara mey hay nga nd̄ohay ma t̄ela mey nga Gazlavay ba. ²¹ Saṅgalamata mey hay a maaya maaya daḡay. Da mey hay a, a samawa ta fa Gazlavay fara fara na, ṅgene, t̄oḡmara mey hay a, aa mevel akwar. ²² Ka da kam cek malamba ba s̄olak.

²³ Anja Gazlavay ta ray aṅga, ndaw ma njadata nd̄ohay daa zazay, nga ka amba ka t̄eram nd̄ohay manjar meb̄orey, nga j̄oḏa mes̄ofney akwar, heter akwar, ta vaw akwar c̄opa

5:8 5.8 Ef 6.11-17 **5:9** 5.9 1.10; 2Tes 2.14 **5:10** 5.10 4.14; Rm 14.8-9 **5:12** 5.12 1Kwr 16.15-18; 1Tm 5.17 **5:14** 5.14 2Tes 3.6, 11, 15 **5:15** 5.15 Rm 12.17; F̄el 1.10 **5:16** 5.16 F̄el 4.4 **5:17** 5.17 5.25; Lk 18.1; Rm 12.12; Ef 6.18; Kwa 4.2 **5:18** 5.18 Ef 5.19-20 **5:19** 5.19 Ef 4.30 **5:21** 5.21 1Kwr 14.29; Ef 5.10; 1J̄n 4.1

maaya maaya, amba ta pas masa Bay aləkwa Mahura Yesu Kəriste ma da vəhwa na, a hətfakwar manjar mebərey.

²⁴ Gazlavay ma zəlkwār n̄ga n̄jey ta ān̄ga na, a ndəvda sləra ha la fara fara, maja cek masa ān̄ga ma ləvey a ka la na, a ka la.

²⁵ Məlma ala hay daa mecəmey-ray n̄ga ndəhay n̄ga Yesu, dərām dan̄gay a Gazlavay maja ala may.

²⁶ Camatar har maaya maaya a məlman̄ hay daa mecəmey-ray n̄ga ndəhay n̄ga Yesu tabiya. ²⁷ Ya kakwar ambahw ta mezəley n̄ga Bay Mahura, jangamara leeter kede fa mey n̄ga ndəhay n̄ga Yesu tabiya.

²⁸ Anja maaya n̄ga Bay aləkwa Mahura Yesu Kəriste n̄ga n̄jey ta akwar.

**Leeter masa Pawl ma wuzlala
nga dey cew a
Tesalawnik hay
Mey da ray
Leeter masa Pawl ma wuzlala nga
dey cew a Tesalawnik hay**

Leeter e keɗe ara Pawl ma wuzlalatar a Tesalawnik hay. A wuzlalatar na, maja ndəhay daa Egəliz da Tesalawnik ta cəndamara mabara nga meɗ daa leeter ngeeme masa aa ma wuzlalatar na, daa ba.

Ndəhay faa sərkaɗamata ndəhay, a ləvam gweegwe Yesu a vəhwa. Ndəhay siya da Tesalawnik ma cəndamara meesərkey a na, a ləvam, da gweegwe Yesu a vəhwa na, kaa mekey sləra keme seme? Daa leeter nga dey cew keɗe na, ara meɗ hay masa Pawl maa guzldata cay daa leeter ngeeme.

A wuɗey kwa fa sərkaɗamata banay ta ndəhay daa berney nga Tesalawnik na, si ndəhay a, a pamara Yesu Kəriste nga ndaw ata fara fara cəngga (1.4-12).

Ta wuzda cek ma da key daa masa Yesu ma da vəhwa la maaya maaya (2.1-5). A ləvey, Yesu a da vəhwa na, si ndaw masa-həma a sawa la ɗagay, ndaw a, a təkta ndəhay nga namar ray a Gazlavay (2.3-4).

Pawl a wuɗey na, ndəhay a sərmara Gazlavay fa wuɗta fara fara, asaya ta ləhɗata sem maja ata ma təbmara Mey-maaya-mawiya, a kam cek ma mbafar a Gazlavay. Si a bəsmara banay maja Yesu Kəriste (2.13-3.5).

Pawl a kətata maja ata masa-mayad hay, a mbəzam aa meɗ masa meɗ ata da hwad a daa ba. Anda keɗe, Pawl a wuɗey a mbəɗdamara menjey ata maaya ba ha ngene (3.6-15).

Daa leeter e keɗe na, meɗ hay maakar daha nga vəley gəɗan a ndəhay da ray mepəsey-mey (2.16-17; 3.5; 3.16)

Mecey-har

¹ Ara yah, Pawl, ma wuzlalakwara leeter keɗe. Ala ta ata Silas lej Timawte, ya camakwar har, akwar ndəhay daa Egəliz da Tesalawnik, akwar masa macəmkaya ta *Gazlavay Papa aləkwa lej ta Bay aləkwa Mahura *Yesu *Kəriste.

² Anja Papa aləkwa, Bay Gazlavay, ta Bay aləkwa Mahura Yesu Kəriste n̄ga pəsmakwar mey, asaya, n̄ga njadamakwar daa zazay.

Pawl a veltar gədan̄ a Tesalawnik hay n̄ga bəsmara banay

³ Məlma ala hay daa *mecəmey-ray n̄ga ndəhay n̄ga Yesu, si ya kamar suse a Gazlavay mandaw mandaw maja akwar. Ara cek maaya amba ya kamar suse anda keđe, maja akwar fa təbmara mey n̄ga Yesu ma fəna ma fəna, asaya, maja akwar fa wudam vaw da wuzlah akwar ma fəna ma fəna.

⁴ Maja n̄gene, da ala da wuzlah ndəhay mekele daa Egəliz hay n̄ga Gazlavay na, ala faa guzlam da ray akwar ta meesəmey, maja kwa ndəhay fa sərdamakwar banay kwara kwara na, akwar fa bəsmara banay a, akwar fa təbmara mey n̄ga Yesu *Kəriste cənḡa. ⁵ Menjey akwar a n̄gene, fa wuzda Gazlavay na, ara ndaw ma da katar sariya a ndəhay təđe fa sləra ata. Ahaw, ara maja menjey akwar a n̄gene, Gazlavay ma da tərdakwar n̄ga ndəhay maaya ma da njam da wuzlah ndəhay masa an̄ga fa wey da ray ata. Akwar fa bəsmara banay a na, maja.

⁶ Fara fara, Gazlavay na, fa key cek ta cəved̄ e. Anda keđe, Gazlavay a da sərd̄ata banay ta ndəhay ma sərdamakwar banay may. ⁷ Akwar ndəhay masa fa səram banay wure keđe kaa na, Gazlavay a da məskadakwar vaw, ala may kəne. Gazlavay a da məskadandakwar vaw na, ta pas masa Bay aləkwa Mahura Yesu ma da pawa salay da vad̄ ta maslan̄ an̄ga hay ma da wuzdamərwa gədan̄ an̄ga. ⁸ A da sawa na, ta awaw magədkaya, a da sərd̄ata banay ta ndəhay ma sərmara Gazlavay ba len̄ ta ndəhay ma təbmara *Mey-maaya-mawiya da ray Bay aləkwa Mahura Yesu ba.

⁹ A sərd̄ata banay la, a daa zədd̄ata n̄ga sərmataw, a da njadata d̄oren̄ ta Bay aləkwa Mahura, asaya, d̄oren̄ ta slam̄ an̄ga menjey mewed̄ey. ¹⁰ Cek hay a keđe a da kam na, ta pas masa Bay aləkwa Mahura Yesu ma da vəhwa. A da vəhwa amba ndəhay an̄ga hay, a həlmamara maja sləra an̄ga, asaya, amba ndəhay tabiya masa ma təbmara mey an̄ga a həslmar ray. Akwar may, akwar da wuzlah ndəhay a n̄gene, maja akwar ma təbmara mey masa ala ma wuzdamakwara.

¹¹ Ara maja n̄gene, ala ma d̄eram dangay mandaw mandaw a Gazlavay maja akwar. Ala faa cəfd̄amara Gazlavay amba a tərdakwar ndəhay maaya təđe n̄ga hətey heter mendəvey ba masa aa ma zəlkw̄ar maja. Ala faa

1:3 1.3 2.13; 1Tes 1.2-3

1.6 Rm 12.19; CWJ 18.6

2.8; 1Pi 4.17

1:4 1.4 1Tes 2.19-20; 3.3, 7

1:7 1.7 Mt 25.31; 1Tes 5.1-2

1:5 1.5 Fəl 1.28

1:6 1.8 1.8 Iz 66.15; Rm

cəfdamara amba a jənkwar ɲga key cek hay maaya tabiya masa akwar ma wudam ɲga kamara, asaya, amba a jənkwar daa sləra masa akwar ma kamara maja akwar ma pamara ɲga ndaw akwar fara fara. Yaa cəfdamara ɲga jənkwar na, ta gədan ɲga. ¹² Da ray ɲgene, ndəhay a da həlmamara Bay aləkwa Mahura Yesu maja akwar. Asaya, Bay aləkwa Mahura Yesu a da həslkwar ray may. Cek aha a da key na, maja mepəsey-mey ɲga Gazlavay aləkwa ta Bay aləkwa Mahura Yesu Kəriste aa da ray akwar.

2

Mey da ray cek ma da key teesed da ray Yesu ma da vəhwa

¹⁻² Məlma adaw hay daa *mecəmey-ray ɲga ndəhay ɲga Yesu, ya wudəy ɲgaa guzlkwar da ray pas masa Bay aləkwa Mahura Yesu *Kəriste ma da vəhwa, asaya, da ray aləkwa ma da kuskwa fa mey ɲga. Ndəhay fa ləvam dər masa Bay Mahura ma da vəhwa heyey na, ta wuswa cay. Ama ya fa kakwar ambahw, ka da həbām ray maja ba. Kwa ndəhay a ləvam ara Gazlavay ma wuzdatara mey da ray dər a, kwa ndəhay ta wuzam mey la da ray a, ka da təbmara ba. Asaya, kwa ndaw a ləvey ta jəngga la daa leeter masa ala ma wuzlalamara na, ka da təbmara mey a ba, ka da zluram ba.

³ Ka da vəlmar cəved kwa ɲgada waawa ɲga batakwār ba səlāk. Dər a fa da wuswa daa ba araɲ, si ndəhay ga ma mbədmar dəba la a Gazlavay dāgay, asaya, si ndaw masa-həma * a sawa la dāgay, ndaw masa Gazlavay ma daa zəfda aa awaw. ⁴ Ndaw masa-həma ha, a da təkta ndəhay ɲga ney ray, kwa ɲgada Gazlavay, kwa ɲgada meeme cəpa. A da ləvey ɲga mahura da ray cek hay a tabiya. Anda kefe, a da mbəzey aa *Way-mekey-kwakwas ɲga Gazlavay amba a njeɲ aa slam maaya daa way a, a da ləvey ɲga na, Gazlavay. ⁵ Daa masa yah da wuzlah akwar heyey na, ya taa guzlkwar la da ray cek hay a, ba diya? Ka sərfdamara saba daw?

⁶ Wure kefe, cek fa təkā ndaw masa-həma ha ɲga sawa. Ka sərmara cek ma təkā ha. Ndaw aha fa da wuzwā vaw wure kefe na, daa ba araɲ, si pas a ma wuswa. ⁷ Fara fara, gədan ɲga ndaw masa-həma ha na, fa həldata ndəhay ga ɲga kam cek hay malamba, ama gədan a mabadakaya.

1:11 1.11 1Tes 1.2-3; 5.24 **2:1-2** 2.1-2 1Tes 4.15-17; 5.1-2 **2:1-2** 2.2 1Tm 1.10; 4.14 * **2:3** 2.3 ndaw masa-həma: Ara Satan ba, ama ara masa-gəra mahura ɲga Kəriste. Nəka 1Jn 2.18, 22. **2:3** 2.3 1Tm 4.1; 1Jn 2.18 **2:4** 2.4 Ez 28.2; Dan 11.36; CWJ 13.5-6

Ndaw manjakaya nga tēka gēdan a † na, daha. A da tēka gēdan a haa ta pas masa anga manjakaya daa slam anga daa saba. ⁸ Fa dēba ha, ndaw masa-hēma heyey a da wuzwa vaw dēba. Ama daa masa Bay Mahura Yesu ma da vēhwa daa mewedey anga na, a kēda la vagay ta memed ma bawa da mey anga, aa zēdda la kudap! ta gēdan anga. ⁹ Masa Yesu ma vēhwa a bēla daa ba aran kede na, ndaw masa-hēma ma da sawa heyey na, a sawa la, a da key slēra ta gēdan nga *Satan, bay-malula. A da key maazla hay mekele mekele, a da batata ndēhay ta fa maazla hay len ta fa cek hay ma rēzla ndaw. ¹⁰ A da sawa nga key cek hay malamba mekele mekele nga batata ndēhay ma daa zēdam. A daa zēdam na, maja ata ma tēbmara mey masa fara fara ba, asaya, maja ata ma rēsmara mey a. Anja da ta tēbmara mey masa fara fara ha la na, Gazlavay a lēhdata la. ¹¹ Yaw, a tēbmara mey masa fara fara ba, da ray ngene, Gazlavay a vēltar mewulkey maaya ba, amba a tēbam mey membērzley. ¹² Da ray ngene, ndēhay ma tēbmara mey masa fara fara ba, asaya, ma wudam nga key cek hay malamba kalah na, sariya nga Gazlavay a tēddata la.

Mey da ray ndēhay masa Gazlavay ma walata nga lēhey daa mebērey

¹³ Akwar, mēlma ala hay daa *mecēmey-ray nga ndēhay nga Yesu na, Bay alēkwa Mahura fa wudkwar kalah. Daa masa bēla ta lēmey daa ba aran na, Gazlavay ta walakwar sem nga lēhey daa mebērey. A lēhdakwar na, ta gēdan nga Mesēfney anga. Mesēfney a, a tērdakwar nga ndēhay nga Gazlavay ma kam cek ma mbafar a Gazlavay. A lēhdakwar maja akwar ma tēbmara mey masa fara fara. Da ray ngene, si ya kamar suse a Gazlavay mandaw mandaw maja akwar.

¹⁴ Gazlavay a zēlkwar nga tērey ndēhay anga hay na, ta fa *Mey-maaya-mawiya masa ala ma wuzdamakwara. A zēlkwar amba a hēslkwar ray anda anga ma hēslar ray a Bay alēkwa Mahura Yesu *Kēriste. ¹⁵ Da ray ngene, akwar mēlma ala hay, mey masa ala ma wuzdamakwara kwa ta

† **2:7** 2.7 Ndaw manjakaya nga tēka gēdan a: Daa 2.6Pawl a lēvey: «cek fa tēka ndaw masa-hēma ha.» Daa 2.7a lēvey ara ndaw ma tēka. Pawl a wufey nga lēvey na, kwara? Ndēhay siya a wulkam ara bay mahura nga Rawma hay, da daa ba, ara mewey nga hwayak nga Rawm. Ndēhay mekele saya a wulkam ara Mesēfney nga Gazlavay, da daa ba, Egēliz. Ndēhay siya saya a wulkam ara Mey-maaya-mawiya maasērkadakaya ngada ndēhay tabiya daa ba aran ma tēka (Mt 24.14). **2:8** 2.8 Iz 11.4; CWJ 19.15 **2:9** 2.9 Mt 24.24; CWJ 13.11-13 **2:11** 2.11 2Tm 4.4 **2:12** 2.12 1.6-8 **2:13** 2.13 1.3 **2:14** 2.14 1Tes 5.9

mey gway, kwa ta daa leeter na, pamara mey a aa lenjesl akwar, tɔbmara ma fɔna ma fɔna.

¹⁶ Gazlavay, Papa alɔkwa, a wudndakwar, aa fa dɔkndakwar mevel mandaw mandaw, asaya, a ka amba ya pakwa lenjesl a ray cek maaya masa anɔa ma da vɔldandakwara. A dɔkndakwar mevel na, ta fa maaya anɔa. Asaya, a ka amba ya pakwa lenjesl a ray cek maaya ha na, ta fa maaya anɔa may. Anja Bay alɔkwa Mahura Yesu Kɔriste ta ray anɔa, len Gazlavay Papa alɔkwa ¹⁷ nɔa dɔkmakwar mevel, nɔa vɔlmakwar gɔdan amba ka kam cek hay mandaw mandaw tabiya masa maaya, asaya, amba kaa guzlam mey masa maaya mandaw mandaw.

3

Pawl aa cɔfɔey medɔrey-dangay

¹ Mɔlma ala hay daa *mecɔmey-ray nɔa ndɔhay nɔa Yesu, wure kedɛ, ya wudam nɔaa guzlmakwar da ray cek mekele. Yaa cɔfdamakwar nɔa dɔrey dangay maja ala, amba mey nɔa Bay Mahura Yesu a daw fa mey fa mey, kwa ndaw a gwa nɔa tɔka ba, asaya, amba ndɔhay a tɔbmara mey a, aa hɔmdamara anda akwar may. ² Dɔram dangay maja ala saya, amba Gazlavay a jɔdndar fa ndɔhay malamba hay, maja ndɔhay ga fa tɔbmara mey nɔa Gazlavay daa ba.

³ Ya sɔrkwa Bay Mahura na, ara ndaw ma mbɔkda ndaw anɔa ba. A da vɔlkwar gɔdan, asaya, a da jɔdkwar amba *Satan a zlangadadakwar ba. ⁴ Alɔkwa macɔmkaya ta Bay Mahura Yesu, anda kedɛ, ya sɔrmara fara fara akwar fa kamara cek masa ala maa sɔrkadamakwara, asaya, ka da kamara mandaw mandaw.

⁵ Anja Bay Mahura nɔa jɔnkwar amba ka sɔrmara Gazlavay fa wudkwar kalah, asaya, amba ka bɔsmara banay anda *Kɔriste ma bɔsa.

Mey da ray mekey slɔra

⁶ Mɔlma ala hay daa *mecɔmey-ray nɔa ndɔhay nɔa Yesu, yaa guzlmakwar ta mezɔley nɔa Bay alɔkwa Mahura Yesu *Kɔriste, ya lɔvmakwar, ndɔhay masa-mayad hay * masa daa mecɔmey-ray nɔa ndɔhay nɔa Yesu na, ka da cɔmam ta ata ba. Masa-mayad hay a na, a tɔbmara cek masa ala maa sɔrkadamakwara ba. ⁷ Akwar ta ray akwar, ka sɔrmara, maaya na, ka kam cek anda ala ma kamara. Daa masa ala

2:15 2.15 3.6; 1Kwr 11.2 **2:16** 2.16 1Tes 1.4 **3:1** 3.1 SNM 2.4; Rm 15.30; 1Tes 5.25 **3:3** 3.3 1Kwr 10.13; 1Jn 5.18 **3:4** 3.4 1Kwr 4.16; Gal 5.10 * **3:6** 3.6 ndɔhay masa-mayad hay: Ara ndɔhay masa ma kam slɔra ba, maja ata masa-mayad fara fara, da daa ba, ara ndɔhay masa ray ata fa hɔbey da ray mavɔhwa nɔa Yesu gweegwe cay. **3:6** 3.6 3.12; 1Tes 5.14

da wuzlah akwar na, ala ta kam mayaf daa ba, ⁸ ala maa cəfdam cek mezəmey fa ndaw ŋga maaya daa ba. Sasəkar jak, ala ta kam sləra la ga, taa vad, taa pas, amba ya njam fa har akwar ba. ⁹ Daa masa ala fa wuzdamakwara mey ŋga Gazlavay na, ala ta cəved ŋгаа cəfdamakwar cek mezəmey, ama ala taa cəfdamakwar daa ba. Ya kam sləra ta har ala na, amba yaa sərkadamakwar ŋga key sləra anda ala.

¹⁰ Masa ala da wuzlah akwar heyey na, ya taa guzlmakwar la, ya ləvam: «Ndaw ma wufey ŋga key sləra ba na, ka da vəlmar cek mezəmey ba may.»

¹¹ Yaa guzlmakwar anda keđe na, maja ya cəndamara a ləvam, ndəhay siya da wuzlah akwar ata masa-mayaf hay. A wufam ŋga kam sləra ba, ama a mbəzam aa mey hay ŋga ndəhay mekele masa mey ata da hwađ a daa ba. ¹² Səkway ŋga ndəhay anda ŋgene na, ala fa kətmata ta mezəley ŋga Bay Mahura Yesu Kəriste, ya ləvmatar: «Kam sləra ta cəved e, amba ka zəmam cek ta fa mawurbay akwar.»

¹³ Akwar, məlma ala hay na, kam cek maaya ta cəved e cəŋga, ka da gəram ba. ¹⁴ Da ndaw da wuzlah akwar a təba mey masa ala ma wuzlalamara daa leeter keđe ba na, wam vaw ta ndaw aha, ka da kam jam ta aŋga ba, amba hwaray a kar. ¹⁵ Ama ndaw a na, ka da pamara ŋga masa-gəra akwar ba, ama sasəkar jak, kətmara anda məlmakw akwar cəŋga.

Mey ŋga madagway-dakw

¹⁶ Bay Mahura na, ara ndaw ma njadata ndəhay daa zazay. Anja aŋga, ta ray aŋga, ŋga njadakwar mandaw mandaw daa zazay, kwa daa cek hay wura wura tabiya. Anja Bay Mahura ŋga njey ta akwar, akwar tabiya.

¹⁷ Ara yah, Pawl, ta har adaw, ma wuzlalakwara mecey-har a keđe. Ya wuzlala mezəley adaw ta har adaw daa mendəvey ŋga leeter adaw hay tabiya anda keđe amba ka səmra ara yah ma wuzlala ta har adaw.

¹⁸ Anja maaya ŋga Bay aləkwa Mahura Yesu *Kəriste ŋga njey ta akwar ndav.

3:8 3.8 1Tes 2.9 **3:9** 3.9 SNM 18.3; 1Tes 1.6; aa cəfdamakwar cek mezəmey: 1Kwr 9.4 **3:10** 3.10 1Tes 4.11 **3:11** 3.11 1Tm 5.13 **3:12** 3.12 Ef 4.28
3:13 3.13 Gal 6.9 **3:14** 3.14 1Kwr 5.9, 11 **3:15** 3.15 Mt 18.15-17; 1Tes 5.14
3:16 3.16 2Kwr 13.11 **3:17** 3.17 1Kwr 16.21 **3:18** 3.18 Gal 6.18

**Leeter masa Pawl ma wuzlala
ngeeme a
Timawte
Mey da ray
Leeter masa Pawl ma wuzlala
ngeeme a Timawte**

Leeter e keɗe ara Pawl ma wuzlala ngada Timawte. Timawte na, ara bəzey nga ndaw Gerek. Mamaha na, ara ngwas ma təba mey nga Yesu, ara dam Jəwif ma yey ta yey. Pawl a səram vaw ta Timawte na, daa mepəkey anga nga dey cew (SNM 16.1-3). Maa sərkada Timawte nga wuzey mey nga Gazlavay na, ara Pawl. Ara maja ngene, anga anda bəzey da hwaɗ anga. Pawl ta vəlar sləra la ga mekele mekele a Timawte, ta slərda la a Tesalawnik leŋ a Kwarinti. A pa nga bay-ray nga Egəliz hay.

Masa ata ma pəskamərwa Pawl la ngeeme daa fərsəne na, ta', a daw a wuzey mey nga Gazlavay cənga. A wuzlalara leeter a Timawte na, masa anga daa hwayak nga Masadəwan. Daa leeter e na, Pawl a kəta Timawte da ray mekey sləra daa Egəliz nga Yesu.

Pawl a wuzlalar leeter a Timawte na, dey cew. Daa masa ngeeme keɗe na, a kətata ndəhay daa mecəmey-ray nga Yesu, a kətata bay-ray hay (3.1-13). Asaya, a kəta Timawte he, a ləvar nga njeŋ ndaw ma ka sləra nga Yesu Kəriste maaya. A ləvar nga nəkey dey fa ndəhay daa mecəmey-ray hay nga Yesu.

Daa leeter e keɗe na, mey mekele mekele daha nga vəley gədaŋ a ndəhay:

Medərey-danŋay (2.1-8)

Metəbey mey nga Yesu na, a fəna mesəpey zleley (6.6-10)

Mesəpey nga key cek maaya (6.11-12)

Mecey-har

¹ Ara yah Pawl ma wuzlalakawa leeter keɗe, yah, *ndaw-meslərey nga *Yesu *Kəriste. Ara *Gazlavay ndaw ma ləhdandakwar, ta Yesu Kəriste ndaw masa aləkwa ma pakwa leŋgesl aləkwa a ray a, ma pamaya nga ndaw-meslərey.

1:1 1.1 ndaw-meslərey: 2.7; ndaw na ləhdandakwar: Tit 3.4; aləkwa ma pakwa leŋgesl: Kwa 1.26-27

² Ya wuzlala na, ngada kah, Timawte, ndaw masa ma tōrey sem nga bōz adaw fara fara, maja kah ma tōba mey nga Yesu Kōriste masa yah ma wuzdakawa.

Anja Gazlavay, Papa aləkwa ta Yesu Kōriste, Bay aləkwa nga pōsmaka mey, nga sōrfamaka dey-ceceh, asaya, nga njadamaka daa zazay.

Mey da ray ndōhay maa sōrkadam ndōhay ta membōrzley

³ Daa masa ya fa da daw aa hwayak nga Masadōwan na, ya ta lōvka la nga njey daa berney nga Efez. Anda kedē, ya wudēy ka njey fetede cōnga amba ka tōkta ndōhay maa sōrkadam ndōhay ta membōrzley. ⁴ Si ndōhay a,

a mbəkdamara nga hōbey ray da ray mamba hay saw ta da ray mezōley hay nga papaŋ nga papa ata hay zleezle ma gōrey ndaw nga tede ŋgene. Mey hay a ŋgene na, fa handawa yawa ga, fa da jōnta nga sōrey cek masa Gazlavay ma wudēy nga ka nga lōhey ndōhay na, daa ba. Ya sōrkwa cek aha na, maja aləkwa ma tōbkwa mey nga Gazlavay.

⁵ Yaa cōfdaka nga tōkta ndōhay a ŋgene na, maja ya wudēy ndōhay a nga wudam vaw da wuzlah ata. Anda melōvey, si a njam ta mevel maaya, a kam cek maaya, asaya, a tōbmara mey nga Gazlavay fara fara. ⁶ Ndōhay siya ta zlanḡadām sem daa cōved maaya. Ata fa kam yawa da ray mey hay saw kōne. ⁷ A wudam ŋгаа sōrkadamatara *kwakwas nga Mawiz a ndōhay. Aa sōrkadamatara ha na, anda ndōhay ma sōra cek, ama ata ta ray ata, a cōndamara mey masa ata ma wuzdamatara ha ba.

Kwakwas nga Mawiz mapakaya na, ngada wa hay wa?

⁸ Ya sōrkwa da aləkwa fa sōpkwa *kwakwas nga Mawiz fara fara na, kwakwas a, aa maaya. ⁹ Sōrmara, ndōhay maaya fa mey nga Gazlavay na, kwakwas a ara ngada ata ba. Ama, kwakwas a na, ara ngada ndōhay ma cōnmar mey a Gazlavay ba, ngada ndōhay ma cōnam mey ba, ngada ndōhay masa-maagway, ngada ndōhay ta mebōrey, ngada ndōhay ma namar ray ba, ta ngada ndōhay maa sanḡōram da ray cōved nga Gazlavay. Asaya, kwakwas a na, ara ngada ndōhay ma kōdmata papa ata hay, da daa ba, ma kōdmata mama ata hay vagay, ta ngada ndōhay ma kōdam ndōhay vagay, ¹⁰ ngada ndōhay ma lam vaw saw, ta ngada zel hay ma lam vaw ta zel cōla ta ngada ŋgusay ma

1:2 1.2 Timawte: 1Kwr 4.17; bōz adaw: 1Kwr 4.15; 1Tes 2.11; Tit 1.4 **1:3** 1.3 Efez: SNM 20.1; ndōhay maa sōrkadam ndōhay ta membōrzley: 4.1-10; 6.3-5, 20-21; 2Tm 2.16-18, 23-26; Tit 1.10-16; 3.9-11 **1:4** 1.4 4.7; 6.20; 2Tm 2.16, 23; 4.4; Tit 1.14 **1:5** 1.5 1.14, 19; 2.15; 4.12; Rm 12.9; 13.10; 1Kwr 8.1; Gal 6.10; 2Tm 1.3, 13; 3.10; Tit 1.15 **1:6** 1.6 1.4; 6.4, 20; Tit 1.10 **1:8** 1.8 Rm 7.12, 16
1:9 1.9-10 Gal 5.19-21

lam vaw ta ngwas cəla, leŋ ngada ndəhay ma hədkadam ndəhay nga beke. Kwakwas a saya na, ara ngada ndəhay ma mbəzlam, ta ngada ndəhay ma mbadam saw kəne. Yaw, anda kefe kwakwas a na, ara ngada kwa waawa ma key cek maaya ba wura wura cəpa, masa wal ta meesərkedey aləkwa masa maaya. ¹¹ Meesərkedey aləkwa ha na, aa daa *Mey-maaya-mawiya. Mey-maaya-mawiya ha na, a wuzdandakwara Gazlavay aa ta gədan, aa daa wiya mandaw mandaw. Ara anga ma vəldiwa Mey-maaya-mawiya ha amba ya wuzdatara a ndəhay.

Pawl a kar suse a Yesu Kəriste

¹² Ya fa kar suse a Yesu *Kəriste, Bay aləkwa Mahura. Ya fa kar suse maja a wulkey yah na, yah təde nga ka sləra anga. Da ray ngene, ta paya la nga ndaw ma ka sləra anga. Ara anga ma vəlya gədan nga ka sləra anga ha. ¹³ Zleezle na, ya faa guzley mey maaya ba da ray anga, ya fa sərdara banay ta ndəhay anga hay, ya fa key həma a ray ndəhay anga hay a. Ama anga na, ta sərfaya dey-ceceh la, maja a səra cek hay masa yah ma kata na, a key ya səra ba. Ya səra ba na, maja yah ma təba mey anga daa ba aran. ¹⁴ Bay aləkwa Mahura ta pəsyə mey la ga. A vəlya gədan amba ya təba mey anga, asaya, amba ya wudta ndəhay.

¹⁵ Mey masa yah ma daa guzlda kaa na, ara mey masa fara fara. Maaya na, ndəhay cəpa a təbmara mey a ta mevel pal. Ya fa ləvkwar, Yesu Kəriste na, ta sawa la a bəla amba a ləhdata ndəhay daa mebərey. Ndaw ma fənta ndəhay ta mekey mebərey na, ara yah. ¹⁶ Fara fara yah, ndaw ma fənta ndəhay ta mekey mebərey, ama Yesu Kəriste ta sərfaya dey-ceceh la cənga. A ka kəne na, amba a wuzdatara a ndəhay, anga ndaw meekwed-mey fara fara. A wuzdatara anda kefe na, nga vəltar gədan a ndəhay ma da təbmara mey anga, amba a hətam heter mendəvey ba. ¹⁷ Anja Bay Gazlavay nga zəma bay anga nga sərmataw.

Ara ndaw masa ta dey, a məcey ba səlak.

Ndaw a gwa nga hətar ta dey ba.

Anga na, Gazlavay pal.

Anja ndəhay nga həslmar ray,

nga həlmamara nga sərmataw. *Amen.

Pawl a vəlar gədan a Timawte

1:10 1.10 4.6; 6.3; 2Tm 1.13; 2.2, 15; 3.14; 4.2-3; Tit 1.9; 2.1, 7-8 **1:11** 1.11
 1Tes 2.4 **1:12** 1.12 Gal 1.15-16 **1:12** 1.12-17 2.7 **1:13** 1.13 SNM 8.3; 9.1-5;
 1Kwr 15.9; Gal 1.13 **1:14** 1.14 1.5; 1Kwr 15.10 **1:15** 1.15 Lk 15.2; 19.10;
 Rm 5.8 **1:16** 1.16 Ef 3.7-9; Kwa 1.25 **1:17** 1.17 Rm 16.27

¹⁸ Timawte, bəz adaw, ya mbəkdaƿa meƿ keƿe a har akah. Mey a na, aa letek ta meƿ masa ndəhay ma təla meƿ ŋga Gazlavay maa guzlam da ray sləra masa kah ma da ka. Sərfadərwa meƿ ata ha, amba ka həteƿ gədan ŋga key sləra maaya maaya. ¹⁹ Anda keƿe, ya wuƿeƿ ka ka sləra ha ta meƿel maaya, asaya, ka pa Gazlavay ŋga ndaw akah fara fara. Ndəhay siya hay a wuƿam ŋga kamara kəne ba. Maja ŋgene, fa pamara Gazlavay ŋga ndaw ata fara fara daa saba. ²⁰ Ata Himene ta Alekzandəre na, ata da wuzlah ndəhay a may. Ya ta vəldata sem a har *Satan* , bay-malula, amba a pam lenġesl, aa guzlam meƿ maaya ba da ray Gazlavay saba.

2

Mey da ray menjey daa mecəmey-ray ŋga ndəhay ŋga Yesu

¹ Cek ŋgeeme, masa yah ma wuƿeƿ ŋga ləƿey na, ndəhay ŋga dərmar danġay a Gazlavay ŋga cacəfdafamar cek, ŋga kamar ambahw, asaya, ŋga kamar suse maja ndəhay tabiya. ² Maaya na, a dərnam danġay a Gazlavay maja bay hay, ta mahura hay tabiya ma wa hwayak hay, amba ya sərkwə banay ba, ya njakwa ta zazay. Da ray ŋgene, ya nakwa ray a Gazlavay, asaya, ya njakwa ta mekey cek maaya. ³ Medərey-danġay a na, ara cek maaya ma mbafar a Gazlavay, ndaw ma ləhdandakwar. ⁴ A mbafar na, maja a wuƿeƿ ndəhay cəpa ŋga ləham, asaya, a wuƿeƿ ndəhay cəpa a səmara meƿ masa fara fara. ⁵ Mey a keƿe aa ŋgada ndəhay tabiya.

Fara fara Gazlavay na, aa pal gway.

Ma cəma ndaw-magədan ta Gazlavay na, ndaw pal.

Ndaw a na, ara Yesu Kəriste.

⁶ Ta sawa la, ta vəlda heter anġa la ŋga ləhey ndəhay tabiya daa mebərey. Ta ka la anda keƿe ta pas masa Gazlavay ma wuƿeƿ, amba a wuzdatara fara fara Bay Gazlavay a wuƿeƿ ŋga ləhdata ndəhay tabiya. ⁷ Bay Gazlavay ta paya la ŋga maslan anġa, ta ŋga ndaw anġa meslərey. A slərđiwa na, ŋga wuzdatara meƿ masa fara fara a ndəhay masa *Jəwif

1:18 1.18 4.14; 6.12; 1Kwr 9.24-25; 2Tm 4.7-8; Jud 3 **1:19** 1.19 1.5 * **1:20** 1.20 a har Satan; Ndəhay a wulkam Pawl a wuƿeƿ ŋga ləƿey: «Ya ta bəlta ata Himene ta Alekzandəre sem daa mecəmey-ray ŋga ndəhay ŋga Yesu.» Nəka 1Kwr 5.13. **1:20** 1.20 Himene: 2Tm 2.17; Alekzandəre: 2Tm 4.14; Satan: 1Kwr 5.5 **2:1** 2.1 Ef 6.18-19; Fəl 4.6 **2:2** 2.2 Es 6.10 **2:3** 2.3 Tit 3.4 **2:4** 2.4 Ez 18.23; 2Tm 2.25-26; 2Pi 3.9 **2:5** 2.5 Mew 6.4-5; 1Kwr 8.6; Rm 3.29-30; 10.12-13 **2:6** 2.6 Mk 10.45; 2Kwr 5.15; Gal 1.4; Tit 2.14; 1Jn 3.16; pas masa Gazlavay ma wuƿeƿ: Gal 4.4; Tit 1.3

hay ba hay, amba a təbmara. Yaa guzlkwar keɗe na, fara fara, ya mbərzley ba.

⁸ Yaw, ya wuɗey na, zel hay ŋga dərmar danɗay a Gazlavay kwa daa wura daa wura. Daa medərey-danɗay a na, ŋga baŋɗaɗamata har ata hay a vad ta mevel maaya, ta mecey-mevel ba, ta metərey-vaw ba.

⁹ Ya wuɗey na, ŋgusay may a da pam zana ŋga zlepey ba, a da pam zana ma kəɗtar dey a ndəhay ba. A da tərɗamata ray ata hay ŋga zlepey ba. Danɗwa hay ta bersle hay, len zana hay masa dala kalah ma həɗkey ba na, a da pamara ba.

¹⁰ Ama ŋga wuzdamərwa membey ata ta fa sləra maaya masa ata ma kamara. Yaw, ŋgusay ma ləvam fa namar ray a Gazlavay na, si a kamara kəne.

¹¹ Daa meesərkey daa way ŋga Gazlavay na, si ŋgusay a njam teete, a jəkam sləmay ta meney ray fa ndaw maa sərkaɗata. ¹² Ya vəltar cəved a ŋgusay ŋgaa sərkaɗamata zel hay ba. A da lam ray da ray zel hay ba, ama si a njam teete. ¹³ Ya ləvey anda keɗe, maja Bay Gazlavay a ləmwa teesef na, zel, mezəley *Adam. Fa dəɓa ha, a ləmwa ŋgwas, mezəley *Ev. ¹⁴ Asaya, *Satan, bay-malula, ta bata Adam ŋga key mebərey na, daa ba, ama a betey na, ŋgwas. Anda keɗe, ara ŋgwas ma cənar mey a Gazlavay ba. ¹⁵ Kwa ta ŋgene he cəpa, ŋgusay a ləham la ta fa mayawa bəza hay, ama a da ləham na, si ata fa təbmara mey ŋga Gazlavay mandaw mandaw, fa wuɗam vaw, a njam maaya fa mey ŋga Gazlavay, asaya, a zlapam ba.

3

Bay-ray hay ŋga ndəhay daa Egəliz na, wa hay wa?

¹ Ehe, mey masa yah ma daa guzlda kaa na, ara mey masa fara fara. Ndaw ma wuɗey ŋga key *bay-ray ŋga ndəhay daa Egəliz na, a key ŋgene, a səpey ŋga key sləra masa maaya. ² Yaw, ŋga key bay-ray na, si ndaw maaya masa ndəhay faa guzlam mey maaya ba da ray a daa ba, si ndaw masa ta ŋgwas pal. Ndaw a, a da wey ba. A da key cek hay saw ba. A wey vaw fa ray anɗa, menjey anɗa, aa maaya fa dey ŋga ndəhay. A təbey mələk hay a way anɗa. A gwa ŋgaa sərkaɗata ndəhay maaya maaya. ³ Ara ndaw ma vəlda ray anɗa ŋgada wuzam ba, ndaw ma kəɗey vaw ba, ama ndaw meekwed-mey, ma wuɗey mey ba, ma səpey dala kalah ba. ⁴ Si a kərza way anɗa maaya maaya,

2:7 2.7 ndaw-meslərey: 1.11-17; Gal 1.1; 2.7-8; Ef 3.7; 2Tm 1.11 **2:8** 2.8 1Pi 3.7 **2:9** 2.9 1Pi 3.3-5 **2:10** 2.10 5.10 **2:11** 2.11-12 1Kwr 14.34 **2:13** 2.13 MC 2.7, 21-22; 1Kwr 11.8-9 **2:14** 2.14 MC 3.1-6, 13; 2Kwr 11.3 **3:2** 3.2-7 Tit 1.6-9; 1Pi 5.1-4 **3:3** 3.3 2Tm 2.24

amba bəz anğa hay a cənmar mey ta meney ray mandaw mandaw. ⁵ Ya ləvey anda keđe na, maja da ndaw a səra ma kərza way anğa ba na, a da key bay-ray nğa ndəhay daa Egəliz na, kwara?

⁶ Nğa key bay-ray na, ka da pam ndaw ma təba mey nğa Yesu təlam ba. Da kaa təde, a da zlepey * kwa, fa dəba ha, Bay Gazlavay a da kar sariya anda aa ma kar sariya a Satan. ⁷ Asaya, ndaw aha na, si ndəhay ma təba mey nğa Yesu ba faa həmdamara may. Anda keđe, fa da rəsmara daa ba, asaya, ndaw aha fa da kəzley aa gadañ nğa *Satan daa ba may.

Ma jəna ndəhay daa Egəliz na, wa hay wa?

⁸ Ndəhay ma jəna ndəhay daa Egəliz na, si ndəhay maaya ta lenğesl. Si aa guzlam ta cəved e, a daa guzlam ta neneh cew cew ba. A da sam wuzam ga ba, a da səpam dala ta cəved malamba ba. ⁹ Si a təbmara mey fara fara masa Gazlavay ma wuzdandakwara, a kərzamara mey a ta mevel maaya.

¹⁰ Nğa pey ndəhay ma jəna ndəhay daa Egəliz na, si ka sanğalamata la dğay. Da cek maaya ba fa ata daa ba na, ka pamata nğa ndəhay ma jəna ndəhay daa Egəliz.

¹¹ Nğwas ata hay may †, si a pam lenğesl kəne. A daa guzlam mey saw a ray ndəhay ba, a da wam ba, ama si a kam cek hay maaya maaya ta cəved e.

¹² Ndaw ma jəna ndəhay daa Egəliz na, si ndaw masa ta nğwas pal. Si a kərzata bəz anğa hay ta ndəhay da way anğa hay maaya maaya. ¹³ Da ndəhay ma jəna ndəhay daa Egəliz fa kamara sləra ata maaya maaya na, ndəhay a həslmatar ray la. Asaya, a hətam gədañ la ga, maja ata fa pamara Yesu *Kəriste nğa ndaw ata fara fara.

Mey da ray mey fara fara masa Bay Gazlavay ma wuzdərwa a ndəhay

¹⁴ Ya fa wulkey, menjey nekədey fedə, ya daw la fa kah, ama ya fa wuzlalakawa mey keđe cəpa dğay. ¹⁵ Da ya ta wusey gweegwe daa ba na, mey masa yah ma wuzlalakawa daa leeter keđe na, ya wuzlalakawa amba ka səra, ndəhay nğa Gazlavay a da njam na, kwara. Ndəhay anğa hay a na, ara ndəhay daa *mecəmey-ray nğa ndəhay nğa Yesu macəmkaya ta Gazlavay, ndaw masa aa daha ta dey nğa sərmataw. Ndəhay daa mecəmey-ray nğa ndəhay nğa Yesu a, faa sərkadamata ndəhay ta mey masa fara fara da ray

* **3:6** 3.6 a da zlepey: A wufey a ləvey: «A da gəley ray». **3:7** 3.7 2Kwr 8.21; SNM 6.3 † **3:11** 3.11 Nğwas ata hay may: Ta mey Gərek a gwa a cəney may «I]ğusay ma jəna ndəhay daa Egəliz». **3:11** 3.11 Tit 2.3

Gazlavay, fa lacam maaya maaya da ray mey a. ¹⁶ Ahaw, fara fara, mey a masa aləkwa ma təbkwa na, aa mahura. Mey a zleezle mabadakaya, ama Gazlavay ta wuzdərwa la a palah. Mey a fa lövey:

Kəriste ta sawa la a bəla, a yawa anğa ndaw-magədan, Mesəfney nğa Gazlavay ta wuzdərwa la anğa na, ndaw maaya ma key cek ta cəved e.

*Maslan hay nğa Bay Gazlavay da vad ta hətmar la ta dey ata.

Ndəhay ta wuzdamara mey da ray a la a ndəhay daa səkway hay mekele mekele.

Ndəhay siya da bəla ta pamara la nğa ndaw ata fara fara.

Bay Gazlavay ta la sem a vad aa slam-mewedey.

4

Mey da ray ndəhay maa sərkadam ndəhay ta membərzley

¹ *Mesəfney nğa Gazlavay ta kada la maaya maaya, a lövey: ta pas masa bəla gweegwe a ndəvey na, ndəhay siya a mbəkdamara metəbey mey nğa Yesu la. Ndəhay a ngene, a da cənmatar mey nğada mesəfney maaya ba hay ma bata ndəhay, a da təbmara meesərkedey ata masa ta membərzley. ² A da təbmara mey a na, ta mey ndəhay masa ta neneh cew maa guzlam si ta membərzley. Ndəhay ta neneh cew e, a sərmara nğa wunkey cek maaya ta maaya ba saba. Ara anda lenğesl ata ta mbədey sem. ³ A təkмата ndəhay nğa ley nğwas. Asaya, a vələm cəved a ndəhay nğa zəmey cek hay mekele mekele ba. Ama Gazlavay a katərwa cek hay a ngene na, nğa zəmey. Anda keđe, ndəhay ma təba mey anğa ma sərmara mey masa fara fara na, nğa zəmamara ta mekey suse a Gazlavay. ⁴ Cek hay tabiya masa Gazlavay ma katərwa na, aa maaya. Cek nğa mbəkey na, daa ba, ama ndəhay nğa kamar suse a Gazlavay maja.

⁵ Fara fara, mey nğa Gazlavay ta medərey-danğay na, a tərdata cek hay a maaya fa mey nğa Gazlavay.

Mey da ray ndaw ma ka sləra maaya nğa Yesu Kəriste

⁶ Si kaa sərkatatara cek hay keđe nğada məlmakw hay daa Egəliz. Da ka faa sərkatata na, kah ndaw ma ka sləra maaya nğa Yesu *Kəriste. Ka fa hətey gədan daa cəved nğa Gazlavay maja mey anğa masa kah ma təba, ta meesərkey

3:15 3.15 Ef 1.23; 2.19-22 **3:16** 3.16 Mt 28.18-19; Mk 16.19; Jan 1.14; SNM 2.33; Ef 1.20-21; Fəl 2.6-11; Kwa 1.6, 23; 2Tm 4.17 **4:1** 4.1 2Tm 3.1 **4:1** 4.1-11 1.10 **4:3** 4.3 nğa ley nğwas: 1Kwr 7.1; cek mezəmey: MC 9.3; Rm 14.2; Kwa 2.21; Heb 13.9; mekey suse: Rm 14.6; 1Kwr 10.30 **4:4** 4.4 MC 1.31; SNM 10.15

maaya masa kah ma sɔpa. ⁷ Ama mamba hay saw na, a mbafar a Gazlavay ba, ka da jɔkey slɔmay fa vɔda ba. Daa menjey akah na, si ka key cek maaya mandaw mandaw, anda Gazlavay ma wufey. ⁸ Da ndaw a hway amba vaw anɔa a pəskey na, ara cek ma jɔna nekɔfey. Ama da ndaw aha fa nar ray a Gazlavay na, nɔgene ara cek maaya ma fɔna cek tabiya, maja a sɔra a da hɔtey heter mendɔvey ba wure kedɛ ta nɔgada fa mey. ⁹ Mey masa yah ma daa guzlda kaa na, ara mey masa fara fara. Maaya na, ndɔhay cɔpa a tɔbmara mey a ta mevel pal. ¹⁰ Fara fara, alɔkwa fa sɔrkwa banay daa slɔra, alɔkwa fa kakwa gɔdan daa slɔra ha maja mewulkey alɔkwa aa da ray Gazlavay, ndaw masa aa daha ta dey nɔa sɔrmataw. A gwa a lɔhdata ndɔhay cɔpa ndav, ama a da lɔhey fara fara na, ndɔhay ma tɔbmara mey nɔa Kɔriste. ¹¹ Lɔvtar a ndɔhay nɔa kamara cek hay a kedɛ, sasɔrkadata mandaw mandaw da ray a.

¹² Kwa anja kah gula dɔgay na, ndaw a da rɔska ba. Ama ka slɔra akah amba ndɔhay ma tɔba mey nɔa Yesu Kɔriste, a nɔkam dey fa kah. Ka wuzdatara ta fa mey akah meeguzley, ta fa menjey akah, ta fa mewufey-vaw akah, ta fa kah ma tɔba mey nɔa Yesu, lej ta fa kah ma sɔpa *mewey nɔa Gazlavay ta mevel pal. ¹³ Vɔlda ray akah nɔa jɔnɔy mey nɔa Gazlavay fa mey nɔa ndɔhay mandaw mandaw. Vɔltar gɔdan, sasɔrkadata haa kasl pas masa yah ma wusey fa kah. ¹⁴ Sɔrfada gɔdan masa *Mesɔfney nɔa Gazlavay ma vɔldakawa. A vɔldakawa gɔdan a na, ta pas masa ndɔhay ma tɔla mey nɔa Gazlavay maa guzlam da ray akah, ta *bay-ray hay nɔa ndɔhay daa *mecɔmey-ray nɔa ndɔhay nɔa Yesu ma pamaka har a ray heyey. ¹⁵ Kata cek hay a kedɛ tabiya maaya maaya, vɔlda ray akah nɔa ka slɔra kedɛ tabiya. Anda kedɛ, ndɔhay tabiya a da hɔtmaka, ka fa daw fa mey fa mey daa slɔra akah. ¹⁶ Wey vaw fa ray akah, asaya, wey vaw fa mey masa kah maa sɔrkadatara a ndɔhay, kata cek hay a kedɛ mandaw mandaw. Da ka fa ka anda kedɛ na, ka lɔhda ray akah la, asaya, ka lɔhdata ndɔhay ma jɔkfamaka slɔmay la.

5

Mey da ray menjey nɔa Timawte da wuzlah ndɔhay nɔa Yesu

¹ Da ndaw-maraw ta key cek maaya ba la na, ka daa bɔcar taa bɔcey ba, ama gwaguzlar ta dɔk-vaw anda nɔgada

4:6 4.6 1.10 4:7 4.7 1.4 4:8 4.8 6.6 4:10 4.10 Tit 3.4 4:12 4.12 1.5;
Tit 2.7 4:13 4.13 2Tm 3.15-16 4:14 4.14 1.18; 5.22; SNM 6.6; 2Tm 1.6; 2.2
4:16 4.16 1.10; 4.12; 2Tm 2.22; 3.10

papakw. Kətata mezəle hay anda ara məlmakw hay.
² Gwaguzltar a madanğwas hay anda kaa guzley nğada mamakw. Kətata nğusay siya ta sabara hay, njeý ta ata, ta mevel maaya anda dam-mamakw hay.

Mey da ray nğwas-vagay hay

³ Dəktar mevel a nğwas-vagay hay, jənta daa masa ndaw nğa jənta daa ba səlak. ⁴ Da nğwas-vagay bəz anğa hay mahura daha, da daa ba bəza hay nğa bəz anğa hay daha na, si bəza hay a, aa sərkam nğa key cek anda Gazlavay ma wufey nğada ndəhay da way ata hay dğagay, a nəkfamatar dey. Maaya na, a jənmata ndəhay da way ata masa ma gəlmata zleezle he. Da fa kamara kəne na, a mbafar a Gazlavay. ⁵ Nğwas-vagay manjakaya taava anğa fara fara masa ndaw nğa jəna daa ba na, mewulkey anğa aa da ray Gazlavay. A dərar danğay, a kar ambahw taa vad, taa pas amba a jəna. ⁶ Ama nğwas-vagay ma key cek saw masa ma mbafar gway na, kwa anğa ta dey na, anğa anda ndaw maməckaya. ⁷ Sasərkadatar meý a keđe amba ndəhay aa guzlam meý maaya ba da ray ata ba. ⁸ Yaw, maaya na, ndaw ma təba meý nğa Yesu a jənta ndəhay daa səkway anğa. Teesed na, a jəney ndəhay da way anğa hay dğagay. Da a jənta ba na, a key nğene, a rəsa cəved nğa Gazlavay. Anda keđe, ta key cek maaya ba sem, a fəna ndaw masa ma təba meý nğa Yesu ba.

⁹ Ka da wuzleley a wuzlah mezəley nğa nğwas-vagay hay masa akwar ma jənmata na, si mezəley nğa nğwas-vagay masa mevey kwakwar maakwaw, da daa ba, ma fəna. Si nğwas aha na, zel e meməcey heyey pal gway, kwa ta ley mekele daa ba, ¹⁰ asaya, si nğwas masa ndəhay faa həmdamara sləra anğa. Anda meləvey, ta gəлта bəz anğa hay la maaya maaya, ndəhay ma samawa a way anğa na, ta təbta la maaya maaya. Asaya, ta pərtara salay nğa ndəhay ma təba meý nğa Yesu la, ta jənta ndəhay ma səram banay la, ta key cek hay maaya la mekele mekele.

¹¹ Ama nğwas-vagay hay masa sebelenj hay na, ka da wuzlalata mezəley ata hay ba, maja da kaa təđe a da lam zel saya kwa. Da mezəley ata hay mawuzlalatakaya, ama da ta wufam sem nğa ley zel saya na, nğene a da mbəkdamara cəved nğa *Kəriste. ¹² Anda keđe, sariya a kərzata la, maja ata ma zləbmara meý masa ata ma jəwmara zleezle nğa njeý taava ata heyey sem nğa key sləra nğa Yesu. ¹³ Asaya, anja kwa nğwas-vagay hay masa sebelenj hay ta lam zel hay daa ba, da ka ta wuzlalata mezəley ata hay la na, a

da tɔram masa-mayad hay nŋa pɔkey way nŋa ndɔhay saw fa mey-mbew e, fa mey-mbew e. Ama cek maaya ba masa ma fɔna saya na, a da tɔram masa baazlam hay, a ndɔkwdamata ray ata hay aa mey nŋa ndɔhay, aa guzlam da ray cek hay masa ata ta cɔved nŋaa guzley da ray a daa ba. ¹⁴ Ara maja nŋene, ya wudɛy na, nŋwas-vagay hay masa sebelen hay na, si a lam zel, a yamawa bɔza hay, a wam daa hejek ata hay, amba masa-gɔra alɔkwa hay a hɔtam mey nŋaa guzley a ray alɔkwa ba. ¹⁵ Yah ma lɔvey anda kedɛ na, maja nŋwas-vagay hay sebelen hay mekele mekele ta mbɔkdamara cɔved maaya sem, nŋa sɔpey cɔved nŋa *Satan.

¹⁶ Da nŋwas-vagay hay daa sɔkway nŋa nŋwas ma tɔba mey nŋa Yesu daha na, nŋwas aha nŋa jɔnta. A da mbɔkdata amba ndɔhay daa *mecɔmey-ray nŋa ndɔhay nŋa Yesu a jɔnmata ba. Anda kedɛ, ndɔhay nŋa Yesu a da jɔnam na, nŋwas-vagay hay masa kwa ndaw nŋa jɔnta daa ba sɔlak.

Mey da ray bay-ray hay daa Egɔliz

¹⁷ *Bay-ray hay ma kam slɔra maaya maaya daa Egɔliz na, ata tɔdɛ nŋa hɔtey mawurbay nŋa slɔra ata da mey cew. Fara fara tɔdɛ nŋa hɔtey mawurbay na, *bay-ray hay ma kam gɔdan nŋa wuzdamakwara mey nŋa Gazlavay ta nŋaa sɔrkadamakwar. ¹⁸ Yaw, mey nŋa Gazlavay fa lɔvey: «Daa masa sla fa key slɔra da ley na, ka da par beben a mey ba.» Mey nŋa Gazlavay fa lɔvey saya: «Ndaw ma ka slɔra na, aa tɔdɛ nŋa hɔtey mawurbay nŋa slɔra nŋa.»

¹⁹ Da ndaw a handaka mey maaya ba da ray bay-ray nŋa ndɔhay daa Egɔliz na, ka da tɔba ba. Ka da tɔba na, si ndɔhay cew, da daa ba, maakar, ma kam sede la da ray mey a. ²⁰ Da ndaw a key meberɛy na, mbɔdar ray fa mey nŋa ndɔhay tabiya, amba ndɔhay siya hay a kam mandɔrzay nŋa key meberɛy. ²¹ Ya fa kaka ambahw fa mey nŋa Gazlavay, fa mey nŋa Yesu *Kɔriste, ta fa mey nŋa maslan hay nŋa Gazlavay da vad masa aa ma walata, tɔba mey a kedɛ. Daa slɔra masa kah ma ka na, ka da weley ndɔhay ta weley ba, wudta ndɔhay tabiya letɛk.

²² Ka da wusey vaw nŋa pey har a ray ndaw amba a key slɔra daa Egɔliz ba, sanjala la dagay, ka da mbɔzda ray akah aa meberɛy nŋa ndɔhay ba. Anda kedɛ, jɔda ray akah maaya maaya.

²³ Yaw, ka da sey yam daada ba, ama sey wuzam * nekədey, amba hwaɗ ma caka mandaw mandaw ŋgene, a caka saba, vaw akah a key ŋgama.

²⁴ Mebərey ŋga ndəhay siya, kwa manjar ŋga seŋgeley na, ndəhay tabiya a sərmara. Ama mebərey ŋga ndəhay siya, ndəhay a da sərmara na, si ata ma sanɗalamata la ɗagay. ²⁵ Ara kəne may, cek masa ndaw ma ka maaya na, a bey ba. Kwa aa mabadakaya, nekədey a na, a wuzwa la a palah.

6

Mey da ray beke hay

¹ Maaya na, beke hay cəpa a namatar ray ŋgada bay ata hay maaya maaya, amba ndəhay aa guzlam mey maaya ba da ray Gazlavay ba, asaya, amba aa guzlam mey maaya ba da ray mey masa aləkwa maa sərkadakwa ba. ² Beke hay siya na, bay ata hay fa təbmara mey ŋga Yesu. Anda keɗe, ata cəpa məlman hay ta bay ata hay a, daa mey ŋga Yesu. Ama beke hay a, da a namatar ray ba maja a ləvam ata məlman hay na, ŋgene maaya ba. Sasəkar jak, maaya na, a kamatar sləra ma fəna ma fəna. A kamatara sləra kəne na, maja bay ata hay masa ata ma jənmata daa sləra ha na, ara ndəhay ma təba mey ŋga Yesu masa Gazlavay ma wudta kalah.

Mey da ray meesərkey maaya ba ta da ray mesəpey zleley

Yaw, cek hay masa yah ma wuzdatakawa cəpa keɗe, si kaa sərkadatar a ndəhay, vəltar gəɗan ŋga kamara kəne. ³ Ama ndəhay siya faa sərkadam mey mekele wal. A gəmam ŋga təbmara mey fara fara ŋga Yesu *Kəriste Bay aləkwa Mahura ba. Mey masa aləkwa maa sərkadakwa da ray menjey maaya ta Gazlavay na, a gəmam ŋga təbmara ba. ⁴ Ndəhay ŋgene a zlapam kalah, a səram cek ba, mewulkey ata maaya ba. A wudam ŋga key yawa saw, ta ŋga tərey vaw kalah da ray mey hay. Cek hay masa ata ma kamata ŋgene na, a handawa səleŋ, metərey-vaw, ta mecədey-vaw, leŋ mewulkey maaya ba da ray ndəhay. ⁵ Ata fa təram vaw mandaw mandaw maja mewulkey ata maaya ba, a sərmara cek masa fara fara saba. A wulkam maaya ba, a ləvam mesəpey cəved ŋga Gazlavay na, ara cəved ŋga hətəy zleley.

* **5:23** 5.23 wuzam: Ara wuzam anda masa Mafaw hay ma samara ba, ama ara wuzam mekele masa Pawl ma wudey Timawte ŋga sa anda slalak. **6:1** 6.1-2 Ef 6.5; Tit 2.9-10; Flm 8-20; 1Pi 2.18 **6:3** 6.3 1.10; Gal 1.6-9 **6:3** 6.3-10 1.3-7 **6:4** 6.4 1.4; 6.20; 2Tm 2.14 **6:5** 6.5 Jan 10.12; SNM 20.33-34; 1Tes 2.5; Tit 1.11; 1Pi 2.14; 5.2

⁶ Ahaw, mesəpey cəved ŋga Gazlavay na, ara zleley mahura, ama si ndaw ma səpa cəved e aa səmey da ray cek masa aa ma hətar da bəla, kwa aa ga daa ba. ⁷ Fara fara, ya yakurwa a bəla na, ta cek da har ba, ya da məckwana, kəne may. ⁸ Anda keđe, da aləkwa fa hətkwa cek ŋga zəmey ta zana ŋga kəzley fa vaw na, ŋgene mak. ⁹ Ndəhay ma səpam zleley na, bay-malula fa batata ŋga key mebərey, a tədam asi har anğa anda cek ma kəzley aa gadaŋ. Ndəhay a, a səpam cek hay saw ma nəsa ndəhay, masa maa zəfdata. ¹⁰ Mewudəy dala kalah na, a handawa cek hay maaya ba tabiya. Ndəhay mekele a mbəkdamara cəved ŋga Gazlavay maja ata fa səpam dala kalah, fa handamawa banay ta mewulkey kalah a ray ata.

Pawl a kəta Timawte

¹¹ Ama kah Timawte, ndaw ŋga Gazlavay, hway la dəren ta cek hay maaya ba ŋgene tabiya. Maaya na, ka səpey ŋga key cek ta cəved e, ka njeý ta Gazlavay mandaw mandaw, ka təba mey ŋga Yesu maaya maaya, ka wudta ndəhay tabiya, ka bəsa banay, ka tərey ndaw meekwed-mey. ¹² Key gədaŋ daa cəved ŋga Gazlavay amba ka hətey heter mendəvey ba masa Gazlavay ma zəlka maja. Ara anda kah ma wuzda fa mey ŋga ndəhay ga, kah ndaw ma təba Yesu *Kəriste sem. ¹³ Ehe, ya wuzdakawa mey keđe fa mey ŋga Gazlavay ma vəltar mesəfney a cek hay tabiya, ta fa mey ŋga Yesu Kəriste ma key sede maaya maaya fa mey ŋga Bay *Pawns Pilat. ¹⁴ Ya fa ləvka, nar ray a mewey masa Gazlavay ma vəldakawa. Ka da zləba ba, daa menjeý akah na, ndaw a da mbədkə ray ba, haa kasl pas masa Bay aləkwa Mahura Yesu Kəriste ma da vəhwa. ¹⁵ A da vəhwa na, ta pas masa Gazlavay ma wudəy.

Bay Gazlavay na, anğa pal ma wata cek hay tabiya,
aa daa wiya mandaw mandaw.

Anğa Bay Mahura da ray bay hay cəpa.

¹⁶ Anğa pal, ndaw masa ta dey ŋga sərmataw, a məcey ba.

Anğa na, manjakaya daa slam-mewedəy.

Mewedəy anğa kalah,

ndaw a gwa ŋga ŋgəchey a cakay a ba.

Kwa ndaw pal ta hətar Gazlavay ta dey anğa na, daa ba,

kwa fa da gwa ŋga hətar daa ba.

Anja ndəhay ŋga həlmamara.

Anja ŋga zəma Bay anğa ŋga sərmataw. Amen.

6:6 6.6 4.8; Fəl 4.11; Heb 13.5 **6:7** 6.7 Jəw 1.21; Ekz 5.14 **6:8** 6.8 MM 30.8-9
6:12 6.12 1.18; 4.14 **6:13** 6.13 Mt 27.11-26; Jan 18.28-19.16 **6:14** 6.14 1.3,
18; Fəl 1.10; 1Tes 5.1-2 **6:15** 6.15 SNM 1.7; 2Pi 3.3-9; CWJ 17.14 **6:16** 6.16
Mab 33.20; Ps 104.2; Jan 1.18; Kwa 1.15; 1Jŋ 4.12

Pawl a kətata ndəhay masa-zleley hay

¹⁷ Ləvtar a ndəhay masa-zleley hay da bəla keđe, a da zlapam ba. Zleley ata masa ma da ndəvey ηgene na, ləvtar a da pamara leŋgesl ata a ray a ba, maja ara cek ma da jənta ba. Ama ləvtar ηga pam leŋgesl na, a ray Gazlavay, ndaw ma da vəlndakwar cek tabiya ta har cew cew amba yaa səmkwa. ¹⁸ Ləvtar ηga kam cek maaya mandaw mandaw. Mekey cek maaya ha na, ara anda zleley ata. Ləvtar ηga təram ndəhay mevəley ta har cew cew. ¹⁹ Da fa kamara kəne na, a key ηgene, a bəcam zleley menəsey ba ηgada fa mey, amba a hətam heter masa fara fara.

Mey ηga madagway-dakw

²⁰ Waa Timawte, wey vaw maaya maaya fa mey masa Gazlavay ma mbəkdamara a har akah. Ka da ndəkwdə ray akah aa mey hay saw ba. Meesərkey masa ndəhay ma wulkam ara mey fara fara, anja ara mey fara fara ba ηgene na, ka da ndəkwdə ray akah a hwad a ba. ²¹ Ndəhay siya hay a ləvam ata na, a təbmara meesərkey a ηgene. Anda keđe, ta mbəkdamara cəved ηga Gazlavay sem.

Anja maaya ηga Gazlavay ηga nje y ta akwar.

Leeter masa Pawl ma wuzlala nga dey cew a

Timawte Mey da ray

Leeter masa Pawl ma wuzlala nga dey cew a Timawte

Pawl a wuzlala leeter keɗe na, daa masa anɗa daa fərsəne da Rawm saya (1.8). Fara fara anɗa daa banay, a nəka na, ndaw mekele da cakay a daa ba, si Luk taava anɗa gway. Asaya, a wulkey a da məcey. A wuzlala leeter e na, ngada Timawte, ndaw masa anɗa ma wuɗa kalah anda bəzey anɗa. Timawte he na, anɗa da Efez nga vɛltar gədanɗ a ndəhay daa mecəmey-ray nga ndəhay nga Yesu fetede.

Pawl a wuzlala leeter e keɗe na, amba Timawte a daw a hətfar fiyaw. Pawl a, a wuɗey nga vɛlar gədanɗ, asaya, nga kəta da ray sləra nga key ngada fa mey, maja a wulkey anɗa na, Rawma hay fa da kəɗmara vagay.

Mey mahura daa leeter e keɗe na, ara mey da ray menjey maaya daa cəved nga Yesu. Menjey maaya daa cəved nga Yesu na, ara anda ndaw-sewje mejerey daa vərəm. Nga njeɗ maaya ha na, si ndaw a bəsa banay, asaya, si a pa Yesu nga Bay anɗa Mahura, a key hwaray maja ba. Pawl a wuɗey Timawte a key baazlam da ray mey hay saw ba, a mbəɗtar dəba ngada ndəhay ma ka cek malamba hay, asaya, a wuɗey amba a key cek anda Pawl ma ka. Pawl a wuɗey meesərkedey anɗa ta meesərkedey maaya nga bay-ray hay mekele mekele na, Timawte a mbəkda ba.

Daa leeter e keɗe na, mey mekele mekele daha nga vɛley gədanɗ a ndəhay:

Mekey hwaray nga kedey mey da ray Bay aləkwa Mahura ba (1.8-10)

Maaya na, gula hay a hwam dərənɗ ta cek maaya ba (2.22)

Derewel nga Gazlavay aa ta gədanɗ nga jənta ndəhay (3.16)

Mecey-har

¹ Ara yah, Pawl, ma wuzlalakawa leeter keɗe. Yah na, *ndaw-meslərey nga *Yesu *Kəriste anda *Gazlavay ma wuɗey. Gazlavay a slərdaya fa ndəhay amba ya wuzdatara mey da ray heter mendəvey ba masa Gazlavay ma ləvey a da vɛldatara a ndəhay macəmkaya ta Yesu Kəriste heyey.

² Ya wuzlala leeter keɗe na, ŋgada kah, Timawte, bəz adaw masa yah ma wuɗa kalah.

Anja Gazlavay, Papa aləkwa ta Yesu Kəriste, Bay aləkwa ŋga pəsmaka mey, ŋga sərfamaka dey-ceceh, asaya, ŋga njadamaka daa zazay.

Pawl a kar suse a Gazlavay maja Timawte

³ Ya fa sərfadaka mandaw mandaw taa vad, taa pas daa medərey-danɗay adaw. Ya fa kar suse a Gazlavay maja kah. Ya fa nar ray ta mevel maaya anda papaŋ ŋga papa ala hay ma namar ray zleezle. ⁴ Masa kah ma təway * heyey na, ya fa sərfada. Anda keɗe, matakwaŋ akah fa kaya. Ya wuɗey ŋga hətka fa dey amba yaa səmey ga. ⁵ Ya kar suse a Gazlavay maja ya fa sərfada, ka ta pa Yesu *Kəriste la ŋga ndaw akah fara fara ta mevel pal, anda mamaŋ ŋga mamakw Lawis ta mamakw Enis ma pamara ŋga ndaw ata fara fara teesed da ray akah. Ahaw, ya səra ka fa pa Yesu ŋga ndaw akah fara fara may.

⁶ Da ray ŋgene, ya fa ləvka saya: key sləra ma fəna ma fəna ta gədaŋ masa Gazlavay ma vəldakawa daa masa yah ma paka har a ray heyey. ⁷ Fara fara, Mesəfney masa Gazlavay ma vəldandakwara na, ara Mesəfney ŋga key sləra ta mandərzay daa dey ba. Mesəfney anɗa ha, a vəldakwar gədaŋ, a jəndakwar ŋga wuɗey vaw, a pandakwar lenɗesl ŋga wey vaw.

⁸ Da ray ŋgene, ka da key hwaray ŋga kedey mey da ray Bay aləkwa Mahura ba. Fara fara yah daa fərsəne maja anɗa. Anda keɗe, ka da key hwaray ŋga kedey mey da ray adaw ba may. Ama maja *Mey-maaya-mawiya na, bəsa banay ta gədaŋ masa Gazlavay ma vəldakawa anda yah ma bəsa. ⁹ Gazlavay ta ləhdandakwar la, ta zəldakwar la amba ya təkwa ŋga ndəhay anɗa hay. A ka anda keɗe na, maja cek hay maaya hay masa aləkwa ma kakwa ba, ama maja aa ma wuɗey ŋga pəsndakwar mey cəŋga. Daa masa bəla ta zlawa daa ba aran, Gazlavay a wuɗey ŋga pəsndakwar mey maja sləra masa Yesu Kəriste ma da ka.

¹⁰ Wure keɗe, mepəsey-mey a ta wuswa cay, maja Yesu Kəriste, ndaw ma ləhdandakwar, ma sawa a bəla. Ara maja anɗa, gədaŋ ŋga meməcey daa saba, asaya, ara anɗa

1:2 1.2 Timawte: 1Tm 1.2; 1Kwr 4.17 **1:3** 1.3 Fəl 3.5; 1Tm 1.5 * **1:4** 1.4 ma təway: Daa masa Pawl fa da mbəkdata ndəhay da Efez na, Timawte ta təway la maja. Nəka SNM 20.37ta 1Tm 1.3. **1:5** 1.5 SNM 16.1 **1:6** 1.6 a paka har a ray: 1Tm 4.14; 5.22 **1:7** 1.7 Rm 8.15 **1:8** 1.8 2.9; Rm 1.16 **1:9** 1.9 Ef 2.8-9; Tit 3.5

ma vøltar heter mendøvey ba a ndøhay ta fa Mey-maaya-mawiya.

¹¹ Yah na, Gazlavay ta paya la nga ndaw anga meslørey, amba ya wuzdatara Mey-maaya-mawiya kede a ndøhay, yaa sèrkadata. ¹² Da ray ngene, ya fa sørey banay daa førsøne kede. Ama hwaray fa kaya maja daa ba, maja ya sèra ndaw masa yah ma pa nga ndaw adaw fara fara. Ya sèra fara fara anga na, aa ta gødan nga jøða Mey-maaya-mawiya masa aa ma mbøkdiwa a har adaw haa kasl pas masa aa ma da vøhwa.

¹³ Da masa ka fa wuzey mey nga Gazlavay na, wuzey mey hay maaya fara fara letek ta mey hay masa yah ma wuzdatakawa maaya. Tøba mey a amba ka høtey gødan daa mey nga Yesu ma føna ma føna, wudta ndøhay maja kah macømkaya ta Yesu Køriste. ¹⁴ Mey-maaya-mawiya masa Gazlavay ma mbøkdamakawa a har akah kede na, ka da vøley cøved a ndaw nga mbødda mey a wal ba. Ka da ka anda kede ta gødan nga *Mesøfney nga Gazlavay masa aa daa mevel aløkwa.

Mey da ray Awnesifar

¹⁵ Ka sèra, ndøhay tabiya ma tøba mey nga Gazlavay daa hwayak nga Azi na, ta mbøkdamaya sem. Kwa ata Figel ta Hørmawzen may, ta mbøkdamaya sem. ¹⁶ Ama Awnesifar na, ta pas langgar fa sawa nga vølya gødan. Anja Bay Gazlavay nga pøstar mey a ndøhay da way anga. Awnesifar na, kwa ta key hwaray ta ndøhay nga nøkyawa daa førsøne na, daa ba. ¹⁷ Ama, sasøkar jak, anga ma sawa aa berney nga *Rawm fede na, ta', a søpya ta døk-vaw haa aa ma høtya. ¹⁸ Ka fa sèra maaya maaya anga ta jønya la ga daa masa yah da Efez. Anja Bay Gazlavay nga sørfar dey-ceceh ta pas sariya.

2

Mey da ray ndaw nga Yesu ma key sløra maaya

¹ Bøz adaw, jerey maaya maaya amba Gazlavay a vølka gødan ma føna ma føna ta fa maaya anga masa aløkwa ma høkwa fa Yesu *Køriste. ² Mey masa kah ma cønda fa yah zleezle masa yah ma wuzda fa mey nga ndøhay ga heyey na, wuzdatara a ndøhay ma tøba mey nga Yesu ta mevel pal ma gwamara ngaa sèrkadamatara a ndøhay mekele.

1:10 1.10 Jan 1.14; Tit 3.6; memøcey, heter mendøvey ba: 1Kwr 15.20, 55, 57; Heb 2.14-15 **1:11** 1.11 1Tm 2.7 **1:13** 1.13 1.5; 1Tm 1.10 **1:14** 1.14 1Tm 6.20 **1:15** 1.15 4.16 **1:16** 1.16 Awnesifar: 4.19 **2:2** 2.2 1Tm 1.10; 4.14

³ Da banay a hɔ̄tfaka maja Yesu Kɔ̄riste na, bɔ̄sa banay a anda kah na, sewje anɔ̄ga masa maaya. ⁴ Da sewje masa maaya, anɔ̄ga daa vɔ̄ram, a wudey amba bay anɔ̄ga aa hɔ̄mda na, kwa a wulkey ta cek hay mekele ba, si ta vɔ̄ram a gway. ⁵ Wulkey may, da ray ndɔ̄hay ma kam kwakurɔ̄fa. Da ndaw ta ka ta cɔ̄vedɔ̄ e daa ba na, a gwa nɔ̄ga hɔ̄tey cek maja anɔ̄ga ma fɔ̄nta ndɔ̄hay mekele na, daa ba. ⁶ Wulkey da ray ndaw mehɔ̄vey, fa sɔ̄rey banay kalah. Anja maaya na, anɔ̄ga ma da zɔ̄ma cek masa anɔ̄ga ma hɔ̄va ha teesed. ⁷ Yaw, wulkey da ray mey adaw hay masa yah ma kadakawa kedɔ̄. Anda kedɔ̄, Bay alɔ̄kwa Mahura a vɔ̄lka lenɔ̄gesl la nɔ̄ga cɔ̄nda mabara nɔ̄ga mey adaw hay a tabiya.

⁸ Wulkey da ray Yesu Kɔ̄riste, sɔ̄kway nɔ̄ga Bay *Davít. Ta mɔ̄cey la, ama ta slɔ̄kɔ̄fawa sem daa memɔ̄cey. Kedɔ̄ ara *Mey-maaya-mawiya masa yah ma wuzdatara a ndɔ̄hay.

⁹ Ara maja Mey-maaya-mawiya ha, wure kedɔ̄ ya fa sɔ̄rey banay haa a jɔ̄wmaya ta calalaw aa fɔ̄rsɔ̄ne, anda yah ndaw-mayal ma sla dɔ̄y nɔ̄ga ndaw. Ama mey nɔ̄ga Gazlavay na, majɔ̄wkaya daa ba. Ndɔ̄hay mekele fa wuzdamara cɔ̄nɔ̄ga.

¹⁰ Da ray nɔ̄gene, ya fa bɔ̄sa banay tabiya ma sawa a ray adaw, amba ndɔ̄hay masa Gazlavay ma walata, a lɔ̄ham ta fa Yesu Kɔ̄riste, a nɔ̄jam ta Gazlavay daa slam anɔ̄ga mewedey nɔ̄ga sɔ̄rmataw.

¹¹ Ehe, mey masa yah ma daa guzlda kaa na, ara mey masa fara fara:

«Da alɔ̄kwa ta mɔ̄ckwa ta Yesu la na,
ya slɔ̄kɔ̄dakurwa la nɔ̄ga nɔ̄jey ta dey ta anɔ̄ga may.

¹² Da alɔ̄kwa ta bɔ̄skwa banay a la na,
ya da wakwa da ray cek hay bama ta anɔ̄ga may.

Ama da alɔ̄kwa ta lɔ̄vkwa sem ya sɔ̄rkwa ba na,
anɔ̄ga may, a da lɔ̄vey a sɔ̄rndakwar ba.

¹³ Kwa da ya mbɔ̄kɔ̄dakwa mey anɔ̄ga na,
ama anɔ̄ga na, fa da mbɔ̄kɔ̄da mey anɔ̄ga daa ba,
maja a gwa nɔ̄ga nɔ̄sa ray anɔ̄ga ba.»

Mey da ray slɔ̄ra ma mbafar a Gazlavay

¹⁴ Wurtar slɔ̄may da ray mey kedɔ̄ a ndɔ̄hay. Kɔ̄tata ta mezɔ̄ley nɔ̄ga Gazlavay, amba a kam baazlam saw da ray mey hay ba. Fara fara, mekey baazlam saw na, ara cek nɔ̄ga tede, a nɔ̄sta ndɔ̄hay ma jɔ̄kam slɔ̄may fa baazlam a. ¹⁵ Kah na, key gɔ̄danɔ̄, amba Gazlavay aa sɔ̄mey da ray akah. Ka slɔ̄ra akah maaya anda ndaw ma key slɔ̄ra ma par hwaray ba. Anda melɔ̄vey, wuzdatara mey masa fara fara a ndɔ̄hay

2:5 2.5 4.7-8 **2:8** 2.8 Rm 1.3-4; 1Kwr 15.4 **2:9** 2.9 1.8; Ef 3.1; Fɔ̄l 1.12-14
2:10 2.10 Rm 5.2; Kwa 1.24 **2:11** 2.11 Rm 6.8 **2:12** 2.12 Mt 10.32-33; Rm 5.17
2:13 2.13 Rm 3.3-4 **2:14** 2.14 1Tm 1.3-7; 6.4; Tit 3.9

ta cøved e. ¹⁶ Yaw, baazlam mehursley na, ka da ndøkwey a hwaɗ a ba, maja ara cek ma mbafar a Bay Gazlavay ba. Ndøhay ma kam baazlam anda ηgene na, faa zødam daa cøved ηga Bay Gazlavay ma føna ma føna. ¹⁷ Mey masa ata ma wuzdamara na, a bødhey anda mbølek gurlen. Ata Himene ta Filet na, ata da wuzlah ndøhay ma kam baazlam a. ¹⁸ Ta mbøkdamara mey masa fara fara sem, a mbørzlam, a løvam Gazlavay ta sløkɗadatørwa ndøhay daa memøcey cay. Da ray ηgene, ndøhay mekele hay, ta mbøkdamara cøved ηga Gazlavay sem maja mey ata ha. ¹⁹ Ama mey masa Gazlavay ma kada na, aa fara fara, a mbøɗey ba. Mey a na, anda salay ηga way masa ta gøɗaη. Ehe, mey mawuzlalakaya da ray a, a løvey: «Bay Gazlavay a sərta ndøhay anga hay.» Mawuzlalakaya saya, a løvey: «Kwa waawa ma zøla Gazlavay Bay anga na, si a mbøkda mekey cek hay maaya ba hay.»

²⁰ Da way ndaw mahura na, ka høtfey cek hay mezømey cek na, taasa hay ηga børey maaya daada ba. Ama vøley hay ta gandaf hay daha may. Siya, ηga zømey cek ta pas gwagway. Siya, ηga zømey cek ta pas mabara. ²¹ Yaw, da ndaw ta mbøkdata cek hay maaya ba tabiya sem na, anga anda taasa ηga børey maaya, anga mapakaya wal ηgada Bay anga. Ndaw a na, anga maaya ηga kar sløra ηgada Bay anga. Anga maɗiykaya vaw ηga kar sløra tabiya masa maaya.

²² Yaw, hway døren ta cek hay maaya ba masa gula hay ma wuɗam ηga kamara. Key cek ta cøved e, tøba mey ηga Yesu ma føna ma føna, wuɗey ndaw. Njam ta zazay ta ndøhay ma døram danɗay a Bay aløkwa Mahura Yesu ta mevel maaya. ²³ Da ndøhay fa kam yawa saw na, ka da ndøkwey a hwaɗ a ba, maja ka søra mekey yawa saw na, a handawa mekøɗey-vaw. ²⁴ Ndaw ma ka sløra ηga Gazlavay na, a key baazlam ba. Si a katar maaya ηgada ndøhay tabiya, a tørey ndaw ma wuzey mey maaya, a bøsa cek ma key maaya ba tabiya fa mey anga. ²⁵ Ndøhay ma tømara mey anga ba na, si aa sørkadata ta døk-vaw. Da kaa tøɗe Gazlavay a jønta la kwa, amba a mbøɗdamara mevel ata ηga sørey cøved masa maaya fara fara. ²⁶ Da ray ηgene, a mbøɗdamara mewulkey ata maaya ba ηgene, a løham daa gadaη ηga bay-malula masa ma kørzata amba a kamar cek anda aa ma wuɗey heyey.

2:15 2.15 1Tm 1.10 **2:16** 2.16 1Tm 1.4 **2:17** 2.17 Himene: 1Tm 1.20
2:19 2.19 Mesl 16.5; Jan 10.14 **2:20** 2.20 Rm 9.21 **2:21** 2.21 3.17 **2:22**
2.22 1Tm 6.11 **2:23** 2.23 2.16 **2:24** 2.24 1Tm 3.3; Tit 2.7-8 **2:25** 2.25-26
1Tm 2.4

3

Mey da ray banay ta pas masa bəla gweegwe a ndəvey

¹ Səra maaya maaya, ta pas masa bəla gweegwe a ndəvey na, banay a sawa la a ray ndəhay, ² maja ndəhay a da wudam na, si ray ata hay gway. A da wudam dala kalah, a da zlapam, a da cədmara Gazlavay, fa da təbmara mey nga papa ata hay ta mama ata hay daa saba, fa da kam suse a ndaw daa saba. Cek maaya nga Gazlavay na, a da rəsmara, ³ fa da wudam ndəhay daa saba, kwa ndəhay da way ata hay na, fa da wudmata daa ba, fa da səram dey-ceceh fa ndəhay daa saba, a da kam mbada fa ndəhay, fa da wam vaw fa ray ata daa saba, a da təram ndəhay masa-həma. Cek hay masa maaya na, fa da wudam daa ba, ⁴ a daa dədam mey a ray ndəhay, a da kam cek hay saw, a da zlapam kalah. Fa da wudmara Gazlavay daa ba, ama a da kam na, si cek hay masa ma mbafatar gway. ⁵ A da pamara ray ata anda ndəhay nga Gazlavay, ama a da rəsmara gədan nga Gazlavay. Ama kah na, hway la ta ndəhay ngene.

⁶ Kwa wure kece, ndəhay da wuzlah ata fa diyam a way ndəhay ngaa sərkadamata. A mbəzam anda ndəhay maaya, amba ngusay manjar lenjesl a təbmatare mey ata. Ngusay a ngene ta kam mebərey la ga. A wudam nga cəney mey hay mekele mekele masa ma mbafatar.

⁷ Mandaw mandaw, a wudam ngaa sərkey cek, ama a gwamara nga səmara mey masa fara fara ba səlak. ⁸ Ndəhay ma səpmata way hay ngene, a wudam mey masa fara fara ba, anda ata Janes ta Jambəres * zleezle ma təram masa-gəra nga Mawiz. Ndəhay ma səpmata way hay a na, mewulkey ata maaya ba, a pamara Gazlavay nga ndaw ata fara fara ba. ⁹ Ama fa da gwamara nga diyam fa mey fa mey daa ba, maja mewulkey ata maaya ba ngene a wuzwa la a palah, anda mewulkey maaya ba nga ata Janes ta Jambəres ma wuzwa zleezle.

Pawl a kəta Timawte

¹⁰ Ama kah na, ka səra cek masa yah maa sərkadatara tabiya a ndəhay. Ka səra menjey adaw maaya maaya. Ka səra mewulkey adaw da ray cek hay masa yah ma da kata tabiya. Ka səra ya fa pa Gazlavay nga ndaw adaw fara fara. Ka səra yah ndaw meekwed-mey, ya fa wudəy ndaw,

3:1 3.1 1Tm 4.1; 2Pi 3.3; 1Jn 2.18; Jud 18 **3:2** 3.2-4 Gal 5.19-21 **3:5** 3.5 Mt 7.15, 21; Rm 2.19-20; Tit 1.16 **3:6** 3.6 Tit 1.11 * **3:8** 3.8 Janes ta Jambəres na, daa mewulkey nga Jəwif hay, ara ndəhay Ejiy hay ma kam maazla merəzley ndəhay fa mey nga Bay Ejiy amba a nəsmara mey nga ata Mawiz ta Aranw. Nəka daa dərəwel nga Mab 7.11, 22. **3:8** 3.8 Mab 7.11, 22; 8.3, 14; 1Tm 6.4-5

yah malacakaya denj e da ray mey nga Gazlavay. ¹¹ Ka sɛra ndɛhay ta sɛrdamaya banay la. Ka sɛra yah daa banay ga. Ka sɛra cek maaya ba masa ndɛhay ma kamiwa daa hwayak nga Antiyaws ta daa hwayak nga Ikwaniyum, ta daa hwayak nga Listɛra. Ahaw, ta sɛrdamaya banay la ga, ama mandaw mandaw Bay Gazlavay fa lɛhdaya dasi har ata. ¹² Yaw, kwa waawa macɛmkaya ta Yesu *Kɛriste, ma wufey nga sɛpa cɛvedɛ nga Gazlavay fara fara na, si a sɛrey banay dasi har nga ndɛhay. ¹³ Ama ndɛhay maaya ba ta ndɛhay ma mbɛrɛlam na, menjey ata fa nɛsey ta gɛdanj ta gɛdanj, fa fɛcam ray ata, asaya, fa fɛcmata ndɛhay mekele hay may.

¹⁴ Ama kah na, lecey denj e da ray mey hay masa ndɛhay nga Gazlavay maa sɛrkadamakawa masa kah ma tɛba ta mevel pal. Lecey denj e da ray mey hay a maja ka sɛrta ndɛhay maa sɛrkadamaka na, aa sɛrkadamaka ta cɛvedɛ e.

¹⁵ Asaya, lecey denj e da ray mey hay a maja ka sɛra mey daa dɛrewel nga Gazlavay dɛga kah daa bɛzey. Mey hay a, a gwa a paka lenjesl nga pey Yesu Kɛriste nga ndaw akah fara fara, amba Gazlavay a lɛhdaka. ¹⁶ Mey tabiya mawuzlalakaya daa dɛrewel nga Gazlavay na, a sawa ta fa Mesɛfney anɛga. A jɛndakwar nga sɛrey cɛvedɛ masa fara fara. A kɛndakwar da ray cek hay maaya ba. A wuzdandakwara cek masa alɛkwa ma kakwa maaya ba amba ya mbɛfdakwa menjey alɛkwa. Asaya, a pandakwar lenjesl amba ya sɛrkwa nga key cek maaya ta cɛvedɛ e. ¹⁷ Da ray nɛgene, ndaw nga Gazlavay a gwa nga key slɛra tabiya masa maaya, maja vaw anɛga madɛykaya nga ka slɛra ha.

4

Pawl a kɛta Timawte nga wuzey mey nga Gazlavay

¹ Yesu *Kɛriste a vɛhwa la nga zɛma bay anɛga, ta nga katar sariya a ndɛhay mamɛctakaya hay ta masa ta dey hay. Da ray nɛgene, ya fa lɛvka saya fa mey nga Gazlavay, ta fa mey nga Yesu Kɛriste, ² wuzdatara mey nga Gazlavay a ndɛhay. Kwa fa wudam nga cɛndamara, kwa fa wudam nga cɛndamara daa ba na, wuzdatara mey a mandaw mandaw cɛnɛga. Da ndɛhay fa kam cek maaya ba na, wuzdatara mebɛrey ata ha, patar lenjesl. Vɛltar gɛdanj amba a kam cek maaya. Sasɛrkadata ta mevel maaya.

3:10 3.10 Rm 16.24; 1Tm 1.5 **3:11** 3.11 SNM 13.50; 14.5; 14.19; banay: Ps 34.20; 2Kwr 11.23-29 **3:12** 3.12 Mt 16.24; Janj 15.20; SNM 14.22; 1Tes 3.3
3:14 3.14 2.2; 1Tm 1.10 **3:15** 3.15-16 Janj 5.39; Rm 15.4; 1Tm 4.13; 2Pi 1.21
3:17 3.17 2.21 **4:1** 4.1 SNM 10.42; 2Kwr 5.10; 1Pi 4.5

³ Ya løyvka anda kefe maja pas a, a wuswa la, masa ndøyhay ma da gøyam nga cöndamara mey nga ndøyhay maa sörkadamatara mey masa fara fara saba. Ama a da söpam nga key cek maaya ba anda mevel ata ma wufey. A da kusam ndøyhay mekele mekele ga ngaa sörkadamata. Ndøyhay maa sörkadamata ha, a da wuzmatar na, cek hay masa ma mbafatar nga cöney. ⁴ Fa da jökam slömay fa mey masa fara fara daa saba. A da jökam slömay si fa mamba hay saw. ⁵ Ama kah na, jöda ray akah kwa daa meeme cöpa, bösa banay, wuzdatara *Mey-maaya-mawiya a ndøyhay, ka slöra akah masa Bay Gazlavay ma völdakawa haa mendövey a.

Pawl a ndövda slöra anga

⁶ Yah na, anda cek ma völey ngada Gazlavay, pas adaw ta wuswa cay, mamba ya da möcey. ⁷ Ya ta ka slöra nga Yesu *Köriste la ta mevel adaw ndav anda ndaw ma key baygula daa wufay *. Ya ta ndövda slöra masa Gazlavay ma völdiwa nga key sem anda ndaw ma key kwakurda maaya. Da ray mey hay masa alökwa ma töbkwa na, kwa ya ta mbökey mey pal daa ba sölak. ⁸ Wure kefe, mawurbay nga slöra adaw masa yah ma da hötär na, fa sökwyä da vad maja yah ma kar slöra ta cöved e a Bay Mahura. Ara anga ma da katar sariya a ndøyhay tabiya ta cöved e. A da völdiwa mawurbay a ta pas masa anga ma da ka sariya. A da völda na, ngada yah taava adaw ba, ama a da völda ngada ndøyhay tabiya masa ma sökwmara mavöhwa anga ta meesömey.

Mey da ray ndøyhay mekele

⁹ Wuswa vaw, sawa, hötfaya, ¹⁰ maja Demas ta mbökdaya sem. A wufey nga söpey cek hay masa da böla kefe kalah. Anga sem a Tesalawnik. Köresens anga sem a Galati, Tit anga sem a Dalmati. ¹¹ Wure kefe na, si ala ta *Luk gway. Da ka fa sawa na, ngölörwa *Mark a har maja a jönya la daa slöra. ¹² Ya ta slörda Tisik sem a Efez. ¹³ Da masa ka fa sawa na, sawa ta daa berney nga Törwas, töbyawa zana adaw nga memed da har Karpus. Latörwa öerewel hay a har saya. Ya wufey kalah na, öerewel masa nga ambal.

¹⁴ Alekzandöre, ndaw-mbözla, ta sördaya banay la ga. Bay Gazlavay a sördä banay la töde fa slöra anga ha may.

4:2 4.2 SNM 20.20, 31; Tit 1.13 **4:3** 4.3 1Tm 1.10; 4.1 **4:4** 4.4 1Tm 1.4
4:6 4.6 Föl 2.17; 2Pi 1.14 * **4:7** 4.7 wufay: megörtay-vaw, mewekey-vaw
4:7 4.7-8 1Kwr 9.24-25; Föl 3.12-14; 1Tm 1.18 **4:10** 4.10 Föl 2.21; Demas:
Kwa 4.14; Flm 24; 1Jn 2.15; Tit: 2Kwr 2.13 **4:11** 4.11 Luk: Kwa 4.14; Mark:
Kwa 4.10 **4:12** 4.12 Tisik: Kwa 4.7-8 **4:13** 4.13 SNM 20.6 **4:14** 4.14 Mt
16.27; Alekzandöre: 1Tm 1.20

¹⁵ Wey vaw, ba na, a da sərdaka banay kəne may, maja anğa masa-gəra aləkwa, a təba mey masa aləkwa ma wuzdakwa a ndəhay ba sələk.

¹⁶ Ata ma handamaya ngeeme fa mey nğa ndəhay ma ka sariya amba ya mbədda mey adaw na, kwa ndaw ta sawa nğa jənya daa ba. Ndəhay tabiya ta mbəkdamaya sem. Anja Gazlavay nğa mbədtar ray maja ba. ¹⁷ Ama Bay Mahura na, aa ta yah, fa jənya. Ta vəlya gədan la nğa wuzda mey anğa tabiya, amba ndəhay masa *Jəwif hay ba ma samawa daa hwayak hay mekele mekele ga a cəndamara mey a. Asaya, Bay Mahura ta ləhdaya la da mey mabar. ¹⁸ Ya səra Bay Mahura a ləhdaya la daa cek hay maaya ba tabiya, a jəfya la amba ya daw aa slam masa anğa ma wey da ray ndəhay da vad. Anja ndəhay nğa həlmamara Bay Mahura nğa sərmataw! *Amen.

Mey nğa madagway-dakw

¹⁹ Catar har nğada ata Pəresil † ta Akilas. Catar har a ndəhay da way Awnesifar may. ²⁰ Eraste, a lawa da Kwarinti. Tərawfim na, ya mbəkdərwa da Mile maja vaw fa car. ²¹ Wuswa vaw, wuskwaa kiya nğa memed a da wuswa na, kah ma sawa cay.

Ata Ebulus, Pudens, Linus, leŋ Kəlawdiya ta məlma aləkwa hay daa mecəmey-ray nğa ndəhay nğa Yesu mekele tabiya fefe a camaka har.

²² Anja Bay aləkwa Mahura nğa njeŋ ta kah. Anja maaya nğa Gazlavay nğa njeŋ ta akwar.

4:16 4.16 1.15 **4:17** 4.17 Dan 6.21; Ps 22.22; SNM 1.8; 23.11 **4:18** 4.18
 2Kwr 1.10; Fəl 1.19-20 † **4:19** 4.19 Pəresil: A zəlmara daa slam mekele Pəriska.
 Nəka SNM 18.2. **4:19** 4.19 Pəresil ta Akilas: SNM 18.2; Awnesifar: 2Tm 1.16-17
4:20 4.20 Eraste: SNM 19.22; Rm 16.23; Tərawfim: SNM 21.29 **4:22** 4.22 Gal
 6.18

Leeter masa Pawl ma wuzlalara a Tit Mey da ray leeter ngada Tit

Leeter keɗe ara Pawl ma wuzlala ngada Tit. Tit na, ara ndaw Jəwif ba (Gal 2.3). Ta jəna Pawl la daa sləra anɗa. Daa masa Pawl fa sərey banay daa mecəmey-ray nɗa ndəhay nɗa Yesu da Kwarinti na, Tit ta jəna la ga. Pawl a wuzlalara leeter e keɗe daa masa Tit aa daa hwayak nɗa Kəret, fa jənta ndəhay daa mecəmey-ray nɗa Yesu fetede amba a njam maaya maaya (1.5).

Pawl a kəta Tit gweegwe letək ta anɗa ma kəta Timawte daa leeter anɗa ngeeme. A wuɗey na, Tit a kətata ndəhay daa mecəmey-ray nɗa Yesu maaya maaya, ndəhay masəkakaya hay, nɗusay meecər e, zariya hay ta beke hay (2.1-15). Pawl a wuzda Yesu Kəriste na, ta vəlda heter anɗa la amba ndəhay a ləham daa mebərey (2.14). Pawl a ləvar na, nɗa njeɗ maaya amba ndəhay nɗa Yesu a nəkam dey fa vəɗa, a kam cek letək anda anɗa.

Daa leeter e keɗe na, meɗ mekele mekele daha nɗa vəley gəɗan a ndəhay:

Maaya nɗa Gazlavay aa da ray ndəhay (2.11-14)

Mesəfney nɗa Gazlavay aa da ray aləkwa (3.4-8)

Mecey-har

¹ Ara yah Pawl ma wuzlalakawa leeter keɗe. Yah, ndaw ma ka sləra nɗa *Gazlavay, asaya, yah, *ndaw-meslərey nɗa *Yesu *Kəriste.

Gazlavay ta slərɗaya la nɗa wuzey meɗ anɗa a ndəhay masa aa ma walata amba a pamara Yesu nɗa ndaw ata fara fara, asaya, amba a sərmara meɗ masa fara fara. Meɗ masa fara fara ha na, aa sərkadata ndəhay nɗa njam anda Gazlavay ma wuɗey. ² Anda keɗe, ndəhay a sərmara fara fara a da hətam heter mendəvey ba. Ya sərkwa fara fara na, maja dəga bəla ta zley daa ba aran na, Gazlavay a ləvey a da vəltar heter mendəvey ba ha a ndəhay. Yaw, Gazlavay na, a mbərzley ba səlak, ³ ta wuzdərwa heter mendəvey ba ha la daa ɗar masa aa ma pa. A wuzdərwa na, ta meɗ ndəhay maa sərkadamara meɗ anɗa a ndəhay. Ta vəldiwa sləra nɗa mewuzey meɗ anɗa ha la may. Anda keɗe, ya

wuzda mey a, a ndəhay mekele maja ara Gazlavay, ndaw ma ləhdandakwar, ma ləvyā nga wuzda mey a.

⁴ Ya wuzlala leeter e keḏe ṅgada kah, Tit. Kah na, ka ta tərey sem ṅga bəz aḏaw fara fara, maja kah ma təba mey ṅga Yesu Kəriste anda yah.

Anja Gazlavay, Papa aləkwa, ta Yesu Kəriste, ndaw masa ma ləhdandakwar, ṅga pəsmaka mey, asaya ṅga njadamaka daa zazay.

Sləra masa Pawl ma vəldara a Tit ṅga key da Kəret

⁵ Ya ta mbəkḏakawa la da Kəret amba ka ḏiyta cek hay masa manjar ṅga ḏiyam, asaya, amba ka pey ndəhay ṅga key *bay-ray ṅga *mecəmey-ray ṅga ndəhay ṅga Yesu fa slala ha, fa slala ha tabiya anda yah ma ləvka.

⁶ Yaw, ndaw ma da key bay-ray na, si anṅa ndaw maaya masa ndəhay a gwamara ṅga mbəḏmar ray ba, si aa ta ṅgwas pal gway, si bəz anṅa hay, a təbmara mey ṅga Yesu, si menjey ṅga bəz anṅa hay a, a key maaya amba ndəhay tabiya a sərmara, ata fa kam cek malamba daa ba, asaya, ata fa jəkam sləmay fa mey ṅga ndəhay mandaw mandaw.

⁷ Yaw, bay-ray ṅga mecəmey-ray ṅga ndəhay ṅga Yesu, a key sləra na, ṅga Gazlavay. Maja ṅgene, si anṅa ndaw maaya masa ndəhay a gwamara ṅga mbəḏmar ray ba. A da zlepey fa mey ṅga ndəhay ba, a da cey mevel saw saw ba, a da vəlda ray anṅa ṅgada wuzam ba, a da kəḏey vaw ba, asaya, a da səpey dala ta cəveḏ malamba ba. ⁸ Ama si a təbta ndəhay ma samawa a way anṅa maaya maaya, si a wuḏey mekey cek mandaw mandaw masa maaya, si anṅa ndaw masa ta mewulkey maaya, si a key cek ta cəveḏ e, si a njeý ndaw manjar mebərey, asaya, si a wey vaw fa ray anṅa. ⁹ Mey fara fara masa aləkwa maa sərkadakwa a ndəhay na, si bay-ray a, a təba mey a maaya maaya aa mevel anṅa. Anda keḏe, a gwa a vəltar gəḏanṅ a ndəhay ta mey a. Asaya, ṅgada ndəhay masa ma təbmara mey a ba na, a da wuzdatara mewulkey ata, anṅa maaya ba.

¹⁰ Ndəhay ga, a wuḏam ṅga jəkey sləmay fa ndəhay mekele ba. Ndəhay a, faa guzlam mey saw kəne, fa batamata ndəhay. Yaa guzley har-gəḏanṅ na, da ray *Jəwif hay ma təbmara mey ṅga Yesu. ¹¹ Si ka təkмата amba aa sərkadamata ndəhay saba, maja fa nəsmata ndəhay tabiya da way hay mekele mekele. Aa sərkadam a ndəhay na, mey masa ta cəveḏ e ba, maja a wuḏam dala gway.

¹² Ndaw Køret pal da wuzlah ata daha, masa-kølenj. Ndaw aha, zleezle a løvey: «Ndøhay da Køret na, ara ndøhay membørzley, ata anda cek nga ley hay, ata ndøhay masa-mayad hay, a wulkam na, nga zømey cek gway.»

¹³ Yaw, ndaw masa-kølenj e taa guzley la fara fara. Maja ngene, katar mey a ndøhay maa guzlam mey saw køne ngene, amba a tømbara mey masa fara fara ta mevel pal,

¹⁴ a mbækdamara mejøkey slømay fa mey nga Jøwif hay maa guzlam saw. Asaya, katar mey amba a mbækdamara mejøkey slømay fa mewey nga ndøhay masa ma røsmara mey masa fara fara ha sem.

¹⁵ Da ndaw, anga ta mevel maaya na, cek hay tabiya masa anga ma kata na, ata maaya may. Ama ndøhay masa mevel maaya ba, masa ma tømbara mey nga Gazlavay ba na, cek hay tabiya masa ata ma kamata na, maaya ba. Ata fa wulkam mandaw mandaw da ray cek hay maaya ba, asaya, kwa masa ata fa kam cek hay maaya ba ha na, hwaray a katar ba. ¹⁶ Ata fa løvam a sømbara Gazlavay, ama cek hay maaya ba masa ata ma kamara na, fa wuzdərwa a sømbara Gazlavay ba. Ata fa jøkam slømay fa mey nga Gazlavay daa ba. Ata fa kam cek masa Gazlavay ma wudəy nga høtar fa dey ba. Asaya, cek masa maaya na, a gwamara nga kamara ba.

2

Ndøhay a da søpmara mey nga Gazlavay na, kwara?

¹ Ama kah Tit na, sasørkadata ndøhay fara fara anda mey nga Gazlavay ma løvey. ² Løvtar a ndøhay masøktakaya a da wam ba, nga kam sløra ta cøved e amba ndøhay a namatar ray, nga tøram ndøhay masa ta mewulkey maaya, nga tømbara mey nga Gazlavay maaya maaya aa mevel ata, nga wudmata ndøhay ta mevel pal, asaya, nga pamara Gazlavay nga ndaw ata fara fara kwa ata daa banay.

³ Ngada ngusay masøktakaya may, løvtar køne, amba a njam fara fara anda Gazlavay ma wudəy. Anda meløvey, a daa guzlam mey saw a ray ndøhay ba, a da vøldamara ray ata ngada wuzam ba. Ngusay masøktakaya ha nga køtmata ⁴ ngusay meecər e *, amba ngusay meecər e hay a, aa sørkam nga wudmata zel ata hay ta bøz ata hay. ⁵ Ngusay masøktakaya ha nga køtmata ngusay meecər e

1:11 1.11 1Tm 6.5; 2Tm 3.6 **1:13** 1.13 2Tm 4.2 **1:14** 1.14 3.9; 1Tm 1.14
1:15 1.15 1Tm 1.5; Mt 15.11; Rm 14.14, 20 **1:16** 1.16 2Tm 3.5; 1Jn 2.4 **2:1**
 2.1 1Tm 1.10 **2:1** 2.1-9 Ef 5.21-6.9 **2:2** 2.2 1Kwr 13.13 **2:3** 2.3 1Tm 3.11;
 1Pi 3.1-5 * **2:4** 2.4 ngusay meecər e: Ngusay meecər e na, ara ngusay masa
 ma kam ngwas tølam.

amba a tɔram ŋgusay masa ta mewulkey maaya, masa mazlɔbtakaya ba, asaya, amba a kam slɔra maaya maaya da way ata hay, a kam cek maaya a ndɔhay, a tɔram ŋgusay ma nam ray a zel ata hay. Maaya na, ŋgusay a, a kamara kɔne amba ndɔhay aa guzlam mey maaya ba da ray mey ŋga Gazlavay ba.

⁶ Ŋgada gula hay na, lɔvtar kɔne may, vɔltar gɔdan ŋga tɔram ndɔhay masa ta mewulkey maaya ⁷ da ray cek hay tabiya.

Kah may, si ka key cek hay na, masa maaya hay gway, amba ndɔhay a nɔkam dey fa cek masa kah ma ka, a kamara kɔne. Yaw, masa ka faa sɔrkadata ndɔhay na, sasɔrkadatar mey fara fara ta cɔved e. ⁸ Gweguzley mey masa fara fara amba kwa waawa a gwa ŋga mbɔdka ray da ray mey a ba. Da ray ŋgene, ndɔhay ma wudam ŋgaa guzley maaya ba da ray mey akah na, hwaray a da katar maja ta hɔtam mey maaya ba da ray alɔkwa daa ba.

⁹ Ŋgada beke hay na, lɔvtar ŋga namatar ray mandaw mandaw a bay ata hay. Daa slɔra ata hay tabiya na, ŋga kam cek masa ma mbafamatar a bay ata hay. Asaya, a da kam yawa ta bay ata hay a ba. ¹⁰ A da lalamatara cek hay ŋga bay ata hay a ba, ama ŋga kam cek masa maaya mandaw mandaw, amba bay ata hay a, a pamata ŋga ndɔhay fara fara. Da ray ŋgene, ndɔhay a da namar ray a meesɔrkey da ray Gazlavay, ndaw ma lɔhdandakwar.

¹¹ Maaya na, ndɔhay ŋga Gazlavay a kamara cek masa yah maa guzlda keɔe maja Gazlavay ta wuzdɔrwa maaya aŋga la a ndɔhay tabiya, amba a lɔhdata daa mebɔrey. ¹² Gazlavay ma wuzdɔrwa maaya aŋga na, amba ya sɔrkwa ŋga mbɔkey mekey cek hay masa ma mbafar ba, asaya, ŋga mbɔkey mesɔpey cek hay malamba da bɔla. Yaw, masa alɔkwa da bɔla keɔe na, si ya njakwa ndɔhay masa ta mewulkey maaya, si ya njakwa ndɔhay ma kam cek ta cɔved e, masa ma jɔkam slɔmay ta mevel pal fa Gazlavay. ¹³ Anda keɔe, ya njakwa, ya sɔkwakwa pas maaya masa Yesu *Kɔriste, ndaw ma lɔhdandakwar, ma da vɔhwa, ma da wuzdɔrwa gɔdan aŋga. Ara aŋga Bay Gazlavay alɔkwa mahura. ¹⁴ Ta vɔlda heter aŋga la, ta mɔcey la maja alɔkwa amba a lɔhdandakwar daa mebɔrey, amba a tɔrdandakwar ndɔhay manjar mebɔrey, amba a

tærdandakwar nga ndøhay anga hay, ndøhay ma wudam nga key sløra maaya mandaw mandaw.

¹⁵ Sasærkadatara cek masa yah ma wuzlalakawa kefe a ndøhay. Vøltar gødan, kətata ndøhay masa ma jøkam slømay maaya maaya ba. Gwaguzltar ta gødan masa Gazlavay ma vøldakawa. Anda kefe, anja ndøhay nga røsmaka maja meesærkey akah kefe ba.

3

Nðøhay nga Yesu a njam da bæla na, kwara?

¹ Løvtar saya a ndøhay nga Yesu nga namatar ray a mahura hay nga ngwamna, nga jøkfamatar slømay, nga kam cek hay tabiya masa maaya. ² Asaya, løvtar a da slam mey a ray ndøhay ba, a da tøram vaw ba, ama nga njam ndøhay meekwed-mey, masa ma kam cek maaya ngada ndøhay tabiya.

³ Gwaguzltar nga kamara anda kefe maja zleezle na, aløkwa ndøhay marøzltakaya may, aløkwa fa jøkakwa slømay fa ndøhay daa ba, aløkwa fa zløbkwa cøved masa fara fara, ya wudkwa na, nga key cek hay malamba masa ma mbafamandakwar gway. Aløkwa fa kakwa maagway, aløkwa fa kakwa dey fa cek nga ndøhay, ya wudkwa nga høtey ndøhay fa dey ba, ndøhay mekele a wudam nga høtmandakwar fa dey ba may. ⁴ Ta ngene he cøpa na, Gazlavay, ndaw ma løhdandakwar, ta wuzdørwa la, anga fa key maaya ngada ndøhay, anga fa wudta ndøhay kalah.

⁵ Anda meløvey, Gazlavay ta løhdandakurwa la maja maaya anga. A løhdandakwar maja aløkwa ma kakwa cek maaya ta cøved e daw? Ara maja ngene ba. Ama a løhdandakwar maja aa ma sørey dey-ceceh fa aløkwa. A løhdandakwar na, a pørndakwara mevel aløkwa ta gødan nga *Mesøfney nga Gazlavay ma yandakurwa mawiya, ma vølndakwar heter mendøvey ba. ⁶ Bay Gazlavay ta pa Mesøfney anga ha la ga a ray aløkwa ta fa Yesu *Køriste, ndaw ma løhdandakwar,

⁷ amba ya høtkwa heter mendøvey ba. Heter mendøvey ba ha, aløkwa fa særkwa, Gazlavay a da vøldandakwara. A pa Mesøfney anga a ray aløkwa, a vølndakwar heter mendøvey ba na, maja ta sørfandakwar dey-ceceh la, ta tærdandakwar nga ndøhay anga hay maaya fa mey anga la.

2:14 2.14 3.14; Mab 19.5; Ez 11.20; Gal 1.4; Ef 2.10; 1Tm 2.6; Heb 13.12; 1Pi 2.9; 1Jn 3.16 **3:1** 3.1 Rm 13.1-7; 1Pi 1.13-17 **3:3** 3.3 1Kwr 6.11; Ef 5.8
3:4 3.4 1.3; 2.10-11; 1Tm 1.1; 2.3; 4.10; Tit 3.6 **3:5** 3.5 Jan 3.5; Rm 6.4; Ef 2.8-9; 5.26; 2Tm 1.9; 1Pi 1.3 **3:6** 3.6 Rm 8.9-16; 1Kwr 6.11; Gal 5.25; ndaw ma løhdandakwar: 2.13; Føl 3.20; 2Tm 1.10; Tit 3.4; 2Pi 1.11; 1Jn 4.14 **3:7** 3.7 Rm 3.24

⁸ Mey masa yah ma daa guzlda kaa na, ara mey masa fara fara. Ya wufey na, kaa sərkadatara mey a kefe dey ga mandaw mandaw ngada ndəhay, amba ndəhay masa ma təbmara mey nga Gazlavay na, a kam cek mandaw mandaw maaya. Mey hay masa aləkwa maa sərkadatakwara a ndəhay na, ara mey hay maaya masa ma jəney ndəhay.

⁹ Da ndəhay fa kam yawa saw na, ka da ndəkwey aa mey a ba. Da ndəhay daa səkway adaw, *Jəwif hay, fa kam yawa da ray papan nga papa ala hay zleezle na, ka da ndəkwey aa mey a ba, ka da key baazlam ta ata ba. Asaya, ka da key yawa da ray *kwakwas nga Mawiz ba. Mekey yawa ha ngene, ara cek nga tede, a jəney ndaw ba. ¹⁰ Da ndaw a handawa mewufkey-dəy a wuzlah ndəhay daa *mecəmey-ray nga ndəhay nga Yesu na, kəta ndaw aha. Da anga fa ka cek aha cənga na, kəta dey pal saya. Ama da a jəkey sləmay ba cənga na, ka da cəmam ta ndaw aha ba. ¹¹ Ka səra səkway nga ndəhay anda ngene na, ara ndəhay masa maazəftakaya daa cəved nga Gazlavay. Ata fa kam cek mandaw mandaw maaya ba, sləra ata fa wuzda mebərey ata.

Mey nga madagway-dakw

¹² Ya da slərka *Artemas, da daa ba, Tisik. Da ndaw pal dasi ata ta wusey la fa kah na, key gədan nga sawa a Nikwapawlis a cakay adaw. Ya wulkey ta kiya memed na, ya da daw fetede. ¹³ Zenas, ndaw ma səra mewey nga ngwamna, ta Apalaws fa pəkam *. Da masa ata fa da sləkdam da slala akwar na, jənta daa mepəkey ata ha amba cek a həctar ba. ¹⁴ Ndəhay masa ma təba mey nga Yesu anda aləkwa na, ngaa sərkam nga key cek maaya mandaw mandaw, amba a jənmata ndəhay masa daa banay. Da ray ngene, ndəhay aləkwa, a da njam ta mekey cek masa maaya.

¹⁵ Ndəhay tabiya masa da cakay adaw fede, a camaka har. Catar har ngada jam aləkwa hay ma təbmara mey nga Yesu fetede.

Anja maaya nga Gazlavay nga njeý ta akwar tabiya.

3:9 3.9 1.14; 1Tm 1.4 **3:9** 3.9-11 1.10-16 **3:10** 3.10 Mt 18.15-17 **3:12** 3.12 Tisik: Kwa 4.7-8 * **3:13** 3.13 fa pəkam: Zenas ta Apalaws fa pəkam nga wuzey mey nga Gazlavay. Nəka SNM 15.3ta 1Kwr 16.6. **3:13** 3.13 Apalaws: 1Kwr 1.12 **3:14** 3.14 2.14; 2Kwr 8.8-9; Gal 5.22; Ef 4.28; Kwa 1.10

Leeter masa Pawl ma wuzlalara a Filemanjw Mey da ray leeter ngada Filemanjw

Pawl a wuzlalara leeter keɗe a Filemanjw na, daa masa anɗa fa wuzlalatar a ndəhay Kwalaws hay. (Kwa 4.10-17; Flm 23-24.) A wuzlala leeter e, daa masa anɗa daa fərsəne. Ndəhay a wulkam leeter e na, ara Tisik ma handara a Filemanjw cewete ta leeter ngada Kwalaws hay (Kwa 4.7-9).

Filemanjw na, ara jam nɗa Pawl, a nɗey daa berney nɗa Kwalaws. Pawl a wuzar Mey-maaya-mawiya, ta', a təba, a tərey ndaw nɗa Yesu (aya 2). Anɗa na, ara ndaw masa-zleley, beke anɗa hay daha. Beke anɗa pal daha mezəley Awnezim. Ta hway la da way bay anɗa ha. A hətfar Pawl daa fərsəne, ta', a təba mey nɗa Yesu, a tərey ndaw nɗa Yesu may (aya 10). Fa dəba ha, Pawl a slərdərwa Awnezim e fa bay anɗa ta leeter e keɗe. Daa mewey nɗa Rawma hay, beke masa ma hway sem na, bay anɗa a gwa a kəda vagay. Ara maja nɗene, Pawl a wuzlalara leeter keɗe a jam anɗa Filemanjw amba aa cəfda nɗa sərfar dey-ceceh a Awnezim, a təba anda məlmanj daa mey nɗa Yesu (aya 16).

Mecey-har

¹ Ara yah Pawl, ndaw daa fərsəne maja sləra nɗa *Yesu *Kəriste ma wuzlalakawa leeter keɗe, ala ta məlma aləkwa Timawte.

Ya wuzlalamakawa nɗada kah, Filemanjw, jam ala masa aləkwa ma kakwa sləra nɗa *Gazlavay bama. ² Asaya, ya wuzlalamatara nɗada dam-mama aləkwa Apiya, lej nɗada Arkip, ndaw masa ma jənnakwar daa cəved nɗa Yesu anda ndaw ma jəney ndaw daa vəram. Ya wuzlalamatara nɗada ndəhay nɗa Yesu ma kusam da way akah may.

³ Anja Papa aləkwa, Bay Gazlavay, ta Bay aləkwa Mahura Yesu Kəriste nɗa pəsmakwar mey, asaya, nɗa njadamakwar daa zazay.

Pawl a key suse a Gazlavay maja Filemanjw

⁴ Mandaw mandaw masa ya fa dərey dangay a Gazlavay na, ya fa sərfadaka, Filemanjw. Ya fa kar suse maja kah, ⁵ maja ya cənda kah fa wudta ndəhay nɗa Gazlavay tabiya,

ka fa pa Bay Mahura Yesu nga ndaw akah fara fara.
⁶ Da masa ya fa dorey dangay na, ya faa cefda Gazlavay nga jonndakwar nga sarey meposey-mey anga tabiya masa alakwa ma hotkwa ta fa *Keriste maja alakwa macomkaya, alakwa fa pakwa Yesu nga ndaw alakwa fara fara. ⁷ Mөлma adaw, mewufey-vaw akah taa samdaya la, ta völyä gədan la kwa ara mey ba, maja kah ma dəktar mevel a ndəhay nga Gazlavay.

Pawl fa kar ambahw a Filemanjw maja Awnezim

⁸ Yaw, yaa cəfdaka nga key cek masa yah ma da lövka kede maja ka wudta ndəhay nga Yesu. Yah təde nga təkaka day nga ka cek aha maja yah na, *ndaw-meslərey nga *Keriste. ⁹ Ama ya təkaka day ba. Maja ya wudka kalah, maaya na, yaa cəfdaka taa cəfdəy. Ara yah, Pawl, ndaw-maraw masa majəwkaya daa fərsəne maja yah ma wuzey mey nga Yesu Keriste, maa cəfdaka, ¹⁰ ya fa kaka ambahw maja Awnezim. Anğa ta tərey sem anda bəzey adaw daa fərsəne kede, maja ara yah ma ka amba a təba mey nga Gazlavay. ¹¹ Zleezle na, Awnezim e ta jənka daa ba, ama wure kede na, a jənka la anda aa ma jənya.

¹² Wure kede ya fa slərdakawa, anğa masa anda mevel adaw. ¹³ Yah daa fərsəne maja yah ma wuzda *Mey-maaya-mawiya. Ya wufey na, anja a njey da cakay adaw mandaw mandaw daa masa yah daa fərsəne kede amba a jənya aa slam a nga akah. ¹⁴ Ama ya wufey nga ndəvda mey da ray Awnezim e yah taava adaw ba, si kah ma təba mewulkey adaw da ray a la dagay. Nga key cek maaya na, ya wufey nga təkaka day ta təkəy ba, ama si ka key cek masa maaya anda mevel akah ma wufey.

¹⁵ Da Awnezim e ta mbəkdaka sem nga dar nekəfey, amba fa dəba ha a vəhey, ka njam nga tar kwa. ¹⁶ Kwa anğa beke akah na, wure kede anğa beke daada saba, maja anğa mөлma alakwa mawudkaya kalah daa mey nga Yesu. Yah na, ya wudfa kalah, ama ya səra ka da wudfa ma fənya. Ka da wudfa maja anğa beke akah, asaya, ka da wudfa maja anğa mөлmakw daa mey nga Bay Mahura Yesu.

¹⁷ Anda kede, da ka fa paya nga mandala akah daa sləra nga Yesu na, təba Awnezim e anda kah ma təbya. ¹⁸ Da ta kaka cek maaya ba la, da ta zəmka dəvaz akah la na, ngene, mey a tabiya a ray adaw. ¹⁹ Ehe, ya wuzlalakawa mey kede ta har adaw, *yah Pawl ma da pəlkawa*. Kah may,

1:5 5 1Tes 3.6 **1:6** 6 Fəl 1.9; Kwa 1.9-10 **1:7** 7 Rm 12.10; 2Kwr 7.4; Heb 13.1 **1:8** 8-20 1Tm 6.1-2 **1:9** 9 aya 1; Ef 3.1 **1:10** 10 Awnezim: Kwa 4.9; bəzey: 1Tm 1.2 **1:13** 13 Fəl 2.30 **1:14** 14 2Kwr 9.7; 1Pi 5.2 **1:16** 16 1Kwr 7.22; 1Tm 6.2

dəvaz adaw da ray akah daha. Ara yah ma ka amba ka təba mey nga Yesu nga hətey heter mendəvey ba na, ka sərfada saba daw? ²⁰ Ambahw məlma adaw, kayawa cek kefe maja mewudəy-vaw nga Bay Mahura Yesu. Dəkyə mevel maja aləkwa macəmka ya ta Kəriste.

²¹ Daa masa ya fa wuzlalakawa leeter kaa na, ya səra fara fara ka pey sləmay la fa mey adaw, ka da ka anda yah ma wudəy. Ya səra cek masa kah ma da ka na, a fəna cek masa yah maa cəfdaka nga key. ²² Ya fa wudəy ngaa cəfdaka cek pal saya, diyaya slam nga ney da way akah, maja ya wulkey Gazlavay a cənda medərey-dəngay akwar la, a vəhdəya la fa akwar saya.

Mecey-har nga madagway-dakw

²³ Epafəras masa ala daa fərsəne cew e maja Yesu *Kəriste, a cakwar har ha. ²⁴ Yaw, *Mark, Aristarke, Demas, leŋ *Luk, ndəhay masa ala ma kam sləra nga Gazlavay bama, a camakwar har may.

²⁵ Anja maaya nga Bay Mahura Yesu Kəriste nga nje y ta akwar.

Leeter ngada Hebøre hay Mey da ray Leeter ngada Hebøre hay

Leeter ngada Hebøre hay na, ndaw ma sèra mezøley nga ndaw ma wuzlala daa ba. Hebøre hay na, ara ndøhay Jøwif hay. Ndaw ma wuzlala leeter e keðe a wudey nga vøltar gøðan ngada Jøwif hay masa ma tøbmara mey nga Yesu. A vøltar gøðan nga tøbey mey nga Yesu ma føna ma føna kwa ata daa banay.

Ndaw ma wuzlala leeter e na, a wuzda Yesu na, a fønta maslan hay nga Gazlavay, a fønta ndøhay ma tøla mey nga Gazlavay zleezle, asaya, a føna Mawiz, maja anga na, Bøzey nga Gazlavay (fasølawal 1 haa 3). Asaya, a wuzda anga na, ndaw mahura da ray ndøhay ma ka kwakwas nga Gazlavay masa fara fara. A da njeý ndaw ma ka kwakwas nga sørmataw. Anga ta vølda ray anga la dey pal nga møcey maja mebørey nga ndøhay tabiya. Anda keðe, Yesu ta handawa Mejøwey-mey Mawiya la aa slam a nga Mejøwey-mey Magurma masa Gazlavay ma jøwa ta ndøhay anga hay ta fa Mawiz.

Ndøhay ma tøba mey nga Yesu na, ata daa cøved mawiya døba. A gwamara nga søpey cøved magurma saba. Maaya na, a sørfadamata ndøhay masa zleezle ma pamara Gazlavay nga ndaw ata fara fara, ata masa ma høtam gøðan daa cøved anga. (Nøka fasølawal 11.) Mey madagway-dakw daa leeter e na, ara mey da ray menjeý nga ndøhay ma tøba mey nga Yesu. Si a njam maaya maaya daa mecømey-ray nga Yesu.

Daa leeter e keðe na, mey mekele mekele daha nga vøley gøðan a ndøhay:

Mey nga Gazlavay aa ta gøðan nga key sløra daa ndaw (4.12)

Mey da ray mejøwey-mey mawiya (8.8-13)

Mey da ray ndøhay zleezle ma pamara Gazlavay nga ndaw ata fara fara (11.1-12.13)

Nøkakwa dey na, si fa Yesu gway (12.2)

Mey da ray Yesu, ndaw ma wuzdørwa mewedey nga Gazlavay

¹ Zleezle na, *Gazlavay taa guzltar la ngada papan nga papa aløkwa hay dey ga ta cøved hay mekele mekele ta mey

ndøhay ma tøla mey anğa hay weewe. ² Ama wure kede daa masa bøla gweegwe a ndøvey kede na, taa guzlnakwar la ta mey Bøzey anğa. Gazlavay a løma bøla ta slam da vad cøpa na, ta fa Bøzey anğa ha, asaya, Gazlavay ta wala la nğa wey da ray cek hay tabiya. ³ Ma wuzdərwa mewedey nğa Gazlavay na, ara anğa. Bøzey a na, a lawa Gazlavay kərad! Mey anğa na, aa ta gədan. Ara ta mey anğa ha aa ma kərza bøla ta slam da vad. Masa anğa ma dıytara cəved cay * a ndøhay amba a njam manjar mebørey fa mey nğa Gazlavay na, ta', a tøpey a vad, a njeý ta har-zømay nğa Bay Gazlavay ma wey da ray cek hay tabiya.

Yesu a fənta maslan hay nğa Gazlavay tabiya

⁴ Bøzey a na, a fənta maslan hay nğa Gazlavay. Mezøley masa Gazlavay ma vøldara na, a fəna nğa maslan hay a may.

⁵ Sərmara, Gazlavay ta ləvar kwa nğada maslan anğa pal:

«Kah na, Bøzey adaw,
døga tasana yah Papakw»

na, daa ba səlak. Asaya, taa guzley da ray maslan anğa pal, a løvey:

«Yah na, Papaha,
anğa na, Bøzey adaw,»
na, daa ba may.

⁶ Ama masa anğa fa da slərdərwa Bøzey anğa maa-mey-ndaw † a bøla na, taa guzley la, a løvey:

«Akwar, maslan adaw hay tabiya, ragadamar!»

⁷ Da ray maslan anğa hay na, aa guzley, a løvey:

«Maslan adaw hay na, ara ndøhay ma ka sləra adaw hay. Ata anda memed, asaya, ata anda neneh nğa awaw.»

⁸ Ama nğada Bøzey anğa na, taa guzlar la, a løvey:

«Kah na, Bay Gazlavay, ka da zøma bay akah nğa sərmataw. Ka da wey da ray ndøhay akah hay ta cəved e.

⁹ Ka wufey na, mekey cek ta cəved e, ba na,
mekey cek ta zlabay ba.

Maja ngene, ya ta walaka la, yah, Gazlavay akah.

Ya taa səmdaka la,
asaya, ya ta vølka gədan la

1:2 1.2 Bøzey anğa: 3.6; 5.8; a løma bøla ta slam da vad: Jan 1.2; Kwa 1.16; Heb

11.3 * **1:3** 1.3 ma dıytara cəved cay: A wufey nğa løvey Yesu a dıytara cəved nğa ndøhay na, ta fa memøcey anğa fa hwadam mazlangalakaya. **1:3** 1.3

2Kwr 4.4; Kwa 1.15; har-zømay: 8.1 **1:4** 1.4 Ef 1.21; Føl 2.9 **1:5** 1.5 Ps 2.7;

2Sam 7.14; Mt 3.17; SNM 13.33; Heb 5.5 † **1:6** 1.6 Bøzey anğa maa-mey-ndaw:

A wufey nğa løvey Gazlavay anğa ta bøzey hay mekele mekele na, kəne ba,

ama a wufey nğa løvey Yesu fa wey da ray cek hay tabiya nğa Gazlavay anda

bøzey maa-mey-ndaw ma wey da ray cek nğa papaha. Nøka 2.11-13; Kwa 1.15,

18, lej Rm 8.29. **1:6** 1.6 Ps 89.28; 97.7 **1:7** 1.7 Ps 104.4 **1:8** 1.8-9 Ps

45.7-8

ma fəna ŋga ndəhay mekele masa akwar bama.»

¹⁰ Gazlavay aa guzley da ray Bəzey aŋga saya, a ləvey:
«Bay Mahura, ara kah ma ləma bəla dəga daa mezley a.

Ara kah ma ləma slam da vad ta har akah.

¹¹ Cek hay a cəpa a ndəvam la, ama kah na,
ka da njeý ŋga sərmataw.

Ahaw, cek hay a tabiya a da nəsam
anda zana magurma.

¹² Ka da takwamata
anda ndaw ma tekwemey zana magurma.

Cek hay a cəpa, ka da mbəfdata
anda ndaw ma mbəfey zana manəskaya.

Ama kah na, ka da njeý kəne, ka fa da mbəfey daa ba,
kah daha ŋga sərmataw.»

¹³ Gazlavay aa guzlar ŋgada Bəzey aŋga, a ləvar:

«Sawa njeý ta har-zəmay adaw
amba ya wakwa da ray ndəhay
haa ta pas masa yah ma pata masa-gəra akah hay cay
asi salay akah.»

Ama taa guzley anda ŋgene kwa ŋgada maslan aŋga pal
na, daa ba səlak.

¹⁴ Kaa maslan hay ŋga Gazlavay na, wa hay wa? Maslan
hay ŋga Gazlavay na, ara mesəfney hay ma ka sləra ŋga
Gazlavay gway. Gazlavay fa slərdata ŋga jəney ndəhay
masa ma da ləham.

2

Ya da rəskwa mey ŋga Gazlavay ba

¹ Gazlavay taa guzldakwar la ta mey Bəzey aŋga. Anda
kefe, si ya wakwa vaw ma fəna ma fəna fa mey masa
aləkwa ma cəndakwa ha, da daa ba na, ya zlanɣadakwa
la aa cəved mekele.

² Mey masa maslan hay ŋga
Gazlavay ma kadamara zleezle na, ta wuzwa la ara mey
fara fara. Ndəhay masa ma rəsmara mey a, ma təbmara
ba na, Gazlavay ta sərdata banay la təde fa mebərey ata
ha.

³ Ama aləkwa na, aləkwa ta cəndakwa mey da ray
meləhey la ma fəna mey masa maslan hay ŋga Gazlavay
ma kadamara ha. Anda kefe, da aləkwa fa rəskwa mey
a, ya təbkwa ba na, ŋgene, ya da ləhkwa na, kwara? Ara
Bay Mahura ta ray aŋga ma wuzda mey da ray meləhey
a teesed. Fa dəba ha, ndəhay masa ma cəndamara mey a
na, ta wuzdamandakwara la ara mey fara fara. ⁴ Gazlavay
may, ta wuzda la ara mey fara fara ta fa gədan aŋga leŋ ta

fa maazla hay mekele mekele masa anğa ma kata. Asaya, Gazlavay ta vøltar gødan nğa Mesøfney anğa la a ndøhay nğa key sløra mekele mekele anda aa ma wufey.

Yesu a møcey na, maja wa hay wa?

⁵ Yaa guzlam na, da ray menjey nğa ndøhay da bøla mawiya nğada fa mey. Daa menjey a na, Gazlavay fa da vøltar cøved nğada maslan anğa hay nğa wam da ray ndøhay daa ba. ⁶ Sasøkar jak, mawuzlalakaya daa ðerewel nğa Gazlavay, a løvey:

«Ndaw-magødan na, wa may wa

amba kah, Bay Gazlavay, ka wulkey da ray a na!

Ndaw-magødan na, wa may wa

amba ka nøkar dey na!

⁷ Ka ta tərda la nğa mecøhe da ray maslan akah hay

nğa menjey nekødefey,

fa døba ha, ka ta hølma la, ka ta hølslar ray la anda bay.

⁸ Ka ta vøldata cek hay sem cøpa asi har anğa *.»

Yaw, Gazlavay ta vøldata cek hay sem cøpa asi har nğa ndaw-magødan, kwa cek pal masa anğa ma wey da ray a ba na, daa ba. Ta ngene he cøpa wure keðe, aløkwa fa høtkwa ndaw-magødan fa wey da ray cek hay tabiya na, daa ba.

⁹ Ama ya sørkwa *Yesu na, ta tørey la nğa mecøhe da ray maslan hay nğa Gazlavay nğa menjey nekødefey, amba a møcey maja ndøhay tabiya maja dey-ceceh nğa Gazlavay. Ahaw, ya sørkwa Yesu na, Gazlavay fa hølma, fa hølslar ray ga. A ka køne na, maja aa ma sørey banay daa memøcey.

¹⁰ Ara Gazlavay ma kata cek hay tabiya. Cek hay a tabiya a njam na, maja anğa. Anda keðe, ta mbafar la a Gazlavay amba a tərda Yesu nğa ndaw ma gwa nğa kata cek hay tabiya maaya maaya ta fa banay masa aa ma søra. Gazlavay a ka anda keðe na, amba ndøhay ga a tøram nğa bøz anğa hay, a mbøzdata aa slam anğa mewødefey, maja ara Yesu ma da handata nğa løhey.

¹¹ Yesu fa tərdata ndøhay nğa ndøhay maaya manjar mebørey fa mey nğa Gazlavay. Ndøhay maaya ha na, Papa ata letek ta Yesu a. Ara maja ngene, Yesu ma zølta «mølma aðaw hay». Kwa hwaray a kar nğa zølta køne ba. ¹² Yesu a løvar a Gazlavay:

«Ya daa guzltar a mølma aðaw hay

da ray cek masa kah ma ka.

Ya da hølmake fa mey nğa ndøhay akah hay tabiya.»

2:4 2.4 Jan 2.11; SNM 2.22; 1Kwr 12.4-11; 2Kwr 12.12 **2:6** 2.6-8 Ps 8.5-7

* **2:8** 2.8 asi har anğa: Ta mey Gørek na, a løvey: «asi salay anğa». **2:8** 2.8
1Kwr 15.27 **2:9** 2.9 Føl 2.8-9 **2:10** 2.10 1Kwr 8.6; 12.2; SNM 3.15 **2:11**
2.11 Mt 25.40; 12.50; Jan 20.17 **2:12** 2.12 Ps 22.23

13 Aa guzley saya, a løyey:
 «Yah na, ya da pa Gazlavay
 nga ndaw adaw mandaw mandaw.»

A løyey saya:

«Yah kefe, yah ta ndøhay adaw hay
 masa Gazlavay ma vøldatiwa.»

14 Ndøhay anga hay a na, ata ndøhay magødan. Ara maja ngene, Yesu ma tøyey nga ndaw-magødan anda ata may. A ka køne na, amba ta fa memøcey anga aa zøfda *Satan, bay-malula, ma handørwa memøcey a bøla. 15 Ndøhay da bøla kefe na, ata anda beke hay daa menjey ata tabiya maja fa zluram ta memøcey. Ara maja ngene, Yesu a møcey na, amba a pøskatørwa ndøhay daa beke he, a zluram ta memøcey saba. 16 Yaw, Yesu a sawa a bøla na, nga jøney maslan hay nga Gazlavay ba, ama a sawa nga jøney ndøhay daa sækway nga *Abøraham. 17 Ara maja ngene, si a tøyey nga ndaw-magødan anda mølmaha hay daa cek hay tabiya. A ka køne na, amba a tøyey nga *ndaw mahura da ray ndøhay ma ka kwakwas nga Gazlavay, ndaw masa ma søyey dey-ceceh fa ndaw, ma ka sløra nga Gazlavay ta cøved e. Sløra anga na, ara nga vøley ray anga nga møcey amba a mbøkdatara mebørey nga ndøhay. 18 Fara fara, daa masa Yesu fa søyey banay na, Satan ta jada la nga bata. Anda kefe, Yesu a gwa nga jønta ndøhay masa Satan fa jadata nga betey.

3

Yesu a føna Mawiz

1 Mølma adaw hay daa *mecømey-ray nga ndøhay nga Yesu, Gazlavay ta zølkwar la nga tøyey ndøhay anga hay. Anda kefe, wulkam da ray Yesu, ndaw masa Gazlavay ma slørdørwa nga key ndaw mahura da ray ndøhay ma ka kwakwas anga. Ara ta fa anga aløkwa ma tøbkwa mey nga Gazlavay, aløkwa fa wuzdakwa mey a fa mey nga ndøhay tabiya. 2 Ara Gazlavay ma pa nga ka sløra ha. A ka sløra ha na, ta cøved e anda *Mawiz ma ka sløra anga ta cøved e ngada ndøhay nga Gazlavay tabiya zleezle may. 3 Yesu na, si ndøhay aa hømdamara ma føna Mawiz. Ara køne may, ndaw ma løma way na, aa hømdamara a føna way a. 4 Ka sørmara, kwa way wura wura na, ndaw ma løma daha. Ama ma katørwa cek hay tabiya na, ara Gazlavay.

2:13 2.13 Iz 8.17-18 2:14 2.14 2.17; Jan 1.14; bay-malula: Jan 8.44; 12.31; 1Jn 3.8; CWJ 12.10 2:15 2.15 Rm 8.21 2:16 2.16 Iz 41.8-9 2:17 2.17 4.14; 5.2; Føl 2.7; 1Jn 2.2 2:18 2.18 4.15; Mt 4.1-11 3:1 3.1 4.14 3:2 3.2 Mesl 12.7

⁵ Mawiz na, ara ndaw ma ka slëra ta cøved e da wuzlah ndøhay nga Gazlavay tabiya. Ara anga ma wuzdatara mey masa Gazlavay ma daa guzlda ngada fa mey. ⁶ Ama ma wey da ray ndøhay nga Gazlavay tabiya ta cøved e na, ara *Køriste, Bøzey nga Gazlavay. Da alækwa fa jarakwa maaya maaya daa mey nga Gazlavay masa alækwa ma tøkwa, asaya, da alækwa fa sækwakwa cek masa Gazlavay ma da vøldandakwara ta meesømey na, ngene, alækwa ndøhay anga hay.

Mey da ray meməskey-vaw nga ndøhay nga Gazlavay

⁷ Maja ngene, *Mesøfney nga Gazlavay a løyey:

«Da akwar fa cøndamara day nga Gazlavay tasana na,

⁸ ka da døzlmata slømay akwar hay ba.

Ka da kamara anda papañ nga papakw akwar hay zleezle ma kam høma a ray Gazlavay ba.

Daa ngene, ata da wuzlah-ley, ta jadamara Gazlavay la.»

⁹ Gazlavay aa guzley, a løyey:

«Da wuzlah-ley a, ta høtmatar cek hay maaya tabiya masa yah ma kata daa mevey kwakwar møfad la.

Ama ta ngene he cøpa, ta jadamaya la cønga.

¹⁰ Ara maja ngene, yah ma cey mevel a ray ata.

Ta', yaa guzley, ya løyey: "Mewulkey ata, anga maaya ba, cek masa yah ma wufey amba a kamara na, ta sørmara daa ba."

¹¹ Daa masa yah ma cey mevel heyey na, ya ta mbedfey la, ya løyey:

"Kwa fa da mbøzam aa slam masa yah ma dïytara nga møskey vaw na, daa ba sølak."»

¹² Mølma adaw hay, wam vaw! Ndøhay masa ta mevel maaya ba, ma tøba mey nga Gazlavay ba na, kwa ndaw pal da wuzlah akwar a da tørey anda ata ba, maja mevel maaya ba anda ngene na, a da zlangadadakwar ta Gazlavay, ndaw masa anga daha ta dey nga sørmataw. ¹³ Ama maaya na, ka døkam mevel da wuzlah akwar mandaw mandaw, amba *Satan a batakwar nga key mebørey ba, kwa ndaw pal da wuzlah akwar fa da døzla slømay daa ba. Ahaw, døkam mevel da wuzlah akwar, maja tasana kefe, Gazlavay a wufey ngaa guzldakwar saya. ¹⁴ Mey nga Gazlavay masa alækwa ma tøkwa døga nga mezley a haa mendøvey a na, da alækwa fa jarakwa maaya maaya daa mey a na, ngene, alækwa ndøhay nga *Køriste.

¹⁵ Mawuzlalakaya daa dferewel nga Gazlavay, a løyey:

3:6 3.6 Bøzey nga Gazlavay: 5.8; alækwa fa sækwakwa cek: 3.14; 4.14; 6.18-19; 9.28; 10.22-24, 35; 13.14; Kwa 1.23; Føl 3.20; 2Tm 4.8 **3:7** 3.7-11 Ps 95.7-11
3:8 3.8 Mab 17.7; Mesl 20.2-5 **3:11** 3.11 Mesl 14.21-23 **3:14** 3.14 3.6

«Da akwar fa cøndamara d̄ay nga Gazlavay tasana na,
ka da d̄əzlmata sl̄əmay akwar hay ba.

Ka da kamara anda papan̄ nga papakw akwar hay zleezle
ma kam h̄əma a ray Gazlavay ba.»

¹⁶ Ma cøndamara d̄ay nga Gazlavay ta ma kam h̄əma a ray
a na, wa hay wa? Ara nd̄əhay tabiya masa *Mawiz ma
badat̄əwa daa hwayak nga *Ejip. ¹⁷ Gazlavay a cey mevel
mevey kwakwar m̄əfad na, da ray wa hay wa? A cey mevel
na, da ray nd̄əhay a ma kam meb̄ərey. Anda ked̄e, ata c̄əpa
ta m̄əcam sem da wuzlah-ley. ¹⁸ Gazlavay ta mbed̄ey la, a
ləvey: «Kwa fa da mb̄əzam aa slam masa yah ma d̄iytara
nga m̄əskey vaw na, daa ba s̄əlak.» A mbed̄ey k̄əne na,
maja wa hay wa? A mbed̄ey na, maja nd̄əhay a ma c̄ənm̄ar
mey ba. ¹⁹ Fara fara, ya s̄ərkwa ta h̄ətam nga mb̄əzey aa
slam mem̄əskey-vaw a daa ba, maja ata ma t̄əbm̄ara mey
nga Gazlavay daa ba.

4

¹ Zleezle na, Gazlavay taa guzley la amba ya mb̄əzkwa
aa slam masa an̄ga ma d̄iyndakwara nga m̄əskey vaw.
Mey a na, aa daha c̄ənga. Anda ked̄e, wakwa vaw, anja
ndaw pal da wuzlah akwar nga mb̄əkey fa d̄əba ba. ² Ta
wuzdamandakwara mey maaya nga Gazlavay la anda ata
ma wuzdamatara a papan̄ nga papa al̄əkwa hay zleezle
may. Ama ata na, mey a ta j̄ənta daa ba, maja ata ma
t̄əbm̄ara mey a ta mevel pal daa ba. Anda ked̄e, ta h̄ətam
nga mb̄əzey aa slam mem̄əskey-vaw masa Gazlavay ma
d̄iytara daa ba. ³ Ama al̄əkwa na, ya ta t̄əbkwa mey a la.
Anda ked̄e, ya h̄ətkwa nga mb̄əzey aa slam mem̄əskey-vaw
a la. Gazlavay taa guzley la da ray nd̄əhay masa ma t̄əbm̄ara
mey a ba, a l̄əvey:

«Daa masa yah ma cey mevel heyey na,
ya ta mbed̄ey la, ya l̄əvey:

“Kwa fa da mb̄əzam aa slam masa yah ma d̄iytara
nga m̄əskey vaw na, daa ba s̄əlak.”»

Ama Gazlavay na, ta nd̄əvda sl̄əra an̄ga sem d̄əga nga mez-
ley nga b̄əla, ba diya? ⁴ Ya s̄ərkwa na, maja mawuzlalakaya
da ray *pas mem̄əskey-vaw daa d̄erewel nga Gazlavay, a
ləvey: «Gazlavay ta kata sl̄əra an̄ga hay la tabiya d̄ar
maakwaw, nga d̄ar maasala ha na, a m̄əskey vaw.» ⁵ Anda
mawuzlalakaya heyey saya, a l̄əvey: «Kwa fa da mb̄əzam
aa slam masa yah ma d̄iytara nga m̄əskey vaw na, daa ba
s̄əlak.» ⁶ Nd̄əhay ma cøndamara mey maaya nga Gazlavay

teesef na, ta hōtam nga mbōzey aa slam masa Gazlavay ma diytara ha na, daa ba, maja ata ma cōnmar mey ba. Anda kefe, ndōhay mekele a hōtam nga mbōzey la aa slam memōskey-vaw a cōnga. ⁷ Maja ngene, Gazlavay ta pey dar mekele la, a zōla dar a «tasana». Fa dōba ha mevey ga, taa guzley la da ray dar a ta mey *Davī. Mey a na, ara mey makadakaya heyey ma lōvey:

«Da akwar fa cōndamara dāy nga Gazlavay tasana na, ka da dōzlmata slōmay akwar hay ba.»

⁸ Da fara fara Jesōwe ta handata papan nga papa alōkwa hay la aa slam memōskey-vaw masa Gazlavay ma diytara na, anja ngene, Gazlavay fa daa guzley da ray dar memōskey-vaw mekele fa dōba ha na, daa saba.

⁹ Anda kefe, ya sōrkwa, ngada ndōhay nga Gazlavay na, memōskey-vaw daha. Memōskey-vaw a na, ara anda Gazlavay ma mōskey vaw nga dar maasala ha. ¹⁰ Yaw, kwa waawa ma mbōzey aa slam memōskey-vaw nga Gazlavay a na, a da mōskey vaw fa dōba nga slōra anga anda Gazlavay ma mōskey vaw fa dōba nga slōra anga may. ¹¹ Maja ngene, kakwa gōdan amba ya hōtkwa membōzey aa slam memōskey-vaw masa Gazlavay ma diya ha. Wakwa vaw amba kwa ndaw pal da wuzlah alōkwa a key hōma a ray Gazlavay anda papan nga papa alōkwa hay ba. Da daa ba na, ndaw aha a daa zōfey.

¹² Mey nga Gazlavay na, aa ta gōdan, fa key slōra daa ndaw, a zōmey a fōna dōlaw masa mey a cew. Mey a na, a mbōzey kasl aa mevel nga ndaw anda dōlaw ma wunka mezōvey hay nga tetesl ma mbōzey kasl aa sasōraḏ. A wuzdōrwa mewulkey daa mevel nga ndaw, asaya, a wuzdōrwa cek masa ndaw ma wufey nga ka. ¹³ Cek mabakaya fa dey nga Gazlavay na, daa ba. Cek hay tabiya masa anga ma kata na, fa hōtam fa dey anga maaya maaya. Cek hay tabiya masa alōkwa ma kakwa na, ya wuzdakwa la fa mey anga.

Yesu anga ndaw mahura da ray ndōhay ma ka kwakwas nga Gazlavay

¹⁴ Ndaw alōkwa mahura da ray ndōhay ma ka kwakwas nga Gazlavay masa ma tōpey a cakay Gazlavay a vad na, daha. Ara Yesu, Bōzey nga Gazlavay. Maja ngene, jarkwa maaya maaya daa mey nga Gazlavay masa alōkwa ma tōbkwa ta masa alōkwa ma wuzdakwa fa mey nga ndōhay

tabiya. ¹⁵ Ndaw aləkwa mahura da ray ndəhay ma ka kwakwas nga Gazlavay a ta sərɣandakwar dey-ceceh la daa banay aləkwa maja aləkwa ndəhay masa-bøle hay. Anɣa na, ta serey banay la anda aləkwa, ta jadamara la nga betey dey weewe ta fa cek hay mekele mekele nga key mebørey, ama kwa ta key mebørey daa ba. ¹⁶ Anda keɗe, ngøchakwa ngada fa Bay Gazlavay, ndaw masa ma wudta ndəhay kalah. Ngøchakwa ta mandərzay daa dey daa ba amba a sərɣandakwar dey-ceceh, a kandakwar maaya, a jəndakwar ta pas masa aləkwa daa banay.

5

¹ Kwa *ndaw mahura da ray ndəhay ma ka kwakwas nga Gazlavay wura wura, a walamara na, da wuzlah ndəhay. Sløra anɣa na, ara mekey kwakwas nga Gazlavay maja ndəhay. A vølar cek a Gazlavay, asaya, a hørar gənw ngada Gazlavay, amba Gazlavay a mbəkdatara mebørey nga ndəhay.

² *Ndaw mahura da ray ndəhay ma ka kwakwas nga Gazlavay na, anɣa ray anɣa, anɣa ndaw-magədan anda ndəhay mekele may. Anda keɗe, a gwa nga jəkfatar sləmay fa ndəhay ma sərmara cek ba ta ndəhay masa fa zlangadəm la daa cəved masa maaya. ³ Maja anɣa ndaw-magədan na, a hørey gənw nga vøley ngada Gazlavay maja mebørey nga ndəhay daada ba, ama maja mebørey anɣa may.

⁴ Ndaw a gwa a pa ray anɣa nga ndaw mahura da ray ndəhay ma ka kwakwas nga Gazlavay ta ray anɣa ba. Si Gazlavay ma pa anda aa ma pa *Araɣw. ⁵ *Køriste may ta pa ray anɣa nga ndaw mahura da ray ndəhay ma ka kwakwas nga Gazlavay ta ray anɣa na, daa ba. Ama ara Gazlavay ma pa, aa guzlar, a løvar:

«Kah na, Bøzey adaw,
døga tasana yah Papakw.»

⁶ Daa slam langar, mawuzlalakaya saya, Gazlavay a løvar:
«Ka da njeɣ ndaw ma ka kwakwas adaw nga sərmataw
anda Melkisedek.»

⁷ Daa masa Yesu Køriste anɣa da bøla na, a səra Gazlavay aa ta gədan nga ləhda daa memøcey. Anda keɗe, ta dərar dangay la ta mewudey, ta matəway daa dey a Gazlavay. Gazlavay ta jəkfar sləmay la, ta sləkɗadərwa la daa memøcey, maja aa ma nar ray. ⁸ Kwa anɣa Bøzey nga

4:14 4.14 5.8; 8.1; ndaw mahura da ray ndəhay ma ka kwakwas nga Gazlavay: 2.17-18; 3.1; 5.1, 4-6; 7.24-28; 8.3; 9.7, 11 **4:15** 4.15 2.18; 5.2; 7.26; 9.12; 1Jn 3.5
4:16 4.16 10.19 **5:1** 5.1 4.14 **5:2** 5.2 2.17-18; 4.15; 7.28 **5:3** 5.3 7.27; 9.7; Lev 9.7; 16.6, 15 **5:4** 5.4 Araɣw: Mab 28.1 **5:5** 5.5 1.5 **5:6** 5.6 Ps 110.4; Heb 6.20 **5:7** 5.7 Mt 26.36-46

Gazlavay na, taa sərkey n̄ga ney ray la ta fa banay masa aa ma s̄era. ⁹ Masa Gazlavay ma tərda n̄ga ndaw ma gwa n̄ga kata cek hay tabiya maaya maaya cay na, ndəhay ma namar ray tabiya a hətam meləhey la ta fa v̄əda n̄ga s̄ərmataw. ¹⁰ Yesu a gwa a l̄əhdata, maja Gazlavay ma pa n̄ga ndaw mahura da ray ndəhay ma ka kwakwas an̄ga anda Melkisedek.

Ka da mbəkdamara mey n̄ga Gazlavay ba

¹¹ Mey hay ga daha n̄gaa guzley n̄gada akwar da ray *K̄əriste, ndaw aləkwa mahura da ray ndəhay ma ka kwakwas n̄ga Gazlavay. Ama an̄ga ta banay amba ya wuzdakwara mey da ray a maaya maaya, maja akwar fa da c̄əndamara fiyaw fiyaw daa ba. ¹² Pas a ta wuswa cay t̄əde amba kaa s̄ərkadamata ndəhay. Ama haa wure kefe, si ndəhay aa s̄ərkadamakwar da ray mey hay n̄ga Gazlavay masa n̄geeme masa akwar ma c̄əndamara cay c̄ən̄ga. Akwar na, anda b̄əza hay ma sam d̄əwa ma wusmara n̄ga z̄əmey d̄af ba aran̄. ¹³ Kwa waawa ma sey d̄əwa daada na, an̄ga b̄əzey mec̄əhe d̄agay. Cek masa maaya ta maaya ba na, a gwa n̄ga wunkata ba. ¹⁴ Ndəhay mahura hay a z̄əmam na, d̄af. Ata na, mak̄ətatakaya, a gwamara n̄ga wunkey cek masa maaya ta maaya ba.

6

¹ Maja n̄gene, nakwa fa mey fa mey, sas̄ərkakwa cek masa n̄ga ndəhay mahura hay. Ya da njakwa daa mees̄ərkey n̄ga ndəhay masa ma s̄ərmara mey n̄ga K̄əriste t̄əlam ba. Aləkwa taa s̄ərkakwa cek hay masa n̄geeme daa met̄əbey mey n̄ga Yesu K̄əriste cay. Anda mel̄əvey, aləkwa taa s̄ərkakwa cay da ray memb̄əkey mekey cek ma hendey ndaw aa mem̄əcey, asaya, da ray mepey Gazlavay n̄ga ndaw fara fara. ² Aləkwa taa s̄ərkakwa cay da ray *baptem mekele mekele, da ray mepey har a ray ndəhay *, da ray masl̄ək̄dawa n̄ga ndəhay daa mem̄əcey, lēn̄ da ray sariya masa Gazlavay ma da d̄əsla ma da n̄jey n̄ga s̄ərmataw.

³ Ahaw, nakwa fa mey fa mey! Da Gazlavay ta t̄əba la na, ya daa s̄ərkakwa mees̄ərkey n̄ga ndəhay mahura hay d̄əba.

⁴ Ndəhay masa ma mb̄ədm̄ar d̄əba sem a Gazlavay na, a gwamara a v̄əhmawa n̄gaa c̄əfd̄ey ambahw fa Gazlavay

5:8 5.8 1.2; 4.14; 6.4-6; 7.3, 28; 10.29; Jan̄ 1.34; meney ray: 4.15; F̄əl 2.8 **5:9** 5.9 7.27 **5:10** 5.10 5.6; 6.20 **5:12** 5.12-13 1Kwr 3.2 **5:14** 5.14 13.9;

Rm 16.19; 1Kwr 14.20; Ef 4.14 **6:1** 6.1 9.14 * **6:2** 6.2 mepey har a ray ndəhay: Ara cek mekey n̄ga wuzda ndaw aha mapakaya wal n̄gada Gazlavay amba Mes̄əfney n̄ga Gazlavay a sawa a ray a, kwa daa baptem, kwa daa sl̄əra wura wura n̄gada Gazlavay. N̄əka SNM 13.2-3; 1Tm 4.14. **6:2** 6.2 Jan̄ 3.25-26; SNM 19.1-6

saya na, kwara? Ta njam la dey pal daa mewedey nga Gazlavay. Cek da vad masa Gazlavay ma vøldatara ngada ndøhay anga hay na, taa cøkdamara la. *Mesøfney nga Gazlavay ta sawa la a ray ata may. ⁵ Ta sørmara la mey nga Gazlavay na, ara mey maaya fara fara. Asaya, ta sørmara maazla hay ma da kam ngada fa mey la. ⁶ Ama, ta ngene he cøpa, ta mbødmar døba sem a Gazlavay cønga. Ndøhay a, a gwamara nga vøhmawa ngaa cøfdey ambahw fa Gazlavay saba, maja da ndaw ta mbødar døba sem a Gazlavay na, a key ngene, anda a døra Bøzey nga Gazlavay fa hwadam mazlanjalakaya saya. Asaya, a key ngene, anda a cøda fa mey nga ndøhay.

⁷ Wulkakwa da ray ley cey! Ley masa var fa pey da hwad a maaya maaya na, cek daa ley a, a key maaya maaya ngada ndaw nga ley a. Anda kefe, a wuzwa maaya nga Gazlavay aa da ray ley a. ⁸ Ama da ley a, guzer ta hatak ta tøba sem na, ngene ara ley maaya ba. Ley a fa da njej ga daa ba, Gazlavay a da nøsa, a da mbøkda aa kusaf, fa døba ha, awaw a daa wura kølmedek!

⁹ Jam adaw hay, kwa da yaa guzlmakwar anda kefe na, ya sørmara fara fara, akwar daa cøved maaya masa ma da løhdakwar. ¹⁰ Gazlavay na, ara ndaw ma key cek ta cøved e, aa fa sørfada sløra maaya masa akwar ma kamara. Asaya, aa fa sørfada akwar fa wudmara. Akwar fa wuzdamørwaw mewudey-vaw akwar a ta fa sløra masa akwar ma kamara zleezle ngada ndøhay mekele daa *mecømey-ray nga ndøhay nga Yesu. Kwa wure kefe, akwar fa kamara køne. ¹¹ Ya wudam na, kwa waawa da wuzlah akwar a key gødan nga njej køne haa mendøvey a, ka da gøram ba, amba ka høtam cek hay tabiya masa akwar ma søkwmar. ¹² Ka da tøram ndøhay masa-mayad hay ba, ama njam anda ndøhay ma tøba mey nga Gazlavay masa majaratakaya. Ata na, a høtam cek masa Gazlavay ma løvey a da vøldatara a ndøhay anga hay heyey la. Kam cek anda ata.

Mey da ray Gazlavay ma da katar maaya ngada ndøhay anga hay

¹³ Masa Gazlavay ma løvar a *Abøraham a da kar maaya heyey na, ta mbedey la fara fara, a ka cek aha la. Ndaw ma føna Gazlavay na, daa ba. Anda kefe, ta mbedey la ta mezøley anga. ¹⁴ A løvey:
«Fara fara, ya da pøska mey,

ya da vëlka bəza hay ga ara mey ba.»

¹⁵ Masa Abərahām ma cənda mey a la na, ta', a səkwa ta dək-vaw. Anda keđe, Abərahām ta hətəy cek masa Gazlavay ma ləvar a da kara heyey la. ¹⁶ Da ndəhay fa mbađam na, a mbađam ta mezəley ŋga ndəhay masa mahura da ray ata hay. *Membədey na, a dəsla mey da wuzlah ndəhay.

¹⁷ Maja ŋgene, Gazlavay a mbədey amba ndəhay masa aa ma ləvey a da katar maaya heyey na, a sərmara fara fara, a katara la, a mbəđda mewulkey anğa ba. Anda keđe, a mbədey, a ləvtar a da katar cek maaya. ¹⁸ Mey ma ləvey Gazlavay a da katar maaya ŋgada ndəhay anğa hay, leŋ membədey anğa na, ara mey hay cew masa a mbəđam ba, maja Gazlavay na, a mbərzley ba səlak. Aləkwa masa ta ŋgəchakwa sem ŋgada fa Gazlavay keđe na, mey hay a keđe fa vəlndakwar gədaŋ ga amba ya səkwa kwa cek masa Gazlavay ma ləvey a da vəldandakwara heyey. ¹⁹ Cek masa aləkwa ma səkwa kwa ha na, fa jarandakwar maaya maaya amba ya ŋjakwa majaratakaya fa mey ŋga Gazlavay. Maja ŋgene, *Slam masa Gazlavay aa da hwađ a na, zana ma gərca slam aha a wurey la, anda keđe, ya mbəzkwa la a hwađ a, a cakay Gazlavay. ²⁰ Yesu ta mbəzey sem aa slam aha ŋgene teesəd da ray aləkwa. A mbəzey na, maja aləkwa, maja anğa ta tərey sem ŋga *ndaw mahura da ray ndəhay ma ka kwakwas ŋga Gazlavay ŋga sərmataw anda Melkisedek.

7

Mey da ray Melkisedek

¹ Melkisedek na, ara bay daa berney ŋga Salem, asaya, anğa *ndaw ma ka kwakwas ŋga Gazlavay, Gazlavay Mawaca-waca. Daa ŋgene na, *Abərahām ta fəntərwa bay hay la ta gədaŋ daa vəram. Masa anğa fa vəhwa na, ta', Melkisedek a daw, a cadərwa ray, a pəsar mey.

² Abərahām a wunka cek masa anğa ma təbtərwa daa vəram a, slam kuraw, a la slam pal, a vəldara a Melkisedek e. Mezəley anğa Melkisedek na, a wuđey ŋga ləvey «bay ma key cek ta cəved e.» Asaya, Melkisedek e anğa «bay ma wuđey zazay da wuzlah ndəhay,» maja anğa bay ŋga Salem. Salem na, a wuđey ŋga ləvey «zazay». ³ Anğa na, dərəwel ŋga Gazlavay faa guzley da ray papaha ta mamaha, leŋ da ray səkway anğa hay na, daa ba. Asaya, faa guzley da ray mayawa anğa ta meməcey anğa daa ba. Anğa na, anda

6:16 6.16 Mab 22.10; Mt 5.34; 23.16-22 **6:18** 6.18 Mesl 23.19 **6:19** 6.19 3.6; Rm 5.5; Heb 9.3 **6:20** 6.20 4.14; Melkisedek: Ps 110.4; Heb 5.6, 10; 7.1-4
7:1 7.1 Melkisedek: MC 14.17-20; Heb 5.6

Yesu, Bøzey nga Gazlavay, anga ndaw ma ka kwakwas nga Gazlavay nga sèrmataw.

⁴ Nèkmara cey! Melkisedek na, anga ndaw mahura, ba daw? Maja kwa Abèraham zleezle, Papan nga papa alèkwa hay na, ta wunka cek hay masa anga ma tètèrwa daa vèram la slam kuraw, ta vèldara slam pal sem. ⁵ Kwakwas nga *Mawiz a vèley cèved a ndèhay daa sèkway nga *Levi masa ma ka kwakwas, nga tøbey cek pal daa kuraw nga cek hay tabiya da har ndèhay *Israyel hay. Kwa Israyel hay a, ara mëlma ata hay daa sèkway nga Abèraham. Ta ngene he cèpa, fa tøbam cek da har ata cènga. ⁶ Melkisedek na, anga daa *sèkway nga Levi ba, ama ta ngene he cèpa, ta tøbey cek pal daa kuraw la da har Abèraham. Abèraham masa Gazlavay ma lèvar a da kar maaya heyey na, ara anga ma pèsar mey ngada Melkisedek ba, ama ara Melkisedek ma pèsar mey a Abèraham. ⁷ Ka sèrmara, ndaw ma pèsey mey a ndaw na, aa mahura da ray ndaw aha. Anda kefe, Melkisedek na, aa mahura da ray Abèraham.

⁸ Ndèhay ma ka kwakwas daa sèkway nga Levi ma tøbam cek pal daa kuraw na, ata ndèhay masa ma da mècam gway. Ama Melkisedek masa ma tèba cek pal daa kuraw da har Abèraham heyey na, aa ta dey nga sèrmataw, anda dèrewel nga Gazlavay ma lèvey. ⁹ Ya gwakwa ya lèvkwa ndèhay daa sèkway nga Levi masa ma tøbam cek pal daa kuraw da har ndèhay mekele na, ta vèlmar la a Melkisedek may, maja papan nga papa ata Abèraham ma vèlar la. ¹⁰ Anda mèlèvey, masa Abèraham ma vèlar cek a Melkisedek e na, ta yawa bøzey daa ba aran. Ama kwa ta yawa bøzey daa ba aran na, Abèraham a vèlar cek a Melkisedek e. Ara anda ata cewete ta Levi, bøzey ma da yawa daa sèkway anga may. Anda kefe, a wufey nga lèvey Melkisedek na, a fènta ndèhay daa sèkway nga Levi.

Mey da ray Yesu, ndaw ma ka kwakwas anda Melkisedek

¹¹ Daa *mewey nga *Israyel hay na, ndèhay ma ka kwakwas nga Gazlavay na, si ndèhay daa sèkway nga *Levi gway. Slèra nga ndèhay a ngene na, ara anda *Aranw, papan nga papa ata hay zleezle, ma ka. Slèra ha na, a gwa nga ndèvda cek masa Gazlavay ma wufey nga ka ba. Da a gwa nga ndèvda na, anja Gazlavay fa da pey ndaw ma ka kwakwas mekele masa anda Melkisedek na, daa saba. ¹² Da Gazlavay ta mbèdda ndaw ma ka kwakwas anga sem na, ngene, si mewey nga Israyel hay a mbèdey may. ¹³ Bay alèkwa Mahura Yesu masa alèkwa maa guzlkwa da ray a kefe na, sèkway anga wal ta *sèkway nga Levi. Kwa ndaw

daa səkway anğa pal masa anğa *ndaw ma ka kwakwas nğa Gazlavay na, daa ba. ¹⁴ Ya sərkwā fara fara Yesu na, a yawa daa səkway nğa Juda. Daa masa *Mawiz maa guzley da ray ndəhay ma ka kwakwas na, kwa taa guzley da ray səkway a daa ba.

¹⁵ Ndəhay ma ka kwakwas nğa Gazlavay masa daa səkway nğa Levi na, a gwamara nğa handamata ndəhay fa Gazlavay ba. Mey a keđe, fa wuzwa maaya maaya maja Gazlavay ta pey ndaw mekele la nğa ndaw ma ka kwakwas anğa anda Melkisedek. ¹⁶ Ndaw a, a tərey ndaw ma ka kwakwas nğa Gazlavay na, ta fa mewey nğa ndaw-magədan ba, ama ta fa gədan nğa heter mendəvey ba, ¹⁷ maja mawuzlalakaya daa dərewel nğa Gazlavay, a ləvey: «Ka da njeý ndaw ma ka kwakwas adaw nğa sərmataw anda Melkisedek.»

¹⁸ Anda keđe, mewey masa zleezle na, mahazakadakaya sem maja ara cek nğa tede, a jəney ndaw ba. ¹⁹ Kwakwas nğa Mawiz na, ta gwa nğa ləhdata ndəhay daa ba. Ama wure keđe, aləkwa ma pakwa lenğesl a ray cek mahura maaya masa aləkwa ma səkwa kwa heyey la. Ara ta fa cek aha aləkwa ma da nğəchakwa nğada fa Gazlavay.

²⁰⁻²¹ Asaya, Gazlavay a pa Yesu nğa ndaw ma ka kwakwas anğa na, ta mbedey la maja. Ama ndəhay mekele ma təram nğa ndəhay ma ka kwakwas zleezle na, Gazlavay ta mbedey maja daa ba. Ahaw, Gazlavay ta mbedey la maja Yesu, a ləvey:

«Yah, Bay Gazlavay akah, ya fa mbedey,

kwa ya fa da mbədda mey adaw daa ba səlak:

“Ka da njeý ndaw ma ka kwakwas adaw nğa sərmataw.”»

²² Maja nğene, ya sərkwā fara fara, Yesu na, ara anğa ma handərwa *mejəwey-mey maaya ma fəna masa zleezle.

²³ Cek mekele daha saya, ndəhay ma ka kwakwas masa daa səkway nğa Levi na, ata ga maja fa məcām, fa pam mekele, fa məcām, fa pam mekele. ²⁴ Ama Yesu na, aa daha nğa sərmataw, sləra anğa nğa mekey kwakwas na, fa da ndəvey daa ba. ²⁵ Maja nğene, Yesu aa ta gədan mandaw mandaw nğa ləhdata ndəhay masa ma nğəcham nğada fa Gazlavay ta fa anğa. A gwa a ka kəne maja aa ta dey nğa sərmataw, anğa fa dərar dangay mandaw mandaw a Gazlavay maja ata.

²⁶ Yesu na, ara *ndaw mahura da ray ndəhay ma ka kwakwas nğa Gazlavay masa ma gwa nğa jəndakwar.

Anğa na, aa maaya fa Gazlavay, manğəra fa vəda daa ba, mebərey da ray a kwa nekədey daa ba. Gazlavay a pa wal, aa da wuzlah ndəhay ta mebərey daa saba, a la a vad a cakay a. ²⁷ Yesu na, anğa anda mahura hay da ray ndəhay ma ka kwakwas nğa Gazlavay mekele hay ba. Ata na, fa vələm cek a Gazlavay mandaw mandaw, ngeeme, maja mebərey ata, fa dəba ha, maja mebərey nğa ndəhay. Ama Yesu na, si a ka kəne na, daa ba. A vələr cek a Gazlavay dey pal gway na, mak, mekele daa ba. Cek aha na, ara anğa ma vəlda ray anğa nğa məcey. ²⁸ Kwakwas nğa Mawiz a pey nğa ndəhay ma ka kwakwas nğa Gazlavay na, ndəhay magədan gway. Ndəhay a na, ara ndəhay ta mebərey. Ama daa masa Gazlavay ma mbedey na, *membedey a, ta njeý sem aa slam a nğa kwakwas nğa Mawiz. Gazlavay a pey nğa ndaw mahura da ray ndəhay ma ka kwakwas anğa na, Bəzey anğa. A pa na, nğa sərmataw. Gazlavay ta tərda sem nğa ndaw ma gwa nğa kata cek hay tabiya maaya.

8

Mey da ray Yesu, ndaw mahura da ray ndəhay ma ka kwakwas nğa Gazlavay

¹ Fara fara ndaw aləkwa mahura da ray ndəhay ma ka kwakwas nğa Gazlavay na, daha. Ara Yesu, aa manjakaya ta har-zəmay nğa Bay Gazlavay da vad, fa wey da ray cek hay tabiya. Kede he ara *bay-ray nğa meý masa ala ma wuđam nğa ləvey. ² Anğa na, a ka sləra anğa daa Way-mekərcey fara fara masa da vad, daa *Slam masa Gazlavay aa da hwađ a masa fara fara. Ara slam masa Gazlavay ma điya da vad, ba na, ara slam masa ndaw ma điya da hwayak ba.

³ *Ndaw mahura da ray ndəhay ma ka kwakwas nğa Gazlavay wura wura na, sləra anğa ara nğa vələy cek ta nğa hərəar gənaw a Gazlavay. Anda kede, Yesu na, si a vələr cek a Gazlavay may. ⁴ Da haa wure kede anğa da bəla na, anja kwa fa da key *ndaw ma ka kwakwas nğa Gazlavay na, daa ba. Fa da key daa ba na, maja ndəhay ma vələm cek a Gazlavay anda *kwakwas nğa Mawiz ma ləvey na, daha cay. ⁵ Ndəhay ma ka kwakwas a na, a kamara sləra ata daa way nğa Gazlavay. Ama sləra masa ata ma kamara ha na, ara anda meezeđ e, ba na, ara anda da gazlavay da vad ba. Cek aha, ta key la kəne ta Mawiz may. Daa masa fa da kərca way nğada Gazlavay na, Gazlavay a ləvar: «Jəkey

7:26 7.26 4.15 **7:27** 7.27 5.3, 9; 7.25; 9.12, 26, 28; 10.10, 12; Rm 6.10; 1Pi 3.18
7:28 7.28 5.1-2, 8; 7.19; Ps 2.7 **8:1** 8.1 4.14; har-zəmay: 1.3, 13; 7.25; 10.12;
 12.2, 25; Ps 110.1; Mt 22.44; SNM 2.33; Rm 8.34; Ef 1.20; Kwa 3.1 **8:2** 8.2 8.5

sləmay maaya maaya, kərca way a ta cəved e anda yah ma ləvka daa aŋgwa ŋga Sinay heyey.» ⁶ Ama wure kedē, sləra masa Yesu ma ka na, a fəna sləra masa ndəhay ma ka kwakwas a ma kamara. Asaya, Yesu a cəmtar dāy ŋga ndəhay ta Gazlavay amba Gazlavay a jəwey mey mawiya ta ata. *Mejəwey-mey Mawiya ha na, a fəna mejəwey-mey masa zleezle maja cek masa Gazlavay ma ləvey a da katara a ndəhay daa mejəwey-mey mawiya na, a fəna cek masa aa ma ləvey daa mejəwey-mey masa zleezle.

Mey da ray mejəwey-mey mawiya

⁷ Da *mejəwey-mey ŋgeeme ta gwa ŋga ka cek tabiya anda Gazlavay ma wufey la na, anja ŋgene, Gazlavay fa da jəwey mey mekele daa saba. ⁸ Ama Gazlavay ta mbədtar ray sem a ndəhay aŋga hay maja mebərəy ata. A ləvtar:

«Yah, Bay Gazlavay, ya ləvey: pas a, a wuswa la
masa yah ma da jəwey mey mawiya ta ndəhay Israyel
hay

leŋ ta ndəhay daa səkway ŋga Juda.

⁹ Mejəwey-mey a na, fa da key anda mejəwey-mey
masa yah ma ka ta papaŋ ŋga papa ata hay zleezle
daa masa yah ma badatərwa
daa hwayak ŋga Ejip heyey na, daa ba.

Ndəhay a ta səpmara mejəwey-mey a ta cəved e daa ba.
Ara maja ŋgene, yah ma mbədtar dəba.

¹⁰ Yah, Bay Gazlavay, ya ləvey:

Mejəwey-mey masa yah ma da ka
ta ndəhay *Israyel hay ŋgada fa mey na,
ara mewuzey kwakwas adaw ŋgada ata,
ahaw, ya wuzlalatara la aa mevel ata.

Ya da tərey Gazlavay ata,
ata may, a da təram ndəhay adaw hay.

¹¹ Kwa ndaw ma daa sərkada ndaw daa hwayak aŋga,
da daa ba, məlmaha,

a ləvar: “Si ka səra Bay Gazlavay” na, daa ba,
maja ata tabiya, kwa bəza hay, kwa mahura hay na,
a sərmaya la.

¹² Yaw, ya mbəkdatara maŋgəra ata la,
kwa ya fa da sərfada mebərəy ata daa saba.»

¹³ Masa Gazlavay maa guzley da ray mejəwey-mey mawiya
na, ta tərda mejəwey-mey masa ŋgeeme sem ŋga
magurma. Cek wura wura masa magurma na, gweegwe
cay aa zəfey.

9

Mey da ray mejøwey-mey masa ngeeme

¹ Daa *mejøwey-mey masa ngeeme, *mewey hay daha. Mewey hay a fa wuzdatara cøved a ndøhay nga søpey Gazlavay. Asaya, slam daha nga dørey danggay masa ndøhay ma dīymara. ² Ta kørkam way la, way a na, mawunkakaya ta zana slam cew. Slam masa ngeeme na, a zølmara *Slam maaya nga Gazlavay. Daa slam aha na, petørla mahura ta neneh nga awaw hay maasala daha, asaya, taabal daha. Peñ mavøldakaya ngada Gazlavay mapakaya da ray a. ³ Slam ta da døba zana na, a zølmara *Slam masa Gazlavay aa da hwaf a. ⁴ Daa slam aha na, slam-meewurey cek mezey maaya ngada Gazlavay daha, slam aha makakaya ta børey magaza. Asaya, *akwatay nga hwadam daha, børey magaza makakaya fa vøfa. Daa akwatay a na, taasa makakaya ta børey magaza daha. Daa taasa ha na, cek mezømey mezøley «*man» da hwaf a daha. Dangwar nga *Aranjw masa maa fekwey heyey aa daa akwatay a, asaya, beeler hay cew masa Gazlavay mawuzlala mewey anga hay fa vøfa heyey, ata daa akwatay a may. *Akwatay a na, ara akwatay nga sørfedey mejøwey-mey nga Gazlavay ta ndøhay. ⁵ Da ray akwatay a na, cek hay cew daha ta zlara mavøftakaya ta børey magaza. Cek hay a na, ata anda maslanj hay nga Gazlavay, fa wuzdamørwa Gazlavay aa daa slam aha. Fa ciymata zlara ata hay a ray slam mewucey mambaz amba Gazlavay a mbøkdatara mebørey nga ndøhay. Ama wure kefe, ya gwa nga kada mey da ray cek hay masa daa slam aha cøpa ba.

⁶ Yaw, cek hay daa way a na, mapatakaya anda kefe. Ndøhay ma ka kwakwas nga Gazlavay fa mbøzam mandaw mandaw aa slam masa ngeeme nga key sløra ngada Gazlavay. ⁷ Aa slam masa ta døba zana na, si ndaw mahura da ray ndøhay ma ka kwakwas ma mbøzey a hwaf a gway. A mbøzey na, dey pal fa mevey. A mbøzey na, si ta mambaz nga gønaw da har nga vøley ngada Gazlavay amba Gazlavay a mbøkdera mebørey * anga, asaya, amba a mbøkdatara mebørey nga ndøhay mekele. ⁸ *Mesøfney nga Gazlavay a wufey nga løvey ta mey a kefe na, slam

9:2 9.2 way mekørcey: 8.5; 9.11-12; Mab 26.1-30; petørla: Mab 25.31-39; taabal: Mab 25.23-30 **9:3** 9.3 Mab 26.31-33; Lev 16.2; Heb 6.19; 9.7, 12; 10.20 **9:4** 9.4 slam-meewurey cek: Mab 30.1-6; akwatay: Mab 25.10-16; man: Mab 16.32-35; dangwar nga Aranjw: Mesl 17.21-25; beeler hay cew: Mab 25.16 **9:5** 9.5 Mab 25.18-22 **9:6** 9.6 10.11; Mesl 18.2-6 * **9:7** 9.7 mebørey: Daa mewulkey nga Jøwif hay na, Gazlavay a mbøkey na, mebørey masa ndaw ma ka tesufe ba. **9:7** 9.7 5.3; 9.25; 13.11; Lev 16.2-16

masa ngeeme, da aa daha arañ na, cøved nga mbøzey aa Slam masa Gazlavay aa da hwaɗ a ta døba zana a wurey ba arañ. ⁹ Cek hay a cøpa keɗe na, ara anda mey-menɗey ma wuzwa cek hay masa ma kam wure keɗe. Anda meløvey, cek masa ndaw ma vøldara a Gazlavay ta mehørey gønaw nɗada Gazlavay na, a gwa nga tərda mevel nga ndaw aha maaya fa mey nga Gazlavay ba. ¹⁰ Cek hay a keɗe na, ara mewey hay da ray cek mezømey, da ray cek mesey, leŋ da ray mesøpey kwakwas nga pørey cek amba a tøram ndøhay ma zløba kwakwas saba gway. Ara na, mewey hay nga ndøhay magødaŋ gway, fa da njeý ga daa ba. A da njeý nekøɗey haa ta pas masa Gazlavay ma mbøɗdata cek hay cøpa mawiya.

Mey da ray Køriste ma vølda ray aŋga maja aløkwa

¹¹ Wure keɗe *Køriste ta sawa la. Aŋga na, *ndaw mahura da ray ndøhay ma ka kwakwas nga Gazlavay ma handandakwara maaya aŋga masa aløkwa ma høtkwa wure keɗe. A ka sløra aŋga na, daa way mahura ma føna Way-mekørecey masa zleezle. Way a na, aa maaya kalah, ara ndaw-magødaŋ ma løma ba. Way a na, aa da bøla keɗe ba. ¹² Masa Køriste ma mbøzey aa *Slam masa Gazlavay aa da hwaɗ a heyey na, ta mbøzey ta mambaz nga kwakwaba daa ba, ta mbøzey ta mambaz nga bøk-sla daa ba. Ama a mbøzey na, ta mambaz aŋga, ray aŋga. A mbøzey na, dey pal gway nga sørmataw. Anda keɗe, ta løhdandakwar sem daa mebørey nga sørmataw. ¹³ Anda kwakwas aløkwa ma løvey na, da ndaw ta zløba kwakwas la na, si a wucmar mambaz nga kwakwaba, da daa ba, nga gusaŋ fa vaw. Da daa ba na, si a lam sla-bølak, a ndølmara, a kwiýdamara bebøɗes e a ray ndaw aha. Anda keɗe, ndaw ma zløba kwakwas a na, a tørey ndaw ma søpa kwakwas a maaya maaya døba. ¹⁴ Da anda keɗe na, mambaz nga Køriste na, a føna cek masa ata ma kamara nɗene ba daw? Mambaz aŋga na, a føna mambaz nga gønaw hay ba daw? Køriste na, kwa ta key mebørey daa ba, ta vølda ray aŋga la a Gazlavay ta gødaŋ nga *Mesøfney nga Gazlavay masa mendøvey ba nga sørmataw. Mambaz aŋga na, a pørndakwara mevel amba ya kakwa cek malamba nga handandakwar aa memøcey saba. Anda keɗe, ya da kakwa sløra nga Gazlavay, ndaw masa aŋga daha ta dey nga sørmataw.

9:9 9.9 7.19; 9.2 **9:10** 9.10 Lev 11; 15; Mesl 19 **9:11** 9.11 4.14 **9:12** 9.12 7.27; 10.4; Lev 16.14-16; mambaz nga Køriste: 9.25; 12.24; 13.12, 20; Mt 26.28; Rm 3.25-26; 1Pi 1.2, 18-19; 1Jŋ 1.7 **9:13** 9.13 Mesl 19.1-10, 17 **9:14** 9.14 Rm 6.20-23; 8.2

¹⁵ Maja ηgene, Køriste na, ara ndaw ma cəmtar dʒay ηga ndəhay ta Gazlavay amba Gazlavay a jəwey mey mawiya ta ndəhay a. Anda keɖe, ndəhay masa Gazlavay ma zəлта na, a hətam maaya aηga masa aa ma ləvtar a da vəldatara heyey la. Maaya aηga ha a da njeɣ da ray ata ηga sərmataw. A hətam la, maja Køriste ta məceɣ la. Meməceɣ aηga ha, a ləhdata ndəhay daa mebərey masa ata ma kamara daa masa ata daa *mejəwey-mey ηgeeme heyey.

¹⁶ Yaw, ya sərkwa da ndaw a mbəɖey mey na, si ndaw aha a məceɣ la dʒagay amba mey aha, a key. ¹⁷ Da ndaw aa ta deɣ na, membəɖey-mey aηga ha a key ba aran, si ndaw aha ma məceɣ la amba membəɖey-mey aηga a key. ¹⁸ Ara maja ηgene, kwa mejəwey-mey masa ηgeeme a zley na, ta mambaz. ¹⁹ Ta pas masa Gazlavay ma jəwa mey ta ndəhay *Israyel hay na, teesed na, *Mawiz a wuzdatara *mewey masa Gazlavay ma vəldatara a ndəhay dʒagay. Fa dəba ha, a ley mambaz ηga bəz-sla ta ηga kwakwaba, a jahada ta yam. Asaya, a ley mey-har ηga wudez, a ley eηgwec ηga təbaη mandəvkaya magaza. A paɖa eηgwec e fa mey-har ηga wudez heyey, a jəhwəba aa mambaz a. A wuca fa ɖerewel masa mewey ηga Gazlavay mawuzlalakaya fa vəɖa, asaya, a wuctara fa ndəhay tabiya. ²⁰ Aa guzley, a ləvey: «Gazlavay a jəwey mey ta akwar na, ta fa mambaz a keɖe. A ləvkwar ηga namar ray a mewey hay daa mejəwey-mey a.» ²¹ Asaya, Mawiz a wuceɣ mambaz heyey fa Way-mekərceɣ leη fa cek hay tabiya mekey sləra daa way a may. ²² Anda kwakwas ηga Mawiz ma ləvey na, har-gəɖaη ηga cek hay a təram maaya na, ta fa mambaz. Si mambaz a mbəɖwa la dʒagay amba Gazlavay a mbəkdatara mebərey ηga ndəhay.

Mey da ray Køriste ma vəlda ray aηga maja mebərey ηga ndəhay

²³ Ya taa guzlkwar la, ya ləvkwar cek masa *Mawiz maa sərkadatar a ndəhay ηga key na, anda meezed ηga cek hay masa fara fara da vad gway, ba na, ara cek hay a fara fara ba. Cek masa Mawiz maa sərkadatar a ndəhay ηga key na, aa fa tərdata cek hay cəpa maaya ta fa mehərey gənaɣ hay ηgada Gazlavay. Ama ηgada cek hay da gazlavay da vad na, mehərey gənaɣ hay ηgada Gazlavay na, ara cek ηga tede. Si mekey cek mekele ma fəna. Cek aha na, ara Yesu *Køriste ma vəlda ray aηga ηga kəɖey vagay.

²⁴ Kəriste na, ta mbəzey aa *Slam masa Gazlavay aa da hwaɗ a daa Way-mekərcey masa ndəhay magədaŋ ma kərcamara ta har ata na, daa ba. Slam aha ŋgene na, ara anda meezed e, ba na, ara Slam ŋga Gazlavay fara fara ba. Ama Kəriste a mbəzey na, aa slam da gazlavay da vad, Slam masa Gazlavay aa da hwaɗ a fara fara. Wure keɗe, aa daa slam aha fa dərar danɗay a Gazlavay maja aləkwa.

²⁵ Asaya, *ndaw mahura da ray ndəhay ma ka kwakwas ŋga Gazlavay na, fa mbəzey fa mevey a fa mevey a aa Slam masa Gazlavay aa da hwaɗ a daa Way-mekərcey. A mbəzey na, ta mambaz ŋga gənaŋ da har. Ama Kəriste na, ta daw dey weewe aa Slam masa Gazlavay aa da hwaɗ a da vad ŋga volda ray aŋga ŋga məcey maja aləkwa na, daa ba. ²⁶ Da ta volda ray aŋga la dey weewe na, anja ŋgene, ta sərey banay la may dey weewe dəga ŋga mezley ŋga bəla. Ama ta wuzdərwa vaw aŋga la dey pal daa masa bəla fa da ndəvey keɗe. Ta volda ray aŋga la ŋga məcey amba a la mebərey ŋga ndəhay.

²⁷ Ndaw-magədaŋ na, a da məcey dey pal gway, fa dəba ha, Gazlavay a kar sariya. ²⁸ Kəriste may, ta volda ray aŋga la dey pal ŋga məcey kəne amba a la mebərey ŋga ndəhay ga da bəla. A da wuzwa vaw ŋga dey cew na, maja mebərey ŋga ndəhay saba, ama ŋga ləhdata ndəhay masa fa səkwmarā.

10

¹ Cek hay masa maaya ma da kam ŋgada fa mey na, kwakwas ŋga Mawiz na, fa wuzdandakwara maaya maaya daa ba. Ama a wuzndakwar na, cek anda meezed e gway. Ndəhay ma səpmara Gazlavay ta fa kwakwas a na, kwa fa da tərām maaya fa mey ŋga Gazlavay maja na, daa ba səlak. Kwakwas a, a wudɗey na, ndəhay a hərəm gənaŋ hay ŋgada Gazlavay fa mevey a, fa mevey a cəŋga. ² Da mehərey gənaŋ a wusa ŋga tərdata ndəhay maaya fa mey ŋga Gazlavay ŋga sərmataŋ na, anja ŋgene, ndəhay fa da wulkam da ray mebərey ata daa saba, asaya, fa da hərəm gənaŋ mekele a Gazlavay daa saba. ³ Ama sasəkar jak, ta fa mehərey gənaŋ na, ndəhay fa wulkam da ray mebərey ata fa mevey a fa mevey a, ⁴ maja mambaz ŋga gusaŋ ta ŋga kwakwaba na, a gwa a la mebərey da ray ndaw ba səlak.

⁵ Maja ŋgene, daa masa Kəriste ma da sawa a bəla na, taa guzlar la a Gazlavay, a ləvar:
«Ka fa wudɗey amba ndaw a hərka gənaŋ,
a vəlka cek na, daa ba,

ama ka ta vølya vaw nga ndaw-magødan la.

⁶ Mehørey gønaw ma fækmara da ray slam-meføkey cek, ta mehørey gønaw ngada kah amba ka mbækda mebørey na, a mbafaka ba.

Ka wufey na, ndøhay a namaka ray.

⁷ Anda kefe, ya ta løvka la: “Bay Gazlavay, ehe yah kefe, ya sawa a bøla na, nga key sløra masa kah ma wufey anda mawuzlalakaya da ray adaw daa ðerewel akah.”

⁸ Køriste aa guzlar teesed ngada Gazlavay na, a løvey: «Ka fa wufey amba ndaw a hørka gønaw, a vølka cek na, daa ba.

Ka faa sømey da ray gønaw masa ma hørmara ma fækmara da ray slam-meføkey cek na, daa ba.

Asaya, mehørey gønaw nga mbøkey mebørey nga ndaw na, a mbafaka ba may.»

Ta ngene he cøpa, kwakwas nga Mawiz a wufey na, si ndøhay a vølam cek a Gazlavay anda ngene cønga. ⁹ Fa døba ha, Køriste a løvey saya: «Ehe, yah kefe, ya sawa a bøla na, nga key sløra masa kah ma wufey.» Køriste aa guzley anda ngene na, a wufey nga løvey ta vavøsa mekey kwakwas ta gønaw anda masa zleezle sem. Ta', a bawa kwakwas mekele mawiya. ¹⁰ Yesu Køriste na, ta kar sløra la a Gazlavay anda Gazlavay a ma wufey. Ta vølda ray anga la dey pal nga møcey maja aløkwa. Anda kefe, ta tøndandakwar sem nga ndøhay manjar mebørey fa mey anga.

¹¹ Ndøhay ma ka kwakwas nga Gazlavay na, a kamara sløra ata mandaw mandaw ta melecey. Ata fa høram gønaw hay nga key kwakwas letek mandaw mandaw a Gazlavay. Ama mehørey gønaw ata ngene, a la mebørey da ray ndaw ba sølak. ¹² Ama Køriste na, ta vølda ray anga la nga møcey dey pal amba a mbækdatara mebørey nga ndøhay nga sørmataw. Fa døba ha, ta', a daw a njeý a har-zømay nga Gazlavay. ¹³ Fetede, aa manjakaya fa søkwa pas masa Gazlavay ma da pata masa-gøra anga hay asi salay anga.

¹⁴ Ta tøndata ndøhay sem maaya fa mey nga Gazlavay manjar mebørey nga sørmataw, maja aa ma vølda ray anga nga møcey. A vølda ray anga ha na, dey pal gway.

¹⁵ *Mesøfney nga Gazlavay may, ta wuzdandakwara cek aha la maaya maaya. Teesed na, aa guzley, a løvey:

¹⁶ «Bay Mahura a løvey:

“Ya da jøwey mey ta ata daa ðar hay a ngene.

*Mejøwey-mey a na, ya da ka

amba kwakwas adaw a njeý aa mevel ata,
asaya, ya da wuzlala aa lenjesl ata.”»

17 Fa dæba ha, aa guzley saya, a løyey:

«Ya fa da wulkey da ray mebørey ata
lenj da ray sløra ata maaya ba ngene na, daa saba.»

18 Maja ngene, da Gazlavay ta mbækda mebørey nga ndaw
sem na, mehørey gønaw nga mbøkey mebørey na, daa saba.

Mey da ray menjgøchey fa Bay Gazlavay ta mevel maaya

19 Mølma adaw hay, maja mambaz nga Yesu ma mbødwa
na, ya gwakwa nga mbøzey la aa *Slam masa Gazlavay
aa da hwad a. 20 Ta wurndakwar cøved mawiya la

masa ma da handandakwar aa heter mendøvey ba ta
fa zana menjgørey daa *Way nga Gazlavay heyey, anda
meløvey, ta fa vaw nga *Køriste masa ma møcey fa hwadam
mazlanjalakaya heyey. 21 Ndaw alækwa mahura da

ray ndøhay ma ka kwakwas daa Way nga Gazlavay na,
daha. Anja na, *bay-ray nga way a. 22 Anda keðe, si
ya ngøchakwa fa Gazlavay ta mevel maaya, ta metøbey
mey nga Gazlavay ta mevel pal, ta mevel manjar mebørey,
asaya, vaw alækwa may mapørkaya ta yam masa maaya.

23 Gazlavay ta løyey la, a da løhdandakwar. Gazlavay na,
a ka cek aha la anda aa ma løyey. Anda keðe, alækwa fa
løvkwa fa mey nga ndøhay tabiya, alækwa fa tøbkwa aa
mevel alækwa cek masa Gazlavay ma løyey a da ka heyey.

Mbækakwa mewulkey cew cew. 24 Alækwa cøpa si ya
jønkwaw vaw da wuzlah alækwa amba ya vølkwa gødanj da
wuzlah alækwa nga wufey vaw, asaya, nga key cek maaya.

25 Ya da mbækakwa nga daw aa *mecømey-ray nga ndøhay
nga Yesu anda ndøhay siya ma mbækdamara na, køne ba.
Ama si ya vølkwa gødanj da wuzlah alækwa ma føna ma
føna, maja pas masa Bay Mahura ma da sawa na, anja
gweegwe cay.

26 Alækwa taa sørkakwa la da ray mey masa fara fara.
Ama fa dæba ha, da ya kakwa mebørey tesuðe na, kwa
ya hørkwar gønaw na, cek mekele nga vøley a Gazlavay
nga mbøkey mebørey alækwa daha daw? Daa ba sølak.

27 Da køne na, kwa cek mekele nga key daa ba, si mesøkwey
sariya ta mandørzay daa dey, sariya masa Gazlavay ma da
ka ngaa zøðdata masa-gøra anja hay aa awaw menjem-
njem e.

10:16 10.16-17 Jer 31.33-34; Heb 8.10, 12 **10:19** 10.19 4.16; 9.8 **10:20** 10.20
zana: 9.3; Mt 27.51; cøved mawiya: 2.14-15; 9.14-15; Jan 14.6 **10:21** 10.21
3.6; 4.14 **10:22** 10.22 Ez 36.25; Ef 5.26 **10:23** 10.23 3.6 **10:24** 10.24 13.1
10:26 10.26 6.4-6 **10:27** 10.27 Iz 26.11

28 Kwa waawa ma rësa *kwakwas nga Mawiz masa ndøhay cew, da daa ba, ndøhay maakar ma kam sede da ray a la na, a da kødmara ndaw aha vagay, fa da sørfamar dey-ceceh daa ba. 29 Da anda ñgene na, ka wulkam na, kwara? Ndaw ma rësa Bøzey nga Gazlavay, ma pa mambaz nga Yesu nga cek nga tede, mambaz nga *Mejëwey-mey Mawiya masa ma përa mevel anga, asaya, ma cøda *Mesøfney nga Gazlavay ma wuzdandakwara maaya nga Gazlavay na, Gazlavay a da kada ndaw a na, kwara? A da sërda banay ta ndaw aha ma føna ñgene saya. 30 Fara fara, ya sèrkwa ndaw masa maa guzley, ma løyey: «Cek masa ata ma kamiwa maaya ba na, ya pøla la, ya da katar sariya.» Asaya, ndaw a, aa guzley, a løyey: «Bay Gazlavay a da katar sariya a ndøhay anga hay.»

31 Da sariya nga Gazlavay, ndaw masa anga daha ta dey nga sèrmataw, ta tødä ndaw la na, ndaw aha a zøley marava la.

32 Sørfadamara menjey akwar zleezle daa masa akwar ma tømbara nga njej daa mewedey nga Bay Gazlavay tølám. Fa døba ha nekødey, akwar ta sèram banay la ga, ama akwar ta bømbara banay a la. 33 Daa ñgene, ta cødmata ndøhay siya da wuzlah akwar la fa mey nga ndøhay ga, ta sèrdamata banay la. Ndøhay siya da wuzlah akwar ta døkmatar mevel la a ndøhay ma cødmata ha ñgene. 34 Ahaw, akwar ta sèram dey-ceceh la fa ndøhay masa ata ma køzlamata aa førsøne maja Yesu. Asaya, daa masa ndøhay fa vamakwara cek akwar hay na, akwar ta mbøkdamatara la ta meesømey nga tømbara, maja ka sèmara akwar ta cek hay maaya mekele ma føna, ma da njej nga sèrmataw. 35 Maja ñgene, pamara Gazlavay nga ndaw akwar fara fara cønga, ka da mbøkdamara ba. Da akwar fa kamara køne na, Gazlavay a pølkwara mawurbay akwar la ma føna. 36 Maaya na, ka bømbara banay cønga amba ka kam anda Gazlavay ma wufey, asaya, amba ka høtam cek masa Gazlavay ma løyey a da vøldakwara heyey.

37 Yaa guzley anda kedde na, maja
«menjey nekødey fedde, fara fara mendørey nekødey gway,
ndaw ma da sawa heyey na, a sawa la,
aa fa sawa, fa da zønwa vaw daa ba sølak.»

38 Gazlavay aa guzley, a løyey saya:
«Ndaw adaw maaya na, ara ndaw ma paya

nga ndaw anga fara fara.

10:28 10.28 Mew 19.15; 2Kwr 13.1 **10:29** 10.29 2.3; 5.8; 9.12; Mt 12.31

10:30 10.30 Mew 32.35, 36 **10:32** 10.32-34 6.10 **10:33** 10.33 1Kwr 4.9

10:34 10.34 11.26; 13.14 **10:35** 10.35-36 3.6; 6.11-12 **10:37** 10.37-38 Hab

Anda keḏe, a hōtey heter mendōvey ba la.
 Ama da ndaw a vōhey fa dōba na,
 ya fa daa sōmey da ray a daa ba.»

³⁹ Aləkwa na, səkway nga ndōhay masa ma vōham sem fa dōba amba aa zōḏam na, kōne ba, ama aləkwa na, ndōhay ma pamara Gazlavay nga ndaw ata fara fara. Anda keḏe, Gazlavay a lōhdandakwar la.

11

Mepey Gazlavay nga ndaw fara fara na, a wuḏey nga lōvey kwara?

¹ Mepey Gazlavay nga ndaw fara fara na, a wuḏey nga lōvey cek masa aləkwa ma səkwa kwa fa Gazlavay na, ya səkwa ya hōtkwa la fara fara. Kwa aləkwa ta hōtkwar ta dey aləkwa daa ba na, ya səkwa ara cek fara fara.

² Ara anda keḏe, ndōhay masa zleezle ma pamara Gazlavay nga ndaw ata fara fara. Ara maja ḡgene, Gazlavay maa hōmdata. ³ Aləkwa fa pakwa Gazlavay nga ndaw aləkwa fara fara. Ara maja ḡgene, ya səkwa Gazlavay a lōma slam da vad ta slam da hwayak ta fa mey aḡga meeguzley gway. Anda melōvey, cek hay masa aləkwa ma hōtatakwar ta dey aləkwa na, Gazlavay a katōrwa ta fa cek masa aləkwa ma hōtatakwar ta dey aləkwa ba.

⁴ Yaw, *Abel ta pa Gazlavay la nga ndaw aḡga fara fara. Anda keḏe, ta vōlar cek la a Gazlavay ta mevel pal ma fōna nga mōlmaha *Kayin. Maja ḡgene, Gazlavay ta tōba cek masa aḡga ma vōldara heyey la, a pa nga ndaw maaya fa mey aḡga. Kwa Abel e ta mōcey sem na, aa faa guzldakwar anda aa ta dey cōḡga, maja aa ma pa Gazlavay nga ndaw aḡga fara fara.

⁵ Henakw ta pa Gazlavay la nga ndaw aḡga fara fara. Da ray ḡgene, Gazlavay a la a vad a cakay a, kwa ta mōcey ta mōcey daa ba, kwa ndaw ma hōtar daa saba. Masa Gazlavay ta la Henakw a daa ba araḡ na, Henakw fa kar cek ma mbafar a Gazlavay, anda mawuzlalakaya daa ḏerewel nga Gazlavay. ⁶ Da ndaw ta pa Gazlavay nga ndaw aḡga fara fara daa ba na, ndaw aha fa da kar cek ma mbafar a Gazlavay daa ba. Kwa waawa ma wuḏey nga ḡḡōchey ḡgada fa Gazlavay nga ḏōrey dangay na, si a sōra Gazlavay na, daha, asaya, si a sōra Gazlavay fa katar maaya ḡgada ndōhay ma sōpmara.

⁷ Nøwe ta pa Gazlavay la nga ndaw anga fara fara. Maja ngene, ta pas masa Gazlavay ma wuzdara cek hay ma da kam ngada fa mey masa kwa ta hətatar ta dey anga daa ba aran na, Nøwe he ta jøkfar slømay la a Gazlavay cønga. Ta', aa cedey kwambiwal mahura anda way nga løhda ray anga ta ndøhay da way anga hay. Nøwe ma pa Gazlavay nga ndaw anga fara fara ngene na, a wuzdərwa ndøhay siya da bøla fa pamara Gazlavay nga ndaw ata fara fara daa ba. Anda kedfe, Gazlavay may, a pa Nøwe nga ndaw maaya fa mey anga.

⁸ *Abøraham ta pa Gazlavay la nga ndaw anga fara fara. Maja ngene, daa masa Gazlavay a ma zøla heyey na, ta jøkfar slømay la. Da ray ngene, ta', a daw aa hwayak masa Gazlavay ma løvar a da vøldara heyey. Slam masa anga ma daw a hwad a na, kwa ta søra fedfe na, daa ba. ⁹ Abøraham ta pa Gazlavay la nga ndaw anga fara fara, maja ngene ta', a daw a njeý daa hwayak masa Gazlavay ma løvar a da vøldara heyey, ama anga manjakaya anda ndaw-mølak. Anda kedfe, a njeý daa way-mekørcey. Ata *Izak ta *Jakwap may, Gazlavay a løvey a da vøldatara hwayak a anda aa ma løvey a da vøldara a Abøraham. Ata may, a njam daa way-mekørcey anda Abøraham a. ¹⁰ Abøraham na, fa sækwa berney masa salay a mapakaya maaya maaya. Ara Gazlavay ta ray anga ma pa kwakway nga berney a, asaya, ara anga ma løma berney a.

¹¹ Yaw, Abøraham ta pa Gazlavay la nga ndaw anga fara fara. Da ray ngene, kwa anga maraw, asaya, kwa ngwas anga Sara aa dørlyay na, ta key hwad la cønga. Abøraham a søra Gazlavay ma løvar a da vølar bøzey heyey na, a mbørzley ba. ¹² Ara anda kedfe, Abøraham, ndaw masa fa sækwey memøcey na, ta yawa bøza hay la, sækway anga ta key la ga anda wurzla hay da vad, a sløfam ba anda mawurbay da wayam.

¹³ Ndøhay a kedfe cøpa ta pamara Gazlavay la nga ndaw ata fara fara haa kasl fa memøcey ata. Ata ta høtam cek masa Gazlavay ma løvey a da vøldatara heyey na, daa ba. Ama a sørmara pas pal na, Gazlavay a vøldatara la anda aa ma løvey a. Da ray ngene, ata faa sømam da ray a, taa guzlam la, a løvam ata na, ata anda mølak hay da bøla kedfe, fa da njam daa ba, kwa hwaray ta katar nga løvey køne na, daa ba. ¹⁴ Ndøhay a maa guzlam anda ngene na, a wudfey nga løvey ata fa søpam hwayak ngada ata ray ata. ¹⁵ Ta

11:7 11.7 MC 6.13-22; Rm 4.3; 1Pi 3.20 **11:8** 11.8 MC 12.1-2 **11:9** 11.9 MC 35.12, 27 **11:10** 11.10 13.14 **11:11** 11.11 MC 17.19; 18.11-14; 21.2; Rm 4.19-20 **11:12** 11.12 MC 15.5 **11:13** 11.13 11.9; 13.14; MC 23.4; 47.9; Ps 39.13

wulkam da ray hwayak masa ata ma mbøkdamørwa na, daa ba. Da ta wulkam la na, anja a vøham la aa hwayak a saya. ¹⁶ Fara fara a sèpam na, hwayak masa maaya, anda meløvey slam da gazlavay da vad. Ara maja ñgene, Gazlavay ma løyey, anğa Gazlavay ata, kwa hwaray fa da kar ñga løyey kəne na, daa ba. Nəka, Gazlavay ta diytar berney maaya la, ba diya?

¹⁷⁻¹⁸ Gazlavay aa guzlar a Abəraham, a ləvar: «Ara ta fa bəza hay ñga bəz akah Izak, sləmay akah ma da zəley.» Fa dəba ha, Gazlavay a jada Abəraham a ñga völdara bəzey anğa mendulen Izak ñga hərey. Abəraham ta pa Gazlavay la ñga ndaw anğa fara fara, maja ñgene, ta', a la bəzey a, a daw ñga hərəra ñgada Gazlavay. ¹⁹ Abəraham a səra Gazlavay na, a gwa ñga sləkɔadərwa ndaw daa meməcey. Anda kedə, a hətər bəzey anğa Izak na, ara anda a sləkɔawa daa meməcey.

²⁰ Izak ta pa Gazlavay la ñga ndaw anğa fara fara, maja ñgene, ta', a pəstar mey ñgada ata Jakwap ta Ezayu da ray cek ma da kam ñgada fa mey. ²¹ Jakwap may, ta pa Gazlavay la ñga ndaw anğa fara fara. Da ray ñgene, daa masa Jakwap a fa da məcey na, ta pəstar mey la ñgada bəza hay ñga *Jawzef, fa dəba ha, a dəra dangay fa zlanday anğa, a həlma Gazlavay.

²² Jawzef ta pa Gazlavay la ñga ndaw anğa fara fara. Maja ñgene, daa masa anğa fa da məcey na, taa guzltar la a ndəhay *Israyel hay, a ləvtar, cay na, a bam la daa hwayak ñga *Ejip. Asaya, taa guzltar la da ray cek masa ata ma da kam ta tetesl anğa.

²³ Ata papan ñga *Mawiz ta mamaha ta pamara Gazlavay la ñga ndaw ata fara fara. Anda kedə, daa masa ata ma yamərwa Mawiz a na, ta bədamara la ta bəy kiya maakar da way. A nəkmara bəzey a na, a mbey ara mey ba. Ata na, kwa ta zluram ta mey ñga bay Ejip daa ba. ²⁴ Masa Mawiz a ta gəley cay na, a wudəy a zəlmara bəzey ñga dam ñga bay *Farawan, bay Ejip ba. A wudəy ñga zəley kəne ba na, maja anğa fa pa Gazlavay ñga ndaw anğa fara fara may. ²⁵ A wudəy ñga sərey banay ta ndəhay ñga Gazlavay da ray aa ma da njeý nekəɔey daa meesəmey daa mekey mebərey. ²⁶ A wudəy na, ndəhay a rəsmara maja *Kəriste, da ray anğa ma da hətəy zleley ga da Ejip ñgene. A wudəy

11:16 11.16 13.14; Mab 3.6; Mt 22.32 **11:17-18** 11.17-18 MC 21.12; 22.1-14; Jak 2.21 **11:19** 11.19 Rm 4.17 **11:20** 11.20 MC 27.27-29, 39-40 **11:21** 11.21 MC 47.31-48.20 **11:22** 11.22 MC 50.24-25; Mab 13.19 **11:23** 11.23 Mab 1.22; 2.2 **11:24** 11.24 Mab 2.10-12

køne na, maja anğa fa səkwa mawurbay nğa sləra anğa masa Gazlavay ma da völdara nğada fa mey.

²⁷ Mawiz ta pa Gazlavay la nğa ndaw anğa fara fara, maja nğene, ta bawa sem daa hwayak nğa Ejip. Kwa mevel nğa bay da Ejip e fa cey na, ta nğene he cəpa, Mawiz ta zlyurey daa ba səlak. Anğa malacakaya deŋ e anda ta hətər Gazlavay la, Gazlavay masa kwa ndaw ta hətər ta dey anğa daa ba səlak. ²⁸ Mawiz ta pa Gazlavay la nğa ndaw anğa fara fara, maja nğene, a zlar nğa key gwagway mezəley «*Pak». A ləvtar a ndəhay Israyel hay nğa wucam mambaz nğa gənwaw fa mey-slam ata hay amba maslan nğa Gazlavay masa ma kədtə ndəhay vagay a sawa a kədtə bəz ata hay maa-mey-ndaw saba.

²⁹ Israyel hay ta pamara Gazlavay la nğa ndaw ata fara fara. Ara maja nğene, daa masa ata ma zləngdamara bəlay magaza na, bəlay a, a wunkey cew, daa cəved' ata na, yam da hwađ a daa ba. Ama ndəhay Ejip hay ma səpmatar wurzay ma wuđam nğa zləngam may na, ta', yam a, a cəmey aa slam a, a babətata.

³⁰ Asaya, Israyel hay ta pamara Gazlavay la nğa ndaw ata fara fara. Ara maja nğene, ata ma zlərmara mahwal nğa berney nğa Jerikwaw đar maasala, ta', mahwal a, a bəzley.

³¹ *Rahap nğwas-barlaw daha, ta pa Gazlavay la nğa ndaw anğa fara fara may. Maja nğene, anğa ma təbtə ndəhay meslərey masa ma slərdamatərwa nğa sengeley berney a. Ara maja nğene, Gazlavay ta kəđə vagay anda aa ma kədtə masa-gəra anğa hay na, daa ba.

³² Yaw, ya daa guzley da ray *Zedeyanw, *Barak, *Sam-sanw, *Jefte, *Davit, *Samiyel leŋ ndəhay ma təla mey nğa Gazlavay na, kwara sura? Ya fa da hətəy har nğaa guzley da ray ata pal pal na, daa ba. ³³ Ata may, ta pamara Gazlavay la nğa ndaw ata fara fara, maja nğene, ta fənmata hwayak hay mekele mekele la ta gəđan daa vəram. Ta kam cek la ta cəved' e anda Gazlavay ma wuđey. Ta hətəm cek masa Gazlavay ma ləvey a da vəlđatara heyey la. Ta gərcamatara mey nğa mabar hay la maja a da pəwmata. ³⁴ Ta məcmara awaw masa ma gəđey ta gəđan la. Ta ləham la daa masa fa da kəđmata ta dəlaw. Ata na, ta təram la nğa masa-bəle hay, ama Gazlavay ta vəltar gəđan la. Ta jaram la daa vəram, ta fənmata sewje hay ma samawa daa hwayak hay

11:26 11.26 12.2; 13.13 **11:27** 11.27 Mab 2.15; 12.41 **11:28** 11.28 Mab 12.1-14 **11:29** 11.29 Mab 14.21-29 **11:30** 11.30 Jes 6.12-21 **11:31** 11.31 Jes 2.11-12; 6.21-25; Mt 1.5; Jak 2.25 **11:32** 11.32 NMH 6.11-8.32; 4.6-5.31; 13.2-16.31; 11.1-12.7; 1Sam 16.1haa 1Bay 2.11; 1Sam 1.1-25.1 **11:33** 11.33 NMH 14.6-7; 1Sam 17.34-36; Dan 6.1-27

mekele mekele sem ta gədan. ³⁵ Nğusay may, ta pamara Gazlavay la nga ndaw ata fara fara. Ara maja ngene, ata ma hətmatar ndəhay maməctakaya fa sləkdfamawa daa meməcey.

Yaw, ndəhay siya ta səram banay la ga ta mekədey haa a məcam. Ama ta wudam nga ləhey daa banay a na, daa ba. A wudam nga məcey daa banay a amba Gazlavay a sləkdfadatərwa daa meməcey, a vəltar menjey masa ma fəna da bəla kefe. ³⁶ Ndəhay mekele na, ta bəsmara mecədey la, ta bəsmara laway la. Asaya, ta jəwmata la ta calalaw, ta gərcamata la aa fərsəne. Ama ta ngene he cəpa ta bəsmara la. ³⁷ Siya hay da wuzlah ata na, taa zakamata la ta aŋgwa vagay, siya hay, ta dəslmata la cew cew. Siya hay, ta nğəmamata la ta dəlaw vagay. Ndəhay siya ta pəkam la saw kəne, ata masa-viya hay, a kəzlam fa vaw na, zana nga ambal nga dəkwa daa ba nga təbaŋ, ta səram banay la ga. ³⁸ Ndəhay maaya ngene na, slam da bəla kefe təde nga njeŋy ngada ata ba. Fa pəkam saw da wuzlah-ley, da daa ba, da aŋgwa, a nam daa bədam hay, da daa ba, daa vəgeɗ hay anda ndəhay masa ta bəlmata sem. ³⁹ Ndəhay a kefe tabiya ta pamara Gazlavay la nga ndaw ata fara fara. Ara maja ngene, Gazlavay ma pata nga ndəhay maaya fa mey aŋga. Ama ta hətam cek maaya masa Gazlavay ma ləvey a da vəldatara a ndəhay aŋga hay heyey na, daa ba. ⁴⁰ Fara fara, Gazlavay ta bəy cek la maaya kalah nğada aləkwa, amba ta pas masa ta ndəvda sləra aŋga cay na, a vəldandakwara cek aha nğada aləkwa ta ata bama da mey pal.

12

¹ Ndəhay a tabiya ma pamara Gazlavay nga ndaw ata fara fara ngene, fa zlərmandakwar ray nga vəlmandakwar gədan. Ata fa wuzdamandakwara, ya da pakwa Gazlavay nga ndaw aləkwa fara fara na, ta fa banay masa ata ma bəsmara ngene. Maja ngene, hazakadakwa cek hay ma təkndakwar nga daw fa mey fa mey cəpa. Hazakakwa ma fəna na, mebərey ma təkndakwar nga daw fa mey fa mey daa mey nga Gazlavay. Jarakwa, nakwa fa mey fa mey haa kasl mendəvey a. ² Nəkakwa dey na, si fa Yesu. Ya da mbəkdwakwa ba, maja ara aŋga ma pandakwara cəved nga ləhey, asaya, ara aŋga ma da jəɗndakwar haa mendəvey a. Ta təba la nga kəɗmara fa hwadam mazlaŋgalakaya, kwa hwaray ta kar nga məcey daa ba. A təba maja a wulkey a

da hōtey meesōmey masa Gazlavay ma bādara ŋga veldara fa dōba ha. Wure keḏe, aŋga manjakaya ta har-zōmay ŋga Gazlavay ma wey da ray cek hay cōpa. ³ Ahaw, wulkam da ray Yesu a. Ndōhay malamba hay ta rōsmara la, ta sōrdamara banay la, ama ta bōsa la cōpa. Anda keḏe, ka da gōram ba, ka da mōcmara vaw ba.

Mey da ray mekōtey ŋga Gazlavay

⁴ Akwar fa kōḏam vaw amba ka kam mebōrey ba, ama kwa ndaw pal da wuzlah akwar ta mōcey daa mekōḏey-vaw a daa ba araŋ. ⁵ Akwar fa sōrfadamara mey masa Gazlavay ma dōkakwar mevel ta aŋga heyey, ba diya? Gazlavay aa guzlkwar anda aa maa guzltar ŋgada bōz aŋga hay, a lōvey: «Bōz aḏaw, da yah, Bay Gazlavay,

ya fa sōrdaka banay ŋga kōtka na, tōba mekōtey a.

Da ya fa mbōḏka ray na, ka da cey mevel ba.

⁶ Maja yah, Bay Gazlavay, ya kōtey na, ndaw masa yah ma wuḏa.

Ya sōrdey banay na,

ta ndōhay cōpa masa yah ma pata ŋga bōz aḏaw hay.»

⁷ Gazlavay a sōrdakwar banay na, a key a kōtkwar. Anda keḏe, Gazlavay a pakwar na, anda bōz aŋga hay. Bōzey masa papaha a kōta ba na, daha daw? ⁸ Gazlavay na, fa kōtata bōz aŋga hay cōpa. Anda keḏe, da aa fa kōtkwar daa ba na, ŋgene akwar bōz aŋga hay fara fara ba, akwar bōza hay manjar papaŋ.

⁹ Yaw, papa alōkwa hay da bōla na, fa kōtmandakwar, anda keḏe, alōkwa fa namatakwar ray. Kaa wara ya nakwar ray a papa alōkwa Bay Gazlavay ma fōna ba na, kwara? Da alōkwa fa nakwar ray na, ya da hōtkwa heter mendōvey ba. ¹⁰ Papa alōkwa hay masa da bōla keḏe a kōtmandakwar ŋga menjey nekōḏey gway anda mevel ata ma wuḏey. Ama papa alōkwa masa da vad na, a kōtndakwar ŋga ḏiyndakwar amba ya tōrkwa ndōhay aŋga hay maaya anda aŋga ŋga sōrmataw. ¹¹ Daa masa Gazlavay fa kōtndakwar na, a mbafandakwar ba, a candakwar mevel. Ama, ndōhay ma tōbmara mekōtey a na, a hōtam menjey maaya la ta zazay fa dōba ha.

Ndōhay ŋga Gazlavay a da njam na, kwara?

¹² Anda keḏe, ka da mōcmara vaw ba, kam gōdaŋ ŋga daw fa mey fa mey. ¹³ Maaya na, ka sōpmara cōved ŋga

Gazlavay dər e amba ndəhay siya da wuzlah akwar masa-bøle hay a mbəkdamara mey nga Gazlavay ba, a səpmara Gazlavay maaya maaya.

¹⁴ Səpam nga njeý ta zazay ta ndəhay tabiya, kam gədan amba ka kam cek ma mbafar a Gazlavay, da daa ba na, kwa ndaw fa da hətər Gazlavay ta dey anğa daa ba. ¹⁵ Wam vaw, kwa waawa da wuzlah akwar a da mbədar dəba a Gazlavay masa fa wudndakwar kalah keđe ba. Asaya, wam vaw amba kwa waawa da wuzlah akwar a tərey anda slaslalay nga wudez masa meedəwek e * ba, da daa ba na, a da pey har, a da nəsta ndəhay siya ta đedəwek anğa ha. ¹⁶ Wam vaw, kwa waawa da wuzlah akwar a da key cek malamba ba, a da rəsa cek maaya nga Gazlavay anda Ezayu ba. Ezayu a na, ta ləvar la a məlmaha mecəhe nga key mahura da ray a amba a vəlar cek mezəmey gway.

¹⁷ Ka səpmara fa dəba ha, Ezayu ta wudfey la amba papaha a pəsar mey cəngə, haa a səpa mepəsey-mey a ta matəway daa dey. Ama papaha ta pəsar mey daa saba, maja Ezayu a gwa nga mbədda cek maaya ba masa anğa ma ka heyey saba.

¹⁸ Səpmara, daa masa *Israyel hay ata da wuzlah-ley na, ata ta ngəcham la a cakay anğwa nga Sinay, cek masa ndaw ma gwa nga gəsfar. Ama akwar na, ka ta ngəcham a cakay cek masa ndaw ma gwa nga gəsfar anda Israyel hay zleezle na, daa ba. Daa ray nga anğwa ha na, awaw fa gədey njem! njem! da ray a, ləvanj bək-bək asaya, bərgadanj fa key ta gədanj da ray a. ¹⁹ Asaya, daa anğwa ha na, taalam fa cənwa, đay fa cənwa. Israyel hay a ma cəndamara na, a təwam, a wudam amba Gazlavay aa guzltar saba, ²⁰ maja mey masa ata ma cəndamara na, a fəntar gədanj. Gazlavay aa guzltar, a ləvtar: «Kwa ndaw, kwa cek nga ley ma gəsfar fa anğwa ha na, hazakamara ta anğwa haa a məcey.»

²¹ Cek masa ata ma hətmar a na, ta zluradata sem kalah. Kwa *Mawiz may, aa guzley, a ləvey: «Ya faa wesey maja mandərzay fa kaya.»

²² Ama akwar na, ka ta ngəcham la aa anğwa nga *Siyanjw, aa berney nga Gazlavay, Gazlavay ndaw masa anğa daha ta dey nga səmataw. Berney a na, ara *Jeruzelem masa da gazlavay da vad. Fetede maslanj

12:13 12.13 MM 4.26 **12:14** 12.14 12.11; Mk 12.30-31; Ps 34.15; 1Kwr 7.15

* **12:15** 12.15 slaslalay nga wudez masa meedəwek e: Mey a keđe a patar lenjesl a ndəhay da ray mesəpey kuley hay. (Nəka Mew 29.17.) Ndəhay siya hay a wulkam mey a keđe a wudfey nga ləvey mepey mey aa mevel. **12:15**

12.15 Mew 29.17; Gal 1.6 **12:16** 12.16 MC 25.29-34 **12:17** 12.17 MC 27.30-40

12:18 12.18-19 Mab 19.16-22; 20.18-21 **12:20** 12.20 Mab 19.12-13

hay nga Gazlavay makustakaya ga, a sløfam ba, fa kam gwagway. ²³ Asaya, akwar ta ngøcham la a cakay bøza hay nga Gazlavay masa maa-mey-ndaw † makustakaya fetede may. Bøza hay a na, ara ndøhay masa Gazlavay ma wuzlalatarata mezøley ata sem aa ðerewel anga. Ata fa kam gwagway da vad may. Akwar ta ngøcham la a cakay Gazlavay, Gazlavay masa ma katar sariya a ndøhay da bøla tabiya. Akwar ta ngøcham la a cakay ndøhay masa ma kam sløra ta cøved e ma tøram maaya kalah fa mey nga Gazlavay. ²⁴ Akwar ta ngøcham la a cakay Yesu, ndaw masa ma mbøððerwa mambaz anga amba ya tøkwa ndøhay maaya fa mey nga Gazlavay. Yesu a na, ara ndaw ma handørwa *Mejøwey-mey Mawiya masa Gazlavay ma jøwa ta aløkwa. Mambaz masa anga ma mbøððerwa na, a wuzwa cek maaya ma føna cek masa mambaz nga *Abel ‡ ma wuzðerwa.

²⁵ Anda keðe, wam vaw, jøkfamar slømay a ndaw masa maa guzlkwat, ka da mbøðmar døba ba. Zleezle na, ndøhay ta jøkfamar slømay a ndaw ma wuzdatara mey nga Gazlavay da bøla keðe daa ba. Ara maja ngenne, Gazlavay ma sørdara banay ta ndøhay a. Aløkwa masa fa cøndakwa ðay nga Yesu, ndaw maa guzlndakwar ta da vad keðe, da ya jøkfakwar slømay ba na, kaa ya da løkwa daa banay a kwara? ²⁶ Zleezle na, ðay nga Gazlavay ta cønwa la, hwiyak ta wusey la. Ama wure keðe, Gazlavay aa guzley da ray cek masa aa ma da ka, a løvey: «Ya wusa hwiyak la dey pal saya. Ya da wusey na, hwiyak daada ba, ama slam da gazlavay da vad may.» ²⁷ Mey masa ma løvey «dey pal saya» a wuzwa cek hay tabiya masa Gazlavay ma katørwa na, a wusam la. Asaya, cek hay a, aa zøðam la. A ka køne amba cek hay masa ma wusam ba na, aa zøðam ba, a njam køne.

²⁸ Anda keðe, kakwar suse a Gazlavay maja aa ma vøldakwar berney masa ma pølhey ba, slam masa Gazlavay fa wey da ray ndøhay anga hay nga sørmataw. Kakwar cek masa ma mbafar, nakwar ray. ²⁹ Sørmara, Gazlavay masa aløkwa ma hølmakwa na, anga anda awaw

12:22 12.22 13.14; Gal 4.26; CWJ 5.11; 21.2 † **12:23** 12.23 bøza hay nga Gazlavay masa maa-mey-ndaw: Ara ndøhay tabiya ma tøba mey nga Yesu manjatakaya da cakay Gazlavay. **12:23** 12.23 Lk 10.20 ‡ **12:24** 12.24 Mambaz nga Yesu a føna nga Abel na, kwara? Ndøhay siya a løvam mambaz nga Yesu na, a wuzwa dey-ceceh ta mewuðey-vaw nga Gazlavay, ama mambaz nga Abel na, a wuzwa Abel ma wuðey nga køðey ndøhay malamba hay. Ndøhay siya a løvam mambaz nga Yesu a føna mebørey ta gøðan. **12:24** 12.24 8.6; 9.12; Abel: MC 4.10. **12:25** 12.25 6.4-6; 8.1; Mab 20.22 **12:26** 12.26 Mab 19.18; Hag 2.6, 21 **12:28** 12.28 13.14

maa wurey cek.

13

Mey da ray menjey maaya nga ndohay nga Gazlavay

¹ Akwar ndohay nga Gazlavay, wufam vaw da wuzlah akwar cɛnga anda akwar mɛlman hay. ² Anda kedɛ, sɛrfadamara nga tɛbey mɛlak hay a way akwar hay ta meesɛmey. Ndohay mekele ta tɛbam mɛlak hay la kɛne, anja a tɛbam na, maslan hay nga Gazlavay, kwa ta sɛrmara daa ba. ³ Wulkam ta ndohay daa fɛrsɛne, anda akwar bama ta ata daa fɛrsɛne he may. Asaya, wulkam ta ndohay masa fa sɛrdamata banay, anda akwar may, fa sɛram banay bama ta ata.

⁴ Kwa waawa nga jɛkey slɛmay fa mey masa Gazlavay ma lɛvey da ray meley ɛgwɛs. Anda kedɛ, kwa waawa a da ley vaw saw da palah ba. Sɛrmara, Gazlavay a katar sariya la ɛgada ndohay ma lam vaw saw da palah ta ɛgada ndohay ma kam cek hay malamba.

⁵ Kwa waawa a da wulkey kalah da ray dala ba. Sasɛmam ta cek masa da har akwar gway, maja Gazlavay ta ray anɛa taa guzley la, a lɛvey: «Ya fa da mbɛɔka dɛba daa ba. Kwa ya fa da mbɛkdaka daa ba.» ⁶ Anda kedɛ, kwa waawa da wuzlah alɛkwa a gwa nga lɛvey ta mandɛrzay daa dey daa ba:

«Bay Gazlavay na, ara ndaw ma jɛnya.

Maja ɛgene, ya fa da zlurey kwa ta meeme daa ba,

maja ndaw ma gwa nga kaya cek maaya ba na, daa ba.»

⁷ Wulkam ta *bay-ray akwar hay daa *mecɛmey-ray nga ndohay nga Yesu masa ma wuzdamakwara mey nga Gazlavay zleezle. Yaw, wulkam da ray menjey ata, asaya, da ray memɛcey ata. Pamara Gazlavay nga ndaw akwar fara fara anda ata.

⁸ Yesu *Kɛriste na, a mbɛɔey ba dɛga zleezle haa wure kedɛ, anɛa daha nga sɛrmataw. ⁹ Wam vaw maja ndohay faa sɛrkadamata ndohay ta meesɛrkey mekele mekele masa wal ta meesɛrkey masa fara fara nga Gazlavay. Ndohay a ɛgene, a da zlanɛadadamakwar ta meesɛrkey ata da ray mesɛpey kwakwas da ray cek mezɛmey. Ama kwakwas da ray cek mezɛmey a na, kwa ta jɛnta ndohay masa ma sɛpmara kwakwas a na, daa ba sɛlak. Anɛa maaya amba ndohay a hɛtam gɛdan daa cɛved nga Gazlavay ta

12:29 12.29 Mew 4.24 **13:1** 13.1 6.10; 10.24; 13.16; 1Pi 1.22 **13:2** 13.2 MC 18.1-8; 19.1-3; Jɛw 31.32; Rm 12.13; 1Tm 3.2; 5.10; 1Pi 4.9; 3Jn 8 **13:3** 13.3 10.34; Mt 25.36 **13:4** 13.4 1Kwr 7.2-4; 1Tes 4.3-8 **13:5** 13.5 Mew 31.6, 8; Fɛl 4.11-12; 1Tm 6.7-10 **13:6** 13.6 Ps 118.6 **13:7** 13.7 6.12; 1Kwr 4.16

fa maaya nga Gazlavay, da ray mesøpey kwakwas da ray cek mezømey.

¹⁰ Aløkwa na, ta slam aløkwa meføkey cek * ngada Gazlavay, ama ndøhay ma ka kwakwas nga Gazlavay ata ta cøved nga zømey cek da ray slam aha daa ba. ¹¹ Ata na, a høram gønaw. *Ndaw mahura da ray ndøhay ma ka kwakwas nga Gazlavay na, a mbøzey ta mambaz a aa *Slam masa Gazlavay aa da hwad a nga vøldara a Gazlavay nga mbøkey mebørey nga ndøhay. Aslaw a na, a badamara ta cakay, aa wurmara fetede. ¹² Yesu na, køne may, a da kødmara na, ta', a badamara la daa berney nga *Jeruzelem ta cakay. A sørey banay anda ngene na, amba a tørdana ndøhay nga ndøhay maaya manjar mebørey ta fa mambaz anga.

¹³ Da anda kefe na, ya da søpkwa kwakwas nga *Jøwif hay saba. Bakwa la ta cakay, nakwa fa Yesu amba a pamandakwar hwaray bama ta anga. ¹⁴ Da bøla kefe na, aløkwa manjatakaya daa berney masa ma da njeý nga sørmataw ba, ama ya søpkwa ta søpey na, berney masa Gazlavay ma da løma ngada fa mey. ¹⁵ Anda kefe, kakwa suse a Gazlavay mandaw mandaw ta mezøley nga Yesu. Mekey suse a ngene na, ara anda cek mevøley ngada Gazlavay ma bawa da mey aløkwa nga hølma. ¹⁶ Maaya na, ka kam cek masa maaya da wuzlah akwar, asaya, ka jønám vaw. Mekey cek anda ngene na, ara anda mevøley cek masa ma mbafar a Gazlavay.

¹⁷ Maaya na, ka namatar ray a bay-ray akwar hay, ka cønmatar mey. Ara ata ma nøkfamakwar dey daa menjey akwar, maja Gazlavay a daa cøfdana da ray sløra ata masa ata ma kamara ngada akwar. Anda kefe, da akwar fa namatar ray na, a kamara sløra ata la ta meesømey, da daa ba na, har a da røwtar. Da har ta røwtar sem na, ngene, fa da jønkwar daa ba sølak.

¹⁸ Ambahw, døram dangay a Gazlavay maja ala. Ya sørmara fara fara, mevel ala maaya, ya wudam nga key cek ta cøved e mandaw mandaw. ¹⁹ Yaa cøfdakwar kalah na, nga dørey dangay a Gazlavay amba a vølya cøved nga vøhey fa akwar wure kefe.

13:9 13.9 Rm 14.2; Kwa 2.20-22; 1Tm 4.3 * **13:10** 13.10 slam aløkwa meføkey cek: Fede a wudøy ngaa guzley da ray Slam masa Gazlavay aa da hwad a da vad. Ara slam masa Køriste ma mbøzey a hwad a. **13:11** 13.11 9.7; Lev 16.27 **13:12** 13.12-13 11.26; Mt 27.31-33 **13:14** 13.14 11.9-10, 13, 16; 12.22, 28; Føl 3.20; 2Kwr 5.6; 1Pi 2.11; CWJ 21.2 **13:15** 13.15 Ef 5.19-20; Ps 50.14, 23 **13:16** 13.16 Gal 6.10; Føl 4.18 **13:17** 13.17 Ez 3.17; SNM 20.28-31; 1Kwr 16.16 **13:18** 13.18 10.22; Rm 15.30; 2Kwr 1.12; SNM 24.16

Mepəsey-mey

²⁰ Ara Gazlavay ma vəldakwar zazay. Ara anğa ma sləkfadərwa Bay aləkwa mahura Yesu da wuzlah ndəhay maməctakaya. Yesu a na, ta tərey la anda mecəkwer aləkwa mahura ma nəkfandakwar dey, maja anğa ma məcey maja aləkwa. Ta fa mambaz anğa ma mbədwa na, Gazlavay ta jəwey mey la ta aləkwa nğa sərmataw. ²¹ Anja Gazlavay nğa vəkwar gədan amba ka kam cek tabiya maaya anda aa ma wufey. Anja nğa ka sləra anğa ta aləkwa ta gədan nğa Yesu *Kəriste, amba ya tərkwə ndəhay maaya fa mey anğa. Anja ndəhay nğa həlmamara nğa sərmataw. *Amen.

Mey nğa madagway-dakw

²² Məlma adaw hay, ya fa kakwar ambahw, təbmara mey adaw masa ma da vəkwar gədan daa leeter kefe ta meesəmey. Leeter kefe na, aa zazam daa ba. ²³ Yaw, ya wufey nğa wuzdakwara, məlma aləkwa Timawte na, ta bawa cay daa fərsəne. Da ta wuswa la fiyaw fedə na, ya da diyam cew e fa akwar. ²⁴ Camatar har a *bay-ray akwar hay ta a ndəhay nğa Yesu fetede tabiya may. Məlma aləkwa hay daa *mecəmey-ray nğa ndəhay nğa Yesu daa hwayak nğa Itali a camakwar har may. ²⁵ Anja Gazlavay nğa pəskwar mey, akwar tabiya ndav.

13:20 13.20 zazay: 12.14; Rm 5.1; 2Kwr 13.11; mejəwey-mey: 8.6; mambaz: 9.12 **13:21** 13.21 Ef 2.10; Fəl 2.12-13 **13:23** 13.23 Timawte: 1Kwr 4.17 **13:25** 13.25 Gal 6.18

**Leeter masa
Jak
ma wuzlala
Mey da ray
Leeter masa Jak ma wuzlala**

Ma wuzlala leeter keɗe na, ara Jak, «ndaw ma ka slɛra nga Gazlavay lenj nga Bay Mahura Yesu Kɛriste.» (1.1) Ndɛhay ga a wulkam Jak a ara mɛlmanj nga Yesu (Mt 13.55). Ara ndaw pal dasi bay-ray hay daa Egɛliz da Jeruzelem (Gal 2.9; SNM 15.13-21). Ta vɛlda ray anjga la nga wuzey mey nga Gazlavay ngada Jɛwif hay fetede.

Jak a wuzlala leeter keɗe ngada ndɛhay nga Gazlavay daa sɛkway hay kuraw a ray a cew maakwacatakaya ray da bɛla tabiya. (1.1; SNM 8.1-3; 11.19). Ara maja ngenɛ, ndɛhay ma lɛvam a wuzlala leeter e na, ngada Jɛwif hay gway. Ndɛhay siya a wulkam Jak a wuzlala na, ngada Jɛwif hay daada ba, ama ngada ndɛhay nga Yesu tabiya (2.1). Leeter e na, faa sɛrkadata ndɛhay, asaya, fa vɛltar gɛdanj amba a kam cek anda mey nga Gazlavay ma lɛvey. Jak a wudɛy ndɛhay a wuzdamɛrwa ata ndɛhay nga Yesu na, ta fa slɛra masa ata ma kamara, ba na, ta fa mey masa ata ma tɛbmara daada ba.

Daa leeter keɗe na, mey hay mahura maakar daha:

Da ndaw a lɛvey anjga ndaw nga Yesu na, si a njeɣ anda Yesu (fasɛlawal 1, 2, 4)

Meweley ndaw ta weley na, ara cek maaya ba (2.1-13; 5.1-6)

Ndaw nga Yesu na, si a wey vaw fa mey masa anjga maa guzlda (3.1-12; 4.11-12)

Daa leeter e keɗe na, mey mekele mekele daha nga vɛley gɛdanj a ndɛhay:

Mɛbɛsey banay ta meesɛmey (1.2)

Mewey vaw fa meeguzley saw (3.1-12)

Vɛram ta mɛtɛrey-vaw da wuzlah ndɛhay a sawa na, dama? (4.1-4)

Mey da ray mɛdɛrey-danjay (5.13-15)

Mecey-har

¹ Yah, *Jak, ndaw ma ka slɛra nga *Gazlavay lenj nga Bay Mahura *Yesu *Kɛriste, ya fa cakwar har, akwar

ndəhay n̄ga Gazlavay daa səkway hay kuraw a ray a cew maakwacatakaya ray da bəla tabiya.

Mey da ray meesəmey daa banay

² Məlma adaw hay, da banay hay mekele mekele a hətfakwar na, sasəmam ga cənga, ³ maja ka səmara na, Gazlavay a wufey n̄ga jadakwar ta fa banay hay a, da akwar fa təbmara mey an̄ga fara fara kwa. Anda kefe, ka da hətam gədan̄ ma fəna n̄ga n̄jey daa cəved̄ n̄ga Gazlavay. ⁴ Bəsmara banay a haa aa mēndəvey a, amba ka təram ndəhay masa maaya kalah, manjar mebərey, ndəhay n̄ga Gazlavay fara fara.

Mey da ray medərey-dan̄gay

⁵ Da ndaw da wuzlah akwar a səra cek maaya masa aa ma da ka ba na, n̄gaa cəfda Gazlavay, amba a wuzdara cek aha, maja Gazlavay a fa vəley ləngesl maaya mandaw mandaw a kwa waawa maa cəfda. N̄gada ndaw maa cəfdafar ləngesl na, a mbədar ray ba. ⁶ Ama si ndaw a, aa cəfda ta mevel pal, si a səra daa mevel an̄ga, fara fara Gazlavay a vəldara cek aha la. Da ndaw a, aa ta mewulkey cew cew na, an̄ga anda yam daa bəlay masa memed̄ ma cawasla saw kəne. ⁷ A da wulkey daa ray an̄ga amba a hətey cek da har Bay Gazlavay ba, ⁸ maja aa ta mewulkey cew cew daa cek hay tabiya masa an̄ga ma ka, a gwa n̄ga n̄jey daa cəved̄ pal ba.

Ndaw masa-zleley ta ndaw masa-viya ata letek fa mey n̄ga Gazlavay

⁹ An̄ja məlma aləkwa hay masa-viya hay daa *mēcəmey-ray n̄ga ndəhay n̄ga Yesu n̄gaa səmam maja Gazlavay a tərdata la n̄ga ndəhay mahura hay fa mey an̄ga da vad. ¹⁰ Asaya, an̄ja ndaw n̄ga Yesu masa-zleley, kwa Gazlavay ta tərda sem n̄ga mecəhe na, n̄gaa səmey cənga. A səra a da məcey * anda meefekwey masa ma da bətey fiyaw fiyaw. ¹¹ Da pas fa tey na, a bəta meefekwey a, a kəzley a hwayak, membey an̄ga daa saba, ta nəsey sem. Yaw, ndaw masa-zleley may, a da ndəvey dey pal kəne, kwa daa mekey sləra an̄ga.

Mey da ray mebəsey banay

1:1 1.1 Jak: Mt 13.55; SNM 12.17; 15.13; 21.18; 1Kwr 15.7; Gal 1.19; 2.9; 1Pi 1.1
1:2 1.2-3 Rm 5.3-5; 1Pi 1.6-7 **1:5** 1.5 MM 2.6 **1:6** 1.6 5.13; Mt 7.7; 21.21-22;
 Ef 4.14 **1:9** 1.9 2.5 * **1:10** 1.10 A səra a da məcey: Ndaw masa-zleley a səra a da məcey, a gwa n̄ga la zleley an̄ga a har ba. Anda kefe, ndaw masa-zleley ma təba mey n̄ga Yesu na, aa səmey maja a səra a da hətey cek ma fəna zleley an̄ga ha. **1:10** 1.10 5.1 **1:10** 1.10-11 Jəw 14.2; Ps 90.5-6; Iz 40.6-8

¹² Maaya nga Gazlavay aa da ray ndaw masa ma b̄osa banay tabiya ma h̄otfar. Fa d̄eba nga banay a na, Bay Gazlavay a da pa nga ndaw maaya, maja an̄ga ta key bay-gula sem. A da v̄elar heter mend̄ovey ba masa aa ma l̄ovey a v̄eldatara la a nd̄ohay masa ma wufm̄ara heyey. ¹³ Da ndaw a wufey nga key cek maaya ba na, n̄gene ndaw a, a da l̄ovey: «Ara Gazlavay ma handaya amba ya ka cek aha» na, k̄one ba. Fara fara, ndaw a gwa nga bata Gazlavay ba, asaya, Gazlavay fa hendey ndaw nga key cek maaya ba na, daa ba. ¹⁴ Da ndaw a wufey nga key cek maaya ba na, ara mewulkey an̄ga maaya ba ma bata, ma zlan̄gad̄ada daa c̄oved masa maaya. ¹⁵ Fa d̄eba ha, mewulkey an̄ga maaya ba ha a handa ndaw a nga key meb̄orey. Meb̄orey a, a da wey da ray ndaw a haa aa z̄ofda.

¹⁶ M̄elma ad̄aw hay mawud̄takaya, ka da t̄ob̄mara mey masa nd̄ohay ma l̄ovmakwar ma f̄ona mey ad̄aw ked̄e ba. ¹⁷ S̄ermara, cek hay maaya tabiya masa ma j̄onmandakwar na, fara fara a sawa da vad̄ fa Gazlavay Papan̄ ma kata cek hay ma wad̄am da vad̄, anda mel̄ovey, pas ta kiya len̄ wurzla hay. Gazlavay na, a mb̄ofey ba s̄olak. Anda pas ma k̄ezley ma key l̄ovan̄ na, Gazlavay a mb̄ofey k̄one ba. ¹⁸ Ta mbafar la a Gazlavay amba a v̄elndakwar heter mend̄ovey ba ta fa mey an̄ga masa fara fara. Gazlavay a ka k̄one amba al̄ekwa nd̄ohay an̄ga hay na, ya t̄orkwa mahura da ray cek hay tabiya masa aa ma kat̄erwa.

Mey da ray mec̄oney mey n̄gada Gazlavay

¹⁹ M̄elma ad̄aw hay mawud̄takaya, maaya na, kwa waawa nga wusey vaw nga c̄onda mey masa ndaw maa guzlda, a daa guzley fiyaw fiyaw ba, asaya, a da cey mevel fiyaw fiyaw ba may. ²⁰ Fara fara, da ndaw mevel fa car na, a gwa a key sl̄era ma mbafar a Gazlavay ba. ²¹ Da ray n̄gene, mb̄ekdamara cek hay maaya ba ma n̄esmakwar. Asaya, mb̄ekdamara mekey meb̄orey. T̄ob̄mara mey masa Gazlavay ma pakwara aa mevel akwar ta mey maakwad̄ a, maja mey a ked̄e na, a gwa nga l̄ohdakwar.

²² Ka da wulkam nga j̄okey sl̄emay fa mey nga Gazlavay daada gway na, k̄one ba. Maaya na, ka kam cek anda mey a maa guzley. Da daa ba na, a key n̄gene, ka b̄emam ray akwar. ²³ Ahaw, da ndaw a j̄okey sl̄emay fa mey nga Gazlavay gway, ama a ka cek anda mey a maa guzley ba na, n̄gene, ndaw a, ta t̄orey sem anda ndaw ma n̄eka dey

1:12 1.12 5.11; 1Kwr 9.24-25 **1:13** 1.13 MM 19.3; 1Kwr 10.13 **1:14** 1.14-15
 Rm 6.19-21; 7.7-10; 1Jn 2.16-17 **1:17** 1.17 MC 1.14-18; Mt 7.11 **1:18** 1.18
 Jan 1.13; Rm 8.19-23; 1Pi 1.23 **1:19** 1.19 3.2; MM 15.1; Ekz 7.8-9 **1:21** 1.21
 Kwa 3.8; 1Pi 2.1 **1:22** 1.22 2.17; Mt 7.24, 26; Rm 2.13

anğa daa banğera. ²⁴ A nêka dey anğa maaya maaya, fa dêba ha, masa ta la dey sem na, a daw, a sêrfada dey anğa ha saba. ²⁵ Ama da ndaw a sanğala kwakwas nğa Gazlavay ta døk-vaw, asaya, da ndaw aha a jøkey slømay fa kwakwas a, a sêrfada, a sêpa na, ngene Gazlavay a kar maaya la maja. Fara fara, Gazlavay a kar maaya la maja kwakwas a, anğa maaya kalah, a gwa nğa løhda ndaw daa mebørey.

Mey da ray menjey maaya ma mbafar a Gazlavay

²⁶ Yaw, da ndaw a wulkey daa mevel anğa, anğa ndaw ma sêpa mey nğa Gazlavay ta cøved e, ama a wey vaw fa mey masa anğa maa guzlda ba na, ngene mesøpey mey nğa Gazlavay a nğada anğa na, ara cek nğa tede, a key a bømey ray anğa. ²⁷ Ama fa Gazlavay Papa aløkwa na, amba ndaw a sêpa mey anğa fara fara, a mbafar a Gazlavay a na, si ndaw aha a nøkey dey fa matawak hay ta nğwas-vagay hay daa banay ata. Asaya, si ndaw aha a wey vaw fa ray anğa maja mebørey da bøla keđe a da zløba.

2

Meweley vaw ta weley ara cek maaya daw?

¹ Mølma adaw hay, akwar masa fa tøbmara mey nğa Yesu *Køriste Bay aløkwa Mahura, ndaw masa ta gødanj ma fønta cek hay tabiya ngene na, ka da walam vaw ta weley da wuzlah akwar ba. ² Wulkam cey! Ndøhay cew a mbøzam a wuzlah akwar daa mekusey, lanğar ta zana fa vaw maaya ta danğwa da har maaya, lanğar ndaw masa-viya, anğa ta zana maaya ba manğærkaya. ³ Ka camar har nğada ndaw ta zana maaya heyey, ka løvmar: «Ndaw mahura, njej fa janğa maaya keđe», ama nğada ndaw masa-viya heyey na, ka løvmar: «Lecey ta lecey», da daa ba, ka løvmar: «Njej fetede a hwayak.» ⁴ Da akwar fa kamara køne na, a key ngene, ka walam vaw ta weley, ba daw? Anda keđe, meweley vaw ta weley ngene na, a sawa daa mewulkey akwar maaya ba ngene.

⁵ Mølma adaw hay mawudtakaya, jøkam slømay maaya maaya. Gazlavay ta walata masa-viya hay da bøla keđe sem amba a pamara Yesu nğa ndaw ata fara fara, a løham. Asaya, ta walata sem amba a mbøzam aa slam masa Gazlavay fa wey da vad, slam masa aa ma løvey a da vøldatara nğada ndøhay ma wudmara heyey. ⁶ Ama

1:25 1.25 2.12, 24; Ps 19.8; Jan 13.17; Rm 8.2; Gal 6.2 **1:26** 1.26 3.2, 10; Ps 34.14; 141.3 **1:27** 1.27 Ps 10.14, 18; Iz 1.17; Mt 25.35-36 **2:1** 2.1 2.1-9; Mew 1.17; 10.17; 16.19; 2Mev 19.7; Jøw 34.19; Ps 82.2; MM 24.23; Mt 5.45; SNM 10.34; Rm 2.11; 10.12; Gal 2.6; Ef 6.9; Kwa 3.25; 1Pi 1.17 **2:5** 2.5 1.9; Lk 6.20-21; 1Kwr 1.26-28; CWJ 2.9

akwar na, ka ta rəsmata masa-viya hay sem. Akwar fa sərmara, masa-zleley hay fa sərdamakwar banay kalah da bəla keɗe, ba diya? Asaya, ara ata ma ɗaɗamakwar ŋgada fa mey ŋga ndəhay ma ka sariya, ba diya? ⁷ Yaw, maa sanɗeram da ray mezəley maaya ŋga Yesu Kəriste masa aŋga ma vəldakwara na, ara ata, ba diya?

⁸ Mawuzlalakaya daa ɗerewel ŋga Gazlavay, a ləvey: «Si ka wuɗa meseembew akah anda kah ma wuɗa ray akah.» Da akwar fa namar ray ŋgada *mewey ŋga Bay Gazlavay a keɗe na, ŋgene ara cek maaya. ⁹ Ama da ka walam vaw ta weley da wuzlah akwar na, ŋgene ara mebərey. Anda keɗe, mewey a, aa zəɗdakwar la maja akwar ma zləbmara.

¹⁰ Kwa ndaw a nar ray a kwakwas ŋga Gazlavay cəpa, ama da ta mbəkda mewey pal sem daa kwakwas a na, ŋgene ta key mebərey sem da ray kwakwas a cəpa. ¹¹ Ya ləvey anda keɗe na, maja mewey pal ma ləvey: «Ka da ley vaw saw da palah ba», mekele saya a ləvey: «Ka da kəɗey ndaw vagay ba». Da ka ta ley vaw saw da palah daa ba, ama da ka ta kəɗey ndaw vagay sem na, ŋgene ka ta zləba kwakwas ŋga Gazlavay a sem. ¹² Maja ŋgene, ya fa ləvkwar, wam vaw fa mey masa akwar ma daa guzldamara, asaya, wam vaw fa menjey akwar da bəla, maja akwar na, ndəhay masa Gazlavay ma da katar sariya ta fa mewey aŋga, mewey masa ma gwa ŋga badakurwa daa mebərey. ¹³ Da ndaw ta sərey dey-ceceh fa ndəhay siya daa ba na, Gazlavay fa da kar sariya ta dey-ceceh daa ba may. Ama da ndaw ta sərey dey-ceceh la fa ndəhay na, ŋgene ndaw a, fa da zlurey fa Gazlavay ta pas sariya na, daa ba.

Mey da ray ndaw ma wuzda metəbey-mey aŋga ta fa sləra aŋga

¹⁴ Məlma aɗaw hay, da ndaw a ləvey aŋga fa təba mey ŋga Gazlavay, ama a ka cek anda Gazlavay ma ləvar ŋga ka ba na, ŋgene metəbey-mey ŋga ndaw aha ta tərey sem ŋga cek ŋga tede, fa da ləhda daa mebərey daa ba sələk. ¹⁵ Yaw, da məlmakw, da daa ba, dam-mamakw daa *mecəmey-ray ŋga ndəhay ŋga Yesu zana ata daa ba, a hətam cek ŋga zəmey mandaw mandaw ba, ¹⁶ ka ləvtar: «Anja ka njam daa zazay, anja ka hətam zana fa vaw, asaya, anja ka hətam cek mezəmey haa ka rəham», ama da ka ta vəltar cek masa ŋga jənta daa ba na, mey akah ŋgene ara mey ŋga tede, ba diya? ¹⁷ Anda keɗe, metəbey mey ŋga Gazlavay na, aa kəne may. Da ka təba mey ŋga Gazlavay, ama da ka kada sləra

2:8 2.8 Lev 19.18; Mt 22.39; Rm 13.9 **2:9** 2.9 2.1 **2:10** 2.10 Mt 5.19; Gal 3.10; 5.3 **2:11** 2.11 Mab 20.13-14 **2:12** 2.12 1.25 **2:13** 2.13 Mt 5.7; 7.1; 18.32-35 **2:14** 2.14 Mt 7.21; 1Jn 3.17 **2:15** 2.15 Mt 25.35-36

ta mey a ba na, metəbey mey nga Gazlavay ngene ara cek nga tede ngada kah.

¹⁸ Ama da kwa ndaw a gwa a ləvya: «Ndaw lanjar a təba mey nga Gazlavay gway, lanjar saya a kar sləra maaya ngada Gazlavay.» Ngada ndaw ma ləvey kəne na, yah, *Jak, ya da mbəfdara, ya ləvar: «Ka gwa nga wuzdiwa metəbey mey nga Gazlavay manjar sləra daw? Ama yah na, ya gwa nga wuzdakawa metəbey-mey adaw ta fa sləra masa yah ma ka.» ¹⁹ Asaya, ka fa təba Gazlavay na, anja pal, ba diya? Ngene, ara cek maaya. Ama kwa mesəfney hay maaya ba na, fa təbmara mey a kəne may, a zluram ta mey a.

²⁰ Fara fara, da ndaw ta təba mey nga Gazlavay sem, ama a key sləra ma mbafar a Gazlavay ba na, ngene, metəbey mey a, ta tərey sem nga cek nga tede. Kah ndaw marəzlkaya, ka wudəy ya wuzdakawa mey a saya daw? ²¹ Sərfada *Abəraham, papaŋ nga papa aləkwa zleezle taw. Gazlavay a pa nga ndaw maaya fa mey anja na, kwariya? A pa nga ndaw maaya na, ta fa cek maaya masa aa ma ka. Cek aha na, ara aa ma vəlda bəzey anja *Izak nga sley dəy a ngada Gazlavay heyey. ²² Anda kedə, ka səra Abəraham ta təba mey nga Gazlavay la. Metəbey-mey anja ta cəmam la aa slam a ta sləra masa aa ma ka ngada Gazlavay. Sləra masa Abəraham ma ka ha fa vəlar gədaŋ nga təbey mey nga Gazlavay ma fəna ma fəna. ²³ Cek aha kedə a key anda mey mawuzlalakaya daa dərəwel nga Gazlavay zleezle, ma ləvey: «Abəraham a pa Gazlavay nga ndaw anja fara fara. Ara maja ngene, Gazlavay ma pa nga ndaw maaya.» Da ray ngene, Gazlavay a zəla Abəraham a «jam adaw.» ²⁴ Anda kedə, ya sərkwə na, Gazlavay a gwa nga pa kwa waawa nga ndaw maaya fa mey anja maja ndaw a ma təba mey anja daada ba, ama maja sləra maaya masa aa ma ka may.

²⁵ Asaya, wulkam da ray ngwas-barlaw *Rahap. Ta təbta ndəhay meslərey hay nga *Israyel hay la a way anja, ta jənta la nga badatərwa da slala Jerikwaw taa cəved mekele. Anda kedə, Rahap a, Gazlavay ta pa sem nga ndaw maaya fa mey anja maja sləra maaya masa aa ma ka ngene. ²⁶ Fara fara, da ndaw fa səfney daa saba na, ngene ta məcəy sem. Metəbey-mey nga Gazlavay na, aa kəne may. Da ndaw a ləvey aa fa təba mey nga Gazlavay, ama a kada sləra ba na, metəbey mey anja ha ngene ara cek nga tede.

2:17 2.17 Gal 5.6, 16, 22-24; 1Jn 3.18 **2:19** 2.19 Mew 6.4; mesəfney hay maaya ba: Mt 8.29; Mk 1.24 **2:21** 2.21 MC 22.9, 12; Rm 4.1-5, 13-16, 19-22; Heb 11.17 **2:23** 2.23 MC 15.6; 2Mev 20.7; Rm 4.3 **2:25** 2.25 Jes 6.17; Mt 1.5; Heb 11.31 **2:26** 2.26 2.17, 20

3

Mey da ray mewey vaw fa meeguzley saw

¹ Məlma adaw hay, ka da tərām cəpa ɲga ndəhay maa sərkadam mey ɲga Gazlavay a ndəhay ba, maja ala ndəhay maa sərkadam ndəhay na, ta pas sariya, Gazlavay a daa cəfdandar ma fəna ndəhay siya hay. ² Aləkwa cəpa fa kakwa mebərey mekele mekele mandaw mandaw. Ama da ndaw fa key mebərey daa meeguzley aɲga daa ba na, ɲgene ara ndaw maaya fara fara ma gwa ɲga wa vaw aɲga cəpa. ³ Nəka, pəles na, aɲga mahura, ama aləkwa fa ndəkwa kwa lagambal, cek mecəhe, a mey amba a cənndakwar mey. Anda keɖe, ya gwakwa ya handakwa aa slam masa anda aləkwa ma wudkwa. ⁴ Asaya, wulkam da ray kwambiwal mahura masa memed ma handa ta gədaɲ. Ara cek mahura, ama ndaw ma hwada kwambiwal a na, a hwada ta hwadam mecəhe, a gwa a handa aa slam masa aa ma wudfey. ⁵ Yaw, neneh may, aa kəne. Ara cek mecəhe da wuzlah mezəvey ɲga vaw hay tabiya, ama ta neneh na, ndaw a gwa aa guzley mey maadakw a ma nəsa ndaw.

Nəkmara, zay-awaw ndez kəɖey na, a gwa a gəɖey, aa kəra sidam da ley * tabiya. ⁶ Neneh na, aɲga anda awaw maa wura slam. Ara mezəvey pal da wuzlah mezəvey ɲga vaw aləkwa hay, ama a gwa a nəsa vaw tabiya maja mey hay malamba da bəla tabiya na, ara aɲga ma badatərwa. A nəsa ndaw dəga mayawa aɲga haa meməcey aɲga. Neneh na, aa wura ndaw kəlmedek! ta awaw magaza. ⁷ Ndaw a gwa a wey da ray cek hay tabiya: cek hay da ley ta dīyaɲ hay ta cek hay ma diyam ta hwad ta hwad, leɲ ewet hay daa yam cəpa. Ahaw, a wey da ray ata tabiya. ⁸ Ama ɲga neneh na, ndaw a gwa a wa ba səlak. Ara cek malamba, a wusey kalah, aɲga marəhkaya ta mewer, a gwa a kəɖey ndaw. ⁹ Ta neneh aləkwa na, aləkwa fa həlmakwa Bay Gazlavay, Papa aləkwa. Yaw, aləkwa fa sərkwə Gazlavay a ləmta ndəhay na, kərad! anda aɲga. Ama ta ɲgene he cəpa, aləkwa fa cədkwa ndəhay ta neneh e cəɲga. ¹⁰ Mepəsey-mey leɲ mey menəsey ndaw na, a gwa ɲga bawa da mey ndaw pal. Məlma adaw hay, ya da kakwa kəne ba. ¹¹ Daa wurak ɲga yam pal na, yam mawuryayak a ta yam mecərey a gwamara a gəcwa daa slam a daw? ¹² Məlma adaw hay, gudav a gwa a yey səked daw? Asaya, wudez mekele may a

3:2 3.2 1.26 **3:2** 3.2-10 Ps 141.3; MM 10.19 **3:3** 3.3 Ps 32.9 * **3:5** 3.5
 sidam da ley: slam da ley masa wudez kəb-keɖ! **3:6** 3.6 MM 10.19; Mt 15.11,
 18-19 **3:7** 3.7 MC 9.2 **3:8** 3.8 Ps 140.4; Rm 3.13; Ef 4.29 **3:9** 3.9 MC
 1.26-27

gwa a yey gudav daw? Wurak nga yam mawuryayak a na, a gwa nga gɛcwa yam maaya daw?

Mey da ray lenjesl masa Gazlavay ma vɛlda a ndɛhay anɔa hay

¹³ Da ndaw ta lenjesl ma sɛra cek da wuzlah akwar daha na, si a wuzda menjey anɔa maaya ta fa slɛra masa aa ma ka ta mey maakwad a, len ta lenjesl masa Gazlavay ma vɛldara. ¹⁴ Ama da akwar fa kam sɛlenj kalah, asaya, da akwar fa wudkam ɗay, ngene, kwa ka da zlapam maja lenjesl akwar a ba. Da daa ba na, mezlepey akwar ta sɛlenj akwar ngene na, fa tɛrda mey masa fara fara nga mey membɛrzley. ¹⁵ Lenjesl akwar ngene na, a sawa ta fa Gazlavay da vad ba, ara lenjesl nga bɛla keɗe, ara lenjesl nga ndɛhay magɛdanj gway, a sawa ta fa *Satanj, bay-malula. ¹⁶ Nɛka, da ndɛhay fa kam sɛlenj, fa wudkam ɗay na, ngene ndɛhay a, a kam cek ta cɛved e saba, cek hay maaya ba hay cɛpa fa ata daha. ¹⁷ Ama lenjesl ma sawa ta fa Gazlavay da vad na, mebɛrey da hwad a daa ba, fa handawa zazay lenj meeguzley ta mey maakwad a, a wuzlah ndɛhay, a sɛrey dey-ceceh fa ndɛhay, a cɛmtar ɗay a ndɛhay, a key slɛra maaya mandaw mandaw, a weley ndaw ta weley ba, asaya, a betey ndaw ba. ¹⁸ Ndɛhay ma cɛmamatar ɗay a ndɛhay na, fa handamawa zazay a wuzlah ndɛhay. Mawurbay nga slɛra ata na, ara menjey maaya fa mey nga Gazlavay.

4

Ka da kam jam ta bɛla ba

¹ Mecekeley-mey ta mekɛɗey-vaw da wuzlah akwar a sawa na, dama? A sawa na, daa mevel akwar ma kɛɗey vaw nga key cek hay maaya ba. ² Akwar fa wudam nga hɛtey cek hay mekele mekele, ama ka hɛtam ba. Ara maja ngene akwar fa kɛɗam ndɛhay vagay. Asaya, akwar fa kam sɛlenj, akwar fa sɛpam cek, ama ka hɛtam ba. Da ray ngene, akwar fa tɛram vaw, akwar fa kɛɗam vaw da wuzlah akwar. Ka hɛtam cek masa akwar ma wudam ba na, maja akwar faa cɛɗamara cek aha fa Bay Gazlavay daa ba. ³ Da akwar faa cɛɗam cek fa Gazlavay, ka hɛtam ba na, ara maja akwar ta mewulkey maaya ba. Anda melɛvey, kaa cɛɗam na, cek masa ma mbafakwar daada gway.

3:12 3.12 Mt 7.16 **3:13** 3.13 Rm 12.16 **3:14** 3.14 1Kwr 3.1-3; Gal 5.20-6.4

3:15 3.15 1.5, 17 **3:17** 3.17 Mt 5.48; 1Kwr 13.4-7; Gal 5.22-23; Fɛl 1.9-11

3:18 3.18 Mt 5.9 **4:1** 4.1 Rm 7.5; 1Pi 2.11 **4:2** 4.2 1Jn 3.16

⁴ Akwar ndəhay ma mbəkdamara Gazlavay sem, anda ngwas ma mbəkda zel e ma ley vaw saw! Akwar ma təbmara mewulkey nga bəla keđe, a key ka rəsmara Gazlavay na, ka sərmara ba daw? Fara fara, kwa waawa ma təba mewulkey nga bəla keđe na, a tərey masa-gəra nga Gazlavay la. ⁵ Mey nga Gazlavay a ləvey: «Gazlavay a wudəy cek mekele a key sləra daa mevel aləkwa ba, si Mesəfney anğa masa aa ma pa a ray aləkwa gway.» Ka wulkam na, mey a keđe aa guzley nga tede daw? ⁶ Ama fa kandakwar maaya ma fəna ma fəna cəngə. Ara anda mawuzlalakaya daa dərewel nga Gazlavay, ma ləvey: «Ndəhay masa ma zlapam na, Gazlavay a mbədtar dəba la. Ama ndəhay meekwed-mey na, Gazlavay a katar maaya la.»

⁷ Da ray ngene, namar ray a Gazlavay, jaram maaya maaya amba *Satan a batakwar ba, ngene Satan a, a hway la dərəj ta akwar. ⁸ Ngəcham fa Gazlavay *, anğa may, a ngəchawa la fa akwar. Akwar masa ta mebərey ngene, təram ndəhay maaya manjar mebərey. Akwar ndəhay masa ta mewulkey cew cew ngene, pərmara mevel akwar.

⁹ Sərmara akwar na, ndəhay maaya ba. Wudam, təwam maja mebərey akwar. Anja meesəngərey akwar nga tərey nga matəway. Ka daa səmam saba, ama ndərbam dey.

¹⁰ Pamara ray akwar nga mecəhe fa mey nga Gazlavay, anda keđe, Gazlavay a gəldakwar la.

Ka da slam mey a ray ndəhay ba

¹¹ Məlma adaw hay, ka da slam mey a ray ndəhay anda akwar ndəhay ma ka sariya ba. Ndaw ma sley mey a ray məlmaha, asaya, a mbədar ray na, ngene anğa letək ta ndaw maa guzley mey maaya ba da ray *mewey nga Gazlavay, a pa mewey a nga vagas. Da ka ka anda ngene na, ka fa nar ray a mewey a daa saba, ama ka ta tərey sem nga ndaw ma rəsa mewey a. ¹² Ara Gazlavay taava anğa ma vəldandakwara mewey a, asaya, ara anğa pal ma gwa nga katar sariya a ndəhay. Anda keđe, ara anğa pal ma gwa nga ləhda ndaw daa sariya ha, ara anğa pal ma gwa ngaa zədda may. Kah na, wa, amba ka sley mey a ray məlmakw anda ndəhay ma ka sariya na!

Mekətey da ray mezlepey

4:4 4.4 Mt 6.24; Jan 15.18-19; 1Jn 2.15 **4:6** 4.6 4.10; MM 3.34; Mt 23.12; 1Pi 5.5 **4:7** 4.7 Ef 6.12; 1Pi 5.8-9 * **4:8** 4.8 ngəcham fa Gazlavay: A wudəy nga ləvey mesəpey mewey anğa ta medərey-dangay ngada anğa. **4:8** 4.8 Ps 18.21, 25; Iz 1.16; Zak 1.2-3; Mal 3.6-7 **4:9** 4.9 Lk 6.25 **4:10** 4.10 4.6; 1Pi 5.6 **4:11** 4.11 Ps 101.5; 1Pi 2.1 **4:12** 4.12 Rm 14.4; 1Kwr 4.5

¹³ Jøkfamaya sləmay, akwar ndəhay ma ləvam: «Tasana, da daa ba, mandaw na, ya diyam la a slala daha, ya kamawa mevey pal, fetede ya mbədmawa har, ya hətam dala ga.»

¹⁴ Akwar maa guzlam anda kefe na, ka səmara cek ma da key mandaw ba, maja ka səmara menjey akwar da bəla kefe ba. Menjey akwar a ara anda kakas mecəhe ma wuzwa vaw nekədey, fa dəba ha, aa zədey caca'!, kwa a hətey saba. ¹⁵ Maaya na, ka ləvam: «Da Bay Gazlavay ta təba la, ala daha ta dey na, ya da kam cek kədey ta kədey.»

¹⁶ Ama wure kefe akwar fa zlapam daa meeguzley akwar kalah. Mezlepey anda ŋgene na, maaya ba. ¹⁷ Yaw, kwa waawa ma səra mekey maaya a ndaw, ama da ta ka daa ba na, ŋgene ta key mebərey sem.

5

Mey da ray masa-zleley hay

¹ Jøkfamaya sləmay wure kefe, akwar ndəhay masa-zleley hay. Təwam, wudam, maja banay mahura a sawa la a ray akwar. ² Zleley akwar hay a, ta zam sem. Maaca ta zəmta zana akwar hay sem. ³ Dala akwar ta key maadar sem. Maadar a ŋgene na, a wuzdərwa mebərey akwar la ta pas mekey sariya. Kwa aslaw ŋga vaw akwar na, aa zədey la cəpa daa sariya ha, maja maadar a ŋgene. Fara fara, kaa zədam la anda cek maa wurey kəlmedek! Menjey nekədey, bəla a ndəvey la, ama akwar na, ka wulkam si ŋga bəcey zleley ga da bəla kefe gway. ⁴ Nəka, mawurbay ŋga ndəhay ma ka sləra da ley akwar hay na, akwar ta pəlmatarə daa ba. Cəndamara matəway ŋga ndəhay a. Matəway a, ta wusey sem kasl fa Bay Gazlavay Mawaca-waca. ⁵ Akwar fa kam wiya da bəla kefe, akwar fa kam cek anda akwar ma wudam. Akwar faa bəldamara vaw akwar anda gənaw hay ŋga hərey. ⁶ Akwar fa kamatar sariya ŋgada ndəhay manjar mebərey, ka kədmata vagay, kwa ta kam həma a ray akwar daa ba.

Mey da ray mesəkwey Yesu ta dək-vaw

⁷ Da ray ŋgene, məlma adaw hay, səkwakwa ta dək-vaw pas ŋga Bay Mahura Yesu ma da vəhwa. Nəkmara, ndaw mehəvey cey! A səkwa mey-var, amba a sləkey. Fa dəba ha, a səkwa daw anga ha ta dək-vaw amba a nəhey maaya maaya haa kasl fa var ŋga madagway-dakw. ⁸ Akwar may,

4:13 4.13-14 MM 27.1; Lk 12.18-20 **4:14** 4.14 Jəw 7.9-10; Ps 39.6 **4:15** 4.15
SNM 18.21; Rm 1.10; 1Kwr 4.19; 16.7 **4:16** 4.16 1Tm 6.17; 1Jn 2.16 **4:17**
4.17 Lk 12.47 **5:1** 5.1 1.10; Lk 6.24 **5:1** 5.1-6 MM 15.6; Iz 5.8-10; Am 6.3-7
5:2 5.2-3 Mt 6.19-20 **5:4** 5.4 Mab 3.7; Lev 19.13; Jer 22.13; Mal 3.5 **5:5**
5.5 Jer 12.3; 25.34 **5:7** 5.7 Jwl 2.23; 2Pi 3.3

si ka səkwmara Bay aləkwa Yesu ta dək-vaw. Ka da gəram ba, maja pas masa anğa ma da vəhwa na, gweegwe cay.

⁹ Məlma adaw hay, ka daa nğuram mey da ray ndəhay ba, daa ba na, Gazlavay a da kakwar sariya. Kwa wure keđe, aa fa mey-slam nğa way mekey sariya, fa da mbəzey aa way a nğa key sariya.

¹⁰ Məlma adaw hay, sərfadamara ndəhay ma təla mey hay maa guzlam anda Bay Gazlavay ma ləvtar. Banay ma hətfatar la, ta bəsmara banay a la. Anda keđe, bəskwa banay anda ata ma bəsmara nğene may. ¹¹ Aləkwa fa ləvkwa, anja maaya nğa Gazlavay nğa njeý a ray ndəhay ma bəsmara banay ma hətfatar. Sərfadamara mey da ray Jəwab ma bəsa banay zleezle. Yaw, sərmara daa mendəvey nğa banay a na, Gazlavay ta kar maaya la, maja Bay Gazlavay a na, ara ndaw ma sərey dey-ceceh fa ndəhay, asaya, fa katar maaya.

¹² Məlma adaw hay, cek mahura na, ka da mbađam ba səlak, kwa ta slam da vad, kwa ta slam da hwayak, kwa ta meeme, maja Gazlavay a da kakwar sariya. Da ahaw na, ləvam «ahaw», da kəne ba na, ləvam «kəne ba». Nğene, a wusa gway.

Mey da ray medərey-danğay

¹³ Ndaw masa fa sərey banay da wuzlah akwar daha daw? Nğa dərey danğay a Gazlavay. Ndaw masa ta meesəmey da wuzlah akwar daha daw? Nğa həlma Gazlavay ta walay.

¹⁴ Ndaw masa-macay da wuzlah akwar daha daw? Nğa zəlwa *bay-ray hay daa Egəliz amba a dəräm danğay a Gazlavay maja anğa, a takwadamar mal ta mezəley nğa Bay Mahura. ¹⁵ Daa medərey-danğay ata ha na, da ta təbmara la aa mevel ata Gazlavay a mbəlda ndaw a la na, nğene, a mbəlda la. Bay Gazlavay a sləkđadərwa la daa macay anğa ha. Asaya, da ndaw a, ta key mebərey la na, Gazlavay a mbəkdara la. ¹⁶ Da ray nğene, wuzdamata mebərey akwar hay da wuzlah akwar, dərmar danğay pal pal da wuzlah akwar a Gazlavay amba ka mbəlam daa macay. Medərey-danğay nğa ndaw masa maaya fa mey nğa Gazlavay na, aa ta gədañ ga. ¹⁷ Nəka, *Eli na, anğa ndaw-magədañ anda aləkwa. Ta dərär danğay la a Gazlavay ta mevel pal amba var a pawa ba. Da ray nğene, mevey maakar ta kiya maakwaw var ta pawa daa ba səlak.

¹⁸ Fa dəba ha, a dərär danğay a Gazlavay saya amba var a

5:8 5.8 Rm 13.11-12; 1Tes 5.5-8; Heb 10.25, 37 **5:9** 5.9 Mt 7.1-2 **5:10** 5.10 Mt 5.12; Heb 11.32-38 **5:11** 5.11 1.12; Mab 34.6; Jəw 1.21-22; 2.10; 42.10-17 **5:12** 5.12 Mt 5.34-37 **5:13** 5.13 1.5-6; SNM 16.25 **5:14** 5.14 Mk 6.13 **5:15** 5.15 Mt 9.2; Mk 16.18 **5:16** 5.16 Ps 32.3-5; 38.4-6; MM 28.13; 1Jn 1.8-9 **5:17** 5.17 1Bay 17.1

pawa. Maja ηgene, var ta', a pawa dēba, cek hay da ley ta kam la.

Mey da ray ndaw ma vəhdərwa ndaw ta mebərey aa cəved ηga Gazlavay

¹⁹ Məlma adaw hay, da ndaw da wuzlah akwar ta zlengeɖey sem daa cəved masa fara fara na, maaya na, ndaw mekele a vəhdərwa aa cəved ehe. ²⁰ Sərmara, kwa waawa ma vəhdərwa ndaw ta mebərey aa cəved masa fara fara na, ηgene, a key a ləhda heter ηga ndaw a. Kwa ndaw a, aa ta mebərey ga na, Gazlavay a mbəkdara la.

**Leeter masa
Piyer
ma wuzlala ngeeme
Mey da ray
Leeter masa Piyer ma wuzlala
ngeeme**

Leeter keɗe ara Simanɗw Piyer, ndaw-meslɔrey nga Yesu Kɔriste, ma wuzlala. Mezɔley Piyer a na, ara Yesu ma para (Luk 6.14). Jak, Jan leɗ Piyer e na, ata jam maa-sɔba-dey ngaa gwar. Daa mezley nga mecɔmey-ray nga ndɔhay nga Yesu na, Piyer e ta key bay-ray la nga ndɔhay nga Yesu (SNM 2.14; 15.7).

Piyer a lɔvey anɗa da Babilanɗw (5.13). Ndɔhay ga a wulkam anɗa da Rawm, ama a wa berney a ta Babilanɗw, berney masa Jɔwif hay zleezle ma njam da hwaɗ a anda mɔlak hay da wuzlah ndɔhay ma sɔra Gazlavay ba. A wuzlatara leeter e ngada ndɔhay nga Yesu maakwacatakaya ray daa hwayak hay mekele mekele (1.1). Ata na, ndɔhay fa rɔsmata, fa sɔrdamata banay maja ata ndɔhay nga Yesu. Piyer a wuɗey nga vɔltar gɔɗanɗa amba a bɔsmara banay a, a diyam fa mey fa mey daa cɔved nga Yesu (5.12). A vɔltar gɔɗanɗa, a lɔvtar nga pamara mewulkey ata a ray maaya nga Gazlavay masa ata ma da hɔtmar ta pas masa Yesu ma da vɔhwa. Asaya, a lɔvtar nga kam cek maaya anda Gazlavay ma wuɗey, maja ata na, ara sɔkway masa Gazlavay ma wala (2.9).

Daa leeter e na, Piyer aa guzltar ngada ndɔhay nga Yesu masa zleezle ma sɔpam kwakwas hay mekele mekele. Anda melɔvey, aa guzley ngada Jɔwif hay ta ngada ndɔhay masa Jɔwif hay ba hay ma sɔpam kwakwas nga Mawiz leɗ ngada ndɔhay ma tam kuley hay. Ata na, ta hɔtam heter mawiya cay, anda keɗe, menjey ata, anɗa anda nga papanɗa nga papa ata hay zleezle saba. Asaya, menjey ata, anɗa anda nga ndɔhay da cakay ata ba may (1.13-2.4). Ata fa bɔsmara banay maja Yesu.

Daa leeter e keɗe na, mey mekele mekele daha nga vɔley gɔɗanɗa ndɔhay:

Mey da ray meɔsey banay (1.7; 3.13-17)

Mey da ray Yesu Kɔriste, anɗa anda anɗwa maaya melɔmey way (2.4; 2.6)

Mey da ray alɔkwa, ndɔhay nga Gazlavay (2.9-10)

Mey da ray banay masa Kəriste ma bəsa maja aləkwa (1.3; 2.21; 2.23; 3.18–4.46)

Mecey-har

¹ Ara yah *Piyer ma wuzlalakwara leeter keđe, yah *ndaw-meslərey nga *Yesu *Kəriste.

Ya wuzlalakwara ngada akwar ndəhay masa *Gazlavay ma walakwar sem, akwar ndəhay masa mələk hay maakwacatakaya ray daa hwayak nga Paṅw, daa hwayak nga Galati, daa hwayak nga Kapadəwas, daa hwayak nga Azi, leṅ daa hwayak nga Bitini. ² Dəga zleezle na, Gazlavay Papan ta walakwar cay nga tərey ndəhay anğa hay anda aa ma wudfey. A pakwar wal ta fa Mesəfney anğa amba ka namar ray a Yesu Kəriste, asaya, amba ka təram nga ndəhay anğa hay maaya manjar mebərey ta fa mambaz anğa.

Anja maaya nga Gazlavay ta zazay anğa nga njeý ta akwar ma fəna ma fəna.

Mey da ray meləhey

³ Həlmakwa Gazlavay, Papan nga Bay aləkwa Mahura Yesu *Kəriste. Ta sərfandakwar dey-ceceh la ga, ta yandakurwa la nga dey cew ta fa aa ma sləkdfadərwa Yesu Kəriste daa meməcey. Ara maja ngene, aləkwa fa sərkwa daa mevel aləkwa, ya sləkdfakurwa la daa meməcey may.

⁴ Anda keđe, akwar fa səkwmarə cek hay maaya masa Gazlavay ma badata ngada ndəhay anğa hay. A badatara cek hay a na, da gazlavay da vad. Fetede na, cek hay a, a zam ba, a nəsam ba, a mbədam ba. ⁵ Gazlavay na, ndaw masa ta gədan. A jədkwar la amba a ləhdakwar maja akwar fa pamara nga ndaw akwar fara fara. Meləhey a ngene, Gazlavay a da wuzdərwa fara fara na, ta pas masa bəla ma da ndəvey.

⁶ Ara maja ngene, kwa wure keđe, masa akwar daa banay wura wura ma da njeý nekədey keđe na, sasəmam cəngə.

⁷ Banay a ngene na, fa wuzdərwa akwar fa pamara Gazlavay nga ndaw akwar fara fara daw, daa ba daw? Nəka bərey magaza cey, kwa ara cek maaya na, a nəsey la. Ama nga sərey anğa maaya na, si a pamara aa awaw. Anğa letek kəne ta akwar ma pamara Gazlavay nga ndaw akwar fara fara. Mepey Gazlavay nga ndaw fara fara na, a fəna bərey magaza ta maaya, ba daw? Ta ngene he cəpa, fa jadamakwar nga sərey, da akwar fa pamara Gazlavay nga ndaw akwar fara fara kwa. Anda keđe, ta pas masa Yesu

Kərıste ma da wuzwa vaw na, Gazlavay a həslkwar ray la, a həlmakwar la, aa həmdakwar la maja akwar ma pamara nğa ndaw akwar fara fara ha. ⁸ Akwar ma hətmar Yesu ta dey akwar daa ba, ama akwar fa wudmara cəngə. Akwar fa hətmar wure keđe daa ba, ama akwar fa pamara nğa ndaw akwar fara fara cəngə. Ara maja ngene, akwar ta meesəmey, meesəmey a ga ara mey ba, kwa ndaw a gwa nğa ləvey ba. ⁹ Akwar ta meesəmey ga na, maja Gazlavay ta ləhdakwar sem. Meləhey a na, ara mawurbay masa akwar ma hətam maja akwar ma pamara Yesu nğa ndaw akwar fara fara.

¹⁰ Zleezle ndəhay ma təla mey nğa Gazlavay ta səpam cəved la mekele mekele amba a sərmara Gazlavay a da ləhdata ndəhay daa mebərey anda aa ma ləhdakwar na, kwara. Ndəhay a taa guzlam la da ray maaya nğa Gazlavay masa aa ma da vəldandakwara. ¹¹ Ndəhay a na, Mesəfney nğa Kərıste aa da ray ata. Mesəfney a ta wuzdatara banay masa Kərıste ma da bəsa la. Asaya, ta wuzdatara gədan masa Kərıste ma da hətar la fa dəba nğa banay a. Ndəhay ma təla mey nğa Gazlavay a ta səpam cəved la nğa sərey cek hay a, a da kam na, ta vara, asaya, a da kam na, kwara. ¹² Gazlavay ta wuzdatara la, a ləvey, mey masa ata ma wuzdamara da ray cek hay a na, ara nğada ata ba, ama nğada akwar. Wure keđe, ndəhay ma wuzda *Mey-maaya-mawiya fa wuzdamakwara mey da ray cek hay a. A wuzdamakwara mey a na, ta gədan nğa *Mesəfney nğa Gazlavay ma sawa da gazlavay da vad. Kwa maslan hay nğa Gazlavay da vad may, a wudam nğa sərmata cek hay a.

Mey da ray menjey maaya ma mbafar a Gazlavay

¹³ Maja ngene *, diyam vaw maaya maaya nğa key sləra nğada Gazlavay. Wam vaw, pamara mewulkey akwar a ray maaya nğa Gazlavay masa akwar ma da hətam ta pas masa Yesu Kərıste ma da wuzwa vaw. ¹⁴ Namar ray mandaw mandaw a Papakw akwar Bay Gazlavay da vad. Zleezle daa masa ka sərmara Yesu *Kərıste ba aran na, akwar fa kam cek hay maaya ba saw masa ma mbafakwar gway. Ama wure keđe na, ka da kamata cek hay a saba. ¹⁵ Gazlavay ta zəlkwar la nğa tərey ndəhay anğa hay. Anğa na, ndaw maaya manjar mebərey. Akwar may, daa menjey akwar cəpa na, təram ndəhay maaya manjar mebərey anda anğa.

1:7 1.7 Jəw 23.10; Ps 66.10; Iz 48.10; 1Kwr 3.13 **1:8** 1.8 Jan 20.29; 2Kwr 5.7

1:9 1.9 Rm 5.2; 6.22; Ef 1.14 **1:10** 1.10-11 Lk 24.46; 1Kwr 15.3-4; 2Pi 1.19-21

1:12 1.12 Ef 3.9-10 * **1:13** 1.13 maja ngene: «Maja ngene» a wudfey nğa ləvey «maja meləhey ta maaya nğa Gazlavay» Nəka 1.10. **1:14** 1.14 Rm 12.2; Ef 2.3; 4.17-18

16 Ya ləvkwar anda keđe na, maja mawuzlalakaya daa ɗerewel nga Gazlavay, Gazlavay a ləvey: «Njam manjar mebərey, maja yah na, yah ndaw manjar mebərey.»

17 Daa masa akwar fa ɗeram dangay na, ka zəlmara Gazlavay «Papaŋ». Maja ŋgene, daa menjey akwar mambəkakaya da bəla keđe na, namar ray a Gazlavay maaya maaya. Aŋga na, ndaw ma ka sariya ŋgada ndaw a, ndaw a, ta cəved e təde fa sləra masa aŋga ma ka, kwa a weley ndaw ta weley ba. 18 Akwar fa sərmara, Gazlavay ta mbəɗkurwa sem amba ka ləham daa menjey nga papakw akwar hay zleezle. Menjey akwar anda nga papakw akwar hay zleezle ŋgene na, ara cek nga tede, fa da jənkwar nga ləhey daa ba. Gazlavay ta mbəɗkurwa ta cek anda dala masa ma da ndəvey na, daa ba. 19 Ama, a mbəɗkurwa na, ta mambaz nga Kəriste ta ray aŋga, ndaw masa ta gədaŋ. Kəriste he na, aŋga ta mebərey daa ba, aŋga anda bəz-təbaŋ maaya masa wurwer nga hərey nga vəley ŋgada Gazlavay. 20 Gazlavay ta wala la nga məcey dəga bəla ta ləmey daa ba araŋ. Wure keđe daa masa bəla fa da ndəvey keđe na, ta wuzɗərwa la amba a ləhdakwar. 21 Ka pamara Gazlavay nga ndaw akwar fara fara na, ta fa Yesu Kəriste. Ara Gazlavay a ma sləkɗadərwa daa meməcey, asaya, ara aŋga ma həslar ray. Anda keđe, akwar fa pamara Gazlavay nga ndaw akwar fara fara, asaya akwar fa sərmara ara aŋga pal ma da jənkwar.

22 Akwar ta təram sem nga ndəhay manjar mebərey fa mey nga Gazlavay maja akwar ma namar ray a mey masa fara fara, amba ka wuɗmata məlmakw akwar hay maaya maaya ta mevel pal. Anda keđe, wuɗam vaw maaya maaya ta mevel akwar cəpa. 23 Ka sərmara, akwar na, ta hətam heter mawiya la ta fa mey nga Gazlavay. Mey a na, a da njeý nga sərmataw, a vəltar heter mawiya a ndəhay. Ka hətam heter e na, ta fa ndaw masa ma da məcey ba, ama ta fa Gazlavay, ndaw masa aŋga daha ta dey nga sərmataw.

24 Anda mawuzlalakaya daa ɗerewel nga Gazlavay ma ləvey:

«Ndəhay magədaŋ na, ata anda kwakwas ma pəcwa da ley. Membey ata, aŋga anda meefekwey da ley.

Kwakwas na, a kweley la, meefekwey may, a kəzley la,

25 ama mey nga Bay Gazlavay na, a da njeý nga sərmataw.»

1:15 1.15-16 Lev 19.2 **1:17** 1.17 Iz 63.16; Jer 3.19; Mt 6.9; 16.27; Rm 2.6; Jak 2.1; 1Pi 4.5 **1:18** 1.18 Mt 20.28; 1Kwr 7.23; 6.20 **1:19** 1.19 1.1-2; Janj 1.29; SNM 20.28; 1Kwr 5.7; Ef 1.7; Heb 9.12 **1:20** 1.20 Ef 1.4 **1:21** 1.21 ma həslar ray: 5.1; Rm 5.2 **1:22** 1.22 2.17; 3.8; 4.8; Rm 12.9; Gal 6.10; 2Pi 1.7; 1Jn 4.11 **1:23** 1.23 Janj 1.13; Heb 4.12; Jak 1.18 **1:24** 1.24-25 Iz 40.6-8; Jak 1.10-11

Mey a na, ara Mey-maaya-mawiya masa ata ma wuzdamakwara heyey.

2

¹ Anda keɗe, mbəkdamara mekey cek maaya ba tabiya, ka da fəcam ndaw ba səlak, ka da tərām ndəhay masa ta neneh cew ba, ka da tərām ndəhay masa səleŋ hay ba, ka daa guzlam mey maaya ba da ray ndəhay ba səlak. ² Anda bəza hay da mey dəwa ma wuɗam ŋga sey dəwa amba a gəlam na, akwar may, təbmara mey ŋga Gazlavay masa fara fara amba ka gəlam ta mey a, ka ləham. ³ Si ka kamara kəne maja «akwar ta sərmara cay fara fara Bay Mahura na, aa maaya.»

Mey da ray ndəhay masa Gazlavay ma walata

⁴ Ŋgəcham ŋgada fa Bay Mahura. Ara ŋga ma vəltar heter a ndəhay. Anŋa na, anda anŋwa mahura meləmey way masa ndəhay ma kəzlamara ta cakay. Ama Gazlavay ta wala sem. A nəka na, anŋa maaya kalah. ⁵ Akwar na, tərām anda Bay Mahura, ndaw masa ta dey, amba akwar ndəhay masa ta dey anda anŋa na, Gazlavay a lakwar, a ləmdakwar way ŋgada Mesəfney anŋa. Fa dəba ha, ka tərām ŋga ndəhay anŋa hay ma ka kwakwas, ka vəldamara ray akwar ŋgada anŋa ta mevel pal anda *Mesəfney ŋga Gazlavay ma wuɗey. Kwakwas a, a mbafar la a Gazlavay maja Yesu *Kəriste. ⁶ Maja mawuzlalakaya daa ɗerewel ŋga Gazlavay, a ləvey:

«Ehe, ya ta weley anŋwa masa maaya la,
ya ta pa la aa berney ŋga Siyanw *,
ara anŋwa mahura masa bay-ray.
Kwa waawa ma zlembey ta anŋwa ha na,
a zəley marava daa ba səlak.»

⁷ Ŋgada akwar ndəhay masa ma pamara Yesu ŋga ndaw ata fara fara na, anŋwa ha aa maaya a fənta cek hay tabiya. Ama ŋgada ndəhay ma pamara Yesu ŋga ndaw ata fara fara ba na, aa kəne ba. Mawuzlalakaya daa ɗerewel ŋga Gazlavay, a ləvey:

«Anŋwa meləmey way masa ndəhay ma ləma way
ma kəzlamara ta cakay na,
ara anŋwa maaya meləmey way ma fənta siya hay jak.»

⁸ Mawuzlalakaya daa slam mekele say, a ləvey:

2:1 2.1 Ef 4.25; Jak 1.21; 4.11 **2:2** 2.2 1Kwr 3.2 **2:3** 2.3 Ps 34.9 **2:4**
2.4 Ps 118.22; Iz 28.16 **2:5** 2.5 2.9; Rm 12.1; Ef 2.21-22 * **2:6** 2.6 Siyanw:
Ara mezəley mekele ŋga berney ŋga Jeruzelem. Ama feɗe, a wuɗey ŋga ləvey
ndəhay daa mecəmey-ray ŋga ndəhay ŋga Yesu. **2:6** 2.6 Iz 28.16; Rm 9.33
2:7 2.7 Ps 118.22; Mt 21.42; SNM 4.11

«Anḡwa ha na, ara anḡwa mekey mecembefey a ndəhay, ara anḡwa ma tədfdata ndəhay.»

A tədfdata ndəhay na, maja ta gəmam nḡa təbmarə mey nḡa Gazlavay daa ba. Zleezle na, Gazlavay ta ləvey la, si a təfam kəne.

⁹ Ama akwar na, səkway masa Gazlavay ma wala, akwar ndəhay ma ka kwakwas nḡa Gazlavay, akwar ndəhay mapatakaya wal nḡada Gazlavay, akwar səkway masa Gazlavay ma pa nḡada anḡa ray anḡa. Gazlavay ta badakurwa sem daa ləvaḡ nḡadaa slam anḡa mewefey masa maaya kalah, amba ka wuzdamara nḡada ndəhay cek hay mahura masa anḡa ma kata. ¹⁰ Zleezle na, akwar ndəhay nḡa Gazlavay ba, ama wure kefe, akwar ndəhay anḡa hay. Zleezle na, Gazlavay fa sərfakwar dey-ceceh daa ba, ama wure kefe, fa sərfakwar dey-ceceh dəba.

Mey da ray menjey maaya da wuzlah ndəhay ma təba mey nḡa Gazlavay ba

¹¹ Jam adaw hay, sərmara, akwar na, anda mələk hay da bəla kefe. Slam akwar menjey na, da bəla fefe ba. Maja nḡene, ya fa ləvkwar, ambahw, cek hay maaya ba masa mevel akwar ma wufey gway na, ka da kamara saba. Cek hay a na, a daa zəfda heter akwar. ¹² Akwar da wuzlah ndəhay ma sərmara Gazlavay ba, njam, kam cek maaya mandaw mandaw. Anda kefe, kwa aa dədfamakwar mey, a ləvam akwar ndəhay maaya ba na, a həlmamara Gazlavay la ta pas masa anḡa ma da sawa, maja ata ma hətmar sləra maaya masa akwar ma kamara.

¹³ Namatar ray a *bay-ray hay cəpa maja Yesu Bay aləkwa Mahura. Anda meləvey, namar ray nḡada bay nḡa hwayak maja anḡa mahura da ray ndəhay siya hay, ¹⁴ asaya, namatar ray a mahura hay nḡa hwayak maja ara ndəhay meslərey nḡa bay nḡa hwayak. Anḡa fa slərdata nḡa kətata ndəhay ma ka cek ta cəved e ba ta nḡa həsltar ray a ndəhay ma ka cek ta cəved e. ¹⁵ Ta fa sləra akwar maaya nḡene na, Gazlavay a wufey ka gərcamatara mey nḡa ndəhay marəzltakaya ma sərmara Gazlavay ba, maa guzlam mey saw kəne nḡene. ¹⁶ Akwar ndəhay nḡa Yesu na, akwar beke hay ba. Ama ka da ləvam akwar beke ba kaa na, ka kam cek maaya ba anda mevel akwar ma wufey na, kəne ba. Sasəkar jak, təram ndəhay ma ka sləra nḡa Gazlavay.

2:8 2.8 Iz 8.14; Rm 9.33 **2:9** 2.9 1.2; Mab 19.5-6; Lev 19.2; Mew 4.20; 7.6; 14.2; Iz 9.1; 43.21; 61.6; SNM 26.18; Rm 5.17; 2Kwr 4.6; Ef 5.8; Tit 2.14; Heb 13.12; 1Pi 2.5; CWJ 1.6; 20.4 **2:10** 2.10 Aw 2.25; Rm 9.25 **2:11** 2.11 1.1, 17; Ps 39.13; Rm 7.15, 17-23; Gal 5.17; Heb 13.14 **2:12** 2.12 Iz 10.3; Mt 5.16; 2Kwr 5.10 **2:13** 2.13-14 Rm 13.1-7; Tit 3.1 **2:15** 2.15 3.16

¹⁷ Namatar ray a ndəhay tabiya. Wudmata məlmakw akwar hay daa mey nga Gazlavay. Namar ray maaya maaya a Gazlavay. Cənmar mey a bay nga hwayak.

Mey da ray mebəsey banay anda Yesu ma bəsa

¹⁸ Akwar ndəhay ma ka sləra nga ndəhay, namatar ray maaya maaya a *bay-ray akwar hay. Ka da nam ray na, ngada bay-ray hay masa maaya ma wudmakwar daada ba. Ama namatar ray a bay-ray hay masa maaya ba hay may.

¹⁹ Da akwar fa bəsmara banay hay mekele mekele ma sawa a ray akwar lək-lək maja ka wudam nga namar ray a Gazlavay na, ngene, ara cek maaya ma mbafar a Gazlavay.

²⁰ Da a kədmakwar maja akwar ma kam cek maaya ba, ka bəsmara na, ma daa həmdakwar maja na, wa? Ama da ka kam cek maaya, fa dəba ha, a sərdamakwar banay lək-lək gway, asaya, da akwar fa bəsmara banay a na, ngene, ara cek maaya ma mbafar a Gazlavay. ²¹ Ahaw, Gazlavay a zəlkwār na, nga key kəne, maja *Kəriste may, ta sərey banay la maja akwar. Anda kede, ta wuzkwār cəved la amba ka kam cek anda anğa ma ka. ²² Yesu na, ta key mebərey daa ba səlak, ta mbərzley kwa dey pal daa ba.

²³ Daa masa fa cədmara na, ta cədtā daa ba. Daa masa fa sərdamara banay na, kwa ta key həma a ray ata daa ba. Ama a pa mewulkey anğa na, a ray Gazlavay, ndaw ma ka sariya ta cəved e. ²⁴ Daa masa ata fa dərmara fa hwadam mazlanğalakaya na, ta la mebərey aləkwa sem cəpa a ray anğa. A ka kəne na, amba ya mbəkdakwa mekey mebərey, ya kakwa cek ta cəved e anda Gazlavay ma wudfey. Ara ta fa banay anğa ha ngene, aləkwa ma ləhkwa. ²⁵ Ahaw, zleezle na, akwar anda təbañ hay maazədtakaya, ama wure kede, Gazlavay ta vəhdakurwa sem asi har nga mecəkwer akwar ma da jədkwar.

3

Mey da ray ngusay ta da ray zel hay

¹ Anda ndəhay ma namatar ray a bay ata hay na, akwar ngusay may, namatar ray a zel akwar hay. Anda kede, da zel hay ma təba mey nga Gazlavay ba daha na, a mbəddamara mevel ata la, a təbmara mey nga Gazlavay la maja menjey akwar, anğa maaya. Kwa anja akwar taa

2:16 2.16 1Kwr 6.11, 19-20; Gal 5.13 **2:17** 2.17 1.22; 3.16; MM 24.21; Mt 22.21; Gal 6.10; Fəl 2.12 **2:18** 2.18 Ef 6.5-8 **2:18** 2.18-3.7 Ef 5.21-6.9 **2:19** 2.19-20 5.12 **2:20** 2.20 4.14 **2:21** 2.21 Mt 16.24; 20.26-28; Jan 13.15; Rm 15.5 **2:22** 2.22 Iz 53.9; Jan 8.46; Heb 4.15 **2:23** 2.23 3.9; Iz 53.7; Mt 26.55-56, 67; 27.14, 27-31 **2:24** 2.24 Iz 53.4, 5; Rm 6.2, 11; Kwa 2.14; Heb 9.28 **2:25** 2.25 Iz 53.6; Ez 34.5-6; Mt 9.36; Jan 10.16; Heb 13.20

guzlmatar mey pal daa ba na, a təbmara mey nga Gazlavay la, ² maja zel akwar hay fa nəkmara menjey akwar masa maaya, asaya, a səmra akwar fa namatar ray.

³ Ka da wulkam a ray mediyey vaw nga mbey ba. Anda meləvey, metərdey ray nga zlepey, mepey dangwa nga bərey magaza ta bersle ma hədkey ba, asaya, mepey zana nga sləmay. ⁴ Ama maaya na, membey akwar a bawa ta daa mevel akwar. Anda meləvey, təram ngusay meekwed-mey, ngusay ta zazay ta ndəhay. Kede he ara cek maaya ma ndəvey ba. Ara cek ma mbey fa dey nga Gazlavay ma fənta cek hay tabiya. ⁵ Ara anda kede, ngusay masa zleezle ma səpmara cəved nga Gazlavay ta mevel pal ma təram nga ngusay ma mbam. A namatar ray a zel ata hay, ⁶ anda zleezle Sara ma nar ray a zel e, *Abərahəm. A zəla «Bay adaw». Anda kede, da akwar fa kam sləra maaya ta mandərzay daa dey daa ba na, akwar anda dam anga hay.

⁷ Akwar zel hay may, si ka kamatar maaya a ngwas akwar hay. Səmra ata na, gədan pəreh. Həslmatar ray, maja ata may, Gazlavay ta vəltar heter la anda aa ma vəldakwara maja maaya anga. Da akwar fa kamara kəne na, kwa cek fa da təkə Gazlavay nga təba medərey-dangay akwar na, daa ba.

Mey da ray mesərey banay maja mekey cek ta cəved e

⁸ Yaw, mey adaw mekele daha saya. Maaya na, akwar cəpa ka cəmam fay, ka səram dey-ceceh da wuzlah akwar, ka wudam vaw da wuzlah akwar maja akwar məlman hay daa mey nga Gazlavay. Kam maaya a ndəhay. Ka da pamara ray akwar nga mahura da ray ndəhay ba. ⁹ Da ndaw fa kakwar cek maaya ba na, ka da madamara ba. Da ndaw fa cədkwar na, ka da cədmara ba. Sasəkar jak, ləvmar a ndaw aha na, «Gazlavay nga kaka maaya», maja daa masa Gazlavay ma zəlkwar nga tərey ndəhay anga hay na, ta ləvkwar la a da kakwar maaya. ¹⁰ Mawuzlalakaya daa dərəwel nga Gazlavay, a ləvey:

«Ndaw ma wudəy nga njeý maaya ta meesəmey na,
si a kərza megewec nga mey anga
 amba aa guzley mey malamba ba,
si a mbəkda membərzley.

¹¹ Asaya, nga mbəkda mekey cek maaya ba,
 nga key cek maaya,
 nga səpey amba a njeý ta zazay ta ndəhay
 mandaw mandaw.»

3:1 3.1 1Kwr 7.16; Ef 5.22-24 **3:3** 3.3 1Tm 2.9 **3:7** 3.7 Ef 5.25-28; 1Tm 2.8

3:8 3.8 1.22; Ef 4.2-3; Fəl 2.2-3 **3:9** 3.9 2.23; Jəw 31.30; Mt 5.44; Rm 12.17

3:10 3.10-12 Ps 34.13-17; Jak 1.26

¹² Fara fara, Bay Gazlavay fa nəkfatar dey
fa ndəhay ma ka cek ta cəved e,
aa fa jəkfatar sləmay daa medərey-danğay ata.
Ama ndəhay ma ka mebərey na,
Bay Gazlavay a mbədfar dəba.

¹³ Anda keđe, da akwar fa kam cek maaya ta cəved e ta mevel akwar cəpa na, ma da gwa nga kakwar cek maaya ba na, wa? ¹⁴ Kwa da akwar fa səram banay maja akwar ma kam cek ta cəved e na, ngene, maaya nga Gazlavay aa da ray akwar. Anda keđe, ka da zluram ta ndəhay ma da sərdamakwar banay ba, ray akwar a da həbəy ba.

¹⁵ Ama daa mevel akwar na, həslmar ray ngada *Kəriste pal taava anğa. Anğa na, Bay akwar Mahura. Njam vaw madfiykaya mandaw mandaw amba da aa cəfdamakwar ka pamara mewulkey akwar a ray Kəriste maja me na, ka mbədfamatara maaya maaya. ¹⁶ Ka mbədfamatara na, ta mey maakwad a, ta meney ray, ta mevel maaya. Anda keđe, da faa guzlam mey maaya ba da ray menjey akwar maaya daa cəved nga Kəriste na, hwaray a katar la. ¹⁷ Fara fara, da Gazlavay a wudəy ka sərey banay na, ngama mesərey banay da ray mekey cek maaya, da ray mesərey banay da ray mekey cek maaya ba.

¹⁸ Ahaw, Kəriste ta ray anğa ta sərey banay la, ta vəlda ray anğa la dey pal nga məcey nga mbəkey mebərey nga ndəhay tabiya. Anğa na, ara ndaw manjar mebərey, a məcey a na, maja ndəhay ta mebərey. A ka kəne amba a handata ndəhay fa Gazlavay. A kədmara vagay na, daa masa anğa ndaw-magədan, ama ara *Mesəfney nga Gazlavay ma sləkfdərwə. ¹⁹ Anda keđe, ta fa Mesəfney a na, ta daw la nga wuztar mey nga Gazlavay a mesəfney hay magərcatakaya *. ²⁰ Mesəfney hay a ngene na, ara mesəfney nga ndəhay masa zleezle ma cənmar mey a Gazlavay ba. Gazlavay fa səkwta ta dək-vaw daa masa Nəwe faa cada kwambiwal mahura heyey. Daa ngene, ndəhay ta mbəzam la aa kwambiwal a, yam ta handata la, ta ləham la. Ma ləham a na, ndəhay ga daa ba, ndəhay daanğafad gway. ²¹ Ngene na, a wuzwa *baptem ma ləhdakwar daa mebərey wure keđe. Mekey baptem na, ara nga pərey dəlay fa vaw ba, ama ara nga jəwey mey ta Gazlavay ta mevel maaya mapərkaya. Baptem

3:13 3.13 Rm 13.3 **3:14** 3.14 4.14; Mt 5.10 **3:15** 3.15 1.3-5; Kwa 4.6

3:16 3.16 2.15 **3:18** 3.18 2.21; Rm 5.6-8; 6.10; Heb 4.15; 7.27 * **3:19** 3.19

mesəfney hay magərcatakaya: Ara mesəfney nga ndəhay masa ma təbmara mey nga Nəwe ba, da daa ba, ara maslan hay ma cənmar mey a Gazlavay saba. Ata daa slam mesəkwey sariya nga Gazlavay. **3:19** 3.19-20 MC 6.2; 2Pi 2.4; Jud 6 **3:20** 3.20 MC 6.14-22

e, a ləhdakwar na, maja Yesu Kəriste ma sləkɔfawa daa meməcey. ²² Yesu Kəriste he na, ta təpey sem a vad, manjakaya ta har-zəmay ŋga Gazlavay. Fa wey da ray maslaŋ hay ta cek hay mekele mekele masa ta gədaŋ da gazlavay da vad.

4

Mey da ray menjey zleezle ta masa wure keɔe

¹ Ya sərkwaa daa masa *Kəriste aŋga ndaw-magədaŋ na, ta sərey banay la ga. Maja ŋgene, akwar may, kam gədaŋ, wulkam letək anda aŋga da ray mesərey banay, maja kwa waawa ma bəsa banay na, a key mebərey saba. ² Dəga wure keɔe haa kasl fa meməcey akwar na, ka da kam cek anda mevel ŋga ndaw-magədaŋ ma wudəy ba, ama kam cek anda Gazlavay ma wudəy. ³ Menjey akwar masa zleezle na, aŋga anda menjey ŋga ndəhay ma sərə Gazlavay ba. Ka ta njam la ga daa mekey cek ma ka hwaray, daa mekey dey fa cek ŋga ndaw, daa mewey, daa mekey wasa malamba, daa mesey wuzam kalah. Asaya, akwar ta nam ray la ŋgada kuley hay mekele mekele. Ŋgene, ara cek maaya ba kalah, mak dəba. ⁴ Fara fara wure keɔe, ndəhay ma sərə Gazlavay ba fa rəzlam ga da ray akwar, maja akwar fa kam cek hay malamba ta ata daa saba. Maja ŋgene, ata fa cəɔfmakwar. ⁵ Ama pas pal na, a kadamara cek hay maaya ba masa ata ma kamara ha ŋgene la a Gazlavay, ndaw masa ta diya vaw cay ŋga katar sariya a ndəhay masa ta dey leŋ a ndəhay masa maməctakaya. ⁶ Ara maja ŋgene, Kəriste ma wuzda *Mey-maaya-mawiya kwa ŋgada ndəhay maməctakaya. Ahaw, Gazlavay ta katar sariya sem, anda aŋga ma katar sariya a ndəhay tabiya *. Ama, a wuztar Mey-maaya-mawiya ha na, amba Mesəfney ŋga Gazlavay a vəltar gədaŋ ŋga njeŋ maaya maaya anda Gazlavay.

Mey da ray menjey da wuzlah ndəhay ma təba meŋ ŋga Gazlavay

⁷ Gweegwe cay bəla a ndəvey. Anda keɔe, wam vaw, pam leŋgesl fa ray akwar, amba ka gwamara ŋga dərmar danɔay a Gazlavay. ⁸ Cek mahura na, wudam vaw da wuzlah akwar ta mevel pal, maja da mewudəy-vaw daha na, ka gwamara ŋga mbəkdamara mebərey ŋga ndəhay

3:21 3.21 Rm 6.3-4; Heb 10.22 **3:22** 3.22 SNM 1.9; Ef 1.21; har-zəmay: Mt 22.44; Rm 8.34; SNM 2.33 **4:1** 4.1 2.24; 2Kwr 4.10; Gal 5.24 **4:2** 4.2 2.21

4:3 4.3 Gal 5.19-21; Ef 2.3; Tit 3.3 **4:5** 4.5 1.17; 2Tm 4.1 * **4:6** 4.6 katar sariya a ndəhay tabiya: Sariya a wudəy ŋga ləvey meməcey. Ndəhay tabiya a məcām la dey pal. Nəka CWJ 20.6. **4:7** 4.7 1Kwr 10.11; 1Tes 5.5-8; 1Jn 2.18

dey ga †. ⁹ Təbmata ndəhay ma samawa a way akwar maaya maaya ta meesəmey ta menjərbey-mey ba. ¹⁰ Kwa waawa na, Gazlavay ta vəlar gədan la wal nga key cek. Kwa waawa nga kada sləra ta gədan a nga jəney ndəhay mekele. Anda keđe, ka da təram ndəhay ma ka sləra hay maaya ta gədan wal wal masa Gazlavay ma vəlda a ndaw a, a ndaw a. ¹¹ Da ndaw aa ta gədan ngaa guzley na, nga wuzey mey nga Gazlavay. Da ndaw a wudəy nga jəney ndəhay na, nga jənta ta gədan masa Gazlavay ma vəldara. Kamara kəne amba ndəhay tabiya a həlmamara Gazlavay ta fa Yesu *Kəriste maja cek hay tabiya masa akwar ma kamara. Ara anğa ndaw masa ta gədan, ndaw masa fa həlmamara nga sərmataw. *Amen.

Mey da ray mesərey banay maja Yesu Kəriste

¹² Jam adaw hay, da banay hay maadaw a mekele mekele a sawa a ray akwar na, ka da rəzlam maja ba. Banay a, a sawa na, nga jadakwar amba Gazlavay a nəka mevel akwar, da akwar fa təbmara mey anğa fara fara kwa. Ara cek merəzley ndaw ba. ¹³ Da masa akwar fa səram banay anda *Kəriste ma səra na, ngene sasəmam. Anda keđe, ta pas masa ndəhay tabiya ma da hətmar gədan anğa ma da wuzwa na, kaa səmam la ga ma fəna saya. ¹⁴ Da a cədmakwar maja akwar ndəhay nga Kəriste na, ngene, maaya nga Gazlavay aa da ray akwar, maja *Mesəfney nga Gazlavay, Mesəfney masa ta gədan ma fənta cek hay tabiya aa da ray akwar. ¹⁵ Da ndaw da wuzlah akwar a sərey banay maja aa ma key cek maaya ba, da daa ba, aa ma kədəy ndaw vagay, aa ma leley, da daa ba, aa ma ndəkwey aa mey nga ndəhay na, ngene, ndaw fa daa həmda maja banay a daa ba. ¹⁶ Ama da ndaw a sərey banay maja anğa ndaw nga Kəriste na, ngene, hwaray a da kar maja ba. Sasəkar jak, nga həlma Gazlavay maja ata ma zəlmara ndaw nga Kəriste he.

¹⁷ Pas a ta wuswa cay amba Gazlavay a katar sariya a ndəhay. A da zlar na, ta fa aləkwa ndəhay anğa hay. Da a zlar ta fa aləkwa ndəhay anğa hay na, kaa wara ndəhay ma təba *Mey-maaya-mawiya nga Gazlavay ba na, a da kam kwara? ¹⁸ Mawuzlalakaya daa dərewel nga Gazlavay, a lövey:

† **4:8** 4.8 Nəka 1Kwr 13.5; Ef 4.32ta Mt 18.21-22.Ndəhay mekele a wulkam mey a, a gwa nga lövey «...da ka wudam ndəhay na, Gazlavay a da mbəkdandakwara mebərey aləkwa.» Nəka Mt 5.7. **4:8** 4.8 1.22; Jak 5.20 **4:9** 4.9 Heb 13.2 **4:10** 4.10 Rm 12.6-8 **4:11** 4.11 Rm 12.7; 1Kwr 10.31; 12.8; Jak 3.1 **4:12** 4.12 1.7 **4:13** 4.13 5.1; 2Kwr 4.10; Rm 5.2 **4:14** 4.14 2.20; 3.14; Mt 5.10-12; Mk 13.11; SNM 7.55 **4:16** 4.16 2Tm 1.8 **4:17** 4.17 Jer 25.29; Ez 9.6; 2Tes 1.8

«Da ndəhay ma ka cek maaya ta cəved e
a da ləham ta gəra na,
kaa wara ndəhay maaya ba ma rəsmara Gazlavay na,
a da kam kwara?»

¹⁹ Da anda keđe na, ndəhay ma səram banay fa cek masa Gazlavay ma wudey na, ɲga vəldamara ray ata tabiya ɲgada Gazlavay, ndaw ma ləmtərwa, ma nəkfatar dey mandaw mandaw. Asaya, ɲga kam cek maaya mandaw mandaw.

5

Mekətey ɲgada ndəhay ɲga Yesu

¹ Wure keđe, ya faa guzltar a *bay-ray hay ɲga Egəliz da wuzlah akwar. Yah may, yah bay-ray anda ata. Daa masa *Kəriste fa sərey banay na, ya ta hətər la ta dey adaw. Asaya, ya mbəzey la a wuzlah ndəhay masa ma da hətəm mewedey ɲga Kəriste masa Gazlavay ma da wuzdərwa.

² Da ray ɲgene, akwar bay-ray hay, ya fa kakwar ambahw, nəkfamatar dey fa ndəhay ma təba mey ɲga Yesu masa Gazlavay ma pata asi har akwar, anda ndaw-mecəkwer ma nəkey dey fa gənaw anɲa hay. Nəkfamatar dey ta mevel akwar cəpa anda Gazlavay ma wudey, ta metəkey dāy ba. Ka da kamara sləra ha maja dala ba, ama kamara maja ka wudmata ndəhay a. ³ Ka da wam da ray ndəhay masa Gazlavay ma pata asi har akwar a ta maagway ba, ama tərəm ndəhay maaya fa mey ata amba a nəkam dey fa akwar. ⁴ Anda keđe, ta pas masa Yesu Kəriste, mecəkwer mahura, ma da vəhwa na, a pəlkwara mawurbay akwar la, a da njadakwar aa slam-mewedey ma da njeɲ ɲga sərmataw.

⁵ Akwar gula hay, ya fa ləvkwar, namatar ray a ndəhay mahura hay da wuzlah akwar. Akwar cəpa, kwa waawa ɲga nar ray a ndaw a, a ndaw a da wuzlah akwar, asaya, jənam vaw da wuzlah akwar, maja mawuzlalakaya daa dərewel ɲga Gazlavay, a ləvey:

«Ndəhay masa ma zlapam na, Gazlavay a mbədtar dəba la. Ama ndəhay meekwed-mey na, Gazlavay a katar maaya la.»

⁶ Da anda keđe na, namar ray a Gazlavay, ndaw ma wey da ray cek hay tabiya amba a pakwar ɲga mahura hay ta pas anɲa ma wudey. ⁷ Kwa meeme ma həbkwar ray na, mbəkdamara tabiya a har anɲa, maja anɲa na, ara ndaw ma nəkfakwar dey.

⁸ Wam vaw, ka da nam d̄ar ba! Masa-ḡera akwar, *Satan̄, bay-malula, fa p̄okey ta wura ta wura nga k̄erzey kwa waawa, anda mabar ma key h̄oma nga k̄erzey cek amba a hamb̄oda. ⁹ Jaram, ka da v̄elmar c̄oved̄ nga wey da ray akwar ba. Pamara Gazlavay nga ndaw akwar fara fara mandaw mandaw. S̄ermara, m̄elmakw akwar hay ma t̄eba mey nga Yesu da b̄ela tabiya ta s̄eram banay la anda akwar may. ¹⁰ Banay akwar a na, fa da n̄jey nga s̄ermataw daa ba. Ama Gazlavay ndaw ma kandakwar maaya mandaw mandaw ta z̄əndakwar la nga n̄jey daa mewed̄ey an̄ga nga s̄ermataw daa masa al̄ekwa mac̄əmkaya ta K̄eriste. Anda ked̄e, Gazlavay ta ray an̄ga, a da t̄erdakwar nga nd̄əhay masa ta ḡədan̄, majaratakaya, kwa daa meeme, kwa ndaw ma da gwa nga t̄əfdakwar daa ba. ¹¹ Anja nga n̄jey an̄ga ndaw masa ta ḡədan̄ nga s̄ermataw. *Amen.

Mecey-har nga madagway-dakw

¹² Silas ta j̄ənya la nga wuzlalakwara leeter mec̄əhe ked̄e. An̄ga na, ara m̄elma al̄ekwa masa yah ma pa nga ndaw ad̄aw fara fara. Ya wuzlalakwara na, amba ya v̄əlkwar ḡədan̄, asaya, ya wud̄ey nga wuzdakwara fara fara maaya nga Gazlavay aa da ray akwar. Njam ta maaya nga Gazlavay, ka da mb̄əkdamara ba s̄əlak.

¹³ M̄elma al̄ekwa hay daa *mec̄əmey-ray nga nd̄əhay nga Yesu fed̄e da *Babilan̄w * masa Gazlavay ma walata anda akwar, a camakwar har. Yaw, Mark masa yah ma pa anda b̄əzey ad̄aw, a cakwar har may. ¹⁴ Cam har da wuzlah akwar maaya maaya anda akwar m̄əlman̄ hay.

Anja Gazlavay nga njadakwar daa zazay, akwar tabiya, nd̄əhay masa nga K̄eriste.

5:8 5.8 Ps 22.14; 1Tes 5.5-8 **5:9** 5.9 Ef 6.11-12; Jak 4.7 **5:10** 5.10 1Tes 2.12

5:12 5.12 Silas: 1Tes 1.1 * **5:13** 5.13 Babilan̄w: Har-ḡədan̄ nga nd̄əhay a wulkam «Babilan̄w» ara Rawm, berney mahura masa bay Rawma ma n̄jey da hwad̄ a. N̄əka CWJ 17.5. **5:13** 5.13 Mark: Flm 24 **5:14** 5.14 Rm 16.16; 2Kwr 13.11

**Leeter masa
Piyer
ma wuzlala nga dey cew
Mey da ray
Leeter masa Piyer ma wuzlala nga
dey cew**

Ara Simanjw Piyer, ndaw-meslōrey nga Yesu Kōriste, ma wuzlala saya. A wuzlalatarā ngada ndōhay nga Yesu daa Egēliz hay da bēla tabiya.

A wuzlala leeter e na, maja a sōra gweegwe cay a mōcey. A wudēy fa dōba anga na, ndōhay a sōrfadamara meesārkedey anga (1.13-14). Daa ngene, ndōhay ma tōba mey nga Yesu ngēeme ga ta mōcam sem, ama kwa Yesu ta vōhwa daa ba aran. Da ray ngene, ndōhay ga ray ata fa hōbey maja. Asaya, ndōhay maa sōrkada ndōhay ta membōrzley lej ndōhay maaya ba hay ta samawa la a wuzlah ndōhay daa Egēliz. Aa sanjōram a ray ndōhay ma ka cek ta cōved e.

Daa fasōlawal 1 Piyer a lōvtar nga kam gōdan nga njeý daa metōbey mey nga Gazlavay anda Gazlavay ma zōlta. Daa fasōlawal 2 a lōvtar nga pam lengesl ta ndōhay maa sōrkadam mey masa fara fara ba, asaya, nga pam lengesl ta ndōhay maaya ba hay. Daa fasōlawal 3 a lōvtar nga wam vaw fa menjeý ata, si a vōldamara ray ata fara fara a Gazlavay maja Yesu fa da vōhwa. Yesu a wuswa vaw fiyaw ba na, maja a wudēy ndōhay a mbōfdamara menjeý ata, asaya, a wudēy kwa ndaw pal aa zōdēy ba (3.9, 11).

Daa leeter e kedē na, mey mekele mekele daha nga vōley gōdan a ndōhay:

Mey da ray Gazlavay ma vōldakwar cek hay cōpa nga jōndakwar (1.3-4)

Mey da ray ndōhay ma da tōram nga ndōhay ma-jaratakaya masa ta gōdan (1.5-8)

Mey da ray dār pal ta mevey pal, ata letek fa Gazlavay (3.8)

Mecey-har

¹ Ara yah *Simanjw *Piyer ma wuzlalakwara leeter kedē, yah ndaw ma ka slōra nga *Yesu *Kōriste, asaya, yah ndaw anga meslōrey.

Leeter e kedē ara ngada akwar ndōhay ma tōba mey nga Yesu. Daa metōbey mey a na, akwar ta hōtam cek maaya la

anda ala. Ya tɔ̀bkwa mey nga Yesu na, maja Yesu a vɔley cɔved ngada kwa waawa nga lɔhey, a weley ndaw ta weley ba. Yesu Kɔriste na, ara Gazlavay, ndaw ma lɔhdandakwar.

² Anja *Gazlavay nga pɛskwar mey, nga njadakwar daa zazay anga ma fɔna ma fɔna maja akwar ma sɛrmara Gazlavay ta Bay alɔkwa Mahura Yesu maaya maaya cay.

Ndɔhay nga Gazlavay a da njam na, kwara?

³ Gazlavay ta vɔlndakwar cek hay cɔpa la ta fa gɔdan anga amba ya njakwa macɛmkaya ta anga, ya kakwa cek fara fara anda aa ma wudɛy. Ara Gazlavay a ma wuzdandakwara ndaw masa ma zɔlndakwar amba ya sɛrkwa gɔdan anga fara fara, asaya, amba ya hɔtkwa maaya anga. ⁴ Ara ta fa gɔdan anga lej ta fa maaya anga ha, anga ma vɔlndakwar cek hay maaya mahura masa aa ma lɔvey a da vɔldandakwara dɔga zleezle heyey. Cek hay a na, maaya kalah, a fɔna cek hay tabiya. A ka anda kedɛ na, amba ta fa cek hay a kedɛ na, ka lɔham fa mewulkey maaya ba ma nɛsa ndaw da bɔla kedɛ. Asaya, a ka anda kedɛ amba ka tɔram ndɔhay ta mevel maaya anda anga.

⁵ Maja ngenɛ, kam gɔdan. Daa menjey akwar na, kam cek ta cɔved e maja akwar ma pamara Yesu *Kɔriste nga ndaw akwar fara fara. Da masa akwar fa kamara kɔne na, kam gɔdan saya nga sɔrey Gazlavay ta nga sɔrey cek masa aa ma wudɛy. ⁶ Da akwar ma sɛrmara cek hay masa Gazlavay ma wudɛy la na, maaya, ka wam vaw fa ray akwar may. Da akwar ma wam vaw la fa ray akwar na, maaya, ka bɛsmara banay hay tabiya may. Da akwar ma bɛsmara banay hay tabiya la na, maaya, ka vɔldamara ray akwar fara fara a Gazlavay anda anga ma wudɛy may.

⁷ Da akwar fa vɔldamara ray akwar fara fara a Gazlavay na, maaya, ka wudɛm vaw da wuzlah akwar anda mɔlman hay may. Da akwar fa wudɛm vaw da wuzlah akwar na, maaya, ka wudɛmata ndɔhay mekele hay may. ⁸ Da akwar fa kamata cek hay a kedɛ ma fɔna ma fɔna na, ngenɛ, ka tɔram ndɔhay masa ta gɔdan ma ka cek maaya la. Anda kedɛ, ka sɛrmara Bay alɔkwa Mahura Yesu Kɔriste la ma fɔna. ⁹ Ama ndɔhay ma kamata cek hay a kedɛ ba na, a hɔtmar dey maaya maaya ba, ata anda wulaf hay. Ndɔhay a ngenɛ, Bay Gazlavay ta mbɔkdatara mebɔrey ata masa zleezle sem na, a sɛrfadamara saba daw?

¹⁰ Mɔlma adaw hay, Gazlavay ta zɔlkwar sem, ta walakwar sem. Maja ngenɛ, kam gɔdan ma fɔna saya amba ka njam maaya maaya anda Gazlavay ma zɔlkwar, ta aa ma

walakwar ṅgene. Da akwar fa kam cek hay anda ṅgene na, ka zlanḡadam daa cæved ṅga Gazlavay daa ba. ¹¹ Anda keḡe, Gazlavay a vølkwar cæved la ta meesømey amba ka mbøzam aa mewey ṅga Yesu Køriste ma da njey ṅga sørmataw. Yesu Køriste na, Bay aløkwa Mahura, ndaw ma læhdandakwar.

¹² Ara maja ṅgene, kwa ka sørmata cek hay a, asaya, kwa akwar fa tøbmara mey fara fara masa akwar maa sørkadamara cay maaya maaya na, ya fa sørfadakwara cek hay a cøṅga. ¹³ Anda keḡe, daa masa yah daha ta dey da bøla keḡe na, maaya na, ya sørfadakwara cek hay a saya amba kaa zøfdamara daa ray ba. ¹⁴ Ya fa søra mamba cay ya møcey anda Bay aløkwa Mahura Yesu Køriste ma wuzdiwa. ¹⁵ Anda keḡe, ya køḡey vaw la ta gøḡaḡ adaw cøpa amba kwa daa masa yah daa saba na, ka gwamara ṅga sørfadamara cek hay a mandaw mandaw.

Mey da ray mewedey ma sawa a ray Yesu

¹⁶ Ahaw, zleezle, ala ta kadamakwara mey da ray masawa ṅga Yesu *Køriste Bay aløkwa Mahura la, ndaw masa ta gøḡaḡ. Ya kadamakwara ha na, anda ndøhay ma kam mamba saw køne ba, ama ala ta dey ala, ya ta høtmar gøḡaḡ aṅga la, gøḡaḡ a, aa mahura. ¹⁷ Fara fara, Gazlavay Papan ta høslar ray la, ta slørwa mewedey la a ray a daa masa ḡay ṅga Gazlavay Mawaca-waca ma cønwa, ma løyey: «Keḡe he, ara Bøzey adaw masa yah ma wuḡa kalah, ya faa sømey ga da ray a.» ¹⁸ Daa masa ala bama ta ata Yesu a daa ray ṅga aṅwa ṅga Gazlavay na, ḡay a ma cønwa da gazlavay da vad la, ala ma cøndamara la ta slømay ala.

¹⁹ Ala ma cøndamara ḡay a ṅgene na, ta vølnḡar gøḡaḡ la saya ṅga tøbey mey ṅga ndøhay ma tøla mey ṅga Gazlavay ma kadamara zleezle. Maaya na, ka pam lenḡesl fa mey ata ha maja mey a na, aṅga anda petørla ma wedey daa slam-løvay haa slam ma wurey, haa batay * ma bawa. Fa døba ha, ka da høtmatar cek hay tabiya maaya maaya. ²⁰ Ya fa løvkwar, mey ṅga ndøhay ma tøla mey daa ḡerewel ṅga Gazlavay zleezle na, kwa ndaw pal ma gwa ṅga wuzda ta gøḡaḡ aṅga daada na, daa ba. Keḡe ara mey mahura ṅga sørey teesed ḡagay. ²¹ Mey ṅga ndøhay ma tøla mey

1:11 1.11 2Tm 4.18; ndaw ma læhdandakwar: 2.20; 3.18; Tit 3.6 **1:12** 1.12 Jud 5 **1:14** 1.14 2Kwr 5.1; 2Tm 4.6; Jan 21.18-19 **1:16** 1.16-18 Mt 17.1-8

* **1:19** 1.19 batay: Ara «wurzla-baṅgay» ta mey Møkaṅ. A wuḡey ṅga løyey Køriste. Nøka daa CWJ 22.16.Aa guzley da ray mavøhwa ṅga Yesu a bøla, da daa ba, da ray pas masa ndaw ma tøba Yesu aa mevel aṅga. **1:19** 1.19 Ps 119.105; Rm 1.2; 13.12; 1Pi 1.10-11

nga Gazlavay daa derewel e na, ara mewulkey nga ndaw-magədan ba, ama ara *Mesəfney nga Gazlavay ma vəltar gədan nga wuzda mey ma sawa ta fa Gazlavay.

2

Mey da ray ndəhay maa sərkada ndəhay ta membərzley

¹ Zleezle na, ndəhay ma pamara ray ata nga ndəhay ma təla mey nga Gazlavay daha da wuzlah ndəhay *Israyel hay. Ndəhay maa sərkada ndəhay ta membərzley a samawa la a wuzlah akwar kəne may. A da samawa na, ngaa sərkadangwar mey membərzley ngaa zəfdakwar. Anda keđe, a da rəsmara Bay Mahura Yesu, ndaw ma ləhdata. Maja ngene, Gazlavay a sərdata banay la fiyaw, aa zəfddata la. ² Ndəhay ga a təbmatara mey ata la, a da kam cek malamba anda ata. Ndəhay a daa guzlam mey maaya ba da ray cəved masa fara fara nga Gazlavay maja ata fa kam cek malamba anda ndəhay ma mbərzley heyey. ³ Ndəhay maa sərkada ndəhay ta membərzley ngene na, a kam dey fa cek nga ndəhay kalah. A fəcmakwara cek akwar hay cəpa ta mey ata hay membərzley ngene. Dəga zleezle Gazlavay ta dəsla sariya ata cay. Anda keđe, a daa zəfddata fiyaw.

⁴ Ya ləvey anda keđe maja kwa maslan hay nga Gazlavay da vad masa ma kam mebərey ma!, Gazlavay ta sərfatar dey-ceceh daa ba, ta kəzlata sem aa slam mesərey banay. Fetede, majəwtakaya daa ləvan ta calalaw, fa səkwmara pas masa Gazlavay ma da dəsla sariya da ray ata. ⁵ Kwa ndəhay masa zleezle ma kam mebərey may, Gazlavay ta sərfatar dey-ceceh daa ba. Gazlavay ta pawa var la mahura, yam ta rəhda bəla la, bəla masa ndəhay malamba ga da hwad a, yam ta həlta sem cəpa. Si Nəwe, ndaw maa guzlar a ndəhay nga kam cek ta cəved e, ta ndəhay da way anga hay maasala ma ləham gway. ⁶ Asaya, Gazlavay ta katar sariya la ngada ndəhay daa berney nga *Sadawm ta nga *Gwamar. Ta wawurta berney hay a sem ta ndəhay da hwad a cəpa kəlmedek! Anda keđe, Gazlavay fa wuzda ngada ndəhay masa malamba na, a da sərdata banay kəne.

⁷ Ndaw daa berney nga Sadawm a daha, mezəley *Lut. Anğa ndaw maaya ma ka cek ta cəved e. Mevel anğa fa cey kalah da ray ndəhay ma kam cek malamba. Anğa na, Gazlavay ta ləhda sem daa berney a ⁸ maja anğa ndaw maaya. Aa manjakaya ta way da wuzlah ndəhay a, anğa

1:21 1.21 2Tm 3.15-16 **2:1** 2.1 Mt 7.15 **2:1** 2.1-22 Jud 4-13 **2:3** 2.3 1Tm 6.5 **2:4** 2.4 1Tm 3.6; Jud 6; CWJ 20.1-3; Jud 6 **2:5** 2.5 3.6; 1Pi 3.20
2:6 2.6 MC 19.24-25; Lk 17.29; Jud 7 **2:7** 2.7 MC 19.1-16

fa hətatar cek hay malamba masa ndəhay a ma kamara, asaya, fa cənda mey hay maaya ba masa ndəhay a maa guzldamara. Cek hay a tabiya kefe fa car mevel kalah mandaw mandaw maja anğa na, ndaw ma ka cek ta cəved e. ⁹ Anda kefe, Bay Gazlavay aa ta gədanŋ nga ləhdata ndəhay masa ma namar ray. Asaya, aa ta gədanŋ nga pata ndəhay ma kam cek malamba ta cakay amba a sərdata banay ta pas masa anğa ma da katar sariya. ¹⁰ Ma da səram banay kalah na, ndəhay ma kam cek malamba saw anda vaw ata ma wudəy, a təbmara Bay Gazlavay nga wey da ray ata ba.

Ndəhay maa sərkada ndəhay ta membərzley heyey na, a kam cek anda ata ma wudam, a zlapam. A zluram nga cədmata maslanŋ hay nga Gazlavay daa slam-mewedəy da vad * ba. ¹¹ Maslanŋ hay nga Gazlavay da vad na, a fənmata ndəhay maa sərkada ndəhay ta membərzley heyey ta gədanŋ. Ama maslanŋ hay a fa cədmata ndəhay mahura hay a fa mey nga Bay Gazlavay daa ba. ¹² Ndəhay a na, a kam cek hay saw anda cek hay nga ley manjar lenğesl masa makatakaya nga kərzey ta nga kədey. A cədam cek hay masa ata ma sərmara ba. Anda kefe, a da məcam saw anda cek hay nga ley. ¹³ Ta sərdata banay la ta ndəhay. Anda kefe, Gazlavay a da sərdata banay maja may. Maa səmdata na, ara mekey cek malamba fa mey nga ndəhay gway, kwa taa pas. Daa masa akwar fa zəmam cek bama, ata faa səmam nga batamakwar na, ara cek maaya ba, ma ka hwaray. ¹⁴ A wulkam na, si nga ley vaw saw da palah gway. Mekey mebərey na, a bəltar mey ba. A batam nga key mebərey na, ndəhay masa ta gədanŋ pəreh daa mey nga Gazlavay. Ara ndəhay ma wudam cek mandaw mandaw na, si ngada ata gway. Ndəhay a na, Gazlavay ta nəsta sem. ¹⁵ Ta zlanğadəm sem daa cəvedŋ nga Gazlavay, a lam cəved masa maaya ba anda nga ndaw mezəley Balam, bəzey nga Bawzar. Balam a na, ara ndaw zleezle ma key cek maaya ba nga hətey dala. ¹⁶ Balam a na, ara *ndaw ma təla mey nga Gazlavay. Ama Gazlavay ta mbədar ray la maja aa ma nar ray ba, haa madi-zəngwaw, cek ma gwa ngaa guzley ba ma! aa guzlar anda ndaw. Aa guzlar na, nga təka sləra anğa maaya ba saw ngene.

2:9 2.9 Jəw 4.7; 1Kwr 10.13; CWJ 3.10 * **2:10** 2.10 maslanŋ hay nga Gazlavay daa slam-mewedəy da vad: Ndəhay siya a wulkam ara maslanŋ hay nga Gazlavay, siya hay a wulkam ara maslanŋ hay maaya ba ma rəsmara Gazlavay zleezle. Nəka Jud 8-10. Ndəhay mekele a wulkam ara ndəhay mahura hay masa da cakay Gazlavay. **2:10** 2.10 Jud 7-8 **2:11** 2.11 Jud 9 **2:12** 2.12 Jud 10 **2:13** 2.13 Jud 12 **2:14** 2.14 Mt 5.28; 2Tm 3.6 **2:15** 2.15 Mesl 22.7, 17; Jud 11 **2:16** 2.16 Mesl 22.28-31

¹⁷ Ndohay maa sarkada ndohay ta membərzley a na, ata anda wurak masa yam maa səkey sem da hwaɗ a. Asaya, ata anda gazlavay ŋga var masa memed ma tɛra, ma pey var ba. Gazlavay ta diytar slam cay daa lɔvanj mebək-bək e.

¹⁸ Ata faa guzlam mey hay mezlepey saw kəne. A kam cek malamba saw anda ata ma wuɗam. Anda keɗe, fa batamata ndohay masa ma ləhmawa tɛlam dasi har ŋga ndohay masa ma sərmara cəved ŋga Gazlavay ba. ¹⁹ Ndohay maa sarkada ndohay ta membərzley a na, a ləvmatar a ndohay kwa waawa a da wey ray aŋga. Anja ŋgene, ata ray ata ha na, ata beke hay ŋga mebərey, maja kwa cek wura wura fa wa ndaw na, ndaw aha aŋga beke ŋga cek aha.

²⁰ Ndohay ma səpa Yesu *Kəriste Bay aləkwa Mahura, ndaw ma ləhdandakwar na, ta ləham cay daa cek hay maaya ba cəpa da bəla ma nəsa ndaw. Ama fa dɛba ha, da ndohay a, a mbəkdamara ray ata ŋga key cek maaya ba ha cəŋga na, ŋgene, cek aha fa wata. Anda keɗe, menjey ata a da nəsey ma fəna masa ŋgeeme. ²¹ Ngada ata na, ŋgama ta sərmara cəved maaya ŋga Gazlavay keɗe daa ba sələk, da ray masa ata ma sərmara cay, a mbəkdamara aa walaŋ, a namar ray a *mewey ŋga Gazlavay saba. ²² Cek aha keɗe aŋga letek anda mey a daha ma ləvey: «Gədey a kərdadərwa cek, fa dɛba ha, a vəhey, a zəma saya.» Asaya, anda mey a daha ma ləvey: «Vetem mapərkaya maaya maaya na, a vəhey, a ney aa ndələb.»

3

Mey da ray mavəhwa ŋga Bay Mahura

¹ Jam aɗaw hay, keɗe he ara leeter ŋga dey cew e masa yah ma wuzlalakwara. Daa leeter hay cewete keɗe na, ya fa sərfadakwara mey masa akwar ma sərmara cay amba ka wulkam maaya maaya da ray a. ² Ya wuɗey na, ka sərfadamara mey masa ndohay ma tɛla mey ŋga Gazlavay zleezle ma wuzdamara. Asaya, sərfadamara mewey hay ŋga Bay aləkwa Mahura, ndaw ma ləhdandakwar. Aa guzlkwar ta mey ndohay aŋga hay meslərey masa aŋga ma slərdata fa akwar ŋgaa sərkadamakwara. ³ Teesed na, ya wuɗey ka sərmara, masa gweegwe cay bəla a ndəvey na, ndohay ma kam cek saw anda ata ma wuɗam a samawa la. A daa sanjəram a ray akwar, ⁴ a da ləvam: «Naa! Yesu a ləvey a vəhwa la, kaa aa dama dɛba ama? Haa papaŋ ŋga papa aləkwa hay a məcām, ama ta vəhwa daa ba. Yaw, dɛga

2:17 2.17 Jud 13 **2:19** 2.19 Janj 8.34; Rm 6.16 **2:20** 2.20 1.11; Mt 12.45

2:21 2.21 Lk 12.47-48 **2:22** 2.22 MM 26.11 **3:1** 3.1 1Pi 1.1 **3:2** 3.2 Jud

17 **3:3** 3.3 Jud 18; 2Tm 3.1

nga mezley nga bəla haa wure keɗe kwa cek ta mbəɗey daa ba.»

⁵ Ndəhay maa guzlam anda keɗe na, cek pal daha ta sərɗadamara daa ba tesuɗe. Cek a na, ara Gazlavay ma ləma slam da vad ta slam da hwayak dɛga zleezle ta fa mey anɗa masa anɗa maa guzlda. A ləma slam da hwayak na, ta yam. A wunkata yam ta hwiyak wal wal. ⁶ Asaya, Gazlavay a pasla bəla zleezle, a rəhda ta yam. A ka kəne na, ta fa mey anɗa meeguzley. ⁷ Ara ta fa mey anɗa meeguzley a, slam da vad ta slam da hwayak masa wure keɗe a njeɗ haa pas masa Gazlavay ma da katar sariya nɗada ndəhay ta mebərey nɗaa zəɗɗata. Ta pas a nɗene, slam da vad ta slam da hwayak a daa wureɗ ta awaw.

⁸ Ama jam aɗaw hay, cek pal daha na, si ka sərɗadamara. Sərmara, fa Bay Gazlavay na, ɗar pal anda mevey gabal, mevey gabal may anda ɗar pal. ⁹ Ndəhay siya a wulkam cek masa Bay Gazlavay ma ləvey a ka la heyey na, a wuseɗ vaw nɗa ka ba. Ara kəne ba. Anɗa fa səkwakwar ta dək-vaw maja a wuɗey kwa ndaw pal aa zəɗey ba. Ama a wuɗey na, kwa waawa a mbəɗɗa menjeɗ anɗa, a mbəkda mekey mebərey.

¹⁰ Pas masa Bay Mahura ma da vəhwa na, a da sawa ɗərɗafay, anda ndaw-mayal. Ta pas a nɗene, ndəhay a da cənam cek ma rəvey ta gəɗanɗ. Daa nɗene, slam da vad a da yeyihey. Awaw a da wawurta cek hay da gazlavay da vad tabiya. Asaya, bəla ta cek hay da hwaɗ a cəpa a da yeyihey* . ¹¹ Da cek hay a tabiya a daa zəɗam anda keɗe na, maaya menjeɗ akwar a mbafar a Gazlavay. Si ka vəɗdamara ray akwar fara fara a Gazlavay anda anɗa ma wuɗey, ka səpmara Gazlavay a ta cəved e. ¹² Akwar na, fa səkwamara pas masa Gazlavay ma da sawa nɗa kar sariya a bəla. Anda keɗe, kam cek ta gəɗanɗ akwar cəpa amba ɗar a, a wuswa fiyaw fiyaw. Ta pas a nɗene, slam da vad a da wewureɗ, aa yihey cəpa, awaw a da wawurta cek hay da gazlavay da vad tabiya. ¹³ Gazlavay ta ləvndakwar la a da vəlndakwar slam da vad ta slam da hwayak mekele mawiya masa cek hay cəpa da hwaɗ a, a da key ta cəved e. Keɗe he ara cek masa aləkwa ma səkwakwa.

¹⁴ Ara maja nɗene, jam aɗaw hay, ya fa ləvkwar, daa masa akwar fa səkwamara ɗar a nɗene na, kam gəɗanɗ amba ka njam akwar ndəhay manjar mebərey, ndəhay maaya

3:4 3.4 Jer 17.15; Ez 12.22; Mt 24.27, 48-51 **3:5** 3.5 MC 1.6-9; Heb 11.3 **3:6** 3.6 2.5; MC 7.11-21; Mt 24.37-39 **3:8** 3.8 Ps 90.4 **3:9** 3.9 3.15; 1Tm 2.4

* **3:10** 3.10 a da yeyihey: Ndəhay siya a wulkam mey Gərek a ləvey: «bəla ta cek hay da hwaɗ a cəpa na, Gazlavay a da katar sariya.» **3:10** 3.10 1Tes 5.1-2; 1Pi 4.7 **3:12** 3.12-13 Iz 60.21; 1Kwr 6.9; CWJ 21.1, 27

fa mey nga Gazlavay, asaya, amba ka njam daa zazay ta anġa. ¹⁵ Sərmara dəba taw, Bay aləkwa Mahura Yesu *Kəriste na, fa səkwakwar ta dək-vaw, ta vəhwa fiyaw daa ba, maja a wufey ndəhay tabiya a mbəɸdamara menjey ata amba a ləham daa mebərey. Kede he ara cek masa məlma aləkwa Pawl, ndaw masa aləkwa ma wuɸkwa kalah, ma wuzlalakwara daa leeter anġa hay. A wuzlalakwara na, ta lenġesl masa Gazlavay ma vəldara. ¹⁶ Daa leeter hay masa aa ma wuzlalata cəpa na, da aa faa guzley da ray mey a kede na, aa guzley letek kəne. Daa leeter anġa hay a na, mey hay ta banay daha nġa cəney. Anda kede, ndəhay marəzltakaya len ndəhay ma səra cek maaya maaya ba na, a mbəɸdamara mey a wal, a wuzdamara ta cəved e ba, anda ata ma wuzdamara mey hay mekele daa cərewel nġa Gazlavay ta cəved e ba may. Ara anda kede, ata ma handamawa mey a ray ata nġaa zəɸdata.

Mey nġa madagway-dakw

¹⁷ Jam adaw hay, akwar na, ka sərmara, ala ma pa-makwar lenġesl cay da ray cek hay a. Da ray nġene, wam vaw fa ndəhay ma nəsa mey nġa Gazlavay. Ka da vəlmatar cəved nġa batamakwar ba. Da daa ba na, a da zlanġadadamakwar daa cəved masa akwar majaratakaya da hwad a nġene †. ¹⁸ Ama səpmara Yesu *Kəriste Bay aləkwa Mahura, ndaw ma ləhdandakwar, anda akwar ma kamara mandaw mandaw, amba a slərwa maaya nġa a ray akwar ma fəna ma fəna, asaya, amba ka sərmara Yesu a ma fəna ma fəna. Anja ndəhay nġa həlmamara dəga wure kede haa nġa sərmataw. [*Amen.]

3:15 3.15 3.9; Rm 2.4 † **3:17** 3.17 cəved masa akwar majaratakaya da hwad a nġene: A wufey nġaa guzley da ray metəbey-mey ata. **3:17** 3.17 Mk 13.5; 1Kwr 10.12; 1Pi 4.7 **3:17** 3.17-18 Jud 24-25 **3:18** 3.18 1.11

**Leeter masa
Jan
ma wuzlala ngeeme
Mey da ray
Leeter masa Jan ma wuzlala
ngeeme**

Leeter kede kwa mezoley nga ndaw da hwaɗ a daa ba na, ndəhay a wulkam ara Jan ma wuzlala. Asaya, ara anɗa ma wuzlala leeter nga dey cew e ta nga dey maakar a. Daa leeter hay a maakar ata na, mey da hwaɗ a, a sɛram ba ta mey daa *Mey-maaya-mawiya masa Jan ma wuzlala*. Ara Jan a ma wuzlala *Cek ma wuzar a Jan* may.

Jan ma wuzlalata leeter hay a kede na, anɗa maraw cay. A njeɗ da Efez. Daa nɗene Egəliz hay daa wura daa wura daha. Ndəhay mekele mekele fa pəkam nga wuzey mey a ndəhay daa berney hay. Ndəhay siya da wuzlah ata a wuzam mey maaya ba wal ta Mey-maaya-mawiya. Da ray nɗene, ndəhay a təbmara Mey-maaya-mawiya na, ara mey nga Gazlavay fara fara saba. A wulkam mebərey da ray ata daa ba. Yesu Kəriste ta sawa la a bəla anda ndaw-magədan na, a təbmara ba. Kwa a wudam mey nga Yesu ba. Meməcey anɗa na, ara cek nga tede nɗada ata.

Da ray nɗene, Jan a wuzlala leeter e kede na, a ləvey ndəhay a gwamara nga sɛmara Gazlavay, ray anɗa, ta Bəzey anɗa Yesu Kəriste. Ndaw nga Yesu fara fara na, ara ndaw ma wudta ndəhay nga Yesu siya hay.

Daa leeter e kede na, mey mekele mekele daha nga vəley gədan a ndəhay:

Gazlavay na, ara anɗa ma wada slam. Maaya na, ya nɗakwa daa mewedey a (1.5-7)

Da yaa cəfdakwa ambahw fa Gazlavay maja mebərey aləkwa na, a mbəkdandakwara la (1.8-10)

Ya da sərkwaa aləkwa bəza hay nga Gazlavay na, maja aləkwa fa wudkwa vaw (3.1-3)

Mey da ray mewudəy-vaw nga Gazlavay (4.7-10)

Mey da ray heter mendəvey ba (5.11-12)

Gazlavay fa jəkfatar sləmay fa bəz anɗa hay (5.14-15)

Mey da ray Yesu, ndaw ma vəltar heter a ndəhay

¹ Ya wuzlalakwara mey keɗe, da ray ndaw mezəley Mey * ɲga Gazlavay ma vɛltar heter a ndəhay. Dəga bəla ta zley daa ba araɲ na, aɲga daha. Ndaw a na, ala ta cəndamara mey aɲga la ta sləmay ala, ala ta hətmar la ta dey ala. Fara fara, ala ta hətmar la, ala ta gəsfamar la ta har ala. ² Daa masa ndaw ma vɛltar heter a ndəhay a ma wuzwa vaw na, ala ta hətmar la. Da ray ɲgene, ala fa kam sede da ray a, ala fa wuzdamakwara mey da ray heter mendəvey ba masa aɲga ma vɛlda ha. Ndaw aha, aɲga da cakay Papa aləkwa Bay *Gazlavay, aɲga ta wuzndar vaw la. ³ Cek masa ala ma hətmar ta masa ala ma cəndamara na, ya wuzdamakwara may amba ya ɲjakwa macəmkaya pal. Ya ɲjakwa macəmkaya pal, asaya, aləkwa macəmkaya ta Papa aləkwa leɲ ta Bəzey aɲga, *Yesu *Kəriste. ⁴ Ya wuzlalamakwara mey a keɗe amba ya ɲjakwa daa meesəmey masa fara fara.

Mey da ray slam-mewedey

⁵ Gazlavay na, ara aɲga ma waɗa slam, ləvaɲ fa vəɗa kwa nekəɗey daa ba. Keɗe ara mey masa ala ma cəndamərwə fa Yesu *Kəriste, ya kadamakwara.

⁶ Da ya ləvkwa aləkwa macəmkaya ta aɲga, anja aləkwa daa ləvaɲ cəɲga na, a key ɲgene, ya mbərzlakwa, aləkwa fa kakwa cek masa ta cəveɗ e daa ba. ⁷ Ama da aləkwa daa slam-mewedey anda Gazlavay manjakaya daa slam-mewedey na, aləkwa macəmkaya pal. ɲgene, mambaz ɲga Yesu, Bəzey aɲga, fa pərndakwara mebərey aləkwa tabiya.

⁸ Da ya ləvkwa aləkwa ndəhay ta mebərey ba na, ɲgene, a key ya təknaƙwa ray aləkwa ta har aləkwa, mey masa fara fara daa mevel aləkwa daa ba. ⁹ Ama da aləkwa fa wuzdakwa mebərey aləkwa a Gazlavay na, anda keɗe, a mbəkɗandakwara mebərey aləkwa la, asaya, a pərndakwara mevel aləkwa, cek hay maaya ba tabiya fa aləkwa daa saba, maja aɲga na, a mbərzley ba, a kata cek hay tabiya ta cəveɗ e. ¹⁰ Da ya ləvkwa aləkwa ta kakwa mebərey daa ba na, ya pakwa Gazlavay ɲga ndaw membərzley, mey aɲga daa mevel aləkwa daa ba.

2

¹ Bəz aɗaw hay, ya wuzlalakwara mey keɗe amba ka kam mebərey saba. Ama, da ndaw ta key mebərey la

* **1:1** 1.1 Mey: Fede na, «mey» ara Kəriste. Gazlavay a wuztar vaw a ndəhay na, ta fa Kəriste. Nəka Jan 1.1. **1:1** 1.1 2.13-14; Jan 1.1-2, 14; heter: 4.14; 6.35; 8.12; 11.25 **1:2** 1.2 sede: Jan 15.27 **1:4** 1.4 Jan 15.11 **1:5** 1.5 1Tm 6.16 **1:5** 1.5-7 Jan 8.12 **1:6** 1.6 2.4 **1:7** 1.7 3.5; Iz 2.5; Heb 9.12; CWJ 1.5 **1:9** 1.9 Ps 32.3-5

na, ndaw ma lacafandakwar a ray daha da cakay Papa aləkwa. Ndaw aha ara Yesu Kəriste, ndaw manjar mebørey.

² Ara anğa ma vəlda ray anğa nğa məcəy amba Gazlavay a mbəkdandakwara mebørey aləkwa. A məcəy maja mebørey aləkwa daada ba, ama a məcəy maja mebørey nğa ndəhay da bəla tabiya.

Mey da ray mewudəy-vaw

³ Da aləkwa fa nakwa ray a *mewey nğa Gazlavay na, ngene, ya sərkwā Gazlavay fara fara. ⁴ Da ndaw a ləvey a səra Gazlavay, ama a key cek anda Gazlavay ma wudəy ba na, ngene, ndaw aha a key a mbərzley, mey masa fara fara daa mevel anğa daa ba. ⁵ Ama ndaw ma key cek anda Gazlavay ma wudəy na, ndaw a, a wuda Gazlavay fara fara. Ngene, ya sərkwā aləkwa macəmkaya pal ta Gazlavay.

⁶ Ndaw masa ma ləvey anğa macəmkaya mandaw mandaw ta Gazlavay na, si menjey anğa a key anda nğa Yesu.

⁷ Jam adaw hay, mey da ray mekey cek masa Gazlavay ma wudəy masa yah ma wuzlalakwara kedə na, ara mewey mawiya ba, ama ara mewey zleezle, masa ka sərmara dəga akwar ma təbmara mey nğa Yesu təlam. Mewey masa zleezle kedə na, ara mey masa akwar ma cəndamara cay.

⁸ Ama ta ngene he cəpa, mewey masa yah ma wuzlalakwara kedə na, ara mewey mawiya. Mey masa fara fara da ray mewey a ta wuzwa cay ta fa menjey nğa *Kəriste. Akwar may, menjey akwar ta mbəđey sem mawiya. A sərey ara mewey mawiya na, maja ləvanj fa ndəvey, slam-mewedəy fara fara ta zlar cay nğa wedəy.

⁹ Ndaw masa ma ləvey anğa manjakaya daa slam-mewedəy, ama a wuda məlmaha ba na, ngene, anğa daa ləvanj cənga. ¹⁰ Ndaw masa ma wuda məlmaha na, ara ndaw masa daa slam-mewedəy, kwa cek ma gwa nğa təđda ndaw a aa mebørey daa ba. ¹¹ Ama ndaw ma wuda məlmaha ba na, anğa daa ləvanj, fa daw daa ləvanj, a səra slam masa anğa ma daw a hwad a ba, maja ləvanj ta tərda sem nğa wulaf.

¹² Bəz adaw hay, ya wuzlalakwara leeter kedə na, maja Gazlavay ta mbəkdakwara mebørey akwar sem, maja Yesu Kəriste.

¹³ Akwar masa papanj nğa bəza hay, ya wuzlalakwara maja ka sərmara Yesu Kəriste, anğa daha dəga bəla ta zley daa ba aranj. Akwar masa gula hay, ya

2:1 2.1 Rm 8.34; Heb 7.25 **2:2** 2.2 4.10; Janj 1.29 **2:4** 2.4 1.6; 4.6; Janj 3.21; 8.44; 16.13 **2:5** 2.5 2.17; 5.3; Janj 14.15; 2Jn 6 **2:6** 2.6 Janj 13.15; 15.5
2:7 2.7 2.24; 3.11 **2:7** 2.7-8 4.11; Janj 13.34 **2:8** 2.8 Janj 1.9-10; 8.12; Rm 13.12 **2:9** 2.9 3.10, 15; 4.20 **2:10** 2.10 Ps 119.165; Rm 14.13 **2:11** 2.11 Janj 12.35-36 **2:12** 2.12 SNM 4.12

wuzlalakwara maja akwar ta fənmara bay-malula sem ta gədan.

¹⁴ Bəz adaw hay, ya wuzlalakwara maja ka sərmara Gazlavay, Papa aləkwa. Akwar, papaŋ ŋga bəza hay, ya wuzlalakwara maja ka sərmara Yesu Kəriste ŋga daha dəga bəla ta zley daa ba araŋ. Akwar, gula hay, ya wuzlalakwara maja akwar ta gədan, mey ŋga Gazlavay aa daa mevel akwar, akwar ta fənmara bay-malula sem ta gədan.

¹⁵ Ka da səpam ŋga njeŋ anda ndəhay da bəla kefe ba, kwa cek hay da bəla * ha na, ka da wuɗam ba. Da ndaw a wuɗey cek hay da bəla kefe na, a wuɗa Gazlavay Papa aləkwa ba. ¹⁶ Bəla na, aa kwara? Ndəhay fa səpam cek hay maaya ba anda ata ma wuɗam. Cek masa ata ma hətam fa ndaw na, a wuɗam ŋgada ata. A zlapam da ray zleley ata hay. Cek hay a tabiya kefe na, a sawa ta fa Gazlavay, Papa aləkwa ba, ama ara cek hay ŋga bəla. ¹⁷ Sərmara bəla kefe na, a ndəvey la, ta cek hay da hwaɗ a tabiya masa ndəhay ma wuɗam kalah. Ama ndaw ma key cek anda Gazlavay ma wuɗey na, a da njeŋ ŋga sərmataw.

Mey da ray masa-gəra hay ŋga Kəriste

¹⁸ Bəz adaw hay, bəla gweegwe cay a ndəvey. Anda akwar ma cəndamara na, masa-gəra mahura ŋga *Kəriste a sawa la. Kwa wure kefe, masa-gəra hay ŋga Kəriste ga daha. Maja ŋgene, ya sərkwa bəla gweegwe cay a ndəvey.

¹⁹ Ndəhay a ŋgene, a bam da wuzlah aləkwa, ama mevel ata anda ŋga aləkwa ba. Da mevel ata anda ŋga aləkwa na, anja a njam macəmkaya ta aləkwa la, fa da bam daa ba. Ama ta bam sem. Mebey ata ŋgene, a wuzwa ata tabiya ara ndəhay aləkwa hay ba.

²⁰ Akwar na, Kəriste ta slərkwar *Mesəfney ŋga Gazlavay la a ray akwar amba a pakwar ŋgada ŋga. Anda kefe, akwar tabiya ka sərmara mey masa fara fara da ray Kəriste he. ²¹ Ya wuzlalakwara na, maja ka sərmara mey masa fara fara ba daw? Kay! maja ŋgene ba. Ya wuzlalakwara na, maja ka sərmara mey masa fara fara, asaya, ka sərmara membərzley daa mey masa fara fara ha na, daa ba. ²² Ndaw membərzley na, ara wa? Ara ndaw masa ma ləvey Yesu na, ara Kəriste ba. Ndaw a ŋgene na, ara masa-gəra mahura ŋga Kəriste. Ndaw a, a rəsa Papa aləkwa Bay Gazlavay,

2:13 2.13-14 1.1-2 * **2:15** 2.15 bəla: Fefe «bəla» a wuɗey ŋga ləvey cek hay cəpa ma mbafamar a Gazlavay ba. Nəka Jak 4.4. **2:15** 2.15 Jak 4.4 **2:16** 2.16 MM 27.20; Rm 13.14; Ef 2.3; Jak 4.16 **2:17** 2.17 Mt 7.21; 1Kwr 7.31 **2:18** 2.18 4.3; Mt 7.15; 2Jn 7 **2:19** 2.19 SNM 20.30 **2:20** 2.20 2.27

asaya, a rəsa Bəzey anğa. ²³ Kwa waawa ma rəsa Bəzey nğa Gazlavay na, a key nğene, a rəsa Bay Gazlavay Papan may. Ama kwa waawa ma təba Yesu, ma ləvey fa mey nğa ndəhay Yesu ara Bəzey nğa Gazlavay na, ndaw a nğene, a təba Bay Gazlavay Papan la may.

²⁴ Akwar na, wam vaw da ray mey masa akwar ma cəndamara dəga akwar ma təbmara mey nğa Yesu təlam, anja mey a nğa njeý aa mevel akwar mandaw mandaw. Mey masa akwar ma təbmara ha, da aa daa mevel akwar na, akwar may, ka njam la macəmkaya ta Bəzey nğa Gazlavay lej ta Papaha. ²⁵ Fara fara, Kəriste ta ləvey la a da vəndakwar cek. Cek a na, ara heter mendəvey ba.

²⁶ Ya wuzlalakwara mey kefe da ray ndəhay ma səpam cəved nğa zlanğadadamakwar. ²⁷ Akwar na, Kəriste ta slərkwar Mesəfney nğa Gazlavay la a ray akwar amba a walakwar nğada anğa. Da Mesəfney anğa, aa da ray akwar na, ka səpam ndaw mekele nğaa sərkadakwar daa saba. Mesəfney a faa sərkadakwara cek hay tabiya. Cek masa aa maa sərkadakwara ha na, ara cek fara fara, membərzley da hwaɗ a daa ba. Da ray nğene, təbmara meesərkey anğa, njam macəmkaya ta Kəriste.

²⁸ Ahaw, bəz adaw hay, Kəriste a wuzwa vaw la. Njam macəmkaya pal ta anğa amba pas a ma wuswa la na, ya zlurakwa fa mey anğa ba, hwaray a kandakwar ba. ²⁹ Ka sərmara Kəriste na, ara ndaw maaya ma ka cek ta cəved e. Anda kefe, ka sərmara kwa waawa ma key cek ta cəved e kəne na, ara ndaw masa Gazlavay ma tərda sem nğa bəzey anğa.

3

Ya da sərkwa aləkwa bəza hay nğa Gazlavay na, kwara?

¹ Nəkmara, Gazlavay Papa aləkwa ma wuɗndakwar cey. A wuɗndakwar kalah, haa a ləvey aləkwa bəz anğa hay. Fara fara aləkwa bəz anğa hay. Ndəhay da bəla kefe a sərmara Gazlavay ba. Ara maja nğene, a sərmandakwar aləkwa bəz anğa hay ba may. ² Jam adaw hay, aləkwa wure kefe bəza hay nğa Gazlavay. Gazlavay a da tərđandakwar nğada fa mey kwara na, ya sərkwa ba aran. Ama ya sərkwa fara fara pas masa *Kəriste ma da wuzwa vaw na, ya da tərkwa letək anda anğa, maja ya hətkwar la fara fara anğa na, kwara. ³ Kwa waawa ma pa mewulkey

2:22 2.22 4.3; 2Jn 7 **2:23** 2.23 4.15; 5.1; Janj 5.23; 15.23; 2Jn 9 **2:24** 2.24
2.7 **2:25** 2.25 Janj 5.24 **2:27** 2.27 Jer 31.34; Janj 14.16; 16.13 **2:28** 2.28
3.21; 4.17; Janj 5.22; 15.5 **2:29** 2.29 3.10 **3:1** 3.1 3.10; 4.6; Janj 1.12; 3.16
3:2 3.2 2Kwr 3.18; Fəl 3.21

aŋga a ray mey a keɗe na, si a wey vaw, a key meɓerey ba anda Yesu Kəriste ma key meɓerey ba.

⁴ Kwa waawa ma key meɓerey na, a key ŋgene, a key həma a ray Gazlavay. Mekey meɓerey na, ara mekey həma a ray Gazlavay. ⁵ Ka səmra Yesu Kəriste a sawa a bəla keɗe na, ŋga ley meɓerey ŋga ndəhay. Aŋga na, meɓerey fa aŋga daa ba səlak. ⁶ Anda keɗe, kwa waawa macəmkaya ta aŋga na, a key meɓerey saba. Ama ndaw masa fa key meɓerey na, ta hətar Yesu daa ba, ta səra Yesu fara fara daa ba.

⁷ Bəz aɗaw hay, ka da mbəkdamara ray akwar amba ndəhay a zlaŋgadadamakwar ba. Ndaw ma key cek ta cəved e na, aŋga ndaw maaya anda Yesu Kəriste aŋga ndaw maaya, ma ka cek ta cəved e. ⁸ Ndaw ma key meɓerey mandaw mandaw na, aŋga dasi har ŋga bay-malula, maja bay-malula a zlar mekey meɓerey na, dəga bəla ta zley daa ba araŋ. Yesu, Bəzey ŋga Gazlavay, a sawa a bəla keɗe na, ŋga nəsa sləra ŋga bay-malula ha.

⁹ Kwa waawa ma terey sem bəzey ŋga Gazlavay na, a key meɓerey saba, maja *Mesəfney ŋga Gazlavay fa key sləra daa aŋga *. A gwa ŋga key meɓerey saba, maja Gazlavay ta tərda sem ŋga bəzey aŋga. ¹⁰ Ma wunkata bəza hay ŋga Gazlavay, ta bəza hay ŋga bay-malula na, me? Səmra, ndaw ma key cek ta cəved e ba, da daa ba, ma wuɗa məmaha ba na, aŋga bəzey ŋga Gazlavay ba.

Mey da ray mewuɗey-vaw

¹¹ Məlma aɗaw hay, wuɗkwa vaw. Yaw, mey a keɗe na, ara mey masa akwar ma cəndamara dəga akwar ma təbmara mey ŋga Yesu təlām. ¹² Wulkam da ray ndaw daha mezəley *Kayin †. Ka da kam cek anda aŋga ba. Aŋga na, aa dasi har ŋga bay-malula, a kəɗa məmaha, mambaray a vagay. A kəɗa na, maja me? A kəɗa maja cek masa Kayin aha ma ka na, maaya ba fa dey ŋga Gazlavay, ama cek masa məmaha ma ka na, maaya fa dey ŋga Gazlavay.

¹³ Məlma aɗaw hay, da masa ndəhay da bəla keɗe a ŋgədamakwar ba na, ka da rəzlam ba. ¹⁴ Ya sərkwa

3:5 3.5 1.7; 2.2; 4.10; Iz 53.9; Jan 1.29; 8.46; 2Kwr 5.21; Heb 4.15; 9.14; 1Pi 1.19; 2.22, 24; 3.18 **3:6** 3.6 3.9; 5.18; Jan 15.5; Rm 6.2, 14 **3:8** 3.8 Mt 12.26-29; Jan

8.44 * **3:9** 3.9 Mesəfney ŋga Gazlavay fa key sləra daa aŋga: Ta mey Gərek, a ləvey «hulfad ŋga Gazlavay aa daa ndaw.» Ndəhay a ləvam «hulfad» a wuɗey ŋga ləvey «Mesəfney ŋga Gazlavay». Ndəhay mekele a wulkam a ləvam hulfad ara «Mey ŋga Gazlavay», da daa ba, ara «Heter mawiya». **3:10** 3.10 2.9, 29

3:11 3.11 2.7-8; 4.11; Jan 13.34 † **3:12** 3.12 Kayin: Ara bəzey mahura ŋga ata Adam ta Ev. **3:12** 3.12 MC 4.8 **3:13** 3.13 Jan 15.18

aləkwa anda ndəhay maməctakaya saba, ama aləkwa ma hətakwa heter mendəvey ba cay. Ya sərkwā na, maja ya wudmatakwa məlma aləkwa hay. Ndaw masa ma wudfey vaw ba na, anğa anda ndaw maməckaya cənğa. ¹⁵ Ndaw masa ma wudfa məlmaha ba na, ara ndaw ma kədfey ndaw vagay. Ka sərmara ndaw ma kədfey ndaw vagay na, aa ta heter mendəvey ba daa ba. ¹⁶ Yesu *Kərīste ta vəlda ray anğa la maja aləkwa. Anda keđe, ya sərkwā mewudfey-vaw na, ta fa vəda. Yaw, anda anğa ma vəlda ray anğa nğada aləkwa na, si ya vəldakwa ray aləkwa nğada məlma aləkwa hay may. ¹⁷ Da ndaw cek anğa daha, a hətār məlmaha cek anğa daa ba, ama a sərfaŕ dey-ceceh ba, a vəlar cek ba na, a da wudfa Gazlavay na, kwara? ¹⁸ Bəz adaw hay, ka da wuzdamara mewudfey-vaw akwar ta fa mey meeguzley maaya maaya daada ba. Ama si ka wuzdamara mewudfey-vaw akwar fara fara ta fa sləra masa akwar ma kamara. ¹⁹⁻²⁰ Da ray nğene, ya sərkwā aləkwa ta təbkwa mey masa fara fara la. Da mevel aləkwa a candakwar da ray cek masa aləkwa ma kakwa maaya ba na, ya sərkwā Gazlavay a fəna mewulkey aləkwa, a səra cek tabiya daa mevel aləkwa. Anda keđe, a dəkndakwar mevel la daa masa aləkwa fa dərkwā danğay.

²¹ Yaw, jam adaw hay, da mevel aləkwa fa candakwar daa ba na, ya da dərkwā danğay a Gazlavay ta mandərzay daa dey daa ba. ²² Ya gwakwa yaa cəfdakwa kwa meeme fa anğa, a vəldakwar la maja aləkwa fa təbkwa *mewey anğa hay, asaya, aləkwa fa kakwa sləra masa ma mbafar.

²³ Mewey anğa mahura na, ara mepey Bəzey anğa, Yesu Kərīste, nğa ndaw aləkwa fara fara, asaya, ara mewudfey-vaw da wuzlah aləkwa, anda Kərīste ma ləvndakwar.

²⁴ Kwa waawa ma təba mewey hay nğa Gazlavay, ma key cek anda mewey hay a ma ləvey na, ndaw a macəmkaya ta Gazlavay, Gazlavay may, aa ta anğa. Ya sərkwā Gazlavay aa ta aləkwa na, ta fa me? Ya sərkwā ta fa Mesəfney anğa masa anğa ma vəldandakwara.

4

Mesəfney nğa Gazlavay a da səram ta mesəfney membərzley ndaw na, kwara?

¹ Jam adaw hay, ndəhay tabiya ma ləvam ata ta *Mesəfney nğa Gazlavay na, ka da təbmara mey ata ba.

3:14 3.14 2.11; Janj 5.24; 13.35 **3:15** 3.15 Mt 5.21-22; CWJ 21.8 **3:16** 3.16 Janj 15.13; Gal 1.4; Fəl 2.17; 1Tes 2.8 **3:17** 3.17 Mew 15.7 **3:18** 3.18 Jak 2.15-17 **3:21** 3.21 2.28 **3:22** 3.22 Janj 15.16 **3:23** 3.23 Janj 2.23; 13.34
3:24 3.24 4.13; Janj 14.16; 15.5; Rm 8.5, 9, 14

Si ka sanɗalamata la ɗagay, amba ka sɔrmara da ata ta Mesɔfney nɗa Gazlavay fara fara kwa. Ya lɔvkwar anda keɗe na, maja ndɔhay ma pamara ray ata nɗa ndɔhay ma tɔla mey nɗa Gazlavay ga daa wura daa wura da bɔla keɗe daha. ² Yaw, kwa waawa ma lɔvey Yesu *Kɔriste a sawa ta fa Gazlavay da vad, ta tɔrey la nɗa ndaw-magɔɗan na, ndaw a nɗene, aa ta Mesɔfney nɗa Gazlavay. Ara anda keɗe, akwar ma da sɔrmara ndaw ta Mesɔfney nɗa Gazlavay. ³ Ama kwa waawa ma tɔba mey a keɗe ba na, aa ta Mesɔfney nɗa Gazlavay daa ba. Mesɔfney masa da ray anɗa na, ara mesɔfney nɗa masa-gɔra mahura nɗa Kɔriste. Akwar ta cɔndamara la masa-gɔra mahura nɗa Kɔriste a sawa la. Wure keɗe, ta sawa cay, anɗa da bɔla cay.

⁴ Ama bɔz adaw hay, akwar na, ndɔhay nɗa Gazlavay. Akwar ta kam bay-gula sem da ray ndɔhay ma pamara ray ata nɗa ndɔhay ma tɔla mey nɗa Gazlavay, maja Mesɔfney masa da ray akwar na, a fɔna mesɔfney nɗa bay-malula da ray ndɔhay da bɔla keɗe ta gɔɗan. ⁵ Ndɔhay ma pamara ray ata nɗa ndɔhay ma tɔla mey na, ata ndɔhay nɗa bɔla. Da ray nɗene, aa guzlam mey nɗa bɔla. Ndɔhay masa nɗa bɔla fa cɔnmatar mey. ⁶ Ama alɔkwa na, ndɔhay nɗa Gazlavay. Ndaw ma sɔra Gazlavay na, a cɔndakwar mey. Ndaw masa nɗa Gazlavay ba na, a cɔndakwar mey ba. Ya sɔrkwa ndaw masa ta Mesɔfney fara fara nɗa Gazlavay da ray, ta ndaw masa ta mesɔfney membɔrzley ndaw na, anda keɗe.

Mey da ray mewuɗfey-vaw nɗa Gazlavay

⁷ Jam adaw hay, wuɗkwa vaw da wuzlah alɔkwa, maja mewuɗfey-vaw na, a sawa ta fa Gazlavay. Ndaw ma wuɗfey vaw na, Gazlavay ta tɔrda sem nɗa bɔzey anɗa, a sɔra Gazlavay. ⁸ Ndaw ma wuɗfey vaw ba na, a sɔra Gazlavay ba, maja cek masa Gazlavay ma ka tabiya na, a ka ta mewuɗfey-vaw. ⁹ Gazlavay ta slɔrdɔrwa Bɔzey anɗa mendulen la a bɔla, amba ya hɔtkwa heter mendɔvey ba ta fa anɗa. Anda keɗe, anɗa fa wuzdɔrwa fara fara aa fa wuɗndakwar. ¹⁰ Ara alɔkwa ma wuɗkwa Gazlavay teesɔf ba, ama ara anɗa ma wuɗndakwar teesɔf. A slɔrwa Bɔzey anɗa, amba Bɔzey anɗa ha a vɔlda ray anɗa nɗa mɔcey amba Gazlavay a mbɔkdandakwara meɔrey alɔkwa. Mewuɗfey-vaw na, anda keɗe.

¹¹ Jam adaw hay, Gazlavay a wuɗndakwar kalah. Anda keɗe maaya na, alɔkwa may, si ya wuɗkwa vaw da wuzlah

4:1 4.1 2.18; Mt 7.15; 1Tes 5.21 **4:2** 4.2 Janj 1.14; Rm 10.9; 1Kwr 12.3 **4:3** 4.3 2.18, 22 **4:4** 4.4 5.5 **4:5** 4.5 Janj 3.31 **4:6** 4.6 2.4; 3.1; Janj 8.47; 18.37
4:8 4.8 4.16 **4:9** 4.9-10 Janj 3.16 **4:10** 4.10 2.2; 3.5; Rm 5.8, 10

alækwa. ¹² Gazlavay na, kwa ndaw ta hëtar ta dey anğa daa ba. Ama da alækwa fa wudkwa vaw da wuzlah alækwa na, a wuzwa Gazlavay aa ta alækwa, asaya, a wuzwa alækwa fa wudkwa vaw fara fara anda Gazlavay ma wudndakwar.

¹³ Gazlavay ta vëldakwar Mesëfney anğa la. Maja ngene, ya sërkwaa alækwa macëmkaya ta Gazlavay, anğa may, aa ta alækwa. ¹⁴ Papa alækwa ta slërdërwa Bëzey anğa la amba a lëhdata ndëhay da bëla. Ala ta hëtmär la ta dey ala, ala fa kam sede da ray a. ¹⁵ Da ndaw a lövey Yesu ara Bëzey nga Gazlavay na, Gazlavay aa ta ndaw a, ndaw a may, macëmkaya ta Gazlavay. ¹⁶ Alækwa na, ya sërkwaa Gazlavay fa wudndakwar, alækwa fa tëbkwa aa mevel alækwa, aa fa wudndakwar fara fara.

Gazlavay a ka slëra anğa tabiya ta mewudëy-vaw. Ndaw ma wudëy vaw na, aa macëmkaya ta Gazlavay, Gazlavay may, aa ta anğa. ¹⁷ Da ya wudkwa vaw fara fara anda Gazlavay ma wudndakwar na, ta pas masa Gazlavay ma da ka sariya na, ya zlurakwa daa ba, maja menjey alækwa da bëla kedë anğa letëk ta nga *Këriste. ¹⁸ Ndaw ma wudëy ndaw na, fa da zlurey ta sariya nga Gazlavay daa ba. Mewudëy-vaw masa fara fara na, a bëla mandërzay daa dey. Da ndaw fa zlurey na, ngene, mewudëy-vaw nga Gazlavay fa key slëra daa anğa anda Gazlavay ma wudëy daa ba, maja ndaw ta mandërzay na, fa zlurey ta banay ma da hëtfar fa dëba nga sariya.

¹⁹ Ya wudkwa vaw na, ara maja Gazlavay ma wudndakwar teesëf. ²⁰ Da ndaw a lövey a wudfa Gazlavay, ama a wudfa mëlmaha ba na, a key ngene, a mbërzley. Da a wudfa mëlmaha masa anğa fa hëtar ba na, a da wudfa Gazlavay masa ta hëtar ta dey anğa daa ba sëlak na, kwara?

²¹ Ndaw ma wudfa Gazlavay na, si a wudfa mëlmaha may. Kedë ara *mewey masa Këriste ma vëldandakwara.

5

Ya fënkwa bëla kedë ta gëdan

¹ Kwa waawa ma tëba Yesu ara *Këriste, *ndaw masa Gazlavay ma wala nga lëhdata ndëhay na, anğa ta tërey sem bëzey nga Gazlavay. Kwa waawa ma wudfa Gazlavay Papa alækwa na, a wudfa bëza hay nga Gazlavay may.

² Da ya wudkwa Gazlavay, asaya, da ya kakwa cek anda *mewey anğa hay ma lövey na, ngene, ya sërkwaa alækwa

fa wudmatakwa bəza hay nga Gazlavay. ³ Da ya kakwa cek anda mewey nga Gazlavay ma ləvey na, a key ngene, ya wudkwa Gazlavay fara fara. Mewey anğa ha, aa ta gəra nga səpey ngada aləkwa ba, ⁴ maja bəza hay nga Gazlavay tabiya na, a fənmara bəla ta gədaŋ. Ya fənkwa bəla kefe ta gədaŋ na, kwara? Ya fənkwa bəla kefe na, maja aləkwa fa pakwa Yesu Kəriste nga ndaw aləkwa fara fara. ⁵ Ma fəna bəla na, wa? Ma fəna bəla na, si ndaw ma təba, Yesu na, ara Bəzey nga Gazlavay.

Ma wuzda mey da ray Yesu Kəriste fara fara na, me hay me?

⁶ Yesu *Kəriste na, ara ndaw masa ma sawa a bəla. A sawa na, ta hətey *baptem la ta yam. Mambaz anğa ta mbədfwa la daa meməcey anğa. A hətey na, baptem ta yam daada ba, ama mambaz anğa ta mbədfwa la daa meməcey anğa may. Asaya, *Mesəfney nga Gazlavay ta wuzda la fara fara cek hay a ta kam la. Mesəfney a, a mbərzley ba səlak. ⁷ Anda kefe, cek hay maakar daha fa wuzdamərwa mey fara fara da ray Yesu. ⁸ Cek hay a na, ara Mesəfney nga Gazlavay, yam nga baptem, leŋ mambaz anğa. Ata maakar ata, mey ata letek.

⁹ Aləkwa fa təbkwa mey masa ndəhay ma wuzdamara da ray cek masa ata ma hətmar. Mey masa Gazlavay ma wuzda na, a fəna mey nga ndəhay ma wuzdamara. Ara Gazlavay ta ray anğa ma wuzda mey a da ray Bəzey anğa. ¹⁰ Anda kefe, ndaw masa ma təba Yesu, anğa Bəzey nga Gazlavay na, a səra daa mevel anğa mey a ara mey masa fara fara. Ama ndaw masa ma təba mey nga Gazlavay ba na, a pada Gazlavay nga ndaw membərzley, maja ta təba mey masa Gazlavay ma wuzda da ray Bəzey anğa daa ba. ¹¹ Cek masa Gazlavay ma wuzdandakwara na, wura? Cek masa Gazlavay ma wuzdandakwara na, ara heter mendəvey ba masa anğa ma vəldandakwara ta har Bəzey anğa. ¹² Ndaw masa macəmkaya pal ta Bəzey nga Gazlavay na, anğa ta heter mendəvey ba. Ndaw masa ta cəmey ta Bəzey nga Gazlavay daa ba na, aa ta heter mendəvey ba daa ba may.

Mey da ray heter mendəvey ba

¹³ Ya wuzlalakwara leeter kefe ngada akwar ma pamara Yesu, Bəzey nga Gazlavay, nga ndaw akwar fara fara amba ka sərmara maaya maaya akwar ta hətam heter mendəvey ba cay. ¹⁴ Da aləkwa fa dərkwā danggay a

5:3 5.3 2.5; Mew 30.11; Mt 11.30 **5:4** 5.4 Janj 16.33 **5:5** 5.5 4.4; Rm 8.37

5:6 5.6 Janj 16.13; 19.34 **5:7** 5.7-9 Janj 5.36-37 **5:10** 5.10 Rm 8.16; Gal 4.6

5:11 5.11 Janj 3.16-18 **5:12** 5.12 Janj 3.36; 5.24 **5:13** 5.13 Janj 20.31

Gazlavay na, ya zlurakwa ba maja ya sərkwā fara fara, da aləkwā faa cəfdafakwar cek masa mevel anḡa ma wuḡey na, ya hətkwā la. ¹⁵ Anda aləkwā ma sərkwā anḡa fa jəkfandakwar sləmay daa medərey-danḡay aləkwā na, ya sərkwā ya hətkwā cek masa aləkwā maa cəfdakwā fa vəḡa la may.

¹⁶ Da ndaw a hətar məlmaha fa key mebərey, da mebərey a, ara mebərey ma hendey ndaw aa meməcey ba na, si a kar ambahw a Gazlavay maja anḡa. Da mebərey nḡa məlmaha ara mebərey ma hendey ndaw aa meməcey ba na, nḡene, Gazlavay a vəlar heter la. Mebərey ma hendey ndaw aa meməcey na, daha. Nḡene, ya ta ləvey nḡa key ambahw a Gazlavay maja mebərey a daa ba. ¹⁷ Cek hay maaya ba hay tabiya masa ndaw ma ka na, ara mebərey. Ama mebərey siya na, a hendey ndaw aa meməcey ba.

¹⁸ Ya sərkwā kwa waawa ma tərey sem nḡa bəzey nḡa Gazlavay na, a key mebərey saba, maja Yesu, Bəzey nḡa Gazlavay, fa jəḡa. Anda keḡe, bay-malula fa da gwa nḡa kar cek daa ba. ¹⁹ Ya sərkwā aləkwā na, ndəhay nḡa Gazlavay, asaya, ya sərkwā ndəhay da bəla keḡe tabiya ata dasi har nḡa bay-malula.

²⁰ Ya sərkwā Bəzey nḡa Gazlavay na, ta sawa la a bəla, ta vəlndakwar lenḡesl la amba ya sərkwā Bay Gazlavay, ndaw masa fara fara. Aləkwā macəmkaya pal ta Gazlavay, ndaw masa fara fara ha, ta fa Bəzey anḡa, Yesu *Kərīste. Anḡa na, ara Gazlavay ndaw masa fara fara, ara anḡa ma vəltar heter mendəvey ba a ndəhay.

²¹ Bəz adaw hay, wam vaw, ka da səpam mey nḡa kuley hay ba.

**Leeter masa
Jan
ma wuzlala nga dey cew
Mey da ray
Leeter masa Jan ma wuzlala nga
dey cew**

Leeter nga Jan nga dey cew e kefe na, ara ngada Dam-mamaha ta bəz anga hay. Anda meləvey, ngada ndəhay daa mecəmey-ray nga Yesu (aya 1). Mey daa leeter e kefe na, anga gweegwe anda leeter masa ngeeme. A ləvtar da ya wudkwa Bay Gazlavay fara fara na, ya wudkwa vaw da wuzlah aləkwa la may (aya 4 haa 6). Asaya, a ləvtar nga wam vaw fa ray ata amba aa zəddamara mawurbay nga sləra ata ba (aya 7 haa 11). Jan a vəltar gədanj amba a pamara Yesu nga ndaw ata fara fara mandaw mandaw. A ndəvda leeter anga ha, a ləvtar a sawa la fa ata amba a kam mafay dey ta dey. A kadatara ndəhay daa Egəliz mekele ma camatar har (aya 12 haa 13).

Mecey-har

¹ Ara yah, ndaw-maraw * da wuzlah bay-ray hay nga ndəhay nga Yesu ma wuzlala dferewel kefe.

Ya wuzlalakawa ngada kah, Dam-mama adaw † masa Gazlavay ma wala leŋ ngada bəz akah hay, akwar masa yah ma wudkwar fara fara. Ara yah taava adaw ma wudkwar daada ba, ama ndəhay tabiya ma sərmara mey nga Gazlavay masa fara fara, a wudmakwar may. Ya wudmakwar na, ² maja mey fara fara ha aa daa mevel aləkwa. A da njeŋ ta aləkwa nga sərmataw.

³ Anja *Gazlavay, Papa aləkwa, ta *Yesu *Kəriste, Bəzey nga Papa aləkwa ha, nga pəsmandakwar mey, nga sərfamandakwar dey-ceceh, nga njadamandakwar daa za-zay, aləkwa masa ma təbkwa mey masa fara fara, asaya, aləkwa masa ma wudkwa vaw da wuzlah aləkwa.

Mey da ray mewudfey-vaw fara fara

⁴ Ya faa səmey ga maja ya nəka na, bəz akah hay siya fa səpmara mey masa fara fara anda Papa aləkwa ma

* **1:1** 1.1 ndaw-maraw: Ndəhay a wulkam «ndaw-maraw» na, ara Janj. † **1:1** 1.1 Dam-mama adaw: Har-gədanj nga ndəhay a wulkam «dam-mama adaw» a wudfey nga ləvey Egəliz. Anda kefe, «bəz akah hay» ara ndəhay daa Egəliz e.

lövndakwar. ⁵ Yaw, Dam-mama adaw, ehe wure kefe, ya fa kaka ambahw, ya lövka, wudkwa vaw da wuzlah aləkwa. Ya wuzlalaka kefe na, ara *mewey mawiya ba, ama ara mewey masa aləkwa ma sərkwā dēga aləkwa ma tēbkwa mey ŋga Yesu tēlam. ⁶ Gazlavay a lövkwar, wudam vaw da wuzlah akwar. Kefe ara mewey masa akwar ma cəndamara dēga akwar ma tēbmara mey ŋga Yesu tēlam.

Mey da ray masa-gəra hay ŋga Kəriste

⁷ Ndəhay ma mbəzlam hay ga daa wura daa wura da bəla kefe daha. Yesu *Kəriste ta terey sem ŋga ndaw-magədan na, ndəhay ma mbəzlam hay a ŋgene a tēbmara mey a ba. Ndəhay ma tēbmara ba ha na, ara ndəhay ma mbəzlam, ata masa-gəra hay ŋga Kəriste. ⁸ Maja ŋgene, wam vaw fa ray akwar, amba kaa zəfdamara mawurbay ŋga sləra akwar ba. Anda kefe, cek hay tabiya masa Gazlavay ma diya maja akwar na, ka hətam la.

⁹ Sərmara, mey masa Kəriste maa sərkadandakwara na, kwa waawa ma səpa mey a ta cəved e ba, a pey mey mekele a dey a na, ndaw a macəmkaya ta Gazlavay daa ba. Ama ndaw ma səpa mey masa Kəriste maa sərkadandakwara na, ndaw a macəmkaya ta Gazlavay, Papa aləkwa, leŋ ta Bəzey aŋga. ¹⁰ Ara maja ŋgene, ya fa lövkwar, da ndaw a sawa fa akwar, a wuzkwar mey mekele wal da ray Kəriste na, ka da tēbmara ndaw a, a way akwar ba, kwa ka da camar har ba. ¹¹ Sləra maaya ba masa ndaw a ma ka na, ndaw ma car har na, anda a kamara cew e.

Mey ŋga madagway-dakw

¹² Yaw, ya wufey ŋgaa guzlkwar da ray cek hay ga, ama ya wufey ŋga wuzlalakwara fa dərəwel ba. Ya wulkey ŋga daw fa akwar, yah ta ray adaw, ya da njakwa cew e, ya kakwa maday, amba ya njakwa daa meesəmey masa fara fara.

¹³ Bəza hay ŋga Dam-mamakw ‡ masa Gazlavay ma wala a camaka har.

1:4 4 3Jŋ 3 **1:5** 5-6 Jan 13.34; 1Jŋ 4.11 **1:6** 6 Jan 14.15; 1Jŋ 2.5; 5.3 **1:7** 7 1Jŋ 2.18 **1:9** 9 1Jŋ 2.23 **1:10** 10 Rm 16.17 **1:12** 12 3Jŋ 13-14 ‡ **1:13** 1.13 Bəza hay ŋga Dam-mamakw: Fefe a wufey ŋga lövey ndəhay daa Egəliz ŋga ata Jan.

**Leeter masa
Jan
ma wuzlala nga dey maakar
Mey da ray
Leeter masa Jan ma wuzlala nga
dey maakar**

Leeter nga Jan nga dey maakar a na, ara ngada ndaw nga Yesu daha mezoley Gayus. Annga ndaw daa mecəmey-ray nga ndəhay nga Yesu masa ndəhay da hwaɗ a fa cəmam ɗay daa ba. Jan aa həmda Gayus maja annga fa təba mey nga Gazlavay, a mbəkda ba (aya 2 haa 3).

Daa leeter e Jan taa guzley la saya da ray Diyawtəref len da ray Demetəriyus. Diyawtəref na, a wuɗey nga key bay-ray, ama aa guzley mey saw da ray Jan, a təbta ndəhay nga Yesu masa mələk hay ma diyam a way annga ba, asaya, a bəta ndəhay ma təbmata mələk hay a daa mecəmey-ray a (aya 9 haa 10). Ama Demetəriyus na, ndəhay faa həmdamara, annga fa key cek maaya (aya 12).

Daa leeter keɗe na, mey hay mahura maakar daha:
Metəbey ndəhay nga Yesu masa mələk hay
Mey da ray mewuɗey-vaw
Menjey daa mey nga Gazlavay mandaw mandaw.

Mecey-har

¹ Ara yah, ndaw-maraw * da wuzlah bay-ray hay nga ndəhay nga Yesu ma wuzlala ɗerewel keɗe.

Ya wuzlala ngada kah, Gayus, jam aɗaw masa yah ma wuɗa fara fara.

² Jam aɗaw, ya səra menjey akah daa cəved nga *Gazlavay annga maaya. Ya wuɗey ka njeɗ ta zazay, cek nga kaka ba.

³ Ya taa səmey la ga ta pas masa mələma aləkwa hay ma samawa, maja ta kam sede la da ray kah, a ləvmaya, kah ndaw ma səpa cəved nga Gazlavay fara fara, ka fa key cek mandaw mandaw anda mey masa fara fara ma ləvey.

⁴ Yaw, cek maa səmdaya ma fəna na, ara yah ma cənda bəz aɗaw hay fa səpmara mey masa fara fara.

Mey da ray mejəney ndəhay ma ka sləra nga Kəriste

* 1:1 1.1 ndaw-maraw: Ndəhay a wulkam «ndaw-maraw» na, ara Jan. 1:1
1 2Jn 1 1:3 3 2Jn 4

⁵ Jam adaw, ka fa jënta mөлma aləkwa hay daa *mecəmey-ray nga ndəhay nga *Yesu, kwa mөлak hay may. Ngene ara cek ma wuzda kah ndaw ma key cek ta cəved e. ⁶ Məlmanj hay a ta kadamara la fa mey nga ndəhay daa mecəmey-ray fedefe, a ləvam kah ta wudfta la kalah. Ya fa kaka ambahw amba ka jënta daa mepəkey ata. Ka da jënta ha na, anda Gazlavay ma wudfey. ⁷ Səra, ata na, ta mbəkdamata way ata hay sem, fa pəkam nga key sləra ngada *Kəriste. Daa mepəkey ata ha na, cek da har ndəhay ma təba mey nga Yesu ba na, ta təbam daa ba. ⁸ Anda kefe, aləkwa na, maaya ya jəntakwa ndəhay a, amba ya cəmkwa daa slam a nga wuzey mey masa fara fara.

Mey da ray ata Diyawtəref ta Demetəriyus

⁹ Ya ta wuzleley leeter mecəhe la a ndəhay daa mecəmey-ray akwar, ama Diyawtəref a wudfey nga təba mey a ba, maja a wudfey nga key *bay-ray nga ndəhay tabiya. ¹⁰ Da ray ngene, ta pas masa yah ma wusey la fa akwar na, ya kadakwara sləra hay maaya ba tabiya masa anğa ma ka la. Anda meləvey, ya da kadakwara mey hay saw masa anğa maa guzlda ta sələnj masa anğa ma ka da ray ala. Cek hay maaya ba masa anğa ma ka na, ara kefe daada ba. A gəmey nga təbta mөлma aləkwa hay masa mөлak hay ma diyam a way anğa ba. Asaya, a təkta ndəhay daa mecəmey-ray masa ma wudfam nga təbmata mөлak hay a. A bəlta ndəhay ma təbmata mөлak hay a daa mecəmey-ray.

¹¹⁻¹² Ama Demetəriyus na, ndəhay tabiya faa həmdamara. Menjey anğa daa cəved fara fara fa wuzdərwa, anğa ndaw maaya. Kwa ala may, ya ləvam kəne da ray a. Yaw, ka səra mey masa ala maa guzldamara na, ara mey fara fara. Jam adaw, ndəhay ma kam cek hay maaya ba na, ka da key cek anda ata ba, ama key cek anda ndəhay ma kam cek maaya. Ndaw ma key cek maaya na, anğa ndaw nga Gazlavay, ama ndaw ma key cek maaya ba na, a səra Gazlavay ba.

Mey nga madagway-dakw

¹³ Ya wudfey ngaa guzлка da ray cek hay ga, ama ya wudfey nga wuzlalakawa ta wuzleley ba. ¹⁴ Ya fa wudfey nga daw fa kah daa dar hay a kefe. Anda kefe, ya da njakwa cew e, ya kakwa maday.

¹⁵ Anja Gazlavay nga njadaka daa zazay.

Jam akah hay fedefe a camaka har. Catar har a jam aləkwa hay fetedefe pal pal tabiya may.

Leeter masa Jud ma wuzlala Mey da ray Leeter masa Jud ma wuzlala

Leeter keɗe ara Jud ma wuzlalatarara ngada ndəhay ma təba mey nga Yesu tabiya. Jud a na, ara məlman̄ nga Jak (aya 1). Ndəhay a wulkam ara Jud masa məlman̄ nga Yesu Kəriste (Mt 13.55).

Jud a wuzlala leeter e na, maja ndəhay faa sərkaɗam ndəhay ta membərzley, asaya, maja ndəhay fa kam cek səfteleh kəne (aya 3 haa 4). Anda keɗe a wudfey nga təkta. Daa aya 6 haa 13 na, mey a ata gweegwe letək ta daa 2 Piyer 2.1 haa 3.3.

Jud a wuzlala na, fa lawa mey hay mekele mekele daa Mejəwey-mey Magurma. A wuzda banay ma da sawa a ray ndəhay ma təbmara mewudfey-vaw nga Gazlavay ba (aya 3 haa 13), banay ma da sawa a ray ndəhay ma kam cek hay malamba (aya 4, 7, 16) leŋ a ray ndəhay ma fəcmatarara cek hay nga ndəhay mekele (aya 11, 16). A wuzey mey da ray cek ma key ta ndəhay da Sadawm ta Gwamar zleezle. Jud a vəltar gəɗan̄ a ndəhay nga Yesu amba a nam ray a meesərkeɗey masa ata ma cəndamara ngeeme.

Daa leeter e keɗe na, mey maaya daha nga vəley gəɗan̄ a ndəhay:

Menjey ta Yesu na, kwara (aya 20 haa 21)

Mecey-har

¹ Ara yah, Jud, ma wuzlalakwara leeter keɗe. Yah na, ndaw ma ka sləra nga *Yesu *Kəriste, asaya, yah məlman̄ nga *Jak*.

Ya wuzlala leeter keɗe ngada akwar, ndəhay masa mazəltakaya ta fa Gazlavay, Papa aləkwa, akwar masa Gazlavay fa wudkwara, masa Yesu Kəriste fa nəfkakwar dey.

² Anja *Gazlavay nga sərfaɗwar dey-ceceh, nga njadakwar daa zazay, asaya, nga wudkwara ma fəna ma fəna.

* **1:1** 1 Jak: Jud ma ləvey an̄ga məlman̄ nga Jak na, anda meləvey an̄ga məlman̄ nga Yesu Kəriste (Mk 6.3). Jud ta ləvey «yah məlman̄ nga Yesu» na, daa ba. A ləvey «yah məlman̄ nga Jak» maja a wudfey nga zlepey ba. Jak a na, ara ndaw ma wuzlala leeter nga Jak. **1:1** 1 Mt 13.55; Mk 6.3 **1:2** 2 2Pi 1.2

Jud a wuzlala dferewel keɗe na, maja me?
(2 Piyer 2.1-17)

³ Jam adaw hay, ya fa kəɗey vaw ŋga wuzlalakwar da ray heter mendəvey ba masa Gazlavay ma vəldandakwara. Ama ya nəka na, si ya wuzlalakwara leeter keɗe amba ya vəlkwar gədan ŋga təbey *Mey-maaya-mawiya ŋga Gazlavay mandaw mandaw, amba ndəhay a zləbmara mey a ba. Mey-maaya-mawiya ha, ara mey masa aləkwa ma təbkwa, masa Gazlavay ma vəlda ŋgada ndəhay anga hay. Mey a, a mbəɗey ba səlak, a da njeɗ kəne ŋga sərmataw.

⁴ Ya ləvkwar anda keɗe na, maja ndəhay masa ma namar ray a Gazlavay ba ta mbəzam la a wuzlah akwar ta mayal a. A mbəɗdamara mabaraŋga mey da ray maaya ŋga Gazlavay amba a kam cek saw anda mevel ata mewuɗey. Da ray ŋgene, a ləvam Gazlavay a vəley cəveɗ a ndaw ŋga key cek malamba. Asaya, Yesu *Kəriste, ndaw pal ma wey da ray aləkwa, masa Bay aləkwa Mahura pal na, a rəsmara, a təbmara saba. Ndəhay ma namar ray a Gazlavay ba kəne na, mawuzlalakaya dəga zleezle daa dferewel ŋga Gazlavay, Gazlavay a da katar sariya.

Mey da ray cek ma da sawa a ray ndəhay ma zləbmara mey ŋga Gazlavay

⁵ Ya wuɗey yaa guzlkwar da ray cek masa akwar ta sərmara cay. Akwar fa sərfadamara Bay Gazlavay ma ləhdatərwa ndəhay anga hay daa hwayak ŋga *Ejip, ba diya? Ama, fa dəba ha, ndəhay da wuzlah ata masa ma rəsmara mey anga na, Gazlavay ta kəɗta sem vagay.

⁶ Asaya, sərfadamara maslan hay ŋga Gazlavay da vad siya. Sləra maaya masa Gazlavay ma vəldatara na, ta rəsmara sem, ta mbəkdamara sem, asaya, ta mbəkdamara slam ata menjeɗ sem. Da ray ŋgene, Gazlavay a pata aa slam-ləvan daa vəgeɗ, a jəwta ta calalaw ŋga sərmataw, amba a katar sariya ta pas ŋga sariya mahura. ⁷ Asaya, sərfadamara berney hay ŋga *Sadawm ta ŋga *Gwamar leŋ slala hay mekele ta cakay. Ndəhay daa slam hay a ŋgene, fa kam cek maaya ba anda maslan hay ŋga Gazlavay heyey. A kam cek malamba, a səpam ŋga ley vaw ta cek saw masa ŋga key ba. Gazlavay ta sərdara banay la ta awaw mendəvey ba. Banay ata ha, a wuzwa cek masa Gazlavay ma da ka ŋgada ndəhay malamba hay.

⁸ Yaw, ndəhay ma zləbmara mey ŋga Gazlavay a ŋgene na, fa kam cek malamba anda ndəhay daa berney hay

1:3 3 1Tm 1.18 1:4 4 Gal 5.13; 2Pi 2.1 1:4 4-13 2Pi 2.1-22 1:5 5 Mab 12.51; Mesl 14.29-30; 1Kwr 10.5; 2Pi 1.12-13 1:6 6 1Pi 3.19-20; 2Pi 2.4 1:7 7 MC 19.1-24; 2Pi 2.6

a. Daa masa ata fa nam na, mesəfney fa katar, fa vəltar mewulkey nga ley vaw saw, a təbmara Bay Gazlavay nga wey da ray ata ba, a cədmata maslaŋ hay nga Gazlavay daa slam-mewedey da vad. ⁹ Kwa Misel, maslaŋ mahura nga Gazlavay da vad na, ta cəda *Sataŋ daa ba. Misel e, ta kam mey la ta Sataŋ da ray vagay nga *Mawiz. Daa masa ata fa kam mey na, Misel e, a wudəy nga key cek ma fənar ray ba, anda kede ta cəda daa ba, ama a ləvar na, «Bay Gazlavay nga sərdaka banay!»

¹⁰ Ama ndəhay ma zləbmara mey nga Gazlavay a na, faa guzlam maaya ba da ray cek masa ata ma sərmara ba. Ata anda cek hay nga ley masa ma sərmara mewulkey ba. Da ray ŋgene, ndəhay a, aa zəcdamata ray ata maja cek hay masa ata ma sərmara ba ha. ¹¹ Banay a da hətfatar, maja ata fa kam mebərey anda *Kayin †. Asaya, ata fa kam cek malamba nga hətey dala anda Balam ‡ ma ka zleezle. A təbmara mewey nga Gazlavay ba anda Kware § ma təba ba may. Da ray ŋgene, a məcam la anda Kware may. ¹² Masa akwar ndəhay ma təba mey nga Yesu, fa zəmam dəf daa slam a na, ndəhay a, a samawa nga key gwagway ta akwar ta hwaray daa dey daa ba, a nəsmara, a nəkam dey na, fa ray ata gway. Da ray ŋgene, ata na, anda gazlavay nga var masa memed ma handa, ama a pey var ba. Ata na, anda wudez hay, masa kwa ta kiya ma yey babəza na, wudez hay a, a yam ba. Ata na, anda wudez hay makwalatakaya masa mədəslkaya da wurza. ¹³ Ata na, a wam vaw ba anda vanɣwala nga yam ma cewesley saw kəne. Mebərey ata a wuzwa anda maŋgwafakw da ray yam. Ata na, fa mbəkdamara cəved nga Gazlavay anda wurzla hay ma mədam da gazlavay da vad. Maja ŋgene, Gazlavay ta dīytar slam la, matara ləveŋ ləveŋ ŋgada ata nga sərmataw.

¹⁴ Zleezle Henakw, ndaw daa səkway nga *Adam nga dey maasala, taa guzley la da ray cek ma da katar a ndəhay

1:8 8 2Pi 2.10 **1:9** 9 Mew 34.6; Zak 3.2; 2Pi 2.11; Misel: CWJ 12.7 **1:10** 10 2Pi 2.12 † **1:11** 11 Kayin: Ara ndaw ma vəlar cek ŋgada Gazlavay ta mevel maaya ba. Gazlavay a təba cek aŋga ha ba. A cey mevel a ray Gazlavay, ta', a kəda məlmaha Abel vagay. (MC 4.3-8.) ‡ **1:11** 11 Balam: Ara ndaw ma wudəy nga nəsa səkway nga Israyel, ama Gazlavay ta vəlar cəved daa ba. A wudəy nga ka anda kede maja Balak, bay nga Mawap hay, fa da vəlar dala. (Mesl 22.1-35.) § **1:11** 11 Kware: Ara ndaw Jəwif daa səkway nga Levi. A wudəy ata Mawiz ta Aranɣw nga kam bay-ray ba. A wudəy nga key anda ndaw ma ka kwakwas nga Gazlavay, ama masa ta zla sləra ha daa ba araŋ na, Gazlavay taa zədfdata sem ta ndəhay da way aŋga hay tabiya aa vəged. (Mesl 16.1-35.)

1:11 11 Kayin: MC 4.3-8; 1Jŋ 3.12; Balam: Mesl 22.7, 17; 1Pi 2.15; Kware: Mesl 16.1-34 **1:12** 12 2Pi 2.13, 17 **1:13** 13 Iz 57.20; 2Pi 2.17

malamba hay a. A løyey: «Ehe, Bay Gazlavay a sawa la ta maslan anga hay ga da vad masa ndaw ma gwa nga sløfta ba. ¹⁵ A sawa na, nga key sariya a ndøhay tabiya. A sərdata banay la ta ndøhay ta mebørey tabiya. A da sərdata banay na, maja ata ma namar ray a Gazlavay ba, maja cek malamba tabiya masa ata ma kamara ma mbafar a Gazlavay ba, asaya, maja ata maa guzlam maaya ba da ray a.» ¹⁶ Ndøhay a na, mevel fa catar mandaw mandaw, faa nguram mey a ray ndøhay siya. A kam cek maaya ba anda ata ma wudam, a zlapam, a fəcmatara cek hay nga ndøhay ngada ata.

Cek masa ndøhay daa cøved nga Yesu ma da kamara

¹⁷ Jam adaw hay, akwar fa sərfadamara mey masa ndøhay mesløyey nga Bay aləkwa Mahura Yesu *Kəriste ma wuzdamakwara zleezle da ray cek ma da key heyey, ba diya? ¹⁸ A ləvmakwar na, ta pas masa bəla gweegwe a ndøvey na, ndøhay a samawa la ngaa senğørey a ray akwar, akwar ndøhay ma səpa cøved nga Gazlavay. Fa da namar ray a Gazlavay daa ba, a da kam cek maaya ba masa mevel ata ma wudəy. ¹⁹ Yaw, ara ndøhay a ma da handamawa mewudkey-dəy a wuzlah ndøhay. Mewulkey nga bəla fa wata, *Mesəfney nga Gazlavay da ray ata daa ba.

²⁰ Ama akwar, jam adaw hay na, kam gədan da wuzlah akwar amba ka təbmara *Mey-maaya-mawiya nga Gazlavay ma fəna ma fəna. Dəram danğay ta gədan nga Mesəfney nga Gazlavay. ²¹ Sərmara, Gazlavay fa wudkwar kalah, njam daa maaya anga. Səkwmarə pas masa Bay aləkwa Mahura Yesu Kəriste ma da vəlndakwar heter mendøvey ba maja maaya anga ta dey-ceceh anga. ²² Səram dey-ceceh fa ndøhay ma wulkam cew cew da ray mey nga Gazlavay, jənmata. ²³ Vamatərwa daa awaw, ləhdamatərwa. Ngada ndøhay mekele saya na, sərřamatar dey-ceceh, ama wam vaw ta ata amba aa zəřdamakwar ba. Zana ata hay na, ata ta dəlay maja mebørey ata. Anda keře, kwa ka da gəřamatar har ba.

Həlmakwa Bay Gazlavay

²⁴ Kakwa suse a Gazlavay, Gazlavay masa anga ta gədan nga jədkwar amba ka mbəkdamara cøved anga ba. A mbəkdamakwara mebørey akwar, a gwa a handakwar manjar mebørey aa slam-mewedəy fa mey anga ta meesəmey ga.

²⁵ Kakwa suse a Gazlavay, ara anga pal Bay Gazlavay.

Ara an̄ga ma ləhdandakurwa ta fa Bay aləkwə Mahura Yesu *Kəriste. Anja ndəhay tabiya ŋga həlmamara. An̄ga Gazlavay Mawaca-waca ta gədan̄ ma wey da ray ndəhay tabiya, dəga bəla ta zley daa ba aran̄, haa wure keɖe, asaya, haa ŋga sərmataw. *Amen.

Cek masa Yesu Kəriste ma wuzar a Jan Mey da ray derewel nga Cek ma wuzar a Jan

Jan a wuzlala mey daa derewel keđe ngada ndəhay nga Gazlavay na, daa masa ata fa səram banay maja mey nga Yesu Kəriste. Bay Rawma zleezle a pa ray anğa na, nga Gazlavay, a kəđdata vaw ta ndəhay daa mecəmey-ray nga Yesu, maja a gəmam nga pamara anda Gazlavay ba. Anda keđe, Jan a wufey nga vəltar gədaŋ a ndəhay nga Gazlavay, amba a mbəkdamara Yesu ba. Asaya, Jan a wufey nga ləvtar na, fara fara, Yesu Kəriste a fənta masa-gəra anğa hay la cəpa ta gədaŋ.

Daa derewel e keđe na, Jan a wuzey cek hay ga ma rəzla ndaw. Cek hay a na, Jan a hətatar anda mesəfney ma kar. Ara Yesu Kəriste ma wuzdara. Fa dəba ha, a wuzlalatərwa cek hay a. Cek hay masa anğa ma hətatar na, mawatakaya ta cek hay mekele mekele. Pəles mabara, da daa ba, anğwa mabara a wufey nga ləvey «mekey bay-gula». Pəles magaza ta kiya magaza a wufey nga ləvey «meməcey, vəram, banay». Bəlay a wufey nga ləvey, slam-menjeŋ nga masa-gəra nga Gazlavay (13.1). Gədem a wufey nga ləvey Satan, bay-malula (20.2-3). Berney nga Babilanw a wufey nga ləvey slam masa ndəhay fa kam cek hay maaya ba da hwađ a. Daa slam mekele mekele cek hay masa anğa ma hətatar na, ata maasala (nəka 1.4; 1.12; 1.16; 5.1; 5.6; 8.2; 10.3; 12.3, leŋ 15.6). Fa Jəwif hay na, cek hay maasala a wufey nga ləvey cek hay a «makatakaya maaya maaya, mambəkakaya daa ba.»

Daa fasəlawal 1 haa 3 na, leeter hay maasala daha mawuzlalatakaya ngada ndəhay nga Yesu daa berney hay maasala masa daa hwayak nga Azi. Daa fasəlawal 4 ta 5 aa guzley da ray Yesu, Bəz-təbaŋ nga Gazlavay na, ara ndaw pal taava anğa ma wusa nga wura derewel mapadəkaya masa maslərbəkaya ta tebed. Daa fasəlawal hay siya na, Jan aa guzley da ray cek ma da key ta pas masa Yesu ma wura derewel mapadəkaya heyey sem. Derewel keđe fa wuzda ta fa Yesu Kəriste na, Gazlavay a fənta masa-gəra anğa hay la cəpa ta gədaŋ, leŋ Satan, bay ata.

Daa derewel e keđe na, mey mekele mekele daha nga vəley gədaŋ a ndəhay:

Yesu fa zöley fa mey-slam nga ndaw a, ndaw a (3.20)
 Maaya nga Gazlavay ma da sawa a ray ndaw ma jökey
 slömay fa mey anga (1.3)
 Ndöhay ta maslan hay masa da vad a hölmamara Bay
 Gazlavay na, kwara (fasölawal 4 haa 5)
 Da Jeruzelem mawiya ndöhay fa da söräm banay daa saba
 (22.3-4)

Mey ngeeme

¹ Derewel keđe a wuzdərwa cek masa *Yesu *Kəriste ma wuzdatara ngada ndöhay ma ka slöra anga hay. *Gazlavay a lövar a Yesu: «Wuzdatara cek hay masa yah ma da ka ngada fa mey neködey.» Da ray ngene, Yesu Kəriste ta', a slərwa maslan anga da vad ngada fa ndaw ma ka slöra anga *Jan, amba a wuzdara cek hay a keđe tabiya. ² Cay, Jan ta', a key sede da ray cek masa anga ma hötär tabiya. Anda melövey, a wuzdatara a ndöhay, a lövey: «Kede he ara mey nga Gazlavay fara fara, ara Yesu Kəriste ma wuzdərwa.» ³ Maaya nga Gazlavay a sawa la a ray ndaw ma da janga derewel e keđe fa mey nga ndöhay. Maaya nga Gazlavay a sawa la a ray ndöhay ma jökam slömay fa mey a keđe. Mey a na, a wuzda cek ma da key. Asaya, maaya nga Gazlavay a sawa la a ray ndöhay ma töbmara mey mawuzlalakaya ha maja cek hay a tabiya daa derewel e keđe gweegwe cay a kam.

Jan a catar har a ndöhay daa Egöliz hay maasala

⁴ Ara yah, *Jan, ma wuzlala leeter keđe. Ya cakwar har ngada akwar ndöhay nga Yesu daa *mecömey-ray hay maasala daa hwayak nga Azi.

Anja Gazlavay nga pöskwar mey, asaya, nga njadakwar daa zazay. Anja na, aa daha döga böla ta lömey daa ba aran, haa kasl wure keđe, anga daha, asaya, a sawa la a böla. Anja mesöfney hay maasala masa ma njam fa mey nga slam-menjey nga Bay Gazlavay nga pösmakwar mey, nga njadamakwar daa zazay may. ⁵ Asaya, anja Yesu *Kəriste, ndaw ma key sede da ray Gazlavay fara fara ta cöved e, nga pöskwar mey, nga njadakwar daa zazay. Anja na, ara ndaw ngeeme ma slököfawa daa memöcey. Anja na, Bay ma wey da ray bay hay cöpa da böla.

Yesu Kəriste he, a wucndakwar kalah. Ta möcey la maja alökwa. Ta fa mambaz anga ma mbödwa daa memöcey anga, a löhdandakwar daa meböre. ⁶ Anja na, ta cömndakwar ray la amba a tördandakwar nga ndöhay

aŋga hay, a key bay aləkwa. Anda keɗe, aləkwa ndəhay ma ka kwakwas ŋga Bay Gazlavay, Papaha. Ara aŋga ndaw masa ta gədaŋ, ndaw masa fa həlmamara ŋga sərmataw. *Amen.

⁷ Nəkmara, Yesu a fa sawa daa mekwtene. Kwa waawa a hətar la ta dey aŋga. Kwa ndəhay masa ma sləkmara ta zəwet * a hətmar la may. Ndəhay da bəla tabiya, a təwam la maja aŋga. Fara fara cek aha a da key kəne. Amen.

⁸ Bay Gazlavay masa ta gədaŋ ma fənta cek hay cəpa, a ləvey: «Yah na, ndaw masa ŋgeeme, asaya yah ndaw madagway-dakw.» Aŋga na, aa daha dəga bəla ta ləmey daa ba araŋ, haa kasl wure keɗe, aŋga daha, asaya, a sawa la a bəla.

Yesu a wuzar vaw a Jan

⁹ Ara yah, *Jan, məlmakw akwar. Aləkwa macəmkaya ta Yesu, aləkwa fa sərkwa banay anda aŋga, aləkwa fa bəskwa banay anda aŋga, aŋga fa wey da ray aləkwa tabiya. Yah na, ta kəzamaaya la, ta', a kəzlamaya a Patmaws, hwayak da wuzlah bəlay, maja yah ma wuzey mey ŋga Gazlavay, asaya, maja yah ma wuzda Yesu *Kəriste na, ara cəved masa fara fara. ¹⁰ Pas pal daha, ara ta pas mesəfedey Bay Mahura Yesu, *Mesəfney ŋga Gazlavay ta sawa la a ray adaw. Daa ŋgene, ya cəney dəy maa guzlya ta fa dəba adaw, anda taalam ma fey ta gədaŋ. ¹¹ Day a, aa guzlya, a ləvey: «Cek masa kah ma hətar keɗe, maaya na, ka wuzlala aa dərəwel amba ka slərdatara ŋgada mecəmey-ray hay maasala ŋga ndəhay ŋga Yesu daa berney ŋga Efez, daa berney ŋga Səmirna, daa berney ŋga Pərgam, daa berney ŋga Tiyatir, daa berney ŋga Sardes, daa berney ŋga Filadelfi, leŋ daa berney ŋga Lawdise.» ¹² Masa dəy a maa guzlya la na, pəla! ya mbədfwa dey a fa dəba, amba ya hətar ndaw masa maa guzlya heyey. Ama ya da nəkey dey na, a ray petərila hay ŋga bərey magaza maasala ma wadəm pəlŋged pəlŋged. ¹³ Da wuzlah petərila hay a na, ya hətey cek anda ndaw. Aŋga ta zana maazəma fa vaw kasl a dəba salay. Daa dadak aŋga na, cek anda zewed ŋga bərey magaza majəwkaya. ¹⁴ Eŋgwec ŋga ray ŋga ndaw aha a wedey mabara ndəf-nded anda gagəmay. Bəz ŋga dey

1:6 1.6 5.10; 20.4, 6; 22.5; Mab 19.6; 1Pi 2.9 * **1:7** 1.7 ndəhay masa ma sləkmara ta zəwet: A wudəy ŋga ləvey sewje pal masa ma sləka heyey daada ba. Ama a wudəy ŋgaa guzley da ray ndəhay tabiya masa ma cəmdamara dəy ata ŋga kəfey Yesu, kwa Jəwif hay, kwa mahura hay ŋga Jəwif hay, kwa bay-ray hay ŋga Rawm may. **1:7** 1.7 1.13; Dan 7.13; Mt 24.30; Jan 19.34, 37; 1Tes 4.17 **1:8** 1.8 1.4, 8; 2.8; 4.8; 11.17; 16.5; 21.6; 22.13; Mab 3.14; Iz 44.6 **1:9** 1.9 22.8 **1:10** 1.10 17.3 **1:11** 1.11 4.5 **1:12** 1.12 Zak 4.2 **1:13** 1.13 Dan 7.13; 10.5

anğa, a ley dey anda awaw. ¹⁵ Asaya, salay anğa a wedfey njölay njölay anda bərey ma bawa daa awaw. Aa guzley day mahura, a cəney anda yam daa maajərav mahura.

¹⁶ Ndaw aha, anğa ta wurzla hay maasala makərzatakaya da har-zəmay anğa. Dəlaw masa mey a makədfkaya dey cew e cew e fa bawa da mey anğa. Dey anğa a wedfey anda pas ma wedfey ta wuzlah-pas.

¹⁷ Masa yah ma hətar la anda keđe na, tad! ya tədfey asi salay anğa anda ya ta məcey sem. Anğa may, ta', a təldərwa har-zəmay anğa, a pa a ray adaw, a ləvya: «Ka da zlurey ba! maja yah na, ndaw masa ngeeme, asaya yah ndaw madagway-dakw. ¹⁸ Yah na, ndaw masa ta dey. Ya ta məcey la, ama nəkmara, ya ta sləkdəwa sem daa meməcey. Ya da njeý ta dey nğa sərmataw. Yah ta gədan nğa wey da ray meməcey, asaya yah ta gədan nğa wey da ray slam masa ndəhay maməctakaya ma njam da hwad a. ¹⁹ Ya fa ləvka saya, wuzlalata cek hay masa kah ma hətatar. Wuzlalata cek hay masa kah ma hətatar wure keđe, asaya wuzlalata cek hay masa ma da kam kwa nğada fa mey cəpa may. ²⁰ Ehe, mabara nğa mey da ray wurzla hay da har-zəmay adaw ta petərila hay maasala heyey. Wurzla hay maasala a wufey nğa ləvey, maslan hay masa Gazlavay ma slərdatərwa ta da vad, ma pata pal pal aa Egəliz maasala heyey. Yaw, petərila hay maasala may a wufey nğa ləvey Egəliz hay maasala.»

2

Mey masa Yesu ma slərdatara nğada ndəhay daa Egəliz da Efez

¹ Ndaw a heyey aa guzlya saya, a ləvey: «Kah, *Janj, wuzlala mey adaw masa yah ma daa guzldakawa keđe amba ka slərdara nğada maslan nğa Gazlavay ma jəfa mecəmey-ray nğa ndəhay adaw hay daa berney nğa Efez. Ləvtar na,

keđe he ara mey adaw, yah, ndaw ta wurzla hay maasala da har-zəmay. Asaya, yah, ndaw ma pəkey da wuzlah petərila hay maasala ma wadəam. ² Yaw, ya səra menjeý akwar, ya səra akwar fa kəfdamara vaw ta menjeý a, asaya ya səra akwar fa bəsmara banay. Ya səra akwar fa vəlmatar cəved nğada ndəhay malamba hay nğa samawa a wuzlah akwar daa ba. Ndəhay malamba hay a, a ləvam, ata ndəhay adaw hay meslərey, anja ngene, ara ndəhay adaw hay meslərey ba. Akwar ta sanğalamara

mey ata la, ka sɛrmara na, ara ndɔhay membɔrzley.

³ Akwar ta bɛsmara banay la maja yah, ka ta gɛram daa ba. ⁴ Ama mey pal daha. Akwar fa wudmaya * anda ngeeme daa saba. Maja ngene, ya wudey nga mbɛdkwar ray da ray a. ⁵ Wulkam da ray menjey akwar masa maaya zleezle. Nɛkmara taw, wure keɛe akwar ta vɛhmawa sem a dɛba. Anda keɛe, si ka mbɛɛdamara menjey akwar, ka sɛpmara Gazlavay ta mevel pal, amba menjey akwar a, a key anda zleezle cɛnga. Da daa ba na, ya sawa la nga la petɛrla akwar daa slam aha. ⁶ Ama taa slam lanɛar na, ya faa hɛmdakwar ara mey ba, maja akwar fa wudam nga jɛkey slɛmay fa meesɛrkedey nga ndɔhay nga Nikwala † daa ba sɛlak. Yah may, ya wudey meesɛrkedey ata ba.

⁷ «Anda keɛe, da ndaw, anɛa ta slɛmay na, si a jɛkey slɛmay nga cɛney mey masa *Mesɛfnɛy nga Gazlavay ma wuzdatara ngada mecɛmey-ray hay nga ndɔhay aɛaw hay. Da ndaw ta fɛna bay-malula sem ta gɛɛan na, ya da vɛlar cɛvedɛ nga zɛmey babɛza nga wudez masa daa jerne nga Gazlavay ma vɛley heter mendɔvey ba.»

Mey masa Yesu ma slɛɛdatara ngada ndɔhay daa Egɛliz da Sɛmirna

⁸ Ndaw a heyey aa guzlya saya, a lɛvey: «Kah, *Jan, wuzlala mey aɛaw masa yah ma daa guzldakawa keɛe amba ka slɛɛɛara ngada maslanɛ nga Gazlavay ma jɛɛa mecɛmey-ray nga ndɔhay aɛaw hay daa berney nga Sɛmirna. Lɛvtar na,

keɛe he ara mey aɛaw, yah na, ndaw masa ngeeme, asaya yah ndaw madagway-dakw. Yah, ndaw masa ta mɛcey la, ama ya ta slɛkɛfawa sem daa memɛcey a. ⁹ Ya sɛra banay akwar, ya sɛra akwar ndɔhay masa-viya hay. Ama fara fara, ya kadakwara, akwar ndɔhay masa-zleley hay. Ya sɛra ndɔhay faa guzlam mey maaya ba da ray akwar may. Ndɔhay a ngene a padamara ray ata nga *Jɛwif hay, ama ara Jɛwif hay ba, ara ndɔhay nga *Satanɛ, bay-malula. ¹⁰ Menjey nekɛɛey feɛe ka da sɛram banay, ama ka da zluram ta banay a ba. Nɛkmara, Satanɛ, bay-malula, a da kɛzlata ndɔhay siya da wuzlah akwar aa fɛrsɛne, amba a jadakwar. Da ray ngene, ka sɛram banay

2:2 2.2 2Kwr 11.13; 1Jn 4.1 * **2:4** 2.4 akwar fa wudmaya: Ndɔhay mekele a cɛɛdamara mewudey-vaw ara mewudey-vaw da wuzlah ndɔhay daa mecɛmey-ray nga ndɔhay nga Yesu. **2:5** 2.5 2.16, 22; 3.3, 19 † **2:6** 2.6 ndɔhay nga Nikwala: Ara ndɔhay maa sɛrkadam mey nga Yesu ta cɛvedɛ e ba. A batamata ndɔhay nga key cek malamba. **2:7** 2.7 22.2, 14, 19; MC 2.8-9; 3.22; Ez 28.13; 31.8; Mt 13.9, 43 **2:8** 2.8 1.8, 18 **2:9** 2.9 2Kwr 6.10; Jak 2.5; Satanɛ; 3.9; 2Kwr 11.14-15

la haa dar kuraw. Njam majaratakaya maaya maaya haa kasl fa meməcey akwar, anda keđe, ya vəlkwar heter mendəvey ba la maja akwar ta kam bay-gula sem.

¹¹ «Anda keđe, da ndaw, anğa ta sləmay na, si a jəkey sləmay nğa cəney mey masa *Mesəfney nğa Gazlavay ma wuzdatara nğada mecəmey-ray hay nğa ndəhay adaw hay. Yaw, da ndaw ta fəna bay-malula sem ta gədan na, fa da məcey nğa dey cew daa saba səlak.»

Mey masa Yesu ma slərdatara nğada ndəhay daa Egəliz da Pərgam

¹² Ndaw a heyey aa guzlya saya, a ləvey: «Kah, *Jan, wuzlala mey adaw masa yah ma daa guzldakawa keđe amba ka slərdara nğada maslan nğa Gazlavay ma jəda mecəmey-ray nğa ndəhay adaw hay daa berney nğa Pərgam. Ləvtar na,

keđe he ara mey adaw, yah, ndaw masa ta dəlaw masa mey a makədkaya dey cew e cew e. ¹³ Ya səra berney masa akwar da hwađ a ngene. Ara berney masa *Satan, bay-malula, fa wey da hwađ a. Akwar ndəhay ma pamaya nğa ndaw akwar fara fara, akwar fa təbmaya anda Bay akwar cənga, kwa ta pas ata ma kədmara Antipas vagay fa mey akwar na, akwar ta mbəkdamaya daa ba. Yaw, Antipas na, ara ndaw masa ma gərey ba nğa key sede da ray adaw. ¹⁴ Ama mey hay siya daha na, ya wuđey nğa mbədkwar ray nekəđey da ray a cənga. Ndəhay siya da wuzlah akwar fa təbmara meesərkeđey nğa ndaw mezəley Balam zleezle. Balam a taa sərkada bay daha la mezəley Balak nğa təkna *Israyel hay nğa zəmey aslaw nğa kuley, ta nğa ley vaw saw da palah. ¹⁵ Ndəhay mekele hay da wuzlah akwar fa kam anda Balam a may, fa təknam ndəhay ta meesərkeđey nğa ndəhay nğa Nikwala. ¹⁶ Anda keđe, si ka mbəddamara menjey akwar da bəla. Da daa ba na, menjey nekəđey feđe, ya sawa la a wuzlah akwar nğa kəđey vaw ta ndəhay a ngene ta dəlaw ma bawa da mey adaw heyey.

¹⁷ «Anda keđe, da ndaw, anğa ta sləmay na, si a jəkey sləmay nğa cəney mey masa *Mesəfney nğa Gazlavay ma wuzdatara nğada mecəmey-ray hay nğa ndəhay adaw hay. Da ndaw ta fəna bay-malula sem ta gədan na, ya vəlar cek mezəmey la masa yah ma da bəda nğada anğa. Asaya, ya da vəlar nğada ndaw a, ndaw a anğwa mabara kerew kerew, masa mezəley mawiya mawuzlalakaya fa

vəda. Mezəley ηgene kwa ndaw ma səra daa ba. Ma səra na, si ndaw masa mezəley a mavəldakaya ηgada anġa.»

Mey masa Yesu ma slərdatara ηgada ndəhay daa Egəliz da Tiyatir

¹⁸ Ndaw a heyey aa guzlya saya, a ləvey: «Kah, *Jan, wuzlala mey adaw masa yah ma daa guzldakawa keđe amba ka slərdara ηgada maslanġ ηga Gazlavay ma jəda mecəmey-ray ηga ndəhay adaw hay daa berney ηga Tiyatir. Ləvtar na,

keđe he ara mey adaw, yah, Bəzey ηga Gazlavay. Bəz ηga dey adaw, a ley dey anda awaw. Salay adaw hay na, a wadəm njəlay njəlay anda bərey maakulɖakaya.

¹⁹ Ya səra sləra akwar. Fara fara ya səra na, akwar fa wudəm vaw da wuzlah akwar. Asaya, akwar fa təbmara mey adaw, akwar fa bəsmara banay maja yah. Akwar fa jənam vaw da wuzlah akwar. Cek hay a tabiya masa akwar ma kamata ηgene, ta fənmara masa akwar ma kamata zleezle sem.

²⁰ Ama mey pal daha na, ya wudəy ηga mbəɖkwar ray da ray a, maja akwar fa vəlmar cəved a ηgwas mezəley Jezebel ηgene ηga təknaqwar. A pa ray anġa anda *ndaw ma təla mey ηga Gazlavay ηgaa sərkadata ndəhay ma ka sləra adaw hay. Meesərkey a ηgene, fa təknaqwa ηga ley vaw saw da palah ta ηga zəmey aslaw ηga kuley.

²¹ Ya ta vəlar ɖar nekəɖey la ηgada Jezebel e ηga mbəɖda menjey anġa da bəla, ama ta gəmey daa ba, fa key cek hay malamba cənġa. ²² Anda keđe, ya da kəzla ηgwas aha fa guzer ηga macay amba a sərey banay. Yaw, ndəhay ma lam vaw saw † ta anġa may, ya da sərdara banay ga anda anġa. Da daa ba na, si a mbəɖdamara menjey ata da bəla, si a mbəɖdamara mejəkey sləmay fa mey ηga Jezebel e kwa. ²³ Asaya, ya da kəɖta bəz anġa hay vagay amba mecəmey-ray hay ηga ndəhay adaw hay cəpa a sərmara ara yah ma gwa ηga nəka mewulkey ηga ndəhay ta cek hay ma mbafatar. Akwar cəpa, ya pəlkwara mawurbay akwar la təɖe fa sləra ηga ndaw a, ndaw a.

²⁴ «Akwar ndəhay siya daa mecəmey-ray ηga ndəhay adaw hay daa berney ηga Tiyatir, akwar ta təbmara mey ηga ηgwas Jezebel ηgene heyey daa ba, akwar taa sərkadamara mey ηga *Satanġ masa ndəhay ma zəlmara “mey maɖadakaya”, daa ba may. Ya fa da kətkwar fa

2:17 2.17 Ps 78.23-25; Jan 6.48-51; anġwa: Zak 3.9; mezəley mawiya: 3.12; Iz 62.2; 65.15 **2:18** 2.18 1.14-15 **2:20** 2.20 Mesl 25.1-8; 1Bay 16.31; 2Bay 9.22, 30; SNM 15.20 † **2:22** 2.22 Meley-vaw saw da palah feđe kaa na, a wudəy ηga ləvey meney ray ηgada cek mekele aa slam a ηga Gazlavay. **2:23** 2.23 22.12; Jer 11.20

cek mekele daa ba, ²⁵ si ka tǝbmara mey masa akwar ma cǝndamara keɔe aa mevel akwar, haa kasl pas masa yah ma da vǝhwa a bǝla.

²⁶ Anda keɔe, da ndaw ma fǝna Satan, bay-malula, sem ta gǝɔaŋ, asaya, da ta tǝba mey aɔaw la haa mendǝvey ŋga bǝla na, ya da pa amba a wey da ray ndǝhay daa hwayak hay tabiya. ²⁷⁻²⁸ Gǝɔaŋ masa yah ma da vǝlar a ndaw a ŋgene na, ara gǝɔaŋ masa Papay ma vǝldiwa. Ta fa gǝɔaŋ a, a da tǝrey ŋga bay masa ta gǝɔaŋ anda zlanday ŋga bǝrey. Da ray ŋgene, a da kǝɔta ndǝhay malamba hay anda ndaw ma wuhey maŋgayak hay. Asaya, ndaw ma sǝrey banay maja yah na, ya da vǝlar batay § ma weɔey njuzl a ta slam ŋga pǝrek.

²⁹ «Anda keɔe, da ndaw, aŋga ta slǝmay na, si a jǝkey slǝmay ŋga cǝney mey masa *Mesǝfney ŋga Gazlavay ma wuzdatara ŋgaa mecǝmey-ray hay ŋga ndǝhay aɔaw hay.»

3

Mey masa Yesu ma slǝrdatara ŋgaa ndǝhay daa Egǝliz da Sardes

¹ Ndaw a heyey aa guzlya saya, a lǝvey: «Kah, *Janj, wuzlala mey aɔaw masa yah ma daa guzldakawa keɔe amba ka slǝrdara ŋgaa maslaŋ ŋga Gazlavay ma jǝɔa mecǝmey-ray ŋga ndǝhay aɔaw hay daa berney ŋga Sardes. Lǝvtar na,

keɔe he ara mey aɔaw, yah, ndaw ta mesǝfney hay maasala ŋga Gazlavay, leŋ ta wurzla hay maasala makǝrzatakaya da har.

«Ya sǝra slǝra akwar. Ndǝhay a lǝvam, akwar ndǝhay masa ta dey, ama akwar anda ndǝhay mamǝctakaya.

² Fara fara, slǝra akwar fa mey ŋga Gazlavay ŋgene na, a hǝcey. Anda keɔe, slǝkɔam, kam gǝɔaŋ, amba kaa zǝɔam ŋga sǝrmataw fa mey ŋga Gazlavay ba. ³ Sǝrfadamara mey ŋga Gazlavay masa akwar ma cǝndamara zleezle, mey masa akwar ma tǝbmara. Tǝbmara mey a aa mevel akwar, namar ray. Mbǝɔdamara menjey akwar da bǝla, sǝpmara Gazlavay ta mevel pal. Da akwar ta slǝkɔam daa ba na, ya sawa la a wuzlah akwar dǝrfafay anda ndaw-mayal, akwar fa da sǝrmara pas a masa yah ma da sawa ha daa ba. ⁴ Ama ta ŋgene cǝpa, ndǝhay siya hay da wuzlah akwar fetede da Sardes, ta dakalamata zana ata

hay daa ba. Ya da pøkam daa slam a ta zana mabara, maja ya nækta na, ata tède nga pøkam ta yah. ⁵ Anda kedé, ndaw ma fëna bay-malula sem ta gëdanj na, ya da kəzlar zana mabara fa vaw. Mezəley anğa mawuzlalakaya daa ðerewel nga ndəhay ma da hətam heter mendəvey ba na, ya fa da vavəsa daa ba. Ya da ləvey ta gëdanj fa mey nga Papay, Bay Gazlavay, ta maslanj anğa hay na, kedé he, ara ndaw adaw.

⁶ «Anda kedé, da ndaw, anğa ta sləmay na, si a jəkey sləmay nga cəney mey masa *Mesəfney nga Gazlavay ma wuzdatara ngada mecəmey-ray hay nga ndəhay adaw hay.»

Mey masa Yesu ma slərdatara ngada ndəhay daa Egəliz da Filadelfi

⁷ Ndaw a heyey aa guzlya saya, a ləvey: «Kah, *Janj, wuzlala mey adaw masa yah ma daa guzldakawa kedé amba ka slərdara ngada maslanj nga Gazlavay ma jəða mecəmey-ray nga ndəhay adaw hay daa berney nga Filadelfi. Ləvtar na,

kedé he ara mey adaw, yah, ndaw nga Gazlavay, yah ndaw ma mbərzley ba sələk. Yah ndaw ma kərza lekəle ma wura mey-slam nga slam masa Bay Davit ma wa. Da ya ta wura mey-slam a la na, kwa ndaw mekele ma gwa ma gərca daa saba. Yaw, da ya ta gərca sem may, kwa ndaw mekele ma gwa nga wura daa ba sələk.

⁸ «Ya səra sləra akwar. Asaya, ya səra, akwar ta gëdanj nekədey gway. Ama ta nğene he cəpa, akwar fa təbmara mey adaw ta mevel pal cəngga, akwar ta mbəkdamara mey adaw daa ba. Ehe, ya ta wurkwar mey-slam la, kwa ndaw pal ma gwa nga gərca daa ba. ⁹ Jəkam sləmay maaya maaya fa cek masa yah ma da katara ngada ndəhay daa mecəmey-ray nga *Satanj, bay-malula. Ndəhay a nğene a padamara ray ata nga *Jəwif hay, ama a mbərzlam, ata Jəwif hay ba. Nəkmara, cek masa yah ma da ka: ya da təktar ðay a ndəhay a, amba a samawa, a ragadam fa mey akwar. Anda kedé, a da sərmara ya fa wudkwar kalah. ¹⁰ Akwar ndəhay adaw hay, akwar ta təbmara mey adaw la, akwar ta bəsmara banay la maja yah. Da ray nğene, ta pas masa banay ma da sawa a ray ndaw a, ndaw a, amba Gazlavay a nəka mevel nga ndəhay cəpa da bəla na, ya nəkəfakwar dey la.

3:4 3.4 6.11 **3:5** 3.5 Mt 10.32; ðerewel: 13.8; 17.8; 20.15; 21.27; Mab 32.32; Ps 69.29; Iz 4.3; Lk 10.20 **3:7** 3.7 Iz 22.22; Mt 16.19 **3:9** 3.9 2.9; Iz 49.23; 60.14 **3:10** 3.10 1.9; Lk 21.19; 1Kwr 10.13; 2Pi 2.9

¹¹ Fara fara, menjey nekødey fede ya sawa la. Anda kefe, si ka pamara mey masa akwar ma cøndamara kefe aa mevel akwar maaya maaya, amba ndaw a gwa nga vakwara mawurbay masa yah ma da vøldakwara ba. Mawurbay a na, ara heter mendøvey ba. ¹² Anda kefe, ndaw ma føna bay-malula sem ta gødan na, ya da njada a cakay Gazlavay nga sørmataw. Kwa cek ma da badørwa a palah daa ba sølak. Ya da wuzlala mezøley nga Gazlavay adaw fa vøða leŋ mezøley nga berney nga Gazlavay adaw. Anda meløvey, berney a na, ara *Jeruzelem mawiya, berney masa Gazlavay ma da slørdørwa ta da vad. Asaya, ya wuzlala mezøley adaw masa mawiya la fa ndaw a ŋgene.

¹³ «Anda kefe, da ndaw, aŋga ta slømay na, si a jøkey slømay nga cøney mey masa *Mesøfney nga Gazlavay ma wuzdatara ŋgada mecømey-ray hay nga ndøhay adaw hay.»

Mey masa Yesu ma slørdatara ŋgada ndøhay daa Egøliz da Lawdise

¹⁴ Ndaw a heyey aa guzlya saya, a løvey: «Kah, *Jan, wuzlala mey adaw masa yah ma daa guzldakawa kefe amba ka slørdara ŋgada maslaŋ nga Gazlavay ma jøða mecømey-ray nga ndøhay adaw hay daa berney nga Lawdise. Løvtar na,

kefe he ara mey adaw, yah, ndaw mezøley Amen. Asaya, ara yah, ndaw ma key sede da ray Gazlavay fara fara ta cøved e, ya mbørzley ba sølak. Gazlavay a katørwa cek hay tabiya na, ta fa yah. ¹⁵ Ya søra sløra akwar. Sløra akwar a, a mbafaya ba, maja akwar fa søpmara cøved adaw ta mevel pal daa ba. Akwar fa wudmaya maaya maaya daa ba, asaya akwar fa røsmaya daa ba, akwar na, baŋ ta baŋ gway. Kay, yah na, ya wudfey ka njam baŋ ta baŋ køne ba. ¹⁶ Da ka njam baŋ ta baŋ ta yah, anda kefe na, ya da køzlakwar a hwayak ta gødan, anda ndaw ma kørdøwa cek maaya ba da mey.

¹⁷ «Ka wulkam na, akwar ndøhay masa-zleley hay, akwar ta zleley ara mey ba. Asaya, ka wulkam na, cek ma høcfakwar daa ba sølak. Ama fara fara akwar ndøhay masa-viya hay na, ka sørmara, ba daw? Ya nøkakwar na, ka kamaya dey-ceceh. Akwar masa-viya hay ta vaw ða' køne. Akwar wulaf hay. ¹⁸ Anda kefe, ya fa køtkwar. Samawa, hødkam børey magaza ma wedfey njølay njølay fa yah, amba ka tøram ndøhay masa-zleley

fara fara. Samawa, hɔdkam zana hay mabara nga kɔzley fa vaw amba ndɔhay a hɔtmakwar akwar vaw ba' kɔne saba. Anda kedɛ, hwaray fa da kakwar daa saba. Asaya, samawa, hɔdkam slalak nga dey, amba ka hɔtmar dey njɔf-njɛf, akwar wulaf hay saba.

¹⁹ Kwa waawa masa yah ma wudɔ na, ya mbɔɔar ray, ya kɔta. Da ara anda kedɛ na, si akwar, ndɔhay da Lawdise, ka kam gɔɔan nga mbɔɔey menjey akwar da bɔla, ka sɔpmara Gazlavay ta mevel pal. ²⁰ Ehe, wure kedɛ ya fa lecey fa mey-slam nga ndaw, ya fa zɔley fa mey-slam a. Yaw, da ndaw a, ta cɔnda ɔay adaw la, asaya, da ta wuryawa mey-slam a la na, ya da mbɔzey fa anga amba ya zɔmam ɔaf daa slam a, yah ta anga, anga ta yah. ²¹ Yah, ndaw ma fɔna bay-malula sem ta gɔɔan, ala manjatakaya ta Papay, Bay Gazlavay daa slam anga menjey. Anda kedɛ, da ndaw ma fɔna bay-malula sem ta gɔɔan na, ya da vɔlar cɔved amba a sawa, ya njam cew e aa slam adaw menjey.

²² «Anda kedɛ, da ndaw, anga ta slɔmay na, si a jɔkey slɔmay nga cɔney mey masa *Mesɔfney nga Gazlavay ma wuzdatara ngada mecɔmey-ray hay nga ndɔhay adaw hay.»

4

Mehɔsley-ray ngada Bay Gazlavay da vad

¹ Fa dɔba ha, yah, *Jan, ya hɔtey cek mekele saya. Ya hɔtey na, mey-slam da vad mawurkaya. Ya cɔnda ɔay nga ndaw maa guzlya ngeeme heyey. Day a, a cɔnwa nga gɔɔan anda taalam ma fey, a lɔvya: «Tɔpwa fede a vad amba ya wuzdakawa cek masa ma da key ngada fa mey.»

² Menjey nekɔɔey na, *Mesɔfney nga Gazlavay ta', a sawa a ray adaw. Fetede da gazlavay da vad, ya da nɔkey dey na, a ray slam-menjey nga bay. Ndaw manjakaya da ray a. ³ Ndaw aha a mbey kalah anda anɔwa hay maaya ma wadɔm pɔlɔged pɔlɔged daa pas. Slam-menjey a mazlɔrkaya ta kwalay. Kwalay a, a wedey kalah may anda anɔwa maaya ma wedey pɔlɔged pɔlɔged mezɔley «emerat».

⁴ Slam-menjey hay mekele kwakwar cew a ray a mɔfad a zlɔmar ray nga slam-menjey heyey. *Bay-ray hay kwakwar

cew a ray a mēfad * manjatakaya da ray slam-menjey hay a ṅgene. Ndōhay a, ata ta zana mabara fa vaw. Jikwew hay ṅga bay-gula mapatakaya da ray. Jikwew hay a ṅgene makatakaya ta bōrey magaza ma wedey.

⁵ Var a zōmey wēd-wēd, wēd-wēd daa slam-menjey da wuzlah heyey. Asaya, var aa bōcey ta gēdan tēzlaw! tēzlaw! daa slam-menjey a. Daa slam a ṅgene, awaw hay maasala fa gēdam ṅgōler ṅgōler. Awaw hay maasala hay a ara mesōfney hay maasala ṅga Gazlavay heyey. ⁶ Asaya, cek anda dōhwa fa mey ṅga slam-menjey a daha, fa wedey pēlṅged pēlṅged anda baṅgōra, dey a hōtey gurgwar a wurza.

Asaya, cek hay mekele daha mēfad ta dey, fa zlōrmar ray ṅga slam-menjey da wuzlah heyey. Vaw ata cōpa na, dey hay wurcacak-cak. ⁷ Ray ṅga cek ṅgeeme, a nōkey anda ray ṅga mabar. ṅga cek ṅga dey cew e na, a nōkey anda ray ṅga bēz-sla. ṅga cek ṅga dey maakar a, a nōkey anda ray ṅga ndaw. Asaya, ṅga cek ṅga dey mēfad a, a nōkey anda ray ṅga bōrgaday mahura masa fa jōvey. ⁸ Cek hay mēfad a, ata ta kōrpsal maakwaw maakwaw. Vaw ata cōpa na, dey wurcacak-cak gway, kwa dasi kōrpsal may. Cek hay a fa zlam walay taa vad, taa pas, a gōram ba, a lōvam:

Kah pal, Bay Gazlavay.

Kah pal, Bay Gazlavay.

Ahaw, kah pal, Bay Gazlavay.

Fara fara, kah, Bay Gazlavay,

ndaw ta gēdan ma fōnta cek hay cōpa.

Kah na, kah daha dōga bōla ta lōmey daa ba aran,

haa kasl wure kefe,

kah daha.

Asaya, ka sawa la a bōla.

⁹ Anda kefe, cek hay mēfad ta dey heyey fa zlamar walay ṅgada Bay Gazlavay manjakaya daa slam-menjey anṅa heyey, ara anṅa ndaw masa ta dey ṅga sōrmataw. A zlamar walay kōne na, ṅga hōslmar ray, ṅga hōlmamara, ta ṅga kamar suse. ¹⁰ Daa masa fa kamara kōne na, *bay-ray hay kwakwar cew a ray a mēfad heyey fa ragadam fa mey ṅga Gazlavay, ndaw masa ta dey ṅga sōrmataw,

* **4:4** 4.4 Bay-ray hay kwakwar cew a ray a mēfad: Ndōhay a wulkam a wufey ṅgaa guzley da ray sōkway ṅga Israyel hay kuraw a ray a cew len da ray ndōhay meslōrey ṅga Yesu kuraw a ray a cew. Anda kefe, bay-ray hay kwakwar cew a ray a mēfad kefe na, mapatakaya anda ndōhay masa Gazlavay ma lōhdata daa mebōrey maja mejōwey-mey ṅga Gazlavay magurma ta mawiya. **4:4** 4.4 Bay-ray hay: 5.5, 8, 10; 7.11, 13; 11.16; 14.3; 19.4; Iz 24.23; mabara: 6.11 **4:5** 4.5 8.5; 11.19; 16.18; 17.9; Mab 9.24; 19.16; Ez 1.13-14 **4:6** 4.6 15.2; Ez 1.22; cek hay mēfad: 5.6, 8, 11; 6.1; 7.11; 14.3; 15.7; 19.4; Ez 1.5-12; 10.14 **4:8** 4.8 1.17; 11.17; Iz 6.2-3; Ez 1.18; 10.12

masa manjakaya daa slam-menjey aŋga heyey. Bay-ray hay a ŋgene fa həlmamara Gazlavay na, a pəkwmata jikwew ata hay heyey, a pamata fa mey ŋga slam-menjey ŋga Bay Gazlavay heyey, a ləvam:

¹¹ Bay ala Gazlavay, gədaŋ tabiya a sawa ta fa kah.

Kah təde amba ndəhay a həlmamaka, a həslmaka ray,
asaya kah təde ŋga wey da ray cek hay tabiya
maja kah ma katərwa cek hay tabiya.

Cek hay tabiya da bəla daha

ara maja kah ma wufey ŋga katərwa.

5

Mey da ray dərewel mapadəkaya leŋ da ray Bəz-təbaŋ

¹ Masa yah, *Jan, ya fa nəkey dey saya na, ya hətey dərewel daha makərzakaya da har ndaw masa manjakaya daa slam-menjey da wuzlah heyey. Dərewel e aa da har-zəmay. Mawuzlalakaya dey cew e cew e, ama mapadəkaya zlec! daa slam pal. Mey a maslərbəkaya ta tebed slam maasala, amba ndaw a gwa ŋga wura ba. ² Fa dəba ha, ya hətey maslaŋ ŋga Gazlavay masa ta gədaŋ. Aa fa wudey, a ləvey: «Ma gwa ŋga pəslta tebed ma slərba dərewel kefe na, wa? Ma wusa ŋga wura dərewel e kefe na, wa?» ³ Ama, kwa ndaw pal ma gwa ŋga wura daa ba səlak. Kwa ndaw ma pawa salay da vad, kwa ndaw ma sawa dama dama da bəla kefe, kwa ndaw ma bawa daa vəged ma gwa ŋga wura dərewel e amba a nəkey dey a hwad a na, daa ba səlak. ⁴ Anda kefe, yah, Jan, ya ta təway la ga, maja kwa ndaw pal ma wusa ŋga wura dərewel e amba a nəkey dey a hwad a daa ba. ⁵ Da ray ŋgene, ndaw pal da wuzlah *bay-ray hay kwakwar cew a ray a məfad heyey aa guzlya, a ləvey: «Ka təway ba. Nəka mabar ŋgene. A bawa daa səkway ŋga Juda. Ara ndaw ma yawa daa səkway ŋga Bay *Davit. Mabar a ŋgene ta fənta cek hay cəpa sem ta gədaŋ. Da ray ŋgene, a gwa ŋga pəslta tebed maslərbəkaya slam maasala ŋgene, a wura dərewel e.»

⁶ Daa ŋgene, ya hətey ndaw malacakaya da wuzlah slam-menjey heyey ta bay-ray hay leŋ cek hay məfad ta dey heyey. Ndaw a, a nəkey anda bəz-təbaŋ maslakaya dəy a, ama aa ta dey cəŋga. Aa ta dərəm maasala * da ray,

4:11 4.11 MC 1.1, 31; CWJ 5.9, 12; 11.15, 17; 12.10; 15.3-4; 19.6 **5:1** 5.1 10.2; Iz 29.11; Ez 2.9-10; Dan 12.4, 9 **5:5** 5.5 4.4; MC 49.9; Mt 1.1; Rm 1.3-4; Heb

7.14 * **5:6** 5.6 dərəm maasala: Daa dərewel ŋga Gazlavay «dərəm» a wufey ŋga ləvey «cek ta gədaŋ». Nəka Mew 33.17; Dan 7.7, 24. «Maasala» a wufey ŋga ləvey «cek makakaya maaya maaya, mambəkakaya daa ba».

leŋ ta dey hay maasala †. Dey hay maasala a ŋgene ara mesəfney hay maasala masa Gazlavay ma slərdata aa slam wura wura da bəla cəpa. ⁷ Ndaw anda Bəz-təbaŋ heyey ta', a ŋgəchawa, a təba dərewel da har-zəmay ŋga ndaw manjakaya daa slam-menjey da wuzlah kaa heyey. ⁸ Masa anŋa ma təba dərewel e cay na, ta', cek hay məfad ta dey, leŋ bay-ray hay kwakwar cew a ray a məfad heyey a ragadam fa mey ŋga ndaw anda Bəz-təbaŋ a. Ata cəpa ta ganjaval da har, ta taasa hay ŋga bərey magaza marəhkaya ta cek meenŋgəsey mezey maaya. Cek meenŋgəsey a, aa mapakaya anda medərey-danŋay ŋga ndəhay ŋga Gazlavay. ⁹ Mahura hay ta cek hay məfad ta dey heyey a zlamar walay mawiya ŋgada ndaw anda Bəz-təbaŋ kaa heyey, a ləvmar:

«Kah na, ka wusa ŋga la dərewel keđe

ŋga pəslta tebed fa vəda

maja ta kədmaka la vagay.

Mambaz akah ta mbədwə la.

Anda keđe, ka ta mbədtərwa ndəhay la

dasi har ŋga Satan

amba a təram ndəhay ŋga Gazlavay.

Kwa ndəhay masa daa səkway wura wura cəpa,

masa maa guzlam ta mey wura wura cəpa,

ta ndəhay daa wura daa wura cəpa

masa daa hwayak hay cəpa na,

ka ta mbədtərwa sem.

¹⁰ Ka ta tərdata la ŋga ndəhay

masa kah ma wey da ray ata,

ndəhay ma ka kwakwas ŋga Gazlavay,

mapatakaya ŋga key sləra ŋgada Gazlavay.

Anda keđe, ndəhay a, a da wam da ray ndəhay da bəla.»

¹¹ Fa dəba ha yah, Jan, ya cəney dəy ŋga maslaŋ hay ŋga Bay Gazlavay da vad ga, a sləfam ba. Ya hətatar fa zləvmar ray ŋga slam-menjey ŋga Bay Gazlavay heyey, ŋga cek hay məfad ta dey, leŋ ŋga bay-ray hay kwakwar cew a ray a məfad heyey. ¹² Maslaŋ hay a, fa zlam walay ta gədan, a ləvam:

«Bəz-təbaŋ masa ma kədmara vagay heyey na,

aa təde ŋga wey da ray cek hay tabiya,

ŋga hətey zleley,

† **5:6** 5.6 dey hay maasala: Anda Jak 4.10ma ləvey «dey hay» a wufey ŋga ləvey «mesərey cek hay cəpa». **5:6** 5.6 4.6-7; bəz-təbaŋ: 5.9, 12; 6; 7.17; 12.11; 13.8; Iz 53.7; Jer 11.19; Jan 1.29; 1Pi 1.19; mesəfney hay maasala: 4.5; Zak 3.9 **5:7** 5.7 4.2, 9; 5.1, 13; 6.16; 7.10, 15; 19.4; 20.11; 21.5; 1Bay 22.19; Iz 6.1; Ez 1.26-28; 10.1 **5:8** 5.8 8.3-4; Ps 141.2; ganjaval: 15.2 **5:9** 5.9 4.11; 5.6; 7.9; 14.3; Ps 96.1 **5:10** 5.10 1.6 **5:11** 5.11 maslaŋ hay: Jəw 1.6; Dan 7.10; Heb 12.22

nga hōtey lenḡesl,
ta nga hōtey ḡədaŋ.

Asaya, aa tēde amba ndōhay tabiya a hōslmar ray,
aa sēmam da ray mewedeŋy anḡa,
a hōlmamara.»

¹³ Fa dōba ha, ya cōnda dāy nga cek hay tabiya masa
Gazlavay ma katərwa. Cek hay da vad, da bōla, daa vōged
leŋ daa bōlay cōpa fa zlam walay, a lōvam:

Anja ndōhay nga hōlmamara Gazlavay
manjakaya daa slam anḡa menjeŋy,
leŋ Bōz-tōbaŋ may.

Anja ndōhay ngaa hōmdamata,
nga hōslmatar ray,

ngaa sēmam da ray mewedeŋy anḡa,

anja nga wam da ray cek hay tabiya nga sōrmataw!

¹⁴ Cek hay mōfad ta dey heyey a mbōdmatara, a lōvam:
«*Amen, nga key kōne.» *Bay-ray hay kwakwar cew a ray
a mōfad heyey may a ragadam fa mey ata, a hōlmamata.

6

Mey da ray dērewel maslōrbakaya

¹ Masa yah, *Janj, ya fa nōkey dey saya na, ya hōtar Bōz-
tōbaŋ ma la dērewel maslōrbakaya slam maasala heyey fa
wura. Masa anḡa fa pōslta tebed daa slam masa nḡeeme
na, ya cōnda dāy nga cek pal da wuzlah cek hay mōfad
ta dey heyey. A wudeŋy ta ḡədaŋ anda var maa bōceŋy, a
lōvey: «Hawa fedē.» ² Ya da nōkey dey na, a ray pōles
mabara fa bawa. Ndaw da ray pōles e. Ndaw aha aa ta
lalaŋ makōrzakaya da har. Ta', a vōlmar jikwew nga bay-
gula. Aa fa daw nga key bay-gula da ray masa-gōra hay nga
Gazlavay saya.

³ Ta', Bōz-tōbaŋ kaa heyey, a pōslta tebed daa slam nga
dey cew e. Masa anḡa fa pōslta tebed daa slam nga dey
cew e na, ya cōnda dāy nga cek nga dey cew e da wuzlah
cek hay mōfad masa ta dey heyey, dāy a aa guzley, a lōvey:
«Hawa fedē.» ⁴ Daa nḡene, pōles mekele ta', a bawa. Pōles
e magaza. A pōskamar mey a ndaw da ray a, amba a daw
a wudkatar dāy nga ndōhay da bōla, amba a kōdam vaw
da wuzlah ata vagay vagay. Ta', a vōlmar dōlaw maazōma
a har.

⁵ Ta', Bōz-tōbaŋ heyey a pōslta tebed daa slam nga dey
maakar a. Masa anḡa fa pōslta tebed daa slam nga dey
maakar a na, ya cōnda dāy nga cek nga dey maakar a da
wuzlah cek hay mōfad masa ta dey heyey, faa guzlwa, a

løvey: «Hawa fedfe.» Ya da nøkey dey na, a ray pøles matara fa bawa. Ndaw da ray pøles e na, anɗa ta kølew ma wey cek da har. ⁶ Asaya, ya cøney ðay maa guzɓa da wuzlah cek hay məfad masa ta dey heyey. Day a, aa guzley, a løvey: «Dala masa ndaw ma hətər daa sləra fa ðar pal na, a da hədkey daw-zlaraway tərəb-har gway. Da ara salaway na, a da key tərəb tərəb-har maakar. Ama mal ta wuzam * na, ka da wusmata ba, ara cek hay nɗa nəsam ba.»

⁷ Ta', Bəz-təbən heyey a pəsɓta tebed daa slam nɗa dey məfad a. Masa anɗa fa pəsɓta tebed daa slam nɗa dey məfad a na, ya cənda ðay nɗa cek nɗa dey məfad a da wuzlah cek hay məfad masa ta dey heyey, faa guzɓa, a løvey: «Hawa fedfe.» ⁸ Ya da nøkey dey na, a ray pøles fa bawa. Vaw nɗa pøles e bərfakw a. Ndaw masa da ray a na, a zəlmara Meməcey, maja ara anɗa ma kəɗta ndəhay vagay. Slam masa ndəhay maməctakaya ma njam da hwad a fa səpar wurzay. Nɗada ata cewete, ta', a vəlmatar gədan nɗa kəɗey ndəhay reta nɗa reta da bəla vagay. A da nɗəmamata ta dəlaw. Siya hay na, may a da kəɗta vagay. Siya hay saya, macay ma da kəɗta vagay. Asaya, siya hay, cek hay da ley ma da pəwmata.

⁹ Cay, Bəz-təbən heyey a pəsɓta tebed daa slam nɗa dey zlam a. Masa anɗa fa pəsɓta tebed daa slam nɗa dey zlam a na, ya hətatar mesəfney nɗa ndəhay maməctakaya dasi slam-mefəkey cek nɗada Gazlavay †. A kəɗmata ndəhay a nɗene vagay maja ata ma təbmara mey nɗa Gazlavay, asaya maja ata ma kam sede fa mey nɗa ndəhay da ray mey nɗa Yesu. ¹⁰ Mesəfney hay nɗa ndəhay kaa heyey a wudam ta gədan, a ləvam: «Bay Mahura, kah na, Bay Gazlavay pal. Kah ndaw ma mbərzley ba. Ndəhay da bəla ma kəɗmandar vagay na, ka da katar sariya na, ta vara? Ka da sərdana banay na, ta vara?» ¹¹ Fa dəba ha, ta', a vəlmatar jəbe mabara nɗada ndəhay maməctakaya kaa heyey, a ləvmatar: «Njam fedfe, məskam vaw nekəɗey. Məskam vaw haa ata ma kəɗmata məlmakw akwar hay masa ma kam sləra da bəla nɗada Gazlavay anda akwar la ðagay. Ata na, mapatakaya nɗa məcey anda akwar. Fa dəba ha, sariya nɗa Gazlavay a key la.»

* **6:6** 6.6 mal ta wuzam: Wuzam a na, ara yam nɗa babəza nɗa wudez maməsilɓkaya. Cek mezəmey na, ndəhay a hətam ta banay maja daw a hədkey ba. Ama «ka da wusmata ba» ta mevey nɗa may a nɗene a wufey nɗa løvey mal ta wuzam daha. **6:8** 6.8 Jer 14.12; Ez 14.21; Aw 13.14 † **6:9** 6.9 dasi slam-mefəkey cek nɗada Gazlavay: Anda meləvey, ata da cakay Gazlavay, aa fa nəkfatar dey. **6:9** 6.9 1.2, 9; 12.11, 17; 19.10; 20.4; 1Jn 1.1-2 **6:10** 6.10 18.24; Ps 13.2-3; Mew 32.43; Lk 18.7 **6:11** 6.11 jəbe mabara: 3.5, 18; 4.4; 7.9, 13; 19.8, 14; Iz 61.10

¹² Masa yah, Jan, ya fa nōkey dey saya na, ya hōtar Bēz-tōban heyey fa pōshta tebed daa slam ŋga dey maakwaw a. Masa anḡa ma pōshta tebed daa slam ŋga dey maakwaw a cay na, hwiyak a wusey ta gōdan. Pas a mbōfey matara tōlekw tōlekw. Kiya may a mbōfey magaza anda mambaz. ¹³ Asaya, wurzla hay aa kwacamawa kurtata-ta' da gazlavay da vad' anda babōza ŋga wudez manḡurlakw a masa memed' ma kwiydōrwa a hwayak. ¹⁴ Slam da gazlavay da vad' taa yihey sem anda ndaw ma pedey dōrewel, ma la, ma pa aa slam mekele. Anḡwa hay ta hwayak hay da wuzlah bōlay ta ŋgōcham sem daa slam ata. ¹⁵ Ndōhay da bōla cōpa ta bām sem. Kwa bay hay, kwa ndōhay mahura hay, kwa *bay-ray ŋga sewje hay, kwa masa-zleley hay, kwa masa-gōdan hay, lenj beke hay ta ndōhay masa beke ba hay, ndōhay cōpa ta hwam sem ŋga bāmawa aa bōdam hay, a dōba hutkwam hay da anḡwa. ¹⁶ Ndōhay a kedē a wudam ŋgada anḡwa hay ta ŋgada hutkwam hay masa ata ma bām asiya kaa heyey, a lōvam: «Bōzlmawa a ray ala, bōdamandar amba ndaw manjakaya daa slam-menjey da wuzlah heyey a hōtndar ba, asaya, amba Bēz-tōban heyey a kōrzandar ta sariya anḡa ba. ¹⁷ Fara fara dōr a masa ata cewete ma da kamara sariya ha kedē na, ta wuswa sem. Da ray ŋgene, kwa ndaw fa da gwa ŋga lōhey ta pas a ŋgene daa ba.»

7

Mey da ray cek matōhkaya fa dangay ŋga ndōhay Israyel hay gabal temere ta kwakwar mōfad' a ray a mōfad'

¹ Fa dōba ha, yah, *Jan, ya hōtey maslanj hay mekele mōfad' ŋga Gazlavay. Ata malacatakaya pal pal ta mey cakay hay mōfad' * ŋga bōla. Fa tōkmara memed' ma kawa ta mey cakay hay a amba memed' e, a key saba. Anda melōvey, a key da hwayak saba, a key kwa da ray bōlay saba, kwa da ray wudez hay saba.

² Cay, ya hōtey maslanj pal mekele fa sawa ta wurza. Anḡa ta cek masa Bay Gazlavay, ndaw masa anḡa daha ta dey ŋga sōrmataw, ma da tōhtara † fa dangay ŋga ndōhay anḡa hay. Ta', a zōltōrwa maslanj hay mōfad' masa Gazlavay ma

6:12 6.12-13 8.5, 12; 11.13, 19; 16.18; Jwl 2.10; Mt 24.29 **6:14** 6.14 16.20; 20.11; Iz 34.4; Heb 1.11-12 **6:15** 6.15 Iz 2.10, 19, 21; 24.21 **6:16** 6.16 5.7;

Aw 10.8; Lk 23.30 **6:17** 6.17 Jwl 2.11; Nah 1.6; Saw 1.14-18; Mal 3.2 * **7:1** 7.1 cakay hay mōfad': «Mōfad'» a wudfey ŋga lōvey da bōla tabiya. **7:1** 7.1 9.14-15; Jer 49.36; Dan 7.2 † **7:2** 7.2 cek masa Bay Gazlavay ma da tōhtara: Cek masa Gazlavay ma tōhtara na, a wuzdōrwa ndōhay a ara ndōhay ŋga Gazlavay. Da daa ba, a wuzdōrwa ndōhay a, Gazlavay ta lōhdata sem, fa nōkfatar dey. Nōka Ez 9.4.

vøltar gødanj nga nøsey hwayak ta bølay heyey. A zøltørwa ta gødanj, a løvtar: ³ «Ka da nøsmata hwayak ta bølay lej wudez hay ba dægay. Si wara ala ma tøhmatar cek fa danjgay nga ndøhay ma ka sløra nga Gazlavay aløkwa la dægay.»

⁴ Fa døba ha, a wuzdamatiwa ndøhay masa ta cek matøhtakaya fa danjgay kaa heyey tabiya. Ya cønda na, ata gabal temere ta kwakwar møfad a ray a møfad. Ndøhay a ngene, ata daa sækway hay tabiya nga *Israyel. ⁵ Ndøhay a na,

ata gabal kuraw a ray a cew daa sækway nga Juda,

gabal kuraw a ray a cew daa sækway nga Ruben,

gabal kuraw a ray a cew daa sækway nga Gat,

⁶ gabal kuraw a ray a cew daa sækway nga Aser,

gabal kuraw a ray a cew daa sækway nga Naftali,

gabal kuraw a ray a cew daa sækway nga Manase,

⁷ gabal kuraw a ray a cew daa sækway nga Simeyanjw,

gabal kuraw a ray a cew daa sækway nga *Levi,

gabal kuraw a ray a cew daa sækway nga Isakar,

⁸ gabal kuraw a ray a cew daa sækway nga Zabulanjw,

gabal kuraw a ray a cew daa sækway nga *Jawzef,

lej gabal kuraw a ray a cew daa sækway nga Benjamenj.

Mey da ray ndøhay da bøla tabiya makustakaya

⁹ Fa døba ha masa yah ma høtatar ndøhay *Israyel hay la na, ta', ya høtey ndøhay mekele ga makustakaya saya, a sløfam ba. A samawa da wuzlah ndøhay daa wura daa wura cøpa, daa hwayak hay cøpa, a bamawa daa sækway wura wura cøpa, aa guzlam mey hay wal wal cøpa. Ata tabiya fa mey nga slam-menjey nga Bay Gazlavay lej fa mey nga Bøz-tøbanj nga Bay Gazlavay heyey. Ata cøpa ta jøbe mabara fa vaw, ta mey-har nga gendew da har nga høsley ray a Bay Gazlavay ta Bøz-tøbanj anja. ¹⁰ Ndøhay a faa guzlam ta gødanj, a løvam: «Ma løhdamandar na, ara Gazlavay aløkwa manjakaya daa slam anja menjey ta Bøz-tøbanj anja ha kedø.»

¹¹ Slam-menjey masa da wuzlah heyey ta *bay-ray hay lej cek hay møfad ta dey heyey na, maslanj hay tabiya nga Bay Gazlavay, a zlørmatar ray. Maslanj hay a, a ragadam, danjgay dar! a hwayak fa mey nga slam-menjey heyey, a hølmamara Gazlavay, ¹² a løvam:

«Amen, Bay Gazlavay aløkwa.

Anja ndøhay nga hølmamaka, ngaa hømdamaka,

kah ndaw masa ta lenjesl.

Anja ndəhay ŋga kamaka suse, ŋga həslmaka ray,
 kah ndaw ma wey da ray cek hay tabiya,
 kah ndaw masa ta gədaŋ.

Cek hay a keđe ŋga key kəne ŋga sərmataw. Amen.»

¹³ Ndaw pal dasi bay-ray hay kwakwar cew a ray a məfad heyey aa cəfdaya, a ləvey: «Ka sərta ndəhay ta jəbe mabara keđe daw? A samawa na, dama?» ¹⁴ Ya mbəddara, ya ləvar: «Ara kah ma səra, Bay adaw. Yah na, ya səra ba.»

A mbəddiwa, a ləvey: «Ara ndəhay ma bamawa cay daa banay mahura da bəla. Ta pərmata jəbe ata hay la daa mambaz ŋga Bəz-təbaŋ ŋga tərey mabara. ¹⁵ Ara maja ŋgene, ndəhay a ma lacam fa mey ŋga slam-menjey ŋga Bay Gazlavay heyey. Fa həlmamara Gazlavay taa vad, taa pas daa Way-mekey-kwakwas anga da vad. Ndaw masa manjakaya daa slam-menjey da wuzlah heyey, fa nəkfatar dey, fa bərdata. ¹⁶ May fa da catar ŋgada ndəhay a ŋgene daa saba, yam fa da katar daa saba may. Kwa pas fa daa wurwa ŋga ndəlta daa ba, kwa meeme fa da ndəlta daa ba, ¹⁷ maja Bəz-təbaŋ masa daa slam-menjey heyey, a da tərey ŋga mecəkwer ata. A da handata aa wurak ŋga yam ma vəley heter mendəvey ba. Asaya, Gazlavay a da takwadatara matəway daa dey ata cəpa.»

8

Mey da ray ma pəsltey tebed ŋga dey maasala ha

¹ Fa dəba ha, Bəz-təbaŋ heyey a pəslta tebed ŋga dey maasala ha. Daa masa aa ma pəslta la, cek hay tabiya da gazlavay da vad manjatakaya teete haa mənət kwakwar maakar. ² Yah, *Janj, ya da nəkey dey na, ya hətey maslaŋ hay maasala ŋga Gazlavay malacatakaya fa mey anga. Ta', a vəlmatar taalam hay maasala a maslaŋ hay a.

³ Daa ŋgene, maslaŋ mekele daha fa kəzey taasa ŋga bərey magaza. Taasa ha maamandaw na, faa ŋgəsam cek mezey maaya ŋgada Gazlavay da hwad a ŋga dərmar danɣay. Maslaŋ a, a sawa, deŋ! a lecey gweegwe ta slam-meewurey cek mezey maaya ŋgada Gazlavay makakaya ta bərey magaza. Ta', a vəlmar cek mezey maaya ga ŋgaa ŋgəsey amba kakas aha ta medərey-danɣay ŋga ndəhay ŋga Gazlavay tabiya a wusam fa vəda. Anda keđe, a pa cek mezey maaya heyey a ray slam aha, aa ŋgəsa fa mey ŋga slam-menjey ŋga Bay Gazlavay heyey. ⁴ Daa masa

7:12 7.12 4.11 **7:13** 7.13 6.11; 7.9 **7:14** 7.14 1.5; 22.14; Ps 51.9; Dan 12.1; Mt 24.21 **7:15** 7.15 21.3 **7:16** 7.16 Iz 49.9-10 **7:17** 7.17 5.6; 21.6; Janj 10.10, 11; Ez 34.11-16, 23-24; mataway daa dey: 21.4; Ps 126.5-6; Iz 25.8 **8:1** 8.1 Zak 2.17; Hab 2.20 **8:2** 8.2 taalam hay: Jes 6.4, 6; Mt 24.31 **8:3** 8.3 5.8; Mab 30.1, 3

maslan faa ngøsa cek mezey maaya kaa heyey, kakas a, a bawa daa taasa da har maslan a, ta', aa ngøsey, a wusey fa mey nga Gazlavay a vad ta medørey-danɣay nga ndøhay nga Gazlavay heyey.

⁵ Masa maslan nga Gazlavay heyey ma ka cek aha la, anda kedø na, leŋ! a la taasa heyey, a hørcawa awaw da ray slam-meewurey cek heyey, ta', a kwiydørwa awaw a, a bøla. Menjey nekødey, var ta', a zømey wød-wed, wød-wed, ta', aa bøcey tøzlaw! tøzlaw! Hwiyak a wusey ta gødan gødek gødek anda anɣwa ma bøzley.

Mey da ray taalam hay møfad ngeeme

⁶ Fa døba nga cek hay a ngeene, maslan hay maasala ta taalam hay da har a diyam vaw amba a famata taalam hay a. ⁷ Maslan ngeeme ta', a fa taalam anɣa. Lanja a kwiywa a bøla majahadakaya ta awaw ta mambaz. Bøla ha a wunkey slam maakar. Slam pal awaw a wawura ta wudez hay da hwad a cøpa. Kusaf masa meendøbek e cøpa ta wewurey sem.

⁸ Cay, maslan nga dey cew e, ta', a fa taalam anɣa may. Cek anda anɣwa mahura, awaw fa gødey njøm-njem da ray a, a køzlwa tøzlem! aa bølay. Bølay a, a wunkey slam maakar. Slam pal a tørey nga mambaz. ⁹ Cek hay masa daa yam a, a wunkey slam maakar. Slam pal, cek hay a cøpa a møcam. Kwambiwal hay ma pøkam da ray yam a, a wunkam slam maakar. Slam pal, kwambiwal hay a cøpa a nøsam.

¹⁰ Cay, maslan lanɣar ta', a fa taalam anɣa. Ara maslan nga dey maakar a. Wayam hay leŋ wurak hay nga yam a wunkam slam maakar. Slam pal, wurzla mahura fa gødey njøm-njem anda awaw, a køzlwa a hwad a. ¹¹ Mezøley nga wurzla ha «Wurzla-Dedøwek». Masa aa ma køzlwa la aa wayam kaa heyey na, ta', wayam hay a, a wunkam slam maakar. Slam pal, yam da hwad a ta tørey sem dedøwek. Ndøhay ga ta møcam sem maja yam meedøwek ehe, aa ta mewer da hwad a.

¹² Cay, maslan mekele saya a fa taalam anɣa may. Ara maslan nga dey møfad a. Masa aa ma fa la na, cek a tøbzla mewedey nga pas, mewedey nga kiya, leŋ nga wurzla hay. Mewedey nga pas, nga kiya, leŋ nga wurzla hay a wunkey slam maakar. Slam pal a wedey saba. Anda kedø, løvan a key nekødey. Anda meløvey daa mevørndey na, pas a tey børey daanɣafad gway. Dasi tavad na, kiya ta wurzla hay a wadam børey daanɣafad gway may.

Mey da ray banay ma da sawa

¹³ Fa dɔba ha, ya da nɔkey dey na, ya hɔtey bɔrgaday fa jɔvey dɔrenj da vad. Ya cɔnda fa wudey ta gɔdan, a lɔvey: «Waay! Waay! Banay a sawa la a ray ndɔhay cɔpa da bɔla. Maslanj hay maakar daha ta famata taalam ata hay daa ba aranj. Da ta famata cay na, banay a sawa la ga.»

9*Mey da ray taalam nga dey zlam a*

¹ Cay, maslanj mekele ta', a fa taalam anja may. Ara maslanj nga dey zlam a. Menjey nekɔdey, yah, *Jan, ya hɔtey wurzla ma kɔzlwɔ da vad a hwayak. A vɔlmar lekɔle amba a wura vɔged meselelen e*. ² Ta', wurzla ha a wura vɔged e. Kakas a bawa da hwad a anda ndaw ma ndɔley melɔmey hay ga daa wurak mahura. Sɔrat! a sɔrta pas. Lɔvanj tɔbzlelem! a key. ³ Ta', ayakw hay a bamawa daa kakas a, a bɔla, a hɔtam gɔdanj nga zey ndɔhay anda arac.

⁴ A lɔvmatar a ayakw hay a amba a zɔmam kwa guzer ba, kwa wudez pal ba, asaya, a da zɔmam cek mekele ma pɔcwa daa hwiyak ba. Ama a da zam na, si ndɔhay masa Gazlavay ma tɔhtar cek fa danjay ata hay daa ba sɔlak. ⁵ Asaya, a lɔvmatar a ayakw hay a nga kɔdmata ndɔhay vagay ba. Si a sɔrdamata banay gway haa kiya zlam. Mezey nga ayakw hay a na, a da catar anda mecey nga arac. ⁶ Daa kiya zlam a kedɛ, ndɔhay a, a daa cɔfdam memɔcey amba a sɔram banay saba, ama fa da hɔtam memɔcey daa ba. Fara fara a wudam nga mɔcey, ama kwa fa da hɔtam slam nga mɔcey daa ba sɔlak.

⁷ Ayakw hay kaa a nɔkam anda pɔles hay masa ma jɔwmata cay nga daw aa vɔram. Ata ta cek anda jikwew nga bay-gula da ray, makakaya ta bɔrey magaza. Dey ata na, anda nga ndɔhay. ⁸ Engwec da ray ayakw hay a, maazɔma sɔlep sɔlep anda nga ngusay. Sler ata hay yinj-yenj anda nga mabar. ⁹ Ayakw hay a, dadak ata hay masɔrtatakaya ta cek anda zana nga bɔrey masa ma kɔzlamata ngadaa vɔram. Zlara ata hay a mbam mey anda seret hay ga masa pɔles hay ma hwadamara ngadaa vɔram.

¹⁰ Asaya, kwetel ata cɔb-ceb anda nga arac. A zam ndaw anda arac may. Ara kwetel hay a ngene ma vɔlvmatar gɔdanj ngada ayakw hay a, amba a zamata ndɔhay daa kiya zlam

* **9:1** 9.1 Vɔged meselelen e na, ara vɔged masa mesɔfney hay nga bay-malula matɔbzlatatakaya da hwad a. **9:1** 9.1 vɔged meselelen e: 11.7; 20.1; Jɔw 26.6; 28.22; Lk 8.31; 2Pi 2.4 **9:2** 9.2 MC 19.28; Mab 19.18 **9:3** 9.3-11 Mab 10.12-20 **9:4** 9.4 7.2-3 **9:6** 9.6 Jɔw 3.21; Jer 8.3 **9:7** 9.7 Jɔw 39.19-20; Jwl 2.4 **9:8** 9.8 Jwl 1.6 **9:9** 9.9 Jwl 2.5

heyey. ¹¹ Bay nga ayakw hay a na, ara maslan nga bay-malula masa ma wa vøgef masa selesen heyey. Ta mey *Hebøre a zølmara maslan a «Abadanw», ta mey Gørek a zølmara «Apaliyanw». Mezøley hay cewete kede a wufey nga løyey: «cek ma nøsey cek hay mandaw mandaw.»

¹² Anda kede, banay ngeeme na, ta ndøvey cay. Ama wam vaw, maja banay hay mekele cew daha a samawa la saya.

Mey da ray taalām nga dey maakwaw a

¹³ Ta', maslan masa nga dey maakwaw a, a fa taalām anga may. Fa døba ha, yah, *Jan, ya cøney ðay maa guzlwa ta cakay hay møfad nga slam-meewurey cek mezey maaya ngada Gazlavay heyey. Slam aha makakaya ta børey magaza, anga fa mey nga Gazlavay. ¹⁴ Day heyey ta', aa guzlar ngada maslan nga dey maakwaw a masa ta taalām da har heyey, a løyar: «Pøskata maslan hay nga bay-malula møfad masa majøwtakaya da mey-wayam mahura nga Eførat ngene.» ¹⁵ Maslan hay møfad ngene madiytakaya vaw døga zleezle nga kødmata ndøhay da bøla vagay. Ta', maslan a, a daw a pøskata maslan hay a møfad ata. A pøskata na, amba a kam sløra, ta lømla kede, daa kiya ha kede, ta pas a kede, asaya, daa ler e kede may. Gazlavay a wunkata ndøhay da bøla slam maakar. Slam pal na, maslan hay a, a kødmata vagay. ¹⁶ Ta', ya høtey sewje hay da ray pøles hay fa samawa. A kadamiwa sewje hay a, ata na, we. A løyam ata maliyanw temere cew. ¹⁷ Anda yah ma høtar daa cek masa Yesu ma wuzdiwa na, sewje hay a, ata ta zana nga vøram fa vaw. Zana hay a magaza anda awaw, matara tølekw tølekw anda løyen nga var, asaya maa kuray-bøzey. Ray nga pøles hay a, a søram ba ta ray nga mabar hay. Awaw ta kakas matara len angwā maa kuray-bøzey, ma gøfey njøm-njem † a bawa da mey pøles hay a. ¹⁸ Ndøhay da bøla mawunkakaya slam maakar. Slam pal na, banay hay maakar a kede a kødmata vagay. Anda meløyey, ara awaw ta kakas matara len angwā maa kuray-bøzey, ma gøfey njøm-njem, ma bawa da mey ata heyey ma kødmata ndøhay a vagay. ¹⁹ Anda kede, ara cek hay a ngene ma bamawa da mey pøles hay a, ma vøltar gødan nga sørdana banay ta ndøhay. Asaya, kwetel ata hay fa sørdamata banay may. Kwetel hay a na, a nøkam anda zezekw hay, maja mey nga kwetel hay a na, ata anda ray

9:13 9.13 8.3; Mab 30.1-3 **9:14** 9.14 7.1; Mew 1.7 **9:15** 9.15 8.7-12 † **9:17** 9.17 angwā maa kuray-bøzey, ma gøfey njøm-njem: Ara angwā kuray-bøzey makørkaya ma gøfey awaw kalah mezøley ta mey Pølta «baruudu», ta mey Nasara «soufre». **9:17** 9.17 Jøw 41.10-12

nga zezekw hay. Da ray ngene, pøles hay a, a zam ndøhay ta kwetel ata hay a.

²⁰ Ndøhay masa ma møcam ta fa banay hay maakar kaa heyey daa ba na, kwa ta mbøkdamura sløra ata maaya ba daa ba cønga. Ata fa namatar ray ngada mesøfney maaya ba hay ma bamawa ta fa bay-malula, lej ngada kuley hay. Kuley hay a siya hay makatakaya ta børey magaza, siya hay ta børey mekele mekele, siya hay ta aŋgwa, siya hay may ta hwadam maacadakaya. Kuley hay a cøpa ngene a høtmar dey ba, a cønám slømay ba, asaya, a gwamara nga diyam ba. Ama ta ngene he cøpa, fa namatar ray gway. ²¹ Ndøhay a ngene fa kødam ndøhay mekele hay vagay, fa kam maazla hay maaya ba, fa lam vaw saw da palah, asaya fa lalam. Ata fa kamata cek hay a cønga, kwa ta mbøfdamura menjey ata da bøla daa ba sølak.

10

Mey da ray maslan ta ðerewel mecøhe da har

¹ Fa døba ha, yah, *Jan, ya høtey maslan mekele masa ta gødan fa pawa salay da gazlavay da vad. Anga masørtakaya ta gazlavay nga var. Ray anga matulakakaya ta kwalay. Dey anga a wedey anda pas. Salay anga hay a nøkam anda neneh nga awaw maazøma. ² Maslan a, aa ta ðerewel mecøhe mawurkaya da har. Salay anga hay maazlakatakaya, salay nga zømay aa da ray bølay, salay nga gula aa da ray hwiya.

³ Maslan a, a wudey ta gødan, anda mabar maa zlehey. Masa aa ma wudey cay na, ya cøney var maa bøcey dey maasala nga mbøfdara mey a, a maslan a.

⁴ Masa var a maa bøcey ta meeguzley cay na, anja ya da wuzlala mey a. Ama, ya cøney ðay nga ndaw mekele da gazlavay da vad maa guzlya, a løvey: «Ka da wuzlala cek masa var maa guzldørwa ngene ba. Ka da kada a ndaw ba.»

⁵ Ta', maslan masa ma pa salay anga pal a ray yam, langar a ray hwiya heyey, a banгада har-zømay ngada vad, ⁶ a mbedey ta mezøley nga Gazlavay, ndaw masa aa daha nga sørmataw, ara anga ma løma slam da vad ta cek hay da hwad a cøpa, lej slam da hwayak ta cek hay da hwad a cøpa. Asaya, ara anga ma katørwa bølay hay ta cek hay da hwad a cøpa. A mbedey, a løvey: «Cek ma da key heyey na, cek ma da tøká daa saba. ⁷ Yaw, daa masa maslan nga dey maasala ha ma da fa taalam anga keðe na, Gazlavay

a da ndøvda cek mabadakaya masa aa ma wulkey nga ka. Cek mabadakaya ha na, ara cek masa annga ma wuzdatara ngada ma ka sløra annga hay, ndøhay ma tøla mey annga hay zleezle.»

⁸ Cay, ðay masa yah, Jan, yah ma cønda da gazlavay kaa heyey aa guzlya saya, a løyey: «Daw ta tøba ðerewel mawurkaya heyey masa da har maslan, salay pal da ray yam, lanngar da ray hwiyyak katay.»

⁹ Fa døba ha, ta', ya daw fa maslan a heyey døba, ya løvar: «Vøldiwa ðerewel mecøhe kefe.» Maslan a, a mbøfðiwa, a løyey: «Ehe, zøma. A da cørfaka da mey anda amam, ama da ka ta nda la a hwað na, a da kaka ðeðøwek *.»

¹⁰ Cay, ta', ya tøba ðerewel mecøhe kaa heyey, zam! ya zøma. Fara fara ta cørfaya la anda amam, ama daa masa yah ma nda la a hwað na, ta tøyey sem ðeðøwek.

¹¹ Asaya, a løyva: «Si ka daw dey pal saya, nga wuzda mey masa Gazlavay maa guzlða da ray cek ma da key da ray søkway hay ga, da ray ndøhay daa wura daa wura, da ray hwayak hay ga maa guzlam ta mey hay mekele mekele, asaya, da ray bay hay ga.»

11

Mey da ray ndøhay ma ka sede cew

¹ Menjey nekøðey, ta', a vølmaya zlanday. Ara zlanday ma wey cek ta annga. Cay, ndaw daha aa guzlya, a løyey: «Sløkðey, daw ta wa megøley nga *Way-mekey-kwakwas nga Gazlavay, leŋ slam-meføkey cek ngada Gazlavay. Asaya, sløfta ndøhay masa ma døram danngay daa way a

*. ² Ama ka da wa slam daa ambaw ba, mbøkda maja slam a ngene aa mapakaya ngada søkway hay tabiya ma sørmara Bay Gazlavay ba, maja ndøhay a ngene a da wam da ray *Jeruzelem, berney nga Gazlavay, a da nøsmara, haa kiya kwakwar møfad a ray a cew †. ³ Asaya, ya da slørdta ndøhay afað hay cew daha nga key sede da ray mey afað

10:7 10.7 22.6; Jer 25.4; Am 3.7-8 **10:8** 10.8-10 Ez 2.8-3.3 * **10:9** 10.9 A da cørfaka...a da kaka ðeðøwek: Ndøhay a wulkam «A da cørfaka anda amam» a wuðey nga løyey «metøbey mey nga Gazlavay aa maaya maja aa guzley da ray meløhey nga ndaw». «A da kaka ðeðøwek» a wuðey nga løyey «mey nga Gazlavay a wuzwa sariya masa Gazlavay ma da ka», da daa ba, a wuðey nga løyey «ndøhay a da søram banay maja mey a». * **11:1** 11.1 wa megøley nga Way-mekey-kwakwas nga Gazlavay[...]sløfta ndøhay: A wuðey nga løyey cek masa annga ma wa ta ndøhay masa annga ma sløfta na, Gazlavay fa nøkfatar dey. Ndøhay masa ma døram danngay na, ara ndøhay nga Gazlavay. **11:1** 11.1 21.15 † **11:2** 11.2 kiya kwakwar møfad a ray a cew: A wuðey nga løyey «ðar 1260». **11:2** 11.2 Ps 79.1; Lk 21.24; kiya kwakwar møfad a ray a cew: 12.6, 14; 13.5; Dan 7.25; 12.7

fa mey nga ndəhay. Ndəhay cew e na, a da kəzlam zana ma təwa vagay fa vaw, amba a təwam maja mebərey nga ndəhay a. Fa dəba ha, a wuzdamara mey adaw masa yah maa guzlda la haa kiya kwakwar məfad a ray a cew e keđe.»

⁴ Ndəhay a cew keđe na, ata malacatakaya fa mey nga Bay Gazlavay ma wa bəla tabiya. Ara wudez hay cew ma zəley *Awliviye. Asaya, ata cewete petərla hay. ⁵ Da ndəhay masa-gəra ata hay a wudam nga kamatar cek maaya ba na, awaw a da bawa da mey nga ndəhay cew e, asaya, awaw a, a da takwarata masa-gəra ata hay a kəlmedek! Ara anda keđe, ndəhay masa-gəra ata hay a, ma da məcam. Kwa fa da hətam dabaray nga ləhey daa ba səlak. ⁶ Daa masa ndəhay cew e fa təlām mey nga Gazlavay na, a gwamara nga təkay var ma da pawa haa kasl ata ma ndəvdamara metəley-mey a. Yaw, ata ta gədanj nga tərdamara yam nga mambaz. Asaya, ata ta gədanj nga handawa banay hay mekele mekele a ray ndəhay da bəla, kwa ta đar wura wura anda ata ma wudam.

⁷ Da ndəhay cew e keđe ta ndəvdamara metəley-mey nga Gazlavay cay na, cek nga ley mahura a bawa la daa vəged meselelej e heyey, a da kərzata ndəhay cew e. A da fənta ta gədanj, a da kəđta vagay. ⁸ Vagay hay a, a da njam makwiydatakaya daa bəwal nga berney mahura, slam masa Bay ata Mahura Yesu ma məcey da hwađ a fa hwadam mazlanjalakaya heyey. Berney a ngene a, a pamar sləmay-wazlay *Sadawm, da daa ba, *Ejip †. ⁹ Ndəhay daa hwayak hay tabiya, daa səkway hay tabiya, maa guzlam ta mey hay tabiya, ndəhay mekele mekele tabiya a da nəkmata vagay hay a daa bəwal haa đar maakar ta reta. Fa da vəlmatar cəvedj nga pəshamata na, daa ba. ¹⁰ Ndəhay maaya ba hay cəpa da bəla aa səmam la ara mey ba da ray vagay hay a. A da kam gwagway ta mevəley cek hay da wuzlah ata. Aa məkam la fa meməcey nga ndəhay cew ma təlām mey nga Gazlavay keđe, maja ata ta sərdamata banay la kalah ta ndəhay da bəla.

¹¹ Fa dəba nga đar maakar ta reta kaa heyey, Bay Gazlavay a da fətatar mesəfney a ndəhay cew maməctakaya kaa heyey, amba a mbəlam. Ta', a sləkđam, a lacam ta

11:4 11.4 Zak 4.1-3, 11-14; Jan 8.17 **11:5** 11.5 2Bay 1.10; Ps 97.3; Jer 5.14
11:6 11.6 Mab 7.17-19; 1Bay 17.1; Jak 5.17 **11:7** 11.7 13.1-2; 17.8 † **11:8**
 11.8 Sadawm ta Ejip: Sadawm ara berney masa ndəhay da hwađ a, a kam cek malamba kalah. Da ray ngene, Gazlavay ta pəlha sem. Ejip na, ara hwayak masa ndəhay Israyel hay zleezle ma kamawa beke da hwađ a. Ara hwayak masa ndəhay da hwađ a, a wudmara Gazlavay ta ndəhay anja hay ba səlak, a nam ray a kuley hay. **11:8** 11.8 Lk 13.33-34; Sadawm: MC 18.20; Iz 1.10; Ez 16.46; Ejip: Mab 3.16-19; 7.3-5 **11:10** 11.10 Jan 16.20

lecey. Ndəhay masa ma hətmar cek aha na, a rəzlam ga, mandərzay a katar. ¹² Fa dəba ha, ndəhay cew heyey a cənam dəy maa guzlwa ta gədan da vad, a ləvtar: «Samawa, təpmawa fa yah fede a gazlavay.» Cay, a təpam a vad, gazlavay ŋga var a sərtata meedey masa-gəra ata hay heyey. ¹³ Daa ŋgene, hwiyak a wusey ta gədan gədek gədek, anda aŋgwa ma bəzley. Da wuzlah slam hay kuraw ŋga berney a na, pal a pəlhey. Hwiyak a ma wusey na, ta kədey ndəhay gabal maasala vagay la. Ndəhay siya masa ta dey na, a zluram ga, a həlmamara Bay Gazlavay da vad.

¹⁴ Ara anda keđe, banay ŋga dey cew e ma ndəvey. Ama wam vaw, maja menjey nekədey fede banay mekele ŋga dey maakar a, a sawa la saya.

Mey da ray taalam masa ŋga dey maasala ha

¹⁵ Fa dəba ŋga banay ŋga dey cew e keđe, maslan ŋga Gazlavay ŋga dey maasala ha, a fa taalam aŋga may. Day hay a cənmawa ta gədan da gazlavay, a ləvam: «Wure keđe, Bay Gazlavay aləkwa leŋ *Kəriste, ndaw aŋga masa aa ma wala, fa wam da ray bəla. A da wam ŋga sərmataw.»

¹⁶ Masa dəy hay a maa guzlam la na, *bay-ray hay kwakwar cew a ray a məfad manjatakaya daa slam-menjey hay fa mey ŋga Gazlavay heyey, ta', a ragadam, dangay dar! dar! a hwayak fa mey ŋga Gazlavay, a həlmamara, ¹⁷ a ləvam:

Bay Gazlavay, kah Gazlavay ta gədan
ma fənta cek hay tabiya.

Kah na, kah daha
dəga bəla ta ləmey daa ba aran,
haa kasl wure keđe,
kah daha ŋga sərmataw.

Ala fa kamaka suse,
maja wure keđe ka fa wuzdərwa gədan akah mahura.
Ka fa wey da ray cek hay tabiya dəba.

¹⁸ Səkway hay tabiya ta cam mevel la da ray akah.

Ama wure keđe na, ara kah, Bay Gazlavay,
ma cey mevel da ray ata dəba.

Pas masa kah ma da katar sariya
ŋgada ndəhay maməctakaya tabiya ta wuswa cay.

Ara pas masa kah ma da pəltara mawurbay ŋga sləra
ŋga ndəhay ma ka sləra akah hay,
masa ma təla mey akah hay.

Asaya, ka pəltara mawurbay

nga ndəhay akah hay ma namaka ray,
kwa ngada ndəhay mahura hay ta mecəhe hay.
Ama ngada ndəhay masa ma nəsmara bəla na,
ara pas masa kah ma daa zəddata.

¹⁹ Masa bay-ray hay a ngene maa guzlam cay na, *Way-mekey-kwakwas nga Gazlavay da vad bədan! a wurey haa kwa waawa a hətar *akwatay § nga *mejəwey-mey nga Gazlavay ta Israyel hay daa way a. Asaya, var a zəmey wəf-wed, wəf-wed, aa bəcey təzlaw! təzlaw! dey ga. Hwiyak a wusey anda anğwa ma bəzley. Asaya, lanja mahura mahura a kwiymawa a hwayak.

12

Mey da ray ata ngwas ta gədem mahura

¹ Fa dəba nga cek hay a ma kam ngene, cek daha merəzley ndaw a wuzwa vaw da gazlavay da vad. Ara ngwas. Ngwas aha pas masərtakaya fa vaw anğa anda zana. Kiya aa dasi salay anğa. Adikwaw nga wurzla kuraw a ray a cew da ray, anda jikwew nga bay-gula. ² Ngwas aha aa ta hwad, fa da yey. Fa wudey maja hwad a, fa car, fa sərey banay ga.

³ Cek mekele daha merəzley ndaw, a wuzwa vaw da vad saya. Ara cek nga ley mahura magaza. A səram ba ta gədem mahura. Cek aha, aa ta ray hay maasala leŋ gursaw nga bay hay maasala da ray hay a. Asaya, cek aha, aa ta dəram hay kuraw da ray. ⁴ Gədem e vey! a vawa wurzla hay ga da vad ta kwetel anğa. Daa wurzla hay makustakaya slam maakar, a vawa slam pal, a hazakadatərwa fakw! fakw! a hwayak. Ta', a lecey fa mey nga ngwas heyey, amba da ngwas aha ma yey cay na, a la bəzey a, a zəma. ⁵ Daa ngene, ngwas a, ta', a yawa bəzey mezəle. Ara bəzey a ma da wey da ray hwayak hay tabiya ta gədan. Daa masa aa ma yarawa cay, ta', a lamara bəzey a, a vad a cakay Gazlavay manjakaya daa slam-menjey anğa. ⁶ Ngwas aha na, ta', a hway a wuzlah-ley aa slam masa Gazlavay ma dīya amba

11:18 11.18 19.5; Ps 2.1-5; 110.5-6 § **11:19** 11.19 Daa akwatay a na, anğwa hay cew masa mejəwey-mey nga Gazlavay ta Israyel hay mawuzlalakaya fa vəda daha. Daa Way-mekey-kwakwas magurma da bəla na, akwatay nga mejəwey-mey nga Gazlavay mabadakaya daa Slam masa Gazlavay aa da hwad a. Ndaw a gwa nga hətar ba səlak, si ndaw mahura da ray ndəhay ma ka kwakwas nga Gazlavay ma hətar dey pal daa mevey gway. Nəka Heb 9.1-7.

11:19 11.19 4.5; 6.12-13; 8.7; 15.5; Jəw 38.22-23; akwatay: 1Bay 8.1, 6 **12:1** 12.1 Iz 7.14; 26.17 **12:3** 12.3 gədem: 12.7, 9, 13; 13.2; 16.13; 20.2; Dan 7.7, 24 **12:4** 12.4 Dan 8.10 **12:5** 12.5 19.15; Ps 2.9

a vɔlar cek mezəmey da hwaɗ a. A da njeɣ daa slam aha kiya kwakwar məfaɗ a ray a cew*.

⁷ Fa dɔba ha, vɔram a key da gazlavay da vaɗ. Misel, mahura ŋga maslan hay ŋga Gazlavay, leŋ maslan anɣa hay siya a kɔɗam vaw ta gɔdem heyey. Gɔdem may ata ta maslan anɣa hay daa vɔram a. ⁸⁻⁹ Ata Misel ta fɛnmata gɔdem ta maslan anɣa hay sem ta gɔɗan, leŋ! a lamatɔrwa, fakw! fakw! a hazakadamɔrwa a palah, maja Bay Gazlavay a wuɗey a njam da vaɗ saba. Gɔdem e na, ara zezekw masa ma tɛknata ndɔhay da bɔla dɔga zleezle. Mezɔley anɣa, *Satan, bay-malula. Ta kɔzlamɔrwa sem da vaɗ ŋgada hwayak ta maslan anɣa hay cɔpa.

¹⁰ Menjeɣ nekɔɗey, ya cɔney ɗay ŋga ndaw maa guzlwa ta gɔɗan da vaɗ, a lɔvey: «Wure keɗe Gazlavay alɔkwa ta lɔhndandakwar cay fara fara daa banay. Anɣa fa wuzɗɔrwa *mewey anɣa, a fɛnta cek hay cɔpa ta gɔɗan. Asaya, wure keɗe, *Kɔriste, ndaw anɣa masa aa ma wala ŋga lɔhdata ndɔhay, fa zɔma bay anɣa. Ta hazakadamɔrwa Satan, ndaw maa dɔɗfatar mey a mɔlma alɔkwa hay sem. Ara ndaw maa dɔɗfatar mey taa vaɗ, taa pas fa mey ŋga Gazlavay alɔkwa. ¹¹ Ama mɔlma alɔkwa hay a, ta fɛnmara Satan sem ta gɔɗan ta fa mambaz ŋga *Bɔz-tɔban ŋga Gazlavay ma mbɔɗwa. Asaya, ta fɛnmara sem ta gɔɗan, maja ata ma kam sede da ray Yesu fa mey ŋga ndɔhay ta mandɔrɔzay daa dey ba, ta zɔluram ta memɔceɣ daa ba. ¹² Da ray ŋgene, meesɔmey ŋga key da gazlavay da vaɗ. Akwar ndɔhay masa da gazlavay da vaɗ, sasɔmam. Ama, akwar, ndɔhay da ray hwayak ta ndɔhay da ray bɔlay, akwar na, banay a sawa la a ray akwar maja Satan, bay-malula, ta kɔzlamɔrwa sem a wuzlah akwar, fa ceɣ mevel ga, maja a sɔra na, pas anɣa mendɔrey nekɔɗey gway.»

¹³ Daa masa ta hazakadamɔrwa gɔdem sem a bɔla na, ta', gɔdem e a wuseɣ vaw, a sɔpar wurɔzay ŋga ŋgwas ma yawa bɔzey mezɔle heyey. ¹⁴ Ama ta', a vɔlmar zɔlara hay cew ŋga bɔrgaday mahura a ŋgwas aha amba a jɔvey ta anɣa a wuzlah-ley, aa slam masa Gazlavay ma da vɔlar cek mezɔmey heyey, amba a njeɣ fetede haa mevey maakar ta reta. Gɔdem kaa heyey a gwa a hɔɗfar fetede saba. ¹⁵ Ta', gɔdem e a vɔŋgwa yam ga da mey, a vevey anda wayam ma ley, a sɔpar wurɔzay ŋga ŋgwas aha amba a la. ¹⁶ Ama

* **12:6** 12.6 kiya kwakwar məfaɗ a ray a cew: A wuɗey ŋga lɔvey «ɗar 1260». **12:6** 12.6 1Bay 17.1-7; 19.5-7; Mt 2.13; ɗar 1260: 11.2 **12:7** 12.7 Dan 10.13; Jud 9 **12:8-9** 12.9 20.2; MC 3.1; Iz 14.12; 27.1; Lk 10.18; Jan 12.31 **12:10** 12.10 4.11; 11.15; ndaw maa dɔɗfatar mey: Jɔw 1.9-11; Zak 3.1 **12:11** 12.11 6.9; Mt 16.25; Bɔz-tɔban: 5.6; 1Jn 2.14; 5.4 **12:12** 12.12 18.20 **12:14** 12.14 mevey maakar ta reta: 11.2

hwiyak ta jəna ŋgwas aha la. Hwiyak a, bəzl! a bəzley anda ndaw ma wura mey, ndərbac! a sa yam masa gədem ma vəŋgwurwa heyey. ¹⁷ Daa masa gədem kaa heyey ma hətər hwiyak ma sa yam kede la na, a cey mevel ga a ray ŋgwas aha. Da ray ŋgene, a vəhwa amba a daw ŋga kawa vərəm ta bəz anğa hay siya. Bəza hay a na, ara ndəhay ma namar ray a mewey hay ŋga Bay Gazlavay, asaya, ara ndəhay ma kam sede da ray Yesu fa mey ŋga ndəhay. ¹⁸ Cay, ta', gədem kaa heyey a daw a lecey a mey-bəlay.

13

Mey da ray cek hay ŋga ley hay cew

¹ Fa dəba ha, yah, *Jan, ya hətəy cek ŋga ley fa bawa daa bəlay. Cek aha aa ta ray hay maasala, dərəm anğa hay kuraw. Gursaw ŋga bay hay macəbtakaya da ray dərəm hay kuraw ata. Mezəley maaya ba ŋga cədey Gazlavay mawuzlalakaya fa ray anğa hay a. ² Cek ŋga ley masa yah ma hətər a na, a sərəm ba ta dəva. Ama salay anğa hay na, zlelek da mey a maazəma yin-yen *. Mey anğa may, a sərəm ba ta mey ŋga mabar. Gədem heyey a vəldara gədan anğa ta bay anğa amba a wey da ray bəla, a key cek ta gədan. ³ Ray ŋga cek ŋga ley a pal dasi maasala hay heyey, a nəkey na, anda ta ŋgəmamara la haa a məcəy. Ama, cek ŋga ley a ta', a mbəlwa daa meməcəy, mbəlek e kaf! a kəfey. Maja ŋgene, ndəhay cəpa da bəla a rəzlam da ray a, ta', a səpmara. ⁴ Ata cəpa a ragadamar ŋgada gədem maja aa ma vələr gədan ŋgada cek ŋga ley kaa heyey. Asaya, a ragadamar ŋgada cek ŋga ley a, a ləvam: «Ma fəna cek ŋga ley kede ta mahura na, wa? Ma gwa ŋga fəna ta mekədey-vaw na, wa? Kwa ndaw pal ma gwa daa ba sələk.»

⁵ Daa ŋgene, a vəlmar cəved a cek ŋga ley a ŋga həsley ray ga ta ŋga cəda Gazlavay. A hətəy gədan ŋga cəda Gazlavay haa kiya kwakwar məfad a ray a cew. ⁶ Anda kede, aa guzley maaya ba da ray Gazlavay, a cəda. Asaya, a cəda slam-menjey anğa leŋ ndəhay da vad tabiya. ⁷ Fa dəba ha, a vəlmar cəved a cek ŋga ley a amba a kədam vaw ta ndəhay ŋga Gazlavay, a fənta ta gədan. Asaya, a fənta səkway hay cəpa, ndəhay daa wura daa wura cəpa, maa guzlam ta mey wura wura cəpa, leŋ hwayak hay cəpa, a fənta ta gədan. Ata cəpa dasi har ŋga cek ŋga ley a.

12:17 12.17 6.9; 11.7; 13.7; Dan 7.21 **13:1** 13.1 bəlay: Dan 7.3; cek ŋga ley:

11.7; 13.11-17; 16.10; 17.3, 7-13; 19.20; Dan 7.3-8, 21, 25 * **13:2** 13.2 Ta mey Gərek a ləvey «salay hay na, a sərəm ba ta salay hay ŋga ours.» «Ours» ta mey Nasara na, ara cek ŋga ley mahura masa-həma kalah. **13:2** 13.2 2Tes 2.9

13:3 13.3 17.8 **13:4** 13.4 Ps 89.7 **13:5** 13.5-6 Dan 7.25; 11.36; kiya 42: 11.2

⁸ Ndəhay cəpa da bəla a dərmar danğay la a cek nğa ley a. Ara ndəhay masa mezəley ata mawuzlalatakaya daa dərrewel nğa ndəhay masa fa da hətam heter mendəvey ba daa ba. Dərrewel nğa ndəhay ma da hətam heter mendəvey ba na, mawuzlalakaya dəga zleezle masa bəla ta ləmey daa ba aran, ara dərrewel nğa Bəz-təbañ masa ma slamara d̄ay a heyey.

⁹ Yah, Jan, ya fa ləvey: «Da ndaw aa ta sləmay, si a jəkey sləmay maaya maaya fa mey masa yah ma kada keḑe.

¹⁰ Ndaw masa mapakaya nğa kərzey na, si a kərzamara kəne. Ndaw masa mapakaya nğa kəḑey vagay ta dəlaw na, si a kəḑmara kəne. Anda keḑe, si ndəhay nğa Gazlavay a bəsmara banay, a pamara Gazlavay nğa ndaw ata fara fara cəñga.»

¹¹ Fa dəba ha, ya hətəy cek nğa ley mekele ma bawa daa vəgeḑ. Anğa ta dərām da ray cew. Dərām anğa hay a na, ata anda nğa bəz-təbañ. D̄ay anğa a cəney anda gədem.

¹² Cek nğa ley a keḑe fa key cek ta gədan tabiya anda nğa cek nğa ley ngeeme heyey. A ka sləra ha fa mey nğa cek nğa ley ngeeme. A təkta d̄ay nğada ndəhay cəpa da bəla nğa ragadamar ta meney ray nğada cek nğa ley ngeeme masa ray mañgəmkaya haa a məcey, mbəlek ma kəfey heyey. ¹³ Cek nğa ley mecew e a key maazla ga haa a kwiywa awaw da gazlavay da vad a hwayak fa mey nğa ndəhay cəpa.

¹⁴ A təkna ndəhay cəpa da bəla ta fa maazla hay masa Gazlavay ma vələr cəved nğa key fa mey nğa cek nğa ley ngeeme kaa heyey. Ta fa maazla hay a na, a həldata ndəhay da bəla cəpa nğa ləmam cek ma səram ba ta cek nğa ley ngeeme masa ma nğəmamara ta dəlaw haa a məcey, ama anğa ta dey cəñga. A həldata ndəhay nğa həsley ray a cek aha. ¹⁵ Fa dəba ha, Gazlavay a vələr cəved a cek nğa ley mecew e nğa fətəy memed a cek maləmkaya ha, amba a səfney, aa guzley, a kəḑta ndəhay masa ma ragadamar ba vagay. ¹⁶ Asaya, cek nğa ley a, a təkta d̄ay nğada ndəhay tabiya, kwa bəza hay, kwa ndəhay mahura hay, kwa masa-zleley hay, kwa masa-viya hay, asaya, kwa beke hay ta ndəhay masa beke ba hay, amba a təkta cek fa danğay, da daa ba, fa har-zəmay ata. ¹⁷ Ndaw masa cek matəhkaya fa vəḑa daa ba na, a gwa a həḑkey cek saba, asaya, a gwa a həḑkedey cek saba may. Cek matəhkaya ha na, ara mezəley nğa cek nğa ley masa ngeeme, da daa ba, ara lamba mapakaya anda mezəley a.

13:7 13.7 12.17 **13:8** 13.8 3.5; Bəz-təbañ: 5.6 **13:10** 13.10 14.12; Jer 15.2; 43.11; Lk 8.15 **13:11** 13.11 Mt 7.15 **13:13** 13.13 16.14; 20.8 **13:15** 13.15-16 14.9, 11; 15.2; 16.2; 19.20; 20.4; Iz 44.5; Dan 3.5 **13:17** 13.17 13.18; 15.2

¹⁸ Anda keɗe, yah, Jan, ya fa ləvey: «Maaya na, ndəhay a wulkam maaya maaya da ray mey a. Ndaw ta lenɗesl na, si a pey lenɗesl fa cek masa lamba ha ma wuɗey nga wuzɗərwa. Lamba ha na, aa mapakaya anda mezəley nga ndaw, ara temere maakwaw ta kwakwar maakwaw a ray a maakwaw.»

14

Mey da ray Yesu ma mbəɗtərwa ndəhay da wuzlah ndəhay da bəla

¹ Daa masa yah, *Jan, ya fa nəkey dey saya na, ya hətar Bəz-təbaŋ heyey malacakaya da ray aŋgwa mezəley *Siyaŋw. Ndəhay masa mezəley nga Bəz-təbaŋ ta mezəley nga Bay Gazlavay Papaha mawuzlalatakaya fa danɗay ata na, ata tabiya malacatakaya ta Bəz-təbaŋ a, daa slam a. Ndəhay a tabiya, ata gabal temere ta kwakwar məfaɗ a ray a məfaɗ. ² Asaya, ya cəney ɗay maa guzlwa ta gədaŋ da gazlavay da vaɗ. Aa guzley ɗay mahura, a mbey mey ta gədaŋ anda yam ma vavawa daa maajərav mahura. Asaya, aa bəcey ta gədaŋ anda var. ɗay a masa yah ma cənda ŋgene, a cəney anda ndəhay ma kəɗam ganjaval ga daa slam a. ³ Ndəhay gabal temere ta kwakwar məfaɗ a ray a məfaɗ heyey malacatakaya fa mey nga cek hay məfaɗ ta dey heyey, len fa mey nga *bay-ray hay heyey. Ata tabiya fa mey nga slam-menjey nga Bay Gazlavay. Ata fa zlam walay mawiya masa kwa ndaw mekele ma sərə nga zla daa ba səlak, si ndəhay masa gabal temere ta kwakwar məfaɗ a ray a məfaɗ heyey, masa Yesu ma mbəɗtərwa da wuzlah ndəhay da bəla. ⁴ Ata na, ara ndəhay masa ta har-dəlay ba, maja ta nam ta ŋgusay daa ba səlak. Kwa aa slam wura wura masa Bəz-təbaŋ ma daw na, ndəhay a, fa səpmar wurzay. Ara ata, ndəhay masa aŋga ma mbəɗtərwa teesef da wuzlah ndəhay da bəla, amba a njam ŋgada Gazlavay ta ŋgada aŋga, anda cek ma key da ley teesef masa ndəhay ma vəldamara a Gazlavay ta ŋgada Bəz-təbaŋ a. ⁵ Kwa ndaw ta cəney membərzley pal da mey ata daa ba səlak, asaya, kwa mebərey fa ata daa ba.

Mey da ray maslaŋ hay nga Gazlavay maakar

⁶ Cay, yah, *Jan, ya hətey maslaŋ nga Gazlavay mekele fa pəkey dərəŋ da gazlavay da vaɗ. *Mey-maaya-mawiya masa fara fara ma da njeŋ nga sərmataw na, aa daha da har aŋga. A da wuzdatara ŋgada ndəhay da bəla cəpa, kwa

14:1 14.1 22.4; aŋgwa mezəley Siyaŋw: Iz 4.5; Jwl 3.5; ndəhay 144.000: 3.12; 7.3-4 **14:2** 14.2 1.15; 15.2; 19.6; Ez 1.24-25 **14:3** 14.3 4.4, 6; walay mawiya: 5.9 **14:4** 14.4 Jan 10.4-5 **14:5** 14.5 Iz 53.9; Saw 3.12-13

ndəhay daa hwayak wura wura, daa səkway wura wura hay cəpa, leŋ ŋgada ndəhay masa maa guzlam ta mey hay wura wura cəpa. ⁷ Ta', maslan ŋga Gazlavay a, aa guzlar ta gədan, a ləvtar: «Namar ray a Gazlavay, həlmamara, maja pas masa aa ma da katar sariya ŋgada ndəhay na, ta wuswa cay. Həslmar ray, ara ŋga ma ləmərwa slam da vad ta da hwayak, ara ŋga ma katərwa bəlay hay leŋ wurak hay ŋga yam cəpa.»

⁸ Fa dəba ha, yah, Jan, ya hətar maslan ŋga dey cew e fa səpar wurzay ŋga maslan ŋgeeme heyey, a ləvey: «Berney mahura ŋga *Babilanw heyey ta pəlhey sem. Fara fara ta pəlhey sem pəlah! pəlah!, maja Babilanw aha ta ley vaw saw la, taa sərkadata səkway hay tabiya sem ŋga mbəkdamara cəved ŋga Gazlavay amba a kam cek hay maaya ba mekele mekele anda ŋga. Ara anda aa ma vəltar wuzam ŋga sey mandaw mandaw ŋga nəsta.»

⁹ Fa dəba ha, yah, Jan, ya hətar maslan ŋga dey maakar a fa səptar wurzay ŋga maslan hay cew heyey. A wudey ta gədan, a ləvey: «Kwa waawa ma nar ray ŋgada cek ŋga ley ma bawa daa bəlay kefe, ta ŋgada cek maləmkaya anda ŋga heyey, asaya, kwa waawa ma təba amba cek aha a təhar cek fa danğay, da daa ba, fa har na, ¹⁰ ŋgene, Gazlavay a sərda banay la. A cey mevel la a ray a. Maja ŋgene, a da sərəy banay, anda ndaw ma sey cek meedəwek e marəhkaya pece pece daa vəley, kwa cek meededek e da hwad a daa ba səlak. Fara fara, Gazlavay a da sərda banay daa awaw, fa gədey njəm-njem. A da sərda banay kəne fa mey ŋga maslan ŋga hay ta fa mey ŋga Bəz-təban ŋga.

¹¹ Kakas ŋga awaw a, faa ŋgəsey ŋga sərmataw. Ndəhay a, ta namar ray la ŋgada cek ŋga ley heyey, leŋ ŋgada cek maləmkaya anda ŋga, asaya, ta təbmara la amba cek aha a wuzlalatar mezəley ŋga fa ata. Anda kefe, fa da hətam meməskey-vaw daa ba səlak. A da səram banay taa vad, taa pas maja awaw a.»

¹² Yah, Jan, ya fa ləvey: «Akwar ndəhay ŋga Gazlavay ma namar ray ŋgada kwakwas ŋga, asaya, ma təbmara mey ŋga Yesu, banay masa akwar ma sərmara da bəla ŋgene na, si ka bəsmara gway.»

¹³ Fa dəba ha, ya cəney dəy maa guzlya dəga da vad, a ləvey: «Wuzlala mey a kefe: Ndəhay ma məcam daa sləra ŋga Bay Mahura na, maaya ŋga Gazlavay aa da ray ata dəga wure kefe haa ŋga sərmataw.» Ta', *Mesəfney

nga Gazlavay a mbəfdara a day maa guzlya heyey, a ləvey: «Ahaw, wure kefe, sləra ata ta ndəvey cay, a da məskam vaw maja banay masa ata ma bəsmara da bəla heyey ta sləra maaya masa ata ma kamara na, fa wuzdərwa ata ndəhay ma kam cek maaya.»

Mey da ray mendəvey nga bəla

¹⁴ Fa dəba ha, yah, *Janj, ya da nəkey dey na, a ray mekwtene mabara. Ndaw anda Bəz nga Ndaw manjakaya da ray mekwtene he. Ndaw aha, jikwew nga bay-gula da ray. Jikwew a makakaya ta bərey magaza. Asaya, ndaw aha aa ta bəbey da har, mey a makədkaya maaya maaya.

¹⁵ Menjey nekədey, maslanj mekele a bawa daa *Way-mekey-kwakwas nga Gazlavay da vad, aa guzlar ta gədanj ngada ndaw da ray mekwtene he, a ləvar: «La bəbey akah amba ka ngəma daw, maja pas a ta wuswa cay. Cek hay da bəla ta nəham cay.» ¹⁶ Da ray ngene, ndaw manjakaya da ray mekwtene kaa heyey lej! a la bəbey anja, ngam! ngam! a ngəma daw * da bəla.

¹⁷ Cay, ya hətey maslanj mekele ma bawa daa Way-mekey-kwakwas nga Gazlavay da vad heyey saya. Anja ta bəbey da har, mey a makədkaya maaya maaya may.

¹⁸ Fa dəba nga maslanj a kefe, maslanj nga Gazlavay mekele a sawa da cakay slam-mefəkey cek ngada Gazlavay. Ara maslanj ma wey da ray awaw. Aa guzlar ta gədanj ngada maslanj masa bəbey da har heyey, a ləvar: «La bəbey akah, daw ta slatərwa babəza nga wudez ma vevey ta vevey da bəla, babəza masa yam a ma kam wuzam † ta anja, daw ta slatərwa da bəla cəpa, maja ta nəham cay.» ¹⁹ Anda kefe, maslanj kaa heyey lej! a la bəbey anja ta', a daw a slatərwa babəza nga wudez hay heyey ‡, kway! a kwiya da aa slam masa ndəhay ma mbərzlamara nga dəcey yam a. A wudəy nga ləvey na, Gazlavay fa cey mevel ga a ray ndəhay siya da bəla. ²⁰ Slam masa aa ma mbərzlamara babəza nga wudez e na, aa da dəba berney a §. Masa fa mbərzlamara nga dəcey yam a, ama ma da bawa na, ara mambaz. A vevey, a ley wayam anda yam haa a daw dərənj a key kələmeeter

14:13 14.13 1.3; 16.15; 19.9; 20.6; 22.7, 14; Heb 4.9-10 **14:14** 14.14 1.7, 13 **14:14** 14.14-20 Dan 7.3-14; Jwl 4.13; Mt 13.39-40; 17.5; 24.30; SNM 1.9

* **14:16** 14.16 a ngəma daw: «Menjəmey daw» fedə (14.15-16) a wudəy nga ləvey mekusey ndəhay maaya fa mey nga Gazlavay nga hətey heter mendəvey ba. Daa 14.17-20a wudəy nga ləvey sariya ngada ndəhay siya. † **14:18** 14.18 wuzam: A tam wuzam kefe ta yam nga babəza nga wudez mezəley «raisin» ta mey Nasara. ‡ **14:19** 14.19 Babəza nga wudez hay kefe mapatakaya anda ndəhay ta mebərey masa Gazlavay ma da katar sariya. **14:19** 14.19 19.15; Iz 63.1-6 § **14:20** 14.20 berney a: Ndəhay a wulkam, berney a na, ara Jeruzelem.

temere maakar. Da pøles a ndøkwey a hwaɗ a na, mambaz a, a kørza kasl aa mey.

15

Mey da ray maslan hay maasala nga Gazlavay ma da sərđamata banay ta ndøhay

¹ Fa døba ha, yah, *Jan, ya høtey cek maaya mekele ma røzley ndaw a wuzwa vaw da gazlavay da vad. Ara maslan hay nga Gazlavay maasala ma da sərđamata banay mekele mekele ta ndøhay haa dey maasala. Banay hay a ngene, ara mecey-mevel nga Gazlavay madagway-dakw a ray ndøhay da bøla. ² Cay, ta', ya høtey cek mekele saya anda døhwa ma wedey pølngeɗ pølngeɗ anda banğøra, ta awaw da hwaɗ a, dey a høtey gurgwar a wurza. Ndøhay malacatakaya da mey døhwa ha, ata ta ganjaval masa Gazlavay ma vøldatara da har. Ara ndøhay ma fønmara cek nga ley ta gøðan, ma namar ray nğada cek malømkaya anda anğa heyey ba, ma tømara amba a høtam lamba anğa heyey fa danğay ata ba sølak. ³ Fa zlam walay masa *Mawiz, ndaw ma ka sløra nga Gazlavay ma zla zleezle. Ngene he, ara walay nga *Bøz-tøban nga Gazlavay may *. Ndøhay a, a zlam walay, a løvam:

Bay Gazlavay, kah Gazlavay ta gøðan
ma fønta cek hay tabiya.

Sløra akah masa kah ma ka keɗe na,
aa kwakwaɗ ba, aa maaya ara mey ba.

Kah na, Bay ma wey da ray hwayak hay cøpa.

Cek hay masa kah ma kata na, ka kata ta cøveɗ e,
membørzley da hwaɗ a daa ba sølak.

⁴ Bay Gazlavay, ndaw ma zlurey ta kah ba na, wa?
Ndaw ma løvey a hølka ray ba na, ndaw a dama?
Kah na, kah Gazlavay pal.

Ndøhay daa hwayak hay cøpa a samawa la fa mey akah
nga hølmaaka ray ta meregeɗey,
maja ata ma høtmar sløra akah makakaya ta cøveɗ e.

15:1 15.1 4.5; 15.7; 16.1; 17.1; 21.9 **15:2** 15.2 4.6; 5.8; 13.15, 18; 14.2 * **15:3** 15.3 Walay keɗe ara walay nga bay-gula. Anda Mawiz ta ndøhay Israyel hay ma zlamara walay da mey Bølay Magaza maja Gazlavay ma løhdata dasi har nga sewje hay nga Ejip heyey na, ndøhay malacatakaya da mey døhwa keɗe fa zlam walay maja Bøz-tøban ma løhdata may. **15:3** 15.3 16.5-6; 19.2; 22.12; Mew 32.4; Ps 145.17; walay: Mab 15.1; Ps 111.2; 139.14 **15:3** 15.3-4 4.11 **15:4** 15.4 14.7; Ps 86.9; 98.2-3; Iz 2.2-3; Jer 10.6-7

⁵ Menjey nekødey, yah, Jan, ya høtar *Way-mekey-kwakwas nga Gazlavay da vad mawurkaya. Slam-mekørcey ta ambal aa da hwad a. *Akwatay nga *mejøwey-mey nga Gazlavay ta ndøhay anga hay aa daa slam-mekørcey a. ⁶ Cay, ya høtatar maslan hay maasala ma da sørdamata banay ta ndøhay haa dey maasala heyey, fa bamawa daa way a. Ata ta zana fa vaw mabara, ma ley dey. Asaya, zøwet hay nga børey magaza ma wedey pølhged pølhged majøwtakaya fa dadak ata hay †. ⁷ Cek hay møfad ta dey heyey, pal da wuzlah ata ta', a vøltar taasa hay nga børey magaza pal pal a maslan hay a maasala heyey. Taasa hay a marøhdatakaya ta mecey-mevel nga Gazlavay, Gazlavay ndaw masa ta dey nga sørmataw. ⁸ Daa ngene, kakas fa bawa, fa bawa haa a røhda way a heyey. Kakas a, a bawa daa mewedey nga Gazlavay ta daa gødan anga. Ndaw a gwa nga mbøzey aa way a ba sølak, si banay hay maasala masa maslan hay maasala ma handamørwa heyey ma ndøvam la cøpa dægay.

16

Mey da ray banay hay nga madagway-dakw

¹ Fa døba nga cek hay ma kam kefe, yah, *Jan, ya cøney døy maa guzlwa ta gødan daa *Way-mekey-kwakwas nga Gazlavay da vad heyey. Døy a, aa guzlwa ngada maslan hay nga Gazlavay maasala heyey, a løvtar: «Diyam ta mbøddamara mecey-mevel nga Gazlavay daa taasa hay maasala kefe cøpa a bøla.» ² Anda kefe, maslan masa ngeeme ta', a daw a mbødda masa daa taasa anga a ray bøla. Daa ngene, mbølek hay ma cey kalah a bamawa njaba-njaba fa ndøhay masa lamba nga cek nga ley matøhtakaya fa vaw ata, masa ma namar ray ngada cek malømkaya anda cek nga ley a heyey.

³ Fa døba ha, maslan masa nga dey cew e ta', a mbødda masa daa taasa anga may aa bølay. Daa ngene, yam daa bølay a, a tørey anda mambaz nga ndaw mamøckaya ma bawa. Anda kefe, cek hay daa yam a cøpa ta møcam sem.

⁴ Ta', maslan masa nga dey maakar a, a mbødda masa daa taasa anga may aa wayam hay ta aa wurak nga yam hay. Anda kefe, yam daa wayam hay a ta daa wurak hay a ta tørey sem anda mambaz may. ⁵ Cay, yah, Jan, ya cønda

15:5 15.5 11.19; Mab 40.34; SNM 7.44 † **15:6** 15.6 zøwet hay nga børey magaza...fa dadak ata hay: A wudøy nga løvey ata ta gødan nga Gazlavay nga key sløra. **15:6** 15.6 1.13; Dan 10.5 **15:7** 15.7 4.6; 14.10; 16.1 **15:8** 15.8 Mab 40.34-35; Iz 6.4; Ez 44.4 **16:1** 16.1 15.1; Ps 69.25; Iz 66.6; Jer 10.25 **16:2** 16.2 13.15; Mab 9.10 **16:3** 16.3-4 8.8; Mab 7.17-21; Ps 78.44

ɗay nga maslan nga Gazlavay ma wey da ray yam fa hɛslar ray ngada Gazlavay, a lɔvey: «Kah na, Bay Gazlavay pal taava akah. Kah daha dɛga zleezle haa wure kedɛ. Ka ta ka sariya kedɛ la ta cɔved e. ⁶ Ndɔhay ma kɛdmata ma tɛla mey akah hay vagay, ta ndɔhay ma kɛdmata ndɔhay akah hay siya na, ka ta vɛltar mambaz la nga sey. Ngene he, ara cek tɛde fa slɛra ata.» ⁷ Cay, ya cɔney ɗay mekele maa guzlwa ta gɔdan da cakay slam-meewurey cek ngada Gazlavay, a lɔvey: «Ahaw, Bay Gazlavay, ndaw masa ta gɔdan ma fɛnta cek hay cɔpa. Ka fa katar sariya a ndɔhay ta cɔved e, membɔrzley da hwad a daa ba sɛlak.»

⁸ Menjey nekɛdey, maslan nga dey mɛfad a, ta', a mbɛɗda masa daa taasa anɔa may a ray pas. Anda kedɛ, pas a hɛtey cɔved nga cey ngulca-ca haa a ndɛlta ndɔhay. ⁹ Daa masa pas a fa ndɛlta ndɔhay a ngene, ta', a cɛdmara Gazlavay, maja ara anɔa ma slɛrdɛrwa banay a kedɛ. Ama ta mbɛɗdamara menjey ata da bɛla daa ba, a namar ray a Gazlavay ba cɛnɔa.

¹⁰ Fa dɛba ha, maslan nga dey zlam a, ta', a mbɛɗda masa daa taasa anɔa may a ray slam-menjey nga cek nga ley heyey. Daa ngene, lɔvan a key daa slam masa cek nga ley a ma wa cɔpa. Ndɔhay cɔpa daa slam aha aa pɛdam sler maja fa sɛram banay. ¹¹ Ama ta banay ngene cɔpa na, kwa ndɔhay a ta mbɛɗdamara menjey ata daa ba, ata fa kam cek maaya ba hay cɛnɔa. A cɛdmara Gazlavay da vad maja banay ata ta mbɛlek hay mekele mekele ma catar.

¹² Cay, maslan nga dey maakwaw a, ta', a mbɛɗda masa daa taasa anɔa aa wayam mahura nga Efɛrat. Yam daa wayam a, taa sɛkey sem mbas! amba bay hay ma da samawa ta daa dana a hɛtam cɔved nga zlɛnɔey a dey lanɔar. ¹³ Fa dɛba ha, ta', yah, Jan, ya hɛtey mesɛfney hay maaya ba maakar. Ata a sɛram ba ta kakɛran hay. Mesɛfney a pal a bawa da mey gɛdem heyey. Lanɔar a bawa da mey cek nga ley heyey. Lanɔar may, a bawa da mey *ndaw ma tɛla mey ta membɔrzley. ¹⁴ Mesɛfney hay a ngene a samawa ta fa bay-malula. Fa kam maazla hay mandaw mandaw nga rɛzley ndɔhay. Fa diyam a way bay hay da bɛla cɔpa nga kusmatɛrwa amba a kam vɛram ta Gazlavay ta pas masa Gazlavay, ndaw ma fɛnta cek hay cɔpa, ma da wuzdɛrwa gɔdan anɔa.

16:6 16.6 17.6; 18.24; 19.2; Mew 32.43; Ps 79.3, 10; Mt 23.35, 37 **16:7** 16.7 15.3 **16:9** 16.9 9.20-21; 16.11, 21 **16:10** 16.10 13.1-2; lɔvan; Mab 10.21-22; Iz 8.22 **16:12** 16.12 Iz 11.15; 44.27; 46.11 **16:13** 16.13-14 12.3; 13.1-2; Mab 8.2; Ps 78.45 **16:14** 16.14 11.17; 13.13-14; 19.20; Mt 24.24; 2Tes 2.9; vɛram: 19.11-21

¹⁵ Da ray ηgene, Bay Mahura a løyey: «Wam vaw maaya maaya, maja ya da sawa na, dərfaḡay anda ndaw-mayal. Maaya ηga Gazlavay aa da ray ndaw ma jəḡa vaw aηga, a ney ba, ma wada vaw ta zana aηga, amba dar masa yah ma da sawa na, ndaw a, a gwa ηga pəkey ta vaw ba' kəne ba, asaya, hwaray fa da kar maja ndəhay a da hətmar vaw ba' kəne na, daa ba.»

¹⁶ Ta', mesəḡney hay maaya ba maakar ma diyam a way bay hay heyey, a kusmata bay hay a aa slam daha mezəley ta mey *Hebəre «Harmagwadaηw».

¹⁷ Fa dəba ha, maslaη masa ηga dey maasala ha, ta', a mbəḡda masa daa taasa aηga aa memed. Day a cənwa ηga gədaη daa slam-menjeη ηga Bay Gazlavay daa Way-mekey-kwakwas aηga, a løyey: «Banay hay a, ta kam cay.» ¹⁸ Da ray ηgene, var a zəmey wəḡ-wed, wəḡ-wed, aa bəcey ta gədaη təzlaw! təzlaw! Hwiyak a wusey ga anda aηgwa ma bəzley. Dəga Gazlavay ma zlar ηga ləmtərwa ndəhay a bəla na, hwiyak ta wusey anda ηgene daa ba səlak. ¹⁹ Ta', hwiyak a bəzley, berney mahura * heyey a wunkey slam maakar. Berney hay cəpa da bəla a pəlham pəlah! pəlah! may. Gazlavay a sərfadərwa berney mahura ηga Babilanw, ta', a ceη mevel a ray a, a sərda banay ga, anda ndaw ma sa cek meedəwek e marəhkaya pece pece daa vəley. ²⁰ Daa ηgene, hwayak hay da wuzlah bəlay cəpa, yam aa zəḡdata. Asaya, aηgwa hay a yayiham. ²¹ Lanja ga a kwiywa da vad a ray ndəhay. Lanja ha pal na, mahura anda hutkwam. Maja ηgene, ndəhay a cəḡmara Gazlavay maja lanja ha fa sərdamata banay ga kalah.

17

Mey da ray ηgwas-barlaw

¹ Fa dəba ha, maslaη pal dasi maslaη hay ηga Gazlavay maasala masa ta taasa hay da har heyey, ta', a sawa, aa guzlya ηgada yah, *Jan, a løyey: «Sawa fede amba ya wuzdakawa banay masa ηgwas-barlaw daha ma da səra. Nηgwas * a na, mapakaya anda berney mahura masa gweegwe ta wayam hay mahura mahura. ² Bay hay cəpa da bəla ta lam vaw la ta aηga. Asaya, ndəhay ma sam wuzam

16:15 16.15 3.3, 18 **16:17** 16.17-21 16.1; Iz 66.6 **16:18** 16.18 4.5; 6.12-13

* **16:19** 16.19 Berney mahura: A wufey ηga løyey na, berney ηga Babilanw daa mewulkey ηga ndəhay mekele. Nəka 14.8.Siya hay na, a wulkam, a ləvam na, ara berney ηga Jeruzelem. **16:19** 16.19 14.10; 18.2 **16:21** 16.21 11.19;

16.9 * **17:1** 17.1 Nηgwas: Fede na, ηgwas aha mapakaya anda berney ηga Babilanw. Ara berney gweegwe ta wayam hay cew mahura. **17:1** 17.1 Jer 51.13

anğa la haa a wam. Anda meləvey, ndəhay a ta lam vaw † la ta anğa may.»

³ Ta', *Mesəfney nğa Gazlavay a sawa a ray adaw. Fa dəba ha, maslan kaa heyey a handaya a ley. Daa masa yah da ley a na, ya hətey nğwas manjakaya da ray cek nğa ley. Cek nğa ley a na, aa magaza anda mambaz, ta ray hay maasala, dərām hay kuraw cegwegw e da ray hay a. Vaw anğa cəpa mawuzlalakaya ta mezəley hay ma cəfey Gazlavay. ⁴ Nğwas aha na, aa ta zana fa vaw. Zana ha magaza ləmter e ta magaza anda mambaz. Asaya, anğa ta cek hay nğa bərey magaza mekele mekele ta anğwa hay ma wadām pəlɲged pəlɲged ma hədkam ba leɲ bersle hay fa vaw. Asaya, taasa nğa bərey magaza makərzakaya da har. Taasa ha na, marəhdakaya ta cek hay maaya ba ma zləba ndaw daa meley-vaw anğa saw da palah heyey. ⁵ Fa danğay anğa mezəley nğa cek masa ndəhay ma sərmara ba mawuzlalakaya daha. Mezəley a, a wufey nğa ləvey:

«Kede he, berney mahura nğa Babilanɲw, ara mamān nğa nğwas-barlaw hay ta mamān nğa cek hay maaya ba da bəla cəpa.»

⁶ Ya hətar nğwas aha fa wey ta mambaz nğa ndəhay nğa Gazlavay, ndəhay ma kam sede da ray Yesu.

Daa masa yah ma hətar na, ya rəzley ga da ray a.

⁷ Da ray ngene, maslan nğa Gazlavay heyey aa cəfdaya, a ləvey: «Ka rəzley na, maja me? Jəkfaya sləmay amba ya wuzdakawa mey mabadakaya da ray nğwas kede ta da ray cek nğa ley masa ta ray maasala leɲ dərām hay kuraw, masa nğwas a, aa da ray a ngene. ⁸ Yaw, cek nğa ley masa kah ma hətar kede na, anğa na, aa ta dey, ama wure kede, ta məcey sem. Menjey nekəfey fedə na, a sləkdawa la daa vəged meseleleɲ e. Fa dəba ha, Gazlavay a daa zədda. Ndəhay da bəla masa mezəley ata mawuzlalatakaya dəga bəla ta ləmey daa ba aran daa dərəwel nğa ndəhay ma da hətam heter mendəvey ba, daa ba na, a hətmar cek nğa ley a ngene na, a rəzlam la da ray a. A da rəzlam maja zleezle cek aha anğa ta dey, wure kede aa ta məcey sem, ama a lacawa la daa vəged e cənğa.»

⁹ Maslan a, a ləvyā saya: «Si ndaw a pey leɲgesl nğa sərə mey da ray cek hay a kede maaya maaya. Ray hay maasala nğa cek nğa ley a ngene na, a wuzwa anğwa maasala masa

† **17:2** 17.2 Meley-vaw saw da palah fedə kaa na, a wufey nğa ləvey meney ray nğada cek mekele aa slam a nğa Gazlavay. **17:2** 17.2 14.8; 17.18; 18.3; Jer 51.7; Nah 3.4 **17:3** 17.3 Mesəfney nğa Gazlavay: 1.10; 21.10; Ez 8.3; 40.2; cek nğa ley: 13.1-2 **17:4** 17.4 18.3, 16; Jer 51.7; Ez 28.13 **17:5** 17.5 Jer 2.20; Aw 1.2 **17:6** 17.6 16.6 **17:7** 17.7-8 13.1-2 **17:8** 17.8 13.3; dərəwel: 3.5

ngwas a ma njeý a ray a †. Ray hay a ngene may a wuzwa bay hay maasala. ¹⁰ Dasi bay hay maasala ha ngene na, zlam ata daa bay daa saba, pal na, aa daa bay, lanġar ta sawa nga zəma bay anġa daa ba aranġ. Ama pas masa anġa ma sawa cay na, fa da njeý daa bay a ga daa ba. ¹¹ Nġa cek nġa ley masa zleezle aa ta dey, ama wure keċe, anġa daa saba heyey na, a da key bay nġa dey daanġafad a. Anġa na, aa da wuzlah bay hay maasala heyey may, Gazlavay a daa zədda.

¹² «Dəram hay kuraw nġa cek nġa ley masa kah ma hətatar ngene, a wuzwa bay hay kuraw ma da samawa. Ata na, fa zəmamara bay ata daa ba aranġ. Ata ta cek nġa ley heyey a hətam ġədanġ la nġa wey da ray ndəhay, ama nġa menjeý nekəċey gway. ¹³ Bay hay a, a cəmam ċay la pal, amba a kamar sləra a cek nġa ley a ngene ta ġədanġ ata cəpa. ¹⁴ A kam vəram la ta Bəz-təbanġ heyey. Ama Bəz-təbanġ a, a fənta la ta ġədanġ, maja anġa na, ara Bay Mahura da ray mahura hay, anġa Bay da ray bay hay cəpa. Asaya, ndəhay masa aa ma zəlta, aa ma walata, ndəhay masa ma təbmara mey anġa ta mevel pal na, a cəmam la ta Bəz-təbanġ a, a kam bay-gula la da ray bay hay a ta cek nġa ley a heyey.»

¹⁵ Ta', maslanġ nġa Gazlavay kaa heyey aa guzlya saya, a lövey: «Yam masa kah ma hətatar ngwas-barlaw manġakaya gweegwe ta anġa ngene na, a wuzwa ndəhay ga, səkway nġa ndəhay wura wura masa maa guzlam ta mey wura wura, asaya, hwayak wura wura. ¹⁶ Ama, dəram hay kuraw masa kah ma hətatar ta cek nġa ley a ray anġa na, a da rəsmara ngwas-barlaw keċe. A təbmara cek anġa hay tabiya la, a cəkwmata zana anġa hay fa vaw la cəpa ta ġədanġ, amba a njeý vaw ba' kəne. Fa dəba ha, a kəċmara vagay la, a zəmamara aslaw nġa vaw anġa la. Siya nġa aslaw a, ma da ġərey na, a da ndəlmara daa awaw. ¹⁷ Ara Gazlavay ma da ka amba bay hay kuraw a, a cəmam ċay pal nġa key sləra nġada cek nġa ley heyey. Bay hay a, a pamara ġədanġ ata asi har nġa cek nġa ley a, amba a wam da ray ndəhay tabiya haa kasl mey masa Gazlavay maa guzlda zleezle heyey a key fara fara. ¹⁸ Anda keċe, ngwas masa kah ma hətatar heyey na, ara berney mahura masa ma wey da ray bay hay cəpa da bəla.»

† 17:9 17.9 Fede na, ngwas aha mapakaya anda berney nġa Rawm. Berney a na, aa maləmkaya da ray anġwa hay maasala. 17:9 17.9 13.18 17:12 17.12 Dan 7.7, 24 17:14 17.14 19.16, 19; Mew 10.17; Ps 136.3; Dan 2.47; 1Tm 6.15 17:15 17.15 17.1 17:16 17.16 17.2; 18.8; Lev 21.9; Ez 23.29; Aw 2.5 17:17 17.17 17.13

18

Mey da ray berney nga Babilanɔw ma da pəlhey

¹ Fa dɛba nga cek hay a ngene, yah, *Jan, ya hɛtey maslan mekele fa pawa salay da vad. Anɔa ta gɛdan ga. Mewedɛy anɔa ta wada bɛla la cɛpa. ² Maslan a, a wudey ta gɛdan, a lɛvey: «*Babilanɔw, berney mahura heyey, ta pəlhey sem. Ta pəlhey sem pələh! pələh! fara fara. Berney a, ta tɛrey sem nga way nga mesəfney maaya ba wura wura cɛpa. Asaya, diyan hay maaya ba hay masa ndəhay ma zəmamara ba səlak, ata cɛpa daa slam aha. ³ Babilanɔw ta pəlhey sem maja ta ley vaw saw sem, taa sərkadata ndəhay daa hwayak hay tabiya sem nga mbəkdamara cəved nga Gazlavay amba a kam cek hay maaya ba mekele mekele anda anɔa. Ara anda aa ma vɛltar wuzam nga sey mandaw mandaw nga nɛsta. Asaya, bay hay cɛpa da bɛla ta lam vaw saw la ta anɔa. Ndəhay ma ka filaw hay cɛpa da bɛla, ta hɛtam dala la ga, maja cek hay maaya ma mbafar kalah masa ata ma hɛdkadamara.»

⁴ Ta', ya cəney dɛy faa guzlwa ta gɛdan da vad, a lɛvey: «Akwar ndəhay adaw hay, bamawa da wuzlah ndəhay daa berney a ngene, amba ka kam mebɛrey anda ata ba. Bamawa amba ka sɛram banay anda ata ba. ⁵ Fara fara, bamawa daa berney a, maja mebɛrey ata ga kalah, mambakaya kasl a gazlavay a vad. Yaw, Gazlavay fa sɛrfada slɛra ata maaya ba masa ata ma kamara cənɔa.

⁶ Sərdamata banay ta ndəhay daa berney a anda ata ma sɛrdamata banay ta ndəhay siya hay. Cek masa ata ma kamara a ndəhay siya ha na, ka da kamatarata ma fɛna ngene. Da ta vɛlmatar cek meedəwek e vɛley pal nga sey la na, ka da vɛlmatar nɔgada ata vɛley cew. ⁷ Sərdamata banay ga ta ndəhay daa berney a amba a cam mevel, anda ata ma pamara vaw ata zleezle nga nɔwas ta gɛdan ga, anda ata ma njam ga daa wiya. Asaya, anda ata ma lɛvam: "Yah manjakaya fɛde daa bay. Yah nɔwas-vagay ba, kwa ndaw adaw fa da mɛcey amba ya tɛway na, daa ba."

⁸ «Da ray ngene, banay a da sawa a ray ndəhay daa Babilanɔw a cɛpa dey pal. Anda kedɛ, macay mepesley ndəhay, memɛcey leɔ may a sawa la a ray ndəhay a ta pas pal. Asaya, awaw a daa wura berney a kɛlmedek! maja Bay Gazlavay na, anɔa ndaw ta gɛdan, ara anɔa pal ma da katar sariya a ndəhay a.»

18:1 18.1-24 Iz 13; 47; Ez 27 **18:2** 18.2 14.8; 16.19; Iz 13.20-22; 21.9; 34.11, 14; Jer 50.39-40; 51.8 **18:3** 18.3 17.2; 18.11-19; Iz 23.8; Ez 27.22-23, 33 **18:4** 18.4 Iz 48.20; Jer 51.45; 2Kwr 6.17 **18:5** 18.5 MC 18.20 **18:6** 18.6 Ps 137.8; Jer 50.29 **18:7** 18.7-8 Iz 47.8-9 **18:8** 18.8 17.16

⁹ Bay hay cəpa da bəla ma lam vaw saw da palah * daa berney a heyey, ta ma njam daa wiya a heyey, a da hətmar kakas ŋga awaw ma daa wura berney aha na, a təwam la, aa huraam la. ¹⁰ Bay hay a, a da lacam dəreŋ ta berney a, maja banay da hwaɗ a ta zɬuradata sem. A ləvam: «Waay! Waay! Babilanɟw, kah berney mahura masa ta gədanɟ heyey, ka ta pəlhey sem pələh! pələh! ler pal gway. Sariya akah ta njeɟ ga daa ba.»

¹¹ Asaya, ndəhay cəpa da bəla ma kam filaw, a təwam la, aa huraam la, maja berney a ma pəlhey sem. Kwa ndaw pal fa da hədkey cek ata hay ŋga filaw daa saba. ¹² Cek ŋga hədkeɗey hay a na, ara bərey hay ma hədkaam ba, aŋgwa hay ma wadam pəlŋgeɗ pəlŋgeɗ ma hədkaam ba ta bersle hay, zana mabara ma ley dey, zana masa magaɶa ləmtər e ta magaɶa anda mambaz ma hədkey ba, leŋ zana səwal ma wəɗey wurek! wurek! Cek hay mekele ŋga filaw a na, ara anda hwadam mezey maaya, cek hay maacaɗakaya ŋga sler ŋga begəney, hwadam ma hədkey ba leŋ cek hay mekele mekele ŋga bərey ta ŋga aŋgwa meekuleɗ e. ¹³ Asaya, ndəhay ŋga filaw a fa hədkaɗam cek hay mezey maaya anda bəreɗey, mal ma tekweɗey fa vaw, slalak mezəley «*mir» leŋ matəway ŋga wudez mezey maaya. Cek hay mekele na, ara wuzam, mal metey lar, hapa leŋ daw. Fa hədkaɗam saya sla hay, təbanɟ hay, pələs hay leŋ seret hay. Kwa beke hay, kwa ndəhay ma kərzawa daa vəram na, ndəhay a ŋgene fa hədkaɗamata may. Cek hay cəpa kaa na, kwa ndaw pal ŋga hədkaɗa da Babilanɟw a daa saba səlak. ¹⁴ Da ray ŋgene, ma ka filaw hay a, a təwam la, a daa guɶlmar aa berney a, a ləvmar: «Cek hay masa ma mbafamaka kalah heyey na, taa wuram sem cəpa. Zleley akah hay ta wiya masa kah ma ka heyey na, daa saba. Anda keɗe, kwa ka fa da hətatar daa saba may.» ¹⁵ Ma ka filaw hay masa ma kam zleley ga daa berney a heyey, a da lacam dəreŋ ta berney a, maja banay da hwaɗ a ta zɬuradata sem. A təwam la ta gədanɟ, aa huraam la, ¹⁶ a da ləvam: «Waay! Waay! Babilanɟw, berney mahura heyey, ta pəlhey sem pələh! pələh! Aŋga anda ŋgwas ta zana mabara fa vaw ma ley dey, asaya, ta zana masa magaɶa ləmtər e ta magaɶa anda mambaz ma hədkey ba. Asaya, aa ta danɟwa ŋga bərey magaɶa leŋ ta bersle ma hədkey ba. ¹⁷ Zleley hay a ga keɗe a nəsam tabiya dey pal gway, kwa ta njeɟ ga daa ba.»

* **18:9** 18.9 Meley-vaw saw da palah feɗe kaa na, a wuɗey ŋga ləvey meney ray ŋgada cek mekele aa slam a ŋga Gazlavay. **18:9** 18.9-10 Ez 26.16-17; 27.30-35
18:12 18.12-13 Ez 27.12-24 **18:15** 18.15 Iz 47.15; Ez 27.36 **18:16** 18.16
 17.4

Ndohay ma hwadamara kwambiwal hay ta bay-ray ata, leŋ ndohay ma ka filaw ta kwambiwal hay a, asaya, ndohay tabiya masa ma diyam a melak ta kwambiwal hay a na, a lacam la doreŋ ta Babilanŋw heyey, ¹⁸ a wudam la maja ata ma hetmar kakas nga awaw a maa wura berney a, a lovam: «Berney mahura ma fona kefe daha saya daw?» ¹⁹ Ndohay a, a da pøtkwalam da hwayak ta matoway, a daa huram, a da wudam ta gedan, a lovam: «Waay! Waay! Babilanŋw, berney mahura heyey na, ta polhey sem. Ara berney masa ndohay ta kwambiwal hay ma hetam zleley ga da hwad a. Berney a na, a polhey polah! polah!, a nøsey ler pal gway, kwa ta njeý ga daa ba.»

²⁰ Yaw, maslan nga Gazlavay heyey a lovey: «Akwar ndohay da gazlavay da vad, sasømam maja Babilanŋw a ma polhey kefe. Akwar ndohay nga Gazlavay ta ndohay meslorey leŋ ndohay ma tøla mey anga hay, sasømam may, maja Gazlavay ta kar sariya sem a berney a kefe, fa cek maaya ba masa anga ma kakwara.» ²¹ Fa døba ha, maslan nga Gazlavay masa ta gedan daha ta', a daw, a lawa anŋwa mahura masa dadakw anda lavar. Tøzlem! a køzla aa bølay kudap! aa zødey. A lovey: «Babilanŋw, berney mahura, a da polhey anda kefe may. Kwa ndaw fa da hetar fa dey daa saba. ²² Da Babilanŋw a, ndohay fa da cønám dáy nga ndohay ma kødam ganjaval, ma zlam walay, leŋ ma fam slølam ta taalám hay na, daa saba. Asaya, ndaw fa da høtey ndaw ma díya cek hay membey kwa pal daa saba. Kwa ndaw fa da cøney dáy nga cek mekørey daw daa berney a daa saba may. ²³ Da Babilanŋw a, petørla hay fa da wadám daa saba. Kwa ndaw fa da cøney meesømey nga meley kwakwa daa berney a daa saba. A key daa saba na, maja me? Ara maja, zleezle ndohay ma ka filaw da Babilanŋw a, a zlapam ta zleley ata hay ma fønmata siya hay da bøla, asaya, ta tøkndata ndohay tabiya da bøla la ta mekey maazla hay maaya ba.»

²⁴ Gazlavay a kar sariya a Babilanŋw anda kefe maja aa ma hetar mambaz nga ndohay ma tøla mey anga da hwad a. Asaya, maja aa ma hetar mambaz nga ndohay anga hay siya da hwad a. Asaya, ndohay makøftakaya vagay daa wura daa wura da bøla na, Gazlavay ta hetar mambaz ata la daa berney a may.

19

¹ Fa dɔba ha, yah, Jan, ya cɔney ɔay hay masa maa guzlmawa ta gɔdan da vad anda ndɔhay ga maa guzlam daa slam a, a lɔvam: «*Aleluya! Hɔlmamara Bay Gazlavay! Ara Gazlavay alɔkwa ma lɔhdata ndɔhay daa banay. Ara anɔa ndaw masa ndɔhay ma hɔslmar ray, ara anɔa ndaw ma wey da ray cek hay tabiya. ² Anɔa fa katar sariya a ndɔhay ta cɔved e, membɔrzley da hwad a daa ba sɔlak. Da ray nɔgene, ta kar sariya cay nɔgada nɔgwas-barlaw masa ma nɔsa bɔla, ma batata ndɔhay nɔga lam vaw saw da palah * heyey. Gazlavay ta sɔrda banay la ta nɔgwas aha maja aa ma kɔɔta ma ka slɔra anɔa hay vagay.» ³ Day hay masa yah ma cɔndatɔrwa nɔgene fa hɔlmamara Gazlavay, a lɔvam: «Aleluya! Hɔlmamara Bay Gazlavay, maja kakas masa faa nɔgɔsey daa berney a nɔgene, a da nɔjey nɔga sɔrmataw, kwa fa da ndɔvey daa ba sɔlak.»

⁴ Daa nɔgene, *bay-ray hay kwakwar cew a ray a mɔfad heyey leɔ cek hay mɔfad ta dey heyey a ragadam fa mey nɔga Gazlavay daa slam anɔa menjey, a hɔlmamara, a lɔvam: «*Amen. Aleluya! Hɔlmamara Bay Gazlavay!»

Mey da ray mekey mɔlak nɔga kwakwa nɔga Bɔz-tɔban

⁵ Fa dɔba ha, ɔay mekele aa guzlwa ta daa slam-menjey nɔga Bay Gazlavay, a lɔvey: «Hɔlmamara Gazlavay alɔkwa, akwar ndɔhay ma ka slɔra anɔa hay tabiya, akwar ndɔhay masa ma namar ray, kwa bɔza hay, kwa ndɔhay mahura hay.» ⁶ Ta', ya cɔney ɔay hay mekele saya faa guzlmawa ta gɔdan anda ndɔhay ga maa guzlam daa slam a. Asaya, ɔay hay a, a mbam mey ta gɔdan anda yam ma vavawa daa maajɔrav mahura. A cɔnmawa anda var maa bɔcey may. Ya cɔnda ɔay hay a na, fa lɔvam: «*Aleluya! Hɔlmamara Gazlavay, maja Bay Gazlavay alɔkwa, ndaw masa ta gɔdan ma fɔnta cek hay tabiya, fa wey da ray cek hay tabiya fara fara. ⁷ Wure keɔe, njakwa daa meemɔlkey, sasɔmkwa, hɔlmakwa Gazlavay, maja gwagway nɔga Bɔz-tɔban † ma ley kwakwa ta wuswa cay. Kwakwa ha ta ɔiya vaw cay, ⁸ maja ta vɔlmar zana ma wedey ma ley dey mabara manjar ɔelay

19:1 19.1 4.11 * **19:2** 19.2 Meley-vaw saw da palah feɔe kaa na, a wuɔey nɔga lɔvey meney ray nɔgada cek mekele aa slam nɔga Gazlavay. **19:2** 19.2 15.3; 16.6; 22.12; Mew 32.43; Ps 79.10 **19:3** 19.3 kakas: 14.11; Iz 34.10 **19:4** 19.4 4.4, 6; 5.7; Ps 106.48 **19:5** 19.5 11.18; Ps 22.25; 115.13; 134.1; 135.1 **19:6** 19.6 11.17; 14.2; Ps 47.6-10; 96.7-10; Zak 14.9 † **19:7** 19.7 Bɔz-tɔban: Feɔe Bɔz-tɔban ara Yesu Kɔriste. Kwakwa anɔa na, ara ndɔhay cɔpa ma tɔbmara mey anɔa. Gwagway may, ara pas masa ndɔhay ma da cɔmam ray ta Yesu da vad nɔga sɔrmataw, anda kwakwa ta zel e ma da nɔjam cewete haa mendɔvey nɔga ɔar ata. **19:7** 19.7 21.2

cay.» (Zana ha ṅgene a wuzwa slɛra maaya masa ndəhay ṅga Gazlavay ma kamara.)

⁹ Cay, maslan heyey a ləvya saya: «Wuzlala mey masa yah ma da kadakawa keḏe aa ḏerewel: Maaya ṅga Gazlavay a sawa la a ray ndəhay cəpa mazəltakaya a gwagway ṅga kwakwa ṅga Bəz-təban a.» Maslan a, a ləvya saya: «Mey masa yah ma kadakawa keḏe na, ara mey fara fara, maja mey a ara mey ṅga Gazlavay.»

¹⁰ Masa maslan a maa guzlya cay na, ta', ya regedey fa mey anḡa amba ya həlma. Daa ṅgene, a ləvya: «Ka regedey fa mey adaw anda keḏe na, maja me? Yah na, yah ndaw ma ka slɛra ṅga Gazlavay anda kah ta məlmakw hay, ma təbmara mey masa Yesu ma handərwa a bəla may. Maaya ka regedey, ka ḏerey danḡay na, ṅgada Gazlavay gway.» Mey masa Yesu ma handərwa a bəla na, ara *Mesəfney ṅga Gazlavay ma vəltar gədan a ndəhay ma təla mey ṅga wuzdamara mey a.

Ndaw da ray pəles mabara

¹¹ Cay, yah, *Jan, ya da nəkey dey na, slam da gazlavay da vad mawurkaya. Ya hətey pəles mabara ta ndaw da ray a. A zəlmara ndaw aha na, «Ndaw ma ka cek anda aa ma ləvey, ma mbərzley ba.» Anḡa na, ndaw ma ka sariya a ndəhay ta cəved e, asaya, anḡa ndaw ma key vəram ṅga ḏiyey cek ta cəved e. ¹² Bəz ṅga dey ṅga ndaw aha na, ṅgələr ṅgələr anda awaw magəḏkaya. Anḡa ta gursaw hay ga da ray. Mezəley mawuzlalakaya fa vaw anḡa daha, kwa ndaw mekele ma gwa ṅga sɛra mezəley a daa ba səlak, si anḡa gway. ¹³ Zana anḡa fa vaw na, magwacakaya ta mambaz †. Mezəley ṅga ndaw a na: «Mey ṅga Gazlavay.» ¹⁴ Asaya, maslan hay ga ṅga Gazlavay da vad fa səpmar wurzay ṅga ndaw aha anda ndəhay ma diyam ṅgadaa vəram. Ata ta zana mabara fa vaw ma ley dey manjar ḏəlay. Ata da ray pəles mabara hay. ¹⁵ Da mey ndaw aha na, ḏəlaw masa mey a makəḏkaya ṅga kəḏta ndəhay daa hwayak hay da bəla daha. A da wey da ray hwayak hay tabiya ta gədan. A da bacata anda ndaw ma becey babəza ṅga wudez fa pərad ṅga ḏəcey yam a, ṅga tey wuzam ta anḡa. Anda keḏe, a da wuzdərwa mecey-mevel ṅga Bay Gazlavay,

19:8 19.8 6.11 **19:9** 19.9 14.12; Iz 25.6; Mt 22.2; Lk 14.15-16; mey fara fara: 21.5; 22.6 **19:10** 19.10 6.9; 22.8-9 **19:11** 19.11 4.1; 19.2; Ps 72.1-14; 98.9; Iz 11.4; Ez 1.1-3; SNM 7.56 **19:12** 19.12 1.14-15; 2.17 † **19:13** 19.13 mambaz: Mambaz keḏe ara mambaz ṅga masa-gəra hay ṅga Yesu masa anḡa ma key bay-gula da ray ata, da daa ba, ara mambaz anḡa masa aa ma mbəḏda ṅga ləhdandakwar. **19:13** 19.13 Jan 1.1 **19:13** 19.13, 15 Iz 63.1-6 **19:14** 19.14 6.2-8, 11

ndaw masa ta gədan ma fənta cek hay tabiya. ¹⁶ Fa zana nga ndaw a, leŋ fa tatəwal na, mezəley mawuzlalakaya daha. Mawuzlalakaya ha a ləvey: «Bay Mahura da ray bay mahura hay, Bay da ray bay hay cəpa.»

¹⁷ Fa dəba ha, yah, Jan, ya hətey maslan nga Gazlavay mekele malacakaya da ray pas. Maslan a, aa guzley ta gədan, a zəltərwa dīyan hay cəpa masa ma jəvam dərəŋ da gazlavay da vad, a ləvtar: «Kusmawa nga zəmey daf daa gwagway mahura masa Gazlavay ma da ka. ¹⁸ Samawa amba ka zəmam aslaw nga vaw nga bay hay, nga *bay-ray hay nga sewje hay, ta nga sewje hay a, leŋ nga pəles hay ta ndəhay da ray a keđe. Samawa nga zəmey aslaw kwa nga waawa: nga beke hay ta nga beke hay ba hay, nga ndəhay mahura ta nga ndəhay mecəhe hay tabiya.»

¹⁹ Fa dəba ha, ya hətar cek nga ley heyey, leŋ bay hay cəpa da bəla. Sewje ata hay makustakaya daa slam a, amba a kam vəram ta ndaw da ray pəles mabara heyey, leŋ ta sewje anga hay may. ²⁰ Cay, ta', ndaw da ray pəles mabara kaa heyey a sawa, kaw! a kərza cek nga ley a, leŋ *ndaw ma təla mey ta membərzley, fakw! fakw! a hazakadata ta dey aa dəhwa nga awaw masa ta anɣwa maa kuray-bəzey, ma gədey njəm-njem. Ndaw ma təla mey ta membərzley a na, ta key maazla ga fa mey nga cek aha nga təknaata ndəhay da bəla masa ta lamba nga cek nga ley matəhtakaya fa vaw ata heyey ta ma namar ray nɣada cek maləmkaya anda cek nga ley a heyey. ²¹ Sewje hay masa nga cek nga ley a na, ndaw da ray pəles e heyey ta kədfta sem vagay ta dəlaw maŋgəkakaya da mey anga heyey. Ta', dīyan hay heyey cəpa a samawa, a zəmamara aslaw nga vaw nga sewje hay a, haa a rəham.

20

Mey da ray Satan majəwkaya haa mevey gabal

¹ Fa dəba ha, yah, *Jan, ya hətey maslan nga Gazlavay mekele fa pawa salay da vad. Aa ta lekəle da har nga wurey vəged meseleleŋ e heyey. Asaya, maslan a, aa ta calalaw meegured e da har. ²⁻³ Cay, maslan a ta', a daw, kaw! a kərzarawa gədem heyey, jəw! a jəwa ta calalaw a. Gədem e ara zezekw masa zleezle heyey, anda meləvey, *Satan, bay-malula. Daa masa aa ma jəwa cay, a kəzla kem! aa vəged meseleleŋ e heyey, a gərca mey a ta lekəle, slərab! a slərbey

19:15 19.15 1.16; 2.26-27; 11.17; 14.14-20; Jer 25.30-31 **19:16** 19.16 17.14
19:17 19.17-18 Ez 39.4-5, 17-19 **19:18** 19.18 13.16 **19:19** 19.19 17.12-14;
 Ps 2.2; Ez 38.2-9, 14-16; Zak 14.2 **19:20** 19.20 13.1-2, 13, 15; anɣwa maa
 kuray-bəzey: 14.10; 20.10, 14; 21.8; Iz 30.33 **20:1** 20.1 10.1; 18.1; vəged
 meseleleŋ e: 9.1

tebed* fa mey a. A ka kəne amba gədem e a təkната ndəhay daa hwayak hay da bəla saba. A da njeý majəwkaya daa vөгed e haa mevey gabal. Fa dəba ha, a pəskamərwa la a bəla, ama a da njeý nekədey gway.

⁴ Fa dəba ha, ya hətəy slam-menjeý hay nga bay, ndəhay manjatakaya da ray a. Gazlavay ta vəltar gədan la amba a kamatar sariya ngada ndəhay da bəla. Asaya, ya hətəy mesəfney hay nga ndəhay maməctakaya, masa ma kədmata vagay, ma dəslmata ray ata, maja ata ma kam sede, ma ləvam Yesu na, ara cəved masa fara fara, asaya maja ata ma wuzam mey nga Gazlavay. Ata na, ta namar ray ngada cek nga ley, ta ngada cek maləmkaya anda anga heyey daa ba. Asaya, ta təbmara amba cek nga ley a, a təhtar cek fa danğay, da daa ba, fa har na, daa ba səlak. Ya nəkta na, ata maməctakaya, ama ta sləkdəməwa sem daa meməcey a. Ata ta *Kəriste na, ta wam la da ray bəla, haa mevey gabal. ⁵ Kede he ara ndəhay ngeeme ma sləkdəməwa daa meməcey. Ndəhay siya na, ta sləkdəməwa daa ba aran, si mevey gabal a cəhwey la dagay. ⁶ Fara fara, maaya nga Gazlavay a sawa la a ray ndəhay masa ma sləkdəməwa teesed daa meməcey. Ata na, ndəhay nga Gazlavay. Fa da məcam nga dey cew daa ba səlak. Ndəhay a, a da təram ndəhay ma ka kwakwas ngada Gazlavay len ngada Kəriste. Ndəhay a na, a da wam ta Kəriste da ray bəla, haa mevey gabal.

Mey da ray vəram nga madagway-dakw

⁷ Masa *Satan, bay-malula, ta key cay daa calalaw mevey gabal daa vөгed heyey na, fa dəba ha, a pəskamərwa daa vөгed e. ⁸ A daw la aa wura aa wura aa hwayak hay da bəla cəpa amba a batata ndəhay. A zəlmata ndəhay daa hwayak hay a ngeene na, Gakw ta Magakw †. Satan a, a da kusta səkway hay a tabiya aa slam a, amba a kam vəram ta Gazlavay. Ndəhay a ata ga, a sləfam ba, anda mawurbay da wayam. ⁹ Daa masa yah ma hətatar na, ata fa samawa təlbej e daa wura daa wura cəpa, a zlərmara slam masa ndəhay anga hay manjatakaya da hwad a, berney masa Gazlavay ma wudey. Daa masa ata ma zlərmara berney a sem na, awaw ba', a kəzlwa da gazlavay, aa wurta

* **20:2-3** 20.2 a slərfəy tebed: A slərfəy tebed fa mey a na, amba a patar lengeşl a ndəhay nga wurmara ba. Tebed e a wuzda ara ndaw mahura ma gərca slam aha. **20:2-3** 20.2 12.3, 9 **20:4** 20.4 6.9; 13.15; Dan 7.9, 22; Lk 22.30; 1Kwr 6.2 **20:6** 20.6 1.6; 2.11 † **20:8** 20.8 Gakw daa dərəwel nga Ezekiyel ara bay nga hwayak nga Magakw (Ez 38.2). Fede na, mapatakaya anda səkway hay tabiya da bəla masa ma da kam vəram ta Gazlavay. **20:8** 20.8 13.14; Jes 11.4; Ez 38.2, 10-12

kəlmədək! ¹⁰ Bay-malula, ndaw ma batata ndəhay daa hwayak hay tabiya heyey na, ta', a kəzamarā, a kəzlamara aa dəhwa ŋga awaw masa ta kakas maa kuray-bəzey mezey maaya ba, ma gədey njəm-njem heyey. A kəzlamara ha na, a cakay ata cek ŋga ley leŋ *ndaw ma təla mey ta membərzley heyey. Daa awaw aha na, ata cəpa a da səram banay taa vad, taa pas ŋga sərmataw.

Mey da ray sariya ŋga bəla

¹¹ Fa dəba ha, yah, *Jan, ta', ya hətey slam-menjey mahura ŋga bay. Slam-menjey aha mabara, ndaw man-jakaya da ray a. Slam da vad ta da hwayak taa zədam sem kudap! fa mey ŋga ndaw aha. Fa da hətmatar daa saba sələk. ¹² Asaya, ya hətatar ndəhay masa maməctakaya. Kwa ndəhay mahura hay, kwa mecəhe hay, ata cəpa malacatakaya fa mey ŋga slam-menjey a. Cay, ya hətey ndaw fa wurey dərewel hay. Ara dərewel hay masa sləra ŋga ndəhay tabiya ma kamara mawuzlalatakaya da hwad a. Fa dəba ha, ya hətey ndaw fa wurey dərewel mekele. Daa dərewel e, mezəley ŋga ndəhay ma da hətam heter mendəvey ba mawuzlalatakaya da hwad a. Anda kede, Gazlavay a katar sariya ŋgada ndəhay maməctakaya ha tədə fa sləra ata mawuzlalatakaya daa dərewel hay a.

¹³ Asaya, kwa ndəhay masa yam daa bəlay ma bəbətata na, yam a ta badatərwa sem a ray-dəgar. Kwa ndəhay maməctakaya daa Slam masa ndəhay maməctakaya ma njam da hwad a na, ta bamawa sem daa meməcey a. Ata cəpa, Gazlavay a katar sariya fa sləra ata.

¹⁴ Cay, a kəzlamata ata bay-meməcey ta slam ŋga ndəhay maməctakaya aa dəhwa ŋga awaw heyey. Dəhwa ŋga awaw aha na, ara slam masa ndəhay ma da məcam ŋga dey cew da hwad a. ¹⁵ Kwa waawa masa mezəley anja mawuzlalakaya daa dərewel ŋga ndəhay ma da hətam heter mendəvey ba ha daa ba na, a kəzlamara aa dəhwa ŋga awaw a.

21

Mey da ray cek hay tabiya masa Gazlavay ma da katərwa mawiya

¹ Fa dəba ha, yah, *Jan, ya da nəkey dey na, ya hətey slam da gazlavay da vad ta slam da hwayak mekele mawiya. Hwiyak ta slam da vad masa ŋgeeme heyey na, daa saba.

20:9 20.9 Mesl 2; 2Bay 1.10, 12; Ps 78.68; Ez 38.22; 39.6 **20:10** 20.10 19.20
20:11 20.11 5.7; 6.14; 21.1; Ps 114.3, 7; Mt 24.35; 2Pi 3.10 **20:12** 20.12 Mab
 32.32 **20:12** 20.12-13 3.5; 22.12; Dan 7.9-10 **20:14** 20.14 20.10; 1Kwr 15.26;
 meməcey ŋga dey cew: 2.11 **20:15** 20.15 3.5

Aa slam ata na, cek hay cəpa mawiya. Asaya, bəlay hay tabiya na, taa zədam sem. ² Asaya, ya hətar *Jeruzelem, berney nga Gazlavay. Berney a, a pey mawiya, fa sawa ta fa Gazlavay da vadŋ ngada hwayak. Gazlavay ta ka berney a la maaya maaya, a mbey kalah anda dam ma diyey vaw cay ngada way zel. ³ Asaya, ya cəney dəy faa guzlwa ta gədan daa slam-menjey nga bay heyey, a ləvey: «Nəkmara, Gazlavay aa manjakaya da wuzlah ndəhay. Gazlavay a, ta ray anŋa, a da njeý ta ndəhay a. Ndəhay a ŋgene may, a da təram nga ndəhay anŋa hay. Anŋa na, a da njeý nga Gazlavay ata. ⁴ A takwadatara matəway daa dey ata la cəpa. Ndəhay fa da məcam daa saba. Anda kefe, matəway-vagay daa saba. Ndəhay fa daa huraam daa saba may. Kwa vaw fa da catar a ndəhay daa saba səlak, maja cek hay masa ŋgeeme taa zədam sem cəpa.»

⁵ Fa dəba ha, ndaw masa manjakaya daa slam-menjey heyey aa guzley, a ləvey: «Nəkmara, ya da katərwa cek hay tabiya mekele.» Menjey nekədey, a ləvya: «Wuzlala cek masa yah ma wuzdakawa kefe, maja ara mey masa fara fara, membərzley da hwad a daa ba səlak.» ⁶ Cay, ndaw a, a ləvya saya: «Sləra ha ta ndəvey cay. Yah na, ndaw masa ŋgeeme, asaya yah ndaw madagway-dakw. Yah ndaw ma katərwa cek hay tabiya, asaya, yah ma ndəvdata. Ndəhay masa yam fa katar na, ya da vəltar yam nga maaya daa wurak, yam masa ma vəley heter mendəvey ba. ⁷ Kwa waawa ma fəna *Satan, bay-malula, ta gədan na, ya da vəldara cek hay a kefe cəpa. Yah, Gazlavay, ya nəkar dey la fa ndaw aha. Ya da njeý nga Gazlavay anŋa. Anŋa may, a da tərey nga bəzey adaw. ⁸ Ama ndəhay masa ta mandərzay daa dey, ndəhay masa ma mbəkdamaya sem, ta ndəhay masa mazləbkaya, leŋ ndəhay ma kədam ndaw vagay, ndəhay masa ma lam vaw saw da palah, leŋ ndəhay ma ka maazla hay maaya ba ta ma ta kuley hay, asaya, ndəhay ma mbərzlam hay tabiya, slam ata na, daa dəhwa nga awaw masa ta anŋwa maa kuray-bəzey, ma gədey ŋəm-njem. ŋgene, ara meməcey nga dey cew.»

Mey da ray Jeruzelem, berney masa Gazlavay ma ləma mawiya

⁹ Fa dəba ha, maslan nga Gazlavay pal a ŋgəchawa ngada fa yah. Ara maslan pal da wuzlah maasala hay masa taasa

21:1 21.1 21.5; Iz 65.17; 2Pi 3.13 **21:2** 21.2 3.12; 19.7; 21.9–22.5; 22.17; Iz 52.1; Mt 22.2; Gal 4.26; Heb 11.16; 12.22 **21:3** 21.3 7.15; Lev 26.12; Ez 37.26–28; Zak 2.9; 2Kwr 6.16 **21:4** 21.4 7.17; Iz 26.19; 35.10 **21:5** 21.5 5.7; 21.1; Iz 43.19; 2Kwr 5.17; mey fara fara: 19.9 **21:6** 21.6 1.8; 7.17; 22.1; Iz 55.1; Zak 14.8; Jan 7.37 **21:7** 21.7 2Sam 7.14; Ez 11.20 **21:8** 21.8 2.11; 19.20; 21.27

hay ta banay hay nga madagway-dakw marəhdatakaya da hwađ a heyey. Masa aa ma ngəchawa la fa yah na, ta', a ləvyā: «Sawa fede amba ya wuzdakawa kwakwa nga Bəz-təbaŋ.»

¹⁰ Masa yah ma wusey fa anğa cay na, *Mesəfney nga Gazlavay ta', a sawa a ray adaw. Cay, maslan nga Gazlavay ta', a handaya aa ray nga anğwa maazəma, a wuzdiwa *Jeruzelem, berney nga Gazlavay, fa pawa salay da vad, da fa Gazlavay. ¹¹ Berney a, a wedey kulŋgwad kulŋgwad ta mewedey ma sawa ta fa Gazlavay. Mewedey a anğa anda anğwa maaya ma hədkey ba. A mbey kalah anda anğwa hay maaya ma wadəm pəlŋged pəlŋged anda baŋgəra daa pas. ¹² Berney a, ray a mازلəkaya telelen ta mahwal meeber e, magəlkaya maazəma. Mey-slam hay nga mahwal nga berney a na, ata kuraw a ray a cew. Maslan hay kuraw a ray a cew fa jədmata mey-slam hay a. Asaya, mezəley nga səkway nga *Israyel kuraw a ray a cew mawuzlalatakaya pal pal fa mey-slam hay a. ¹³ Mahwal nga berney a na, ata dey məfad. Yaw, ta dey məfad ata na, mey-slam hay maakar maakar daha. ¹⁴ Vərza nga mahwal a na, makakaya ta anğwa hay mahura mahura kuraw a ray a cew. Mezəley nga ndəhay meslərey nga Bəz-təbaŋ mawuzlalatakaya pal pal fa anğwa hay a.

¹⁵ Maslan nga Gazlavay masa maa guzlya heyey na, aa ta zlanday nga bərey magaza da har. Ara zlanday ma wey megəley nga cek hay. A da wa berney a, len mey-slam hay ta mahwal nga berney a may. ¹⁶ Mahwal nga berney a na, maləmkaya zedere, dey məfad ata rək-rak. Zazam nga berney a, a key kələmeeter gabal cew ta temere cew *. Megəley a may, ata letək. ¹⁷ Fa dəba ha, maslan heyey ta', a wa megəley nga mahwal nga berney a. Megəley a na, meeter kwakwar maasala a ray a maakwaw. A wa anda ndəhay ma wam cek hay mandaw mandaw. ¹⁸ Mahwal a na, maləmkaya ta anğwa mezəley «jaspa», ma wedey ŋgəl-ŋgəl. Berney a may, maləmkaya ta bərey magaza masa maaya ma wedey anda baŋgəra. ¹⁹ Vərza nga mahwal a na, mapakaya ta anğwa hay mekele mekele ma hədkey ba. Anğwa nga wurza ma pey ngeeme na, mezəley «jaspa». Anğwa nga dey cew e mezəley «safir», nga

21:9 21.9 15.1 **21:9** 21.9-22.5 Iz 54.1-17 **21:10** 21.10 17.3; Ez 40.2; Mt 4.8 **21:11** 21.11 21.18, 23; Iz 60.1-3, 19; Ez 43.2 **21:12** 21.12-13 7.5-8; MC 35.22-26; Mab 28.21; Ez 48.30-35 **21:14** 21.14 Heb 11.10; Ef 2.20 **21:15** 21.15 11.1; Ez 40.3 * **21:16** 21.16 kələmeeter gabal cew ta temere cew: Ta mey Gərek a ləvey, «a key stadiya gabal kuraw a ray a cew.» Lamba kuraw a ray a cew a wudey nga ləvey cek manjar nga zləbey. **21:16** 21.16 Ez 48.16-17 **21:18** 21.18-21 21.11; Iz 54.11-12; Ez 28.13

dey maakar a mezəley «agat», nga dey məfad a mezəley «emerat». ²⁰ Anɣwa nga dey zlam a mezəley «awnikis», nga dey maakwaw a, «sardəwan», nga dey maasala a, «kərizawlit», nga dey daanɣafad a, «beril», nga dey zlam-letek a, «tawpaz», nga dey kuraw a, «kərisawpəraz», nga dey kuraw a ray a letək e, «turkwaz», leŋ anɣwa nga dey kuraw a ray a cew e, mezəley «ametista» †. ²¹ Mey-slam hay kuraw a ray a cewete na, makatakaya ta anɣwa ma mbey kalah, kuled kuled anda bersle. Mey-slam pal na, makakaya ta anɣwa ha pal may. Bəwal mahura daa berney a na, makakaya ta bərey magaza masa maaya anda kwalaba masa ndaw a gwa a nəkey dey a dey lanɣar.

²² Daa berney a, yah, *Jan, ya ta hətar *Way-mekey-kwakwas nga Gazlavay daa ba, maja aa slam nga way a na, ara Bay Gazlavay, Gazlavay masa ta gədan ma fənta cek hay tabiya, leŋ Bəz-təbaŋ anɣa. ²³ Asaya, berney a, fa wudey pas ta kiya nga wadamawa a ray a daa saba, maja mewedey nga Gazlavay fa wada, Bəz-təbaŋ heyey na, fa wada berney a anda petərla. ²⁴ Səkway hay cəpa da bəla a da pəkam daa mewedey anɣa ha. Bay hay masa sləmay ata fa zəley, a da samawa ta cek ata hay masa maaya nɣadaa berney a.

²⁵ Mey-slam hay nga berney a, a da njam mawurtakaya hipas. Kwa ndaw fa da gərcata daa saba səlak, maja fetede he na, tavad a key daa saba. ²⁶ Ndəhay daa hwayak hay cəpa da bəla masa sləmay ata fa zəley a da handamərwa cek hay mekele mekele maaya hay nɣadaa berney a, amba a həslmar ray a Gazlavay. ²⁷ Ama kwa cek masa ta dəlay na, fa da mbəzey aa berney a daa ba. Asaya, ndəhay ma mbəzlam ta ndəhay ma kam cek hay maaya ba mekele mekele cəpa fa da mbəzam daa ba may. Ma da mbəzam na, si ndəhay masa mezəley ata hay mawuzlalatakaya daa dərewel nga ndəhay ma da hətam heter mendəvey ba, dərewel masa nga Bəz-təbaŋ heyey.

22

¹ Fa dəba ha, maslaŋ heyey a wuzdiwa wayam nga yam masa ma vəley heter mendəvey ba. Yam a kəlar kəlar, dey a hətey gurgwar a wurza, a bawa daa slam-menjeŋ nga Bay Gazlavay ta nga Bəz-təbaŋ. ² Yam a, a vevey da wuzlah bəwal nga berney heyey. Ta dey cewete nga wayam a na,

† **21:20** 21.20 Anɣwa hay a cəpa na, ara anɣwa hay maaya ma hədkam ba, mewedey ata wal wal. **21:22** 21.22 11.17 **21:23** 21.23 22.5; Iz 60.1-2, 19-20; 24.23 **21:24** 21.24 Ps 68.30; Iz 60.3 **21:25** 21.25-26 Iz 60.11 **21:27** 21.27 21.8; 22.15; Iz 35.8; 52.1; Ez 44.9; 1Kwr 6.9-10; 2Pi 3.13; dərewel nga ndəhay ma da hətam heter mendəvey ba: 3.5 **22:1** 22.1-2 21.6; Ez 47.1-12

wudez daha ma völey heter mendövey ba *, a yam baböza dey kuraw a ray a cew fa mevey. Anda kedé, a yam dey pal fa kiya. Gwaslaf nga wudez e, ara slalak masa ma mböldata ndöhay daa hwayak hay tabiya. ³ Daa berney a, cek hay masa Gazlavay ma nösta sem na, kwa pal daa ba sölak. Daha na, slam-menjey nga Bay Gazlavay ta nga Böz-töban, lej ndöhay ma ka slöra anğa hay fa namar ray. ⁴ Ndöhay a, a hötmar dey nga Gazlavay la. Asaya, Gazlavay a wuzlala mezöley anğa la fa dangay ata. ⁵ Daa berney a, tavad fa da key daa saba. Pas ta petörla hay na, slöra ata daa saba may, maja ara Bay Gazlavay ta ray anğa ma da wadata ndöhay da hwad a. A da wam da ray cek hay tabiya nga sarmataw.

Mey da ray Yesu ma da vöhma a böla

⁶ Cay, maslan nga Gazlavay heyey a lövya saya: «Mey hay tabiya masa kah ma cöndata kedé na, ara mey hay fara fara, kwa membörzley da hwad a daa ba sölak. Bay Gazlavay ta völar Mesöfney anğa la ngada ndöhay ma töla mey anğa, nga wuzdamara mey anğa. Ara anğa ma slödörwa maslan anğa nga wuzdatara cek masa ma da key ngada fa mey neködey a ma ka slöra anğa hay.»

⁷ Yesu a lövey: «Wam vaw, menjey neködey fedé, ya vöhma la. Maaya nga Gazlavay a sawa la a ray ndöhay ma töbmara mey hay daa derewel kedé, ara mey masa Gazlavay ma wuzdörwa da ray cek ma da key.»

⁸ Yah, ara yah, *Jan, ma cönda mey hay a kedé tabiya ta slömay adaw. Asaya, ara yah ma hötatar cek hay tabiya ma kam kedé ta dey adaw. Masa yah ma cönda mey a ta yah ma hötatar cek hay a cay na, ta', ya regedey fa mey nga maslan masa ma wuzdatiwa cek hay a kedé cöpa, amba ya hölma.

⁹ Daa ngene, a lövya: «Ka regedey fa mey adaw anda kedé na, maja me? Yah na, ndaw ma ka slöra nga Gazlavay anda kah ta mölmakw hay ma tölam mey nga Gazlavay, lej ndöhay siya hay ma töbmara mey daa derewel kedé aa mevel ata. Maaya ka regedey, ka dörey dangay na, ngada Gazlavay gway.»

¹⁰ Fa döba ha, maslan nga Gazlavay aa guzlya saya, a lövey: «Mey masa Gazlavay ma wuzdakawa, kah ma wuzlala aa derewel ngene na, ka da bada aa mevel akah ba, ama wuzdatara a ndöhay, maja cek hay masa mey hay a ma wuzdamatörwa ngene na, a kam la fiyaw. ¹¹ Anda

* **22:2** 22.2 wudez ma völey heter mendövey ba: Nöka MC 1.9; 3.22. **22:2** 22.2 21.21; wudez: 2.7 **22:3** 22.3 7.15; Jer 3.17 **22:4** 22.4 14.1; Ps 17.15; Mt 5.8 **22:5** 22.5 1.6; 21.23; Dan 7.18, 27 **22:6** 22.6 1.1; 10.7; 19.9; SNM 11.27-28; 13.1 **22:7** 22.7 3.11; 22.12, 20 **22:8** 22.8 1.9; 19.10 **22:10** 22.10 Dan 12.4

keɗe, ndəhay ma ka cek ta cəveɗ e ba na, ŋga kamara kəne cəŋga. Ndəhay ma kam cek maaya ba ma ka hwaray na, ŋga kamara kəne cəŋga. Yaw, ndəhay masa ma kam sləra maaya na, ŋga kamara kəne cəŋga. Asaya, ndəhay masa ma vəldamara ray ata ŋgada Gazlavay ma njam manjar mebərey na, ŋga njam kəne.»

¹² Cay, Yesu ta', aa guzley, a ləvey: «Wam vaw, maja menjey nekəɗey feɗe, ya vəhwa la. Ya da sawa ta cek da har, amba ya wurkara mawurbay ŋga ndaw a, ndaw a təɗe fa sləra masa aa ma ka. ¹³ Yah na, ndaw masa ŋgeeme, asaya yah ndaw madagway-dakw. Yah ndaw ma katərwa cek hay tabiya, asaya, yah ma ndəvdata.»

¹⁴ Maaya ŋga Gazlavay a sawa la a ray ndəhay masa ma pərmata zana ata hay. Ata na, ata ta cəveɗ ŋga mbəzey aa berney ŋga Gazlavay ta daa mey-slam hay ŋga mahwal ŋga berney a. Asaya, ata ta cəveɗ ŋga zəmey babəza ŋga wudez ma vəley heter mendəvey ba. ¹⁵ Yaw, ndəhay ma kam cek maaya ba ma ka hwaray, ndəhay ma kam maazla maaya ba hay leŋ ndəhay ma lam vaw saw da palah na, fa da mbəzam aa berney a daa ba səlak. Asaya, ndəhay masa ma kəɗam ndaw vagay, ndəhay ma ta kuley hay, leŋ ndəhay ma mbərzlam mandaw mandaw na, a da njam daa ambaw, fa da mbəzam daa ba may.

¹⁶ «Yah, Yesu, ya ta slərdərwa maslaŋ aɗaw la ŋga wuzdatara mey a keɗe ŋgada ndəhay daa mecəmey-ray hay ŋga ndəhay aɗaw hay. Yah na, ndaw ma yawa daa səkway ŋga Bay *Davit. Yah, batay ma weɗey njuzl a ta slam ŋga pərek.»

¹⁷ Ata *Mesəfney ŋga Gazlavay ta kwakwa mawiya heyey a ləvmar a Yesu: «Vəhwa.»

Akwar masa ma jəkam sləmay fa mey hay a keɗe, si ka ləvmar may: «Vəhwa.»

Yaw, ndəhay masa yam fa katar, ŋga samawa ŋga sam yam. Kwa waawa ma wudey ŋga sey yam na, ŋga sey yam ma vəley heter mendəvey ba ŋga maaya.

Mendəvey ŋga mey hay a

¹⁸ Yah, *Jan, ya fa kətata ndəhay tabiya ma cəndamara mey masa Gazlavay ma wuzdərwa daa ɗerewel e keɗe: da ndaw ta pey mey mekele la a ray masa daa ɗerewel keɗe na, Gazlavay a da pa ndaw aha ŋga sərey banay anda

22:11 22.11 Iz 56.1; Ez 3.27; Dan 12.10 **22:12** 22.12 2.23; 6.10; 15.3; 16.5-6; 19.2, 11; 20.12-13; 22.7; Ps 28.4; MM 24.12; Jer 17.10; Mt 16.27 **22:13** 22.13 1.8 **22:14** 22.14 7.14; Ps 118.19-20; wudez: 22.2 **22:15** 22.15 21.27; Ef 5.5
22:16 22.16 1.1; 5.5; batay ma weɗey njuzl a ta slam ŋga pərek: 2.28; Mesl 24.17 **22:17** 22.17 21.2, 6

mawuzlalakaya daa dferewel e kefe heyey. ¹⁹ Yaw, da ndaw ta guhey mey a pal masa Gazlavay ma wuzdərwa daa dferewel e kefe la na, Gazlavay fa da vølar cøved nga zømey babøza nga wudez ma vøley heter mendøvey ba heyey daa ba sèlak, anda mawuzlalakaya daa dferewel e kefe. Asaya, ndaw aha fa da høtey cøved nga mbøzey aa berney nga Gazlavay kefe daa ba sèlak, anda mawuzlalakaya daa dferewel e kefe.

²⁰ Yesu, ndaw ma key sede fara fara ta cøved e da ray mey hay a kefe, aa guzley, a løvey: «Ahaw, ya fa vøhwa wure kefe.»

Amen. Yesu, Bay Mahura, sawa!

²¹ Anja maaya nga Bay Mahura Yesu nga njey ta ndøhay tabiya.